

परमेश्वरला बचन छार कबुल
Eastern Tamang New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

MAT.....	4
MRK.....	32
LUK.....	49
JHN.....	78
ACT.....	100
ROM.....	126
1CO.....	139
2CO.....	151
GAL.....	159
EPH.....	164
PHP.....	169
COL.....	173
1TH.....	177
2TH.....	180
1TI.....	182
2TI.....	186
TIT.....	189
PHM.....	191
HEB.....	193
JAS.....	203
1PE.....	207
2PE.....	211
1JN.....	214
2JN.....	218
3JN.....	219
JUD.....	220
REV.....	222

चु किताबला बारेरी पाड्ती:मा

येशूला मुल चेला मत्तीसे भिबा मुबा। थेदा लेवीएनोन भिमुबा (मर्कूस २:१४)।

एन्टीओखिया शहररी भिबा मुबा।

ओस्पन ईश्वी संवत् ७० (विक्रम संवत् १२७) सालरी भिबा मुबा। बाइबलला कोड कोड विद्वानगदेसे ईश्वी संवत् ८० (विक्रम संवत् १३५) साल भन्दा लिच्छा भिबा हिन्ना भिसी पाड्मुला। चु मिति मर्कूसला किताब भिबा भन्दा लिच्छाला हिन्ना। मत्तीला किताब भिबा धुडरी यरूशलेमरी मुबा परमेश्वरला मन्दिरदा रोमीगदेसे नाश लबा मुबा।

येशू थार्बा पिन्बा ग्ले हिन्ना भिसी उन्बाला लागिरी यहूदीगदेदा भिबा मुबा।

चु थार्बा पिन्बा समाचाररी डाच्छान पुइखला भिसी कबुल लबा थार्बा पिन्बा म्हे चा येशू हिन्ना भिसी पाड्बा मुला। ल्हानान डाच्छा परमेश्वरसे हाडला म्हे यहूदीगदेदा थार्बा पिन्बा म्हे पुइखला भिसी कबुल लबा मुबा। थे कबुल चा परमेश्वरसे येशूदा जम्बुलिडरी पुइखसी पूरा लजी। चु थार्बा पिन्बा समाचार यहूदी यहूलला म्हेगदेला लागिरी जे आहिन, जम्बुलिड नाडलान म्हेगदेला लागिरीएनोन हिन्ना।

चु थार्बा पिन्बा समाचाररी मत्तीसे जम्मान तामगदे मेलोसेन भिबा मुला। चु किताबरी येशू ख्रीष्ट न्हबाहेन्से सिबाग्याम सोबाधोनाला तामगदेला बारेरी पाड्बा मुला। चुरी येशू न्हबा ताम ओच्छे येशूला बप्तिस्मादेन शैतानसे येशूला सेम च्याबाला बारेरी पाड्बा मुला। थेहड लसीन गालील अञ्चलरी येशूसे परमेश्वरला यहूलसाला समाचार थे:ना लबादेन लोप्बा ओच्छे आखम्बा म्हेगदेदा खम्ना लबा तामगदेला बारेरीनोन पाड्बा मुला। थेहड लसीन येशू जम्मान म्हेला पापला सय फाबारी कुसरी सिबादेन सिबाग्याम सोबा तामला बारेरीनोन पाड्बा मुला।

चु थार्बा पिन्बा समाचारग्याम येशूदा परमेश्वरसे मोशादा पिन्बा ठिमदेन परमेश्वरला यहूलसाला बारेरी म्हेसे आघोबा तामगदे घोना लबा अधिकार याड्बा जम्मान भन्दा घेन गुरु हिन्ना भिसी उन्बा मुला।

मुल तामगदे

येशूला आखे म्हेमेगदेला मिनदेन येशू ख्रीष्ट न्हबा १:१-२:२३

बप्तिस्मा पिन्बा यूहन्नासे लबा गे ३:१-१२

येशूसे बप्तिस्मा किन्बादेन शैतानसे येशूदा फसब लबारी म्हाड्बा ३:१३-४:११

येशूसे गालील अञ्चलरी लबा गे ४:१२-१८:३५

येशू गालील अञ्चलहेन्से यरूशलेम शहरधोना फेप्बा १९:१-२०:३४

यरूशलेम शहररी येशूला गे थुम्बा धुड २१:१-२७:६६

येशूदा सिबाग्याम सोना लबादेन हाडला चेलागदेदेन छ्याम हुप तबा २८:१-२०

मत्तीसे भिबा थार्बा पिन्बा समाचार

येशूला आखे म्हेमे

लूका ३:२३-३८

1 चुरी भिबा म्हेला मिनगदे येशू ख्रीष्टला वंशला हिन्ना। येशू ख्रीष्ट दाऊदला वंशरी न्हबा हिन्ना, ओच्छे दाऊद अब्राहामला वंशरी न्हबा हिन्ना।

2 अब्राहामला झा इसहाक मुबा,

इसहाकला झा याकूब,

याकूबला झा यहूदादेन थेला ज्योज्यो आलेगदे मुबा।

3 यहूदाला झा फारेसदेन जाहेर मुबा।

थेनीगदेला आमा तामार मुबा,

फारेसला झा हेसोन,

हेसोनला झा आराम,

4 आरामला झा अम्मीनादाब,

अम्मीनादाबला झा नहशोन,

नहशोनला झा सल्मोन,

5 सल्मोनला झा बोअज मुबा, थेला आमा राहाब मुबा,
बोअजला झा ओबेद मुबा, थेला आमा रूथ मुबा,
ओबेदला झा यिशै,

6 यिशैला झा दाऊद ग्ले मुबा,

दाऊद ग्लेला सन्तान सोलोमन मुबा, सोलोमनला आमा चा डाच्छा उरियाहला मिड मुबा।

7 सोलोमनला झा रहबाम,

रहबामला झा अबिया,

अबियाला झा आश,

8 आशला झा यहोशापात,

यहोशापातला झा यहोराम,

यहोरामला झा उज्जियाह,

9 उज्जियाहला झा योताम,

योतामला झा आहाज,

आहाजला झा हिजकिया,

10 हिजकियाला झा मनश्शे,

मनश्शेला झा आमोन,
 आमोनला झा योशियाह,
 11 योशियाहला झा यकोनियासदेन थेला आलेगदेला आबा मुबा। थेनीगदे
 यहूदीगदेदा चुइसी बेबिलोन भिबा ग्लारी भोर्बा भन्दा डाच्छान न्हबा मुबा। †
 12 बेबिलोनरी भोर्माहेन्से
 यकोनियासला झा शालतिएल न्हजी,
 ओच्छे शालतिएलला झा यरुबाबेल,
 13 यरुबाबेलला झा अबिउद,
 अबिउदला झा एल्याकीम,
 एल्याकीमला झा आजोर,
 14 आजोरला झा सादोक,
 सादोकला झा आखिम,
 आखिमला झा एलिउद,
 15 एलिउदला झा एलाजार,
 एलाजारला झा मत्तान,
 मत्तानला झा याकूब,
 16 याकूबला झा योसेफ मुबा, योसेफसे मरियमदा ब्याह लजी।
 थेनोन मरियमग्याम येशू न्हजी, थेदा जम्मासेन थार्बा पिन्बा ख्रीष्ट भिसी
 भिला।
 17 चुहइ लसी अब्राहामहेन्से दाऊदधोना च्युक ब्लि पुस्ता मुबा, थेहइ
 लसीन दाऊदहेन्से यहूदीगदे बेबिलोनरी भोर्बा धुइधोना च्युक ब्लि पुस्ता
 मुबा, ओच्छे बेबिलोनरी भोर्बा धुइहेन्से थार्बा पिन्बा ख्रीष्ट न्हबा धुइधोना
 च्युक ब्लि पुस्ता मुबा।

येशू ख्रीष्ट न्हबा

लूका २:१-७

18 येशू ख्रीष्ट चुहइ लसी न्हजी, योसेफसे येशूला आमादा ब्याह लबारी
 ह्रीबा मुबा। तर थेनीगदेला ब्याह तबा भन्दा डाच्छान मरियम परमेश्वरला
 आत्माग्याम न्हसेला तबा मुबा। †19 तर थेला हेम्बो योसेफ परमेश्वरला
 डाच्छा ज्यबा म्हे तबासे लमा थेदा म्हेला ओन्छाडरी पे:ना थालगै भिसी
 खालैसे था आयाइना लसी खलाबा सेम लजी।

20 चु ताम म्हन्बान लमा योसेफ छुप निजी, जमाहेन्से म्हाडरी थे मुबा
 ग्लारी परमप्रभुला दूत खसी थेदा “दाऊद ग्लेला सन्तान योसेफ, ए
 मरियमदेन ब्याह लबारी थालोज्ञो। तिगदा भिसम थे परमेश्वरला आत्माग्याम
 न्हसेला तबा हिन्ना। 21 थेसे झा गिक न्हला, एसे थेला मिन येशू † थान्गी।
 तिगदा भिसम थेसे हाडला म्हेगदेदा थेनीगदेला पापग्याम थार्ना लला” भिसी
 भिजी। †

22 परमप्रभुसे अगमवक्ताग्याम सुइबा बचन पूरा तगै भिसीन चु जम्मान
 तबा हिन्ना। 23 “च्यागो, ब्याह आलबा म्रिडकोला गिक न्हसेला तला ओच्छे
 थेसे झा न्हला, थेला मिन इम्मानुएल भिसी थान्ना,” इम्मानुएल भिबा चा
 “परमेश्वर य्हाडदेन छ्याम” भिबा हिन्ना। †

24 योसेफ छोर्माहेन्से परमप्रभुला दूतसे पाइबा हइ थेसे मरियमदा ब्याह
 लजी। 25 तर मरियमसे कोला आन्हतेधोना योसेफ मरियमदेन छ्याम
 आम्हेर्नी। मरियमसे कोला न्हमाहेन्से योसेफसे कोलाला मिन येशू थान्जी।
 ††

ज्योतिषीगदे येशूदा इयाल्बारी खबा

2 हेरोद ग्लेला धुइरी यहूदिया अञ्चलला बेथलेहेम भिबा नाम्सारी येशू
 न्हजी। जमाहेन्से स्यारला ज्योतिषीगदे यरूशलेमरी खजी, ओच्छे
 थेनीगदेसे, 2 “यहूदीगदेला ग्ले दोसी न्हबा कोला खानड मुला? तिगदा भिसम
 डन्से स्याररी थे न्हजी भिसी उन्बा सार म्राइजी। थेतबासेलमा डनी थेदा
 इयाल्बारी खबा हिन्ना” भिसी भिजी।

† 1:11 २ राजा २४:१५; २ इति ३६:१०; यर्मि २७:२० †† 1:18 लूका १:२७ †
 “येशू” भिबाला अर्थ चा परमप्रभुसे थार्ना लला भिबा हिन्ना। †† 1:21 लूका १:३१

‡ 1:23 यशै ७:१४ ††† 1:25 लूका २:२१

3 चु ताम थे:माहेन्से हेरोद ग्लेदेन यरूशलेमरी मुबा जम्मान म्हेगदेदा
 ल्हानान सुर्दा तजी। 4 जमाहेन्से हेरोद ग्लेसे परमेश्वरला मन्दिररी पूजा लबा
 मुल म्हेगदेदेन यहूदी धर्मगुरुगदे जम्मादान ग्ला गिकरी इयोइसी “थार्बा
 पिन्बा ख्रीष्ट खानड न्हला भिसी पाइबा मुला?” भिसी इयोइबा छार्बा
 लजी। 5 थेनीगदेसे हेरोद ग्लेदा “यहूदियाला बेथलेहेम भिबा नाम्सारी न्हला
 भिसी पाइबा मुला, तिगदा भिसम अगमवक्तासे चुहइ लसी भिबा मुला,
 6 ‘यहूदिया अञ्चलरी मुबा बेथलेहेम
 नाम्सा जजा मुसैनोन घेन तला,
 तिगदा भिसम बेथलेहेमग्याम शासन लबा म्हे गिक थोन्ना,
 थेसे डाला म्हे इस्राएलीगदेदा वास्ता लला’ भिसी भिजी।” †††
 7 जमाहेन्से हेरोदसे थे ज्योतिषीगदेदा जे सुदुक्क इयोइसी सार खाइमा
 म्राइबा हिन्ना, भिसी इयोइबा छार्बा लजी। ओच्छे थेनीगदेग्याम सार म्राइबा
 धुइ था याइजी। 8 जमाहेन्से थेसे थेनीगदेदा “निउ, ओच्छे थे कोलादा ज्यना
 लसी म्हाइगो। थेदा स्याप्पेछ्याम डादा पाङ्गो, डाएनोन थेदा इयाल्बारी
 निला” भिसी बेथलेहेमरी पुइजी।
 9 ग्लेला ताम थे:सी थेनीगदे थेंग्याम निजी। थेनीगदेसे डाच्छा स्याररी
 म्राइबा सार दो:सी थेनीगदेला डाच्छा डाच्छा निजी, ओच्छे लैनु येशू मुबा
 ग्लारी धोमाहेन्से थे सार अडेब तजी। 10 थे सार म्राइवाहेन्से थेनीगदे ल्हानान
 ताइजी। 11 दिम न्हडरी वाङ्गा थेनीगदेसे लैनु येशूदा थेला आमा मरियमदेन
 छ्याम म्राइजी, जमाहेन्से थेनीगदेसे येशूदा प्या लसी हाड हाडला बाकस
 ठोइसी म्हर, ज्यबा बास्ना खबा धूपदेन मूर् भिबा महँगो अत्तर भसी फुलजी।
 12 ओच्छे म्हाडरी परमेश्वरसे थेनीगदेदा हेरोद मुबा ग्लारी थानिउ भिबासे
 लमा थेनीगदे अर्गुन ग्यामसे हाडला य्हुल्सारी निजी।

लैनु येशूदा मिश्र य्हुल्सारी भोर्बा

13 ज्योतिषीगदे निमाहेन्से, परमप्रभुला दूत गिक म्हाडरी योसेफ मुबा
 ग्लारी खजी, ओच्छे थेसे योसेफदा “योसेफ, ए रे:सी लैनु कोलादेन थेला
 आमादा भोर्सी मिश्र य्हुल्सारी निउ। ओच्छे डाइ एदा दो:सी खउ भिसी
 आपाइतेधोना एनीगदे थेरीन चिउ। तिगदा भिसम हेरोदसे लैनु कोलादा
 साइबारी म्हाइबा मुला” भिसी भिजी। 14 जमाकुनु म्हुनडनोन रे:सी थेसे लैनु
 कोलादेन थेला आमादा भोर्सी मिश्र य्हुल्सारी निजी। 15 ओच्छे हेरोद
 आसितेधोना थेनीगदे थेरीन चिजी। चुहइ लसी परमप्रभुसे अगमवक्ताग्याम
 “डाइ डाला झादा मिश्र य्हुल्साग्याम इयोइबा मुला” भिसी सुइबा बचन पूरा
 तबारी हिन्ना। †

हेरोद ग्लेसे जजा कोलागदेदा साइपुइबा

16 जमाहेन्से हाडदा ज्योतिषीगदेसे झुक्काब लजीम भिबा था याइसी
 हेरोद ल्हानान बोमो खजी। ओच्छे थेसे ज्योतिषीगदेग्याम था याइबा धुइ
 अन्धार बेथलेहेम नाम्सादेन क्यारक्युर मुबा न्ही दिडधोनाला जम्मान
 कोलागदेदा साइपुइजी। 17 जमाहेन्से यर्मिया अगमवक्तासे पाइबा ताम पूरा
 तजी,

18 “रामा भिबा ग्लारी क्राबा क्रिइबा लबा थे:जी,
 राहेल हाडला कोलागदेला लागिरी क्राबान मुबा।
 थेदा जम्मासेन सम्झब लसैनोन क्राबा आखलानी।
 तिगदा भिसम थेला कोलागदे साइसी जिन्बा मुबा।” ††

योसेफदेन मरियम मिश्र य्हुल्साग्याम दो:बा

19 ओच्छे हेरोद सिमाहेन्से, मिश्र य्हुल्सारी परमप्रभुला दूत गिक म्हाडरी
 योसेफ मुबा ग्लारी खजी, ओच्छे थेदा स्वर्गदूतसे, 20 “योसेफ, ए रे:सी लैनु
 कोलादेन थेला आमादा इस्राएल य्हुल्सारी भोर्सी निउ। तिगदा भिसम लैनु
 कोलादा साइबारी म्हाइबा म्हेगदे जम्मान सिसी जिन्बा मुला” भिसी भिजी।

21 जमाहेन्से थे रे:सी लैनु कोलादेन थेला आमादा इस्राएल य्हुल्सारी भोर्सी
 निजी। 22 तर यहूदियारी हेरोदला झा अखिलाउस ग्ले दोबा मुला भिबा थे:सी
 थेनीगदे थेरी निबारी लोइजी। थेतबासेलमा दो:सी परमेश्वरसे थेदा म्हाडरी

‡‡ 2:6 मीका ५:२ § 2:15 होशे ११:१ §† 2:18 यर्मि ३१:१५

पाड्बा अन्धार गालील अज्वलला नासरत भिबा नाम्सारी निसी चिजी।
चुहड लसी “थेदा नासरी भिला” भिसी अगमवक्तागदेग्याम पाड्बा ताम पूरा
तजी। †

बत्तिस्मा पिन्बा यूहन्नासे थे:ना लबा परमेश्वरला यहुल्साला समाचार
मर्कूस १:१-८; लूका ३:१-१८; यूहन्ना १:१९-२८

3 ल्हानान दिड लिच्छा बत्तिस्मा पिन्बा यूहन्ना यहूदिया अज्वलला
तोडतोडबा ग्लारी खसी चुहड भिसी पाड्बारी छ्याइजी, 2 “हाड
हाडला पाप ख्लासी परमेश्वरपट्टि दो:गो, तिगदा भिसम स्वर्गला यहुल्सा खसी
जिन्बा मुला।” †3 यशैया अगमवक्तासे चुनोन यूहन्नाला बारेरी चुहड भिसी
पाड्बा मुला,

“तोडतोडबा ग्लारीक्यार परमप्रभुला ग्याम तयार लउ,
ओच्छे ‘परमप्रभु भ्रबाला लागिरी थेला ग्याम सोजो स्होउ,’
भिसी म्हि गिक क्रिड्बा मुला।” †

4 यूहन्नासे ऊँटला क्राला क्वान क्वान्मुबा, ओच्छे ढिला पेटी खीमुबा। थेसे
तिरीदेन हि सिडसोरला खुदु चमुबा। †5 यरूशलेम शहरदेन यहूदिया अज्वल
ओच्छे यर्दन स्योडला क्यारक्युरला जम्मान ग्लाला म्हिगदे थे मुबा ग्लारी
खजी। 6 ओच्छे हाड हाडला पाप ख्लासी थेग्याम यर्दन स्योडरी बत्तिस्मा
किन्जी।

7 तर फरिसीगदेदेन सदुकीगदे न्हडला ल्हानान म्हिगदे बत्तिस्मा किन्बारी
खबान लबा म्राड्सी थेसे थेनीगदेदा “पुख्रीला कोलागदे, एनीगदेदा
परमेश्वरला बोमोग्याम स्योरम्याड्ला भिसी खाल्से भिजी? †8 थेतबासेलमा
हाड हाडला पाप ख्लासी परमेश्वरपट्टि दो:बा अन्धारला गे लउ। 9 एनीगदेसे
डाला ताम ड्यान्गो, एनीगदेसे ‘डनी अब्राहामला सन्तान हिन्ना’ भिदेमा
परमेश्वरला सजायग्याम स्योरम्याड्ला भिसी थाम्हन्गो। तिगदा भिसम
परमेश्वरसे अब्राहामला लागिरी चु युडबागदेग्यामसेनोन कोलागदे स्होबारी
खम्ला। †10 च्यागो, दोड थाबारी तरी थीसी जिन्बा मुला। थेतबासेलमा
ज्यबा रो आरोबा जम्मान दोड टाहेन्सेन थासी मेरी भ्याड्ला। †

11 “डाइ चा एनीगदेसे हाड हाडला पाप ख्लासी परमेश्वरपट्टि दो:जी
भिसी क्युइसे बत्तिस्मा पिन्ना। तर डा भन्दा लिच्छा फेक्खबासे एनीगदेदा
परमेश्वरला आत्मादेन मेसे बत्तिस्मा पिन्ना। थे डा भन्दा शक्तिशाली मुला।
ओच्छे डा थेला लखम पुडबाधोनाला सुतै आरे। 12 ग्वा यहाप्बा नाखले थेलान
छ्यारी मुला, दाहेन्से ग्वा ज्यना लसी यहाप्सी ग्वा जति भकारीरी थान्ना
ओच्छे पोलोवा जति खाइमै आसिबा मेरी खाड्ला।”

येशूसे बत्तिस्मा किन्बा
मर्कूस १:९-११; लूका ३:२१-२२

13 जमाहेन्से येशूएनोन यूहन्ना ग्याम बत्तिस्मा किन्बारी गालील
अज्वलग्याम यर्दन स्योडरी फेक्खजी। 14 तर यूहन्नासे थेदा “डाइ चा
हाडग्याम बत्तिस्मा किन्तो:बा मुला, तिगदा हाड चा डा मुबा ग्लारी
फेक्खबा?” भिसी रोकब लबारी म्हाइजी।

15 तर येशूसे थेदा “दान्देदा चुहडनोन तगै। तिगदा भिसम परमेश्वरसे
म्हन्बा ताम पूरा लबारी यहाडसे चुहडनोन लतो:ला” भिसी सुड्जी।
जमाहेन्से यूहन्नासे येशूदा बत्तिस्मा पिन्जी। 16 ओच्छे येशूसे बत्तिस्मा
किन्सी क्युइग्याम पाखारी थोन्मैछ्याम थेसे स्वर्ग ठोड्सी परमेश्वरला आत्मा
ढुकुर हड लसी फाप्सी हाडथोरी फेक्खबान लबा म्राड्जी। 17 जमाहेन्से
स्वर्गग्याम “चु डाइ सेमहेन्सेन माया लबा डाला झा हिन्ना, चुदा म्राड्सी डा
ल्हानान ताड्बा मुला” भिबा काइ खजी। †

येशूदा फसब लबारी म्हाइबा
मर्कूस १:२२-२३; लूका ४:१-१३

4 जमाहेन्से परमेश्वरला आत्मासे शैतानग्याम सेम च्याबारी येशूदा
तोडतोडबा ग्लारी भोजी। †12 थेरी बोगल न्ही धिनधोना येशूसे धिन
म्हूननोन तिगै आसोल्नी। थेतबासेलमा थेदा ल्हानान फोखेन्जी। 3 जमाहेन्से

† 2:22-23 लूका २:३९; यूह १:४५ †† 3:2 मत्ती ४:१७; मर्कू १:१५ † 3:3
यशै ४०:३ †† 3:4 २ राजा १:८ †† 3:7 मत्ती १२:३४; २३:३३ ††† 3:9 यूह

शैतान येशू मुबा ग्लारी खसी “हाड परमेश्वरला झा हिन्सम चु युडबागदेदा
गेड दोगो भिसी सुड्जी” भिसी भिजी।

4 तर येशूसे “गेडसे जे म्हि आसो, तर परमेश्वरला सुड्ग्याम थोन्बा
जम्मान बचनसे सोबारी खम्ला भिसी परमेश्वरला बचनरी भिबा मुला” भिसी
सुड्जी। ††

5 जमाहेन्से शैतानसे येशूदा परमेश्वरला शहर यरूशलेमरी भोर्सी
परमेश्वरला मन्दिरला थोबोरी राप्पुड्जी। 6 ओच्छे थेसे येशूदा “हाड
परमेश्वरला झा हिन्सम चुग्याम मार छ्योङ्गो। तिगदा भिसम बचनरी चुहड
भिसी भिबा मुला,

‘परमेश्वरसे हाडदा चुड्बाला लागिरी हाडला स्वर्गदूतगदेदा कुल्ला।
ओच्छे एला काड युडबारी थाठोकौ भिसी एदा
थेनीगदेसे या यारीन ताला’ भिसी भिजी।” †

7 येशूसे थेदा “बचनरी चुहड लसी भिबा मुला, ‘एसे हाडला परमप्रभु
परमेश्वरला सेम च्याबा गे तिगै थालउ’” भिसी सुड्जी। ††

8 दो:सी शैतानसे येशूदा नोबा गड गिकरी भोर्सी जम्बुलिडला जम्मान
यहुल्सागदेदेन जम्मान ज्यबा सहेगदे उन्जी। 9 ओच्छे “हाडसे डादा प्या लसी
तेन्जी भिसम चु जम्मान यहुल्सा डाइ हाडदा पिन्ना” भिसी भिजी।

10 जमाहेन्से येशूसे थेदा “शैतान, ए चुग्याम तुरुन्तन निउ! तिगदा भिसम
बचनरी ‘एसे हाडला परमप्रभु परमेश्वरदा प्या लउ, ओच्छे थेदा जे तेन्गो’
भिसी भिबा मुला” भिसी सुड्जी। †

11 जमाहेन्से शैतानसे येशूदा ख्लासी निजी ओच्छे स्वर्गदूतगदे खसी येशूदा
क्योड्जी।

येशूसे परमेश्वरला यहुल्साला समाचार थे:ना लबा
मर्कूस १:१४-१५; लूका ४:१४-१५

12 यूहन्ना इयाल्खनारी परब तजी भिबा थे:सी येशू दो:सी गालील
अज्वलरी फेक्खी। †13 ओच्छे नासरत भिबा ग्लारी आफेजा कफर्नहुम
शहररी धन्छ्याबारी फेक्खी। चु शहर गालील समुन्द्रला कुनीरी मुबा, चु शहर
चा जबूलूनदेन नप्ताली भिबा यहुलला म्हिगदे चिबा जिल्लारी परब तमुबा।

††14 चुहड लसी यशैया अगमवक्तासे पाड्बा ताम पूरा तजी,

15 “जबूलूनदेन नप्तालीला जिल्लारी यर्दन क्याम्सड,
समुन्द्रला कुनीरी, यर्दन क्याम्सड, गालीलरी चिबा अर्गु यहुलला म्हिगदे
16 ओच्छे धोपधोपरी चिबा म्हिगदेसे ग्रेन यहालदा म्राड्बा मुला। ††

थेहड लसीन कालला धोपधोपरी मुबा म्हिगदेला गुडरी थे यहाल फे:बा
मुला।”

17 थे धुइहेन्से येशूसे “एनीगदेसे हाड हाडला पाप ख्लासी परमेश्वरपट्टि
दो:गो, तिगदा भिसम स्वर्गला यहुल्सा खसी जिन्बा मुला” भिसी म्हिगदेदा
सुड्बारी छ्याइजी।

येशूसे डाच्छा स्होबा चेलागदे
मर्कूस १:१६-२०; लूका ५:१-११

18 येशू गालील समुन्द्रला कुनीन कुनी फेक्खान लमा पत्रुस भिबा सिमोनदेन
थेला आले अन्द्रियासदा तार्डा साइबारी समुन्द्ररी घ्याड क्लाड्बान लबा
म्राड्जी। तिगदा भिसम थेनीगदे तार्डा साइबा म्हिगदे मुबा। 19 येशूसे
थेनीगदेदा “डादेन छ्याम भ्रउ, दाहेन्से डाइ एनीगदेदा तार्डा चुड्बा म्हि
आहिन, तर म्हिगदेदा परमेश्वर मुबा ग्लारी भबा म्हि स्होला” भिसी सुड्जी।
20 येशूसे थेहड सुड्छ्याम, हाडला घ्याड ख्लासी थेनीगदे येशूदेन छ्याम
भ्रजी।

21 थेग्याम फेक्खान लमा येशूसे जब्दियाला झागदे याकूबदेन थेला आले
यूहन्नादा म्राड्जी। थेनीगदे हाडला आबादेन छ्याम दौंगारी घ्याड राबान
मुबा। येशूसे थेनीगदेदाएनोन इयोइजी। 22 येशूसे चुहड सुड्छ्याम थेनीगदे
दौंगदेन आबादा ख्लासी येशूदेन छ्याम भ्रजी।

८:३३ ††† 3:10 मत्ती ७:१९ § 3:17 भजन २:७; यशै ४२:१; मत्ती १२:१८;
१७:५ §† 4:1 हिब्रू २:१८; ४:१५ §†† 4:4 व्यव ८:३ §† 4:6 भजन ११:११-१२
§†† 4:7 व्यव ६:१६ §† 4:10 व्यव ६:१३ §† 4:12 मत्ती १४:३; मर्कू ६:१७;
लूका ३:१९-२० §§† 4:13 यूह २:१२ §§† 4:16 यशै ९:१-२

येशूसे आखम्बा म्हिगदेदा खम्ना लबा
लूका ६:१७-१९

23 येशू गालील अञ्चलला जम्मान ग्लारी फेप्सी यहूदीगदे हुप तबा दिमरी म्हिगदेदा लोप्यान परमेश्वरला खुल्साला समाचार थे:ना लजी। ओच्छे ल्हानान थरीला रोगसे स्याप्यादेन आखम्बा म्हिगदेदा खम्ना लजी।
†24 जमाहेन्से सिरिया खुल्सा नाडनोन येशूला बारेरी थे:जी। ओच्छे म्हिगदेसे ल्हानान थरीला रोगसे स्याप्सी दुख याड्बागदे, म्हडसे स्याप्यागदे, सह म्हडसे स्याप्यागदेदेन काड या चलब आतबा कुज्या म्हिगदेदा येशू मुबा ग्लारी भजी। जमाहेन्से येशूसे थेनीगदेदा खम्ना लजी। 25 ओच्छे गालील, डेकापोलिस, यरूशलेम, यहूदियादेन यर्दन क्याम्सडहेन्सेला ल्हानान म्हिगदे येशूदेन छ्याम भजी।

येशूसे म्हिगदेदा लोप्या
लूका ६:२०-२३

5 ल्हानान म्हिगदे खबा म्राड्सी येशू गडरी फेप्सी धन्ख्याजी। जमाहेन्से चेलागदेएनोन येशूला क्युसीन चिजी। 2 ओच्छे येशूसे थेनीगदेदा चुहड् भिसी लोप्यारी छ्याड्जी,

3 “परमेश्वरथोरी जे आश लबागदेसे † परमेश्वरग्याम मोलम याड्ला, तिगदा भिसम स्वर्गला खुल्सा थेनीगदेदान हिन्ना।
4 सेम क्राबागदेसे परमेश्वरग्याम मोलम याड्ला तिगदा भिसम थेनीगदेदा परमेश्वरसे ताड्ना लला। †
5 सोजो म्हिगदेसे परमेश्वरग्याम मोलम याड्ला, तिगदा भिसम थेनीगदेसे जम्बुलिडला अधिकार याड्ला। †
6 परमेश्वरसे म्हन्बा अन्धार भ्रबारी म्हाड्बागदेसे परमेश्वरग्याम मोलम याड्ला, तिगदा भिसम परमेश्वरसे थेनीगदेदा भड पिन्ना। †
7 स्थान्दोदा दया लबागदेसे परमेश्वरग्याम मोलम याड्ला, तिगदा भिसम थेनीगदेसे दया याड्ला।
8 ज्यबा सेम थोबागदेसे परमेश्वरग्याम मोलम याड्ला, तिगदा भिसम थेनीगदेसे परमेश्वरदा म्राड्ला। ††
9 स्थान्दोदा ढिक्ना लबागदेसे परमेश्वरग्याम मोलम याड्ला, तिगदा भिसम थेनीगदे परमेश्वरला झा दोला।
10 म्हिगदेसे दुख पिन्सैनोन परमेश्वरसे म्हन्बा अन्धार भ्रबागदेसे परमेश्वरग्याम मोलम याड्ला, तिगदा भिसम स्वर्गला खुल्सा थेनीगदेदान हिन्ना। ††

11 “डादा विश्वास लबासे लमा म्हिगदेसे एनीगदेदा खिसी लला, दुख पिन्ना, ओच्छे लुसीला ताम पाड्सी एनीगदेला बिरोधरी जम्मान नडबा ताम लमैनोन एनीगदेसे परमेश्वरग्याम मोलम याड्ला। §12 तसैनोन एनीगदे ल्हानान ताड्जी, तिगदा भिसम स्वर्गरी एनीगदेसे घ्रेन इनाम याड्ला। एनीगदे भन्दा डाच्छाला अगमवक्तागदेदाएनोन थेनीगदेसे चुहड् लसीन दुख पिन्मुबा। †

चजा हड् तबा
मर्कूस ९:५०; लूका १४:३४-३५

13 “एनीगदे जम्बुलिडला चजा हड्बान हिन्ना, तर चजाला डम्बा रहे म्हाजी भिसम दो:सी तिगसे डम्ना लबा? गे आखेल्बासे लमा म्हिसे थेदा थ्याड्ला, जमाहेन्से म्हिसे नाड्सी भ्रला। ††

14 “गडरी मुबा शहरदा जम्मासेन म्राड्बा हड् लसी एनीगदेएनोन जम्बुलिडला नाडसल तबासे लमा जम्मासेन म्राड्ला। §15 म्हिगदेसे नाडसल म्रासी फामसे घप्पी आथान, तर दिमरी मुबा जम्मान म्हिगदेसे म्राड्डी भिसी

† 4:23 मत्ती ९:३५; मर्कू १:३९ †† “परमेश्वरथोरी जे आश लबागदेसे” भिबा तामदा ग्रीक बाइबलरी आत्मारी प्राड्बो भिसी भिबा मुला। † 5:4 यशै ६१:२-३ † 5:5 भजन ३७:११ † 5:6 यशै ५५:१-२ †† 5:8 भजन २४:३-४ †† 5:10 † पत्रु ३:१४ § 5:11 † पत्रु ४:१४ † 5:12 † इति ३६:१६; मुल ७:५२ †† 5:13 मर्कू ९:५० § 5:14 यूह ८:१२; ९:५

नोबा ग्लारी थान्ना। §16 चुहड् लसी नाडसलसे थाल तना लबा हड् लसी एनीगदेसे ज्यबा गे लसी उन्गो। एनीगदेला गे म्राड्सी थेनीगदेसे स्वर्गरी धन्ख्याबा एनीगदेला परमेश्वर आबाला जयजयकार लगै। †

परमेश्वरसे मोशादा पिन्बा ठिम अन्धार भ्रबा

17 “डा परमेश्वरसे मोशादा पिन्बा ठिमदेन अगमवक्तागदेसे पाड्बा ताम थ्याड्बारी आहिन, तर थे पूरा लबारी खबा हिन्ना। 18 एनीगदेसे डाला ताम ड्यान्गो, तिगदा भिसम मुदेन जम्बुलिड नाश आततेधोना परमेश्वरसे मोशादा पिन्बा ठिमरी मुबा हिगी गिकनोन आम्हा। §19 थेतबासेलमा जुन म्हिसे ठिमरी मुबा तामगदे न्हडला जम्मान भन्दा जजा तामदा आड्यान्ना म्हिगदेदाएनोन थेहड्बानोन लपुड्जी भिसम थे म्हि स्वर्गला खुल्सारी जम्मान भन्दा जजा तला। तर जुन म्हिसे ठिमरी मुबा तामगदे ड्यान्सी म्हिगदेदा थेहड्बानोन लपुड्ला थे म्हि स्वर्गला खुल्सारी जम्मान भन्दा घ्रेन म्हि तला। 20 एनीगदेसे डाला ताम ड्यान्गो, तिगदा भिसम एनीगदेसे यहूदी धर्मगुरुगदेदेन फरिसीगदेसे भन्दा ज्यना लसी परमेश्वरसे म्हन्बा अन्धार आलनी भिसम तिगै लसीन एनीगदे स्वर्गला खुल्सारी वाड्आम्याड्।

बोमो लबारी आत भिसी लोप्या

21 “एसे म्हि थासाड्गो, जुन म्हिसे म्हि साड्ला थेसे सजाय याड्ला’ भिसी परमेश्वरसे मोशादा पिन्बा ठिमरी भिबा ताम एनीगदेसे थे:बा मुला। §22 तर एनीगदेसे डाला ताम ड्यान्गो, जुन म्हिसे खालैदा बोमो लला, थे म्हिसे सजाय याड्ला, ओच्छे खालैसे स्थान्दोदा हेला लजी भिसम थेदा अदालतरी भोर्ला। तर जुन म्हिसे स्थान्दोदा ‘ए गे आखेल्बा मूर्ख’ भिसी भिला थेदा नर्गला लोड्बा खबा मेरी युला।

23 “थेतबासेलमा परमेश्वरदा भेटी फुल्बा धुडरी एदेन छ्याम खालै म्हि बोमो खबा मुला भिबा ताम एसे ढन्जी भिसम, 24 एला भेटी परमेश्वरला मन्दिररी भेटी फुल्बा ग्लाला डाच्छापट्टि ख्लासी डाच्छा थे म्हिदेन छ्याम ढिक्मो, ओच्छे एसे ह्वाडला भेटी फुल्गो।

25 “एदा मुद्दा युबा म्हिदेन छ्याम अदालतरी निबान लबा धुडरी ग्यामरीन ढिक्मो। आहिन्सम थेसे एदा न्यायाधीशला यारी जिम्मा पिन्ना, ओच्छे न्यायाधीशसे सिपाहीगदेला यारी जिम्मा पिन्ना। जमाहेन्से ए ड्याल्खानरी परब तला। 26 एसे डाला सत्य ताम ड्यान्गो, एसे जम्मान टाड्गा आफातेधोना थेग्याम थोन्बारी आम्याड्।

सेमरी म्हन्बा नड्बा ताम

27 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘ए स्थान्दोला म्रिडदेन छ्याम ब्रेल्सी थाभ्रउ।’ §28 तर एनीगदेसे डाला ताम ड्यान्गो, जुन म्हिसे खालै म्रिडम्हेमेदा नड्बा सेमसे च्याला थेसे सेमरी थे म्रिडम्हेमेदेन छ्याम ब्रेल्सी जिन्बा तला। 29 चुदे एला दाहिने मीसे पाप लपुड्जी भिसम थे मी ते:सी थ्याड्गो। तिगदा भिसम एला पूरान लहुड् नर्गरी निबा भन्दा मी गिक ते:सी थ्याड्बान एला लागिरी ज्यबा तला। §30 थेहड् लसीन एदा दाहिने यासे पाप लपुड्जी भिसम थे या थासी थ्याड्गो। तिगदा भिसम एला पूरान लहुड् नर्गरी निबा भन्दा एला या गिक थासी थ्याड्बान एला लागिरी ज्यबा तला। 18

छोडपत्र

मर्कूस १०:११-१२; लूका १६:१८

31 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘जुन म्हिसे म्रिड खलाला थे म्हिसे छोडपत्रला कागज भ्रिसी पिन्ना।’ 1932 तर एनीगदेसे डाला ताम ड्यान्गो, जुन म्हिसे ह्वाडला म्रिडदा स्थान्दोदेन छ्याम ब्रेल्सी आभ्रसैनोन खलाला, थेसे ह्वाडला म्रिडदा

§† 5:15 मर्कू ४:२१; लूका ८:१६; ११:३३ † 5:16 † पत्रु २:१२ † 5:18 लूका १६:१७ † 5:21 प्रस्था २०:१३; व्यव ५:१७ † 5:27 प्रस्था २०:१४; व्यव ५:१८ † 5:29 मत्ती १८:९; मर्कू ९:४७ 18 5:30 मत्ती १८:८; मर्कू ९:४३ 19 5:31 व्यव २४:१-४; मत्ती १९:७; मर्कू १०:४

स्थान्दोदेन छ्याम ब्रेल्सी भ्रबा मिडम्हेमे स्होला। ओच्छे थे मिडम्हेमेदेन छ्याम जुन म्हिसे ब्याह लला थे एनीन ब्रेल्सी भ्रबा तला। †

घान थाफागो

33 “परमेश्वरसे मोशादा पिन्बा ठिमरी चुहड् भिसी भ्रिबा तामएनीन एनीगदेसे थे:बा मुला, ‘एसे लुसीला ताम लसी घान थाफागो, ओच्छे परमेश्वरदेन छ्याम लबा कबुल पूरा लउ।’ †34 तर एनीगदेसे डाला ताम इयान्गो, एनीगदेसे घान भिबा फानोन थाफागो, स्वर्गला मिनरी तसै, जम्बुलिडला मिनरी तसै एनीगदेसे घान थाफागो। तिगदा भिसम स्वर्ग परमेश्वर धन्छ्याबा ग्ला हिन्ना ओच्छे जम्बुलिड परमेश्वरला स्थाप न्हे:बा ग्ला हिन्ना, ओच्छे यरूशलेम शहर चा जम्मालान ग्ले परमेश्वरला शहर हिन्ना। †36 ओच्छे हाडला थोबोरी या थान्सी घान थाफागो। तिगदा भिसम एसे क्रा गिकदाएनीन म्लाड अथवा तार तना लबारी आखम।
37 थेतबासेलमा एनीगदेसे पाड्बा ताम चा ‘हिन्ना’ भिसम ‘हिन्ना,’ ‘आहिन’ भिसम ‘आहिन’ जे तगै। थे भन्दा ल्हाना ताम चा शैतानग्याम खबा हिन्ना।

बदला थाकिन्गो

लूका ६:२७-३६

38 “परमेश्वरसे मोशादा पिन्बा ठिमरी चुहड् भिसी भ्रिबा तामएनीन एनीगदेसे थे:बा मुला, ‘मीला बदला मी, ओच्छे स्वाला बदला स्वा किन्गो।’ †39 तर एनीगदेसे डाला ताम इयान्गो, एनीगदेदा बिरोध लबागदेदा एनीगदेसे बदला थाकिन्गो। बरु खालैसे एला दाहिने ग्रम्बारी तोजी भिसम अर्गुपट्टिला ग्रम्बाएनीन तासी पिन्गो। 40 खालै म्हिसे एदा बिरोध लसी मुद्दा लमा अदालतसे थेदा एला स्हुदम पिन्गो भिजी भिसम थेदा एसे घएनीन पिन्गो। 41 चुदे खालै म्हिसे एदा कोस गिकधोना भ्रउ भिसी कर लजी भिसम थेदेन छ्याम कोस न्हीधोना निउ। 42 खालैसे एदा हीजी भिसम पिन्गो ओच्छे एदा छे हीबा म्हिदाएनीन छे पिन्गो।

शत्रुदाएनीन माया लतो:बा

लूका ६:२७-२८, ३२-३६

43 “परमेश्वरसे मोशादा पिन्बा ठिमरी चुहड् भिसी भ्रिबा तामएनीन एनीगदेसे थे:बा मुला, ‘एसे हाडला खिम्जेमदा माया लउ, ओच्छे शत्रुदा हेला लउ।’ †44 तर एनीगदेसे डाला ताम इयान्गो, एनीगदेसे हाडला शत्रुगदेदा माया लउ, ओच्छे एनीगदेदा दुख पिन्बागदेला लागिरी प्रार्थना लउ। 45 चुहड् लजी भिसम एनीगदे स्वर्गरी धन्छ्याबा परमेश्वर आबाला कोलागदे दोला। परमेश्वरसे ज्यबा सेम थोबादेन नड्बा सेम थोबा न्हीलान लागिरी धिनी फेना लबा मुला। ओच्छे परमेश्वरला डाच्छापट्टि ज्यबा गे लबा म्हिदेन आज्यबा गे लबा म्हि न्हीलान लागिरी नाम ताइना लबा मुला। 46 चुदे एनीगदेदा माया लबादा जे एनीगदेसे माया लजी भिसम एनीगदेसे खाहड् लसी इनाम याड्ला? थेहड् मी तिरो दुड्बा म्हिगदेसेनोन आल? लमुला। 47 एनीगदेसे हाडला ज्योज्यो आलेगदेदा जे मान लजी भिसम स्थान्दोगदेसे भन्दा ज्यबा तिग लजी? थेहड् मी अर्गु स्हुलला म्हिगदेसेनोन आल? लमुला।
48 थेतबासेलमा एनीगदेला स्वर्गरी धन्छ्याबा परमेश्वर आबा खाहड्बा मुला, एनीगदेएनीन थेहड्बान दोगो।” †

एसे सुट्क पिन्गो

6 “एनीगदेसे लबा ज्यबा गेगदे म्हिगदेदा उन्बाला लागिरी भिसी थालउ। थेहड् लजी भिसम स्वर्गरी धन्छ्याबा एनीगदेला परमेश्वर आबासे एनीगदेदा तिगै इनाम आपिन। थेतबासेलमा होशियार तसी चिउ। †
2 “एनीगदेसे प्राडबोगदेदा पिन्बा धुडरी कप्टीगदेसे हड् लसी म्हिगदेदा थे:ना लसी थाभ्रउ। तिगदा भिसम थेनीगदे म्हिगदेसे मान लगै भिसी यहूदीगदे

† 5:32 मत्ती १९:९; १ कोर ७:१०-११ †† 5:33 लेवी १९:१२; गन्ती ३०:२; व्यव २३:२१ † 5:34-35 याकू ५:१२; यशै ६६:१; मत्ती २३:२२; भजन ४८:२ †† 5:38 प्रस्था २१:२४; लेवी २४:२०; व्यव १९:२१ †† 5:43 लेवी १९:१८ ††† 5:48 लेवी १९:२; व्यव १८:१३ ††† 6:1 मत्ती २३:५

हुप तबा दिमगदेदेन ग्यामरीक्यार निसी स्थान्दोदा थे:ना लसी भ्रमुला। च्यागो, एनीगदेसे डाला ताम इयान्गो, थेनीगदेसे याड्तो:बा इनाम याड्सी जिन्बा मुला। 3 तर एसे प्राडबोगदेदा पिन्बा धुडरी एला दाहिने यासे तिग लबान मुला थे ताम एला देब्रे यासेनोन था थायाङ्गै। 4 थेतबासेलमा एसे प्राडबोगदेदा पिन्बा स्हे खालैदा था आतगै। थेहड् लजी भिसम खालैसे था आयाड्बा तामएनीन था याड्बा परमेश्वर आबासे एदा इनाम पिन्ना।

येशूसे प्रार्थनाला बारेरी लोष्वा

लूका ११:२-४

5 “थेतबासेलमा एसे प्रार्थना लबा धुडरी कप्टीगदेसे हड् लसी थालउ। तिगदा भिसम थेहड्बा म्हिगदेसे म्हिगदेदा उन्बाला लागिरी यहूदीगदे हुप तबा दिमगदेदेन ग्यामला कुनीरीक्यार राप्सी प्रार्थना लबारी सेम लमुला। च्यागो, एनीगदेसे डाला ताम इयान्गो, थेहड्बा म्हिगदेसे याड्तो:बा इनाम याड्सी जिन्बा मुला। 6 तर ए प्रार्थना लबा धुडरी कोठा न्हडरी वाड्सी म्राप दुङ्गो, ओच्छे खालैसे आम्राड्बा ग्लारी धन्छ्याबा परमेश्वर आबादेन छ्याम प्रार्थना लउ। जमाहेसे खालैसे आम्राड्बा तामएनीन म्राड्बा परमेश्वर आबासे एदा इनाम पिन्ना। 7 ओच्छे प्रार्थना लमा अर्गु स्हुलला म्हिगदेसे हड् लसी ओहड्नीन थाकिङ्गो। तिगदा भिसम हेड्बा हेड्बा प्रार्थना लजी भिसम परमेश्वरसे थे:मुला भिसी थेनीगदेसे म्हुन्मुला। 8 थेतबासेलमा एनीगदे थेनीगदे हड्बा थादोगो। तिगदा भिसम एनीगदेसे हीबा भन्दा डाच्छान एनीगदेदा तिग तिग स्हे तो:बा मुला, थे एनीगदेला परमेश्वर आबादा था मुला।

9 “तर एनीगदेसे चा चुहड् लसी प्रार्थना लउ,

‘स्वर्गरी धन्छ्याबा उन्ना परमेश्वर आबा,
हाडदा † जम्मासेन मान लगै।

10 ओच्छे जम्मानथोरी हाडला शासन खगै,
ओच्छे हाडसे म्हुन्बा ताम स्वर्गरी पूरा तबा
हड्नीन चु जम्बुलिडरीनोन पूरा तगै।

11 डन्से धिन धिननोन चतो:बा स्हे डन्दा तिनी पिन्गो।

12 डन्से डन्दा बिरोध लसी पाप लबागदेदा

माफ लबा हड् लसी हाडसेनोन

डन्ना पाप माफ लसी पिन्गो।

13 ओच्छे डन्दा पापरी फसब तबा ग्यामरी भ्रआपुङ्गो,

तर शैतानग्याम फेसी थान्गो।

हाडला स्हुल्सादेन शक्ति ओच्छे हाडला मान

सदनना लागिरी हाडलान हिन्ना, आमैना।” ††

14 “एनीगदेदा बिरोध लसी पाप लबागदेदा एनीगदेसे माफ लजी भिसम स्वर्गरी धन्छ्याबा परमेश्वर आबासेनोन एनीगदेदा माफ लला। ††15 तर एनीगदेसे म्हिगदेदा माफ आलनी भिसम परमेश्वर आबासेनोन एनीगदेदा माफ आल।

फोइथान चिसी प्रार्थना लबा

16 “एनीगदेसे फोइथान चिसी प्रार्थना लबा धुडरी कप्टी म्हिगदेसे हड् लसी ली धोपधोप लसी थाभ्रउ। तिगदा भिसम थेनीगदेसे फोइथान चिसी प्रार्थना लबा म्हिगदेसे म्राङ्गै भिसी ली धोपधोप लसी भ्रमुला। थेतबासेलमा एनीगदेसे डाला ताम इयान्गो, थेनीगदेसे याड्तो:बा इनाम याड्सी जिन्बा मुला। 17 तर एनीगदेसे चा फोइथान चिसी प्रार्थना लबा धुडरी ली खूसी थोबोरी छ्युगु फोर्गो। 18 ओच्छे ए फोइथान चिसी प्रार्थना लबा म्हिगदेसे आहिन, तर खालैसे आम्राड्बा ग्लारी धन्छ्याबा परमेश्वर आबासे म्राङ्गै। ओच्छे खालैसे आम्राड्बा तामएनीन म्राड्बा परमेश्वर आबासे एदा इनाम पिन्ना।

§ 6:5 लूका १८:१०-१४ †† चु पदरी ग्रीक बाइबलरी “हाडला छानदा मान लगै” भिसी भ्रिबा मुला। तर मुल अर्थ चा परमेश्वरदा मान तगै भिबा हिन्ना। ††† “हाडला स्हुल्सादेन शक्ति ओच्छे हाडला मान सदनना लागिरी हाडलान हिन्ना, आमैना।” चु पदला ताम चा ल्हानान हड्बा ग्रीक बाइबलरी भ्रिबा आरे। †† 6:14 मर्कू ११:२५-२६

हाडला लागिरी स्वर्गरी धन सम्पत्ति सोसी थान्गो

लूका ११:३४-३६; १२:३३-३४; १६:१३

19 “हाडला लागिरी जम्बुलिडरी धन सम्पत्ति सोसी थाथान्गो, तिग्दा भिसम जम्बुलिडला धन सम्पत्तिगदे बुलुडदेन खियासे चला, ओच्छे दिम फोसी य्होगदेसे य्हो लसी भोर्ला। 20 बरु हाडला लागिरी स्वर्गरी धन सम्पत्ति सोसी थान्गो। तिग्दा भिसम थेरी बुलुडसेएनोन आच खियासेएनोन आच, ओच्छे य्होसेएनोन वाड्सी य्हो आल। 21 तिग्दा भिसम जुन ग्लारी एनीगदेला धन सम्पत्ति मुला, एनीगदेला सेमएनोन थेरीन तला।

22 “मी ल्हुडला लागिरी नाडसल हड्बान हिन्ना। थेतबासेलमा एला मी ज्यबा मुसम एसे ज्यना लसी म्राड्ला, 23 तर एला मी न्होड्जी भिसम एसे तिगै आम्राड्। थेहड् लसीन एला सेमला नाडसल सिजी भिसम एला लागिरी जम्मान धोपधोप तला। 24 “खालैसेनोन मालिक न्हीला गे लबारी आखम। तिग्दा भिसम थेसे गिकदा हेला लला, ओच्छे स्थान्दोदा माया लला। अथवा थेसे गिकसे भिबा ताम इयान्ना, ओच्छे स्थान्दोदा वास्तान आल। थेहड् लसीन एनीगदेसेनोन परमेश्वरदेन धन सम्पत्ति न्हीलान गे लबारी आखम।

धन्दा सुर्दा थालउ

लूका १२:२२-३१

25 “थेतबासेलमा एनीगदेसे डाला ताम इयान्गो, सोबाला लागिरी तिग चसे तिग थुड्से ओच्छे तिग क्वान्से भिसी धन्दा सुर्दा थालउ। तिग्दा भिसम चबा थुड्बादेन क्वान्बा भन्दा एनीगदेला प्राणदेन ल्हुड ग्रेन आहिन? 26 मुरी चरागदेदा च्यागो, थेनीगदेसे न्ह बलु द्बला, न्ह बाली दुड्सी पोप लला, तर स्वर्गरी धन्ड्याबा एनीगदेला परमेश्वर आबासेन थेनीगदेदा ख्वामुला। चरागदे भन्दा मी एनीगदे ग्रेन आहिन? 27 एनीगदे न्हडला खालैसे धन्दा सुर्दा लसी छिन्नडला लागिरी आयू काप्खम्ला?

28 “तिग्दा एनीगदेसे क्वान्ना लागिरी धन्दा सुर्दा लबा? द्विरी सार्बा म्हेन्दोदा च्यागो, थेसे गेएनोन आलमुला, क्वानएनोन आरामुला। तसैनोन थे खाहड् लसी ल्हेमुला! 29 एनीगदेसे डाला ताम इयान्गो, सोलोमन ग्लेदेन ल्हानान धन सम्पत्ति मुसैनोन थेसे क्वान्बा क्वान थे म्हेन्दोगदे न्हडला गिक तेबै जेबा आरेमुबा। 30 तिनी ल्हेबान निसी न्हडगर खमहिन्से मेरी फर्बा छेदा मी परमेश्वरसे चुहड् लसी जेना लमुला भिसम झन एनीगदेदा परमेश्वरसे जेना आल? खाड् एनीगदेला विश्वास? 31 थेतबासेलमा ‘तिग चसे? तिग थुड्से? ओच्छे तिग क्वान्से?’ भिसी धन्दा सुर्दा थालउ। 32 तिग्दा भिसम परमेश्वरदा डोआसेबा अर्गु य्हुलला म्हिगदेसे चा चु जम्मान रहे म्हाड्मुला। तर स्वर्गरी धन्ड्याबा परमेश्वर आबासे एनीगदेदा चु जम्मान रहे तो:ला भिसी था मुला। 33 थेतबासेलमा डाच्छा एनीगदेसे परमेश्वरला य्हुल्सा म्हाड्गो ओच्छे थेसे म्हन्बा अन्धार गे लउ। जमाहेन्से परमेश्वरसे एनीगदेदा चु जम्मान रहे पिन्ना। 34 थेतबासेलमा न्हडगरला लागिरी धन्दा सुर्दा थालउ। तिग्दा भिसम न्हडगरदा तो:बा रहे न्हडगरनोन याड्ला। तिनीला लागिरी तिनीलान दुख मुला।

स्थान्दोदा दोष थालउ

लूका ६:३७-३८, ४१-४२

7 “स्थान्दोदा दोष लसी थाभ्रउ ओच्छे परमेश्वरसेनोन एनीगदेदा दोष आल। 2 तिग्दा भिसम एनीगदेसे खाहड् लसी स्थान्दोदा दोष लला, थेहड् लसीन एनीगदेदाएनोन दोष लला। ओच्छे एनीगदेसे जुन दप्बा रहेसे दप्सी पिन्ना, परमेश्वरसेनोन एनीगदेदा थेनोन दप्बा रहेसे दप्सी पिन्ना। †

3 “स्थान्दोला गोरी से: भ्रबा म्राड्बा म्हिसे हाडला गोरी मुड् भ्रबा तिग्दा आम्राड्बा? 4 हाडला गोरी म्हुड् भ्रबा आम्राड्बासे खाहड् लसी आलेदा ‘खाड् एला गोला से: ते:सी पिन्ना भिसी भिखम्ला?’ †5 कप्टी, डाच्छा

† 6:19 याकू ५:२-३ †† 6:29 १ राजा १०:४-७; २ इति ९:३-६ † 7:2 मर्कू ४:२४ †† “हाडला गोरी भ्रबा मुड् भिबादेन आलेला गोरी मुबा से:” भिबा तामदा ग्रीक बाइबलरी “हाडला मीरी मुबा मूढादा वास्ता आलना हाडला आलेला मीरी मुबा थुलु ते:सी पिन्ना भिसी” भिबा मुला।

हाडला गोला मुड् ते:गो, ओच्छे जे एसे आलेला गोरी भ्रबा से: ते:बारी खम्ला।

6 “परमेश्वरदा फुल्लो:बा रहे नगीदा थापिन्गो, तिग्दा भिसम थेसे एदा ख्राप्बारी खला। ओच्छे हाडला मोती द्बला डाच्छापट्टि थाभ्याड्गो। तिग्दा भिसम थेसे मोती नाड्सी भ्रला।

प्रार्थना लबारी आँट पिन्बा

लूका ११:९-१३

7 “एनीगदेसे ह्रीसम पिन्ना म्हाड्सम स्याप्ला ओच्छे म्रापरी द्बक द्बक लसम एनीगदेला लागिरी म्राप ठोड्सी पिन्ना। 8 तिग्दा भिसम जुन म्हिसे ह्रीला थेदा पिन्ना, ओच्छे जुन म्हिसे म्हाड्ला थेसे स्याप्ला ओच्छे जुन म्हिसे म्रापरी द्बक द्बक लला थेदा म्राप ठोड्सी पिन्ना।

9 “एनीगदे न्हडला खालैसे हाडला कोलासे गेड् ह्रीमा थेदा युड्बा पिन्ना? 10 खाड्मै तार्डा ह्रीमा थेदा पुखी पिन्ना? 11 एनीगदे पापी तसीनोन हाडला कोलागदेदा ज्यबा रहे पिन्बारी सेमुला भिसम स्वर्गरी मुबा एनीगदेला परमेश्वर आबासे गाते ल्हाना ज्यबा रहे पिन्ना। 12 एनीगदेदा स्थान्दो म्हिगदेसे जस्तो व्यवहार लगै भिसी म्हन्बा मुला एनीगदेसेनोन थेनीगदेदा थेहड्बान व्यवहार लउ। तिग्दा भिसम परमेश्वरसे मोशादा पिन्बा ठिमरी मुबादेन अगमवक्तासे लोप्बा मुल ताम चुनोन हिन्ना। †

साडरो म्रापदेन ग्रेन म्राप

लूका १३:२४

13 “एनीगदे साडरो म्रापग्याम वाड्गो। तिग्दा भिसम ग्रेन म्रापग्याम वाड्बारी सजिलो मी मुला तसैनोन थे म्रापग्याम नाश तबा ग्लारी धोमुला। चु म्रापग्याम वाड्बा म्हिगदे चा ल्हानान मुला। 14 तर साडरो म्रापदेन जजाबा ग्यामसे भ्रमा जुकजुकधोनाला जुनी याड्गुला। तसैनोन चु ग्यामरी भ्रबा म्हिगदे ल्हाना आरे।

ज्यबा दोडदेन आज्यबा दोडला रो

लूका ६:४३-४४; १३:२५-२७

15 “फट्टा अगमवक्तागदे म्राड्सी होशियार तसी चिउ, थेनीगदे एनीगदे मुबा ग्लारी ग्यु हड् लसी खमुला, तर थेनीगदेला सेम चा लोड्बा खबा फार्बा हड्बान तमुला। 16 एनीगदेसे रो च्यासी दोड डोसेबा हड् लसी थेनीगदे खाहड्बा म्हि हिन्ना भिबा ताम थेनीगदेला गेग्यामसेन डोसेला। पुजुला दोडग्याम अड्गुर आथु ओच्छे देस्यला दोडग्यामनोन अज्जीर आथु। 17 थेहड् लसीन जम्मान ज्यबा दोडरी ज्यबान रो रोला। ओच्छे आज्यबा दोडरी आज्यबान रो रोला। 18 ओच्छे ज्यबा दोडरी आज्यबा रो आरो ओच्छे आज्यबा दोडरीनोन ज्यबा रो आरो। 19 आज्यबा रो रोबा जम्मान दोड थासी मेरी फर्ला। ††20 चुहड् लसीन थे अगमवक्तागदे खाहड्बा म्हि हिन्ना भिबा ताम एनीगदेसे थेनीगदेला गेग्यामसेन डोसेखम्ला। †††

21 “डादा ‘प्रभु, प्रभु’ जे भिबा म्हिगदे स्वर्गला य्हुल्सारी वाड्बारी आम्याड्। तर स्वर्गरी धन्ड्याबा डाला आबासे कुल्बा ताम इयान्बा म्हि जे वाड्म्याड्ला। 22 जमा धुड्री ल्हानान म्हिसे डादा ‘प्रभु, डन्से हाडला अधिकारग्याम परमेश्वरला ताम पाड्बा आहिन? ओच्छे हाडला अधिकारग्याम डन्से म्हडगदे ताप्बा आहिन? थेहड् लसीन डन्से हाडला अधिकारग्याम ल्हानान उदेकला गेगदे लबा आहिन?’ भिसी भिला। 23 जमा डाड् थेनीगदेदा ‘एनीगदेदा डाड् खाड्मै डोसेबा आरे। पाप गे लबा म्हिगदे, एनीगदे डा मुबा ग्लायाम निउ’ भिसी पाड्ला। †

बुद्धि मुबा म्हिदेन मूर्ख म्हिसे स्होबा दिम

लूका ६:४७-४९

24 “थेतबासेलमा जुन म्हिसे डाड् पाड्बा ताम इयान्सी थे अन्धार भ्रला, थे म्हि चा दिम स्होमा नुजा जग ख्वसी स्होबा बुद्धि मुबा म्हि हड्बान हिन्ना।

25 बुद्धि मुबा म्हिसे दिम स्होमा नुजा जग ख्वसी स्होबासे लमा

†† 7:12 लूका ६:३१ ††† 7:19 मत्ती ३:१०; लूका ३:९ ††† 7:20 मत्ती १२:३३ † 7:23 भजन ६:८

लाबालुडसरदेन भाल बाढी खसी थे दिमरी टसैनोन थे दिम आफुजी।²⁶ तर जुन म्हिसे डाइ पाड्बा ताम थे:सी थे अन्धार गे आल, थे म्हि चा दिम स्होमा नुजा जग आख्वना स्होबा बुद्धि आरेबा मूर्ख म्हि हड्बान हिन्ना।²⁷ बुद्धि आरेबा मूर्ख म्हिसे दिम स्होमा नुजा जग आख्वना स्होला। तर लाबालुडसरदेन भाल बाढी खसी थे दिमरी टजी भिसम थे दिम फुप्सी ल्हानान नोक्सान तला।”

²⁸ येशूसे चु ताम सुड्सी जिन्माहेन्से थेरी मुबा म्हिगदे येशूसे लोष्वा म्राड्सी उदेक तजी।²⁹ तिगदा भिसम येशूसे थेनीगदेला यहूदी धर्मगुरुगदेसे लोष्वा हड् लसी आहिन, तर अधिकार मुबा म्हिसे हड् लसी लोष्वा मुबा। †

येशूसे कोरे खबा म्हिदा खम्ना लबा
मर्कूस १:४०-४५; लूका ५:१२-१६

8 येशू गडग्याम मार फेपखमाहेन्से ल्हानान म्हिगदे येशूदेन छ्याम भ्रबारी छ्याइजी।² थेनोन धुइरी कोरे खबा म्हि गिक येशूला डामरी खसी येशूदा पया लजी। ओच्छे “प्रभु, हाडला सेम मुसम हाडसे डादा खम्ना लखम्ना” भिसी भिजी।

³ जमाहेन्से येशूसे थेदा थुसी “ए खमौ भिबा डाला सेम मुला, ए खमो” भिसी सुड्छ्याम थेला कोरे म्हाजी।⁴ ओच्छे येशूसे थेदा “एसे चु ताम खालैदा थापाङ्गो। बरु ए निसी परमेश्वरला मन्दिररी पूजा लबा म्हिदा उन्गो। ओच्छे मोशासे कुल्बा अन्धार बलि फुल्गो। थेहड् लजी भिसम म्हिगदेसे ए खम्जी भिसी था याड्ला” भिसी सुड्जी। ††

येशूसे कप्तानना नोकरदा खम्ना लबा
लूका ७:१-१०

⁵ येशू कफर्नहुम शहररी फेपखमा रोमी कप्तान गिक खसी,⁶ “प्रभु, डाला नोकर काड या चलब आतना स्हु खसी थलारी मुला” भिसी बिन्ती लजी।

⁷ जमाहेन्से येशूसे कप्तानदा “डा खसी थेदा खम्ना लला” भिसी सुड्जी।

⁸ तर कप्तानसे येशूदा “प्रभु, हाड डाला दिमरी फेपखबाधोनाला डा आरे। थेतबासेलमा हाडसे चुग्यामसेन खमौ भिसी सुड्जे सुड्सैनोन डाला नोकर खम्ना।⁹ तिगदा भिसम डाएनोन डाला हाकिमला तहरी चिबा म्हि हिन्ना। डाला तहरीनोन सिपाहीगदे मुला। डाइ कोइदा निउ भिमा निमुला, कोइदा खउ भिमा खमुला। ओच्छे डाला नोकरदा डाइ चुहड् लउ भिमा थेसे थेहड्नेन लमुला” भिसी भिजी।

¹⁰ चु ताम थे:सी येशू उदेक तसी हाडदेन छ्याम भ्रबा म्हिगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, इस्राएल युल्साला म्हिगदे न्हडरीनोन डाइ चुहड्बा ग्रेन विश्वास मुबा म्हि आस्याजी।¹¹ च्यागो, एनीगदेसे डाला ताम ड्यान्गो, स्यारदेन ल्हो जम्मान ग्लायाम अर्गु यहुलला ल्हानान म्हिगदे खला। ओच्छे अब्राहाम, इसहाक, याकूबदेन छ्यामनोन स्वर्गला युल्सारी भोज चबारी चिला।¹² तर स्वर्गला युल्सारी चितो:बा ल्हानान इस्राएल युल्साला म्हिगदे चा मडग्यार धोपधोष्वा ग्लारी भ्याड्ला। थेरी क्राबा क्रिड्बा लसी स्वा क्रेला।”¹³ जमाहेन्से येशूसे थे कप्तानदा “ए निउ, एसे विश्वास लबा हड्नेन तगै” भिसी सुड्जी। चुहड् सुड्बा धुइरीन थे नोकर खम्जी।

येशूसे आखम्बा म्हिगदेदा खम्ना लबा
मर्कूस १:२९-३४; लूका ४:३८-४१

¹⁴ येशू पत्रुसला दिमरी धोखमाहेन्से पत्रुसला स्युमी छवा खसी म्हेसी चिबा म्राड्जी।¹⁵ चु म्राड्सी येशूसे थेला यारी थुर्जी, ओच्छे थेला छवा म्हाजी। जमाहेन्से थे रे:सी येशूदा क्योड्बारी छ्याइजी।

¹⁶ धिनी घल्माहेन्से म्हिगदेसे म्हडसे स्याष्वा म्हिगदेदा येशू मुबा ग्लारी भजी। जमाहेन्से येशूसे म्हडदा बड्सी थे म्हिगदेला ल्हुड्याम ताप्जी। ओच्छे थेरी मुबा जम्मान आखम्बा म्हिगदेदा खम्ना लजी।¹⁷ येशूसे चुहड् लबासे लमा यशैया अगमवक्तासे पाड्बा ताम पूरा तजी। यशैया अगमवक्तासे, “म्हाडसे नातो:बा दुख थेसेन नाजी

† 7:29 मर्कूस १:२२; लूका ४:३२ †† 8:4 लेवी १४:१-३२ † 8:11 लूका १३:२९ † 8:12 मत्ती २२:१३; २५:३०; लूका १३:२८

ओच्छे म्हाडला आखम्बागदेएनोन खम्ना लजी”
भिसी पाड्बा मुबा। †

येशूला लागिरी नातो:बा दुख
लूका ९:५७-६२

¹⁸ येशूसे हाडला क्युसीन ल्हानान म्हिगदे म्राड्सी “म्हाड समुन्द्रला क्याम्सडपट्टि निड” भिसी सुड्जी।¹⁹ थे धुइरी यहूदी धर्मगुरु गिक खसी येशूदा “गुरु, हाड खानडदमान फेप्सै डाएनोन हाडदेन छ्याम निला” भिसी भिजी।²⁰ जमाहेन्से येशूसे थेदा “च्यागो, ल्हुन्दीगदे चिबारी ऊ मुला, ओच्छे चरागदे चिबारीनोन जड मुला। तर परमेश्वरसे पुड्खबा म्हेला मी ब्लष्वा न्हबा ग्ला सुत्त आरे” भिसी सुड्जी।

²¹ स्हान्दो चेला गिकसे येशूदा “प्रभु, डाच्छा डाला सिबा आबादा ल्हुसी हाडदेन छ्याम भ्रला” भिसी भिमा,²² येशूसे थेदा “सिबागदेदा सिबागदे हड्बासेन ल्हुगै, तर ए चा डादेन छ्याम भ्रउ” भिसी सुड्जी।

येशूसे ग्रेन लाबालुडसर म्हाणा लबा
मर्कूस ४:३५-४१; लूका ८:२२-२५

²³ जमाहेन्से येशू दौंगारी क्रे:जी, ओच्छे थेला चेलागदेएनोन थेदेन छ्यामनोन निजी।²⁴ निबान लमा तिक्खुरीन समुन्दरी ग्रेन लाबालुडसर खजी। ओच्छे समुन्दरी छाल रे:सी छालसे दौंगा प्लिड्बारी छ्याइजी। तर थे धुइरी येशू चा स्हिम्बा मुबा।²⁵ जमाहेन्से चेलागदे खसी “प्रभु, म्हाड सिबारी छ्याइजी, जोगब लउ” भिसी येशूदा छिड्जी।

²⁶ जमाहेन्से येशूसे थेनीगदेदा “एनीगदे तिगदा लोड्बा? खाइ एनीगदेला विश्वास?” भिसी सुड्जी। ओच्छे येशू रे:सी लाबालुडसरदेन समुन्द्रला छालदा बड्जी। जमाहेन्से लाबालुडसर म्हासी शान्त तजी।²⁷ चुहड् तबा म्राड्सी थेनीगदे उदेक तजी। ओच्छे थेनीगदेसे “चु खाहड्बा म्हि? चुसे कुल्बा ताम मी लाबालुडसरदेन समुन्द्रला छालसेनोन ड्यान्बा चीम” भिसी हाड हाड न्हडरी ताम लजी।

येशूसे म्हडसे स्याष्वा म्हि न्हीदा खम्ना लबा
मर्कूस ५:१-२०; लूका ८:२६-३९

²⁸ येशू समुन्द्रला क्याम्सडपट्टि गदरा ††† भिबा ग्लारी धोखमा म्हडसे स्याष्वा म्हि न्ही धुर्साग्याम खबान लबा स्याष्वा। थे म्हि न्ही ल्हानान लोड्बा खबा खाल्ला मुबासे लमा थे ग्याम खालै म्हि आभ्रमुबा।²⁹ थेनीगदेसे येशूदा म्राड्सी क्रिड्बान, “परमेश्वरला झा, हाडसे डन्दा तिग लबारी म्हाइबा? डन्दा धुइ आतमान हाड डन्दा नाश लबारी फेपखबा हिन्ना?” भिसी भिजी।

³⁰ थेनीगदे मुबा ग्लायाम जजाकी क्याथाड् द्वागदे छबान मुबा।

³¹ थेतबासेलमा म्हडगदेसे येशूदा “चुदे हाडसे डन्दा चुरी चिआपुड्बा हिन्सम डन्दा द्वागदे न्हडरी वाड्पुङ्गो” भिसी बिन्ती लजी।

³² जमाहेन्से येशूसे थेनीगदेदा “निउ” भिसी सुड्छ्याम हेनेनीगदे थोन्सी द्वागदे न्हडरी वाड्जी। जमाहेन्से जम्मान द्वागदे गडग्याम समुन्दरी छ्योड्सी सिजी।³³ चुहड् तबा म्राड्सी द्वा छबा म्हिगदे यासी नाम्सारि निजी। ओच्छे म्हडसे स्याष्वा म्हि न्हीदा तिग तिग तजी भिबा ताम जम्मादान थे:ना लजी।³⁴ जमाहेन्से नाम्साला मुबा जति जम्मान म्हिगदे येशूदा स्याष्वारी खजी। ओच्छे येशूदा म्राड्सी थे म्हिगदेसे “चु ग्लायाम फेपो” भिसी बिन्ती लजी।

येशूसे कुज्या म्हिदा खम्ना लबा
मर्कूस २:१-१२; लूका ५:१७-२६

9 जमाहेन्से येशू दौंगारी क्रे:सी क्यामसडपट्टि फेप्जी, ओच्छे हाडलान शहररी ††† दो:सी फेपखजी।² म्हिगदेसे काड या चलब आतबा कुज्या तसी म्हेसी चिबा म्हि गिकदा येशू मुबा ग्लारी भजी। येशूसे थेनीगदेला

†† 8:17 यशैया ५३:४ ††† कोइ कोइ ग्रीक बाइबलरी “गेरासेनस” भिसी भिबा मुला। “गदय” भिबादेन “गेरासेनस” भिबा ग्ला गिकनोन हिन्ना। ††† “हाडलान शहर” चा कफर्नहुम शहर हिन्ना।

विश्वास म्राड्सी थे कुज्या म्हिदा “कोला, भड लउ, डाइ एला पाप माफ लबा मुला” भिसी सुड्जी।

3 थेरी मुबा यहूदी धर्मगुरुगदे न्हडला कोड कोडसे “चुसे मी हाडसे हाडदान परमेश्वर स्होसी ताम लबान मुला” भिसी हाड हाड न्हडरी ताम लजी। 4 येशूसे थेनीगदेला सेमला ताम था याड्सी “एनीगदेसे तिगदा चुहड्बा नडबा ताम म्हन्बा? 5 ‘एला पाप माफ तबा मुला’ भिबादेन ‘रे:सी भ्रउ’ भिबारी खजिबा चा सजिलो मुला? 6 तर परमेश्वरसे पुडखबा म्हिदा चु जम्बुलिडरी म्हिगदेला पापला दोष मेटब लबा अधिकार मुला भिसी डाइ एनीगदेदा उन्ना” भिसी सुड्जी। जमाहेन्से येशूसे थे कुज्या म्हिदा “ए रे:गो, ओच्छे एला तीबा नान्बा पुड्सी दिमरी निउ” भिसी सुड्जी। 7 जमाहेन्से थे रे:सी हाडला दिमरी निजी। 8 चु म्राड्सी थेरी मुबा म्हिगदे उदेक तजी। ओच्छे थेनीगदेसे म्हिगदेदा चुहड्बा शक्ति पिन्बा परमेश्वरला जयजयकार लजी।

येशूसे मत्तीदा इयोडबा

मर्कुस २:१३-१७; लूका ५:२७-३२

9 येशू थेग्याम फेज्बान लबा धुडरी मत्ती भिबा म्हिदा तिरो दुडबा ग्लारी चिबान लबा म्राड्जी, ओच्छे येशूसे थेदा “डादेन छ्याम भ्रउ” भिसी सुड्जी। जमाहेन्से थे रे:सी येशूदेन छ्याम भ्रजी। 10 येशू मत्तीला दिमरी सोल छयोडबान लबा धुडरी तिरो दुडबा म्हिगदेदेन पापीगदेएनोन खसी येशूदेन येशूला चेलागदेदेन छ्याम चिसी चबान मुबा। 11 चु म्राड्सी फरिसीगदेसे येशूला चेलागदेदा “एनीगदेला गुरु तिगदा तिरो दुडबा म्हिगदे ओच्छे पापीगदेदेन छ्याम चिसी चबा?” भिसी इयोड्जी। 12 चु ताम थे:सी येशूसे “खम्बा म्हिगदेदा डाक्टर आतो:, तर आखम्बा म्हिगदेदा जे डाक्टर तो:ला। 13 दाहेन्से एनीगदे निसी चु तामला अर्थ तिग हिन्ना घोबारी म्हाड्गो, ‘च्यागो, डाइ म्हाड्बा चा बलिदान आहिन, तर एनीगदेसे स्हान्दोदा लबा दया हिन्ना।’ थेतबासेलमा परमेश्वरला डाच्छा ज्यबा मुबा म्हिगदेदा आहिन, तर पापीगदेदा इयोड्बारी डा खबा हिन्ना” भिसी सुड्जी। ††

येशूसे फोडथान चिसी प्रार्थना लबाला लागिरी लोप्ला

मर्कुस २:१८-२२; लूका ५:३३-३९

14 जमाहेन्से यूहन्नाला चेलागदे येशू मुबा ग्लारी खसी “डन्देन फरिसीगदे फोडथान चिसी प्रार्थना लमुला, तर हाडला चेलागदे चा तिगदा फोडथान चिसी प्रार्थना आलबा?” भिसी इयोड्जी। 15 येशूसे थेनीगदेदा चुहड् भिसी सुड्जी, “म्हाछार जन्तीगदेदेन छ्याम मुतेधोना थेरी मुबागदेसे सुर्दा आल। तर म्हाछार थेनीगदेग्याम फेसी भोर्माहेन्से जे थेनीगदे सुर्दा तसी फोडथान चिला। 16 खालैसे बोक्तो क्वानरी छार क्वानगेनसे आख्या, छार क्वानगेनसे बोक्तो क्वान ख्याजी भिसम बोक्तो क्वान झन ढेला। 17 ओच्छे खालै म्हिसेनोन ढिला बोक्तो ताडरी अडगुरला कलिलो निडगु आयु, चुदे युजी भिसम थे ताड ढेसी अडगुरला निडगु डेला। ओच्छे थे ताडएनोन गे आखेल्बा तला। तर अडगुरला कलिलो निडगु ढिला छार ताडरी युला ओच्छे न्हीनोन जोगब तला।”

येशूसे याडरसला झामेदा खम्बा लबा

मर्कुस ५:२१-४३; लूका ८:४०-५६

18 येशूसे थेनीगदेदा चुहड् सुड्बान लबा धुडरी यहूदीगदे हुप तबा दिमला नेता गिक खजी। ओच्छे येशूदा प्या लसी “दान्दे भर्खर डाला झामे सिजी, तर हाड फेपखसी थेदा हाडसे थुर्जी भिसम थे सोला” भिसी भिजी। 19 जमाहेन्से येशू स्हेड्सी थे म्हिदेन छ्याम फेज्जी, ओच्छे येशूला चेलागदेएनोन येशूदेन छ्यामनोन निजी।

20 थेनोन धुडरी का निबा बेथासे स्याप्सी च्युक न्ही दिड तबा म्रिडम्हेमे गिक ग्यापग्याम खसी येशूला क्वानला जोरी थुर्जी। 21 तिगदा भिसम “डाइ येशूला क्वान थुर्बारी जे म्याड्सम डा खम्बा” भिसी थेसे सेम सेमरी म्हन्बा मुबा। 22 प्लिक दो:सी च्यामा येशूसे थे म्रिडम्हेमेदा म्राड्जी। ओच्छे येशूसे

थेदा “भड लउ, माइ! एला विश्वाससे लमा ए खम्बा मुला” भिसी सुड्छ्याम थे म्रिडम्हेमे खम्बी।

23 येशू थे नेताला दिमरी धोखमा थेरी बाँसुरी हाप्ला † म्हिगदेदेन हल्ली खल्ली लसी चिबा म्हिगदे म्राड्जी। 24 चु म्राड्सी येशूसे जम्मादान “एनीगदे जम्मान मडग्यार थोन्गो। तिगदा भिसम माइ सिबा आरे, तर म्हर्से चिबा मुला” भिसी सुड्जी। चु ताम थे:सी थेरी मुबा म्हिगदेसे खिसी लसी डे:जी। 25 थेरी मुबा म्हिगदे मडग्यार थोन्माहेन्से येशू दिम न्हडरी वाड्जी। ओच्छे थे माइला यारी चुड्सी थीजी। थीमैछ्याम थे माइ डोड रे:जी। 26 जमाहेन्से चु ताम थे यहुल्साला जम्मान ग्लारी थे:जी।

येशूसे मी आम्राड्बा म्हि न्हीदेन ताइ दोबा म्हिदा खम्बा लबा

27 येशू थेग्याम फेज्बान लबा धुडरी मी आम्राड्बा म्हि † न्हीसे “दाऊद ग्लेला सन्तान, डन्दा दया लउ” भिसी क्रिड्बान येशूला लिच्छा लिच्छा खजी।

28 येशू दिम न्हडरी वाड्बाहेन्से थे मी आम्राड्बा म्हि न्हीएनोन येशू मुबा ग्लारी खजी। जमाहेन्से येशूसे थेन्नीदा “डाइ खम्बा लबारी खम्बा भिसी एनीगदेदा विश्वास मुला?” भिसी इयोड्मा थेन्नीसे “मुला, प्रभु” भिसी भिजी।

29 जमाहेन्से येशूसे थेन्नीला मीरी थुर्सी “एनीगदेसे विश्वास लबासे लमा एनीगदे खम्बा मुला” भिसी सुड्जी। 30 येशूसे चुहड् सुड्छ्याम थेन्नीसे म्राड्जी। जमाहेन्से येशूसे थेन्नीदा “च्यागो, चु ताम खालैदान थापाङ्गो” भिसी सुड्जी। 31 तसेनोन थेनीगदे निसी जम्मान ग्लारी येशूला बारैरी थे:ना लजी।

32 थे म्हि न्ही निबारी छ्याड्मा म्हिगदेसे म्हडसे स्याप्सी ताइ दोबा म्हि गिकदा येशू मुबा ग्लारी भजी। 33 येशूसे म्हडदा ताप्पैछ्याम थे ताइ दोबा म्हिसे ताम पाड्बारी छ्याड्जी। चु म्राड्सी थेरी मुबा म्हिगदे उदेक तसी “चुहड्बाम डन्से इस्राएल यहुल्साला म्हिगदे † न्हडरी खाड्मै म्राड्बा आरेबा” भिसी भिजी।

34 तर फरिसीगदेसे चा “चु म्हिसे मी म्हडगदेला ग्लेला शक्तिग्याम म्हड ताप्ला हिन्ना” भिसी भिबारी छ्याड्जी। †††

म्हिगदेदा म्राड्सी येशूदा दया रे:बा

35 जमाहेन्से येशूसे यहूदीगदे हुप तबा दिमरी लोप्लादेन परमेश्वरला यहुल्साला समाचार थे:ना लजी। ओच्छे जम्मान थरीला रोगसे स्याप्लादेन आखम्बा म्हिगदेदा खम्बा लबान शहरदेन नाम्सा नाम्साारी फेज्जी। †††36 म्हिला हुल म्राड्सी येशूदा ल्हानान दया रे:जी, तिगदा भिसम थेनीगदे खालैसे आच्याना दुख याड्बा गोठालो आरेबा ग्युगदे हड्बान मुबा। 37 जमाहेन्से येशूसे हाडला चेलागदेदा “च्यागो, बाली मी ल्हानान मिन्बा मुला, तर बाली दुडबा म्हिगदे ल्हाना आरे। 38 थेतबासेलमा बाली दुडबा म्हिगदे पुड्खउ भिसी बालीला दोप्ता प्रभुदेन छ्याम प्रार्थना लउ” भिसी सुड्जी। ††

येशूला मुल चेलागदे

मर्कुस ३:१३-१९; लूका ६:१२-१६

10 येशूसे हाडला च्युक न्ही चेलागदेदा इयोड्सी जम्मान थरीला रोगसे स्याप्सी आखम्बागदेदा खम्बा लबादेन म्हडगदेदा ताप्ला अधिकार पिन्जी। 2 येशूला मुल चेलागदे चुनोन हिन्ना, जम्मान भन्दा डाच्छा पत्रुस भिबा सिमोनदेन थेला आले अन्द्रियास, जब्दियाला झा याकूबदेन याकूबला

‡ यहूदीगदेला ठिम अन्छार म्हि सिबा धुडरी बाँसुरी हाप्ला म्हि भिसी बाँसुरी हापुड्मुबा। †† मी आम्राड्बा म्हिगदेसे येशूदा दाऊद ग्लेला सन्तान भिसी इयोड्मा थेनीगदेदा डाच्छाहेन्सेन था मुबा थार्बा पिन्बा मसीह भिसी घोमुबा। तिगदा भिसम यहूदीगदेसे येशू आखम्बा म्हिदा खम्बा लबारीदेन शासन लबारी दाऊदला सन्तानग्याम थोन्ना भिसी विश्वास लमुबा। †† याकूबला सन्तानदा इस्राएली भिसी भिसम येशूला धुडला यहूदीगदे चा यहूदा अज्वलला बन्ध्यामीनदेन लेवीला सन्तानगदे मुबा। ††† 9:34 मत्ती १०:२५; १२:२४; मर्कु ३:२२; लूका ११:१५ ††† 9:35 मत्ती ४:२३; मर्कु १:३१; लूका ४:४४ § 9:36 गन्ती २७:१७; १ राजा २२:१७; २ इति १८:१६; इज ३४:५; मर्कु ६:३४ †† 9:38 लूका १०:२

आले यूहन्ना, ³ ओच्छे फिलिपदेन बारथोलोमाइ, थोमादेन तिरो दुइबा मत्ती, अल्फयसला झा याकूबदेन थेंदियस, ⁴ ओच्छे सिमोन चु सिमोनदा हाडला खुल्सादा माया लसी हाडला खुल्साला लागिरी ज्याननोन पिन्खम्बा म्हि भिसी भिमुबा। ओच्छे यहूदा इस्करियोत, चुनोन यहूदा इस्करियोतसे लिच्छा येशूदा चुइसी म्हिगदेला यारी जिम्मा पिन्जी।

मुल चेलागदेला गे
मर्कूस ६:७-१३; लूका ९:१-६

⁵ येशूसे हाडला च्युक न्ही मुल चेलागदेदा चुहइ भिसी कुल्सी पुइजी, “एनीगदे अर्गु खुलला म्हिगदेदेन सामरीगदेला शहररी थानिउ। ⁶ बरु एनीगदे गोठालो आरेबा ग्युगदे हइ तसी भ्रबा इसाएलीगदे मुबा ग्लारी निउ। ⁷ ओच्छे ‘स्वर्गला खुल्सा खसी जिन्बा मुला’ भिसी पाङ्गो। ⁸ ओच्छे आखम्बा म्हिगदेदा खम्मा लबादेन सिबा म्हिगदेदा सोना लउ। थेहइ लसीन कोरे खबागदेदा खम्मा लबादेन म्हडगदे ताणो। एनीगदेसे ओहइनोन याइबा रहे एनीगदेसेएनोन ओहइनोन पिन्गो। ⁹ एनीगदेसे म्हर म्हुइदेन टाडगा तिगै थाभोगो। ¹⁰ ओच्छे एनीगदेसे ग्यामला लागिरी पोबा क्वानदेन झोला ओच्छे लखमदेन कडी तिगै थाभोगो। तिग्दा भिसम गे लबा म्हिसे ज्याला याइतो:मुला। ††

¹¹ “एनीगदे शहररी निसे नाम्सारी निसे डाच्छा थेरी एनीगदेदा मान लबा म्हि खाल चीम थे म्हाइगो। ओच्छे एनीगदे थेग्याम आनितेधोना थेरीन चिउ। ¹² ओच्छे थे दिमरी वाङ्गा एनीगदेसे थे दिमला म्हिदा “परमेश्वरला शान्ति एनीगदेदेन छ्याम तगै” भिसी पाङ्गो। ¹³ थे दिमला म्हिसे एनीगदेदा मान लजी भिसम थे दिमला म्हिसे शान्ति याइगै। चुदे थे दिमला म्हिसे एनीगदेदा मान आलनी भिसम थे दिमला म्हिसे शान्ति थायाङ्गै। ¹⁴ ओच्छे खालैसे एनीगदेला ताम आइयान्ना मान आलनी भिसम थे दिमदेन शहरग्याम थोन्बा धुइरी हाडला काडला धुलु खसी पिन्गो। * ††¹⁵ च्यागो, एनीगदेसे डाला ताम इयान्गो, परमेश्वरसे निसाफ लबा धिनकुनु थे शहरला म्हिगदेला गति भन्दा मी सदोमदेन गमोरा †† शहरला म्हिगदेला गति नाखम्बा तला। ††

विश्वासीगदेसे नातो:बा दुख
मर्कूस १३:९-१३; लूका २१:१२-१७

¹⁶ “च्यागो, डाइ एनीगदेदा फार्बागदेला गुडरी ग्युदा पुइबा हइ लसी पुइला। थेतबासेलमा एनीगदे पुखी हइबा चलाक ओच्छे दुकुर हइ सोजो तसी भ्रउ। ††¹⁷ तर एनीगदे म्हिगदे म्हाइसी होशियार तउ, तिग्दा भिसम थेनीगदेसे एनीगदेदा चुइसी अदालतरी भोर्ला। ओच्छे यहूदीगदे हुप तबा दिमरी भोर्सी एनीगदेदा कोर्से तोबा ग्याइबा लला। ¹⁸ डादा विश्वास लबासे लमा थेनीगदेसे एनीगदेदा अज्वलाधीशदेन ग्लेला डाच्छापट्टि भोर्ला। एनीगदे थेनीगदेदेन अर्गु खुलला म्हिगदेला लागिरी डाला साक्षी दोला। ¹⁹ थेनीगदेसे चुइसी भोर्सेनोन खाहइ लसी जोहाब पिन्से भिसी एनीगदेसे धन्दा सुर्दा लआतो:। तिग्दा भिसम थे धुइरी खाहइ लसी पाइतो:बा थे ताम एनीगदेदा लोप्सी पिन्ना। ²⁰ तिग्दा भिसम थे धुइरी एनीगदेसे पाइबा आहिन, तर परमेश्वर आबाला आत्मासेन एनीगदेग्याम पाइला।

²¹ “हाडलान ज्योज्यो आलेसे हाडलान ज्योज्यो आलेदा साइपुइला। थेहइ लसीन आबासे कोलागदेदा साइपुइला, ओच्छे कोलागदेसे आबा आमाला बिरोध लसी साइपुइला। ²² ओच्छे डादा विश्वास लबासे लमा एनीगदेदा जम्मासेन हेला लला। तर जुन म्हिसे जस्तोन दुख तसैनोन हाड आसितेधोना डादा विश्वास लबा आखला थेसे थार्बा याइला। ²³ म्हिगदेसे एनीगदेदा नाम्सा गिकरी दुख पिन्जी भिसम एनीगदे अर्गु नाम्सारी यारगो। च्यागो, एनीगदेसे डाला ताम इयान्गो, परमेश्वरसे पुइखबा म्हि खबा भन्दा डाच्छा एनीगदे इसाएलला जम्मान नाम्सारी धोआखम।

† 10:7 लूका १०:४-१२ †† 10:10 १ कोर ९:१४; १ तिमो ५:१८ † यहूदीला ठिम अन्धार काडला धुलु खर्बा चा परमेश्वरसे सजाय पिन्ना भिसी उन्बा हिन्ना। †† 10:14 मुल १३:५१ †† उत्पत्ति १९:२३-२९ सदोमदेन गमोरा भिबा चा शहर न्ही हिन्ना। थेदा परमेश्वरसे नाश लजी। तिग्दा भिसम थे शहररी ल्हानान नइबा गेगदे लमुबा। चु ताम, मत्ती ११:२३-२४; लूका १०:१२, १७:२९; रोमी ९:२९; २ पत्रुस २:६; यहूदा १:७; उन्बा ११:८ पदरीएनोन मुला। ††† 10:15 मत्ती ११:२४; उत्प १९:२४-२८ ††† 10:16 लूका १०:३ § 10:22 मत्ती २४:९-१३

²⁴ “च्यागो, गुरु भन्दा चेला घेन आत, ओच्छे मालिक भन्दा नोकरएनोन घेन आत। §†²⁵ चेला हाडला गुरु हइबा दोबादेन नोकर हाडला मालिक हइबा दोबान ठीक मुला। तिग्दा भिसम थेनीगदेसे डा दिमला मुल म्हिदाम म्हडला ग्ले बालजिबुल भिला भिसम इन डाला म्हेमेगदेदा मी तिग भिला? §†

खाल म्हाइसी लोइतो:बा?
लूका १२:२-९

²⁶ “थेतबासेलमा थेहइबा म्हिगदेदेन छ्याम थालोङ्गो। तिग्दा भिसम घप्सी आम्राइबा रहे तिगै आरे, ओच्छे छुम्सी था आयाइबा रहे तिगै आरे। §†²⁷ जुन ताम डाइ एनीगदेदा धोपधोपरी पाइबा मुला, थे ताम एनीगदेसे य्हालरी पाङ्गो, ओच्छे जुन ताम एनीगदेसे थे:ला, थे ताम एनीगदेसे दिमला धुरीग्याम थे:ना लउ। ²⁸ ओच्छे एनीगदेला ल्हुइदा साइसी आत्मादा चा तिगै लबारी आखम्बा म्हिगदेदेन छ्याम थालोङ्गो। तर ल्हुइदेन आत्मा न्हीदान साइसी नर्गरी धोना लखम्बा परमेश्वरदेन छ्याम जे लोङ्गो। ²⁹ डबल गिकरी च्युर्गन न्ही याइला। तसैनोन एनीगदेला परमेश्वर आबासे सेम आलनी भिसम थे च्युर्गनगदे न्हडला गिकएनोन आसि। ³⁰ एनीगदेला थोबोरी क्रा गाते मुला भिबा ताम सुत्तै परमेश्वरदा था मुला। ³¹ थेतबासेलमा एनीगदे थालोङ्गो। तिग्दा भिसम थे ल्हानान च्युर्गनगदे भन्दा मी एनीगदे ल्हानान घेन मुला।

स्थान्दोगदेदा ख्रीष्टला बाररी पाइबा
लूका १२:८-९

³² “थेतबासेलमा जुन म्हिसे डादा म्हिदा ओन्हाडरी सेमहेन्से प्रभु भिसी पाइला, डाएनोन स्वर्गरी धन्छ्याबा आबाला डाच्छा थेदा डाला म्हि भिसी भिला। ³³ तर जुन म्हिसे म्हिगदेला ओन्हाडरी डादा डाइ थेदा डोसेबा आरे भिसी भिला, डाइएनोन थेदा स्वर्गरी धन्छ्याबा डाला आबाला डाच्छा डोसेबा आरे भिसी भिला। §†

ख्रीष्टदा विश्वास लबादेन आलबा
लूका १२:५१-५३; १४:२६-२७

³⁴ “डा जम्बुलिडरी म्हिगदेदा ढिक्ना लबारी खबा हिन्ना भिसी थाम्हन्गो। तिग्दा भिसम डा म्हिगदेदा ढिक्ना लबारी आहिन, तर थेनीगदे न्हडरी छेना लबारी खबा हिन्ना। ³⁵ तिग्दा भिसम

‘डा आबाला बिरोधरी झा,
आमाला बिरोधरी झामे

ओच्छे स्युमीला बिरोधरी चाड रे:ना लबारी खबा हिन्ना।

³⁶ म्हिदा शत्रु चा हाडलान म्हेमेगदे न्हडग्याम थोन्ना।’ §†

³⁷ “जुन म्हिसे डादा भन्दा हाडला आबा आमामेन कोलागदेदा माया लला, थे म्हि डाला चेला दोबारी आखम। ³⁸ ओच्छे जुन म्हिसे आसितेधोना हाडला दुख हाडसेन नासी §† डादेन छ्याम आभ्र, थे म्हि डाला चेला दोबाधोनाला आरे। §†³⁹ जुन म्हिसे हाडला ज्यान जोगब लबारी म्हाइला थे म्हिसे जुकजुकधोनाला जुनी आयाइ। तर डाला लागिरी ज्याननोन पिन्खम्बा म्हिसे जुकजुकधोनाला जुनी याइला। §†

⁴⁰ “एनीगदेदा मान लबा म्हिगदेसे डादाएनोन मान लला। ओच्छे डादा मान लबागदेसे डादा पुइखबादाएनोन मान लला। §†⁴¹ जुन म्हिसे अगमवक्तादा ‘अगमवक्ता’ भिसी मान लला, थेसेनोन अगमवक्तासे याइबा हइबान इनाम याइला। थेहइ लसीन जुन म्हिसे परमेश्वरदा सेम निबा म्हिदा ‘परमेश्वरदा सेम निबा म्हि’ भिसी मान लला, थेसेनोन थे परमेश्वरदा सेम निबा म्हिसे याइबा हइबान इनाम याइला। ⁴² च्यागो, खालैसे चुगदे न्हडला

§† 10:24 लूका ६:४०; यूह १३:१६; १५:२० §†† 10:25 मत्ती ९:३४; १२:२४; मर्कू ३:२२; लूका ११:१५ §† 10:26 मर्कू ४:२२; लूका ८:१७ §†† 10:33 २ तिमो २:१२ §† 10:36 मीका ७:६ §† ग्रीक बाइबलरी चा हाडला क्रुस हाडसेन पुइतो:ला भिसी भिबा मुला। §†† 10:38 मत्ती १६:२४; मर्कू ८:३४; लूका ९:२३ §†† 10:39 मत्ती १६:२५; मर्कू ८:३५; लूका ९:२४; १७:३३; यूह १२:२५ §†§ 10:40 मर्कू ९:३७; लूका ९:४८; १०:१६; यूह १३:२०

गिकदा डाला चेला भिसी सिम्बा क्युड † जे थुङ्बारी पिन्सैनोन थेसे याङ्तो:बा इनाम याङ्ला।”

बत्तिस्मा पिन्बा यूहन्नासे इयोइबा ताम

11 येशूसे हाडला च्युक न्ही चेलादा चुहङ् सुङ्सी जिन्माहेन्से गालील अञ्चलला नाम्सागदेरी परमेश्वरला यहुलसाला समाचार लोप्यारीदेन थे:ना लबारी फेप्जी।

2 थे धुङ्री बत्तिस्मा पिन्बा यूहन्ना इयाल्खानरी मुबा। थाबा पिन्बा ख्रीष्टसे लबा गेला बारेरी थे:सी यूहन्नासे हाडला चेलागदेदा “डन्से फेप्यला भिसी आश लसी चिबा थाबा पिन्बा ग्ले हाडनोन हिन्ना कि स्थान्दो खालैदा भ्रान्तो:बा हिन्ना?” भिसी इयोइबारी थाबा पिन्बा ख्रीष्ट मुबा ग्लारी पुङ्जी।

4 जमाहेन्से येशूसे थेनीगदेदा चुहङ् भिसी सुङ्जी, “एनीगदेसे थे:बादेन म्राङ्बा ताम निसी यूहन्नादा पाङ्सी पिन्गो। 5 मी आम्राङ्बागदेला मी म्राङ्ना लबा मुला, कुज्यादेन कोरे खबा म्हिगदेदा खम्ना लबा मुला, नाब्यड आथे:बागदेदा थे:ना लबा मुला, सिबागदेदा सोना लबा मुला, ओच्छे प्राडबोगदेदा परमेश्वरला यहुलसाला समाचार थे:ना लबान मुला। †6 जुन म्हिसे शङ्का आलना विश्वास लला, थे म्हिसे परमेश्वरग्याम मोलम याङ्ला।”

7 थेनीगदे निमाहेन्से येशूसे थेरी मुबा म्हिगदेदा यूहन्नाला बारेरी सुङ्बारी छ्याइजी, “एनीगदे तोडतोडबा ग्लारी तिग च्याबारी निबा मुबा? तिग लाबासे य्होङ्बा मा दोड च्याबारी निबा हिन्ना? 8 ओच्छे एनीगदे तिग च्याबारी थोन्बा मुबा? ज्यबा ज्यबा क्वान क्वान्बा म्हिदा च्याबारी? च्यागो, ज्यबा ज्यबा क्वान क्वान्बा म्हिगदे मी ग्लेखाङ्री जे चिमुला। 9 एनीगदे तिग च्याबारी निमुबा? तिग अगमवक्तादा च्याबारी निबा आहिन? हिन्ना, डाइ पाङ्ला एनीगदेसे स्थान्दो अगमवक्तागदे भन्दा ग्रेन म्हि गिक म्राङ्बा मुला। 10 चुनोन यूहन्नाला बारेरी परमेश्वरला बचनरी चुहङ् भिसी भिबा मुला, ‘च्यागो, डाइ डाला समाचार भोर्बा म्हिदा एला डाच्छा डाच्छा पुङ्ला। थेसे एला लागिरी ग्याम स्होला।’ † † †

11 “च्यागो, दान्देधोना बत्तिस्मा पिन्बा यूहन्ना भन्दा ग्रेन म्हि खालैनोन न्हबा आरे। तसैनोन जुन म्हि स्वर्गला यहुलसारी जम्मान भन्दा जजा मुला, थे बत्तिस्मा पिन्बा यूहन्ना भन्दा ग्रेन हिन्ना। †12 बत्तिस्मा पिन्बा यूहन्नाला धुङ्हेन्से दान्देधोना थे:ना लबा स्वर्गला यहुलसाला बारेरी ल्हानान गे तबा मुला। तर हाडसे हाडदान शक्तिशाली म्हन्बा म्हिगदे चा हाडलान भडसे स्वर्गला यहुलसारी वाङ्बारी म्हाइबा मुला। †13 तिगदा भिसम यूहन्नाला धुङ्धोना परमेश्वरसे मोशादा पिन्बा ठिमदेन जम्मान अगमवक्तागदेसे परमेश्वरला यहुलसाला बारेरी पाङ्बा मुला। 14 एनीगदेसे अगमवक्तागदेसे पाङ्बा ताम विश्वास लबा हिन्सम थेनीगदेसे खाल भिसी पाङ्बा एलिया चा चुनोन यूहन्ना हिन्ना। †15 जुन म्हिदा इयान्बा सेम मुला, थेसे इयान्सी घोड।

16 “दान्देल्ला म्हिगदेदा डाइ खाहङ् लसी घोना लसे? थेनीगदे मी ग्यामरीक्यार क्लाङ्बा कोलागदे हङ्बान हिन्ना। थेनीगदेसे हाडला ह्योगदेदा इयोइसी चुहङ् भिमुला,

17 ‘डन्से एनीगदेला लागिरी बाँसुरी ह्याप्पी पिन्जी, तर एनीगदे आस्य्हनी। ओच्छे डन्से दुखला व्हाइ गोजी, तर एनीगदे आक्रानी।’

18 चुहङ् लसीन यूहन्नासे अडगुरला निङ्गु आथुङ्ना फोइथान चिसी प्रार्थना लमुबा, जमा म्हिगदेसे ‘थेदा म्हडसे स्याप्या म्हि’ भिसी भिबा मुबा।

19 परमेश्वरसे पुङ्खबा म्हि चा चबा थुङ्बा लसी भ्रजी। थेतबासेलमा म्हिगदेसे डादा ‘च्यागो, ल्हानान चबा स्हेदेन ल्हानान निङ्गु कासी इन्धोइसी भ्रबा, तिरो दुइबादेन पापीगदेला ह्यो’ भिसी भिमुला! तर परमेश्वरला

† “सिम्बा क्युड” नेपाली बाइबलदेन ग्रीक बाइबलरी चा “कचौर नाड क्युड” भिसी भिबा मुला। †† 11:5 यशै ३५:५, ६; ६१:१ † † चु ताम चा परमेश्वरसे थाबा पिन्बा ख्रीष्टदा चुङ्बा ताम हिन्ना। †† 11:10 मला ३:१ † † यूहन्नासे थाबा पिन्बा ख्रीष्ट योना फेप्यला भिबा ताम थे:ना लसी ग्रेन गे लबा मुबा, तसैनोन येशूला चेलागदेसे येशूदा थाबा पिन्बा ख्रीष्टदा डोसेजी भिसी थे:ना लजी। थे ताम यूहन्नासे लबा गे भन्दा ग्रेन मुबा। ††† 11:12 लुका १६:१६ ††† 11:14 मला ४:५; मत्ती १७:१०-१३; मर्कु ९:११-१३

बुद्धिग्याम गे लबा म्हिदा थेसे लबा गेगदेग्यामसेन थे ठीक हिन्ना भिसी था याङ्ला।”

येशूसे विश्वास आलबा शहरला म्हिगदेदा बङ्बा

लुका १०:१३-१५

20 जमाहेन्से जुन जुन नाम्सारी येशूसे ल्हानान उदेकला गेगदे लबा मुबा, थे नाम्साला म्हिगदेदा दाहेन्से ज्यबा तसेला आरे भिसी सुङ्बारी छ्याइजी, तिगदा भिसम थेनीगदेसे हाड हाडला पाप ख्लासी परमेश्वरपट्टि आदो:नी।

21 “खोराजीनदेन बेथसेदाला म्हिगदे, एनीगदेसे परमेश्वरग्याम सजाय याङ्ला। तिगदा भिसम एनीगदेला नाम्सारी लबा हङ्बा उदेकला गेगदे दुरोसदेन सीदोन शहररी लबा हिन्सम ओन्मान थेनीगदेसे बोरा क्वान्सी मेफ्रा फोर्सी हाड हाडला पाप ख्लासी परमेश्वरपट्टि दो:सेला मुबा। †22 तर एनीगदेसे डाला ताम इयान्गो, परमेश्वरसे निसाफ लबा धुङ्री एनीगदेला दुख भन्दा दुरोसदेन सीदोनला म्हिगदेला दुख नाखम्बा तला †23 कफर्नहुमला म्हिगदे, तिग एनीगदे स्वर्गरीन धोला भिसी म्हन्मुला? आधो! एनीगदेदा मी नर्गरी भ्याङ्ला। तिगदा भिसम एनीगदेला गुडरी लबा उदेकला गेगदे सदोमरी लबा हिन्सम थे नाम्सा तिनीधोना चिसेला मुबा। †24 च्यागो, परमेश्वरसे निसाफ लबा धुङ्री सदोमला म्हिगदेसे भन्दा एनीगदेसे ल्हानान सजाय याङ्ला?” ††

25 थे धुङ्री येशूसे चुहङ् भिसी प्रार्थना लजी, “मुदेन जम्बुलिडला प्रभु आबा, हाडदा धन्यवाद मुला, तिगदा भिसम हाडसे ज्ञान बुद्धि मुबा म्हिगदेदेन सेबा घोबा म्हिगदेग्याम छुम्सी थान्बा ताम तिगै आसेबा म्हिगदेदा उन्सी पिन्जी। 26 हिन्ना आबा, चुहङ् लमान हाड ताङ्जी।

27 “डाला आबासे डादा जम्मान स्हे जिम्मा पिन्बा मुला। थेतबासेलमा झा खाल हिन्ना भिसी आबादा बाहेक स्थान्दो खालैदान था आरे। थेहङ् लसीन आबा खाल भिसी झादेन झासे आबादा डोसेना लबा म्हिगदेसे बाहेक स्थान्दो खालैदान आबा खाल हिन्ना भिसी था आरे। †

डा मुबा ग्लारी खसी ब्लप्या न्हउ

28 “धोइ पुङ्सी ब्लप्या म्हिगदे, डा मुबा ग्लारी खउ, डाइ एनीगदेला ब्लप्या साल्ना लला। 29 डाला जुवा †† पुङ्सी डाग्याम लोपो, तिगदा भिसम डाला सेम डेम्बादेन दयासे प्लिङ्बा मुला। थेतबासेलमा एनीगदेला सेमरी शान्ति तला। †30 तिगदा भिसम डाइ काप्या जुवा सजिलो मुला, ओच्छे डाइ काप्या धोइ याङ्बा मुला।”

येशू ब्लप्या न्हबा धिननाएनोन प्रभु हिन्ना

मर्कुस २:२३-२८; ३:१-६; लुका ६:१-११

12 येशूदेन थेला चेलागदे ब्लप्या न्हबा धिनकुनु बुग्याम फेप्यान मुबा। थे धुङ्री फोखेन्बासे लमा थेला चेलागदेसे ग्वाला नम थुसी चबारी छ्याइजी। †2 थेनीगदेसे चुहङ् लबा म्राङ्सी फरिसीगदेसे येशूदा “च्यागो, हाडला चेलागदेसे ब्लप्या न्हबा धिनकुनु लबारीन आतबा गे लजी” भिसी पाङ्जी।

3 जमाहेन्से थेनीगदेदा येशूसे चुहङ् भिसी सुङ्जी, “दाऊददेन थेला ह्योगदेदा फोखेन्बा धुङ्री थेनीगदेसे तिग लजी? तिग एनीगदेसे खाइमै परमेश्वरला बचन पढब लबा आरे? ††4 थे धुङ्री दाऊदसे परमेश्वरला दिमरी वाङ्सी परमेश्वरदा फुल्बा गेड भसी हाडला ह्योगदेदेन छ्याम ठिक्सी चजी। थे गेड थेनीगदेसे चबारीन आतमुबा। तिगदा भिसम थे गेड परमेश्वरला मन्दिररी पूजा लबा म्हिसे जे चबारी तमुबा। ††5 ओच्छे एनीगदेसे परमेश्वरसे मोशादा पिन्बा ठिम पढब लबा आरे? ब्लप्या न्हबा धिनकुनुएनोन परमेश्वरला मन्दिररी पूजा लबा म्हिगदेसे गे लमुला, तसैनोन थेनीगदेसे पाप लबा मुला भिसी आम्हन्मुला। ††6 तर एनीगदेसे डाला ताम इयान्गो,

§ 11:21 यशै २३:१-१८; इज २६:१-२८:२६; योए ३:४-८; आमो १:९-१०; जक ९:२-४ †† 11:23 यशै १४:१३-१५; उत्प १९:२४-२८ ††† 11:24 मत्ती १०:१५; लुका १०:१२ †† 11:27 यूह ३:३५; १:१८; १०:१५ ††† चुरी जुवा भिबा चा परमेश्वरसे सुङ्बा ताम इयान्बादेन गाहो गे हिन्ना। †† 11:29 यर्मि ६:१६ †† 12:1 व्यव २३:२५ ††† 12:3 १ शमू २१:१-६ ††† 12:4 लेवी २४:९ ††† 12:5 गन्ती २८:९-१०

परमेश्वरला मन्दिर भन्दा घेन चुरी स्थान्दो खालै मुला। 7 थेतबासेलमा 'डाड म्हाइबा चा बलिदान आहिन, तर एनीगदेसे स्थान्दोदा लबा दया हिन्ना' भिसी बचनरी भिबा ताम घोबा हिन्सम एनीगदेसे तिगै दोष आरेबा म्हिदा दोष आलसेला मुबा। 8 तिगदा भिसम परमेश्वरसे पुइखबा म्हि बल्पा न्हाबा धिनना प्रभु हिन्ना।"

बल्पा न्हाबा धिनकुनु येशूसे आखम्बा म्हिदा खम्मा लबा

9 थेग्याम येशू यहूदीगदे हुप तबा दिमरी फेप्जी। 10 थेरी या गिक खर्बा म्हि मुबा। फरिसीगदेसे येशूदा दोष लबाला लागिरी "तिग बल्पा न्हाबा धिनकुनु खालै म्हिदा खम्मा लबा ठीक हिन्ना?" भिसी इयोइजी।

11 जमाहेन्से येशूसे थेनीगदेदा चुहइ भिसी सुइजी, "एनीगदे न्हडरी खालैला ग्यु गिक बल्पा न्हाबा धिनकुनु व्हाडरी ताइजी भिसम एसे थे ग्युदा आते:ना थेहइन्नेन थान्ना? 12 एनीगदेसे ग्युदा मी ते:मुला भिसम म्हि ग्यु भन्दा घेन आहिन? थेतबासेलमा बल्पा न्हाबा धिनकुनु खालैदा ज्यबा लबा ठीक हिन्ना।"

13 जमाहेन्से येशूसे थे म्हिदा "एला या तन्गब लउ" भिसी सुइजाहेन्से थेसे या तन्गब लजी। तन्गब लमैछ्याम थेला या अर्गु या हइबान ज्यबा तजी। 14 जमाहेन्से फरिसीगदे थेग्याम थोन्सी निजी, ओच्छे येशूदा खाहइ लसी साइबा भिसी हाड हाड न्हडरी सल्लाह लबारी छ्याइजी।

परमेश्वरसे धम्बा म्हि

15 फरिसीगदेला ताम था याइसी येशू थेग्याम फेप्जी। जमाहेन्से म्हिला हुलएनोन येशूदेन छ्यामनोन खजी, ओच्छे येशूसे आखम्बा जम्मान म्हिगदेदा खम्मा लजी। 16 तर येशूसे थे म्हिला ल्हुडरी मुबा म्हडदा "च्यागो, डा परमेश्वरला झा हिन्ना भिसी खालैदा थापाङ्गा" भिसी सुइजी। 17 यशैया भिबा अगमवक्तासे पाइबा ताम पूरा तबारीन येशूसे चुहइ सुइबा हिन्ना। यशैया अगमवक्ताग्याम परमेश्वरसे चुहइ भिसी सुइबा मुला,

18 "डाइ धम्बा डादा तेन्बा म्हि म्हाइसी डा ताइबा मुला।

ओच्छे थेदा डाइ माया लसी डाला आत्मा थेथोरी थान्सी पिन्बा मुला, थेसे डाइ लबा निसाफला बारैरी जम्मान यहुलला म्हिगदेदा पाइला।

19 थे छेबा बइबा लसी आभ्र

ओच्छे ल्हानान क्रिइसीएनोन आभ्र।

थेतबासेलमा थे ग्यामरीक्यार क्रिइसी भ्रबा खालैसे आथे:।

20 थिबा मादा आक्युइना जोगब लसी थान्बा हइ लसी दुखरी मुबा म्हिगदेदा थेसे जोगब लसी थान्ना।

थेहइ लसीन छ्युगु जिन्सी सिबारी छ्याइबा नाडसलदा सिआपुइबा हइ लसी थेसे

विश्वासरी कमजोर तबा म्हिगदेदाएनोन जोगब लसी थान्ना।

ओच्छे जम्मादान ठीक निसाफ लसी थार्ना लला।

21 थेतबासेलमा जम्मान यहुलला म्हिगदेसे थेथोरी आश लला।" 4

येशूदेन म्हडला ग्ले बालजिबुल

मर्कुस ३:२०-३०; लूका ११:१४-२३

22 जमाहेन्से म्हिगदेसे म्हडसे स्याप्सी ताइ दोबादेन मी आम्राइबा म्हि गिकदा येशू मुबा ग्लारी भजी। येशूसे थेदा खम्मा लजी, जमाहेन्से थेसे म्हाइखम्बी तामएनोन पाइखम्बी। 23 चु म्हाइसी थेरी मुबा जम्मान म्हिगदे उदेक तसी "चु दाऊद ग्लेला सन्ताननोन हिन्ना?" भिसी भिजी। 4

24 तर चुहइबा ताम थे:सी फरिसीगदेसे येशूदा "चु म्हिसे मी म्हडगदेला ग्ले बालजिबुलला 4 शक्तिग्याम जे म्हडगदे ताप्बा हिन्ना" भिसी भिजी। 4

25 तर थेनीगदेला सेमला ताम था याइसी येशूसे थेनीगदेदा चुहइ भिसी सुइजी, "च्यागो, जुन यहुलला म्हिगदे हाड हाड न्हडरी तोबा छेबा लला थे यहुल्ला नाश तला, ओच्छे दिम गिकलान म्हिगदेन हाड हाड न्हडरी

† 12:7 मत्ती ९:१३; होशे ६:६†† 12:11 लूका १४:५‡ 12:21 यशै ४२:१-४‡† 12:23 मत्ती ९:२७‡‡ "बालजिबुल" भिबा शैतानना अर्गु मिन हिन्ना। ‡‡† 12:24 मत्ती ९:३४; १०:२५

आढिकनी भिसम थे दिमएनोन फुप्ला। 26 थेतबासेलमा शैतानसे शैतानदान ताप्जी भिसम थेनीगदे हाड हाड न्हडरी फेला। थेहइ लजी भिसम थेनीगदेला यहुल्ला खाहइ लसी टुला? 27 डाइ बालजिबुलला शक्तिग्याम म्हड ताप्पुला भिसम एनीगदेला चेलागदेसे चा खाल्ला शक्तिग्याम म्हड ताप्बा हिन्ना? थेतबासेलमा एनीगदेला गल्ती थेनीगदेसेन उन्ना। 28 तर डाइ परमेश्वरला आत्माग्याम म्हड ताप्बा मुला भिसम एनीगदेला गुडरी परमेश्वरला यहुल्ला खसी जिन्बा मुला।

29 "भइबा म्हिला दिमरी वाइसी डाच्छा थे म्हिदा आखीना खालैसे थेला धन सम्पत्ति य्हो लखम्मा? थे भइबा म्हिदा 44 खीमाहेन्से जे थेसे थेला धन सम्पत्ति भोर्खम्मा।

30 "जुन म्हि डादेन छ्याम आढिक, थे म्हि डाला बिरोधी तला। ओच्छे जुन म्हिसे डा मुबा ग्लारी म्हिगदे आभ, थे म्हिसे डाला बिरोधी गे लला। 31 थेतबासेलमा म्हिगदेसे जस्तोन पाप गेदेन पाप तामगदे लसैनोन थेनीगदेदा माफ लला। तर परमेश्वरला आत्मादा बिरोध लसी पाप ताम लबा म्हिसे खाइमै माफ आयाइ। 32 थेहइ लसीन खालै म्हिसे परमेश्वरसे पुइखबा म्हिदा बिरोध लसी ताम पाइसै थेसे माफ याइला। तर परमेश्वरला आत्मादा बिरोध लसी ताम पाइजी भिसम थेदा दान्देल्ला धुइरी माफ आल, लिच्छाला जुनीरीनोन माफ आयाइ। 4

दोड खाहइ लसी डोसेबा

लूका ६:४३-४५

33 "ज्यना लसी सयार लबा दोडरी ज्यना लसीन रोला। ओच्छे ज्यना लसी सयार आलबा दोडरी ज्यना लसी आरो। थेतबासेलमा सयार लजीम कि आलजीम भिबा ताम रोग्यामसेन था तला। 4†34 पुख्रीला कोलागदे, एनीगदेला सेमरीन पाप मुला भिसम खाहइ लसी ज्यबा ताम पाइखम्मा? तिगदा भिसम सेमरी जुन ताम मुला, थेनोन ताम एनीगदेसे पाइबा हिन्ना। 35 ज्यबा सेम मुबा म्हिला सेम न्हडग्याम ज्यबान ताम थोन्मुला ओच्छे नइबा सेम मुबा म्हिला सेम न्हडग्याम नइबान ताम थोन्मुला। 36 थेतबासेलमा एनीगदेसे डाला ताम इयान्गो, परमेश्वरसे निसाफ लबा धिनकुनु आतो:बा ताम पाइबा म्हिगदेसे हाड हाडला हिसाब उन्तो:ला। 37 तिगदा भिसम एला दोष मुला कि आरे भिबा एला तामग्यामसेन था तला।"

म्हिगदेसे उदेकला चिनु म्हाइबा

मर्कुस ८:११-१२; लूका ११:२९-३२

38 जमाहेन्से यहूदी धर्मगुरुगदेदेन फरिसीगदे न्हडला कोइ कोइसे येशूदा "गुरु, इन्दा हाडसे लबा उदेकला गे च्याबा सेम मुला" भिसी पाइमा, 4

39 येशूसे थेनीगदेदा चुहइ भिसी जोहाब पिन्जी, "नइबा बानिबेहोर थोसी स्थान्दोदेन छ्याम ब्रेल्सी भ्रबा म्हिगदेसे उदेकला चिनु जे म्हाइमुला। तर दान्देल्ला म्हिगदेदा चा योना अगमवक्ताला चिनु बाहेक अर्गु चिनु आउन। 40 तिगदा भिसम धिन सोम म्हुन सोमधोना योना घेन तार्डाला फोरी चिबा हइ लसी परमेश्वरसे पुइखबा म्हिगदेन धिन सोम म्हुन सोमधोना धुसारी तला। 41 च्यागो, परमेश्वरसे निसाफ लबा धुइरी निनवे शहरला म्हिगदे रे:सी दान्देल्ला म्हिगदेला दोष उन्ना। तिगदा भिसम योना अगमवक्तासे पाइबा परमेश्वरला यहुल्ला समाचार थे:सी, थेनीगदे हाड हाडला पाप खलासी परमेश्वरपट्टि दो:बा मुबा। तर चुरी योना अगमवक्ता भन्दा घेन म्हि गिक मुला। तसैनोन एनीगदेसे थेला ताम आइयान्नी। 42 निसाफ लबा धुइरी ल्होग्याम खबा ग्लेस्यासे दान्देल्ला म्हिगदेला दोष उन्ना, तिगदा भिसम थे सोलोमन ग्लेला ज्ञान बुद्धिला ताम इयान्बारी ल्हानान थारेडग्याम खबा मुबा। तर च्यागो, चुरी सोलोमन ग्ले भन्दा घेन म्हि मुसैनोन थेला ताम आइयान्नी। 4

44†† येशूसे चु कथा थेसे भइबा म्हि हइबा शैतानना ग्लेदा ढाजी भिसी घोना लबारी सुइबा हिन्ना। तिगदा भिसम थेसे म्हडदा म्हिला ल्हुइग्याम ताप्बा मुबा। § 12:30 मर्कु ९:३९ §† 12:32 लूका १२:१० §†† 12:33 मत्ती ७:२० §‡ 12:34 मत्ती ३:७; २३:३३; १५:१८; लूका ३:७ §†† 12:35 मत्ती १५:१८ §† 12:38 मत्ती १६:१; मर्कु ८:११ §‡ 12:39 मत्ती १६:४; मर्कु ८:१२ §†† 12:40 जोना १:१७ §‡‡ 12:41 जोना ३:५ §§§ 12:42 १ राजा १०:१-१०; २ इति ९:१-१२

डाच्छा थोन्सी निबा म्हड दोःसी खमाहेन्से

43 “म्हड म्हिला ल्हुङ्ग्याम थोन्सी निमाहेन्से थेसे बल्लबा न्हबारी तोडतोडबा ग्लारीक्यार ग्ला म्हाइसी भ्रला। ओच्छे खानडएनोन बल्लबा न्हबारा ग्ला आयाङ्गाहेन्से, 44 ‘डा जुन म्हिला ल्हुङ्ग्याम थोन्सी खजी थेनोन म्हिला ल्हुङ्गरी चिबारी निड’ भिसी दोःसी निला। दोःसी खमा थेसे डाच्छा हाड चिबा ग्ला खालै आरेबा साडसाडबा म्हाइला। 45 जमाहेन्से थे म्हड निसी हाड भन्दा नडबा अर्गु गोर निस म्हडगदे भसी थे म्हि न्हडरी वाइसी चिमुला। थेतबासेलमा थे म्हिला गति डाच्छाला भन्दा लिच्छाला गति झन नडबा तला। दान्देला म्हिगदेदाएनोन थेहड्बान तला।”

येशूला आमामेन आलेगदे
मर्कूस ३:३१-३५; लूका ८:१९-२१

46 येशू म्हिगदेदेन छ्याम ताम लबान लबा धुडरी येशूदेन छ्याम ताम लबारी भिसी थेला आमामेन आलेगदे मडग्यार खसी चिबा मुबा।

47 जमाहेन्से म्हि गिकसे “हाडदेन छ्याम ताम लबारी भिसी हाडला आमामेन आलेगदे मडग्यार खसी चिमुला” भिसी येशूदा पाड्जी।

48 तर येशूसे थे म्हिदा “डाला आमा खाल? डाला आलेगदे खाल?”

49 ओच्छे येशूसे हाडला चेलागदेदा उन्बान चुहड् भिसी सुड्जी, “च्यागो, चुरी मुबा जम्मान डाला आमामेन आलेगदे हिन्ना। 50 तिगदा भिसम जुन म्हि स्वर्गरी धन्छ्याबा डाला आबासे म्हन्बा अन्छार भ्रला थेनोन डाला आमा, डाला आडा ओच्छे डाला आले हिन्ना।”

ब्लु द्ववबाला उखान
मर्कूस ४:१-९; लूका ८:४-८

13 जमाकुनु येशू दिमग्याम फेप्सी समुन्द्रला कुनीरी धन्छ्याजी।
2 ओच्छे थेरी म्हिला हुल मुबासेलमा येशू दोंगारी धन्छ्याजी। ओच्छे म्हिला हुल चा समुन्द्रला कुनीरीक्यार राप्सी चिजी। 3 जमाहेन्से थेरी मुबा म्हिगदेदा येशूसे उखानग्याम ल्हानान ताम लोष्वान चुहड् भिसी सुड्जी, “च्यागो, ब्लु द्ववबा म्हि गिक ब्लु द्ववबारी भ्रजी। 4 थे म्हिसे ब्लु द्ववमा कोड ब्लु ग्यामरी परब तजी, थे ब्लु चरागदे खसी चजी। 5 कोड ब्लु चा युडबाला घहड मुबा सरी परब तजी, ओच्छे थेरी साप्रा ल्हाना आरेबासे लमा योनान फुड्जी। 6 तर साप्रा ल्हाना आरेबासे लमा थेला टा नुजा निआम्पाड्नी। थेतबासेलमा धिनीसे क्रोसी थे दोड सिजी। 7 कोड ब्लु चा पुजु झाडरी परब तजी, ओच्छे थे ब्लुदेन पुजु दोड छ्याम छ्यामनोन फुड्जी। तर पुजु दोड ल्हेबान निबासे लमा थे दोडदा हाप तजी। 8 कोड ब्लु चा ज्यबा सरी परब तसी फुड्जी, ओच्छे कोड दोडरी दोब्बर, कोड दोडरी तेब्बर, कोड दोडरी चौबरधोना रोजी। 9 जुन म्हिदा इयान्बा सेम मुला थेसे इयान्सी घोड।”

येशूसे तिगदा उखान सुड्बा?
मर्कूस ४:१०-१२; लूका ८:९-१०

10 जमाहेन्से चेलागदेसे येशूदा “हाडसे थेनीगदेदा तिगदा उखानग्यामसे जे लोष्वा?” भिसी इयोडमा, 11 येशूसे थेनीगदेदा चुहड् भिसी जोहाब पिन्जी, “म्हिसे था आयाड्बा स्वर्गला यहुल्साला ताम डाइ एनीगदेदा घोखम्बा ज्ञान बुद्धि पिन्बा मुला। तर थेनीगदेदा चु ज्ञान बुद्धि पिन्बा आरे। 12 तिगदा भिसम जुन म्हिसे डाइ लोष्वा तामदा सेम लसी इयान्ना, थेदा डाइ अझन घोना लला। तर डाइ लोष्वा ताम आइयान्बादा चा थेसे जुन घोबा मुला थे तामएनोन म्हाना लला। 13 थेनीगदेसे डाइ लबा गे च्याबाम च्यामुला तर आम्राङ्गला, ओच्छे डाइ पाड्बा ताम इयान्बाम इयान्मुला तर आघोमुला। थेतबासेलमान डाइ थेनीगदेदा उखानग्याम पाड्बा हिन्ना।

14 “परमेश्वरसे यशैया अगमवक्ताग्याम सुड्बा ताम चुहड् लसी पूरा तबा मुला,

‘थेनीगदेसे इयान्बाम इयान्मुला तर खाइमै आघोमुला,
च्याबाम च्यामुला तर खाइमै आम्राङ्गला,

† 13:2 लूका ५:१-३ †† 13:12 मत्ती २५:२९; मर्कू ४:२५; लूका ८:१८; १९:२६

15 तिगदा भिसम चु म्हिगदेला सेम कोड्बा मुला,
थेनीगदेला नाब्यडसे आथे:मुला,
ओच्छे थेनीगदेसे मी च्युम्बा मुला।
आहिन्सम थेनीगदेसे म्हाइसेला मुबा,
थे:सेला मुबा, सेमहेन्सेन घोसेला मुबा,
डापट्टि दो:सेला मुबा,
ओच्छे थेनीगदेदा डाइ खम्ना लसेला मुबा।” † †

16 जमाहेन्से येशूसे हाडला चेलागदेदा चुहड् भिसी सुड्जी, “एनीगदेसे परमेश्वरग्याम मोलम याड्ला, तिगदा भिसम एनीगदेसे म्हाइबाएनोन मुला थे:बाएनोन मुला। 17 च्यागो, एनीगदेसे डाला ताम इयान्ना, ल्हानान अगमवक्तादेन परमेश्वरसे म्हन्बा अन्छार भ्रबा म्हिगदेसे एनीगदेसे म्हाइबा चु तामगदे च्याबारी म्हाइमुबा। तर थेनीगदेसे आम्राङ्गनी, ओच्छे एनीगदेसे थे:बा ताम थेनीगदेसे थे:बारी म्हाइजी, तर थे:बारी आम्याड्नी। †

ब्लु द्ववबा उखानना अर्थ
मर्कूस ४:१३-२०; लूका ८:११-१५

18 “लु, ब्लु द्ववबा उखानना अर्थ इयान्गो। 19 ग्यामरीक्यार परब तबा ब्लुला अर्थ चुनोन हिन्ना, जुन म्हिसे परमेश्वरला बचन इयान्ना, तर थेसे घोबा भन्दा डाच्छान शैतान खसी थेनीगदेला सेमग्याम थे ताम ब्यन्सी भोर्ला। 20 युडबाला घहड मुबा सरीक्यार परब तबा ब्लुला अर्थ चुनोन हिन्ना, जुन म्हिसे परमेश्वरला बचन इयान्सी तुरुन्तन विश्वास लला। 21 तर थेनीगदेला विश्वासला टा आरेबासे लमा, थे छिन्नड जे चिला। ओच्छे परमेश्वरला बचनदा विश्वास लबासे लमा थेनीगदेदा आपत विपत खमाहेन्से थेनीगदेसे विश्वास लबा खलाला। 22 पुजु झाड न्हडरी परब तबा ब्लुला अर्थ चा जुन म्हिसे परमेश्वरला बचन इयान्ना, तर चु जम्बुलिडला धन्दा सुददिन धन सम्पत्तिला लोभसे लमा परमेश्वरला बचनदा गे लआपुड्। थेतबासेलमा थेला विश्वासग्याम तिगै आरो। 23 तर ज्यबा सरी परब तबा ब्लुला अर्थ चा जुन म्हिसे परमेश्वरला बचन इयान्सी हाडला सेमरी थान्ना, ओच्छे थेला विश्वासग्याम दोब्बर, तेब्बर, चौबरधोनाला रो रोला।”

कोडोड म्हाला उखान

24 दो:सी येशूसे थेनीगदेदा उखान गिक सुड्जी, “च्यागो, स्वर्गला यहुल्सा हाडला बुरी ज्यबा ब्लु द्ववबा म्हि हड्बान हिन्ना। 25 तर जम्मान म्हिगदे म्हेर्बा धुडरी थेला शत्रु खसी ग्वा न्हडरी कोडोड † † द्ववसी निजी। 26 थे ग्वा ल्हेबान निसी रोबा धुडरी चा ग्वा न्हडरी कोडोडला दोडएनोन म्हाइजी।

27 “थेतबासेलमा नोकरगदे दिमला मालिक मुबा ग्लारी खसी ‘बुरी हाडसे ग्वा जे द्ववबा आहिन? थेरीम कोडोडएनोन फुड्जीम’ भिसी भिजी।

28 “जमाहेन्से दिमला मालिकसे थेनीगदेदा ‘खालै शत्रुसे चुहड् लबा हिन्ना’ भिसी भिमा, नोकरगदेसे ‘थेहड् भिसम डनी निसी थे कोडोड स्योड्सी भ्याङ्गो?’ भिसी भिजी।

29 “तर थे मालिकसे नोकरगदेदा चुहड् भिसी पाड्जी, ‘दान्देन थास्योड्गो, तिगदा भिसम एनीगदेसे कोडोड भिसी स्योड्मा ग्वाएनोन स्योड्सी भ्याङ्गला। 30 बरु ग्वा खन्बा धुड आततेधोना थेहड्बान मुगै। ग्वा खन्बा धुडरी खन्बागदेदा डाच्छा कोडोड स्योड्सी खाड्बाला लागिरी ग्ला गिकरी थान्ना। तर एनीगदेसे ग्वा जे भसी डाला भकारीरी थान्ना भिसी पाड्ला।”

पच्छे ब्लुला उखानदेन खमीरला उखान
मर्कूस ४:३०-३४; लूका १३:१८-२१

31 दो:सी येशूसे थेनीगदेदा अर्गु उखान गिक सुड्जी, “च्यागो, स्वर्गला यहुल्सा म्हि गिकसे घुन्यानरी द्ववबा पच्छे ब्लुला गेडा गिक हड्बान हिन्ना। 32 पच्छेला गेडा ढापट्टुपगदे न्हडरी जम्मान भन्दा जजा तसैनोन थे फुड्सी ल्हेबान निसी दोडनोन दोला। ओच्छे थे पच्छे दोडला हाँगारी चरागदे खसी जड स्योसी चिला।”

† 13:15 यशै ६:९-१० †† 13:17 लूका १०:२३-२४ †† “कोडोड” भिबा चा सुन हड्बान म्हाइबा म्हा हिन्ना।

33 दोःसीनोन येशूसे थेनीगदेदा अर्गु उखान गिक सुड्जी, “च्यागो, स्वर्गला खुल्सा चा गेडरी युबा खमीर हडबान हिन्ना। थे खमीर म्रिडम्हेमे गिकसे फाम सोम ब्रायी युसी ज्योप्ला। ओच्छे थे ब्रा आभोतेधोना थेसे घप्सी थान्ना।”

34 येशूसे म्हेला हुलदा जम्मान ताम उखानग्यामसे जे लोप्जी। उखान आसुड्तेधोना थेनीगदेदा येशूसे तिगै ताम आलोप्जी। 35 परमेश्वरसे अगमवक्ताग्याम सुड्बा ताम चुहड् लसी पूरा तजी, “डाइ ताम लमा उखानग्यामसे जे लला, ओच्छे जम्बुलिड ठुङ्गाहेन्से दान्देधोना था आरेबा ताम डाइ घोना लला।” †

कोडोड म्राला उखानना अर्थ

36 जमाहेन्से थे म्हेला हुलदा ख्लासी येशू दिम न्हडरी फेप्जी। ओच्छे थेला चेलागदेएनोन दिम न्हडरी खसी, “बुरी फुड्बा कोडोड म्राला उखानना अर्थ घोना लसी पिन्गो” भिसी इयोड्मा, 37 येशूसे थेनीगदेदा चुहड् भिसी सुड्जी, “ज्यबा ब्लु द्बवा म्हे चा परमेश्वरसे पुड्खबा म्हे हिन्ना। 38 बु भिबा चा चु जम्बुलिड हिन्ना ओच्छे ज्यबा ब्लु भिबा चा परमेश्वरला खुल्साला म्हेगदे हिन्ना, कोडोड म्राला भिबा चा परमेश्वरदा बिरोध लबागदे हिन्ना। 39 ओच्छे कोडोड द्बवा शत्रु चा शैतान हिन्ना, बाली खन्बा धुड् भिबा चा परमेश्वरसे जम्बुलिडला जम्मान म्हेगदेला निसाफ लबा धुड् हिन्ना। †† ओच्छे बाली खन्बागदे चा स्वर्गदूतगदे हिन्ना। 40 कोडोड स्योड्सी म्हेगदेसे खाहड् लसी मेरी फर्मूला थेहड् लसीन परमेश्वरसे जम्बुलिडला जम्मान म्हेगदेला निसाफ लबा धुड्नीनोन थेहड्नीनोन लला। 41 जमा धुड्नी परमेश्वरसे पुड्खबा म्हेसेनोन डाला स्वर्गदूतगदेदा पुड्खला। थेनीगदेसे म्हेगदेदा पाप लपुड्बा जम्मान स्हेदेन पाप गे लबा जम्मान म्हेगदेदा डाला खुल्साग्याम हुप लला। 42 ओच्छे थेनीगदेदा मेरी युला, थेरी थेनीगदेदे स्वा क्रेसी क्रेसी क्राबा क्रिड्बा लला। 43 जमाहेन्से परमेश्वरसे म्हेन्बा अन्धार भ्रबा म्हेगदेदे हाडला परमेश्वर आबाला खुल्सारी धिनी हड्नीनोन य्हाल य्हाल तसी चिला। जुन म्हेदा घोबा सेम मुला थेसे ज्यना लसी इयान्सी घोड।

ल्हूसी थान्बा धनना उखानदेन मोतीला उखान

44 “च्यागो, स्वर्गला खुल्सा वारीरी ल्हूसी थान्बा धन हड्बान हिन्ना। थे धन म्हे गिकसे स्याप्जी। जमाहेन्से थे ल्हानान ताड्सी थे धन थेरीन ल्हूसी थान्सी दिमरी निजी। ओच्छे थेसे हाडदेन छ्याम मुबा जति जम्मान चुड्सी थे वारी ग्लुजी।

45 “चुहड् लसीन स्वर्गला खुल्सा ज्यबा खाल्ला मोती म्हाड्सी भ्रबा व्यापारी हड्बान हिन्ना। 46 थेसे ज्यबा खाल्ला मोती स्याप्माहेन्से हाडदेन छ्याम मुबा जति जम्मान चुड्सी थे मोती ग्लुजी।

तार्डा चुड्बा घ्याडला उखान

47 “थेहड् लसीन स्वर्गला खुल्सा समुन्द्ररी रोप्बा घ्याड हड्बान हिन्ना। थे घ्याडरी ल्हानान थेरीला तार्डागदे परब तला। 48 ओच्छे घ्याड नाडनोन तार्डा परब तमाहेन्से म्हेगदेसे समुन्द्रला कुनीरी भसी गे खेल्बा तार्डागदे ताडरी थान्ना, गे आखेल्बा तार्डागदे पाखारी भ्याड्ला। 49 चुहड्नीनोन लसी परमेश्वरसे जम्बुलिडला जम्मान म्हेगदेला निसाफ लबा धुड्नीनोन स्वर्गदूतगदे खसी ज्यबा गे लबा म्हेगदेदेन नड्बा गे लबा म्हेगदेदा फेला। 50 ओच्छे परमेश्वरसे कुल्बा ताम आड्यान्बागदेदा चा मेरी युला। थेरी म्हेगदेदे स्वा क्रेसी क्रेसी क्राबा क्रिड्बा लला।”

छारदेन पुरानो धन

51 जमाहेन्से येशूसे थेनीगदेदा “एनीगदेसे चु ताम जम्मान घोजी?” भिसी इयोड्मा, “घोजी” भिसी थेनीगदेसे येशूदा जोहाब पिन्जी। 52 थेतबासेलमा येशूसे चेलागदेदा “च्यागो, स्वर्गला खुल्साला बारैरी था याड्बा यहूदी

धर्मगुरुगदे दिमला दोप्ता हड्बान हिन्ना। तिग्दा भिसम थेसे हाडला डुकुटीग्याम छारदेन पुरानो धनगदे तेःला” भिसी सुड्जी।

नासरतला म्हेगदेसे येशूदा मान आलबा

मर्कूस ६:१-६; लूका ४:१६-३०

53 चु उखानगदे सुड्सी जिन्माहेन्से येशू थेंग्याम हाडला नाम्सारी फेप्जी। 54 ओच्छे हाडला नाम्सारी धोखमाहेन्से यहूदीगदे हुप तबा दिमरी फेप्सी थेरी मुबा म्हेगदेदा लोप्जी। येशूसे लोप्बा म्हाड्सी थेरी मुबा म्हेगदे उदेक तसी चुहड् भिजी, “चु म्हेसे चुहड्बा उदेकला गे लबा शक्तिदेन बुद्धि खानड्ग्याम याड्जी? 55 चु सिकर्मीला झा आहिन? चुला आमा मरियम ओच्छे आलेगदे याकूब, योसेफ, सिमोनदेन यहूदा आहिन? 56 चुला जम्मान आडागदे य्हाडदेन छ्यामनोन आरे? तसैनोन चुसे चु जम्मान ज्ञान बुद्धिदेन शक्ति खानड्ग्याम याड्जी?” 57 जमाहेन्से थेनीगदेदा येशूदेन छ्याम बोमो खजी। तर येशूसे थेनीगदेदा “च्यागो, अगमवक्तादा हाडला नाम्सारीदेन हाडला दिमरी बाहेक अर्गु खजिबै ग्लारी निसैनोन मान लला” भिसी सुड्जी। 58 थेनीगदेसे विश्वास आलबा म्हाड्सी येशूसे थेरी ल्हाना उदेकला गे आलनी।

बत्तिस्मा पिन्बा यूहन्नादा साड्बा

मर्कूस ६:१४-२९; लूका ९:७-९

14 थे धुडरी गालील अञ्चलरी शासन लबा हेरोदसे येशूसे लबा उदेकला गेला बारैरी थेःजी। 2 जमाहेन्से थेसे हाडला गे लबागदेदा “थे म्हे बत्तिस्मा पिन्बा यूहन्ना हिन्ना। थे सिबाग्याम सोसी खबा हिन्ना। थेतबासेलमान थेसे चुहड्बा उदेकला गेगदे लबा हिन्ना” भिसी भिजी। 3 हेरोदसे हाडला आले फिलिपला म्रिड हेरोदियाससे लमा डाच्छा यूहन्नादा इयाल्खानरी झाड्बा। 4 तिग्दा भिसम हेरोदसे हाडला आले चाडदा थान्बासे लमा यूहन्नासे हेरोददा “हाडसे आले चाडदेन छ्याम ब्याह लबा ठीक आहिन” भिसी पाड्बा। 5 थेतबासेलमा हेरोदसे यूहन्नादा साड्बारी म्हाड्मुबा। तर हेरोद म्हेगदेदे म्हाड्सी लोड्बा। तिग्दा भिसम म्हेगदेसे बत्तिस्मा पिन्बा यूहन्नादा अगमवक्ता हिन्ना भिसी भिमुबा। 6 हेरोदसे हाड न्हबा धिनदा ढन्सी घ्रेन भोज लजी। जमाकुनु हेरोदियासला झामे जम्मान म्हेगदेला डाच्छापट्टि स्हसी हेरोददा ल्हानान ताड्ना लजी। 7 थेतबासेलमा हेरोदसे थेदा “एसे जे हीबा थेनोन पिन्ना” भिसी कबुल लजी।

8 तर थेला आमासे थेदा बत्तिस्मा पिन्बा यूहन्नाला थोबो हीगो भिसी पाड्बासे लमा थेसे “डादा दान्देन बत्तिस्मा पिन्बा यूहन्नाला थोबो खार्बारी भउ” भिसी भिजी।

9 जमाहेन्से हेरोद ग्लेदा ल्हानान दुख इहम्जी। तसैनोन हाडला डोन्बोगदेला ओन्छाडरी जे हीसै पिन्ना भिसी ग्रान फाबासे लमा थेसे भिबा हड्नीनोन लउ भिसी सिपाहीगदेदा कुल्जी। 10 ओच्छे थेनीगदे इयाल्खानरी निसी यूहन्नाला थोबो थाजी। 11 जमाहेन्से यूहन्नाला थोबो खार्बारी भसी थे माड्दा पिन्जी। ओच्छे थे माड्से भोसी हाडला आमादा पिन्जी। 12 यूहन्नादा साड्जी भिबा ताम थेःमाहेन्से यूहन्नाला चेलागदे खसी लास भोसी ल्हुजी। जमाहेन्से यूहन्नाला चेलागदे येशू मुबा ग्लारी खसी थे जम्मान ताम पाड्जी।

येशूसे हजार डा म्हेदा चबा स्हे पिन्बा

मर्कूस ६:३०-४४; लूका ९:१०-१७; यूहन्ना ६:१-१५

13 बत्तिस्मा पिन्बा यूहन्नादा साड्जी भिबा ताम थेःमाहेन्से येशू हाड गिक जे दौंगारी क्रेःसी सुनसान ग्लारी फेप्जी। तर येशू थेंग्याम सुनसान ग्लारी फेप्जी भिबा ताम थेःसी शहर शहरग्याम म्हेला हुल भ्रसीन येशू मुबा ग्लारी निजी। 14 येशू समुन्द्रला कुनीरी धोमा ल्हानान म्हेला हुलदा म्हाड्सी थेदा दया रेःजी। थेतबासेलमा येशूसे थेनीगदेला आखम्बा म्हेगदेदा खम्ना लजी।

15 ओच्छे ड्यसे तमाहेन्से येशूला चेलागदे थे मुबा ग्लारी खसी “दाहेन्से ड्यसे तसी जिन्जी, चु सुनसान ग्लारी तिगै आरे। थेतबासेलमा चु म्हेगदेदा

† 13:35 भजन ७८:२ †† “निसाफ लबा धुड्” चा ग्रीक बाइबलरी जम्बुलिड जिन्बा धुड् भिसी भिबा मुला। पद ४० देन ४९ पदरीनोन चुहड् लसीन भिबा मुला।

‡ 13:57 यूह ४:४४ †† 14:3 लूका ३:१९-२० †† 14:4 लेवी १८:१६; २०:२९

पुडगो। ओच्छे थेनीगदे नाम्सा नाम्सा निसी हाड हाडला लागिरी चबा रहे लुसी चगै" भिसी येशूदा पाड्जी।

16 तर येशूसे थेनीगदेदा "चु म्हिगदेदा तिग्दा पुडसे? एनीगदेसेन चुगदेदा चबा रहे पिन्नो" भिसी सुड्जी।

17 जमाहेन्से थेनीगदेसे येशूदा "डन्देन छ्याम गोर डा गेडदेन गोर न्ही तार्डा भन्दा अर्गु तिगै आरे" भिसी भिजी।

18 येशूसे थेनीगदेदा "थे गेडदेन तार्डा डादा भउ" भिसी सुड्जी।

19 जमाहेन्से येशूसे म्हिगदेदा पाडरी चिपुड्जी। ओच्छे गेडदेन तार्डा यारी थोसी स्वर्गपट्टि स्हीबान परमेश्वरदा धन्यवाद पिन्जी। ओच्छे गेड क्युड्सी म्हिगदेदा भो लसी पिन्नो भिसी चेलागदेदा पिन्जी। जमाहेन्से चेलागदेसे भो लसी म्हिगदेदा पिन्जी। 20 जम्मान म्हिगदेसे घेन्ना चसीनोन लेड्बा गेडदेन तार्डा चेलागदेसे च्युक न्ही सोली दुड्जी। 21 थेरी गेड चबा म्हिगदे म्रिडम्हेमेदेन कोलागदे बाहेकनोन हजार डा हेम्फेबेगदे मुबा।

येशू समुन्द्रथोरी भ्रवा

मर्कूस ६:४५-५२; यूहन्ना ६:१६-२१

22 जमाहेन्से येशूसे तुरुन्तन हाडला चेलागदेदा दौंगारी क्रेःसी क्यामसडपट्टि हाड भन्दा डाच्छा पुड्जी। थे धुड्डी येशूसे चा म्हिला हुलदा पुडबान लजी। 23 म्हिगदे पुड्सी जिन्माहेन्से येशू हाड गिक जे प्रार्थना लबारी गडरी फेज्जी। थेरी ड्यसेधोनान येशू गिक जे मुबा। 24 थे धुड्डी चेलागदे क्रेःसी निबा दौंगा समुन्द्रला कुनीग्याम ल्हानान थारेड थोसी जिन्बा मुबा। तसैनोन लाबा उल्लोग्याम खबासे लमा समुन्द्ररी छाल रेःसी थेनीगदेदा क्यामसडपट्टि निबारी गाहो तबा मुबा।

25 स्थोला तीन बजेरीक्यार येशू समुन्द्रथोरी भ्रवान थेनीगदेपट्टि फेज्जजी।

26 चेलागदेसे येशू समुन्द्रथोरी भ्रसी फेज्जबान लबा म्राड्सी "चु मी म्हडनोन हिन्ना!" भिसी थेनीगदे लोड्सी क्रिड्जी। 27 तर तुरुन्तन येशूसे थेनीगदेदा "भड लउ, डानोन हिन्ना, थालोङ्गो" भिसी सुड्जी।

28 जमाहेन्से पत्रुससे येशूदा "प्रभु, हाडनोन हिन्सम डादाएनोन समुन्द्रथोरी भ्रसी हाड मुबा ग्लारी खउ भिसी सुड्जी" भिसी भिजी।

29 येशूसे "लु, खउ!" भिसी सुड्जाहेन्से पत्रुस दौंगाग्याम फाप्सी येशू मुबा ग्लारी निबारी समुन्द्रथोरी भ्रबारी छयाड्जी। 30 तर घेन लाबा खबा म्राड्सी थे लोड्जी। लोड्बासे लमा थे समुन्द्ररी डुबब तबारी छयाड्जी। जमाहेन्से थेसे "प्रभु, डादा जोगब लउ" भिसी क्रिड्जी।

31 येशूसे तुरुन्तन पत्रुसला या चुड्सी "खाड एला विश्वास, एसे तिग्दा शड्का लबा?" भिसी सुड्जी। 32 येशूदेन पत्रुस दौंगारी क्रेःमाहेन्से लाबा म्हाजी। 33 जमाहेन्से दौंगारी मुबा चेलागदेसे येशूदा फ्या लसी, "हाड पक्कान परमेश्वरला झा हिन्ना" भिसी भिजी।

येशूसे आखम्बा ल्हानान म्हिगदेदा खम्ना लबा

मर्कूस ६:५३-५६

34 थेनीगदे समुन्द्र थासी गनेसरते भिबा ग्लारी धोखजी। 35 थे ग्लाला म्हिगदेसे येशूदा डोसेमाहेन्से क्यारमारला नाम्साला म्हिगदेदा येशू फेज्जजी भिसी पाड्सी पिन्जी। जमाहेन्से म्हिगदेसे आखम्बा म्हिगदे जम्मादान येशू मुबा ग्लारी भसी, 36 "चुगदेदा हाडला क्वान्ना जो जे भिसै थुर्पुङ्गो" भिसी बिन्ती लजी, ओच्छे येशूला क्वान थुर्बा जति जम्मान खम्जी।

रिमठिमला बारेरी लोप्बा

मर्कूस ७:१-२३

15 यरूशलेमग्याम खबा फरिसीगदेदेन यहूदी धर्मगुरुगदे येशू मुबा ग्लारी खसी, 2 "हाडला चेलागदेसे तिग्दा आखे म्हेमेला रिमठिमदा खलाबा? तिग्दा चबा भन्दा डाच्छा या आख्बुबा?" भिसी ड्योड्मा, 3 येशूसे थेनीगदेदा चुहड् भिसी सुड्जी, "एनीगदेसे चा तिग्दा परमेश्वरसे कुल्बा ताम आड्यान्ना आखे म्हेमेला रिमठिम तेन्बा? 4 तिग्दा भिसम परमेश्वरसे 'एसे हाडला आबा आमामादा मान लउ,' ओच्छे 'जुन म्हिसे हाडला आबा आमामादा बिरोध लसी नड्बा ताम लला थेदा चा साडनोन तोःला' भिसी सुड्बा मुला।

15 तर एनीगदेसे चा 'जुन म्हिसे हाडला आबा आमामादा पिन्तोःबा रहे परमेश्वरदा फुल्बा मुला, थेसे हाडला आबा आमामादा मान लआतोः' भिसी लोप्मुला। 6 चुहड् लसी एनीगदेसे हाडला रिमठिम अन्धार भ्रगै भिसी परमेश्वरसे कुल्बा ताम चा गे आखेल्बा स्होबा मुला। 7 थेतबासेलमा कट्टीगदे, परमेश्वरसे यशैया अगमवक्ताग्याम सुड्बा ताम एनीगदेला गे अन्धार दिक्बा मुला।

8 'चु म्हिगदेसे सुडसे जे डादा मान लमुला, तर सेमहेन्से चा मान आलमुला।

9 ओच्छे थेनीगदेसे डादा तेन्बाम तेन्मुला, तसैनोन परमेश्वरसे कुल्बा तामदा भन्दा म्हिसे स्होबा रिमठिमदा घेन म्हन्मुला।" ††

10 जमाहेन्से येशूसे म्हिला हुलदा हाड मुबा ग्लारी ड्योड्सी, "डाड पाड्बा ताम तिग चीम भिसी एनीगदेसे घोबारी म्हाड्गो। 11 परमेश्वरदा तेन्बारी म्हिदा खजिबै चबा रहेसे न्होड्ना आल। तर म्हिला सेमग्याम थोन्बा नड्बा तामसे चा म्हिदा न्होड्ना लमुला" भिसी सुड्जी। †

12 जमाहेन्से चेलागदे येशू मुबा ग्लारी खसी "हाडला ताम थेःसी फरिसीगदे हाडदेन छ्याम बोमो खबा ताम हाडदा था मुला?" भिसी पाड्जी।

13 तर येशूसे चेलागदेदा चुहड् भिसी सुड्जी, "स्वर्गरी धन्छ्याबा डाला आबासे आसूबा दोडगदे †† स्योड्सी भ्याड्ला। 14 थेतबासेलमा थेनीगदेदा तिगै पाड्आतोः। थेनीगदे मी आम्राड्बा म्हिगदेदा लोप्बा मी आम्राड्बा म्हिगदे हिन्ना। थेतबासेलमा मी आम्राड्बा म्हिसे मी आम्राड्बादान चुड्सी भोर्सम न्हीनोन व्हाडरी ताड्ला।" †† ††

15 जमाहेन्से पत्रुससे येशूदा "म्हिगदेदा चबा रहेसे न्होड्ना आलमुला भिसी हाडसे सुड्बा ताम डन्दा घोना लसी पिन्नो" भिसी भिमा, 16 येशूसे थेनीगदेदा चुहड् भिसी सुड्जी, "दान्देधोना अड्ग एनीगदेसे घोबा आरे?

17 चबा रहे चमाहेन्से फोरी धोमुला। ओच्छे फोग्यामसेनोन मडग्यार थोन्मुला भिबा ताम एनीगदेदा था आरे? 18 तर म्हिला सेमरी जुन ताम मुला थेनोन ताम सुडग्याम थोन्मुला, ओच्छे थेनोन तामसे म्हिदा न्होड्ना लमुला। 19 तिग्दा भिसम म्हिला सेमग्याम थोन्बा नड्बा तामगदे चा म्हि साड्बा, म्हिला म्रिडदेन छ्याम ब्रेल्सी भ्रबा, खालैदेन छ्याम ब्रेल्सी भ्रबा, य्हो लबा, लुसीला ताम पाड्बा ओच्छे म्हिला तामगन लबा हिन्ना। 20 चु जम्मान तामसे चा म्हिदा न्होड्ना लमुला। तर या आख्बुना चसी म्हिदा न्होड्ना आलमुला।"

अर्गु य्हुलला म्रिडम्हेमेला विश्वास

मर्कूस ७:२४-३०

21 जमाहेन्से येशू थे शहर खलासी टुरोसदेन सीदोन भिबा ग्लारीक्यार फेज्जी। 22 थे शहरला अर्गु य्हुलला कनानी म्रिडम्हेमे गिक क्रिड्बान खसी येशूदा "प्रभु, दाऊद ग्लेला सन्तान, डादा दया लउ। डाला डामेदा म्हडसे ल्हानान दुख पिन्बा मुला" भिसी भिजी। 23 तर येशूसे तिगै जोहाब आपिन्नी। जमाहेन्से चेलागदेसे येशूदा "चु म्रिडम्हेमेदा चुग्याम पुड्गो। तिग्दा भिसम चु क्रिड्बान व्हाडला लिच्छा लिच्छा भ्रसी छेर्ना लजी" भिसी बिन्ती लजी।

24 जमाहेन्से येशूसे थे म्रिडम्हेमेदा "च्यागो, परमेश्वरसे डादा म्हाबा ग्यु हड् तसी चिबा इस्राएलला म्हिगदेला लागिरी जे पुड्खबा हिन्ना" भिसी सुड्जी।

25 तर थे म्रिडम्हेमेसे येशूदा फ्या लबान, "प्रभु, डादा ह्यो लउ" भिसी भिजी।

26 जमाहेन्से येशूसे थे म्रिडम्हेमेदा "च्यागो, कोलागदेदा पिन्तोःबा गेड नगीदा †† पिन्बा ठीक आहिन" भिसी सुड्जा, 27 थे म्रिडम्हेमेसे "हिन्ना प्रभु,

† 15:4 प्रस्था २०:१२; २१:१७; व्यव ५:१६; लेवी २०:९ †† 15:9 यशै २९:१३
 † यहुदीगदेला ठिम अन्धार खालैसे स्हान्दोदेन छ्याम दिक्सी परमेश्वरदा तेन्बारी थे चोखो ततोःबा मुबा। थे परमेश्वरसे कुल्बा खजिबै ताम अन्धार आभ्रनी भिसम थेदा अशुड् भिसी पाड्बा ओच्छे थे दोःसी शुड्द दोबारी थेसे बलि फुल्लोःबा मुबा। †† थे फरिसीगदे चा परमेश्वरसे आसूबा दोडगदे हड्बान हिन्ना। ओच्छे परमेश्वरसे थेनीगदे जम्मादान दोड स्योड्बा हड् लसी लेःला, तिग्दा भिसम थेनीगदेसे परमेश्वरसे म्हन्बा हड् लसी आलोपनी। †† चुदे खालै म्हि सत्य ताम आसेबा म्हिसे लोप्बा अन्धार भ्रजी भिसम तिरिकुनु थे नाश तसी निला। ††† 15:14 लूका ६:३९ ††† यहुदीगदेसे अर्गु य्हुलला म्हिगदेदा हेला लसी हि नगी

तर नगीसेनो न थेला दोप्तासे चमा सरी ताइबा भ्राइभुइ मी चम्याङ्गुला" भिसी भिजी।

28 जमाहेन्से येशूसे थे म्रिडम्हेमेदा "माइ, एला विश्वास घ्रेन चीम। एला विश्वाससे लमा एसे म्हन्बा हङ्गोन तबा मुला" भिसी सुङ्गी। थेनोन धुइरी थेला झामे खम्जी।

येशूसे ल्हानान थरीला रोगसे स्याप्बा म्हिदा खम्ना लबा

29 जमाहेन्से येशू थे ग्ला ख्लासी गालील समुन्द्रला कुनीग्याम गडरी फेप्पी धन्छ्याजी। 30 ओच्छे म्हिला हुल येशू मुबा ग्लारी खजी। थेनीगदेसे कुज्या तबा, मी आम्राइबादेन ताइ दोबा ओच्छे ल्हानान थरीला रोगसे स्याप्बा म्हिगदेदा भजी। जमाहेन्से येशूसे थे आखम्बा म्हिगदेदा खम्ना लजी। 31 येशूसे ताइ दोबा म्हि, कुज्या म्हि, मी आम्राइबा म्हिदेन जम्मान आखम्बा म्हिगदेदा खम्ना लबा म्राइसी थेरी मुबा जम्मान म्हिगदे उदेक म्हन्सी इसाएलला म्हिगदेसे तेन्बा परमेश्वरला जयजयकार लजी।

येशूसे हजार ब्लि म्हिदा चबा स्हे पिन्बा

मर्कूस ८:१-१०

32 जमाहेन्से येशूसे चेलागदेदा हाड मुबा ग्लारी इयोइसी, "चु म्हिगदे म्राइसी डादा दया रे:जी। तिगदा भिसम चुगदे डादेन छ्याम भ्रबा तिनी सोमरे तजी। ओच्छे चुगदेदेन छ्याम तिगै चबा स्हे आरे। थेतबासेलमा चुगदेदा फोइथाननोन पुइबारी आत। फोइथाननोन दिमरी पुइजी भिसम चुगदे ग्यामरीन बिहोस तला" भिसी सुङ्गी।

33 जमाहेन्से चेलागदेसे येशूदा "चुहङ्गुला तिगै आयाइबा ग्लारी चुदेला म्हिला हुलदा ख्वाबारी डन्से खानडग्याम गेड भसे?" भिसी भिजी।

34 येशूसे थेनीगदेदा "एनीगदेदेन छ्याम गेड गाते मुला?" भिसी इयोइमा, थेनीगदेसे "डन्देन छ्याम गोर निस गेडदेन जजाबा तार्डागदे जजाकी मुला" भिसी भिजी।

35 जमाहेन्से येशूसे थेरी मुबा म्हिला हुलदा पाडरी चिपुइजी। 36 येशूसे गोर निस गेडदेन तार्डा थोसी परमेश्वरदा धन्यवाद पिन्जी। ओच्छे गेड क्युइसी चेलागदेदा पिन्जी। जमाहेन्से चेलागदेसे म्हिगदेदा भो लसी पिन्जी। 37 ओच्छे जम्मान म्हिगदेसे म्रेन्ना चजी। जमाहेन्से चेलागदेसे लेइबा गेडदेन तार्डा दुइमा सोली निस तजी। 38 थेरी चबागदे न्हडरी कोलागदेदेन म्रिडम्हेमे बाहेकनोन हेम्फेबेगदे जे हजार ब्लि मुबा। 39 जमाहेन्से येशूसे जम्मान म्हिगदेदा पुइजी। ओच्छे येशू हाडला चेलागदेदेन छ्याम दौंगारी क्रे:सी मगादान भिबा नाम्सारीक्यार फेप्जी।

यहूदी धर्मगुरुगदेसे येशूदा स्वर्गला चिनु उन्गो भिसी पाइबा

मर्कूस ८:११-१३; लूका १२:५४-५६

16 कोइ कोइ फरिसीगदेदेन सदुकीगदे येशूला सेम च्याबाला लागिरी येशू मुबा ग्लारी खजी। ओच्छे "चुदे हाड परमेश्वरग्याम फेप्खबा हिन्सम डन्दा स्वर्गला चिनु उन्गो" भिसी पाइमा, 12 येशूसे थेनीगदेदा चुहङ्गुला भिसी सुङ्गी, "एनीगदेसे ड्यसे मु वाला तबा म्राइसम 'न्हङ्गार धिन ज्यबा तला' भिसी भिमुला। 3 ओच्छे स्होरी चा खसुदेन मु वाला तबा म्राइसम 'तिनी लाबालुडसर खनम' भिसी मु च्यासी एनीगदेसे धिन फेबारी खम्मुला। तर एनीगदेदा ज्यना लसी उन्बा चु धुइला चिनु चा एनीगदेसे घोखम्बा आरे। 4 नइबा बानिबेहोर थोसी स्हान्दोदेन छ्याम ब्रेल्सी भ्रबा म्हिगदेसे उदेकला चिनु जे म्हाइमुला। तर दान्देला म्हिगदेदा चा योना अगमवक्ताला चिनु बाहेक अर्गु चिनु आउन।" जमाहेन्से येशू थे ग्लायाम फेप्जी। 11

येशूसे फरिसीदेन सदुकीगदेला खमीरला बारेरी सुङ्गा

मर्कूस ८:१४-२१

5 समुन्द्रला क्यामसडपट्टि धोखमाहेन्से गेड भबारी म्ले:जीम भिसी चेलागदेसे था याइजी। 6 थेनोन धुइरी येशूसे थेनीगदेदा "च्यागो, एनीगदे फरिसीदेन सदुकीगदेला खमीरग्याम होशियार तसी चिउ" भिसी सुङ्गी। 7 तर चेलागदेसे चा "फ्हाडसे गेड भबारी म्ले:बासे लमा येशूसे चुहङ्गुला सुङ्गा हिन्ना" भिसी हाड हाड न्हडरी ताम लबारी छ्याइजी।

8 येशूसे चु ताम था याइसी, "एनीगदे खाहङ्गुला विश्वास आरेबा म्हिगदे! एनीगदेसे हाडदेन छ्याम गेड आरे भिसी तिगदा ताम लसी चिबा? 9 एनीगदेसे अइ घोबा आरे? डाइ गोर डा गेडसे हजार डा म्हिगदेदा ख्वामा एनीगदेसे गाते सोली गेड दुइबा मुबा? थे ताम म्ले:सी जिन्जी? 10 ओच्छे डाइ गोर निस गेडसे हजार ब्लि म्हिगदेदा ख्वामा एनीगदेसे गाते सोली दुइमुबा? 11 एनीगदेसे अइ तिगदा आघोबा? डाइ एनीगदेदा गेडला बारेरी पाइबा आहिन। तर फरिसीदेन सदुकीगदेला खमीर हङ्गुल तामग्याम होशियार तसी चिउ" भिसी पाइबा हिन्ना।

12 जमाहेन्से थेनीगदेसे येशूसे गेडरी युबा खमीरग्याम आहिन, तर फरिसीदेन सदुकीगदेसे लोप्बा तामग्याम होशियार तसी चिउ भिसी सुङ्गा चीम भिसी घोजी।

येशू परमेश्वरला म्हि ख्रीष्ट हिन्ना

मर्कूस ८:२७-३०; लूका ९:१८-२१

13 कैसरिया फिलिप्पी भिबा ग्लारी धोखमाहेन्से येशूसे हाडला चेलागदेदा "म्हिगदेसे परमेश्वरसे पुइखबा म्हिदा खाल भिसी भिमुला?" भिसी इयोइमा, 14 चेलागदेसे "खालैसे बप्तिस्मा पिन्बा यूहन्ना, खालैसे एलिया अगमवक्ता, खालैसे यर्मिया अगमवक्ता थेहङ्गुला लसीन खालैसे अगमवक्तागदे न्हडला गिक हिन्ना भिसी भिमुला" भिसी येशूदा जोहाब पिन्जी। 15 दो:सी येशूसे थेनीगदेदा "तर एनीगदेसे चा डा खाल भिसी म्हन्मुला?" भिसी इयोइमा, 16 सिमोन पत्रुससे "हाड परमेश्वरला झा थार्बा पिन्बा ख्रीष्ट हिन्ना" भिसी भिजी। 17

17 जमाहेन्से येशूसे थेदा "योनाला झा सिमोन, एसे परमेश्वरग्याम मोलम याइबा मुला। तिगदा भिसम चु ताम एदा म्हिगदेसे पाइसी था तबा आहिन। तर स्वर्गी धन्छ्याबा डाला आबासे सुइसी था याइबा हिन्ना। 18 च्यागो, एसे डाला ताम इयान्गो, एला मिन पत्रुस 5 हिन्ना। चु युडबाला पहराथोरी डाइ डाला मण्डली स्होला। चु मण्डलीदा कालला शक्तिगदेसे खाइमै ढाबारी आखम। 19 थेतबासेलमा डाइ एदा स्वर्गला यहुल्साला साँचोगदे पिन्ना। एसे जम्बुलिडरी जुन स्हे ढुइला, थे स्हे स्वर्गीनोन ढुइला। ओच्छे एसे जम्बुलिडरी जुन स्हे ठोइला, थे स्हे स्वर्गीनोन ठोइला" भिसी सुङ्गी। 20 तर चेलागदेदा येशूसे "डा थार्बा पिन्बा ख्रीष्ट हिन्ना भिसी खालैदा थापाङ्गो" भिसी सुङ्गी।

येशूसे हाड खाहङ्गुला लसी सिला भिबा ताम चेलागदेदा सुङ्गा

मर्कूस ८:३१-९:१; लूका ९:२२-२७

21 जमाहेन्से येशूसे हाडला चेलागदेदा "यरूशलेमरी निसी डाइ यहूदी गन्बागदे, परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेग्याम ल्हानान दुख नातो:ला। थेनीगदेसे डादा दुख पिन्सी पिन्सीन साइला। तसैनोन डादा सिबाग्याम सोमरेमाकुनु सोना लला" भिसी सुङ्गी।

22 चु ताम थे:माहेन्से पत्रुससे येशूदा जजाकी क्यथाड भोर्सी "प्रभु, हाडदा परमेश्वरसे खाइमै चुहङ्गुला तआपुङ्गै, हाडदा चुहङ्गुला खाइमै आत!" भिसी बङ्गी।

भिसी पाइबा। तर येशूसे चा यहूदीगदेदा कोलागदेदेन छ्याम ओच्छे अर्गु यहुलला म्हिगदेदा चा दिमला नगीदेन दौजब लसी घांना लसी सुङ्गा मुबा। † 16:1 मत्ती १२:३८; लूका ११:१६ †† 16:4 मत्ती १२:४०; लूका ११:२९

‡ 16:6 लूका १२:१ †† 16:9 मत्ती १४:१७-२१ †† 16:10 मत्ती १५:३४-३८ ††† 16:14 मत्ती १४:१-२; मर्कू ६:१४-१५; लूका ९:७-८ †††† 16:16 यहू ६:६८-६९ § "पत्रुस" भिबाला अर्थ चा युडबा हिन्ना। †† चु पदरी येशूसे पत्रुसदा मण्डलीरी तिगै ताम लपुइबादेन लआपुइबा अधिकार पिन्ना भिसी सुङ्गी। ††† 16:19 मत्ती १८:१८; यहू २०:२३

23 तर येशू प्लिक दोःसी पत्रुसदा “डादा कोल्ना लबारी म्हाइबा शैतान, ए चुग्याम थोन्सी निउ! तिगदा भिसम एसे परमेश्वरसे सुड्बा तामदा भन्दा म्हिगदेला तामदा सेम लमुला” भिसी सुड्जी।

24 जमाहेन्से येशूसे हाडला चेलागदेदा चुहड् भिसी सुड्जी, “खालै म्हि डाला चेला दोबा सेम मुसम थेसे हाडला ज्याननोन माया मारब लसी हाडला क्रुस हाडसेन पुड्सी डादेन छ्याम भ्रगै। 25 तिगदा भिसम जुन म्हिसे हाडला ज्यान जोगब लबारी म्हाइला, थे म्हिसे जुकजुकधोनाला जुनी आयाड्। तर डाला लागिरी ज्याननोन पिन्खम्बा म्हिसे चा जुकजुकधोनाला जुनी याड्ला। 26 म्हिसे जम्बुलिडनोन यारी किन्सी हाडला ज्यान चा निजी भिसम थेदा तिग ज्यबा तला? जम्बुलिडरी म्हिला ज्यान भन्दा घ्रेन अर्गु तिगै स्हे मुला? 27 तिगदा भिसम लिच्छा परमेश्वरसे पुड्खबा म्हि हाडला आबाला घ्रेन य्हालदेन शक्तिरी स्वर्गदूतदेन छ्याम खला। ओच्छे थेसे जम्मान म्हिदा थेनीगदेसे लबा गे अन्धारला इनाम पिन्ना। 28 च्यागो, एनीगदेसे डाला ताम इयान्गो, चुरी मुबा म्हिगदे न्हडला कोड कोड म्हि चा परमेश्वरसे पुड्खबा म्हि हाडला य्हुल्सारी खबा आम्राइतेधोना आसि।”

येशूला स्थाल पोबा
मर्कूस ९:२-१३; लूका ९:२८-३६

17 दुरे लिच्छा येशूसे पत्रुस, याकूबदेन याकूबला आले यूहन्नादा जे हाडदेन छ्याम नोबा गडरी भोर्सी फेज्जी। 2 चेलागदेसे च्याना च्यानान येशूला स्थाल पोसी धिनी हड् य्हाल य्हाल तजी। ओच्छे थेला क्वानएनोन धिनीला स्हेर हड्बान तजी। 3 थेनोन धुडरी थेनीगदेसे थेरी मोशादेन एलिया, येशूदेन छ्याम ताम लबान लबा म्हाइजी। 4 चु म्हाइसी पत्रुससे येशूदा “प्रभु, य्हाड चुरी मुबा ज्यबा तजीम। हाडदा ज्यबा छोर्सम चुरी डाइ छाप्रो सोम स्होला, गिक हाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। 5 थेसे थेहड् पाड्ना पाड्ना तार तार्बा खसु खसी थेनीगदेदा घज्जी। थे खसु न्हडग्याम “चु डाइ सेमहेन्से माया लबा डाला झा हिन्ना, थेदा म्हाइसी डा ल्हानान ताड्बा मुला। थेतबासेलमा एनीगदेसे चुसे भिबा ताम इयान्गो” भिबा काइ थेःजी। 6 थे ताम थेःमाहेन्से चेलागदे लोड्सी सरी खलुप तजी। 7 तर येशू थेनीगदे मुबा ग्लारी खसी थेनीगदेदा थुर्सी “रेःगो, एनीगदे थालोङ्गो” भिसी सुड्जी। 8 जमाहेन्से थेनीगदे रेःसी च्यामा थेरी येशू बाहेक स्हान्दो खालैदा आम्राइनी।

9 जमाहेन्से येशू हाडला चेलागदेदेन छ्याम गड्ग्याम फाज्बान लबा धुडरी येशूसे चेलागदेदा “च्यागो, परमेश्वरसे पुड्खबा म्हि सिबाग्याम आसोतेधोना एनीगदेसे तिनी म्हाइबा चु ताम खालैदा थापाङ्गो” भिसी सुड्जी।

10 जमाहेन्से चेलागदेसे येशूदा “यहूदी धर्मगुरुगदेसे तिगदा एलिया अगमवक्ता डाच्छा खतोःला भिबा?” भिसी इयोड्मा, 11 येशूसे चेलागदेदा चुहड् भिसी सुड्जी, “हिन्ना, डाच्छा एलिया खला ओच्छे थेसे जम्मान ताम ढिव्ना लला। 12 तर एनीगदेसे डाला ताम इयान्गो, तिगदा भिसम एलिया खसी जिन्बा मुला। तसैनोन थेदा डोआसेना म्हिगदेसे जे लड् म्हन्बा थेनोन लजी। थेहड् लसीन परमेश्वरसे पुड्खबा म्हिसेनोन थेनीगदेला याग्याम ल्हानान दुख नातोःबा मुला।” 13 जमाहेन्से येशूसे बप्टिस्मा पिन्बा यूहन्नाला बारेरी सुड्जीम भिबा ताम चेलागदेसे घोजी।

येशूसे म्हडसे स्याज्बा कोलादा खम्ना लबा
मर्कूस ९:१४-२९; लूका ९:३७-४३

14 थेनीगदे म्हिला हुल मुबा ग्लारी धोखमाहेन्से म्हि गिक येशूला डाच्छापट्टि पुड् जूसी, 15 “प्रभु, डाला झादा दया लउ, तिगदा भिसम थेदा स्ह म्हडसे ल्हानान दुख पिन्बा मुला। थेदा खाइमाम मेरी, खाइमाम क्युडरी भ्याङ्गुला।

† 16:24 मत्ती १०:३८; लूका १४:२७ †† 16:25 मत्ती १०:३९; लूका १७:३३; यूह १२:२५ † 16:27 मत्ती २५:३१; भजन ६२:१२; रोमी २:५ †† “क्वानएनोन धिनीला स्हेर हड्बान तजी” कोड कोड बाइबलरी चा तार तार तजी भिसी भिबा मुला। तर ग्रीक बाइबल अन्धार चु पदला मुल अर्थ चा धिनीला स्हेर हड्बान य्हाल य्हाल तजी भिसी पाड्बा हिन्ना (मर्कूस ९:३; लूका ९:२९)। †† 17:5 व्यव १८:१५; भजन २:७; यशै ४२:१; मत्ती ३:१७; मर्कूस १:११; लूका ३:२२; २ पत्रु १:१७-१८ ††† 17:10 मला ४:५ ††† 17:12 मत्ती ११:१४

16 थेदा खम्ना लसी पिन्गो भिसी डाइ हाडला चेलागदे मुबा ग्लारी भमुबा। तर थेनीगदेसे खम्ना लबारी आखम्नी” भिसी भिजी।

17 जमाहेन्से येशूसे थेनीगदेदा “विश्वास आलबादेन नड्बा सेम थोबा म्हिगदे, खाइमाधोना डा एनीगदेदेन छ्याम तला? खाइमाधोना डाइ एनीगदेदा नासे? थेदा चुरी भउ” भिसी सुड्जी। 18 ओच्छे येशूसे थे म्हडदा बड्जी। बङ्गाहेन्से थे कोलाला ल्हुड्ग्याम म्हड थोन्सी यार्जी। जमाहेन्से थे कोला तुरुन्तन खम्जी।

19 ओच्छे चेलागदे सुट्क्क येशू मुबा ग्लारी खसी “तिगदा डन्से थे म्हडदा ताज्बारी आखम्नी” भिसी इयोड्मा, 20 येशूसे थेनीगदेदा “एनीगदेला विश्वास आयोबासे लमा हिन्ना। थेतबासेलमा एनीगदेसे डाला ताम इयान्गो, चुदे एनीगदेदेन छ्याम पच्छैला ब्लु गिक तेःबा जे विश्वास मुसैनोन चु गडदा ‘चुग्याम लेःउ’ भिसम थे लेःला। एनीगदेला लागिरी आतबा गे तिगै आरे। § 21 तसैनोन चुहड्बा म्हड चा फोड्थान चिसी प्रार्थना आलतेधोना थोन्सी आयार्मुला” भिसी सुड्जी। ††

येशूसे हाड खाहड् लसी सिला भिबा ताम दोःसी सुड्बा
मर्कूस ९:३०-३२; लूका ९:४३-४५

22 थेनीगदे गालील अज्चलरी हुप तबा धुडरी येशूसे चेलागदेदा “परमेश्वरसे पुड्खबा म्हिदा म्हिगदेला यारी जिम्मा पिन्ना। 23 थेनीगदेसे थेदा साइला। तसैनोन सिसी सोमरेमाकुनु थेदा सिबाग्याम सोना लला” भिसी सुड्जी। चु ताम थेःसी चेलागदेदा ल्हानान दुख इहम्जी।

परमेश्वरला मन्दिरला तिरो

24 येशू हाडला चेलागदेदेन छ्याम कफर्नहुम नाम्सारी फेज्खबा धुडरी परमेश्वरला मन्दिरला तिरो दुड्बा म्हिगदे पत्रुस मुबा ग्लारी खसी, “एनीगदेला गुरुसे परमेश्वरला मन्दिरला तिरो फामुला कि आफामुला?” भिसी इयोड्मा, 25 पत्रुससे “फामुला” भिसी भिजी। जमाहेन्से पत्रुस दिम न्हडरी वाड्सी येशूदा पाड्बारी छ्याइमा येशूसेन, “सिमोन, एला तिग सेम मुला? जम्बुलिडला ग्लेगदेसे हाडलान म्हिगदेग्याम तिरो दुड्मुला कि स्हान्दो म्हिगदेग्याम दुड्मुला?” भिसी इयोड्जी।

26 पत्रुससे “स्हान्दो म्हिगदेग्याम दुड्मुला” भिसी जोहाब पिन्जी। जमाहेन्से येशूसे चुहड् भिसी सुड्जी, “थेहड् भिसम हाडला म्हिगदेसे चा आफासै तबा चीम। 27 तसैनोन ए समुन्दरी निसी बल्छीसे तार्डा साइसी भउ। एसे जम्मान भन्दा डाच्छा साइबा तार्डाला सुडरी च्यागो, एसे थेला सुडरी म्हुइला डबल गिक स्याप्ला। थे डबल भोर्सी य्हाड न्हीला तिरो फागो। थेनीगदे य्हाडदेन छ्याम बोमो थाखगै।”

परमेश्वरला य्हुल्सारी खाल घ्रेन तला
मर्कूस ९:३३-३७, ४२-४८; लूका ९:४६-४८; १७:१-२

18 थे धुडरी चेलागदे येसू मुबा ग्लारी खसी, “स्वर्गला य्हुल्सारी जम्मान भन्दा घ्रेन खाल तला?” भिसी इयोड्मा, 19 येशूसे कोला गिकदा इयोड्जी। ओच्छे थेनीगदेला गुडरी राप्पुड्सी, 3 चुहड् भिसी सुड्बारी छ्याइजी, “च्यागो, एनीगदेसे डाला ताम इयान्गो, एनीगदेसे हाड हाडला सेम पोसी चु कोलागदे हड्बा आतनी भिसम खाइमै स्वर्गला य्हुल्सारी वाड्आम्पाइ। 4 जुन म्हि चु कोला हड्बान सोजो तला थेनोन स्वर्गला य्हुल्सारी जम्मान भन्दा घ्रेन तला। 5 जुन म्हिसे चुहड्बा कोलादा डाला मिनरी वास्ता लला, थेसे डादाएनोन वास्ता लला।

6 “तर जुन म्हिसे डादा विश्वास लबा चु कोलागदे न्हडला गिकदा पाप लपुड्ला, थेहड्बा म्हिदा मी खारेरी हान्दा च्योसी समुन्दरी डुबब लबान ज्यबा तला। 7 चु जम्बुलिडरी म्हिगदेदा पाप लपुड्बा स्हेगदे मुला।

थेतबासेलमा चु जम्बुलिडला म्हिगदेसे परमेश्वरग्याम सजाय याड्ला। पाप

§ म्हिसे गाते विश्वास लबा मुला भिबा चा घ्रेन ताम आहिन, तर थेला जजाबा विश्वासरी परमेश्वरला शक्ति गाते घ्रेन मुला भिबा ताम चा घ्रेन ताम हिन्ना। † 17:20 मत्ती २१:२१; मर्कूस ११:२३; १ कोर १३:२ †† चु पदला ताम ल्हाना हड्बा ग्रीक बाइबलरी भिबा आरे। मर्कूस २:२९ स्हीगो। † 17:24 प्रस्था ३०:१३; ३८:२६ †† 18:1 लूका २२:२४ †† 18:3 मर्कूस १०:१५; लूका १८:१७

लपुड्बा स्हेगदे मी मुनोन मुला, तसैनोन जुन म्हिसे स्थान्दोदा पाप लपुड्ला थे परमेश्वरग्याम सजाय याड्बा म्हि हिन्ना।

8 “एला यादेन काडरी खजिबासे चा एदा पाप लपुड्ला थे थासी भ्याङ्गो। तिगदा भिसम या काड मुसी खाइमै आसिबा मेरी निबा भन्दा मी बरु ठुडे तसी जुकजुकधोनाला जुनी याड्बा चा एला लागिरी ज्यबा तला।¹⁹ एला मीसे एदा पाप लपुड्जी भिसम तेःसी भ्याङ्गो। तिगदा भिसम मी न्हीनोन मुसी नर्गरी खाइमै आसिबा मेरी निबा भन्दा मी बरु काना तसी जुकजुकधोनाला जुनी याड्बा चा एदा ज्यबा तला।^{††}

म्हाबा ग्युला उखान

लूका १५:३-७

10 “च्यागो, एनीगदेसे चु कोलागदे न्हडरी खालैदान हेला थालउ। तिगदा भिसम चु कोलागदेदा च्याबा स्वर्गदूतगदे स्वर्गरी धन्छ्याबा डाला आबादेन छ्याम सदन तला। थेतबासेलमा एनीगदे होशियार तसी चिउ।^{†††} तिगदा भिसम परमेश्वरसे पुड्खबा म्हि म्हाबागदेदा म्हाइबारीदेन थार्बा पिन्बारी खबा हिन्ना।^{††}

12 “च्यागो, खालै म्हिला ग्यार्जा गिक ग्यु न्हडरी गिक म्हाजी भिसम थेसे तिग लला? तिग थेसे बोगल ब्लिसे च्युक कु ग्युदा गडरीन खलासी म्हाबा ग्यु म्हाइबारी आनि? 13 च्यागो, डाला ताम इयान्गो, चुदे थे म्हिसे म्हाबा ग्यु स्याप्जी भिसम थे आमहबा बोगल ब्लिसे च्युक कु ग्युगदेला लागिरी भन्दा थे स्याप्बा ग्यु गिकला लागिरी ल्हानान ताड्ला।¹⁴ थेह्ङ लसीन स्वर्गरी धन्छ्याबा एनीगदेला परमेश्वर आबालाएनोन चु कोलागदे न्हडरी खालैनोन नाश थातगै भिबा सेम मुला।

बिरोध लबा म्हि

15 “चुदे परमेश्वरदा विश्वास लबा खालै म्हिसे एला बिरोध लसी आज्यबा गे लजी भिसम ए गिक जे थे मुबा ग्लारी निसी थेदा घोना लउ। चुदे एला ताम इयान्सी थेसे हाडसे लबा आज्यबा गे खलाजी भिसम थे एला हो तला।^{††††} तर थेसे एला ताम आड्यान्नी भिसम एसे हाडदेन छ्याम स्थान्दो म्हि गिक अथवा न्ही भोर्सी निउ। ओच्छे परमेश्वरला बचनसे पाड्बा ह्ङ म्हि न्ही अथवा सोम साक्षी थान्सी जम्मान ताम पक्का लउ।^{†††††} थे म्हिसे थेनीगदेला तामएनोन आड्यान्नी भिसम एसे मण्डलीदा पाङ्गो। मण्डलीला तामएनोन आड्यान्नी भिसम एसे थेदा परमेश्वरदा आतेन्बा म्हिदेन तिरो दुड्बा म्हि ह्ङबान म्हन्सी खलापिन्गो।¹⁸ एनीगदेसे डाला ताम इयान्गो, एनीगदेसे जम्बुलिडरी जुन स्हे टुड्ला थे स्हे स्वर्गरीनोन टुड्ला। ओच्छे एनीगदेसे जम्बुलिडरी जुन स्हे ठोड्ला, थे स्हे स्वर्गरीनोन ठोड्ला।^{†††}

19 “दोःसी डाइ एनीगदेदा पाड्ला, जम्बुलिडरी एनीगदे न्हडला म्हि न्ही ढिक्सी तिगै ताम हीजी भिसम स्वर्गरी धन्छ्याबा डाला आबासे एनीगदेदा पिन्ना।²⁰ तिगदा भिसम डाला मिनरी म्हि न्ही सोम ढिक्सी खजिबै ग्लारी हुप तजी § भिसम डा थेनीगदेदेन छ्याम तला।”

माफ आपिन्बा नोकरला उखान

21 जमाहेन्से पत्रुससे येशूदा “प्रभु, परमेश्वरदा विश्वास लबा म्हिसे डादा आज्यना लजी भिसम डाइ थेदा गाते रेमधोना माफ लतोःबा? निसरेमधोना?” भिसी इयोड्मा,²² येशूसे थेदा चुह्ङ भिसी जोहाब पिन्जी, “निसरेमधोना जे आहिन, एसे थेदा सदन माफ लउ! §††††† तिगदा भिसम स्वर्गला यहुल्सा मी ग्ले गिक ह्ङबान हिन्ना। थेसे हाडला नोकरगदेदेन छ्याम हिसाब किताब किन्बारी म्हाइजी।²⁴ थे ग्लेसे हिसाब किताब किन्बारी छ्याइमा हजार च्युड म्हरला डबल †† छे किन्बा नोकरदा ग्ले मुबा ग्लारी भजी।²⁵ तर थे नोकरसे छे फाबारी आखम्बासे लमा ग्लेसे थेदा, थेला मिड,

† 18:8 मत्ती ५:३० †† 18:9 मत्ती ५:२९ † येशूदा विश्वास लबा कोलागदे च्याबा स्वर्गदूतगदेसे कोलागदेला वास्ता लसी सदन थेनीगदेला बारेरी परमेश्वरदा पाड्मुला। †† चु पदला ताम ल्हाना ह्ङ्बा ग्रीक बाइबलरी भिबा आरे (लूका १९:१० स्हीगो)। ††† 18:15 लूका १७:३ †††† 18:16 व्यव १९:१५ ††††† 18:18 मत्ती १६:१९; यूह २०:२३ § डाला मिनरी हुप तबा भिबा चा येशूदा विश्वास लबा म्हिगदे हिन्ना। §† “सदन माफ लउ” भिबादा ग्रीक बाइबलरी चा सात गुण सत्तरी पल्ट माफ लउ भिसी भिबा

झा जामेदेन थेदेन छ्याम मुबा जम्मान स्हे चूड्सी जम्मान टाडगा किन्गो” भिसी कुल्जी।

26 जमाहेन्से थे नोकरसे ग्लेदा पया लबान, “हाडसे तिगै रेधोना भ्रान्गो। डाइ हाडला जम्मान टाडगा फाला” भिसी बिन्ती लजी।²⁷ थे नोकरदा म्हाइसी ग्लेदा दया रेःजी। ओच्छे ग्लेसे थेदा ‘दाहेन्से तजी, एसे चु छे फाआतोः’ भिसी खलापिन्जी।

28 “जमाहेन्से थे नोकर निजी। निबान लमा थेसे डाच्छा ग्यार्जा गिक म्हुड्ला डबल पिन्बा होदा स्याप्जी। जमाहेन्से थेसे होला खारेरी न्हेप्सी ‘डाला टाडगा दान्देन भउ’ भिसी भिजी।²⁹ जमाहेन्से थे होसे थेदा पया लबान, ‘तिगै रे भ्रान्गो डाइ एला जम्मान टाडगा पिन्ना’ भिसी बिन्ती लजी।³⁰ तर थेसे आड्यान्ना होदा टाडगा आपिन्तेधोना इयाल्खानरी झाइजी।

31 “थे नोकरसे थेह्ङ लबा म्हाइसी स्थान्दो होगदेदा ल्हानान दुख इहम्सी थेसे लबा जम्मान ताम ग्लेदा पाड्जी।³² थेह्ङ्बा ताम थेःसी ग्लेसे थे नोकरदा हाड मुबा ग्लारी इयोड्जी। ओच्छे थेदा ‘पापी नोकर, एला ताम थेःसी डाइ दया लसी एसे फातोःबा जम्मान टाडगा खलापिन्जी।³³ डाइ एदा दया लमाहेन्से एसेनोन एला होदा दया लआतोःबा?’ भिसी भिजी।³⁴ थे नोकरला बेहोर म्हाइसी ग्लेदा ल्हानान बोमो खजी। जमाहेन्से थेदाएनोन जम्मान छे आफातेधोना सजाय पिन्बा म्हिगदेला यारी जिम्मा पिन्जी।

35 “थेह्ङ लसीन एनीगदेसेनोन परमेश्वरदा विश्वास लबा खालै म्हिदा सेमहेन्सेन माफ आलनी भिसम स्वर्गरी धन्छ्याबा डाला आबासेनोन एनीगदेदा थेह्ङनोन लला।”

येशूसे छोडपत्र लबारी आत भिसी लोप्बा

मर्कस १०:१-१२

19 चु ताम सुड्सी जिन्माहेन्से येशू गालील अञ्चलग्याम यर्दन स्योडला क्याम्सडपट्टि यहूदिया अञ्चलरी फेप्जी।² येशूला लिच्छा लिच्छा म्हिला हुल खजी। ओच्छे येशूसे थेनीगदेदा खम्ना लजी।

3 ओच्छे कोइ कोइ फरिसीगदेसे येशूला सेम च्याबाला लागिरी, “खालै म्हिसे हाडला मिडदा तिगै दोष उन्सी छोडपत्र लबा ठीक हिन्ना कि आहिन” भिसी इयोड्जी।

4 जमाहेन्से येशूसे थेनीगदेदा चुह्ङ भिसी सुड्जी, “परमेश्वरसे जम्बुलिड छ्यामाहेन्सेन ‘हेम्कोलादेन मिडकोला स्होबा हिन्ना’ भिबा ताम एनीगदेसे पढब लबा आरे? ††††† ‘थेतबासेलमा म्हिसे हाडला आबादेन आमादा खलासी हाडला मिडदेन छ्याम ढिक्सी चिमुला। ओच्छे थेन्नी ल्हुड गिक ह्ङ्बान तला’ ††††† दाहेन्से थेन्नी ल्हुड न्ही आहिन, तर ल्हुड गिकनोन हिन्ना। थेतबासेलमा परमेश्वरसे स्होबा जोडीदा खालैसेन थाफेगै।”

7 थेनीगदेसे दोःसी येशूदा “थेह्ङ भिसम मोशासे तिगदा छोडपत्र भिसी मिडदा खलागो भिसी कुल्बा?” भिसी इयोड्जी।^{††}

8 जमाहेन्से येशूसे थेनीगदेदा “मोशासे मी एनीगदेला सेम कोड्बासे मिडदा खलाबारी तला भिसी पाड्बा हिन्ना। तर डाच्छाहेन्से चा चुह्ङ्बा ठिम आरेबा।⁹ थेतबासेलमा एनीगदेसे डाला ताम इयान्गो, जुन म्हिसे हाडला मिड स्थान्दोदेन छ्याम ब्रेल्सी आभ्रसै खलासी स्थान्दो मिडम्हेमेदेन छ्याम ब्याह लला थेसे चा डाच्छाला मिडला बिरोधरी ब्रेल्सी भ्रबा हिन्ना। ओच्छे स्थान्दोसे खलाबा मिडम्हेमेदेन छ्याम ब्याह लबा म्हिएनोन ब्रेल्सी भ्रबा हिन्ना” ††††† भिसी सुड्जी। †††††

10 जमाहेन्से चेलागदेसे येशूदा “मिड हेम्बो न्हडरी चुह्ङ तसम ब्याह आलबान ज्यबा हिन्ना” भिसी भिजी।

11 येशूसे थेनीगदेदा चुह्ङ भिसी सुड्जी, “तर जम्मान म्हि ब्याह आलना चिबारी आखम। जुन म्हिदा परमेश्वरसे ब्याह आलना चिखम्बा शक्ति पिन्ना थे जे चिखम्बा।¹² तिगदा भिसम कोइ न्हमान नपुंसक न्हमुला, कोइ म्हिदा चा स्थान्दो म्हिसे नपुंसक स्होसी थान्मुला। ओच्छे कोइ म्हि चा स्वर्गला

मुला। §†† 18:22 लूका १७:३-४ §† “हजार च्युड म्हरला डबल” भिबा चा करोडीं करोड टाडगा हिन्ना। §†† 19:4 उत्प १:२७; ५:२ §†† 19:5 उत्प २:२४ §†† 19:7 व्यव २४:१-४; मत्ती ५:३१ §††† चु ताम “स्थान्दोसे खलाबा मिडम्हेमेदेन छ्याम ब्याह लबा म्हिएनोन ब्रेल्सी भ्रबा हिन्ना” भिसी ल्हाना ह्ङ्बा ग्रीक बाइबलरी भिबा आरे। §§† 19:9 मत्ती ५:३२; १ कोर ७:१०-११

खुल्साला गे लबारी नपुंसक हइ लसीन ब्याह आलना चिमुला। जुन म्हि चुहइ लसी चिखम्ला, थे म्हि जे चुहइ लसी चिउ” भिसी सुइजी।

येशूसे कोलागदेदा मोलम पिन्बा
मर्कूस १०:१३-१६; लूका १८:१५-१७

13 येशूसे हाडला छ्या कोलागदेधोरी थान्सी मोलम पिन्बै भिसी म्हिगदेसे हाडला कोलागदेदा येशू मुबा ग्लारी भजी। चु ब्राइसी येशूला चेलागदेसे थे कोलागदे भवा म्हिगदेदा बइजी। 14 तर येशूसे चेलागदेदा “कोलागदेदा डा मुबा ग्लारी खपुङ्गो, थेनीगदेला ग्याम थाकागो। तिगदा भिसम स्वर्गला खुल्सा चु कोलागदे हइबालान हिन्ना” भिसी सुइजी। 15 जमाहेन्से येशूसे कोलागदेधोरी हाडला छ्या थान्सी मोलम पिन्जी। ओच्छे येशू थे ग्याम फेज्जी।

परमेश्वरला खुल्सादेन पयुक्पो म्हि
मर्कूस १०:१७-३१; लूका १८:१८-३०

16 पयुक्पो म्हि गिक येशू मुबा ग्लारी खसी, “गुरु, जुकजुकधोनाला जुनी याइबारी डाइ ज्यबा गे तिग लतो:ला?” भिसी इयोइजी। 17 जमाहेन्से येशूसे थेदा “एसे डादा ज्यबा तिग हिन्ना भिसी तिगदा इयोइबा? च्यागो, ज्यबा मी परमेश्वर जे मुला। थेतबासेलमा एदा जुकजुकधोनाला जुनी याइबा सेम मुसम परमेश्वरसे कुल्बा अन्धार भ्रउ” भिसी सुइजी।

18 थे म्हिसे येशूदा “परमेश्वरसे कुल्बा खजिबा ताम?” भिसी भिमा, येशूसे थेदा चुहइ भिसी सुइजी, “एसे म्हि थासाइगो, स्थान्दोदेन छ्याम ब्रेल्सी थाभ्रउ, य्हो थालउ, लुसीला ताम पाइसी थाभ्रउ, 19 हाडला आबा आमादा मान लउ, ओच्छे एसे हाडला खिम्जेमदा हाडदा हइनोन माया लउ।” †

20 जमाहेन्से थे म्हिसे येशूदा “चु जम्मान ताम मी डाइ लसीन चिबा मुला। दाहेन्से डाइ लतो:बा तिग मुला?” भिसी भिजी।

21 जमाहेन्से येशूसे थेदा “चुदे ए परमेश्वरदा सेम निबा म्हि दोबा हिन्सम एदेन छ्याम मुबा जम्मान धन सम्पत्ति चूइसी प्राडबोगदेदा भो लसी पिन्गो। एसे स्वर्गरी धन सम्पत्ति याइला, ओच्छे डादेन छ्याम भ्रउ।” भिसी सुइजी। 22 येशूला ताम थे:सी थे म्हि ल्हानान दुख इहम्सी निजी। तिगदा भिसम थेदेन छ्याम ल्हानान धन सम्पत्ति मुबा।

23 ओच्छे येशूसे हाडला चेलागदेदा चुहइ भिसी सुइजी, “च्यागो, एनीगदेसे डाला ताम इयान्गो, पयुक्पो म्हिदा स्वर्गला खुल्सारी वाइबारी ल्हानान गाहो मुला। 24 दो:सी डाइ एनीगदेदा पाइला, पयुक्पो म्हिदा परमेश्वरला खुल्सारी वाइबारी भन्दा ऊँटदा दापला मीग्याम वाइबारी सजिलो मुला।”

25 चुहइबा ताम थे:सी चेलागदे उदेक म्हन्बान, “थेहइ भिसम खाल्से थार्बा याइला?” भिसी येशूदा इयोइजी। †

26 जमाहेन्से येशूसे थेनीगदेदा स्हीबान, “चु गे म्हिसे लबारीन आखम्बा गे हिन्ना। तर परमेश्वरसे चु जम्मान गे लखम्ला” भिसी सुइजी।

27 जमाहेन्से पत्रुससे येशूदा “डन्से मी जम्मान स्हे खलासी हाडदेन छ्याम भ्रवा मुला। दाहेन्से डन्से चा तिग याइला?” भिसी भिजी।

28 येशूसे थेनीगदेदा चुहइ भिसी सुइजी, “एनीगदेसे डाला ताम इयान्गो, परमेश्वरसे छार जम्बुलिड स्होमा परमेश्वरसे पुइखबा म्हि य्हाल य्हाल्बा शक्तिशाली ठिरी चिबा धुइरी एनीगदे डादेन छ्याम भ्रवागदेपेनो हाडला च्युक न्ही ठिरी चिला। ओच्छे इस्राएलला च्युक न्ही वंशला निसाफ लला। †29 थेहइ लसीन जुन म्हिसे डाला लागिरी हाडला दिमनाम, ज्योज्यो आले, नाना आडा, आबा आमादेन झा झामे खलाला, थेसे थे भन्दा दोब्बर, तेब्बर, चौबरधोना याइला। ओच्छे जुकजुकधोनाला जुनी याइबा अधिकार याइला” भिसी सुइजी। 30 तर दान्दे डाच्छा मुबागदे न्हडला ल्हानान म्हि लिच्छा तला। ओच्छे दान्दे लिच्छा मुबागदे चा डाच्छा तला। †

अडगुरला वारीरी गे लबागदेला उखान

20 “च्यागो, स्वर्गला खुल्सा अडगुर वारीला दोप्ता गिक हइबान हिन्ना। थे म्हि स्होरीन हाडला वारीरी गे लबारी म्हि म्हाइबारी निजी। 2 थेसे म्हि स्याप्माहेन्से धिन गिकला ज्याला तोगब लसी थेनीगदेदा अडगुर वारीरी गे लउ भिसी पुइजी।

3 “दो:सी थे दोप्ता नौ बजेरीक्यार बजाररी निमा गे आयाइना चिबा म्हि म्हाइजी। 4 जमाहेन्से थेसे थे म्हिगदेदा ‘एनीगदेपेनोन डाला अडगुर वारीरी गे लबारी निउ। डाइ एनीगदेदा ठीक ज्याला पिन्ना’ भिसी भिमाहेन्से, 5 थेनीगदे गे लबारी निजी।

“थेहइ लसीन दो:सी थे दोप्तासे बाह बजेदेन तीन बजेरीक्यारपेनोन स्थान्दो म्हिगदे भसी गे लपुइजी।

6 “पाँच बजेरीक्यार दो:सी थे दोप्ता बजाररी निमा गे आयाइना चिबा म्हिगदे स्याप्जी। थेतबासेलमा थेसे थे म्हिगदेदा ‘एनीगदे तिगदा गे आलना धिन गिक य्होइसी चिबा?’ भिसी भिमा, 7 थेनीगदेसे ‘खाइ डन्दा खालैसेन गे आपिन्नी’ भिसी भिजी। जमाहेन्से थे दोप्तासे ‘थेहइ भिसम एनीगदे डाला अडगुर वारीरी निसी गे लउ’ भिसी भिजी।

8 “ऊयसे तमाहेन्से थे अडगुर वारीला दोप्तासे नाइकेदा ‘गे लबागदे जम्मादान इयोइसी थेनीगदेदा ज्याला पिन्गो। ज्याला पिन्बा धुइरी जम्मान भन्दा लिच्छा गे लबारी खबा म्हिगदेदा डाच्छा पिन्गो, ओच्छे डाच्छा गे लबारी खबा म्हिगदेदा चा लिच्छा पिन्गो’ भिसी कुल्जी। †9 जमाहेन्से पाँच बजेरी गे लबारी खबा म्हि खजी। थेनीगदेदा धिन गिकलान ज्याला पिन्जी।

10 पाँच बजेरी खबागदेदा धिन गिकला ज्याला पिन्बा म्हाइसी स्होरी जम्मान भन्दा डाच्छा खसी गे लबागदेसे चा य्हाइसे मी थे भन्दा ल्हानान याइला तला भिसी म्हन्जी। तर थेनीगदेसेनोन धिन गिकला ज्याला जे याइजी।

11 ज्याला याइहेन्से थेनीगदेसे थे अडगुर वारीला दोप्ताला बिरोध लबान ताम लबारी छयाइजी। 12 ‘लिच्छा खसी घण्टा गिक जे गे लबा चुगदेदा डनी स्होहेन्से धिन गिकनोन छेप्बा छबा नासी गे लबागदेदा तेनोन तिगदा हाइसे ज्याला पिन्बा’ भिसी थेनीगदेसे भिजी,

13 “तर थे अडगुर म्हाइला दोप्तासे थेनीगदे न्हडला म्हि गिकदा चुहइ भिसी जोहाब पिन्जी, ‘च्यागो, एनीगदेदा डाइ तिगे अन्याय लबा आरे। डाइ धिन गिकला ज्याला पिन्ना भिमा एसेन तला भिसी गे लबा आहिन?

14 थेतबासेलमा एला ज्याला भोर्सी निउ। लिच्छा खसे चुगदेदा एदा तेनोन पिन्बा डाला सेम मुला। 15 डादेन मुबा स्हे डाइ म्हन्बा अन्धार पिन्आम्याइ? डाइ ताइसी पिन्बा ग्लारी एसे तिगदा डाह लबा?’

16 “चुहइ लसी लिच्छाला म्हि डाच्छा, डाच्छाला म्हि लिच्छा तला।” † † †

डादा साइला भिसी येशूसे दो:सीनोन सुइबा

मर्कूस १०:३२-३४; लूका १८:३१-३४

17 यरूशलेमपट्टि फेज्बान लबा धुइरी येशूसे हाडला च्युक न्ही चेलागदेदा कुनी गिकरी भोर्सी चुहइ भिसी सुइजी, 18 “च्यागो, दान्दे य्हाइ यरूशलेमपट्टि निबान मुला। दाहेन्से परमेश्वरसे पुइखबा म्हिदा परमेश्वरला मन्दिररी पूजा लबा मुल म्हिगदेदेन य्हूदी धर्मगुरुगदेला यारी जिम्मा पिन्ना। जमाहेन्से थेनीगदेसे थेदा ‘चुदा साइनोन तो:ला’ भिसी पाइला। 19 ओच्छे थेदा अर्गु खुलला म्हिगदेला यारी जिम्मा पिन्ना। जमाहेन्से थेनीगदेसे थेदा खिसी लबान कोर्से तोबा ग्याइबा लसी क्रुसरी टाँगब लसी साइला। तर थेदा सोमरेमाकुनु सिबाग्याम सोना लला।”

जब्दियाला मिडसे लबा बिन्ती

मर्कूस १०:३५-४५

20 जमाहेन्से जब्दियाला मिडसे हाडला झा न्हीदा छ्यामनोन येशू मुबा ग्लारी भसी खजी। ओच्छे थेसे येशूदा पया लबान बिन्ती लजी।

††† 20:8 लेवी १९:१३; व्यव २४:१५ ††† चु उखानग्याम येशूसे लोप्बा ताम चा डाच्छाहेन्से विश्वास लबा म्हिदेन लिच्छा विश्वास लबा म्हि न्हीसेन च्योच्यो इनाम याइला भिबा हिन्ना। तिगदा भिसम इनाम चा परमेश्वरला दयामायाग्याम ओहइनोन पिन्बा मोलम हिन्ना।

§ 20:16 मत्ती १९:३०; मर्कू १०:३३; लूका १३:३०

† 19:18 प्रस्था २०:१३-१६; व्यव ५:१७-२० †† 19:19 प्रस्था २०:१२; व्यव ५:१६; लेवी १९:१८ † य्हूदीगदेसे पयुक्पो म्हिगदेदा चा परमेश्वरसे मोलम पिन्मुला भिसी म्हनुबा। †† 19:28 मत्ती २५:३१ †† 19:30 मत्ती २०:१६; लूका १३:३०

21 जमाहेन्से येशूसे थेदा “एदा तिग तो:बा?” भिसी सुझा, थेसे येशूदा “हाडसे शासन लबा धुइरी डाला झा न्हीदा गिकदा हाडला दाहिनेपट्टि गिकदा देब्रेपट्टि चिपुइला भिसी सुझा” भिसी भिजी।

22 तर येशूसे थेनीगदेदा “तिग हीदोबा भिसी एनीगदेदा थानोन आरे। डाइ नाबा दुख एनीगदेसे नाबारी खम्ला?” भिसी सुइजी।

थेनीगदेसे “खम्ला” भिसी भिजी।

23 जमाहेन्से येशूसे थेनीगदेदा “एनीगदेसे डाइ नाबा दुख मी नाला। तर डाला दाहिने देब्रे चिपुइबा अधिकार डाला यारी आरे। चु ग्ला डाला आबासे जुन म्हेला लागिरी स्होबा हिन्ना थे जे चिम्याइला” भिसी सुइजी।

24 चु ताम थे:सी स्थान्दो चेला च्युइदा चा थेन्ना ज्योज्यो आले न्हीदेन छ्याम बोमो रे:जी। 25 तर येशूसे थेनीगदेदा हाड मुबा ग्लारी ड्योइसी चुहइ भिसी सुइजी, “च्यागो, एनीगदेदा चु ताम थानोन मुला, अर्गु यहुलला शासन लबा म्हेगदेसे हाडला सेमसे म्हेन्बा अन्धार म्हेगदेथोरी शासन लमुला। ओच्छे घेन घेन पदरी मुबा म्हेगदेसे हाड भन्दा धिरी मुबा म्हेगदेथोरी शासन लमुला। 26 तर एनीगदे चा थेहइ तबारी आत। जुन म्हे जम्मान भन्दा घेन दोबारी म्हाइला थेसे चा एनीगदेला सेवा लतो:ला। 27 ओच्छे एनीगदे न्हडरी जुन म्हे डाच्छा तबारी म्हाइला थे चा एनीगदेला नोकर दोतो:ला। 28 थेहइ लसीन परमेश्वरसे पुइखबा म्हेएनोन स्थान्दोगदेग्याम सेवा किन्बारी आहिन, तर स्थान्दोगदेला सेवा लबारी ओच्छे हाडलान ज्यान पिन्सी ल्हानान म्हेगदेला पापला सय फाबारी खबा हिन्ना।”

येशूसे मी आम्राइबा म्हे न्हीदा खम्ना लबा

मर्कूस १०:४६-५२; लूका १८:३५-४३

29 येशू हाडला चेलागदेदेन छ्याम यरीहो भिबा शहरग्याम फेप्वान लबा धुइरी म्हेला हुलएनोन थेनीगदेदेन छ्याम छ्याम खजी। 30 ग्यामला कुनीरी चिबा मी आम्राइबा म्हे न्हीसे येशू थेनोन ग्याम फेप्वान लबा ताम था याइसी “प्रभु, दाऊद ग्लेला सन्तान! इन्दा दया लउ” भिसी क्रिडबान भिजी।

31 थे म्हे न्हीदा येशूदेन छ्यामनोन खबा म्हेगदेसे “कुटिसी चिउ” भिसी बइजी। तर थेन्नी झन क्रिडबान, “प्रभु, दाऊद ग्लेला सन्तान इन्दा दया लउ” भिसी भिजी।

32 जमाहेन्से थेन तसी येशूसे थेनीगदेदा “डाइ एनीगदेला लागिरी तिग लगे भिसी म्हेन्बा मुला?” भिसी ड्योइजी।

33 थेनीगदेसे येशूदा “प्रभु हाडसे इन्ना मी म्हाइना लपिन्गो” भिसी भिजी।

34 थेनीगदेला ताम थे:सी येशूदा दया रे:सी येशूसे थेनीगदेला मीरी थुर्जी। थुर्मेछ्याम थेनीगदेसे म्हाइजी। ओच्छे थेनीगदे येशूदेन छ्याम भ्रजी।

येशू यरूशलेमरी फेप्वान

मर्कूस ११:१-११; लूका १९:२८-४०; यूहन्ना १२:१२-१६

21 येशू हाडला चेलागदेदेन छ्याम फेप्वान लमा यरूशलेम डामला जैतून भिबा गडला बेथफागे नाम्सारी धोखजी। ओच्छे येशूसे हाडला चेला न्हीदा पुइजी। 2 पुइबा धुइरी चुहइ भिसी सुइजी, “एनी जजाकी क्याथाडला नाम्सारी निउ। एनी थेरी धोमेछ्याम च्युन्सी थान्बा गधाला मामादेन कोला म्हाइला। जमाहेन्से एनीसे थे गधाला मामादेन कोलादा बलसी डा मुबा ग्लारी भउ। 3 थेरी एनीदा खालैसे तिगै भिजी भिसम ‘चु प्रभुदा तो:बा मुला’ भिसी भिउ। जमाहेन्से थेनीगदेसे एनीदा पुइखला।”

4 अगमवक्ताग्याम पाइबा बचन पूरा तगै भिसी चु तबा हिन्ना।

5 “सियोनना † म्हेगदेदा चुहइ भिसी पाङ्गो, ‘च्यागो, एनीगदेला ग्ले एनीगदे मुबा ग्लारी गधाला कोलाथोरी क्रे:सी फेप्वान मुला।

थे ल्हानान सोजो मुला।” †

6 जमाहेन्से चेला न्ही निसी येशूसे कुल्बा अन्धार लजी। 7 थेनीगदेसे गधाला मामादेन कोला भजी। ओच्छे थे गधाला मामादेन कोलाथोरी हाड हाडला घ तीजी। जमाहेन्से येशू थेथोरी धन्छ्याजी। 8 ओच्छे थेरी मुबा ल्हानान म्हेगदेसे ग्यामरी हाड हाडला घगदे तीजी, कोइसे स्याउला थासी

† 20:26 लूका २२:२५-२६ †† 20:27 मत्ती २३:११; लूका २२:२६ † “सियोन” भिबा चा यरूशलेम शहरदा पाइबा हिन्ना। †† 21:5 जक १:९

ग्यामरी तीजी, 9 जमाहेन्से येशूला लिच्छा डाच्छा भ्रबा जम्मान म्हेला हुलसे चुहइ भिसी क्रिडबान जयजयकार लजी,

“दाऊद ग्लेला सन्तानला जयजयकार तगै।

परमप्रभुला मिनरी फेप्वबासे परमेश्वरग्याम मोलम याइगी। थेहइ लसीन स्वर्गी धन्छ्याबा परमेश्वरदा जयजयकार तगै।”

10 येशू यरूशलेमरी धोमाहेन्से शहर नाडनोन हल्ली खल्ली तजी। ओच्छे म्हेगदेसे “चु खाल हिन्ना?” भिसी ड्योइजी। †

11 येशूदेन छ्याम खबा म्हेला हुलसे “चु गालीलला नासरत भिबा नाम्साग्याम फेप्वबा अगमवक्ता येशू हिन्ना” भिसी भिजी।

येशू परमेश्वरला मन्दिररी फेप्वान

मर्कूस ११:१५-१९; लूका १९:४५-४८; यूहन्ना २:१३-२२

12 येशूसे परमेश्वरला मन्दिर न्हडरी चूडबादेन ग्लुबागदेदा ताप्जी। ओच्छे टाडगा देप्वारी चिबागदेला टेबुलदेन दुकुर चूडबारी चिबागदे जम्मान चिबा ग्लागदे प्लाड प्लिड लसी भ्याइजी। 13 ओच्छे येशूसे थेनीगदेदा चुहइ भिसी सुइजी, “च्यागो, ‘डाला दिम यहुल यहुलला म्हेगदेसे प्रार्थना लबा दिम दोला’ भिसी परमेश्वरला बचनरी भिबा मुला। तर एनीगदेसे मी डाला दिमदा य्होगदे चिबा ग्ला स्होबा मुला।” ††

14 येशू परमेश्वरला मन्दिररी मुबा धुइरी मी आम्राइबा म्हेदेन कुज्या म्हेगदे येशू मुबा ग्लारी खजी। जमाहेन्से येशूसे थेनीगदेदा खम्ना लजी।

15 तर येशूसे लबा उदेकला गेदेन परमेश्वरला मन्दिररी कोलागदेसे “दाऊद ग्लेला सन्तानला जयजयकार तगै” भिसी क्रिडबा म्हाइसी परमेश्वरला मन्दिररी पूजा लबा मुल म्हेगदेदेन यहूदी धर्मगुरुगदे बोमो खजी।

††16 थेनीगदेसे येशूदा “चु कोलागदेसे तिग भिबान मुला हाडसे थे:बा आरे?” भिसी भिमा, येशूसे थेनीगदेदा चुहइ भिसी सुइजी, “थे:बा मुला।

तर परमेश्वरला बचनरी चुहइ भिसी भिबा मुला, ‘प्रभु, हाडसे लैनु कोलागदेदेन जजा कोलागदेदाएनोन जयजयकार लतो:ला भिसी लोपबा मुला’

तिग एनीगदेसे चु ताम पढब लबा आरे?” †

17 जमाहेन्से थेनीगदेदा थेरी खलासी येशू बेथानिया भिबा नाम्सारी फेप्वी जमाकुनु म्हुनड थेरीन धन्छ्याजी।

तिगै आरोबा अज्जीरला दोड

मर्कूस ११:१२-१४, २०-२४

18 न्हडगरदड स्होरी यरूशलेमपट्टि दो:सी फेप्वबान लबा धुइरी येशूदा फोखेन्जी। 19 ग्यामरी फेप्वान लबा धुइरी येशूसे ग्यामला कुनीरी अज्जीरला दोड गिक म्हाइजी। थे दोडरी अज्जीर मुजी वा भिसी स्हीबारी फेप्वान भा जे म्हाइसी “दाहेन्से चु दोडरी खाइमै अज्जीर थारोगै” भिसी येशूसे सुइजी। थेहइ सुइछ्याम थे अज्जीर दोड खर्जी। †

20 अज्जीर दोड खर्सी निबा म्हाइसी उदेक म्हेन्बान येशूला चेलागदेसे “दान्देल्ला दान्देन खाहइ लसी चु अज्जीर दोड खर्जी?” भिसी भिमा, 21 येशूसे थेनीगदेदा चुहइ भिसी सुइजी, “च्यागो, एनीगदेसे डाला ताम इयान्गो, एनीगदेला सेमरी शड्का आलना विश्वास लजी भिसम चु अज्जीर दोडदा लबा हइ जे आहिन, तर चु गडदाएनोन ‘ए होक निसी समुन्दरी ताडगो’ भिसम थेहइनोन तला। 22 ओच्छे एनीगदेसे विश्वास लसी प्रार्थना लमा जुन ताम हीला थेनोन एनीगदेसे याइला।”

†† 21:10 भजन ११८:२६-२७ ††† 21:13 यशै ५६:७; यर्मि ७:११ †††

यहूदी धर्मगुरुगदेसे येशूदा ख्रीष्ट हिन्ना भिसी विश्वास आलमुबा। ओच्छे स्थान्दो म्हेगदेसे येशूदा ख्रीष्ट भिबासे लमा थेनीगदेदा बोमो रे:जी। चुदे स्थान्दो म्हेगदेसे येशूदा ल्हानान सेम निजी भिसम येशूसे स्थान्दो म्हेगदेदा थेनीगदेला बिरोधरी रे:पुइला भिसी थेनीगदे लोड्हुबा।

§ 21:16 भजन ८:२ †† येशूसे यहूदी धर्मगुरुगदेदा परमेश्वरसे सजाय पिन्ना भिबा ताम उन्बाला लागिरी अज्जीरला दोड खर्ना लबा हिन्ना।

येशूला अधिकारला बारेरी इयोइबा
मर्कूस ११:२७-३३; लूका २०:१-८

23 परमेश्वरला मन्दिररी फेप्पी येशूसे म्हिगदेदा लोप्यान लबा धुइरी परमेश्वरला मन्दिररी पूजा लबा मुल म्हिगदेदेन यहूदी गन्बागदे येशू मुबा ग्लारी खसी "हाडसे खानडग्याम अधिकार याइसी चु गे लबा हिन्ना? हाडदा चु अधिकार खाल्से पिन्बा हिन्ना?" भिसी इयोइमा, 24 येशूसे थेनीगदेदा चुहइ भिसी सुइजी, "एनीगदेदाएनोन डाइ ताम गिक इयोइला। थे तामला जोहाब पिन्जी भिसम डादा चु गेगदे लबारी खाल्से अधिकार पिन्जी थे एनीगदेदा पाइला। 25 यूहन्नादा बत्तिस्मा पिन्बा अधिकार खाल्से पिन्जी? परमेश्वरसे कि म्हिगदेसे?"

जमाहेन्से थेनीगदे हाड हाड न्हडरी सल्लाह लबान, "परमेश्वरग्याम भिजी भिसम थेसे व्हाडदा 'थेहइ भिसम एनीगदेसे तिगदा यूहन्नादा विश्वास आलबा?' भिसी भिला। 26 तर म्हिगदेग्याम भिजी भिसम म्हिला हुलसे साइला भिसी व्हाड लोइमुला। तिगदा भिसम जम्मासेन यूहन्नादा अगमवक्ता हिन्ना भिसी भिमुला।" 27 थेतबासेलमा थेनीगदेसे "डन्दा था आरे" भिसी येशूदा जोहाब पिन्जी।

येशूसे थेनीगदेदा "थेहइ भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाइ" भिसी सुइजी।

झा न्ही मुबा म्हिला उखान

28 येशूसे अइ चुहइ भिसी सुइजी, "डाइ एनीगदेदा झा न्ही मुबा म्हिला उखान पाइला। एनीगदेसे चुग्याम तिग घोला? थे म्हि थेबा झा मुबा ग्लारी निसी 'ए तिनी अडगुर वारीरी निसी गे लउ झा' भिसी कुल्मा, 29 थेसे 'डा आनि आबा' भिसी जोहाब पिन्जी। तर लिच्छा सेम दो:सी थे गे लबारी निजी।

30 "थेहइ लसीन थे झा च्याइबा मुबा ग्लारी निसी थेदाएनोन थेहइनोन भिसी कुल्मा, थेसे 'तला आबा डा निला' भिसी भिजी। तर थे आनिनी।"

31 जमाहेन्से येशूसे परमेश्वरला मन्दिररी पूजा लबा मुल म्हिगदेदेन यहूदी गन्बागदेदा "चु न्ही न्हडरी खजिबासे चा आबासे कुल्बा ताम इयान्जी" भिसी इयोइमा, थेनीगदेसे "थेबा झासे" भिसी जोहाब पिन्जी।

ओच्छे येशूसे थेनीगदेदा चुहइ भिसी सुइजी, "च्यागो, एनीगदेसे डाला ताम इयान्गो, एनीगदे भन्दा डाच्छा तिरो दुइबा म्हिगदेदेन बेश्यागदे परमेश्वरला यहुल्सारी निला। 32 तिगदा भिसम बत्तिस्मा पिन्बा यूहन्नासे एनीगदेदा परमेश्वरसे म्हन्बा अन्धारला ग्याम उन्बारी खमाएनोन एनीगदेसे थेदा विश्वास आलनी। बरु तिरो दुइबा म्हिगदेदेन बेश्यागदेसे चा थेदा विश्वास लजी। थेनीगदेसे विश्वास लबा म्हाइसीनोन एनीगदेसे हाड हाडला पाप खलासी परमेश्वरपट्टि आदो:नी। ओच्छे थेला ताम विश्वास आलनी।

अधियाँ स्होबा म्हिगदेला उखान

मर्कूस १२:१-१२; लूका २०:९-१९

33 "अर्गु उखानएनोन इयान्गो, प्युक्पो म्हि गिकसे वारीरी अडगुर सूसी क्युसीन परखाल लजी। ओच्छे अडगुर म्हर्बारी कोल स्होसी अडगुर वारी खूइबारी नोबा छाप्रो गिक स्होजी। जमाहेन्से अधियाँरी पिन्सी थे अर्गु यहुल्सारी निजी। †

34 "अडगुर मिन्बा धुइ तमाहेन्से थे प्युक्पो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुइजी। 35 ओच्छे अधियाँ लबागदेसे थे प्युक्पो म्हिला नोकर गिकदा चुइसी तोबा ग्याइबा लजी, गिकदा साइजी तर स्हान्दो गिकदा चा युडबासे तोजी। 36 थे प्युक्पो म्हिसे दो:सी डाच्छाला भन्दा ल्हानान नोकरगदे पुइजी, तर थेनीगदेसे थे नोकरगदेदाएनोन थेहइनोन लजी। 37 "जमाहेन्से थे प्युक्पो म्हिसे जम्मान भन्दा लिच्छा 'थेनीगदेसे डाला झादा मी मान लला तला' भिसी थेसे हाडला झादान थेनीगदे मुबा ग्लारी पुइजी। 38 तर थेदा खबान लबा म्हाइसी अधियाँ

लबागदेसे 'चु मी व्हाडला धनीला झा हिन्ना, व्हाडसे थेदा साइगे। जमाहेन्से थेला सम्पत्ति व्हाडलान तला' भिसी हाड हाड न्हडरी ताम लजी। 39 जमाहेन्से थेनीगदेसे थे प्युक्पो म्हिला झादा चुइसी अडगुर वारीग्याम क्याथाड भोर्सी साइजी।

40 जमाहेन्से परमेश्वरला मन्दिररी पूजा लबा मुल म्हिगदेदेन यहूदी गन्बागदेदा येशूसे "दाहेन्से अडगुर वारीला धनी खसी थे अधियाँ लबा म्हिगदेदा तिग लला?" भिसी इयोइमा, 41 थेनीगदेसे "थे अडगुर वारीला धनीसे थेहइबा नइबा गे लबा म्हिगदेदा नाश लला। ओच्छे जुन म्हिसे अडगुर मिन्माहेन्से हाडला भो पिन्ना थेहइबा म्हिगदेदा अधियाँ पिन्ना" भिसी येशूदा जोहाब पिन्जी। ††

42 जमाहेन्से येशूसे थेनीगदेदा चुहइ भिसी सुइजी, "एनीगदेसे परमेश्वरला बचन खाइमै पढब लबा आरे?

'जुन युडबादा दिम स्होबा कर्मीगदेसे गे आखेल भिसी भ्याइबा मुबा थेनोन युडबा दिमला सुर युडबा दोजी।

चु परमप्रभुग्याम तबासे लमा

व्हाडला लागिरी उदेकला ताम हिन्ना'

भिसी भिबा मुला। †

43 "थेतबासेलमा एनीगदेसे डाला ताम इयान्गो। च्यागो, दाहेन्से परमेश्वरला यहुल्सा एनीगदेग्याम ब्यन्सी परमेश्वरसे कुल्बा अन्धार भ्रवा यहुलला म्हिगदेदा पिन्ना। 44 थे युडबाथोरी ताइबा म्हि चा जम्मान छारछिर निला, ओच्छे थे युडबा खालैथोरी ताइजी भिसम थेरी मुबा म्हि फ्लातफ्लेत निला।" ††

45 येशूसे सुइबा उखान थे:माहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे "चु ताम येशूसे व्हाडलान बारेरी पाइबा ताम हिन्ना" भिसी घोजी। 46 थेतबासेलमा थेनीगदेसे येशूदा चुइबारी म्हाइजी, तर थेनीगदे म्हिला हुल म्हाइसी लोइजी। तिगदा भिसम म्हिगदेसे येशूदा अगमवक्ता भिसी म्हन्मुबा।

ब्याह भोजला उखान

लूका १४:१५-२४

22 दो:सीनोन येशूसे थेनीगदेदा उखानग्याम चुहइ भिसी सुइजी,

2 "स्वर्गला यहुल्सा चुहइबान हिन्ना, ग्ले गिकसे हाडला झाला ब्याहला भोज ठीक लजी। 3 ओच्छे निम्तो याइबा म्हिगदेदा इयोइबारी हाडला नोकरगदे पुइजी। तर निम्तो याइबा म्हिगदेसे खबा सेम आलनी।

4 "दो:सी ग्लेसे निम्तो याइबा म्हिगदेदा 'डाइ छोबा छोबा म्हे बहर साइसी ब्याहला भोज ठीक लसी जिन्बा मुला। दाहेन्से हाडनी फेपखउ भिउ' भिसी स्हान्दो नोकरगदेदा पुइजी।

5 "तर थे निम्तो याइबा म्हिगदेसे नोकरगदेला तामदा थेगोन आलना कोइ हाडला बु वारीरीक्यार निजी, कोइ व्यापार लबारी निजी, 6 ओच्छे स्हान्दोगदेसे चा थे नोकरगदेदा चुइसी तोबा ग्याइबा लसी साइजी। 7 चु ताम थे:सी ग्ले ल्हानान बोमो खजी। जमाहेन्से ग्लेसे सिपाहीगदेदा पुइसी हाडला नोकरगदे साइबागदेदा साइजी। ओच्छे थेनीगदेला शहरएनोन ख्राइजी।

8 "जमाहेन्से ग्लेसे हाडला नोकरगदेदा चुहइ भिसी कुल्जी, 'ब्याहला भोज ठीक लसी जिन्बा मुला। तसैनोन निम्तो याइबा म्हिगदे व्हाडला भोजरी खबाधोनाला आरेम। 9 थेतबासेलमा दाहेन्से एनीगदे ग्याम ग्यामरी निउ। ओच्छे स्याप्यागदे जम्मादान ब्याहला भोज चबारी खउ भिसी निम्तो पिन्गो।' 10 ओच्छे नोकरगदे ग्याम ग्यामरी निसी ज्यबा गे लबा तसै आज्यबा गे लबा तसै स्याप्येबा जम्मादान निम्तो पिन्जी। चुहइ लसी ब्याह दिम नाडनोन डोन्बोगदे तजी।

11 "डोन्बोगदेदा च्याबारी भिसी ग्ले दिम न्हडरी खमा थेरी ब्याहरी खबा धुइरी क्वान्तो:बा क्वान आक्वान्ना खबा म्हि गिकदा म्हाइजी। 12 थेदा म्हाइसी, 'ओहो, हो!, ए मी ब्याहरी क्वान्तो:बा क्वान आक्वान्ना चुरी खाहइ लसी खजी?' भिसी इयोइमा, थे म्हिसे तिगे जोहाब पिन्आखन्नी।

†† थे वारीला धनीला झा चा परमेश्वरला झा येशू हइबान हिन्ना। † 21:42 भजन ११८:२२-२३ †† लूका २०:१८ स्हीगो, चु पदला ताम कोइ कोइ ग्रीक बाइबलरी भिबा आरे।

13 जमाहेन्से ग्लेसे ह्राडला नोकरगदेदा 'चुला या काड खीसी मडग्यार धोपधोष्बा ग्लारी भ्याङ्गो। थेरी म्हिगदे स्वा क्रेसी क्राबा क्रिड्बा लला' भिसी कुल्जी। †

14 "तिगदा भिसम ड्योडबागदे ल्हानान मुला, तर धम्बागदे चा ल्हाना आरे।"

तिरो फाबा ठीक हिन्ना कि आहिन?

मर्कूस १२:१३-१७; लूका २०:२०-२६

15 जमाहेन्से फरिसीगदे येशू मुबा ग्लायाम निजी। ओच्छे दाहेन्से येशूदा थेलान तामग्याम खाह्ङ लसी फसब लसे भिसी ह्राड ह्राड न्हडरी सल्लाह लजी। 16 थेनीगदेसे ह्राडला चेलागदेदा हेरोद ग्लेला म्हिगदेदेन छ्याम येशू मुबा ग्लारी पुडजी। थे म्हिगदे येशू मुबा ग्लारी निसी चुह्ङ भिसी भिजी, "गुरु, ह्राड सत्य म्हि हिन्ना, ओच्छे ह्राडसे खालैदा वास्ता आलमुला भिसी इन्दा था मुला। तिगदा भिसम ह्राडसे म्हिला ली च्यासी गे आलमुला, तर ह्राडसे म्हिगदेदा लोष्बा धुडरी परमेश्वरला ग्याम ज्यना लसी उन्मुला।

17 थेतबासेलमा रोमी ग्याल्बो कैसरदा तिरो फाबा ठीक हिन्ना कि आहिन? इन्दा सुङ्गो।" ††

18 तर येशूसे थेनीगदेला सेमला नडबा ताम था याडसी "कप्टीगदे, तिगदा एनीगदेसे डादा फसब लबारी म्हाडबा? 19 एनीगदेसे तिरो फाबा डबल डादा उन्नो" भिसी सुङ्गो, थेनीगदेसे डबल गिक भसी येशूदा पिन्जी। 20 जमाहेन्से येशूसे थेनीगदेदा "चु डबलरी मुबा छापदेन मिन खाल्ला हिन्ना?" भिसी सुङ्गो, 21 थेनीगदेसे "रोमी ग्याल्बो कैसरला" भिसी जोहाब पिन्जी।

जमाहेन्से येशूसे थेनीगदेदा "दाहेन्से एनीगदेसे रोमी ग्लेला जति रोमी ग्लेदा फागो। ओच्छे परमेश्वरला जति परमेश्वरदान फागो" भिसी सुङ्गो।

22 चुह्ङबा ताम थे:सी थेनीगदे उदेक तजी। जमाहेन्से थेनीगदेसे येशूदा ख्लासी निजी।

सिबाग्याम सोना लबाला बारेरी ड्योडबा

मर्कूस १२:१८-२७; लूका २०:२७-४०

23 म्हि सिमाहेन्से दो:सी आसो भिसी विश्वास लबा सदुकीगदे थेनोन धिनकुनु येशू मुबा ग्लारी खसी येशूदा चुह्ङ भिसी ड्योडबारी छ्याडजी। †24 "गुरु, मोशासे य्हाडदा पिन्बा ठिम अन्छार खालैला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतो:ला भिसी पाड्बा मुला। †25 इन्ना गुडरी ज्योज्यो आले निस मुबा। थेनीगदे न्हडरी थेबासे ब्याह लजी। तर कोलागदे आतनान थे सिजी। जमाहेन्से पाराडसे थेनोन चाडदेन छ्याम ब्याह लजी। 26 थेह्ङ लसीन पाराड साँजी लसी च्याड्बाधोनासेन थेनोन चाडदेन छ्याम ब्याह लजी। 27 थेनीगदे जम्मान सिमाहेन्से थे म्रिडम्हेमेनोन सिजी। 28 थेतबासेलमा इन्दा सुङ्गो, सिबाग्याम सोना लजी भिसम थे म्रिडम्हेमे खजिबाला म्रिड तला? तिगदा भिसम थेनीगदे जम्मासेन थे म्रिडम्हेमेदेन छ्याम ब्याह लबा मुला।" 29 जमाहेन्से येशूसे थेनीगदेदा चुह्ङ भिसी जोहाब पिन्जी, "एनीगदे अन्दोलरीन चीम, तिगदा भिसम एनीगदेसे परमेश्वरला बचनदेन परमेश्वरला शक्तिला बारेरी घोबान आरेम। 30 तिगदा भिसम सिबाग्याम सोना लबा धुडरी न्ह ब्याह लला न्ह ब्याह तला। तर थेनीगदे स्वर्गरी मुबा स्वर्गदूतगदे ह्ङ्बान तला। 31 सिबाग्याम सोना लबाला बारेरी परमेश्वरसे एनीगदेदा तिग सुङ्गो मुला, थे ताम एनीगदेसे पढब लबा आरे? 32 'डा अब्राहाम, इसहाकदेन याकूबला परमेश्वर हिन्ना' भिसी परमेश्वरसे मोशादा सुङ्गो मुबा। परमेश्वर सिबागदेला परमेश्वर आहिन, तर सोबागदेला परमेश्वर हिन्ना।" ††

33 येशूसे चुह्ङ लसी लोष्बा म्राड्सी थेरी मुबा म्हिला हुल उदेक तजी।

परमेश्वरसे कुल्बा मुल ताम
मर्कूस १२:२८-३४; लूका १०:२५-२८

34 येशूसे सदुकीगदेदा जोहाबनोन पिन्आखम्बा तना लजी भिबा ताम थे:सी फरिसीगदे दिक्सी सल्लाह लबारी ग्ला गिकरी पोप तजी। 35 जमाहेन्से थेनीगदे न्हडला यहूदी धर्मगुरु गिकसे येशूला सेम च्याबाला लागिरी चुह्ङ भिसी ड्योडजी, 36 "गुरु, परमेश्वरसे मोशादा पिन्बा ठिमरी जम्मान भन्दा मुल ताम चा खजिबा हिन्ना?" ††

37 येशूसे थेदा चुह्ङ भिसी सुङ्गो, "च्यागो, परमेश्वरसे कुल्बा जम्मान भन्दा मुल ताम चा चुनोन हिन्ना। एसे ह्राडला परमप्रभु परमेश्वरदा ह्राडला जम्मान सेमहेन्से, जम्मान प्राणसे, जम्मान बुद्धिसे माया लउ। ††39 ओच्छे अर्गु मुल ताम चा एसे ह्राडला खिम्जेमदा ह्राडदा ह्ङ्गोन माया लउ। 340 अगमवक्तागदेसे लोष्बा तामदेन मोशाला ठिमरी मुबा जम्मान तामगदे चा परमेश्वरसे कुल्बा चु मुल ताम न्हीग्यामनोन खबा हिन्ना।"

ख्रीष्ट खाल्ला झा हिन्ना?

मर्कूस १२:३५-३७; लूका २०:४१-४४

41 जमाहेन्से येशूसे थेरी पोप तसी चिबा फरिसीगदेदा चुह्ङ भिसी ड्योडजी, 42 "थार्बा पिन्बा ख्रीष्टला बारेरी एनीगदेसे तिग म्हन्बा मुला? थे खाल्ला झा हिन्ना?"

थेनीगदेसे येशूदा "दाऊद ग्लेला सन्तान हिन्ना" भिसी जोहाब पिन्जी।

43 दो:सी येशूसे थेनीगदेदा चुह्ङ भिसी सुङ्गो, "थेह्ङ भिसम दाऊददा परमेश्वरला आत्माला शक्तिग्याम तिगदा ख्रीष्टदा 'प्रभु' भिपुड्जी? दाऊदसेन चुह्ङ भिसी भिमुला,

44 'परमप्रभुसे डाला प्रभुदा,

"डाइ एला शत्रुगदेदा एला काड धिरी आथान्तेधोना

ए डाला दाहिनेपट्टि चिउ भिसी सुङ्गो।" ††

45 दाऊद ग्लेसेन ख्रीष्टदा प्रभु भिला भिसम खाह्ङ लसी ख्रीष्ट दाऊद ग्लेला सन्तान तला?" ††46 जमाहेन्से खालैसेन येशूदा जोहाब गिकनोन लआखम्नी। जमाकुनुहेन्से खालैसेन येशूदा तिगै ताम ड्योडबा आँट आलनी।

येशूसे यहूदी धर्मगुरुदेन फरिसीगदेला दोष उन्बा

मर्कूस १२:३८-४०; लूका ११:३९-५२; २०:४५-४७

23 जमाहेन्से येशूसे ह्राडला चेलागदेदेन थेरी मुबा म्हिला हुलदा चुह्ङ भिसी सुङ्गो, 2 "च्यागो, यहूदी धर्मगुरुदेन फरिसीगदेसे मोशाला

ठिम लोष्बा अधिकार याड्बा मुला। 3 थेतबासेलमा थेनीगदेसे पाड्बा ताम एनीगदेसे ड्यान्गो, तर थेनीगदेसे लबा ह्ङ्गबान गे चा थालउ। तिगदा भिसम थेनीगदेसे एनीगदेदा लोष्बाम लोष्पुला, तर लोष्बा अन्छारला गे चा आलमुला। 4 ओच्छे म्हिगदेदा थेनीगदेसे पुड्गोन आखम्बा धोड काप्सी पिन्मुला। तर थेनीगदेसे भिसम थे धोड थीबाला लागिरी या जुम्बीसेनोन आथुर्मुला।

5 "थेनीगदेसे जम्मान गे म्हिदा उन्बाला लागिरी लमुला। तिगदा भिसम थेनीगदेसे परमेश्वरसे मोशादा पिन्बा ठिम कागजरी भिसी ग्रेन ग्रेन जन्तर स्होसी डोदेन नारीरी खीमुला। ओच्छे थेनीगदेसे क्वान्बा क्वान्ना जोरी हेड्बा हेड्बा फुर्गा कार्मुला। ††6 थेनीगदेसे भोजरीदेन यहूदीगदे हुप तबा दिमला मुल ठिरी चिबारी सेम लमुला। 7 बजाररी निमाएनोन म्हिगदेसे फ्या लगै भिसी म्हन्मुला, ओच्छे 'गुरु' भिसीएनोन पाड्गै भिसी म्हन्मुला। 8 तर एनीगदेदा खालैसेन 'गुरु' भिसी थाभिगै। तिगदा भिसम एनीगदे ज्योज्यो आले हिन्ना। एनीगदेला गुरु चा गिक जे मुला। ††9 जम्बुलिडरी एनीगदेसे खालैदान आबा थापाङ्गो। तिगदा भिसम स्वर्गरी एनीगदे जम्मान आबा

††† 22:36 लूका १०:२५-२८ ††† 22:37-38 व्यव ६:५ 22:39 लेवी

१९:१८ †† परमेश्वरसे प्रभुदा स्वर्गरी ह्राडदेन छ्याम चिबारी ग्ले स्होबा मुला। †††

22:44 भजन ११०:१ †† म्हिगदेसे दाऊद ग्लेला सन्तानदा दाऊद ग्ले भन्दा जजा भिसी

म्हन्मुबा, तसैनोन दाऊद ग्लेसेनोन ह्राडला सन्तानदा प्रभु भिबासे लमा थेनीगदे उदेक तजी।

††† 23:5 मती ६:१; गन्ती १५:३८; व्यव ६:८ †† ख्रीष्टियानगदे न्हडरीनोन गुरुगदे

तखम्ला (याकूब ३:१; एफिसी ४:११)। तर ख्रीष्ट चा जम्मान मुल गुरु हिन्ना।

† 22:13 मती ८:१२; २५:३०; लूका १३:२८ †† हेरोदला म्हिगदेदेन फरिसीगदेसे स्हान्दो म्हिगदेसे येशूदा विश्वास लबा खलागै भिसी म्हन्मुबा। † 22:23 मुल २३:८ †† 22:24 व्यव २५:५ †† 22:32 प्रस्था ३:६

गिक जे मुला।^{†10} ओच्छे एनीगदेदा खालैसेन 'मालिक' थाभिगे। तिग्दा भिसम एनीगदे जम्मालान मालिक थाबा पिन्बा खीष्ट जे हिन्ना।^{†11} एनीगदे न्हडला जुन म्हि घेन मुला, थेसे चा एनीगदे जम्मालान सेवा लतो:ला।^{††12} ओच्छे जुन म्हिसे हाडसे हाडदान घेन स्होला, थे म्हि चा जजा दोला। तर हाडसे हाडदान जजा स्होबा म्हि चा घेन दोला।[‡]

¹³ "परमेश्वरग्याम सजाय याडतो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे म्हिगदेला डाच्छा स्वर्ग घुल्साला प्राप दुड्डुला। ओच्छे एनीगदे हाडएनोन आनिमुला निबारी म्हाइबा म्हिदाएनोन निआपुड्डुला।

¹⁴ "परमेश्वरग्याम सजाय याडतो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे हेम्बो सिबा प्रिडन्हेमेगदेला दिमनाम ब्यन्मुला। ओच्छे म्हिदा उन्बाला लागिरी हेड्बा हेड्बा प्रार्थना लबा स्होमुला। थेतबासेलमा स्हान्दोगदेसे भन्दा एनीगदेसे ल्हाना सजाय याडला।^{‡‡}

¹⁵ "परमेश्वरग्याम सजाय याडतो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदे गड स्योड थासी भ्रसे कोर्सी कोर्सी स्हान्दो म्हिदा हाडलान ग्यामरी भ्रपुड्डुला। ओच्छे तिगे लसी स्हान्दो म्हि गिक एनीगदेदेन छ्याम ठिकजी भिसम एनीगदेसे थे म्हिदा हाड भन्दा आज्यबा स्होसी नगरी नितो:बा म्हि स्होमुला।

¹⁶ "स्हान्दोदा लोप्बा काना म्हिगदे, एनीगदेसे परमेश्वरग्याम गाते सजाय याडला। एनीगदेसे म्हिगदेदा लोप्बा धुइरी 'परमेश्वरला मन्दिरला मिन किन्सी घान फासैनोन तिगे आतमुला। तर परमेश्वरला मन्दिररी मुबा म्हरला मिन किन्सी घान फाजी भिसम चा थे घानसेन चमुला' भिसी लोप्मुला।

¹⁷ मूर्ख कानागदे, खजिबा चा घेन? म्हरदा चोखो तना लबा परमेश्वरला मन्दिर घेन कि म्हर घेन? ¹⁸ ओच्छे 'खालै म्हिसे बलि फुल्बा ग्लाला मिन किन्सी घान फाजी भिसम तिगे आतमुला, तर थेरी फुल्बा भेटीला मिन किन्सी घान फाजी भिसम चा थे घानसेन चमुला' भिसीनोन एनीगदेसे लोप्मुला। ¹⁹ कानागदे, खजिबा चा घेन हिन्ना। भेटीदा चोखो तना लबा ग्ला घेन कि भेटी घेन? ²⁰ थेतबासेलमा च्यागो, परमेश्वरला मन्दिररी बलि फुल्बा ग्लाला मिन किन्सी घान फाबा म्हिसे थेथोरी मुबा जम्मान स्हेला मिन किन्सी घान फाबा तला। ²¹ ओच्छे परमेश्वरला मन्दिरला मिन किन्सी घान फाबासे थेरी धन्छ्याबाला मिन किन्सी घान फाबा तला। ²² थेहड् लसीन स्वर्गला मिन किन्सी घान फाबासे परमेश्वरला ठिदेन थेथोरी धन्छ्याबाला मिन किन्सी घान फाबा तला।^{‡‡}

²³ "परमेश्वरग्याम सजाय याडतो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे बाबरीदेन सौप ओच्छे जिराला भो च्युडला भो गिक चा पिन्मुला। तर ठीक निसाफ, दयादेन विश्वासला बारेरी परमेश्वरसे मोशादा पिन्बा ठिमला मुल तामदा चा आड्यान्मुला। तर एनीगदेसे चु गे न्हीनोन लतो:बा मुबा।^{‡‡‡24} तर एनीगदेसे भुसुना हड्बा जजा स्हे चा म्हाइबा, तर ऊँट हड्बा घेन स्हेदा चा आम्राड्बा, एनीगदे मी कानान हिन्ना।^{‡‡‡}

²⁵ "परमेश्वरग्याम सजाय याडतो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। एनीगदेसे खोरेदेन खार्बाला पाखापट्टि जे म्याप्मुला। तर न्हडपट्टि चा चीबुन थान्बा हड् लसी एनीगदेसे हाडला सेमरी लोभदेन म्हिदा ठगब लबा हड्बा नड्बा ताम थान्मुला। ²⁶ काना फरिसीगदे, डाच्छा खार्बदिन खोरे न्हडपट्टि ज्यना लसी म्यापगो। जमाहेन्से जे थे खार्बदिन खोरे पाखापट्टि ज्यना लसी धाला।

²⁷ "परमेश्वरग्याम सजाय याडतो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। एनीगदे तार साप्रासे च्युर्सी थान्बा धुर्सा हड्बान मुला। थे धुर्साला पाखापट्टि च्यामा चा जेबा म्हाइमुला। तर न्हडरी भिसम सिबा

म्हिला नखुदेन नड्बा स्हेगदेसे प्लिड्बा मुला।^{§28} थेहड् लसीन एनीगदे म्हिला ओन्हाडरी 'डनी परमेश्वरला डाच्छा ज्यबा म्हि हिन्ना' भिसी भ्रमुला। तर एनीगदेला सेम चा छलकपट्टेन पापसे प्लिड्बा मुला।

²⁹ "परमेश्वरग्याम सजाय याडतो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे अगमवक्तागदेला धुर्सा स्होमुला, ओच्छे परमेश्वरला डाच्छा ज्यबा म्हिगदेला धुर्सा जेना लसी थान्मुला।

³⁰ ओच्छे 'डन्ना आखे म्हेमेसे अगमवक्तागदेदा साइबा धुइरी डनीएनोन थेनीगदेदेन छ्याम मुबा हिन्सम थेनीगदेसे हड् चा डन्से आलसेला मुबा' भिसी एनीगदेसे पाड्मुला। ³¹ एनीगदेसे पाड्बा चुहड्बा तामग्यामसेन एनीगदे अगमवक्तागदेदा साइबागदेला सन्तान हिन्ना भिसी था तना लबा मुला। ³² दाहेन्से एनीगदेला आखे म्हेमेसे शुरु लबा पाप गे एनीगदेसे पूरा लउ।

³³ "पुखीदेन पुखीला कोलागदे, नगरी नातो:बा दुखग्याम एनीगदे खाहड् लसी जोगब तला? ^{§†34} थेतबासेलमा एनीगदेसे डाला ताम ड्यान्गो, दाहेन्से डाइ अगमवक्तागदेदेन बुद्धि मुबा म्हिगदेदा ओच्छे सत्य ताम लोप्बा धर्मगुरुगदे एनीगदे मुबा ग्लारी पुड्खला। थेनीगदेदा एनीगदेसे कोइदा साइला, कोइदा कुसरी टॉगब लसी साइला, कोइदा एनीगदे हुप तबा दिमगदेरी भोर्सी कोर्से तो:ला ओच्छे कोइदा शहर शहरग्याम ताप्ला। ³⁵ थेतबासेलमा परमेश्वरला डाच्छा ज्यबा म्हि हाबिलदा साइबा धुइहेन्से बेरेक्याहला झा जकरियादा साइबा धुइधोना जम्बुलिडरी मुबा जम्मान ज्यबा म्हिगदेदा साइबा पापला दोष एनीगदेसेन नातो:ला। एनीगदेसे बेरेक्याहला झा जकरियादाएनोन परमेश्वरला मन्दिरदेन बलि फुल्बा ग्लाला गुडरी साइजी। ³⁶ च्यागो, एनीगदेसे डाला ताम ड्यान्गो, चु जम्मान पापला सजाय दान्देला म्हिगदेथोरीन खला।

यरूशलेमला म्हिगदे म्हाइसी येशूदा दुख इहम्बा
लूका १३:३४, ३५

³⁷ "यरूशलेमला म्हिगदे, एनीगदेसे अगमवक्तागदेदा साइला ओच्छे परमेश्वरसे एनीगदे मुबा ग्लारी पुड्खबागदेदा युडबासे तोला। डाइ एनीगदेला कोलागदेदा नागा मामासे हाडला कोलागदेदा भ्याप्से घप्बा हड् लसी पोप लबारी म्हाइमा एनीगदेसे आड्यान्नी। ³⁸ थेतबासेलमा दाहेन्से परमेश्वरसे एनीगदेला शहर खलाला। ^{†††39} डाला ताम ड्यान्गो, एनीगदेसे 'परमप्रभुला मिनरी फेप्खबादा मोलम याड्बा म्हि' आभितेथोना डादा आम्राड्।"^{‡‡}

परमेश्वरला मन्दिर नाश तला
मर्कूस १३:१-२; लूका २१:५-६

24 जमाहेन्से येशू परमेश्वरला मन्दिरग्याम थोन्सी फेप्बारी छ्याइमा थेला चेलागदे परमेश्वरला मन्दिरला दिमगदे उन्बारी भिसी येशूला डामरी खजी।² तर येशूसे थेनीगदेदा चुहड् भिसी सुड्जी, "एनीगदेसे चु जम्मान म्हाइबा मुला आहिन? च्यागो, एनीगदेसे डाला ताम ड्यान्गो, चु मन्दिरला युडबा गिकनोन बाँकी आचिना जम्मान फुप्ला" भिसी सुड्जी।

जम्बुलिड नाश तबा धुइला चिनुगदे
मर्कूस १३:३-१३; लूका २१:७-१९

³ जमाहेन्से येशू जैतून भिबा गडरी धन्छ्याबा धुइरी, थेला चेलागदे सुटक्क खसी "हाडसे सुड्बा चु तामगदे खाइमा तला? ओच्छे हाड फेप्खबा धुइदेन परमेश्वरसे जम्बुलिडला जम्मान म्हिगदेला निसाफ लबा धुइरी खाहड्बा चिनु म्हाइला? डन्दा सुड्जो" भिसी भिजी।

⁴ येशूसे थेनीगदेदा चुहड् भिसी सुड्जी, "एनीगदे होशियार तसी चिउ, एनीगदेदा खालैसेन झुक्याब थालगै।⁵ तिग्दा भिसम ल्हानान म्हिगदे डाला मिन किन्सी 'डानोन थाबा पिन्बा खीष्ट हिन्ना' भिसी खला। ओच्छे ल्हानान म्हिदा झुक्याब लला।⁶ एनीगदेसे लडाइदेन लडाइला हल्लागदे थे:ला। तसैनोन एनीगदे थालोड्जो, तिग्दा भिसम चु तनोन तो:बा हिन्ना। तर थेनोन

§ 23:27 मुल २३:३ §† 23:33 मत्ती ३:७; १२:३४; लूका ३:७ §†† 23:38 यर्मि २२:५ §‡ 23:39 भजन ११८:२६

† येशूसे हाडला आबादा मान थालउ भिसी सुड्बा आहिन। तर परमेश्वरदा पिन्तो:बा मान जम्बुलिडरी स्हान्दो म्हिदा थालउ भिबा हिन्ना। †† 23:11 मत्ती २०:२६-२७; मर्कूस ९:३५; लूका २२:२६ ‡ 23:12 लूका १४:११; १८:१४ †† चु पदला ताम ल्हाना हड्बा ग्रीक बाइबलरी भिबा आरे, कोइ कोइ बाइबलरी जे भिबा मुला। चु ताम मर्कूस १२:४० स्हीगो। ‡‡ 23:22 यशै ६६:१; मत्ती ५:३४ ††† 23:23 लेवी २७:३० †††† चु पदरी येशूसे चुहड् भिसी लोप्बारी छ्याइजी, फरिसीगदेसे जजाबा भुसुना हड्बा तामदा चा वास्ता लमुला, तर थेनीगदेसे परमेश्वरसे मोशादा पिन्बा ठिमरी मुबा घेन तामदा चा तिगे वास्ता आलमुला।

धुइरी चा चु जम्बुलिङ नाश आत।⁷ तिग्दा भिसम म्हि खुलला बिरोधरी म्हि खुलनोन ओच्छे खुल्साला बिरोधरी खुल्सा रे:ला। चुह्इ तसी ग्ला ग्लारी अनिकाल तबादेन सडगुल निला।⁸ चु जम्मान ताम मी कोला न्हसेला मिडम्हेमेदा बेथासे थुर्बा ह्इबा जे हिन्ना।

⁹ “थे धुइरी एनीगदेदा म्हिगदेसे चुइसी दुख पिन्ना, ओच्छे साइला। थेह्इ लसीन डादा विश्वास लबासे लमा एनीगदेदा जम्मान खुलला म्हिगदेसे हेला लला।¹⁰ थे धुइरी ल्हानान म्हिगदेसे डादा विश्वास लबा खलाला। ओच्छे गिकसे स्थान्दोदा चुइसी म्हिगदेला यारी जिम्मा पिन्बादेन हेला लला।¹¹ थे धुइरी ल्हानान फट्टा अगमवक्तागदे थोन्सी ल्हानान म्हिगदेदा झुक्याब लला।¹² थेह्इ लसीन पाप गे ल्हानान तसी निबासे लमा ल्हानान म्हिसे स्थान्दोदा माया लबा खलाबान निला।¹³ तर जस्तोन दुख तसैनोन जुन म्हिसे ह्वाड आसितेधोना डादा विश्वास लसीन चिला थेसे थार्बा याइला।¹⁴ ओच्छे जम्बुलिङला जम्मान खुलला म्हिगदेसे परमेश्वरला खुल्साला समाचार थे:सी जिन्माहेन्से जे नाश तबा धुइ खला।

लोइबा खबा धुइ

मर्कूस १३:१४-२३; लूका २१:२०-२४

¹⁵ “थेतबासेलमा दानिएल अगमवक्तासे पाइबा ह्इनोन एनीगदेसे परमेश्वरला मन्दिरला चोखो ग्लारी नइबा खबा स्हे म्हाइला।” चुला अर्थ पढब लबा म्हिसे घोर्गे।¹⁶ “थे धुइरी यहूदिया अञ्चलरी मुबा म्हिगदे गडरीक्यार यार्गे।¹⁷ ओच्छे तलाथोरी मुबा म्हिगदे ह्वाडला सामान किन्बारी मार फाप्सी दिम न्हडरी थावाङ्गो।¹⁸ बु वारीरी मुबागदे ह्वाडला घ किन्बारी दो:सी दिमरी थानिउ।¹⁹ थे धुइरी जिउ न्हीला मिडम्हेमेदेन कोलादा इहे खवाबा आमागदेदा झन गाते ल्हानान दुख तला!²⁰ थेतबासेलमा खड्बा लादेन बल्पा न्हाबा धिनकुनु यारआतो:गे भिसी एनीगदेसे प्रार्थना लउ।²¹ तिग्दा भिसम थे धुइरी तबा ग्रेन दुख जम्बुलिङ छ्यामाहेन्से दान्देधोना तबा आरे ओच्छे लिच्छाएनोन खाइमे तसेला आरे।²² थेह्इबा दुखला धिन परमेश्वरसे तुन्ना आलबा हिन्सम खालैसेन थार्बा आयाइसेला मुबा। तर परमेश्वरसे ह्वाडसे धम्बा म्हिगदेला लागिरी थे धिन तुन्ना लसी पिन्ना।

²³ “खालैसे एनीगदेदा ‘च्यागो, थार्बा पिन्बा ख्रीष्ट चुरी मुला,’ अथवा ‘थेरी मुला,’ भिजी भिसम थेनीगदेला ताम विश्वास थालउ।²⁴ तिग्दा भिसम फट्टा ख्रीष्टगदेदेन फट्टा अगमवक्तागदे थोन्ना। ओच्छे थेनीगदेसे खन्तेधोना परमेश्वरसे धम्बा म्हिगदेदा झुक्याब लबाला लागिरी उदेकला ग्रेन चिनुगदेदेन उदेकला गेगदे लसी उन्ना।²⁵ च्यागो, चु ताम डाइ एनीगदेदा डाच्छाहेन्सेन पाइसी पिन्बा मुला।

²⁶ “थेतबासेलमा म्हिगदेसे एनीगदेदा ‘येशू तोडतोडबा ग्लारी मुला’ भिजी भिसम, एनीगदे थेरी थानिउ। ओच्छे ‘च्यागो, येशू मी कोठा न्हडरी मुला’ भिजी भिसैनोन एनीगदेसे थेनीगदेला ताम विश्वास थालउ।²⁷ तिग्दा भिसम स्यारपट्टि तिप्लीड खमा न्हुपधोना व्हाल तबा ह्इ लसी परमेश्वरसे पुइखबा म्हिएनोन थेह्इ लसीन खला।²⁸

²⁸ “जुन ग्लारी सिबा जन्तु मुला थेरी गिद्धागदे पोप तमुला। §

परमेश्वरसे पुइखबा म्हि फेख्खा धुइ

²⁹ “थेह्इबा दुखला धिन खमैछ्याम, ‘धिनीसे व्हाल पिन्बा खलाला ओच्छे लनीला व्हाल म्हाला। जमाहेन्से मुला शक्तिगदे याडयोड तसी सुक्र सार जम्मान ताइला।’ §†

† 24:9 मत्ती १०:२२ †† 24:13 मत्ती १०:२२ ‡ 24:15 दानि ९:२७; ११:३१; १२:११ †† ईश्वी संवत् ७० सालरी रोमी सिपाहीगदेसे यरूशलेम शहर ह्वाडला यारी किन्बा भन्दा डाच्छा ल्हानान ख्रीष्टियानगदेदा येथूसे होशियार तना लबारी चु ताम सुइबा हिन्ना। थे धुइरी ल्हानान म्हिगदे यर्दन स्योडला स्यार ड्याडपट्टिला डेकापोलिस भिबा अञ्चलरी यार्गी †† 24:18 लूका १७:३१ ††† 24:21 दानि १२:१; उन्बा ७:१४ ††† 24:27 लूका १७:२३-२४ § 24:28 लूका १७:३७ §† 24:29 यशै १३:१०; ३४:४; इज ३२:७; योए २:१०-३१; ३:१५; उन्बा ६:१२-१३

³⁰ चुह्इ तमाहेन्से मुरी परमेश्वरसे पुइखबा म्हि खबान लबा चिनु गिक म्हाइला। ओच्छे परमेश्वरसे पुइखबा म्हिदा स्वर्गला खसुरी शक्तिदेन ग्रेन व्हाल व्हालरी खबा म्हाइसी जम्बुलिङरी मुबा जम्मान खुलला म्हिगदे क्राबा क्रिड्बा लला। §††३१ बिगुलला ग्रेन काइदेन छ्याम थेसे स्वर्गदूतगदेदा जम्बुलिङदेन मुला जम्मान ग्लारी पुइला। जमाहेन्से थे स्वर्गदूतगदेसे परमेश्वरसे धम्बा जम्मान म्हिगदेदा ग्ला गिकरी पोप लला।

अञ्जीरला दोड च्यासी लोप्तो:बा ताम

मर्कूस १३:२८-३१; लूका २१:२९-३३

³² “एनीगदेसे अञ्जीरला दोडदा च्यासी थेंग्याम तिगै ताम लोप्पो। थेला हाँगागदेरी भा भुमैछ्याम छेप्पा छबा ला वाइजी भिसी एनीगदेसे था याइला।³³ थेह्इ लसीन डाइ पाइबा जम्मान तामगदे तबा म्हाइहेन्से परमेश्वरसे पुइखबा म्हि खबा धिन खसी जिन्जी भिबा ताम एनीगदेसे था याइलो।³⁴ च्यागो, एनीगदेसे डाला ताम ड्यान्गो, चु जम्मान ताम पूरा आततेधोना दान्देला म्हिगदे आसि।³⁵ मुदेन जम्बुलिङ म्हासी निसैनोन डाला बचन खाइमै आम्हा।

सदन होशियार तसी चिउ

मर्कूस १३:३२-३५; लूका १२:३९-४०; १७:२६-२७, ३४-३५

³⁶ “थे दुखला धिनदेन धुइ खाइमा खला भिसी स्वर्गदूतदाएनोन था आरे ओच्छे डा परमेश्वरला झादाएनोन था आरे। थे ताम परमेश्वर आबादा जे था मुला।³⁷ ओन्मा नोआला धुइरी तबा ह्इनोन परमेश्वरसे पुइखबा म्हि दो:सी खबा धुइरीनोन तला। §†३८ तिग्दा भिसम नाम खसी भाल बाढी खबा भन्दा डाच्छा नोआ पानी जहाजरी वाइबा धिनकुनुधोना म्हिगदे चबा थुइबादेन ब्याह लबान मुबा।³⁹ ओच्छे नाम खसी भाल बाढीसे आभोतेधोना थेनीगदेसे तिग तला भिसी था आयाइनी। परमेश्वरसे पुइखबा म्हि खमाएनोन थेह्इ तला। §†४० थे धुइरी बु वारीरी गे लसी चिबा म्हि न्ही न्हडरी गिकदा भोर्ला गिकदा थेरीन खलाला।⁴¹ थेह्इ लसीन हान्दारी ब्रा स्याइसी चिबा मिडम्हेमे न्ही न्हडरी गिकदा भोर्ला, गिकदा थेरी खलाला।

⁴² “थेतबासेलमा एनीगदे होशियार तसी छोर्सी चिउ। तिग्दा भिसम एनीगदेला प्रभु खाइमा खला भिबा ताम एनीगदेदा था आरे।⁴³ तर एनीगदेसे चु तामएनोन था याइलो, दिमला म्हिसे य्हा खबा धुइ था याइसम थे छोर्सी चिला, ओच्छे थेसे ह्वाडला दिम न्हडरी य्हा वाइआपुइ।⁴⁴ थेतबासेलमा एनीगदेएनोन होशियार तसी छोर्सी चिउ। तिग्दा भिसम परमेश्वरसे पुइखबा म्हिएनोन एनीगदेसे आम्हन्बा धुइरी खला। §†

ज्यबा गे लबा नोकरदेन नइबा गे लबा नोकर

लूका १२:४२-४६

⁴⁵ “दिमरी गे लबा बुद्धि मुबादेन भर्तुप्या म्हि खाल हिन्ना? मालिकसे दिमला स्थान्दो नोकरगदेदा ठीक ठीक धुइरी चबा थुइबा ढिक्का लसी पिन्बारी जिम्मा पिन्थान्जी।”⁴⁶ मालिक दो:सी खबा धुइरीनोन थेसे मालिकसे कुल्सी थान्बा ह्इ लसी गे लबा म्हाइजी भिसम इनाम याइबा नोकर थेनोन हिन्ना।⁴⁷ च्यागो, एनीगदेसे डाला ताम ड्यान्गो, मालिकसे थेह्इबा नोकरदा ह्वाडला जम्मान धन सम्पत्ति जिम्मा पिन्ना।⁴⁸ तर थे नइबा नोकरसे ‘डाला मालिक योनान आख’ भिसी म्हन्सी,⁴⁹ इय्हाइबा म्हिगदेदेन छ्याम चिसी चबा थुइबा लसी ह्वाडदेन छ्यामनोन गे लबा नोकरगदेदा तोबा ग्याइबा लजी भिसम,⁵⁰ थेला मालिक थेसे आम्हन्बा धिनदेन धुइरी धोखला।⁵¹ जमाहेन्से मालिकसे थेदा ल्हानान सजाय पिन्सी कट्टी म्हिगदे मुबा ग्लारी भ्याइला। थेरी चा जम्मान म्हिगदे स्वा क्रेसी क्रेसी क्राबा क्रिड्बा लसी चिला।”

§†† 24:30 दानि ७:१३; जक १२:१०-१४; उन्बा १:७ §† 24:37 उत्प ६:५-८

§†† 24:39 उत्प ७:६-२४ §† 24:44 लूका १२:३९-४०

मिडकोला गोर च्युड

25 येशूसे अझ चुहड् भिसी सुड्जी, “स्वर्गला यहुल्सा चा गोर च्युड मिडकोलागदेला ताम हड्बान तला। थे गोर च्युड मिडकोलागदे ह्राड हाडला नाडसल थोसी म्हाछारदा हुप तबारी निजी।¹² थे गोर च्युड मिडकोला न्हडरी गोर डा बुद्धि मुबा, गोर डा बुद्धि आरेबा मुबा।³ तिग्दा भिसम बुद्धि मुबागदेसे चा नाडसलदेन छ्युगुएनोन भोर्सी निजी, तर बुद्धि आरेबासे चा नाडसल जे भोर्सी निजी।⁵ म्हाछार घड्सी खबासे लमा थेनीगदे जम्मान छुप निजी।

6 “तर म्हून गडसलरी ‘म्हाछारदा स्याप्वारी खउ’ भिबा काड थे:जी।
7 जमाहेन्से थेनीगदे जम्मान रे:सी ह्राड हाडला नाडसल ठीक लजी।⁸ ओच्छे बुद्धि आरेबा मिडकोलागदेसे बुद्धि मुबा मिडकोलागदेदा ‘डन्ना नाडसल सिबारी छयाड्जी, एनीगदेला छ्युगु डन्दाएनोन जजाकी जजाकी पिन्तो:जी’ भिसी हीजी।⁹ तर बुद्धि मुबा मिडकोलागदेसे ‘डन्देन छयाम मुबा छ्युगुसे य्हाड जम्मादान आछ्यो तला। बरु एनीगदे पसलरी निसी ग्लुसी भउ’ भिसी भिजी।

10 “तर थेनीगदे छ्युगु ग्लुबारी निमा म्हाछार धोखजी। ओच्छे डाच्छान ठीक तसी चिबागदे म्हाछारदेन छयाम भोज चबारी दिम न्हडरी वाड्जी। ओच्छे म्राप दुड्जी।

11 “छिन्नड लिच्छा थे बुद्धि आरेबा मिडकोलागदे खसी ‘प्रभु, प्रभु डन्दाएनोन म्राप ठोड्सी पिन्गो’ भिसी भिमा,¹² म्हाछारसे थेनीगदेदा ‘च्यागो, एनीगदेसे डाला ताम ड्यान्गो, डाइ एनीगदेदा डोसेबा आरे’ भिसी जोहाब पिन्जी।¹¹

13 “थेतबासेलमा एनीगदे होशियार तसी चिउ। तिग्दा भिसम डा खजिबा धिनदेन धुडरी खला भिबा ताम एनीगदेदा था आरे।

म्हरला डबलला उखान
लूका १९:११-२७

14 “थे धुडरी परमेश्वरला यहुल्सा चुहड्बान तला, च्यागो, प्युकपो म्हे गिक अर्गु यहुल्सारी निबा धुडरी हाडला नोकरगदेदा ड्योड्सी हाडला धन सम्पत्तिगदे जिम्मा पिन्जी।¹⁵ अर्गु यहुल्सारी निबा धुडरी थे प्युकपो म्हेसे हाडला नोकरगदेसे तिग तिग गे लखमुला थे अन्छार गिकदा म्हरला डबल डा, गिकदा डबल न्ही, गिकदा डबल गिक पिन्सी निजी।

16 “जमाहेन्से म्हरला डबल डा याड्बा चा तुरुन्तन निजी। ओच्छे व्यापार लसी अर्गु म्हरला डबल डा स्होजी।¹⁷ थेहड् लसीन म्हरला डबल न्ही याड्बासेनोन अर्गु म्हरला डबल न्ही स्होजी।¹⁸ तर म्हरला डबल गिक याड्बासे चा थे डबल भोर्सी स न्हडरी ल्हुसी थान्जी।

19 “ल्हानान धिन लिच्छा थे नोकरगदेला मालिक खसी थेनीगदेदेन छयाम हिसाब किताब म्हाड्जी।²⁰ जमाहेन्से म्हरला डबल डा याड्बा नोकर खसी ‘मालिक, हाडसे डादा पिन्बा डबल डाग्याम डाइ अर्गु डबल डा स्होबा मुला, चु किन्गो’ भिसी भिमा,²¹ मालिकसे थेदा ‘स्याबास ज्यबा नोकर, एसे जजा तामरी विश्वास उन्जी। थेतबासेलमा दाहेन्से डाइ एदा ल्हानान तामगदे जिम्मा पिन्ना। दाहेन्से ए डादेन छयाम ताड्सी गे लउ’ भिसी भिजी।

22 “जमाहेन्से म्हरला डबल न्ही याड्बा नोकरएनोन खसी ‘मालिक, हाडसे डादा पिन्बा म्हरला डबल न्हीग्याम डाइ अर्गु म्हरला डबल न्ही स्होबा मुला, चु किन्गो’ भिसी भिमा,²³ थेदाएनोन मालिकसे ‘स्याबास ज्यबा नोकर, एसेनोन जजा तामरी विश्वास उन्जी। थेतबासेलमा एदाएनोन डाइ ल्हानान तामगदे जिम्मा पिन्ना। दाहेन्से एएनोन डादेन छयाम ताड्सी गे लउ’ भिसी भिजी।

24 “थेहड् लसीन म्हरला डबल गिक याड्बा नोकरएनोन खसी ‘मालिक, हाड तिगै आद्वबा ग्लाय्याम बाली दुड्बारी म्हाड्बादेन तिगै आद्वबा ग्लारी पोप लबारी म्हाड्बा खरो म्हे हिन्ना भिबा ताम डादा था मुबा।

25 थेतबासेलमा लोड्सी हाडसे डादा पिन्बा म्हरला डबल डाइ स न्हडरी ल्हुसी थान्जी। दाहेन्से हाडला चु डबल किन्गो’ भिसी भिजी।

† 25:1 लूका १२:३५ † 25:12 लूका १३:२५

26 “जमाहेन्से मालिकसे थेदा ‘ब्लेगु गे आखेल्बा नोकर, डाइ तिगै आद्ववना बाली दुड्बारी म्हाड्बादेन तिगै आद्वबा ग्लाय्याम पोप लबारी म्हाड्मुला भिबा ताम एदा था मुबा हिन्सम,²⁷ एसे डाइ पिन्बा डबल बैकरी थान्तो:बा मुबा, एसे बैकरी थान्बा हिन्सम डाइ दो:सी ब्याजदेन थे डबल किन्म्याड्सेला’ भिसी भिजी।

28 “जमाहेन्से मालिकसे ‘थे म्हरला डबल थेग्याम ब्यन्सी डबल च्युड मुबा म्हेदा पिन्गो।²⁹ तिग्दा भिसम जुन म्हेदेन छयाम मुला थेदा अर्गुएनोन पिन्ना। जमाहेन्से थेदेन छयाम झन ल्हानान तला। तर जुन म्हेदेन छयाम आरे थेदेन छयाम मुबा जजाकीएनोन थेग्याम ब्यन्ना। † †³⁰ दाहेन्से थे गे आखेल्बा नोकरदा मडग्यार धोपधोप्वार ग्लारी भ्याङ्गो। थेरी म्हेगदे स्वा क्रेसी क्राबा क्रिड्बा लला।’ †

निसाफ लबा धिन

31 “परमेश्वरसे पुड्खबा म्हे य्हाल य्हाल्बा शक्तिरी स्वर्गदूतगदेदेन छयाम खसी हाडला ठिरी शक्तिशाली ग्ले दोसी धन्छ्याला। ††³² थे धुडरी जम्बुलिडरी मुबा जम्मान यहुलला म्हेगदे डा मुबा ग्लारी पोप तला। जमाहेन्से गोठालोसे रादेन ग्युदा फेबा हड् लसी थेसेनोन थे म्हेगदेदा फेला।³³ थेहड् लसी फेमाहेन्से डाइ रादा देब्रेपट्टि थान्ना। ओच्छे ग्युदा चा दाहिनेपट्टि थान्ना।

34 “जमाहेन्से डाइ हाडला दाहिनेपट्टि मुबा म्हेगदेदा चुहड् भिसी भिला, ‘डाला आबा परमेश्वरग्याम मोलम याड्बा म्हेगदे! जम्बुलिड छ्यामाहेन्सेन एनीगदेला लागिरी स्होसी थान्बा यहुल्सारी खसी चिउ।³⁵ तिग्दा भिसम डा खेन्बा फुड्बा धुडरी एनीगदेसे डादा चबा थुड्बा पिन्जी। डा विदेशी तसैनोन एनीगदेसे डादा हाडला दिमरी चिपुड्जी।³⁶ ओच्छे डाइ क्वान क्वान-आम्याड्बा धुडरी एनीगदेसे डादा क्वान पिन्जी। डा आखम्बा धुडरी एनीगदेसे डादा च्याजी, डा ड्याल्खानरी परब तमा एनीगदे डादा स्याप्वारी खजी।’

37 “चुहड्बा ताम थे:सी परमेश्वरसे कुल्बा ताम ड्यान्बा म्हेगदेसे थेदा चुहड् भिसी ड्योड्ला, ‘प्रभु, डन्से हाडदा खाड्मा खेन्बा फुड्बा म्राड्सी चबा थुड्बा पिन्जी?’³⁸ ओच्छे डन्से हाडदा खाड्मा विदेशी भिसी डन्ना दिमरी स्हूपुड्जी, ओच्छे खाड्मा हाडसे क्वान-आम्याड्बा म्राड्सी डन्से हाडदा क्वान पिन्जी।³⁹ हाड आखम्बा खाड्मा म्राड्सी डन्से हाडदा च्याजी? खाड्मा हाड ड्याल्खानरी परब तबा म्राड्सी डनी हाडदा स्याप्वारी खजी?’

40 “जमाहेन्से डाइ थेनीगदेदा ‘एनीगदेसे डाला ताम ड्यान्गो, चु डाला आलेगदे न्हडला जम्मान भन्दा जजा आले गिकदा एनीगदेसे जे लबा मुबा थे डालान लागिरी लबा हिन्ना’ भिसी भिला।

41 “दो:सी डाइ हाडला देब्रेपट्टि मुबा म्हेगदेदा चा चुहड् भिसी भिला, ‘नाश तसी निबा म्हेगदे, दाहेन्से एनीगदे शैतानदेन थेला दूतगदेला लागिरी स्होबा खाड्मै आसिबा मेरी निउ!⁴² तिग्दा भिसम डा खेन्बा फुड्बा धुडरी एनीगदेसे डादा चबा थुड्बा आपिन्नी।⁴³ डा विदेशी मुमा एनीगदेसे डादा एनीगदेला दिमरी चिआपुड्नी। डाइ क्वान क्वान-आम्याड्बा एनीगदेसे डादा क्वान आपिन्नी। डा आखम्बा धुडरी एनीगदेसे डादा आच्यानी। ओच्छे डा ड्याल्खानरी परब तबा धुडरी एनीगदे डादा स्याप्वारी आखनी।’

44 “जमाहेन्से थेनीगदेसेनोन ‘प्रभु, खाड्मा डन्से हाड खेन्बा फुड्बादेन विदेशी, क्वान क्वान-आम्याड्बा, आखम्बा ओच्छे ड्याल्खानरी परब तबा म्राड्सीनोन हाडला वास्ता आलनी?’ भिसी ड्योड्ला।

45 “जमाहेन्से डाइ थेनीगदेदा ‘एनीगदेसे डाला ताम ड्यान्गो, चु डाला आलेगदे न्हडला जम्मान भन्दा जजा आलेदा एनीगदेसे वास्ता आलबान डादा वास्ता आलबा हिन्ना’ भिसी भिला।

46 “थेतबासेलमा परमेश्वरसे कुल्बा ताम आड्यान्बा म्हेगदेसे चा जुकजुकधोनान सजाय याड्ला। तर परमेश्वरसे कुल्बा ताम ड्यान्बा म्हेगदेसे चा जुकजुकधोनाला जुनी याड्ला।” ††

‡ चु उखानना अर्थ चा खालै म्हेसे परमेश्वरग्याम तिगै मोलम याड्बा मुसम थेदा पूरान चलब लतो:ला, चुहड् लसी चलब लमा थेदेन छयाम मुबा मोलम बढब तबान निला। तर थेसे थे मोलम चलब आलनी भिसम याड्बा मोलमएनोन म्हासी निला। †† 25:29 मत्ती १३:१२; मर्कु ४:२५; लूका ८:१८ †† 25:30 मत्ती ८:१२; २२:१३; लूका १३:२८ ††† 25:31 मत्ती १६:२७; १९:२८ ††† 25:46 दानि १२:२

येशूदा साइबारी म्हाइबा

मर्कूस १४:१-२; लूका २२:१-२; यूहन्ना ११:४५-५३

26 चु जम्मान ताम सुइसी जिन्माहेन्से येशूसे ह्राडला चेलागदेदा चुह्ण्ड भिंसी सुइजी, 2 "मिश्र खुल्साग्याम फेसी खबा धिनदा ढन्सी धड्बा चाड खबारी न्हीरे जे मुला भिबा ताम एनीगदेदा थानोन मुला। थेनोन धुइरी परमेश्वरसे पुइखबा म्हिंदा क्रुसरी टाँगब लबारी चुइसी म्हिंगदेदा जिम्मा पिन्ना।" †

3 थेनोन धुइरी परमेश्वरला मन्दिररी पूजा लबा मुल म्हि कैयाफाला दिमरी यहूदी गन्बागदेदेन परमेश्वरला मन्दिररी पूजा लबा मुल म्हिंगदे हुप तजी। 4 ओच्छे थेनीगदेसे येशूदा खाह्ण्ड लसी खालैदा था आयाड्ना साइबा भिंसी ह्राड ह्राड न्हडरी सल्लाह लजी। 5 तर थेनीगदेसे "य्हाडला चाडला धुइरी चा चुइबारी आत। चाडला धुइरी चुइजी भिसम म्हिंगदेसे हुल दडगा लला" भिंसी भिजी।

मिडम्हेमे गिकसे येशूला थोबोरी अत्तर फोर्ब

मर्कूस १४:३-९; यूहन्ना १२:१-८

6 येशू बेथानिया भिबा नाम्माला कोरे खबा सिमोनला दिमरी फेक्खजी। 7 सोल छ्योइबान लबा धुइरी मिडम्हेमे गिक सिङ्गमरमरला ताडरी ल्हानान महँगे अत्तर भसी येशू मुबा ग्लारी खजी। ओच्छे थेसे थे अत्तर येशूला थोबोरी युजी। ††

8 चुह्ण्ड लबा म्हाइसी येशूला चेलागदे बोमो खसी "चुह्ण्डबा महँगे अत्तर तिग्दा ओह्ण्डनोन खेरो भ्याड्बा? 9 बरु चु अत्तर चूइसी खबा टाडगा प्राडबोगदेदा पिन्बा हिन्सै तसे मुबा" भिंसी ह्राड ह्राड न्हडरी ताम लजी।

10 येशूसे चु ताम था याइसी थेनीगदेदा चुह्ण्ड भिंसी सुइजी, "एनीगदेसे तिग्दा चु मिडम्हेमेदा कचकच लबा? चुसे मी डाला लागिरी ज्यबा गे लबा मुला। 11 तिग्दा भिसम प्राडबोगदे मी सदन एनीगदेदेन छ्याम तला। तर डा मी एनीगदेदेन छ्याम सदन आत। 12 चुसे डाला सिबा ल्हुइ धुसारी थान्बाला लागिरी डा सिबा भन्दा डाच्छान डाला थोबोरी चु अत्तर युसी ठीक लबा मुला। 13 च्यागो, एनीगदेसे डाला ताम इयान्गो, जम्बुलिडला जुन जुन ग्लारी थार्बा पिन्बा समाचार थे:ना लला, थे, थे ग्लारी चु मिडम्हेमेसे लबा गे ढन्बाला लागिरी थेला ताम लला।"

येशूदा धोका पिन्बा

मर्कूस १४:१०-११; लूका २२:३-६

14 जमाहेन्से येशूला च्युक न्ही चेलागदे न्हडला यहूदा इस्करियोत भिबा चेला गिक परमेश्वरला मन्दिररी पूजा लबा मुल म्हिंगदे मुबा ग्लारी निजी। 15 ओच्छे थेसे थेनीगदेदा "चुदे डाइ येशूदा चुइसी ह्राडनीदा जिम्मा पिन्सम ह्राडनीसे डादा तिग पिन्ना?" भिंसी इयोइमा, थेनीगदेसे यहूदा इस्करियोतदा बोगल गिकसे च्युइ म्हुइला डबल पिन्ना भिंसी पिन्जी। 16 जमाकुनुहेन्से यहूदा इस्करियोतसे येशूदा चुइसी पिन्बाला लागिरी दाउ च्यासी भ्रजी।

येशूसे भोज तयार लउ भिंसी कुल्बा

मर्कूस १४:१२-२५; लूका २२:७-१३; यूहन्ना १३:२१-३०

17 खमीर आयुना गेड चसी धड्बा चाडला शुरुला धिनकुनु चेलागदे येशू मुबा ग्लारी खसी "ह्राडला लागिरी डन्से मिश्र खुल्साग्याम फेसी खबा धिनदा ढन्सी धड्बा चाडला भोज खानड ठीक लउ?" भिंसी इयोइजी।

18 येशूसे चेलागदेदा चुह्ण्ड भिंसी कुल्जी, "एनीगदे शहररी म्हि गिक मुबा ग्लारी निसी थे म्हिंदा 'डा सिबा धुइ तसी जिन्बा मुला। थेतबासेलमा डाइ ह्राडला चेलागदेदेन छ्याम चिसी एला दिमरी मिश्र खुल्साग्याम फेसी खबा धिनदा ढन्सी धड्बा चाड धड्बा सेम मुला, भिंसी गुरुसे सुइबा मुला' भिंसी पाङ्गो।" 19 जमाहेन्से येशूसे कुल्बा अन्धारनोन चेलागदेसे मिश्र खुल्साग्याम फेसी खबा धिनदा ढन्सी धड्बा चाडला भोज ठीक लजी।

20 ड्यसे तमाहेन्से येशू ह्राडला च्युक न्ही चेलागदेदेन छ्यामनोन भोज छ्योइबारी धन्छ्याजी। 21 जमाहेन्से भोज छ्योइबान लबा धुइरी येशूसे चेलागदेदा "च्यागो, एनीगदेसे डाला ताम इयान्गो, एनीगदे न्हडलान गिकसे डादा म्हिंगदेला यारी जिम्मा पिन्ना" भिंसी सुइजी।

22 जमाहेन्से ल्हानान दुख इहम्सी चेलागदे जम्मासेन येशूदा "प्रभु, थे म्हि डानोन हिन्ना?" भिंसी पालो पालो लसी इयोइबारी छ्याइजी।

23 ओच्छे येशूसे थेनीगदेदा चुह्ण्ड भिंसी सुइजी, "च्यागो, जुन म्हिसे खार्बारी डादेन छ्याम गेड तुइसी चमुला, थेनोन म्हिसे डादा चुइसी पिन्ना। 24 परमेश्वरला बचनरी भिबा ह्ण्डनोन परमेश्वरसे पुइखबा म्हि मी सिनोन तो:ला। तर जुन म्हिसे परमेश्वरसे पुइखबा म्हिंदा चुइसी म्हिला यारी जिम्मा पिन्ना, थेसे परमेश्वरग्याम खाह्ण्डबा लोड्बा खबा सजाय याड्ला। बरु थे मी न्होन आन्हबा हिन्सम ज्यबा तसेला मुबा" भिंसी सुइजी।

25 येशूदा चुइसी पिन्बारी म्हाइबा यहूदासेनोन येशूदा "गुरु, थे म्हि डानोन हिन्ना?" भिंसी इयोइजी।

जमाहेन्से येशूसे थेदा "थे ताम मी एसेन पाइजी" भिंसी सुइजी।

प्रभु भोजला शुरु

मर्कूस १४:२२-२६; लूका २२:१४-२३; १ कोरिन्थी ११:२३-२५

26 थेनीगदे भोज चबान लबा धुइरी येशूसे गेड थोसी परमेश्वरदा धन्यवाद पिन्जी। ओच्छे थे गेड क्युइसी चेलागदेदा "ना! चु चउ, चु डाला ल्हुइ हिन्ना" भिंसी सुइजी।

27 जमाहेन्से येशूसे खोरेरी मुबा अडगुरला निडगु थोसी परमेश्वरदा धन्यवाद पिन्सी, चेलागदेदा चुह्ण्ड भिंसी सुइजी, "ना! एनीगदे जम्मासेन चु थुङ्गो। 28 तिग्दा भिसम एनीगदेसे थुड्बा चु निडगु डाला का हिन्ना। चु का एनीगदेदेन छ्याम लबा छार † कबुल हिन्ना। चुनोन का ल्हानान म्हिला पापला दोष मेटब लबाला लागिरी बगब तला। 29 तर एनीगदेसे डाला ताम इयान्गो, एनीगदेदेन छ्याम डाला आबाला खुल्सारी छार अडगुरला निडगु थुड्बा धिन आखतेधोना डाइ चु निडगु आथुइ।"

30 जमाहेन्से परमेश्वरदा धन्यवादला व्हाइ गिक गोसी येशू ह्राडला चेलागदेदेन छ्याम थे ग्लाग्याम जैतून भिबा गडरीक्यार फेप्जी।

पत्रुससे येशूदा खलाला भिंसी पाइबा ताम

मर्कूस १४:२७-३१; लूका २२:३१-३४; यूहन्ना १३:३६-३८

31 जमाहेन्से येशूसे ह्राडला चेलागदेदा चुह्ण्ड भिंसी सुइजी, "तिनी म्हुनड एनीगदे जम्मासेन डादा खलासी यार्ला। तिग्दा भिसम परमेश्वरला बचनरी 'डाइ गोठालोदा साइला। ओच्छे ग्युगदे ससा बडबड तसी यार्ला' भिंसी भिबा मुला। 32 तर डादा सिबाग्याम सोना लमाहेन्से एनीगदे भन्दा डाच्छा डा गालीलरी निला।" †

33 थेनोन धुइरी पत्रुससे येशूदा "ह्राडदा थेह्ण्ड लमा जम्मासेन खलासी यार्लेनोन डाइ ह्राडदा खाइमै आखला" भिंसी भिजी।

34 जमाहेन्से येशूसे पत्रुसदा "च्यागो, एसे डाला ताम इयान्गो। तिनी म्हुनड नागा क्राबा भन्दा डाच्छा एसे सोमरेमधोना 'डाइ येशूदा डोसेबान आरे' भिंसी पाइला" भिंसी सुइजी।

35 दो:सी पत्रुससे येशूदा "डा ह्राडदेन छ्याम सितो:सैनोन डाइ ह्राडदा आखला" भिंसी भिजी। ओच्छे स्थान्दो चेलागदेसेनोन थेह्ण्डनोन भिजी।

गेतसमनी भिबा ग्लारी येशूसे लबा प्रार्थना

मर्कूस १४:३२-४२; लूका २२:३९-४६

36 जमाहेन्से येशू ह्राडला चेलागदेदेन छ्याम गेतसमनी भिबा ग्लारी फेप्जी। ओच्छे चेलागदेदा "एनीगदे चुरीन चिउ, डा चा जजाकी क्याथाड निसी प्रार्थना लला" भिंसी सुइसी 37 येशूसे पत्रुसदेन जब्दियाला झा न्हीदा ह्राडदेन छ्यामनोन भोर्सी फेप्जी। ओच्छे थेदा ल्हानान सुर्दा तसी सेमरी दुख तबारी छ्याइजी। 38 जमाहेन्से येशूसे थेनीगदेदा "डाला सेम क्रोसी डा सिबा

† 26:23 भजन ४१:९ †† ल्हानान ह्ण्डबा बाइबलरी "छार" भिंसी भिबा आरे।

††† 26:28 प्रस्था २४:८; यर्मि ३१:३४ ††† 26:31 जक १३:७ § 26:32 मत्ती २८:१६

तेबान तबा मुला। थेतबासेलमा एनीगदे चुरीन डा हड लसी छोर्सी चिउ” भिसी सुड्जी।

³⁹ ओच्छे येशू चा जजाकी क्याथाड फेप्सी सरी खलुप तसी “आबा डाथोरी खबारी छ्याइबा चु दुख तसम डादा नाआपुङ्गो। तर डाइ म्हन्बा अन्धार आहिन, हाडसे म्हन्बा अन्धार तगै” भिसी प्रार्थना लजी।

⁴⁰ जमाहेन्से येशू चेला सोम मुबा ग्लारी दोःसी फेप्खमा थेनीगदे म्हर्सी चिबा म्राड्सी येशूसे पत्रुसदा चुहड् भिसी सुड्जी, “एनीगदे डादेन छ्याम घण्टा गिक सुतै छोर्सी चिआखम्नी? ⁴¹ दाहेन्से एनीगदे पापरी फसब आतबाला लागिरी छोर्सी प्रार्थना लसी चिउ। च्यागो, एनीगदेला आत्मा मी तयार मुला, तर ल्हुड चा कमजोर मुला।”

⁴² दोःसीनोन येशू डाच्छाला ग्लारीन फेप्सी “आबा चु दुख डाइ नानोन तोःबा हिन्सम हाडसे म्हन्बा हड्जोन तगै” भिसी प्रार्थना लजी।

⁴³ ओच्छे चेलागदे मुबा ग्लारी दोःसी फेप्खमा चेलागदे म्हर्सी चिबा स्याप्जी। म्हर्बा खबासे लमा थेनीगदेसे मीनोन ठोड्आखम्नी।

⁴⁴ थेतबासेलमा येशूसे थेनीगदेदा थेरीन खलासी सोमरेमला पालोरी डाच्छाला ग्लारीन फेप्सी डाच्छाला हड लसीन प्रार्थना लजी।

⁴⁵ जमाहेन्से येशू चेलागदे मुबा ग्लारी फेप्खसी थेनीगदेदा चुहड् भिसी सुड्जी, “अझन एनीगदे म्हर्सी ब्लाबा न्हबान मुला? च्यागो, परमेश्वरसे पुडखबा म्हिदा चुड्सी पापीगदेला यारी जिम्मा पिन्बा धुड् खसी जिन्बा मुला।

⁴⁶ रेःगो, निड! च्यागो, डादा स्थान्दोला यारी जिम्मा पिन्बा म्हि खसी जिन्बा मुला।”

येशूदा चुड्बा

मर्कूस १४:४३-५०; लूका २२:४७-५३; यूहन्ना १८:३-१२

⁴⁷ येशूसे चु ताम सुड्बान लबा धुडरी च्युक न्ही चेला न्हडला यहूदा इस्करियोत भिबा चेलादेन छ्याम कडीदेन तरवार थोबा म्हिला हुल धोखजी। थेनीगदेदा परमेश्वरला मन्दिररी पूजा लबा मुल म्हिदेन यहूदी गन्बागदेसे पुडखमुबा। ⁴⁸ येशूदा चुड्बारी खबा म्हिगदेदा यहूदासे “जुन म्हिदा डाइ च्योक लला थेनोन येशू हिन्ना, थेदान चुङ्गो” भिसी डाच्छान पाड्बा मुबा।

⁴⁹ येशू मुबा ग्लारी धोमैछ्याम यहूदासे “लास्सो, फ्याफुल्ला गुरु” भिसी येशूदा च्योक लजी।

⁵⁰ जमाहेन्से येशूसे थेदा “यहूदा, ए तिग लबारी खबा लउ” भिसी सुड्बाहेन्से कडी तरवार पुड्सी खबा म्हिगदेसे येशूदा चुड्सी खीसी भोर्जी।

⁵¹ येशूदेन छ्याम मुबा चेलागदे न्हडला गिकसे हाडला तरवार तेःसी परमेश्वरला मन्दिररी पूजा लबा मुल म्हिला नोकरला नाब्यड च्वाट्टन थाजी।

⁵² थे चेलादा येशूसे चुहड् भिसी सुड्जी, “एला तरवार स्युबारी झाङ्गो। तिगदा भिसम तरवार थोबा जम्मान म्हिदा तरवारसेन ताम्सी नाश लला।

⁵³ चुदे डाइ डाला आबादा पाड्बा हिन्सम डादा जोगब लबारी डाला आबासे च्युक न्ही भन्दा ल्हानान स्वर्गदूतगदेला हुल तुरुन्तन पुड्खसे मुबा। चु ताम दान्देधोना एसे घोबा आरे? ⁵⁴ तर डाइ चुहड् लबा हिन्सम परमेश्वरला बचनरी चुहड् तनोन तला भिसी भिबा ताम खाहड् लसी पूरा तला?”

⁵⁵ जमाहेन्से येशूसे हाडदा चुड्बारी खबा म्हिला हुलदा चुहड् भिसी सुड्जी, “एनीगदे तिगदा यहूदा चुड्बारी खबा हड लसी कडी तरवार थोसी खबा? खाड, डाइ म्हिगदेदा धिन धिननोन परमेश्वरला मन्दिररी लोप्सी चिबा धुडरी एनीगदेसे डादा आचुड्नी। ⁵⁶ तर अगमवक्तागदेसे परमेश्वरला बचनरी भिबा अन्धार पूरा तगै भिसीन चुहड् तबा हिन्ना।” जमाहेन्से जम्मान चेलागदेसे येशूदा खलासी यार्जी।

येशूदा यहूदीगदेला सभारी भोर्बा

मर्कूस १४:५३-६५; लूका २२:५४-५५, ६३-७१; यूहन्ना १८:१३-१४, १९-२४

⁵⁷ जमाहेन्से येशूदा चुड्बा म्हिगदेसे येशूदा परमेश्वरला मन्दिररी पूजा लबा मुल म्हि कैयाफाला दिमरी भोर्जी। थेरी यहूदी गन्बागदेदेन यहूदी धर्मगुरुगदेएनोन पोप तसी चिबा मुबा। ⁵⁸ तर पत्रुस चा थारेड्यामसेन येशूदा च्याबान च्याबान थे पूजा लबा मुल म्हिला दिमला खाडगाधोनान निजी।

† 26:55 लूका १९:४७; २१:३७

जमाहेन्से येशूदा तिग लबा चीम भिसी पालेगदेदेन छ्याम चिसी च्याबारी छ्याइजी।

⁵⁹ परमेश्वरला मन्दिररी पूजा लबा मुल म्हिगदेदेन यहूदी सभाला जम्मान म्हिगदेसे येशूदा साइबाला सजाय पिन्बाला लागिरी येशूला बिरोधरी लुसीला ताम पाड्बा म्हिगदे म्हाइजी। ⁶⁰ चुहड् लसी ल्हानान म्हिगदेसे येशूदा बिरोध लबान लुसीला ताम पाड्जी। तसैनोन थेनीगदेसे पाड्बा ताम गिकनोन आढिकनी। जम्मान भन्दा लिच्छाला म्हि न्ही डाच्छापट्टि खसी, ⁶¹ “च्यागो, चु म्हिसे ‘डाइ परमेश्वरला मन्दिरदा फुप्सी सोमरेरीन स्होखम्ला’ भिसी पाड्बा मुला” भिसी दोष लजी। ††

⁶² जमाहेन्से परमेश्वरला मन्दिररी पूजा लबा मुल म्हि रेःसी येशूदा “एसे तिगदा जोहाब आपिन्बा? चु म्हिगदेसे एला बिरोधरी पाड्बा तामला बारेरी एदा तिगै पाड्सेला आरे?” भिसी ड्योइजी।

⁶³ तर येशूसे तिगै जोहाब आलमाहेन्से परमेश्वरला मन्दिररी पूजा लबा मुल म्हिसे दोःसीनोन येशूदा “छोन्बो परमेश्वरला मिनरी ग्रान फासी डन्दा पाङ्गो। तिग ए परमेश्वरला झा थार्बा पिन्बा ख्रीष्टनोन हिन्ना?” भिसी पाड्मा,

⁶⁴ येशूसे थेदा “थे ताम मी हाडसेन सुड्जी। तसैनोन दाहेन्से हाडनीसे परमेश्वरसे पुड्खबा म्हिदा शक्तिशाली परमेश्वरला दाहिने छ्यापट्टि चिबादेन स्वर्ग्याम खसुरी खबान लबा म्राड्ला” भिसी सुड्जी। †

⁶⁵ जमाहेन्से परमेश्वरला मन्दिररी पूजा लबा मुल म्हिसे हाडला क्वान देबान, “चु म्हिसे परमेश्वरला बिरोध लसी ताम पाड्बा मुला। दाहेन्से यहाडदा अर्गु प्रमाण तिगदा तोःजी? हाडनीसे दान्दे चुसे हाडसे हाडदान परमेश्वर स्होसी पाड्बा ताम यहाडसे थेःनोन थेःजी। ⁶⁶ दाहेन्से हाडनीला तिग बिचार मुला?” भिसी ड्योइमा, स्थान्दोगदेसे “चु म्हि साइनोन तोःबा म्हि हिन्ना” भिसी भिजी। ††

⁶⁷ जमाहेन्से थे म्हिगदेसे येशूला लीरी थो स्वाबा तोबा ग्याइबा लजी। ओच्छे कोड कोडसे चा तोबान, ††⁶⁸ “ए थार्बा पिन्बा ख्रीष्ट हिन्सम, लु, अगमवाणी पाङ्गो। एदा खाल्से तोबा हिन्ना?” भिसी पाड्जी।

पत्रुससे डाइ येशूदा डोसेबान आरे भिसी पाड्बा

मर्कूस १४:६६-७२; लूका २२:५६-६२; यूहन्ना १८:१५-१८, २५-२७

⁶⁹ थे धुडरी पत्रुस खाडगारी मुबा। थेदा म्राड्सी नोकरस्या गिक थे मुबा ग्लारी खसी, “एनोन गालीलला येशूदेन छ्यामनोन मुबा आहिन?” भिसी ड्योइजी।

⁷⁰ तर पत्रुससे जम्मालान ओन्हाडरी “एसे खाल्ला ताम लबा, डादा तिगै था आरे” भिसी, ⁷¹ थे खाडगाला म्रापरी निजी। थेरीनोन थेदा स्थान्दो नोकरस्या गिकसे म्राड्सी जम्मान म्हिगदेदा “चु म्हिएनोन नासरतला येशूदेन छ्यामनोन मुबा” भिसी पाड्जी।

⁷² दोःसी पत्रुससे ग्रान फाबान, “डाइ थे म्हिदा डोसेबान आरे” भिसी पाड्जी।

⁷³ जजाकी लिच्छा थेरी मुबा म्हिगदे पत्रुसला डामरी खसी थेदा “पक्कान एनोन थेनीगदे न्हडला गिक हिन्ना भिबा एला तामग्यामनोन था तजी” भिसी भिजी।

⁷⁴ जमाहेन्से पत्रुससे “डाइ लुसीला ताम पाड्बा हिन्सम परमेश्वरला सजाय डाथोरी खगै भिसी ग्रान फाबान डाइ थे म्हिदा डोसेबान आरे” भिसी भिजी।

थेसे थेहड् भिमैछ्याम नागा क्राजी। ⁷⁵ जमाहेन्से येशूसे “च्यागो, नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी सुड्बा ताम पत्रुससे ढन्जी। थेतबासेलमा थे मडग्यार निसी घ्वाँ घ्वाँ क्राजी।

†† 26:61 यूह २:१९ † 26:64 दानि ७:१३ † 26:66 लेवी २४:१६ † † 26:67 यशै ५०:६

येशूदा पिलातसला डाच्छापट्टि भोर्बा
मर्कूस १५:१; लूका २३:१-२; यूहन्ना १८:२८-३२

27 स्होरीन परमेश्वरला मन्दिररी पूजा लबा जम्मान मुल म्हिगदेदेन
यहूदी गन्बागदेसे येशूदा साइनोन तो:ला भिसी सल्लाह लजी।
2 जमाहेन्से थेनीगदेसे येशूदा खीसी पिलातस भिबा रोमी अञ्चलाधीश मुबा
ग्लारी भोर्सी जिम्मा पिन्जी।

यहूदा इस्करियोत च्योसी सिबा
मुल चेला १:१८-१९

3 येशूदा साइनोन तो:ला भिसी पाड्बा ताम येशूदा चुड्सी पिन्बा यहूदासे
थे:जी। जमाहेन्से थेदा ल्हानान दुख इहम्सी थेसे किन्बा बोगल गिकसे च्युड
म्हुइला डबल परमेश्वरला मन्दिररी पूजा लबा मुल म्हिगदेदेन यहूदी
गन्बागदेदा दो:सी पिन्बारी खजी। 4 ओच्छे यहूदासे थेनीगदेदा “तिगै दोष
आरेबा म्हिदा साइबाला लागिरी चुड्सी पिन्सी डाइ पाप गे लबा मुला”
भिसी भिमा, थेनीगदेसे यहूदादा “डन्दा तिग मतलब? एनोन सेला” भिसी
भिजी।

5 जमाहेन्से यहूदासे थे म्हुइला डबल परमेश्वरला मन्दिररीन भ्याड्सी
निजी, ओच्छे थे च्योसी सिजी।

6 तर परमेश्वरला मन्दिररी पूजा लबा मुल म्हिगदेसे चा थे डबल दुड्सी “चु
डबल परमेश्वरला मन्दिरला ढुकुटीरी थान्बा ठीक आत। तिगदा भिसम चु
काला सय हिन्ना” भिसी भिजी। 7 थेतबासेलमा थेनीगदे ह्वाड ह्वाड न्हडरी
सल्लाह लसी थे टाडगासे अर्गु य्हुल्साला सिबा म्हि ल्हुबारी कुमालेला वारी
ग्लुजी। 8 थेतबासेलमा दान्देधोनाएनोन थे वारीदा काला वारी भिसी भिमुला।
9 यर्मिया अगमवक्तासे पाड्बा ताम चुह्ण्ड लसी पूरा तजी,
“थे म्हुइला बोगल गिकसे च्युड डबल परमेश्वरला मन्दिररी पूजा लबा
म्हिगदेसे किन्जी।

थे डबल चा थेला सय हिन्ना भिसी इस्राएलला म्हिगदेसे तोगब लबा मुबा।
††

10 जमाहेन्से परमेश्वरसे डादा कुल्बा अन्छार
थेनीगदेसे थेनोन टाडगासे कुमालेला बु ग्लुजी।” †

येशूदा पिलातसला डाच्छापट्टि राप्पुड्बा
मर्कूस १५:२-१५; लूका २३:३-५, १३-२५; यूहन्ना १८:३३-१९:१६

11 येशू अञ्चलाधीशला डाच्छापट्टि राप्पाहेन्से अञ्चलाधीशसे “तिग ए
यहूदीगदेला ग्ले हिन्ना?” भिसी इयोइमा, येशूसे थेदा “थे मी ह्वाडसेन सुड्बा
मुला” भिसी जोहाब पिन्जी।

12 परमेश्वरला मन्दिररी पूजा लबा मुल म्हिगदेदेन यहूदी गन्बागदेसे येशूदा
ल्हानान दोष लजी। तसेनीन येशूसे तिगै जोहाब आलनी। 13 जमाहेन्से
पिलातस भिबा अञ्चलाधीशसे येशूदा “थेनीगदेसे एला बिरोध लसी एदा
ल्हानान दोष लबान मुला, तिग एसे थे:बा आरे?” भिसी भिजी। 14 तर येशूसे
थेदा ताम गिकलान जोहाब आपिन्नी। थेतबासेलमा अञ्चलाधीशएनोन
उदेक तजी।

15 अञ्चलाधीशसे मिश्र य्हुल्साग्याम फेसी खबा धिनदा ढन्सी धड्बा
चाडला धुडरी म्हिला हुलसे धम्बा इयाल्खानरी मुबा म्हि गिकदा पुड्मुबा।
16 थे धुडरी जम्मान म्हिसे डोसेबा बारब्बा भिबा आज्यबा गे लबा म्हि गिक
इयाल्खानरी मुबा। 17 थेरी म्हिगदे पोप तमाहेन्से पिलातससे थेनीगदेदा “डाइ
खाल्दा पुड्गै भिबा एनीगदेला सेम मुला? बारब्बादा पुड्गो कि थार्बा पिन्बा
ख्रीष्ट भिबा येशूदा पुड्गो?” भिसी इयोइजी। 18 तिगदा भिसम थेनीगदेसे
येशूला डाह लसी ह्वाड मुबा ग्लारी भबा हिन्ना भिबा ताम पिलातसदा था
मुबा।

19 पिलातस निसाफ लबा ग्लारीन मुबा धुडरी पिलातसला ग्निडसे “थे तिगै
दोष आरेबा म्हिदा तिगै थालउ। तिगदा भिसम तिनी म्हुनड डाइ थेला बाररी
म्हड म्हाड्सी डादा ल्हानान दुख तबा मुला” भिसी खबर पुड्जी।

20 तर परमेश्वरला मन्दिररी पूजा लबा मुल म्हिगदेदेन यहूदी गन्बागदेसे
थेरी मुबा म्हिला हुलदा “बारब्बादा ख्लासी पिन्गो। ओच्छे येशूदा चा
साइगो” भिउ” भिसी पाड्पुड्जी। 21 थेतबासेलमा दो:सी अञ्चलाधीशसे
थेनीगदेदा “डाइ चु न्ही न्हडरी खजिबादा पुड्गै भिबा एनीगदेला सेम
मुला?” भिसी इयोइमा, थेनीगदेसे “बारब्बादा पुड्गो” भिसी भिजी।

22 जमाहेन्से पिलातससे थेनीगदेदा “थेह्ण्ड भिसम थार्बा पिन्बा ख्रीष्ट
भिबा येशूदा डाइ तिग लउ?” भिसी इयोइमा, थेनीगदे जम्मासेन “चुदा
क्रुसरी टाँगब लसी साइगो!” भिसी भिजी।

23 पिलातससे “तिगदा? चुसे थेह्ण्ड्बा आज्यबा गे तिग लबा मुला?” भिसी
इयोइजी।

तर थेनीगदेसे इन क्रिड्बान, “चुदा क्रुसरी टाँगब लसी साइगो” भिसी
भिजी।

24 तिगै लसीन आखम्बा म्हाड्सी दाहेन्से इन हल्ली खल्ली तला भिसी
पिलातस लोड्जी। ओच्छे थेसे जम्मान म्हिला डाच्छा या खूसी †† “चु म्हिदा
साइबासे लमा डाइ तिगै सजाय नाआतो:गै, थे सजाय एनीगदेसेन नागो”
भिसी भिमा, ††25 थेरी मुबा जम्मान म्हिगदेसे “चुदा साइबाला सजाय डन्देन
डन्ना सन्तानसेन नाला” भिसी जोहाब पिन्जी।

26 जमाहेन्से पिलातससे बारब्बादा पुड्जी। तर येशूदा चा कोर्से तोसी
क्रुसरी टाँगब लसी साइबाला लागिरी रोमी सिपाहीगदेदा जिम्मा पिन्जी।

सिपाहीगदेसे येशूदा खिसी लबा

मर्कूस १५:१६-२०; यूहन्ना १९:२-३

27 जमाहेन्से येशूदा सिपाहीगदेसे अञ्चलाधीश चिबा दिमरी भोर्जी। ओच्छे
जम्मान सिपाहीगदे येशूला क्युर्सीन पोप तजी। 28 जमाहेन्से येशूला क्वान
स्युसी वाला क्वान क्वान्सी पिन्जी। 29 थेनीगदेसे पुजुला फेटा स्होसी येशूदा
थोइसी पिन्जी। ओच्छे येशूदा दाहिने छ्यारी माला कडी पिन्सी “लास्सो
यहूदीगदेला ग्ले, फ्याफुल्ला” भिसी फ्या लबा स्होसी येशूदा खिसी लजी।
30 ओच्छे थेनीगदेसे येशूदा थो स्वाबान थे माला कडीसे थोबोरी तोजी।
31 थेह्ण्ड लसी खिसी लमाहेन्से थेनीगदेसे थे क्वान स्युसी पिन्जी। ओच्छे
येशूदा थेलान क्वान क्वान्सी क्रुसरी टाँगब लसी साइबारी भोर्जी।

येशूदा क्रुसरी टाँगब लबा

मर्कूस १५:२१-३२; लूका २३:२६-४३; यूहन्ना १९:१७-२४

32 ग्यामरी निबान लमा थेनीगदेसे कुरेनी भिबा ग्लाला सिमोनदा खबान
लबा स्याप्जी। जमाहेन्से थेनीगदेसे थे म्हिदा कर लसी येशूला क्रुस
पुड्पुड्जी। 33 ओच्छे थेनीगदे गलगथा भिबा ग्लारी धोखजी। गलगथा भिबा
चा “खप्परला ग्ला” हिन्ना। 34 थेरी धोखमाहेन्से थेनीगदेसे येशूदा अडगुरला
निडगुरी कम्बा मान युसी पिन्जी। तर येशूसे थे निडगु म्हाड्ज्हेन्से
आसोल्नी। ††

35 थेनीगदेसे येशूदा क्रुसरी टाँगब लमाहेन्से चिट्टा युसी ह्वाड ह्वाड न्हडरी
येशूला क्वान भो लजी। ††36 जमाहेन्से थेनीगदे थेरीन चिसी येशूदा खुड्जी।
37 ओच्छे थेनीगदेसे “येशू यहूदीगदेला ग्ले” भिसी दोष उन्बा ताम भिसी
येशूला थोबोथोरी क्रुसरी थान्जी। 38 थेनीगदेसे येशूदा क्रुसरी टाँगब लबा
धुडरी य्हो न्हीदाएनोन गिकदा दाहिनेपट्टि गिकदा देब्रेपट्टि क्रुसरी टाँगब लजी।

39 थे ग्याम निबा खबा म्हिगदेसेनोन ह्वाड ह्वाडला थोबो य्होड्बान येशूदा
खिसी लबान, §40 “लु, परमेश्वरला मन्दिर फुप्सी दो:सी सोमरेरीन स्होला
भिबा म्हि दान्दे एसे ह्वाडसे ह्वाडदान जोगब लउ। ए परमेश्वरलान झा हिन्सम
क्रुसग्याम मार फापो” भिसी भिजी। §†

41 जमाहेन्से परमेश्वरला मन्दिररी पूजा लबा मुल म्हिगदे, यहूदी धर्मगुरुदेन
यहूदी गन्बागदेसेनोन येशूदा खिसी लबान चुह्ण्ड भिसी भिजी, 42 “चुसे
स्थान्दो म्हिदा चा जोगब लजी, तर ह्वाडसे ह्वाडदान चा जोगब लबारी
आखम्नी। चु इस्राएलीगदेला ग्ले आहिन! थे दान्देन क्रुसग्याम मार फाप्सी
खगै। जमाहेन्से डन्से थेदा विश्वास लला। 43 चुसे परमेश्वरदा विश्वास

†† पिलातससे या खूबाला अर्थ चा डाला तिगै दोष आरे भिसी उन्बाला लागिरी हिन्ना।

†† 27:24 व्यव २१:६-९ ††† 27:34 भजन ६९:२१ ††† 27:35 भजन
२२:१८ § 27:39 भजन २२:७; १०९:२५ §† 27:40 मती २६:६१; यूह २:१९

लमुबा। ओच्छे 'डा परमेश्वरलान झा हिन्ना' भिसी भिमुबा। चुदे परमेश्वर चुदा म्राड्सी ताड्बा मुसम परमेश्वरसेन चुदा जोगब लगै।†

44 थेहड्ड लसीन येशूदेन छ्यामनोन कुसरी टाँगब लबा य्होगदेसेनोन येशूदा खिसी लजी।

येशू सिबा

मर्कूस १५:३३-४१; लूका २३:४४-४९; यूहन्ना १९:२८-३०

45 जमाहेन्से धिनना बहबजेहेन्से तीन बजेधोना यहुल्सा नाडनोन धोपधोप तजी। 46 ओच्छे तीन बजेरीक्यार येशूसे ग्रेन काइरी क्रिड्बान, "इलोड इलोड लामा सबखथनी?" भिसी सुड्जी। चुहड्ड भिबा चा "डाला परमेश्वर, डाला परमेश्वर ह्राडसे डादा तिगदा खलाबा?" भिबा हिन्ना। †

47 येशूला ताम थे:सी थेरी राप्सी चिबागदे न्हडला कोइ कोइसे चा "चुसे मी एलियादा गा इयोड्बा चीम" भिसी भिजी। 48 जमाहेन्से थेनीगदे न्हडला गिक चा तुरुन्तन यार्बान निसी अडगुरला कम्बा निडगुरी क्वानगेन ब्लुम्सी माला कडीरी खिसी येशूदा ख्वाजी। 49 तर स्थान्दोगदेसे चा "भ्रान्गो, भ्रान्गो, चुदा एलिया खसी जोगब लला वा? च्यागे" भिसी भिजी।

50 दो:सी येशू ग्रेन काइरी क्रिड्जी, जमाहेन्से येशूला सा निजी।

51 थेनोन धुइरी परमेश्वरला मन्दिररी मुबा पर्दा तोरहेन्से मारधोना ह्राडनोन ठेसी पखले न्ही तजी। ओच्छे जम्बुलिडनोन याडयोड तसी पहरागदे फुज्जी। 52 जमाहेन्से धुर्सागदे ठोड्जी, ओच्छे परमेश्वरला ल्हानान म्हिगदेदा सिबाग्याम सोना लजी। 53 येशू सिबाग्याम सोना लमाहेन्से थेनीगदे धुर्साग्याम थोन्सी परमेश्वरला शहर यरूशलेमरी निजी। थेनीगदेदा थेरी ल्हानान म्हिगदेसे म्राड्जी।

54 सडगुल खबादेन थेरी तबा जम्मान ताम म्राड्सी येशूदा खूड्सी चिबा रोमी सिपाहीगदेदेन कप्तान ल्हानान लोड्सी "पक्कान चु मी परमेश्वरला झानोन चीम" भिसी भिजी।

55 थेरी येशूदा गालीलहेन्सेन ह्यो लबान येशूदेन छ्याम छ्यामनोन खबा ल्हानान म्रिडम्हेमेगदेसेनोन थारेडग्यामसेन च्यासी चिबा मुबा। 56 थेनीगदे न्हडरी मरियम मग्दलिनी, याकूबदेन योसेफला आमा मरियमदेन जब्दियाला म्रिडएनोन मुबा। †

येशूदा धुर्सारी थान्बा

मर्कूस १५:४२-४७; लूका २३:५०-५६; यूहन्ना १९:३८-४२

57 ड्यसे तमाहेन्से अरिमाथिया भिबा शहरला योसेफ भिबा फ्युकपो म्हि गिक पिलातस मुबा ग्लारी निजी। थेएनोन येशूला चेला मुबा। 58 पिलातस मुबा ग्लारी धोमाहेन्से थेसे येशूला लास हीजी। जमाहेन्से पिलातससे थेदा येशूला लास भोर्पुड्जी। 59 जमाहेन्से योसेफसे मलमलला सफा छार क्वानरी येशूला लास रिल्सी, 60 थेसे ह्राडलान लागिरी पहरारी ठ्वाइसी स्होबा छार धुर्सारी थान्जी। ओच्छे धुर्साला म्रापरी ग्रेन युड्बा ब्लिड्बान भसी थान्सी थे निजी। 61 थे धुर्साला डाच्छापट्टि मरियम मग्दलिनीदेन अर्गु मरियमएनोन चिबा मुबा।

सिपाहीगदेसे येशूला धुर्सा खूड्बा

62 न्हडगरदडसे ब्लपबा न्हबा धिनकुनु परमेश्वरला मन्दिररी पूजा लबा मुल म्हिगदेदेन फरिसीगदे पिलातस मुबा ग्लारी निजी। 63 ओच्छे थेनीगदेसे चुहड्ड भिसी भिजी, "थे ठगसे सोबा धुइरी 'डादा सिबाग्याम सोमरेमाकुनु सोना लला' भिसी भ्रबा ताम डन्दा था मुला। 64 थेतबासेलमा सोमरेमाधोना सिपाहीगदेदा धुर्सा खूड्पुड्जी। आहिन्सम थेला चेलागदे खसी थेला लास य्हो लसी भोर्ला। ओच्छे 'येशूदा सिबाग्याम सोना लजी' भिसी म्हिगदेदा डाच्छाला भन्दा झन झुक्याब लसी भ्रला।"

65 लु, थेहड्ड भिसम "सिपाहीगदे भोर्सी ज्यना लसी धुर्सा खूड्पुड्जी" भिसी पिलातससे थेनीगदेदा भिजी।

66 जमाहेन्से थेनीगदे धुर्सारी निसी धुर्साला म्रापरी थान्बा युड्बारी लाहा छाप लसी सिपाहीगदेदा खूड्पुड्जी।

येशूदा सिबाग्याम सोना लबा

मर्कूस १६:१-१०; लूका २४:१-१२; यूहन्ना २०:१-१०

28

ब्लपबा न्हबा धिनना न्हडगरदड स्थोरीन मरियम मग्दलिनीदेन स्थान्दो मरियम भिबा म्रिडम्हेमे न्ही येशूदा थान्बा धुर्सा च्याबारी निजी। 2 थेनोन धुइरी सडगुल खजी। तिगदा भिसम स्वर्ग्याम परमप्रभुला दूत गिक मार फाप्सी धुर्साला म्रापरी थान्बा युड्बा ब्लिड्सी थेनोन युड्बाथोरी चिजी। 3 थे स्वर्गदूतला ली धिनीला स्हेर ह्रड्बान य्हाल य्हाल्बा मुबा। ओच्छे थेला क्वान ग्लिड तेबान तार मुबा। 4 थेदा म्राड्सी धुर्सा खूड्सी चिबा सिपाहीगदे लोड्सी फितफित धर्सी सिबा तेबान तजी।

5 तर स्वर्गदूतसे थे म्रिडम्हेमेगदेदा चुहड्ड भिसी भिजी, "एनीगदे थालोड्जी, तिगदा भिसम कुसरी टाँगब लसी साइबा येशूदा एनीगदेसे म्हाइबान मुला भिबा ताम डादा था मुला। 6 येशू चुरी आरे, थेसे सुड्बा ह्रड्बान थेदा सिबाग्याम सोना लसी जिन्बा मुला। एनीगदेन खसी थेदा थान्बा ग्ला च्यागो। 7 दाहेन्से एनीगदे योना निसी थेला चेलागदेदा 'येशूदा सिबाग्याम सोना लसी जिन्बा मुला। ओच्छे येशू एनीगदे भन्दा डाच्छा गालील अञ्चलरी फेज्वान मुला। एनीगदेसे येशूदा थेरीन म्राड्ला' भिसी पाड्सी पिन्गो।"

8 चुहड्ड तबा म्राड्सी थे म्रिडम्हेमेगदे लोड्जी। तसैनोन स्वर्गदूतला ताम थे:सी थेनीगदे ल्हानान ताड्सी येशूला चेलागदेदा थे ताम पाड्बारी धुर्साग्याम थोन्सी यार्बान निजी।

9 थे म्रिडम्हेमेगदे ग्यामरी निबान लमा तिकखुरीन येशूसे स्याप्सी "एनीगदेदा शान्ति तगै" भिसी सुड्जाहेन्से थेनीगदेसे येशूला स्थाप चुड्सी प्या लजी। 10 जमाहेन्से येशूसे थेनीगदेदा "एनीगदे थालोड्जी, डाला आलेगदे मुबा ग्लारी निसी थेनीगदेदा गालील अञ्चलरी निउ भिउ, थेनीगदेसे डादा थेरीन स्याप्ला भिसी पाड्सी पिन्गो" भिसी सुड्जी।

धुर्सा खूड्बा सिपाहीगदेसे पाड्बा ताम

11 थे म्रिडम्हेमेगदे धुर्साग्याम निमाहेन्से धुर्सा खूड्सी चिबा सिपाहीगदे न्हडला कोइ कोइ सिपाहीगदे शहररी निसी परमेश्वरला मन्दिररी पूजा लबा मुल म्हिगदेदा थे धुर्सारी तिग तिग तबा मुबा, थे ताम पाड्सी पिन्जी।

12 जमाहेन्से पूजा लबा मुल म्हिगदेदेन यहूदी गन्बागदे हुप तसी थेनीगदे न्हडरी सल्लाह लसी सिपाहीगदेदा ल्हानान टाडगा पिन्सी चुहड्ड भिसी भिजी, 13 "एनीगदेसे 'डनी म्हुनड म्हेर्बा धुइरी थेला चेलागदे खसी थेला लास य्हो लसी भोर्जिम' भिसी पाड्जी। 14 तिगै लसी चु ताम अञ्चलाधीशसे था याड्जी भिसै डन्से थेदा ताड्ना लसी एनीगदेदा तिगै लआपुड्।"

15 जमाहेन्से सिपाहीगदेसे थे टाडगा किन्जी, ओच्छे थेनीगदेदा लोप्ला अन्धारनोन म्हिगदेदा पाड्जी। दान्देधोनाएनोन यहूदीगदेला गुडरी चुनोन ताम लसी चिमुला।

येशूसे पिन्बा थुमला अर्ती

मर्कूस १६:१४-१८; लूका २४:३६-४९; यूहन्ना २०:१९-२३; मुल चेला १:६-८

16 येशूसे ह्राडला च्युक गिक चेलागदेदा "गालील अञ्चलला गडरी निउ" भिसी कुल्बासे लमा थेनीगदे थेरी निजी। 17 थेरी थेनीगदेसे येशूदा म्राड्सी प्या लजी। तर थेनीगदे न्हडला कोइ कोइसे चा येशू हिन्ना कि आहिन भिसी शड्का लजी। 18 जमाहेन्से येशू थेनीगदे मुबा ग्लारी फेखसी चुहड्ड भिसी सुड्जी, "च्यागो, परमेश्वरसे स्वर्गदेन जम्बुलिडला जम्मान अधिकार डादा पिन्बा मुला। 19 थेतबासेलमा एनीगदे यहुल्सा यहुल्सारी निसी जम्मान यहुलला म्हिगदेदा डाला चेला स्होड। ओच्छे थेनीगदेदा परमेश्वर आबा, परमेश्वरला झादेन परमेश्वरला आत्माला मिनरी बत्तिस्मा पिन्गो, 20 ओच्छे डाइ एनीगदेदा लोप्लादेन कुल्बा जम्मान ताम थेनीगदेदाएनोन लउ भिसी लोणो। च्यागो, परमेश्वरसे जम्बुलिडला जम्मान म्हिगदेला निसाफ लबा धिनधोनाएनोन डा एनीगदेदेन छ्यामनोन तला।"

††† 28:16 मत्ती २६:३२; मर्कू १४:२८ § 28:19 मुल १:८

† 27:43 भजन २२:८ †† 27:46 भजन २२:१ † 27:48 भजन ६८:२१
†† 27:51 प्रस्था २६:३१-३३ †† 27:56 लूका ८:२-३ ††† 27:63 मत्ती
१६:२१; १७:२३; २०:१९; मर्कू ८:३१; ९:३१; लूका ९:२२; १८:३१-३३

चु किताबला बारेरी पाड्तो:मा

मर्कूस भिबा यूहन्नासे भिबा मुबा। थे येशूला मुल चेला सिमोन पत्रुसला ह्यो मुबा (१ पत्रुस ५:१३)। थे बारनाबास ओच्छे पावलदेन छ्याम थार्बा पिन्बा समाचार थे:ना लबारी निबा मुबा (मुल चेला १२:२५)।

रोम शहररी भिबा मुबा।

ओस्पन ईश्वी संवत् ६०-६५ (विक्रम संवत् ११७-१२३) सालला गुडरी भिबा हिन्ना। थे धुडरी ख्रीष्टियानगदेदा रोमीगदेसे ल्हानान दुख पिन्बा मुबा। चु थार्बा पिन्बा समाचार जम्मान भन्दा डाच्छा भिबा मुबा।

येशू परमेश्वरला झा हिन्ना भिसी उन्बाला लागिरी अर्गु यहुलला म्हिगदेदा भिबा मुबा।

चु थार्बा पिन्बा समाचाररी येशूसे लबा गेदेन थेला अधिकारला बारेरी भिबा मुला। येशूसे लोप्ला तामगदेग्याम, म्हड म्हड ताप्ला तामगदेग्याम, म्हिगदेला पाप माफ लबा तामगदेग्याम येशू चा अधिकार याड्बा म्हे हिन्ना भिसी था याड्खम्ला। ओच्छे येशूसे म्हिगदेदा पापग्याम सोना लबारी हाडला ज्याननोन पिन्बारी खबा “परमेश्वरसे पुड्खबा म्हे” हिन्ना भिसी सुड्बा मुला।

चुरी येशूसे पिन्बा अर्तीला तामदेन लोप्ला तामगदे भन्दा थेसे लबा गेगदेला बारेरी ल्हानान भिबा मुला। बप्तिस्मा पिन्बा यूहन्नाला बारेरीदेन येशूसे किन्बा बप्तिस्माला बारेरी ओच्छे शैतानसे येशूला सेम च्याबा तामला बारेरी तिगै ताम पाङ्गाहेन्से तुरुन्तन येशूसे म्हिगदेदा खम्ना लबादेन लोप्ला तामला बारेरी घोना लबा मुला। थेहड् लसीन लिच्छा येशूला चेलागदेसे येशूदा ज्यान लसी डोसेजी। तर येशूदा बिरोध लबागदेसे चा येशूदा झन बिरोध लबारी छ्याड्जी। चु किताबला थुमरी येशूला ल्हुडरी तबा लिच्छाला साताला तामगदेदेन क्रुसरी टाँगब लसी साड्बा ओच्छे सिबाग्याम दो:सी सोबा तामला बारेरी भिबा मुला।

मुल तामगदे

थार्बा पिन्बा समाचार थे:ना लबा १:१-१३

येशूसे गालील अज्चलरी लबा गे १:१४-९:५०

येशू गालील अज्चलहेन्से यरूशलेम शहरधोना फेप्ला १०:१-५२

यरूशलेम शहररी येशूला गे थुम्बा धुड ११:१-१५:४७

येशू सिबाग्याम सोबा १६:१-८

येशू सिबाग्याम सोमाहेन्से चेलागदे मुबा ग्लारी फेप्लबादेन येशू स्वर्गी फेप्ला १६:९-२०

मर्कूससे भिबा थार्बा पिन्बा समाचार

बप्तिस्मा पिन्बा यूहन्नासे थे:ना लबा थार्बा पिन्बा समाचार

मत्ती ३:१-१२; लूका ३:१-९, १५-१७; यूहन्ना १:१९-२८

1 परमेश्वरला झा येशू ख्रीष्टला बारेला थार्बा पिन्बा समाचार चुहड् लसी शुरु तजी। 2 यशैया भिबा अगमवक्ताला किताबरी परमेश्वरसे चुहड् भिसी सुड्बा मुला,

“च्यागो, डाइ डाला समाचार भोर्बा म्हिदा एला डाच्छा डाच्छा पुड्खला।

थेसे एला ग्याम स्होला। †

3 तोडतोडबा ग्लारीक्यार म्हे गिक क्रिड्बान,

‘परमप्रभुला ग्याम तयार लउ,

ओच्छे परमप्रभु भ्रबाला लागिरी थेला ग्याम सोजो स्होउ।” ††

4 चु म्हे बप्तिस्मा पिन्बा यूहन्ना हिन्ना। थेसे तोडतोडबा ग्लारीक्यार खसी म्हिगदेदा “दाहेन्से एनीगदे हाड हाडला पाप खलासी परमेश्वरपट्टि दो:सी बप्तिस्मा किन्गो। परमेश्वरसे एनीगदेला पापला दोष मेटब लला।” भिबान थार्बा पिन्बा समाचार थे:ना लजी। 5 यरूशलेमदेन यहुदिया यहुल्साला जम्मान म्हिगदे यूहन्ना मुबा ग्लारी खसी, दाहेन्से डनी हाड हाडला पाप खलासी परमेश्वरपट्टि दो:ला भिसी यर्दन स्योडरी यूहन्नाग्याम बप्तिस्मा किन्जी। 6 यूहन्नासे ऊँटला काला क्वान क्वानमुबा ओच्छे ढिला पेटी

खीमुबा। थेसे तिरीदेन हि सिडसोरला खुदु चमुबा। #7 थेसे म्हिगदेदा चुहड् भिसी पाड्जी, “डा भन्दा लिच्छा फेप्लबान लबा चा डा भन्दान शक्तिशाली मुला। डा कू तसी थेला लखमला तुना ब्लबाधोनाला आरे। 8 डाइ एनीगदेदा क्युड्ग्याम बप्तिस्मा पिन्बा मुला, तर थेसे एनीगदेदा परमेश्वरला आत्मासे बप्तिस्मा पिन्ना।”

येशूसे यूहन्नाग्याम बप्तिस्मा किन्बा

मत्ती ३:१३-१७; लूका ३:२१-२२

9 थेनोन धुडरी येशू गालील अज्चलला नासरत नाम्साग्याम फेप्लजी, ओच्छे यर्दन स्योडरी यूहन्नाग्याम बप्तिस्मा किन्जी। 10 यूहन्नाग्याम बप्तिस्मा किन्सी क्युड्ग्याम थोन्मैछ्याम येशूसे स्वर्ग ठोड्बा म्हाड्जी ओच्छे परमेश्वरला आत्मा दुकुर हड् लसी हाडथोरी फाप्लबान लबा म्हाड्जी।

11 ओच्छे स्वर्गग्याम “ए डाइ सेमहेन्से माया लबा डाला झा हिन्ना, थेतबासेलमा डा एदा म्हाड्सी ल्हानान ताड्बा मुला” भिबा काइ खजी। †

† 1:2 मला ३:१ †† 1:3 यशै ४०:३

‡ 1:6 २ राजा १:८ †† 1:11 उत्प २२:२; भजन २:७; यशै ४२:१; मत्ती १२:१८; मर्कू ९:७

शैतानसे येशूदा फसब लबारी म्हाइबा
मत्ती ४:१-११; लूका ४:१-१३

12 जमाहेन्से परमेश्वरला आत्मासे येशूदा तोडतोडबा ग्लारी भोजी। 13 येशू बोगल न्ही धिनधोना थेरीन धन्ख्याजी। थेनोन धुडरी शैतानसे थेदा फसब लबारी थेला सेम च्याजी। थे हीला जन्तुगदेदेन छ्याम मुबा ओच्छे स्वर्गदूतगदेसे थेदा क्योड्जी।

येशूसे डाच्छा धम्बा चेलागदे
मत्ती ४:१२-२२; लूका ४:१४-१५; ५:१-११

14 बप्तिस्मा पिन्बा यूहन्नादा इयाल्खानरी थान्माहेन्से येशूसे परमेश्वरला खुल्साला समाचार थे:ना लबान गालील अज्वलरी फेप्जी। 15 “दाहेन्से धुड योसी जिन्बा मुला, ओच्छे परमेश्वरला खुल्सा खबा धुड तसी जिन्बा मुला। थेतबासेलमा एनीगदे ह्वाड ह्वाडला पाप ख्लासी परमेश्वरपट्टि दो:गो। ओच्छे थाबा पिन्बा समाचाररी विश्वास लउ” भिसी येशूसे सुड्जी। †

16 येशू गालील समुन्द्रला कुनीन कुनी फेप्बान लमा थेसे सिमोनदेन थेला आले अन्द्रियासदा तार्डा साइबारी समुन्द्ररी घ्याड क्लाडबान लबा म्हाइजी। तिगदा भिसम थेनीगदे तार्डा साइबा म्हेगदे मुबा। 17 येशूसे थेनीगदेदा “डादेन छ्याम भउ, दाहेन्से डाइ एनीगदेदा तार्डा चुड्बा म्हे आहिन, तर म्हेगदेदा परमेश्वर मुबा ग्लारी भबा म्हे स्होला” भिसी सुड्जी। 18 येशूसे थेह्ण्ड सुड्छ्याम ह्वाडला घ्याड ख्लासी थेनीगदे येशूदेन छ्याम भजी। 19 जजाकी क्याथाड धोमाहेन्से येशूसे जब्दियाला झा न्ही, याकूबदेन थेला आले यूहन्नादा दौंगारी चिसी घ्याड राबान लबा म्हाइजी। 20 येशूसे थेनीगदेदा म्हाइछ्याम “डादेन छ्याम खउ” भिसी इयोड्जी, ओच्छे थेनीगदेसे ह्वाडला आबा जब्दियादा दौंगारी मुबा कुल्लीगदेदेन छ्याम ख्लासी येशूदेन छ्याम भजी।

येशूसे म्हडसे स्याप्बा म्हेदा खम्ना लबा
लूका ४:३१-३७

21 जमाहेन्से थेनीगदे कफर्नहुम भिबा शहररी फेप्जी। ओच्छे बलप्बा न्हाब धिनकुनु येशू यहुदीगदे हुप तबा दिमरी फेप्सी परमेश्वरला बचनग्याम लोप्बारी छ्याइजी। 22 येशूसे लोप्बा म्हाइसी म्हेगदे उदेक तजी। तिगदा भिसम येशूसे यहुदी धर्मगुरुगदेसे लोप्बा ह्ण्ड लसी आहिन, तर अधिकार मुबा म्हेसे ह्ण्ड लसी लोप्बा मुबा। †23 थेनोन धुडरी यहुदीगदे हुप तबा दिम न्हडग्याम म्हडसे स्याप्बा म्हे गिक चुह्ण्ड भिबान क्रिड्जी, 24 “नासरतला येशू, ह्वाडसे इन्दा तिग लबारी म्हाइबा? तिग ह्वाड इन्दा साइबारी फेप्बबा हिन्ना? ह्वाड परमेश्वरसे पुड्खबा परमेश्वरला म्हे भिसी डादा था मुला।” 25 येशूसे थे म्हडदा बड्सी, “कुटिसी चिउ! थे म्हेग्याम थोन्सी निउ!” भिसी 26 सुड्छ्याम थे म्हेदा लछार पछार लसी क्रिड्बान थे म्हेग्याम म्हड थोन्सी निजी। 27 चु म्हाइसी थेरी मुबा जम्मान म्हेगदे उदेक म्हन्जी। ओच्छे ह्वाड ह्वाड न्हडरी चुह्ण्ड भिबारी छ्याइजी, “आहिन, चु तिग? चु मी अधिकार लसी लोप्बा छार ताम गा चीम। थेसे कुल्बा ताम म्हडगदेसेएनोन इयान्बा चीम।” 28 चुह्ण्ड तमैछ्याम येशूसे लबा उदेकला गेला बारेरी गालील अज्वलला जम्मान ग्लारी थे:जी।

येशूसे ल्हानान म्हेगदेदा खम्ना लबा
मत्ती ८:१४-१७; लूका ४:३८-४१

29 ओच्छे येशू यहुदीगदे हुप तबा दिमग्याम थोन्सी याकूब, यूहन्नादेन छ्याम सिमोनदेन अन्द्रियासला दिमरी फेप्जी। 30 थे धुडरी सिमोनना स्युमी छवा खसी म्हेसी चिबा मुबा। ओच्छे थेनीगदेसे थे ताम येशूदा पाड्जी। 31 थेतबासेलमा येशू सिमोनना स्युमी मुबा ग्लारी फेप्सी थेला यारी चुड्सी थीजी। जमाहेन्से थेला छवा म्हाजी। ओच्छे थेसे थेनीगदेदा क्योड्बारी छ्याइजी। 32 जमाकुनु उचसे धिनी घल्माहेन्से म्हेगदेसे ल्हानान आखम्बा म्हेदेन म्हडसे स्याप्बा म्हेगदेदा येशू मुबा ग्लारी भजी। 33 ओच्छे नाम्साला

जम्मान म्हेगदे दिमला खाडगारी हुप तजी। 34 येशूसे ल्हानान खाल्ला रोगसे आखम्बा म्हेगदेदा खम्ना लजी। ओच्छे ल्हानान म्हेला ल्हुड्ग्याम म्हड ताप्जी। येशू खाल भिबा ताम थे म्हडगदेसे डोसेबासे लमा येशूसे थेनीगदेदा ताम पाड्आपुड्नी।

सुनसान ग्लारी येशूसे लबा प्रार्थना
लूका ४:४२-४४

35 स्यहोरीन मी म्हाइबा भन्दा डाच्छान येशू स्हेड्सी सुनसान ग्लारी प्रार्थना लबारी फेप्जी। 36 सिमोन ओच्छे थेदेन छ्याम मुबागदे जम्मासेन येशूदा म्हाइबान निजी। 37 थेनीगदेसे येशूदा स्याप्माहेन्से “ह्वाडदा जम्मासेन म्हाइबान मुला” भिसी भिजी। 38 येशूसे थेनीगदेदा “लु, य्हाड अर्गु नाम्सारिक्यार निड, थेरीनोन डाइ थाबा पिन्बा समाचार थे:ना लतो:बा मुला। तिगदा भिसम डा चुलान लागिरी खबा हिन्ना” भिसी सुड्जी। 39 ओच्छे येशू गालील अज्वलला जम्मान ग्लारी यहुदीगदे हुप तबा दिमगदेरी थाबा पिन्बा समाचार थे:ना लबान म्हेगदेला ल्हुड्ग्याम म्हडगदे ताप्बान भजी। †

येशूसे कोरे खबा म्हेदा खम्ना लबा
मत्ती ८:१-४; लूका ५:१२-१६

40 ओच्छे कोरे खबा म्हे गिक येशू मुबा ग्लारी खसी पुड् जूबान, “ह्वाडला सेम मुसम ह्वाडसे डादा खम्ना लखम्ना” भिसी भिजी। 41 चु ताम थे:माहेन्से येशूदा दया रे:सी ह्वाडला यासे थेदा थुर्बान, “ए खम्मा भिबा डाला सेम मुला, ए खम्मा” भिसी सुड्जी। 42 थेनोन धुडरी थे कोरे खबा म्हे खम्जी। 43 ओच्छे येशूसे थेदा “एसे चु ताम खालैदा थापाङ्गो, बरु निसी परमेश्वरला मन्दिररी पूजा लबा म्हेदा उन्गो। ओच्छे ए खम्मी भिसी म्हेगदेदा उन्बाला लागिरी मोशासे कुल्बा अन्छार परमेश्वरदा बलि फुल्गो” भिसी कुल्जी। †45 तर थे म्हे निसी चु ताम जम्मान म्हेदा पाड्जी। जमाहेन्से येशू दो:सी नाम्सारि डाच्छाला ह्ण्ड लसी फेप्बारी आखम्नी। थेतबासेलमा येशू सुनसान ग्लारी धन्ख्याजी। तर थेरीनोन जम्मान ग्लायामसे म्हेगदे येशू मुबा ग्लारी खजी।

येशूसे कुज्या म्हेदा खम्ना लबा
मत्ती ९:१-८; लूका ५:१७-२६

2 तिगै धिन लिच्छा दो:सी येशू कफर्नहुम भिबा शहररी फेप्जी। ओच्छे येशू दिमरीन मुला भिबा ताम म्हेगदेसे थे:जी। 2 जमाहेन्से म्हेला हुल खसी मडग्यारहेन्से दिम न्हडधोना चिबा ग्ला आतनी। थेरी येशूसे परमेश्वरला बचन सुड्बान मुबा। 3 थेनोन धुडरी गोर बलि म्हेसे काड या चलब आतबा कुज्या म्हे गिकदा पुड्सी येशू मुबा ग्लारी भजी। 4 तर म्हेला हुलसे लमा थेनीगदेसे थे कुज्या म्हेदा येशू मुबा ग्लारी धोना लबारी आखम्नी। थेतबासेलमा थेनीगदेसे थे दिमला छाना होक्सी थे कुज्या म्हेदा थेला तीबा नान्बादेन छ्यामनोन येशूला डाच्छापट्टि धोना लजी। 5 येशूसे थे म्हेगदेला विश्वास म्हाइसी कुज्या म्हेदा “कोला, एला पाप माफ तबा मुला” भिसी सुड्जी।

6 येशूसे चुह्ण्ड सुड्बा म्हाइसी थेरी मुबा यहुदी धर्मगुरुगदेसे “तिगदा चु म्हेसे चुह्ण्डबा ताम लबा? चुसे मी ह्वाडसे ह्वाडदान परमेश्वर स्होसी गा ताम लबा चीम, म्हेगदेला पापला दोष परमेश्वरसे जे मेटब लखम्मुला” भिसी सेम न्हड न्हडरी म्हन्जी। 8 येशूसे थेनीगदेला सेमला ताम था याड्सी थेनीगदेदा चुह्ण्ड भिसी सुड्जी, “एनीगदेला सेमरी तिगदा चुह्ण्डबा म्हन्बा?” 9 चु कुज्या म्हेदा ‘एला पाप माफ तबा मुला’ भिबादेन ‘रे:सी भउ, एला तीबा नान्बा पुड्सी निउ’ भिबा खजिबा चा सजिलो मुला? 10 तर च्यागो, परमेश्वरसे पुड्खबा म्हेदा चु जम्बुलिडरी म्हेगदेला पापला दोष मेटब लबा अधिकार मुला भिबा ताम डाइ एनीगदेदा उन्ना।” जमाहेन्से येशूसे थे कुज्या म्हेदा “ए रे:गो, ओच्छे एला तीबा नान्बा पुड्सी दिमरी निउ” भिसी सुड्जी। 12 येशूसे थेह्ण्ड सुड्छ्याम थे कुज्या म्हे जम्मासेन च्याना च्यानान डोड रे:सी ह्वाडला तीबा नान्बा पुड्सी निजी। चु म्हाइसी म्हेगदे उदेक म्हन्सी

परमेश्वरदा जयजयकार लबान, “चुहड्बाम व्हाडसे खाइमै म्राड्बा आरे” भिसी भिजी।

येशूसे लेवीदा ड्योड्बा
मत्ती ९:१-१३; लूका ५:२७-३२

13 दोःसी तिरें येशू समुन्द्रला कुनीरी फेज्जी। थेरी येशूदा म्राड्सी म्हिला हुल खजी ओच्छे येशूसे थेनीगदेदा लोण्बारी छ्याड्जी। 14 येशू थेग्याम फेज्बा धुडरी अल्फयसला झा लेवीदा तिरों दुड्बा ग्लारी चिबान लबा म्राड्जी ओच्छे थेदा “डादेन छ्याम भ्रउ” भिसी सुड्जी। जमाहेन्से थे रेःसी येशूदेन छ्याम भ्रजी।

15 येशू लेवीला दिमरी सोल छ्योड्बान लबा धुडरी तिरों दुड्बा म्हिगदे, पापीगदे ओच्छे थेला चेलागदे थेदेन छ्यामनोन चिसी चबान मुबा। तिगदा भिसम येशूदेन छ्याम भ्रबा म्हिगदे ल्हानान मुबा। 16 फरिसीदेन यहूदी धर्मगुरुगदेसे येशू पापीगदेदेन तिरों दुड्बा म्हिगदेदेन छ्यामनोन धन्छ्यासी चबा म्राड्सी थेनीगदेसे थेला चेलागदेदा “तिगदा चुसे पापीगदेदेन तिरों दुड्बा म्हिगदेदेन छ्याम चिसी चबा?” भिसी ड्योड्जी।

17 चुहड् भिबा ताम थेःसी येशूसे थेनीगदेदा “खम्बा म्हिगदेला लागिरी डाक्टर आतोः, तर आखम्बा म्हिगदेला लागिरी जे तोःला। थेतबासेलमा परमेश्वरला डाच्छा ज्यबा मुबा म्हिगदेदा आहिन तर पापीगदेदा ड्योड्बारी डा खबा हिन्ना” भिसी सुड्जी।

येशूसे फोड्थान चिसी प्रार्थना लबाला लागिरी लोण्बा
मत्ती ९:१४-१७; लूका ५:३३-३९

18 यूहन्नाला चेलागदेदेन फरिसीगदे फोड्थान चिसी प्रार्थना लबान लमुबा। थेतबासेलमा कोड कोड म्हिगदे खसी येशूदा “यूहन्नाला चेलागदेदेन फरिसीला चेलागदे फोड्थान चिसी प्रार्थना लमुला तर ह्राडला चेलागदेसे चा तिगदा चुहड् आलबा?” भिसी ड्योड्जी। 19 येशूसे थेनीगदेदा चुहड् भिसी सुड्जी, “म्हाछार जन्तीगदेदेन छ्याम मुतेधोना खाहड् लसी थेनीगदे फोड्थान चिला? दान्देधोना म्हाछार थेनीगदेदेन छ्याम मुला, थेतबासेलमा थेनीगदे फोड्थान आचि। 20 तर म्हाछार जन्तीगदेग्याम फेसी भोर्बा धुड् खला। थे धुडरी थेनीगदे फोड्थान चिला।

21 “खालैसे बोक्टो क्वानरी छार क्वानगेनसे आख्या, छार क्वानगेनसे बोक्टो क्वान ख्याजी भिसम बोक्टो क्वान झन ढेला। 22 ओच्छे खालै म्हिसेनोन ढिला बोक्टो ताडरी अडगुरला कलिलो निडगु आयु, युजी भिसम थे ढिला बोक्टो ताड भोसी ढेला, ओच्छे अडगुरला निडगु जति डेला। जमाहेन्से ढिला ताडएनोन गे आखेल्बा तला। थेतबासेलमा अडगुरला कलिलो निडगु ढिला छार ताडरी युतोःला।”

येशू बल्पा न्हबा धिननाएनोन प्रभु हिन्ना
मत्ती १२:१-८; लूका ६:१-५

23 बल्पा न्हबा धिनकुनु येशू बुग्याम फेज्बान मुबा। थे धुडरी थेला चेलागदेसे ग्वाला नम थुबारी छ्याड्जी। †24 चु म्राड्सी फरिसीगदेसे येशूदा “च्यागो, बल्पा न्हबा धिनकुनु लबारी आतबा गे थेनीगदेसे तिगदा लबा?” भिसी ड्योड्जी। 25 ओच्छे येशूसे थेनीगदेदा “दाऊदसे थेदेन छ्याम मुबा म्हिगदे फोखेन्बा धुडरी थेनीगदेसे तिग लजी? एनीगदेसे खाइमै परमेश्वरला बचन पढब लबा आरे? 26 थेसे परमेश्वरला मन्दिररी पूजा लबा मुल म्हि अबियाथारला पालरी परमेश्वरला दिमरी वाड्सी, परमेश्वरदा फुल्बा गेड चजी, ओच्छे थेसे थेदेन छ्याम मुबा म्हिगदेदाएनोन पिन्जी। तर थे गेड परमेश्वरला मन्दिररी पूजा लबा म्हिगदेदा जे चपुड्बा” भिसी सुड्जी। †

27 दोःसी येशूसे फरिसीगदेदा “बल्पा न्हबा धिन म्हिला लागिरी स्होबा हिन्ना, तर म्हि बल्पा न्हबा धिनना लागिरी स्होबा आहिन। 28 थेतबासेलमा परमेश्वरसे पुड्खबा म्हि बल्पा न्हबा धिननाएनोन प्रभु हिन्ना” भिसी सुड्जी।

† 2:23 व्यव २३:२५ † 2:26 १ शम् २१:१-६; लेवी २४:९

3 दोःसी येशू यहूदीगदे हुप तबा दिमरी वाड्जी। थेरी या खर्बा म्हि गिक मुबा। 2 बल्पा न्हबा धिनकुनु येशूसे थे म्हिला खर्बा या खम्ना लला वा भिसी कोड कोड म्हिगदेसे दोष लबाला लागिरी चिवा लसी चिबा मुबा। 3 येशूसे थे या खर्बा मुबा म्हिदा “जम्मालान डाच्छापट्टि राणो” भिसी सुड्जी। 4 थेसे थेनीगदेदा “बल्पा न्हबा धिनकुनु ज्यबा गे लबा कि नड्बा गे लबा, म्हि सोना लबा कि सिना लबा खजिबा चा ज्यबा हिन्ना?” भिसी ड्योड्जी। तर थेनीगदे कुटिसी चिजी। 5 येशूसे ह्राडला क्युर्सिन मुबा म्हिगदेदा स्हीसी येशूसे थेनीगदेला सेम कोड्बा था याड्सी सेमरी ल्हानान दुख तसी येशूदा बोमो रेःजी। ओच्छे येशूसे थे या खर्बा मुबा म्हिदा “एला या तन्नाब लउ” भिसी सुड्जी। ओच्छे थे म्हिसे थेला या तन्नाब लमैछ्याम या खम्जी। 6 जमाहेन्से फरिसीगदे थेग्याम थोन्सी निसी येशूदा खाहड् लसी साड्बा भिसी हेरोद ग्लेला म्हिगदेदेन छ्याम सल्लाह लजी।

येशूला लिच्छा म्हिला हुल भ्रबा
मत्ती १२:१५-१६; लूका ६:१७-१९

7 जमाहेन्से येशू ह्राडला चेलागदेदेन छ्याम समुन्द्रपट्टि फेज्जी, ओच्छे गालील अञ्चलग्यामसे म्हिला हुल थेला लिच्छा भ्रजी। 8 येशूसे लबा उदेकला गेला बारेरी थेःसी यहूदिया, यरूशलेम, इदुमिआ, यर्दन क्याम्सड्ला ओच्छे टुरोसदेन सीदोन नाम्साला क्यारमारला म्हिगदे येशू मुबा ग्लारी खजी। 9 थेतबासेलमा म्हिगदेसे ह्राडदा थानाङ्गे भिसी येशूसे ह्राडला चेलागदेदा दौंगा गिक ठीक लपुड्जी। 10 तिगदा भिसम येशूसे ल्हानान आखम्बा म्हिगदेदा खम्ना लबासे लमा रोगसे स्याण्बा म्हिगदे येशूदा थुर्बारी तोर हुड मार हुड लबान मुबा। †11 ओच्छे म्हडसे स्याण्बा म्हिगदेसे येशूदा म्राङ्गेछ्याम खलुप तसी, “ह्राड परमेश्वरला झा हिन्ना” भिसी क्रिड्बा। 12 तर येशूसे थे म्हिला ल्हुडरी मुबा म्हडदा “च्यागो, डा परमेश्वरला झा हिन्ना भिसी खालैदा थापाङ्गे” भिसी बड्जी।

येशूसे च्युक न्ही चेलादा धम्बा
मत्ती १०:१-४; लूका ६:१२-१६

13 येशू गडरी फेप्सी ह्राडला सेमसे चबा जतिदा ड्योड्जी, ओच्छे थेनीगदे थे मुबा ग्लारी खजी। 14 जमाहेन्से ह्राडदेन छ्याम भ्रबारी ओच्छे म्हिगदेदा परमेश्वरला यहुल्साला समाचार थेःना लबारी च्युक न्ही म्हि धम्जी, ओच्छे थेनीगदेदा मुल चेला भिसी सुड्जी। 15 ओच्छे म्हिगदेला ल्हुडग्याम म्हड ताण्बा अधिकार पिन्जी। 16 येशूसे धम्बा च्युक न्ही मुल चेलागदे चुगदेन हिन्ना, सिमोन भिबादा येशूसे पत्रुस मिन थान्जी। 17 जब्दियाला झा याकूबदेन याकूबला आले यूहन्नादा थेसे बोअनर्गस भिसी मिन थान्जी। बोअनर्गस भिबा चा मु घुर्बा हड्बाला झागदे भिबा हिन्ना। 18 ओच्छे अन्द्रियास, फिलिप, बारथोलोमाड, मत्ती, थोमा, अल्फयसला झा याकूब, ओच्छे थेदियस, सिमोन मुबा। चु सिमोनदा चा ह्राडला यहुल्सादा माया लबा म्हि भिसी भिमुबा। 19 ओच्छे यहूदा इस्करियोत चुनोन यहूदा इस्करियोतसे लिच्छा येशूदा चुड्सी म्हिगदेला यारी जिम्मा पिन्जी।

येशूदेन म्हडला ग्ले बालजिबुल
मत्ती १२:२२-३२; लूका ११:१४-२३; १२:१०

20 ओच्छे येशू दिमरी फेज्बा धुडरी दोःसी म्हिगदे हुप तजी। थेतबासेलमा येशूदेन थेला चेलागदेसे सोल छ्योड्बारी सुत्तै आम्याड्नी। 21 चु ताम येशूला दिमला म्हिगदेसे थेःसी थेदा भोर्बारी भिसी दिमग्याम थोन्जी, तिगदा भिसम येशूला सेम ठेगानरी आरे भिसी थेनीगदेसे म्हन्मुबा।

22 यरूशलेमग्याम खबा यहूदी धर्मगुरुगदेसे, “चुला ल्हुडरी म्हडगदेला ग्ले बालजिबुल मुला, चु म्हिसे मी म्हडगदेला ग्लेला शक्तिग्याम म्हड ताण्बा हिन्ना” भिसी भिजी। †

23 तर येशूसे थेनीगदेदा ह्राड मुबा ग्लारी ड्योड्सी उखानग्याम चुहड् भिसी सुड्जी, “शैतानसे शैतानदा खाहड् लसी ताण्खम्ला? 24 यहुल्सा गिकलान म्हि ह्राड ह्राड न्हडरी आढिक्सम थे यहुल्सा न्होड्ला। 25 ओच्छे दिम गिकला

‡ 3:10 मर्कू ४:१; लूका ५:१-३ † 3:22 मत्ती १३:४; १०:२५

म्हिणोन हाड हाड न्हडरी आढिकनी भिसम थे दिमनामएनोन फुला।
26 थेहड लसी शैतान शैतान न्हडरी आढिकनी भिसम थेला यहुल्सा नाश
तला। 27 खालैसे भड्बा म्हिदा दिमरी वाड्सी थेला धन सम्पत्ति य्हो लतो:जी
भिसम थेसे डाच्छा थे भड्बा म्हिदा चुड्सी खीतो:ला। थे भड्बा म्हिदा
खीमाहेन्से जे थेसे थेला धन सम्पत्ति भोर्खम्ला।

28 “एनीगदेसे डाला ताम इयान्ना, म्हिगदेसे लबा जम्मान पाप गेदेन
परमेश्वरदा बिरोध लसी पाप लसैनोन माफ याड्ला। 29 तर जुन म्हिसे
परमेश्वरला आत्माला बिरोध लसी पाप गेदेन पाप ताम लला, थेसे खाड्मै
माफ आयाड्। थे जुकजुकधोना पापरी चितो:ला।” 30 तिग्दा भिसम
थेनीगदेसे येशूला ल्हडरी म्हड मुला भिसी भिबान मुबा।

येशूला आमामेन आलेगदे
मत्ती १२:४६-५०; लूका ८:१९-२१

31 ओच्छे येशूला आमामेन आलेगदे थेरी धोखजी। थेनीगदे मडग्यार राप्सी
येशूदा इयोडबारी कोड म्हिदा पुड्जी। 32 येशूला क्युनोन म्हिदा हुल मुबा
ओच्छे थेनीगदेसे येशूदा “मडग्यार हाडला आमामेन आलेगदे हाडदा
म्हाडबान मुला” भिसी भिजी।

33 येशूसे थेनीगदेदा “डाला आमामेन आलेगदे खाल हिन्ना?” भिसी
सुड्जी। 34 ओच्छे येशूसे हाडला क्युनोन चिबा म्हिगदेदा स्हीबान, “च्यागो,
चुरी मुबा जम्मान डाला आमामेन आलेगदे हिन्ना। 35 तिग्दा भिसम जुन म्हि
परमेश्वरसे म्हन्बा अन्धार भ्रला थेनोन डाला आमा, डाला आडा ओच्छे
डाला आले हिन्ना” भिसी सुड्जी।

ब्लु द्बवाला उखान
मत्ती १३:१-२३; लूका ८:४-१५

4 येशूसे दो:सी समुन्द्रला कुनीरी फेप्सी लोप्बारी छ्याड्जी। थेरी म्हिदा
हुल मुबासे लमा येशू समुन्द्ररी मुबा दोंगा गिकरी धन्ड्यासी लोप्बारी
छ्याड्जी। ओच्छे म्हिदा हुल चा समुन्द्रला कुनीरीक्यार चिजी। 12 येशूसे
थेरी मुबा म्हिगदेदा उखानग्याम ल्हानान ताम लोप्बान चुहड् सुड्जी,
3 “च्यागो, ब्लु द्बवा म्हि गिक ब्लु द्बवारी भ्रजी। 4 थे म्हिसे ब्लु द्बवा धुडरी
कोड ब्लु ग्यामरी परब तजी, ओच्छे थे ब्लु चरा खसी चजी। 5 कोड ब्लु चा
युडबाला घहड मुबा सरी परब तजी, थेरी ल्हानान साप्रा आरेबासे लमा थे
ब्लु योनान फुड्जी। 6 थेतबासेलमा थेला टा नुप्जा निआम्पाड्नी। ओच्छे
धिनीसे क्रोसी थे दोड सिजी। 7 कोड ब्लु चा पुजु झाडरी परब तजी, ओच्छे
थे ब्लु फुड्सी ल्हेबान निजी। ल्हेसी निसै थे पुजु झाडला हापसे लमा थे
दोडला नमरी गेडा आवाड्नी। 8 कोड ब्लु चा ज्यबा सरी परब तसी फुड्जी,
ओच्छे थे दोड ल्हेसी निमा थे दोडला नमरी चा दोब्बर, तेब्बर, चौबरधोना
गेडा रोजी। 9 जुन म्हिदा इयान्बा सेम मुला थेसे इयान्सी घोड।”

10 म्हिदा हुल निमाहेन्से येशूला क्युनोन मुबा म्हिगदेदेन च्युक न्ही
चेलागदेसे थे उखानना अर्थ इयोड्जी। 11 ओच्छे येशूसे थेनीगदेदा चुहड्
भिसी सुड्जी, “एनीगदेदा डाइ म्हिसे था आयाड्बा परमेश्वरला यहुल्साला
ताम धोखम्बा ज्ञान बुद्धि पिन्बा मुला। तर स्हान्दोगदेदा चा डाइ उखानग्याम
जे पाड्बा मुला। 12 तिग्दा भिसम

‘थेनीगदेसे च्याबाम च्यामुला तर आम्राड्हुला
ओच्छे इयान्बाम इयान्मुला तर आघोमुला।
आहिन्सम हाड हाडला पाप ख्लासी परमेश्वरपट्टि दो:सेला मुबा,
ओच्छे परमेश्वरसे थेनीगदेला पाप माफ लसेला मुबा।” 13

ब्लु द्बवा उखानना अर्थ
मत्ती १३:१८-२३; लूका ८:११-१५

13 येशूसे थेनीगदेदा “एनीगदेसे चु उखानला अर्थ आघोसम अर्गु उखानना
अर्थ खाहड् लसी घोला?” भिसी सुड्जी। 14 ब्लु द्बवा म्हि चा परमेश्वरला
बचन थे:ना लबा म्हि हिन्ना। 15 ग्यामरीक्यार परब तबा ब्लुला अर्थ चा चुनोन
हिन्ना, जुन म्हिसे परमेश्वरला बचन इयान्ना तर तुरुन्तन शैतान खसी

† 3:29 लूका १२:१० † 4:1 लूका ५:१-३ † 4:12 यशै ६:९-१०

थेनीगदेदा थे:ना लबा ताम भोर्ला। 16 युडबाला घहडरी परब तबा ब्लुला अर्थ
चा चुनोन हिन्ना, जुन म्हिसे परमेश्वरला बचन थे:मैछ्याम ताड्सी हाडला
सेमरी थान्ना, 17 तर थेनीगदेला विश्वासला टा आरेबासे लमा, थे छिन्ड जे
चिला। ओच्छे परमेश्वरला बचनदा विश्वास लबासे लमा थेनीगदेदा आपत
विपत खमाहेन्से थेनीगदेसे विश्वास लबा खलाला। 18 पुजु झाड न्हडरी परब
तबा ब्लुला अर्थ चा जुन म्हिसे बचन इयान्ना 19 तर थेला सेमरी जम्बुलिडला
धन्दा सुददिन धन सम्पत्तिला लोभसे लमा परमेश्वरला बचनदा गे लआपुड्,
ओच्छे थेला विश्वासग्याम तिगै आरो 20 तर ज्यबा सरी परब तबा ब्लुला अर्थ
चा जुन म्हिसे बचन इयान्सी हाडला सेमरी थान्ना, थेला विश्वाससे दोब्बर,
तेब्बर, चौबरधोना गे लला।

नाडसलला अर्थ
लूका ८:१६-१८

21 येशूसे थेनीगदेदा चुहड् भिसी सुड्जी, “खालैसे नाडसल म्ग्रासी खाट
धिरीनोन आथान ओच्छे फामसे घप्सीनोन आथान। बरु य्हाल तगै भिसी
नोबा ग्लारी थान्ना। 22 थेतबासेलमा ल्हुसैनोन आम्राड्बा स्हे तिगै आरे।
ओच्छे छुम्सी थान्सैनोन आघोबा स्हे तिगै आरे। 23 खालैदा इयान्बा सेम
मुसम थेसे इयान्सी घोड।

24 “एनीगदेसे जुन ताम थे:बा मुला, थे तामरी सेम लउ। तिग्दा भिसम जुन
दप्बा स्हेसे एनीगदेसे दप्पा, थेनोन दप्बा स्हेग्यामसे एनीगदेसे याड्ला।
ओच्छे एनीगदेदा झन ल्हाना पिन्ना। 25 जुन म्हिसे डाइ लोप्बा तामदा सेम
लसी इयान्ना, थेदा डाइ अझ घोना लला। तर डाइ लोप्बा ताम
आइयान्बादा चा थेसे जुन घोबा मुला थे तामएनोन म्हाणा लला।” 26

ल्हेबान निबा ब्लुला उखान

26 येशूसे चुहड् भिसी सुड्जी, “परमेश्वरला यहुल्सा चा म्हि गिकसे बुरी
द्बवा ब्लु हड्बान हिन्ना। 27 ओच्छे थे म्हि म्हेसी चिसै आम्हेर्ना चिसै धिन
म्हुननोन थे ब्लु फुड्सी ल्हेबान निला, तर खाहड् लसी ल्हेजी भिबा ताम थे
म्हिसे था आयाड्। 28 तिग्दा भिसम बुरी ब्लु हाडनोन फुड्सी ल्हेबान
निमाहेन्से दोड दोला, ओच्छे थे दोडरी नम थोन्ना, जमाहेन्से थे नमरी गेडा
वाड्ला। 29 बाली दुड्बा धुड तमैछ्याम थे म्हि खसी बाली खन्ना।” 30

पच्छे ब्लुला उखान

मत्ती १३:३१-३२, ३४-३५; लूका १३:१८-१९

30 येशूसे दो:सी चुहड् भिसी सुड्जी, “डाइ परमेश्वरला यहुल्सादा तिगदेन
छ्याम दाँजब लसे? ओच्छे एनीगदेदा खाहड् लसी घोना लसे? 31 चु मी
घुन्यानरी द्बवा पच्छेला ब्लु हड्बान हिन्ना। जम्बुलिडरी जम्मान भन्दा
जजाबा ब्लु तसैनोन, 32 थे गेडा द्बवामहेन्से ढापदुप न्हडरी जम्मान भन्दा
हाँगा मुबा घेन दोड तला। ओच्छे थे दोडला हाँगारी चरागदे खसी जड स्होसी
चिला।”

33 थेनीगदेसे धोखम्तेधोना येशूसे चुहड्बान उखानगदेग्याम परमेश्वरला
बचन लोप्जी। 34 उखान आसुड्तेधोना थेनीगदेदा येशूसे तिगै ताम आलोप्जी।
तर हाडला चेलागदे जे तबा धुडरी चा जम्मान उखानना अर्थ घोना लमुबा।

येशूसे लाबालुडसरदा म्हाणा लबा
मत्ती ८:१८, २३-२७; लूका ८:२२-२५

35 जमाकुनु ड्यसे येशूसे हाडला चेलागदेदा “लु, य्हाड समुन्द्रला
क्याम्सडपट्टि निड्” भिसी सुड्जी। 36 येशूसे चुहड् सुड्बाहेन्से चेलागदे म्हिदा
हुलदा ख्लासी येशू मुबा दोंगारी क्रै:जी। ओच्छे दोंगा चलब लबान
क्याम्सडपट्टि भोजी। थेनीगदेला दोंगादेन छ्याम छ्याम अर्गु दोंगागदेएनोन
निजी। 37 निबान लमा समुन्द्ररी लाबालुडसर खजी। थे लाबालुडसरसे लमा
समुन्द्रला छाल रे:सी दोंगा डुबब तबारी छ्याड्जी। 38 थे धुडरी येशू दोंगाला

† 4:21 मत्ती ५:१५; लूका ११:३३ † 4:22 मत्ती १०:२६; लूका १२:२ † †
4:24 मत्ती ७:२; लूका ६:३८ † † 4:25 मत्ती १३:१२; २५:२९; लूका १९:२६ †
4:29 योए ३:१३

ग्यापपट्टि खुम लसी स्हिम्बान मुबा। ओच्छे चेलागदेसे “प्रभु, यहाड सिबारी छ्याइजी, हाडदा तिगै वास्ता आरे?” भिसी छिड्जी।

³⁹ जमाहेन्से येशूसे स्हेइसी लाबालुडसरदेन समुन्द्रला छालदा “कुटिसी चिउ” भिसी सुङ्खयाम लाबालुडसर म्हाजी ओच्छे शान्त तजी।

⁴⁰ येशूसे “एनीगदे तिगदा लोड्बा? दान्देधोना एनीगदेदा डाला विश्वास आरे?” भिसी हाडला चेलागदेदा सुङ्जी।

⁴¹ ओच्छे चेलागदे उदेक म्हन्सी लोड्बान, “चु खाल? लाबालुडसरदेन समुन्द्रला छालसेएनोन थेसे कुल्बा ताम ड्यान्बा चीम!” भिसी थेनीगदे हाड हाड न्हडरी ताम लबारी छ्याइजी।

येशूसे म्हडसे स्याप्बा म्हिदा खम्ना लबा

मत्ती ८:२८-३४; लूका ८:२६-३९

5 ओच्छे येशूदेन थेनीगदे गालील समुन्द्रला क्याम्सडपट्टि गेरासेनस † भिबा ग्लारी धोखजी। ² येशू दौंगायाम फप्पैछ्याम म्हडसे स्याप्बा म्हि गिक धुर्साग्याम यार्बान खसी येशूदा स्याप्जी। ³ थे म्हि धुर्सारीक्यार चिमुबा। थेदा तिगै लसीन चुड्बारी आखम्मुबा थेदा च्याल्दासे खीसैनोन ब्लसी यार्मुबा। ⁴ तिगदा भिसम थेदा ल्हानान रेम च्याल्दासे खीसी थान्सेनोन थेसे थे च्याल्दागदे फ्राटफ्रेट टाङ्गुबा। थेतबासेलमा थेदा खालैसे तहरी थान्बारी आखम्मुबा। ⁵ थे धिन म्हुननोन हाडसे हाडदान युडबासे तोसी धुर्सा गडरीक्यार क्रिड्बान भ्रमुबा।

⁶ थेसे थारेडग्यामसेन येशूदा म्हाङ्खयाम यार्बान खसी येशूदा प्या लजी।

⁷ ओच्छे थेसे “जम्मान भन्दा घेन परमेश्वरला झा येशू, हाडसे डादा तिग लबारी छ्याइबा? डाड हाडदा परमेश्वरला मिनरी घान फासी भिला, डादा दुख थापिन्गो” भिसी क्रिड्बान भिजी। ⁸ तिगदा भिसम येशूसे डाच्छान थे म्हिला ल्हडरी मुबा म्हडदा “ए थोन्सी निउ” भिसी सुङ्बा मुबा। ⁹ ओच्छे येशूसे थेदा “एला मिन तिग?” भिसी ड्योडमा, थे म्हडसे “डाला मिन हुल हिन्ना, तिगदा भिसम डनी ल्हानान मुला” भिसी भिजी। ¹⁰ थे म्हडसे येशूदा “डन्दा चु ग्लायाम थाते:गो।” भिसी बिन्ती लजी।

¹¹ थेरी गडरीक्यार द्बला बथान छबान मुबा। ¹² ओच्छे म्हडगदेसे येशूदा “डन्दा द्वागदे न्हडरी वाङ्पुङ्गो” भिसी बिन्ती लजी ¹³ येशूसे वाङ्पुडमाहेन्से म्हडगदे म्हिला ल्हडग्याम थोन्सी द्वागदे न्हडरी वाङ्जी। वाङ्खयाम ओस्पन, हजार न्ही द्बला बथान गडग्याम समुन्दरी छ्योड्सी सिजी।

¹⁴ जमाहेन्से द्वा छबा म्हिगदे यासी शहरदेन नाम्सा नाम्सारी निसी चु ताम थे:ना लजी। ओच्छे जम्मान म्हिगदे तिग तजीम भिसी च्याबारी खजी।

¹⁵ जमाहेन्से थेनीगदे येशू मुबा ग्लारी खजी, ओच्छे थे म्हडला हुलसे स्याप्बा म्हि खम्सी ज्यना लसी क्वान क्वान्सी चिबा म्हाङ्सी थेनीगदे लोड्जी।

¹⁶ म्हडसे स्याप्बा म्हिदेन द्वागदेदा तिग तिग तजी भिबा ताम म्हाङ्बा म्हिगदेसे थेरी च्याबारी खबा म्हिगदेदा पाङ्जी। ¹⁷ जमाहेन्से थेनीगदेसे येशूदा “चु ग्लायाम फेपो” भिसी बिन्ती लबारी छ्याइजी।

¹⁸ येशू दौंगारी क्रे:बारी छ्याइमा थे म्हडसे स्याप्बा म्हिसे “डाएनोन हाडदेन छ्याम निसे” भिसी बिन्ती लजी। ¹⁹ तर येशूसे हाडदेन छ्याम खआपुङ्ना “ए हाडला दिमरी निसी एदा परमेश्वरसे उन्बा दयादेन परमेश्वरसे एला लागिरी तिग तिग लजी, थे तामगदे एसे हाडला ह्गोदेदा थे:ना लउ” भिसी सुङ्जी। ²⁰ ओच्छे थे निसी डेकापोलिस भिबा ग्ला नाडनोन येशूसे हाडला लागिरी लबा उदेकला गेला बारेरी पाङ्सी भ्रजी, चु ताम थे:सी नाम्साला म्हिगदे उदेक म्हन्जी।

याइरसला झामेदेन का निबा बेथासे स्याप्बा म्हाङ्मेमे खम्बा

मत्ती ९:१८-२६; लूका ८:४०-५६

²¹ दो:सी येशू दौंगारी क्रे:सी समुन्द्रला क्याम्सडपट्टि फेप्जी। ओच्छे थेला क्युर्सीन म्हिला हुल पोप तजी। ²² थेनोन धुडरी यहूदीगदे हुप तबा दिमला याइरस मिन लबा नेता गिक थेरी धोखजी। थेसे येशूदा म्हाङ्खयाम येशूदा

† “गेरासेनस” भिबादा कोड कोड ग्रीक बाइबलरी गदरा भिसी भिबा मुला। गेरासेनस भिबादेन गदरा भिबा ग्ला गिकनोन हिन्ना।

प्या लसी, ²³ “डाला झामे आखम्ना सिबारी छ्याइबा मुला, हाड फेप्खसी थेदा थुर्सी पिन्गो। ओच्छे थे खम्मी” भिसी बिन्ती लजी।

²⁴ थेतबासेलमा येशू याइरसदेन छ्याम फेप्जी ओच्छे म्हिला हुलएनोन येशूला लिच्छा भ्रजी, म्हिला हुलसे लमा येशूदा तोर हुड मार हुड लजी। ²⁵ थे म्हिला हुल न्हडरी का निबा बेथासे स्याप्सी च्युक न्ही दिड तबा म्हाङ्मेमे गिक मुबा। ²⁶ थेसे हाडला मुदेबा धन सम्पत्ति खर्च लसी डाक्टरगदेदा च्यापुङ्जी। तर खम्ला भिमाम झन डाच्छाला भन्दा सारो तसी निजी।

²⁷ थेसे येशूला बारेरी थे:माहेन्से थे म्हिला हुल न्हडरी वाङ्सी ग्यापग्याम खसी येशूला क्वान थुर्जी। ²⁸ तिगदा भिसम थेसे “डाड येशूला क्वान थुर्बारी जे म्याङ्सम डा खम्ला” भिसी म्हन्बा मुबा। ²⁹ थेसे येशूला क्वान थुर्मेछ्याम थेला का निबा बेथा म्हाजी भिसी थेसे तुरुन्तन था याङ्जी। ³⁰ ओच्छे येशूसे हाडला ल्हडग्याम तुरुन्तन शक्ति थोन्बा था याङ्सी म्हिला हुलपट्टि दो:सी, “खाल्से डाला क्वान थुर्जी?” भिसी ड्योडजी।

³¹ चेलागदेसे येशूदा भिजी, “चुदेला म्हिला हुलसे तोर हुड मार हुड लबा स्हीना स्हीनान दो:सी हाड ‘डादा खाल्से थुर्जी’ भिसी सुङ्बान मुला।”

³² डादा थुर्बा खाल भिसी येशूसे क्युर्सीन च्याबारी छ्याइजी। ³³ ओच्छे थे का निबा बेथासे स्याप्बा म्हाङ्मेमेसे येशूला क्वान थुर्मा हाडदा तिग तजी भिबा था तसी लोड्सी फितफित धर्बान येशूला डाच्छापट्टि प्या लजी। ओच्छे येशूदा जम्मान सत्य ताम पाङ्जी। ³⁴ येशूसे थेदा “झामे, एला विश्वाससे लमा ए खम्बा मुला। दाहेन्से ए दुक्क तसी निउ, एला रोग म्हाजी” भिसी सुङ्जी।

³⁵ येशूसे ताम लबान लबा धुडरी याइरसला दिमग्याम म्हिगदे खसी, “हाडला झामे सिजी, दाहेन्से गुरुदा दुख थापिन्गो” भिसी भिजी।

³⁶ तर येशूसे थेनीगदेला तामदा थेगो आलना, याइरसदा “थालोङ्गो, एसे विश्वास जे लउ” भिसी सुङ्जी। ³⁷ ओच्छे येशूसे पत्रुस, याकूबदेन याकूबला आले यूहन्नादा बाहेक स्हान्दोदा हाडदेन छ्याम खआपुङ्नी। ³⁸ थेनीगदे याइरसला दिमरी फेप्खमा येशूसे थेरी मुबा म्हिगदे क्राबा क्रिड्बादेन हल्ली खल्ली लसी चिबा म्हाङ्जी। ³⁹ येशू दिम न्हडरी वाङ्सी, थेनीगदेदा “तिगदा एनीगदे चुहड् लसी क्राबा क्रिड्बादेन हल्ली खल्ली लसी चिबा? माइ सिबा आरे, म्हेसी चिबा मुला” भिसी सुङ्जी।

⁴⁰ तर थेनीगदेसे येशूला तामदा खिसी लसी डे:जी। ओच्छे येशूसे थेनीगदे जम्मादान मडग्यार ते:सी माइला आबादेन आमा ओच्छे हाडला चेलागदेदा छ्याम भोर्सी माइ मुबा ग्लारी फेप्जी। ⁴¹ ओच्छे येशूसे थे माइला या चुङ्सी, “तालिता कुम,” भिसी सुङ्जी। चु भिबा चा “माइ रे:गो” भिबा हिन्ना।

⁴² येशूसे चुहड् सुङ्खयाम थे माइ डोड रे:सी क्यारमार भ्रबारी छ्याइजी। थे माइ च्युक न्ही दिडला मुबा। चु म्हाङ्सी थेनीगदे उदेक म्हन्जी। ⁴³ येशूसे थेनीगदेदा “च्यागो, चु ताम खालैसे था थायाङ्गो।” ओच्छे थे माइदा चा “तिगै चबा रहे पिन्गो” भिसी सुङ्जी।

नासरतरी येशूदा पत्याब आतबा

मत्ती १३:५३-५८; लूका ४:१६-३०

6 येशू थे ग्याम थोन्सी हाडलान नाम्सारी फेप्जी। ओच्छे थेला चेलागदेएनोन थेदेन छ्याम निजी। ² ब्लप्बा न्हबा धिनकुनु येशूसे यहूदीगदे हुप तबा दिमरी लोप्बारी छ्याइजी। थेसे लोप्बा म्हाङ्सी ल्हानान म्हिगदे उदेक तजी, “चु म्हिसे चु जम्मान खानडग्याम याङ्जी? चुदा पिन्बा चु ज्ञान बुद्धि खाहड्बा हिन्ना? चुला याग्यामसे खाहड्बा उदेकला गे तबा? ³ तिग चु मरियमला झा, याकूब, योसेफ, यहूदादेन सिमोनला ज्योज्यो सिकर्मी आहिन? तिग चुला आडागदेएनोन यहाडदेन छ्याम आरे?” भिसी येशूला ताम पत्याब आतनी।

⁴ येशूसे थेनीगदेदा “अगमवक्तादा जम्मान ग्लारी मान लला, तर हाडला नाम्सारीदेन हाडला म्हिगदे ओच्छे हाडला दिमरी बाहेक अर्गु खजिबै ग्लारी निसैनोन मान लला” भिसी सुङ्जी। ⁵ थेरी येशूसे कोड कोड आखम्बा म्हिगदेथोरी हाडला या थान्सी थेनीगदेदा खम्ना लजी। तर थेनीगदेला विश्वास आरेबा म्हाङ्सी अर्गु उदेकला गे आलनी। ⁶ येशू थेनीगदेसे विश्वास

आलबा म्राड्सी उदेक म्हन्जी। थेतबासेलमा नाम्सा नाम्सारी लोप्वारी फेप्जी।

येशूसे हाडला च्युक न्ही चेलागदेदा पुडबा

मत्ती १०:१, ५-१५; लूका ९:१-६

7 थे धुडरी येशूसे हाडला च्युक न्ही चेलागदेदा ड्योड्सी थेनीगदेदा म्हड ताप्ला अधिकार पिन्सी गोर न्ही न्ही लसी पुड्जी। 8 येशूसे थेनीगदेदा चुहड् भिसी कुल्जी, “एनीगदेसे ग्यामला लागिरी कडी बाहेक तिगै चबा स्हे, टाडगा, झोला थापुडगो। 9 तर लखम क्वान्गो, ओच्छे हाडला लागिरी पोबा क्वान थापुडगो। 10 दोःसी येशूसे थेनीगदेदा चुहड् भिसी सुड्जी, “एनीगदे खजिबै दिमरी वाड्हाहेन्से थे नाम्साग्याम थोन्सी आनितेधोना एनीगदे थे दिमरीन चिउ। 11 चुदे खजिबै ग्लारी एनीगदेदा मान आलनी। ओच्छे एनीगदेसे पाड्बा ताम आड्यान्नी भिसम, एनीगदे थे ग्लायाम थोन्बा धुडरी दाहेन्से डन्से लतोःबा गे लसी जिन्जी। एनीगदेसे तिग लतोःबा लउ भिसी काडला धुलु खर्सी पिन्गो।” †

12 जमाहेन्से थेला चेलागदे थेग्याम थोन्सी निसी म्हिगदेदा “हाड हाडला पाप ख्लासी परमेश्वरपट्टि दोःगो” भिसी पाड्जी। 13 थेनीगदेसे ल्हानान म्हिला ल्हुड्ग्याम म्हड ताप्ली। ओच्छे ल्हानान आखम्बा म्हिगदेदा छयुगु फोर्सी प्रार्थना लसी खम्ना लजी। ††

बत्तिस्मा पिन्बा यूहन्ना सिबा

मत्ती १४:१-१२; लूका ९:७-९

14 येशूसे लबा उदेकला गेला बारेरी हेरोद ग्लेसे थेःजी, तिगदा भिसम जम्मान ग्लारी येशूला मिन थेःमुबा। गाते म्हिसे मी “बत्तिस्मा पिन्बा यूहन्ना सिबाग्याम सोसी खजीम, थेतबासेलमान थेसे चुहड्बा उदेकला गेगदे लबा हिन्ना” भिसी भिमुबा। 15 तर स्हान्दोगदेसे, “चु एलिया हिन्ना” भिसी भिजी। ओच्छे अझ स्हान्दोगदेसे, “चु म्हि मी ओन्माला अगमवक्तागदे हड्बान अगमवक्ता गिक हिन्ना” भिसी भिजी। †

16 तर हेरोदसे चु ताम थेःसी, “चु म्हि डाड साड्पुड्बा यूहन्ना हिन्ना, थेनोन सिबाग्यामसे सोसी खजीम” भिसी भिजी। 17 तिगदा भिसम डाच्छा हेरोद हाडसेन यूहन्नादा चुड्पुड्जी थेदा इयाल्खानरी थान्बा मुबा। हेरोदसे हाडला आले फिलिपला मिड हेरोदियासदेन छ्याम ब्याह लबासे लमा थेसे यूहन्नादा इयाल्खानरी थान्बा मुबा। 18 तिगदा भिसम यूहन्नासे हेरोददा “हाडसे आले चाडदेन छ्याम ब्याह लबा ठीक आहिन” भिसी भिमुबा। ††19 थेतबासेलमा हेरोदियाससे यूहन्नाथोरी ईख थान्सी थेदा साड्बारी म्हाड्मुबा तर खम्बा आरेबा। 20 तिगदा भिसम यूहन्ना परमेश्वरसे म्हन्बा अन्खार भ्रबा म्हिदेन परमेश्वरला लागिरी फेसी थान्बा म्हि भिसी हेरोददा था मुबा। थेतबासेलमा यूहन्नादेन छ्याम लोड्सी थेदा जोगब लसी थान्मुबा। यूहन्नासे लोप्ला म्राड्सी थेला सेम क्रामुबा। तसैनोन सेम लसी ड्यान्मुबा।

21 हेरोदियाससे हेरोद न्हबा धिनदा ढन्सी लबा भोजकुनु ज्यबा मौका याड्जी। हेरोदसे हाड न्हबा धिनदा ढन्सी घेन पदरी मुबा म्हिगदे, सिपाहीला कप्तानगदेदेन गालील नाम्साला गन्बा म्हिगदेदा ड्योड्सी भोज पिन्जी। 22 थे धुडरी हेरोदियासला हाडलान झामे थेरी खसी स्हज्जी। थे स्हबा म्राड्सी हेरोद ग्लेदेन थेला डोन्बोगदे ल्हानान ताड्जी। हेरोद ग्लेसे थे माड्दा “एदा तिग तोःबा डादा हीगो, थे डाड् एदा पिन्ना” भिसी भिजी। 23 ओच्छे हेरोद ग्लेसे ग्रान फासी, “एदा डाला गडसल यहुल्सा भिसै पिन्ना” भिसी भिजी।

24 ओच्छे थे मड्ग्यार थोन्सी हाडला आमदा डाड तिग हीगो भिसी, ड्योड्मा, “बत्तिस्मा पिन्बा यूहन्नाला थोबो हीगो” भिसी थेला आमासे भिजी। 25 चुहड् भिमैछ्याम थे माड् ग्ले मुबा ग्लारी निसी, “दान्दे डादा हाडसे बत्तिस्मा पिन्बा यूहन्नाला थोबो खार्बारी भउ” भिसी भिजी। 26 थेहड् भिमाहेन्से ग्लेला सेमरी दुख इहम्जी, तर ओतेला डोन्बोला ओन्छाडरी ग्रान फासी पाड्बा तामदा थाबारी आखम्नी। 27 थेतबासेलमा थेसे तुरुन्तन हाडला सिपाही गिकदा “बत्तिस्मा पिन्बा यूहन्नाला थोबो थासी भउ” भिसी कुल्जी। ओच्छे थे सिपाही इयाल्खानरी निसी यूहन्नाला थोबो थाजी।

28 थासी भसी थे माड्दा खार्बारी युसी पिन्जी। ओच्छे थे माड्से थेला आमदा

पिन्जी। 29 चु ताम थेःसी यूहन्नाला चेलागदे खसी थेला लास भोर्सी धुर्सारी थान्जी।

येशूसे हजार डा म्हिगदेदा चबा स्हे पिन्बा

मत्ती १४:१३-२१; लूका ९:१०-१७; यूहन्ना ६:१-१३

30 येशूसे पुड्बा जम्मान मुल चेलागदे दोःसी खसी येशू मुबा ग्लारी पोप तजी। थेनीगदेसे लबा गेदेन लोप्सी पिन्बा तामगदे येशूदा पाड्जी। 31 येशूसे थेनीगदेदा “एनीगदेएनोन सुनसान ग्लारी खसी ब्लाप्ला न्हउ” भिसी सुड्जी। तिगदा भिसम थेरी खबा निबा म्हिगदे ल्हानान मुबासे लमा थेनीगदेदा चबारी सुत्तै फुर्सत आरेबा। 32 थेतबासेलमा थेनीगदे दोंगारी क्रेःसी सुटुक्क सुनसान ग्लारी फेप्जी। 33 तर ल्हानान म्हिगदेसे थेनीगदे निबान लबा म्राड्जी। थेतबासेलमा थेनीगदे फेप्गे लबा ग्ला था याड्सी, नाम्सा नाम्साला म्हिगदे याबान थेनीगदे फेप्ला ग्लापट्टि निजी। ओच्छे थेनीगदे भन्दा डाच्छा धोजी। 34 येशू दोंगाग्याम फाप्ला धुडरी ल्हानान म्हिला हुल म्राड्सी थेदा दया रेःजी। तिगदा भिसम थे म्हिगदे गोठालो आरेबा ग्युगदे हड्बा मुबा। येशूसे थे म्हिगदेदा ल्हानान ताम लोप्वारी छ्याड्जी। †

35 ड्यसे तमाहेन्से थेला चेलागदे थे मुबा ग्लारी खसी थेदा “दाहेन्से ड्यसे तसी जिन्जी, चु सुनसान ग्लारी तिगै आरे। 36 थेतबासेलमा चु म्हिगदेदा पुड्गो। थेनीगदे चु क्यारमारला नाम्सारी निसी चबा स्हेगदे ग्लुसी चगै” भिसी भिजी। 37 तर येशूसे थेनीगदेदा “एनीगदेसेन चुगदेदा चबा स्हे पिन्गो” भिसी सुड्जी। तर थेनीगदेसे येशूदा “डन्से ग्यार्जा न्ही म्हुडला डबलसे गेड ग्लुसी थेनीगदेदा चबारी छयोला?” भिसी भिजी।

38 येशूसे थेनीगदेदा “एनीगदेदेन छ्याम गेड गाते मुला? निसी च्यागो” भिसी सुड्जी। जमाहेन्से थेनीगदेसे च्यासी, “गोर डा गेडदेन गोर न्ही तार्डा मुला” भिसी भिजी।

39 जमाहेन्से येशूसे म्हिगदेदा पाडरी लाम लसी चिउ भिसी कुल्जी। 40 ओच्छे म्हिगदे ग्यार्जा ग्यार्जादेन बोगल न्हीसे च्युड् च्युड्ला लाम लसी पाडरी चिजी। 41 येशूसे थे गोर डा गेडदेन गोर न्ही तार्डा थोसी स्वर्गपट्टि स्हीसी परमेश्वरदा धन्यवाद पिन्जी। ओच्छे थे गोर डा गेड क्युड्सी म्हिगदेदा भो लसी पिन्गो भिसी चेलागदेदा पिन्जी। ओच्छे गोर न्ही तार्डाएनोन जम्मान म्हिगदेदा भो लसी पिन्जी। 42 ओच्छे जम्मान म्हिगदेसे ग्रेन्ना चजी। 43 जमाहेन्से चेलागदेसे लेड्बा गेडदेन तार्डा दुड्मा च्युक न्ही सोली तजी। 44 थेरी चबा हेम्फेबेगदे हजार डा मुबा।

येशू समुन्द्रथोरी भ्रबा

मत्ती १४:२२-३६; यूहन्ना ६:१५-२१

45 ओच्छे येशूसे तुरुन्तन हाडला चेलागदेदा दोंगारी क्रेःसी क्यामसड् बेथसेदा नाम्सारी हाड भन्दा डाच्छा पुड्जी। थे धुडरी येशूसे चा म्हिला हुलदा पुड्बान लजी। 46 ओच्छे थेनीगदेदा पुड्माहेन्से येशू गडपट्टि प्रार्थना लबारी फेप्जी। 47 ड्यसे तमा दोंगा समुन्द्रला गुडरी मुबा, ओच्छे येशू चा गिकजेन समुन्द्रला कुनीरी मुबा। 48 थेसे चेलागदेदा दोंगा चलब लबारी गाहो तबा म्राड्जी। तिगदा भिसम लाबा उल्टोग्यामसे खबा मुबा। स्होला तीन बजेरीक्यार येशू समुन्द्रथोरी भ्रबान थेनीगदेपट्टि फेप्लज्जी, ओच्छे थेनीगदेदा ख्लासी डाच्छा फेप्ले लमा, 49 थेनीगदेसे येशूदा समुन्द्रथोरी भ्रबान लबा म्राड्सी म्हड मुनम भिसी थेनीगदे लोड्सी क्रिड्जी। 50 तिगदा भिसम येशूदा म्राड्सी जम्मान लोड्बा मुबा। तर तुरुन्तन येशूसे थेनीगदेदा “भड लउ, डानोन हिन्ना, थालोड्जी” भिसी सुड्जी। 51 ओच्छे हाडला चेलागदेदेन छ्याम दोंगारी क्रेःजी। जमाहेन्से लाबालुडसर म्हाजी। ओच्छे थेनीगदे ल्हानान उदेक तजी। 52 तिगदा भिसम थेनीगदेला सेम कोड्बासे लमा येशूसे हजार डा म्हिगदेदा गेड पिन्बा म्राड्सीएनोन थेला अर्थ घोबा आरेबा।

53 थेनीगदे समुन्द्र थासी गनेसरेत भिबा ग्लारी धोखमाहेन्से दोंगा समुन्द्रला कुनीरी थान्सी, 54 दोंगाग्याम फाप्लैछ्याम म्हिगदेसे येशूदा डोसेजी। 55 ओच्छे थेनीगदे क्यारमारला नाम्सारी निसी येशू फेप्लज्जी भिसी थेःना लजी। जमाहेन्से म्हिगदेसे आखम्बा म्हिगदेदा तीबा नान्बादेन छ्यामनोन येशू मुबा

† 6:11 लूका १०:४-११; मुल १३:५१ †† 6:13 याक् ५:१४ † 6:15 मत्ती १६:१४; मर्क ८:२८; लूका ९:१९ †† 6:18 लूका ३:१९-२०

‡ 6:34 गन्ती २७:१७; १ राजा २२:१७; २ इति १८:१६; इज ३४:५; मत्ती ९:३६

ग्लारी भबारी छ्याइजी। ⁵⁶ जुन जुन ग्लारी येशू फेज्जी, थे ग्लारी म्हिगदेसे आखम्बा म्हिगदेदा येशूला क्वान जे भिसै, थुर्पुङ्गो भिसी बिन्ती लजी। ओच्छे येशूला क्वान थुर्बा जति जम्मान खम्जी।

रिमठिमला बारेरी लोष्वा ताम
मत्ती १५:१-२०

7 यरूशलेमग्याम खबा फरिसीदेन यहूदी धर्मगुरुगदे येशूला क्युनोन पोप तजी। ² थेनीगदेसे येशूला कोइ कोइ चेलागदेसे या आखुना चबा म्राइजी। ³ फरिसीगदेदेन यहूदीगदेला आखे म्हमेला रिमठिम अन्धार या आखुतेधोना चबारी आतबा मुबा। ⁴ चुदे जे आहिन बजारग्याम खमाहेन्से नुहाब आलतेधोना आचमुबा। आखे म्हमेला चु भन्दा ल्हानान रिमठिम तेन्मुबा ओच्छे खोरेगदे, ताडगदेदेन काँसला ताडगदे म्याप्बा रिमठिम मुबा।

⁵ ओच्छे फरिसीगदेदेन यहूदी धर्मगुरुसे येशूदा “हाडला चेलागदे तिगदा आखे म्हमेला रिमठिम अन्धार आभ्रबा? ओच्छे या आखुनान चबा?” भिसी इयोइजी।

⁶ थेतबासेलमा थेनीगदेदा चुहइ भिसी सुइजी, “एनीगदे हइबा कट्टी म्हिगदेला लागिरी यशैया अगमवक्तासे भिबा ताम ढिक्वा मुला, ‘चु म्हिगदेसे सुडसे जे डादा मान लमुला, तर सेमहेन्से चा मान आलमुला।

⁷ ओच्छे एनीगदेसे डादा तेन्बाम तेन्मुला तसैनोन परमेश्वरसे कुल्बा तामदा भन्दा म्हिसे स्होबा रिमठिमदा घेन म्हन्मुला।’[†]

⁸ एनीगदेसे परमेश्वरसे कुल्बा ताम ख्लासी म्हिगदेला रिमठिम तेन्बा मुला।”

⁹ दोःसी येशूसे थेनीगदेदा चुहइ भिसी सुइजी, “एनीगदे हाडला रिमठिम तेन्बाला लागिरी परमेश्वरसे कुल्बा ताम खलाबा एनीगदे खाहइबा छट्टु? ¹⁰ तिगदा भिसम मोशासे भिबा मुला, ‘एसे हाडला आबा आमादा मान लउ,’ ओच्छे ‘जुन म्हिसे हाडला आबा आमादा बिरोध लसी नइबा ताम लला थेदा चा साइनोन तोःला’ भिसी सुइबा मुला। ^{††11} तर एनीगदेसे चा ‘जुन म्हिसे हाडला आबा आमादा पिन्तोःबा स्हे परमेश्वरदा फुल्बा मुला, थेसे हाडला आबा आमादा मान लआतोः’ भिसी पाइमुला। ¹² थेतबासेलमा एनीगदेला तामग्यामसेन म्हिगदेदा थेन्ना आबा आमादा तिगै पिनआपुइबा हइबान हिन्ना। ¹³ चुहइ लसी एनीगदे हाडला रिमठिम अन्धार चा भ्रमुला। तर परमेश्वरला बचनदा चा तिगै गे आखेल्बा भिसी म्हन्मुला। चुहइबा गे एनीगदेसे ल्हानान लमुला।”

म्हिदा चोखो तना लबा स्हेगदे
मत्ती १५:१०-२०

¹⁴ दोःसी येशूसे म्हिला हुलदा हाड मुबा ग्लारी इयोइसी चुहइ भिसी सुइजी, “डाइ पाइबा ताम तिग चीम भिसी एनीगदेसे घोबारी म्हाइगो। ¹⁵ खजिबै चबा स्हेसे म्हिदा न्होइना लबारी आखम। तर म्हिला सेमग्याम थोन्बा तामसे जे म्हिदा न्होइना लमुला। ¹⁶ जुन म्हिदा इयान्बा सेम मुला थेसे इयान्सी घोउ।”[‡]

¹⁷ येशू म्हिगदेदा ख्लासी दिम न्हडरी वाङ्गाहेन्से थेला चेलागदेसे “हाडसे सुइबा ताम इन्दा घोना लसी पिन्गो” भिसी भिजी। ¹⁸ जमाहेन्से येशूसे हाडला चेलागदेदा चुहइ भिसी सुइजी, “दान्देधोना अझ एनीगदेसे घोबा आरे? एनीगदेदा था आरे? म्हिला सुडग्याम न्हडरी वाइबा स्हेसे म्हिदा न्होइना आल। ¹⁹ तिगदा भिसम चबा स्हे मी सेम न्हडरी आवाइना फो न्हडरी वाइला ओच्छे फो न्हडसेनोन मडग्यार थोन्ना।” चुहइ लसी येशूसे जम्मान चबा स्हे चबारी तला भिसी हाडला चेलागदेदा घोना लसी पिन्जी।

²⁰ येशूसे दोःसी चुहइ भिसी सुइजी, “म्हिला सेम न्हडग्याम मडग्यार थोन्बा तामसे म्हिदा न्होइना लमुला। ²¹ तिगदा भिसम म्हिला सेमग्यामसेन नइबा म्हन्बा, ब्रेल्सी भ्रबा, य्हो लबा, म्हि साइबा, ²² म्हिला मिडडेन छ्याम ब्रेल्सी भ्रबा, लोभ लबा, नइबा गे लबा, ठगब लबा, सुडरी जे ताम खजी थेनोन पाइसी भ्रबा, डाह लबा, म्हिला तामगन लबा, डा हइबा खालै आरे

[†] 7:7 यशै २९:१३ ^{††} 7:10 प्रस्था २०:१२; २१:१७; व्यव ५:१६; लेवी २०:९
[‡] चु पदला ताम चा ल्हानान हइबा ग्रीक बाइबलरी भिबा आरे।

भिसी भ्रबा, मूर्ख गे लबा चु जम्मान तामगदे थोन्मुला। ²³ म्हिला सेमग्याम थोन्बा चु जम्मान नइबा तामसेन म्हिगदेदा न्होइना लमुला।”

अर्गु य्हलला मिडम्हेमेला विश्वास
मत्ती १५:२१-२८

²⁴ जमाहेन्से येशू थेग्याम टुरोस भिबा ग्लापट्टि फेज्जी। ओच्छे खालैसे था थायाङ्गै भिसी दिम गिकरी वाइजी तसैनोन म्हिगदेसे था याइजी। ^{‡25} थेनोन धुडरी मिडम्हेमे गिकसे येशूला बारेरी थेःमैछ्याम येशू मुबा ग्लारी खसी येशूदा पया लजी। थे मिडम्हेमेला झामेदा म्हडसे स्याप्बा मुबा। ²⁶ थे मिडम्हेमे सिरिया य्हल्साला फोनिके भिबा नाम्पारी न्हबा मुबा। थे अर्गु य्हलला मिडम्हेमे मुबा। थेसे “डाला झामेला ल्हुइग्यामसे म्हड ताप्सी पिन्गो” भिसी येशूदा बिन्ती लजी। ²⁷ तर येशूसे “डाच्छा हाडला कोलागदेदा मेन्ना लतोःला, हाडला कोलागदेला गेड ब्यन्सी नगीदा पिन्बा ठीक आहिन” भिसी सुइजी। ²⁸ ओच्छे थे मिडम्हेमेसे “हिन्ना प्रभु, तसैनोन कोलागदेसे चबान लमा ताइबा भ्राइभुइ नगीसेनोन चम्याङ्गुला” भिसी भिजी। ²⁹ येशूसे थे मिडम्हेमेदा “एसे चुहइ भिबासे लमा एला झामेला ल्हुइग्याम म्हड थोन्सी निसी जिन्बा मुला। दाहेन्से ए दिमरी निउ” भिसी सुइजी। ³⁰ थे मिडम्हेमे दिमरी धोमा झामेला ल्हुइग्याम म्हड थोन्सी निसी जिन्बा मुबा, ओच्छे झामे चा खाटरी म्हेसी चिबा मुबा।

नाब्यड आथेःबा खाले म्हि खम्बा

³¹ येशू टुरोस भिबा ग्लाग्याम थोन्सी सीदोन ओच्छे डेकापोलिस तबान गालील समुन्दरी फेज्जी। ³² थेरी म्हिगदेसे नाब्यड आथेःबा खाले म्हिदा येशू मुबा ग्लारी भसी, “थेदा थुर्सी खम्ना लपिन्गो” भिसी बिन्ती लजी। ³³ येशूसे थे म्हिदा म्हिला हुलग्याम जजाकी क्याथाड भोसी थेला नाब्यड न्हीरी या जुम्बी झाइजी। ओच्छे सरी थो स्वासी यासे थेला लेरी थुर्जी। ³⁴ जमाहेन्से येशूसे स्वर्गपट्टि स्हीबान सा न्हसी, “इप्फाता” भिसी सुइजी। चु भिबा चा “ठोङ्गो” भिबा हिन्ना। ³⁵ चुहइ भिमैछ्याम थे म्हिदा नाब्यड थेःजी ओच्छे थेसे ज्यना लसी ताम पाइबारी छ्याइजी। ³⁶ येशूसे थेनीगदे जम्मादान “चु ताम खालैदा थापाङ्गो” भिसी कुल्जी। तर जति जति चु ताम खालैदा थापाङ्गो भिसी कुल्जी, इन ओतेन म्हिगदेसे पाइबान भ्रजी। ³⁷ चु ताम थेःबागदेसे उदेक म्हन्सी, “येशूसे लबा जम्मान गे ज्यबा मुला। थेसे नाब्यड आथेःबा खाले म्हिदाएनोन खम्ना लमुला” भिसी भिबारी छ्याइजी।

येशूसे हजार ब्लि म्हिदा चबा स्हे पिन्बा
मत्ती १५:३२-३९

8 तिगै धिन लिच्छा दोःसी म्हिला हुल पोप तजी। थेनीगदेदेन छ्याम चबा स्हे तिगै आरेबासे लमा येशूसे हाडला चेलागदेदा इयोइसी, ² “चु म्हिगदेदा म्राइसी डादा दया रेःजी। तिगदा भिसम चुगदे डेदेन छ्याम भ्रबा तिनी सोमरे तजी। ओच्छे चुगदेदेन छ्याम चबा स्हे तिगै आरे। ³ चु म्हिगदेदा फोइथाननोन दिमरी पुइजी भिसम ग्यामरी बिहोस तला। तिगदा भिसम कोइ कोइ म्हिगदे ल्हानान थारेडग्याम खबा मुला” भिसी सुइजी।

⁴ जमाहेन्से चेलागदेसे येशूदा “चुहइबा तिगै आयाइबा ग्लारी चु म्हिगदेदा खानडग्याम गेड भसी ख्वासे?” भिसी भिजी। ⁵ येशूसे थेनीगदेदा “एनीगदेदेन छ्याम गेड गाते मुला?” भिसी इयोइमा, थेनीगदेसे “इन्देन छ्याम गोर निस गेड मुला” भिसी भिजी।

⁶ जमाहेन्से येशूसे थेरी मुबा म्हिला हुलदा पाडरी चिपुइजी। ओच्छे थेसे गोर निस गेड थोसी परमेश्वरदा धन्यवाद पिन्सी गेड क्युइसी चेलागदेदा भो लसी पिन्गो भिसी सुइजी, ओच्छे चेलागदेसे म्हिगदेदा भो लसी पिन्जी। ⁷ थेनीगदेदेन छ्याम जजाबा तार्डागदेएनोन मुबा। येशूसे तार्डाला लागिरीनोन धन्यवाद पिन्सी चेलागदेदा भो लपुइजी। ⁸ ओच्छे म्हिगदेसे मेन्ना चजी। जमाहेन्से चेलागदेसे लेइबा गेडदेन तार्डा दुइमा सोली निस तजी। ⁹ थेरी गेड चबा म्हिगदे हजार ब्लि ते मुबा। येशूसे म्हिला हुलदा पुइसी, ¹⁰ हाडला चेलागदेदेन छ्याम दौंगारी क्रेःसी दलमनुथा भिबा ग्लारीक्यार फेज्जी।

^{‡†} कोइ कोइ ग्रीक बाइबलरी “टुरोसदेन सीदोन” भिसी भिबा मुला।

फरिसीगदेसे उदेकला चिनु म्हाइबा
मत्ती १६:१-४

11 फरिसीगदे येशू मुबा ग्लारी खसी चुहड् भिसी ताम लबारी छयाइजी। ओच्छे येशूला सेम च्याबान, “उन्दा स्वर्गला चिनु गिक उन्गो” भिसी भिजी।^{†12} चु ताम थे:सी येशूसे सा न्हसी, “एनीगदेसे डाला ताम इयान्गो, दान्देल्ला म्हिगदेसे तिग्दा चिनु म्हाइबा? तर डाइ दान्देल्ला म्हिगदेदा तिगै चिनु आउन” भिसी सुड्जी।^{††13} ओच्छे थेनीगदेदा ख्लासी दौंगारी क्रै:सी येशू क्याम्सडपट्टि फेज्जी।

येशूसे फरिसीदेन हेरोदसे लबा लुसीला तामला बारैरी लोष्बा
मत्ती १६:५-१२

14 दौंगारी क्रै:सी समुन्द्रला क्याम्सडपट्टि निबा धुइरी चेलागदेसे गेड भोबारी म्ले:बा मुबा। थेनीगदेदेन छयाम गेड गिक जे मुबा।¹⁵ ओच्छे येशूसे थेनीगदेदा “च्यागो, एनीगदे फरिसीदेन हेरोद ग्लेला खमीरय्याम होशियार तसी चिउ” भिसी सुड्जी।¹⁶ तर चेलागदेसे चा “म्हाडदेन छयाम गेड आरेबासे लमा येशूसे चुहड् भिसी सुड्बा हिन्ना” भिसी ह्राड ह्राड न्हडरी ताम लबारी छयाइजी।

17 चेलागदेसे चुहड् लसी ताम लबा था याइसी येशूसे थेनीगदेदा चुहड् भिसी सुड्जी, “एनीगदे गेड आरे भिसी तिग्दा ताम लसी चिबा? एनीगदेसे अझ घोबा आरे? एनीगदेला सेम कोडबान मुला? 18 मी मुसैनोन एनीगदेसे तिग्दा आम्राड्बा? नाब्यड मुसैनोन तिग्दा आथे:बा? अझ एनीगदेसे ढन्बा आरे? ^{††19} डाइ गोर डा गेडसे हजार डा म्हिगदेदा ख्वामा एनीगदेसे लेड्बा गेड गाते सोली दुड्बा मुबा?” थेनीगदेसे “च्युक न्ही सोली” भिसी भिजी।²⁰ ओच्छे “डाइ गोर निस गेडसे हजार ब्लि म्हिगदेदा ख्वामा एनीगदेसे लेड्बा गेड गाते सोली दुड्मुबा?” भिसी येशूसे इयोइमा, थेनीगदेसे “सोली निस” भिसी भिजी।²¹ जमाहेन्से येशूसे थेनीगदेदा “थेहड् भिसम अझ एनीगदेसे तिग्दा आघोबा?” भिसी सुड्जी।

येशूसे मी आम्राड्बा म्हेला मी म्राड्ना लबा

22 येशू ह्राडला चेलागदेदेन छयाम बेथसेदा भिबा ग्लारी धोखमा म्हिगदेसे मी आम्राड्बा म्हे गिकदा येशू मुबा ग्लारी भसी, “चुदा थुसीं पिन्गो” भिसी बिन्ती लजी।²³ येशूसे थे मी आम्राड्बा म्हेदा नाम्साग्याम क्याथाड भोसीं थे मी आम्राड्बा म्हेला मीरी थो स्वाजी ओच्छे यासे थुसीं, “एसे तिगै म्राड्जी?” भिसी इयोइमा,²⁴ थे मी आम्राड्बा म्हेसे ओसो च्यासी, “डाइ म्हिगदेदा दोड भ्रबा ह्रड लसी क्युसीन भ्रबा म्राड्बा मुला” भिसी भिजी।²⁵ येशूसे दो:सी थे मी आम्राड्बा म्हेला मीरी ह्राडला यासे थुजीं। जमाहेन्से थेसे म्राड्जी।²⁶ जमाहेन्से थे म्हेदा येशूसे नाम्सारी आवाड्ना दिमरी निउ भिसी पुड्जी।

येशू परमेश्वरला म्हे ख्रीष्ट हिन्ना
मत्ती १६:१३-२०; लूका ९:१८-२१

27 जमाहेन्से येशू ह्राडला चेलागदेदेन छयाम कैसरिया फिलिप्पी भिबा म्हाला नाम्सारीक्यार फेज्जी। थेनीगदे ग्यामरी फेज्बान लमा येशूसे ह्राडला चेलागदेदा “म्हिगदेसे डादा खाल भिमुला?” भिसी इयोइजी।

28 थेनीगदेसे “खालैसे बत्तिस्मा पिन्बा यूहन्ना, खालैसे एलिया, ओच्छे गाते म्हेसे चा अगमवक्तागदे न्हडला गिक हिन्ना भिमुला” भिसी भिजी।[‡]

29 “तर एनीगदेसे चा डा खाल भिसी म्हेन्मुला?” भिसी येशूसे इयोइमा, पत्रुससे “ह्राड परमेश्वरला म्हे थार्व पिन्बा ख्रीष्ट हिन्ना” भिसी भिजी।^{‡‡}

30 येशूसे थेनीगदेदा “च्यागो, एनीगदेसे चु ताम खालैदा थापाङ्गो” भिसी कुल्जी।

येशूसे ह्राड खाहड् लसी सिला भिबा ताम चेलागदेदा सुड्बा
मत्ती १६:२१-२८; लूका ९:२२-२७

31 जमाहेन्से येशूसे ह्राडला चेलागदेदा “परमेश्वरसे पुड्खबा म्हेसे ल्हानान दुख नातो:ला। थेदा यहूदी गन्बागदेसे, परमेश्वरला मन्दिररी पूजा लबा मुल म्हिगदेसे ओच्छे यहूदी धर्मगुरुगदेसे बिरोध लसी साइला। तसैनोन थे सिबाग्याम सोमरेमाकुनु सोला” भिसी सुड्जी।³² येशूसे चुहड् भिसी ह्राडला चेलागदेदा घोना लमाहेन्से पत्रुससे येशूदा जजाकी क्याथाड भोसीं, “चुहड् थासुङ्गो” भिसी बड्जी।³³ तर येशू स्थान्दो चेलागदेपट्टि प्लिक दो:सी थेनीगदेदा स्हीबान पत्रुसदा “शैतान ए चुग्याम थोन्सी निउ! एसे म्हेन्बा ताम परमेश्वरला आहिन, म्हेला हिन्ना” भिसी बड्जी।

चेलागदेसे नातो:बा दुख

मत्ती १६:२४-२८; लूका ९:२३-२७

34 जमाहेन्से येशूसे ह्राडला चेलागदेदेन थेरी मुबा म्हिगदेदा इयोइसी, “खालै म्हे डाला चेला दोबा सेम मुसम थेसे ह्राडला ज्याननोन माया मारब लसी ह्राडला कुस ह्राडसेन पुड्सी डादेन छयाम भ्रगै” भिसी सुड्जी।^{‡‡‡35} तिग्दा भिसम जुन म्हेसे ह्राडला ज्यान जोगब लबारी म्हाइला थे म्हेसे जुकजुकधोनाला जुनी आयाइ, तर डादेन थार्व पिन्बा समाचारला लागिरी ज्याननोन पिन्खम्बा म्हेसे चा जुकजुकधोनाला जुनी याइला।^{‡‡‡36} म्हेसे जम्बुलिडनोन यारी किन्सी ह्राडला ज्यान चा निजी भिसम थेदा तिग ज्यबा तला? ³⁷ जम्बुलिडरी म्हेला ज्यान भन्दा घेन अर्गु तिगै स्हे मुला? ³⁸ ओच्छे दान्दे पापीदेन नइबा बानीबेहोर थोसी भ्रबा म्हिगदेला ओन्हाडरी जुन म्हे डादेन डाला तामरी पे:ला लिच्छा परमेश्वरला स्वर्गदूतगदेदेन छयाम परमेश्वरसे पुड्खबा म्हे ह्राडला आबा परमेश्वरला य्हालदेन शक्तिरी खमा थेदा ह्राडला भिबारी पे:ला।

9 ओच्छे येशूसे थेनीगदेदा “च्यागो, एनीगदेसे डाला ताम इयान्गो, चुरी मुबा म्हिगदे न्हडला कोड कोड म्हे चा परमेश्वरला य्हुल्सा शक्तिरी खबा आम्राड्तेधोना आसि” भिसी सुड्जी।

येशूला स्थाल पोबा

मत्ती १७:१-१३; लूका ९:२८-३६

2 दुरे लिच्छा येशूसे पत्रुस, याकूबदेन यूहन्नादा जे ह्राडदेन छयाम नोबा गडरी भोसीं फेज्जी। ओच्छे चेलागदेसे च्याना च्यानान येशूला स्थाल पोजी।^{‡13} येशूला क्वान धिनीला स्हेर ह्रड्बान य्हाल य्हाल तसी चुदे य्हाल य्हाल तजी कि ओते तार मी जम्बुलिडला खजिबै म्हेसे खूसैनोन तना लआखम।⁴ थे धुइरी थेनीगदेसे एलियादेन मोशा, येशूदेन छयाम ताम लबान लबा म्राड्जी।⁵ चु म्राड्सी पत्रुससे येशूदा “गुरु, डनीएनोन चुरी मुबा ज्यबा तजी। दाहेन्से डन्से चुरी छाप्री सोम स्होइ, गिक ह्राडला लागिरी, गिक मोशाला लागिरी ओच्छे गिक एलियाला लागिरी” भिसी भिजी।⁶ थेनीगदे लोड्बासे लमा पत्रुसदा तिग भितो:बा था आरेबा।

7 थे धुइरी खसु खसी थेनीगदेदा घज्जी। ओच्छे खसु न्हडग्याम चुहड्बा काइ थे:जी, “चु डाइ सेमहेन्से माया लबा डाला झा हिन्ना, चुसे भिबा ताम एनीगदेसे इयान्गो।”^{‡††8} चुहड् भिबा थे:सी थेनीगदेसे क्यारमार च्यामा थेरी येशू बाहेक खालैदा आम्राड्नी।

9 जमाहेन्से येशू ह्राडला चेलागदेदेन छयाम गडग्याम फाज्बान लबा धुइरी येशूसे चेलागदेदा “परमेश्वरसे पुड्खबा म्हे सिबाग्याम आसोतेधोना एनीगदेसे तिनी म्राड्बा चु ताम खालैदा थापाङ्गो” भिसी सुड्जी।

10 थेनीगदेसे येशूसे सुड्बा ताम सेमरी थान्जी। तर थेनीगदेसे चु सिबा ग्याम सोबा भिबा चा तिग हिन्ना भिसी ह्राड ह्राड न्हडरी ताम लजी।

11 थेनीगदेसे येशूदा “यहूदी धर्मगुरुगदेसे तिग्दा एलिया अगमवक्ता डाच्छा खतो:ला भिबा?” भिसी इयोइजी।^{‡†12} येशूसे थेनीगदेदा चुहड् भिसी सुड्जी, “हिन्ना, डाच्छा एलिया खला ओच्छे थेसे जम्मान ताम दिक्ना

† 8:11 मत्ती १२:३८; लूका ११:१६ †† 8:12 मत्ती १२:२९; लूका ११:२९ ‡ 8:15 लूका १२:१ ‡† 8:18 यर्मि ५:२१; इज १२:२; मर्कु ४:१२ ‡‡ 8:28 मर्कु ६:१४-१५; लूका ९:७-८ ‡‡† 8:29 यूह ६:६८-६९

‡‡‡ 8:34 मत्ती १०:३८; लूका १४:२७ § 8:35 मत्ती १०:३९; लूका १७:३३; यूह १२:२५ §† 9:2 २ पत्रु १:१७-१८ §†† 9:7 मत्ती ३:१७; मर्कु १:११; लूका ३:२२ §‡ 9:11 मला ४:५; मत्ती ११:१४

लला। तर परमेश्वरसे पुइखबा म्हिसे ल्हानान दुख नातो:ला ओच्छे जम्मान म्हिगदेसे थेंदा खलाला भिसी तिग्दा भिबा? ¹³ तर च्यागो, एलिया मी खसी जिन्बा मुला। ओच्छे परमेश्वरला बचनरी भिबा अन्धार थेंदा म्हिगदेसे जे लइ म्हन्बा थेंनोन लजी।”

येशूसे म्हडसे स्याप्बा कोलादा खम्ना लबा

मत्ती १७:१४-२०; लूका ९:३७-४३

¹⁴ थेनीगदे स्हान्दो चेलागदे मुबा ग्लारी धोखमा क्युनोन म्हिला हुल मुबा। ओच्छे यहूदी धर्मगुरुगदे थेरी चेलागदेदेन छ्याम छलफल लबान मुबा। ¹⁵ म्हिगदेसे येशूदा म्हाङ्गछ्याम उदेक म्हन्सी यार्बान निसी येशूदा प्या लजी। ¹⁶ येशूसे थेनीगदेदा “एनीगदे तिग ताम लबान मुला?” भिसी इयोइजी, ¹⁷ म्हिला हुल न्हडग्याम म्हि गिकसे बिन्ती लबान येशूदा “गुरु, डाइ डाला झा हाड मुबा ग्लारी भबा मुला। म्हडसे स्याप्बासे लमा थेंसे ताम पाइआखम्बा मुला। ¹⁸ थेंदा म्हडसे भ्याड्बा धुइरी थेंसे सुडग्याम बोप्स्या ते:मुला। ओच्छे स्वा क्रेसी कक्क कुक्कूक तमुला। डाइ हाडला चेलागदेदा थेंला ल्हुडग्याम म्हड ताप्सी पिन्गो भिसी बिन्ती लजी, तर थेनीगदेसे आखम्नी” भिसी भिजी।

¹⁹ येशूसे थेनीगदेदा “विश्वास आलबा म्हिगदे, खाइमाधोना डा एनीगदेदेन छ्याम तला? खाइमाधोना डाइ एनीगदेदा नासे? थेंदा डा मुबा ग्लारी भउ” भिसी सुइजी।

²⁰ थेनीगदेसे थें म्हडसे स्याप्बा कोलादा येशू मुबा ग्लारी भजी। येशूदा म्हाङ्गछ्याम थें म्हडसे थें कोलादा लछार पछार लसी सरी हिल्ना लजी। ओच्छे सुडग्याम बोप्स्या ते:बान कक्क कुक्कूक तना लजी। ²¹ ओच्छे येशूसे थें म्हडसे स्याप्बा कोलाला आबादा “खाइमाहेन्से चुहड तबा?” भिसी इयोइजी। थेंला आबासे येशूदा चुहड भिसी भिजी, “चुदा जजाहेन्सेन चुहड तबा हिन्ना। ²² थेंदा साइबारी म्हडसे घरिघरि मेरी, क्युइरी भ्याड्बा मुला। गुरु, हाडसे खम्सम डन्दा दया लसी खम्ना लपिन्गो।” ²³ येशूसे थेंदा “खम्सम भिसी तिग्दा भिबा? विश्वास लबादा जम्मान तखम्ला” भिसी सुइजी। ²⁴ येशूसे चुहड सुङ्गाहेन्से थें म्हडसे स्याप्बा कोलाला आबासे क्रिडबान भिजी, “गुरु, डाइ विश्वास लला। विश्वास लबारी डादा ह्यो लउ।”

²⁵ म्हिला हुल हाड मुबापट्टि यार्बान खबा म्हाङ्गी येशूसे म्हडदा “ताइधोना लबादेन नाब्यड थें:ना आलबा म्हड ए थें कोलाला ल्हुडग्याम थोन्सी निउ! दो:सी खाइमै चु कोलाला ल्हुइरी थावाङ्गो” भिसी बइजी। ²⁶ जमाहेन्से थें म्हड क्रिड्सी थें कोलादा लछार पछार लबान थोन्सी निजी। म्हड थोन्सी निबा धुइरी थें कोला सिबा तेबान तजी। ओच्छे थेरी मुबा ल्हानान म्हिगदेसे सिजीम भिसी म्हन्जी। ²⁷ तर येशूसे थेंला यारी चुइसी थीमाहेन्से थें डोड रे:जी।

²⁸ दिम न्हडरी वाङ्गाहेन्से खालै आरेबा धुइरी येशूदा चेलागदेसे “तिग्दा डन्से थें म्हडदा ताप्बारी आखम्नी” भिसी इयोइजी।

²⁹ येशूसे हाडला चेलागदेदा “चुहड्बा म्हडदा चा प्रार्थनाग्यामसे जे ताप्खम्ला, तर अर्गु तिगै लसी ताप्आखम” भिसी सुइजी।

दो:सी येशूसे हाड खाइल लसी सिला भिसी सुइबा

मत्ती १७:२२-२३; लूका ९:४३-४५

³⁰ येशूदेन थेंला चेलागदे थें ग्ला खलासी गालील अज्चलग्याम तबान फेज्जी। हाड खानड मुला भिसी म्हिगदेसे था थायाङ्ग भिबा येशूला सेम मुबा। ³¹ तिग्दा भिसम येशूसे हाडला चेलागदेदा लोप्बान मुबा। थें धुइरी येशूसे थेनीगदेदा “परमेश्वरसे पुइखबा म्हिदा चुइसी म्हिगदेला यारी जिम्मा पिन्ना। थेनीगदेसे थेंदा साइला, तसैनोन सोमरेमाकुनु थें सिबाग्याम सोला” भिसी सुइजी ³² तर चेलागदेसे चु ताम आघोनी, ओच्छे दो:सी येशूदेन छ्याम चु ताम इयोइबारी थेनीगदे लोइजी।

जम्मान भन्दा घेन खाल?

मत्ती १८:१-५; लूका ९:४६-५०

³³ थेनीगदे कफर्नहुम नाम्सारी धोमाहेन्से जम्मान दिमरी मुबा धुइरी येशूसे चेलागदेदा “दोलो एनीगदे ग्यामरी तिग ताम लबान मुबा?” भिसी इयोइजी।

³⁴ तर थेनीगदे कुटिसी चिजी। तिग्दा भिसम थेनीगदेसे “फाड न्हडला खाल घेन हिन्ना” भिसी हाड हाड न्हडरी ताम लबा मुबा। ³⁵ ओच्छे येशू धन्छ्यासी हाडला च्युक न्ही चेलागदेदा इयोइसी, “खालै घेन दोबा सेम मुसम थें जम्मान भन्दा जजा तसी जम्मालान सेवा लतो:ला” भिसी सुइजी। †

³⁶ जमाहेन्से येशूसे थेनीगदेला गुडरी कोला गिकदा भजी। ओच्छे थें कोलादा हाडला कुरी किन्सी चेलागदेदा, ³⁷ “डाला मिनरी चुहड्बा कोलागदेदा वास्ता लबासे डादा वास्ता लला, ओच्छे डादा वास्ता लबासे डादा जे आहिन, डादा पुइखबा डाला आबादाएनोन वास्ता लला” भिसी सुइजी। †

³⁸ जमाहेन्से यूहन्नासे येशूदा “गुरु, डन्से हाडला मिनरी म्हि गिकसे म्हड ताप्बा म्हाङ्गी। तर डन्से थेंदा थेंहड लआपुङ्गी तिग्दा भिसम थें म्हि यहाडदेन छ्याम भ्रबा म्हि आहिन” भिसी भिजी। ³⁹ येशूसे थेनीगदेदा चुहड्बा भिसी सुइजी, “एनीगदेसे थेंदा थेंहड थालउ। तिग्दा भिसम डाला मिनरी उदेकला गे लबासे खाइमै डाला बिरोध आल। ⁴⁰ यहाडदा बिरोध आलबा म्हि चा यहाडपट्टिला हिन्ना। †⁴¹ च्यागो, खालैसे एनीगदेदा थार्बा पिन्बा ख्रीष्टदा विश्वास लबा म्हि भिसी क्युइ † जे थुड्बारी पिन्सैनोन थें म्हिसे याइतो:बा इनाम याइला।” ††

स्हान्दोदा पाप लपुड्बा म्हिसे याइतो:बा सजाय

मत्ती १८:६-९; लूका १७:१-२

⁴² दो:सी येशूसे थेनीगदेदा चुहड्बा भिसी सुइजी, “जुन म्हिसे डादा विश्वास लबा चु कोलागदे न्हडला गिकदा पाप लपुड्बा, थेंहड्बा म्हिदा मी खारेरी हान्दा च्योसी समुन्दरी भ्याड्बा ज्यबा तला। ⁴³ चुदे एला यासे पाप लपुड्जी भिसम थें थासी भ्याङ्गो। या न्ही मुसी नर्गरी खाइमै आसिबा मेरी निबा भन्दा बरु ठुडे तसी जुकजुकधोनाला जुनी याइबा चा एला लागिरी ज्यबा हिन्ना। ††⁴⁴ नर्गरी न्ह च्योलोड सिला न्ह मेनोन सिला। ⁴⁵ ओच्छे एला काडसे एदा पाप लपुड्जी भिसम थें थासी भ्याङ्गो। काड न्ही मुसी नर्गरी निबा भन्दा बरु कुज्या तसी जुकजुकधोनाला जुनी याइबा चा एला लागिरी ज्यबा हिन्ना। ⁴⁶ नर्गरी न्ह च्योलोड सिला, न्ह मेनोन सिला। ⁴⁷ एला मीसे एदा पाप लपुड्जी भिसम ते:सी भ्याङ्गो मी न्ही मुसी नर्गरी निबा भन्दा मी गिक ते:सी भ्याङ्गी परमेश्वरला यहुल्सारी वाड्बा एदा ज्यबा तला। ††⁴⁸ नर्गरी न्ह च्योलोड सिला, न्ह मेनोन सिला। ††⁴⁹ जम्मान म्हिगदेदा मेसे खारेब लसी चजा डम्बा हड्बा दोना लला। ††⁵⁰ चजा ज्यबा स्हे हिन्ना, तर चजाला डम्बा म्हाजी भिसम थें दो:सी तिगसे डम्ना लबा? थेंतबासेलमा एनीगदेसेनोन हाड हाड न्हडरी चजा थान्गो ओच्छे हाड हाड न्हडरी ठिक्सी चिउ।” ††

छोडपत्रला बारेरी लोप्बा ताम

मत्ती १९:१-१२; लूका १६:१८

10 येशू थें ग्ला खलासी यर्दन स्योडला क्याम्सडपट्टि यहूदिया अज्चलरी फेज्जी। थेरीनोन म्हिला हुल पोप तजी, ओच्छे येशूसे दो:सी डाच्छाला हड् लसी थेनीगदेदा लोप्जी। ² फरिसीगदेसे येशूला सेम च्याबाला लागिरी येशूदा “खालै म्हिसे हाडला म्हिगदेदेन छोडपत्र लबारी तला कि आत?” भिसी इयोइजी। ³ येशूसे थेनीगदेदा “एनीगदेदा मोशासे तिग भिसी कुल्बा मुला?” भिसी सुइजी।

† 9:34 लूका २२:२४ †† 9:35 मत्ती २०:२६-२७; २३:११; मर्कु १०:४३-४४; लूका २२:२६ † 9:37 मत्ती १०:४०; लूका १०:१६; यूह १३:२० †† 9:40 मत्ती १२:३०; लूका ११:२३ †† “क्युइ” नेपाली बाइबलदेन ग्रीक बाइबलरी चा “कचौर नाड क्युइ” भिसी भिबा मुला। ††† 9:41 मत्ती १०:४२ ††† 9:43 मत्ती ५:३० § चु पदगदेला ताम ल्हानान हड्बा ग्रीक बाइबलरी भिबा आरे। §† 9:47 मत्ती ५:२९ §†† 9:48 यशै ६६:२४ §† ग्रीक बाइबलरी मेग्याम चजा डम्बा दोना लला भिसी भिबा मुला। §†† 9:50 मत्ती ५:१३; लूका १४:३४-३५

4 थेनीगदेसे, “खालैसे हाडला मिडदा खलातो:सम छोडपत्र भिसी खलाबारी तला भिसी मोशासे पाड्बा मुला” भिसी भिजी। †

5 येशूसे थेनीगदेदा चुहड् भिसी सुड्जी, “एनीगदेला सेम कोड्बासे लमा मोशासे चुहड् भिसी कुल्बा हिन्ना। 6 तर परमेश्वरसे जम्बुलिड छ्यामाहेन्सेन थेनीगदेदा हेम्कोलादेन मिडकोला लसी स्होबा हिन्ना। ††7 ‘थेतबासेलमा म्हिसे हाडला आबादेन आमादा खलासी हाडला मिडदेन छ्याम दिक्सी चिमुला। 8 ओच्छे थेन्नी ल्हुड गिक हड्बान तला’ दाहेन्से थेन्नी न्ही आहिन, तर गिक हड्बान हिन्ना। †9 थेतबासेलमा परमेश्वरसे स्होबा जोडीदा खालै म्हिसे थाफेगै।”

10 येशू हाडला चेलागदेदेन छ्याम दिमरी धन्छ्याबा धुडरी चेलागदेसे येशूदा थे तामला बारेरी इयोड्जी। 11 येशूसे थेनीगदेदा चुहड् भिसी सुड्जी, “खालै म्हिसे हाडला मिडदेन छ्याम छोडपत्र लसी स्हान्दो मिडहेमेदेन छ्याम ब्याह लजी भिसम डाच्छाला मिडला बिरोधरी थे ब्रेल्सी भ्रबा हिन्ना। 12 ओच्छे थेहड् लसी हाडला हेम्बोदेन छ्याम छोडपत्र लसी स्हान्दो हेम्फेबेदेन छ्याम ब्याह लजी भिसम थेएनोन हाडला डाच्छाला हेम्बोला बिरोधरी ब्रेल्सी भ्रबा हिन्ना।” ††

येशूसे कोलागदेदा मोलम पिन्बा
मत्ती १९:१३-१५; लूका १८:१५-१७

13 येशूसे हाडला छ्या कोलागदेथोरी थान्सी मोलम पिन्बा भिसी म्हिगदेसे हाडला कोलागदेदा येशू मुबा ग्लारी भजी। तर येशूला चेलागदेसे थे कोलागदे भबा म्हिगदेदा बड्जी। 14 चेलागदेसे चुहड् लबा म्राड्सी येशूदा बोमो रे:जी। ओच्छे थेनीगदेदा चुहड् भिसी सुड्जी, “कोलागदेदा डा मुबा ग्लारी खपुङ्गो, थेनीगदेला ग्याम थाकागो। तिगदा भिसम परमेश्वरला यहुल्सा चु कोलागदे हड्बालान हिन्ना। 15 एनीगदेसे डाला ताम इयान्गो, जुन म्हिसे चु कोलागदेसे हड् लसी परमेश्वरला यहुल्सादा विश्वास आल थे म्हि परमेश्वरला यहुल्सारी खाइमै वाड्आम्याड्। ††16 जमाहेन्से येशूसे कोलागदेदा हाडला कुरी किन्सी थेनीगदेथोरी हाडला छ्या थान्सी मोलम पिन्जी।

परमेश्वरला यहुल्सादेन प्युक्पो म्हि
मत्ती १९:१६-३०; लूका १८:१८-३०

17 येशू ग्यामरी फेप्बान लबा धुडरी म्हि गिक यार्बान खसी पुड् जूबान येशूदा “ज्यबा गुरु, जुकजुकधोनाला जुनी याड्बाला लागिरी डाइ तिग लतो:ला?” भिसी इयोड्जी।

18 येशूसे थेदा चुहड् भिसी सुड्जी, “एसे डादा तिगदा ज्यबा भिबा? परमेश्वर बाहेक खालै ज्यबा आरे। 19 परमेश्वरसे कुल्बा ताम एदा थानोन मुला। म्हि थासाड्गो, स्हान्दोदेन छ्याम ब्रेल्सी थाभ्रउ, य्हो थालउ, लुसीला ताम पाड्सी थाभ्रउ, ठगब थालउ, ओच्छे हाडला आबा आमादा मान लउ।” ††

20 थेसे येशूदा “प्रभु, चु गे मी डाइ जत्धुगुहेन्सेन लबान मुला” भिसी भिजी। 21 येशूसे थेदा स्हीबान माया लसी चुहड् भिसी सुड्जी, “अझन एसे गे गिक लतो:बा मुला। दाहेन्से ए निसी एला जम्मान धन सम्पत्ति चूड्सी प्राड्बोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ।”

22 चु तामसे थेला ली धोपधोप तजी। ओच्छे दुख इहम्सी निजी। तिगदा भिसम थेदेन छ्याम ल्हानान धन सम्पत्ति मुबा।

23 येशूसे क्युनोन स्हीसी हाडला चेलागदेदा “प्युक्पो म्हिदा परमेश्वरला यहुल्सारी वाड्बारी गाते गाहो मुला” भिसी सुड्जी। 24 चुहड्बा तामसे चेलागदे उदेक म्हन्जी। तर येशूसे अझ थेनीगदेदा चुहड् भिसी सुड्जी, “च्यागो कोलागदे, धन सम्पत्तिथोरी भर लबा म्हिगदेदा परमेश्वरला यहुल्सारी वाड्बारी गाते गाहो मुला? 25 प्युक्पो म्हिदा परमेश्वरला यहुल्सारी वाड्बारी भन्दा बरु ऊँटदा दापला मीग्याम वाड्बारी सजिलो तला।” 26 चु ताम थे:सी चेलागदे झन उदेक म्हन्सी, “थेहड् भिसम खाल्से थार्बा याड्ला?” भिसी

भिजी। 27 येशूसे थेनीगदेदा स्हीबान, “चु गे म्हिसे लबारीन आखम्बा गे हिन्ना, तर परमेश्वरसे खम्ला, तिगदा भिसम परमेश्वरसे लआखम्बा गे तिगै आरे” भिसी सुड्जी।

28 जमाहेन्से पत्रुससे येशूदा “डन्से डन्ना जम्मान स्हे खलासी हाडदेन छ्याम भ्रबा मुला” भिसी भिमा, 29 येशूसे चुहड् भिसी सुड्जी, “च्यागो, एनीगदेसे डाला ताम इयान्गो, खालैसे डादेन थार्बा पिन्बा समाचारला लागिरी हाडला आबा आमा, झा झामे, ज्योज्यो आले, नाना आडा, दिमनाम खलाला, 30 थेसे नाबा दुखदेन छ्यामनोन दान्देन थे भन्दा ल्हाना दिमनाम, आबा आमा, झा झामे, ज्योज्यो आले, नाना आडा याड्ला। ओच्छे खबा धुडरी थेसे जुकजुकधोनाला जुनी याड्ला। 31 तर दान्दे डाच्छा मुबागदे न्हडला ल्हानान म्हि लिच्छा तला, दान्दे लिच्छा मुबागदे चा डाच्छा तला।” ††

दो:सी येशूसे हाड खाहड् लसी सिला भिबा ताम सुड्बा
मत्ती २०:१७-१९; लूका १८:३१-३४

32 थेनीगदे यरूशलेमपट्टि फेप्बान लबा धुडरी येशू चेलागदे भन्दा डाच्छा डाच्छा भ्रबान मुबा। ओच्छे चेलागदे उदेक तजी, तर स्हान्दो लिच्छा भ्रबा म्हिगदे चा लोड्जी। दो:सीनोन येशूसे हाडला च्युक न्ही चेलागदेदा कुनी गिकरी भोर्सी हाडथोरी तिग तला भिबा तामला बारेरी चुहड् भिसी सुड्जी। 33 “च्यागो, दान्दे यहाड् यरूशलेमपट्टि निबान मुला। परमेश्वरसे पुड्खबा म्हिदा परमेश्वरला मन्दिररी पूजा लबा मुल म्हिगदेदेन यहुदी धर्मगुरुगदेला यारी जिम्मा पिन्ना। जमाहेन्से थेनीगदेसे साइनोन तो:ला भिसी अर्गु यहुलला म्हिगदेला यारी जिम्मा लला। ओच्छे थेनीगदेसे थेदा थो स्वासी खिसी लला ओच्छे कोर्से तोसी साड्ला। तसैनोन थे सोमरेमाकुनु सिबाग्याम सोला।”

याकूबदेन यूहन्नासे लबा बिन्ती
मत्ती २०:२०-२८

35 जमाहेन्से जब्दियाला झा याकूबदेन यूहन्ना येशू मुबा ग्लारी खसी, “गुरु, डन्से हीबा स्हे पूरा लसी पिन्गो भिबा डन्ना सेम मुला” भिसी थेनीगदेसे बिन्ती लजी।

36 “डाइ एनीगदेला लागिरी तिग लतो:जी?” भिसी येशूसे थेनीगदेदा इयोड्जी।

37 “हाड स्वर्गला यहाल यहाल्बा मान याड्बा ठिरी धन्छ्यामा डनी ज्योज्यो आलेदा हाडला दाहिनेपट्टिदेन देब्रेपट्टि चिपुङ्गो” भिसी थेनीगदेसे भिजी।

38 “तिग हीदोबा भिसी एनीगदेदा थानोन आरे। डाइ नाबा दुख एनीगदेसे नाबारी खम्ला? डाइ किन्बा बप्तिस्मा एनीगदेसे किन्खम्ला?” भिसी येशूसे थेनीगदेदा सुड्जी। †

39 जमाहेन्से थेनीगदेसे येशूदा “खम्ला” भिसी भिजी।

जमाहेन्से येशूसे चुहड् भिसी सुड्जी, “एनीगदेसे डाइ नाबा दुख मी नाला, ओच्छे डाइ किन्बा बप्तिस्माएनोन एनीगदेसे किन्ना। 40 तर डाला दाहिने देब्रे चिपुङ्गो अधिकार डाला यारी आरे। चु ग्ला परमेश्वरसे जुन म्हिला लागिरी स्होबा हिन्ना थे जे चिम्याड्ला।”

41 चु ताम थे:सी चेला च्युडदा चा याकूब, यूहन्ना म्राड्सी बोमो रे:जी।

42 तर येशूसे थेनीगदेदा हाड मुबा ग्लारी इयोड्सी चुहड् भिसी सुड्जी, “च्यागो, एनीगदेदा चु ताम थानोन मुला, अर्गु यहुलला शासन लबा म्हिगदेसे हाडला सेमसे म्हन्बा अन्धार म्हिगदेथोरी शासन लमुला। ओच्छे घ्रेन घ्रेन पदरी मुबा म्हिगदेसे हाड भन्दा धिरी मुबा म्हिगदेथोरी शासन लमुला। 43 तर एनीगदे चा थेहड् तबारी आत। जुन म्हि जम्मान भन्दा घ्रेन दोबारी म्हाइला थेसे चा एनीगदेला सेवा लतो:ला। ††44 जुन म्हि जम्मान भन्दा डाच्छा तबारी म्हाइला थे म्हि चा जम्मालान नोकर दोतो:ला। ††45 तिगदा भिसम परमेश्वरसे पुड्खबा म्हिएनोन स्हान्दोगदेग्याम सेवा किन्बारी आहिन, तर स्हान्दोगदेला सेवा लबारी ओच्छे हाडलान ज्यान पिन्सी ल्हानान म्हिगदेला पापला सय फाबारी खबा हिन्ना” भिसी सुड्जी।

† 10:4 व्यव २४:१-४; मत्ती ५:३१ †† 10:6 उत्प १:२७; ५:२ † 10:8 उत्प २:२४ †† 10:12 मत्ती ५:३२; १ कोरे ७:१०-११ †† 10:15 मत्ती १८:३ ††† 10:19 प्रस्था २०:१२-१६; व्यव ५:१६-२०

††† 10:31 मत्ती २०:१६; लूका १३:३० † 10:38 लूका १२:५० †† 10:43 लूका २२:२५-२६ ††† 10:44 मत्ती २३:११; मर्कू ९:३५

मी आम्नाइबा बारतिमै
मती २०:२९-३४; लूका १८:३५-४३

46 येशू हाडला चेलागदेदेन छ्याम यरीहो नाम्सारी धोखजी। थे नाम्सा ख्लासी निबा धुडरी ल्हानान म्हिला हुल थेनीगदेदेन छ्याम छ्याम खजी। ग्यामला कुनीरी तिमैला झा बारतिमै भिबा मी आम्नाइबा म्हि गिक हीसी चिबा मुबा। 47 नासरतला येशू खबा थे:सी थेसे “दाऊद ग्लेला सन्तान येशू, डादा दया लउ!” भिसी क्रिडबारी छ्याइजी।

48 ल्हानान म्हिगदेसे थेदा “कुटिसी चिउ” भिसी बड्जी। तर इन थेसे “दाऊद ग्लेला सन्तान येशू, डादा दया लउ!” भिसी क्रिडबान भिजी।

49 येशू थेन तसी, “थेदा चुरी ड्योइगो!” भिसी सुड्जी। ओच्छे थेनीगदेसे थे मी आम्नाइबा म्हिदा ड्योइसी, “भड लउ, एदा येशूसे ड्योइबान मुला, योनान रे:सी खउ।” भिसी भिजी। 50 जमाहेन्से थे मी आम्नाइबा म्हि हाडला घ भ्याइसी छ्योइबान येशू मुबा ग्लारी खजी।

51 येशूसे थेदा “डाइ एला लागिरी तिग लगै भिसी म्हन्बा मुला?” भिसी ड्योइजी, थे मी आम्नाइबा म्हिसे “गुरु, डाला मी म्नाइना लसी पिन्नो” भिसी बिन्ती लजी। 52 येशूसे थेदा “एसे विश्वास लबासे लमा ए खम्बा मुला। दाहेन्से ए निउ” भिसी सुड्जी। येशूसे थेहड सुड्छ्याम थेसे म्नाइजी ओच्छे येशूदेन छ्याम भ्रजी।

येशू यरूशलेमरी फेष्बा

मती २१:१-११; लूका १९:२८-३८; यूहन्ना १२:१२-१५

11 येशूदेन थेला चेलागदे यरूशलेम डामला जैतून गडला बेथफागदेदेन बेथानिया भिबा नाम्सारी धोखमा येशूसे हाडला चेलागदे न्हडला न्हीदा पुड्जी। 2 पुड्बा धुडरी चुहड् भिसी सुड्जी, “एनी जजाकी क्याथाडला नाम्सारी निउ। नाम्सारी धोमेछ्याम एनीसे दान्देधोना खालै आक्रे:बा गधाला कोला गिक स्याप्ला। थेदा ब्लसी चुरी भसी खउ। 3 थेरी एनीदा खालैसे चु तिग लबा? भिसी ड्योइसम, चु प्रभुदा तो:बा मुला, प्रभुसे योनान दो:सी पिन्ना भिउ” भिसी पुड्जी।

4 थेनी निमा ग्याम डामला दिमला खाडगारी गधाला कोला च्युन्सी थान्बा स्याप्ली। थेनीसे थे गधाला कोलादा ब्लबारी छ्याइमा, 5 थेरी राप्सी चिबा म्हिगदेसे “एनीसे थे गधाला कोलादा ब्लसी तिग लबारी छ्याइबा?” भिसी ड्योइजी। 6 येशूसे सुड्बा हड्दोन चला न्हीसे थेरी मुबा म्हिगदेदा भिजी, जमाहेन्से थे म्हिगदेसे गधाला कोला भोर्पुड्जी।

7 थे गधाला कोलादा चला न्हीसे येशू मुबा ग्लारी भसी हाड हाडला घ गधाला कोलाथेरी तीसी पिन्जी, ओच्छे येशू गधाला कोलाथेरी क्रे:जी। 8 ल्हानान म्हिगदेसे ग्यामरी हाड हाडला घगदे तीजी, ओच्छे स्थान्दोगदेसे चा भ्लेग्याम स्याउला भसी तीजी। 9 येशूला लिच्छा डाच्छा भ्रवा म्हिगदेसे चुहड् भिसी क्रिडबारी छ्याइजी

“परमेश्वरदा जयजयकार तगै,
परमप्रभुला मिनरी फेष्बबासे परमेश्वरग्याम मोलम याड्गै। †

10 यहाडला आखे म्हैमे दाऊद ग्लेला खबा

चु यहुल्सादा परमेश्वरसे मोलम पिन्गै।

ओच्छे स्वर्गरी धन्छ्याबा परमेश्वरला जयजयकार तगै।”

11 यरूशलेमरी धोखमाहेन्से येशू परमेश्वरला मन्दिर न्हडरी वाड्जी। ओच्छे थेसे परमेश्वरला मन्दिरला क्युसीन स्हीजी। तर घड्बासे लमा येशू हाडला च्युक न्ही चेलागदेदेन छ्याम बेथानिया नाम्सारी फेष्जी।

तिगै आरोबा अज्जीरला दोड

मती २१:१८-१९

12 न्हडगरदडसे थेनीगदे बेथानियाग्याम यरूशलेमपट्टि फेष्बा धुडरी येशूदा फोखेन्जी। 13 येशूसे जजाकी क्याथाड अज्जीरला दोड गिक म्नाइजी। थेरी अज्जीर मुजी वा भिसी येशूसे स्हीबारी फेष्जी। तर थे दोडरी भानोन भा जे मुबा। तिगदा भिसम थे धुडरी अज्जीर रोबा धुड तबा आरेबा। 14 जमाहेन्से

† 11:9 भजन ११८:२५-२६

येशूसे “दाहेन्से एग्याम रोबा अज्जीर खाइमै खालैसे थाचगै” भिसी सुड्जी।
चु ताम थेला चेलागदेसे थे:जी।

येशू परमेश्वरला मन्दिररी फेष्बा

मती २१:१२-१७; लूका १९:४५-४७; यूहन्ना २:१३-२२

15 येशू हाडला चेलागदेदेन छ्याम यरूशलेमरी धोमाहेन्से परमेश्वरला मन्दिर न्हडरी चुड्बादेन ग्लुबागदेदा ताप्जी। थेसे थेरी चुड्बा ग्लुबा लबा जम्मान व्यापारीगदेदा ताप्जी। ओच्छे टाडगा देव्यारी चिबागदेला टेबुलदेन दुकुर चुड्बारी चिबागदे जम्मान चिबा ग्लागदे प्लाड प्लिड लसी भ्याइजी। 16 जमाहेन्से येशूसे परमेश्वरला मन्दिरग्याम खालैदा तिगै स्हे भोर्बारी आपिन्नी भवारीएनोन आपिन्नी। 17 ओच्छे येशूसे जम्मान म्हिगदेदा लोप्वान, “तिग परमेश्वरला बचनरी चुहड् भिबा आरे? ‘डाला दिमदा यहुल यहुलला म्हिगदेसे प्रार्थना लबा दिम भिसी भिला।’ तर एनीगदेसे मी डाला दिमदा य्होगदे चिबा ग्ला स्होबा मुला” भिसी सुड्जी। †

18 चु ताम परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे थे:सी येशूदा खाहड् लसी साइबा भिसी दाउ च्यासी भ्रवारी छ्याइजी। तिगदा भिसम येशूसे लोप्वाम तामरी जम्मान म्हिगदे उदेक म्हन्मुबा। थेतबासेलमा थेनीगदे येशूदेन छ्याम लोड्बा। 19 ड्यसे तमाहेन्से येशू हाडला चेलागदेदेन छ्याम यरूशलेम शहरग्याम फेष्जी।

विश्वासग्याम उदेकला गे तबा

मती २१:२०-२२

20 न्हडगरदड स्होरी थेनीगदे डाच्छालाग्याम्से निबान लमा थेनीगदेसे थे अज्जीर दोड टाहेन्सेन खर्बा म्नाइजी। 21 येशूसे थे अज्जीरला दोड मी सिजीम” भिसी भिमा, 22 येशूसे हाडला चेलागदेदा “परमेश्वरथेरी विश्वास लउ” भिसी सुड्जी। 23 दो:सी येशूसे थेनीगदेदा चुहड् भिसी सुड्जी, “एनीगदेसे डाला ताम ड्यान्गो, चुदे एनीगदेसे सेमरी तिगै शड्का आलना हाडला सेमरी म्हन्बा ताम पूरा तला भिसी विश्वास लसी चु गडदा ‘ए होक निसी समुन्द्ररी ताडगो’ भिजी भिसम एनीगदेला लागिरी थेहड्दोन तला।” 24 थेतबासेलमा एनीगदेसे प्रार्थना लमा तिग हीबा मुला, थे डाइ याड्जी भिसी विश्वास लजी भिसम एनीगदेसे याड्ला। 25 तर एनीगदेसे प्रार्थना लबारी छ्याइबा धुडरी खालैला बिरोधरी तिगै आज्यबा ताम मुसम थेदा माफ लउ। स्वर्गरी मुबा एनीगदेला परमेश्वर आबासेनोन एनीगदेला पाप माफ लला। 26 तर एनीगदेसे माफ आलनी भिसम स्वर्गरी मुबा एनीगदेला परमेश्वर आबासेनोन एनीगदेला पाप माफ आल। † †

येशूला अधिकारला बारेरी ड्योइबा

मती २१:२३-२७; लूका २०:१-८

27 दो:सी येशू हाडला चेलागदेदेन छ्याम यरूशलेम शहररी फेष्बजी। मन्दिररी भ्रवान लमा परमेश्वरला मन्दिररी पूजा लबा मुल म्हिगदे, यहूदी गन्बागदे ओच्छे यहूदी धर्मगुरुगदे येशू मुबा ग्लारी खसी, 28 “हाडसे खानडग्याम अधिकार याड्सी चु गे लबा हिन्ना? हाडदा चु अधिकार खाल्से पिन्बा हिन्ना?” भिसी ड्योइजी।

29 येशूसे थेनीगदेदा चुहड् भिसी ड्योइजी, “एनीगदेदाएनोन डाइ ताम गिक ड्योइला। थे तामला जोहाब पिन्जी भिसम डादा चु गेगदे लबारी खाल्से अधिकार पिन्जी थे एनीगदेदा पाड्ला। 30 यूहन्नासे पिन्बा बप्तिस्मा परमेश्वरग्याम मुबा कि म्हिग्याम मुबा? डादा पाड्गो।” 31 जमाहेन्से थेनीगदे हाड हाड न्हडरी ताम लसी, “चुदे यहाडसे परमेश्वरग्याम भिजी भिसम थेसे यहाडदा ‘थेहड् भिसम एनीगदेसे तिगदा यूहन्नादा विश्वास आलबा?’ भिसी भिला। 32 तर म्हिगदेग्याम भिबारीनोन आत।” थेनीगदे म्हिला हुल म्नाइसी लोड्जी। तिगदा भिसम जम्मान म्हिगदेसे यूहन्नादा अगमवक्ता हिन्ना भिसी भिमुला।

† 11:17 यशै ५६:७; यर्मि ७:११ † 11:23 मती १७:२०; १ कोर १३:२ †
चु पदला ताम ल्हानान ग्रीक बाइबलरी भिबा आरे † 11:26 मती ६:१४-१५

33 थेतबासेलमा थेनीगदेसे “डन्दा था आरे” भिसी येशूदा जोहाब पिन्जी। येशूसे थेनीगदेदा “थेह्ङ् भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाङ्” भिसी सुङ्जी।

अधियाँ स्होबा म्हिगदेला उखान
मत्ती २१:३३-४६; लूका २०:९-१९

12 येशूसे थेनीगदेदा उखानग्याम चुह्ङ् भिसी सुङ्बारी छ्याइजी, “म्हि गिकसे वारीरी अडगुर सूसी क्युसीन पर्खाल लजी। ओच्छे अडगुर म्हर्बारी कोल स्होसी अडगुर वारी खुङ्बारी नोबा छाप्रो गिक स्होजी। जमाहेन्से अधियाँरी पिन्सी थे अर्गु खुल्सारी निजी। †2 अडगुर मिन्बा धुङ् तमाहेन्से थे प्युक्पो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुङ्जी। 3 तर थे अधियाँ लबागदेसे थेदा चुङ्सी तोबा ग्याङ्बाल लसी तिगै आपिन्ना पुङ्जी। 4 ओच्छे थेसे स्हान्दो नोकरदा पुङ्जी, तर थेनीगदेसे थेला थोबोरी तोसी बेडज्जत लसी पुङ्जी। 5 थेसे अङ्ग स्हान्दो नोकरदा पुङ्जी। थेनीगदेसे थेदाएनोन साङ्जी। चुह्ङ् लसी थेनीगदेसे कोङ्दा साङ्बाल कोङ्दा तोबा लजी।

6 “दाहेन्से थेदेन छ्याम थेसे सेमहेन्सेन माया लबा झा गिक जे बाँकी मुबा। जम्मादान पुङ्सी जिन्माहेन्से ‘थेनीगदेसे डाला झादा मी मान लला तला’ भिसी थेसे हाडला झादा थेनीगदेसे मुबा ग्लारी पुङ्जी। 7 तर अधियाँ लबागदेसे ‘चु मी यहाडला धनीला झा हिन्ना, यहाडसे थेदा साङ्गे। जमाहेन्से थेला सम्पत्ति यहाडलान तला’ भिसी हाड हाड न्हडरी ताम लजी। 8 ओच्छे थेनीगदेसे थेदा चुङ्सी साङ्सी थेदा वारीग्याम पाखारी भ्याङ्जी।

9 “दाहेन्से थे अडगुर वारीला धनीसे तिग लला? थे खसी अधियाँ लबा म्हिगदेदा साङ्गला ओच्छे थे अडगुरला वारी स्हान्दोगदेदा स्होबारी पिन्ना।

10 एनीगदेसे परमेश्वरला बचन खाङ्मै पढब लबा आरे?

‘जुन युडबादा दिम स्होबा कर्मीगदेसे गे आखेल भिसी भ्याङ्बाल मुबा, थेनोन युडबा दिमला सुर युडबा दोजी।

11 चु परमप्रभुग्याम तबासे लमा यहाडला लागिरी उदेकला ताम हिन्ना’ भिसी भिबा मुला।” ††

12 येशूसे सुङ्बाल ताम यहाडला बिरोधरी चीम भिसी यहूदी धर्मगुरुगदेसे था याङ्सी थेनीगदेसे येशूदा चुङ्बारी म्हाङ्गी। तिगदा भिसम चु उखान येशूसे थेनीगदेलेन बिरोधरी सुङ्बाल हिन्ना भिबा ताम थेनीगदेदा था मुबा। तर म्हिला हुलसे लमा थेनीगदे लोङ्सी येशूदा चुङ्बारी आखम्नी। थेतबासेलमा थेनीगदेसे येशूदा खलासी निजी।

रोमी ग्याल्बोदा तिरो फातो:बा कि फाआतो:बा भिसी येशूदा इयोङ्बा
मत्ती २२:१५-२२; लूका २०:२०-२६

13 जमाहेन्से तामनोन तामरी येशूदा फसब लङ् भिसी यहूदी धर्मगुरुगदेसे फरिसीदेन हेरोदीगदेला कोङ् कोङ् म्हिगदेदा येशू मुबा ग्लारी पुङ्जी।

14 थेनीगदेसे येशू मुबा ग्लारी खसी, “गुरु, हाड सत्यला म्हि हिन्ना, ओच्छे खालैदा वास्ता आलमुला भिसी डन्दा था मुला। तिगदा भिसम हाडसे म्हिला ली च्यासी गे आलमुला। तर परमेश्वरला ग्याम ज्यना लसी लोप्मुला।

थेतबासेलमा डन्से रोमी ग्याल्बो कैसरदा तिरो फाबा ठीक हिन्ना कि आहिन? सुङ्गे। 15 डन्से तिरो फागो कि थाफागो?” भिसी इयोङ्मा, येशूसे थेनीगदेला कप्टी सेम था याङ्सी, “तिगदा एनीगदेसे डादा फसब लबारी म्हाङ्बा? खाड डबल गिक भउ च्यागे” भिसी सुङ्गी। 16 थेनीगदेसे येशूदा डबल गिक पिन्जी, ओच्छे येशूसे थेनीगदेदा “चु डबलरी मुबा छापदेन मिन खाल्ला हिन्ना?” भिसी सुङ्गा, थेनीगदेसे “रोमी ग्याल्बो कैसरला” भिसी जोहाब पिन्जी। 17 जमाहेन्से येशूसे थेनीगदेदा “थेह्ङ् भिसम रोमी ग्याल्बो कैसरला जति रोमी ग्याल्बो कैसरदा पिन्गो ओच्छे परमेश्वरला जति परमेश्वरदा पिन्गो” भिसी सुङ्गी। चुह्ङ्बाल ताम थे:सी थेनीगदे उदेक तजी।

सिबाग्याम सोना लबाला बारेरी इयोङ्बा
मत्ती २२:२३-३३; लूका २०:२७-३८

18 सिबा म्हि दो:सी आसो भिसी विश्वास लबा सदुकीगदेसे येशू मुबा ग्लारी खसी चुह्ङ् भिसी इयोङ्जी, †19 “गुरु, मोशासे यहाडदा पिन्बा ठिम अन्धार खालैला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतो:ला भिसी भिबा मुला। †20 म्हि गिकला ज्योज्यो आले निस मुबा। थेबासे ब्याह लजी तर कोलागदे आतनान थे सिजी। 21 ओच्छे पाराडसे चाडदा ब्याह लजी थेएनोन कोलागदे आतनान सिजी, साँजीएनोन थेह्ङ् तसीन सिजी। 22 चुह्ङ् लसी जम्मासेन पालोन पालो चाडदा ब्याह लजी। ओच्छे कोलागदे आतनान थेनीगदे सिजी। ओच्छे थे म्रिडम्हेमेएनोन सिजी। 23 थेतबासेलमा डन्दा सुङ्गे, सिबाग्याम सोना लजी भिसम थे म्रिडम्हेमे खजिबाला म्रिड तला? तिगदा भिसम थेनीगदेसे जम्मासेन थे म्रिडम्हेमेदेन छ्याम ब्याह लबा मुला।” 24 येशूसे थेनीगदेदा “एनीगदे अन्दोलरीन चीम, तिगदा भिसम एनीगदेसे परमेश्वरला बचनदेन परमेश्वरला शक्तिला बारेरी घोबान आरेम। 25 तिगदा भिसम सिबाग्याम सोना लबा धुङ्गी न्ह ब्याह लला न्ह ब्याह तला। तर थेनीगदे स्वर्गी मुबा स्वर्गदूतगदे ह्ङ्बान तला। 26 सिबाग्याम सोना लबाला बारेरी अङ्ग भिगे भिसम परमेश्वरसे मोशादा लुङ्बाल मेला झाङ्ग्याम ‘डा अब्राहाम, इसहाकदेन याकूबला परमेश्वर हिन्ना’ भिसी सुङ्गी। †27 परमेश्वर मी सिबागदेला परमेश्वर आहिन, तर सोबागदेला परमेश्वर हिन्ना। थेतबासेलमा एनीगदेसे घोबा जम्मान ताम गल्ती मुला” भिसी सुङ्गी।

येशूसे लोप्बाल जम्मान भन्दा मुल ताम
मत्ती २२:३४-४०; लूका १०:२५-२८

28 येशूसे म्हिगदेदा ज्यना लसी जोहाब पिन्बा म्राङ्सी यहूदी धर्मगुरुगदे न्हडला गिकसे, “गुरु, परमेश्वरसे मोशादा पिन्बा ठिमरी जम्मान भन्दा मुल ताम चा खजिबा हिन्ना?” भिसी इयोङ्जी। 29 येशूसे थेदा चुह्ङ् भिसी सुङ्गी, “इसाएलीगदे च्यागो, जम्मान भन्दा मुल ताम चा परमप्रभु यहाडला परमेश्वर गिक जे प्रभु हिन्ना। 30 एसे हाडला परमप्रभु परमेश्वरदा सेमहेन्से, जम्मान प्राणसे, जम्मान बुद्धिसे, जम्मान शक्तिसे माया लउ।” †31 ओच्छे परमेश्वरसे कुल्बाल अर्गु मुल ताम चा ‘एसे हाडला खिम्जेमदा हाडदा ह्ङ्गोन माया लउ।’ †32 परमेश्वरसे कुल्बाल मुल ताम चु भन्दा अर्गु आरे।”

32 चु ताम थे:सी यहूदी धर्मगुरुसे येशूदा “गुरु, हाडसे सुङ्बाल ताम ठीक हिन्ना। परमेश्वर गिक जे मुला, ओच्छे परमेश्वर बाहेक स्हान्दो खालै आरे। †33 ओच्छे परमेश्वरदान सेमहेन्सेन, जम्मान प्राणसे, जम्मान बुद्धिसे, जम्मान शक्तिसे माया लबा, ओच्छे हाडदा ह्ङ्गोन हाडला खिम्जेमदाएनोन माया लबा चा मेरी खाङ्सी पिन्बाल जम्मान बलिदेन बलिदानगदे भन्दा मुल ताम हिन्ना” भिसी भिजी। †34 थेसे होशियार तसी जोहाब पिन्बाल म्राङ्सी येशूसे थेदा “ए परमेश्वरला यहुल्साग्याम थारेड आरे” भिसी सुङ्गी। जमाकुनुहेन्से खालैसे येशूदा तिगै ताम इयोङ्बारी आँट आलनी। ††

येशू खीष्ट खाल्ला झा हिन्ना?

मत्ती २२:४१-४६; २३:१-३६; लूका २०:४१-४७

35 येशूसे परमेश्वरला मन्दिररी लोप्बान लबा धुङ्गी चुह्ङ् भिसी सुङ्गी, “यहूदी धर्मगुरुगदेसे तिगदा थारबा पिन्बाल खीष्टदा दाऊद ग्लेला सन्तान भिसी भिबा? 36 तिगदा भिसम दाऊदसेन परमेश्वरला आत्माग्याम चुह्ङ् भिबा मुबा,

‘परमप्रभुसे डाला प्रभुदा डाइ एला शत्रुगदेदा

एला काङ् धिरी आथान्तेधोना

ए डाला दाहिनेपट्टि चिउ’ भिसी सुङ्गी। †

‡ 12:18 मुल २३:८ †† 12:19 व्यव २५:५ †† 12:26 प्रस्था ३:६ †††
12:30 व्यव ६:४-५ ††† 12:31 लेवी १९:१८ § 12:32 व्यव ४:३५ §† 12:33
होशे ६:६ §†† 12:34 लूका १०:२५-२८ §† 12:36 भजन ११०:१

† 12:1 यशै ५:१-२ †† 12:11 भजन ११८:२२-२३

37 “दाऊद हाडसेन मी ख्रीष्टदा ‘प्रभु’ भिमाहेन्से खाह्ण्ड लसी ख्रीष्ट दाऊद ग्लेला सन्तान तला?” ओच्छे येथूसे लोप्ला ताम म्हिगदेसे सेम लसी इयान्जी।

येथूसे यहूदी धर्मगुरुगदे म्राड्सी होशियार तउ भसी सुड्बा
मत्ती २३:१-३६; लूका २०:४५-४७

38 येथूसे लोप्लान लबा धुडरी चुह्ण्ड भिसी सुड्जी, “यहूदी धर्मगुरुगदे म्राड्सी होशियार तउ। तिगदा भिसम थेनीगदे ज्यबा ज्यबा क्वान क्वान्सी कोर्बारी निबादेन बजाररी निबा धुडरी म्हिगदेसे मान लगै भिसी म्हन्मुला।
39 ओच्छे यहूदीगदे हुप तबा दिमरीदेन भोज लबा ग्लारीनोन मुल ठि म्हाड्मुला। 40 थेह्ण्ड लसीन थेनीगदेसे हेम्बो सिबा म्रिडम्हेमेगदेला दिमनाम ब्यन्मुला। ओच्छे म्हिगदेदा उन्बाला लागिरी हेड्बा हेड्बा प्रार्थना लमुला थेह्ण्डबा म्हिगदेसे झन ल्हानान सजाय याड्ला।”

हेम्बो सिबा म्रिडम्हेमेसे पिन्बा भेटी
लूका २१:१-४

41 येथू परमेश्वरला मन्दिररी भेटी युबा ग्लाला डाच्छापट्टि धन्ड्यासी म्हिगदेसे भेटी युबा बाकसरी भेटी युबान लबा स्हीबान मुबा। थेरी फ्युक्पो म्हिगदेसे ल्हानान टाडगा युजी। 42 ओच्छे हेम्बो सिबा प्राडबो म्रिडम्हेमे गिक खसी साडबोला सिगा गिकला डबल न्ही युजी। 43 जमाहेन्से येथूसे चेलागदेदा हाड मुबा ग्लारी इयोड्सी, “च्यागो, डाला ताम इयान्गो। भेटी युबा बाकसरी चु हेम्बो सिबा प्राडबो म्रिडम्हेमेसे स्हान्दो म्हिगदेसे भन्दा ल्हाना भेटी युबा मुला। 44 तिगदा भिसम स्हान्दो म्हिगदेसे हाडदेन छ्याम मुबा ल्हानान सम्पत्तिग्याम युजी। तर चु म्रिडम्हेमे प्राडबो तसीनोन हाडदेन छ्याम मुबा जति जम्मान युबा मुला” भिसी सुड्जी।

परमेश्वरला मन्दिर नाश तला
मत्ती २४:१-२; लूका २१:५-६

13 येथू परमेश्वरला मन्दिरग्याम थोन्सी फेप्लान लबा धुडरी चेलागदे न्हडला गिकसे “गुरु स्हीगो, चुरी गाते घ्रेन घ्रेन युडबासे स्होबा गाते जेबा दिमगदे” भिसी भिमा, 2 येथूसे थेदा “चु घ्रेन दिमगदेला युडबा गिकनोन बाँकी आचिना जम्मान फुप्ला” भिसी सुड्जी।

जम्बुलिड नाश तबा धुडला चिनुगदे
मत्ती २४:३-१४; लूका २१:७-१९

3 येथू परमेश्वरला मन्दिरला क्याम्सडपट्टिला जैतून गडरी धन्ड्याबा धुडरी पत्रुस, याकूब, यहून्नादेन अन्द्रियास येथू मुबा ग्लारी खसी चुह्ण्ड भिसी सुटक्क इयोड्जी, 4 “हाडसे सुड्बा चु तामगदे खाडमा तला? ओच्छे चु तामगदे तबा धुडरी खाह्ण्डबा चिनु म्राड्ला? डन्दा सुड्जी।”

5 येथूसे थेनीगदेदा चुह्ण्ड भिसी सुड्जी, “एनीगदे होशियार तउ। खालैसे एनीगदेदा झुक्वाब थालगै। 6 तिगदा भिसम ल्हानान म्हिगदे डाला मिन किन्सी ‘डानोन थार्बा पिन्बा ख्रीष्ट हिन्ना’ भिसी खला। ओच्छे ल्हानान म्हिदा झुक्वाब लला। 7 एनीगदेसे लडाइदेन लडाइला हल्लागदे थे:ला। तसैनोन एनीगदे थालोङ्गो, तिगदा भिसम चु तनोन तो:बा हिन्ना। तर थेनोन धुडरी चा चु जम्बुलिड नाश आत। 8 तिगदा भिसम म्हि य्हुलला बिरोधरी म्हि य्हुलनोन ओच्छे य्हुल्साला बिरोधरी य्हुल्सा रे:ला। खानडदमान सडगुल निला ओच्छे अनिकाल तला। चु चा कोला न्हसेला म्रिडम्हेमेदा कोला न्हबा धुडरी स्हु खबारी छ्याड्बा दुख ह्ण्डबान दुख तबारी छ्याड्बा हिन्ना।

9 “तर थे धुडरी एनीगदे होशियार तउ। तिगदा भिसम म्हिगदेसे एनीगदेदा अदालतरी ओच्छे यहूदीगदे हुप तबा दिमरी भोर्सी तोबा ग्याड्बा लला। ओच्छे थेनीगदेसे एनीगदेदा डादा विश्वास लबा ताम उन्बाला लागिरी अज्वलाधीशदेन ग्लेला डाच्छापट्टि राप्पुड्ला। 10 थे भन्दा डाच्छा जम्मान य्हुलदा थार्बा पिन्बा समाचार थे:ना लतो:बा मुला। 11 म्हिगदेसे एनीगदेदा चुड्सी भोर्सी मुद्दा युबा धुडरी एनीगदेसे तिग पाड्तो:ला भिसी धन्दा सुर्दा थालउ। तर थे धुडरी परमेश्वरसे तिग पाङ्गो भिबा चीम थेनोन पाङ्गो। तिगदा

भिसम थे धुडरी पाड्बा एनीगदेसे आहिन तर परमेश्वरला आत्मासे हिन्ना। †

12 “हाडलान ज्योज्यो आलेसे हाडलान ज्योज्यो आलेदा साड्पुड्ला। थेह्ण्ड लसीन आबासे कोलागदेदा साड्पुड्ला ओच्छे कोलागदेसे आबा आमादा बिरोधरी लसी साड्पुड्ला। 13 ओच्छे डादा विश्वास लबासे लमा एनीगदेदा जम्मान म्हिगदेसे हेला लला। तर जुन म्हिसे जस्तोन दुख तसैनोन हाड आसितेधोना डादा विश्वास लबा आख्ला थेसे थार्बा याड्ला। ††

लोड्बा खबा धुड

मत्ती २४:१५-२८; लूका २१:२०-२४

14 “परमेश्वरला मन्दिरला चोखो ग्लारी नड्बा खबा स्हे म्राड्ला।” चुला अर्थ चा पढब लबा म्हिसे घोगै। “थे धुडरी यहूदिया अज्वलरी मुबा म्हिगदे गडरीक्वार यार्गै। †15 ओच्छे तलाथोरी मुबा म्हिगदे हाडला सामान किन्बारी मार फाप्सी दिम न्हडरी थावाङ्गो। †16 बु वारीरी मुबागदे हाडला घ किन्बारी दो:सी दिमरी थानिउ। 17 थे धुडरी जिउ न्हीला म्रिडम्हेमेदेन कोलादा इहे ख्वाबा आमागदेदा झन गाते ल्हानान दुख तला! 18 चु ताम खड्बा लारी आतगै भिसी प्रार्थना लउ। 19 तिगदा भिसम थे धुडरी तबा घ्रेन दुख परमेश्वरसे चु जम्बुलिड स्होमाहेन्से दान्देधोना तबा आरे ओच्छे लिच्छापुनोन खाड्मै तसेला आरे। †20 चुदे परमेश्वरसे थे धुड तुन्ना आलबा हिन्सम खालै म्हिसेन थार्बा आयाड्सेला मुबा। तर हाडसे धम्बा म्हिगदेला लागिरी परमेश्वरसे थे धुड तुन्ना लबा मुला।

21 “थे धुडरी खालैसे एनीगदेदा ‘च्यागो, थार्बा पिन्बा ख्रीष्ट चुरी मुला,’ अथवा ‘थेरी मुला,’ भिजी भिसम एनीगदेसे थेनीगदेला ताम पत्याब थाचउ। 22 तिगदा भिसम फट्टा ख्रीष्टगदेदेन फट्टा अगमवक्तागदे थोन्ना। ओच्छे थेनीगदेसे खम्तेधोना परमेश्वरसे धम्बा म्हिगदेदा झुक्वाब लबाला लागिरी उदेकला चिनुगदेदेन उदेकला गेगदे लसी उन्ना। 23 तर एनीगदे चा होशियार लसी चिउ। डाड् एनीगदेदा जम्मान ताम डाच्छाहेन्सेन पाड्सी पिन्बा मुला।

प्रभु येथू फेप्लबा धुड

मत्ती २४:२९-३१; लूका २१:२५-२८

24 “थे दुखला धुड जिन्माहेन्से

धिनीसे य्हाल पिन्बा खलाला

ओच्छे लनीला य्हाल म्हाला। ††

25 जमाहेन्से मुला शक्तिगदे याडयोड तसी

सुक सार जम्मान ताड्ला। †††

26 जमाहेन्से म्हिगदेसे परमेश्वरसे पुड्खबा म्हिदा घ्रेन शक्तिदेन य्हाल य्हालरी खसुरी खबान लबा म्राड्ला। §27 ओच्छे थेसे स्वर्गदूतगदेदा जम्बुलिडदेन मुला जम्मान ग्लारी पुड्ला। जमाहेन्से थे स्वर्गदूतगदेसे परमेश्वरसे धम्बा जम्मान म्हिगदेदा ग्ला गिकरी पोप लला।”

अज्जीरला दोड च्यासी लोप्लो:बा ताम

मत्ती २४:३२-३५; लूका २१:२९-३३

28 येथूसे थेनीगदेदा दो:सी चुह्ण्ड भिसी सुड्जी, “एनीगदेसे अज्जीरला दोडदा च्यासी थेग्याम तिगै ताम लोणो। थेला हाँगागदेरी भा भुमैछ्याम छेप्ला छबा ला वाड्जी भिसी एनीगदेसे था याड्गुला। 29 थेह्ण्ड लसीन डाड् पाड्बा तामगदे तबा म्राड्हाहेन्से परमेश्वरसे पुड्खबा म्हि खबा धिन खसी जिन्जी भिबा ताम एनीगदेसे था याड्गो। 30 च्यागो, एनीगदेसे डाला ताम इयान्गो, चु जम्मान ताम पूरा आततेधोना दान्देला म्हिगदे आसि। 31 मुदेन जम्बुलिड म्हासी निसैनोन डाला बचन खाड्मै आम्हा।

† 13:11 मत्ती १०:१७-२०; लूका १२:११-१२ †† 13:13 मत्ती १०:२२ †

13:14 दानि ९:२७; ११:३१; १२:११ †† 13:15 लूका १७:३१ †† 13:19 दानि १२:१; उन्बा ७:१४ ††† 13:24 यथै १३:१०; इज ३२:७; योए २:१०, ३१; ३:१५; उन्बा ६:१२ ††† 13:25 यथै ३४:४; योए २:१०; उन्बा ६:१३ § 13:26 दानि ७:१३; उन्बा १:७

होशियार तसी चितोःबा
मत्ती २४:३६-४४

32 “थे दुखला धिनदेन धुइ खाइमा खला भिसी स्वर्गदूतदाएनोन था आरे ओच्छे डा परमेश्वरला झादाएनोन था आरे। थे ताम परमेश्वर आबादा जे था मुला। 33 थेतबासेलमा एनीगदे होशियार तसी छोर्सी चिउ। ओच्छे प्रार्थना लउ, तिगदा भिसम थे धुइ खाइमा खला भिसी एनीगदेदा था आरे।

34 “चु ताम चा मालिकसे हाडला दिम च्याबा म्हिदा क्यारमार ज्यना लसी च्यागो, ओच्छे नोकरगदेदाएनोन हाड हाडला गे ज्यना लसी लउ भिसी कुल्सी हाड चा विदेशरी निबा ह्इबान हिन्ना। 35 थेतबासेलमा एनीगदे छोर्सी चिउ, तिगदा भिसम मालिक खाइमा खला भिसी एनीगदेदा था आरे। थे ड्यसे खखम्ला, म्हुन गुडरी खखम्ला, नागा क्राबा धुइरी खखम्ला, स्होरीनोन खखम्ला खजिबै धुइरीनोन थे खखम्ला। 36 तर एनीगदेदा था आपिन्ना तिक्खुरीन खमा एनीगदेदा म्हेर्सी चिबा स्याप्ला। 37 थेतबासेलमा एनीगदे छोर्सी चिउ, डाइ एनीगदेदा पाइबा चु ताम जम्मादान पाइबा मुला।”

येशूदा साइबारी सल्लाह लबा

मत्ती २६:१-५; लूका २२:१-२; यूहन्ना ११:४५-५३

14 मिश्र यहुल्साग्याम फेसी खबा धिनदा ढन्सी धड्बा चाडदेन खमीर आयुना गेड चसी धड्बा चाडला न्हीरे डाच्छाकुनु परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे येशूदा चुड्सी साइबारी दाउ च्यासी भ्रमुबा। 1†2 तिगदा भिसम “य्हाडला चाडला धुइरी चा चुड्बारी आत। चाडला धुइरी चुड्जी भिसम म्हिगदेसे हुल दडगा लला” भिसी थेनीगदे हाड हाड न्हडरी ताम लजी।

येशूदा अत्तर फोर्बा

मत्ती २६:६-१३; यूहन्ना १२:१-८

3 येशू बेथानिया भिबा नाम्सांला कोरे खबा सिमोनला दिमरी सोल छ्योइबान लबा धुइरी म्प्रिडम्हेमे गिकसे सिङ्गमरमरला ताडरी ल्हानान महँगो खाल्ला अत्तर भसी खजी। थे अत्तर जटामसी भिबा दोडला टाग्याम स्होबा मुबा। थेसे थे ताडनोन थिसी येशूला थोबोरी युजी। 4 थेसे चुहड् लबा म्प्राइसी स्हान्दो म्हिगदेसे नाआखम्ना “चुदे महँगो अत्तर ओह्इडनोन तिगदा खेरो भ्याड्बा” भिसी हाड हाड न्हडरी ताम लजी। 5 बरु चु चूड्सी खबा टाडगा प्राडबोगदेदा पिन्सै तसेला। चु चूड्सम ग्यार्जा सोम म्हुइला डबल खसेला मुबा” चुहड् लसी थे म्प्रिडम्हेमेदा थेनीगदेसे बड्जी।

6 तर येशूसे थेनीगदेदा चुहड् भिसी सुड्जी, “थालउ, एनीगदेसे तिगदा चुदा कचकच लबा? चुसे मी डाला लागिरी ज्यबा गे लबा मुला। 7 च्यागो, प्राडबोगदे मी सदन एनीगदेदेन छ्याम तला। ओच्छे एनीगदेसे थेनीगदेदा खजिबै धुइरी ह्नु लखम्ला। तर डा मी सदन एनीगदेदेन छ्याम आत। 8† चु म्प्रिडम्हेमेसे जे लखम्जी, थेनोन थेसे लजी। डाला ल्हुइ धुसर्सी थान्बाला लागिरी चुसे अत्तर फोर्सी डाच्छान ठीक लबा मुला। 9 च्यागो, एनीगदेसे डाला ताम ड्यान्गो, जम्बुलिडला जुन जुन ग्लारी थार्बा पिन्बा समाचार थे:ना लला, थे, थे ग्लारी चु म्प्रिडम्हेमेसे लबा गे ढन्बाला लागिरी थेला ताम लला।”

यहूदा इस्करियोतसे लबा सल्लाह

मत्ती २६:१४-१६; लूका २२:३-६

10 जमाहेन्से येशूला च्युक न्ही चेलागदे न्हडला यहूदा इस्करियोत भिबा चेला गिक परमेश्वरला मन्दिररी पूजा लबा मुल म्हिगदे मुबा ग्लारी निसी येशूदा चुड्सी पिन्ना भिसी सल्लाह लजी। 11 चु ताम थे:सी परमेश्वरला मन्दिररी पूजा लबा मुल म्हिगदे ल्हानान ताड्सी यहूदा इस्करियोतदा टाडगा पिन्ना भिसी कबुल लजी। थे धुइहेन्से थेसे येशूदा चुड्सी पिन्बाला लागिरी दाउ च्यासी भ्रजी।

येशूसे भोज तयार लउ भिसी कुल्बा

मत्ती २६:१७-२५; लूका २२:७-१४, २१-२३; यूहन्ना १३:२१-३०

12 खमीर आयुना गेड चसी धड्बा चाडला शुरुला धिनकुनु यहूदीगदेसे ग्यु बोगो फुल्लो:मुबा। येशूला चेलागदेसे येशूदा “हाडला लागिरी डन्से मिश्र यहुल्साग्याम फेसी खबा धिनदा ढन्सी धड्बा चाडला भोज खानड ठीक लउ?” भिसी ड्योइजी।

13 येशूसे हाडला चेला न्हीदा “एनीगदे शहररी निउ, एनीगदेसे थेरी दर्बुडरी क्युइ पुड्सी निबा म्हि गिकदा स्याप्ला। थेनोन म्हिला लिच्छा लिच्छा निउ। 14 ओच्छे थे म्हि जुन दिमरी वाड्ला, थेनोन दिमला धनीदा ‘डाइ डाला चेलागदेदेन छ्याम चिसी मिश्र यहुल्साग्याम फेसी खबा धिनदा ढन्सी धड्बा चाडला भोज चबा कोठा खानड मुला?’ भिसी गुरुसे ड्योइबा मुला भिउ। 15 एनीगदेदा थेसे डाच्छान जेना लसी थान्बा तलाथोला घेन कोठा उन्सी पिन्ना। एनीगदेसे थेरीन य्हाडला लागिरी भोज ठीक लउ” भिसी कुल्जी। 16 जमाहेन्से चेलागदे शहररी निबान लबा धुइरी येशूसे सुड्बा ह्इडनोन स्याप्ली। ओच्छे थेनीगदेसे थेरीन मिश्र यहुल्साग्याम फेसी खबा धिनदा ढन्सी धड्बा चाडला भोज ठीक लजी। 17 ओच्छे ड्यसे तमाहेन्से येशू हाडला च्युक न्ही चेलागदेदेन छ्याम फेप्वजी। 18 भोज सोल्बान लबा धुइरी येशूसे हाडला चेलागदेदा “च्यागो, एनीगदेसे डाला ताम ड्यान्गो, एनीगदे न्हडला डादेन छ्यामनोन चबा गिकसे डादा म्हिगदेला यारी जिम्मा पिन्ना” भिसी सुड्जी। #

19 चु ताम थे:माहेन्से चेलागदेदा दुख इहम्सी, “थे म्हि डानोन हिन्ना?” भिसी पालो पालो लसी येशूदा ड्योइजी।

20 येशूसे थेनीगदेदा “एनीगदे च्युक न्ही न्हडला गिकसे खार्बारी डादेन छ्यामनोन गेड तुइसी चबान मुला। 21 परमेश्वरला बचनरी भिबा ह्इडनोन परमेश्वरसे पुड्खबा म्हि मी सिनोन तो:ला। तर जुन म्हिसे परमेश्वरसे पुड्खबा म्हिदा चुड्सी म्हिला यारी जिम्मा पिन्ना, थेसे परमेश्वरयाम खाह्इबा लोड्बा खबा सजाय याड्ला। बरु थे मी न्हनोन आन्हबा हिन्सम ज्यबा तसेला मुबा” भिसी सुड्जी।

प्रभु भोज

मत्ती २६:२६-३०; लूका २२:१५-२०; १ कोरिन्थी ११:२३-२५

22 थेनीगदेसे चबान लबा धुइरी येशूसे यारी गेड किन्सी परमेश्वरदा धन्यवाद पिन्बान प्रार्थना लजी। ओच्छे गेड क्युइसी चेलागदेदा पिन्बान, “ना! चु डाला ल्हुइ हिन्ना” भिसी सुड्जी। 23 जमाहेन्से येशूसे खोरेरी मुबा अडगुरला निडगु थोसी परमेश्वरदा धन्यवाद पिन्सी चेलागदेदा पिन्जी। ओच्छे थेनीगदेसे थे खोरेग्याम थुड्जी। 24 जमाहेन्से येशूसे थेनीगदेदा “चु ल्हानान म्हिगदेला लागिरी बगब तबा डाला का हिन्ना। डाला कानोन परमेश्वरसे म्हिगदेदा लबा छार कबुल हिन्ना। 25† च्यागो, एनीगदेसे डाला ताम ड्यान्गो, परमेश्वरला यहुल्सारी अडगुरला छार निडगु थुड्बा धुइ आखतेधोना डाइ चु अडगुरला निडगु आथुड्” भिसी सुड्जी।” 26 ओच्छे थेनीगदे परमेश्वरदा धन्यवादला व्हाइ गिक गोसी जैतून भिबा गडरीक्यार भ्रजी।

पत्रुससे येशूदा खलाला भिसी पाइबा ताम

मत्ती २६:३१-३५; लूका २२:३१-३४; यूहन्ना १३:२६-३८

27 येशूसे हाडला चेलागदेदा चुहड् भिसी सुड्जी, “एनीगदे जम्मासेन डादा खलासी यार्ला। तिगदा भिसम परमेश्वरला बचनरी

‘डाइ गोठालोदा साइला

ओच्छे ग्युगदे ससा बडबड तसी यार्ला’ भिसी भिबा मुला। ##

28 तर डादा सिबाग्याम सोना लमाहेन्से एनीगदे भन्दा डाच्छा डा गालीलरी निला।” §

29 येशूसे चुहड् सुड्छ्याम पत्रुससे येशूदा “जम्मासेन हाडदा खलासी यार्लेनोन डाइ हाडदा खाइमै आखला” भिसी भिजी।

† 13:34 लूका १२:३६-३८ †† 14:1 प्रस्था १२:१-२७ † 14:3 लूका ७:३७-३८ † 14:7 व्यव १५:११

14:18 भजन ४१:९ ††† 14:24 प्रस्था २४:८; यर्मि ३१:३१-३४ ††† 14:27 जक १३:७ § 14:28 मत्ती २८:१६

30 येशूसे पत्रुसदा “च्यागो, एसे डाला ताम ड्यान्गो, न्हडगर स्होरी न्हीरेम नागा क्राबा भन्दा डाच्छा एसे सोमरेमधोना डा येशूदेन छ्याम भ्रबा म्हि हिन्नोन आहिन भिसी भिला” भिसी सुड्जी।

31 तर पत्रुससे, “आहिन, डा हाडदेन छ्याम सितो:सैनोन डाइ हाडदा आखला” भिसी भिजी। ओच्छे स्हान्दो चेलागदेसेनोन थेह्ज्जोन भिजी।

गेतसमनी भिबा ग्लारी येशूसे लबा प्रार्थना

मत्ती २६:३६-४६; लूका २२:३९-४६

32 जमाहेन्से थेनीगदे गेतसमनी भिबा ग्लारी फेप्जी। ओच्छे येशूसे हाडला चेलागदेदा “डाइ प्रार्थना लतेधोना एनीगदे चुरीन चिउ” भिसी सुड्जी।

33 येशूसे पत्रुस, याकूबदेन यूहन्नादा हाडदेन छ्याम भोर्जी। ओच्छे येशूला सेम भोल्सी ल्हानान दुख तबारी छ्याइजी। 34 ओच्छे येशूसे थेनीगदेदा “डाला सेम क्रोसी डा सिबा तेबान तबा मुला। थेतबासेलमा एनीगदे चुरीन डा ह्ज्ज लसी छोर्सी चिउ” भिसी सुड्जी। 35 जमाहेन्से येशू जजाकी क्याथाड फेप्सी सरी ख्लुप तसी, “डाथोरी खबारी छ्याइबा चु दुख तसम डाइ नाआतो:गे” भिसी प्रार्थना लबारी छ्याइजी। 36 येशूसे चुह्ज्ज भिसी प्रार्थना लजी, “आबा, हाडसे लआखम्बा ताम तिगै आरे, थेतबासेलमा तसम डादा चु दुखग्याम फेसी पिन्गो। तर डाइ म्हन्बा अन्धार आहिन, हाडसे म्हन्बा अन्धार तगै।”

37 जमाहेन्से येशू हाडला चेला सोम मुबा ग्लारी दो:सी फेप्खमा थेनीगदे म्हेर्सी चिबा स्याप्जी। येशूसे पत्रुसदा चुह्ज्ज भिसी सुड्जी, “सिमोन, तिग ए म्हेर्सी चिबा? ए घण्टा गिक सुत्ते छोर्सी चिआखम्नी? 38 दाहेन्से एनीगदे पापरी फसब आतबाला लागिरी छोर्सी प्रार्थना लसी चिउ। च्यागो, एनीगदेला आत्मा मी तयार मुला, तर ल्हुइ चा कमजोर मुला।”

39 येशू दो:सी तिरेम थे ग्लारी फेप्सी डाच्छाला ह्ज्ज लसीन प्रार्थना लजी। 40 ओच्छे चेलागदे मुबा ग्लारी दो:सी फेप्खमा चेलागदे म्हेर्सी चिबा स्याप्जी। म्हेर्बा खबासे लमा थेनीगदेसे मीनोन ठोड्आखम्नी, ओच्छे तिग भितो:बा थे थेनीगदेदा था आतनी।

41 येशू सोमरेमला पालोरी फेप्खसी चेलागदेदा चुह्ज्ज भिसी सुड्जी, “अझन एनीगदे म्हेर्सी ब्लप्बा न्हबान मुला? दाहेन्से म्हेर्बा धुइ निजी। च्यागो, परमेश्वरसे पुड्खबा म्हिदा चुड्सी पापीगदेला यारी जिम्मा पिन्बा धुइ तसी जिन्बा मुला। 42 रे:गे, निड! च्यागो, डादा स्हान्दोला यारी जिम्मा पिन्बा म्हि खसी जिन्बा मुला।”

येशूदा चुड्बा

मत्ती २६:४७-५६; लूका २२:४७-५३; यूहन्ना १८:३-१२

43 येशूसे चु ताम सुड्छ्याम च्युक न्ही चेलागदे न्हडला यहूदा भिबा चेलादेन छ्याम कडीदेन तरवार थोबा म्हेला हुल धोखजी। थेनीगदेदा परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे ओच्छे यहूदी गन्बागदेसे पुड्खबा मुबा। 44 येशूदा चुड्बारी खबा म्हिगदेदा यहूदासे “जुन म्हिदा डाइ च्योक लला, थेनोन येशू हिन्ना, थेदा चुड्सी क्युर लसी भोगो” भिसी पाड्बा मुबा। 45 ओच्छे यहूदा येशू मुबा ग्लारी सरासर निसी, “गुरु” भिसी येशूदा च्योक लजी। 46 जमाहेन्से थेनीगदेसे येशूदा चुड्सी खीसी भोर्जी। 47 तर थेरी राप्सी चिबा गिकसे तरवार ते:सी परमेश्वरला मन्दिररी पूजा लबा मुल म्हेला नोकरला नाब्यड च्वाट्टन थाजी।

48 येशूसे थेनीगदेदा “एनीगदे तिगदा य्होदा चुड्बारी खबा ह्ज्ज लसी कडी तरवार थोसी खबा? 49 खाड, डाइ एनीगदेला गुडरी म्हिगदेदा धिन धिनोन परमेश्वरला मन्दिररी लोप्सी चिबा धुडरी एनीगदेसे डादा आचुड्नी। तर परमेश्वरला बचनरी श्रिबा अन्धार पूरा तगै भिसीन चुह्ज्ज तबा हिन्ना” भिसी सुड्जी। 50 जमाहेन्से चेलागदे जम्मासेन येशूदा खलासी यार्जी।

51 तर सुतिला क्वान क्वान्बा भ्योन गिक येशूला लिच्छा लिच्छा भ्रवान मुबा। थेनीगदेसे थेदाएनोन चुड्जी। 52 ओच्छे थेनीगदेसे थेदा चुड्जा थेला क्वान जे स्याप्जी। तर थे म्हि हाडला क्वानोन खलासी लिगन्डीन यार्जी।

येशूदा यहूदीगदेला सभारी भोर्बा

मत्ती २६:५७-६८; लूका २२:५४-५६, ६३-७९; यूहन्ना १८:१३-१४, १९-२४

53 जमाहेन्से येशूदा परमेश्वरला मन्दिररी पूजा लबा मुल म्हि मुबा ग्लारी भोर्जी। थेरी पूजा लबा म्हिगदेदेन यहूदी गन्बागदे ओच्छे यहूदी धर्मगुरुगदेएनोन पोप तबा मुबा। 54 ओच्छे पत्रुस चा येशूला जजाकी लिच्छा लिच्छा निसी परमेश्वरला मन्दिररी पूजा लबा मुल म्हेला दिमला खाडगाधोना निजी, ओच्छे पालेगदेदेन छ्याम मे दूसी चिजी।

55 जमाहेन्से परमेश्वरला मन्दिररी पूजा लबा मुल म्हिगदेदेन यहूदी सभाला जम्मान म्हिगदेसे येशूदा साड्बाला लागिरी प्रमाण म्हाड्बारी छ्याइजी। तर थेनीगदेसे तिगै प्रमाण आस्याप्नी। 56 थेरी ल्हानान म्हिगदेसे येशूला बिरोध लसी लुसीला ताम लजी। तर खालैला ताम आढिवनी।

57 जमाहेन्से कोइ कोइ म्हिगदे रे:सी येशूला बिरोध लबान चुह्ज्ज भिसी लुसीला ताम पाड्बारी छ्याइजी, 58 “चु म्हिसे ‘डाइ म्हिसे स्होबा चु परमेश्वरला मन्दिरदा फुप्सी सोमरेरीन म्हिसे आस्होबा परमेश्वरला मन्दिर स्होला भिसी चुसे भिबा डन्से थे:बा मुला।” ††59 ओते लसैनोन थेनीगदेला ताम आढिवनी।

60 परमेश्वरला मन्दिररी पूजा लबा मुल म्हिगदे जम्मान म्हिगदेला डाच्छापट्टि राप्सी येशूदा “एसे तिगदा जोहाब आपिन्बा? चु म्हिगदेसे एला बिरोधरी पाड्बा तामला बारेरी एदा तिगै पाड्सेला आरे?” भिसी इयोइजी। 61 तर येशूसे तिगै जोहाब आपिन्ना कुटिसी स्हूजी। परमेश्वरला मन्दिररी पूजा लबा मुल म्हिसे येशूदा दो:सी, “तिग ए परमेश्वरला झा थार्बा पिन्बा ख्रीष्ट हिन्ना?” भिसी इयोइमा, 62 “डा हिन्ना, परमेश्वरसे पुड्खबा म्हिदा हाडनीसे शक्तिशाली परमेश्वरला दाहिने छ्यापट्टि चिबादेन स्वर्ग्याम खसुरी खबान लबा म्हाड्बाला” भिसी येशूसे सुड्जी। †

63 चु ताम थे:सी परमेश्वरला मन्दिररी पूजा लबा मुल म्हिसे हाडला क्वान टेबान, “दाहेन्से य्होडा अर्गु प्रमाण तिगदा तो:जी?” भिसी भिजी। 64 “चुसे हाडसे हाडदान परमेश्वर स्होसी पाड्बा ताम य्होडासे थे:नोन थे:जी, दाहेन्से एनीगदेला तिग बिचार मुला?” भिमा, थेरी मुबा जम्मान म्हिगदेसे “चु म्हि साड्बान तो:बा म्हि हिन्ना” भिसी भिजी। ††

65 थेरी मुबा म्हिगदे न्हडला कोइ कोइ म्हिगदेसे येशूदा थो स्वाबारी छ्याइजी। ओच्छे येशूला मी घप्सी तोबान, “लु, अगमवाणी पाड्गो” भिसी इयोइजी। जमाहेन्से थेरी मुबा स्हान्दो सिपाहीगदेसेनोन येशूदा तोबारी छ्याइजी।

पत्रुससे डा येशूला चेला आहिन भिसी पाड्बा

मत्ती २६:६९-७५; लूका २२:५६-६२; यूहन्ना १८:१५-१८, २५-२७

66 पत्रुस खाडगारी चिबान लमा परमेश्वरला मन्दिररी पूजा लबा मुल म्हेला नोकरस्या गिक पत्रुस मुबा ग्लारी खजी। 67 ओच्छे पत्रुसदा मे दूबान लबा म्हाड्सी थे नोकरस्यासे “एएनोन नासरतला येशूदेन छ्यामनोन मुबा आहिन?” भिसी इयोइमा, 68 “एसे खाल्ला ताम लबा, डादा तिगै था आरे” भिसी पत्रुस खाडगाला म्प्रापरीक्यार निजी। थे धुडरी नागा क्राजी।

69 पत्रुसदा म्प्रापरी चिबान लबा म्हाड्सी दो:सी थे नोकरस्यासे स्हान्दो म्हिगदेदा “चु म्हि मी येशूला चेला हिन्ना” भिसी भिजी। 70 पत्रुससे दो:सी आहिन भिसी भिजी। जजाकी लिच्छा दो:सी थेरी राप्सी चिबा म्हिगदेसे पत्रुसदा “पक्कान, ए येशूला चेला हिन्ना। तिगदा भिसम ए गालीलला म्हि हिन्ना” भिसी भिजी।

71 पत्रुससे दो:सी, “डाइ लुसीला ताम पाड्बा हिन्सम परमेश्वरला सजाय डाथोरी खड् भिसी ग्रान फाबान हाडसे भिबा म्हिदा डाइ डोसेबा आरे” भिसी भिजी।

72 पत्रुससे थेह्ज्ज भिमैछ्याम दो:सी नागा क्राजी। “न्हीरेम नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी येशूसे सुड्बा ताम ढन्सी पत्रुस घ्वाँ घ्वाँ क्राजी।

† 14:49 लूका १९:४७; २१:३७

†† 14:58 यूह २:१९ † 14:62 दानि ७:१३ †† 14:64 लेवी २४:१६

येशूदा पिलातसला डाच्छापट्टि भोर्बा

मती २७:१-२, ११-२६; लूका २३:१-३, १८-२५; यूहन्ना १८:२८-४०; १९:१६

15 स्थोरीन परमेश्वरला मन्दिररी पूजा लबा मुल म्हिगदेदेन यहूदी गन्बागदे ओच्छे थेरी मुबा यहूदी धर्मगुरुगदेदेन छ्याम जम्मान म्हिगदे सल्लाह लजी। ओच्छे थेनीगदेसे येशूदा खीसी पिलातस भिबा रोमी अञ्चलाथीश मुबा ग्लारी भोर्सी जिम्मा पिन्जी।

2 जमाहेन्से पिलातससे येशूदा “तिग ए यहूदीगदेला ग्ले हिन्ना?” भिसी इयोइमा, येशूसे “थे मी हाडसेन सुड्बा मुला” भिसी जोहाब पिन्जी। 3 परमेश्वरला मन्दिररी पूजा लबा मुल म्हिगदेसे येशूदा ल्हानान तामरी दोष लबाला लबान लजी। 4 थेतबासेलमा पिलातससे येशूदा दोःसी, “एला तिगै जोहाब आरे? च्यागो, थेनीगदेसे एला बिरोध लसी एदा ल्हानान दोष लबान मुला” भिसी भिजी। 5 तर येशूसे तिगै जोहाब आपिन्नी। चु म्नाइसी पिलातस उदेक तजी।

6 मिश्र यहूसाग्याम फेसी खबा धिनदा ढन्सी धड्बा चाडला धुइरी पिलातससे म्हिगदेसे धम्बा इयाल्खानरी मुबा म्हि गिकदा पुडमुबा। 7 थे धुइरी बारब्बा भिबा आज्यबा गे लबा म्हि गिक इयाल्खानरी मुबा। थेसे आन्दोलनरी म्हि साड्बा मुबा। 8 ओच्छे म्हिला हुल खसी पिलातसदा “निबा दिडरी हड् चु पाल्सेनोन इयाल्खानरी मुबा म्हि गिकदा पुड्सी पिन्गो” भिसी भिजी। 9 म्हिगदेसे चुहड् भिमाहेन्से पिलातससे “डाड् चु यहूदीगदेला ग्लेदा ख्लासी पिन्नी भिसी एनीगदेसे म्हन्बा मुला?” भिसी इयोइजी। 10 तिगदा भिसम परमेश्वरला मन्दिररी पूजा लबा मुल म्हिगदेसे डाह लसी येशूदा डा मुबा ग्लारी भबा हिन्ना भिबा ताम पिलातसदा था मुबा।

11 तर परमेश्वरला मन्दिररी पूजा लबा मुल म्हिगदेसे स्थान्दो म्हिगदेदा थीसी, “येशूदा आहिन, बारब्बादा ख्लासी पिन्गो!” भिपुड्जी। 12 ओच्छे पिलातससे “चु यहूदीगदेला ग्ले भिबा म्हिदा डाड् तिग लउ?” भिसी इयोइमा, 13 “चुदा कुसरी टाँगब लसी साड्गो!” भिसी यहूदीगदे क्रिड्बारी छ्याइजी।

14 पिलातससे “तिगदा? चुसे थेहड्बा आज्यबा गे तिग लबा मुला?” भिसी इयोइजी।

तर थेनीगदेसे इन क्रिड्बान, “चुदा कुसरी टाँगब लसी साड्गो” भिसी भिजी।

15 पिलातसदा थे म्हिला हुलदा ताड्ना लबा सेम मुबा। थेतबासेलमा थेसे बारब्बादा पुड्जी। तर येशूदा चा कोर्सासे तोसी कुसरी टाँगब लसी साड्बाला लागिरी रोमी सिपाहीगदेदा जिम्मा पिन्जी।

सिपाहीगदेसे येशूदा खिसी लबा

मती २७:२७-३१; यूहन्ना १९:२-३

16 जमाहेन्से सिपाहीगदेसे येशूदा सिपाहीगदेला हाकिम चिबा प्रेटोरियन भिबा दिम न्हडरी भोर्जी। ओच्छे जम्मान सिपाहीगदेदा इयोइजी। 17 ओच्छे थेनीगदेसे ग्लेला हड्बान वाला वाला पिड्गै छोनना क्वान क्वान्सी पिन्जी। ओच्छे थेनीगदेसे पुजुला फेटा स्होसी येशूदा थोइसी पिन्जी। 18 जमाहेन्से थेनीगदेसे येशूदा “लास्सो यहूदीगदेला ग्ले, प्याफुल्ला” भिबान सलाम लजी। 19 ओच्छे थेनीगदेसे येशूदा थो स्वाबान माला कडीसे थोबोरी तोसी प्या लजी। 20 थेहड् लसी येशूदा खिसी लमाहेन्से थेनीगदेसे थे वाला वाला पिड्गै छोनना क्वान स्युसी पिन्जी। ओच्छे येशूदा थेलान क्वान क्वान्सी कुसरी टाँगब लसी साड्बारी भोर्जी।

येशूदा कुसरी टाँगब लबा

मती २७:३२-४४; लूका २३:२६-४३; यूहन्ना १९:१७-२७

21 थेनीगदेसे येशूदा भोर्बान लबा धुइरी कुरेनी भिबा ग्लाला सिमोनदा खबान लबा स्याप्जी। थे अलेक्जेन्डरदेन रूफसला आबा मुबा। जमाहेन्से सिपाहीगदेसे थेदा कर लसी येशूला कुस पुड्पुड्जी। 22 ओच्छे थेनीगदेसे येशूदा गलगथा भिबा ग्लारी भोर्जी। गलगथा भिबा चा “खप्परला ग्ला”

† 15:21 रोमी १६:१३

हिन्ना। 23 गलगथारी धोमाहेन्से थेनीगदेसे येशूदा अड्गुरला निड्गुरी लठेब तबा मन †† युसी पिन्जी। तर येशूसे थे आसोल्नी। 24 जमाहेन्से थेनीगदेसे येशूदा कुसरी टाँगब लजी। ओच्छे थेनीगदेसे येशूला क्वान भो लसी खाल्दा खजिबा परब तबा चीम भिसी हाड हाड न्हडरी चिट्टा युजी। †

25 येशूदा कुसरी टाँगब लबा धुइरी स्होला नौ बजब तमुबा। 26 येशूदा दोष लबा तामरी “चु यहूदीगदेला ग्ले” भिसी भिबा मुबा। 27 थेनीगदेसे येशूदा कुसरी टाँगब लबा धुइरी य्हो न्हीदाएनोन गिकदा दाहिनेपट्टि गिकदा देब्रेपट्टि कुसरी टाँगब लजी। 28 परमेश्वरला बचनरी भिबा ताम चुहड् लसी पूरा तजी, “थेदा अपराधीगदेदा हड्बान लजी।” †† †

29 थेग्याम भ्रबा म्हिगदेसे थोबो य्होड्बान, “लु, परमेश्वरला मन्दिर फुप्सी सोमरेरीन दोःसी स्होला भिबा म्हि दान्दे एसे हाडसे हाडदान जोगब लउ, ओच्छे कुसग्याम मार फापो” भिसी येशूदा खिसी लजी। †††1 थेहड् लसीन परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसेएनोन थेनीगदे हाड हाड न्हडरी, “चुसे स्थान्दोदा चा जोगब लखम्जी। तर हाडसे हाडदा चा जोगब लआखम्नी। चु इस्राएलीगदेला ग्ले थार्बा पिन्बा ख्रीष्ट कुसग्याम मार फाप्सी खगै, ओच्छे जे य्हाडसे थेदा विश्वास लला!” भिसी ठट्टा लजी। ओच्छे येशूदेन छ्याम कुसरी टाँगब लबा म्हिगदेसेनोन येशूदा खिसी लजी।

येशू सिबा

मती २७:४५-५६; लूका २३:४४-४९; यूहन्ना १९:२८-३०

33 धिनना बाह्न बजेहेन्से तीन बजेधोना यहूल्सा नाड्बान धोपधोप तजी। 34 ड्यसे तीन बजेरीक्यार येशूसे ग्रेन काइरी क्रिड्बान, “इलोड इलोड लामा सबखथनी?” भिसी सुड्जी। चु भिबा चा “डाला परमेश्वर, डाला परमेश्वर, हाडसे डादा तिगदा खलाबा?” भिबा हिन्ना। †††35 चुहड् लसी क्रिड्बा म्नाइसी थेरी राप्सी चिबागदे न्हडरी कोड कोडसे “च्यागो, चुसे मी एलियादा गा इयोइबा चीम” भिसी भिजी। 36 ओच्छे थेनीगदे न्हडरी गिकसे चा यार्सी निसी अड्गुरला कम्बा निड्गुरी क्वानगेन ब्लुम्सी माला कडीरी खीसी येशूदा ख्वामा, “भ्रान्गो, भ्रान्गो, चुदा एलिया खसी कुसग्याम मार तेःला वा? च्यागे” भिसी भिजी। †

37 जमाहेन्से ग्रेन काइरी क्रिड्सी येशूला सा निजी। 38 थेनोन धुइरी परमेश्वरला मन्दिर न्हडरी मुबा पर्दा हाडनोन तोरहेन्से मारधोना पख्ले न्ही तसी ढेजी। ††39 चुहड् लसी येशूला सा निबा म्नाइसी थेरी कुसला डाच्छापट्टि राप्सी चिबा रोमी कप्तानसे “चु मी साँच्चिन परमेश्वरला झानोन चीम” भिसी भिजी।

40 थेरी कोड कोड म्रिड्मेगेदेसे थारेड्ग्याम च्यासी चिबा मुबा। थेनीगदे न्हडरी मरियम मग्दलिनी, जजा याकूबदेन योसेफला आमा मरियम ओच्छे सलोमी मुबा। 41 येशू गालीलरी मुबा धुइरी थेनीगदे येशूला लिच्छा लिच्छा भ्रसी येशूला सेवा लमुबा। ओच्छे थेरी यरूशलेमधोना येशूदेन छ्याम खबा ल्हानान म्रिड्मेगेदेएनोन मुबा। †††

येशूदा धुर्सारी थान्बा

मती २७:५७-६१; लूका २३:५०-५६; यूहन्ना १९:३८-४२

42 चु धिन ब्लप्बा न्हबा धिनना डाच्छाकुनु मुबा। 43 थे धिनकुनु ड्यसे अरिमाथिया भिबा शहरला योसेफ भिबा म्हि आलोड्बान पिलातस मुबा ग्लारी निसी येशूला लास हीजी। थे योसेफ यहूदी सभाला मुल सदस्या मुबा। थेएनोन परमेश्वरसे शासन लबा धुइ खला भिसी भ्रान्सी चिबा मुबा।

44 येशू सिजी भिबा ताम थेःसी पिलातस उदेक तजी। ओच्छे थेसे रोमी कप्तानदा हाड मुबा ग्लारी इयोइसी येशू साँच्चिन सिबा हिन्ना कि आहिन भिसी इयोइबा छार्बा लजी। 45 रोमी कप्तानसे येशू साँच्चिन सिबा हिन्ना भिमाहेन्से पिलातससे येशूला लास योसेफदा भोर्बारी पिन्जी। 46 योसेफसे

†† “लठेब तबा मन” ग्रीक बाइबलरी चुदा मूर् भिसी भिबा मुला। † 15:24 भजन २२:१८ †† चु पदला ताम ल्हानान हड्बा ग्रीक बाइबलरी भिबा आरे। †† 15:28 यशै ५३:१२ ††† 15:29-30 भजन २२:७; १०९:२५; मर्कू १४:५८; यूह २:१९ ††† 15:34 भजन २२:१ § 15:36 भजन ६९:२१ †† 15:38 प्रस्था २६:३१-३३ ††† 15:41 लूका ८:२-३

ज्यबा खाल्ला सुतिला क्वान ग्लुसी भजी। ओच्छे येशूला लास कुसग्याम मार तेःसी थे सुतिला क्वानरी रिल्ली। थेग्याम येशूला लासदा भोर्सी युडबाला पहरारी ठ्वाइसी स्होबा धुर्सा न्हडरी भोर्सी थान्जी। जमाहेन्से युडबा ब्लिड्बान भसी धुर्साला म्नापरी थान्जी।⁴⁷ मरियम मग्दलिनीदेन योसेफला आमा मरियमसे येशूला लास थान्बा ग्ला च्यासी चिमुबा।

येशू सिबाग्याम सोबा

मत्ती २८:१-८; लूका २४:१-१२; यूहन्ना २०:१-१०

16 ब्लप्बा न्हबा धिन निमाहेन्से थेनोन धिनकुनु ड्यसे मरियम मग्दलिनी, याकूबला आमा मरियमदेन सलोमीसे येशूला लासरी फोर्बाला लागिरी ज्यबा बास्ना खबा छ्युगु ग्लुजी।² न्हडगरदड आइतवार स्होरी धिनी फेबा धुइरी थेनीगदे येशूदा थान्बा धुर्सारी निजी।³ “य्हाडदा थे धुर्साला म्नापरी मुबा युडबा खाल्से ब्लिड्सी पिन्ना?” भिसी थेनीगदे ग्यामरीक्यार ताम लबान निजी।⁴ तर धुर्साला डाच्छापट्टि धोसी च्यामा, थे ग्रेन युडबा डाच्छान ब्लिड्सी थान्बा म्नाड्जी।⁵ थेनीगदे धुर्सा न्हडरी वाड्सी च्यामा, धुर्साला दाहिनेपट्टि तार क्वान क्वान्सी चिबा भ्योन म्हे गिकदा म्नाड्जी। चु म्नाड्सी थेनीगदे लोड्जी।⁶ तर थे भ्योन म्हेसे थेनीगदेदा “थालोङ्गो! कुसरी साइबा नासरतला येशूदा एनीगदेसे म्हाइबान मुला भिबा ताम डादा था मुला। थेदा सिबाग्याम सोना लसी जिन्बा मुला। येशू चुरी आरे। एनीगदेन खसी थेदा थान्बा ग्ला च्यागो।⁷ दाहेन्से निसी थेला चेलागदेदा ओच्छे खास लसी पत्रुसदा ‘एनीगदे भन्दा डाच्छा येशू गालील अज्चलरी फेप्वान मुला। थेसे सुड्बा ह्दन्नोन एनीगदेसे थेरी थेदा म्नाड्ला भिसी पाड्सी पिन्गो’” भिसी भिजी।⁸ जमाहेन्से थेनीगदे लोड्सी फितफित धर्सी धुर्साग्याम थोन्सी निजी। ओच्छे थेनीगदेसे चु ताम खालैदा आपाड्नी। तिग्दा भिसम थेनीगदे ल्हानान लोड्बा मुबा।

येशू चेलागदे मुबा ग्लारी फेप्वबा

मत्ती २८:१-२०; लूका २४:१३-५३; यूहन्ना २०:११-२३; मुल चेला १:४-११

⁹ आइतवार स्होरीन येशू सिबाग्याम सोमाहेन्से जम्मान भन्दा डाच्छा मरियम मग्दलिनी मुबा ग्लारी फेप्वी। थे मरियमला ल्हुड्ग्याम येशूसे गोर

निस म्हाड ताप्बा मुबा।¹⁰ जमाहेन्से मरियम मग्दलिनी येशूला चेलागदे मुबा ग्लारी निसी चु ताम थेःना लजी। सेमरी ल्हानान दुख तसी थेनीगदे क्रासी चिबा मुबा।¹¹ येशू सोसी ह्वाड मुबा ग्लारी फेप्वजी भिबा ताम मरियमसे थेनीगदेदा भिजी। तर थेनीगदेसे चु ताम पत्याब आतनी।

¹² जमाहेन्से चेला न्ही नाम्सारीक्यार निबान लबा धुइरी ह्वाडला डाच्छापट्टि येशूदा अर्गुन रूपरी म्नाड्जी।¹³ ओच्छे थेनीगदे स्हान्दो चेलागदे मुबा ग्लारी निसी चु ताम थेःना लजी। तर स्हान्दो चेलागदेसे थेनीगदेला ताम पत्याब आतनी।

¹⁴ जमाहेन्से येशू च्युक गिक चेलागदे चबान लबा धुइरी थेनीगदे मुबा ग्लारी फेप्वजी। ओच्छे थेनीगदेला सेम कोड्बादेन म्हेगदेसे येशू सिबाग्याम सोजी भिसी पाड्बा ताम विश्वास आलबासे लमा येशूसे थेनीगदेदा बड्जी।

¹⁵ येशूसे ह्वाडला चेलागदेदा “एनीगदे जम्बुलिडला जम्मान ग्लारी निसी जम्मान म्हेगदेदा परमेश्वरला य्हुल्साला समाचार थेःना लउ।¹⁶ विश्वास लसी बप्तिस्मा किन्बागदेसे थाबा याड्ला। तर विश्वास आलबा जतसे चा परमेश्वरग्याम सजाय याड्ला।¹⁷ ओच्छे विश्वास लबा म्हेगदेदेन छ्याम चुड्बा चिनुगदे तला थेनीगदेसे डाला मिनरी म्हाडगदे ताप्ला, ओच्छे छार छार ग्योइरी ताम लला।¹⁸ ओच्छे थेनीगदेसे पुख्खी चुड्साेनोन, बिख थुड्साेनोन थेनीगदेदा तिगै आत। थेनीगदेसे आखम्बा म्हेगदेथोरी या थान्सी प्रार्थना लमाहेन्से थे म्हेगदे खम्ला” भिसी सुड्जी।

येशू स्वर्गरी फेप्व

लूका २४:५०-५३; मुल चेला १:९-११

¹⁹ चुड्ड लसी चेलागदेदेन छ्याम ताम लमाहेन्से प्रभु येशूदा स्वर्गरी भोर्जी। ओच्छे येशू परमेश्वरला दाहिने छ्यापट्टि मुल ठिरी धन्छ्याजी।²⁰ जमाहेन्से चेलागदे जम्मान ग्लारी निसी येशूला बारैरी पाड्सी भ्रजी। थेनीगदेदेन छ्याम तसी प्रभुसे गे लजी। ओच्छे थेनीगदेसे थेःना लबा तामदा प्रभुसे उदेकला गेग्याम चु हिन्ना चीम भिसी विश्वास तना लजी।

† चु पदला ताम कोड कोड ग्रीक बाइबलरी आरे। †† 16:15 मुल १:८ ‡ 16:19 मुल १:९-११

चु किताबला बारेरी पाड्तो:मा

येशूला मुल चेला पावलला ह्यो लूकासे भिबा मुबा (२ तिमोथी ४:११)। थे अर्गु यहुलला म्हि हिन्ना ओच्छे थे डाक्टर मुबा (कलस्सी ४:१४)। थेसे मुल चेलागदेला गेला बारेरीनोन भिबा मुला (मुल चेला १:१-२)।

रोम शहररी भिबा मुबा।

ओस्पन ईश्वी संवत् ६०-७० (विक्रम संवत् ११७-१२७) सालला गुडरी भिबा मुबा।

येशूला बारेरी तबा तामगदे घोना लबाला लागिरी थियोफिलस भिबा म्हिदा भिबा हिन्ना।

चु थार्बा पिन्बा समाचाररी येशूला बारेरी चुहड् लसी भिबा मुला, इस्राएलीगदेला गुडरी फेप्लला भिसी कबुल लबा थार्बा पिन्बा ग्लेदेन जम्मान यहुलला म्हिगदेदा सोना लबा येशू ख्रीष्ट हिन्ना। थे दुख याड्बा म्हिगदेदेन प्राडबो म्हिगदे ओच्छे जम्मान म्हिगदेदा थार्बा पिन्बा समाचार थे:ना लगै भिसी परमेश्वरला आत्माग्याम जम्बुलिडरी पुडखबा हिन्ना। चु थार्बा पिन्बा समाचाररी जम्मान खाल्ला दुखरी परब तबा म्हिगदेदा वास्ता लसी भिबा हिन्ना। चुरी ताड्तो:बा तामगदे प्रस्टन म्हाड्मुला। पाड्-नोन तो:मा चुरी डाच्छाला अध्यायगदेरी येशू जम्बुलिडरी फेप्लबा ताम ओच्छे लिच्छापट्टिला अध्यायगदेरी चा येशू स्वर्गरी फेप्लबा तामला बारेरी भिबा मुला।

येशू स्वर्गरी फेप्लाम्हेन्से येशूदा विश्वास लबागदे ल्हानान बढब तबान निजी ओच्छे येशूला बारेरी ल्हानान ग्लारी थे:बान निबा तामगदे लूकासे “मुल चेलागदेला गे” भिबा किताबरी भिबा मुला।

मुल तामगदे

शुरुला ताम १:१-४

बप्टिस्मा पिन्बा यूहन्नादेन येशू न्हबा ओच्छे येशू जजा मुबा धुडला ताम १:५-२:५२

बप्टिस्मा पिन्बा यूहन्नासे लबा गे ३:१-२०

येशूसे बप्टिस्मा किन्बादेन शैतानसे येशूदा फसब लबारी म्हाड्बा ३:२१-४:१३

येशूसे गालील अज्वलरी लबा गे ४:१४-९:५०

येशू गालील अज्वलहेन्से यरूशलेम शहरधोना फेप्लबा ९:५१-१९:२७

यरूशलेम शहररी येशूला गे थुम्बा धुड १९:२८-२३:५६

येशू सिबाग्याम सोबादेन स्वर्गरी फेप्लबा २४:१-५३

लूकासे भिबा थार्बा पिन्बा समाचार

लूकासे येशूला बारेरी भिबा

१ परमेश्वरसे डन्ना गुडरी लबा गेला बारेरी ल्हानान म्हिगदेसे भिबारी छ्याड्बा मुला।^२ डाच्छाहेन्सेन येशूसे लबा गेदेन लोप्ला ताम म्हाड्बा म्हिगदेसे डन्दा थे:ना लजी।^३ थेतबासेलमा माननीय थियोफिलस, डाड्एनोन डाच्छाहेन्सेन जम्मान ताम म्हाड्सी घोबासे लमा ह्याडला लागिरी मेलोसेन भिमा ज्यबा तला भिसी म्हन्जी।^४ तिगदा भिसम ह्याडदा पाड्बा तामगदेरी सत्य ताम घोगै भिसी डाड् चु ह्याडला लागिरी भिबा हिन्ना।

बप्टिस्मा पिन्बा यूहन्ना न्हला भिसी पाड्बा ताम

५ यहूदिया यहुल्साला हेरोद ग्लेला धुडरी अबिया भिबा समूहरी परमेश्वरला मन्दिररी पूजा लबा जकरिया भिबा म्हि मुबा। थेला म्रिड एलीशिबाएनोन परमेश्वरला मन्दिररी पूजा लबा हारूनना वंशरी न्हबा मुबा।^६ परमेश्वरसे कुल्बा जम्मान ताम इयान्बासे लमा थे न्हीनोन परमेश्वरला डाच्छा ज्यबा म्हि मुबा।^७ तर एलीशिबाग्याम कोला आतबासे लमा थे न्हीला कोलागदे आरेबा मुबा। थे न्हीला दिडएनोन निसी जिन्बा मुबा।^८ तिरेकुनु जकरिया ह्याडला

समूहला पालोरी परमेश्वरला मन्दिररी पूजा लबान मुबा।^९ परमेश्वरला मन्दिररी पूजा लबा समूहला ठिम अन्छार चिट्टा युमा, परमप्रभुला मन्दिर न्हडरी वाड्सी धूप म्हाबा गे जकरियाला मिनरी थोन्जी।^{१०} परमेश्वरला मन्दिर न्हडरी धूप म्हाबा धुडरी म्हिला हुल मडग्यार प्रार्थना लसी चिबा मुबा।^{११} धूप म्हाबान लबा धुडरी जकरियासे धूप म्हाबा ग्लाला दाहिनेपट्टि स्वर्गदूत खसी राप्सी चिबा म्हाड्जी।^{१२} स्वर्गदूतदा म्हाड्सी जकरिया आतेब तसी लोड्जी।^{१३} तर स्वर्गदूतसे थेदा “थालोङ्गो जकरिया, तिगदा भिसम परमेश्वरसे एला प्रार्थना सान्बा मुला। दाहेन्से एला म्रिड एलीशिबासे झा गिक न्हला। एसे थेला मिन यूहन्ना थान्गो।^{१४} थे न्हबा धुडरी ए ल्हानान ताड्ला, ओच्छे स्पहान्दो ल्हानान म्हिगदेएनोन ताड्ला।^{१५} तिगदा भिसम थे परमप्रभुला डाच्छापट्टि घेन म्हि दोला। ओच्छे थेसे अडगुरला निडगुदेन खजिबै अर्गु इय्हीड्बा स्हे आथुड्। थे आमाला फोरी खमाहेन्सेन परमेश्वरला आत्मा थेदेन छ्याम तला।^{१६} थेसे ल्हानान इस्राएलीगदेदा परमप्रभु परमेश्वरला ग्यामरी दो:सी भला।^{१७} आबागदेला सेम कोलागदेपट्टि तना लबारी ओच्छे परमेश्वरसे कुल्बा ताम आड्यान्बागदेदा परमेश्वरसे कुल्बा ताम इयान्बा म्हिगदे ह्यड्बा स्होसी प्रभुला ग्याम च्यासी चिबा यहुल स्होबाला लागिरी थे प्रभुला डाच्छा एलियाला आत्मादेन शक्तिरी भ्रला।^{१८}

† 1:5 १ इति २४:१०

†† 1:15 गन्ती ६:३ ‡ 1:17 मला ४:५-६

18 जमाहेन्से जकरियासे स्वर्गदूतदा “डाइ चु ताम खाहइ लसी विश्वास लसे? तिग्दा भिसम डा खेप्बा दोसी जिन्जी ओच्छे डाला म्रिडलाएनोन दिड निसी जिन्बा मुला” भिसी भिमा, 19 स्वर्गदूतसे जकरियादा “डा परमेश्वरला डाच्छा राप्सी चिबा गब्रिएल हिन्ना। डादा परमेश्वरसे एदेन छ्याम ताम लबारी ओच्छे चु ज्यबा समाचार पाइबारी पुइखबा हिन्ना। 20 एसे डाइ पाइबा ताम विश्वास आलबासे लमा चु ताम पूरा आततेधोना एसे ताम पाइआखम। तर चु ताम ततो:बा धुइरी तनोन तला” भिसी भिजी।

21 जकरिया परमेश्वरला मन्दिर न्हडरी घडना चिबासे लमा मडग्यार जकरियादा भ्रान्सी चिबा म्हिगदेदा सुर्दा तजी। 22 थे परमेश्वरला मन्दिर न्हडग्याम मडग्यार थोन्सी खमा थेसे तिगै ताम पाइआखम्नी। थेतबासेलमा मडग्यार मुबा म्हिगदेसे थेसे तिगै ग्राड्जीनम भिसी म्हन्जी। जकरियासे थे म्हिगदेदा या लिबान ताम लबारी छ्याइजी। ओच्छे थे ताम पाइआखम्बाला आखम्बान तजी।

23 परमेश्वरला मन्दिर न्हडरी पूजा लतो:बा हाडला पालो जिन्माहेन्से जकरिया दिमरी निजी। 24 तिगै थिन लिच्छा थेला म्रिड एलीशिबा न्हसेला तजी। जमाहेन्से एलीशिबा ला डाधोना दिम खलासी खानडएनोन आनिनी। 25 ओच्छे थेसे “दाहेन्से खालैसे डादा हेला थालगै भिसी परमेश्वरसे डादा दया लसी चु लबा हिन्ना” भिसी भिजी।

येशू न्हला भिसी पाइबा ताम

26 गालील अज्वलला नासरत भिबा नाम्सारी मरियम भिबा कन्याकेटी गिक मुबा। थेदा दाऊद ग्लेला वंशला योसेफ भिबा म्हिसे ब्याह लबारी ह्रीबा मुबा। एलीशिबा न्हसेला तबा ला दु तमा परमेश्वरसे गब्रिएल स्वर्गदूतदा मरियम मुबा ग्लारी पुइखजी। 27 जमाहेन्से स्वर्गदूत थे कन्याकेटी मुबा ग्लारी निसी, “लास्सो माइ, एदा परमेश्वरसे ल्हानान दयामाया लबा मुला। थेतबासेलमा एदेन छ्याम परमप्रभु मुला” भिसी भिजी।

29 स्वर्गदूतला ताम थे:सी मरियम उदेक तजी। ओच्छे “आहिन, चु तिग भिबा?” भिसी सेमरी म्हन्जी। 30 तर स्वर्गदूतसे थेदा “थालोजो मरियम, तिग्दा भिसम परमेश्वरसे एदा ल्हानान मोलम पिन्बा मुला। 31 दाहेन्से ए न्हसेला तला ओच्छे एसे झा गिक न्हला। एसे थेला मिन येशू थान्गो। 32 थे ग्रेन म्हि दोला ओच्छे थेदा जम्मान भन्दा ग्रेन परमेश्वरला झा भिला। परमप्रभु परमेश्वरसे थेदा दाऊदला यहुल्सारी शासन लबारी ग्ले स्होला। 33 थेसे सदनना लागिरी याकूबला वंशथोरी शासन लला। ओच्छे थेला शासन खाइमै आजिन” भिसी भिजी। 34

34 स्वर्गदूतला चुहइबा ताम थे:सी मरियमसे “चु खाहइ लसी तला? तिग्दा भिसम डाइ ब्याह लबान आरे” भिसी भिजी।

35 स्वर्गदूतसे मरियमदा “एथोरी परमेश्वरला आत्मा फेप्खला। ओच्छे एसे जम्मान भन्दा ग्रेन परमेश्वरला आत्माला शक्तिसे कोला न्हला। थेतबासेलमा थे कोलादा परमेश्वरला झा भिला। 36 च्यागो, एला हाडला म्हि एलीशिबादाएनोन दिड निबासे लमा कोला आन्ह भिसी भिमुबा। तर दान्दे थे न्हसेला तबा ला दु तबा मुला। 37 थेतबासेलमा परमेश्वरसे लआखम्बा गे तिगै आरे” भिसी मरियमदा जोहाब पिन्जी। 38

38 ओच्छे मरियमसे स्वर्गदूतदा “डा परमेश्वरदा तेन्बा म्हि हिन्ना, डादा हाडसे भिबा हइनोन तगै” भिसी भिमाहेन्से स्वर्गदूत निजी।

मरियम एलीशिबादा हुप तबारी निबा

39 तिगै थिन लिच्छा मरियम योना योना लसी यहूदिया अज्वलला गडपट्टिला नाम्सा गिकरी निजी। 40 ओच्छे जकरियाला दिमरी वाइसी एलीशिबादा “लास्सो प्याफुल्ला” भिजी। 41 मरियमसे लास्सो प्याफुल्ला भिबा एलीशिबासे थे:माहेन्से एलीशिबाला फोरी मुबा कोला भोल्जी। ओच्छे एलीशिबाथोरी परमेश्वरला आत्मा फेप्खजी। 42 जमाहेन्से एलीशिबासे ग्रेन काइ लसी, “म्रिडम्हेमेगदे न्हडरी ए परमेश्वरग्याम मोलम याइबा म्हि हिन्ना। ओच्छे एला फोरी मुबा कोलादाएनोन ल्हानान मोलम पिन्बा मुला।

† 1:19 दानि ८:१६; ९:२१ †† 1:26-27 मत्ती १:१८ † 1:31 मत्ती १:२१ †† 1:33 २ शमू ७:१२; १३:१६; यशै ९:७ †† 1:37 उत्प १८:१४

43 खाल्ला दयासे लमा डा हइबाला दिमरी डाला प्रभुला आमा खजी?

44 च्यागो, एसे लास्सो प्याफुल्ला भिबा डाइ थे:मैछ्याम डाला फोरी मुबा कोला ताइसी भोल्जी। 45 परमप्रभुसे सुइबा ताम पूरा तला भिसी विश्वास लबासे लमा एसे परमेश्वरग्याम मोलम याइबा मुला।” भिसी भिजी।

मरियमसे परमेश्वरदा धन्यवाद पिन्बा

46 ओच्छे मरियमसे चुहइ भिसी व्हाइ गोबारी छ्याइजी, “डाला परमप्रभु परमेश्वरदा जयजयकार तगै। 47

47 डादा थार्बा पिन्बा परमेश्वरदेन छ्याम डा सेमहेन्सेन ताइबा मुला।

48 तिग्दा भिसम परमेश्वरदा तेन्बा डा हइबा जजा म्हिदाएनोन वास्ता लबा मुला।

दाहेन्से जम्मान म्हिगदेसे डादा परमेश्वरग्याम मोलम याइबा म्हि भिसी भिला। 49

49 तिग्दा भिसम जम्मान भन्दा ग्रेन परमप्रभु परमेश्वरसे डाला लागिरी ग्रेन गे लसी पिन्बा मुला।

परमप्रभुन परमेश्वर ५ हिन्ना।

50 परमेश्वरदा मान लबा म्हिगदेदा परमेश्वरसे जुकजुकधोनान दया लला।

51 ओच्छे सेमरी डा हइबा खालै आरे भिसी भ्रबा म्हिगदेदा परमेश्वरसे हाडला शक्तिसे ससा बडबड तना लबा मुला।

52 शासन लबा म्हिगदेदा परमेश्वरसे थेला ग्लाय्याम ते:बा मुला।

ओच्छे प्राडबोगदेदा परमेश्वरसे ग्रेन म्हि स्होबा मुला। 53

53 ओच्छे फोखेन्बागदेदा परमेश्वरसे सदन ज्यबा ज्यबा स्हे पिन्सी ग्रेन्ना लबा मुला।

तर पयुकपो म्हिगदेदा तिगै आपिन्ना या थान्थान पुइबा मुला।

54 परमेश्वरसे हाडसे लबा दया ढन्सी हाडदा तेन्बा इस्राएलीगदेदा हो लबा मुला।

55 ओच्छे व्हाडला आखे म्हेमेदा सुइबा हइ अब्राहामदेन थेला सन्तानगदेदा जुकजुकधोनाला लागिरी दया लबा मुला।” 56

56 मरियम ला सोमधोना एलीशिबादेन छ्यामनोन चिसी हाडला दिमरी निजी।

बप्तिस्मा पिन्बा यूहन्ना न्हबा

57 ओच्छे एलीशिबासे कोला न्हबा धुइ तसी थेसे झा न्हजी। 58 जमाहेन्से परमप्रभु परमेश्वरसे एलीशिबादा दया लबा मुला भिबा थे:सी थेला हाडला म्हिदेन खिमजेमगदे ल्हानान ताइजी।

59 कोला न्हसी भे:रे तमाहेन्से थेनीगदे थे कोलाला खतना लबारी खजी। ओच्छे थेनीगदेसे थे कोलाला मिन थेला आबाला हइबान जकरिया थान्बारी छ्याइजी, 60 तर थेला आमासे “आहिन, थेला मिन यूहन्ना थान्तो:ला” भिसी भिमा, 61 थेनीगदेसे “थेहइबा मिन एला हाडला म्हि न्हडरी खालैला आरे” भिसी भिजी।

62 जमाहेन्से थेनीगदेसे थेला आबादा झाला मिन तिग थान्बा भिसी या लिप्सी इयोइमा, 63 जकरियासे पाटी गिक ह्रीसी थे पाटीरी थेला मिन यूहन्ना हिन्ना भिसी भिजी। चुहइबा म्हाइसी थेनीगदे जम्मान उदेक तजी। 64 थेनीन धुइरी जकरियासे ताम पाइबारी छ्याइजी। ओच्छे थेसे परमेश्वरदा धन्यवाद पिन्जी। 65 चुहइ तबा म्हाइसी थेला खिमजेमगदे जम्मान उदेक तसी लोइबा खजी। ओच्छे यहूदियाला गडरीक्वारला नाम्सा नाडनोन चु ताम थे:जी।

66 चु ताम थे:बा जति जम्मासेन “लिच्छा चु कोला खाहइबा तला” भिसी हाड हाडला सेमरी म्हन्जी। तिग्दा भिसम थे कोलादेन छ्याम परमेश्वर मुबा।

††† 1:46 १ शमू २:१-१० ††† 1:48 १ शमू १:११ § चु पदरी “परमप्रभु परमेश्वर” भिसी पाइबा ताम ग्रीक बाइबलरी “थेला छान चोखो मुला” भिसी पाइबा मुला। चुला मुल अर्थ चा थे जम्मान भन्दा ग्रेन हिन्ना ओच्छे थे हइबा स्थान्दो खालै आरे भिबा हिन्ना। थेतबासेलमा जम्मासेन थेदा तेन्तो:ला। §† 1:52 अय्यूब ५:११; १२:१९ §†† 1:55 उत्प १७:७ § 1:59 लेवी १२:३

जकरियासे गोबा व्हाड

67 यूहन्नाला आबा जकरियाथोरी परमेश्वरला आत्मा फेख्जजी। ओच्छे परमेश्वरला आत्मासे कुल्बा ह्ज्जोन थेसे पाड्बारी छ्याड्जजी।

68 “इसाएलीगदेला परमप्रभु परमेश्वरला जयजयकार तगै तिगदा भिसम परमेश्वर फेख्जसी ह्वाडला म्हिगदेदा ह्यो लसी पापग्याम फेबा मुला!

69 परमेश्वरसे थेदा तेन्बा दाऊदला वंशरी व्हाडदा थार्बा पिन्बा शक्तिशाली म्हि गिक पुड्खबा मुला।

70 व्हाडला शत्रुगदेदेन व्हाडदा हेला लबागदेग्याम थार्बा पिन्बा भिबा ताम

दडबोरीन परमेश्वरसे ह्वाडला अगमवक्तागदेग्याम सुड्सी जिन्बा मुबा।

72 ओच्छे परमेश्वरसे व्हाडला आखे म्हेमेदेन छ्याम लबा ह्वाडला कबुल हन्सी

व्हाडदा दया लबा मुला।

73 थे कबुल परमेश्वरसे व्हाडला म्हेमे अब्राहामदेन छ्याम लबा मुबा।

74 थेतबासेलमा शत्रुगदेग्याम थार्बा याड्बाला लागिरी आलोड्ना

व्हाड सोतेधोना परमेश्वरला डाच्छापट्टि ज्यबा म्हि दोसी व्हाडसे ज्यबा गे लसी परमेश्वरदा तेन्म्याड्जै।

76 डाला झा,

दाहेन्से एदा जम्मासेन जम्मान भन्दा घेन परमेश्वरला अगमवक्ता भिसी भिला।

तिगदा भिसम ए प्रभुला डाच्छा डाच्छा निसी थेला ग्याम स्होला। †

77 ओच्छे पापला दोष मेटब तमाहेन्से थार्बा याड्बाला भिसी एसे परमेश्वरला म्हिगदेदा लोप्ला। 78 तिगदा भिसम व्हाडला परमेश्वर दया लबा परमेश्वर हिन्ना।

थेतबासेलमा परमेश्वरसे व्हाड मुबा ग्लारी स्वर्ग्याम व्हाल पुड्खला।

79 परमेश्वरसे धोपधोपरी भ्रवादेन सिला भिसी लोड्बा म्हिगदेदा व्हाल पिन्ना।

ओच्छे थेनोन व्हालसे व्हाडदा शान्तिला ग्यामरी भ्रपुड्जला। ††

80 यूहन्ना परमेश्वरला आत्माग्याम ज्ञान बुद्धि याड्बान घेन तबान निजी। ओच्छे इसाएलीगदेला गुडरी परमेश्वरला यहुल्साला समाचार थे:ना लबा धुड आततेधोना यूहन्ना तोडतोडबा ग्लारी चिजी।

येशू न्हबा
मत्ती १:१८-२५

2 थे धुडरी रोमी ग्याल्बो कैसर अगस्टससे जम्मान यहुल्साला म्हि ड्याबाला लागिरी जम्मालान मिन भ्रिउ भिसी कुल्जी। 2 सिरिया भिबा ग्लाला हाकिम कुरेनियस मुबा धुडरी चुह्ज् लसी म्हिगदे ड्याबा डाच्छा रेम तबा मुबा। 3 जमाहेन्से जम्मान म्हिगदे मिन भ्रिबारी ह्वाड ह्वाडला आखे म्हेमेला नाम्सारी निजी।

4 थे धुडरी योसेफ गालील अञ्चलला नासरत भिबा ग्लारी चिबा मुबा। थेएनोन ह्वाडला मिन भ्रिबारी यहूदिया अञ्चलला बेथलेहेम भिबा दाऊदला शहररी निजी। तिगदा भिसम थे दाऊद ग्लेला वंशला मुबा। 5 ओच्छे योसेफसे ह्वाडसे ब्याह लबारी छ्याड्बा मरियमदाएनोन छ्यामनोन भोर्सी बेथलेहेमरी मिन भ्रिबारी निजी। थे धुडरी मरियम न्हसेला मुबा। 6 थेनीगदे बेथलेहेमरी मुमान मरियमसे कोला न्हबा धुड तजी। 7 जमाहेन्से मरियमसे बेथलेहेमरीन ह्वाडला थेबा झा न्हजी। थे झादा ल्हेथानरी रिल लसी म्हे मुडदा खोले पिन्बा डूडरी नाड्जजी। तिगदा भिसम थेनीगदेसे खजिबै दिमरी चिबा ग्ला आयाड्नी।

गोठालोगदेसे लैनु येशूदा स्याप्बा

8 थे ग्लाला डामला पाड्ग्यालरी गोठालोगदे म्हुनड ग्युगदे खुड्सी चिबा मुबा। 9 थेनोन धुडरी थेनीगदेसे स्वर्गदूत गिक व्हाड्जजी। ओच्छे थेनीगदेला क्युर्नोन परमेश्वरला स्हेरसे व्हाल व्हाल तजी। चुह्ज् तबा व्हाड्सी थेनीगदे

† 1:76 मला ३:१†† 1:79 यशै ९:२

लोड्जजी। 10 तर स्वर्गदूतसे थेनीगदेदा “थालोड्जो! तिगदा भिसम डाड् एनीगदेला लागिरी थार्बा पिन्बा समाचार भसी खबा मुला। चु समाचार जम्मान म्हिगदेला लागिरी हिन्ना। 11 तिनी दाऊदला शहररी एनीगदेदा पापग्याम थार्बा पिन्बा म्हि गिक न्हबा मुला। थेनोन थार्बा पिन्बा ख्रीष्ट प्रभु हिन्ना। 12 ओच्छे एनीगदेला लागिरी चिनु चा चु तला, एनीगदेसे कोला गिकदा ल्हेथानसे रिल लसी म्हे मुडदा खोले पिन्बा डूडरी नाड्सी थान्बा स्याप्ला।”

13 थेनोन धुडरी स्यहान्दो स्वर्गदूतला हुल व्हाड्जजी। ओच्छे थे स्वर्गदूतगदेसे परमेश्वरदा धन्यवादला व्हाड गोबारी छ्याड्जजी,

14 “स्वर्गरी धन्ख्याबा परमेश्वरला जयजयकार, जम्बुलिडरी जुन म्हिदा परमेश्वरसे धम्बा मुला थेनीगदेदा शान्ति तगै!”

15 स्वर्गदूतगदे स्वर्गरी निमाहेन्से गोठालोगदेसे ह्वाड ह्वाड न्हडरी “लु, भ्रउ, व्हाडदा परमेश्वरसे सुड्बा चु ल्हेडमो च्याबारी बेथलेहेमरी निड” भिसी भिजी।

16 जमाहेन्से थेनीगदे योना योना लसी बेथलेहेमरी निजी। थेरी थेनीगदेसे मरियमदेन योसेफ ओच्छे लैनु कोलादा चा म्हे मुडदा खोले पिन्बा डूडरी नाड्सी थान्बा व्हाड्जजी। 17 जमाहेन्से थे कोलाला बारैरी थेनीगदेदा स्वर्गदूतसे पाड्बा ताम थेनीगदेसे जम्मान म्हिगदेदा थे:ना लजी। 18 ओच्छे गोठालोगदेसे पाड्बा ताम थे:बा म्हिगदे जम्मान उदेक तजी। 19 तर मरियमसे चा चु जम्मान ताम म्हन्सी सेमरीन थान्जी। 20 ओच्छे स्वर्गदूतसे भिबा ह्ज्जोन व्हाड्बासे लमा गोठालोगदेसे परमेश्वरदा घेन मानदेन जयजयकार लसी धन्यवादला व्हाड गोबान निजी।

येशूदा परमेश्वरला मन्दिररी भोर्सी अर्पण लबा

21 थे कोला न्हसी भ्रे:रे तमा खतना लबा धुडरी थेला मिन येशू थान्जी। थेला मिन आमाला फोरी खबा भन्दा डाच्छान स्वर्गदूतसे पाड्बा मुबा। #22 ओच्छे मोशाला ठिम अन्धार थेनीगदे चोख्याब लबा धुड तमाहेन्से येशूदा थेला आबादेन आमासे परमप्रभुला डाच्छा अर्पण लबाला लागिरी यरूशलेमरी परमेश्वरला मन्दिररी भजी। #23 परमप्रभुसे मोशाला पिन्बा ठिमरी भ्रिबा अन्धार जम्मान भन्दा डाच्छा न्हबा झा परमप्रभुला लागिरी फेसी थान्तो:बा मुबा। #24 ओच्छे परमेश्वरसे मोशाला पिन्बा ठिमरी मुबा अन्धार जोर गिक डुकुर तसै जोर गिक परेवा तसै परमप्रभुदा फुल्तो:बासे लमा थेनीगदे बलि फुल्बारी खजी।

25 थे धुडरी यरूशलेमरी शिमियोन भिबा म्हि गिक मुबा। थे परमेश्वरसे म्हन्बा अन्धार भ्रवादेन परमेश्वरदा तेन्बा म्हि मुबा। थेदा परमेश्वरसे इसाएलीगदेदा थार्बा पिन्बा म्हि पुड्खला भिसी सुड्बा ताम पूरा लला भिसी भ्रान्सी चिबा मुबा। 26 ओच्छे “थार्बा पिन्बा ख्रीष्टदा आम्राड्तेधोना ए आसि” भिसी परमेश्वरला आत्मासे डाच्छान थेदा पाड्बा मुबा।

27 परमेश्वरला आत्मासे कुल्बा ह्ज्ज शिमियोन परमेश्वरला मन्दिररी निजी। थे धुडरी येशूला आबादेन आमासे परमेश्वरसे मोशाला पिन्बा ठिम अन्धार तिग लतो:बा मुबा, थे लबारी येशूदा परमेश्वरला मन्दिररी भसी खजी।

28 जमाहेन्से शिमियोनसे लैनु येशूदा कुरी किन्सी परमेश्वरदा धन्यवाद पिन्सी चुह्ज् भिजी,

29 “परमप्रभु ह्वाडसे सुड्बा ताम पूरा तबा मुला। दाहेन्से ह्वाडदा तेन्बा म्हि डा सिसै डुक्क मुला।

30 तिगदा भिसम ह्वाडसे कबुल लबा ह्ज्जोन थार्बा पिन्बा ख्रीष्टदा डाड् व्हाड्सी जिन्बा मुला।

31 चु कोलादा ह्वाडसे जम्मान म्हिगदेला लागिरी पुड्खबा हिन्ना।

32 अर्गु यहुलला म्हिगदेदा ख्रीष्टसेन ह्वाडला ग्याम उन्ना, ओच्छे चुसे लमा इसाएलीगदेसे मान याड्जला।” †††

33 ओच्छे शिमियोनसे लैनु येशूला बारैरी पाड्बा ताम थे:सी येशूला आबादेन आमा उदेक तजी। 34 जमाहेन्से शिमियोनसे मरियमदा मोलम पिन्बान भिजी, “च्यागी, चु लैनु इसाएलीगदेदा थार्बा पिन्बादेन नाश लबाला

‡ 2:21 लेवी १२:३; लुका १:३१†† 2:22 लेवी १२:६-८ †† 2:23 प्रस्था १३:३, १२††† 2:32 यशै ४२:६; ४९:६; ५२:१०

लागिरी परमेश्वरसे पिन्बा चिनु हिन्ना। थेदा ल्हानान म्हिगदेसे बिरोध लला।
35 थेतबासेलमा ल्हानान म्हिला सेमरी म्हन्बा तामगदे परमेश्वरसे उन्ना।
ओच्छे एला सेमरी ल्हानान दुख तला।”

36 थेरी आशेर वंशला फनुएलला झामे हन्ना भिबा बोगल बलिसे बलि दिड तबा म्रिडम्हेमे गिक मुबा। थे अगमवक्तास्या मुबा, ब्याह तसी निस दिड तमा थेला हेम्बो सिजी। ओच्छे थे फोडथान चिसी धिन म्हुननोन परमेश्वरला मन्दिररी प्रार्थना लबान परमेश्वरदा तेन्मुबा। 38 थेनोन धुडरी हन्ना खसी परमेश्वरदा धन्यवाद पिन्जी। ओच्छे थेसे परमेश्वरसे यरूशलेमदा पापग्याम फेबा धुडदा भ्रान्सी चिबा म्हिगदेदा थे कोलाला बारेरी पाड्सी पिन्जी।
39 जमाहेन्से थेनीगदेसे परमेश्वरसे मोशादा पिन्बा ठिम अन्छार लतोःबा जम्मान गे जिन्ना लसी गालील अञ्चलला हाडलान नासरत शहररी निजी।
40 लैनु येशू घ्रेन घ्रेन तबान खमाहेन्से थेला बुद्धिएनोन खजी। तिगदा भिसम परमेश्वरला मोलम थेदेन छ्याम मुबा।

येशूसे यहूदी धर्मगुरुगदेदेन छ्याम ताम लबा

41 मिश्र यहुल्साग्याम फेसी खबा धिनदा ढन्सी धड्बा चाडरी चाडला ठिम अन्छार येथूला आबा आमा दिडएदडसे यरूशलेमरी निबा लमुबा। थेतबासेलमा येथू च्युक न्ही दिड तमाएनोन येथूला आबादेन आमासे येथूदा छ्यामनोन भोर्सी यरूशलेमरी निजी। 43 चाड धड्सी जिन्नाहेन्से थेनीगदे दिमरी निजी। तर येथू चा यरूशलेमरीन धन्छ्याजी। चु ताम थेला आबादेन आमासे था आयाड्नी। 44 येथूला आबादेन आमासे येथू म्हिला हुलरी मुला तला भिसी म्हन्सी तिरैला ग्याम भ्रसी निजी। ओच्छे थेनीगदेसे येथूदा हाडला म्हिदेन डोसेबा म्हिगदे मुबा ग्लारी निसी म्हाइजी, 45 तर आस्याप्बासे लमा थेनीगदे थेदा म्हाइबान यरूशलेमरी दोःसी खजी। 46 थेनीगदेसे सोमरेरी येथूदा परमेश्वरला मन्दिररी स्याप्जी। थेरी थे यहूदी धर्मगुरुगदेदेन छ्याम धन्छ्यासी थेनीगदेसे पाड्बा ताम इयान्सी, इयोड्बा छाबा लसी धन्छ्याबा मुबा। 47 थेरी येथूला ताम इयान्सी चिबागदे येथूसे ताम घोसी जोहाब पिन्बा म्हाइसी उदेक तबा मुबा। 48 येथूला आबादेन आमासे थेदा म्हाइसी उदेक म्हन्सी थेला आमासे “च्यागो झा, एला आबादेन डा एदा म्हाइमा म्हाइमा हैरान तजी, एसे चुहड् तिग लबा?” भिमा, 49 येथूसे थेनीगदेदा “हाडनीसे डादा तिगदा म्हाइबा? डा डाला आबाला दिमरी चितोःबा भिसी हाडनीदा था आरे?” भिसी सुड्जी। 50 तर थेला आबादेन आमासे चु ताम आघोनी।

51 जमाहेन्से येथू हाडला आबा आमादेन छ्यामनोन नासरतरी फेप्जी। ओच्छे हाडला आबा आमासे पाड्बा ताम इयान्सी धन्छ्याजी। तर थेला आमासे चु जम्मान ताम हाडला सेमरीन थान्नी। 52 ओच्छे येथू परमेश्वरदेन म्हिगदेला दयामायारी घ्रेन घ्रेन तमाहेन्से बुद्धिनोन बढब तबान निजी। †

बत्तिस्मा पिन्बा यूहन्ना

मती ३:१-१२; मर्कुस १:१-८; यूहन्ना १:१९-२८

3 रोमी ग्याल्बो कैसर तिबेरियाससे शासन लबा च्युक डा दिड तमा पन्तियस पिलातस भिबा म्हि यहूदिया अञ्चलला हाकिम मुबा। जमा धुडरी हेरोद गालील अञ्चलला ग्ले मुबा, ओच्छे थेला आले फिलिप इतुरियादेन त्राखोनितिस भिबा ग्लाला ग्ले मुबा, थेहड् लसीन लुसानियास अबिलेने अञ्चलला ग्ले मुबा। 2 ओच्छे हन्नासदेन कैयाफा परमेश्वरला मन्दिररी पूजा लबा मुल म्हि मुबा। थेनोन धुडरी परमेश्वरसे जकरियाला झा तोडतोडबा ग्लारी चिबा यूहन्ना मुबा ग्लारी हाडला बचन पुड्खजी। 3 यूहन्नासे म्हिगदेदा हाड हाडला पाप ख्लासी परमेश्वरपट्टि दोःगो, ओच्छे बत्तिस्मा किन्गो। जमाहेन्से परमेश्वरसे एनीगदेला पापला दोष मेटब लला भिबान थार्बा पिन्बा समाचार थेःना लबान यर्दन स्योडला क्यारमारला जिल्लारीक्यार खजी। 4 चु ताम यशैया भिबा अगमवक्तासे चुहड् लसी भिबा मुबा,

“तोडतोडबा ग्लारीक्यार म्हि गिक क्रिड्बान चुहड् भिसी भ्रला,
‘परमप्रभुला ग्याम तयार लउ,

ओच्छे परमप्रभु भ्रबाला लागिरी थेला ग्याम सोजो स्होउ,

5 मुबा जे गडदेन होपगदे सम्म स्होला,
ओच्छे काडलाड कुडलीडबा ग्यामगदे सोजो तला
ओच्छे पगल पोगल मुबा ग्लाएनोन सम्म तला।

6 जमाहेन्से जम्मान म्हिगदेसे परमेश्वरसे पिन्बा थार्बा म्हाइला।” † †

7 थेतबासेलमा यूहन्नासे बत्तिस्मा किन्बारी खबा म्हिगदेदा चुहड् भिसी पाड्जी, “पुख्रीला कोलागदे, एनीगदेदा परमेश्वरला बोमोग्याम स्योरम्याड्ला भिसी खाल्से भिजी? †† चुदे एनीगदे हाड हाडला पाप ख्लासी परमेश्वरपट्टि दोःबान हिन्सम परमेश्वरदा सेम निबा गे लउ, ओच्छे एनीगदे हाड हाड न्हडरी डनी अब्राहामला कोलागदे भिसी पाड्बारी थाम्हाइगो। तिगदा भिसम परमेश्वरसे अब्राहामला लागिरी चु युडबागदेग्यामसेनोन कोलागदे स्होबारी खम्ला। 9 च्यागो, दोड थाबारी तरी थीसी जिन्बा मुला। थेतबासेलमा ज्यबा रो आरोबा जम्मान दोड टाहेन्सेन थासी मेरी फर्ला।” ††

10 जमाहेन्से म्हिगदेसे यूहन्नादा “थेहड् भिसम दाहेन्से डन्से तिग लउ?” भिसी इयोड्मा, 11 यूहन्नासे थेनीगदेदा “जुन म्हिदेन छ्याम स्हुदम न्ही मुला थेसे आरेबा म्हिदा पिन्ना, ओच्छे जुन म्हिदेन छ्याम चबा सहे मुला थेसे आरेबागदेदा भो लसी पिन्ना” भिसी जोहाब पिन्जी।

12 ओच्छे तिरो दुड्बा म्हिगदेएनोन यूहन्ना मुबा ग्लारी बत्तिस्मा किन्बारी खसी, “गुरु, डन्से चा तिग लउ?” भिसी इयोड्जी। ††

13 यूहन्नासे थेनीगदेदा “एनीगदेसे तिरो दुड्मा सरकारसे तोगब लबा भन्दा ल्हाना थाकिन्गो” भिसी भिजी।

14 ओच्छे सिपाहीगदेएनोन खसी, “डन्से चा तिग लउ?” भिसी इयोड्जी। यूहन्नासे थेनीगदेदा “खालैदा अत्याचार लसी आहिन्बा तामदा हिन्ना भिसी टाडगा थाकिन्गो, हाडला खतोःबा जे टाडगा किन्सी सन्तोक लसी चिउ” भिसी भिजी।

15 जमा धुडरी म्हिगदेसे थार्बा पिन्बा ख्रीष्ट फेप्खला भिसी आथ लसी चिबा मुबा। थेतबासेलमा थेनीगदेसे यूहन्नादा म्हाइसी चुनोन ख्रीष्ट हिन्ना वा भिसी सेमरी म्हन्सी चिबा मुबा। 16 तर यूहन्नासे थेनीगदेदा “डाइ एनीगदेदा क्युडसे बत्तिस्मा पिन्ना। तर डा भन्दा शक्तिशाली फेप्खबान मुला डा थेला लखमला तुना ब्लबाधोनाला आरे। थेसे एनीगदेदा परमेश्वरला आत्मादेन मेसे बत्तिस्मा पिन्ना। 17 ग्वा यहाप्बा नाखले थेलान छ्यारी मुला। थेसे खलारी ग्वा ज्यना लसी यहाप्सी ग्वा जति भकारीरी युला। ओच्छे पोलोवा जति खाइमै आसिबा मेरी ख्वाड्ला” भिसी भिजी। 18 चुहड् लसी यूहन्नासे अर्गु ल्हानान अर्ती पिन्सी, लोप्सी म्हिगदेदा परमेश्वरला यहुल्साला समाचार थेःना लजी। 19 तर हेरोद ग्लेसे हाडला आले चाड हेरोदियास भिबादा थान्बासे लमा थेला जम्मान पाप गे म्हाइसी यूहन्नासे थेदा बड्बा मुबा।

20 थेतबासेलमा थेसे यूहन्नादा इयाल्खानरी म्हाइसी पापथोरी झन पाप गे लजी। †

येथूसे बत्तिस्मा किन्बा

मती ३:१३-१७; मर्कुस १:९-११; यूहन्ना १:३२-३४

21 म्हिगदेसे बत्तिस्मा किन्बान लबा धुडरी येथूसेनोन बत्तिस्मा किन्जी। थेसे प्रार्थना लबान लबा धुडरी स्वर्ग ठोड्बा म्हाइजी। 22 ओच्छे परमेश्वरला आत्मा थेथोरी दुकुर हड् लसी फाप्खजी। ओच्छे स्वर्ग्याम “ए डाइ सेमहेन्से माया लबा डाला झा हिन्ना, ए म्हाइसी डा ल्हानान ताड्बा मुला” भिबा काड खजी। ††

येथूला आखे म्हेमे

मती १:१-१७

23 येथूसे हाडला गे लबारी छ्याइबा धुडरी येथू बोगल गिकसे च्युड दिड तबा मुबा।

जम्मान म्हिगदेसे येथू योसेफलान झा भिसी म्हन्बा मुबा।
योसेफ एलीला झा मुबा।

† 2:39 मती २:२३ †† 2:41-42 प्रस्था १२:१-२७; व्यव १६:१-८ † 2:52 † श्मू २:२६; हितो ३:४

‡ 3:6 यशै ४०:३-५ †† 3:7 मती १२:३४; २३:३३ ††† 3:9 मती ७:१९ ††† 3:12 लूका ७:२९ † 3:20 मती १४:३-४; मर्कु ६:१७-१८ †† 3:22 उत्प २२:२; भजन २:७; यशै ४२:१; लूका ९:३५

24 एली मत्तातला झा,
 मत्तात लेवीला झा,
 लेवी मल्कीला झा,
 मल्की यान्नाला झा,
 यान्ना योसेफला झा,
 25 योसेफ मत्ताथियासला झा,
 मत्ताथियस आमोसला झा,
 आमोस नहूमला झा,
 नहूम इसलीला झा,
 इसली नगैला झा,
 26 नगै माथला झा,
 माथ मत्ताथियासला झा,
 मत्ताथियस सेमैनला झा,
 सेमैन योसेखला झा,
 योसेख योदाला झा,
 27 योदा योआननला झा,
 योआनन रेसाला झा,
 रेसा यरुबाबेलला झा,
 यरुबाबेल शालतिएलला झा,
 शालतिएल नेरीला झा,
 28 नेरी मल्कीला झा,
 मल्की अदीला झा,
 अदी कोसामला झा,
 कोसाम एलमादमला झा,
 एलमादम एरला झा,
 29 एर यहोशूला झा,
 यहोशू एलीएजरला झा,
 एलीएजर योरीमला झा,
 योरीम मत्तातला झा,
 मत्तात लेवीला झा,
 30 लेवी शिमियोनला झा,
 शिमियोन यहूदाला झा,
 यहूदा योसेफला झा,
 योसेफ योनानला झा,
 योनान एल्याकीमला झा,
 31 एल्याकीम मलेआला झा,
 मलेआ मिन्नाला झा,
 मिन्ना मत्ताथाला झा,
 मत्ताथा नातानला झा,
 नातान दाऊद ग्लेला सन्तान,
 32 दाऊद यिशैला झा,
 यिशै ओबेदला झा,
 ओबेद बोअजला झा,
 बोअज सल्मोनला झा,
 सल्मोन नहशोनला झा,
 33 नहशोन अम्मीनादाबला झा,
 अम्मीनादाब आरामला झा,
 आराम हेस्त्रोनला झा,
 हेस्त्रोन फारेसला झा,
 फारेस यहूदाला झा,
 34 यहूदा याकूबला झा,
 याकूब इसहाकला झा,
 इसहाक अब्राहामला झा,
 अब्राहाम तेरहला झा,
 तेरह नाहोरला झा,
 35 नाहोर सरूगला झा,

सरूग रऊला झा,
 रऊ पेलेगला झा,
 पेलेग एबेरला झा,
 एबेर शेलहला झा,
 36 शेलह केनानला झा,
 केनान अर्षक्षदला झा,
 अर्षक्षद शेमला झा,
 शेम नोआला झा,
 नोआ लेमेखला झा,
 37 लेमेख मतूशेलहला झा,
 मतूशेलह हनोकला झा,
 हनोक येरेदला झा,
 येरेद महलालेलला झा,
 महलालेल केनानला झा,
 38 केनान एनोशला झा,
 एनोश शेतला झा,
 शेत आदमला झा,
 आदम परमेश्वरला झा मुबा।

शैतानसे येशूदा सेम फसब लबारी म्हाइबा
 मत्ती ४:१-११; मर्कूस १:१२-१३

4 परमेश्वरला आत्मा येशूथोरी फेख्खमाहेन्से येशू यर्दन स्योङ्ग्याम दो:जी। ओच्छे परमेश्वरला आत्मासे थेदा तोडतोडबा ग्लारी भोर्जी। 2 थेरी शैतानसे येशूदा बोगल न्ही धिनधोना फसब लबारी म्हाइजी। ओच्छे बोगल न्ही धिनधोना येशूसे तिगै आसोल्नी। थेतबासेलमा येशूदा ल्हानान फोखेन्जी। 3 थेनोन धुइरी शैतानसे येशूदा “हाड परमेश्वरला झा हिन्बान हिन्सम चु युडबादा गेड स्होउ” भिसी भिजी। 4 ओच्छे येशूसे शैतानदा “गेडसे जे म्हे आसो भिसी बचनरी भिबा मुला” भिसी सुइजी। †
 5 जमाहेन्से शैतानसे येशूदा नोबा गडरी भोर्सी जम्बुलिडला जम्मान यहूल्सागदे उन्बान, “डाइ हाडदा चु जम्मान यहूल्साला ग्लेदेन चु जम्मान धन सम्पत्तिला मालिक स्होला, तिगदा भिसम चु जम्मान डादा पिन्बा मुला। ओच्छे डाला सेमसे म्हन्बादा डाइ पिन्ना। 7 थेतबासेलमा हाडसे डादा पया लजी भिसम चु जम्मान हाडला तला” भिसी भिमा, 8 येशूसे थेदा “बचनरी चुहइ भिसी भिबा मुला, ‘एसे हाडला परमप्रभु परमेश्वरदा पया लउ, ओच्छे थेदा जे तेन्गो” भिसी सुइजी। ††
 9 दो:सी शैतानसे येशूदा यरूशलेमरी भोर्सी परमेश्वरला मन्दिरला थोबोरी राप्पुइजी। ओच्छे थेसे येशूदा चुहइ भिसी भिजी, “हाड पक्कान परमेश्वरला झा हिन्सम चु ग्याम मार छ्योङ्गो, 10 तिगदा भिसम बचनरी चुहइ भिसी भिबा मुला,
 ‘परमेश्वरसे हाडदा जोगब लबाला लागिरी हाडला स्वर्गदूतगदेदा कुल्ला। †
 11 ओच्छे एला काड युडबारी थाठोक्नै भिसी थेनीगदेसे एदा या यारीन ताला’ भिसी भिबा मुला।” ††
 12 तर येशूसे थेदा “बचनरी चुहइबाएनोन भिबा मुला, ‘एसे हाडला परमप्रभु परमेश्वरला सेम च्याबा गे तिगै थालउ’” भिसी सुइजी।
 ††13 जमाहेन्से शैतानसे येशूदा तिगै लसी फसब लबारी आखम्बासे लमा दो:सी मौका आयाइतेधोना थेसे येशूदा ख्लासी निजी।

येशूसे म्हिगदेदा लोप्बारी छ्याइबा
 मत्ती ४:१२-१७; मर्कूस १:१४-१५

14 जमाहेन्से परमेश्वरला आत्माला शक्तिरी येशू गालील अञ्चलरी दो:सी फेख्खजी। ओच्छे थेला बारेरी क्यारमारला जम्मान ग्लारी थे:जी। 15 येशू यहूदीगदे हुप तबा दिम दिमरी फेप्सी म्हिगदेदा लोप्बारी छ्याइजी। जमाहेन्से जम्मान म्हिगदेसे थेला जयजयकार लजी।

नासरतरी येशूला ताम पत्याब आतबा
मत्ती १३:५३-५८; मर्कूस ६:१-६

16 जमाहेन्से येशू हाड छर्बा नासरत नाम्साारी फेखजी। ओच्छे थे सदन ह्द लसी बल्ला न्हा धिनकुनु यहूदीगदे हुप तबा दिमरी फेप्सी परमेश्वरला बचनग्याम पढब लबारी छ्याइजी। 17 ओच्छे थेदा यशैया अगमवक्तासे भिबा किताब पढब लबाला लागिरी पिन्जी। जमाहेन्से थे ठोड्सी चुह्द भिसी भिबा ग्ला ते:सी पढब लजी।

18 “परमप्रभु परमेश्वरला आत्मा डादेन छ्याम मुला। तिग्दा भिसम प्राडबोगदेदा परमेश्वरला यहूत्साला समाचार थे:ना लबारी ओच्छे इयाल्खानरी मुबागदेदा परमेश्वरला यहूत्साला समाचार थे:ना लसी इयाल्खानग्याम ते:बारी,

मी आम्राड्बागदेदा मी म्राड्ना लबारी
ओच्छे दुखरी मुबागदेदा दुखग्याम फेबारी, †

19 थेह्द लसीन हाडला म्हिगदेदा परमेश्वरसे थार्बा पिन्बा धुइ खसी जिन्बा मुला भिसी

थे:ना लबारी परमेश्वरसे डादा धम्सी पुइखबा हिन्ना।”

20 जमाहेन्से येशूसे किताब बन्द लसी थेरी मुबा म्हिदा पिन्सी धन्छ्याजी। यहूदीगदे हुप तबा दिमरी मुबा जम्मान म्हिगदेसे येशूदा च्यासी चिबा मुबा।

21 ओच्छे येशूसे थेनीगदेदा “परमेश्वरला बचनरी भिबा चु ताम तिनी एनीगदेसे इयान्ना इयान्नान पूरा तबा मुला” भिसी सुड्जी। 22 येशूसे सुड्जी दयामायाला ताम थे:सी थेनीगदे उदेक म्हन्सी जम्मासेन थेला तामदा ज्यबा भिजी। ओच्छे “चु योसेफला झा आहिन?” भिसी थेनीगदेसे भिजी।

23 येशूसे थेनीगदेदा “एनीगदेसे डादा पक्कान चु उखान भिला ‘डाक्टर, हाडसे हाडदान खम्मा लउ। एसे कफर्नहुमरी उदेकला गे लजी भिसी डन्से थे:मुबा थे गे एसे हाडला नाम्साारीनोन लउ’ भिसी पाड्ला” भिसी सुड्जी।

24 दो:सी येशूसे थेनीगदेदा चुह्द भिसी सुड्जी, “च्यागो, खजिबे अगमवक्तादा हाडलान नाम्साारी मान आला। †25 तर इयान्गो, चु सत्य हिन्ना। तिग्दा भिसम एलियाला धुइरी इस्राएलरी हेम्बो सिबा मिडम्हेमेगदे ल्हानान मुबा। थे धुइरी सोम दिडसे ला दुधोना नाम आखबासे लमा यहूत्सा नाडनोन अनिकाल तबा मुबा। †26 तर परमेश्वरसे एलियादा स्थान्दो खालै मुबा ग्लारी आपुइना सीदोनला सारपत भिबा नाम्साारी मुबा हेम्बो सिबा मिडम्हेमे मुबा ग्लारी जे पुइजी। †27 थेह्द लसीन एलीशा अगमवक्ताला धुइरीएनोन इस्राएलरी कोरे खबा म्हिगदे ल्हानान मुबा। तर थेनीगदे न्हडरी सिरिया यहूत्साला नामान भिबा कोरेला जे कोरे म्हाजी। तर स्थान्दो म्हिगदे खालैलान आम्रानी।” †

28 चु ताम थे:सी यहूदीगदे हुप तबा दिमरी मुबा जम्मान म्हिगदेदा बोमो खजी। 29 जमाहेन्से थेरी मुबा म्हिगदेसे येशूदा शहरग्याम मडग्यार ते:जी। थे शहर गडरी मुबा, थेतबासेलमा थेनीगदेसे येशूदा गडला जोरी भोर्सी हिल्ना लबारी छ्याइजी। 30 तर येशू थे म्हिगदेला गुडग्याम थोन्सी फेप्जी।

येशूसे म्हड ताप्बा
मर्कूस १:२१-२८

31 जमाहेन्से येशू गालीलला कफर्नहुम भिबा शहररी फेप्जी। ओच्छे बल्ला न्हा धिनकुनु म्हिगदेदा परमेश्वरला बचनग्याम लोप्बारी छ्याइजी। 32 येशूसे लोप्बा म्राड्सी थेनीगदे उदेक तजी। तिग्दा भिसम येशूसे अधिकार लसी म्हिगदेदा लोप्बा मुबा। †33 यहूदीगदे हुप तबा दिम न्हडरी म्हडसे स्याप्बा म्हि गिक मुबा। थे म्हडसे स्याप्बा म्हिसे क्रिड्बान, 34 “नासरतला येशू हाडसे डन्दा तिग लबारी छ्याइबा? तिग हाड डन्दा साइबारी फेखबा हिन्ना? हाड परमेश्वरसे पुइखबा परमेश्वरला म्हि भिसी डादा था मुला” भिसी भिजी।

35 चुह्द भिबा थे:सी येशूसे थे म्हडदा बड्बान, “कुटिसी चिउ! थे म्हियाम थोन्सी निउ!” सुड्छ्याम थे म्हिदा जम्मान म्हिला ओन्हाडरी लछार पछार लसी थोन्सी निजी, तर थे म्हिदा तिगै आतनी। 36 चु म्राड्सी जम्मान

म्हिगदे उदेक म्हन्सी, “चु म्हिला बोली बचनरी खाह्दबा अधिकार चीम, थेला अधिकारदेन शक्तिसे कुल्मैछ्याम म्हडगदे थोन्सी यार्बा चीम!” भिसी भिजी। 37 ओच्छे येशूसे लबा गे कफर्नहुम शहरला वयारमारला जम्मान ग्लारी थे:जी।

येशूसे ल्हानान म्हिगदेदा खम्मा लबा
मत्ती ८:१४-१७; मर्कूस १:२९-३४

38 येशू यहूदीगदे हुप तबा दिमग्याम थोन्सी सिमोनना दिमरी फेप्जी। थेरी सिमोनना स्युमी छवा खसी आखम्बा मुबा। ओच्छे दिमरी मुबागदेसे “थेदा खम्मा लसी पिन्गो” भिसी बिन्ती लजी। 39 जमाहेन्से येशू सिमोनना स्युमीला डामरी फेप्सी छवादा म्हासी निउ भिसी सुड्ना थेला छवा म्हाजी। ओच्छे सिमोनना स्युमी तुरुन्तन रे:सी थेनीगदेदा क्योड्बारी छ्याइजी।

40 ओच्छे धिनी घल्माहेन्से म्हिगदेसे ल्हानान थरीला रोगसे स्याप्बा म्हिगदेदा येशू मुबा ग्लारी भजी। जमाहेन्से येशूसे थेनीगदेथोरी हाडला या थान्सी थेनीगदे जम्मादान खम्मा लजी। 41 जमाहेन्से ल्हानान म्हिगदेला ल्हुइग्याम म्हडगदे चुह्द भिबान क्रिड्सी थोन्जी, “हाड परमेश्वरला झा हिन्ना।” तर येशूसे थे म्हडगदेदा बड्बान दो:सी तिगै ताम पाड्आपुइनी। तिग्दा भिसम येशू थार्बा पिन्बा ख्रीष्ट हिन्ना भिसी थे म्हडगदेसे डोसेबा मुबा।

येशूसे परमेश्वरला यहूत्साला समाचार थे:ना लबा
मर्कूस १:३५-३९

42 स्थो तमाहेन्से येशू सुनसान ग्लारी फेप्जी। जमाहेन्से म्हिला हुलसे म्हाइबान येशू मुबा ग्लारी धोखजी। ओच्छे थेनीगदेसे येशूदा “डन्दा खलासी थाफेणो” भिसी रोकब लबारी म्हाइजी। 43 तर येशूसे थेनीगदेदा “डाइ अर्गु ग्लागदेरीएनोन परमेश्वरला यहूत्साला समाचार थे:ना लतो:बा मुला। तिग्दा भिसम परमेश्वरसे डादा चुलान लागिरी पुइखबा हिन्ना” भिसी सुड्जी। 44 जमाहेन्से येशू यहूदियाला यहूदीगदे हुप तबा दिमगदेरी फेप्सी थार्बा पिन्बा समाचार थे:ना लजी।

येशूसे डाच्छा धम्बा चेलागदे
मत्ती ४:१८-२२; मर्कूस १:१६-२०; यहून्ना १:४०-४२

5 परमेश्वरला बचन इयान्बाला लागिरी ल्हानान म्हिगदे येशूला क्युर्सीन तोर हुइ मार हुइ लबान मुबा। थेतबासेलमा येशू गनेसरेत भिबा घ्योइला कुनीरी राप्सी धन्छ्याबा मुबा। 2 ओच्छे येशूसे घ्योइला कुनीरी दौंगा न्ही म्राड्जी। थे धुइरी माड्गीगदे दौंगा खलासी हाड हाडला घ्याड खुबान मुबा। 3 थेरी मुबा दौंगा गिक चा सिमोनना मुबा। येशू सिमोनना दौंगारी क्रै:सी, “दौंगा जजाकी क्याथाड भोगो” भिसी सिमोनना सुड्जी। थे दौंगारी धन्छ्यासी म्हिगदेदा लोप्बारी छ्याइजी। †

4 लोप्सी जिन्माहेन्से येशूसे सिमोनना “दौंगा नुप्बा ग्लारीवयार भोगो, ओच्छे तार्डा चुड्बारी घ्याड रोणो” भिसी सुड्जी। 5 चु थे:सी सिमोनसे येशूदा “गुरु, डन्से म्हुन गिक घ्याड क्लाड्सैनोन तार्डा गिकनोन आस्याप्नी। तर हाडसे कुल्बासे लमा डाइ घ्याड रोप्ला” भिसी भिजी। 6 ओच्छे थेनीगदेसे घ्याड रोप्माहेन्से तार्डा ल्हानान स्याप्बासे लमा घ्याडनोन डेबारी छ्याइजी। 7 थेतबासेलमा थेनीगदेसे अर्गु दौंगारी मुबा हाडला ह्योगदेदा गुहार हीजी। जमाहेन्से थेनीगदे खसी तार्डा ते:बारी छ्याइजी। तार्डा ते:मा ते:मा दौंगा न्हीरीन तार्डा ल्हानान तबासे लमा दौंगा न्हीनोन डुबब तबारी छ्याइजी।

8 चु म्राड्सी सिमोन पत्रुससे येशूला स्थापरी प्या लसी, “प्रभु, डा पापी म्हि हिन्ना। थेतबासेलमा हाड डा मुबाग्याम फेणो” भिसी भिजी। 9 तिग्दा भिसम ल्हानान तार्डा स्याप्बासे लमा सिमोनदेन थेला ह्योगदे उदेक तजी।

10 ओच्छे सिमोनदेन छ्याम ढिक्सी गे लबा जब्दियाला झागदे याकूबदेन यहून्नादाएनोन ल्हानान उदेक तजी। जमाहेन्से येशूसे सिमोनना “थालोङ्गो, दाहेन्से ए तार्डा चुड्बा म्हि आहिन, तर एसे म्हिगदेदा परमेश्वर मुबा ग्लारी

† 4:18 यशै ६१:१-२ †† 4:24 यहू ४:४४ † 4:25 १ राजा १७:१ †† 4:26 १ राजा १७:८-१६ †† 4:27 २ राजा ५:१-१४ ††† 4:32 मत्ती ७:२८-२९

‡‡‡ 5:3 मत्ती १३:१-२; मर्कूस ३:९-१०; ४:१ § 5:5 यहू २१:३ †† 5:6 यहू २१:६

भला" भिंसी सुड्जी।¹¹ जमाहेन्से थेनीगदेसे दोंगा घ्योइला कुनीरी भसी हाडदेन छ्याम मुबा जम्मान स्हेगदे ख्लासी येशूदेन छ्याम भ्रजी।

येशूसे कोरे खबा म्हिदा खम्ना लबा
मत्ती ८:१-४; मर्कूस १:४०-४५

¹² तिरुकुनु येशू शहर गिकरी मुबा। ओच्छे थेनोन शहररी मुबा कोरे खबा म्हि गिकसे येशूदा म्राड्जी। जमाहेन्से थे येशूला डामरी खसी प्या लबान, "प्रभु, हाडला सेम मुसम हाडसे डादा खम्ना लखम्ना" भिंसी भिमा,¹³ येशूसे थेदा हाडला छ्यासे थुसी, "ए खम्ना भिबा डाला सेम मुला, ए खम्ना" भिंसी सुड्छ्याम थेला कोरे म्हाजी।¹⁴ जमाहेन्से येशूसे थेदा "च्यागो, एसे चु ताम खालैदा थापाङ्गो। बरु ए निसी परमेश्वरला मन्दिररी पूजा लबा म्हिदा उन्गो। ओच्छे एला कोरे म्हाजी भिंसी म्हिगदेसे था याड्बाला लागिरी परमेश्वरसे मोशादा पिन्बा ठिमसे कुल्बा अन्धार बलि फुल्गो" भिंसी कुल्जी।[†]

¹⁵ जमाकुनुहेन्से झन जम्मान ग्लारी येशूसे लबा गेला बारैरी थे:जी। थेतबासेलमा म्हिगदे येशूला ताम ड्यान्बारीदेन हाडला रोग म्हागै भिंसी येशू मुबा ग्लारी खजी।¹⁶ तर येशू चा सुनसान ग्लारी फेप्सी प्रार्थना लबा मुबा।

येशूसे कुज्या म्हिदा खम्ना लबा
मत्ती ९:१-८; मर्कूस २:१-१२

¹⁷ तिरुकुनु येशूसे म्हिगदेदा लोप्बान लबा धुडरी गालील अञ्चलदेन यहूदिया अञ्चलला नाम्सा नाम्साग्यामसे ओच्छे यरूशलेमग्याम खबा फरिसीगदेदेन यहूदी धर्मगुरुगदेएनोन थेरी मुबा। येशूदेन छ्याम आखम्बा म्हिगदेदा खम्ना लबा परमप्रभुला शक्ति मुबा।¹⁸ थेनोन धुडरी म्हिगदेसे कुज्या म्हि गिकदा खाटरीन पुड्सी भजी। ओच्छे थेनीगदेसे थे कुज्या म्हिदा दिम न्हडरी येशूला डाच्छापट्टि भोबारी म्हाड्जी।¹⁹ तर म्हिला हुलसे लमा थेनीगदेसे थे कुज्या म्हिदा येशूला डाच्छापट्टि भोबाला लागिरी ग्याम आयाड्नी। थेतबासेलमा थेनीगदेसे थे कुज्या म्हिदा मड्यारग्यामसे छानारी भोजी। ओच्छे छाना होक्सी थेदा तीबा नान्बादेन छ्यामनोन येशूला डाच्छापट्टि धोना लजी।²⁰ थे म्हिगदेला विश्वास म्राड्सी येशूसे थे कुज्या म्हिदा "डाड एला पापला दोष मेटब लबा मुला" भिंसी सुड्जी।²¹ येशूसे चुहड् सुड्बा म्राड्सी यहूदी धर्मगुरुगदेदेन फरिसीगदेसे "हाडसे हाडदान परमेश्वर स्होसी ताम लबा चु म्हि खाल हिन्ना? म्हिगदेला पापला दोष मी परमेश्वरसे जे मेटब लखम्मुला" भिंसी हाड हाड न्हडरी पाड्बारी छ्याड्जी।

²² येशूसे थेनीगदेला सेमला ताम था याड्सी चुहड् भिंसी सुड्जी, "एनीगदेला सेमरी तिग्दा चुहड्बा म्हन्बा?"²³ चु कुज्या म्हिदा 'एला पाप माफ तबा मुला' भिबादेन 'रे:सी भ्रउ' भिबारी खजिबा चा सजिलो मुला?²⁴ तर च्यागो, परमेश्वरसे पुड्खबा म्हिदा चु जम्बुलिडरी म्हिगदेला पापला दोष मेटब लबा अधिकार मुला भिबा तामला प्रमाण डाड एनीगदेदा उन्ना।" जमाहेन्से येशूसे थे कुज्या म्हिदा "ए रे:गो, ओच्छे एला तीबा नान्बा पुड्सी दिमरी निउ।"²⁵ येशूसे थेहड् सुड्छ्याम थे कुज्या म्हि डोड रे:सी हाडला तीबा नान्बा पुड्सी परमेश्वरला जयजयकार लबान दिमरी निजी।²⁶ जमाहेन्से थेरी मुबा जम्मान म्हिगदे लोड्सी उदेक म्हन्जी। ओच्छे परमेश्वरला जयजयकार लबान, "तिनी य्हाडसे ल्हानान उदेकला गे म्राड्जी" भिंसी भिजी।

येशूसे लेवीदा ड्योड्बा
मत्ती ९:९-१३; मर्कूस २:१३-१७

²⁷ थेग्याम फेप्बान लबा धुडरी येशूसे लेवी भिबा तिरो दुड्बा म्हिदा तिरो दुड्बा ग्लारी चिबान लबा म्राड्जी। ओच्छे येशूसे थेदा "डादेन छ्याम भ्रउ" भिंसी सुड्जी।²⁸ जमाहेन्से लेवीसे जम्मान स्हे ख्लासी रे:जी ओच्छे येशूदेन छ्याम भ्रजी।

²⁹ ओच्छे लेवीसे येशूदा हाडला दिमरी भोज सोल्बारी ड्योड्जी। थेरी येशूदेन छ्याम भोज चबारी चिबा म्हिगदे न्हडरी तिरो दुड्बा म्हिगदेदेन

ल्हानान स्हान्दो म्हिगदेएनोन मुबा।³⁰ जमाहेन्से फरिसीगदेदेन थेनीगदेला धर्मगुरुगदेसे येशूला चेलागदेदा बिरोध लबान, "तिग्दा एनीगदे तिरो दुड्बा म्हिगदे ओच्छे स्हान्दो पापीगदेदेन छ्याम चिसी चबा थुड्बा लबा?" भिंसी ड्योड्मा,^{††} येशूसे थेनीगदेदा "खम्बा म्हिदा डाक्टर आतो:, तर आखम्बा म्हिदा जे डाक्टर तो:ला!³² थेतबासेलमा परमेश्वरला डाच्छा ज्यबा मुबा म्हिगदेदा आहिन, तर डनी पापी हिन्ना भिंसी भ्रबा म्हिगदेसे हाडला पाप ख्लासी परमेश्वरपट्टि दो:गै भिंसी ड्योड्बारी डा खबा हिन्ना" भिंसी सुड्जी।

येशूसे फोड्थान चिसी प्रार्थना लबाला लागिरी लोप्बा
मत्ती ९:१४-१७; मर्कूस २:१८-२२

³³ जमाहेन्से थेनीगदेसे येशूदा "यूहन्नाला चेलागदे सदन फोड्थान चिसी प्रार्थना लमुला। ओच्छे फरिसीगदेला चेलागदेसेनोन थेहड्नुन लमुला। तर हाडला चेलागदेसे चा तिग्दा फोड्थान चिसी प्रार्थना आलबा?" भिंसी ड्योड्मा,³⁴ येशूसे थेनीगदेदा "म्हाछार जन्तीगदेदेन छ्याम मुतेधोना थेनीगदेदा खाहड् लसी फोड्थान चिउ भिखम्ना?"³⁵ तर म्हाछार थेनीगदेग्याम फेसी भोर्बा धुडरी जे थेनीगदे फोड्थान चिला" भिंसी सुड्जी।³⁶ ओच्छे येशूसे थेनीगदेदा उखान गिकएनोन सुड्बान, "खालै म्हिसे बोक्तो क्वानरी छार क्वानगेन्से आख्या। थेहड् लसी ख्याजी भिसम छार क्वानएनोन न्होड्ला ओच्छे छार क्वानगेन बोक्तो क्वानदेन छ्याम ढिकएनोन आढिक।³⁷ ओच्छे खालै म्हिसे ढिला बोक्तो ताडरी अडगुरला कलिलो निड्गु आयु, युजी भिसम कलिलो निड्गुसे ढिला बोक्तो ताड भोसी ढेला। जमाहेन्से निड्गु डेला ओच्छे ढिला ताडएनोन गे आखेल्बा तला।³⁸ थेतबासेलमा कलिलो निड्गु छार ढिला ताडरी युसी थान्तो:बा मुला।³⁹ खालैसे चिप्बा निड्गु थुड्सी कलिलो निड्गु थुड्बा सेम आल, तिग्दा भिसम थेसे चिप्बा निड्गुन ज्यबा भिला।"

येशू बलप्बा न्हबा धिननाएनोन प्रभु हिन्ना
मत्ती १२:१-८; मर्कूस २:२३-२८

6 बलप्बा न्हबा धिनकुनु येशू बुग्याम फेप्बान मुबा। थे धुडरी थेला चेलागदेसे ग्वाला नम थुसी यारी न्हड्सी चबारी छ्याड्जी।[‡] तर फरिसीगदे न्हडरी कोड कोडसे "थेनीगदेदा बलप्बा न्हबा धिनकुनु लबारी आतबा गे एनीगदेसे तिग्दा लबा?" भिंसी भिमा,³ येशूसे थेनीगदेदा चुहड् भिंसी सुड्जी, "एनीगदेसे परमेश्वरला बचन पढब लबा आरे? दाऊदसे थेदेन छ्याम मुबागदे फोखेन्बा धुडरी थेसे तिग लजी?"^{‡‡} थेसे परमेश्वरला मन्दिररी पूजा लबा म्हिगदे बाहेक स्हान्दोसे चबारी आतबा गेड परमेश्वरला दिमरी वाड्सी ते:सी चजी। ओच्छे थेसे हाडदेन छ्याम मुबागदेदाएनोन पिन्मा खालैसेन तिगै भिजी?"^{‡‡}

⁵ जमाहेन्से येशूसे थेनीगदेदा "परमेश्वरसे पुड्खबा म्हि बलप्बा न्हबा धिनना प्रभु हिन्ना" भिंसी सुड्जी।

येशूसे या खर्बा म्हिला या खम्ना लबा
मत्ती १२:९-१४; मर्कूस ३:१-६

⁶ बलप्बा न्हबा अर्गु धिनकुनु येशूसे यहूदीगदे ह्युप तबा दिम न्हडरी परमेश्वरला खुल्साला बारैरी लोप्बारी छ्याड्जी। थेरी दाहिने या खर्बा म्हि गिक मुबा।⁷ बलप्बा न्हबा धिनकुनु येशूसे थे म्हिला खर्बा या खम्ना लला वा भिंसी यहूदी धर्मगुरुगदेदेन फरिसीगदेसे दोष लबाला लागिरी चिवा लसी चिबा मुबा।⁸ तर येशूसे थेनीगदेला सेमला ताम था याड्सी थे या खर्बा मुबा म्हिदा "ए रे:सी चुरी रापो" भिंसी सुड्जी। ओच्छे थे म्हि राप्पी।⁹ जमाहेन्से येशूसे थेनीगदेदा "थेहड् भिसम चु तामला जोहाब पिन्गो, बलप्बा न्हबा धिनकुनु ज्यबा लबादेन नड्बा लबा, अथवा म्हि सोना लबादेन सिना लबा खजिबा चा ज्यबा हिन्ना" भिंसी सुड्जी।¹⁰ ओच्छे येशूसे हाडला क्युसीन मुबा म्हिगदेदा स्हीसी थे या खर्बा मुबा म्हिदा "एला या तन्गब लउ!" भिंसी सुड्जी। ओच्छे थेसे या तन्गब लमैछ्याम थेला या खम्नी।¹¹ चु म्राड्सी

† 5:14 लेवी १४:१-३२

†† 5:30 लूका १५:१-२ ‡ 6:1 व्यव २३:२५ ‡‡ 6:3 १ शमू २१:१-६ ‡‡ 6:4 लेवी २४:९

फरिसीगदेदा बोमो रे:सी दाहेन्से येशूदा तिग लबा भिसी हाड हाड न्हडरी सल्लाह लजी।

येशूसे च्युक न्ही चेलागदेदा धम्बा
मत्ती १०:१-४; मर्कूस ३:१३-१९

12 तिरेकुनु येशू गडरी फेप्पी म्हुन गिकनोन परमेश्वरदेन छयाम प्रार्थना लजी। 13 ओच्छे स्हो तमाहेन्से येशूसे हाडला चेलागदेदा ड्योइसी थेनीगदे न्हडरी च्युक न्ही चेलादा धम्जी। ओच्छे थेनीगदेदा मुल चेला भिसी मिन थान्जी। 14 सिमोनदा येशूसे पत्रुस भिसी सुड्जी, थेला आले अन्द्रियास ओच्छे याकूब, यूहन्ना, फिलिप, बारथोलोमाइ, 15 मत्ती, थोमा, अल्फयसला झा याकूब ओच्छे सिमोन। चु सिमोनदा हाडला यहुल्सादा माया लबा म्हि भिसी भिमुबा। 16 ओच्छे याकूबला झा यहूदा, ओच्छे यहूदा इस्करियोत चुनोन यहूदा इस्करियोतसे लिच्छा येशूदा चुड्सी म्हिगदेला यारी जिम्मा पिन्जी।

येशूसे ल्हानान म्हिगदेदा खम्ना लबा
मत्ती ४:२३-२५; मर्कूस ३:७-१२

17 येशू हाडसे धम्बा चेलागदेदेन छयाम गडग्याम मार फाप्पी सम्म ग्लारी फेप्खसी राप्पी धन्छ्याजी। जमाहेन्से येशूदेन छयाम भ्रबा म्हिला हुल ओच्छे यहूदिया अञ्चलला जम्मान ग्लादेन यरूशलेम, ओच्छे टुरोसदेन सीदोन भिबा ग्लायाम म्हिला हुल 18 येशूसे लोप्बा ताम ड्यान्बारी ओच्छे हाड हाडला रोगगदे म्हाना लबारी खजी। थेरी म्हडसे स्याप्पी आखम्बा म्हिगदेएनोन खम्जी। 19 थेतबासेलमा जम्मान म्हिगदेसे येशूदा थुर्बारी म्हाइमुबा। तिगदा भिसम येशूदेन छयाम म्हिगदेदा खम्ना लबा शक्ति मुबा। थे शक्तिग्याम रोगसे स्याप्बा जम्मान म्हिगदे खम्जी।

दुखदेन सुख
मत्ती ५:१-१२

20 जमाहेन्से येशूसे हाडला चेलागदेदा स्हीबान चुहड् भिसी सुड्जी, "दुख याड्बा म्हिगदे †, एनीगदेसे परमेश्वरग्याम मोलम याड्बा। तिगदा भिसम परमेश्वरला यहुल्सा एनीगदेलान हिन्ना।

21 फोखेन्बा म्हिगदे, एनीगदेसे परमेश्वरग्याम मोलम याड्बा। तिगदा भिसम एनीगदेदा परमेश्वरसे घेन्ना लला। ओच्छे क्राबा म्हिगदे, एनीगदेसे परमेश्वरग्याम मोलम याड्बा। तिगदा भिसम परमेश्वरसे एनीगदे ताड्सी डे:म्याड्बा।

22 "परमेश्वरसे पुड्खबा म्हिदा विश्वास लबासे लमा म्हिगदेसे एनीगदेदा हेला लसी नाम्साग्यामसे ते:ला ओच्छे जम्मासेन एनीगदेदा खिसी लमाएनोन एनीगदेसे परमेश्वरग्याम मोलम याड्बा। †

23 "थे धुडरी एनीगदे फुरफुर ताड्बा। तिगदा भिसम स्वर्गरी एनीगदेसे घेन इनाम याड्बा। एनीगदेदा दुख पिन्बागदेला आखे म्हेमेगदेसेनोन अगमवक्तागदेदा चुहड्नुन लमुबा। ‡

24 फ्युक्पोगदे, एनीगदेसे परमेश्वरग्याम सजाय याड्बा। तिगदा भिसम एनीगदेसे मोजमजा लसी जिन्बा मुला।

25 घेन्बागदे, एनीगदे फोड्थाननोन चितो:ला। तिगदा भिसम एनीगदेसे परमेश्वरग्याम सजाय याड्बा। ओच्छे ताड्बागदे दुख नासी क्रासी चितो:ला।

तिगदा भिसम एनीगदेसे परमेश्वरग्याम सजाय याड्बा।

26 म्हिगदेग्याम मान याड्बागदे, एनीगदेसे परमेश्वरग्याम सजाय याड्बा। तिगदा भिसम एनीगदेला आखे म्हेमेगदेसेनोन फट्टा अगमवक्तागदेदा चुहड्नुन लमुबा।

येशूसे शत्रुदाएनोन माया लतो:ला भिसी लोप्बा
मत्ती ५:३८-४८; ७:१२

27 "तर डाइ लोप्बा ताम ड्यान्बागदेदा डाइ भिला, एनीगदेसे हाडला शत्रुगदेदा माया लउ, ओच्छे हाडदा हेला लबागदेदा ज्यबा व्यवहार लउ। 28 एनीगदेदा के:बागदेदा परमेश्वरसे मोलम पिन्नी भिसी प्रार्थना लउ। ओच्छे खालैसे एनीगदेदा आज्यबा लजी भिसम थेनीगदेदा ज्यबा तगै भिसी परमेश्वरदेन छयाम प्रार्थना लउ। 29 खालैसे एदा ग्रम्बा गिकरी तोजी भसम अर्गुपट्टिला ग्रम्बाएनोन तासी पिन्गो। ओच्छे एला स्कोट भोर्बारी छ्याड्बादा स्हुदमदाएनोन पिन्गो। 30 एदेन छयाम हीबागदेदा पिन्गो, ओच्छे एसे थेदेन छयाम दो:सी थाड्गीगो। 31 एनीगदेदा स्हान्दो म्हिगदेसे जस्तो व्यवहार लगै भिसी म्हन्बा मुला, एनीगदेसेनोन स्हान्दोगदेदा थेहड्नुन लउ। †

32 "चुदे एनीगदेदा माया लबादा जे एनीगदेसे माया लजी भिसम एनीगदेदा तिग ज्यबा तला? तिगदा भिसम पापीगदेसेनोन हाडदा माया लबागदेदा माया लमुला। 33 ओच्छे एनीगदेसे हाडदा ज्यबा लबादा जे ज्यबा लजी भिसम एनीगदेदा तिग ज्यबा तला? तिगदा भिसम पापीगदेसेनोन थेहड्नुन लमुला। 34 चुदे एनीगदेसे दो:सी याड्बा सेम लसी खालैदा छे पिन्जी भिसम एनीगदेदा तिग ज्यबा तला? तिगदा भिसम पापीगदेसे जे जति छे पिन्बा मुला ओतेन किन्बा आश लसी पापीगदेदान छे पिन्बा मुला। 35 तर हाडला शत्रुगदेदा माया लउ, जम्मादान ज्यबा लउ, दो:सी किन्बा सेम लसी छे थापिन्गो ओच्छे एनीगदेला मान घेन तला। एनीगदे स्वर्गरी धन्छ्याबा जम्मान भन्दा घेन परमेश्वरला सन्तान तला। तिगदा भिसम परमेश्वरसे बैगुनीदेन हाडला जे ग्याम च्याबा म्हिगदेदाएनोन दया लमुला। 36 थेतबासेलमा एनीगदेला परमेश्वर आबासे दया लबा हड् एनीगदेसेनोन दया लउ।

स्हान्दोदा दोष थालउ
मत्ती ७:१-५

37 "स्हान्दोदा दोष लसी थाभ्रउ ओच्छे परमेश्वरसेनोन एनीगदेदा दोष आल। म्हिगदेला निसाफ लसी थाभ्रउ ओच्छे परमेश्वरसेनोन एनीगदेला निसाफ आल। म्हिगदेदा माफ पिन्गो ओच्छे परमेश्वरसेनोन एनीगदेदा माफ पिन्ना। 38 म्हिगदेदा पिन्गो ओच्छे परमेश्वरसेनोन एनीगदेदा पिन्ना। परमेश्वरसे मी छुड्सी छुड्सी पिन्ना ओच्छे जुन दप्बा स्हेसे एनीगदेसे स्हान्दोगदेदा पिन्ना, थेनोन दप्बा स्हेसे एनीगदेसे याड्बा।"

39 येशूसे थेनीगदेदा उखानग्याम चुहड् भिसी सुड्जी, "तिग मी आम्राड्बा म्हिसे मी आम्राड्बा म्हिदान डोन्याब लखम्ला? चुदे थेसे डोन्याब लजी भिसम थे न्हीनोन व्हाडरी ताड्बा। †40 ओच्छे खजिबै चेला हाडला गुरु भन्दा घेन आत, तर थेसे लोप्सी जिन्माहेन्से गुरु हड्बान तला। ††

41 "स्हान्दोला गोरी से: भ्रबा म्हाड्बासे हाडला गोरी मुइ भ्रबा तिगदा आम्राड्बा? 42 हाडला गोरी भ्रबा मुइ आम्राड्बासे खाहड् लसी आलेदा 'खाइ, एला गोला से: ते:सी पिन्ना भिसी भिखम्ला।' ††† कप्टी, डाच्छा हाडला गोला मुइ ते:गो, ओच्छे जे एसे आलेला गोरी भ्रबा से: ते:बारी खम्ला।

ज्यबा दोडला रोदेन आज्यबा दोडला रो
मत्ती ७:१६-२०; १२:३३-३५

43 "ज्यबा दोडरी आज्यबा रो आरो ओच्छे आज्यबा दोडरी ज्यबा रो आरो। 44 जम्मान दोड थेरी रोबा रो अन्धार डोसेला। पुजुला दोडग्याम अञ्जीर आथु ओच्छे पोलाडला दोडग्यामएनोन अड्गुर आथु। §45 तिगदा भिसम ज्यबा सेम मुबा म्हिला सेम न्हडग्याम ज्यबान ताम थोन्मुला ओच्छे नड्बा सेम मुबा म्हिला सेम न्हडग्याम नड्बान ताम थोन्मुला। थेतबासेलमा म्हिला सेम न्हडरी जे मुला थेनोन थेला सुड्ग्याम पाड्बा। ††

†† 6:31 मत्ती ७:१२ †† 6:39 मत्ती १५:१४ ††† 6:40 मत्ती १०:२४-२५; यूह १३:१६; १५:२० ††† "हाडला गोरी मुइ भ्रबा भिबादेन आलेला गोरी मुबा से:" भिबा तामदा ग्रीक बाइबलरी "हाडला गोरी मुबा मूढादा वास्ता आलना हाडला आलेला गोरी मुबा धुलु ते:सी पिन्ना" भिसी भिबा मुला। § 6:44 मत्ती १२:३३ †† 6:45 मत्ती १२:३४

† "दुख याड्बा म्हिगदे" भिबा तामदा ग्रीक बाइबलरी प्राड्बोगदे भिसी भिबा मुला।
†† 6:22 १ पत्रु ४:१४ † 6:23 २ इति ३६:१६; मुल ७:५२

बुद्धि मुबा म्हिदेन मूर्ख म्हिसे स्होबा दिम
मती ७:२४-२७

46 “डाइ कुल्बा ताम आइयान्सम तिगदा डादा ‘प्रभु, प्रभु’ जे भिबा? 47 डा मुबा ग्लारी खबा म्हिसे डाइ पाइबा ताम इयान्ना ओच्छे डाइ कुल्बा अन्धार गे लला। थे खाहइबा म्हि हिन्ना भिबा ताम डाइ एनीगदेदा पाइला। थे म्हिसे 48 हाडला दिम स्होबा धुइरी जग नुप्पा ख्वसी स्होजी। ओच्छे नाम, भाल खमा थे दिमरी टजी। तसैनोन थे दिम आफुप्पी, तिगदा भिसम थे दिमला जग नुप्पा ख्वसी स्होबा मुबा। 49 तर जुन म्हिसे डाइ पाइबा ताम थे:सी थे अन्धार गे आल थे म्हि चा जग नुप्पा आख्वना दिम स्होबा म्हि हइबा हिन्ना। थेतबासेलमा नाम, भाल बाढी खबा धुइरी थे दिमरी टसी थे दिम फुप्पी ल्हानान नोक्सान तजी।”

येशूसे कप्तानला नोकरदा खम्ना लबा
मती ८:५-१३

7 चुहइ सुइसी जिन्माहेन्से येशू कफर्नहुम भिबा ग्लारी फेप्पी। 2 थेरी रोमी कप्तान गिकला नोकर आखम्ना सिबारीन छ्याइबा मुबा। थेसे थे नोकरदा ल्हानान माया लमुबा। 3 थेतबासेलमा थेसे हाडला नोकरदा खम्ना लगै भिसी येशूदा फेप्खउ भिसी इयोइबाला लागिरी यहूदी गन्बागदेदा पुइजी। तिगदा भिसम थेसे येशूला बारेरी थे:बा मुबा। 4 जमाहेन्से थेनीगदे येशू मुबा ग्लारी खसी बिन्ती लबान, “थे हाडला दया याइतो:बा खाल्ला म्हि हिन्ना। 5 तिगदा भिसम थेसे यहाइ यहूदी यहुलदा माया लमुला, ओच्छे थेसेन यहूदीगदे हुप तबा दिम स्होसी पिन्बा हिन्ना” भिसी भिजी।

6 जमाहेन्से येशू थेनीगदेदेन छ्याम फेप्पी। येशू कप्तानला दिम डामरी धोमा, कप्तानसे हाडला ह्योगदेदा चुहइ भिउ भिसी येशू मुबा ग्लारी पुइजी, “प्रभु हाडसे दुख थालउ। तिगदा भिसम हाड डाला दिमरी फेप्खबाधोनाला डा आरे। 7 डाएनोन हाड मुबा ग्लारी खबाधोनाला आम्हन्नी। थेतबासेलमा हाडसे डाला नोकर खमै भिसी सुइ जे सुइसैनोन थे खम्ना। 8 तिगदा भिसम डाएनोन डाला हाकिमला तहरी चिबा म्हि हिन्ना। डाला तहरीनोन सिपाहीगदे मुला। डाइ कोइदा निउ भिमा निमुला, कोइदा खउ भिमा खमुला। ओच्छे डाला नोकरदा डाइ चुहइ लउ भिमा थेसे थेहइनोन लमुला” भिसी भिजी।

9 थेला चुहइबा ताम थे:सी येशू उदेक तजी, ओच्छे म्हिला हुलपट्टि दो:सी, “एनीगदेसे डाला ताम इयान्ना, इस्राएल यहुल्साला म्हिगदे न्हडरीनोन डाइ चुहइबा ग्रेन विश्वास मुबा म्हि आस्याप्पी” भिसी सुइजी। 10 जमाहेन्से कप्तानसे येशू मुबा ग्लारी पुइबा म्हिगदे दो:सी दिमरी निमा, थे नोकर खम्सी जिन्बा म्राइजी।

येशूसे हेम्बो सिबा म्रिडम्हेमेला झादा सिबाग्याम सोना लबा

11 न्हडगरदड येशू नाइन भिबा शहररी फेप्पा हाडला चेलागदेदेन म्हिला हुलएनोन येशूदेन छ्याम निजी। 12 ओच्छे येशू शहररी धोबारीन छ्याइमा सिबा म्हि भवान मुबा। थे सिबा म्हि हेम्बो सिबा म्रिडम्हेमेला गिक जेन झा मुबा। ओच्छे शहरला म्हिगदेएनोन थेदेन छ्याम मुबा। 13 थे म्रिडम्हेमेदा म्राइसी प्रभुदा सेमहेन्सेन दया रे:जी। ओच्छे थेदा “ए थाक्रागो” भिसी सुइजी। 14 जमाहेन्से येशू सिबाला डामरी फेप्पी सिबादा थुर्जी। चुहइ लसी थुर्मेछ्याम सिबा पुइबा म्हिगदे थेन तजी। जमाहेन्से येशूसे सिबा म्हिदा “कोला, रे:गो” भिसी सुइजी। 15 जमाहेन्से सिबा म्हि रे:सी ताम पाइबारी छ्याइजी। ओच्छे येशूसे थेदा थेला आमादा जिम्मा पिन्जी।

16 चु म्राइसी जम्मान म्हिगदे लोइसी परमेश्वरदा जयजयकार लबान चुहइ भिजी, “यहाडला गुइरी ग्रेन अगमवक्ता गिक फेप्खबा मुला। ओच्छे परमेश्वरसे हाडला म्हिदा दया लबा मुला।” 17 जमाहेन्से येशूसे लबा गेला बारेरी यहूदियाला जम्मान ग्लारीदेन डाम डामला जम्मान जिल्लारी थे:जी।

बत्तिस्मा पिन्बा यूहन्नासे हाडला चेला न्हीदा येशू मुबा ग्लारी पुइबा
मती ११:२-१९

18 यूहन्नाला चेलागदेसे येशूसे लबा जम्मान गे हाडला गुरु यूहन्नादा पाइजी। जमाहेन्से यूहन्नासे हाडला चेला न्हीदा इयोइसी, 19 “डन्से फेप्खला भिसी आश लसी चिबा थार्बा पिन्बा ग्ले हाडनोन हिन्ना कि स्थान्दो खालैदा भ्रान्तो:बा हिन्ना?” भिसी येशू मुबा ग्लारी इयोइबारी पुइजी। 20 जमाहेन्से थेनीगदे येशू मुबा ग्लारी निसी, “डन्से फेप्खला भिसी आश लसी चिबा थार्बा पिन्बा ग्ले हाडनोन हिन्ना कि स्थान्दो खालैदा भ्रान्तो:बा हिन्ना?” भिसी इयोइबारी बत्तिस्मा पिन्बा यूहन्नासे डन्दा हाड मुबा ग्लारी पुइखबा हिन्ना भिसी भिजी।

21 थे धुइरी येशूसे रोगसे स्याप्पा ल्हानान म्हिगदेदेन म्हडसे स्याप्पा म्हिगदेदा खम्ना लबान मुबा। ओच्छे मी आम्राइबा ल्हानान म्हिगदेला मी म्राइना लजी। 22 जमाहेन्से यूहन्नाला चेलागदेदा येशूसे चुहइ भिसी सुइजी, “एनीगदेसे जुन जुन ताम म्राइबादेन थे:बा मुला, थेनोन ताम यूहन्ना मुबा ग्लारी निसी पाइजी। मी आम्राइबागदेला मी म्राइना लबा मुला, कुज्यादेन कोरे खबा म्हिगदेदा खम्ना लबा मुला, नाब्यड आथे:बागदेदा थे:ना लबा मुला, सिबागदेदा सोना लबा मुला, ओच्छे प्राडबोगदेदा परमेश्वरला यहुल्साला समाचार थे:ना लबान मुला। 23 जुन म्हिसे शइका आलना विश्वास लला थे म्हिसे परमेश्वरग्याम मोलम याइला।”

24 यूहन्नाला चेलागदे दो:सी निमाहेन्से येशूसे यूहन्नाला बारेरी म्हिला हुलदा चुहइ भिसी सुइबारी छ्याइजी, “एनीगदे तोडतोडबा ग्लारी तिग च्याबारी निबा मुबा? तिग लाबासे य्होइबा मा दोड च्याबारी निबा हिन्ना? 25 ओच्छे एनीगदे तिग च्याबारी थोन्बा मुबा? ज्यबा ज्यबा क्वान क्वान्बा म्हिदा च्याबारी? च्यागो, थेहइबा ज्यबा ज्यबा क्वान क्वान्बादेन मोजमजा लबा म्हि मी ग्लेखाडरी जे चिबा मुला। 26 एनीगदे तिग च्याबारी निमुबा? तिग अगमवक्तादा च्याबारी निबा आहिन? हिन्ना, डाइ पाइला एनीगदेसे स्थान्दो अगमवक्तागदे भन्दा ग्रेन म्हि गिकदा म्राइबा मुला। 27 थे अगमवक्ता थेनोन हिन्ना, थेला बारेरी परमेश्वरला बचनरी चुहइबा भ्रिबा मुला, ‘च्यागो, डाइ डाला समाचार भोर्बा म्हिदा एला डाच्छा डाच्छा पुइखला। थेसे एला लागिरी ग्याम स्होला’। 28

28 “थेतबासेलमा च्यागो, दान्दोना न्हबा कोलागदे न्हडरी यूहन्ना भन्दा ग्रेन म्हि खालै आरे। तसैनोन परमेश्वरला यहुल्सारी जुन म्हि जजा मुला थे म्हि यूहन्ना भन्दा ग्रेन म्हि तला।”

29 ओच्छे तिरो दुइबा म्हिगदेदेन स्थान्दो म्हिगदेसे यूहन्नाला ताम थे:सी, “परमेश्वरसे कुल्बा ताम ठीक हिन्ना” भिसी थेंग्याम बत्तिस्मा किन्बा मुबा। 30 तर फरिसीगदेदेन यहूदी धर्मगुरुगदेसे चा परमेश्वरसे कुल्बा ताम गे आखेल्बा ताम हिन्ना भिसी यूहन्नाग्याम बत्तिस्मा आकिन्बा मुबा। 31 येशूसे थेनीगदेदा चुहइ भिसी सुइजी, “थेहइबा म्हिगदेदा डाइ तिगदेन छ्याम दाँजब लसे? थेनीगदे खाहइबा मुला भिसम, 32 बजाररी चिबा कोलागदे हइबा मुला। थेनीगदे हाड हाड न्हडरी चुहइ भिसी कल लमुला, ‘डन्से एनीगदेला लागिरी बाँसुरी ह्याप्पी पिन्जी, तर एनीगदे आस्थनी। ओच्छे डन्से दुखला व्हाइ गोजी, तर एनीगदे आक्रानी?’

33 तिगे चबा थुइबादेन अडगुरला निडगुएनोन आथुइबा बत्तिस्मा पिन्बा यूहन्ना खमा एनीगदेसे ‘थेदा म्हडसे स्याप्पा म्हि’ भिसी भिबा मुबा। 34 परमेश्वरसे पुइखबा म्हि चा चबा थुइबा लसी भ्रजी। थेतबासेलमा म्हिगदेसे डादा ‘च्यागो, ल्हानान चबा स्हेदेन ल्हानान निडगु कासी इयोइसी भ्रबा, तिरो दुइबादेन पापीगदेला ह्यो’ भिसी भिमुला! 35 तर परमेश्वरग्याम बुद्धि याइबागदेसे जे परमेश्वरला बुद्धि ठीक हिन्ना भिसी था याइबा मुला।”

येशू फरिसीला दिमरी फेप्पा

36 फरिसीगदे न्हडला गिकसे येशूदा सोल छ्योइबारी इयोइजी। ओच्छे थेला दिमरी फेप्पी येशू सोल छ्योइबारी धन्छ्याजी। 37 थे शहररी मुबा पापी

मिडम्हेमे गिकसे फरिसीला दिमरी येशू सोल छ्योइबारी फेखजी भिबा थे:सी सिङ्गमरमरला बोटलरी अत्तर भसी येशू मुबा ग्लारी खजी।³⁸ थे येशूला ग्यापग्याम खसी येशूला डामरी राप्सी क्राजी, ओच्छे थेला मीखलीसे येशूला स्थाप भम्जी। जमाहेन्से थेसे हाडला क्रासे येशूला स्थाप पयासी च्योक लसी³⁹ येशूला स्थापरी अत्तर फोर्बारी छयाइजी।³⁹ चुहइ लबा म्राइसी येशूदा इयोइबा फरिसीसे “चु म्हे अगमवक्ता हिन्सम थेदा थुर्बा मिडम्हेमे खाहइबा मिडम्हेमे भिसी डोसेसेला मुबा। तिग्दा भिसम चु पापीस्या हिन्ना” भिसी हाडला सेम न्हडरी म्हन्जी।

⁴⁰ थेसे सेमरी चुहइबा ताम म्हन्बा था याइसी येशूसे फरिसीदा “सिमोन डाइ एदा ताम गिक पाइतो:बा मुला” भिसी सुङ्गा, थेसे “सुङ्गो गुरु” भिसी भिजी।⁴¹ “च्यागो, म्हे न्हीसे साहू गिकदेन छ्याम छे किन्बा मुबा गिकसे ग्यार्जा डा ओच्छे स्थान्दोसे बोगल न्हीसे च्युड टाडगा किन्बा मुबा।⁴² थे न्हीसेन छे फाआखम्बासे लमा साहूसे थे न्हीदान माफ पिन्जी। थेतबासेलमा, लु, पाङ्गो थे न्ही न्हडरी खजिबासे चा साहूदा ल्हाना माया लला” भिसी इयोइमा,⁴³ “ल्हाना माफ याइबासे” भिसी सिमोनसे भिमा, “एसे ठीक भिजी” भिसी येशूसे थेदा सुङ्गी।

⁴⁴ ओच्छे थे मिडम्हेमेपट्टि दो:सी येशूसे सिमोनदा चुहइ सुङ्गी, “चुदा च्यागो, डा एला दिमरी खमा एसे डादा काड खूबारी क्युइएनोन आपिन्नी तर चुसे मी डाला काड मीखलीसे खूसी हाडला क्रासे पयासी पिन्जी।⁴⁵ एसे डादा च्योक लसी पयाआफुल्नी, तर चुसे मी खमाहेन्सेन डाला काडरी च्योक लबाला लबान मुला।⁴⁶ ओच्छे एसे डाला थोबोरी छ्युगु फोर्सी आपिन्नी। तर चुसे मी डाला काडरी अत्तर फोर्सी पिन्जी।⁴⁷ थेतबासेलमा एसे डाला ताम इयान्गो, चुसे ल्हानान पाप लसैनोन माफ याइसी जिन्बा मुला। तिग्दा भिसम चु मिडम्हेमेसे ल्हानान मान लबा मुला। तर जुन म्हेदा जजाकी जे माफ लला, थेसे जजाकी जे मान लला।”

⁴⁸ ओच्छे येशूसे थे मिडम्हेमेदा “एला पाप माफ तबा मुला” भिसी सुङ्गी।

⁴⁹ थेरी चबारी चिबा म्हेगदेसे चु ताम थे:सी, “पाप माफ लबा चु म्हे खाल हिन्ना?” भिसी हाड हाड न्हडरी भिबारी छयाइजी।⁵⁰ ओच्छे येशूसे थे मिडम्हेमेदा “एला विश्वाससे लमा एसे थार्बा याइबा मुला, ए ढुक्क तसी निउ” भिसी सुङ्गी।

येशूसे परमेश्वरला खुल्साला समाचार थे:ना लबा

8 जमाहेन्से येशू शहर शहरदेन नाम्सा नाम्सा तसी परमेश्वरला खुल्साला समाचार थे:ना लबान फेप्जी। थेला च्युक न्ही चेलागदेएनोन थेदेन छ्यामनोन मुबा।² ओच्छे येशूसे म्हडसे स्यापबादेन रोगग्याम खम्ना लबा कोइ कोइ मिडम्हेमेगदेएनोन येशूदेन छ्याम मुबा, थेनीगदे न्हडरी मरियम मग्दलिनी भिबा मिडम्हेमेला ल्हुइग्याम येशूसे गोर निस म्हड ताप्बा मुबा।³ ओच्छे सुसन्नादेन हेरोद ग्लेला दिमरी गे लबा म्हेगदे न्हडला खुजास भिबा मुल म्हेला मिड योअन्नाएनोन येशूदेन छ्याम मुबा। ओच्छे थेनीगदेदेन स्थान्दो मिडम्हेमेगदेसे हाडलान टाडगासे येशूदा हो लमुबा।⁴

ब्लु ढ्वबाला उखान
मत्ती १३:१-९; मर्कूस ४:१-९

⁴ जमाहेन्से नाम्सा नाम्साग्याम म्हेला हुल खसी येशू मुबा ग्लारी पोप तजी। ओच्छे येशूसे थेनीगदेदा उखान गिक चुहइ भिसी सुङ्गी,⁵ “च्यागो, ब्लु ढ्वबाला म्हे गिक ब्लु ढ्वबारी भ्रजी। थे म्हेसे ब्लु ढ्वबाला कोइ ब्लु ग्यामरी परब तजी। थे ब्लु म्हेसे नाइजी ओच्छे चरागदे खसी चजी।⁶ कोइ ब्लु चा युडबाला घहड मुबा सरी परब तजी, ओच्छे फुइमैछ्याम सिजी। तिग्दा भिसम थे स खर्बा मुबा।⁷ कोइ ब्लु चा पुजु झाडरी परब तजी। ओच्छे थे ब्लु पुजुदेन छ्याम छ्यामनोन ल्हेसी निसैनोन पुजु दोडला हापसे लमा थे दोडरी तिगै आरोनी।⁸ तर कोइ ब्लु चा ज्यबा सरी परब तजी, ओच्छे थे दोडरी

† 7:37 मत्ती २६:७; मर्कू १४:३; यूह १२:३ †† स्थाप च्योक लबा चा यहूदीला ठिम अन्धार यहाडसे पया लबा हइबान हिन्ना। † 8:3 मत्ती २७:५५-५६; मर्कू १५:४०-४१; लूका २३:४९

दोब्बर, तेब्बर, चौबरधोना रोजी।” चुदे सुङ्गाहेन्से येशूसे थेरी मुबा म्हेगदेदा “जुन म्हेदा इयान्बा सेम मुला, थेसे इयान्सी घोउ।”

ब्लु ढ्वबाला उखानना अर्थ
मत्ती १३:१०-२३; मर्कूस ४:१०-२०

⁹ जमाहेन्से चेलागदेसे येशूदा चु उखानना अर्थ तिग भिसी इयोइजी।¹⁰ येशूसे थेनीगदेदा चुहइ भिसी सुङ्गी, “डाइ एनीगदेदा म्हेसे था आयाइबा परमेश्वरला खुल्साला ताम घोखम्बा ज्ञान बुद्धि पिन्बा मुला। तर स्थान्दोगदेदा चा उखानग्याम पाइबा मुला। थेतबासेलमा

‘थेनीगदेसे च्याबाम च्याला तर आम्राइ,
इयान्बाम इयान्बा मुला तर आघो।’ †

¹¹ “च्यागो, चु उखानना अर्थ चुनोन हिन्ना, चु ब्लु भिबा चा परमेश्वरला बचन हिन्ना।¹² ग्यामला कुनीरीक्यार परब तबा ब्लुला अर्थ चा जुन म्हेसे परमेश्वरला बचन इयान्बाम इयान्ना तर सेमरी थान्बारी चा आखम्मुला। तिग्दा भिसम थेनीगदेसे विश्वास लसी थार्बा थायाइगै भिसी शैतान खसी थेनीगदेला सेमग्याम परमेश्वरला बचन ब्यन्सी भोर्मुला।¹³ थेहइ लसीन युडबाला घहडरी परब तबा ब्लुला अर्थ चा थेनीगदेसे परमेश्वरला बचन ज्यबा म्हन्सी विश्वास मी लला। तर थेनीगदेला विश्वासला टा आरेबासे लमा तिगै धिन लिच्छा थेनीगदेदा तबा दुखसे लमा थेनीगदेसे विश्वास लबा खलाला।¹⁴ ओच्छे पुजु झाड न्हडरी परब तबा ब्लुला अर्थ चा थेनीगदेसे जम्बुलिडरी म्राइबा धन सम्पत्तिदेन मोजमजा, ओच्छे थेनीगदेदा तबा धन्दा सुदासे लमा विश्वासरी कोइसी चिआखम्बासे लमा थेनीगदेला विश्वासग्याम तिगै आरो।¹⁵ तर ज्यबा सरी परब तबा ब्लुला अर्थ चा जुन म्हेसे परमेश्वरला बचन इयान्सी हाडला ज्यबा सेमहेन्सेन विश्वास लला। ओच्छे थेला विश्वासग्याम गोल्से गोल्से ज्यबा रोगदे रोबान निला।

नाडसलला अर्थ
मर्कूस ४:२१-२५

¹⁶ “खालैसे नाडसल म्रासी फामसे घप्पी आथान, ओच्छे खाट धिरीएनोन छुम्सी आथान। तर दिम न्हडरी खबा म्हेगदेदा य्हाल तगै भिसी नोबा ग्लारी थान्ना।¹⁷ ल्हसैनोन आम्राइबा स्हे तिगै आरे। ओच्छे छुम्सी थान्सेनोन आघोबा स्हे तिगै आरे।¹⁸ जुन म्हेसे डाइ लोप्बा तामदा सेम लसी इयान्ना, थेदा डाइ अइ घोना लला। तर डाइ लोप्बा ताम आइयान्बादा चा थेसे जुन घोबा मुला थे तामएनोन म्हाना लला।” ††

येशूला आम्रादेन आलेगदे
मत्ती १२:४६-५०; मर्कूस ३:३१-३५

¹⁹ थे धुइरी येशूला आम्रादेन आलेगदे येशूदा स्यापबारी येशू मुबा ग्लारी खजी। तर येशूला क्युर्सीन म्हेला हुल मुबासे लमा थेनीगदेसे येशूदा स्यापबारी आखम्नी।²⁰ जमाहेन्से थेरी मुबा खालै म्हेसे “हाडला स्यापबारी हाडला आम्रादेन आलेगदे मडग्यार भ्रान्सी चिबा मुला” भिमा,²¹ “च्यागो, जुन म्हेसे परमेश्वरला बचन इयान्सी परमेश्वरसे कुल्बा ताम इयान्ना थेनोन डाला आम्रादेन आलेगदे हिन्ना” भिसी येशूसे थेनीगदे जम्मादान सुङ्गी।

येशूसे लाबालुडसर म्हाना लबा
मत्ती ८:२३-२७; मर्कूस ४:३५-४९

²² तिरैकुनु येशू हाडला चेलागदेदेन छ्याम दौंगारी क्रे:माहेन्से “लु, यहाड समुन्द्रला क्याम्सडपट्टि निइ” भिसी चेलागदेदा सुङ्गी। जमाहेन्से येशू हाडला चेलागदेदेन छ्याम क्याम्सड फेप्जी।²³ थेनीगदे फेप्बान लबा धुइरी येशू दौंगारीन छुप निजी। जमाहेन्से समुन्द्ररी घेन लाबालुडसर खजी, लाबालुडसरसे लसी समुन्द्ररी छाल रे:जी, छालसे लमा दौंगा डुबब तबारी छयाइजी, जमाहेन्से थेनीगदेदा आपत विपत तजी।²⁴ जमाहेन्से चेलागदे येशूला डामरी खसी येशूदा छिइबान, “गुरु, यहाड सिबारी छयाइजी” भिसी

†† 8:10 यशै ६:९-१० †† 8:16 मत्ती ५:१५; लूका ११:३३ ††† 8:17 मत्ती १०:२६ ††† 8:18 मत्ती २५:२९; लूका १९:२९

भिजी। चेलागदेला चुहड्बा ताम थे:सी येशू स्हेड्सी लाबालुडसरदा बड्जी। बड्छ्याम लाबालुडसर म्हासी शान्त तजी।²⁵ येशूसे थेनीगदेदा “खाड, एनीगदेला विश्वास” भिजी सुड्जा, थेनीगदे लोड्सी उदेक म्हन्बान हाड हाड न्हडरी “चु खाल? लाबालुडसरसेनोन थेसे कुल्बा ताम ड्यान्बा चीम” भिजी ताम लजी।

येशूसे म्हिला लहुड्ग्याम म्हड ताप्बा
मत्ती ८:२८-३४; मर्कूस ५:१-२०

²⁶ येशू हाडला चेलागदेदेन छ्याम गालील अज्वलला क्याम्सडपट्टि गेरासेनस भिबा ग्लारी धोखजी।²⁷ येशू दौंगाग्याम फम्पेछ्याम थे शहररी मुबा म्हडसे स्याप्बा म्हि गिक येशूदा स्याप्बारी खजी। थे क्वान आक्वानान भ्रबा ल्हानान तसी जिन्बा मुबा। ओच्छे थे दिमरी आचिना धुसारीक्यार चिबा मुबा।²⁸ थेसे येशूदा म्हाड्छ्याम क्रिड्बान येशूला डाच्छापट्टि ख्लुप तसी, “जम्मान भन्दा घेन परमेश्वरला झा येशू हाडसे डादा तिग लबा सेम मुला? डादा दुख थापिनो” भिजी बिन्ती लजी।²⁹ तिगदा भिसम येशूसे थे म्हडदा थे म्हिला लहुड्ग्याम थोन्सी निउ भिजी कुल्बा मुबा। थेदा थे म्हडसे ल्हानान रेम चुड्बा मुबा। थे म्हिदा या काडरी च्याल्दासे खीसी खुड्सी चिसैनोन म्हडला शक्तिसे लमा थेसे च्याल्दा फ्राटफ्रेट टाड्सी थे हिरीक्यार यामुबा।

³⁰ येशूसे थेदा “एला मिन तिग?” भिजी ड्योड्मा, “डा हुल हिन्ना” भिजी भिजी। तिगदा भिसम थे म्हिला लहुड्ग्याम ल्हानान म्हड मुबा।³¹ ओच्छे म्हडगदेसे “डन्दा ल्हानान नुप्बा व्हाडरी † थापुड्गो” भिजी येशूदेन छ्याम बिन्ती लजी।

³² थे ग्लाला डामला गडरी द्बला बथान छबान मुबा। थेतबासेलमा थे म्हडगदेसे डन्दा थे द्वागदे न्हडरी वाड्पुड्गो भिजी बिन्ती लमा थेनीगदेदा येशूसे “निउ” भिजी सुड्जी।³³ जमाहेन्से थे म्हडगदे थे म्हिला लहुड्ग्याम थोन्सी द्वागदे न्हडरी वाड्गहेन्से थेरी मुबा जम्मान द्वागदे गड्ग्याम समुन्दरी छ्योड्सी सिजी।

³⁴ चुहड् तबा म्हाड्सी द्बला छबा म्हिगदे यार्जी। ओच्छे नाम्सा नाम्सादेन शहर शहररी निसी थेनीगदेसे म्हाड्बा जम्मान ताम थे:ना लजी।³⁵ थेनीगदेसे पाड्बा ताम थे:सी ल्हानान म्हिगदे च्याबारी येशू मुबा ग्लारी खमा, थेनीगदेसे डाच्छा म्हडसे स्याप्सी म्योसी भ्रबा म्हि खम्सी क्वान क्वान्सी येशूला डामरी चिबा म्हाड्जी। चु म्हाड्सी थेनीगदे लोड्जी।³⁶ थे म्हडसे स्याप्बा म्हि खाहड् लसी खम्जी भिजी म्हाड्बा म्हिगदेसे थेरी च्याबारी खबा म्हिगदेदा पाड्जी।³⁷ जमाहेन्से गेरासेनस भिबा नाम्साला क्यारमारला म्हिगदेसे येशूदा “डनी मुबा ग्लग्याम फेजो” भिजी बिन्ती लजी। तिगदा भिसम थेनीगदे ल्हानान लोड्सी उदेक तबा मुबा। थेतबासेलमा येशू थे ग्लग्याम दौगारी क्रे:सी फेज्वारी छ्याड्मा,³⁸ येशूसे म्हड ताप्सी खम्ना लबा म्हिसे “डाएनोन हाडदेन छ्याम निबा” भिजी येशूदेन छ्याम बिन्ती लमा येशूसे थेदा,³⁹ “ए हाडला दिमरी निउ ओच्छे परमेश्वरसे एला लागिरी खाहड्बा गे लबा मुला, थे ताम जम्मादान थे:ना लउ” भिजी सुड्जी। जमाहेन्से थे म्हि निसी येशूसे हाडला लागिरी लबा गेला बाररी शहरला जम्मान ग्लारी थे:ना लबान भ्रजी।

याडरसला झामेदेन का निबा बेथासे स्याप्बा म्निड्म्हेमे खम्बा
मत्ती ९:१८-२६; मर्कूस ५:२१-४३

⁴⁰ जमाहेन्से येशू दो:सी फेख्माहेन्से म्हिला हुलसे येशूदा फ्याफुल्जी। तिगदा भिसम थेनीगदे येशू फेख्खला भिजी भ्रान्सी चिमुबा।⁴¹ थेनोन धुडरी याडरस भिबा यहूदीगदे हुप तबा दिमला नेता येशू मुबा ग्लारी खसी येशूला स्थापरी फ्या लबान, “डाला दिमरी फेख्खउ” भिजी बिन्ती लजी।⁴² तिगदा भिसम थेला गिक जेन मुबा च्युक न्ही दिडला झामे सिबारीन छ्याड्बा मुबा। जमाहेन्से येशू फेख्बान लबा धुडरी म्हिगदेसे तोर हुड मार हुड लबारी छ्याड्जी।⁴³ थेरी का निबा बेथासे स्याप्सी च्युक न्ही दिड तबा म्निड्म्हेमे गिक मुबा। थेसे हाडला जम्मान सम्पत्ति खर्च लसी मन लसैनोन थेदा खालैसे खम्ना लआखम्बा मुबा।⁴⁴ थेतबासेलमा थे येशूला ग्यापग्याम खसी

† चु पदरी “ल्हानान नुप्बा व्हाड” भिबा चा म्हड म्हड चिबा ग्ला हिन्ना। चु ताम (रोमी १०:७; उन्बा ९:१, ११; ११:७; १७:८; २०:१, ३) पदरी एनोन मुला।

येशूला क्वान्ना जोरी थुर्जी। थेसे येशूला क्वान थुर्मेछ्याम थेला का निबा बेथा म्हाजी।

⁴⁵ जमाहेन्से येशूसे “डादा खाल्से थुर्जी” भिजी सुड्जा, जम्मासेन “डाड थुर्बा आहिन” भिजी भिजी। तर पत्रुससे चा “गुरु, हाडदा म्हिगदेसे तोर हुड मार हुड लबान मुला” भिजी भिजी।⁴⁶ तर येशूसे “आहिन, डादा खालैसे थुर्बा मुला, तिगदा भिसम डग्याम डाला शक्ति थोन्सी निबा डाड था याड्जी” भिजी सुड्जी।⁴⁷ जमाहेन्से थे म्निड्म्हेमेसे हाड लासी चिबारी आतनम भिजी फितफित धर्बान येशूला डाच्छापट्टि खसी फ्या लबान येशूदा तिगदा थुर्जी ओच्छे थुर्मेछ्याम हाड खाहड् लसी खम्जी भिबा ताम जम्मान म्हिगदेला डाच्छापट्टि पाड्जी।⁴⁸ ओच्छे येशूसे थे म्निड्म्हेमेदा “झामे, एला विश्वाससे लमा ए खम्बा मुला, ए दुक्क तसी निउ” भिजी सुड्जी।

⁴⁹ येशूसे ताम लबान लबा धुडरी याडरसला दिमग्याम म्हि गिक खसी याडरसदा “हाडला झामे सिसी जिन्जी। दाहेन्से गुरुदा दुख थापिनो” भिजी भिजी।⁵⁰ तर येशूसे याडरसदा “थालोड्गो, एसे विश्वास जे लउ, ओच्छे एला झामे सोला” भिजी सुड्जी।

⁵¹ याडरसला दिमरी धोमाहेन्से येशूसे पत्रुस, याकूब, यूहन्नादेन थे माइला आबादेन आमादा बाहेक स्हान्दो खालैदान दिम न्हडरी खआपुड्नी।

⁵² याडरसला दिमरी पोप तबा म्हिगदे थे माइ सिजी भिजी क्राबा क्रिड्बा लसी चिबा मुबा। येशूसे थेनीगदेदा “थाक्रागो, थे सिबा आरे, म्हेसी चिबा मुला” भिजी सुड्जी।⁵³ येशूला ताम थे:सी थेनीगदेसे डे:बान येशूदा खिसी लजी। तिगदा भिसम थे माइ सिसी जिन्बा मुला भिजी थेनीगदेदा था मुबा।

⁵⁴ तर येशूसे थे माइला यारी चुड्सी, “माइ, ए रे:गो” भिजी सुड्छ्याम,⁵⁵ थे माइला आत्मा दो:सी खजी ओच्छे थे डोड रे:जी। जमाहेन्से येशूसे “चु माइदा चबा स्हे पिन्गो” भिजी सुड्जी।⁵⁶ चु म्हाड्सी थे माइला आबादेन आमा उदेक तजी। तर येशूसे थेनीगदेदा “चु ताम खालैदा थापाड्गो” भिजी कुल्जी।

येशूसे हाडला च्युक न्ही चेलागदेदा पुड्बा
मत्ती १०:५-१५; मर्कूस ६:७-१३

9 जमाहेन्से येशूसे हाडला च्युक न्ही चेलागदेदा ड्योड्सी थेनीगदेदा म्हडगदे ताप्बादेन रोगगदे म्हाना लबा शक्तिदेन अधिकार पिन्सी,² परमेश्वरला युल्साला समाचार थे:ना लबारी ओच्छे आखम्बा म्हिगदेदा खम्ना लबारी पुड्जी।³ ओच्छे येशूसे थेनीगदेदा चुहड् भिजी सुड्जी, “एनीगदेसे ग्यामला लागिरी कडी, झोला, चबा स्हे, टाडगा ओच्छे पोबा क्वान तिगे थाभोर्गो।⁴ जुन दिमला म्हिगदेसे एनीगदेदा मान लला, थे नाम्साग्याम थोन्सी आनितेधोना एनीगदे थे दिमरीन चिउ।⁵ तर जुन ग्लाला म्हिगदेसे एनीगदेदा मान आल, एनीगदे थे शहरग्याम थोन्बा धुडरी दाहेन्से डन्से लतो:बा गे लसी जिन्जी। एनीगदेसे तिग लतो:बा लउ भिजी काडला धुलु खर्सी पिन्गो।” ††

⁶ जमाहेन्से चेलागदे नाम्सा नाम्सारी निसी परमेश्वरला युल्साला समाचार थे:ना लबान आखम्बा म्हिगदेदा खम्ना लजी।

येशूला बाररी थे:सी हेरोद ग्ले अलमल तबा
मत्ती १४:१-१२; मर्कूस ६:१४-२९

⁷ चु जम्मान गेला बाररी थे:सी गालील अज्वलरी शासन लबा हेरोद अलमल तजी। तिगदा भिसम कोड कोड म्हिसे येशूदा “बप्तिस्मा पिन्बा यूहन्ना सिबाग्याम सोसी खजीम” भिजी भिबा मुबा।⁸ कोड कोडसे चा “एलिया दो:सी खजीम” भिजी भिबा मुबा। ओच्छे स्हान्दो कोड कोडसे चा “ओन्माला अगमवक्तागदे न्हडरी गिक सिबाग्याम सोसी खजीम” भिजी भिबा मुबा।⁹ थेतबासेलमा हेरोद ग्लेसे “चुहड्बा उदेकला गे लबा म्हि खाल हिन्ना? तिगदा भिसम यूहन्नाला थोबो मी डाडिनोन आपुड्बा हिन्ना” भिजी भिजी। ओच्छे थेसे तिरैम येशूदा स्याप्बा सेम लजी।

†† 9:5 लूका १०:४-११; मुल १३:५१ † 9:8 मत्ती १६:१४; मर्कू ८:२८; लूका ९:१९

येशूसे हजार डा म्हिगदेदा चबा स्हे पिन्बा
मत्ती १४:१३-२१; मर्कूस ६:३०-४४; यूहन्ना ६:१-४

10 येशूसे परमेश्वरला व्हुल्साला समाचार थे:ना लबारी पुडबा मुल चलागदे दो:सी खसी थेनीगदेसे लबा जम्मान गे येशूदा पाड्जी। जमाहेन्से येशूसे थेनीगदेदा जे भोर्सी बेथसेदा भिबा शहररी फेज्जी। 11 तर चु ताम था याड्सी म्हिला हुल येशू मुबा ग्लारी निजी। जमाहेन्से येशूसे थेनीगदेदा खपुड्जी। ओच्छे म्हिगदेदा परमेश्वरला व्हुल्साला समाचार थे:ना लबान आखम्बा म्हिगदेदा खम्ना लजी।

12 धिनी घल्बारी छ्याइमाहेन्से च्युक न्ही चलागदे येशू मुबा ग्लारी खसी येशूदा “म्हिगदेदा च्याम निपुङ्गो। तिगदा भिसम चु ग्लारी तिगै आरे। थेतबासेलमा थेनीगदे व्कारमारला नाम्साारी निसी चबा थुड्बादेन चिबा ग्ला ढिव्ना लगै” भिसी भिजी।

13 तर येशूसे थेनीगदेदा “एनीगदेसेन चुगदेदा चबा स्हे पिन्गो” भिसी सुड्जा, थेनीगदेसे “डन्डेन छ्याम गोर डा गेडदेन तार्डा न्ही जे मुला। आतसम डनी निसी चु जम्मान म्हिगदेला लागिरी चबा स्हे ग्लुसी भतो:ला” भिसी भिजी।

14 थेरी हजार डा ते चा हेम्फेबे जे मुबा। ओच्छे येशूसे हाडला चलागदेदा “म्हिगदेदा बोगल न्हीसे च्युडला लाम लसी चिपुङ्गो” भिसी सुड्जी।

15 ओच्छे चलागदेसे येशूसे सुड्बा हड्दोन लसी चिपुड्जी। 16 जमाहेन्से येशूसे गोर डा गेडदेन तार्डा न्ही छ्यारी थोसी स्वर्गपट्टि स्हीसी परमेश्वरदा धन्यवाद पिन्जी। ओच्छे येशूसे गेडदेन तार्डा क्युडसी म्हिगदेदा भो लसी पिन्गो भिसी चलागदेदा कुल्जी। 17 जमाहेन्से जम्मान म्हिगदेसे ग्रेन्ना चसीनोन लेड्बा भ्राड्भुड् चलागदेसे दुड्मा च्युक न्ही सोली तजी।

येशू परमेश्वरला म्हि ख्रीष्ट हिन्ना
मत्ती १६:१३-१९; मर्कूस ८:२७-२९

18 तिरिकुनु येशू गिक जेन प्रार्थना लसी धन्छ्याबा मुबा। थे धुडरी थेला चलागदेएनोन छ्यामनोन मुबा। ओच्छे येशूसे थेनीगदेदा “म्हिगदेसे डादा खाल भिबा चीम?” भिसी इयोड्मा, 19 थेनीगदेसे “हाडला खालैसे बत्तिस्मा पिन्बा यूहन्ना भिबा मुला, खालैसे एलिया, ओच्छे स्थान्दोगदेसे चा ओन्माला अगमवक्तागदे न्हडला गिक सिबाग्याम सोसी खजीम भिबा मुला” भिसी जोहाब पिन्जी। †20 जमाहेन्से येशूसे दो:सी चलागदेदा “तर एनीगदेसे चा डा खाल भिसी म्हन्मुला?” भिसी इयोड्मा, पत्रुससे “हाड परमेश्वरसे पुड्खबा थार्बा पिन्बा ख्रीष्ट हिन्ना” भिसी जोहाब पिन्जी। ††

21 जमाहेन्से येशूसे, “च्यागो, एनीगदेसे चु ताम खालैदा थापाङ्गो” भिसी कुल्जी। 22 ओच्छे येशूसे थेनीगदेदा “परमेश्वरसे पुड्खबा म्हिसे ल्हानान दुख नातो:ला। ओच्छे यहूदी गन्बागदे, परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे बिरोध लसी साड्ला। तसैनोन थेदा सिबाग्याम सोमरेमाकुनु सोना लला” भिसी सुड्जी।

चलागदेसे नातो:बा दुख
मत्ती १६:२४-२८; मर्कूस ८:३४-९:१

23 जमाहेन्से येशूसे थेरी मुबा जम्मान म्हिगदेदा चुहड् भिसी सुड्जी, “खालै म्हि डाला चेला दोबा सेम मुसम थेसे हाडला ज्याननोन माया मारब लसी हाडला क्रुस हाडसेन धिन धिननोन पुड्सी डादेन छ्याम भ्रगै। †24 तिगदा भिसम जुन म्हिसे हाडला ज्यान जोगब लबारी म्हाड्ला, थे म्हिसे चा जुकजुकधोनाला जुनी आयाड्। तर डाला लागिरी हाडला ज्याननोन पिन्खम्बा म्हिसे चा जुकजुकधोनाला जुनी याड्ला। ††25 चुदे खालै म्हिसे जम्बुलिडनोन यारी किन्सी थेला ज्याननोन निजी भिसम तिग ज्यबा तला? 26 ओच्छे खालै म्हि डादेन डाला तामरी पे:जी भिसम परमेश्वरला स्वर्गदूतगदेदेन छ्याम परमेश्वरसे पुड्खबा म्हि डाला आबा परमेश्वरला व्हालदेन शक्तिरी खमा थेदा हाडला भिबारी पे:ला। 27 तर एनीगदेसे डाला

† 9:19 मत्ती १४:१-२; मर्कूस ६:१४-१५; लूका ९:७-८ †† 9:20 यूह ६:६८-६९
‡ 9:23 मत्ती १०:३८; लूका १४:२७ †† 9:24 मत्ती १०:३९; लूका १७:३३; यूह १२:२५

ताम ड्यान्गो, चुरी मुबा म्हिगदे न्हडला कोड कोड म्हि चा परमेश्वरला व्हुल्सा आम्राड्तेधोना आसि।”

येशूला स्थाल पोबा
मत्ती १७:१-८; मर्कूस ९:२-८

28 येशूसे चु ताम सुड्सी भे:रे तमा पत्रुस, यूहन्नादेन याकूबदा प्रार्थना लबारी गडरी भोर्सी फेज्जी। 29 थेरी येशू प्रार्थना लबान लबा धुडरी येशूला स्थाल पोजी। ओच्छे येशूला क्वान धिनीला स्हेर हड्बान व्हाल व्हाल तजी 30 ओच्छे म्हि न्ही येशूदेन छ्याम ताम लबा म्हाड्जी। थे म्हि न्ही मोशादेन एलिया मुबा। 31 थेनीगदेला स्थाल व्हाल व्हाल तबा मुबा। ओच्छे येशू यरूशलेमरी सितो:ला भिबा तामला बारेरी येशूदेन छ्याम ताम लबान मुबा। 32 थे धुडरी चा पत्रुस ओच्छे थेदेन छ्याम मुबागदे म्हेर्बा मुबा। थेनीगदे फातछोर्मा येशू स्वर्गला व्हालरी ओच्छे स्थान्दो म्हि न्हीएनोन येशूदेन छ्याम राप्सी चिबा म्हाड्जी। 33 ओच्छे थे म्हि न्ही येशू मुबाग्याम दो:सी निबारी छ्याइमा पत्रुससे “गुरु, व्हाड चुरी मुबा ज्यबा तजीम। दाहेन्से डन्से चुरी छाप्रो सोम स्होड, गिक हाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। तर पत्रुसदा तिग ताम पाड्तो:बा थे था आरेमुबा। 34 पत्रुससे चुहड् पाड्ना पाड्नान खसु खसी थेनीगदेदा घज्जी। चु म्हाड्सी चलागदे लोड्जी। 35 ओच्छे खसु न्हडग्याम चुहड्बा काड थे:जी, “चु डाड धम्बा डाला झा हिन्ना, चुसे भिबा ताम एनीगदेसे ड्यान्गो।” ††36 चु काड थे:सी जिन्माहेन्से चलागदेसे थेरी येशूदा जे म्हाड्जी। जमाहेन्से थेनीगदे कुटिसी चिजी। ओच्छे थेनीगदेसे म्हाड्बा चु ताम थे धुडरी खालैदा आपाड्नी।

येशूसे म्हडसे स्याम्बा म्हिदा खम्ना लबा
मत्ती १७:१४-१८; मर्कूस ९:१४-२७

37 न्हडगरदड येशू हाडला चलागदेदेन छ्याम गडग्याम मार फेखबा धुडरी म्हिला हुल गिक येशूदा स्याम्बारी खजी। 38 ओच्छे थे म्हिला हुल न्हडग्याम म्हि गिकसे क्रिड्बान भिजी, “गुरु, डाला झादा च्यासी पिन्गो, तिगदा भिसम चु डाला गिक जेन झा हिन्ना! 39 थेदा म्हडसे घरिघरि चुड्नुला, ओच्छे थे क्रिड्सी सिबा तेबान तमुला। जमाहेन्से थेला सुड्ग्याम बोप्या ते:बा मुला, ओच्छे थे म्हडसे लछार पछार आलतेधोना थेदा आख्लामुला। 40 डाड थे म्हड ताप्सी पिन्गो भिसी हाडला चलागदेदा भिजी, तर थेनीगदेसे म्हड ताप्आखम्नी।” 41 जमाहेन्से येशूसे थेनीगदेदा “विश्वास आलबादेन नड्बा सेम थोबा म्हिगदे, खाड्माधोना डा एनीगदेदेन छ्याम तला? खाड्माधोना डाड एनीगदेदा नासे?” भिसी सुड्जी। ओच्छे येशूसे थे म्हिदा “एला झादा चुरी भउ” भिसी सुड्जी। 42 ओच्छे थेसे हाडला झादा भना भनान थेला झादा थे म्हडसे चुड्सी भ्याड्जी। तर येशूसे थे म्हडदा बड्सी थे कोलादा खम्ना लसी थेला आबादा पिन्जी। 43 परमेश्वरला शक्ति म्हाड्सी थेरी मुबा म्हिगदे उदेक तजी।

दो:सी येशूसे हाड खाहड् लसी सिला भिसी सुड्बा
मत्ती १७:२२-२३; मर्कूस ९:३०-३२

ओच्छे थेरी मुबा म्हिगदे येशूला गे म्हाड्सी उदेक तसी चिबा धुडरी येशूसे हाडला चलागदेदा, 44 “च्यागो, परमेश्वरसे पुड्खबा म्हिदा चुड्सी म्हिगदेला यारी जिम्मा पिन्ना। एनीगदेसे चु ताम खाड्मै थाम्ते:गो” भिसी सुड्जी। 45 तर चलागदेसे चु ताम आघोनी। तिगदा भिसम थेनीगदेसे चु ताम घोखम्बा ज्ञान आयाड्बासे लमा येशूसे तिग सुड्जी भिसी म्हन्बारीनोन आखम्नी। ओच्छे थेनीगदे लोड्बासे लमा चु तामला अर्थ तिग भिसी येशूदा इयोड्बारी आखम्नी।

जम्मान भन्दा घेन खाल?
मत्ती १८:१-५; मर्कुस ९:३३-४०

46 थे धुइरी चेलागदे ह्राड ह्राड न्हडरी खाल घेन भिसी ताम लबान मुबा।
†47 येशूसे थेनीगदेला सेमला ताम था याइसी कोला गिकदा ह्राडला डामरी
भसी थेनीगदेदा चुहड् भिसी सुइजी, 48 “च्यागो, जुन म्हिसे चुहड्बा
कोलादा डाला मिनरी वास्ता लला, थेसे डादाएनोन वास्ता लला, डादा
वास्ता लबासे डादा पुइखबा डाला आबादाएनोन वास्ता लला। ओच्छे
एनीगदे न्हडरी जुन म्हि जम्मान भन्दा जजा मुला, थेनोन घेन तला।” ††
49 जमाहेन्से यूहन्नासे, “गुरु, डन्से ह्राडला मिनरी म्हि गिकसे म्हड ताप्बा
म्राइजी। तर डन्से थेदा थेहड् लआपुइनी, तिगदा भिसम थे डनी ह्रड ह्राडदेन
छ्याम आभ्रमुला।” 50 तर येशूसे थेनीगदेदा “एनीगदेसे थेहड् थालउ, तिगदा
भिसम जुन म्हिसे एनीगदेला विरोध आल थे म्हि एनीगदेपट्टिला हिन्ना”
भिसी सुइजी।

सामरीगदेसे येशूदा चिआपुइबा

51 जमाहेन्से येशूसे ह्राड स्वर्गरी फेप्बा धुइ तबासे लमा यरूशलेमरी निनोन
तो:ला भिसी पक्का लजी। 52 ओच्छे येशूसे कोइ कोइ समाचार भोर्बा
म्हिगदेदा डाच्छान जम्मान ताम तयार लबाला लागिरी सामरियाला नाम्सा
गिकरी पुइजी। 53 येशू यरूशलेमरी फेप्बारी छ्याइबा ताम था याइसी
सामरिया नाम्साला म्हिगदेसे येशूदा चिआपुइनी। 54 चु म्राइसी येशूला चेला
याकूबदेन यूहन्नासे, “प्रभु, डन्से स्वर्ग्याम मे ताइना लसी थेनीगदेदा नाश
लगै भिसी भिउ भिबा ह्राडला सेम मुला?” भिसी भिमा, †55 येशू
चेलागदेपट्टि दो:सी थेनीगदेदा बइजी। †56 जमाहेन्से येशू ह्राडला चेलागदेदा
भोर्सी अर्गु नाम्सापट्टि फेप्जी।

विश्वासीगदेदेन छ्याम ततो:बा गुण
मत्ती ८:१९-२२

57 ओच्छे येशू ह्राडला चेलागदेदेन छ्याम यरूशलेमपट्टि फेप्बान लबा
धुइरी म्हि गिक खसी येशूदा “ह्राड खानडदमान फेप्सै डाएनोन ह्राडदेन
छ्याम निला” भिसी भिजी।

58 जमाहेन्से येशूसे थेदा “च्यागो, लहुन्दीगदे चिबारी ऊ मुला, ओच्छे
चरागदे चिबारीनोन जड मुला, तर परमेश्वरसे पुइखबा म्हिदा ब्लप्बा
न्हबारीनोन ग्ला आरे” भिसी सुइजी।

59 ओच्छे स्थान्दो म्हि गिकदा येशूसे “डादेन छ्याम भ्रउ” भिसी सुइजी।
तर थेसे “प्रभु, डाच्छा डाला सिबा आबादा लहुसी ह्राडदेन छ्याम भ्रला”
भिसी भिजी। 60 येशूसे थेदा “सिबागदेदा सिबागदे ह्रडबासेन लहुगै तर ए चा
निसी परमेश्वरला यहुल्साला समाचार थे:ना लउ” भिसी सुइजी।

61 दो:सी स्थान्दो म्हि गिक येशू मुबा ग्लारी खसी, “डाएनोन ह्राडदेन
छ्याम भ्रला, तर डाच्छा डा दिमरी निसी जम्मादान डा येशूदेन छ्याम निजी
भिसी पाइसी खला” भिसी भिजी। †62 थेदा येशूसे, “मोइबा धुइरी ग्याप
दो:सी च्याबा म्हि चा परमेश्वरला यहुल्सारी गे आखेल” भिसी सुइजी।

येशूसे बोगल सोमसे च्युक न्ही चेलागदेदा परमेश्वरला यहुल्साला समाचार
थे:ना लबारी पुइबा

10 जमाहेन्से येशूसे स्थान्दो बोगल सोमसे च्युइ चेलागदेदा धम्जी।

ओच्छे ह्राड फेप्बारी छ्याइबा नाम्सादेन शहररी ह्राड फेप्बा भन्दा
डाच्छा थेनीगदेदा गोर न्ही न्ही लसी पुइजी। 2 पुइबा धुइरी येशूसे थेनीगदेदा
चुहड् भिसी सुइजी, “च्यागो, बाली मी ल्हानान मिन्बा मुला, तर बाली दुइडा
म्हिगदे ल्हाना आरे। थेतबासेलमा बाली दुइडा म्हिगदे पुइखउ भिसी बालीला
दोप्ता प्रभुदेन छ्याम प्रार्थना लउ। ††3 दाहेन्से एनीगदे निउ। डाइ एनीगदेदा

† 9:46 लूका २२:२४ †† 9:48 मत्ती १०:४०; लूका १०:१६; यूह १३:२० †
9:54 २ राजा १:९-१६ †† कोइ कोइ ग्रीक बाइबलरी चु ताम काप्बा मुला: ओच्छे येशूसे
थेनीगदेदा “एनीगदेला सेम खाहड्बा ततो:मुला भिसी एनीगदेसे अइ घोबा आरेम। डा
परमेश्वरसे पुइखबा म्हि मी म्हिगदेदा साइबारी खबा आहिन, तर थेनीगदेदा थार्बा पिन्बारी खबा
हिन्ना” भिसी सुइजी। †† 9:61 १ राजा १९:२० ††† 10:2 मत्ती ९:३७-३८

फार्बागदेला गुइरी ग्युला कोलादा पुइबा ह्रड लसी पुइला। ††4 ओच्छे
एनीगदेसे टाडगा, झोला, लखम तिगै थापुइगो। ओच्छे ग्यामरी खालैदेन
छ्याम ल्हाना ताम थालउ।

5 “ओच्छे एनीगदे जुन दिमरी वाइला डाच्छा ‘थे दिमला म्हिदा शान्ति
तगै’ भिसी मोलम पिन्गो। 6 थे दिमरी एनीगदेदेन छ्याम ढिक्बा म्हि मुसम
थेनीगदेसे शान्ति याइला। तर एनीगदेदेन छ्याम ढिक्बा म्हि आरेसम
एनीगदेसे पिन्बा मोलम एनीगदेदान दो:सी खला। 7 ओच्छे थेनीगदेसे
एनीगदेदा जस्तो चबा स्हे पिन्सै चबा थुइबा लसी थेनोन दिमरी चिउ। तिगदा
भिसम गे लबा म्हिसे ज्याला याइतो:मुला। ओच्छे एनीगदे दिम दिमरी
वाइसी ज्यबा ज्यबा चबा स्हे म्हाइसी थाभ्रउ। †

8 “थेहड् लसी एनीगदे शहरगदेरी निबा धुइरी थे शहरला म्हिगदेसे मान
लसी चबा थुइबारी पिन्बा स्हे चउ। 9 ओच्छे थेरी आखम्बा म्हिगदेदा खम्मा
लउ, ‘ओच्छे परमेश्वरला यहुल्सा खसी जिन्बा मुला’ भिसी थेनीगदेदा पाइजी।
10 तर खजिबै शहररी एनीगदे निमा थे शहरला म्हिगदेसे एनीगदेदा मान
आलनी भिसम थे शहरला ग्यामरी थोन्सी, 11 ‘डन्से डन्ना काडरी भेर्बा
एनीगदेला नाम्साला धुलु सुतै एनीगदेदान नाम्सारी खर्बा मुला। तिगदा
भिसम डन्से पाइबा ताम एनीगदेसे आइयान्नी। तर च्यागो, परमेश्वरला
यहुल्सा खसी जिन्बा मुला भिबा एनीगदेसे था याइजी’ भिसी थेनीगदेदा पाइजी।
12 एनीगदेसे डाला ताम इयान्गो, परमेश्वरसे निसाफ लबा धिनकुनु थे
शहरला म्हिगदेला गति भन्दा मी सदोम †† शहरला म्हिगदेला गति नाखम्बा
तला।

येशूसे विश्वास आलबा शहरला म्हिगदेदा बइबा
मत्ती ११:२०-२७; १३:१६-१७

13 “खोराजीनदेन बेथसेदाला म्हिगदे, एनीगदेसे परमेश्वरग्याम सजाय
याइला। तिगदा भिसम एनीगदेला नाम्सारी लबा ह्रडबा उदेकला गेगदे
टुरोसदेन सीदोन शहररी लबा हिन्सम ओन्मान थेनीगदेसे बोरा क्वान्सी मेफ्रा
फोर्सी ह्राड ह्राडला पाप खलासी परमेश्वरपट्टि दो:सेला मुबा 14 तर
परमेश्वरसे निसाफ लबा धुइरी एनीगदेला गति भन्दा टुरोसदेन सीदोनला
म्हिगदेला गति नाखम्बा तला। 15 कफर्नहुमला म्हिगदे, तिग एनीगदे स्वर्गरीन
धोला भिसी म्हन्मुला? आधो! एनीगदेदा मी नर्गरी भ्याइला।”

16 येशूसे ह्राडला चेलागदेदा “एनीगदेला ताम इयान्बासे डाला
तामदाएनोन इयान्ना, एनीगदेला ताम आइयान्बासे डाला तामएनोन
आइयान। ओच्छे डाला ताम आइयान्बासे डादा पुइखबाला तामएनोन
आइयान” भिसी सुइजी।

येशूसे पुइबा बोगल सोमसे च्युक न्ही चेलागदे दो:सी खबा

17 येशूसे पुइबा बोगल सोमसे च्युइ न्ही चेलागदे ताइबान येशू मुबा ग्लारी
खसी, “प्रभु डन्से ह्राडला मिनरी म्हडगदेदा कुल्मा थेनीगदेसे इयान्जी”
भिसी भिजी। 18 ओच्छे येशूसे थेनीगदेदा “डाइ शैतानदा स्वर्ग्याम तिप्लीड
ह्रड लसी ताइबा म्राइजी। 19 ओच्छे डाइ एनीगदेदा पुखीदेन बिच्छीदा
नाइसी भ्रबादेन एनीगदेदा ह्राडला शत्रुगदेला जम्मान शक्तिदा ढाबा
अधिकार पिन्बा मुला। थेतबासेलमा एनीगदेदा तिगै स्हेसेएनोन न्होइना
लआखम। 20 तसैनोन म्हडगदेदा ह्राडला धिरी थान्म्याइजी भिसी एनीगदे
थाताइजी। तर ह्राडला मिन स्वर्गरी भिबा मुला भिसी एनीगदे ताइजी” भिसी
सुइजी।

येशूसे पिन्बा धन्यवाद

मत्ती ११:२५-२७; १३:१६-१७

21 थेनोन धुइरी येशूथोरी परमेश्वरला आत्मा फेप्बजी। ओच्छे येशू
ताइसी, “मुदेन जम्बुलिडला प्रभु आबा, ह्राडदा धन्यवाद मुला, तिगदा
भिसम ह्राडसे ज्ञान बुद्धि मुबा म्हिगदेदेन सेबा घोबा म्हिगदेग्याम छुम्सी

††† 10:3 मत्ती १०:१६ † 10:7 १ कोर ९:१४; १ तिमी ५:१८ ††† उत्पत्ति
१९:२३-२९ “सदोम” भिबा चा शहर हिन्ना। थेदा परमेश्वरसे नाश लजी। तिगदा भिसम थे
शहररी ल्हानान नइबा गेगदे लमुबा। चु ताम, मत्ती ११:२३-२४; लूका १०:१२, १७:२९; रोमी
९:२९; २ पत्रुस २:६; यूह १:७; उन्बा ११:८ पदरीएनोन मुला।

थान्बा ताम तिगै आसेबा म्हिगदेदा उन्सी पिन्जी। हिन्ना आबा, चुहड लमान हाड ताडजी।

22 “डाला आबासे डादा जम्मान रहे जिम्मा पिन्बा मुला। ओच्छे डा खाल भिसी डाला आबादा बाहेक स्थान्दो खालैदा था आरे। थेहड लसीन आबा खाल भिसी झादेन झासे आबादा डोसेना लबा म्हिगदेसे बाहेक स्थान्दो खालैदान आबा खाल हिन्ना भिसी था आरे।”

23 जमाहेन्से येशू हाडला चेलागदेपट्टि दोःसी थेनीगदेदा जे चुहड भिसी सुड्जी, “एनीगदेसे झाडबा मुला, चु ताम झाडबागदे चा परमेश्वरग्याम मोलम याडबा म्हिगदे हिन्ना। 24 तिगदा भिसम ल्हानान अगमवक्तागदेदेन ग्लेगदेसे एनीगदेसे झाडबा चु तामगदे च्याबारी म्हाडमुबा। तर थेनीगदेसे आम्राडनी, ओच्छे एनीगदेसे थेःबा ताम थेनीगदेसे थेःबारी म्हाडजी, तर थेःबारी आम्याडनी।”

ज्यबा खिम्जेम

मत्ती २२:३४-४०; मर्कूस १२:२८-३४

25 तिरुकुनु यहूदी धर्मगुरु गिक येशू मुबा ग्लारी खसी येशूला सेम च्याबारी थेसे “गुरु जुकजुकधोना आसिबा जुनी याडबारी डाड तिग लतोःला?” भिसी इयोडमा, 26 येशूसे थेदा “परमेश्वरसे मोशादा पिन्बा ठिमरी तिग भिबा मुला? एसे पढब लबा आरे?” भिसी सुड्जी। 27 जमाहेन्से थेसे येशूदा “हाडला सेमहेन्सेन, हाडला प्राणसे, हाडला बुद्धिसे ओच्छे हाडला शक्तिसे एसे परमप्रभु हाडला परमेश्वरदा माया लउ। ओच्छे एसे हाडला खिम्जेमदा हाडदा हडनोन माया लउ” भिसी भिबा मुला। 28 भिसी भिमा, येशूसे थेदा “एसे ठीक भिजी दाहेन्से एसे थेहडनोन लउ। जमाहेन्से ए जुकजुकधोना सोला” भिसी सुड्जी। 29 तर थे म्हिसे हाडसे हाडदान डा ठीक मुला भिसी उन्बाला लागिरी “थेहड भिसम डाला खिम्जेम खाल हिन्ना?” भिसी येशूदा इयोडजी।

30 जमाहेन्से येशूसे थेदा चुहड भिसी सुड्जी, “च्यागो, म्हि गिक यरूशलेमग्याम यरीहो भिबा ग्लापट्टि निबान लमा थेदा य्होगदेसे स्याप्सी लिगन्डीन लसी सिबाधोनान तोजी। 31 ओच्छे छिन्नड लिच्छा परमेश्वरला मन्दिररी पूजा लबा म्हि थेंग्यामसेन खजी। तर थेसे थे य्होगदेसे तोसी सिबा तेबान तबा म्हिदा म्हाडसीनोन आम्राडबा स्होसी निजी। 32 थेहड लसीन स्थान्दो लेवी गिकएनोन थेंग्यामसेन खजी थेसेनोन थे सिबा तेबान तबा म्हिदा म्हाडसीनोन आम्राडबा स्होसी निजी। 33 तर स्थान्दो सामरी य्हुलला † म्हि गिकएनोन थेंग्यामसेन खजी। थे सिबा तेबान तबा म्हिदा म्हाडसी थेदा ल्हानान दया रेःजी। 34 जमाहेन्से थे सिबा तेबान तबा म्हि मुबा ग्लारी निसी थेसे थे म्हिला पोरगदेरी छुयगुदेन अडगुरला निडगु फोर्सी क्वानगेनसे खीजी। ओच्छे थेसे थे म्हिदा हाडलान गधाथोरी थान्सी म्हिगदे बास चिबा पाटी गिकरी भोर्सी म्हुन गिक हाडसेन थे म्हिला सयार लजी। 35 न्हडगरदड निबा धुडरी थेसे थे पाटीला धनीदा म्हुडला डबल न्ही पिन्सी थेसे ‘ज्यना लसी चुला सयार लउ, अझ खर्च ल्हानान निसम डा दोःसी खमा हाडदा पिन्ना’ भिसी भिजी।”

36 येशूसे थेदा “एला बिचाररी चु म्हि सोम न्हडरी खजिबा चा थे य्होसे स्याप्बा म्हिला खिम्जेम तजी?” भिसी इयोडमा, 37 थेसे येशूदा “थे य्होगदेसे तोबा म्हिदा दया लबा म्हि” भिसी भिजी।

ओच्छे येशूसे थेदा “दाहेन्से निसी एसेनोन थेहडनोन लउ” भिसी सुड्जी।

येशू माथदिन मरियमला दिमरी फेप्बा

38 ओच्छे येशू हाडला चेलागदेदेन छ्याम फेप्बान लमा नाम्सा गिकरी धोजी, थे नाम्सारी मुबा मार्था भिबा म्निडम्हेमेसे येशूदा हाडला दिमरी इयोडजी। 39 थे म्निडम्हेमेला मरियम भिबा आडा गिक मुबा, थे चा येशूला डामरी चिसी येशूला ताम इयान्मुबा। 40 मार्था चा येशूदा क्योडबाला लागिरी चबा रहे स्होबा गेरी कोल्सी चिबा मुबा। ओच्छे थे येशूला डामरी खसी, “प्रभु, चबा रहे स्होबारी आडासे डादा हो आलबा हाडसे म्हाडबा आरे?

† “सामरी य्हुल” चा यहूदीगदेला लागिरी जजा य्हुलला म्हि हिन्ना।

हाडसे डादा हो लबारी निउ भिसी थेदा सुड्सी पिन्गो” भिसी भिजी। 41 तर येशूसे थेदा “मार्था, ए ल्हानान तामरी धन्दा सुर्दा जे लमुला। 42 तर तोःबा रहे गिक जेन मुला, थेनोन रहे मरियमसे धम्बा मुला। थेतबासेलमा थेंग्याम चु आब्यन” भिसी सुड्जी।

येशूसे प्रार्थना लबारी लोप्बा

मत्ती ६:९-१३; ७:७-११

11 तिरुकुनु येशूसे ग्ला गिकरी प्रार्थना लबान मुबा। येशूसे प्रार्थना लसी जिन्माहेन्से थेला चेला गिकसे “प्रभु, यूहन्नासे हाडला चेलागदेदा प्रार्थना लबारी लोप्सी पिन्बा हड लसी उन्दाएनोन प्रार्थना लबारी लोप्सी पिन्गो” भिसी भिमा, 2 येशूसे थेनीगदेदा “एनीगदेसे चुहड लसी प्रार्थना लउ” भिसी सुड्जी,

“परमेश्वर आबा,
हाडदा † जम्मासेन मान लगै,
ओच्छे जम्मानथोरी हाडला शासन खगै।

3 डन्से धिन धिननोन चतोःबा रहे डन्दा धिन धिननोन पिन्गो।

4 डन्ना पाप माफ लसी पिन्गो।

तिगदा भिसम डन्सेनोन डन्दा बिरोध लसी पाप लबागदेदा माफ लबा मुला। ओच्छे डन्दा पापरी फसब तबा ग्यामरी भ्रआपुड्गो।”

5 जमाहेन्से येशूसे हाडला चेलागदेदा दोःसी चुहड भिसी सुड्जी, “एनीगदे न्हडरी खालैला हो गिक मुला भिसी म्हुनो। थे म्हुन गुडरी थे हो मुबा ग्लारी निसी ‘डादा गोर सोम गेड भउले ज्योज्यो, 6 डाला दिमरी थारेडग्याम डोन्बो गिक खबा मुला। दान्दे डादेन छ्याम चबा रहे तिगै आरे’ भिसी भिमा, 7 थेला होसे दिम न्हडग्यामसेन ‘डा म्प्राप दुड्सी कोलागदेदेन छ्याम म्हेर्सी जिन्जी। थेतबासेलमा डादा दुख थापिन्गो। दान्दे डा रेःसी एदा तिगै पिन्आखम’ भिसी भिजी। 8 तर डाड एनीगदेदा पाड्ला, थे होसे थेदा हो म्हुन्सी तिगै आपिन्सैनोन थेसे हीबाला हीबान लमाहेन्से थे रेःसी थेदा तोःतेधोना पिन्ना।

9 “थेतबासेलमा एनीगदेसे डाला ताम इयान्गो, हीसम पिन्ना, म्हाडसम स्याप्ला ओच्छे म्प्रापरी दूवक दूवक लसम एनीगदेला लागिरी म्प्राप ठोड्सी पिन्ना। 10 तिगदा भिसम जुन म्हिसे हीला थेदा पिन्ना, ओच्छे जुन म्हिसे म्हाडला थेसे स्याप्ला ओच्छे जुन म्हिसे म्प्रापरी दूवाक दूवाक लला थेदा म्प्राप ठोड्सी पिन्ना।

11 “ओच्छे एनीगदे न्हडरी खाल्ला आबासे चा हाडला कोलासे गेड हीमा युडबा, तार्डा हीमा पुखी, 12 ओच्छे नागाफुम हीमा बिच्छी पिन्ना? आपिन। 13 एनीगदे पापी तसीनोन हाडला कोलागदेदा ज्यबा रहे पिन्बारी सेमुला भिसम एनीगदेला स्वर्गरी मुबा परमेश्वर आबासे थेदेन छ्याम हीबागदेदा गाते ल्हाना लसी हाडला आत्मा पिन्ना।”

येशूदेन म्हाडला ग्ले बालजिबुल

मत्ती १२:२२-२९, ४३-४५; मर्कूस ३:२०-२७

14 येशूसे म्हाडसे स्याप्सी ताड दोबा म्हिला ल्हुडग्याम थे ताड दोना लबा म्हाड ताप्ली। जमाहेन्से थे म्हिसे ताम पाडबारी छ्याडबा म्हाडसी थेरी मुबा म्हिगदे उदेक तजी। 15 तर थेनीगदे न्हडरी कोड कोडसे “चु म्हिसे मी म्हाडगदेला ग्ले बालजिबुलला शक्तिग्याम जे म्हाडगदे ताप्बा हिन्ना” भिसी भिजी। 16 ओच्छे स्थान्दो कोड कोडसे चा येशूला सेम च्याबाला लागिरी “डन्दा स्वर्गला चिनु गिक उन्सी पिन्गो” भिसी भिजी।

17 तर येशूसे थेनीगदेला सेमला ताम था याड्सी थेनीगदेदा “च्यागो, जुन य्हुल्साला म्हिगदे हाड हाड न्हडरी तोबा छेबा लला, थे य्हुल्सा नाश तला, ओच्छे जुन दिमला म्हिगदे हाड हाड न्हडरीन तोबा छेबा लला, थे दिमएनोन फुप्ला।” 18 थेतबासेलमा शैतानएनोन हाड हाड न्हडरी आडिक्नी भिसम खाहड लसी थेला य्हुल्सा टुला? तिगदा भिसम एनीगदेसे डादा बालजिबुलला शक्तिग्याम म्हाड ताप्बा मुला भिसी भिबा मुला। 19 डाड बालजिबुलला शक्तिग्याम म्हाड ताप्पुला भिसम एनीगदेला चेलागदेसे चा खाल्ला शक्तिग्याम म्हाड ताप्बा हिन्ना? थेतबासेलमा एनीगदेला गल्ती थेनीगदेसेन उन्ना। 20 तर

† † चु पदरी ग्रीक बाइबलरी “हाडला छानदा मान लगै” भिसी भिबा मुला। तर मुल अर्थ चा परमेश्वरदा मान तगै भिबा हिन्ना।

डाइ परमेश्वरला शक्तिग्याम म्हड ताप्बा मुला भिसम एनीगदेला गुडरी परमेश्वरला यहुल्सा खसी जिन्बा मुला।

21 ओच्छे भड्बा म्हिसे हतियार थोसी हाडला दिम खुड्जी भिसम थेला मालसामान खालैसे भोरआखम। 22 तर थें भन्दान भड्बा म्हि खजी भिसम थेदा ढासी थेसे भर लबा जम्मान हतियारगदे ब्यन्ना, ओच्छे थेला जम्मान मालसामान ब्यन्नी जम्मादान भो लसी पिन्ना। 23 जुन म्हि डादेन छ्याम आढिक, थें म्हि डाला बिरोधी तला। ओच्छे जुन म्हिसे डादेन छ्याम गे आल थें म्हिसे डाला बिरोधी गे लला।

डाच्छा थोन्सी निबा म्हड दोःसी खमाहेन्से

मती १२:४३-४५

24 "म्हड म्हिला ल्हुड्ग्याम थोन्सी निमाहेन्से थेसे बलपबा न्हबारी तोडतोडबा ग्लारीक्यार ग्ला म्हाइसी भ्रला, तर थेसे खानडएनोन बलपबा न्हबा ग्ला आयाङ्गहेन्से 'डा जुन म्हिला ल्हुड्ग्याम थोन्सी खजी थेनोन म्हिला ल्हुडरी चिबारी निड' भिसी दोःसी निला। 25 ओच्छे थें म्हड दोःसी खमा थेसे डाच्छा हाड चिबा ग्ला साडसाडबा म्हाइला। 26 जमाहेन्से थें म्हड निसी हाड भन्दा नड्बा अर्गु गोर निस म्हडगदे भसी थें म्हि न्हडरी वाड्सी चिमुला। थेतबासेलमा थें म्हिला गति डाच्छाला भन्दा लिच्छाला गति झन नड्बा तला।"

सुख याड्बागदे

27 येशूसे चु ताम सुड्बान लमा म्हिला हुल न्हड्ग्याम क्रिड्बान म्रिडम्हेमे गिकसे "हाडदा न्हसी इहे ख्वाबा आमासे परमेश्वरग्याम मोलम याड्बा मुला," भिसी भिजी। 28 तर येशूसे "जुन म्हिसे परमेश्वरला बचन इयान्सी परमेश्वरसे कुल्बा अन्धार लला, थें म्हिसे परमेश्वरग्याम झन मोलम याड्बा," भिसी सुड्जी।

म्हिंगदेसे चिनु म्हाइबा

मती १२:३८-४२

29 येशूला क्युर्नोन म्हिला हुल तमाहेन्से येशूसे थेनीगदेदा चुहड् भिसी सुड्जी, "एनीगदे दान्देलो म्हिंगदे खाहड्बा नड्बा म्हि! उदेकला चिनु जे म्हाइबा। तर योना अगमवक्ताला चिनु बाहेक अर्गु चिनु आउन। 30 निनवे शहरला म्हिंगदेला लागिरी योना चिनु तबा हड्नीन परमेश्वरसे पुड्खबा म्हि दान्देलो म्हिंगदेला लागिरी चिनु हिन्ना। 31 निसाफ लबा धुडरी ल्होग्याम खबा ग्लेस्यासे दान्देलो म्हिंगदेला दोष उन्ना, तिगदा भिसम थें सोलोमन ग्लेला ज्ञान बुद्धिला ताम इयान्बारी ल्हानान थारेड्ग्याम खबा मुबा। तर च्यागो, चुरी सोलोमन ग्ले भन्दा घ्रेन म्हि मुसैनोन थेला ताम आड्ग्यान्नी। 32 निसाफ लबा धुडरी निनवे शहरला म्हिंगदे रेःसी दान्देलो म्हिंगदेला दोष उन्ना। तिगदा भिसम योना अगमवक्तासे पाड्बा ताम इयान्सी थेनीगदेसे हाड हाडला पाप खलासी परमेश्वरपट्टि दोःबा मुबा। तर च्यागो, चुरी योना अगमवक्ता भन्दा घ्रेन म्हि गिक मुला।

ल्हुडला नाडसल

मती ५:१५; ६:२२-२३

33 "खालैसे नाडसल म्हासी फामसे घप्पी आथान, ओच्छे छुम्सीनोन आथान। बरु दिम न्हडरी खबा म्हिंगदेदा य्हाल तगै भिसी नोबा ग्लारी थान्ना। 34 एला मी एला ल्हुडला लागिरी नाडसल हड्बान हिन्ना। एला मी ज्यबा मुसम एसे ज्यना लसी म्हाइला। तर एला मी ज्यबा आरेसम एसे तिगै म्हाइबारी आखम ओच्छे ए धोपधोपरी भ्रतोःला। 35 थेतबासेलमा ए होशियार तउ, तिगदा भिसम एला ल्हुडरी मुबा नाडसल सिसी धोपधोप थातगै। 36 चुदे एनीगदेला ल्हुडरी तिगै धोपधोप आतना जम्मान ल्हुड य्हाल तजी भिसम नाडसलसे एनीगदेदा य्हाल तना लबा हड्नीन एनीगदेला पूरान ल्हुड य्हाल तला।"

येशूसे फरिसीदेन यहुदी धर्मगुरुगदेला दोष उन्बा

मती २३:१-३६; मर्कुस १२:३८-४०

37 येशूसे चुहड् सुड्सी जिन्माहेन्से फरिसी गिकसे येशूदा सोल छुयोडबारी हाडला दिमरी इयोड्जी। जमाहेन्से येशू थेला दिमरी फेप्पी सोल छुयोडबारी धन्छयाजी। 38 तर येशूसे छ्या आस्याल्ना † सोल्बा म्हाइसी थें फरिसी उदेक तजी।

39 थें उदेक तबा म्हाइसी प्रभुसे थेदा चुहड् भिसी सुड्जी, "एनी फरिसीगदेसे खोरेदेन खार्बाला पाखापट्टि म्याप्पी चोखो स्होबा हड् लसी एनीगदेएनोन म्हिदा उन्बारी चोखो दोबा स्होमुला। तर एनीगदेला सेम लोभदेन नड्बा तामसे प्लिड्बा तमुला। 40 एनीगदे खाहड्बा मूर्ख म्हि, जुनसे पाखापट्टि स्होजी, थेसेन न्हडपट्टिनोन स्होबा आहिन? 41 एनीगदेदेन छ्याम मुबा स्हेगदे प्राड्बोगदेदा पिन्गो। जमाहेन्से एनीगदेला लागिरी जम्मान स्हे चोखो तला। 42 परमेश्वरग्याम सजाय याड्तोःबा फरिसीगदे, एनीगदेसे परमेश्वरदा बाबरीदेन जिरा ओच्छे अर्गु मसलाला दोडला भो च्युडला भो गिक मी पिन्मुला, तर एनीगदेसे म्हिंगदेदा ठीक निसाफदेन परमेश्वरदा लतोःबा मायाला भिसम तिगै वास्ता आलमुला। तर एनीगदेसे चु गे न्हीनोन लतोःबा मुबा। 43 परमेश्वरग्याम सजाय याड्बा फरिसीगदे, एनीगदेसे यहुदीगदे हुप तबा दिमला मुल ठिरी चिबारीदेन बजाररी स्हान्दो म्हिंगदेसे मान लगै भिसी सेम लमुला। 44 परमेश्वरग्याम सजाय याड्तोःबागदे, एनीगदे म्हिंगदेसे आम्राड्बा धुर्सा हड्बान हिन्ना। थेतबासेलमा म्हिंगदेसे था आयाङ्गना चुहड्बा धुर्साथोरी भ्रमुला।"

45 ओच्छे यहुदी धर्मगुरुगदे न्हडला गिकसे येशूदा "गुरु हाडसे चुहड् सुड्सी डन्नाएनोन बेड्जजत लबा मुला" भिसी भिमा, 46 येशूसे चुहड् भिसी सुड्जी, "एनी धर्मगुरुगदेएनोन परमेश्वरग्याम सजाय याड्तोःबा म्हिंगदे हिन्ना। तिगदा भिसम एनीगदेसे म्हिंगदेदा पुड्नीन आखम्बा धोड काष्बा मुला। तर एनीगदेसे चा या जुम्बीसेनोन आथुर्मुला।

47 "परमेश्वरग्याम सजाय याड्तोःबा म्हिंगदे, एनीगदेसे हाडला आखे म्हेमेगदेसे साड्बा अगमवक्तागदेला धुर्सा स्होबा मुला। 48 तर एनीगदेला आखे म्हेमेसे तिग लमुबा थें एनीगदेला गेग्यामसेन उन्बा मुला। ओच्छे थेन्ना गेदेन एनीगदेला गे ढिक्का मुला। तिगदा भिसम थेनीगदेसे अगमवक्तागदेदा साड्जी, ओच्छे एनीगदेसे चा म्हिदा उन्बाला लागिरी अगमवक्तागदेला धुर्सा स्होबा मुला। 49 थेतबासेलमा परमेश्वरसे हाडला ज्ञान बुद्धिग्याम चुहड् भिसी सुड्बा मुला, 'डाइ थेनीगदे मुबा ग्लारी अगमवक्तादेन मुल चेला पुड्खला थेनीगदेसे कोडदा साड्ला कोडदा ल्हानान दुख पिन्ना।' 50 थेतबासेलमा जम्बुलिड छ्यामाहेन्से दान्दोना साड्बा अगमवक्तागदेला सजाय दान्देलो म्हिंगदेसे याड्ला। 51 ओच्छे हाबिलहेन्से परमेश्वरला मन्दिर न्हडला चोखो ग्लादेन धूप म्हाबा ग्लाला गुडरी साड्बा जकरियाथोनाला सजाय दान्देलो म्हिंगदेला थोबोरी खला। 52 "परमेश्वरग्याम सजाय याड्तोःबा यहुदी धर्मगुरुगदे, एनीगदेदेन छ्याम परमेश्वरला ज्ञान, बुद्धिला म्हाप ठोड्बा साँचो मुला। तसैनोन एनीगदे न्हडरी आवाङ्नी ओच्छे न्हडरी वाड्बारी म्हाइबा म्हिंगदेदाएनोन वाड्आपुड्नी।"

53 येशू थेंग्याम थोन्सी फेप्बारी छ्याइमा यहुदी धर्मगुरुगदेदेन फरिसीगदेसे येशूदा ल्हानान बिरोध लसी ल्हानान तामगदे इयोडबारी छ्याइजी। 54 येशूसे जोहाब पिन्मा खानडै गल्ती स्याप्ला वा भिसी थेनीगदेसे दाउ च्यासी चिजी।

चेलागदेदा होशियार तना लबा

मती १०:२६-३३

12 थें धुडरी थेरी इयासीन इयाबारी आखम्बाधोनाला म्हिंगदे पोप तबासे लमा गिकसे गिकदा नाड्बारी छ्याइजी, ओच्छे जम्मान भन्दा डाच्छा येशूसे हाडला चेलागदेदा चुहड् भिसी सुड्बारी छ्याइजी, "एनीगदे फरिसीगदेला खमीरग्याम जोगब तसी चिउ। थें खमीर चा थेनीगदेसे म्हन्बा कप्टी ताम हिन्ना। †2 घप्पी आम्राड्बा स्हे तिगै आरे, ओच्छे छुम्सी था आयाङ्गबा स्हे तिगै आरे। †3 थेतबासेलमा जुन ताम

† यहुदीला ठिम अन्धार या आखुना चबा म्हिदा परमेश्वरला डाच्छा अशुद्ध भिसी म्हन्मुबा। †† 12:1 मती १६:६; मर्कुस ८:१५ † 12:2 मती ४:२२; लुका ८:१७

एनीगदेसे धोपधोपरी पाइला थे ताम यहाल तमा थे:ला। ओच्छे दिम न्हडरी सा ताम लसी पाइबा ताम दिमला धुरीग्याम थे:ना लला।

खाल म्राइसी लोइतो:बा?

मत्ती १०:२८-३३; १२:३२

4 येशूसे दो:सी चुहइ भिसी सुइजी, “डाला ह्योगदे इयान्गो, एनीगदे हाडदा साइबा म्हि म्राइसी थालोङ्गो। तिग्दा भिसम थेसे एनीगदेला ल्हुइदा जे साइला, तर आत्मादा चा साइबारी आखम। 5 तर एनीगदे खाल्देन छ्याम लोइतो:ला थे ताम इयान्गो, जुनदेन छ्याम एनीगदेदा साइसी नर्गरी भ्याइबा शक्ति मुला, थे म्राइसी जे लोङ्गो। 6 तिग डबल न्हीरी च्युर्गन डा ग्लुबारी आखम? खम्ला। तसैनोन थे न्हडला गिकदाएनोन परमेश्वरसे आम्ले:। 7 ओच्छे एनीगदेला थोबोला क्राएनोन परमेश्वरसे इयासी जिन्बा मुला। थेतबासेलमा एनीगदे थालोङ्गो। तिग्दा भिसम थे ल्हानान च्युर्गनगदे भन्दा मी एनीगदे ल्हानान घेन मुला।

स्थान्दोगदेदा खीष्टला बाररी पाइबा

मत्ती १०:३२-३३

8 “डाला ताम इयान्गो, जुन म्हिसे डादा म्हिला ओन्हाडरी सेमहेन्से प्रभु भिसी पाइला, परमेश्वरसे पुइखबा म्हिसेनोन थेदा परमेश्वरला दूतगदेला ओन्हाडरी चु हाडलान हिन्ना भिसी पाइला। 9 तर जुन म्हिसे म्हिगदेला ओन्हाडरी डादा डाइ थेदा डोसेबा आरे भिसी भिला, डाइएनोन परमेश्वरला दूतगदेला ओन्हाडरी थेदा सेबान आरे भिसी पाइला। 10 च्यागो, जुन म्हिसे परमेश्वरसे पुइखबा म्हिला बिरोधरी ताम लला, थेसे माफ याइला। तर परमेश्वरला आत्माला बिरोधरी ताम लबा म्हिसे खाइमै माफ आयाइ। †

11 “म्हिगदेसे एनीगदेदा चुइसी यहूदीगदे हुप तबा दिमला नेतादेन शासन लबा म्हिगदे ओच्छे न्यायाधीश मुबा ग्लारी भोर्बा धुइरी खाहइ लसी जोहाब पिन्बा भिसी एनीगदेसे धन्दा सुर्दा थालउ। ††12 तिग्दा भिसम थे धुइरी खाहइ लसी जोहाब पिन्तो:ला भिसी एनीगदेदा परमेश्वरला आत्मासेन लोप्ला।”

मूर्ख प्युक्पो म्हिला उखान

13 म्हिला हुल न्हडग्याम म्हि गिकसे येशूदा “गुरु, डाला ज्योज्योदा अंश भो लसी पिन्गो भिसी सुइसी पिन्गो” भिसी भिमा, 14 येशूसे थेदा “एनीगदेला निसाफ लबादेन अंश भो लसी पिन्बारी डादा खाल्से अधिकार पिन्बा मुला” भिसी सुइजी। 15 ओच्छे येशूसे थेनीगदेदा “एनीगदे होशियार तसी लोभग्याम जोगब तसी चिउ। तिग्दा भिसम म्हिदेन छ्याम जतिन धन सम्पत्ति मुसैनोन थेसे म्हिदा सत्यला जुनी आपिन” भिसी सुइबान, 16 थेनीगदेदा उखान गिक सुइजी, “ग्ला गिकरी प्युक्पो म्हि गिक मुबा, थेला बुरी ल्हानान बाली रोजी। 17 थे प्युक्पो म्हिसे सेम सेमरी चुहइ भिजी, ‘डादेन छ्याम बाली थान्बा ग्ला आरे, डाइ तिग लसे?’ 18 ओच्छे थेसे चुहइ भिजी, ‘दाहेन्से डाइ चुहइ लला, जम्मान ढुकुटीगदे फुप्पी घेन घेन स्होला, ओच्छे जम्मान बालीदेन मालसामान थेरीन थान्ना। 19 ओच्छे थेसे हाडला सेम न्हड न्हडरी चुहइ भिसी भिजी, ‘डाइ ल्हानान दिडधोनादा छ्योबा बाली पोप लबा मुला। थेतबासेलमा डा सुख शान्तिरी चबा थुइबादेन मोजमजा लसी चिला।”

20 “तर परमेश्वरसे थेदा ‘मूर्ख, तिनी म्हुनडनोन एला प्राण डाइ किन्ना, एसे पोप लसी थान्बा धन सम्पत्ति खाल्से चला?’ भिसी सुइजी।”

21 चु उखान सुइसी जिन्माहेन्से येशूसे “हाडला लागिरी धन सम्पत्ति पोप लबा म्हिला गति चुहइबान तला। परमेश्वरसे चुहइबा म्हिगदेदा प्युक्पो आम्हन्मुला” भिसी सुइजी।

धन्दा सुर्दा थालउ

मत्ती ६:२५-३४

22 जमाहेन्से येशूसे हाडला चेलागदेदा चुहइ भिसी सुइजी, “थेतबासेलमा एनीगदेसे डाला ताम इयान्गो, ‘सोबाला लागिरी तिग चसे, तिग क्वान्से भिसी धन्दा सुर्दा थालउ।’ 23 तिग्दा भिसम चबा थुइबादेन क्वान्बा भन्दा एनीगदेला प्राणदेन ल्हुइ घेन हिन्ना। 24 एनीगदेसे कावागदेदा च्यागो! थेनीगदेसे न्ह कमाइ लला, न्ह बाली थुइला, न्ह थेनीगदेला ढुकुटीन मुला। तसैनोन परमेश्वरसे थेनीगदेदा चबा सहे पिन्बान मुला। एनीगदे मी चरागदे भन्दा ल्हानान घेन मुला। 25 एनीगदे न्हडरी खाल्से धन्दा सुर्दा लसी छिन्नडला लागिरी आयू काप्खम्ला? 26 चुदे जजा गे मी लआखम्मुला भिसम तिग्दा एनीगदे अर्गु तामला धन्दा सुर्दा लबा?

27 “एनीगदेसे म्हेन्दोदा च्यागो, थेनीगदेसे न्ह गे लला, न्ह क्वान राला। तर च्यागो, सोलोमन ग्लेदेन छ्याम ल्हानान धन सम्पत्ति मुसैनोन थे म्हेन्दो तेएनोन जेबा आरेमुबा। †28 तिनी ल्हेबान निसी न्हडगर खमहिन्से मेरी फर्बा छेदा मी परमेश्वरसे चुहइ लसी जेना लमुला भिसम झन एनीगदेदा परमेश्वरसे गाते जेना लला? खाइ एनीगदेला विश्वास? 29 थेतबासेलमा एनीगदेसे तिग चबा, तिग थुइबा भिसी धन्दा सुर्दा लसी म्हाइसी थाभ्रउ। 30 तिग्दा भिसम परमेश्वरदा डोआसेबा जम्बुलिडला म्हिगदेसे चा चुहइ लसी धन्दा सुर्दा लमुला। तर एनीगदेदा चु जम्मान सहे तो:ला भिसी परमेश्वर आबादा था मुला। 31 थेतबासेलमा डाच्छा परमेश्वरला य्हुल्सा म्हाइगो। जमाहेन्से परमेश्वरसे एनीगदेदा चु जम्मान सहे पिन्ना।”

हाडला लागिरी स्वर्गरी धन सम्पत्ति सोसी थान्गो

मत्ती ६:१९-२९

32 दो:सी येशूसे चुहइ भिसी सुइजी, “डाला कोलागदे, एनीगदे थालोङ्गो! तिग्दा भिसम एनीगदेला परमेश्वर आबा ल्हानान ताइसी एनीगदेदा थेसे हाडला य्हुल्सा पिन्बारी छ्याइबा मुला। 33 थेतबासेलमा एनीगदेसे हाडदेन छ्याम मुबा धन सम्पत्ति चुइसी खबा टाडगा प्राडबोगदेदा भो लसी पिन्गो। ओच्छे खाइमै आन्होइबा ढुकुटी स्होसी हाडला लागिरी स्वर्गरी धन सम्पत्ति सोसी थान्गो। थेरी य्होएनोन आख, बुलुडसेनोन आच। 34 तिग्दा भिसम जुन ग्लारी एनीगदेला धन सम्पत्ति मुला, एनीगदेला सेमएनोन थेरीन तला।”

छोर्सी चिउ

मत्ती २४:४२-५१; मर्कूस १३:३२-३७

35 दो:सी येशूसे थेनीगदेदा चुहइ भिसी सुइजी, “एनीगदे हाडला क्वान क्वान्सी नाडसल म्रासी तयार लसी चिउ। †36 ओच्छे एनीगदे ब्याहला भोजरी निसी खबा मालिकदा भ्रान्सी चिबा नोकर हइबान तउ। तिग्दा भिसम मालिक खसी म्राप ढवक ढवक लमैछ्याम थेनीगदेसे हाडला मालिकदा म्राप ठोइसी पिन्मुला। 37 च्यागो, थे नोकरगदे गाते ताइम्याइला, हाडला मालिक खबा धुइरी थेनीगदेदा छोर्सी चिबा म्राइजी। थेतबासेलमा थेसे के: खीसी हाडला नोकरगदेदा चबा सहे पिन्ना। 38 थे नोकरगदे गाते ताइम्याइला, मालिक म्हुन गुडरी अथवा स्हो तबा धुइरी खसैनोन हाडला नोकरगदे छोर्सी चिबा म्राइजी। 39 तर एनीगदेसे चु तामएनोन था याङ्गो, दिमला म्हिसे य्हो खबा थुइ था याइसम थेसे हाडला दिम न्हडरी य्हो वाइआपुइ। 40 थेहइ लसीन एनीगदेएनोन होशियार तसी छोर्सी चिउ। तिग्दा भिसम परमेश्वरसे पुइखबा म्हिएनोन एनीगदेसे आम्हन्बा धुइरी खला।

ज्यबा गे लबा नोकरदेन आज्यबा गे लबा नोकर

मत्ती २४:४५-५१

41 जमाहेन्से पत्रुससे येशूदा “प्रभु, चु उखान डन्ना लागिरी जे सुइबा कि स्थान्दो म्हिगदेला लागिरीनोन सुइबा हिन्ना?” भिसी इयोइमा, 42 प्रभुसे थेदा चुहइ भिसी सुइजी, “दिमरी गे लबा बुद्धि मुबादेन भर्तुप्पा म्हि खाल हिन्ना? मालिकसे दिमला स्थान्दो नोकरगदेदा ठीक ठीक धुइरी चबा थुइबा

† 12:10 मत्ती १२:३२; मर्कूस ३:२९ †† 12:11 मत्ती १०:१९-२०; मर्कूस १३:११; लूका २१:१४-१५

‡ 12:27 १ राजा १०:४-७; २ इति ९:३-६ †† 12:35 मत्ती २५:१-१३

ढिक्ना लसी पिन्बारी जिम्मा पिन्थान्जी।⁴³ मालिक दोःसी खबा धुइरीनोन थेसे मालिकसे कुल्सी थान्बा ह्इ लसी गे लबा म्राइजी भिसम इनाम याइबा नोकर थेनोन हिन्ना।⁴⁴ च्यागो, एनीगदेसे डाला ताम इयान्गो, मालिकसे थेह्इबा नोकरदा ह्इडला जम्मान धन सम्पत्ति जिम्मा पिन्ना।⁴⁵ तर थे आज्यबा नोकरसे 'डाला मालिक योनान आख' भिसी म्हन्सी, इय्होइबा म्हिगदेदेन छ्याम चिसी चबा थुइबा लसी ह्इडदेन छ्यामनोन गे लबा नोकरगदेदा तोबा ग्याइबा लजी भिसम,⁴⁶ थेला मालिक थेसे आम्हन्बा धिनदेन धुइरी धोखसी मालिकसे थेदा ल्हानान सजाय पिन्ना। ओच्छे थेदा परमेश्वरदा विश्वास आलबा म्हिगदे मुबा ग्लारी भ्याइला।

⁴⁷ "ह्इडला दिमला मालिकला सेमला ताम था याइसीनोन सेम निबा गे आलबा नोकरसे तोबा चला।⁴⁸ तर ह्इडला मालिकला सेमला ताम था आयाइना तोबा चबा खाल्ला गे लसैनोन थे नोकरदा ल्हाना आतोः। ओच्छे जुन म्हिदा ल्हाना पिन्बा मुला थेसेनोन ल्हानान पिन्तोःला। थेह्इ लसीन जुन म्हिदा ल्हानान जिम्मा पिन्बा मुला थेदेन छ्याम ल्हानान किन्ना।

थेमे न्हडरी बिरोध लबा

मत्ती १०:३४-३६

⁴⁹ "च्यागो, डा जम्बुलिडरी मे सल्कब लबारी खबा हिन्ना। बरु डाच्छान सल्कब तबा हिन्सै तसेला मुबा।⁵⁰ डाइ दुखला बप्तिस्मा किन्तोःबा मुला, थे बप्तिस्मा आकिन्तेधोना डादा शान्ति आत।⁵¹ तिग एनीगदेसे डा जम्बुलिडरी म्हिगदेदा ढिक्ना लबारी खबा भिसी म्हन्बा? आहिन, डा मी एनीगदेदा फेना लबारी खबा हिन्ना।⁵² दाहेन्से गोर डा म्हिला थेमे ह्इड ह्इड न्हडरी फेला। ओच्छे न्हीला बिरोधरी सोम, सोमला बिरोधरी न्ही रेःला।⁵³ थेह्इ लसीन आबाला बिरोधरी झा, झाला बिरोधरी आबा, आमाला बिरोधरी झामे, झामेला बिरोधरी आमा ओच्छे स्युमीला बिरोधरी चाड, चाडला बिरोधरी स्युमी रेःला।" †

धुइ च्यासी भ्रतोःबा

मत्ती १६:२-३; ५:२५-२६

⁵⁴ जमाहेन्से म्हिला हुलदाएनोन येशूसे चुह्इ भिसी सुइजी, "जम्बुलिडला न्हुपग्याम खसु थोन्माहेन्से 'दाहेन्से नाम खला' भिसी एनीगदेसे भिमुला, ओच्छे थेह्इनोन तमुला।⁵⁵ थेह्इ लसीन जम्बुलिडला ल्होपट्टिसे लाबा खबारी छ्याइमाहेन्से 'दाहेन्से छेप्बा छला' भिसी एनीगदेसे भिमुला, ओच्छे थेह्इनोन तमुला।⁵⁶ कप्टीगदे, एनीगदेसे सदेन मुरी च्यासी तिग तबारी छ्याइबा मुला भिबा ताम चा था याइला। तर दान्दे तिग तबारी छ्याइबा मुला भिबा ताम चा तिगदा था आयाइबा?

⁵⁷ "डाइ लबा गे ठीक मुला कि आरे' भिसी एनीगदेसे तिगदा पक्का आलबा? ⁵⁸ खालैसे एदा मुद्दा युसी न्यायाधीश मुबा ग्लारी भोजी भिसम, थे म्हिदेन छ्याम ग्यामरीन ढिक्को। आहिन्सम थेसे एदा न्यायाधीशला डाच्छापट्टि राप्पुइला। ओच्छे न्यायाधीशसे सिपाहीगदेला यारी जिम्मा पिन्ना। जमाहेन्से सिपाहीगदेसे भोर्सी इयाल्खानरी झाइला।⁵⁹ एसे डाला ताम इयान्गो, एसे जम्मान टाडगा आफातेधोना थेग्याम थोन्बारी आम्याइ।"

पाप खलासी परमेश्वरपट्टि दोःबा

13 थेनोन धुइरी थेरी मुबा कोइ कोइ म्हिगदेसे येशूदा चुह्इ भिसी पाइजी। गालीलला म्हिगदेसे परमेश्वरदा बलि फुल्बान लमा पिलातस भिबा रोमी अञ्चलाधीशसे थेनीगदेदान साइजी। ओच्छे थेनीगदेला काएनोन पशुला कादेन छ्याम दोइजी।² जमाहेन्से येशूसे थेनीगदेदा चुह्इ भिसी जोहाब पिन्जी, "थे गालीलला म्हिगदेसे चुह्इ लसी दुख नाजी भिदेमा एनीगदेसे चु गालीलला म्हिगदेदा स्थान्दोगदे भन्दा ल्हानान पापी मुला भिसी म्हन्बा? ³ आहिन, एनीगदेसे डाला ताम इयान्गो, तिगदा भिसम एनीगदेसे ह्इड ह्इडला पाप खलासी परमेश्वरपट्टि आदोःनी भिसम एनीगदेएनोन थेह्इ लसीन नाश तला। ⁴ थेह्इ लसीन सिलोआम भिबा ग्लाला धरहरा गुर्सी सिबा च्युक भ्रेः म्हिगदे तिग यरूशलेमला स्थान्दो म्हिगदे भन्दा पापी मुबा भिसी

† 12:50 मर्कु १०:३८ †† 12:53 मीका ७:६

म्हन्बा? ⁵ आहिन, डाला ताम इयान्गो, तिगदा भिसम एनीगदेसे ह्इड ह्इडला पाप खलासी परमेश्वरपट्टि आदोःनी भिसम एनीगदेएनोन थेह्इ लसीन नाश तला।"

तिगै आरोबा दोडला उखान

⁶ जमाहेन्से येशूसे थेनीगदेदा उखान गिक सुइजी, "म्हि गिकसे वारीरी अञ्जीरला दोड सूबा मुबा। थे म्हिसे थे अञ्जीरला दोडरी अञ्जीर रोजी वा भिसी च्याबारी खमा तिगै आस्याजी। ⁷ थेतबासेलमा थेसे ह्इडला वारीरी गे लबा म्हिदा 'डाइ अञ्जीर रोला वा भिसी च्याबा सोम दिड तजी, तर दान्देधोना आरोनी। दाहेन्से चुदा थासी भ्याङ्गे' भिसी भिमा, ⁸ थे गे लबा म्हिसे 'अझ तिदिड भ्रान्गो, डाइ चु दोडला क्यारक्युर ख्वसी सार युला। ⁹ ओते लसीनोन आरोनी भिसम ह्इडसे चु दोड थासी भ्याइखम्ला' भिसी भिजी।"

येशूसे कुब्रे तबा मिडम्हेमेदा खम्ना लबा

¹⁰ येशूसे ब्लप्बा न्हबा धिनकुनु † यहूदीगदे हुप तबा दिमरी लोप्बान मुबा। ¹¹ थेरी म्हडसे स्याप्सी कुब्रे तबा मिडम्हेमे गिक मुबा। थे खाइमै सिधा तसी भ्रबारी आखम्मुबा। थे थेह्इ तबा च्युक भ्रेः दिड तबा मुबा। ¹² येशूसे थे मिडम्हेमेदा म्राइसी ह्इडला डामरी इयोइसी, "दाहेन्से ए खम्जी" भिसी सुइजी। ¹³ ओच्छे थेथोरी येशूसे ह्इडला छ्या थान्मैछ्याम थे कुब्रे तबा मिडम्हेमे खम्जी। जमाहेन्से थे मिडम्हेमेसे परमेश्वरला जयजयकार लबारी छ्याइजी।

¹⁴ येशूसे थे मिडम्हेमेदा ब्लप्बा न्हबा धिनकुनु खम्ना लबा म्राइसी यहूदीगदे हुप तबा दिमला नेता बोमो खसी, "म्हिगदेदा गे लबा धिन साता गिकरी दुरे मुनोन मुला। थेतबासेलमा चु दुरे न्हडरी खसी खम्ना लउ, ब्लप्बा न्हबा धिनकुनु आहिन" भिसी भिजी। †

¹⁵ प्रभुसे थेदा चुह्इ भिसी सुइजी, "कप्टी, तिग एनीगदेसे ब्लप्बा न्हबा धिनकुनु म्हे मुइदेन गधादा पुइसी क्युइ ख्वाबारी आभोर्मुला? ¹⁶ चु अब्राहामला सन्तानदा च्युक भ्रेः दिडधोना शैतानसे आख्लाबा मुबा भिसम, तिनी ब्लप्बा न्हबा धिनकुनुएनोन खम्ना लतोःबा आहिन?" ¹⁷ येशूसे चुह्इ लसी जोहाब पिन्बा म्राइसी, येशूला बिरोधीगदे पेःजी। तर थेरी मुबा म्हिगदे चा येशूसे लबा उदेकला गे म्राइसी ताइजी।

पच्छै ब्लुदेन खमीरला उखान

मत्ती १३:३१-३३; मर्कुस ४:३०-३२

¹⁸ जमाहेन्से येशूसे थेनीगदेदा "परमेश्वरला यहूल्सादा डाइ तिगदेन छ्याम दाँजब लसे? परमेश्वरला यहूल्सा खाह्इबा मुला भिसम, ¹⁹ चु चा पच्छै ढापला ब्लु गिक ह्इडबान हिन्ना। खालै म्हिसे घुन्यानरी ढ्वमाहेन्से थे ढाप फुइसी ल्हेबान निमुला। जमाहेन्से थे पच्छै ढापला दोडला हाँगारी चरागदेसे जड स्होसी चिला" भिसी सुइजी।

²⁰ दोःसी येशूसे थेनीगदेदा चुह्इ भिसी सुइजी, "परमेश्वरला यहूल्सादा डाइ तिगदेन छ्याम दाँजब लसे? ²¹ चु मी गेडरी युबा खमीर ह्इडबान हिन्ना। थे खमीर मिडम्हेमे गिकसे फाम सोम ब्रारी युसी ज्योप्ला। ओच्छे थे ब्रा आभोतेधोना थेसे घप्सी थान्ना।"

साडरो ग्राप

मत्ती ७:१३-१४, २१-२३; ८:११-१२

²² जमाहेन्से येशू शहर शहरदेन नाम्सा नाम्सारी फेप्सी म्हिगदेदा लोप्बान यरूशलेमरी फेप्जी। ²³ थेनोन धुइरी म्हि गिकसे, "प्रभु, तिग थार्वा याइबा म्हिगदे ल्हाना आरे?" भिसी येशूदा इयोइमा, ²⁴ येशूसे थेरी मुबा म्हिगदेदा चुह्इ भिसी सुइजी, "च्यागो, साडरो ग्रापग्याम वाइबारी भड लउ। तिगदा भिसम ल्हानान म्हिगदे वाइबारी म्हाइमुला, तसैनोन वाइबारी आखम्मुला। ²⁵ दिमला मालिक रेःसी ग्राप ढुइसी जिन्माहेन्से एनीगदेसे मडग्यारग्याम

‡ "ब्लप्बा न्हबा धिन" चा यहूदीगदेसे परमेश्वरला लागिरी फेसी थान्बा धिन हिन्ना।

†† 13:14 प्रस्था २०:९-१०; व्यव ५:१३-१४

द्वक द्वक लसी 'गुरु, इन्दा म्राप ठोइसी पिन्गो' भिसी भिमा, थेसे एनीगदेदा 'एनीगदे खाल हिन्ना? ओच्छे खानडग्याम खबा? डाइ एनीगदेदा डोसेबा आरे' भिसी भिला। ²⁶ एनीगदेसे 'हाड इन्देन छ्यामनोन सोल्बा छ्योइबा लबा मुबा। ओच्छे इन्ना नाम्सारीक्यार हाडसे लोष्वा मुबा' भिसी भिमा, ²⁷ थेसे एनीगदेदा 'एनीगदे खाल हिन्ना? डाइ डोआसेनी। थेतबासेलमा पाप गे लबागदे, एनीगदे डा मुबा ग्लायाम निउ' भिसी भिला। ^{†28} ओच्छे एनीगदेसे अब्राहाम, इसहाक, याकूबदेन जम्मान अगमवक्तागदेदा परमेश्वरला यहुल्सारी म्राङ्गा, हाडदा चा मडग्यार भ्याङ्गा क्राबा क्रिड्बा लसी स्वा क्रेला। ^{††29} स्यार, ल्हो, न्हुप, इयाड जम्मान ग्लायामसे म्हिगदे खसी परमेश्वरला यहुल्सारी थेदेन छ्यामनोन चबा थुड्बा लबारी चिला। ^{‡30} तर च्यागो, दान्दे लिच्छा मुबागदे डाच्छा तला, ओच्छे दान्दे डाच्छा मुबागदे लिच्छा तला।" †

यरूशलेमदा म्राङ्सी येशूदा दुख इहम्बा
मत्ती २३:३७-३९

³¹ थेनोन धुडरी कोइ कोइ फरिसीगदे येशू मुबा ग्लारी खसी, "हाड चुग्याम थोन्सी फेणो। तिगदा भिसम हाडदा हेरोदसे साइबारी छ्याइबा मुला" भिसी भिमा, ³² येशूसे थेनीगदेदा चुहड् भिसी सुड्जी, "एनीगदे निसी थे ल्हुन्दी हड्बा छट्टुदा चुहड् भिउ, 'तिनीदेन न्हडगर डाइ म्हडगदे ताप्बादेन आखम्बागदेदा खम्ना लबा गे लला, ओच्छे रेनी डाला गे जिन्ना।" ³³ ओच्छे तिनी, न्हडगर, रेनीकुनुधोनारी डा यरूशलेम शहररी धोनोन तो:ला। तिगदा भिसम यरूशलेम शहररी बाहेक अर्गु ग्लारी अगमवक्तादा आसाइ!

यरूशलेमला म्हिगदे म्राङ्सी येशूदा दुख इहम्बा
मत्ती २३:३७-३९

³⁴ "यरूशलेमला म्हिगदे, एनीगदेसे अगमवक्तागदेदा साइला ओच्छे परमेश्वरसे एनीगदे मुबा ग्लारी पुड्खबागदेदा युडबासे तोला। डाइ एनीगदेला कोलागदेदा नागा मामासे हाडला कोलागदेदा भ्याप्से घप्बा हड् लसी पोप लबारी म्हाइमा एनीगदेसे आड्यान्नी। ³⁵ दाहेन्से परमेश्वरसे एनीगदेला दिम खलाला। च्यागो, डाला ताम इयान्गो, एनीगदेसे 'परमप्रभुला मिनरी फेप्खबादा मोलम याड्बा म्हि' भिसी आभितेधोना डादा आम्राड्।" †

फरिसी गिकला दिमरी येशू फेण्बा

14 येशू बलप्बा न्हबा धिनकुनु फरिसीगदेला नेता गिकला दिमरी सोल छ्योइबारी फेण्जी। थेरी मुबा फरिसीगदेसे येशूला चिवा लसी चिमुबा। ² थेरी टाड्बा बेथासे स्याप्बा म्हि गिक येशूला डाच्छापट्टि मुबा। ³ येशूसे यहूदी धर्मगुरुगदेदेन फरिसीगदेदा "बलप्बा न्हबा धिनकुनु आखम्बा म्हिदा खम्ना लबारी तला कि आत?" भिसी इयोइमा, ⁴ थेनीगदे कुटिसी चिजी। ओच्छे येशूसे थे आखम्बा म्हिदा हाडला यासे थुर्सी खम्ना लमाहेन्से "दिमरी निउ" भिसी सुड्जी।

⁵ जमाहेन्से येशूसे थेनीगदेदा "बलप्बा न्हबा धिनकुनु एनीगदेला कोलागदे अथवा ग्लाप इनार न्हडरी ताइजी भिसम तिग एनीगदेसे तुरुन्तन आते:ना चिला?" भिसी सुङ्गा, ^{‡‡6} थेनीगदेसे तिगै पाड्बारी आखम्नी।

हाडसे हाडदान घेन थास्होउ

⁷ थेरी चबा थुड्बारी खबा म्हिगदेसे मुल ठिगदे धम्सी चिबारी म्हाइबा म्राङ्सी येशूसे थेनीगदेदा उखान गिक सुड्जी, ⁸ "खालैसे एनीगदेदा ब्याहरी निम्तो पिन्जी भिसम मुल ठिरी चिबारी थाम्हाइगो। तिगदा भिसम थेरी एनीगदे भन्दा घेन म्हिदाएनोन निम्तो पिन्बा मुला तला। ⁹ एदेन थेदा निम्तो पिन्बा म्हि खसी 'चु ग्लारी थेदा चिपुङ्गो' भिसी एदा चिबा ग्लायाम रे:पुड्ला। जमा ए पे:सी जम्मान भन्दा धिरी चितो:ला। ¹⁰ थेतबासेलमा एसे निम्तो याड्बा धुडरी निसी जम्मान भन्दा धिला ग्लारी चिउ। जमाहेन्से एदा निम्तो पिन्बा म्हि खसी

† 13:27 भजन ६:८ †† 13:28 मत्ती २२:१३; २५:३० ‡ 13:29 मत्ती ८:११-१२ †† 13:30 मत्ती १९:३०; २०:१६; मर्कु १०:३१ †† 13:35 भजन ११८:२६; यर्मि २२:५ ††† 14:5 मत्ती १२:११

'तोर धन्छ्यागो' भिसी मुल ठिरी चिपुड्ला। ^{‡‡} थे धुडरी एदेन छ्याम चबा थुड्बारी चिबागदेला ओन्छाडरी एसे मान याड्ला। ¹¹ तिगदा भिसम जुन म्हिसे हाडसे हाडदान घेन स्होला थेदा जम्मान भन्दा जजा स्होला ओच्छे जुन म्हिसे हाडसे हाडदान जजा स्होला थेदा जम्मान भन्दा घेन स्होला।" §

¹² येशूसे हाडदा निम्तो पिन्बा म्हिदाएनोन चुहड् भिसी सुड्जी, "एसे चबा थुड्बारी ह्योगदे, हाडला ज्योज्यो आलेगदे, हाडला म्हिगदेदेन पयुक्पो खिमजेमगदेदा जे थाड्योइगो। तिगदा भिसम थेनीगदेसेनोन एसे हड् लसीन निम्तो पिन्सी एला गुण फाला। ¹³ थेतबासेलमा एसे प्राडबोगदे, कुज्यागदेदेन मी आम्राड्बा म्हिगदेदाएनोन इयोइगो। ¹⁴ थेहड् लजी भिसम एसे मोलम याड्ला। तिगदा भिसम थेनीगदेसे एसे लबा गुण फाबारी आखम्सै परमेश्वरसे म्हन्बा अन्छारला गे लबा म्हिगदे सिबाग्याम सोबा धुडरी परमेश्वरसेन एसे लबा गुण फाला।"

भोजला उखान
मत्ती २२:१-१४

¹⁵ येशूला ताम थे:सी येशूदेन छ्याम चबा थुड्बा लबा म्हिगदे न्हडला गिकसे "परमेश्वरला यहुल्सारी चबा थुड्बा लम्याड्बागदे गाते ताड्म्याइला" भिसी भिजी। ¹⁶ जमाहेन्से येशूसे थेदा उखानग्याम चुहड् भिसी सुड्जी, "म्हि गिकसे घेन भोज पिन्बारी ल्हानान म्हिगदेदा निम्तो पिन्जी। ¹⁷ भोज ठीक लसी जिन्माहेन्से हाडसे निम्तो पिन्बा म्हिगदेदा जम्मान ठीक तजी भिसी इयोइबारी हाडला नोकरदा पुड्जी। ¹⁸ तर निम्तो याड्बा जम्मान म्हिगदेसे निउ गिक गिक लसी चुहड् भिबारी छ्याइजी, 'गिकसे चा डाइ बु ग्लुबा मुला थे च्याबारी नितो:ला। थेतबासेलमा डादा माफ लउ, डा खआम्पाड्' भिसी भिजी। ¹⁹ ओच्छे स्थान्दोसे चा 'डाइ हल डा ग्लाप ग्लुबा मुला, तिनीन थे ग्लाप च्याबारी नितो:बा मुला। थेतबासेलमा डादा माफ लउ, डा खआम्पाड्' भिसी भिजी। ²⁰ थेहड् लसीन स्थान्दोसेनोन 'डाइ भर्खर जे ब्याह लबा मुला, थेतबासेलमा डा खआम्पाड्' भिसी भिजी। ²¹ नोकरसे चु ताम हाडला मालिकदा पाङ्गाहेन्से दिमला मालिक बोमो खसी 'ए शहरला ग्यामदेन गल्लीगदेरी निसी थेरी मुबा जम्मान प्राडबो, कुज्यादेन मी आम्राड्बागदेदा इयोइसी चुरी भउ' भिसी कुल्जी। ²² चुहड् लसी जिन्माहेन्से नोकरसे दिमला मालिकदा 'गुरु, हाडसे कुल्बा अन्छार डाइ जम्मादान इयोइसी भजी, तसैनोन अड्ग ग्ला मुला' भिसी भिमा, ²³ मालिकसे 'ए शहरला मुल ग्यामदेन गल्ली गल्लीरी निसी म्हिगदेदा कर लसी भसी खउ। तिगदा भिसम डाला दिम नाडनोन म्हिगदे तगै। ²⁴ चु भन्दा डाच्छा निम्तो याड्बा म्हिगदे खालैसेनोन डाला भोजला ब्रोइ म्हाड् आम्हाड्' भिसी भिजी।"

चेलासे लतो:बा गे
मत्ती १०:३७-३८

²⁵ म्हेला हुल येशूदेन छ्याम निबान लबा धुडरी थेनीगदेपट्टि दो:सी येशूसे चुहड् भिसी सुड्जी, ²⁶ "चुदे डादेन छ्याम भ्रजी भिसम थेसे हाडला आबा आमा, म्रिड, कोलागदे, ज्योज्यो आले, नाना आडा ओच्छे हाडलान ज्यानएनोन माया मारब आलनी भिसम थे डाला चेला दोआखम। ^{‡‡27} जुन म्हिसे आसितेधोना हाडला दुख हाडसेन नासी ^{‡‡†} डादेन छ्याम आभ्र थे डाला चेला दोआखम। §

²⁸ "चुदे एनीगदे न्हडरी खालै म्हिसे धरहरा स्होबा सेम लसम थेसे धरहरा स्होसी जिन्बाधोना गाते खर्च निला भिसी डाच्छान हिसाब लतो:ला। ²⁹ थेहड् आलनी भिसम थेसे धरहराला जग थान्सी धरहरा स्होसी जिन्ना लबारी आखम्नी भिसम चु म्राड्बा जम्मान म्हिगदेसे थेदा खिसी लसी, ³⁰ 'चु म्हिसे स्होबारीम छ्याइमुबा तर स्होसी जिन्ना लबारी चा आखम्नी' भिला।

³¹ "खजिबै ग्लेसे अर्गु यहुल्साला ग्लेदेन छ्याम लडाइ लबारी निमा हाडदेन छ्याम मुबा हजार च्युइ सिपाहीगदे भोर्सी हाडदेन छ्याम लडाइ लबारी खबा

‡‡‡ 14:10 हितो २५:६-७ § 14:11 मत्ती २३:१२; लूका १८:१४ †† 14:26 मत्ती १०:३७ ††† "हाडला दुख हाडसेन नासी" भिबादा ग्रीक बाइबलरी चा "हाडला कुस हाडसेन पुड्तो:ला" भिसी भिबा मुला। §‡ 14:27 मत्ती १०:३८; १६:२४; मर्कु ८:३४; लूका ९:२३

बोगल गिक हजार सिपाहीदा ढाबारी खम्ला कि आखम थे डाच्छान चिसी सल्लाह आल? ³² लडाइ लबारी आखमनाम भिसी था याङ्गाहेन्से डाच्छान ढिकबाला लागिरी स्थान्दो ग्ले मुबा ग्लारी हाडला ग्ले ब्लोन पुडला। ³³ थेह्ण्ड लसी एनीगदे न्हडला जुन म्हिसे डाला लागिरी जम्मान स्हे खलाआखम थे म्हि डाला चेला दोआखम।

चजा ह्ण्ड तबा
मत्ती ५:१३; मर्कूस ९:५०

³⁴ “चजा ज्यबा स्हे हिन्ना, तर चजाला उम्बा स्हे निजी भिसम थेदा दोःसी तिग्से डम्ना लबा? ³⁵ थे चजा न्ह साप्राला लागिरी गे खेलबा तला न्ह सारनोन तला। जमाहेन्से म्हिगदेसे थे चजा थ्याङ्गला। जुन म्हिदा इयान्बा सेम मुला थेसे इयान्सी घोउ।”

म्हाबा ग्युला उखान
मत्ती १८:१२-१४

15 तिरेकुनु तिरो दुडबा म्हिगदेदेन पापीगदे जम्मान येशूला बचन इयान्बारी थेला डामरी खजी। ² चु म्राइसी फरिसीदेन यहूदी धर्मगुरुगदेसे “चु म्हि मी पापीगदेदेन छयाम ढिक्वसी थेनीगदेदेन छयामनोन चिसी चबा थुडबा लबा चीम” भिसी येशूला तामगन लबारी छयाइजी। [†]
³ जमाहेन्से येशूसे थेनीगदेदा उखान गिक सुड्जी, ⁴ “एनीगदे खालै म्हिला ग्यार्जा गिक ग्यु न्हडरी गिक म्हाजी भिसम थेसे बोगल ब्लिसे च्युक कु ग्युगदेदा खलासी थे म्हाबा ग्यु आस्याप्लेधोना आम्हाइ? म्हाइला। ⁵ थे ग्यु स्याप्लाहेन्से ताइसी ताइसी थेसे बमरी पुइसी दिमरी भला। ⁶ ओच्छे हाडला ह्गोगदेदेन खिम्जेमगदेदा इयोइसी एनीगदेएनोन डा ह्ण्ड लसी ताङ्गो। तिग्दा भिसम ‘डाइ डाला म्हाबा ग्यु स्याप्ल्जी’ भिसी भिला। ⁷ थेतबासेलमा एनीगदेसे डाला ताम इयान्गो, चुह्ण्ड लसीन हाडला पाप आखलाना डनी परमेश्वरला डाच्छा ज्यबा दोसी हाडला पाप खलाआतोःबा बोगल ब्लिसे च्युक कु म्हिगदेला लागिरी भन्दा हाडला पाप खलासी परमेश्वरपट्टि दोःबा म्हि गिकला लागिरी स्वर्गरी मुबागदे ल्हानान ताङ्गला।

म्हाबा डबलला उखान

⁸ दोःसी येशूसे उखान गिकग्याम चुह्ण्ड भिसी सुड्जी, “खालै म्रिडम्हेमे गिकदेन छयाम म्हुइला गोर च्युइ डबल मुबा। थे डबल च्युइ न्हडरी डबल गिक म्हाजी भिसम थेसे थे डबल आस्याप्लेधोना नाडसल म्रासी दिम साडसिड लसी आम्हाइ? म्हाइला। ⁹ ओच्छे थे म्हाबा डबल स्याप्लाहेन्से थेसे हाडला ह्गोगदेदेन खिम्जेमगदेदा इयोइसी ‘एनीगदेएनोन डा ह्ण्ड लसी ताङ्गो। तिग्दा भिसम डाइ डाला म्हाबा डबल याङ्गी’ भिसी भिला। ¹⁰ थेतबासेलमा एनीगदेसे डाला ताम इयान्गो, थेह्ण्ड लसीन खालै म्हिसे हाडला पाप खलासी परमेश्वरपट्टि दोःजी भिसम थे पापी गिकला लागिरी परमेश्वरला दूतगदे परमेश्वरदेन छयामनोन ताङ्गला।”

म्हाबा झाला उखान

¹¹ दोःसी येशूसे उखान गिक सुड्जी, “च्यागो, म्हि गिकला झा न्ही मुबा। ¹² थेला झा च्याङ्बासे चा आबादा ‘डाला अंश भउ आबा’ भिसी भिजी। जमाहेन्से थेसे हाडला सम्पत्ति झा न्हीदान भो लसी पिन्जी। ¹³ “तिगै धिन लिच्छा थे म्हिला झा च्याङ्बा हाडला जम्मान सम्पत्ति भोर्सी अर्गु ह्दुल्सारी निजी। थेसे थेरी मोजमजा लसी जम्मान सम्पत्ति जिन्ना लजी। ¹⁴ थेला जम्मान धन सम्पत्ति जिन्बा थुडरीन थे ह्दुल्सारी ल्हानान अनिकाल तजी, ओच्छे थेसे ल्हानान दुख याङ्गी। ¹⁵ जमाहेन्से थे, थे ह्दुल्साला म्हि गिक मुबा ग्लारी गे म्हाइबारी निजी। थे म्हिसे थेदा हाडला ढ्वा छबारी पुइजी। ¹⁶ थेदा खालैसे चबा थुड्बा आपिन्बासे लमा थेसे ढ्वला दाना चसीन हाडला फो म्रेन्ना लबारी म्हाइजी।

¹⁷ “जमाहेन्से थेसे हाडला दिम ढन्जी। ओच्छे चुह्ण्ड भिबारी छयाइजी, ‘डाला दिमरी डाला आबाला नोकरगदेसे म्रेन्ना चसीनोन लेड्बाधोना चबा

† 15:2 लूका ५:२९-३०

स्हे मुला। तर डा चा भिसम चुरी फोइथाननोन सिबारी छयाइबा मुला।

¹⁸ दाहेन्से डा आबा मुबा ग्लारी निसी, “आबा, डाइ परमेश्वरदेन हाडला बिरोधरी पाप लजी। ¹⁹ दाहेन्से डा हाडला झा भिबाधोनाला आरे। तसैनोन हाडसे डादा दया लसी हाडला नोकरगदे न्हडला गिक म्हन्सी थान्गो भितोःजी” भिसी म्हन्जी।

²⁰ “जमाहेन्से थे आबा मुबा ग्लारी निजी। आबासे थेदा थारेडग्याम खबान लबा म्राइसी थेला सेमरी दया रेःजी। ओच्छे ताइसी झादा स्याप्लारी यार्बान निसी झादा हाप ख्वाइसी च्योक लजी। ²¹ ओच्छे झासे ‘आबा, डाइ परमेश्वरदेन हाडला बिरोधरी पाप लबा मुला। डा दाहेन्से हाडला झा भिबाधोनाला आरे’ भिसी भिजी। ²² तर आबासे हाडला नोकरगदेदा इयोइसी चुह्ण्ड भिजी, ‘जम्मान भन्दा ज्यबा क्वान, च्यापदेन लखम योना भसी चुदा क्वान्सी पिन्गो। ²³ ओच्छे छोबा ह्ण्डबा बहर भसी साइगो। तिनी य्हाडसे भोज लइ। ²⁴ तिग्दा भिसम चु डाला झा सिबा मुबा दान्दे सोबा मुला, थे म्हाबा मुबा तर दान्दे याङ्गला मुला।’ जमाहेन्से जम्मान ताइसी भोज चबारी छयाइजी।

²⁵ “थे धुइरी थेला थेबा झा बुरी मुबा। थे बुग्याम खबा धुइरी दिमला डामरी धोखमा दिमरी व्हाइ गोबादेन स्हबान लबा थेःजी। ²⁶ जमाहेन्से थेसे नोकर गिकदा इयोइसी, ‘चुरी तिग लबा?’ भिसी इयोइमा, ²⁷ नोकरसे थेदा ‘हाडला आले दोःसी दिमरी खबा मुला। चुह्ण्ड लसी हाडला झा ज्यना लसी खबासे लमा आबासे जम्मान भन्दा छोबा बहर गिक साइबा मुला’ भिसी भिजी।

²⁸ “चु ताम थेःसी थे बोमोसे दिम न्हडरी वाङ्बारी आम्हाइनी। थेतबासेलमा थेला आबा मङ्ग्यार खसी थेदा व्हाम्बारी छयाइजी। ²⁹ तर थेसे आबादा ‘च्यागो, डाइ चुदे दिङ्धोना हाडला नोकरसे ह्ण्ड लसी जम्मान गे लसी हाडसे कुल्बा जम्मान तामएनोन इयान्जी। तसैनोन डाला ह्गोगदेदेन छयाम ढिक्वसी चबा थुड्बा लबारी हाडसे डादा खाइमै रा गिकधोना पिन्जी? ³⁰ तर तिनी हाडला धन सम्पत्ति बेश्यागदेदेन छयाम भ्रसी जिन्ना लबा झा दोःसी खमा चा थेला लागिरी छोबा बहर साइबा?’ भिसी भिमा, ³¹ आबासे थेदा ‘झा, ए मी सदन डादेन छयाम मुनोन मुला। ओच्छे डादेन छयाम मुबा जम्मान धन सम्पत्ति एलान हिन्ना। ³² तिनी य्हाडसे ताइसी भोज लतोःबा धिन हिन्ना। तिग्दा भिसम एला आले सिबा मुबा दान्दे सोबा मुला, म्हाबा मुबा दान्दे याङ्गला मुला’ भिसी भिजी।”

चलाक नाइके

16 येशूसे हाडला चेलागदेदा चुह्ण्ड भिसी सुड्जी, “ग्ला गिकरी प्युकपो म्हि गिकला गे लबा नाइके गिक मुबा। ‘नाइकेसे हाडला धन सम्पत्ति नाश लजी’ भिसी म्हिगदेसे थे प्युकपो म्हिदा पाङ्गी। ² जमाहेन्से थे प्युकपो म्हिसे हाडला गे लबा नाइकेदा इयोइसी ‘म्हिगदेसे एला बिरोधरी पाङ्गा ताम तिग हिन्ना? दाहेन्से जम्मान हिसाब किताब डादा घोना लउ। ओच्छे चु गे खलागो’ भिसी भिमा, ³ थे नाइकेसे चुह्ण्ड भिसी म्हन्जी, ‘दाहेन्से डादा मालिकसे गेग्याम तेःबारी छयाइबा मुला, डा तिग लइ? ख्वबा मोइबा लइ भिसम भड आरे, हीसी चबारी डादा पेःबा खमुला। ⁴ दाहेन्से डाइ तिग लतोःबा थे डादा था मुला, डादा मालिकसे गेग्याम तेःमाहेन्से म्हिगदेसे डादा मान लला भिबा ताम डाइ था याङ्गी जिन्बा मुला।’ ⁵ जमाहेन्से थेसे हाडला मालिकला असामीगदेदा गिक गिक लसी इयोइजी। ओच्छे थेसे डाच्छा खबा असामीदा ‘एदा डाला मालिकला छे गाते मुला?’ भिसी इयोइमा, ⁶ थे असामीसे ‘हजार सोम लिटर छ्युगु मुला’ भिसी भिमाहेन्से थे नाइकेसे ‘दाहेन्से एला तमसुकरी हजार गिकसे ग्यार्जा डा लिटर जे भ्रिउ’ भिसी भिजी। ⁷ थेह्ण्ड लसी स्थान्दोदाएनोन ‘एदा डाला मालिकला छे गाते मुला?’ भिसी इयोइमा, थे असामीसे ‘हजार गिक बोरा ग्वा मुला’ भिसी भिमाहेन्से थे नाइकेसे ‘एला तमसुकरी ग्यार्जा भ्रेः बोरा जे भ्रिउ’ भिसी भिजी।

⁸ “मालिकसे थे बेइमान नाइकेसे चलाक गे लबा म्राइसी थेला हर्गबढाइ लजी। तिग्दा भिसम चु जम्बुलिडला म्हिगदे हाडला ह्गो स्होबारी परमेश्वरदा डोसेबा म्हिगदे भन्दा ल्हानान चलाक तमुला। ⁹ थेतबासेलमा एनीगदेसे डाला

ताम इयान्गो, एनीगदेसे ह्याडला लागिरी जम्बुलिडला धन सम्पत्तिसे हो स्होउ। तिग्दा भिसम एनीगदेला धन सम्पत्ति जिन्सी निसैनीन थेनीगदेसे एनीगदेदा जुकजुकधोना चिबा ग्लारी मान लला।

जजाबा तामरीन विश्वास लखम्बा ततो:ला
मत्ती ६:१४

10 येशूसे दो:सी चुहड भिसी सुड्जी, “खालैसे जजाबा तामरी विश्वासला गे लजी भिसम थेदा घेन गेरीएनीन विश्वास लला। तर जजाबा तामरी विश्वासला गे आलनी भिसम थेदा घेन गेरीएनीन विश्वास आल।

11 थेतबासेलमा एनीगदेसे जम्बुलिडला धन सम्पत्तिरी विश्वासला गे आलनी भिसम खाल्से एनीगदेदा सत्यला धन सम्पत्ति जिम्मा पिन्ना? 12 थेहड लसीन स्हान्दोला धन सम्पत्तिरी विश्वासला गे आलनी भिसम एनीगदेदा धन सम्पत्ति खाल्से पिन्ना?

13 “खजिबै नोकरसे मालिक न्हीला गे लबारी आखम। तिग्दा भिसम थेसे गिकदा हेला लला, स्हान्दोदा माया लला, अथवा गिकसे भिबा ताम इयान्ना, स्हान्दोदा वास्तान आल। थेहड लसीन एनीगदेसेनीन परमेश्वरदेन धन सम्पत्ति न्हीलान गे लबारी आखम।” †

येशूसे लोप्बा अर्गु तामगदे
मत्ती ११:१२-१३; ५:१८, ३२

14 चु ताम थे:सी थेरी मुबा फरिसीगदेसे येशूदा खिसी लजी। तिग्दा भिसम थेनीगदे टाडगाला लिच्छा जे भ्रमुबा। 15 ओच्छे येशूसे थेनीगदेदा “म्हिगदेला ओन्हाडरी ह्याडसे ह्याडदान डनी ज्यबा म्हि हिन्ना भिसी भ्रबा एनीगदेन हिन्ना। तर परमेश्वरदा एनीगदेला सेम खाहड्बा मुला भिसी था मुला। तिग्दा भिसम म्हिगदेसे घेन भिसी म्हन्बा तामगदे परमेश्वरला लागिरी ल्हानान नडबा खबा ताम हिन्ना। 16 “बप्टिस्मा पिन्बा यूहन्नाला धुडधोना मोशाला ठिमदेन अगमवक्तागदेसे भिबा परमेश्वरला बचन थे:ना लबा मुबा। थेनीन धुडहेन्से परमेश्वरला यहुल्साला समाचार थे:ना लबान मुला। ओच्छे जम्मान म्हिगदे भड लसी परमेश्वरला यहुल्सारी वाड्बान मुला। ††17 मुदेन जम्बुलिड नाश तसैनीन परमेश्वरसे मोशादा पिन्बा ठिमरी मुबा ताम गिकनीन आम्हा। †

18 “खालै म्हिसे ह्याडला मिडदेन छयाम छोडपत्र लसी स्हान्दो मिडम्हेमेदेन छयाम ब्याह लजी भिसम थे चा ब्रेल्सी भ्रबा हिन्ना। थेहड लसी थेसे खलाबा मिडम्हेमेदा जुन म्हिसे ब्याह लला थेएनीन ब्रेल्सी भ्रबा हिन्ना।” †

फ्युकपो म्हिदेन लाजरस

19 दो:सी येशूसे चुहड भिसी सुड्जी, “ग्ला गिकरी फ्युकपो म्हि गिक मुबा। थेसे मलमलला म्हांगो क्वान क्वान्सी धिन धिननीन मोजमजा लसी चिमुबा।

20 तर थेला प्रापरी चा जिउ नाड पोरनीन पोर मुबा लाजरस भिबा हीबा म्हि गिकदा भसी थान्मुबा। 21 थे फ्युकपो म्हिसे चमा ताड्बा भ्राड्भुड चम्याड्वा वा भिसी च्यासी चिमुबा। नगीगदे चा खसी थेला पोर ल्हेम्मुबा।

22 “तिरेकुनु थे प्राड्बो म्हि सिजी। जमाहेन्से थेदा स्वर्गदूतगदेसे अब्राहामला डामरी भोर्सी थान्जी। ओच्छे थे फ्युकपो म्हिएनीन सिजी। 23 थे फ्युकपो म्हि नर्गरी ल्हानान दुख नासी चिबा धुडरी थेसे च्यामा थारेड्ग्याम अब्राहामला डामरी लाजरसदा म्हाड्जी। 24 ओच्छे थेसे क्रिड्सी ‘आबा अब्राहाम, डादा दया लसी लाजरसदा डा मुबा ग्लारी पुड्खउ। थेला या जुम्बी क्युडरी ब्लुम्सी डाला लेरी थोपा गिक क्युड ताड्ना लगै। तिग्दा भिसम डा चुरी मेसे क्रोसी भोल्सी चिबा मुला’ भिसी भिजी।

25 “जमाहेन्से अब्राहामसे थेदा ‘झा, एसे तिग ढन्बा आरे? ए सोबा धुडरी ल्हानान सुख याड्बा मुबा, तर लाजरससे चा ल्हानान दुख याड्बा मुबा। दान्दे चा लाजरससे चुरी सुख शान्ति याड्बा मुला, एसे चा दुख नासी चितो:बा मुला। 26 एदेन छयाम डन्ना गुडरी घेन व्हाड मुला। थेतबासेलमा

क्याम्सड झासम लबा सेम मुसैनीन क्याम्सड झासम लबारी आखम्मुला’ भिसी भिजी।

27 “जमाहेन्से थे फ्युकपो म्हिसे ‘थेहड भिसम आबा अब्राहाम, डाला बिन्ती मुला, लाजरसदा डाला आबाला दिमरी पुड्गो। 28 तिग्दा भिसम थेरी डाला आले डा मुला। थेसे थेनीगदेदा डा हड लसी थाभ्रउ भिसी पाड्गै, आहिन्सम थेनीगदेएनीन चु दुख नातो:बा ग्लारी खला’ भिसी भिजी।

29 “जमाहेन्से अब्राहामसे, ‘थेनीगदेदेन छयाम मोशादेन अगमवक्तागदेसे भिबा परमेश्वरला बचन मुनीन मुला, एला आलेगदेसे थे बचनरी भिबा ताम इयान्सम तनीन तला’ भिसी भिजी।

30 “ओच्छे थे फ्युकपो म्हिसे ‘आहिन अब्राहाम आबा, थेनीगदेदा ओतेसे जे आत। सिबा म्हिगदे न्हडला खालै सोसी थेनीगदे मुबा ग्लारी निजी भिसम थेनीगदे ह्याड ह्याडला पाप खलासी परमेश्वरपट्टि दो:सेला मुबा’ भिसी भिजी।

31 “तर अब्राहामसे थेदा ‘मोशादेन अगमवक्तागदेला ताम आड्ग्यान्बागदेसे सिबा म्हि सोसी निसैनीन थेनीगदेसे विश्वास आल’ भिसी भिजी।”

येशूसे विश्वासदेन माफ लतो:बा भिसी लोप्बा
मत्ती १८:६-७, २१-२२; मर्कूस ९:४२

17 येशूसे ह्याडला चेलागदेदा चुहड भिसी सुड्जी, “च्यागो, म्हिदा पापरी फसब लबा तामगदे मी खनीन खमुला। तर स्हान्दोदा पापरी फसब लबा म्हिसे चा परमेश्वरग्याम सजाय याड्वा। 2 जुन म्हिसे चु कोलागदेदा पाप लपुड्वा थेहड्बा म्हिदा पाप लपुड्बा भन्दा खारेरी हान्दा च्योसी समुन्दरी भ्याड्बान ज्यबा तला। 3 थेतबासेलमा ह्याडला लागिरी होशियार तसी चिउ! एला आलेसे पाप लजी भिसम थेदा बड्गो। ओच्छे थेसे डाड लबा पाप खलाला भिजी भिसम थेदा माफ लउ। ††4 एला आलेसे एला बिरोधरी धिनना निसरेमधोना पाप लसैनीन निसरेमधोनान थेसे डाड लबा पाप खलाला भिजी भिसम थेदा माफ लउ।”

5 जमाहेन्से प्रभुला मुल चेलागदेसे प्रभुदा “प्रभु, डन्ना विश्वास ल्हेना लसी पिन्गो” भिसी भिजी।

6 प्रभुसे थेनीगदेदा “एनीगदेदेन छयाम पच्छैला ब्लु गिक ते:बा जे विश्वास मुजी भिसम चु किम्बुला दोडदा ‘ए प्योक्सी समुन्दरी निउ’ भिजी भिसम थे एनीगदेसे भिबा ह्युडनीन तला।

नोकरसे लतो:बा गे

7 “एनीगदे न्हडरी खालैला नोकर बु मोड्सी तसे ग्यु छसी तसे दिमरी खमा, एनीगदेसे थेदा ‘चबा थुड्बा लउ’ भिसी खाड्मै भिला? आभि। 8 बरु एनीगदेसे थेदा ‘निउ, डाला लागिरी चबा थुड्बा तयार लउ, डाड चसी आजिन्तेधोना डादा क्योड्सी चिउ, ओच्छे ए चउ’ भिसी भिला। 9 ह्याडसे कुल्बा अन्धार गे लबा थे नोकरदा एसे खाड्मै धन्यवाद पिन्ना? आपिन। 10 थेहड लसीन एनीगदेदा कुल्बा जम्मान गे लसी जिन्माहेन्से ‘डनी मी गे आखेल्बा नोकर हिन्ना। तिग्दा भिसम डन्से लतो:बा गे जे लबा हिन्ना’ भिसी भिउ।”

येशूसे कोरे खबा म्हि च्युडदा खम्ना लबा

11 येशू यरूशलेम भिबा शहररी फेप्बा धुडरी सामरियादेन गालील अज्चलग्याम तबान फेप्जी। 12 येशू नाम्सा गिकरी वाड्बारी छ्याड्बा धुडरी कोरे खबा म्हि च्युडदा स्याप्जी। थे कोरे खबा म्हिगदे जजाकी क्याथाड्नीन राप्सी, 13 “येशू गुरु, डन्दा दया लउ” भिसी क्रिड्जी।

14 जमाहेन्से येशूसे थेनीगदेदा “एनीगदे परमेश्वरला मन्दिररी पूजा लबा म्हि मुबा ग्लारी निसी ह्याडदा उन्गो” भिसी सुड्जी। ओच्छे थेनीगदे निना निनान ग्यामरीन खम्जी। ††15 थेनीगदे न्हडला गिकसे ह्याड खम्बा था याड्सी परमेश्वरदा जयजयकार लबान दो:सी खजी। 16 ओच्छे थे म्हिसे येशूदा धन्यवाद पिन्सी येशूला स्हापरी पया लजी। थे म्हि चा सामरी यहुलला मुबा।

† 16:13 मत्ती ६:२४ †† 16:16 मत्ती ११:१२-१३ † 16:17 मत्ती ५:१८
†† 16:18 मत्ती ५:३२; † कोरे ७:१०-११

‡ 17:3 मत्ती १८:१५ ††† 17:14 लेवी १४:१-३२

17 जमाहेन्से येशूसे “कोरेग्याम खम्बा म्हि च्युड न्हडरी चु गिक जेन हिन्ना? स्थान्दो म्हि कु चा खानड निजी? 18 परमेश्वरदा धन्यवाद पिन्बारी चु सामरी बाहेक स्थान्दो खाले आतनी?” भिसी सुड्जी। 19 जमाहेन्से येशूसे थें सामरी खुलला म्हिदा “दाहेन्से ए रे:सी निउ, एला विश्वाससे लमा एला कोरे म्हाबा मुला” भिसी सुड्जी।

परमेश्वरला खुल्सा एनीगदेला गुडरीन मुला
मत्ती २४:२३-२८, ३७-४१

20 फरिसीगदेसे परमेश्वरला खुल्सा खाडमा खला भिसी इयोडमा, येशूसे थेनीगदेदा “परमेश्वरला खुल्सा ग्राडना लसी आख। 21 खाले म्हिसे परमेश्वरला खुल्सा चुरी मुला, थेरी मुला भिसी भिदेमा एनीगदेसे आम्राड। तिगदा भिसम परमेश्वरला खुल्सा एनीगदेला गुडरीन मुला” भिसी सुड्जी।

22 जमाहेन्से येशूसे हाडला चेलागदेदा चुहड् भिसी सुड्जी, “एनीगदेसे तिरिकुनु परमेश्वरसे पुड्खबा म्हिदा च्याबा सेम लला, तसैनोन एनीगदेसे आम्राड। 23 म्हिगदेसे एनीगदेदा थें थेरी मुला, चुरी मुला भिसी भिला, जमा धुडरी एनीगदे थानिउ ओच्छे थेनीगदेला लिच्छा थाभ्रउ। 24 तिगदा भिसम परमेश्वरसे पुड्खबा म्हि तिप्लीड खबा धुडरी मुला कुनी गिकग्याम अर्गु कुनीधोना फ्हाल तबा हड् तला। 25 तर डाच्छा थेसे ल्हानान दुखदेन म्हिगदेसे लबा बिरोध नातो:बा मुला।

26 “ओन्मा नोआला धुडरी तबा हड्-नोन परमेश्वरसे पुड्खबा म्हि दो:सी खबा धुडरीनोन तला। 27 नोआ पानी जहाजरी वाड्बा धिनकुनुधोना म्हिगदे चबा थुड्बादेन ब्याह लबान मुबा। थेनोन धुडरी नामदेन भाल बाढी खसी जम्मान नाश लजी। †

28 “थेहड् लसीन लोतला धुडरीनोन कोड म्हिगदे चबा थुड्बा, कोड म्हिगदे ग्लुबा चूड्बा, कोड सूबा ओच्छे कोड म्हिगदे दिम स्होबान मुबा। 29 लोत सदोमग्याम थोन्माकुनुन मुग्याम मेदेन बारूद ताड्सी जम्मान नाश लजी। †

30 “परमेश्वरसे पुड्खबा म्हि खबा धुडरीनोन थेहड्-नोन तला। 31 थे धुडरी तलाथेरी मुबा म्हिगदे हाडला सामान किन्बारी मार फाप्सी दिम न्हडरी थावाङ्गो, ओच्छे बुरी मुबागदेएनोन दिमरी दो:सी थानिउ। †32 थेहड् लसीन एनीगदेसे लोतला म्रिडदा तबा ताम ढन्गो। 33 तिगदा भिसम जुन म्हिसे हाडला ज्यान जोगब लबारी म्हाडला थे म्हिसे जुकजुकधोनाला जुनी आयाड्। तर डाला लागिरी ज्याननोन पिन्खम्बा म्हिसे जुकजुकधोनाला जुनी याड्ला। 34 थेतबासेलमा एनीगदेसे डाला ताम इयान्गो, म्हनड ग्ला गिकरीन म्हेसी चिबा म्हि न्ही न्हडरी गिकदा भोर्ला गिकदा थेरीन खलाला। 35 ओच्छे हान्दारी ब्रा स्याड्सी चिबा म्रिडम्हेमे न्ही न्हडरी गिकदा भोर्ला गिकदा थेरी खलाला। 36 थेहड् लसीन बुरी मुबा म्हि न्ही न्हडरी गिकदा भोर्ला, गिकदा खलाला।” †

37 जमाहेन्से चेलागदेसे येशूदा “खानड प्रभु?” भिसी इयोडमा, येशूसे थेनीगदेदा “जुन ग्लारी सिबा जन्तु मुला थेरी गिद्धागदे पोप तमुला” भिसी सुड्जी।

हेम्बो सिबा म्रिडम्हेमेदेन न्यायाधीशला उखान

18 जमाहेन्से येशूसे हाडला चेलागदेदा “सदन प्रार्थना लसी चिगै ओच्छे खाड्मै हरेस थाचगै” भिसी उखान गिक सुड्जी। 2 “शहर गिकरी न्यायाधीश गिक मुबा। थेसे परमेश्वरदेन म्हिगदेला वास्ता आलमुबा। 3 थेनोन शहररी हेम्बो सिबा म्रिडम्हेमे गिकएनोन मुबा। थे म्रिडम्हेमे घरिघरि थे न्यायाधीश मुबा ग्लारी निसी ‘डादा डाला बिरोधरी रे:बा म्हिग्याम ठीक निसाफ लसी पिन्गो’ भिसी भिमुबा।

4 “तिगै धिनधोना मी थेसे थे म्रिडम्हेमेला तामदा आड्यान्नी। तर लिच्छा थेसे, ‘डा परमेश्वरदेन म्हिगदेला वास्ता आलबा म्हि हिन्ना। 5 तर चु हेम्बो सिबा म्रिडम्हेमेसे डादा ल्हानान दुख पिन्बासे लमा चुला ठीक निसाफ लसी पिन्तो:जी। आहिन्सम चु घरिघरि खसी डादा छेर्न लला’ भिसी सेमरी म्हन्जी।”

† 17:26 उत्प ६:५-८ †† 17:27 उत्प ७:६-२४ † 17:29 उत्प १८:२०-१९-२५ †† 17:31 मत्ती २४:१७-१८; मर्कू १३:१५-१६ ††† चु पदला ताम ल्हाना हड्बा ग्रीक बाइबलरी भिबा आरे।

6 जमाहेन्से प्रभुसे चुहड् भिसी सुड्जी, “च्यागो, थें आज्यबा न्यायाधीशसे तिग लबा चीम, एनीगदेसे था याङ्गो। 7 थेहड् लसीन परमेश्वरसे धिन म्हननोन बिन्ती लबा हाडसे धम्बा हाडला म्हिला ठीक निसाफ आल? तिग हाडला म्हिदा ह्यो लबारी घडना लला? 8 च्यागो, परमेश्वरसे हाडला म्हिला ठीक निसाफ लबारी खाड्मै घडना आल। तसैनोन परमेश्वरसे पुड्खबा म्हि खमा तिग चु जम्बुलिडरी डादा विश्वास लबागदे स्याप्ला?”

म्हि न्हीला प्रार्थना

9 हाडसे हाडदान डा ज्यबा म्हि हिन्ना भिसी ढुक्क तसी स्थान्दोदा चा हेला लबा म्हिगदेदा येशूसे चुहड् भिसी उखान गिक सुड्जी, 10 “फरिसीदेन तिरो दुड्बा म्हि प्रार्थना लबारी परमेश्वरला मन्दिररी निजी। 11 ओच्छे फरिसीसे चुहड् भिसी प्रार्थना लजी, ‘परमेश्वर हाडदा धन्यवाद मुला, तिगदा भिसम डा स्थान्दो म्हिगदे हड्बा लोभी, बेड्मानी, स्थान्दोदेन छ्याम ब्रेल्सी भ्रबा म्हि हड्बा आहिन। ओच्छे चु तिरो दुड्बा म्हि हड्बाएनोन आहिन। 12 डाड सातारी न्हीरेम फोड्थान चिसी प्रार्थना लबा मुला। ओच्छे डाड याड्बा जम्मान स्हेला भो च्युडला भो गिक हाडदा पिन्बा मुला।’

13 “तर तिरो दुड्बा म्हि चा थारेडनोन राप्सी स्वर्गपट्टि आच्याना हाडला कु ठोक्बान, ‘परमेश्वर, डा पापीदा दया लउ’ भिसी भिजी। 14 थेतबासेलमा एनीगदेसे डाला ताम इयान्गो, चु तिरो दुड्बा म्हि चा स्थान्दो म्हि भन्दा परमेश्वरदा सेम निबा म्हि दोसी हाडला दिमरी निजी। तिगदा भिसम जुन म्हिसे हाडसे हाडदान घेन स्होला थे म्हि जजा तला। तर जुन म्हिसे हाडसे हाडदान जजा स्होला थे म्हि घेन तला।” ††

येशूसे कोलागदेदा मोलम पिन्बा
मत्ती १९:१३-१५; मर्कूस १०:१३-१६

15 म्हिगदेसे हाडला कोलागदेदा येशूसे हाडला छ्या थान्सी मोलम पिन्नी भिसी येशू मुबा ग्लारी भजी। चु ग्राड्सी चेलागदेसे थेनीगदेदा बड्जी। 16 तर येशूसे थेनीगदेदा इयोड्सी चुहड् भिसी सुड्जी, “कोलागदेदा डा मुबा ग्लारी खपुङ्गो, थेनीगदेला ग्याम थाकागो। तिगदा भिसम परमेश्वरला खुल्सा चु कोलागदे हड्बालान हिन्ना। 17 एनीगदेसे डाला ताम इयान्गो, जुन म्हिसे चु कोलागदेसे हड् लसी परमेश्वरला खुल्सादा विश्वास आल, थे म्हि परमेश्वरला खुल्सारी खाड्मै वाड्-आम्पाड्।”

परमेश्वरला खुल्सादेन प्युक्पो म्हि
मत्ती १९:१६-३०; मर्कूस १०:१७-३१

18 यहूदी नेता गिकसे येशूदा “ज्यबा गुरु, जुकजुकधोनाला जुनी याड्बाला लागिरी डाड तिग लतो:ला?” भिसी इयोड्मा, 19 येशूसे थेंदा चुहड् भिसी सुड्जी, “एसे डादा तिगदा ज्यबा भिबा? परमेश्वर बाहेक खाले ज्यबा आरे। 20 परमेश्वरसे कुल्बा ताम एदा थानोन मुला। म्हि थासाड्गो, स्थान्दोदेन छ्याम ब्रेल्सी थाभ्रउ, ह्यो थालउ, लुसीला ताम पाड्सी थाभ्रउ ओच्छे हाडला आबा आमादा मान लउ।” ††

21 जमाहेन्से थेसे, “चु जम्मान ताम मी डाड जट्धुगुहेन्सेन लसीन चिबा मुला” भिसी भिजी। 22 चु ताम थें:माहेन्से येशूसे थेंदा “अड् एसे गे गिक लतो:बा मुला, दाहेन्से एसे हाडदेन छ्याम मुबा जम्मान धन सम्पत्ति चूड्सी प्राड्बोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ” भिसी सुड्जी। 23 तर चु ताम थें:सी थें म्हिदा ल्हानान दुख इहम्जी। तिगदा भिसम थें ल्हानान प्युक्पो मुबा।

24 थे म्हिला सेमरी ल्हानान दुख तबा था याड्सी येशूसे चुहड् भिसी सुड्जी, “थेंदा च्यासी प्युक्पो म्हिदा परमेश्वरला खुल्सारी वाड्बारी गाते गाह्यो मुला। 25 तिगदा भिसम प्युक्पो म्हिदा परमेश्वरला खुल्सारी वाड्बारी भन्दा ऊँटदा दापला मीग्याम वाड्बारी सजिलो मुला।”

26 चु ताम थें:बागदेसे येशूदा “थेहड् भिसम खाल्से थाबा याड्ला?” भिसी इयोड्जी।

††† 18:14 मत्ती २३:१२; लूका १४:११ ††† 18:20 प्रस्था २०:१२-१६; व्यव ५:१६-२०

27 जमाहेन्से येशूसे थेनीगदेदा “चु गे म्हिसे लबारीन आखम्बा गे तसैनोन परमेश्वरसे लखम्बा” भिंसी सुड्जी।

28 ओच्छे पत्रुससे, “स्हीगो प्रभु, डन्से हाडला दिमनामनोन खलासी हाडदेन छ्याम भ्रबा मुला” भिंसी भिमा, 29 येशूसे थेनीगदेदा “एनीगदेसे डाला ताम ड्यान्गो, जुन म्हिसे हाडला दिम, म्रिड, ज्योज्यो आले, आबा आमा, ओच्छे झा झामेदा परमेश्वरला खुल्साला लागिरी खलाला, 30 थेसे दान्देन थे भन्दा ल्हाना याडला, ओच्छे लिच्छा खबा धुडरी थेसे जुकजुकधोनाला जुनी याडला” भिंसी सुड्जी।

येशूसे हाडदा साडला भिंसी सुड्बा
मत्ती २०:१७-१९; मर्कूस १०:३२-३४

31 येशूसे हाडला च्युक न्ही चेलागदेदा कुनी गिकरी भोर्सी चुहड् भिंसी सुड्जी, “च्यागो, य्हाड यरूशलेमरी निबान मुला। दाहेन्से परमेश्वरसे पुडखबा म्हिला बारेरी अगमवक्तागदेसे भ्रिबा ताम पूरा तला। 32 थेदा अर्गु खुलला म्हिगदेला यारी जिम्मा पिन्ना। जमाहेन्से थे म्हिगदेसे थेदा खिसी लला ओच्छे थो स्वाबान बेडज्जत लला, 33 जमाहेन्से कोर्रसे तोला ओच्छे साडला। तसैनोन थे सोमरेमाकुनु सिबाग्याम सोला।” 34 तर चेलागदेसे चु ताम तिगै आघोनी। तिग्दा भिसम चु ताम म्हिला ज्ञान बुद्धिसे घोसी घोआखम्बा तबासे लमा येशूसे तिग सुड्बा हिन्ना भिंसी थेनीगदेसे म्हन्बारीएनोन आखम्नी।

येशूसे मी आम्राड्बा म्हिला मी म्राड्ना लबा
मत्ती २०:२९-३४; मर्कूस १०:४६-५२

35 येशू यरीहो शहरला डामरी धोमा थेरी मी आम्राड्बा म्हि गिक ग्यामला कुनीरी हीसी चिमुबा। 36 थे मी आम्राड्बा म्हिसे हाडला डामग्याम म्हिला हुल निबान लबा थे:सी, “चुरी तिग तजी?” भिंसी ड्योड्मा, 37 म्हिगदेसे थेदा “नासरतला येशू चुग्यामसेन फेबान मुला” भिंसी भिजी।

38 जमाहेन्से थेसे क्रिड्बान, “दाऊद ग्लेला सन्तान येशू, डादा दया लउ” भिंसी भिमा, 39 डाच्छा भ्रबागदेसे थेदा कुटिसी चिउ भिंसी बड्जी। तर थेसे झन क्रिड्बान, “दाऊद ग्लेला सन्तान येशू, डादा दया लउ” भिंसी भिजी।

40 थेसे चुहड् भिंसी थे:सी येशू थन तसी थेदा हाड मुबा ग्लारी भपुड्जी। ओच्छे थे डामरी खमाहेन्से, 41 “डाइ एला लागिरी तिग लउ भिंसी म्हन्बा मुला?” भिंसी ड्योड्जी। जमाहेन्से थेसे “प्रभु, डाला मी म्राड्ना लसी पिन्गो” भिंसी भिजी।

42 येशूसे थेदा “लु, एसे म्राङ्ग, एसे विश्वास लबासे लमा एसे म्राड्बा मुला” भिंसी सुड्जी। 43 येशूसे चुहड् सुड्छ्याम थेसे म्राड्जी। ओच्छे थेसे परमेश्वरदा जयजयकार लबान येशूदेन छ्याम भ्रजी। चु म्राड्बा म्हिगदेसेनोन परमेश्वरदा जयजयकार लजी।

तिरो दुड्बा जखायस

19 येशू यरीहो शहरग्याम फेबान मुबा। 2 थेरी जखायस भिंसी प्युक्यो म्हि गिक मुबा। थे तिरो दुड्बा म्हिगदे न्हडला मुल म्हि मुबा। 3 थेसे येशूदा खाल चीम भिंसी च्याबारी म्हाड्जी। तर म्हिला हुलसे लमा थेसे येशूदा आम्राड्नी। तिग्दा भिसम थे मेबा मुबा। 4 थेतबासेलमा येशूदा च्याबारी थे डाच्छा डाच्छा यार्बान निसी अज्जीरला दोडरी क्रै:जी। तिग्दा भिसम येशू थेग्यामसेन फेबारी छ्याड्बा मुबा। 5 थेरी धोखमाहेन्से येशूसे तोरपट्टि स्हीसी जखायसदा “जखायस, ए योना मार फाप्सी खउ! तिग्दा भिसम तिनी डा एला दिमरी चितो:बा मुला” भिंसी सुड्जी।

6 जमाहेन्से जखायस ताड्सी मार फाप्सी येशूदा फ्याफुल्जी। 7 चु म्राङ्गाहेन्से म्हिगदेसे “चु म्हि मी पापीला दिमरी डोन्बो दोसी निजी” भिंसी येशूला तामगन लजी।

8 तर जखायससे “प्रभु, दाहेन्से डाइ डाला गडसल धन सम्पत्ति प्राड्बोगदेदा भो लसी पिन्ना, ओच्छे डाइ खालैदा ठगब लसी किन्बा मुसम थेदा भो ब्लि ल्हाना दो:सी पिन्ना” भिंसी भिजी।

9 जमाहेन्से येशूसे थेदा “तिनीहेन्से चु दिमसे थार्बा याड्बा मुला। तिग्दा भिसम जखायसएनोन अब्राहामला सन्तान हिन्ना। 10 परमेश्वरसे पुड्खबा म्हि म्हाबागदेदा म्हाड्बारीदेन थार्बा पिन्बारी खबा हिन्ना” भिंसी सुड्जी।

म्हरला डबलला उखान
मत्ती २५:१४-३०

11 येशू यरूशलेमला डामरी धोमुबा। म्हिगदेसे दाहेन्से परमेश्वरला खुल्सा योनान खबान मुला भिंसी म्हन्सी येशूला ताम ड्यान्सी चिमुबा। थेतबासेलमा येशूसे थेनीगदेदा चुहड् भिंसी उखान गिक सुड्जी, 12 “खालै ग्रेन म्हि गिक हाडला ग्लारी शासन लबा सेम लसी थे खुल्साला ग्ले मुबा ग्लारी निजी। 13 निबा भन्दा डाच्छा थेसे हाडला नोकर च्युड्दा ड्योड्जी। ओच्छे जम्मादान म्हरला डबल † गिक गिक पिन्सी ‘डा आखतेधोना चु टाड्गासे व्यापार लउ’ भिंसी कुल्जी। 14 तर थेला खुल्साला म्हिगदेसे चा थेदा सेम आनिमुबा। थेतबासेलमा थे निसी जिन्माहेन्से ‘चु म्हिसे शासन लगे भिंसी डन्ना सेम आरे’ भिंसी ग्ले ब्लोनदा पुड्जी।

15 “तर थे म्हि शासन लबा अधिकार किन्सी खजी। जमाहेन्से थेसे हाडला नोकरगदेदा व्यापार लसी गाते स्होजी भिंसी ड्योड्बारी ड्योड्जी। 16 ओच्छे डाच्छा खबा नोकरसे ‘मालिक, हाडसे पिन्बा डबल गिकसे डाइ डबल च्युड् स्होजी’ भिंसी भिजी। 17 जमाहेन्से थे म्हिसे थेदा ‘स्याबास! ए डाला ज्यबा नोकर हिन्ना! तिग्दा भिसम एसे डादा जजा तामरी विश्वास उन्नी। थेतबासेलमा डाइ एदा शहर च्युड्री शासन लबा अधिकार पिन्ना’ भिंसी भिजी। 18 ओच्छे स्हान्दो नोकरसे ‘मालिक, हाडसे पिन्बा डबल गिकसे डाइ डबल डा स्होजी’ भिंसी भिजी। 19 जमाहेन्से थेदाएनोन थे म्हिसे ‘ए शहर डाला मुल म्हि तला’ भिंसी भिजी। 20 ओच्छे स्हान्दो नोकरएनोन खसी ‘मालिक, डाइ हाडला म्हरला डबल रूमालरी झोर्सी थान्बा मुला, थे चुरी मुला। 21 हाड खरो म्हि भिंसी डादा था मुबासे लमा डादा लोड्बा खजी, हाडसे व्यापार आलबा ग्लारी नाफा म्हाड्मुला, ओच्छे तिगै आड्बवा ग्लारी बाली दुड्बारी म्हाड्मुला’ भिंसी भिजी। 22 थे शासन लबा म्हिसे थेदा ‘गे आखेल्बा नोकर! एला तामग्यामसेन डाइ ए गे आखेल्बा चीम भिंसी निसाफ लला। डाइ व्यापार आलबा ग्लारी नाफा म्हाड्मुला ओच्छे तिगै आड्बवा ग्लारी बाली दुड्बारी म्हाड्बा खरो म्हि भिंसी एदा थानोन चीम। 23 थेहड् भिसम एसे तिग डाइ पिन्बा डबल बैकरी आथान्नी? एसे बैकरी थान्बा हिन्सम डाइ दो:सी ब्याजदेन थे डबल किन्म्याड्सेला’ भिंसी भिजी। 24 ओच्छे थेसे थेरी राप्सी चिबागदेदा ‘दाहेन्से थेग्याम थे म्हरला डबल ब्यन्सी गोर च्युड् डबल मुबादा पिन्गो’ भिंसी भिजी। 25 जमाहेन्से थेनीगदेसे ‘मालिक, थेदेन छ्याम मी डाच्छालान गोर च्युड् डबल मुला’ भिंसी भिमा, 26 थे शासन लबा म्हिसे थेनीगदेदा ‘एनीगदेसे डाला ताम ड्यान्गो, तिग्दा भिसम जुन म्हिदेन छ्याम मुला थेदा अर्गुएनोन पिन्ना। तर जुन म्हिदेन छ्याम आरे थेदेन छ्याम मुबा जजाकीएनोन थेग्याम ब्यन्ना। 27 थेतबासेलमा डाइ शासन थालगै भिंसी म्हन्बा डाला शत्रुगदेदा चुरी भसी डाला डाच्छापट्टि साड्गो’ भिंसी कुल्जी।”

येशू यरूशलेमरी फेबान

मत्ती २१:१-११; मर्कूस ११:१-११; यूहन्ना १२:१२-१९

28 चुहड् सुड्जी जिन्माहेन्से येशू थेनीगदेला डाच्छा डाच्छा यरूशलेमपट्टि फेप्जी। 29 ओच्छे बेथफागेदेन बेथानिया नाम्साला डामला जैतून भिंसी गडरी धोखमाहेन्से येशूसे हाडला चेलागदे न्हडला न्हीदा पुड्जी। 30 पुड्बा धुडरी चुहड् भिंसी सुड्जी, “एनी जजाकी क्याथाडला नाम्सारी निउ। नाम्सारी धोमाहेन्से एनीगदेसे दान्देधोना खालै आक्रै:बा गधाला कोला गिक स्याप्ला। थेदा ब्लसी चुरी भसी खउ। 31 ब्लबारी छ्याड्मा खालैसे एनीदा ‘चुदा तिग्दा ब्लबा’ भिंसी ड्योड्जी भिसम, ‘चु प्रभुदा तो:बा मुला’ भिंसी भिउ।”

32 जमाहेन्से थे चेला न्ही नाम्सारी निजी। ओच्छे थेरी थेनीसे येशूसे सुड्बा ह्झोनो गधाला कोला स्याप्ली। 33 थेनीसे थे गधाला कोलादा ब्लबारी

† “म्हरला डबल गिक” भिंसी चा थे धुडरी ला सोमला तलब हिन्ना।

छ्याइमा थे गधाला धनीसे “एनीसे चु गधाला कोलादा तिगदा ब्लाबा?” भिसी इयोइजी।

³⁴ ओच्छे चेला न्हीसे “चु प्रभुदा तो:बा मुला” भिसी भिजी।

³⁵ जमाहेन्से थे चेला न्हीसे गधाला कोलादा येशू मुबा ग्लारी भसी हाडला घ तीसी येशूदा थेथोरी धन्छ्यापुइजी। ³⁶ येशू फेप्वारी छ्याइबा धुइरी म्हिगदेसेनोन ग्यामरी हाड हाडला घगदे तीजी।

³⁷ येशू यरूशलेम डामला जैतून भिबा गडला ग्युरोरी धोखमा येशूदेन छ्याम भ्रबा चेलागदेसे येशूसे लबा उदेकला गेगदे ढन्सी ताड्बान क्रिड्सी चुहइ भिसी परमेश्वरदा धन्व्याद पिन्बारी छ्याइजी,

³⁸ “परमप्रभुला मिनरी फेप्वबा ग्लेसे परमेश्वरग्याम मोलम याड्गै, स्वर्गरी शान्ति तगै।

ओच्छे स्वर्गरी धन्छ्याबा परमेश्वरदा मानदेन जयजयकार तगै।

³⁹ म्हिला हुल न्हडग्याम फरिसीगदेसे येशूदा “गुरु, हाडला चेलागदेदा कुटिसी चिउ भिसी बड्गो” भिसी भिजी।

⁴⁰ तर येशूसे थेनीगदेदा “डाला ताम इयान्गो, चुगदे कुटिसी चिजी भिसम युडबागदेन क्रिड्बारी छ्याइला” भिसी सुइजी।

यरूशलेम नाश तला भिबा था याड्सी येशू क्राबा

⁴¹ यरूशलेम डामरी धोमा येशूसे शहरदा हाडला डाच्छापट्टि म्राड्सी क्राबान चुहइ भिसी सुइजी, ⁴² “यरूशलेमला म्हिगदे, तिनी शान्तिला लागिरी तिग तो:ला भिसी था याड्बा हिन्सम तसेला, तर एनीगदेसे था आयाइनी! ⁴³ थेतबासेलमा दाहेन्से एनीगदेला शत्रुगदे ढिक्सी क्युसीन खसी एनीगदेदा गुडरी झाइला। ⁴⁴ ओच्छे थेनीगदेसे एनीगदेला शहरला पखाल फुप्सी एनीगदेला शहरदा नाश लला। जमाहेन्से एनीगदेला कोलागदेदा साइला। तिगदा भिसम परमेश्वरसे एनीगदेदा थाना लबा धुइदा एनीगदेसे डोआसेनी।”

येशू परमेश्वरला मन्दिररी फेप्व

मत्ती २१:१२-१७; मर्कूस ११:१५-१९; यूहन्ना २:१३-२२

⁴⁵ जमाहेन्से येशू परमेश्वरला मन्दिररी फेप्वी। ओच्छे परमेश्वरला मन्दिर न्हडरी चूडबागदेदा चुहइ भिसी सुड्बान ताप्पी, ⁴⁶ “च्यागो, परमेश्वरला बचनरी ‘डाला दिम प्रार्थना लबा दिम तला’ भिसी भिबा मुला। तर एनीगदेसे मी य्होगदे चिबा ग्ला स्होबा मुला।” †

⁴⁷ जमाहेन्से धिन धिननोन येशूसे परमेश्वरला मन्दिररी लोप्वारी छ्याइजी। थे धुइरी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे ओच्छे थे यहुल्साला नेतागदे ढिक्सी येशूदा साइबारी म्हाइमुबा। ⁴⁸ तर थेनीगदेसे तिगै निउ आयाइनी। तिगदा भिसम जम्मान म्हिगदेसे सेम लसी येशूला ताम इयान्मुबा।

येशूला अधिकारला बारेरी इयोइबा

मत्ती २१:२३-२७; मर्कूस ११:२७-३३

20 तिरुकुनु येशू परमेश्वरला मन्दिररी लोप्वान मुबा ओच्छे परमेश्वरला यहुल्साला समाचार थे:ना लबान मुबा। थेनोन धुइरी परमेश्वरला मन्दिररी पूजा लबा मुल म्हिगदेदेन यहूदी गन्बागदे ओच्छे यहूदी धर्मगुरुगदे येशू मुबा ग्लारी खजी। ² ओच्छे थेनीगदेसे येशूदा “हाडसे खानडग्याम अधिकार याड्सी चु गे लबा हिन्ना? हाडदा चु अधिकार खाल्से पिन्बा हिन्ना?” भिसी इयोइमा, ³ येशूसे थेनीगदेदा “डाइएनोन एनीगदेदा ताम गिक इयोइला, थे ताम डादा पाङ्गो। ⁴ यूहन्नासे पिन्बा बप्तिस्मा परमेश्वरग्याम हिन्ना कि म्हिग्याम हिन्ना?” भिसी इयोइजी। ⁵ जमाहेन्से थेनीगदे हाड हाड न्हडरी ताम लबारी छ्याइजी, “परमेश्वरग्याम भिजी भिसम थेसे य्हाडदा ‘थेहइ भिसम एनीगदेसे तिगदा यूहन्नादा विश्वास आलबा?’ भिसी भिला। ⁶ तर म्हिगदेग्याम भिजी भिसम म्हिगदेसे य्हाडदा बिरोध लला। तिगदा भिसम थेनीगदेसे यूहन्नादा अगमवक्ता भिसी विश्वास

† 19:46 यशै ५६:७; यर्मि ७:११

लबा मुबा।” ⁷ थेतबासेलमा थेनीगदेसे येशूदा “खाइ, थेसे चु अधिकार खानडग्याम याड्जी इन्दा था आरे” भिसी भिमा, ⁸ येशूसे थेनीगदेदा “थेहइ भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाड्” भिसी सुइजी।

अधियाँ स्होबा म्हिगदेला उखान

मत्ती २१:३३-४६; मर्कूस १२:१-१२

⁹ जमाहेन्से येशूसे म्हिगदेदा उखान गिक सुइजी, “म्हि गिकसे वारीरी अडगुर सूसी अधियाँरी पिन्सी थे ल्हानान धिनना लागिरी अर्गु यहुल्सारी निजी। ¹⁰ अडगुर मिन्बा धुइ तमाहेन्से थे प्युकपो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुइजी। तर थे अधियाँ लबागदेसे थेदा तोबा ग्याड्बा लसी तिगै आपिन्ना पुइजी। ¹¹ थे वारीला धनीसे स्थान्दो नोकर गिकदा पुइजी। थेदाएनोन थे अधियाँ लबागदेसे तोसी बेइज्जत लसी थान्थान पुइखजी। ¹² थेहइ लसीन थेसे दो:सी स्थान्दो नोकरदाएनोन पुइजी थेदाएनोन थे अधियाँ लबागदेसे सिबाधोनान तोसी ते:जी।

¹³ “जमाहेन्से थे वारीला धनीसे ‘दाहेन्से डाइ तिग लसे? डाइ माया लबा डाला झादान पुइतो:जी। डाला झादा मी थेनीगदेसे मान लला वा?’ भिसी पुइजी। ¹⁴ तर थेदा म्राड्सी अधियाँ लबागदेसे ‘चु मी य्हाडला धनीला झा हिन्ना, य्हाडसे थेदा साइगे। जमाहेन्से थेला सम्पत्ति य्हाडलान तला’ भिसी हाड हाड न्हडरी ताम लजी। ¹⁵ जमाहेन्से थेनीगदेसे थेदा अडगुर वारीग्याम मडग्यार भोसी साइजी।”

चुहइ सुइसी जिन्माहेन्से येशूसे थेनीगदेदा “दाहेन्से थे वारीला धनीसे थेनीगदेदा तिग लला तला? ¹⁶ थे खसी अधियाँ लबा म्हिगदेदा साइला ओच्छे थे अडगुरला वारी स्थान्दोगदेदा स्होबारी पिन्ना।” भिसी सुइजी। चु थे:सी म्हिगदेसे “चुहइबाम खाइमै थातगै” भिसी भिजी। ¹⁷ ओच्छे येशूसे थेनीगदेला लीरी स्हीसी चुहइ भिसी सुइजी, “थेहइ भिसम परमेश्वरला बचनरी

‘जुन युडबादा दिम स्होबा कर्मीगदेसे गे आखेल भिसी भ्याड्बा मुबा थेनोन युडबा दिमला सुर युडबा दोजी’

भिसी भिबा चु तामला अर्थ तिग हिन्ना? ††

¹⁸ थे युडबाथोरी ताइबागदे जम्मान छारछिर निला, ओच्छे थे युडबा खालैथोरी ताइजी भिसम थेरी मुबा म्हि फ्लातफलेत निला।”

तिरो फातो:बा कि फाआतो:बा भिसी येशूदा इयोइबा

मत्ती २२:१५-२२; मर्कूस १२:१३-१७

¹⁹ जमाहेन्से यहूदी धर्मगुरुगदेदेन परमेश्वरला मन्दिररी पूजा लबा मुल म्हिगदेसे थे धुइरी येशूदा चुड्बारी म्हाइजी। तिगदा भिसम चु उखान येशूसे थेनीगदेदान बिरोधरी सुड्बा हिन्ना भिबा ताम थेनीगदेदा था मुबा। तर थेनीगदे म्हिगदे म्राड्सी लोङ्गुबा। ²⁰ थेतबासेलमा थेनीगदेसे येशूदा चुड्बारी दाउ च्याजी। थेनीगदेसे येशूदा तामग्याम फसब लसी रोमी अञ्चलाधीशला यारी जिम्मा पिन्बारी म्हाइमुबा। थेतबासेलमा हाडसे हाडदान डा ज्यबा म्हि हिन्ना भिसी भ्रबा म्हिगदेदा थेनीगदेसे येशू मुबा ग्लारी पुइजी। ²¹ थे म्हिगदे येशू मुबा ग्लारी निसी, “गुरु, हाडसे लोप्व ताम ठीक हिन्ना। हाडसे खालैला ली स्हीसी गे आलमुला, ओच्छे हाडसे परमेश्वरला सत्य ग्याम उन्मुला भिसी इन्दा था मुला। ²² थेतबासेलमा इन्से रोमी ग्याल्बो कैसरदा तिरो फाबा य्हाडला ठिम अन्छार ठीक हिन्ना कि आहिन?” भिसी इयोइजी।

²³ तर येशूसे थेनीगदेला पापी सेम था याड्सी येशूसे थेनीगदेदा “डादा डबल गिक भउ। चु डबलरी मुबा छापदेन मिन खाल्ला हिन्ना?” भिसी सुइजा, थेनीगदेसे “रोमी ग्याल्बो कैसरला” भिसी जोहाब पिन्जी। ²⁵ जमाहेन्से येशूसे थेनीगदेदा “थेहइ भिसम रोमी ग्याल्बो कैसरला जति कैसरदा पिन्गो, परमेश्वरला जति परमेश्वरदा पिन्गो” भिसी सुइजी। ²⁶ थेनीगदेसे म्हिला

†† 20:17 भजन ११८:२२

ओन्हाडरी येशूदा खजिबै तामग्याम फसब लसी चुडबारी आखम्नी। ओच्छे येशूसे सुडबा तामरी थेनीगदे उदेक म्हन्सी कुटिसी चिजी।

सिबाग्याम सोना लबाला बारेरी इयोइबा
मत्ती २२:२३-३३; मर्कूस १२:१८-२७

27 जमाहेन्से सिबाग्याम दोःसी आसो भिसी विश्वास लबा कोड कोड सदुकीगदे येशू मुबा ग्लारी खजी। 28 ओच्छे थेनीगदेसे येशूदा चुहड् भिसी इयोइजी, “गुरु, मोशासे य्हाडदा पिन्बा ठिम अन्धार खालेला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतोःला भिसी भिबा मुला। 29 ग्ला गिकरी ज्योज्यो आले निस मुबा। थेबासे ब्याह लजी, तर कोलागदे आतनान थे सिजी। 30 थेहड् लसीन पाराडसे चाडदा ब्याह लजी, थेएनोन कोलागदे आतनान सिजी। 31 जमाहेन्से साँजीसे चाडदा ब्याह लजी, थेएनोन कोलागदे आतनान सिजी। थेहड् लसी जम्मासेन पालोन पालो चाडदा ब्याह लजी। तर जम्मान कोलागदे आतनान सिजी। 32 ओच्छे थे म्रिडम्हेमेएनोन सिजी। 33 थेतबासेलमा इन्दा सुड्, सिबाग्याम सोना लजी भिसम थे म्रिडम्हेमे खजिबाला म्रिड तला? तिगदा भिसम थेनीगदे जम्मासेन थे म्रिडम्हेमेदेन छ्याम ब्याह लबा मुला।”

34 जमाहेन्से येशूसे थेनीगदेदा चुहड् भिसी सुड्जी, “दान्दला म्हिगदेसे ब्याह लला, ओच्छे ब्याहएनोन लसी पिन्ना। 35 तर स्वर्गरी निम्याड्सेला म्हिगदे सिबाग्याम सोना लबा धुडरी ब्याह लसी आपिन ब्याहएनोन आल। 36 ओच्छे थेनीगदे खाड्मै आसि तिगदा भिसम थेनीगदे स्वर्गदूतगदे हड्बान तला। ओच्छे सिबाग्याम सोना लबाला सन्तान तबासे लमा थेनीगदे परमेश्वरला सन्तान हिन्ना। 37 परमप्रभुसे लुड्बा झाड्ग्याम मोशादा ‘डा अब्राहामला परमेश्वर, इसहाकला परमेश्वर ओच्छे याकूबला परमेश्वर हिन्ना’ भिसी सुड्बा ताम मोशासे भिबा मुला। चु तामग्यामसेन सिबाग्याम सोना लमुला भिसी उन्बा मुला। 38 परमेश्वर सिबागदेला परमेश्वर आहिन, तर सोबागदेला परमेश्वर हिन्ना! थेतबासेलमा परमेश्वरला लागिरी जम्मान सोबा मुला।”

39 जमाहेन्से कोड कोड यहूदी धर्मगुरुगदेसे “गुरु, हाडसे सुड्बा ताम ठीक हिन्ना” भिसी भिजी। 40 जमाहेन्से खालैसेन येशूदा तिगै ताम इयोइबारी आँट आलनी।

येशू खाल हिन्ना
मत्ती २२:४१-४६; मर्कूस १२:३५-३७

41 जमाहेन्से येशूसे थेनीगदेदा चुहड् भिसी सुड्जी, “म्हिगदेसे खाहड् लसी थार्बा पिन्बा ख्रीष्टदा दाऊद ग्लेला सन्तान भिसी भिबा? 42 तिगदा भिसम दाऊद हाडसेन भिबा व्हाइला किताबरी चुहड् भिसी भिबा मुला, ‘परमप्रभुसे डाला प्रभुदा डाइ एला शत्रुगदेदा एला काड धिरी आथान्तेधोना

ए डाला दाहिने यापट्टि चिउ भिसी सुड्जी।’ ††
44 दाऊद ग्लेसेन ख्रीष्टदा प्रभु भिला भिसम खाहड् लसी ख्रीष्ट दाऊद ग्लेला सन्तान तला?”

यहूदी धर्मगुरुगदे म्राड्सी होशियार ततोःबा
मत्ती २३:१-३६; मर्कूस १२:३८-४०

45 ओच्छे जम्मान म्हिगदेसे इयान्बान लबा धुडरी येशूसे हाडला चेलागदेदा चुहड् भिसी सुड्जी, 46 “एनीगदे यहूदी धर्मगुरुगदे म्राड्सी होशियार तसी चिउ। तिगदा भिसम थेनीगदे ज्यबा ज्यबा क्वान क्वान्सी कोबारी निमुला, ओच्छे बजाररीक्यार निमा म्हिगदेसे मान लगै भिसी सेम लमुला। थेहड् लसीन यहूदीगदे हुप तबा दिमदेन भोज चबा ग्लारीनोन मुल ठिरी चिबारी सेम लमुला। 47 थेहड् लसी थेनीगदेसे हेम्बो सिबा म्रिडम्हेमेगदेला दिमनाम ब्यन्मुला ओच्छे म्हिगदेदा उन्बाला लागिरी हेड्बा हेड्बा प्रार्थना लमुला। थेहड्बा म्हिगदेसे ल्हानान सजाय याड्ला।”

हेम्बो सिबा म्रिडम्हेमेसे पिन्बा भेटी
मर्कूस १२:४१-४४

21 येशूसे परमेश्वरला मन्दिररी फ्युकपो म्हिगदेसे भेटी युबा ताडरी भेटी युबान लबा म्राड्जी। 2 ओच्छे हेम्बो सिबा प्राडबो म्रिडम्हेमेसेनोन डबल न्ही युबा म्राड्जी। 3 चु म्राड्सी येशूसे, “च्यागो, डाला ताम इयान्नो। स्थान्दो म्हिगदेसे भन्दा चु हेम्बो सिबा प्राडबो म्रिडम्हेमेसे ल्हानान भेटी युबा मुला। 4 तिगदा भिसम स्थान्दो म्हिगदेसे हाडदेन छ्याम मुबा ल्हानान सम्पत्तिग्याम युजी, तर चु हेम्बो सिबा म्रिडम्हेमे प्राडबो तसीनोन हाडदेन छ्याम मुबा जति जम्मान युजी” भिसी सुड्जी।

परमेश्वरला मन्दिर नाश तला
मत्ती २४:१-२; मर्कूस १३:१-२

5 तिरैकुनु चेलागदेसे, “ज्यबा ज्यबा युडबादेन म्हिगदेसे फुल्बा भेटीगदेग्याम जेना लसी स्होबा चु परमेश्वरला मन्दिर गाते जेबा!” भिसी ताम लबान मुबा। तर येशूसे थेनीगदेदा, 6 “तिरैकुनु चुहड्बा धुड्एनोन खाल, थे धुडरी दान्दे म्राड्बा चु मन्दिरला युडबा गिकनोन बाकी आचिना जम्मान फुप्ला” भिसी सुड्जी।

जम्बुलिड नाश तबा धुडला चिनुगदे
मत्ती २४:३-१४; मर्कूस १३:३-१३

7 ओच्छे थेनीगदेसे, “गुरु, चु तामगदे खाड्मा तला? चुहड् तबारी छ्याइजी भिसी खाहड्बा चिनु म्राड्ला?” भिसी इयोइमा, 8 येशूसे थेनीगदेदा चुहड् भिसी सुड्जी, “एनीगदे होशियार तसी चिउ, खालैसे एनीगदेदा झुक्याब थालगै। तिगदा भिसम डाला मिन किन्सी ‘डानोन थार्बा पिन्बा ख्रीष्ट हिन्ना’ भिसी ल्हानान म्हिगदे खला। ओच्छे ‘धुड् खसी जिन्बा मुला’ भिसी भिला, तर एनीगदेसे थेनीगदेला ताम थाड्यान्गो। 9 ओच्छे लडाइ तजी भिबा ताम थेःसी एनीगदे आत्तेब थातउ, तिगदा भिसम चु जम्बुलिड नाश तबा भन्दा डाच्छा चु तनोन तोःला। तर थेनोन धुडरी चु जम्बुलिड नाश आता।” 10 जमाहेन्से येशूसे थेनीगदेदा दोःसी चुहड् भिसी सुड्जी, “म्हि य्हुलला बिरोधरी म्हि य्हुलनोन ओच्छे य्हुल्साला बिरोधरी य्हुल्सा रेःला। 11 ओच्छे ग्रेन ग्रेन सड्गुल खला, जम्मान ग्लारी अनिकालदेन देसान खला। मुरी ग्रेन ग्रेन लोड्बा खबा चिनुगदे म्राड्ला।

12 “तर चु तबा भन्दा डाच्छा म्हिगदेसे एनीगदेदा चुड्सी दुख पिन्ना। ओच्छे यहूदीगदे हुप तबा दिमरी जिम्मा लसी एनीगदेदा इयाल्खानरी झाड्ला। ओच्छे एनीगदेसे डादा विश्वास लबासे लमा ग्लेदेन अञ्चलाधीशगदेला डाच्छापट्टि भोर्ला। 13 थे धुडरी एनीगदेसे डाला बारेरी पाड्बा मौका याड्ला। 14 तर एनीगदेसे हाडदा जोगब लबारी तिग पाड्तोःबा भिसी धन्दा सुर्दा थालउ। 15 तिगदा भिसम थे धुडरी एनीगदेसे तिग ताम पाड्तोःबा थे ताम पाड्बारी डाइ एनीगदेदा ज्ञान बुद्धि पिन्ना। जमाहेन्से थेनीगदेसे एनीगदेला ताम थाबारी आखम ओच्छे एनीगदेसे पाड्बा तामला जोहाबएनोन पिन्बारी आखम। 16 तर एनीगदेदा हाडलान आबा आमा, ज्योज्यो आले ओच्छे हाडला म्हिगदेदेन ह्योगदेसेनोन चुड्सी पिन्ना। ओच्छे एनीगदे न्हडला कोड कोड्दा मी म्हिगदेसे साड्पुड्ला। 17 थेहड् लसीन डादा विश्वास लबासे लमा एनीगदेदा जम्मान म्हिगदेसे हेला लला। 18 तर एनीगदेला थोबोला क्रा गिक सुत्तै आताइ। 19 जस्तोन दुख तसैनोन एनीगदेसे सेमहेन्सेन विश्वास लसी चिबासे लमा जुकजुकधोनाला जुनी याड्ला।

येशूसे यरूशलेम नाश तला भिसी सुड्बा
मत्ती २४:१५-२१; मर्कूस १३:३४-३९

20 “यरूशलेम शहरदा सिपाहीगदेसे घेरब लबा म्राड्बाहेन्से शहर नाश तबा धुड् खसी जिन्जी भिसी एनीगदेसे घोउ। 21 थे धुडरी यहूदिया अञ्चलरी मुबागदे गडरीक्यार यार्गै, शहर न्हडरी मुबागदेसे शहर खलागै ओच्छे नाम्सारि मुबागदे शहररी थाखगै। 22 तिगदा भिसम थे धिन चा परमेश्वरग्याम

सजाय याड्बा धिन हिन्ना। ओच्छे परमेश्वरला बचनरी भ्रिबा जम्मान ताम पूरा तनोन तला। ^{†23} थे धुइरी जिउ न्हीला म्रिडम्हेमेदेन कोलादा इहे ख्वाबा आमागदेदा झन गाते ल्हानान दुख तला! ओच्छे यहुल्सा नाडनोन ल्हानान दुख तला। चु यहुलला म्हिगदेदा परमेश्वरसे ल्हानान सजाय पिन्ना। ²⁴ थे धुइरी कोड कोड म्हिगदेदा तरवारसे ताम्सी साइला, कोड कोडदा चुइसी यहुल्सा यहुल्सारी भोर्ला। ओच्छे अर्गु यहुलला म्हिगदेला धुइ आजिन्तेधोना थेनीगदेसे यरूशलेमरी रजाई लला।

येशू दोःसी फेप्खबा धुइ

मत्ती २४:२९-३१; मर्कूस १३:२४-२७

²⁵ “लनी धिनीदेन सारगदेरी खाइमै आम्नाड्बा चिनुगदे म्राड्ला। ओच्छे समुन्द्र घुबदिन समुन्द्रला छालसे लमा जम्बुलिडला जम्मान म्हिगदे लोड्सी आतेब तला। ^{†26} जम्बुलिडरी तबारी छ्याइबा दुखला बारेरी था याइसी म्हिगदे लोड्सी सिबा तेबान तला। तिग्दा भिसम मुरी मुबा जम्मान शक्ति याड्योड तला। ²⁷ जमाहेन्से परमेश्वरसे पुइखबा म्हिदा ग्रेन शक्तिदेन य्हाल य्हालरी खसुरी खबान लबा म्राड्ला। ^{†28} थेह्ण्ड तमाहेन्से आलोड्ना एनीगदेसे स्वर्गपट्टि च्यागो, तिग्दा भिसम एनीगदेदा योनान थार्ना लला।”

अज्जीरला दोड च्यासी लोप्टोःबा ताम

मत्ती २४:३२-३५; मर्कूस १३:२८-३१

²⁹ जमाहेन्से येशूसे थेनीगदेदा उखानग्याम चुह्ण्ड भिसी सुइजी, “एनीगदेसे अज्जीर दोडदेन अर्गु दोडगदे, ³⁰ भुबा म्राड्नाहेन्से दाहेन्से छेप्बा छबा ला खबारी छ्याइजी भिसी था याड्जुला। ³¹ थेह्ण्ड लसीन डाइ पाड्बा ताम तबान लबा म्राड्नाहेन्से एनीगदेसे परमेश्वरला यहुल्सा खबा धुइ तबारी छ्याइजी भिसी था याड्जो।

³² “च्यागो, एनीगदेसे डाला ताम इयान्गो, चु जम्मान ताम पूरा आततेधोना दान्देला म्हिगदे आसि। ³³ मुदेन जम्बुलिड म्हासी निसैनोन डाला बचन खाइमै आम्हा।”

येशूसे छोर्सी चिउ भिसी लोप्बा

³⁴ “तर एनीगदे होशियार तसी चिउ, आहिन्सम मोजमजा लसी इय्हीड्सी भ्रबादेन हाडला ल्हुइला धन्दा सुर्दासे लमा एनीगदेला सेम न्होड्ला। ओच्छे परमेश्वरसे पुइखबा म्हि खमा एनीगदे तिव्खुरीन पासोरी परब तबा ह्ण्ड तला। ³⁵ थेह्ण्ड लसीन जम्बुलिडरी चिबा जम्मान म्हिगदेथोरी थे धिन खला। ³⁶ थेतबासेलमा एनीगदे ‘थे लोड्बा खबा धुइरी जोगब तबारीदेन परमेश्वरसे पुइखबा म्हिला डाच्छा राप्बारी खमौ भिसी प्रार्थना लसी छोर्सी चिउ’ भिसी सुइजी।”

³⁷ थे धुइरी येशूसे धिनीरी म्हिगदेदा परमेश्वरला मन्दिररी लोप्मुबा, ओच्छे म्हुन तमाहेन्से जैतून भिबा गडरी बास स्हूबारी फेप्मुबा। ^{†38} येशूला बचन इयान्बाला लागिरी म्हिगदे स्थोरीन परमेश्वरला मन्दिररी खमुबा।

येशूदा साइबारी सल्लाह लबा

मत्ती २६:१-५, १४-१६; मर्कूस १४:१-२, १०-११

22 मिश्र यहुल्साग्याम फेसी खबा धिनदा ढन्सी खमीर आयुना गेड चसी धड्बा चाड खबारी छ्याइमुबा। ² थे धुइरी परमेश्वरला मन्दिररी पूजा लबा मुल म्हिदेन यहूदी धर्मगुरुगदेसे येशूदा खाह्ण्ड लसी साइबा भिसी दाउ च्यासी भ्रमुबा। तर थेनीगदे म्हिगदेदेन छ्याम लोड्बा। ³ थे धुइरी च्युक न्ही चेलागदे न्हडला यहूदा इस्करियोत भिबा चेलाला सेम न्हडरी शैतान वाड्जी। ⁴ जमाहेन्से यहूदा इस्करियोत परमेश्वरला मन्दिररी पूजा लबा मुल म्हिदेन मन्दिरला सिपाहीगदेला हाकिम मुबा ग्लारी निसी येशूदा चुइसी थेनीगदेला यारी जिम्मा लसी पिन्ना भिसी सल्लाह लजी। ⁵ जमाहेन्से थेनीगदे ताड्सी यहूदा इस्करियोतदा टाडगा पिन्ना भिसी कबुल लजी।

⁶ जमाहेन्से यहूदा इस्करियोतसे तला, भिसी म्हिला हुल आरेबा धुइरी येशूदा चुइसी पिन्बारी दाउ च्यासी भ्रजी।

येशूसे भोज तयार लउ भिसी कुल्बा

मत्ती २६:१७-२५; मर्कूस १४:१२-२१; यूहन्ना १३:२१-३०

⁷ मिश्र यहुल्साग्याम फेसी खबा धिनदा ढन्सी धड्बा चाड खसी जिन्बा मुबा। थे चाडकुनु ग्यु बोगो बलि पिन्तोःबा मुबा। ⁸ थे धुइरी येशूसे पत्रुसदेन यूहन्नादा “एनीगदे निसी य्हाडला लागिरी चाडला भोज तयार लउ” भिसी कुल्जी।

⁹ जमाहेन्से थेनीगदेसे “डन्से भोज खानड तयार लउ” भिसी येशूदा इयोइमा, ¹⁰ येशूसे थेनीगदेदा “एनीगदे शहररी धोमैछ्याम दर्बुडरी क्युइ पुइसी निबान लबा म्हि गिकदा स्याप्ला, एनीगदे थे म्हिला लिच्छा लिच्छा निउ। ¹¹ ओच्छे थे म्हि जुन दिमरी वाड्ला थे दिमला धनीदा ‘डाइ डाला चेलागदेदेन छ्याम चिसी मिश्र यहुल्साग्याम फेसी खबा धिनदा ढन्सी धड्बा चाडला भोज चबा कोठा खानड मुला? भिसी डन्ना गुरुसे इयोइबा मुला’ भिसी भिउ। ¹² जमाहेन्से एनीगदेदा थेसे डाच्छान जेना लसी थान्बा तलाथोला ग्रेन कोठा उन्सी पिन्ना। एनीगदेसे थेरीन य्हाडला लागिरी भोज तयार लउ” भिसी कुल्जी।

¹³ जमाहेन्से थेनीगदे निजी ओच्छे येशूसे सुइबा ह्ण्डनोन स्याप्जी। ओच्छे थेनीगदेसे थे मिश्र यहुल्साग्याम फेसी खबा धिनदा ढन्सी धड्बा चाडला भोज तयार लजी।

प्रभु भोज

मत्ती २६:२६-३०; मर्कूस १४:२२-२६; १ कोरिन्थी ११:२३-२५

¹⁴ चबा धुइ तमाहेन्से येशू हाडला मुल चेलागदेदेन छ्याम सोल छ्योइबारी धन्छ्याजी। ¹⁵ जमाहेन्से येशूसे थेनीगदेदा “डाइ दुख नाबा भन्दा डाच्छा एनीगदेदेन छ्याम चिसी चु चाडला भोज चबा सेम ल्हानान मुबा।

¹⁶ थेतबासेलमा एनीगदेसे डाला ताम इयान्गो, परमेश्वरला यहुल्सारी चु भोजला अर्थ पूरा आततेधोना डाइ चु भोज दोःसी आच” भिसी सुइजी। ¹⁷ जमाहेन्से येशूसे खोरे यारी थोसी परमेश्वरदा धन्यवाद पिन्माहेन्से “ना, चु एनीगदे जम्मासेन भो लसी थुड्जो। ¹⁸ एनीगदेसे डाला ताम इयान्गो, तिग्दा भिसम परमेश्वरला यहुल्सा आखतेधोना डाइ अडगुरला निडगु आथुड्” भिसी सुइजी। ¹⁹ जमाहेन्से येशूसे यारी गेड थोसी परमेश्वरदा धन्यवाद पिन्माहेन्से गेड क्युइसी चेलागदेदा पिन्बान, “चु एनीगदेला लागिरी पिन्बा डाला ल्हुइ हिन्ना। दाहेन्से डादा ढन्सी चिबाला लागिरी एनीगदेसे चुह्ण्डनोन लउ” भिसी सुइजी। ²⁰ थेह्ण्ड लसीन गेड चसी जिन्माहेन्से येशूसे खोरे थोसी चेलागदेदा चुह्ण्ड भिसी सुइजी, “चु खोरेरी मुबा अडगुरला निडगु डाला काग्याम स्होबा छार कबुल हिन्ना। चु डाला का एनीगदेला लागिरी बगब तबा मुला। ²¹ “तर च्यागो, डादा चुइसी पिन्बा म्हि डादेन छ्यामनोन चिसी चबान मुला। ²² परमेश्वरसे पुइखबा म्हि मी परमेश्वरसे सुइबा अन्धार निनोन तोःला। तर परमेश्वरसे पुइखबा म्हिदा चुइसी पिन्बा म्हिसे चा परमेश्वरग्याम सजाय याड्ला।” ²³ चु ताम थेःसी चेलागदे हाड हाड न्हडरी चुह्ण्डबा गे लबा म्हि खाल मुला तला? भिसी ताम लजी।

खाल ग्रेन खाल जजा

²⁴ जमाहेन्से चेलागदे हाड हाड न्हडरी खाल ग्रेन भिसी ताम लबारी छ्याइजी। ²⁵ चु ताम था याड्सी येशूसे थेनीगदेदा चुह्ण्ड भिसी सुइजी, “चु जम्बुलिडला ग्लेगदेदेन ग्रेन ग्रेन म्हिगदेसे म्हिगदेथोरी शासन लमुला। ओच्छे म्हिगदेसे थेनीगदेन डन्दा दया लबा ज्यबा म्हि हिन्ना भिसी भिमुला। ²⁶ तर एनीगदे चा थेह्ण्ड तबारी आत। ओच्छे एनीगदे न्हडरी जुन ग्रेन मुला थे जजा दोगै ओच्छे नेता दोबासे चा स्हान्दोगदेला सेवा लगै। ²⁷ तिग्दा भिसम चबारी चिबा मालिकदेन चबा पिन्बा नोकररी खजिबा चा ग्रेन हिन्ना? तिग चबारी चिबा मालिक ग्रेन आहिन? हिन्ना। तर डा एनीगदेला ओन्हाडरी चबा पिन्बा नोकर ह्ण्डबान मुला। ²⁸ एनीगदे चा डादा दुख तमा हो लबागदे हिन्ना। ²⁹ थेतबासेलमा डाला आबासे डादा यहुल्सा गिकला अधिकार पिन्बा ह्ण्ड

† 21:22 होशे १:७ †† 21:25 यशै १३:१०; इज ३२:७; योए २:३१; उन्बा ६:१२-१३ † 21:27 दानि ७:१३; उन्बा १:७ †† 21:37 लूका ११:४७

लसी डाइएनोन एनीगदेदा थे खुल्साला अधिकार पिन्ना।³⁰ जमाहेन्से एनीगदेसे डाला खुल्सारी टेबुल गिकरीन चबा थुड्बा लला। ओच्छे इस्राएलला च्युक न्ही वंशला निसाफ लसी ठिरी चिला।”

पत्रुससे येशूदा खलाला भिसी पाड्बा ताम
मत्ती २६:३१-३५; मर्कूस १४:२७-३१; यूहन्ना १३:३६-३८

³¹ जमाहेन्से येशूसे पत्रुसदा “सिमोन, सिमोन, शैतानसे एदा ग्वा य्हाप्बा ह्ण्ड लसी य्हाप्बारी छ्याइबा मुला।³² तर एला विश्वास याडयोड थातौ भिसी डाइ एला लागिरी प्रार्थना लजी। ए दोःसी डाडेन छ्याम खमाहेन्से एसे आलेगदेदा विश्वासरी कोड्ना लउ।

³³ जमाहेन्से पत्रुससे येशूदा “प्रभु, डा ह्ण्डदेन छ्याम इयाल्खानरी चितोःसै ह्ण्डदेन छ्याम सितोःसै सिबारी तयार मुला” भिसी भिजी।

³⁴ तर येशूसे पत्रुसदा “पत्रुस, डाला ताम इयान्गो, न्हडगर स्थोरी नागा क्राबा भन्दा डाच्छा एसे डादा डोसेबान आरे भिसी सोमरेमधोना पाड्ला” भिसी सुड्जी।

खबारी छ्याइबा दुखला लागिरी होशियार तउ

³⁵ येशूसे थेनीगदेदा “डाइ एनीगदेदा टाडगा, झोला, लखम आभोर्ना निउ भिसी पुड्मुबा। थे धुडरी एनीगदेदा तिगै स्हेला खॉचो तजी? भिसी इयोइमा, थेनीगदेसे “आतनी” भिसी भिजी।

³⁶ जमाहेन्से येशूसे थेनीगदेदा चुह्ण्ड भिसी सुड्जी, “तर दाहेन्से टाडगा मुबासे टाडगा थोगो, झोला मुबासे झोला थोगो, ओच्छे जुन म्हिदेन छ्याम तरवार आरे थेसे ह्ण्डला क्वान चूड्सी भिसै तरवार गिक ग्लुउ।³⁷ एनीगदेसे डाला ताम इयान्गो, तिगदा भिसम परमेश्वरला बचनरी ‘थेदा अपराधीगदेदा ह्ण्डेनोन लला भिसी भिबा ताम डायाम पूरा तनोन तोःला’ तिगदा भिसम डाला बारेरी भिबा ताम पूरा तबान मुला।”³⁸ जमाहेन्से येशूदा चेलागदेसे “प्रभु, चुरी तरवार न्ही मुला” भिसी भिमा, येशूसे थेनीगदेदा “तजी” भिसी सुड्जी।

येशूसे लबा प्रार्थना

मत्ती २६:३६-४६; मर्कूस १४:३२-४२

³⁹ येशू सदला ह्ण्डेनोन थे ग्लायाम थोन्सी जैतून भिबा गडरी फेप्जी। ओच्छे थेला चेलागदेएनोन लिच्छा लिच्छा निजी।⁴⁰ थे ग्लारी धोमाहेन्से येशूसे थेनीगदेदा “एनीगदे फसब आतबाला लागिरी प्रार्थना लसी चिउ” भिसी सुड्जी।⁴¹ ओच्छे येशू थेनीगदेग्याम जजाकी क्याथाड फेप्सी पुड् जूसी चुह्ण्ड भिसी प्रार्थना लबारी छ्याइजी।⁴² “आबा, तसम डादा चु दुखग्याम फेसी पिन्गो। तर डाइ म्हन्बा अन्छार आहिन, ह्ण्डसे म्हन्बा अन्छार पूरा तौ।”⁴³ जमाहेन्से स्वर्ग्याम स्वर्गदूत गिक खसी येशूदा दुख नाखम्बा भड पिन्जी।⁴⁴ थे धुडरी येशूदा ल्हानान दुख तबासे लमा थेसे झन प्रार्थना लजी। थे धुडरी थेला टू काला धारा ह्ण्ड लसी सरी ताइबान मुबा।

⁴⁵ प्रार्थना लसी ह्ण्डला चेलागदे मुबा ग्लारी फेप्खमा येशूसे थेनीगदे दुखसे लमा लारकलुरूक तसी म्हेसी चिबा स्याप्जी।⁴⁶ जमाहेन्से येशूसे थेनीगदेदा “तिगदा एनीगदे म्हेसी चिबा? रेःगो, पापरी फसब आतबाला लागिरी एनीगदेसे प्रार्थना लउ” भिसी सुड्जी।

येशूदा चुड्बा

मत्ती २६:४७-५६; मर्कूस १४:४३-५०; यूहन्ना १८:३-११

⁴⁷ येशूसे चु ताम सुड्बान लबा धुडरी थेरी म्हिला हुल गिक खजी। थे म्हिला हुलला डाच्छा डाच्छा च्युक न्ही चेलागदे न्हडला यहुदा भिबा चेला खजी। येशूदा च्योक लबाला लागिरी थे येशूला डामरी खजी।⁴⁸ तर येशूसे थेदा “यहुदा, तिग एसे परमेश्वरसे पुड्खबा म्हिदा च्योक लसी फसब लबारी म्हाइबा?” भिसी सुड्जी।

⁴⁹ जमाहेन्से येशूला डामरी मुबा चेलागदेसे थेरी तबारी छ्याइबा ताम था याड्सी येशूदा “प्रभु, डन्से तरवार चलब लउ?” भिसी,⁵⁰ थेनीगदे न्हडला

गिकसे परमेश्वरला मन्दिररी पूजा लबा मुल म्हिला नोकरदा ताम्मा थेला दाहिनेपट्टिला नाब्यड च्वाट्टन थाजी।⁵¹ तर येशूसे “तजी थालउ” भिसी थेला नाब्यडरी थुर्सी खम्ना लजी।

⁵² जमाहेन्से येशूसे ह्ण्डा चुड्बारी खबा परमेश्वरला मन्दिररी पूजा लबा मुल म्हिगदेदेन मन्दिरला सिपाहीगदेला हाकिमगदेदा ओच्छे यहुदी गन्बागदेदा “एनीगदे य्होदा चुड्बारी खबा ह्ण्ड लसी तिगदा कडीदेन तरवार थोसी खबा? ⁵³ डा धिन धिननोन एनीगदेदेन छ्यामनोन परमेश्वरला मन्दिररी मुबा। थे धुडरी एनीगदेसे डादा आचुड्नी। तर दाहेन्से एनीगदेला गे लबा धुड् खबा मुला ओच्छे चु धोपधोपसे शासन लबा धुड् हिन्ना” भिसी सुड्जी।

पत्रुससे येशूदा डोसेबा आरे भिसी पाड्बा

मत्ती २६:५७-५८, ६९-७५; मर्कूस १४:५३-५४, ६६-७२; यूहन्ना १८:१३-१८, २५-२७

⁵⁴ जमाहेन्से थेनीगदेसे येशूदा चुड्सी परमेश्वरला मन्दिररी पूजा लबा मुल म्हिला दिमरी भोजी। पत्रुसएनोन थारेडग्यामसेन येशूला लिच्छा लिच्छा निजी।⁵⁵ थेरी म्हिगदे ख्राडगाला गुडरी मे फुड्सी दूबान मुबा। ओच्छे पत्रुसएनोन थेरी खसी थेनीगदेदेन छ्यामनोन चिजी।⁵⁶ थेनोन धुडरी नोकरस्या गिकसे पत्रुसदा मे दूसी चिबा म्ण्ड्सी थेदा “चु म्हिएनोन येशूदेन छ्यामनोन मुबा” भिसी भिमा,⁵⁷ पत्रुससे थे नोकरस्यादा “माइ, डाइ थेदा डोसेबा आरे” भिसी भिजी।

⁵⁸ ओच्छे छिन्ड लिच्छा स्थान्दो म्हि गिकसे पत्रुसदा म्ण्ड्सी, “एएनोन थेनीगदेला ह्ण्ड हिन्ना” भिसी भिमा, पत्रुससे “डा आहिन” भिसी जोहाब पिन्जी।

⁵⁹ ओस्पन घण्टा गिक लिच्छा स्थान्दो म्हि गिकसे “चु म्हिएनोन पक्कान येशूदेन छ्यामनोन मुबा, तिगदा भिसम चुएनोन गालीलला हिन्ना” भिसी भिमा,⁶⁰ पत्रुससे “एसे तिग भिबा, डादा था आरे” भिसी भिमैछ्याम नागा क्राजी।⁶¹ ओच्छे प्रभुसे पत्रुसदा स्हीजी। जमाहेन्से “न्हडगर स्थोरी नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी प्रभुसे सुड्बा ताम पत्रुससे ढन्जी।⁶² जमाहेन्से पत्रुस मडग्यार निसी घ्वाँ घ्वाँ क्राजी।

येशूदा सिपाहीगदेसे खिसी लसी तोबा

मत्ती २६:५९-६८; मर्कूस १४:५५-६५; यूहन्ना १८:१९-२४

⁶³ जमाहेन्से येशूदा चुड्सी भबा म्हिगदेसे येशूदा खिसी लबान तोजी।⁶⁴ ओच्छे येशूला मी घप्पी तोबान, “लु, अगमवाणी पाङ्गो, एदा खाल्से तोजी?” भिसी भिजी।⁶⁵ ओच्छे थेनीगदेसे येशूदा बड्बान बेइज्जत लजी।

येशूदा यहुदीगदेला सभारी भोर्बा

मत्ती २६:५९-६६; मर्कूस १४:५५-६४; यूहन्ना १८:१९-२४

⁶⁶ य्हाल तमैछ्याम येशूदा यहुदी गन्बागदे हुप तबा सभारी भोजी। थे सभारी परमेश्वरला मन्दिररी पूजा लबा मुल म्हिगदेदेन यहुदी धर्मगुरुगदे मुबा।⁶⁷ जमाहेन्से थेनीगदेसे येशूदा “ए थार्बा पिन्बा ख्रीष्ट हिन्ना भिसम डन्दा पाङ्गो” भिसी भिमा, येशूसे थेनीगदेदा “डाइ पाड्सैनोन ह्ण्डनीसे विश्वास आल।⁶⁸ ओच्छे डाइ तिगै इयोइसैनोन ह्ण्डनीसे जोहाब पिन्बारी आखम।⁶⁹ तर दाहेन्से परमेश्वरसे पुड्खबा म्हि शक्तिशाली परमेश्वरला दाहिनेपट्टि चिला” भिसी सुड्जी।

⁷⁰ जमाहेन्से थेनीगदे जम्मासेन येशूदा “थेह्ण्ड भिसम तिग ए परमेश्वरला झा हिन्ना?” भिसी इयोइमा, येशूसे थेनीगदेदा “ह्ण्डनीसे सुड्बा ह्ण्डेनोन डा थेनोन हिन्ना” भिसी जोहाब पिन्जी।

⁷¹ येशूसे चुह्ण्ड सुड्बाहेन्से थेनीगदेसे “थेलान सुड्ग्याम य्हाडसे चु जम्मान ताम थेःसी जिन्माहेन्से दाहेन्से य्हाडदा थेला बिरोधरी अर्गु प्रमाण तिगदा तोःजी” भिसी भिजी।

पिलातससे येशूदा इयोइबा छार्बा लबा
मत्ती २७:१-२, ११-१४; मर्कूस १५:१-५; यूहन्ना १८:२८-३८

23 जमाहेन्से यहूदीगदेलान सभाला म्हिगदेसे येशूदा पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी।² ओच्छे थेनीगदेसे येशूदा दोष लबान, “चुसे हाडसे हाडदान डा थार्बा पिन्बा ख्रीष्ट हिन्ना भिबादेन रोमी ग्याल्बो कैसरदा तिरो फाआतो: भिसी य्हाडला य्हुल्साला म्हिगदेदा न्होइना लबा डन्से स्याप्जी” भिसी भिजी।³ थेनीगदेलाम ताम थे:सी पिलातससे येशूदा “तिग ए यहूदीगदेलाम ग्ले हिन्ना?” भिसी इयोइमा, येशूसे पिलातसदा “थे मी हाडसेन सुइबा मुला” भिसी जोहाब पिन्जी।

4 जमाहेन्से पिलातससे परमेश्वरला मन्दिररी पूजा लबा मुल म्हिदेन थेरी मुबा जम्मान म्हिगदेदा “डाइ चु म्हिला तिगै गल्ती आस्याप्जी” भिसी भिमा,⁵ थेनीगदेसे क्रिडबान, “चुसे यहूदिया अञ्चलदेन गालील अञ्चलहेन्से चुधोनाला म्हिगदेदा हाडला ताम लोप्सी न्होइना लबा मुला” भिसी भिजी।⁶ जमाहेन्से पिलातससे “चु म्हि गालीलला हिन्ना?” भिसी इयोइजी।

7 येशू हेरोदसे शासन लबा अञ्चलला चीम भिसी था याङ्गाहेन्से पिलातससे येशूदा हेरोद मुबा ग्लारी पुइजी। थे धुइरी हेरोद यरूशलेमरी मुबा।⁸ येशूदा म्नाङ्गाहेन्से हेरोद ल्हानान ताइजी। तिग्दा भिसम थेसे येशूला बाररी थे:बासे लमा ल्हानान धिनहेन्से येशूदा च्याबा सेम लमुबा। ओच्छे थेसे येशूसे लबा तिगै उदेकला गे च्याम्याइला भिसी आश लबा मुबा।⁹ थेतबासेलमा थेसे येशूदा ल्हानान ताम इयोइजी तर येशूसे तिगै जोहाब आपिन्नी।¹⁰ ओच्छे परमेश्वरला मन्दिररी पूजा लबा मुल म्हिगदेदेन यहूदी धर्मगुरुदे क्रिडबान येशूदा दोष लबारी छयाइजी।¹¹ जमाहेन्से हेरोददेन थला सिपाहीगदेसे येशूदा खिसी लबान बेइज्जत लजी। ओच्छे येशूदा ग्लेसे क्वान्बा हइबा क्वान क्वान्सी पिन्सी पिलातस मुबा ग्लारी दो:सी पुइजी।¹² डाच्छा हेरोददेन पिलातस आठिक्वा मुबा। तर थे धिनकुनुहेन्से थेन्नी ठिक्वा।

येशूदा सिबाला सजाय पिन्बा

मत्ती २७:१५-२६; मर्कूस १५:६-१५; यूहन्ना १८:३९-१९:१६

13 जमाहेन्से पिलातससे परमेश्वरला मन्दिररी पूजा लबा मुल म्हिगदेदेन यहूदी नेतागदेदा ओच्छे म्हिगदेदा इयोइसी,¹⁴ “एनीगदेसे चुसे म्हिगदेदा न्होइना लजी भिसी डा मुबा ग्लारी भजी, तर डाइ एनीगदेलाम डाच्छापट्टिन चुदा इयोइबा छार्बा लमा डाइ हाडनीसे लबा दोष तिगै आस्याप्जी।¹⁵ हेरोदसेएनोन तिगै दोष आस्याप्बासे लमा चुदा य्हाड मुबा ग्लारी पुइखजी। च्यागो, साइनोन तो:बा खाल्ला गे चा चुसे तिगै लबा आरे।¹⁶ थेतबासेलमा डाइ चुदा सजाय जे पिन्सी पुइला” भिसी भिजी।¹⁷ यहूदीगदे मिश्र य्हुल्सायाम फेसी खबा धिनदा ढन्सी धइबा चाडला धुइरी पिलातससे इयाल्खानरी मुबा म्हि गिकदा पुइतो:मुबा।¹⁸ तर जम्मान म्हिगदेसे “चुदा साइनोन तो:ला, बरु डन्ना लागिरी बारब्बादा पुइसी पिन्गो” भिसी क्रिड्जी।¹⁹ थे धुइरी जम्मान म्हिसे डोसेबा बारब्बा भिबा आज्यबा गे लबा म्हि गिक इयाल्खानरी थान्बा मुबा।

20 पिलातससे येशूदा पुइबा सेम लसी म्हिगदेदा घोना लबारी म्हाइजी।²¹ तर थेनीगदे जम्मानसेन, “चुदा कुसरी टाँगब लसी साइगो, कुसरी साइगो!” भिसी क्रिडबाला क्रिडबान लजी।²² दो:सीएनोन पिलातससे थेनीगदेदा “तिग्दा? चुसे थेहइबा आज्यबा गे तिग लबा मुला? डाइ मी चुदा साइतो:बा दोष तिगै आस्याप्जी। थेतबासेलमा डाइ चुदा सजाय पिन्सी पुइला” भिसी भिजी।²³ तर थेनीगदे झन क्रिड्सी, “कुसरी साइनोन तो:ला” भिसी भिजी। चुहइ लसी क्रिड्सी म्हिगदेसे ढाजी।²⁴ जमाहेन्से पिलातससे येशूदा थेनीगदेसे भिबा हइनोन लपुइजी।²⁵ ओच्छे आन्दोलन लसी म्हि साइबासे लमा इयाल्खानरी झाइबा बारब्बादा पिलातससे पुइसी पिन्जी। तिग्दा भिसम म्हिगदेसे थेदान पुइसी पिन्गो भिसी भिमुबा। तर येशूदा चा थेनीगदेसे पाइबा अन्धार थेनीगदेलाम यारी जिम्मा लसी पिन्जी।

येशूदा कुसरी साइबा

मत्ती २७:३२-४४; मर्कूस १५:२१-३२; यूहन्ना १९:१७-२७

26 जमाहेन्से थेनीगदेसे येशूदा थेग्याम भोर्बान लमा कुरेनी भिबा ग्लाला सिमोन खबान मुबा। थेदा चुइसी येशूला कुस पुइपुइसी येशूला लिच्छा लिच्छा भ्रपुइजी।²⁷ ओच्छे म्हिला हुल येशूला लिच्छा लिच्छा निजी। थेरी म्रिडम्हेमेगदेएनोन क्राबा क्रिड्बा लबान मुबा।²⁸ तर थेनीगदेपट्टि दो:सी येशूसे चुहइ भिसी सुइजी, “यरूशलेमला झामेगदे, डाला लागिरी थाक्रागो, तर हाडलान लागिरी ओच्छे हाडलान कोलागदेलाम लागिरी क्रागो।²⁹ तिग्दा भिसम चुहइबा धुइएनोन खबान मुला। थे धुइरी म्हिगदेसे कोला आन्हा म्रिडम्हेमेदेन इहे ख्वाआतो:बा म्रिडम्हेमेगदेदा परमेश्वरयाम मोलम याइबा म्हि हिन्ना भिसी भिमा।³⁰ थेनोन धुइरी म्हिगदेसे गडगदेदा डनीथोरी ताइगो ओच्छे डन्दा ल्हुउ भिसी भिमा।³¹ दोड पिडगै मुबा धुइरीन चुगदेसे चुहइ लमुला भिसम दोड खमहेन्से झन तिग लला?” भिसी सुइजी।

32 थेनीगदेसे य्हो न्हीदाएनोन येशूदेन छ्यामनोन साइबारी भोर्जी।³³ जमाहेन्से थेनीगदे खप्पर भिबा गडरी धोखजी। थेरी थेनीगदेसे येशूदा कुसरी टाँगब लजी। ओच्छे थे य्हो न्हीदाएनोन गिकदा येशूला दाहिनेपट्टि, गिकदा देब्रेपट्टि लसी कुसरी टाँगब लजी।³⁴ थे धुइरी येशूसे “आबा, चुगदेदा माफ लउ। तिग्दा भिसम चुगदेसे तिग लबान मुला थे चुगदेदा था आरे” भिसी सुइजी। ओच्छे सिपाहीगदेसे चिट्टा युसी येशूला क्वान हाड हाड न्हडरी भो लजी।³⁵

35 थेरी राप्सी च्यासी चिबा म्हिगदेदेन यहूदी नेतागदेसे येशूदा खिसी लबान, “चुसे स्थान्दो म्हिदा मी जोगब लजी। चु परमेश्वरसे धम्बा थार्बा पिन्बा ख्रीष्ट हिन्सम हाडसे हाडदान जोगब लगे” भिसी भिजी।³⁶

36 ओच्छे सिपाहीगदेसेएनोन येशूदा अडगुरला कम्बा निडगु पिन्सी खिसी लबान,³⁷ “ए यहूदीगदेलाम ग्ले हिन्सम हाडसे हाडदान जोगब लउ” भिसी भिजी।

38 ओच्छे येशूदा “यहूदीगदेलाम ग्ले” भिसी दोष उन्बा ताम भिसी येशूला थोबोथोरी थान्जी।

39 येशूदेन छ्यामनोन कुसरी टाँगब लबा य्हो न्ही न्हडला गिकसे येशूदा खिसी लबान, “ए थार्बा पिन्बा ख्रीष्ट आहिन? लु, एसे हाडदा जोगब लउ, ओच्छे डन्दाएनोन जोगब लउ” भिसी भिजी।⁴⁰ तर स्थान्दो य्होसे थेदा बइबान चुहइ भिसी सुइजी, “एदा परमेश्वर म्नाइसी लोइबा आखमुला? थेसे याइबा सजाय एसे याइबा आरे? ⁴¹ य्हाडसे मी आज्यबा गे लबासे लमा ठीक सजाय नाबान मुला, तर चुसे मी थेहइबा तिगै आज्यबा गे लबा आरे।”

42 जमाहेन्से थेसे येशूदा “येशू, हाडला य्हुल्सारी फेप्बा धुइरी डादाएनोन ढन्गो” भिसी भिजी।

43 ओच्छे येशूसे थेदा “एसे डाला ताम इयान्गो, तिनीन ए डादेन छ्याम स्वर्गरी तलाम” भिसी सुइजी।

येशू सिबा

मत्ती २७:४५-५६; मर्कूस १५:३३-४१; यूहन्ना १९:२८-३०

44 ओस्पन धिनना बाह बजेहेन्से तीन बजेधोना य्हुल्सा नाडनोन धोपधोप तजी।⁴⁵ थे धुइरी धिनीला य्हाल म्हाजी, ओच्छे परमेश्वरला मन्दिर न्हडला पर्दा पखले न्ही तसी ठेजी।⁴⁶ जमाहेन्से येशूसे क्रिडबान, “आबा, डाला आत्मा किन्गो” भिसी सुइबाहेन्से येशूला सा निजी।⁴⁷

47 चु म्नाइसी रोमी कप्तानसे परमेश्वरदा जयजयकार लबान, “चु म्हि पक्कान परमेश्वरला डाच्छा ज्यबा म्हि चीम” भिसी भिजी।

48 चु म्नाइसी थेरी च्याबारी खबा जम्मान म्हिगदेदा ल्हानान दुख तसी क्राबा क्रिड्बा लबान दिमरी निजी।⁴⁹ ओच्छे येशूदा डोसेबा म्हिगदेदेन गालीलयाम येशूदेन छ्याम छ्याम खबा म्रिडम्हेमेगदे थारेडयामसेन चु ताम च्यासी चिबा मुबा।⁵⁰

†† 23:30 होशे १०:८; उन्बा ६:१६ † 23:34 भजन २२:१८ †† 23:35 भजन २२:७ ††† 23:36 भजन ६९:२१ †††† 23:45 प्रस्था २६:३१-३३ ††††† 23:46 भजन ३१:५ § 23:49 लुका ८:२-३

† चु पदलाम ताम ल्हानान हइबा ग्रीक बाइबलरी भिबा आरे।

येशूदा धुसारी थान्बा

मत्ती २७:५७-६१; मर्कूस १५:४२-४७; यूहन्ना १९:३८-४२

50 योसेफ भिबा म्हि ज्यबादेन परमेश्वरसे कुल्बा ताम इयान्बा म्हि मुबा। थे यहूदी सभाला सदस्य मुबा। 51 थेसे स्थान्दोगदेसे येशूदा साइबारी सल्लाह लबा धुइरी बिरोध लमुबा। तिगदा भिसम थेसे परमेश्वरसे शासन लबा धुइ खला भिसी भ्रान्सी चिबा मुबा। थे यहूदिया अज्वलला अरिमाथिया भिबा नाम्साला म्हि मुबा। 52 थे पिलातस मुबा ग्लारी निसी येशूला लास ह्रीजी। 53 ओच्छे थेसे येशूला लास क्रुसग्याम ते:सी मलमलला क्वानसे रिल्जी। जमाहेन्से युडबाला पहरारी ठ्वाइसी स्होबा धुसारी थान्जी, थे धुसारी चु भन्दा डाच्छा खालैला लास थान्बा आरेबा। 54 थे धिन ब्लब्बा न्हबा धिनना डाच्छाकुनु मुबा। थेतबासेलमा ब्लब्बा न्हबा धिन खबारी छ्याइमुबा। 55 गालीलग्याम येशूदेन छ्याम खबा म्रिडम्हेमेगदेएनोन योसेफदेन छ्यामनोन निजी ओच्छे येशूला लास धुसारी थान्बा च्याजी। 56 जमाहेन्से थेनीगदे दिमरी निसी येशूला लासरी फोर्बाला लागिरी ज्यबा खाल्ला छ्युगुदेन अत्तर तयार लजी। तर न्हडगरदड चा यहूदीगदेला ठिम अन्धार ब्लब्बा न्हबा धिन धइजी। †

येशू सिबाग्याम सोबा

मत्ती २८:१-१०; मर्कूस १६:१-८; यूहन्ना २०:१-१०

24 जमाहेन्से थे म्रिडम्हेमेगदे आइतवारकुनु स्थोरीन हाडसे तयार लबा ज्यबा खाल्ला छ्युगुदेन अत्तर भोर्सी येशूदा थान्बा धुसारी निजी। 2 थेनीगदे थेरी धोमा धुसाला म्रापरी थान्बा युडबा ब्लिड्सी थान्बा म्राइजी। 3 तर थेनीगदे धुसार् न्हडरी वाइसी च्यामा थेरी येशूला लास आम्राइनी। 4 थेरी थेनीगदे अलमल तसी चिबा धुइरी झक्झक्बा क्वान क्वान्बा म्हि न्ही थेनीगदेला डामरीन राप्जी। 5 थे म्हि न्हीदा म्राइसी म्रिडम्हेमेगदे लोड्सी सरी खलुप तजी। जमाहेन्से थे म्हि न्हीसे थेनीगदेदा चुहइ भिसी भिजी, “एनीगदेसे सोबा म्हिदा तिगदा सिबागदे थान्बा धुसारी म्हाइबा? 6 येशू चुरी आरे। थेदा सिबाग्याम सोना लसी जिन्बा मुला! येशू गालीलरी मुबा धुइरी एनीगदेदा तिग भिसी सुइबा मुबा थे ताम एनीगदेसे ढन्गो। 7 परमेश्वरसे पुइखबा म्हिदा पापीगदेला यारी जिम्मा लला, ओच्छे क्रुसरी टाँगब लला तसैनोन डादा सोमरेमाकुनु सिबाग्याम सोना लला।” 8 जमाहेन्से येशूसे सुइबा ताम थेनीगदेसे ढन्जी। 9 जमाहेन्से थे म्रिडम्हेमेगदे धुसार्ग्याम दो:सी निसी हाडसे म्राइबा जम्मान ताम च्युक गिक चेलागदेदेन स्थान्दो जम्मान म्हिगदेदा पाइजी। 10 थे म्रिडम्हेमेगदे चा मरियम मग्दलिनी, याकूबला आमा मरियमदेन योअन्ना मुबा। ओच्छे थेनीगदेदेन छ्याम स्थान्दो म्रिडम्हेमेगदेएनोन मुबा। थेनीगदेसेन मुल चेलागदेदा हाडसे म्राइबा जम्मान ताम पाइबा। 11 तर चेलागदेसे “एनीगदेसे तिग आतो:बा ताम लबा?” भिसी पत्याब आतनी। 12 तर पत्रुस चा डोड रे:सी धुसार्पट्टि यार्बान निजी। थेरी धोसी धुसाला म्रापग्याम योइ तसी च्यामा येशूदा बेरब लबा क्वान जे म्राइजी। चुहइ तबा म्राइसी थे उदेक म्हन्बान दिमपट्टि निजी।

इम्माउस नाम्सारी निबा ग्यामरी येशूदा स्याब्बा

मर्कूस १६:१२-१३

13 थेनोन धिनकुनु येशूला चेलागदे न्हडला चेला न्ही यरूशलेमग्याम ओस्पन कोस सोमसे गडसल थारेडला इम्माउस भिबा नाम्सारीक्यार निबान मुबा। 14 थेनीगदेसे यरूशलेमरी तबा तामला बारैरी हाड हाड न्हडरी ताम लबान मुबा। 15 चुहइ लसी ताम लसी भ्रबान लबा धुइरी येशूएनोन थेनीगदेदेन छ्यामनोन फेप्जी। 16 तसैनोन थेनीगदेसे येशूदा डोआसेनी। तिगदा भिसम परमेश्वरसे थेनीगदेदा डोसेना आलनी। 17 जमाहेन्से येशूसे थेनीगदेदा “एनीगदेसे तिग ताम लसी भ्रबा?” भिसी इयोइमा, थेनीगदेला ली धोपधोप लसी थेन तजी।

18 थे न्ही न्हडला क्लेओपास भिबासे येशूदा “यरूशलेमरी कोर्सी खबा म्हि तसीनोन थेरी तिनी न्हडगर तिग तबा मुला थे ताम था आयाइबा चा हाड जे चीम” भिसी पाइमा, 19 येशूसेएनोन थेनीगदेदा “तिग ताम?” भिसी इयोइजी।

जमाहेन्से थेनीगदेसे “नासरतला येशूला बारैरी तबा ताम हाडदा था आरे? थे म्हि अगमवक्ता हिन्ना। थेसे लबा गेदेन लोप्बा ताम परमेश्वरदेन म्हिला ओन्हाडरी शक्तिशाली मुबा। 20 तर थेदा परमेश्वरला मन्दिररी पूजा लबा मुल म्हिदेन यहूदी नेतागदेसे चुदा साइगो भिसी क्रुसरी टाँगब लपुइजी। 21 य्हाड इस्राएलीगदेदा येशूसेन पापग्याम फेला भिसी डन्से आश लमुबा। तर येशूदा साइबाएनोन तिनी सोमरे तजी। 22 चुदे जे आहिन, तिनी स्थोरीन डन्ना कोइ कोइ नाना आडागदे येशूदा थान्बा धुसारी निमा, थेनीगदेसे येशूला लास आस्याप्नी। थेरी थेनीगदेसे स्वर्गदूतगदेदा म्राइजी। थे स्वर्गदूतगदेसे “येशू सोसी जिन्बा मुला” भिसी थेनीगदेदा पाइबा ताम डन्दाएनोन पाइसी उदेक तना लजी। 24 चु ताम थे:सी डन्ना कोइ कोइ ह्योगदे येशूदा थान्बा धुसारी च्याबारी निजी। थेनीगदेसेएनोन थे म्रिडम्हेमेगदेसे पाइबा हइन्डोन स्याप्जी, तर येशूदा भिसम आम्राइनीम।”

25 जमाहेन्से येशूसे थेनीगदेदा चुहइ भिसी सुइजी, “ताम आघोबा म्हि, अगमवक्तागदेसे पाइबा ताम विश्वास लबारी एनीगदेदा खाहइबा गाहो तबा? 26 तिग थार्बा पिन्बा ख्रीष्ट हाडला शक्तिदेन य्हालरी फेप्खबा भन्दा डाच्छा चु दुख नातो:बा आरेबा?” 27 ओच्छे येशूसे हाडला बारैरी मोशाहेन्से जम्मान अगमवक्तागदेसे परमेश्वरला बचनरी भ्रिबा ताम थेनीगदेदा घोना लजी।

28 थेनीगदे इम्माउस नाम्साला डामरी धोखमाहेन्से येशू अझ थेग्याम क्यारनोन फेप्बारी छ्याइजी। 29 तर थे चेला न्हीसे येशूदा “म्हुन तबारी छ्याइजी, थेतबासेलमा तिनी हाड डन्देन छ्यामनोन धन्छ्यागो” भिसी भिमाहेन्से येशू थेनीगदेदेन छ्याम धन्छ्याबाला लागिरी दिम न्हडरी फेप्जी। 30 येशू थेनीगदेदेन छ्याम सोल छ्योइबारी धन्छ्याजी। जमाहेन्से येशूसे गेड छ्यारी थोसी धन्यवाद पिन्सी गेड क्युइसी थेनीगदेदा पिन्जी। 31 जमाहेन्से थेनीगदेसे येशूदा डोसेजी। तर थेनोन धुइरी थेनीगदेसे येशूदा थेरी आम्राइनी। 32 ओच्छे थेनीगदेसे “येशू य्हाडदेन छ्याम ग्यामरी ताम लबान परमेश्वरला बचन घोना लबा धुइरी य्हाडला सेम गाते ताइबा मुबा” भिसी हाड हाड न्हडरी ताम लजी।

33 जमाहेन्से तुरुन्तन थेनीगदे यरूशलेमपट्टि निजी। थेरी धोमा थेनीगदेसे च्युक गिक चेलागदेदेन छ्याम पोप तसी चिबा म्हिगदेसे, 34 “प्रभु सिबाग्याम सोबादेन सिमोन मुबा ग्लारी फेप्बा ताम चा पक्कान हिन्ना चीम” भिसी ताम लसी चिबा स्याप्जी। 35 जमाहेन्से थेनीसेएनोन ग्यामरी तबा तामदेन प्रभुसे गेड क्युइबा धुइरी थेनीसे प्रभुदा डोसेजी भिबा ताम थेरी मुबागदेदा पाइजी।

येशू चेलागदे मुबा ग्लारी फेप्खबा

मत्ती २८:१६-२०; मर्कूस १६:१४-१८; यूहन्ना २०:१९-२३; मुल चेला १:४-८

36 थेनीगदेसे चु ताम लबान लबा धुइरी येशू थेनीगदेला डाच्छा राप्जी, ओच्छे “एनीगदेदा शान्ति तगै” भिसी सुइजी।

37 तर येशूदा म्राइसी, “चु म्हड कि तिग” भिसी थेनीगदे लोड्सी आत्यब तजी।

38 जमाहेन्से येशूसे थेनीगदेदा “एनीगदे तिगदा सेमरी शइका लसी लोइबा? 39 एनीगदेसे डाला यादेन काडरी थुर्सी च्यागो, डानोन हिन्ना। तिगदा भिसम म्हडला स्यादेन नख्खु आत, तर डाला मी मुला” भिसी सुइजी।

40 चुहइ सुइहाहेन्से येशूसे थेनीगदेदा हाडला छ्यादेन स्थाप उन्जी।

41 जमाहेन्से थेनीगदे ताइसी उदेक तसी अझ येशूला ताम विश्वास आलनी। जमाहेन्से येशूसे थेनीगदेदा “एनीगदेदेन छ्याम तिगै चबा स्हे मुला?” भिसी इयोइमा, 42 थेनीगदेसे दुम्बु गिक तार्डाला स्या येशूदा पिन्जी। 43 थे तार्डाला स्या तासी येशूसे थेनीगदेदान डाच्छापट्टि छ्योइजी।

44 जमाहेन्से येशूसे थेनीगदेदा “डाला बारैरी परमेश्वरसे मोशादा पिन्बा ठिमरी, अगमवक्तागदेसे भ्रिबा किताबगदेदेन व्हाइला किताबरी भ्रिबा

जम्मान ताम पूरा तबा मुला। चु ताम एनीगदेदेन छ्याम मुबा धुइरीन डाइ एनीगदेदा पाइबा मुबा” भिसी सुइजी।

⁴⁵ जमाहेन्से येशूसे थेनीगदेदा परमेश्वरला बचन घोखम्बा ज्ञान पिन्जी।
⁴⁶ ओच्छे येशूसे थेनीगदेदा चुहइ भिसी सुइजी, “थार्बा पिन्बा ख्रीष्टसे दुख नातोःला ओच्छे सोमरेमाकुनु थे सिबाग्याम सोला, ⁴⁷ थेला मिनरी ह्वाड ह्वाडला पाप खलासी परमेश्वरपट्टि दोःजी भिसम पापला दोष मेटब तला। चु ताम यरूशलेमहेन्से जम्मान खुलला म्हिगदेदा थेःना लतोःला भिसी परमेश्वरला बचनरी भिबा मुला। ⁴⁸ तिगदा भिसम चु जम्मान ताम म्नाइबा एनीगदेन हिन्ना। ⁴⁹ च्यागो, डाला आबासे पिन्ना भिसी कबुल लबा शक्ति

डाइ एनीगदे मुबा ग्लारी पुइखला। थेतबासेलमा तोरग्याम शक्ति आयाइतेधोना एनीगदे चु शहररीन चिउ।”

येशू स्वर्गरी फेष्बा

मर्कुस १६:१९-२०; मुल चेला १:९-११

⁵⁰ जमाहेन्से येशूसे थेनीगदेदा बेथानियाधोना भोर्जी, ओच्छे ह्वाडला या थीसी थेनीगदेदा मोलम पिन्जी। ⁵¹ चुहइ लसी मोलम पिन्माहेन्से येशूदा थेनीगदेग्याम फेसी स्वर्गरी भोर्जी। ⁵² येशूदा फ्या लमाहेन्से थेनीगदे ताइसी यरूशलेमरी दोःसी निजी। ⁵³ ओच्छे थेनीगदेसे परमेश्वरला जयजयकार लबान सदन परमेश्वरला मन्दिररी चिजी।

चु किताबला बारेरी पाड्ती:मा

येशूला मुल चेला यूहन्नासे भिबा मुबा। चु यूहन्ना येशूसे माया लबा चेला हिन्ना (यूहन्ना २१:७)। थे जब्दियाला झा ओच्छे याकूबला आले हिन्ना (मत्ती ४:२१)।

एफिसस शहररी भिबा मुबा।

ओस्पन ईश्वी संवत् ८०-९५ (विक्रम संवत् १३७-१५२) सालला गुडरी भिबा मुबा। चु जम्मान भन्दा लिच्छा भिबा थार्बा पिन्बा समाचार हिन्ना।

यहूदी धर्म तेन्बा अर्गु यहुलला म्हिगदेदा येशू ख्रीष्टनोन परमेश्वर हिन्ना भिसी उन्बाला लागिरी भिबा मुबा।

चु थार्बा पिन्बा समाचाररी येशू जुकजुकधोनाला जुनी पिन्बा बचन हिन्ना। ओच्छे थे बचन म्हे दोसी जम्बुलिडरी मुबा म्हिगदेला गुडरी धन्ख्याजी भिसी भिबा मुला। येशू परमेश्वरला झादेन कबुल लबा थार्बा पिन्बा ग्ले हिन्ना भिसी चु थार्बा पिन्बा समाचार पढब लबागदेसे येशूदा विश्वास लगै ओच्छे थेनीगदेसे जुकजुकधोनाला जुनी याड्गै भिसी भिबा हिन्ना (यूहन्ना २०:३१)।

चु किताबरी बचनदेन येशू गिकनोन हिन्ना भिसी भिबा मुला। चु थार्बा पिन्बा समाचारला डाच्छाला भोरी येशूसे लबा उदेकला गेगदेला बारेरी पाड्बा मुला। ओच्छे येशून परमेश्वरला झादेन कबुल लबा थार्बा पिन्बा ग्ले हिन्ना भिसी पाड्बा मुला। डाच्छाला भोरी प्रभुसे लबा उदेकला गेगदेग्याम तिग उन्बा मुला भिबा ताम येशूसे सुड्बा बचनग्यामनोन ज्यना लसी घोबारी खम्ला। चु भोरी चा म्हिगदेसे खाह्ङ लसी येशूदा विश्वास लसी चेला दोजी ओच्छे स्थान्दोसे थेदा बिरोध लसी विश्वास आलनी भिबा तामला बारेरी पाड्बा मुला। जमाहेन्से १३ अध्यायहेन्से १७ अध्याय न्हडरी येशूसे हाडदा चुड्बाकुनु म्हुनड हाडला चेलागदेदेन छ्याम संगती लबा तामदेन हाड कुसरी सिबा भन्दा डाच्छा हाडला चेलागदेदा होशियार तना लबान आँट पिन्बा तामगदेला बारेरी भिबा मुला। लिच्छाला अध्यायगदेरी चा येशूदा चुड्बा तामला बारेरीदेन येशूला सेम च्याबा तामला बारेरी भिबा मुला। थेह्ङ लसीन येशू कुसरी सिबा तामला बारेरीदेन सिबाग्याम सोबा तामला बारेरी ओच्छे येशू हाडला चेलागदे मुबा ग्लारी फेख्बा तामला बारेरीनोन भिबा मुला।

यूहन्नासे जुकजुकधोनाला जुनी चा ख्रीष्टग्याम याड्कुला ओच्छे येशूदा परमेश्वर मुबा ग्लारी भोर्बा ग्यामदेन सत्य ओच्छे जुनी हिन्ना भिसी विश्वास लसी थे मुबा ग्लारी खबागदेसे जे याड्ला भिसी लोप्ला मुला। चु थार्बा पिन्बा समाचाररी उदेकला ताम तिग मुला भिसम म्हिगदेदा आत्माला ताम घोना लबाला लागिरी क्युडदेन गेड ओच्छे य्हाल, गोठालोदेन ग्यु, थेह्ङ लसीन अडगुरला दोडदेन रोगदे ह्ङ्बा जम्मासेन घोबारी खम्बा उखानगदेग्याम सुड्बा मुला।

मुल तामगदे

बचन म्हे दोसी न्हबा १:१-१८

बप्टिस्मा पिन्बा यूहन्नादेन येशूला चेलागदे १:१९-५१

येशूसे म्हिगदेला गुडरी लबा गे २:१-१२:५०

येशू सिबा भन्दा डाच्छा हाडला चेलागदेदेन छ्याम लबा तामगदे १३:१-१७:२६

येशूदा कुसरी टाँगब लबा १८:१-१९:४२

येशू सिबाग्याम सोसी हाडला चेलागदे मुबा ग्लारी फेख्बा २०:१-२१:२५

यूहन्नासे भिबा थार्बा पिन्बा समाचार

बचन म्हे दोसी न्हबा

1 जम्बुलिड स्होबा भन्दा डाच्छान बचन भिबा मुबा, थे बचन परमेश्वरदेन छ्याम मुबा, ओच्छे बचननोन परमेश्वर मुबा। 2 जम्बुलिड स्होबा भन्दा डाच्छाहेन्सेन थे परमेश्वरदेन छ्याम मुबा।

3 परमेश्वरसे जम्मान स्हे थेनोन बचनग्याम स्होजी। परमेश्वरसे स्होबा स्हेगदे न्हडरी बचनग्याम आस्होबा स्हे तिगैनोन आरे। 4 बचनसे स्होबा जम्मान स्हेगदेसे थेनोन बचनग्याम जुनी याड्जी। थेनोन जुनी जम्मान म्हिगदेला य्हाल हिन्ना। 5 थे य्हाल धोपधोपरी य्हाल य्हाल तला, ओच्छे धोपसे थे य्हालदा खाड्मै साड्बारी आखम।

6 परमेश्वरसे म्हे गिक पुड्खबा मुबा, थेला मिन यूहन्ना मुबा।

†7 थेग्यामसेन जम्मान म्हिगदेसे थे य्हालदा विश्वास लगै भिसी परमेश्वरसे

थेदा थे य्हालला बारेरी पाड्बाला लागिरी पुड्खबा मुबा। 8 थे चा थे य्हाल आहिन्बा मुबा। तर थे य्हालला बारेरी म्हिगदेदा घोना लबारी थे खबा मुबा।

9 जम्मान म्हिगदेदा ज्ञान बुद्धि पिन्बा सत्य य्हाल चा जम्बुलिडरी फेख्बान मुबा। 10 थे जम्बुलिडरी मुबा, जम्बुलिड थेग्यामसेन स्होबा हिन्ना। तसैनोन जम्बुलिडला म्हिगदेसे थेदा डोआसेनी। 11 थे हाडलान म्हिगदे मुबा ग्लारी फेख्बजी। तर थेदा हाडलान म्हिगदेसे मान आलनी। 12 तर जुन म्हिसे थेदा मान लसी थेथोरी विश्वास लजी, थेनीगदेदा थेसे परमेश्वरला सन्तान दोबा हक पिन्जी। 13 थेनीगदे म्हिला सेमसे म्हन्बा अन्धार खजिबै म्हिला ल्हुड्ग्याम न्हबा आहिन। थेनीगदे परमेश्वरसे स्होबा परमेश्वरलान कोलागदे हिन्ना।

14 चुनोन बचन म्हे दोसी न्हजी, ओच्छे दयामायादेन सत्यसे प्लिड्सी थे य्हाडला गुडरी धन्ख्याजी। डन्से थेला प्रेन य्हालदेन शक्ति म्हाड्जी, थे य्हालदेन शक्ति परमेश्वरला गिकजेन झाला मुबा।

15 यूहन्नासे थेला बारैरी चुहड् भिसी क्रिड्बान पाड्जी, “डा भन्दा लिच्छा फेखबा चा डा भन्दा घेन न्हि हिन्ना। तिग्दा भिसम थे डा भन्दा डाच्छाहेन्सेन मुबा। थे न्हिला बारैरी डाइ डाच्छान पाड्बा मुबा।”

16 थे दयामायासे प्लिड्बा मुला। थेतबासेलमा थेग्यामसेन व्हाडसे दयामायाथोरी दयामाया याड्बा मुला। 17 तिग्दा भिसम परमेश्वरसे व्हाडदा मोशाग्याम ठिम पिन्मुबा। तर येशू ख्रीष्टग्याम चा दयामायादेन सत्य ताम पिन्बा मुला। 18 परमेश्वरदा खालैसेन खाइमै म्राड्बा आरे। तर परमेश्वर आबादेन छ्याम मुबा थेला गिकजेन झा परमेश्वरसेन व्हाडदा परमेश्वर आबा खाहड्बा मुला भिसी उन्बा मुला।

बत्तिस्मा पिन्बा यूहन्नासे पाड्बा ताम
मती ३:१-१२; मर्कूस १:१-८; लूका ३:१-१८

19 यरूशलेम शहरग्याम यहूदीगदेसे परमेश्वरला मन्दिररी पूजा लबागदेदेन लेवीगदेदा यूहन्ना मुबा ग्लारी थे खाल चीम? भिसी इयोड्बारी पुड्मा यूहन्नासे थेनीगदेदा चुहड् भिसी पाड्बा। 20 थेसे थेनीगदेदा “डा थार्बा पिन्बा ख्रीष्ट हिन्नोन आहिन” भिसी सत्य ताम पाड्जी।

21 जमाहेन्से थेनीगदेसे यूहन्नादा “थेहड् भिसम ए खाल हिन्ना? तिग ए एलिया हिन्ना” भिसी इयोड्जी।

तर यूहन्नासे “डा आहिन” भिसी जोहाब पिन्जी।

दोःसी थेनीगदेसे “तिग ए थेनोन अगमवक्ता हिन्ना?” भिसी इयोड्मा, यूहन्नासे “डा थे अगमवक्ताएनोन आहिन” भिसी जोहाब पिन्जी। † †

22 जमाहेन्से दोःसीनोन थेनीगदेसे यूहन्नादा “ए खाल हिन्ना? इन्दा पाङ्गो। इन्दा चुरी पुड्खबा म्हेगदेदा एला बारैरी पाड्तोःबा मुला। थेतबासेलमा ए खाल हिन्ना? इन्दा पाङ्गो” भिसी भिमा,

23 यूहन्नासे थेनीगदेदा “यशैया अगमवक्तासे पाड्बा हड्जोन ‘परमप्रभु भ्रबाला लागिरी थेला ग्याम सोजो स्होउ’ भिसी तोडतोडबा ग्लारी क्रिड्बा म्हे गिकला काइ डानोन हिन्ना” भिसी पाड्जी। †

24 थेनीगदे न्हडला कोइ कोइ फरिसीगदेसे 25 यूहन्नादा “ए थार्बा पिन्बा ख्रीष्टएनोन आहिन, एलियाएनोन आहिन, ओच्छे थे अगमवक्ताएनोन आहिन भिसम तिग्दा बत्तिस्मा पिन्बा?” भिसी इयोड्जी।

26 जमाहेन्से यूहन्नासे थेनीगदेदा “डाइ क्युइसे बत्तिस्मा पिन्बा मुला, तर एनीगदेला गुडरी खालै गिक मुला थेदा एनीगदेसे डोसेबा आरे। 27 डा भन्दा लिच्छा फेखबा चा थेनोन हिन्ना। डा थेला लखमला तुना ब्लबाधोनाला आरे” भिसी भिजी।

28 चु ताम यर्दन स्योडला क्याम्सडपट्टि बेथानिया भिबा नाम्सारी तबा मुबा, थेरीन यूहन्नासे म्हेगदेदा बत्तिस्मा पिन्बान मुबा।

परमेश्वरला झा

29 न्हडगरदड येशू हाड मुबा ग्लारी फेखबान लबा म्राड्सी यूहन्नासे चुहड् भिजी, “च्यागो, जम्बुलिडरी मुबा जम्मान म्हेदा पापग्याम फेबा परमेश्वरसे पुड्खबा ग्ले! †30 थेला बारैरी डाइ डाच्छान पाड्बा मुबा, ‘डा भन्दा लिच्छा म्हे गिक फेखबान मुला, थे डा भन्दा शक्तिशाली मुला। तिग्दा भिसम थे डा न्हबा भन्दा डाच्छाहेन्सेन मुबा।’ 31 थे खाल हिन्ना भिबा ताम डादा था आरेबा, तर इस्राएलीगदेसे थेदा डोसेगै भिसीन डाइ क्युइग्याम बत्तिस्मा पिन्बान खबा हिन्ना।”

32 यूहन्नासे अझ हाडसे म्राड्बा ताम चुहड् भिसी पाड्जी, “डाइ परमेश्वरला आत्मा दुकुर हड् लसी स्वर्गग्याम फेखसी थेथोरी धन्ध्याबा म्राड्जी। 33 डाइ अझ थेदा डोसेबा आरेबा, तर क्युइग्याम बत्तिस्मा पिन्ना भिसी डादा पुड्खबासेन, ‘एसे जुन म्हेथोरी परमेश्वरला आत्मा फेखसी धन्ध्याबा म्राड्ला, थेसेन परमेश्वरला आत्माग्याम बत्तिस्मा पिन्ना’ भिसी सुड्जी। 34 थेथोरी परमेश्वरला आत्मा फेखबा डाइ म्राड्बा मुला।

† चु पदरी “थे अगमवक्ता” भिबा चा ठिमला किताबरी यहूदीगदेदा पुड्खला भिसी पाड्बा अगमवक्ताला बारैरी हिन्ना। †† 1:21 व्यव १८:१५, १८; मला ४:५ † 1:23 यशै ४०:३ †† “परमेश्वरसे पुड्खबा ग्ले” भिसी भिबा तामदा ग्रीक बाइबलरी परमेश्वरसे पुड्खबा ग्यु बांगो भिसी भिबा मुला। चु ताम १:३६ पदरीनोन मुला।

थेतबासेलमा डाइ पाड्बा चु ताम सत्य हिन्ना, परमेश्वरला झा चा थेनोन हिन्ना।”

येशूसे डाच्छा धम्बा चेलागदे

35 दोःसी न्हडगरदड यूहन्ना हाडला चेलागदे न्हडला न्हीदेन छ्याम राप्सी चिबा मुबा। 36 येशू फेखबान लबा म्राड्सी यूहन्नासे, “च्यागो, परमेश्वरसे पुड्खबा ग्ले!” भिसी पाड्जी। 37 चु ताम थेःसी यूहन्नाला चेला न्ही येशूला लिच्छा लिच्छा निजी।

38 येशूसे प्लिक दोःसी स्हीमा, थेनीगदे लिच्छा लिच्छा खबान लबा म्राड्सी येशूसे थेनीगदेदा “एनीगदेसे तिग म्हाड्बा?” भिसी इयोड्जी। जमाहेन्से थेनीगदेसे येशूदा “गुरु हाड खानड धन्ध्यामुला?” भिसी इयोड्मा,

39 येशूसे थेनीगदेदा “डादेन छ्याम खउ, एनीगदेसे म्राड्ला” भिसी सुड्जी। जमाहेन्से थेनीगदे येशूदेन छ्याम निजी, ओच्छे येशू धन्ध्याबा ग्ला म्राड्जी। जमाकुनु ओस्पन ड्यसेला चार बजब तसी जिन्बासे लमा थेनीगदे येशूदेन छ्याम चिजी।

40 यूहन्नासे पाड्बा ताम थेःसी येशूदेन छ्याम निबा थे चेला न्ही न्हडला गिक चा सिमोन पत्रुसला आले अन्द्रियास मुबा। 41 थेसे डाच्छा हाडला ज्योज्यो सिमोनदा स्याप्सी, “डन्से मसीहदा स्याप्सी,” भिसी पाड्जी। हिब्रू ग्योइरी “मसीह” भिबा चा “थार्बा पिन्बा ख्रीष्ट” भिबा हिन्ना। 42 थेसे सिमोनदा येशू मुबा ग्लारी भजी।

येशूसे सिमोनदा स्हीसी, “ए योनाला झा सिमोन हिन्ना, एला मिन केफास हिन्ना” भिसी सुड्जी। केफास भिबा चा ग्रीक ग्योइरी पत्रुस भिबा हिन्ना। †

फिलिपदेन नथानेल

43 न्हडगरदड येशू गालील अञ्चलरी नितोःजी भिसी फेप्पा फिलिपदा स्याप्सी। ओच्छे येशूसे थेदा “डादेन छ्याम भ्रउ” भिसी सुड्जी।

44 फिलिपएनोन पत्रुसदेन अन्द्रियासलान शहर बेथसेदाला मुबा।

45 जमाहेन्से फिलिप नथानेलदा हुप तबारी निजी। ओच्छे नथानेलदा चुहड् भिसी पाड्जी, “मोशासे भिबा ठिमदेन अगमवक्तागदेसे जुन न्हिला बारैरी पाड्बा मुबा, डन्से थे न्हिदा स्याप्बा मुला। थे योसेफला झा नासरतला येशू हिन्ना।”

46 नथानेलसे थेदा “तिग नासरतग्यामसेनोन तिगै ज्यबा स्हे खला?” भिसी इयोड्मा, फिलिपसे थेदा “खसी च्यागो” भिसी जोहाब पिन्जी।

47 नथानेल हाड मुबा ग्लारी खबान लबा म्राड्सी येशूसे थेला बारैरी “तिगै लुसीला ताम आलबा पक्का इस्राएलीदा च्यागो” भिसी सुड्जी।

48 नथानेलसे येशूदा “हाडसे डाला बारैरी खाहड् लसी था याड्जी?” भिसी इयोड्मा, येशूसे थेदा “फिलिपसे एदा इयोड्बारी निबा भन्दा डाच्छान डाइ एदा अञ्जीरला दोड टारी म्राड्बा” भिसी जोहाब पिन्जी।

49 जमाहेन्से नथानेलसे येशूदा “रब्बी, हाडनोन परमेश्वरला झा इस्राएलला ग्ले हिन्ना” भिसी भिजी।

50 येशूसे थेदा “डाइ एदा अञ्जीरला दोड टारी म्राड्जी भिबासे लमा एसे विश्वास लबा आहिन? एसे अझ चु भन्दान घेन घेन तामगदे म्राड्ला” भिसी सुड्जी। 51 दोःसी येशूसे थेनीगदेदा “च्यागो, एनीगदेसे डाला ताम इयान्गो, एनीगदेसे स्वर्ग ठोड्बादेन परमेश्वरला दूतगदे परमेश्वरसे पुड्खबा म्हेथोरी फाखबान लबा तोर निबान लबा म्राड्ला” भिसी सुड्जी। †††

काना भिबा नाम्सारी लबा ब्याह

2 सोमरेमाकुनु गालील अञ्चलला काना भिबा नाम्सारी ब्याह गिक मुबा। थेरी येशूला आमाएनोन मुबा। 2 थे ब्याहरी येशूदेन येशूला चेलागदेदाएनोन निम्तो पिन्बा मुबा। 3 अडगुरला निडगु जिन्माहेन्से येशूला आमासे येशूदा “थेनीगदेदेन छ्याम अडगुरला निडगु आरे” भिसी भिजी।

†† “पत्रुस” भिबा चा युडबाला पहरा भिबा हिन्ना। ††† 1:51 उत्प २८:१२

4 चु ताम थे:सी येशूसे “चु व्हाडला गे आहिन। डाइ गे लबा धुइ अझ तबा आरे” भिसी सुइजी। 5 जमाहेन्से येशूला आमासे नोकरगदेदा “येशूसे एनीगदेदा जे लउ भिसी कुल्ला, थेनोन लउ” भिसी पाइजी।

6 ओच्छे थेरी युडबा ठवाइसी स्होबा ओस्पन बोगल ब्लिहेन्से ग्यार्जा गिक लिटर क्युइ वाइबा गोर दु युडबाला फुम्बा मुबा। थे फुम्बारी चा यहूदीगदेला ठिम अन्धार चोख्याब लबाला लागिरी क्युइ थान्मुबा। 7 येशूसे थेरी मुबा नोकरगदेदा “चु जम्मान फुम्बारी क्युइ प्लिङ्ना लउ” भिसी कुलजी। जमाहेन्से थेनीगदेसे थे जम्मान फुम्बा नाड नाड क्युइ प्लिङ्ना लजी।

8 ओच्छे येशूसे थेनीगदेदा “चु जजाकर भोर्सी भोजला मुल म्हिदा म्हाइपुङ्गो” भिसी कुलजी। जमाहेन्से थेनीगदेसे भोर्सी मुल म्हिदा पिन्जी।

9 मुल म्हिसे म्हाइबा धुइरी थे क्युइ अडगुरला निडगु दोसी जिन्बा मुबा। थेदा थे निडगु खानडग्याम भजी भिबा ताम था आरेबा, तर थे क्युइ युबा नोकरगदेदा चा था मुबा। जमाहेन्से थे मुल म्हिसे म्हाछारदा इयोइसी,

10 “जम्मान म्हिसे डाच्छा अडगुरला ज्यबा निडगु पिन्मुला। ओच्छे डोन्बोगदे इयोइमाहेन्से लिच्छा अडगुरला आज्यबा निडगु पिन्मुला। तर एसे मी दान्दे धोनान ज्यबा निडगु पिन्बान मुला” भिसी भिजी।

11 येशूसे लबा उदेकला गेगदे न्हडरी गालील अञ्चलला काना भिबा नाम्सारी लबा उदेकला गे चा जम्मान भन्दा डाच्छा लबा हिन्ना। चु उदेकला चिनुग्याम येशूसे हाडला शक्ति उन्जी। चु म्हाइसी थेला चेलागदेसे थेदा विश्वास लजी।

12 जमाहेन्से येशू हाडला आमा, आले, चेलागदेदेन छ्याम कफर्नहुम भिबा शहररी फेपजी। ओच्छे तिगै धिनधोना थेनीगदे थेरीन धन्छ्याजी। †

येशू परमेश्वरला मन्दिररी फेपजा

मत्ती २१:१२-१३; मर्कुस ११:१५-१७; लूका १९:४५-४६

13 यहूदीगदेसे मिश्र यहुल्साग्याम फेसी खबा धिनदा ढन्सी धड्बा चाड खबारी छ्याइबा मुबा। थे धुइरी येशू यरूशलेमरी फेपजी। ††14 येशूसे म्हिगदेदा परमेश्वरला मन्दिररी † ग्यु, बहर, ढुकुर चूइबा किन्बा लबादेन टेबुलरी टाडगा थान्सी टाडगा देप्सी चिबा म्हाइजी। 15 जमाहेन्से येशूसे छोला कोर्रा स्होसी मन्दिररी मुबा ग्युगदेदेन बहरगदे जम्मादान ताप्जी, ओच्छे टाडगा देप्सी चिबागदेला टाडगागदे थ्याइसी टेबुल प्लाड प्लिड लसी पिन्जी। 16 ढुकुर चूइबागदेदा येशूसे “चु जम्मान स्हे चुग्याम भोगो। डाला आबाला दिमदा व्यापार लबा दिम थास्होउ” भिसी सुइजी।

17 थे धुइरी येशूला चेलागदेसे परमेश्वरला बचनरी, “परमेश्वर! हाडला दिमला लागिरी डाइ लबा मायासे लमा डा सिबा तेबान तबा मुला” भिसी भिबा ताम ढन्जी। †

18 यहूदी नेतागदेसे येशूदा “हाडदा चु गे लबाला लागिरी अधिकार मुबा हिन्सम डन्दा हाडसे तिग चिनु उन्बारी खम्ला?” भिसी भिजी।

19 येशूसे थेनीगदेदा “एनीगदेसे चु मन्दिर फुणो, डाइ चु सोमरेरी स्होला” भिसी सुइजी। ††20 जमाहेन्से यहूदी नेतागदेसे येशूदा “परमेश्वरला चु मन्दिर स्होबारी डन्दा बोगल न्हीसे ढु दिड लगब तजी भिसम हाडसे चा खाहइ लसी सोमरेरी स्होखम्ला?” भिसी इयोइजी। 21 तर येशूसे जुन मन्दिरला बारेरी सुइबा मुबा, थे मन्दिर चा हाडलान ल्हुइ मुबा। 22 येशू सिबाग्याम सोमाहेन्से येशूसे सुइबा चु ताम चेलागदेसे ढन्जी। जमाहेन्से थेनीगदेसे परमेश्वरला बचनरी भिबा तामदेन येशूसे सुइबा तामरी विश्वास लजी।

23 मिश्र यहुल्साग्याम फेसी खबा धिनदा ढन्सी धड्बा चाडला धुइरी येशू यरूशलेमरी मुबा। थेरी येशूसे लबा उदेकला गे म्हाइसी ल्हानान म्हिगदेसे येशूदा विश्वास लजी। 24 तर थेनीगदेसे लबा विश्वासदा येशूसे पत्याब आतनी। तिगदा भिसम जम्मान म्हिगदेला सेमला ताम येशूदा था मुबा।

25 जम्मान म्हिला सेमला ताम था मुबासे लमा खालै म्हिला बारेरी येशूदा खालैसेन पाइतो:बा आरेबा।

निकोदेमस येशूदा स्याप्वारी निबा

3 फरिसीगदे न्हडला निकोदेमस भिबा म्हि गिक मुबा। थे यहूदी नेतागदे न्हडला गिक मुबा। 2 थे तिरुकुनु म्हुनड येशू मुबा ग्लारी निसी येशूदा “गुरु, हाड डन्दा लोप्वारी परमेश्वरग्याम फेप्वबा हिन्ना भिबा डन्दा था मुला। तिगदा भिसम परमेश्वरसे ह्यो आलनी भिसम हाडसे लबा हइबा शक्तिशाली गेगदे खालैसेन लबारी आखम” भिसी भिजी।

3 येशूसे थेदा “च्यागो, एसे डाला ताम इयान्गो, खालै म्हि तोरग्याम †† आन्हेतेधोना परमेश्वरला यहुल्सादा म्हाइबारी आखम” भिसी सुइजी।

4 चु ताम थे:सी निकोदेमससे येशूदा “खेप्व दोसीनोन म्हि खाहइ लसी दो:सी न्हबारी खम्ला? तिग थे दो:सी आमाला फो न्हडरी वाइसी न्हबारी खम्ला?” भिसी भिजी।

5 जमाहेन्से येशूसे थेदा चुहइ भिसी सुइजी, “च्यागो, एसे डाला ताम इयान्गो, खालै म्हि क्युइदेन आत्माग्याम आन्हेतेधोना परमेश्वरला यहुल्सारी वाइआम्याइ। 6 ल्हुइग्याम न्हबा ल्हुइ हिन्ना, तर परमेश्वरला आत्माग्याम न्हबा आत्मा हिन्ना। 7 डाइ एदा तोरग्याम न्हतो:ला भिसी पाइमा ए उदेक थातउ। 8 लाबा खानडपट्टि निम्हन्जी थेनोनपट्टि निमुला। लाबा खबा एसे था याङ्गुला, तर थे खानडग्याम खजी खानडपट्टि निजी भिबा एदा था आरे। परमेश्वरला आत्माग्याम न्हबा म्हिगदेएनोन थेहइबान तमुला।”

9 निकोदेमससे येशूदा “चु खाहइ लसी तखम्ला?” भिसी इयोइजी।

10 जमाहेन्से येशूसे थेदा चुहइ भिसी सुइजी, “ए इस्राएलीगदेला गुरु तसीनोन चु ताम आघोनी? 11 च्यागो, एसे डाला ताम इयान्गो, डन्से मी हाडसे म्हाइबा तामदेन था याइबा ताम जे पाइमुला। तर डन्से पाइबा ताम एनीगदेसे विश्वास आलमुला। 12 डाइ जम्बुलिडरी मुबा स्हेला बारेरी पाइमा मी एनीगदेसे विश्वास आलमुला भिसम स्वर्गला बारेरी पाइमा एनीगदेसे खाहइ लसी विश्वास लबारी खम्ला? 13 “स्वर्गग्याम खबा परमेश्वरसे पुइखबा म्हि बाहेक स्थान्दो खालैनोन स्वर्गरी निबा आरे। 14 यहूदीगदे तोडतोडबा ग्लारी मुबा धुइरी मोशासे पिचलला पुख्री स्होसी सिडरी ठोक्सी च्योबा हइ परमेश्वरसे पुइखबा म्हिदाएनोन च्योला। †††15 ओच्छे जुन जुन म्हिसे थेदा विश्वास लला, थेनीगदेसे जुकजुकधोनाला जुनी याइला।

16 “तिगदा भिसम परमेश्वरसे जम्बुलिडदा ल्हानान माया लसी हाडला गिक जेन झा पुइखजी। थेदा विश्वास लबागदे खालै नाश थातगै, तर जुकजुकधोनाला जुनी याइगै भिसीन चुहइ लबा हिन्ना। 17 तिगदा भिसम परमेश्वरसे हाडला झादा जम्बुलिडदा सजाय पिन्बारी पुइखबा आहिन। तर थेग्याम जम्बुलिडसे थार्बा याइगै भिसी पुइखबा हिन्ना। 18 जुन म्हिसे परमेश्वरला झाथोरी विश्वास लला, थेला दोष आउन। तर विश्वास आलबा म्हिला चा डाच्छान दोष उन्सी जिन्बा तला। तिगदा भिसम थेसे परमेश्वरला झादा विश्वास आलनी। 19 दोषी खाहइ लसी तला भिसम य्हाल जम्बुलिडरी खसी जिन्सैनोन म्हिगदेदा य्हाल भन्दा धोपधोपनोन सेम निजी। तिगदा भिसम थेनीगदेसे लबा गेनोन आज्यबा मुबा। 20 आज्यबा गे लबागदेसे य्हालदा हेला लमुला। तिगदा भिसम य्हालरी खमाहेन्से थेनीगदेसे लबा आज्यबा गे जम्मासेन म्हाइला भिसी थेनीगदे य्हालरी आखबा हिन्ना। 21 तर थेसे लबा जम्मान गे परमेश्वरदेन छ्याम गिक तसी लबा हिन्ना भिसी जम्मासेन म्हाइ भिसी सत्य तामदा तेन्बा म्हि य्हालरी खबा हिन्ना।”

बप्टिस्मा पिन्बा यूहन्नासे येशूला बारेरी दो:सी पाइबा

22 जमाहेन्से येशू हाडला चेलागदेदेन छ्याम यहूदिया अञ्चलरी फेपसी तिगै धिनना लागिरी थेनीगदेदेन छ्याम थेरी धन्छ्याबा धुइरी म्हिगदेदा बप्टिस्मा पिन्बान मुबा। 23 यूहन्नासेनोन सालीम भिबा ग्लाला डामरी मुबा एनोन भिबा ग्लारी बप्टिस्मा पिन्बान मुबा। तिगदा भिसम थेरी ल्हानान क्युइ मुबा, ओच्छे म्हिगदे थेरी खसी बप्टिस्मा किन्बान मुबा। 24 थे धुइधोना यूहन्ना इयाल्खानरी परब तबा आरेमुबा। †

† 2:12 मत्ती ४:१३ †† 2:13 प्रस्था १२:१-२७ † यरूशलेमरी परमेश्वरला मन्दिर गिक जे मुबा। †† 2:17 भजन ६९:९ †† 2:19 मत्ती २६:६१; २७:४०; मर्कु १४:५८; १५:२९

††† “तोरग्याम” भिबा चा ग्रीक बाइबल अन्धार दो:सीनोन भिबा हिन्ना। चुला अर्थ चा परमेश्वरला आत्माग्याम भिबा हिन्ना। चु ताम ३:७ देन ३१ रीनोन मुला। †††† 3:14 गन्ती २१:९ † 3:24 मत्ती १४:३; मर्कु ६:१७; लूका ३:१९-२०

25 थेनोन धुइरी यूहन्नाला चेलागदे यहुदी गिकदेन छ्याम चोखो तबाला बारेरी ताम लबान मुबा। 26 जमाहेन्से थेनीगदे यूहन्ना मुबा ग्लारी खसी, “गुरु, यर्दन क्याम्सड मुबा धुइरी हाडसे डन्दा म्हे गिकला बारेरी सुड्ढुबा, थे म्हे हाडदेन छ्यामनोन मुबा। दान्दे थेसेनोन बत्तिस्मा पिन्बान मुला, ओच्छे जम्मान म्हेगदे थे मुबा ग्लारी निबान मुला” भिसी भिजी।

27 यूहन्नासे थेनीगदेदा चुहड् भिसी जोहाब पिन्जी, “परमेश्वरसे आपिन्तेधोना म्हेसे तिगै सहे आयाड्। 28 ‘डा थार्बा पिन्बा ख्रीष्ट आहिन, तर थे भन्दा डाच्छा पुड्खबा म्हे जे हिन्ना’ भिसी डाला बारेरी पाड्बा ताम एनीगदेदान था मुला। 29 जुन म्हेदेन छ्याम चाडछार चिला थेनोन म्हाछार हिन्ना। म्हाछारदेन छ्याम राण्बा म्हे म्हाछारला काड थे:सी ल्हानान ताड्कुला। थेहड् लसीन डाएनोन ल्हानान ताड्बा मुला। 30 दाहेन्से ख्रीष्ट चा बढब तबान नितो:ला, तर डा चा घटब तबान नितो:ला।

स्वर्ग्याम फेखबा परमेश्वरला झा

31 “तोरग्याम फेखबा चा जम्मान भन्दा घेन मुला। जम्बुलिडरी न्हबा म्हेगदे चा जम्बुलिडलान हिन्ना, ओच्छे जम्बुलिडलान ताम लमुला। तर स्वर्ग्याम फेखबा चा जम्मान भन्दा घेन मुला। 32 थेसे हाडसे म्हाड्बादेन थे:बा तामनोन सुड्ढुला, तर थेला ताम खालैसेन विश्वास आलमुला। 33 जुन म्हेसे थेला तामदा विश्वास लला, थेसे चा परमेश्वर सत्य हिन्ना भिबा तामला प्रमाण उन्ना। 34 परमेश्वरसे पुड्खबा म्हेसे परमेश्वरलान ताम पाड्बा। तिगदा भिसम परमेश्वरसे थेदा हाडला पूरान आत्मा पिन्बा मुला। 35 परमेश्वरसे हाडला झादा माया लबा मुला, ओच्छे थेदा जम्मानथोरी शासन लबा अधिकार पिन्बा मुला। 36 थेतबासेलमा जुन म्हेसे परमेश्वरला झादा विश्वास लला थेसे जुकजुकधोनाला जुनी याड्ला। तर जुन म्हेसे परमेश्वरला झासे कुल्बा ताम आड्यान थेसे जुकजुकधोनाला जुनी आयाड्। बरु थेसे परमेश्वरग्याम खबा सजाय नातो:ला।”

येशूदेन सामरी खुलला म्रिडम्हेमे

4 यूहन्नासे भन्दा येशूसे ल्हानान चेलागदे स्होबा मुला, ओच्छे बत्तिस्माएनोन पिन्बान मुला भिसी फरिसीगदेसे थे:जी भिबा ताम येशूदा था मुबा। 2 बत्तिस्मा पिन्बा चा चेलागदेसे पिन्मुबा तर येशू हाडसेन चा आहिन मुबा। 3 फरिसीगदेसे थे:बा ताम था याङ्गाहेन्से येशू यहुदिया अञ्चल खलासी गालील अञ्चलरी दो:सी फेप्जी।

4 येशू गालील अञ्चलरी फेप्मा सामरिया अञ्चलग्याम फेप्तो:मुबा। 5 थेतबासेलमा येशू सामरिया अञ्चलला सुखार भिबा शहररी धोखजी। चु शहर चा याकूबसे हाडला झा योसेफदा पिन्बा बुला डामरी मुबा। 6 थेरी याकूबला इनार मुबा। भना भना बल्पासे लमा येशू थे इनारला कुनीरी धन्ख्याबा मुबा। थे धुइरी ओस्पन धिनी गडसल तबा मुबा।

7 थेनोन धुइरी सामरी खुलला म्रिडम्हेमे गिक थे इनाररी क्युइ किन्बारी खजी। येशूसे थेदा “डादा क्युइ थुड्बारी भउ” भिसी सुड्जी। 8 येशूला चेलागदे चा चबा सहे ग्लुबारी शहररी निबा मुबा।

9 सामरी खुलला म्रिडम्हेमेसे येशूदा “हाड यहुदी खुलला म्हे तसीनोन डा हड्बा सामरी खुलला म्रिडम्हेमेदेन छ्याम तिगदा क्युइ ह्रीबा?” भिसी भिजी। तिगदा भिसम यहुदीगदेसे सामरीगदेदेन छ्याम संगतनोन आलमुबा। †

10 येशूसे थेदा “एसे परमेश्वरसे पिन्बा मोलमदेन दान्दे एदेन छ्याम क्युइ ह्रीबा म्हेदा डोसेबा हिन्सम एसे थे म्हेदेन छ्याम क्युइ ह्रीसेला मुबा। जमाहेन्से थे म्हेसे एदा जुकजुकधोनाला जुनी याड्बा क्युइ पिन्सेला मुबा” भिसी सुड्जी।

11 थे म्रिडम्हेमेसे येशूदा “लास्सो, हाडदेन छ्याम क्युइ ते:बारी ताड आरे, ओच्छे इनारएनोन नुप्बा मुला। हाडसे खानडग्याम थे जुकजुकधोनाला जुनी याड्बा क्युइ भला? 12 तिग हाड डन्ना म्हेमे याकूब भन्दा घेन हिन्ना? थेसेन

डन्दा चु इनार स्होसी पिन्बा हिन्ना। थेदेन थेला सन्तानसे ओच्छे थेला म्हे मुड्गदेसेनोन चुनोन इनारला क्युइ थुड्ढुबा” भिसी भिजी।

13 जमाहेन्से येशूसे थेदा चुहड् भिसी सुड्जी, “चु क्युइ थुड्बा म्हेगदेदा दो:सी क्युइ फुडला। 14 तर जुन जुन म्हेसे डाड पिन्बा क्युइ थुड्बा थे म्हेदा दो:सी क्युइ आफुड। डाड थेदा जुन क्युइ पिन्ना, थे क्युइ चा थेला लागिरी जुकजुकधोनाला जुनी पिन्बा क्युइला मुहान दोला!” भिसी सुड्जी।

15 थे म्रिडम्हेमेसे येशूदा “लास्सो, डादाएनोन थे क्युइ भउ, थेहड् भिसम डादा दो:सी क्युइ आफुड ओच्छे चुधोना क्युइ किन्बारीनोन खआतो:” भिसी भिजी।

16 जमाहेन्से येशूसे थेदा “निउ, एला हेम्बोदा ड्योइसी भउ” भिसी सुड्जी।

17 थेसे “डाला हेम्बो आरे” भिसी भिजी।

तर येशूसे थेदा “एसे डाला हेम्बो आरे भिसी भिबा ठीक हिन्ना।

18 तिगदा भिसम एला गोर डा हेम्बो तसी जिन्बा मुला। दान्दे ए जुन म्हेदेन छ्याम चिबा मुला, थे म्हे एला हेम्बो आहिन। एसे पाड्बा ताम सत्य हिन्ना” भिसी सुड्जी।

19 जमाहेन्से थे म्रिडम्हेमेसे, “लास्सो, हाड अगमवक्ता हिन्बा चीम भिसी डाड था याड्जी। 20 डन्ना आखे म्हेमेगदेसे चु गडरी परमेश्वरदा तेन्जी, तर हाडनी यहुदीगदेसे चा परमेश्वरदा तेन्बा ग्ला यरूशलेम जे हिन्ना भिसी सुड्ढुला” भिसी भिजी।

21 येशूसे थे म्रिडम्हेमेदा चुहड् भिसी सुड्जी, “एसे डादा विश्वास लउ, दाहेन्से खालैनोन परमेश्वरदा तेन्बारी चु गडरीदेन यरूशलेमरी निआतो:बा धुड् खबान मुला। 22 एनी सामरीगदेसे आसेनान परमेश्वरदा तेन्जी, तर डनी यहुदीगदेसे चा सेसी तेन्जी। तिगदा भिसम थार्बा याड्बा चा यहुदीगदे न्हडग्यामनोन तला। 23 तर चुहड्बा धुइएनोन खबान मुला, थे धुइ चा चुनोन हिन्ना, सेसी सेमहेन्सेन परमेश्वरदा तेन्बा म्हेगदेसे चा सत्यदेन आत्माग्याम परमेश्वर आबादा तेन्मुला। परमेश्वर आबासे चुहड् लसी तेन्बा म्हेगदे म्हाड्मुला। 24 तिगदा भिसम परमेश्वर आत्मा हिन्ना। थेतबासेलमा थेदा तेन्बागदेसे सत्यदेन आत्माग्याम तेन्तो:ला।”

25 जमाहेन्से थे म्रिडम्हेमेसे येशूदा “थार्बा पिन्बा ग्ले फेखला भिबा ताम डादाएनोन था मुला, थेदा ‘थार्बा पिन्बा ख्रीष्ट’ भिसी भिला। थे फेखमाहेन्से थेसेन डन्दा जम्मान ताम घोना लला” भिसी भिजी।

26 येशूसे थेदा “एदेन छ्याम ताम पाड्बा म्हे, डा थेनोन हिन्ना” भिसी सुड्जी।

27 थे धुइरी येशूला चेलागदेएनोन थेरी धोखजी। येशू म्रिडम्हेमे गिकदेन छ्याम ताम लसी चिबा म्हाड्सी थेनीगदे उदेक तजी। तर “हाडसे तिग म्हाड्बा?” अथवा “हाड थे म्रिडम्हेमेदेन छ्याम तिगदा ताम लबा” भिसी खालैसेन आड्योइनी।

28 जमाहेन्से थे म्रिडम्हेमे दर्बुड थेरीन खलासी नाम्सापट्टि निसी म्हेगदेदा, 29 “म्हे गिकदा च्याबारी खउ, डाड लबा जम्मान गे थेसे डादा पाड्जी।

थेनोन थार्बा पिन्बा ख्रीष्ट मी आहिन?” भिसी भिजी। 30 चु ताम थे:सी शहरला जम्मान म्हेगदे येशूदा च्याबारी थेरी खजी।

31 थेनोन धुइरी चेलागदेसे येशूदा “रब्बी, सोल छयोइगो” भिसी बिन्ती लजी।

32 तर येशूसे थेनीगदेदा “डादेन छ्याम चबा सहे मुला, थे ताम एनीगदेदा थानोन आरे” भिसी सुड्जी।

33 थेतबासेलमा चेलागदेसे “खालैसे येशूदा सोल भसी पिन्जी कि तिग?” भिसी हाड हाड न्हडरी ताम लजी।

34 येशूसे थेनीगदेदा चुहड् भिसी सुड्जी, “डादा पुड्खबासे कुल्बा ताम ड्यान्सी थेला गे पूरा लबान डाला चबा सहे हिन्ना। 35 एनीगदेसे ‘बाली मिन्बारी अझ ला बलि बाँकी मुला भिसी भिमुला।’ तर एनीगदेसे डाला ताम ड्यान्गो, बु वारीरी च्यागो, बाली मिन्सी दुड्बा धुइ तसी जिन्बा मुला। 36 जुन म्हेसे बाली दुड्बान मुला, थेसे ज्यला याड्बान मुला। ओच्छे जुकजुकधोनाला जुनी याड्बा बाली हुप लबान मुला। ओच्छे ब्लु द्बवादेन बाली दुड्बा न्हीनोन ताड्म्याड्ला। 37 तिगदा भिसम चु ताम सत्य हिन्ना। ‘गिकसे ब्लु द्बवा, ओच्छे स्यहान्दोसे बाली दुड्बाला।’ 38 डाड एनीगदेदा

† 3:28 यूह १:२० †† 3:35 मत्ती ११:२७; लूका १०:२२ ‡ 4:5 उत्प ३३:१९; यहो २४:३२ †† “यहुदीगदेसे सामरीगदेदेन छ्याम संगतनोन आलमुबा” भिबा चु ताम कोड कोड ग्रीक बाइबलरी आरे।

एनीगदेसे ब्लुनोन आद्वबा ग्लारी बाली दुइबारी पुइजी। स्थान्दोसे दुख लसी ब्लु दवबा ग्लारी एनीगदेसे बाली दुइम्याड्बा मुला।”

³⁹ “डाइ लबा जम्मान गे थेसे डादा सुइजी” भिसी थे सामरी म्रिडम्हेमेसे पाइबासे लमा थे नाम्माला ल्हानान सामरीगदेसे येशूदा विश्वास लजी।
⁴⁰ थेनीगदे येशू मुबा ग्लारी खसी येशूदा “हाड डन्देन छ्याम धन्छ्यागो” भिसी बिन्ती लजी। जमाहेन्से येशू थेनीगदेदेन छ्याम न्हीरेधोना धन्छ्याजी।
⁴¹ येशूला ताम थे:सी झन ल्हानान सामरीगदेसे येशूदा विश्वास लजी।
⁴² थेनीगदेसे थे म्रिडम्हेमेदा “दान्दे एसे पाइबा ताम थे:सी जे डन्से विश्वास लबा आहिन, तर डन्सेन येशूला ताम थे:सी विश्वास लबा हिन्ना। ओच्छे पक्कान जम्बुलिडला जम्मान म्हिदा थार्ना लबा थेनोन हिन्ना भिसी डन्से था याइजी” भिसी भिजी।

येशूसे हाकिमला झादा खम्ना लबा

⁴³ थे ग्लारी न्हीरेधोना धन्छ्यासी येशू गालील अज्चलरी फेज्जी।
⁴⁴ अगमवक्तादा हाडलान नाम्मारी मान आल भिसी येशूसेन सुइबा मुबा।
⁴⁵ येशू गालील अज्चलरी धोखमाहेन्से थे ग्लाला म्हिगदेसे येशूदा मान लजी। तिग्दा भिसम मिश्र यहुल्साग्याम फेसी खबा धिनदा ढन्सी धइबा चाडला धुइरी येशूसे यरूशलेम शहररी लबा जम्मान उदेकला गेगदे थेनीगदेसे म्हाइबा मुबा। थे धुइरी थेनीगदेएनोन यरूशलेम शहररी चाड धइबारी निबा मुबा। †

⁴⁶ दो:सी येशू गालील अज्चलला काना भिबा शहररी फेज्जी। थेनोन शहररी येशूसे क्युइदा अडगुरला निडगु दोना लबा मुबा। कफर्नहुम शहररी चिबा हाकिम गिकला झा ल्हानान आखम्बा मुबा।⁴⁷ येशू यहुदिया अज्चलग्याम गालील अज्चलरी फेज्जजी भिबा ताम थे:सी थे हाकिम येशू मुबा ग्लारी खजी। ओच्छे थेसे हाड फेज्जसी डाला झादा खम्ना लसी पिन्गो भिसी बिन्ती लजी। तिग्दा भिसम थेला झा ल्हानान आखम्ना सिबारीन छ्याइबा मुबा।

⁴⁸ थेतबासेलमा येशूसे थेदा “उदेकला गेदेन चिनु आम्राइतेधोना एनीगदेसे खाइमै विश्वास आल” भिसी सुइजी।

⁴⁹ थे हाकिमसे येशूदा “लास्सो, डाला झा सिबा भन्दा डाच्छान हाड फेज्जउ” भिसी पाइजी।

⁵⁰ येशूसे थेदा “निउ, दाहेन्से एला झा सोला” भिसी सुइजी।

जमाहेन्से येशूसे सुइबा तामरी विश्वास लसी थे दिमरी निजी।

⁵¹ ओच्छे थे ग्यामरी निबान लमा थेला नोकरगदे खसी, “हाडला झा खम्जी” भिसी भिजी।⁵² जमाहेन्से थेसे नोकरगदेदा “थे गाते धुइहेन्से खम्जी?” भिसी इयोइमा, थेनीगदेसे “तिल्मा धिनना एक बजेहेन्से थेला छवा म्हाजी” भिसी भिजी।⁵³ चु ताम थे:माहेन्से येशूसे थेदा “एला झा सोला” भिसी सुइबा धुइरीन खम्जी भिबा ताम थेसे था याइजी। थेतबासेलमा थेदेन थेला म्हेमेक्योइसेन येशूदा विश्वास लजी।

⁵⁴ चु गे चा यहुदिया अज्चलग्याम गालील अज्चलरी फेज्जसी येशूसे लबा अर्गु उदेकला गे हिन्ना।

येशूसे कुज्या म्हिदा खम्ना लबा

5 जमाहेन्से यहुदीगदेला चाडला धुइरी येशू यरूशलेमरी फेज्जी।

² यरूशलेम शहर न्हडरी निबारी ग्यु भिबा म्राप मुबा। थे म्रापला डामरी गोर डा दलान मुबा घ्योइ गिक मुबा। थे घ्योइदा हिब्रू ग्योइरी बेथेसदा भिसी भिमुबा।³ थे दलानरी आखम्बा ल्हानान म्हिगदे, मी आम्राइबा म्हि, कुज्या म्हिदेन काड या चलब आतबा म्हि चिमुबा। थे घ्योइला क्युइ गाते धुइरी ल्हिइला भिसी थेनीगदे जम्मासेन च्यासी चिमुबा।⁴ तिग्दा भिसम धुइ धुइरी परमप्रभुला दूत गिक मार खसी थे घ्योइला क्युइ ल्हिइसी पिन्मुबा। घ्योइरी क्युइ ल्हिइछ्याम जुन म्हि डाच्छा घ्योइरी वाइजी थे म्हि जस्तोन आखम्बा मुसैनोन थे खम्मुबा। †

† 4:44 मत्ती १३:५७; मर्कू ६:४; लुका ४:२४ †† 4:45 यूह २:२३ † 4:46 यूह २:१-११ †† “थे घ्योइला क्युइ...थे म्हि जस्तोन आखम्बा मुसैनोन थे खम्मुबा।” चु ताम ल्हानान हइबा ग्रीक बाइबलरी आरे।

⁵ थेरी बोगल गिकसे च्युक भ्रे: दिडधोना आखम्बा म्हि गिकएनोन मुबा।
⁶ येशूसे थे थेरीन म्हेसी चिबा म्हाइजी। ओच्छे थे ल्हानान दिडहेन्से आखम्बा चीम भिबा था याइसी येशूसे थेदा “तिग एदा खम्बा सेम मुला?” भिसी इयोइमा,⁷ थे आखम्बा म्हिसे, “लास्सो, घ्योइला क्युइ ल्हिइबा धुइरी डादा घ्योइरी झाइसी पिन्बा डाला खालै आरे। थेतबासेलमा डा घ्योइरी वाइबारी निना निनान डा भन्दा डाच्छा स्थान्दो म्हि वाइला” भिसी भिजी।
⁸ जमाहेन्से येशूसे थेदा “रे:गो, ओच्छे हाडला तीबा नान्बा पुइसी भ्रउ” भिसी सुइजी।

⁹ येशूसे थेहइ सुइछ्याम थे म्हि खम्जी। जमाहेन्से थे हाडला तीबा नान्बा पुइसी भ्रजी। जमाकुनु ब्लप्बा न्हबा धिन मुबा।¹⁰ थेतबासेलमा यहूदी धर्मगुरुगदेसे थे म्हिदा “तिनी ब्लप्बा न्हबा धिन हिन्ना, एसे तीबा नान्बा पुइबारी आत” भिसी भिजी।

¹¹ जमाहेन्से थेसे “जुन म्हिसे डादा खम्ना लजी थेसेन डादा तीबा नान्बा पुइसी भ्रउ भिसी सुइबा हिन्ना” भिसी भिजी।¹² थे म्हिगदेसे थेदा “एदा तीबा नान्बा पुइसी भ्रउ भिबा म्हि खाल हिन्ना?” भिसी इयोइजी।¹³ तर हाडला खम्ना लबा म्हि खाल हिन्ना भिसी थेसे डोसेबा आरेमुबा। तिग्दा भिसम थेरी म्हिगदे ल्हानान पोप तबासे लमा म्हिला हुल न्हडग्याम येशू सुटक्क फेज्जी जिन्बा मुबा।

¹⁴ लिच्छा येशूसे थेदा परमेश्वरला मन्दिररी स्याप्सी, “च्यागो, ए खम्सी जिन्बा मुला। थेतबासेलमा एसे दो:सी पाप थालउ, चुदे पाप लजी भिसम एदा चु भन्दा आज्यबा तला” भिसी सुइजी।¹⁵ थे निसी हाडला खम्ना लबा म्हि येशू चीम भिसी यहूदी धर्मगुरुगदेदा पाइजी।

परमेश्वरला झाग्याम याइबा जुनी

¹⁶ येशूसे चु गे ब्लप्बा न्हबा धिनकुनु लबासे लमा यहूदी धर्मगुरुगदेसे येशूदा बिरोध लबारी छ्याइजी।¹⁷ तर येशूसे “डाला आबासे सदन गे लमुला। ओच्छे डाइनोन सदन गे लला” भिसी सुइजी।¹⁸ थेतबासेलमा यहूदी धर्मगुरुगदेसे झन येशूदा साइबारी म्हाइजी, तिग्दा भिसम थेसे ठिम अन्धार ब्लप्बा न्हबा धिनकुनु लबारी आतबा गे जे लबा आहिन, तर थेसे हाडसे हाडदान परमेश्वर हइबान स्होसी परमेश्वरदा हाडला आबा भिसी सुइबा।

¹⁹ येशूसे थेनीगदेदा चुहइ भिसी सुइजी, “च्यागो, एनीगदेसे डाला ताम इयान्गो, आबासे जुन जुन लबा म्हाइला झासेनोन थेनोन गे जे लला, तर झासे जे तिगै गे लबारी आखम। तिग्दा भिसम आबासे जुन गे लला झासेनोन थेनोन गे लला।²⁰ तिग्दा भिसम आबासे झादा माया लसी हाडसे लबा जम्मान गे उन्ना। ओच्छे थेसे अझ चु भन्दान घ्रेन घ्रेन गे हाडला झादा उन्ना। ओच्छे एनीगदे उदेक तगै भिसी थेसे अझ चु भन्दा घ्रेन घ्रेन गे लला।²¹ आबासे सिबागदेदा सोना लसी जुकजुकधोनाला जुनी पिन्बा हइ लसी झासेनोन जुन म्हिदा सेम निला थेदा जुकजुकधोनाला जुनी पिन्ना।²² आबासे खालैलान निसाफ आल। तिग्दा भिसम जम्मादान निसाफ लबा अधिकार आबासे झादा पिन्बा मुला।²³ आबादा मान लबा हइ लसी झादाएनोन मान लगै भिसीन आबासे चुहइ लबा हिन्ना। तिग्दा भिसम जुन म्हिसे झादा मान आल थेसे झादा पुइखबा आबादाएनोन मान आल।

²⁴ “थेतबासेलमा एनीगदेसे डाला ताम इयान्गो, जुन म्हिसे डाला ताम इयान्सी डादा पुइखबादा विश्वास लला थेसे जुकजुकधोनाला जुनी याइला। ओच्छे थेदा दोषएनोन आल, बरु थे सिबाला तहग्याम थोन्ना। जमाहेन्से थेसे जुकजुकधोनाला जुनी याइला।²⁵ च्यागो, एनीगदेसे डाला ताम इयान्गो, थे धुइ खबान मुला, थे धुइ डाच्छान खसी जिन्बा मुला। थेतबासेलमा सिबागदे न्हडला जुन जुन्से परमेश्वरला झाला काइ थे:ला थेनीगदे सोला।²⁶ तिग्दा भिसम परमेश्वर आबा हाडदेन छ्यामनोन जुकजुकधोनाला जुनी मुला, थेहइ लसीन थेसे हाडला झादाएनोन जुकजुकधोनाला जुनी पिन्बा अधिकार मुबा म्हि स्होबा मुला।²⁷ ओच्छे निसाफ लबा अधिकार थेदान पिन्बा मुला। तिग्दा भिसम परमेश्वरसे पुइखबा म्हि थेनोन हिन्ना।

‡‡ यहूदीगदेला ठिम अन्धार ब्लप्बा न्हबा धिनकुनु तिगै गे लबारी आतमुबा।

28 “डाला ताम थे:सी एनीगदे उदेक थातउ। तिग्दा भिसम चुहड्बा धुइ खबान मुला, थे धुइरी परमेश्वरसे पुइखबा म्हिला काइ थे:सी सिबागदे जम्मान दो:सी सोला। 29 ज्यबा गे लबागदे जुकजुकधोनाला जुनी याइबारी दो:सी सोला ओच्छे आज्यबा गे लबागदे सजाय नाबाला लागिरी दो:सी सोला। †

30 “डाइ हाडसेन तिगै लबारी आखम, परमेश्वर आबासे सुइबा अन्धार निसाफ लबासे लमा डाइ लबा निसाफ ठीक तमुला। तिग्दा भिसम डाइ म्हन्बा अन्धार आहिन, तर डादा पुइखबासे म्हन्बा अन्धार डाइ गे लमुला।

31 “चुदे डाइ डाला बारेरी जे पाइजी भिसम एनीगदेसे डाइ पाइबा ताम सत्य हिन्ना भिसी था आयाइ। 32 तर डाला बारेरी परमेश्वर आबासेन सुइला, थेसे डाला बारेरी जुन ताम सुइला थे जम्मान ताम सत्य हिन्ना भिसी डादा था मुला।

33 “एनीगदेसे ताम घोबाला लागिरी हाडला म्हिगदेदा बप्तिस्मा पिन्बा यूहन्ना मुबा ग्लारी पुइजी। ओच्छे थेसे थेनीगदेदा सत्य ताम पाइजी। †34 डाइ म्हिगदेसे डाला बारेरी तिग ताम पाइमुला भिसी भर लबा आहिन, तर एनीगदेदा थार्ना लबाला लागिरीन डाइ चु ताम पाइबा हिन्ना। 35 यूहन्ना मी लुइसी व्हाल तना लबा नाडसल हड्बान मुबा, तर थेसे पिन्बा व्हालरी एनीगदे छिन्ड जे ताइबारी म्हाइजी।

36 “तर डाला बारेरी ताम पाइबा यूहन्ना भन्दाएनोन घेन ताम चुरी मुला। तिग्दा भिसम जुन गेगदे पूरा लबारी आबासे डादा पिन्बा मुला, थे गेगदे डाइ लबान मुला। चु गेसेन डादा परमेश्वरसे पुइखबा हिन्ना भिसी उन्बा मुला। 37 डादा पुइखबा आबासेनोन डाला बारेरी सुइबा मुला। तर एनीगदेसे थेला काइ खाइमै थे:बा आरे, ओच्छे थेदा म्हाइबाएनोन आरे। †38 थेसे सुइबा बचन एनीगदेला सेमरी आचि। तिग्दा भिसम थेसे पुइखबा म्हिदा एनीगदेसे विश्वास आलनी। 39 एनीगदेसे जुकजुकधोनाला जुनी याइला भिसी बचनरी म्हाइमुला, थे बचनसेनोन डाला बारेरी पाइमुला। 40 तसैनोन जुकजुकधोनाला जुनी याइबाला लागिरी एनीगदे डा मुबा ग्लारी खबारी आम्हाइमुला।

41 “म्हिगदेसे डादा जयजयकार लगै भिसी डाइ म्हन्बा आरे। 42 तर एनीगदे परमेश्वरदा माया आलबा खाहड्बा खाल्ला म्हि हिन्ना भिबा ताम डादा था मुला। 43 डा हाडलान आबाला मिन किन्सी खमाएनोन एनीगदेसे डादा मान आलनी। तर स्ट्हान्दो खालै म्हि हाडलान मिन किन्सी खजी भिसम एनीगदेसे थेदा मान लला। 44 एनीगदेसे डादा खाहड् लसी विश्वास लखम्ला? एनीगदे हाड हाड न्हडरी चा गिकसेम गिकदा मान लगै भिसी म्हन्बा, तर परमेश्वरग्याम जे याइबा मान चा किन्बारी आम्हाइबा।

45 “परमेश्वर आबाला ओन्छाडरी डाइ एनीगदेला दोष उन्ना भिसी थाम्हन्गो। तर थार्बा पिन्ना भिसी एनीगदेसे विश्वास आश लबा मोशाला ठिमरी मुबा तामसेन एनीगदेला दोष उन्ना। 46 च्यागो, एनीगदेसे मोशादा विश्वास लबा हिन्सम दान्दे डादाएनोन विश्वास लसेला मुबा। तिग्दा भिसम थेसे डालान बारेरी भिबा मुबा! 47 तर मोशासे भिबा तामनोन एनीगदेसे विश्वास लबारी आखम्नी भिसम डाइ पाइबा ताम इन खाहड् लसी विश्वास लखम्ला?”

येशूसे हजार डा म्हिगदेदा चबा स्हे पिन्बा
मत्ती १४:१३-२१; मर्कूस ६:३०-४४; लूका ९:१०-१७

6 जमाहेन्से येसू गालील समुन्द्रला क्याम्सडपट्टि फेज्जी। थे समुन्द्रदा तिबेरियास समुन्द्र भिसीनोन भिमुबा। 2 ओच्छे ल्हानान म्हिला हुलएनोन येसूला लिच्छा लिच्छा निजी। तिग्दा भिसम आखम्बा म्हिगदेदा येसूसे ल्हानान रेम खम्ना लबा उदेकला चिनुगदे थेनीगदेसे म्हाइबा मुबा। 3 ओच्छे येसू गडरी फेप्सी हाडला चेलागदेदेन छ्याम थेरीन धन्ख्याजी। 4 थे धुइरी यहूदीगदेला मिश्र यहुत्साग्याम फेसी खबा धिनदा ढन्सी धड्बा चाडएनोन खबारी छ्याइबा मुबा।

5 येसूसे क्युर्सीन स्हीमा हाड मुबा ग्लारी ल्हानान म्हिगदे खबान लबा म्हाइसी फिलिपदा “चु म्हिगदेदा पिन्बाला लागिरी व्हाडसे खानड्यामसे गेड

† 5:29 दानि १२:२ †† 5:33 यूह १:१९-२७; ३:२७-३० † 5:37 मत्ती ३:१७; मर्कूस १:११; लूका ३:२२

ग्लुसी भसे?” भिसी सुइजी। 6 येसूसे थेला सेम च्याबाला लागिरी थेहड् भिसी सुइबा मुबा। तिग्दा भिसम हाडसे तिग लबारी छ्याइबा मुबा, थे ताम येसूदा था मुबा।

7 फिलिपसे येसूदा “व्हाडसे ग्यार्जा न्ही म्हुइला डबलसे गेड ग्लुसी भसैनोन चुरी मुबा म्हिगदेदा जजाकर सुत्तै आथोप” भिसी भिजी। †

8 येसूला चेला सिमोन पत्रुसला आले अन्दियाससे येसूदा, 9 “चुरी कोला गिकदेन छ्याम जौला गोर डा गेडदेन गोर न्ही तार्डा मुला। तिग चुदेसे चु जम्मान म्हिगदेदा छयोला?” भिसी भिजी।

10 येसूसे चेलागदेदा “म्हिगदेदा चिपुङ्गो” भिसी सुइजी। थेरी घेन पाडग्याल मुबा, थेरी हजार डा ते चा हेम्फेबे जे मुबा। 11 जमाहेन्से येसूसे गेड छ्यारी थोसी परमेश्वरदा धन्यवाद पिन्नाहेन्से जम्मान म्हिदा भो लसी पिन्जी, ओच्छे तार्डाएनोन भो लसी पिन्जी। थेरी मुबा जम्मान म्हिसे घेन्ना चजी।

12 थेनीगदे जम्मासेन घेन्ना चसी जिन्नाहेन्से येसूसे हाडला चेलागदेदा “लेड्बा टगलटोगोल खेरो थानिगै, जम्मान पोप लउ” भिसी सुइजी।

13 थेतबासेलमा थेनीगदेसे चसी लेड्बा गोर डा जौला गेडला टगलटोगोल दुइमा च्युक न्ही सोली तजी।

14 येसूसे लबा चुहड्बा उदेकला गे म्हाइसी म्हिगदेसे “जम्बुलिडरी फेखला भिसी बचनसे व्हाडदा पाइबा अगमवक्ता †† चा पक्कान चुनोन चीम” भिसी भिजी। ††15 थेतबासेलमा म्हिगदे खसी हाडदा जबरजस्ती ग्ले स्होबारी म्हाइबा मुला भिबा ताम था याइसी येसू दो:सी हाड गिकनोन गडरी फेज्जी।

येसू समुन्द्रथोरी भ्रबा

मत्ती १४:२२-२३; मर्कूस ६:४५-५२

16 ड्यसे तमाहेन्से येसूला चेलागदे समुन्द्रपट्टि निजी। 17 ओच्छे थेनीगदे दौंगारी क्रे:सी समुन्द्रला क्याम्सड कफर्नहुम भिबा शहरपट्टि निजी। थे धुइरी धोप तसी जिन्बा मुबा, तसैनोन अइ येसू थेनीगदे मुबा ग्लारी फेखबा आरेमुबा। 18 घेन लाबा खबासे लमा समुन्द्ररी छाल रे:बारी छ्याइजी। 19 चेलागदे दौंगा चलब लसी ओस्पन कोस गिक-न्ही ते थारेड धोमा, थेनीगदेसे येसू समुन्द्र थोथोरी भ्रसी हाडगदे मुबापट्टि फेखबान लबा म्हाइजी। चु म्हाइसी थेनीगदे लोइजी। 20 तर येसूसे थेनीगदेदा “डानोन हिन्ना, थालोङ्गो” भिसी सुइजी। 21 चु ताम थे:सी थेनीगदे ल्हानान ताइजी, ओच्छे येसूदा दौंगारी धन्ख्यापुइजी। जमाहेन्से तुरुन्तन थेनीगदे धोतो:बा ग्लारी धोजी।

22 ओच्छे समुन्द्रला क्याम्सडपट्टि मुबा म्हिगदेसे न्हडगरदड थेरी दौंगा गिक जेन म्हाइजी। डाच्छाकुनु येसू चेलागदेदेन छ्याम दौंगारी फेखा आरेमुबा, तर थेला चेलागदे जे निमुबा भिबा ताम थेनीगदेदा था मुबा। 23 जमाहेन्से तिबेरियास भिबा शहरग्याम अर्गु दौंगागदे येसूसे परमेश्वरदा धन्यवाद पिन्सी थेनीगदेदा गेड पिन्बा ग्लाला डामरी धोखजी। 24 थेरी येसूदेन छ्याम चेलागदे आरेबा था याइसी थेनीगदे दौंगागदेरी क्रे:सी येसूदा म्हाइबान कफर्नहुम शहररी निजी।

जुनी पिन्बा गेड

25 थेनीगदेसे येसूदा समुन्द्रला क्याम्सडपट्टि स्याम्पाहेन्से “गुरु, हाड चुरी खाइमा फेखजी?” भिसी इयोइजी।

26 जमाहेन्से येसूसे थेनीगदेदा चुहड् भिसी सुइजी, “एनीगदेसे डाला ताम इयान्गो, डाइ लबा उदेकला गे म्हाइसी आहिन, तर घेन्ना गेड चम्पाइबासे लमान एनीगदेसे डादा म्हाइबा हिन्ना। 27 च्यागो, नाश तसी निबा चबा स्हेला लागिरी जे दुख लसी गे थालउ, तर जुकजुकधोना चिबा चबा स्हेला लागिरी दुख लसी गे लउ। चु चबा स्हे एनीगदेदा परमेश्वरसे पुइखबा म्हिसे पिन्ना। तिग्दा भिसम चु गे लबाला लागिरीन परमेश्वर आबासे थेदा धम्बा मुला।”

†† थे धुइरी धिन गिक गे लमा सिगा गिक म्हुइला डबल गिक याहुबा। ††† “पाइबा अगमवक्ता” भिबा चा यूहन्ना हिन्ना (१:२१ स्हीगो)। ††† 6:14 व्यव १८:१५

28 जमाहेन्से थेनीगदेसे येशूदा “थेह्ण्ड् भिसम परमेश्वरसे म्हन्बा अन्छारला गे लबाला लागिरी डन्से तिग लतोःला?” भिसी इयोइमा, 29 येशूसे थेनीगदेदा “परमेश्वरसे पुइखबा म्हिदा विश्वास लउ, एनीगदेसे लगै भिसी परमेश्वरसे म्हन्बा गे चा थेनोन हिन्ना” भिसी सुइजी।

30 जमाहेन्से थेनीगदेसे येशूदा भिसी भिजी, “डन्से हाडदा विश्वास लबाला लागिरी हाडसे डन्दा खाह्ण्ड् उदेकला चिनु उन्खम्ला? हाडसे तिग लखम्ला? 31 ऱ्हाडला आखे म्हमेगदेसे मी तोडतोडबा ग्लारीएनोन मन्न † चजी। चु ताम बचनरीन ‘परमेश्वरसे थेनीगदेदा स्वर्ग्याम गेड पिन्जी’ भिसी भिबा मुला।” ††

32 येशूसे थेनीगदेदा चुह्ण्ड् भिसी सुइजी, “च्यागो, एनीगदेसे डाला ताम इयान्गो, एनीगदेदा स्वर्ग्याम गेड पिन्बा मोशा आहिन। तर स्वर्ग्याम सत्य गेड पिन्बा चा डाला आबा हिन्ना। 33 तिगदा भिसम परमेश्वरसे पिन्बा गेड चा चुनोन हिन्ना, थे स्वर्ग्याम खसी जम्बुलिडला म्हिगदेदा जुनी पिन्मुला!”

34 थेनीगदेसे येशूदा “प्रभु, चु गेड डन्दा सदन पिन्गो” भिसी भिजी।

35 जमाहेन्से येशूसे थेनीगदेदा चुह्ण्ड् भिसी सुइजी, “जुकजुकधोनाला जुनी पिन्बा गेड चा डानोन हिन्ना। डा मुबा ग्लारी खबागदे खाइमै आखेन, ओच्छे डादा विश्वास लबागदेदा खाइमै क्युइ आफुइ। 36 तर डाइ एनीगदेदा पाइसी जिन्बा मुबा, एनीगदेसे डादा म्राइसैनोन विश्वास आलनी।

37 आबासे डादा पिन्बा जति जम्मान डा मुबा ग्लारी खला, डा मुबा ग्लारी खबागदेदा डाइ तिगै लसीन आखला। 38 डा हाडसे म्हन्बा अन्छारला गे लबारी खबा आहिन, तर डादा पुइखबासे म्हन्बा अन्छारला गे लबारी डा स्वर्ग्याम खबा हिन्ना। 39 डादा पुइखबासे म्हन्बा ताम चा थेसे डादा पिन्बा म्हिगदे डाय्याम गिकनोन थाम्हागै, तर चु जम्बुलिडरी डा दोःसी खबा धुइरी डाइ थेनीगदेदा सोना लबारी खमौ भिसी हिन्ना। 40 तिगदा भिसम डाला आबासे म्हन्बा ताम चा चुनोन हिन्ना, डादा म्राइसी थेदा विश्वास लबागदे जम्मासेन जुकजुकधोनाला जुनी याइगै, ओच्छे डा दोःसी खबा धुइरी डाइ थेनीगदेदा सिबाग्याम सोना लला।”

41 “स्वर्ग्याम खबा गेड डानोन हिन्ना” भिसी येशूसे सुइबासे लमा यहूदी गन्बागदेसे येशूला बिरोध लसी ताम लबारी छ्याइजी। 42 थेनीगदेसे, “तिग चु योसेफला डा येशू आहिन?, चुला आबा आमादा ऱ्हाडसे डोसेबा आरे?, खाह्ण्ड् लसी चुसे ‘डा स्वर्ग्याम खबा हिन्ना’ भिसी पाइबा” भिसी भिजी।

43 जमाहेन्से येशूसे थेनीगदेदा चुह्ण्ड् भिसी सुइजी, “एनीगदेसे हाड हाड न्हडरी डाला बिरोध लसी ताम थालउ। 44 तिगदा भिसम डादा पुइखबा आबासे डा मुबा ग्लारी खबा सेम आपिन्तेधोना खालैनोन डा मुबा ग्लारी खबारी आखम। डा मुबा ग्लारी खबागदे जम्मादान डा दोःसी खबा धुइरी डाइ सोना लला। 45 अगमवक्तागदेसेनोन परमेश्वरला बचनरी ‘परमेश्वरसेन जम्मान म्हिगदेदा लोप्ला’ भिसी भिबा मुबा। परमेश्वर आबाला ताम थेःसी थेग्यामसेन लोप्ला म्हिगदे जम्मान डा मुबा ग्लारी खला। 46 परमेश्वर आबाग्याम खबा म्हिसे जे परमेश्वरदा म्राइबा मुला। तर स्हान्दो खालैसेन थेदा म्राइबा आरे। 47 थेतबासेलमा एनीगदेसे डाला ताम इयान्गो, जुन म्हिसे विश्वास लला थेसे जुकजुकधोनाला जुनी याइबा मुला। 48 च्यागो, जुकजुकधोनाला जुनी पिन्बा गेड डानोन हिन्ना। 49 एनीगदेला आखे म्हमेगदेसे तोडतोडबा ग्लारी मन्न चजी, तसैनोन थेनीगदे सिजी। 50 तर स्वर्ग्याम खबा गेड चुनोन हिन्ना, जुन म्हिसे चु गेड चला थे खाइमै आसि। 51 स्वर्ग्याम खबा छोन्बो गेड चा डानोन हिन्ना, जुन म्हिसे चु गेड चला थे खाइमै आसि। चु गेड चा डाइ जम्बुलिडला म्हिगदेसे जुकजुकधोनाला जुनी याइगै भिसी पिन्ना। थे गेड चा डालान ल्हुइ हिन्ना।”

52 चु ताम थेःसी यहूदीगदेदा बोमो रेःसी हाड हाड न्हडरी चुह्ण्ड् भिसी ताम लबारी छ्याइजी, “चु म्हिसे खाह्ण्ड् लसी हाडला ल्हुइ ऱ्हाडदा चबारी पिन्खम्ला?”

53 जमाहेन्से येशूसे थेनीगदेदा चुह्ण्ड् भिसी सुइजी, “च्यागो, एनीगदेसे डाला ताम इयान्गो, चुदे एनीगदेसे परमेश्वरसे पुइखबा म्हिला ल्हुइ आचनी भिसम, का आथुइनी भिसम एनीगदेदेन छ्याम जुकजुकधोनाला जुनी आत। 54 तर डाला ल्हुइ चबा, डाला का थुइबा म्हिदेन छ्याम

जुकजुकधोनाला जुनी तला। ओच्छे डा दोःसी खबा धुइरी डाइ थेदा सिबाग्याम सोना लला। 55 तिगदा भिसम चनोन तोःबा स्हे चा डाला ल्हुइ हिन्ना ओच्छे थुइनोन तोःबा स्हे चा डाला का हिन्ना। 56 डाला ल्हुइ चबा, डाला का थुइबा म्हि डादेन छ्याम तला, ओच्छे डा थेदेन छ्याम तला। 57 छोन्बो परमेश्वरसे डादा पुइखबासे लमा डा थेग्यामसे सोला, थेह्ण्ड् लसीन डादा चबा म्हिएनोन डाय्यामसेन सोला। 58 स्वर्ग्याम खबा गेड चुनोन हिन्ना। चु गेड एनीगदेला आखे म्हमेगदेसे चबा गेड ह्ण्ड्बा आहिन। थेनीगदेसे थे गेड चजी तसैनोन थेनीगदे सिजी। तर चु गेड चबा म्हिगदे चा खाइमै आसि।” 59 चु ताम चा येशूसे कफर्नहुम भिबा शहररी यहूदीगदे हुप तबा दिमरी म्हिगदेदा लोप्ला धुइरी सुइबा मुबा।

ल्हानान चेलागदेसे येशूदा खलाबा

60 चु ताम थेःमाहेन्से येशूला चेलागदे न्हडला ल्हानानसे “चुह्ण्ड्बा गाहो बचन खाल्से ड्यान्खम्ला?” भिसी भिजी।

61 तर चेलागदेसे चु तामला बारेरी ताम लबान मुला भिबा था याइसी येशूसे थेनीगदेदा चुह्ण्ड् भिसी सुइजी, “तिग डाइ पाइबा तामसे लमा एनीगदेला विश्वास म्हाबा हिन्ना? 62 थेह्ण्ड् भिसम एनीगदेसे परमेश्वरसे पुइखबा म्हिदा स्वर्गरी दोःसी निबा म्राइवा एनीगदेला सेमरी खाह्ण्ड्बा छोर्ला? 63 जुकजुकधोनाला जुनी पिन्बा चा परमेश्वरला आत्मासेन हिन्ना। चु गे चा म्हिला शक्तिसे लबारी खम्बा गे आहिन। डाइ एनीगदेदा पाइबा ताम चा परमेश्वरला आत्मासे पिन्बा जुकजुकधोनाला जुनीला बारेरी हिन्ना। 64 तर एनीगदे न्हडरी गातेसे मी चु ताम विश्वास लबा आरे।” तिगदा भिसम खाल्से विश्वास आल, खाल्से हाडदा धोका पिन्ना भिबा ताम येशूदा डाच्छाहेन्सेन था मुबा। 65 जमाहेन्से दोःसी येशूसे थेनीगदेदा “थेतबासेलमान डाइ एनीगदेदा चु ताम पाइबा हिन्ना, चुदे डाला आबासे डा मुबा ग्लारी खआपुइनी भिसम खालै म्हि डा मुबा ग्लारी खबारी आखम” भिसी सुइजी। 66 चु तामसे लमा जमाकुनुहेन्से चेलागदे न्हडला ल्हानान चेलागदे येशूदेन छ्याम भ्रबारी खलाजी।

67 थेतबासेलमा येशूसे हाडला च्युक न्ही चेलागदेदा “तिग एनीगदेएनोन डादा खलासी निबा हिन्ना?” भिसी सुइजी। 68 जमाहेन्से सिमोन पत्रुससे येशूदा भिसी भिजी, “प्रभु, जुकजुकधोनाला जुनी पिन्बा बचन मी हाडदेन छ्याम मुला भिसम डनी खाल मुबा ग्लारी निसे? 69 हाड परमेश्वरसे पुइखबा परमेश्वरला म्हि हिन्ना भिबा ताम डन्से था याइसीन हाडदा विश्वास लबा हिन्ना।”

70 येशूसे थेनीगदेदा “एनीगदे च्युक न्हीदान डाइ धम्बा हिन्ना, तसैनोन एनीगदे न्हडला गिक चा शैतान हिन्ना” भिसी सुइजी। 71 चु ताम येशूसे सिमोन इस्करियोतला डा यहूदाला बारेरी सुइबा मुबा। तिगदा भिसम च्युक न्ही चेला न्हडला तसैनोन थेसे लिच्छा येशूदा धोका पिन्बारी छ्याइबा मुबा।

यहूदीगदेसे छाप्रोरी चिसी धड्बा चाड

7 जमाहेन्से येशू गालील अञ्चललान नाम्सा नाम्सारी फेज्जी, तर यहूदिया अञ्चलरी चा फेज्बा सेम आलनी। तिगदा भिसम यहूदीगदेसे येशूदा साइबारी म्हाइमुबा। 2 थे धुइरी यहूदीगदेसे छाप्रोरी चिसी धड्बा चाड # खबारी छ्याइबा मुबा। ##3 थेतबासेलमा येशूदा हाडला आलेगदेसेनोन खिसी लसी चुह्ण्ड् भिसी भिजी, “चु ग्ला खलासी हाड यहूदिया अञ्चलरी फेज्जोन फेज्जो, थेरीनोन हाडसे लबा गेगदे हाडला चेलागदेसे म्राइ। 4 हाडदा जम्मासेन डोसेगै भिसी म्हन्बा म्हिसे खाइमै लासी गे आलमुला। हाडसेनोन थेह्ण्ड्बान गेगदे लबा मुसम हाड खाल हिन्ना भिबा ताम जम्बुलिडला म्हिगदेदा डोसेना लउ।” 5 तिगदा भिसम येशूला आलेगदेसेनोन येशूदा विश्वास आलमुबा।

6 थेतबासेलमा येशूसे थेनीगदेदा चुह्ण्ड् भिसी सुइजी, “डाला लागिरी धुइ तबा आरे। तर एनीगदेला लागिरी मी खजिबै धुइ मुसै ठीक मुला।

† “मन्न” भिबा चा परमेश्वरसे स्वर्ग्याम पिन्बा गेड हिन्ना। †† 6:31 प्रस्था १६:१५, ३१; भजन ७८:२४ ‡ 6:45 यशै ५४:१३

‡ 6:68 मत्ती १६:१६; मर्कू ८:२९; लूका ९:२० †† चु चाड यहूदीगदेसे हाडला आखे म्हमेगदे बोगल न्ही दिडधोना तोडतोडबा ग्लारी चिबा धुइदा ढन्बाला लागिरी छाप्रोरी चिसी धड्बा। ††† 7:2 लेवी २३:३४; व्यव १६:१३

7 एनीगदेदा जम्बुलिडला म्हिगदेसे हेला आलमुला, तर डादा चा हेला लमुला। तिग्दा भिसम थेनीगदेला बानीबेहोर आज्यबा मुला भिसी डाड पाडमुला।⁸ एनीगदे चा चाड धड्बारी निउ, डा दान्दे आनि। तिग्दा भिसम डाला धुइ तबा आरे।⁹ थेहड् सुड्सी येशू गालीलरीन धन्ड्याजी।

¹⁰ तर येशूला आलेगदे चाड धड्बारी निमाहेन्से येशूएनोन खालैसे था आयाइना लसी थेरी फेज्जी।

¹¹ थेरी यहूदी नेतागदेसे येशूदा म्हाइबान, “थे म्हि खानड मुला?” भिसी म्हिगदेदा ड्योड्जी।

¹² ल्हानान म्हिगदेसे येशूला बारेरी चुहड् भिसी ताम लबान मुबा, कोड कोडसे “थे ज्यबा म्हि हिन्ना” भिसी भिमुबा। तर कोड कोडसे चा “आहिन, थेसे ल्हानान म्हिगदेदा न्होड्ना लबा मुला” भिसी भिमुबा।¹³ तसैनोन यहूदी नेतागदेदेन छ्याम लोड्सी खालैसेन येशूला बारेरी स्थान्दो म्हिसे था याड्ना लसी ताम आलमुबा।

चाडला धुइरी येशूसे म्हिगदेदा लोप्ला

¹⁴ चाडला गुडरी परमेश्वरला मन्दिररी फेप्सी येशूसे म्हिगदेदा लोप्लारी छ्याड्जी।¹⁵ यहूदी नेतागदे उदेक म्हन्बान, “चुसे तिगै पढब आलना चुहड्बा ज्ञान बुद्धि खानड्ग्याम याड्जी?” भिसी भिजी।

¹⁶ जमाहेन्से येशूसे थेनीगदेदा चुहड् भिसी जोहाब पिन्जी, “डाड डाला ताम लोप्ला आहिन, तर डादा पुड्खबा परमेश्वरला ताम लोप्ला हिन्ना।

¹⁷ चुदे खालै म्हिसे परमेश्वरसे म्हन्बा अन्धार लबारी म्हाइजी भिसम थेसे जे डाड लोप्ला ताम परमेश्वरग्याम हिन्ना कि डालान सेमला ताम लोप्ला हिन्ना भिसी था याड्ला।¹⁸ जुन म्हिसे हाडलान ताम पाड्ला थेसे हाडदान मान लगै भिसी म्हन्मुला। तर हाडदा पुड्खबादा मान लगै भिसी म्हन्बा म्हिसे चा सत्य ताम पाड्मुला, थेसे तिगै लुसीला ताम आलमुला।¹⁹ मोशासे एनीगदेदा ठिम पिन्बा मुला, तसैनोन एनीगदेसे मोशासे पिन्बा ठिम अन्धार गे आलनी। एनीगदेसे डादा तिग्दा साड्बारी म्हाइबा?”

²⁰ थेरी मुबा म्हिला हुलसे येशूदा “एदा म्हडसे स्याप्जीम, खाइ एदा खाल्से साड्बारी म्हाइबा मुला?” भिसी भिजी।

²¹ जमाहेन्से येशूसे थेनीगदेदा चुहड् भिसी सुड्जी, “डाड गे गिक लमा एनीगदे तिग्दा उदेक म्हन्बा? ²² च्यागो, खतना लउ भिसी एनीगदेदा मोशासे ठिम स्होसी पिन्बा मुला। हिन्बाम थे ठिम मोशासे स्होबा आहिन, एनीगदेला आखे म्हमेसेन स्होबा हिन्ना। थेतबासेलमा एनीगदेसे ब्लप्ला न्हबा धिनकुनुएनोन हाडला झागदेला खतना लमुला।^{†23} य्हाडसे मोशासे पिन्बा ठिम आखलागे भिसी ब्लप्ला न्हबा धिनरीएनोन खतना लमुला भिसम डाड चा आखम्बा म्हि गिकदा खम्ना लमा एनीगदेसे तिग्दा डादा बोमो लबा? ^{††24} एनीगदेसे म्हिला ली च्यासी निसाफ थालउ, तर ठीक लसी निसाफ लउ।”

तिग चुनोन ख्रीष्ट हिन्ना?

²⁵ यरूशलेमग्याम खबा कोड कोड म्हिगदेसे चुहड् भिसी भिजी, “तिग यहूदी धर्मगुरुगदेसे साड्बारी म्हाइबा म्हि चुनोन आहिन? ²⁶ च्यागो, आलोड्नान चुसे जम्मादान लोप्लान मुला, तर चुदा थेनीगदेसे तिगै आपाड्नी! डन्ना नेतागदेसेनोन चुनोन थार्बा पिन्बा ख्रीष्ट हिन्ना भिसी पक्कान था याड्जी कि तिग? ²⁷ चु म्हि खाहड् लसी थार्बा पिन्बा ख्रीष्ट हिन्ना, तिग्दा भिसम चु म्हि खानड्ग्याम खबा हिन्ना भिबा ताम य्हाडदा था मुला। तर ख्रीष्ट फेप्लबा धुइरी खानड्ग्याम फेप्लला भिबा ताम खालैदान था आत।

²⁸ थे धुइरी परमेश्वरला मन्दिररी लोप्लान लमा येशूसे ग्रेन काइरी चुहड् भिसी सुड्जी, “डा खानड्ग्याम खबा हिन्ना भिबादेन डा खाल हिन्ना भिबा ताम एनीगदेदा पक्कान था मुला। च्यागो, डा हाडनोन खबा आहिन, तर डादा खालैसे पुड्खबा हिन्ना थे चा सत्य हिन्ना, एनीगदेसे थेदा डोसेबा आरे।²⁹ तर डाड थेदा डोसेबा मुला। तिग्दा भिसम थेसे पुड्खबासे लमा डा थेग्याम खबा हिन्ना।”

³⁰ चु ताम थे:सी थेनीगदेसे येशूदा चुड्बारी म्हाइजी। तर खालैसेन या आझाड्नी, तिग्दा भिसम येशूला धुइ तबा आरेमुबा।³¹ थेरी मुबा ल्हानान म्हिगदेसे येशूदा विश्वास लजी। ओच्छे थेनीगदेसे, “थार्बा पिन्बा ख्रीष्ट फेप्लसी, तिग चु म्हिसे भन्दा अझ उदेकला गेगदे लला?” भिसी भिजी।

येशूदा चुड्बारी म्हाइबा

³² म्हिगदेसे येशूला बारेरी खासखास खुसखुस ताम लबान लबा फरिसीगदेसे थे:जी। जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे येशूदा चुड्बाला लागिरी परमेश्वरला मन्दिर खुड्बा सिपाहीगदेदा पुड्जी।

³³ येशूसे म्हिगदेदा चुहड् भिसी सुड्जी, “तिगै धिनधोना डा एनीगदेदेन छ्यामनोन तला, जमाहेन्से डादा जुन्से पुड्खबा मुला, डा थे मुबा ग्लारीन निला।³⁴ ओच्छे एनीगदेसे डादा म्हाइला, तर आस्याप। तिग्दा भिसम डा निबा ग्लारी एनीगदे खबारी आखम।”

³⁵ चु ताम थे:सी यहूदी नेतागदेसे हाड हाड न्हडरी चुहड् भिसी भिजी, “चु म्हि खानड निबारी छ्याड्जी? एनीगदेसे डादा आस्याप भिसी भिमुला। अर्गु य्हुल्सारी ससा बडबड तसी चिबा यहूदीगदे मुबा ग्लारी निसी थे य्हुल्साला ग्रीक ग्योड पाड्बा म्हिगदेदा लोप्लारी म्हाइजी कि तिग? ³⁶ ‘एनीगदेसे डादा म्हाइला, तर आस्याप। तिग्दा भिसम डा निबा ग्लारी एनीगदे खबारीन आखम’ भिसी चु म्हिसे तिग ताम पाड्बा?”

जुकजुकधोनाला जुनी पिन्बा क्युड

³⁷ चाड जिन्बा धिनकुनु अथवा मुल धिनकुनु येशूसे म्हिगदेला डाच्छा राप्सी ग्रेन काइरी चुहड् भिसी सुड्जी, “चुदे खालैदा क्युड फुड्बा मुसम डा मुबा ग्लारी खसी थुङ्गो।³⁸ परमेश्वरला बचनसे पाड्बा हड्दोन डादा विश्वास लबा म्हिला सेम न्हड्ग्याम जुकजुकधोनाला जुनी पिन्बा क्युड थोन्ना।”³⁹ चु ताम चा येशूसे हाडदा विश्वास लबा म्हिगदेसे याड्तो:बा परमेश्वरला आत्माला बारेरी सुड्बा मुबा। परमेश्वरसे थे धुइधोना हाडला आत्मा पुड्खबा आरेमुबा। तिग्दा भिसम थे धुइधोना येशूदा कुसरी टांगब लबादेन स्वर्गरी ग्रेन य्हालदेन शक्तिरी फेप्ला धुइ तबा आरेमुबा।

थे खाल?

⁴⁰ येशूला ताम थे:सी थेरी मुबा कोड कोड म्हिगदेसे “चु म्हि पक्कान थेनोन अगमवक्ता † हिन्ना” भिसी भिजी। ††

⁴¹ ओच्छे कोड कोडसे “चु थार्बा पिन्बा ख्रीष्ट हिन्ना” भिसी भिजी। तर कोड कोडसे चुहड् भिसी भिजी, “तिग गालील अज्वलग्यामसेनोन थार्बा पिन्बा ग्ले फेप्लला? ⁴² परमेश्वरला बचनरी थार्बा पिन्बा ख्रीष्ट दाऊदला सन्तानग्याम दाऊदलान नाम्सा बेथलेहेमग्यामसेन खला भिसी पाड्बा आरे?”⁴³ चुहड् लसी येशूसे लमा म्हिगदे हाड हाड न्हडरीन आडिक्नी।⁴⁴ थेनीगदे न्हडला गाते म्हिगदेसे येशूदा चुड्बारी म्हाइजी। तर थेनीगदे खालैसेन या आझाड्नी।

यहूदी धर्मगुरुगदेसे विश्वास आलबा

⁴⁵ परमेश्वरला मन्दिर खुड्बा सिपाहीगदे दो:सी खमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे थेनीगदेदा “खाइ, एनीगदेसे थेदा तिग्दा आभबा?” भिसी भिजी।

⁴⁶ जमाहेन्से थे सिपाहीगदेसे थेनीगदेदा “थे म्हिला ताम थे:सी डनी उदेक तजी। थेहड्बा ताम मी डन्से खाइमै थे:बा आरे” भिसी भिजी।

⁴⁷ जमाहेन्से फरिसीगदेसे थेनीगदेदा चुहड् भिसी भिजी, “एनीगदेदाएनोन थेसे झुक्याब लजी कि तिग? ⁴⁸ तिग यहूदी नेतागदेदेन फरिसीगदे खालैसे थेदा विश्वास लबा मुला? ⁴⁹ तर परमेश्वरसे मोशादा पिन्बा ठिम आसेबा चु म्हिगदेसे परमेश्वरग्याम सजाय याड्ला।”⁵⁰ डाच्छा म्हुनड तिरमे येशूदा हुप

† 7:37 लेवी २३:३६ †† 7:38 यशै ५८:११; जक १४:८ ††† “थेनोन अगमवक्ता” भिबा चा य्हुन्ना हिन्ना (य्हुन्ना १:२१ स्हीगो)। †††† 7:40 व्यव १८:१५ †††† 7:42 २ थमू ७:१२; यर्मि २३:५-६; मीका ५:२; भजन ८९:३-४

तबारी निबा थेनीगदे न्हडलान निकोदेमस भिबा म्हिसे चुहड् भिसी भिजी, †⁵¹ “तिग यहाडला ठिम अन्धार थे म्हिसे लबा तामदेन गे आघोनान यहाडसे थेदा दोष उन्बारी तला?”

⁵² तर स्थान्दोदेनसे थेदा “एएनोन गालील अज्चलला हिन्ना? परमेश्वरला बचन ज्यना लसी पढब लउ। जमाहेन्से एसे गालीलग्याम खाइमै खालै अगमवक्ता आख भिबा ताम था याड्ला” भिसी भिजी। ⁵³ जमाहेन्से थेनीगदे जम्मान हाड हाडला दिमरी निजी।

स्थान्दोदेन छ्याम ब्रेल्सी भ्रवा म्रिडम्हेमे

8 तर येशू चा जैतून भिबा गडरी फेप्जी। ² येशू न्हडगरदड स्थोरीन परमेश्वरला मन्दिररी फेप्वजी। जमाहेन्से जम्मान म्हिगदे येशू मुबा ग्लारी खजी। ओच्छे येशू धन्छ्यासी जम्मान म्हिगदेदा लोप्वारी छ्याइजी।

³ यहूदी धर्मगुरुगदेदेन फरिसीगदेसे स्थान्दोदेन छ्याम ब्रेल्सी चिबान लबा धुइरी स्यापवा म्रिडम्हेमेदा चुइसी येशू मुबा ग्लारी भजी। ओच्छे जम्मालान डाच्छा थे म्रिडम्हेमेदा राप्सी चिपुइजी। ⁴ थेनीगदेसे येशूदा चुहड् भिसी भिजी, “गुरु, चु स्थान्दोदेन छ्याम ब्रेल्बान लबा म्रिडम्हेमेदा चुइसी डन्से हाड मुबा ग्लारी भसी खबा मुला। ⁵ यहाडला मोशासे ठिमरी चुहड्बा म्रिडम्हेमेदा युडबासे तोसी साइगो भिसी कुल्बा मुला। हाडसे चा चुला बारेरी तिग सुइबा?” †⁶ तर येशूदा दोष लम्याड्ला कि भिसी थेनीगदेसे चुहड् भिसी इयोइबा मुबा।

येशूसे कू तसी या जुम्बीसे सरी भ्रिबारी छ्याइजी। ⁷ थेनीगदेसे येशूदा इयोइबाला इयोइबान लमाहेन्से येशू राप्सी थेनीगदेदा “जुन म्हिसे खाइमै पाप लबा आरे थेसे डाच्छा चु म्रिडम्हेमेदा युडबासे तोउ” भिसी सुइजी।

⁸ जमाहेन्से येशूसे दोःसी कू तसी सरी भ्रिजी।

⁹ चु ताम थेःसी थेरी मुबा जम्मान म्हिगदे ग्रेनहेन्से जजाधोना गिक गिक लसी थेंग्याम निजी। ओच्छे थेरी येशूदेन छ्याम थे म्रिडम्हेमे जे तजी। थे म्रिडम्हेमे चा अझ येशूला डाच्छापट्टि राप्सी चिबा मुबा। ¹⁰ जमाहेन्से येशू राप्सी थे म्रिडम्हेमेदा चुहड् भिसी सुइजी, “खाइ, एदा दोष लबा म्हिगदे खानड निजी? तिग थेनीगदे खालैसेन एदा सजाय आपिन्नी?”

¹¹ जमाहेन्से थे म्रिडम्हेमेसे येशूदा “प्रभु, खालैसेन तिगे आलनी” भिसी भिमा, येशूसे थेदा “डाइएनोन एदा सजाय आपिन, दाहेन्से निउ, तर दोःसी पाप थालउ” भिसी सुइजी। †

जम्बुलिडला य्हाल

¹² दोःसीनोन येशूसे म्हिगदेदा लोप्वान, “जम्बुलिडला य्हाल डानोन हिन्ना। डादेन छ्याम भ्रवा म्हि खाइमै धोपधोपरी भ्रआतोः। तिगदा भिसम थेसे जुनी पिन्बा य्हाल याड्ला” भिसी सुइजी। †

¹³ जमाहेन्से फरिसीगदेसे येशूदा “एसे हाडलान बारेरी पाड्बान मुला, एसे पाड्बा ताम सत्य आहिन” भिसी भिजी। †

¹⁴ येशूसे थेनीगदेदा चुहड् भिसी सुइजी, “डाइ डालान बारेरी पाड्बानोन डाइ पाड्बा ताम सत्य हिन्ना। तिगदा भिसम डा खानडग्याम खबा हिन्ना, ओच्छे खानड निबान मुला भिबा ताम डादा था मुला। तर एनीगदेदा चु ताम था आरे। ¹⁵ एनीगदेसे मी म्हिला ज्ञान बुद्धिम्याम निसाफ लमुला। तर डाइ मी खालैला निसाफ आल। ¹⁶ चुदे डा हाडसेन निसाफ लतोःजी भिसम डाइ लबा निसाफ चा सत्य तला। तिगदा भिसम डा गिक जे आरे, तर डादा पुइखबा आबाएनोन डादेन छ्याम मुला। ¹⁷ मोशासे पिन्बा एनीगदेला ठिमरी म्हि न्हीसे पाड्बा ताम चा सत्य तमुला भिसी भ्रिबा मुला। ††¹⁸ हाडलान बारेरी सत्य ताम पाड्बा म्हि गिक चा डानोन हिन्ना, ओच्छे स्थान्दो चा डादा पुइखबा आबा हिन्ना।”

¹⁹ चु ताम थेःसी थेनीगदेसे येशूदा “एला आबा खानड मुला?” भिसी इयोइमा, येशूसे थेनीगदेदा “एनीगदेसे डादाएनोन डोसेबा आरे, डाला

आबादाएनोन डोसेबा आरे। चुदे एनीगदेसे डादा डोसेबा हिन्सम डाला आबादाएनोन डोसेसेला मुबा” भिसी सुइजी।

²⁰ चु जम्मान ताम येशूसे परमेश्वरला मन्दिररी भेटी युबा ताड मुबा ग्लायाम लोप्वान लबा धुइरी सुइबा मुबा। तर थेनीगदे खालैसेन येशूदा आचुइनी। तिगदा भिसम अझ येशूला धुइ तबा आरेमुबा।

म्हिगदेसे येशूदा डोआसेबा

²¹ दोःसी येशूसे थेनीगदेदा “डा चुग्याम निनोन निला, ओच्छे एनीगदेसे डादा म्हाइला। तर एनीगदे हाडलान पापरी सिला। डा निबा ग्लारीनोन एनीगदे खबारी आखम” भिसी सुइजी।

²² चु ताम थेःसी यहूदी नेतागदेसे “चु म्हि सिबारी म्हाइबा कि तिग? चुसे मी ‘डा निबा ग्लारी एनीगदे खबारी आखम भिसी भिमुला’ भिसी हाड हाड न्हडरी ताम लजी।”

²³ जमाहेन्से येशूसे थेनीगदेदा “एनीगदे मारग्याम खबा हिन्ना, डा तोरग्याम खबा हिन्ना। एनीगदे चुनोन जम्बुलिडला हिन्ना, तर डा चा चु जम्बुलिडला आहिन। ²⁴ थेतबासेलमा ‘एनीगदे हाडलान पापरी सिला’ भिसी डाइ एनीगदेदा पाइसी जिन्बा मुला। चुदे एनीगदेसे ‘डा थेनोन हिन्ना’ †† भिसी डादा विश्वास आलनी भिसम एनीगदे हाडलान पापरी सिला।”

²⁵ जमाहेन्से थेनीगदेसे येशूदा “ए खाल हिन्ना?” भिसी इयोइमा, येशूसे थेनीगदेदा चुहड् भिसी सुइजी, “डा थेनोन हिन्ना, चु ताम डाइ एनीगदेदा डाच्छान पाड्बा मुला। ²⁶ एनीगदेला बारेरी डाइ पाइतोःबा तामदेन एनीगदेला निसाफ लतोःबा ताम ल्हानान मुला। तर डादा पुइखबा चा सत्य मुला, ओच्छे थेंग्याम डाइ जुन ताम थेःजी थेनोन ताम डाइ जम्बुलिडला म्हिगदेदा पाड्बा मुला।”

²⁷ येशूसे परमेश्वर आबाला बारेरी सुइबान मुबा भिबा ताम थेनीगदेसे आघोनी। ²⁸ थेतबासेलमा येशूसे थेनीगदेदा चुहड् भिसी सुइजी, “एनीगदेसे परमेश्वरसे पुइखबा म्हिदा तोर थीमाहेन्से † जे डा थेनोन चीम भिबादेन डाइ डालान सेमग्याम ताम पाड्बा आहिन्बा चीम, तर परमेश्वर आबासे लोप्वान अन्धार जे पाड्बा चीम भिबा ताम एनीगदेसे था याड्ला। ²⁹ ओच्छे डादा पुइखबा डादेन छ्यामनोन मुला, थेसे डादा खाइमै आख्लामुला। तिगदा भिसम डाइ सदन थेदा सेम निबा गे जे लमुला।” ³⁰ चु ताम थेःसी ल्हानान म्हिगदेसे येशूदा विश्वास लजी।

सत्यसे पापग्याम फेला

³¹ येशूसे हाडदा विश्वास लबा यहूदीगदेदा चुहड् भिसी सुइजी, “एनीगदे डाइ लोप्वान अन्धार भ्रजी भिसम एनीगदे डाला पक्का चेला दोला। ³² ओच्छे सत्य तिग हिन्ना भिसी एनीगदेसे था याड्ला, थेनोन सत्यसे एनीगदे खालैला तहरी चिआतोः।”

³³ थेनीगदेसे येशूदा “डनी अब्राहामला सन्तान हिन्ना, दान्देधोना डनी खालैला नोकर दोबा आरे। हाडसे डन्दा स्थान्दोला तहग्याम फेला भिसी सुइबाला अर्थ चा तिग हिन्ना?” भिसी भिजी। †

³⁴ जमाहेन्से येशूसे थेनीगदेदा चुहड् भिसी सुइजी, “च्यागो, एनीगदेसे डाला ताम इयान्गो, पाप लबागदे जम्मान पापला तहरी तला। ³⁵ नोकर सदन मालिकला दिमरी आचि, तर झा चा सदन चिला। ³⁶ थेतबासेलमा परमेश्वरला झासे एनीगदेदा फेजी भिसम एनीगदे पक्कान फेला। ³⁷ एनीगदे अब्राहामला सन्तान हिन्ना भिसी डादा था मुला। तसैनोन एनीगदेसे डाइ पाड्बा ताम नाबारी आखम्बासे लमा डादा साइबारी म्हाइबा मुला। ³⁸ डा डाला आबादेन छ्याम मुबा धुइरी डाइ जुन ताम म्हाइबा, थेनोन ताम डाइ एनीगदेदा पाड्बा हिन्ना। तर एनीगदेसे चा एनीगदेला आबाग्याम तिग थेःबा मुला थेनोन लमुला।”

³⁹ थेनीगदेसे येशूदा “डन्ना आबा चा अब्राहामनोन हिन्ना” भिसी भिमा, येशूसे थेनीगदेदा चुहड् भिसी सुइजी, “एनीगदे पक्कान अब्राहामला सन्तान

† 7:50 यूह ३:१-२ †† 8:5 लेवी २०:१०; व्यव २२:२२-२४ † जम्मान भन्दा पुरानो ग्रीक बाइबलगदेरी ७:५३ पदहेन्से ८:११ पदथोनाला ताम भ्रिबा आरे। †† 8:12 मत्ती ५:१४; यूह ९:५ †† 8:13 यूह ५:३१ ††† 8:17 व्यव १९:१५; गन्ती ३५:३०

††† “डा थेनोन हिन्ना” भिबा चा परमेश्वरला बचनरी परमेश्वरला मिन हिन्ना। † ††† “तोरे थीमाहेन्से” भिबा चा येशूदा कुसरी टोंगब लबा हिन्ना। †† 8:33 मत्ती ३:९; लूका ३:८

हिन्सम अब्राहामसे लबा ह्इबा गे एनीगदेसेनोन लसेला मुबा।⁴⁰ तर डाइ परमेश्वरग्याम थे:बा सत्य ताम एनीगदेदा पाड्मा एनीगदेसे चा डादा साइबारी म्हाइजी। तर अब्राहामसे मी चुह्इबा गे आलनी।⁴¹ एनीगदेला आबासे जुन गे लबा मुबा, थेनोन गे एनीगदेसेनोन लबा मुला।”

जमाहेन्से थेनीगदेसे येशूदा “डनी स्थान्दोदेन छ्याम ब्रेल्सी भ्रमा न्हबा कोलागदे आहिन, तर परमेश्वरनोन डन्ना आबा हिन्ना” भिसी भिजी।

⁴² येशूसे थेनीगदेदा चुह्इ भिसी सुड्जी, “च्यागो, एनीगदेला आबा परमेश्वरनोन हिन्सम एनीगदेसे डादा माया लसेला मुबा। तिग्दा भिसम परमेश्वरसे पुइखबासे लमा डा दान्दे चुरी मुला। डा हाडला सुरसे खबा आहिन, तर परमेश्वरसेन डादा पुइखबा हिन्ना।⁴³ एनीगदेसे तिग्दा डाड पाड्बा ताम आघोबा? तिग्दा भिसम एनीगदेसे डाला ताम नाआखम्नी।⁴⁴ एनीगदेला आबा शैतान हिन्ना, एनीगदेसे हाडला आबासे म्हन्बा अन्धारनोन गे लमुला। थेसे मी डाच्छाहेन्से म्हे साइबा मुबा, थे सत्यरी खाइमै भ्रबारी आखम। तिग्दा भिसम थेदेन छ्याम सत्य भिबा मुनोन आरे। थेसे सदन हाडला बानीबेहोर अन्धार लुसीला ताम पाड्मुला। थेतबासेलमा थे लुसीला ताम पाड्बा म्हे हिन्ना, थे जम्मान लुसीला तामला आबा हिन्ना।⁴⁵ तर एनीगदेसे डाला ताम विश्वास आलमुला। तिग्दा भिसम डाइ सत्य ताम पाड्मुला।⁴⁶ एनीगदे न्हडला खाल्से डादा पापी भिसी दोष लबारी खम्ला? डाइ सत्य ताम पाड्मा एनीगदेसे तिग्दा डादा विश्वास आलबा?⁴⁷ परमेश्वरला म्हेगदेसे परमेश्वरला ताम ड्यान्मुला। तर एनीगदे चा परमेश्वरला म्हे आहिन। थेतबासेलमा एनीगदेसे परमेश्वरला ताम आड्यान्मुला।”

अब्राहाम भन्दा येशू डाच्छा

⁴⁸ यहूदी नेतागदेसे येशूदा “डन्से पाड्बा ताम ठीक हिन्ना। ए सामरी खुलला हिन्ना, एदा म्हडसे स्याप्बा मुला” भिसी भिजी।

⁴⁹ येशूसे थेनीगदेदा चुह्इ भिसी सुड्जी, “डादा म्हडसे स्याप्बा आरे। डाइ डाला आबादा मान लबा मुला, तर एनीगदेसे डादा पे:ना लमुला।⁵⁰ डाइ डादा मान लगै भिसी म्हन्बा आहिन, तर डादा मान लबादेन डाला लागिरी निसाफ लसी पिन्बा म्हे स्थान्दोन मुला।⁵¹ थेतबासेलमा च्यागो, एनीगदेसे डाला ताम ड्यान्गो, चुदे खालै म्हेसे डाला ताम ड्यान्जी भिसम थे खाइमै आसि।”

⁵² यहूदीगदेसे येशूदा चुह्इ भिसी भिजी, “एदा म्हडसे स्याप्बान हिन्ना भिसी दाहेन्से डन्दा पक्का था तजी। तिग्दा भिसम अब्राहामदेन अगमवक्तागदे सिजी, तर एसे चा “खालै म्हेसे डाइ पाड्बा ताम ड्यान्जी भिसम थे खाइमै आसि” भिसी भिमुला।⁵³ तिग ए डन्ना म्हेमे अब्राहाम भन्दा घेन हिन्ना? थे सिजी, ओच्छे अगमवक्तागदेएनोन सिजी। एसे चा हाडदा खाल भिसी म्हन्बा?”

⁵⁴ येशूसे थेनीगदेदा चुह्इ भिसी सुड्जी, “डाइ हाडदा मान लगै भिसी म्हन्जी भिसम थे गे आखेल्बा ताम हिन्ना। तर डादा मान पिन्बा चा डालान आबा हिन्ना, डाला आबादान एनीगदेसे य्हाडला परमेश्वर भिसी पाड्मुला।⁵⁵ तर एनीगदेसे थेदा डोसेबा आरे। डाइ चा थेदा ज्यना लसी डोसेबा मुला। चुदे डाइएनोन थेदा डोसेबा आरे भिसी भिजी भिसम डाएनोन एनीगदे ह्इबान लुसीला ताम पाड्बा म्हे दोला। तर डाइ थेदा डोसेबा मुला, ओच्छे थेसे सुड्बा अन्धारनोन डाइ गे लबा मुला।⁵⁶ एनीगदेला म्हेमे अब्राहामसेनोन डा खबा धिन च्याबारी ल्हानान सेम लबा मुबा। ओच्छे थेसे डा खबा धिन म्हाइसी जिन्बासे लमा ताड्जी।”

⁵⁷ थेतबासेलमा यहूदीगदेसे येशूदा “एसे बोगल न्हीसे च्युड दिड मी तबा आरे भिसम खाह्इ लसी एसे अब्राहामदा म्हाइजी?” भिसी भिजी।

⁵⁸ जमाहेन्से येशूसे थेनीगदेदा “च्यागो, एनीगदेसे डाला ताम ड्यान्गो, अब्राहाम न्हबा भन्दा डाच्छाहेन्सेन ‘डा थेनोन हिन्ना’ भिबा मुनोन मुबा” भिसी सुड्छ्याम,⁵⁹ थेनीगदेसे येशूदा तोबारी भिसी युडबा दुड्जी। तर येशू लासी परमेश्वरला मन्दिरला ग्यापग्याम सुटक्क थोन्सी फेप्जी।

मी आम्राड्बा म्हेसे म्हाइबा

⁹ थेंग्याम फेप्बान लमा येशूसे न्हमान मी आम्राड्बा म्हे गिकदा स्याप्जी।² येशूला चेलागदेसे येशूदा “गुरु, खाल्ला पापसे लमा चु म्हे न्हमान काना न्हजी, चुलान पापसे लमा कि चुला आबा आमाला पापसे लमा चुह्इ तबा हिन्ना?” भिसी ड्योड्जी।

³ जमाहेन्से येशूसे थेनीगदेदा चुह्इ भिसी सुड्जी, “थेला पापसे लमाएनोन आहिन, थेला आबा आमाला पापसे लमाएनोन आहिन। तर परमेश्वरला गे थेंग्याम म्हाइ भिसीन थे काना तबा हिन्ना।⁴ धिनी मुबा धुइरीन य्हाडसे डादा पुइखबाला गे लतो:ला। धोप तमाहेन्से खालैसेन गे लबारी आखम।⁵ डा जम्बुलिडरी चितेधोना डानोन जम्बुलिडला य्हाल हिन्ना।” †

⁶ चुह्इ सुड्बाहेन्से येशूसे सरी थो स्वाजी, ओच्छे थोसे साप्रा ज्योप्सी थे काना म्हेला मीरी फोर्सी पिन्जी।⁷ ओच्छे थेदा चुह्इ भिसी सुड्जी, “सिलोआम भिबा घ्योइरी निसी ली खूउ।” सिलोआम भिबाला अर्थ चा पुड्बा हिन्ना। ओच्छे थे, थे घ्योइरी निसी ली खूजी। जमाहेन्से थेसे म्हाइजी, ओच्छे दो:सी खजी।⁸ थेला खिम्जेमगदेदेन थेदा डाच्छा हीसी चिबा म्हाइबा म्हेगदेसे “तिग चु थे हीबा म्हे आहिन?” भिसी ड्योड्जी।⁹ कोइ कोइ म्हेसे थेदा म्हाइसी, “चु मी थेनोन हीबा म्हे हिन्ना” भिसी भिबान मुबा। स्थान्दोगदेसे चा हिन्बाम थे ह्इबान म्हाइबा चीम, तर थे म्हे “आहिन” भिसी भिजी।

तर थे म्हेसे “डा थेनोन हिन्ना” भिसी भिबाला भिबान मुबा।

¹⁰ थेनीगदेसे थेदा “दान्दे एसे खाह्इ लसी म्हाइजी?” भिसी ड्योड्जी।

¹¹ जमाहेन्से थेसे थेनीगदेदा “येशू भिबा म्हे गिकसे साप्रा ज्योप्सी डाला मीरी फोर्सी डादा ‘सिलोआमरी निसी खूउ’ भिसी सुड्जी। ओच्छे निसी खूमाहेन्से डाइ म्हाइजी” भिसी भिजी।¹² थेनीगदेसे थेदा “थे म्हे खानड मुला?” भिसी ड्योड्मा, थेसे “डादा था आरे” भिसी भिजी।

फरिसीगदेसे ड्योड्बा छार्बा लबा

¹³ जमाहेन्से थेनीगदेसे डाच्छा काना मुबा म्हेदा फरिसीगदे मुबा ग्लारी भोर्जी।¹⁴ येशूसे साप्रा ज्योप्सी थेला मीरी फोर्सी थेदा खम्ना लबा धिन चा ब्लप्बा न्हबा धिनकुनु मुबा।¹⁵ फरिसीगदेसेनोन थेदा “एसे खाह्इ लसी म्हाइजी?” भिसी ड्योड्मा, थेसे थेनीगदेदा “येशूसे साप्रा ज्योप्सी डाला मीरी फोर्सी पिन्जी, ओच्छे डाइ खूमाहेन्से म्हाइजी” भिसी भिजी।

¹⁶ फरिसीगदे न्हडला कोइ कोइसे “थे म्हे परमेश्वरग्याम खबा आहिन। तिग्दा भिसम थेसे ब्लप्बा न्हबा धिनदा आधङ्गुला” भिसी भिजी। तर स्थान्दोगदेसे चा “पापी म्हेसे खाह्इ लसी चुह्इबा उदेकला गे लबारी खम्ला?” भिसी भिजी। थेतबासेलमा थेनीगदे हाड हाड न्हडरी आढिकनी।

¹⁷ थेनीगदेसे दो:सीनोन थे काना म्हेदा “थे म्हेसे एला मी खम्ना लजी, दाहेन्से एसे चा थे म्हे खाल भिसी म्हन्बा मुला” भिसी ड्योड्मा, थेसे “थे म्हे अगमवक्ता हिन्ना” भिसी भिजी।

¹⁸ यहूदी नेतागदेसे थे पक्कान काना मुबा, ओच्छे दान्दे म्हाइखम्बा हिन्ना भिसी विश्वास लबारी आखम्नी। थेतबासेलमा थेनीगदेसे थेला आबा आमदा ड्योड्सी,¹⁹ “चु एनीगदेलान झा हिन्ना? तिग चु न्हमान काना न्हबा हिन्ना? थेंह्इ भिसम दान्दे चा चुसे खाह्इ लसी म्हाइजी?” भिसी ड्योड्जी।

²⁰ जमाहेन्से थेला आबा आमसे चुह्इ भिसी भिजी, “हिन्ना, चु डन्नान झा हिन्ना, चु न्हमान काना मुबा।²¹ तर चुला मी खाल्से खम्ना लसी म्हाइखम्जी भिबा ताम डन्दा था आरे। चु दिड छयोसी जिन्बा म्हे हिन्ना, थेसे हाडला बाररी हाडसेन पाड्खम्ला। थेतबासेलमा हाडनीसे थेदान ड्योड्गो।”²² यहूदी नेतागदेदेन छ्याम लोड्सी थेनीगदेसे थेंह्इ भिसी पाड्बा हिन्ना। तिग्दा भिसम जुन म्हेसे येशूदा थार्बा पिन्बा ख्रीष्ट हिन्ना भिसी विश्वास लला थेदा यहूदीगदे हुप तबा दिमग्याम ते:तो:ला भिसी यहूदीगदेसे डाच्छान सल्लाह लसी जिन्बा मुबा।²³ थेतबासेलमान थेला

आबा आमासे “चु दिड छयोसी जिन्बा म्हि हिन्ना, चुदान इयोइगो” भिसी पाइजी।

²⁴ जमाहेन्से थेनीगदेसे दोःसीनोन थे काना म्हिदा इयोइसी, “एसे सत्य ताम पाइसी परमेश्वरदा मानदेन जयजयकार लउ, थे येशू चा पापी हिन्ना भिसी इन्दा था मुला” भिसी भिजी।

²⁵ थे म्हिसे थेनीगदेदा “थे पापी हिन्ना कि आहिन भिबा ताम मी डादा था आरे। तर डाच्छा डा काना मुबा, दान्दे डाइ म्नाइमुला भिबा ताम जे डादा था मुला” भिसी भिजी।

²⁶ जमाहेन्से थेनीगदेसे थेदा “थे म्हिसे एदा तिग लजी? खाहइ लसी थे म्हिसे एला मी खम्ना लजी?” भिसी इयोइजी।

²⁷ थेसे थेनीगदेदा “डाइ हाडनीदा दोलोन पाइसी जिन्जी, तर हाडनीसे वास्तान आलनी दान्दे दोःसी तिग्दा इयोइबा, तिग हाडनीएनोन थेला चेला दोबारी म्हाइबा हिन्ना?” भिसी जोहाब पिन्जी।

²⁸ थेनीगदेसे थेदा खिसी लबान चुहइ भिजी, “ए गा थेला चेला हिन्ना, डनी मी मोशाला चेला हिन्ना। ²⁹ मोशादेन छ्याम परमेश्वरसे ताम लबा इन्दा था मुला, तर चु म्हि चा खानड्याम खजी थे ताम इन्दाएनोन था आरे।”

³⁰ जमाहेन्से थेसे थेनीगदेदा चुहइ भिसी भिजी, “चु खाहइबा उदेकला ताम! येशूसे डाला मी खम्ना लजी। तर हाडनीसे चा येशू खानड्याम फेखजी भिबा ताम इन्दा था आरे। ³¹ परमेश्वरसे पापी म्हिला ताम आइयान्मुला, तर थेदा मान लबादेन थेसे म्हन्बा अन्छार गे लबा म्हिला जे ताम इयान्मुला भिसी म्हाइ जम्मादान था मुला। ³² जम्बुलिड छ्यामाहेन्से दान्देधोना खालै म्हिसे न्हमान काना मुबा म्हिला मी खम्ना लजी भिबा ताम थेःबा आरे। ³³ चु येशू परमेश्वरग्याम फेखबा आहिनसम येशूसे चुहइबा तिगै गे लबारी आखम्सेला मुबा।”

³⁴ थेनीगदेसे थेदा “ए पापरी न्हसी पापरीन छर्बा म्हिसे इन्दा लोप्यारी म्हाइबा?” भिसी भिजी। ओच्छे थेनीगदेसे थेदा यहूदीगदे हुप तबा दिमग्याम तेःजी।

परमेश्वरदा डोआसेबा म्हि काना हइबान हिन्ना

³⁵ यहूदीगदेसे थे काना म्हिदा यहूदीगदे हुप तबा दिमग्याम तेःजी भिबा ताम येशूसे थेःजी। ओच्छे थेदेन छ्याम हुप तसी येशूसे “तिग एसे परमेश्वरसे पुइखबा म्हिदा विश्वास लला?” भिसी इयोइजी।

³⁶ थेसे येशूदा “प्रभु, डाइ थेदा विश्वास लबारी थे खाल हिन्ना?” भिसी भिमा,

³⁷ येशूसे थेदा “थे म्हि एसे म्नाइसी जिन्बा मुला, दान्दे थे म्हि एदेन छ्याम ताम लबान मुला” भिसी सुइजी।

³⁸ चु ताम थेःसी थेसे येशूदा फ्या लबान, “प्रभु, डाइ विश्वास लला” भिसी जयजयकार लजी।

³⁹ ओच्छे येशूसे, “कानागदेसे म्नाइ, ओच्छे डा काना आहिन भिसी भिबा म्हिगदेसे चा थाम्नाइ भिसी निसाफ लबाला लागिरीन डा चु जम्बुलिडरी खबा हिन्ना” भिसी सुइजी।

⁴⁰ चु ताम थेःसी थेरी मुबा कोइ कोइ फरिसीगदेसे येशूदा “तिग डनीएनोन काना हिन्ना?” भिसी भिजी।

⁴¹ जमाहेन्से येशूसे थेनीगदेदा “बरु एनीगदे कानान मुबा हिन्सम पापला दोष लगब आतसेला मुबा, तर एनीगदेसे ‘इन्से म्नाइमुला’ भिसी भिबासे लमा एनीगदेदा सदन पापला दोष तला” भिसी सुइजी।

येशू ज्यबा गोठालो

10 येशूसे थेनीगदेदा चुहइ भिसी सुइजी, “च्यागो, एनीगदेसे डाला ताम इयान्गो, ग्युला गोठेरी प्रापग्याम आवाइना अर्गुपट्टियाम वाइबा म्हि चा य्होदेन डाँका हिन्ना। ² तर ग्युगदेला गोठालो चा प्रापग्याम वाइला। ³ गोठे खूइबा म्हिसे गोठालोदा प्राप ठोइसी पिन्ना। जमाहेन्से गोठालोसे ग्युगदेदा मिन किन्सी किन्सी इयोइला। जमाहेन्से ग्युगदेसे गोठालोला काइ थेःला, ओच्छे गोठालोसे ग्युगदेदा मडग्यार भोर्ला। ⁴ हाडला

जम्मान ग्युगदे मडग्यार तेःसी जिन्माहेन्से गोठालो डाच्छा डाच्छा भ्रला, ओच्छे ग्युगदे चा गोठालोला लिच्छा लिच्छा भ्रला। तिग्दा भिसम ग्युगदेसे हाडला गोठालोला काइ डोसेला। ⁵ डोआसेबा म्हिसे इयोइजी भिसम ग्युगदे थे म्हिदेन छ्याम आनि। बरु थे म्हिला काइ डोआसेबासे लमा थेनीगदे लोइसी यार्ला।”

⁶ येशूसे थेनीगदेदा चु उखान सुइजी। तर थेनीगदेसे उखानना अर्थ आघोनी।

सत्य प्राप

⁷ थेतबासेलमा दोःसीनोन येशूसे थेनीगदेदा चुहइ भिसी सुइजी, “च्यागो, एनीगदेसे डाला ताम इयान्गो, ग्युगदे वाइबा प्राप डानोन हिन्ना। ⁸ डा भन्दा डाच्छा खबागदे चा जम्मान य्होदेन डाँका हिन्ना, तर ग्युगदेसे थेनीगदेला ताम आइयान्नी। ⁹ प्राप चा डानोन हिन्ना, चुदे खालै म्हि डाग्याम न्हडरी वाइजी भिसम थे जोगब तला। थेनीगदे गोठे न्हडरी निबा मडग्यार थोन्बा लला, ओच्छे पिड पिडबा छे याइबा पाइरी चम्याइला।

¹⁰ “य्हो मी य्हो लबारी, साइबारी ओच्छे नाश लबारी भिसी जे खमुला। तर डा मी थेनीगदेसे पूरान जुनी याइगै भिसी खबा हिन्ना। ¹¹ ज्यबा गोठालो चा डानोन हिन्ना। हाडला ग्युगदेदा जोगब लबाला लागिरी ज्यबा गोठालो चा सिबारीन तयार तमुला। ¹² तर जुन म्हि ग्यु छबारी जे थान्ना ओच्छे थे साँच्चिलान गोठालो आहिन ओच्छे ग्युगदेएनोन थेला आहिन भिसम थेहइबा म्हि फार्बा खबा म्नाइहेन्से ग्युगदेदा खलासी यार्ला। ओच्छे फार्बासे ग्युगदेदा व्हाला, जमाहेन्से ग्युगदे ससा बडबड तला। ¹³ थेसे ग्युगदेदा तिगै वास्ता आलना यार्ला। तिग्दा भिसम थे टाडगा किन्सी गे लबा म्हि जे हिन्ना।

¹⁴ “ज्यबा गोठालो चा डानोन हिन्ना। आबासे डादा, डाइ आबादा डोसेबा हइ लसी डाइ डाला ग्युगदेदा डोसेमुला, ओच्छे ग्युगदेसेनोन डादा डोसेमुला। थेतबासेलमा डाइ डाला ग्युगदेला लागिरी हाडला ज्याननोन पिन्ना। ¹⁶ डाला अर्गु ग्युगदेएनोन मुला, थेनीगदे चा चु गोठेला आहिन। डाइ थेनीगदेदाएनोन भतोःबा मुला, थेनीगदेसे डाला काइ थेःसी बगाल गिकनोन तला। ओच्छे थेनीगदेला गोठालोएनोन गिकनोन तला।

¹⁷ “डाइ डाला प्राण पिन्बा चा दोःसी किन्बाला लागिरी हिन्ना।

थेतबासेलमा डाला आबासे डादा माया लबा हिन्ना। ¹⁸ खालैसे डाग्याम डाला प्राण किन्बारी आखम, तर डाइ डालान सेमसे डाला प्राण पिन्ना। डादा डाला प्राण पिन्बा अधिकारएनोन मुला, दोःसी किन्बा अधिकारएनोन मुला। डाला आबासे डादा कुल्बा तामएनोन चुनोन हिन्ना।”

¹⁹ चु ताम थेःसी दोःसीनोन यहूदीगदे हाड हाड न्हडरी आठिकनी।

²⁰ ल्हानान म्हिगदेसे येशूला बाररी, “चु म्हडसे स्याप्सी म्योबा मुला। एनीगदेसे तिग्दा चुला ताम इयान्बा?” भिसी हाड हाड न्हडरी पाइबान मुबा।

²¹ तर स्पहान्दो म्हिगदेसे चा “म्हडसे स्याप्बा म्हिसे चुहइबा ताम लबारी आखम! तिग म्हडसे स्याप्बा म्हिसेनोन काना म्हिला मी खम्ना लबारी खम्ला?” भिसी पाइबान मुबा।

यहूदीगदेसे येशूदा विश्वास आलबा

²² यरूशलेम शहररी परमेश्वरला मन्दिर अर्पण लबा चाड खबा मुबा। थे धुइ चा सेखरी मुबा। ²³ येशू परमेश्वरला मन्दिरला सोलोमन भिबा दलानरी भ्रबान मुबा। ²⁴ यहूदीगदे येशूला क्यूसीन पोप तसी, “हाडसे इन्दा खाइमाधोना अलमल तना लसी थान्बा? चुदे हाड थार्बा पिन्बा ख्रीष्टनोन हिन्सम इन्दा सिधान सुइजी” भिसी भिजी।

²⁵ जमाहेन्से येशूसे थेनीगदेदा चुहइ भिसी सुइजी, “डाइ डाच्छान पाइसी जिन्बा मुला, तर एनीगदेसे विश्वास आलनी। डाइ डाला आबाग्याम अधिकार याइसी लबा गेग्यामसेन डा खाल हिन्ना भिसी उन्ना। ²⁶ तर एनीगदेसे डादा विश्वास आलनी, तिग्दा भिसम एनीगदे डाला ग्युगदे आहिन। ²⁷ डाला ग्युगदेसे डाला काइ डोसेमुला, ओच्छे डाइएनोन थेनीगदेदा डोसेमुला। थेनीगदे डादेन छ्याम भ्रमुला। ²⁸ थेनीगदे खाइमै नाश आत।

तिग्दा भिसम डाइ थेनीगदेदा जुकजुकधोनाला जुनी पिन्ना। ओच्छे खालैसेन थेनीगदेदा डाग्याम ब्यन्सी भोर्बारी आखम।²⁹ चुगदे डादा पिन्बा डाला आबा चा जम्मान भन्दा घेन मुला। थेग्यामसे मी इन खालैसेन चुगदेदा ब्यन्सी भोर्बारी आखम।³⁰ आबादेन डा गिकनोन हिन्ना।”

³¹ चु ताम थे:सी यहूदी नेतागदेसे दो:सीनोन येशूदा तोबारी भिसी युडबा दुड्जी।³² तर येशूसे थेनीगदेदा “आबासे कुल्बा जम्मान ज्यबा गेगदे डाइ एनीगदेला ओन्हाडरी लबा मुला। थे गेगदे न्हडला खजिबा गेला लागिरी एनीगदेसे डादा युडबासे तोबारी म्हाइबा?” भिसी सुड्जी।

³³ जमाहेन्से यहूदी नेतागदेसे येशूदा “एसे ज्यबा गे लबासे लमा डन्से एदा युडबासे तोबारी म्हाइबा आहिन। तर एसे परमेश्वरला बिरोध लसी ताम लबासे लमान डन्से एदा युडबासे तोबारी छ्याइबा हिन्ना। ए म्हे तसीनोन हाडसे हाडदान परमेश्वर स्होबा?” भिसी भिजी। †

³⁴ येशूसे थेनीगदेदा चुहड् भिसी सुड्जी, “एनीगदेला हाडलान ठिमरी ‘एनीगदे ल हिन्ना’ भिसी परमेश्वरसे सुड्बा ताम भिबा आरे? †³⁵ जुन म्हेगदे मुबा ग्लारी परमेश्वरला बचन खजी परमेश्वरसे थेनीगदेन ल हिन्ना भिसी पाड्मा परमेश्वरला बचन न्होड्बारी आखम्नी भिसम, ³⁶ परमेश्वर आबासेन धम्सी चु जम्बुलिडरी पुड्खबा म्हेसे ‘डा परमेश्वरला झा हिन्ना’ भिसी पाड्मा खाहड् लसी डाइ परमेश्वरला बिरोध लबा तला? ³⁷ चुदे डाइ डाला आबाला गे लबा आरे भिसम डादा विश्वास लआतो:। ³⁸ तर चुदे डाइ डाला आबाला गे लसीनोन डादा विश्वास आल भिसम चु गेगदेदा मी विश्वास लउ। जमाहेन्से एनीगदेसे परमेश्वर आबा डादेन छ्याम डा परमेश्वर आबादेन छ्याम मुला भिबा ताम पक्कान था याड्ला।” ³⁹ चु ताम थे:सी थेनीगदेसे दो:सीनोन येशूदा चुड्बारी म्हाइजी। तर येशू थेनीगदेला याग्याम स्योर्जी।

⁴⁰ येशू दो:सीनोन यर्दन स्योडला क्याम्सड फेप्सी धन्छ्याजी। थे ग्लारी डाच्छा यूहन्नासे बत्तिस्मा पिन्मुबा।⁴¹ ल्हानान म्हेगदे येशू मुबा ग्लारी खजी। ओच्छे थेनीगदेसे, “यूहन्नासे मी तिगै उदेकला गे आलनी, तर यूहन्नासे येशूला बारेरी जुन ताम पाड्बा थे जम्मान ताम सत्य चीम” भिसी भिजी।⁴² ओच्छे थेरी ल्हानान म्हेगदेसे येशूदा विश्वास लजी।

लाजरस सिबा

11 बेथानिया भिबा नाम्सारी लाजरस भिबा म्हे गिक आखम्बा मुबा। थेनोन नाम्सारी मरियमदेन थेला नाना मार्थाएनोन चिमुबा।
#12 चुनोन मरियमसे तिरैम येशूला स्थापरी अत्तर फोर्सी हाडलान क्रासे फ्यामुबा। आखम्बा लाजरस चा चुनोन नाना आडाला आले मुबा।
#13 माथदिन मरियमसे येशूदा “प्रभु, हाडसे माया लबा म्हे आखम्बा मुला” भिसी समाचार पुड्जी।

⁴ चु समाचार थे:सी येशूसे “लाजरस आखम्बा मुला, तसैनोन थे आसि। तर चुहड् तबा चा परमेश्वरला मानदेन जयजयकार तबाला लागिरी हिन्ना, ओच्छे चुग्यामसेन म्हेगदेसे परमेश्वरला झादाएनोन मानदेन जयजयकार लला” भिसी सुड्जी।⁵ येशूसे मार्था, मरियमदेन लाजरसदा ल्हानान माया लमुबा।⁶ तसैनोन लाजरस आखम्बा मुला भिबा ताम थे:सी येशू अड्ड हाड धन्छ्याबा ग्लारीन न्हीरेधोना धन्छ्याजी।

⁷ जमाहेन्से येशूसे हाडला चेलागदेदा “लु, दाहेन्से य्हाड दो:सीनोन यहूदिया अञ्चलरी निड” भिसी सुड्जी।

⁸ चेलागदेसे येशूदा “गुरु, ओने जे हाडदा थेरी यहूदीगदेसे युडबासे तोबारी म्हाइमुबा, तिग दो:सीनोन हाड थेरीन फेप्बारी म्हाइबा?” भिसी भिजी।

⁹ येशूसे थेनीगदेदा चुहड् भिसी सुड्जी, “तिग धिन गिकरी च्युक न्ही घण्टा आत? धिनीरी भ्रबा म्हेला काड आठोक। तिग्दा भिसम थेसे जम्बुलिडरी धिनीग्याम य्हाल याड्ला।¹⁰ तर म्हुनड भ्रबा म्हेला काड ठोकला। तिग्दा भिसम म्हुनड थेदेन छ्याम य्हाल आत।”

¹¹ जमाहेन्से येशूसे थेनीगदेदा “य्हाडला ह्यो लाजरस म्हेर्बा मुला। तर डा थेदा छिड्बारी थेरी नितो:ला” भिसी सुड्जी।

† 10:33 लेवी २४:१६ †† 10:34 भजन ८२:६ † 10:40 यूह १:२८ †† 11:1 लुका १०:३८-३९ †† 11:2 यूह १२:३

¹² चेलागदेसे येशूदा “प्रभु, थे म्हेर्बा जे हिन्सम थे खम्ला” भिसी भिजी।
¹³ येशूसे सुड्बा चा लाजरस सिसी जिन्जी भिसी सुड्बा, तर थेनीगदेसे चा लाजरस म्हेर्बा जे चीम भिसी म्हन्बा मुबा।

¹⁴ थेतबासेलमा येशूसे थेनीगदेदा सिधान सुड्जी, “लाजरस सिसी जिन्बा मुला।¹⁵ तर एनीगदेसे विश्वास लगे भिसी डा थेरी तुरुन्तन आनिबा हिन्ना। थेतबासेलमा डा ताड्बा मुला। दाहेन्से भ्रउ, य्हाड थे मुबा ग्लारी निड” भिसी सुड्जी।¹⁶ जमाहेन्से येशूला चेला दिदुमस ††† भिबा थोमासे स्हान्दो चेलागदेदा “लु, य्हाडएनोन गुरुदेन छ्याम निड, सितो:सै गुरुदेन छ्यामनोन सिला” भिसी भिजी।

सिबाग्याम सोना लबादेन जुनी पिन्बा येशू

¹⁷ येशू बेथानिया भिबा नाम्सारी धोखमा लाजरसदा धुर्सा न्हडरी थान्बा ब्लिरे तसी जिन्बा मुबा।¹⁸ बेथानिया नाम्सा यरूशलेम शहरग्याम कोस गिक ते थारेड मुबा।¹⁹ माथदिन मरियमला आले सिबासे लमा ल्हानान यहूदीगदे माथदिन मरियमदा सम्झब लबारी खबा मुबा।²⁰ येशू फेप्खबान मुला भिबा ताम थे:सी मार्था येशूदा स्याप्बारी निजी। तर मरियम चा दिमरीन चिजी।

²¹ जमाहेन्से मार्थासे येशूदा स्याप्सी चुहड् भिजी, “प्रभु, हाड मुबा हिन्सम डाला आले आसिसेला मुबा।²² तर दान्देनोन हाडसे परमेश्वरदेन छ्याम जुन स्हे हीसैनोन परमेश्वरसे हाडदा पिन्ना भिबा ताम डादा था मुला।”

²³ येशूसे मार्थादा “एला आले दो:सी सोला” भिसी सुड्जी।

²⁴ मार्थासे येशूदा “चु जम्बुलिड नाश तबा धुडरी जम्मान म्हे सिबाग्याम सोमा थेएनोन सोला भिबा ताम डादा था मुला” भिसी भिजी।

²⁵ येशूसे थेदा चुहड् भिसी सुड्जी, “सिबाग्याम सोना लबादेन जुनी पिन्बा डानोन हिन्ना। डादा विश्वास लबा म्हे सिसैनोन सोला।²⁶ ओच्छे डादेन छ्याम भ्रबादेन डादा विश्वास लबा म्हे खाड्मै आसि। तिग एसे चु ताम विश्वास लखम्ला?” भिसी सुड्जी।

²⁷ मार्थासे येशूदा “हिन्ना प्रभु, डाइ हाडदा विश्वास लला, हाड परमेश्वरला झा जम्बुलिडरी फेप्खबा थार्बा पिन्बा ख्रीष्ट हिन्ना” भिसी भिजी।

²⁸ चुहड् भिसी मार्था निजी, ओच्छे हाडला आडा मरियमदा सुटुक्क ड्योड्सी, “गुरु धोखजी, एदा गुरुसे ड्योड्बान मुला” भिसी भिजी।²⁹ चु ताम थे:मैछ्याम मरियम तुरुन्तन येशू मुबा ग्लारी निजी।³⁰ थे धुड्धोना येशू नाम्सारी धोखबा आरेमुबा। तर येशू मार्थासे स्याप्बा ग्लारीन मुबा।³¹ थेन्ना दिमरी थेन्दा सम्झब लबारी खबा यहूदीगदेसे मरियम योना योना लसी निबा म्हाइजी। थे आलेला धुर्सारी क्राबारी निबा हिन्ना भिसी म्हन्सी थेनीगदे मरियमला लिच्छा लिच्छा निजी।

³² मरियम येशू मुबा ग्लारी थोमाहेन्से येशूदा फ्या लबान, “प्रभु, हाड चुरी मुबा हिन्सम डाला आले आसिसेला मुबा” भिसी भिजी।³³ मरियम ओच्छे थेदेन छ्याम खबा जम्मान यहूदीगदे क्राबा म्हाइसी येशूदा ल्हानान दुख इहम्जी।

³⁴ जमाहेन्से येशूसे थेनीगदेदा “एनीगदेसे थेदा खानड थान्बा मुला?” भिसी इयोड्मा, थेनीगदेसे येशूदा “प्रभु, फेप्खसी स्हीगो” भिसी भिजी।

³⁵ थे धुडरी येशूएनोन क्राजी।³⁶ थेतबासेलमा यहूदीगदेसे “च्यागो, येशूसे थेदा गाते माया लमुबा” भिसी भिजी।

³⁷ तर कोड कोड म्हेसे चा “तिग काना म्हेला मी खम्ना लबा चु म्हेसे थेदा खम्ना लबारी आखम्नी?” भिसी भिजी।

येशूसे लाजरसदा सिबाग्याम सोना लबा

³⁸ जमाहेन्से येशू दो:सीनोन ल्हानान दुख इहम्सी धुर्सारी फेप्जी। थे धुर्सा चा ऊ हड्बा मुबा। थे धुर्साला प्रापरी युडबा थान्मुबा।³⁹ येशूसे थेनीगदेदा “धुर्साला प्रापरी थान्बा युडबा ते:गो” भिसी सुड्जा, सिबा म्हेला नाना मार्थासे येशूदा “प्रभु दान्देधोना मी थे थाड खसी जिन्तला। तिग्दा भिसम थे सिबा ब्लिरे तसी जिन्जी” भिसी भिजी।

††† “दिदुमस” भिबा चा जौल्या हिन्ना।

40 येशूसे थेदा “एसे विश्वास लजी भिसम परमेश्वरला घेन यहालदेन शक्ति म्राडला भिसी डाइ एदा पाडबा आहिन?” भिसी सुड्जी।

41 थेनीगदेसे युडबा ले:माहेन्से स्वर्गपट्टि स्हीसी येशूसे चुहड् भिसी सुड्जी, “आबा, हाडदा धन्यवाद मुला। तिगदा भिसम हाडसे डाला बिन्ती ड्यान्जी।

42 हाडसे डाला ताम सदन ड्यान्मुला भिबा ताम डादा था मुला। तसैनोन डादा हाडसे चु जम्बुलिडरी पुड्खबा हिन्ना भिबा ताम चुरी मुबा म्हिगदेसे विश्वास लबारी खमौ भिसीन डाइ हाडदा चु ताम पाडबा हिन्ना।”

43 चुहड् सुड्जी जिन्माहेन्से येशूसे घेन काडरी “लाजरस, ए मडग्यार खउ” भिसी क्रिड्जी। 44 जमाहेन्से सिबा लाजरस रे:सी मडग्यार खजी। अझन थेला थोबोहेन्से काडधोना खीबा मुबा। येशूसे थेरी मुबा म्हिगदेदा “थेदा खीबा क्वान ब्लासी थेदा निपुड्जी” भिसी सुड्जी।

येशूदा साइबारी म्हाइबा

मत्ती २६:१-५; मर्कुस १४:१-२; लूका २२:१-२

45 येशूसे लबा चुहड्बा उदेकला गे म्राड्सी मरियमदा हुप तबारी खबा ल्हानान यहूदीगदेसे येशूदा विश्वास लजी। 46 तर थेनीगदे न्हडला कोड कोड चा फरिसीगदे मुबा ग्लारी निसी येशूसे लबा गेला बारेरी पाड्जी।

47 जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे जम्मान भन्दा घेन यहूदी सभाला म्हिगदेदा ड्योड्सी चुहड् भिसी भिजी, “चु म्हिसे ल्हानान उदेकला गेगदे लमुला। दाहेन्से यहाडसे तिग लड? 48 चु म्हिदा तिगै आलना ओहड्नुन खलाजी भिसम जम्मान म्हिगदेसे चुदा विश्वास लला। ओच्छे रोमी सिपाहीगदे खसी यहाडला परमेश्वरला मन्दिरदेन यहाडला यहुल नाश लला।”

49 कैयाफा भिबा म्हि परमेश्वरला मन्दिररी पूजा लबा थे दिडला मुल म्हि मुबा। थेसे थेनीगदेदा चुहड् भिसी भिजी, “एनीगदेदा तिगै ताम था आरे।

50 जम्मान यहुल्सा नाश तबा भन्दा बरु जम्मान म्हिला लागिरी म्हि गिक सिबान एनीगदेला लागिरी ज्यबा तला भिसी एनीगदेसे घोबा आरे।”

51 चु ताम थेसे हाडला सेमग्याम पाड्बा आहिन मुबा। तर थे परमेश्वरला मन्दिररी पूजा लबा थे दिडला मुल म्हि तबासे लमा यहूदी यहुलला लागिरी येशू सिनोन तो:ला भिसी परमेश्वरला ताम पाड्बा मुबा। 52 ओच्छे थेसे चु ताम यहूदी यहुलला लागिरी जे पाड्बा आहिन मुबा। तर ससा बडबड तसी चिबा परमेश्वरला जम्मान म्हिगदेदाएनोन गिक स्होबाला लागिरी थेसे चु ताम पाड्बा मुबा। 53 थेतबासेलमा थे धिनहेन्से यहूदी नेतागदेसे येशूदा साइबारी सल्लाह लजी।

54 जमाहेन्से यहूदीगदेला डाच्छा येशू दो:सी डाच्छाला हड् लसी आभनी। तर थे ग्लायाम तोडतोडबा ग्लाला डामरी मुबा एफ्राइम भिबा शहररी फेप्सी थेरीन चेलगदेदेन छ्याम धन्छ्याजी।

55 यहूदीगदे मिश्र यहुल्साग्याम फेसी खबा धिनदा ढन्सी धड्बा चाड खबारी छ्याडमुबा। थेतबासेलमा चाड खबा भन्दा डाच्छान हाड हाडदा चोखो स्होबाला लागिरी नाम्सा नाम्साग्याम ल्हानान म्हिगदे यरूशलेम शहररी निजी। 56 थेनीगदेसे येशूदा जम्मान ग्लारी म्हाइजी, ओच्छे थेनीगदे जम्मान परमेश्वरला मन्दिररी हुप तबा धुडरी “एनीगदेदा खाहड्बा छोर्बा मुला, तिग थे चु चाडरी खला?” भिसी हाड हाड न्हडरी ताम लजी। 57 परमेश्वरला मन्दिररी पूजा लबा मुल म्हिगदेदेन फरिसीगदेसे चा येशूदा चुड्बाला लागिरी थे जुन ग्लारी मुसै था याड्बा म्हिसे “डन्दा पाड्जी” भिसी कुल्बा मुबा।

येशूदा अत्तर फोर्बा

मत्ती २६:६-१३; मर्कुस १४:३-९

12 मिश्र यहुल्साग्याम फेबा धिनदा ढन्सी धड्बा चाड खबा भन्दा डुरे डाच्छा येशू लाजरसदा सिबाग्याम सोना लबा बेथानिया भिबा नाम्सारी धोखजी। 2 येशूला लागिरी थेनीगदेसे जमाकुनु ड्यसे थेरीन सोल स्होजी। मार्थासे चा जम्मादान क्योड्बान मुबा। येशूदेन छ्यामनोन चिबागदे न्हडरी गिक चा लाजरस मुबा। 3 थेनोन धुडरी मरियमसे जटामसी भिबा दोडला टाग्याम स्होबा महंगो खाल्ला ज्यबा बास्ना खबा अत्तर लिटर गडसल ते भसी येशूला स्थापरी फोर्सी हाडलान क्रासे येशूला स्थाप फ्याजी। ओच्छे दिम नाडनोन थे अत्तरला बास्ना खजी। 4 तर येशूदा चुड्सी

पिन्बारी म्हाइबा चेला यहूदा इस्करियोतसे चुहड् भिसी भिजी, 5 “चु अत्तर मी ग्यार्जा सोम म्हुडला डबलरी †† चुड्सी थे टाडगा प्राडबोगदेदा पिन्सै तसेला।” 6 तर थेसे प्राडबोगदेदा वास्ता लसी चु ताम पाड्बा आहिन मुबा। तिगदा भिसम थे य्हो मुबा, ओच्छे टाडगाएनोन थेदेन छ्यामनोन थान्सी थेसेन य्हो लमुबा।

7 येशूसे चुहड् भिसी सुड्जी, “थेदा तिगै थापाड्जी, डादा ल्हुबा धिनना लागिरी चुसे चुहड् लबा हिन्ना। 8 तिगदा भिसम प्राडबो म्हिगदे मी एनीगदेदेन छ्याम सदन तला, तर डा चा एनीगदेदेन छ्याम सदन आत।” ‡

लाजरसदा साइबारी सल्लाह लबा

9 येशू बेथानिया भिबा नाम्सारी मुला भिबा था याड्सी ल्हानान यहूदीगदे थेरी खजी, थेनीगदे येशूदा च्याबारी जे खबा आहिन मुबा। तर येशूसे सिबाग्याम सोना लबा लाजरसदाएनोन च्याबारी खबा मुबा। 10 थेतबासेलमा परमेश्वरला मन्दिररी पूजा लबा मुल म्हिगदेसे लाजरसदाएनोन साइबारी सल्लाह लजी। 11 तिगदा भिसम लाजरसदा सिबाग्याम सोना लबासे लमा ल्हानान यहूदीगदेसे थेनीगदेदा खलासी येशूदा विश्वास लबान मुबा।

येशू यरूशलेमरी फेप्बा

मत्ती २१:१-११; मर्कुस ११:१-११; लूका १९:२८-४०

12 न्हडगरदडसे मिश्र यहुल्साग्याम फेबा धिनदा ढन्सी धड्बा चाडरी खबा ल्हानान म्हिगदेसे येशू यरूशलेमरी फेप्खबान मुला भिबा ताम थे:जी।

13 जमाहेन्से खजूरला हाँगागदे क्युड्सी थोबान म्हिगदेसे “थेला जयजयकार तगै,

परमप्रभुला मिनरी फेप्खबासे परमेश्वरग्याम मोलम याड्नी इस्त्राएलला ग्लेदा ‡ परमेश्वरसे मोलम पिन्सै”

भिसी क्रिड्बान येशूदा मान लबारी खजी। ‡

14 येशूसे गधाला कोला गिक स्याप्जी ओच्छे थेनोन गधाला कोलाथोरी क्रे:सी फेप्खजी। परमेश्वरला बचनरीनोन चुहड् लसी भिबा मुला, ‡‡

15 “सियोनना ‡‡‡ म्हिगदे, एनीगदे थालोड्जी।

च्यागो, एनीगदेला ग्ले गधाला कोलाथोरी क्रे:सी फेप्खबान मुला।” §

16 डाच्छा मी चु ताम येशूला चेलागदेसेनोन आघोनी। तर येशू सिबाग्याम सोसी स्वर्गरी घेन यहालदेन शक्तिरी फेप्माहेन्से जे थेनीगदेसे येशूला बारेरी भिबा जम्मान ताम घोजी।

17 येशूसे धुर्सारी थान्बा लाजरसदा ड्योड्सी सिबाग्याम सोना लबा धुडरी येशूदेन छ्यामनोन मुबा म्हिगदेसे येशूसे लबा गेला बारेरी पाड्सी भ्रजी।

18 येशूसे चुहड्बा उदेकला गे लबा मुबा भिबा ताम थे:बासे लमाएनोन म्हिगदे येशूदा हुप तबारी निबा मुबा। 19 थेतबासेलमा फरिसीगदे हाड हाड न्हडरी “खाड्, यहाडसे तिग लखम्जी। च्यागो, जम्बुलिडला जम्मान म्हिगदे थेदेन छ्याम भ्रबारी छ्याड्जी” भिसी भिजी।

ग्रीक यहुलला म्हिगदेसे येशूदा म्हाइबा

20 कोड कोड ग्रीस यहुल्साला म्हिगदे ‡ मिश्र यहुल्साग्याम फेबा धिनदा ढन्सी धड्बा चाडरी पूजा लबाला लागिरी यरूशलेम शहररी खबा मुबा।

21 थेनीगदे गालील अञ्चलला बेथसेदा भिबा नाम्सारी चिबा फिलिप मुबा ग्लारी निसी, “डनी येशूदेन छ्याम हुप तबा सेम मुला” भिसी बिन्ती लजी।

22 जमाहेन्से फिलिप निसी अन्द्रियासदा चु ताम पाड्जी, ओच्छे थेनीनोन निसी येशूदा पाड्जी।

23 येशूसे थेनीगदेदा चुहड् भिसी सुड्जी, “दाहेन्से परमेश्वरसे पुड्खबा म्हिदा मान लबा धुड् खसी जिन्बा मुला। 24 च्यागो, एनीगदेसे डाला ताम ड्यान्गो, बु वारीरी ड्वबा ग्वाला ब्नु आसिनी भिसम थे गिक जेन तला। तर थे सिजी भिसम फुड्सी थेरी ल्हानान ग्वा रोला। 25 थेतबासेलमा जुन म्हिसे

† 12:3 लूका ७:३७-३८ †† “ग्यार्जा सोम म्हुडला डबल” चा तिदिडला ज्याला मुबा। ‡ 12:8 व्यव १५:११ ‡‡ “इस्त्राएलला ग्ले” भिबा चा थार्बा पिन्बा ख्रीष्ट भिबा हिन्ना। ‡‡‡ 12:13 भजन ११८:२५-२६ ‡‡‡ 12:14 मत्ती २१:१-११; मर्कु ११:१-११; लूका १९:२८-४० ‡‡‡ “सियोन” भिबा चा यरूशलेम शहरदा पाड्बा हिन्ना। § 12:15 जक ९:९ ‡ चु म्हिगदे चा यहूदीगदेसे हड्नुन परमेश्वरदा तेन्बा म्हि मुबा।

हाडला ज्यान जोगब लबा सेम लला थे म्हिसे जुकजुकधोनाला जुनी आयाड। तर जुन म्हिसे जम्बुलिडरी मुमा हाडला ज्यानना वास्ता आलना डादेन छयाम भ्रला, थेसे जुकजुकधोनाला जुनी सदन जोगब लसी थान्ना।[†] 126 खालै म्हिसे डाला लागिरी गे लबा सेम लजी भिसम थे डादेन छयाम भ्रतोःला। ओच्छे डा जुन ग्लारी चिला, डाला गे लबा म्हिणेन डादेन छयामनोन तला। खालै म्हिसे डाला लागिरी गे लजी भिसम डाला आबासे थेला मान बढब लसी पिन्ना।

येशूसे हाड सिबाला बाररी सुड्बा

27 येशूसे चुहड् भिसी सुड्जी, “दान्दे डादा सेमरी ल्हानान दुख तबा मुला, डाइ तिग पाड्से? ‘आबा डादा चु दुखग्याम जोगब लउ’ भिसी पाड्बारी तला? आत, तिगदा भिसम डा चु दुख नाबाला लागिरीन खबा हिन्ना।

28 आबा, हाड जम्मान भन्दा घेन परमेश्वर हिन्ना भिबा ताम उन्गो।”

जमाहेन्से स्वर्ग्याम “डाइ डा जम्मान भन्दा घेन परमेश्वर हिन्ना भिबा ताम उन्सी जिन्बा मुला, चु ताम डाइ अझ उन्ना” भिबा काइ खजी।

29 चु ताम थेःसी थेरी मुबा म्हिगदेसे “चु मु गुर्बा हिन्ना” भिसी भिजी। तर स्हान्दोगदेसे चा “स्वर्गदूत थेदेन छयाम ताम लबा हिन्ना” भिसी भिजी।

30 येशूसे थेनीगदेदा चुहड् भिसी सुड्जी, “स्वर्ग्याम खबा चु काइ डाला लागिरी आहिन, तर एनीगदेला लागिरी हिन्ना।[‡] 31 दाहेन्से चु धुइ चा जम्बुलिडरी मुबा म्हिगदेला निसाफ लबा धुइ हिन्ना, ओच्छे चु जम्बुलिडदा तहरी थान्बादा †† मडग्यार भ्याड्ला।^{‡‡} 32 ओच्छे डादा जम्बुलिडग्याम तोर थीमाहेन्से जम्मान म्हिदा डाइ डा मुबा ग्लारी भला।”^{‡‡‡} 33 येशूसे हाड खाहड् लसी सिबान मुला भिबा ताम म्हिगदेसे घोगै भिसी चुहड् सुड्बा मुबा।

34 जमाहेन्से म्हिगदेसे येशूदा “थार्बा पिन्बा ख्रीष्ट सदन सोला भिबा ताम डन्से ठिमग्याम थेःबा मुला। हाडसे चा तिगदा ‘परमेश्वरसे पुड्खबा म्हिदा तोर थीनोन तोःला’ † भिसी सुड्बा? परमेश्वरसे पुड्खबा चु म्हि चा खाल हिन्ना?” भिसी इयोइजी।^{‡‡‡}

35 येशूसे थेनीगदेदा चुहड् भिसी सुड्जी, “अझ छिन्नड य्हाल एनीगदेदेन छयाम तला। थेतबासेलमा य्हाल एनीगदेदेन छयाम मुबा धुइरीन हाड भ्रतोःबा ग्यामरी भ्रउ। आहिन्सम एनीगदेदा धोपधोपसे घप्ला, धोपधोपरी भ्रबा म्हिदा हाड खानड निबान मुला भिबा तामनोन था आत।^{‡‡‡} 36 य्हाल एनीगदेदेन छयाम मुबा धुइरी एनीगदेसे थेदा विश्वास लउ। थेहड् लजी भिसम एनीगदे य्हालला सन्तान दोला।” चु ताम सुड्सी जिन्माहेन्से येशू थे ग्याम फेप्सी थेनीगदेसे आम्राड्बा ग्लारी धन्छ्याजी।

यहूदीगदेसे येशूदा विश्वास आलबा

37 येशूसे यहूदीगदेदान ओन्हाडरी ल्हानान उदेकला गेगदे लबा मुबा। तसैनोन थेनीगदेसे येशूदा विश्वास आलनी।^{‡‡‡} 38 यशैया अगमवक्तासे पाड्बा ताम पूरा तबारीन चुहड् तबा हिन्ना। यशैया अगमवक्तासे

“परमप्रभु, डन्से पाड्बा ताम खाल्से विश्वास लजी?

ओच्छे हाडसे लबा शक्तिशाली गे खाल्से म्राड्जी?”

भिसी पाड्बा मुबा।^{‡‡‡}

39 थेनीगदेसे विश्वास लआखम्नी, तिगदा भिसम यशैया अगमवक्तासे दोःसी चुहड् भिसी पाड्बा मुला,

40 “प्रभुसे थेनीगदेला मी बन्द लसी पिन्बा मुला

ओच्छे थेनीगदेला सेम कोड्ना लबा मुला।

आहिन्सम थेनीगदेसे म्राड्सेला मुबा,

सेमहेन्सेन घोसेला मुबा,

डापट्टि दोःसेला मुबा,

ओच्छे थेनीगदेदा डाइ खम्ना लसेला मुबा।”^{‡‡‡}

41 यशैया अगमवक्तासे येशूला घेन शक्ति म्राड्सी येशूला बाररीन चु ताम पाड्बा मुबा।

42 तसैनोन ल्हानान यहूदी नेतागदेसे येशूदा विश्वास लजी। तर फरिसीगदेसे यहूदीगदे हुप तबा दिमरी वाड्बारी आपिन भिसी लोड्सी थेनीगदेसे चु ताम खालैदान आपाड्नी।^{‡‡‡} 43 तिगदा भिसम थेनीगदेसे परमेश्वरसे भन्दा म्हिगदेसे ज्यबा भिगै भिसी म्हन्मुबा।

येशू जम्बुलिडदा सोना लबारी फेप्खबा

44 येशूसे घेन काइरी चुहड् भिसी सुड्जी, “डादा विश्वास लबा म्हिगदेसे डादा जे आहिन, तर डादा पुड्खबादाएनोन विश्वास लला।^{‡‡‡} 45 ओच्छे डादा म्राड्बा म्हिसे डादा पुड्खबादाएनोन म्राड्ला।^{‡‡‡} 46 डादा विश्वास लबा म्हिगदे धोपधोपरी भ्रआतोःगै भिसीन डा जम्बुलिडरी य्हाल दोसी खबा मुला।

47 “डाला ताम थेःसीनोन डाइ पाड्बा अन्धार आभ्रबा म्हिगदेला निसाफ आल। तिगदा भिसम डा जम्बुलिडला म्हिगदेला निसाफ लबारी खबा आहिन। तर जम्बुलिडला म्हिगदेदा थार्ना लबारी खबा हिन्ना।^{‡‡‡} 48 तर डादेन डाला तामदा विश्वास आलबा म्हिगदेला निसाफ लबारी न्यायाधीश गिक मुला। थे न्यायाधीश चा डाइ पाड्बा तामनोन हिन्ना। थेसेन चु जम्बुलिड नाश तबा धुइरी थेनीगदेला निसाफ लला।^{‡‡‡} 49 तिगदा भिसम चु ताम डाइ डाला सेमग्याम पाड्बा आहिन, तर डादा पुड्खबा आबासे कुल्बा अन्धारनोन डाइ पाड्बा हिन्ना।^{‡‡‡} 50 डादा पुड्खबा आबासे कुल्बा ताम इयान्बा म्हिदा जुकजुकधोनाला जुनी पिन्ना भिबा ताम डादा था मुला। थेतबासेलमा आबासे जुन ताम पाड्पुड्ला थे ताम जे डाइ पाड्बा मुला।”

येशूसे हाडला चेलागदेला काड ख्बुबा

13 मिश्र यहूल्साग्याम फेसी खबा धिनदा ढन्सी धड्बा चाड खबा भन्दा डाच्छान चु जम्बुलिड ख्लासी आबा मुबा ग्लारी निबा धुइ तसी जिन्जी भिबा ताम येशूसे था याड्सी जिन्बा मुबा। येशूसे जम्बुलिडरी मुबा हाडला चेलागदेदा ल्हानान माया लमुबा, ओच्छे थेनीगदेदा लिच्छाधोनान माया लजी।

2 येशू हाडला चेलागदेदेन छयाम ड्यसेला सोल छ्योइबान मुबा। थेनोन धुइरी येशूदा चुड्सी पिन्बा सेम शैतानसे सिमोनना झा यहूदा इस्करियोतदा खना लसी जिन्बा मुबा।^{‡‡‡} 3 परमेश्वरसे जम्मान अधिकार हाडदा पिन्बा मुला भिबा ताम येशूदा था मुबा। ओच्छे परमेश्वरग्यामनोन खसी दोःसी परमेश्वर मुबा ग्लारी निबान मुला भिबा तामएनोन येशूदा था मुबा 4 सोल छयोइमाहेन्से येशू स्हेड्जी, ओच्छे हाडसे नान्बा घ क्यार थान्सी क्रेप्सरी गम्सा खीजी।^{‡‡‡} 5 जमाहेन्से येशूसे ताड गिकरी क्युइ युजी, ओच्छे हाडला चेलागदेला काड ख्बुसी हाडसे खीबा गम्सासे थेनीगदेला काड फ्याजी।

6 येशूसे सिमोन पत्रुसला काड ख्बुबारी छयाइमा सिमोन पत्रुससे “प्रभु तिग हाडसे डाला काड ख्बुबारी छयाइबा?” भिसी भिजी।

7 येशूसे थेदा “डाइ तिग लबान मुला, थे ताम एसे दान्दे आघो। तर चु ताम एसे लिच्छा घोला” भिसी सुड्जी।

8 पत्रुससे येशूदा “हाडसे डाला काड खाइमै ख्बुबारी आत” भिसी भिमा, येशूसे थेदा “डाइ एला काड आख्बुनी भिसम ए डाला म्हि आदो” भिसी सुड्जी।

9 जमाहेन्से सिमोन पत्रुससे येशूदा “थेहड् भिसम प्रभु, डाला काड जे आहिन, तर डाला यादेन थोबोएनोन ख्बुसी पिन्गो” भिसी भिजी।

10 जमाहेन्से येशूसे थेदा “नुहाब लसी जिन्बा म्हिसे काड जे ख्बुतोःला। एनीगदे न्हडरी म्हि गिक बाहेक स्हान्दो जम्मान चोखो तसी जिन्बा मुला” भिसी सुड्जी।^{‡‡‡} 11 तिगदा भिसम हाडदा खाल्से चुड्सी पिन्बारी छयाइबा मुला भिबा ताम येशूदा था मुबा। थेतबासेलमान येशूसे “एनीगदे न्हडला गिक चा चोखो तबा आरे” भिसी सुड्बा मुबा।

12 थेनीगदेला काड ख्बुसी जिन्माहेन्से हाडला घ नान्सी येशू दोःसी धन्छ्याजी। जमाहेन्से येशूसे थेनीगदेदा चुहड् भिसी सुड्जी, “डाइ तिगदा एनीगदेला काड ख्बुजी भिबा ताम एनीगदेसे घोजी? ‡‡‡^{‡‡‡} एनीगदेसे डादा

‡‡‡ 13:12 लूका २२:२७

† 12:25 मत्ती १०:३९; १६:२५; मर्कू ८:३५; लूका ९:२४; १७:३३ †† “जम्बुलिडदा तहरी थान्बा” चा शैतान हिन्ना। यहू १४:३०, १६:११ स्हीगो। ‡ येशूसे ‘परमेश्वरसे पुड्खबा म्हिदा तोर थीनोन तोःला’ भिबा चा हाडदा कुसरी टोंगब लसी साइला भिसी सुड्बा हिन्ना। ‡‡ 12:34 भजन ११०:४; यशै ९:७; इज ३७:२५; दानि ७:१४ ‡‡‡ 12:38 यशै ५३:१ ‡‡‡ 12:40 यशै ६:१०

'गुरुदेन प्रभु' भिसी पाड्बा ताम सत्य हिन्ना, तिग्दा भिसम डा एनीगदेला गुरुदेन प्रभुन हिन्ना। ¹⁴ चुदे डा प्रभुदेन गुरु तसीनोन डाइ एनीगदेला काड खुजी भिसम एनीगदेसेनोन गिकसेम गिकला काड खुतो:ला। ¹⁵ डाइ लबा हड्ढोन एनीगदेसेनोन लगै भिसीन डाइ चुहड् लसी उन्बा हिन्ना। एनीगदेसेनोन चुहड्ढोन लउ। ¹⁶ थेतबासेलमा च्यागो, एनीगदेसे डाला ताम इयान्गो, मालिक भन्दा नोकर घेन आत ओच्छे समाचार पुड्बा म्हि भन्दा समाचार भोर्बा म्हि एनोन खाड्मै घेन आत। ¹⁷ चुदे एनीगदेसे चु ताम घोसी चुनोन अन्धार लजी भिसम एनीगदेसे परमेश्वरग्याम मोलम याड्जला।

येशूसे हाडदा थोका पिन्बा चेलाला बारेरी सुड्बा
मत्ती २६:२०-२५; मर्कूस १४:१७-२१; लूका २२:२१-२३

¹⁸ "चु ताम डाइ एनीगदे जम्मालान बारेरी पाड्बा आहिन, डाइ धम्बागदेदा डाइ ज्यना लसी डोसेमुला। तर 'डादेन छ्यामनोन गेड चबा म्हिसे डादा थोका पिन्बा' भिसी परमेश्वरला बचनरी पाड्बा ताम पूरा तबाला लागिरीन चुहड् तबा हिन्ना। ¹⁹ चु ताम तमाहेन्सेनोन एनीगदेसे डादा "डा थेनोन हिन्ना" भिसी विश्वास लबारी खमौ भिसीन डाइ चु ताम एनीगदेदा डाच्छान पाड्बा हिन्ना। ²⁰ थेतबासेलमा च्यागो, एनीगदेसे डाला ताम इयान्गो, डाइ पुड्बा म्हिगदेदा मान लबा म्हिसे डादा एनोन मान लला, ओच्छे डादा मान लबा म्हिसे डादा पुड्खबादा एनोन मान लला।" ²¹

²¹ चु ताम सुड्सी जिन्माहेन्से ल्हानान दुख इहम्सी येशूसे चेलगदेदा "च्यागो, एनीगदेसे डाला ताम इयान्गो, एनीगदे न्हडलान गिकसे डादा म्हिगदेला यारी जिम्मा पिन्ना" भिसी सुड्जी।

²² येशूसे चु ताम खाल्ला बारेरी सुड्बा हिन्ना भिबा आघोबासे लमा चेलगदेसे हाड हाड न्हडरी गिकसेम गिकला लीरी च्याबारी छ्याड्जी।

²³ येशूसे ल्हानान माया लबा चेला चा येशूला डामरीन चिबा मुबा।

²⁴ जमाहेन्से सिमोन पत्रुससे थेदा "येशूसे चु ताम खाल्ला बारेरी सुड्बा हिन्ना? इयोड्गो" भिसी मीला चाल लजी।

²⁵ थे येशूला डामरी चिबान येशूदा "प्रभु, थे म्हि खाल हिन्ना?" भिसी इयोड्जी।

²⁶ येशूसे थेदा "डाइ जुन म्हिदा गेड तुड्सी पिन्ना, थे म्हि थेनोन हिन्ना" भिसी सुड्जी। ओच्छे येशूसे टोगल गिक गेड तुड्सी सिमोन इस्करियोतला झा यहूदा इस्करियोतला पिन्जी। ²⁷ थे गेड किन्माहेन्से यहूदा इस्करियोत न्हडरी शैतान वाड्जी। जमाहेन्से येशूसे थेदा "एसे तिग लबारी छ्याड्बा मुला, थे योनान लउ" भिसी सुड्जी। ²⁸ तर येशूसे थेदा तिग्दा थेहड् भिसी सुड्बा हिन्ना भिसी थेरी चबारी चिबागदे खालैसेन आघोनी। ²⁹ थेनीगदेला टाड्गा यहूदा इस्करियोतसे थान्बासे लमा कोड कोडसे चा येशूसे थेदा चाडला लागिरी तो:बा स्हेगदे ग्लुड भिसी सुड्जीनम भिसी म्हन्जी। ओच्छे कोड कोडसे चा येशूसे थेदा प्राड्बोगदेदा तिगै पिन्गो भिसी सुड्जीनम भिसी म्हन्जी। ³⁰ येशूसे पिन्बा गेड चमाहेन्से यहूदा इस्करियोत तुरुन्तन मडग्यार निजी। थे धुड्डी थोप तसी जिन्बा मुबा।

येशूसे कुल्बा छार ताम

³¹ यहूदा इस्करियोत मडग्यार निमाहेन्से येशूसे चुहड् भिसी सुड्जी, "दाहेन्से परमेश्वरसे पुड्खबा म्हिसे घेन मान याड्बा मुला, ओच्छे थेग्याम परमेश्वरसेनोन घेन मान याड्बा मुला। ³² चुदे परमेश्वरसे पुड्खबा म्हिग्याम परमेश्वरसे घेन मान याड्जी भिसम परमेश्वरसेनोन हाडसे पुड्खबादा घेन मान पिन्ना। ओच्छे परमेश्वरसे चु गे योनान लला।

³³ "कोलागदे, डा एनीगदेदेन छ्याम छिन्नड जे तला। एनीगदेसे डादा म्हाइला, तर दाहेन्से डाइ यहूदीगदेदा पाड्बा ताम एनीगदेदा एनोन पाड्बा, 'डा जुन ग्लारी निबान मुला, थेरी एनीगदे खबारी आखम।' ³⁴

³⁴ "दाहेन्से डाइ एनीगदेदा छार ताम गिक कुल्ला, एनीगदेसे गिकसेम गिकदा माया लउ। डाइ एनीगदेदा माया लबा हड् लसी एनीगदेसेनोन

गिकसेम गिकदा माया लउ। ³⁵ चुदे एनीगदेसे गिकसेम गिकदा माया लजी भिसम एनीगदे डाला चेला हिन्बा चीम भिसी जम्मासेन डोसेला।"

पत्रुससे येशूदा डोसेबा आरे भिसी पाड्बा भिसी येशूसे सुड्बा
मत्ती २६:३१-३५; मर्कूस १४:२७-३१; लूका २२:३१-३४

³⁶ सिमोन पत्रुससे येशूदा "प्रभु, हाड खानड फेज्वारी छ्याड्बा?" भिसी इयोड्मा, येशूसे थेदा "डा निबा ग्लारी ए दान्दे डादेन छ्याम भ्रबारी आखम, तर लिच्छा चा भ्रला" भिसी सुड्जी।

³⁷ पत्रुससे येशूदा "प्रभु, तिग्दा डा दान्देन हाडदेन छ्याम भ्रबारी आखम? हाडला लागिरी डा सिबारीनोन तयार मुला" भिसी भिजी।

³⁸ जमाहेन्से येशूसे थेदा "तिग एसे डाला लागिरी हाडला ज्याननोन पिन्खम्ला? च्यागो, एसे डाला ताम इयान्गो, नागा क्राबा भन्दा डाच्छान एसे डादा डोसेबान आरे भिसी सोमरेमधोना पाड्बा" भिसी सुड्जी।

येशूसे चेलगदेदा सम्झब लबा

14 येशूसे हाडला चेलगदेदा चुहड् भिसी सुड्जी, "एनीगदेसे दुख थाम्हेन्गो। एनीगदेसे परमेश्वरदा विश्वास लबा मुला, ओच्छे डादा एनोन विश्वास लउ। ² डाला आबाला दिमरी चिबा ग्ला ल्हानान मुला, ओच्छे डा एनीगदेला लागिरी ग्ला स्होबारी निबान मुला। चुदे ग्ला आरेबा हिन्सम डाइ एनीगदेदा चु ताम पाड्नीन आपाड्सेला मुबा। ³ एनीगदेला लागिरी ग्ला स्होसी जिन्माहेन्से डा दो:सी खला, ओच्छे एनीगदे डादेन छ्यामनोन चिबाला लागिरी एनीगदेदा एनोन डा मुबा ग्लारीन भोर्ला। ⁴ डा निबारी छ्याड्बा ग्याम एनीगदेदा थानोन मुला।"

येशू सत्य, ग्याम ओच्छे जुनी हिन्ना

⁵ थोमासे येशूदा "प्रभु, हाड खानड फेज्वान मुला भिबा ताम मी इन्दा था आरे भिसम हाड फेज्वा ग्याम मी झन इन्से खाहड् लसी था याड्से?" भिसी भिजी।

⁶ येशूसे चुहड् भिसी सुड्जी, "परमेश्वर मुबा ग्लारी भोर्बा ग्याम, सत्य ओच्छे जुनी डानोन हिन्ना। डाग्याम बाहेक खालैनोन परमेश्वर आबा मुबा ग्लारी निबारी आखम। ⁷ एनीगदेसे डादा डोसेबा हिन्सम डाला आबादा एनोन डोसेसेला मुबा। तर दाहेन्से एनीगदेसे डाला आबादा डोसेला, ओच्छे एनीगदेसे थेदा म्हाड्सी जिन्बा मुला।

⁸ फिलिपसे येशूदा "प्रभु, इन्दा परमेश्वर आबा उन्सी पिन्गो, चुदे लजी भिसम तला" भिसी भिजी।

⁹ येशूसे थेदा चुहड् भिसी सुड्जी, "फिलिप, चुदे धिनधोना डा एनीगदेदेन छ्याम चिजी, तसीनोन एसे डादा डोसेबा आरे? डादा म्हाड्बा म्हिसे परमेश्वर आबादा एनोन म्हाड्सी जिन्बा मुला। तर डादा म्हाड्सीनोन तिग्दा एसे इन्दा परमेश्वर आबादा उन्सी पिन्गो भिसी भिबा? ¹⁰ डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम एदा विश्वास आरे? जुन ताम डाइ एनीगदेदा पाड्बा मुला थे ताम डाइ डाला सेमग्याम पाड्बा आहिन। तर डादेन छ्याम गिक तबा आबासे हाडला गे डाग्याम लबान मुला। ¹¹ डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम विश्वास लउ। आहिन्सम डाइ लबा गेगदे च्यासीन विश्वास लउ।

¹² "च्यागो, एनीगदेसे डाला ताम इयान्गो, डादा विश्वास लबागदेसे डाइ लबा हड्ढान गे लबारी खम्ला, ओच्छे थे भन्दा घेन घेन गेगदे एनोन लबारी खम्ला। तिग्दा भिसम डा परमेश्वर आबा मुबा ग्लारी निबान मुला।

¹³ एनीगदेसे डादेन छ्याम जुन स्हे ह्रीसैनोन डाग्याम परमेश्वर आबाला मान तगै भिसी डाइ एनीगदेदा पिन्ना। ¹⁴ एनीगदेसे डाला मिनरी जुन स्हे ह्रीसै डाइ एनीगदेदा पिन्ना।

† 13:16 मत्ती १०:२४; लूका ६:४०; यूह १५:२० †† 13:18 भजन ४१:९ †
13:20 मत्ती १०:४०; मर्कू ९:३७; लूका ९:४८; १०:१६ †† 13:33 यूह ७:३४

‡ 13:34 यूह १५:१२, १७; १ यूह ३:२३; २ यूह ५

परमेश्वरला आत्मा पुइखला भिसी लबा कबुल

15 “चुदे एनीगदेसे डादा माया लबा मुसम डाइ कुल्बा ताम एनीगदेसे ड्यान्ना। 16 ओच्छे डाइ परमेश्वर आबादेन छ्याम बिन्ती लला, डाला साटोरी परमेश्वर आबासे एनीगदेदा ह्यो लबा आत्मा पुइखला। थे सदन एनीगदेदेन छ्याम धन्छ्याला। 17 थे आत्मासे एनीगदेदा परमेश्वरला बारेरी सत्य ताम घोना लला। तर थेदा जम्बुलिडला म्हिगदेसे विश्वास आल, तिग्दा भिसम जम्बुलिडला म्हिगदेसे थेदा न्ह म्राडला न्ह डोसेला। तर एनीगदेसे मी थेदा डोसेला, तिग्दा भिसम थे एनीगदेदेन छ्यामनोन मुला ओच्छे थे एनीगदे न्हडरी धन्छ्याला।

18 “डाइ एनीगदेदा टुहुरा स्होसी आथान, डा दोःसी एनीगदे मुबा ग्लारी खला। 19 छिन्नाड लिच्छा जम्बुलिडला म्हिगदेसे डादा खाइमै आम्राड, तर एनीगदेसे मी डादा म्राडला। तिग्दा भिसम डा सोबासे लमा एनीगदेएनोन सोला। 20 थे धिन खमाहेन्से खाह्ण्ड लसी एनीगदे डादेन छ्याम गिक तसी चिबा मुला, डाएनोन एनीगदेदेन छ्याम गिक तसी चिबा मुला, ओच्छे डा परमेश्वर आबादेन छ्याम गिक तसी चिबा मुला भिबा ताम एनीगदेसे था याडला। 21 जुन म्हिसे डाइ कुल्बा ताम सेमरी थान्सी थे अन्छार भला थेसे डादा माया लला। डादा माया लबा म्हिदा परमेश्वर आबासेनोन माया लला, डाइएनोन थेदा माया लला ओच्छे डा ह्नाडनोन थे मुबा ग्लारी खला।”

22 यहूदा इस्करियोत चा आहिन, तर स्हान्दो यहूदासे येशूदा “प्रभु, ह्नाड तिग्दा डनी मुबा ग्लारी चा फेपखला, तर जम्बुलिडला स्हान्दो म्हिगदे मुबा ग्लारी चा आफेपख भिसी सुडबा?” भिसी भिमा, 23 येशूसे थेदा चुह्ण्ड भिसी सुडजी, “चुदे खालैसे डादा माया लमुला भिसम थेसे डाइ कुल्बा तामएनोन ड्यान्मुला। ओच्छे थेदा डाला आबासेनोन माया लला, थेह्ण्ड लसीन डादेन डाला आबा थे मुबा ग्लारी खसी थेदेन छ्यामनोन चिला। 24 तर डादा माया आलबा म्हिगदेसे डाइ कुल्बा तामएनोन आड्यान्मुला। चु ताम डाइ एनीगदेदा डाला सेमग्याम पाड्बा आहिन, तर डादा पुइखबा परमेश्वर आबासेन सुड्बा हिन्ना।

25 “डा एनीगदेदेन छ्याम मुबा धुइरीन चु ताम डाइ एनीगदेदा पाड्बा मुला। 26 डाला साटोरी आबासे एनीगदेदा ह्यो लबारी पुइखबा थेला आत्मासे एनीगदेदा जम्मान ताम लोप्ला ओच्छे डाइ पाड्बा जम्मान तामएनोन एनीगदेदा ढन्ना लला।

27 “डा एनीगदेदा शान्ति पिन्सी निबान मुला। एनीगदेदा पिन्बा शान्ति चा डाला ह्नाडलान शान्ति हिन्ना। चु शान्ति चा जम्बुलिडला म्हिगदेसे पाड्बा ह्ण्डबा शान्ति आहिन। थेतबासेलमा दुख थाम्हन्गो ओच्छे थालोड्णो।

28 “डा चुग्याम निबान मुला, तसैनोन डा एनीगदे मुबा ग्लारी दोःसी खला” भिसी डाइ पाड्बा ताम एनीगदेसे थेःबा मुला। एनीगदेसे डादा पक्कान माया लबा हिन्सम डा परमेश्वर आबा मुबा ग्लारी निबारी छ्याइबा मुला भिबा ताम थेःसी एनीगदे ताड्सेला मुबा। तिग्दा भिसम डा भन्दा मी परमेश्वर आबान घेन हिन्ना। 29 चु ताम पूरा तमाहेन्से एनीगदेसे डादा विश्वास लगै भिसी चु ताम पूरा तबा भन्दा डाच्छान डाइ एनीगदेदा पाड्सी जिन्बा मुला। 30 दाहेन्से डाइ एनीगदेदा चु भन्दा ल्हाना ताम आपाड्। तिग्दा भिसम चु जम्बुलिडदा तहरी थान्बा चा खबान मुला। तसैनोन थेदेन छ्याम डादा तिगै लबा शक्ति आरे। 31 तर डाइ परमेश्वर आबादा माया लमुला भिबा ताम जम्बुलिडला म्हिगदेसे था याड्गै भिसीन परमेश्वर आबासे कुल्बा अन्छारनोन डाइ लबान मुला। दाहेन्से भ्रउ, य्हाड चुग्याम निड।

येशू चा अडगुरला दोड

15 “साँच्चिलान अडगुर दोड चा डानोन हिन्ना, ओच्छे डाला आबा चा दोडदा सयार लबा म्हि हिन्ना। 2 थेसे डादेन छ्याम मुबा तिगै आरोबा हाँगा चा थासी भ्याड्ला। तर रोबा हाँगागदेदा चा अझ ल्हाना रोगै भिसी जोगदे घ्याम्सी ज्यना लसी सयार लला। 3 थेह्ण्ड लसीन एनीगदेला विश्वास अझ ल्हैगै भिसी डाइ पाड्बा चु बचनगदेसेन एनीगदेला सेम ज्यना लसी जिन्बा मुला। 4 एनीगदे डादेन छ्याम गिक तसी चिउ, डाएनोन

एनीगदेदेन छ्याम गिक तसी चिला। हाँगा दोडग्याम फेजी भिसम थे हाँगारी तिगै आरो। थेह्ण्ड लसीन एनीगदेएनोन ड्याग्याम फेसी चिजी भिसम एनीगदेसेनोन तिगै लबारी आखम।

5 “अडगुरला दोड डानोन हिन्ना, एनीगदे चा हाँगागदे हिन्ना। चुदे खालै म्हि डादेन छ्याम गिक तसी चिजी भिसम डाएनोन थेदेन छ्याम गिक तसी चिला, ओच्छे थे विश्वासरी ल्हेसी ल्हानान ज्यबा गेगदे लला। तर ड्याग्याम फेसी चिजी भिसम एनीगदेसे तिगै लबारी आखम। 6 डादेन छ्याम गिक तसी आचिबागदेदा चा थे हाँगागदेदा भ्याड्बा ह्ण्ड लसी भ्याड्ला, ओच्छे थे खर्ला। थेह्ण्डबा हाँगागदेदा म्हिगदेसे हुप लसी मेरी भ्याड्ला, जमाहेन्से थे मेफ्रा दोला। 7 चुदे एनीगदे डादेन छ्याम गिक तसी भिसम ओच्छे डाला बचन एनीगदेला सेम न्हडरी थान्जी भिसम एनीगदेदा तोःबा स्हे हीमा पिन्ना। 8 चुदे एनीगदेसे ल्हानान ज्यबा गेगदे लसी डाला चेला दोसी उन्जी भिसम डाला आबाला मानदेन जयजयकार तला।

9 “डादा आबासे माया लबा ह्ण्ड लसी डाइएनोन एनीगदेदा डाच्छाहेन्सेन माया लबा मुला। थेतबासेलमा एनीगदेसे डाला माया थाम्लेःगो। 10 डाला आबासे कुल्बा ताम ड्यान्बासे लमा आबाला माया सदन डादेन छ्याम मुला। थेह्ण्ड लसीन एनीगदेसेनोन डाइ कुल्बा ताम ड्यान्जी भिसम डाला माया सदन एनीगदेदेन छ्याम तला। 11 डाला सेम ताड्बा ह्ण्ड लसी एनीगदेला सेमएनोन पूरान ताड्खम्भै भिसीन डाइ एनीगदेदा चु ताम पाड्बा हिन्ना।

12 “डाइ एनीगदेदा माया लबा ह्ण्ड लसी एनीगदेसेनोन ह्नाड ह्नाड न्हडरी गिकसेम गिकदा माया लउ भिसी डाइ चु ताम कुल्बा मुला। 13 ह्योला लागिरी ह्नाडला ज्याननोन पिन्बा भन्दा घेन माया अर्गु तिगैनोन आरे। 14 चुदे एनीगदेसे डाइ कुल्बा ताम ड्यान्जी भिसम एनीगदे डाला ह्यो हिन्ना। 15 दाहेन्से डाइ एनीगदेदा नोकर भिसी आपाड्, तिग्दा भिसम मालिकसे तिग लबान मुला भिसी नोकरदा था आत। तर डाइ एनीगदेदा ह्यो भिसी पाड्बा मुला, तिग्दा भिसम डाला आबासे डादा सुड्बा जम्मान ताम डाइ एनीगदेदा पाड्सी जिन्बा मुला। 16 एनीगदेसे डादा धम्बा आहिन, तर एनीगदे सदन ज्यबा म्हि दोसी ज्यबा गे लगै भिसीन डाइ एनीगदेदा धम्बा हिन्ना। थेह्ण्ड लसी एनीगदेसे डाला मिन किन्सी परमेश्वर आबादेन छ्याम हीजी भिसम एनीगदेसे हीबा स्हे परमेश्वर आबासे पिन्ना। 17 थेतबासेलमा डाइ कुल्बा अन्छार एनीगदेसे गिकसेम गिकदा माया लउ।

चेलागदेदा हेला लबा

18 “चुदे एनीगदेदा जम्बुलिडला म्हिगदेसे हेला लजी भिसम एनीगदेदा भन्दा डाच्छा डादा हेला लबा हिन्ना भिसी घोउ। 19 चुदे एनीगदे जम्बुलिडला म्हि हिन्बा हिन्सम थेनीगदेसे एनीगदेदा ह्नाडला म्हि म्हन्सी माया लसेला मुबा। तर एनीगदे चु जम्बुलिडला म्हि आहिन। एनीगदेदा डाइ चु जम्बुलिडग्याम धम्बा हिन्ना। थेतबासेलमा एनीगदेदा जम्बुलिडला म्हिगदेसे हेला लबा हिन्ना। 20 ‘नोकर मालिक भन्दा घेन आत’ भिसी डाइ पाड्बा ताम एनीगदेसे थाम्लेःगो। थेनीगदेसे डादा दुख पिन्जी भिसम एनीगदेदाएनोन दुख पिन्ना। थेह्ण्ड लसीन थेनीगदेसे डाइ कुल्बा ताम ड्यान्जी भिसम एनीगदेसे पाड्बा तामएनोन ड्यान्ना। 21 एनीगदे डाला म्हि तबासे लमा थेनीगदेसे एनीगदेदा ल्हानान दुख पिन्ना। तिग्दा भिसम थेनीगदेसे डादा पुइखबा परमेश्वर आबादा डोसेबा आरे। 22 चुदे डा आखबादेन डाइ थेनीगदेदा आपाड्बा हिन्सम थेनीगदेदा पापला दोष आतसेला मुबा। तर दाहेन्से थेनीगदेसे ह्नाडला पापला लागिरी तिगै निउ लबा ग्ला आरे। 23 डादा हेला लबा म्हिसे डाला आबादाएनोन हेला लला। 24 खालैसेन लबारी आखम्बा गेगदे डाइ थेनीगदेला गुडरी आलबा हिन्सम थेनीगदेदा पापला दोष आतसेला मुबा। तर डाइ लबा उदेकला गेगदे म्राड्सीनोन थेनीगदेसे डादेन डाला आबादा हेला लबा मुला। 25 तर थेनीगदेला ह्नाडलान ठिमरी ‘थेनीगदेसे डादा थेह्ण्डनोन हेला लला’ भिसी भिबा ताम पूरा तबाला लागिरीन चुह्ण्ड तबा हिन्ना। 26

26 “डाइ आबाग्याम सत्यला आत्मा एनीगदेदा ह्यो लबाला लागिरी पुडखला। थे खसी थेसेन डाला बारेरी पाड्ला। 27 ओच्छे एनीगदे चा डाच्छाहेन्सेन डादेन छ्याम चिबासे लमा एनीगदेसेनोन डाला बारेरी पाड्ला।

16 “एनीगदेला विश्वास म्हासी थानिगै भिसी डाइ एनीगदेदा जम्मान ताम पाड्बा हिन्ना। 2 एनीगदेदा थेनीगदेसे यहुदीगदे हुप तबा दिमग्याम तेःला। ओच्छे एनीगदेदा साड्बा म्हिगदेसे ‘डन्से परमेश्वरदा तेन्बा मुला’ भिसी म्हन्बा धुइएनोन खबान मुला। 3 थेनीगदेसे एनीगदेदा थेहड् लला, तिग्दा भिसम थेनीगदेसे परमेश्वर आबादा डोसेबा आरे ओच्छे डादाएनोन डोसेबा आरे। 4 च्यागो, थे जम्मान ताम तबा धुइरी एनीगदेसे ‘चु जम्मान तामला बारेरी डादा प्रभुसे डाच्छान सुड्सी जिन्बा मुबा’ भिबा ताम ढनै भिसी डाइ एनीगदेदा चु ताम पाड्बान मुला। दान्देधोना डा एनीगदेदेन छ्यामनोन मुबासे लमा चु ताम डाइ डाच्छा एनीगदेदा आपाड्नी।

परमेश्वरला आत्मासे लबा गे

5 दाहेन्से डा डादा पुडखबा परमेश्वर आबा मुबा ग्लारी निबान मुला। तर एनीगदे खालैसेन डादा ‘हाड खानड फेप्खा?’ भिसी आड्योइ। 6 तसैनोन डाइ चु जम्मान ताम पाड्बासे लमा एनीगदेदा सेमरी ल्हानान सुर्दा तबा मुला। 7 तसैनोन डाइ एनीगदेदा सत्य ताम पाड्बा मुला, डा चुग्याम निबान एनीगदेदा ज्यबा हिन्ना। तिग्दा भिसम डा चुग्याम आनिनी भिसम एनीगदेदा ह्यो लबा आत्मा एनीगदे मुबा ग्लारी आफेप्ख। तर डा निजी भिसम डाइ थेदा एनीगदे मुबा ग्लारी पुडखला। 8 थे फेप्खमाहेन्से थेसे जम्बुलिडला म्हिगदेदा परमेश्वरदा सेम निबा गेला बारेरीदेन परमेश्वरसे लबा निसाफला बारेरी, गल्ली गेला बारेरी ओच्छे पापला बारेरी उन्ना। 9 डादा विश्वास आलबान पाप हिन्ना भिसी थेसे थेनीगदेदा घोना लला। 10 थेसे परमेश्वरदा सेम निबा गे तिग हिन्ना भिसी घोना लला। तिग्दा भिसम डा परमेश्वर आबा मुबा ग्लारी निबान मुला, ओच्छे एनीगदेसे डादा दोःसी आम्राड्। 11 थेसे परमेश्वरसे लबा निसाफ भिबा तिग हिन्ना भिसीएनोन थेनीगदेदा घोना लला। तिग्दा भिसम चु जम्बुलिडदा तहरी थान्बादा परमेश्वरसे निसाफ लसी जिन्बा मुला।

12 “डाइ एनीगदेदा पाड्तोःबा ताम मी ल्हानान मुबा। तर एनीगदेसे दान्दे चु भन्दा ल्हाना घोबारी आखम। 13 तर थे सत्यला आत्मा फेप्खमाहेन्से सत्य ताम तिग हिन्ना भिसी थेसेन एनीगदेदा घोना लला। थेसे हाडला सेमग्याम एनीगदेदा तिगै ताम आसुड्, थेसे जुन ताम थेःला थेनोन ताम जे एनीगदेदा सुड्ला। ओच्छे थेसेन लिच्छा तसेला तामगदेएनोन एनीगदेदा घोना लला। 14 थेसे डाला मानदेन जयजयकार लला, तिग्दा भिसम थेसे डाइ पाड्बा ताम थेःसी एनीगदेदा पाड्ला। 15 परमेश्वर आबादेन छ्याम मुबा जम्मान सहे जम्मान डालान हिन्ना। थेतबासेलमा डाइ पाड्बा जम्मान ताम ‘सत्यला आत्मासे थेःसी एनीगदेदा घोना लला’ भिसी पाड्बा हिन्ना।”

सुर्दा म्लेःसी ताड्म्याड्ला

16 येशूसे हाडला चेलागदेदा “छिन्नड लिच्छा एनीगदेसे डादा आम्राड्, तर दोःसी तिगै धिन लिच्छा मी एनीगदेसे डादा म्राड्ला” भिसी सुड्जी।

17 चु ताम थेःसी येशूला कोइ कोइ चेलागदेसे “थेसे यहाडदा ‘छिन्नड लिच्छा एनीगदेसे डादा आम्राड् दोःसी छिन्नड लिच्छा मी एनीगदेसे डादा म्राड्ला’ भिबादेन ‘तिग्दा भिसम डा आबा मुबा ग्लारी निबान मुला’ भिसी सुड्बाला अर्थ चा तिग हिन्ना?” भिसी हाड हाड न्हडरी ताम लजी।

18 ओच्छे थेनीगदेसे दोःसी, “थेसे ‘छिन्नड लिच्छा’ भिसी सुड्बा तिग हिन्ना? थेसे सुड्बा ताम यहाडदा था आरे” भिसी भिजी।

19 थेनीगदेसे चु तामला बारेरी इयोइबा सेम लबा मुला भिसी था याड्सी येशूसे थेनीगदेदा चुहड् भिसी सुड्जी, “डाइ एनीगदेदा ‘छिन्नड लिच्छा एनीगदेसे डादा आम्राड् भिबादेन छिन्नड लिच्छा मी एनीगदेसे डादा म्राड्ला’ भिसी पाड्बा तामला बारेरी एनीगदेसे हाड हाड न्हडरी ताम लबा आहिन? 20 थेतबासेलमा च्यागो, एनीगदेसे डाला ताम इयान्गो, एनीगदे क्राबा क्रिड्बा लला, तर जम्बुलिडला म्हिगदे चा ताड्ला। एनीगदेदा दुखदेन सुर्दा तला, तसैनोन एनीगदेला सुर्दा म्हासी दोःसी ताड्म्याड्ला। 21 कोला

न्हबा धुइरी म्रिडम्हेमेदा ल्हानान दुख तमुला। तर कोला न्हाहेन्से थेसे थे जम्मान दुख म्लेःमुला। तिग्दा भिसम जम्बुलिडरी कोला गिक न्हजी भिसी थे ल्हानान ताड्म्याड्ला। 22 थेहड् लसीन एनीगदेदा दान्दे दुख तबा मुला। तर डा दोःसी एनीगदेदा हुप तबारी खमा एनीगदे सेमरी ल्हानान ताड्म्याड्ला। ओच्छे एनीगदेला ताड्बा खालैसेन म्हाना लबारी आखम। 23 थे धुइरी एनीगदेसे डादेन छ्याम तिगै ताम आड्योइ। च्यागो, डाला मिनरी एनीगदेसे जुन सहे हीला थे सहे एनीगदेदा परमेश्वर आबासे पिन्ना। 24 दान्देधोना मी एनीगदेसे डाला मिनरी तिगै हीबा आरे। हीगो एनीगदेदा पिन्ना, ओच्छे एनीगदे पूरान ताड्म्याड्ला।

येशूसे जम्बुलिडला जम्मान नड्बा तामदा ढाबा

25 “दान्दे चा डाइ एनीगदेदा चु ताम उखानग्याम पाड्बा मुला, तर धुइ तमाहेन्से परमेश्वरला बारेरी पाड्मा चा उखान आपाड्ना डाइ एनीगदेदा प्रस्टन घोना लला। 26 थे धुइरी एनीगदे हाडसेन डाला मिनरी हीला। तर डाइ एनीगदेला लागिरी परमेश्वर आबादेन छ्याम हीसी पिन्आतोः। 27 तिग्दा भिसम परमेश्वर आबा हाडसेन एनीगदेदा माया लबा मुला। तिग्दा भिसम एनीगदेसे डादा माया लबा मुला, ओच्छे डा परमेश्वरग्याम खबा हिन्ना भिसीएनोन विश्वास लबा मुला। 28 डा परमेश्वर आबाग्यामसेन चु जम्बुलिडरी खबा हिन्ना, दान्दे दोःसी डा चु जम्बुलिडदा खलासी परमेश्वर आबा मुबा ग्लारी निबान मुला।”

29 जमाहेन्से चेलागदेसे येशूदा चुहड् भिसी भिजी, “दान्दे चा भिसम हाडसे इन्दा उखान आसुड्ना प्रस्टन घोना लजी। 30 दाहेन्से हाडदा जम्मान ताम था मुला भिबा ताम इन्से था याड्जी। दाहेन्से खालैसे हाडदा ड्योइतोःबा ताम तिगै आरे। थेतबासेलमा हाड परमेश्वरग्याम फेप्खबा हिन्ना भिसी इन्से विश्वास लजी।”

31 येशूसे थेनीगदेदा चुहड् भिसी सुड्जी, “तिग दान्दे मी एनीगदेसे डादा विश्वास लबा मुला? 32 च्यागो, चुहड्बा धुइएनोन खबान मुला, एनीगदे ससा बडबड तसी डा गिकदा जे खलासी हाड हाडला दिमरी निला, पाड्नोन तोःमा चु धुइ खसी जिन्बा मुला। तसैनोन थे धुइरी डा गिक जे आत, तिग्दा भिसम डाला आबा सदन डादेन छ्याम मुला। 33 एनीगदे डादेन छ्याम गिक तसी शान्ति याड्सी चिबारी खमौ भिसीन डाइ एनीगदेदा चु जम्मान ताम पाड्बा हिन्ना। जम्बुलिडरी एनीगदेदा ल्हानान दुख तला, तर एनीगदेसे आँट लउ, तिग्दा भिसम डाइ जम्बुलिडला जम्मान नड्बा तामदा ढासी जिन्बा मुला।”

येशूला प्रार्थना

17 चु जम्मान ताम सुड्सी जिन्माहेन्से येशूसे स्वर्गपट्टि स्हीसी चुहड् भिसी प्रार्थना लजी, “परमेश्वर आबा, दाहेन्से धुइ तसी जिन्बा मुला। हाड गाते ग्रेन मुला भिसी उन्बाला लागिरी हाडसे हाडला झा गाते ग्रेन मुला भिसी उन्गो। 2 हाडसे थेदा पिन्बा जम्मान म्हिगदेदा थेसे जुकजुकधोनाला जुनी पिन्खमौ भिसी हाडसे थेदा जम्बुलिडला जम्मान म्हिगदेथोरी शासन लबा अधिकार पिन्बा मुला। 3 हाड गिक जेन सत्य परमेश्वर हिन्ना भिसी डोसेबादेन हाडसे पुड्खबा येशू ख्रीष्टदा डोसेबान जुकजुकधोनाला जुनी याड्बा हिन्ना। 4 हाडसे डादा जिम्मा पिन्बा गे पूरा लसी डाइ जम्बुलिडरी हाडदा मान लबा मुला। 5 परमेश्वर आबा, जम्बुलिड स्होबा भन्दा डाच्छा डा हाडदेन छ्याम मुबा धुइरी गाते ग्रेन मानदेन जयजयकार मुबा। दाहेन्से थेहड् लसीन डादा हाडदेन छ्याम ग्रेन स्होउ।

हाडला चेलागदेला लागिरी येशूसे लबा प्रार्थना

6 “हाडसे जम्बुलिडग्याम डादा पिन्बा जम्मान म्हिगदेदा डाइ हाड खाल हिन्ना भिसी डोसेना लबा मुला। थेनीगदे हाडलान म्हि मुबा, ओच्छे हाडसे डादा पिन्जी। थेनीगदे हाडला बचन अन्धार भ्रबा मुला। 7 हाडसे डादा पिन्बा जम्मान ताम हाडग्यामसेन खबा हिन्ना भिसी दान्दे थेनीगदेसे था याड्सी जिन्बा मुला। 8 तिग्दा भिसम हाडसे डादा पिन्बा बचन डाइ थेनीगदेदा लोप्बा मुला, ओच्छे थेनीगदे थे अन्धार भ्रबान मुला। डा हाडग्याम

खबा हिन्ना भिसी थेनीगदेसे घोबा मुला, ओच्छे डादा हाडसे पुइखबा हिन्ना भिसीएनोन थेनीगदेसे विश्वास लबा मुला।

9 “डाइ थेनीगदेलान लागिरी प्रार्थना लबान मुला, जम्बुलिडला म्हिगदेला लागिरी चा आहिन। तर हाडसे पिन्बा म्हिगदेलान लागिरी प्रार्थना लबान मुला, तिगदा भिसम थेनीगदे हाडलान हिन्ना। 10 डादेन छ्याम मुबा जम्मान हाडला हिन्ना, हाडदेन छ्याम मुबा जम्मान डाला हिन्ना। ओच्छे थेनीगदेग्याम डाला मानदेन जयजयकार तबा मुला।

11 “दाहेन्से डा हाड मुबा ग्लारी खबान मुला। ल्हानान धिनधोना डा चु जम्बुलिडरी आचि, तर चुगदे मी चु जम्बुलिडरीन चिला। थेतबासेलमा डाला आबा परमप्रभु परमेश्वर, हाडदेन डा गिक तबा ह्इ लसी चुगदेएनोन गिक तबाला लागिरी हाडसे डादा पिन्बा हाडला मिनग्याम थेनीगदेदा जोगब लसी थान्गो। 12 डा थेनीगदेदेन छ्याम मुबा धुइरी हाडसे डादा पिन्बा हाडला मिनग्याम डाइ थेनीगदेदा जोगब लसी थान्जी। नाश ततो:बा म्हि बाहेक स्हान्दो खालैदान डाइ नाश तआपुइनी। तिगदा भिसम परमेश्वरला बचनरी भिबा ताम पूरा तबाला लागिरीन चुह्इ तबा हिन्ना। †

13 “तर दाहेन्से डा हाड मुबा ग्लारी खबान मुला। डग्याम याइबा ताइबा थेनीगदेसे पूरान याइगै भिसीन डाइ चु ताम जम्बुलिडरी मुबा धुइरीन पाइबा मुला। 14 डा हाडसेन थेनीगदेदा हाडला बचन लोप्जी। तर थेनीगदेदा चु जम्बुलिडला म्हिगदेसे हेला लजी। तिगदा भिसम डा चु जम्बुलिडला आहिन्बा ह्इ थेनीगदेएनोन चु जम्बुलिडला आहिन। 15 थेनीगदेदा चु जम्बुलिडग्याम भोगो भिसी डाइ प्रार्थना आल, तर थेनीगदेदा शैतानग्याम जोगब लसी थान्गो। 16 डा चु जम्बुलिडला आहिन्बा ह्इ थेनीगदेएनोन चु जम्बुलिडला आहिन। 17 थेनीगदेदा सत्य बचनग्याम हाडदा तेन्बा चोखो म्हि स्होउ। तिगदा भिसम हाडला बचन सत्य मुला। 18 हाडसे डादा जम्बुलिडरी पुइखबा ह्इ लसी डाइएनोन थेनीगदेदा जम्बुलिडरी पुइबा मुला। 19 थेनीगदेसे हाडसे हाडदान पूरान चोखो थान्नी भिसी डाइनोन थेनीगदेला लागिरी हाडसे हाडदान चोखो स्होबा मुला।

हाडदा विश्वास लबागदे जम्मान गिक तसी चिगै भिसी येशूसे लबा प्रार्थना

20 “डाइ चुगदेला लागिरी जे आहिन, तर चुगदेला ताम थे:सी डादा विश्वास लबा म्हिगदेला लागिरीनोन प्रार्थना लला। 21 थेनीगदे जम्मान गिक तसी चिबारी खमौ। परमेश्वर आबा, हाड डादेन छ्याम ओच्छे डा हाडदेन छ्याम गिक तबा ह्इ लसी थेनीगदेएनोन यहाडदेन छ्याम गिक तबारी खमौ। ओच्छे डादा हाडसे पुइखबा हिन्ना भिसी जम्बुलिडला म्हिगदेसे विश्वास लबारी खमौ। 22 यहाड गिक तबा ह्इ लसी थेनीगदेएनोन गिक तसी चिबारी खमौ भिसी हाडसे डादा मान याइबा म्हि स्होबा ह्इ लसी डाइएनोन थेनीगदेदा मान याइबा म्हि स्होबा मुला। 23 डा थेनीगदेदेन छ्याम ओच्छे हाड डादेन छ्याम गिक तबा ह्इ लसी थेनीगदेएनोन पूरान गिक तबारी खमौ। ओच्छे डादा हाडसेन पुइखबा हिन्ना भिबादेन हाडसे डादा माया लबा ह्इ लसी हाडसे थेनीगदेदाएनोन माया लमुला भिसी जम्बुलिडला जम्मान म्हिगदेसे था याइगै।

24 “परमेश्वर आबा, हाडसे जम्बुलिड स्होबा भन्दा डाच्छाहेन्सेन डादा माया लसी यहालदेन शक्ति पिन्बा मुला। चु ताम म्राइबाला लागिरी हाडसे डादा पिन्बा जम्मान म्हिगदे डादेन छ्याम तगै भिबा डाला सेम मुला।

25 “ठीक निसाफ लबा परमेश्वर आबा, हाडदा जम्बुलिडला म्हिगदेसे डोसेबा आरे, तर डाइ हाडदा डोसेबा मुला। ओच्छे हाडसेन डादा पुइखबा हिन्ना भिसी डाला चेलागदेसे था याइबा मुला। 26 हाडसे डादा लबा माया थेनीगदेदेन छ्याम तगै, ओच्छे डा थेनीगदेदेन छ्याम तबारी खमौ भिसी डाइ थेनीगदेदा हाड खाल हिन्ना भिसी डोसेना लबा मुला। अझ हाड खाल हिन्ना भिसी डाइ थेनीगदेदा सदन पाइला।”

येशूदा चुइबा

मत्ती २६:४७-५६; मर्कूस १४:४३-५०; लूका २२:४७-५३

18 प्रार्थना लसी जिन्माहेन्से येशू हाडला चेलागदेदेन छ्याम किद्रोन भिबा खोलसाला क्याम्सडपट्टि मुबा बगैचारी फेप्जी। 2 थे ग्ला येशूदा चुइसी पिन्बा यहुदादाएनोन था मुबा। तिगदा भिसम येशू हाडला चेलागदेदेन छ्याम थे ग्लारी ल्हानान ह्इबा फेप्मुबा। 3 थे धुइरी फरिसीगदेदेन परमेश्वरला मन्दिररी पूजा लबा मुल म्हिगदेसे पुइखबा परमेश्वरला मन्दिर खूइबा सिपाहीदेन रोमी सिपाहीगदेदा भसी यहुदा येशू मुबा ग्लारी धोखजी। थेनीगदे हतियार थोसी नाडसलदेन मेदड ग्रासी खबा मुबा।

4 हाडदा तबारी छ्याइबा जम्मान ताम था याइसी थेनीगदेला डाच्छापट्टि फेप्सी येशूसे थेनीगदेदा “एनीगदेसे खाल्दा म्हाइबा?” भिसी इयोइजी। 5 जमाहेन्से थेनीगदेसे “नासरतला येशूदा म्हाइबा” भिसी भिमा, येशूसे थेनीगदेदा “डा थेनोन हिन्ना” भिसी सुइजी। येशूदा चुइसी पिन्बा यहुदाएनोन थेनीगदेदेन छ्यामनोन राप्सी चिबा मुबा। 6 येशूसे थेनीगदेदा “डा थेनोन हिन्ना” भिसी सुइबा थे:मैछ्याम थेनीगदे ग्यापपट्टि ले:मा जम्मान हिल्ली। 7 दो:सी येशूसे थेनीगदेदा “एनीगदेसे खाल्दा म्हाइबान मुला?” भिसी सुइबा, थेनीगदेसे “नासरतला येशूदा म्हाइबा” भिसी भिजी। 8 येशूसे थेनीगदेदा “डा थेनोन हिन्ना भिसी डाइ एनीगदेदा दोलोन पाइसी जिन्जी। थेतबासेलमा एनीगदेसे डादान म्हाइबा हिन्सम चु म्हिगदेदा चा निपुङ्गो” भिसी सुइजी। 9 “हाडसे डादा पिन्बा म्हिगदे डाइ गिकनोन नाश तपुइबा आरे” भिसी येशूसे डाच्छान सुइबा ताम चुह्इ लसी पूरा तजी।

10 सिमोन पत्रुससे हाडदेन छ्याम मुबा तरवार ते:सी परमेश्वरला मन्दिररी पूजा लबा मुल म्हिला नोकरदा ताम्मा दाहिनेपट्टिला नाब्यड च्वाट्टन थाजी। थेला मिन चा माल्खस मुबा।

11 येशूसे पत्रुसदा “एला तरवार स्युबारी झाङ्गो। तिग परमेश्वर आबासे नापुइबा दुख डाइ थानागो?” भिसी सुइजी। ††

येशूदा हन्नास मुबा ग्लारी भोर्बा

12 जमाहेन्से रोमी सिपाहीगदेदेन थेनीगदेला कप्तान ओच्छे यहुदीगदेसे पुइबा परमेश्वरला मन्दिर खूइबा सिपाहीगदेसे येशूदा चुइसी खीजी। 13 ओच्छे डाच्छा थेनीगदेसे येशूदा कैयाफाला केन हन्नास मुबा ग्लारी भोजी। कैयाफा चा परमेश्वरला मन्दिररी पूजा लबा थे दिडला मुल म्हि मुबा। 14 चुनोन कैयाफासे “जम्मान म्हिगदेला लागिरी म्हि गिक सिबा चा ज्यबा हिन्ना” भिसी यहुदी नेतागदेदा सल्लाह पिन्बा मुबा। †

पत्रुससे येशूदा डोसेबा आरे भिसी लुसीला ताम पाइबा

मत्ती २६:६९-७०; मर्कूस १४:६६-६८; लूका २२:५५-५७

15 सिमोन पत्रुसदेन स्हान्दो चेला गिक चा येशूदेन छ्याम छ्याम निजी। थे स्हान्दो चेलासे चा परमेश्वरला मन्दिररी पूजा लबा मुल म्हिदा ज्यना लसी डोसेमुबा। थेतबासेलमा थे येशूदेन छ्यामनोन परमेश्वरला मन्दिररी पूजा लबा मुल म्हिला दिमला खाडगारी निजी। 16 तर पत्रुस चा म्रापरीन राप्सी चिबा मुबा। थेतबासेलमा परमेश्वरला मन्दिररी पूजा लबा मुल म्हिदा डोसेबा थे स्हान्दो चेला मडग्यार निसी म्रापरी चिबा म्रिडम्हेमेदा पाइसी पत्रुसदा न्हडरी भजी।

17 जमाहेन्से म्रापरी चिबा थे म्रिडम्हेमेसे पत्रुसदा “तिग एएनोन थे म्हिला चेला आहिन?” भिसी भिमा, पत्रुससे थेदा “डा आहिन” भिसी भिजी।

18 खड्बासे लमा थेरी नोकरगदेदेन पालेगदे मे दूसी चिबा मुबा। पत्रुसएनोन निसी थेनीगदेदेन छ्यामनोन मे दूबारी छ्याइजी।

परमेश्वरला मन्दिररी पूजा लबा मुल म्हिसे येशूदा इयोइबा छार्बा लबा

मत्ती २६:५९-६६; मर्कूस १४:५५-६४; लूका २२:६६-७१

19 परमेश्वरला मन्दिररी पूजा लबा मुल म्हिसे येशूदा थेला चेलागदेदेन छ्याम थेसे लोप्बा तामला बारेरी इयोइबा छार्बा लजी। 20 येशूसे थेदा चुह्इ

भिंसी सुइजी, “डाइ जम्मान लोष्वा मुला। डाइ सदन यहूदीगदे हुप तबा दिमदेन परमेश्वरला मन्दिररी खबा जम्मान यहूदीगदेला डाच्छा लोष्वा मुला। डाइ खालैसे था आयाइना लसी तिगै ताम पाइबा आरे।

21 डादा तिग्दा इयोइबा? डाइ लोष्वा ताम थे:बागदेदा इयोइगो। डाइ तिग पाइजी, तिग लोष्वा भिबा थेनीगदेदान था मुला।”

22 येशूसे चुहइ सुइया येशूला डामरी राप्पी चिबा परमेश्वरला मन्दिरला सिपाही गिकसे येशूदा तोबान, “परमेश्वरला मन्दिररी पूजा लबा मुल म्हिदेन छ्याम चुहइ लसी ताम लबारी तला?” भिंसी भिजी।

23 येशूसे थेदा “डाइ पाइबा ताम ठीक आहिन्सम आहिन भिंसी पाइजे। चुदे डाइ पाइबा ताम ठीक हिन्सम तिग्दा डादा तोबा?” भिंसी सुइजी।

24 जमाहेन्से हन्नाससे येशूदा आब्लानान परमेश्वरला मन्दिररी पूजा लबा मुल म्हि कैयाफा मुबा ग्लारी पुइजी।

दो:सीनोन पत्रुससे येशूदा डोसेबा आरे भिंसी लुसीला ताम पाइबा
मती २६:७१-७५; मर्कुस १४:६९-७२; लूका २२:५८-६२

25 सिमोन पत्रुसएनोन राप्पी मे दूसी चिबा धुइरी थेरी मुबा म्हिगदेसे थेदा “एएनोन येशूलान चेला आहिन?” भिंसी इयोइमा, थेसे थेनीगदेदा “आहिन, डाइ थेदा डोसेबान आरे” भिंसी लुसीला ताम पाइजी। 26 पत्रुससे नाब्यड थासी पिन्बा नोकरला हाडलान म्हिएनोन थेरी मे दूसी चिबा मुबा। थेएनोन परमेश्वरला मन्दिररी पूजा लबा मुल म्हिला नोकर मुबा। थेसे पत्रुसदा “डाइ एदा थे म्हिदेन छ्यामनोन बगैचारी प्राइबा आहिन?” भिंसी भिमा, 27 पत्रुससे दो:सीनोन आहिन, भिंसी जोहाब पिन्जी। जोहाब पिन्मैछ्याम नागा क्राजी।

येशूदा पिलातस मुबा ग्लारी भोर्बा

मती २७:१-२, ११-१४; मर्कुस १५:१-५; लूका २३:१-५

28 थेनीगदेसे येशूदा स्होरीन कैयाफाला दिमग्याम रोमी अञ्चलाधीशला दरबाररी भोजी। तर हाड अशुद्ध तसी मिश्र खुल्साग्याम फेसी खबा धिनदा ढन्सी धइबा चाडरी तिगै चबा रहे चबारी आम्याइ भिंसी थेनीगदे चा लोइसी दरबार न्हडरी आवाइनी। 29 थेतबासेलमा रोमी हाकिम पिलातस मडग्यार खजी। ओच्छे थेसे थेनीगदेदा “एनीगदेसे चु म्हिला तिग दोष स्यापजी?” भिंसी इयोइमा, 30 थेनीगदेसे थेदा “चुदे चु म्हिला दोष आस्यापबा हिन्सम डन्से चु म्हिदा हाड मुबा ग्लारी आभसेला” भिंसी भिजी।

31 पिलातससे थेनीगदेदा “चु म्हिदा एनीगदेसेन भोगो, ओच्छे एनीगदेला हाडलान ठिम अन्धार चु म्हिला निसाफ लउ” भिंसी भिजी।

जमाहेन्से यहूदीगदेसे थेदा “खालै म्हिदा साइबाला सजाय पिन्बा डन्ना लागिरी ठीक आरे” भिंसी भिजी। 32 हाड खाइ लसी सितो:ला भिंसी येशूसेन सुइबा ताम पूरा तबाला लागिरीन चुहइ तबा मुबा। †

33 दरबार न्हडरी निंसी पिलातससे येशूदा इयोइजी, ओच्छे थेसे येशूदा “तिग ए यहूदीगदेला ग्ले हिन्ना?” भिंसी इयोइजी।

34 येशूसे पिलातसदा “चु ताम हाडसे हाडलान सेमग्याम सुइबा हिन्ना कि स्हान्दो खालै म्हिसे हाडदा डाला बारेरी पाइबासे लमा चु ताम इयोइबा हिन्ना?” भिंसी सुइजी।

35 पिलातससे येशूदा “तिग डा यहूदी हिन्ना? एलान यहूलला म्हिगदेदेन परमेश्वरला मन्दिररी पूजा लबा मुल म्हिगदेसे एदा चुरी भबा हिन्ना। एसे तिग लजी?” भिंसी भिजी।

36 येशूसे पिलातसदा “डाइ शासन लबा चु जम्बुलिडरी आहिन। चुदे डाइ चु जम्बुलिडरी शासन लबा हिन्सम डादा यहूदीगदेला याग्याम जोगब लबारी डाला म्हिगदे थेनीगदेदेन छ्याम छेसेला मुबा। तर डाइ शासन लबा चुरी आहिन” भिंसी सुइजी।

37 पिलातससे येशूदा “थेहइ भिसम ए ग्लेनोन हिन्ना?” भिंसी इयोइमा, येशूसे पिलातसदा “डा ग्ले हिन्ना भिंसी मी हाडसेन सुइबा मुला। डा ग्ले दोबाला लागिरी न्हबा हिन्ना, ओच्छे चुनोन सत्य ताम घोना लबाला लागिरी

† यहूदीगदेला ठिम अन्धार यहूदीगदे अर्गु यहूलला म्हिगदेला दिमरी वाइजी भिसम अशुद्ध तमुबा। †† 18:32 यूह ३:१४; १२:३२

डा चु जम्बुलिडरी खबा हिन्ना। थेतबासेलमा जुन म्हि सत्यला लिच्छा भ्रला थेसे डाला ताम इयान्ना” भिंसी सुइजी।

38 पिलातससे येशूदा “खाइइबा सत्य ताम हिन्ना?” भिंसी इयोइजी।

चु तामगदे इयोइमैछ्याम पिलातस मडग्यार यहूदीगदे मुबा ग्लारी निंसी चुहइ भिंसी भिजी, “डाइ चु म्हिला तिगै दोष आस्यापजी। 39 तर मिश्र खुल्साग्याम फेसी खबा धिनदा ढन्सी धइबा चाडला धुइरी डाइ एनीगदेला लागिरी म्हि गिकदा खलासी पिन्तो:मुबा। थेतबासेलमा डाइ चु यहूदीगदेला ग्लेदा खलासी पिन्तौ भिंसी एनीगदेसे म्हन्बा मुला?”

40 तर थेनीगदेसे “चु म्हिदा आहिन, तर बारब्बादा खलासी पिन्तो” भिंसी क्रिडबान भिजी। बारब्बासे चा आन्दोलन लसी म्हि साइबा मुबा।

येशूदा सिबाला सजाय पिन्बा

मती २७:१५-३१; मर्कुस १५:६-२०; लूका २३:१३-२५

19 जमाहेन्से पिलातससे येशूदा भोर्सी कोरसे तोउ भिंसी रोमी सिपाहीगदेदा कुल्जी। 2 कोरसे तोमाहेन्से सिपाहीगदेसे पुजुला फेटा स्होसी येशूदा थोइसी पिन्जी, ओच्छे ग्लेसे क्वान्बा हइबान वाला वाला पिडगै छोनना क्वानएनोन क्वान्सी पिन्जी। 3 ओच्छे येशूला डामरी खसी, “लास्सो यहूदीगदेला ग्ले, प्याफुल्ला” भिंसी येशूदा खिंसी लबान ग्रम्बारी तोबारी छ्याइजी।

4 पिलातस दो:सी मडग्यार खसी थेरी मुबा म्हिगदेदा “च्यागो, डाइ चु म्हिदा सजाय पिन्बा तिगै दोष आस्यापजी। चु ताम एनीगदेदा था तगै भिंसी डाइ थेदा मडग्यार भबा मुला” भिंसी भिजी। 5 येशू पुजुला फेटादेन वाला वाला पिडगै छोनना क्वान क्वान्सीन मडग्यार फेखजी। जमाहेन्से पिलातससे थेनीगदेदा “लु, च्यागो, चु म्हिदा!” भिंसी भिजी।

6 परमेश्वरला मन्दिररी पूजा लबा मुल म्हिगदेदेन सिपाहीगदेसे येशूदा प्राइछ्याम “चुदा कुसरी टांगब लसी साइगो, कुसरी साइगो!” भिंसी क्रिडबाला क्रिडबान लजी। जमाहेन्से पिलातससे थेनीगदेदा “चु म्हिदा एनीगदेसेन भोर्सी कुसरी टांगब लउ, तिग्दा भिसम चु म्हिदा सजाय पिन्तो:बा तिगै दोष डाइ आस्यापजी” भिंसी भिजी।

7 यहूदीगदेसे थेदा “डन्ना ठिम गिक मुला थे ठिम अन्धार चुदा साइनोन तो:ला। तिग्दा भिसम चुसे हाडसे हाडदान परमेश्वरला झा स्होबा मुला” भिंसी भिजी।

8 चु ताम थे:सी पिलातस इन लोइजी। 9 पिलातससे दो:सी दरबार न्हडरी वाइसी येशूदा “ए खानडला हिन्ना?” भिंसी इयोइजी। तर येशूसे थेदा तिगै जोहाब आपिन्नी। 10 थेतबासेलमा पिलातससे येशूदा “तिग ए डादेन छ्याम ताम आपाड? एदा खलासी पिन्बा अधिकार डादा मुला, ओच्छे एदा कुसरी टांगब लसी साइबा अधिकारएनोन डादा मुला भिंसी एदा था आरे?” भिंसी भिजी।

11 येशूसे थेदा “चु अधिकार परमेश्वरसे आपिन्बा हिन्सम हाडसे डादा तिगै लबारी आखम्बसेला मुबा। थेतबासेलमा डादा हाडला जिम्मारी पिन्बा म्हिदा इन ल्हाना पापला दोष तला” भिंसी सुइजी।

12 चु ताम थे:सी पिलातससे इन येशूदा खलाबारी म्हाइजी। तर यहूदीगदेसे क्रिडबान चुहइ भिंसी भिजी, “चुदे हाडसे चु म्हिदा खलाजी भिसम हाड रोमी ग्याल्बो कैसरला म्हि आहिन। जुन म्हिसे हाडसे हाडदान ग्ले हिन्ना भिंसी पाइला थे म्हिसे रोमी ग्याल्बो कैसरला बिरोध लबा हिन्ना।”

13 चु ताम थे:सी पिलातससे येशूदा मडग्यार भजी ओच्छे पिलातस युडबा तीबा खाडगारी निसाफ लबा ठिरी चिजी। थे युडबा तीबा खाडगादा हिबू ग्योइरी गब्बथा भिंसी भिमुला। 14 थे धुइरी ओस्पन धिनना बाह बजब तसी जिन्बा मुबा। थे धिन चा मिश्र खुल्साग्याम फेसी खबा धिनदा ढन्सी धइबा चाड धइबारी तयार लबा धिन मुबा। पिलातससे यहूदीगदेदा “च्यागो, एनीगदेला ग्ले” भिंसी भिजी।

15 तर थेनीगदेसे “चुदा कुसरी टांगब लसी साइबारी भोनोन तो:ला” भिंसी क्रिडबाला क्रिडबान लजी।

जमाहेन्से पिलातससे थेनीगदेदा “थेहइ भिसम डाइ एनीगदेला ग्लेदा कुसरी टांगब लसी साइगो?” भिंसी भिमा, परमेश्वरला मन्दिररी पूजा

लबा मुल म्हिगदेसे “रोमी ग्याल्बो कैसर बाहेक डन्ना स्हान्दो खालै ग्ले आरे” भिसी भिजी।

16 थेतबासेलमा चु ताम थे:सी पिलातससे येशूदा कुसरी टाँगब लसी साइगो भिसी थेनीगदेदा जिम्मा लसी पिन्जी। जमाहेन्से येशूला जिम्मा सिपाहीगदेसे किन्जी।

येशूदा कुसरी साइबा

मत्ती २७:३२-४४; मर्कूस १५:२१-३२; लूका २३:२६-४३

17 येशूसे हाडला क्रुस हाडसेन पुडसी, “खप्परला ग्ला” भिबा ग्लारी फेप्जी, चु ग्लादा हिब्रू ग्योइरी गलगथा भिमुबा। 18 थेरी धोमाहेन्से थेनीगदेसे येशूदा कुसरी टाँगब लजी, ओच्छे य्हो न्हीदाएनोन गिकदा येशूला दाहिनेपट्टि गिकदा देब्रेपट्टि कुसरी टाँगब लजी। येशूदा चा गुडरी थान्जी।

19 पिलातससे “नासरतला येशू, यहूदीगदेला ग्ले” भिसी भिबा ताम येशूला थोबो भन्दा फिरी कुसरी ठोकपुड्जी। 20 चु ताम ल्हानान यहूदीगदेसे पढब लजी। तिगदा भिसम येशूदा कुसरी टाँगब लसी साइबा ग्ला शहरला डामरीन मुबा। चु ताम हिब्रू, ल्याटिनदेन ग्रीक ग्योइरी भिबा मुबा। 21 परमेश्वरला मन्दिररी पूजा लबा यहूदीगदेला मुल म्हिगदेसे पिलातसदा “‘यहूदीगदेला ग्ले’ भिसी आहिन, तर चुसे डा यहूदीगदेला ग्ले हिन्ना भिजी भिसी भिउ” भिसी भिजी।

22 पिलातससे थेनीगदेदा “डाइ जुन ताम भिसै, भिसी जिन्जी, तजी” भिसी भिजी।

23 येशूदा कुसरी टाँगब लमाहेन्से सिपाहीगदेसे येशूला क्वान भो ब्लि लसी हाड हाड न्हडरी भो लजी। ओच्छे थेनीगदेसे येशूसे न्हडरी क्वान्बा क्वानएनोन किन्जी, तर थे क्वान चा आडुप्ना तोरहेन्से मारधोनान रासी स्होबा मुबा। 24 थेतबासेलमा थेनीगदेसे “चु चा आढेगे, तर खाल्दा परब तबा चीम चिट्टा युसी च्यागे” भिसी हाड हाड न्हडरी ताम लजी। बचनरी भिबा ताम पूरा तबाला लागिरीन चुहड् तबा मुबा। बचनरी “थेनीगदेसे डाला क्वान हाड हाड न्हडरी भो लजी, ओच्छे डाला क्वान किन्बाला लागिरी चा चिट्टा युजी” † भिसी भिबा मुबा।

थेतबासेलमा सिपाहीगदेसे चु गे लजी। ††

25 येशूला आमामेन येशूला आमाला आडा ओच्छे क्लोपासला म्रिड मरियमदेन मरियम मगदलिनी येशूला कुसला डामरी राप्सी चिबा मुबा। 26 येशूसे हाडला आमामेन हाडसे माया लबा चेला डामरी राप्सी चिबा म्राड्सी आमामेन “आमा च्यागो, दाहेन्से चु हाडला झा हिन्ना” भिसी सुड्जी। 27 ओच्छे येशूसे थे चेलादाएनोन “च्यागो, दाहेन्से थे एला आमा हिन्ना” भिसी सुड्जी। जमाकुनुहेन्से थे चेलासे येशूला आमा मरियमदा हाडला दिमरी भोजी।

येशू सिबा

मत्ती २७:४५-५६; मर्कूस १५:३३-४१; लूका २३:४४-४९

28 “दाहेन्से डाइ लतो:बा गे जिन्जी” भिसी येशूसे था याड्सी बचनरी भिबा जम्मान ताम पूरा तगै भिसी येशूसे “डादा क्युड फुड्जी” भिसी सुड्जी। †29 थेरी अडगुरला कम्बा निडगु मुबा ताड गिक मुबा। थेतबासेलमा सिपाहीगदेसे हिंसप भिबा दोडला हाँगारी क्वानगेन खीसी थे निडगुरी ब्लुम्सी येशूदा खवाजी। 30 अडगुरला निडगु सोल्माहेन्से येशूसे “दाहेन्से डाला गे जिन्जी” भिसी थोबो कु लजी। जमाहेन्से येशूला सा निजी।

येशूला राइरी भालासे भ्लोबा

31 थे धिन चा मिश्र यहुल्साग्याम फेसी खबा धिनदा ढन्सी धड्बा चाड धड्बारी तयार लबा धिन मुबा। चु धिन चा यहूदीगदेसे ब्लप्बा न्हबा धिनना डाच्छाकुनु मुबा। न्हडगरदड मिश्र यहुल्साग्याम फेसी खबा धिनदा ढन्सी धड्बा चाड धड्बा धिन परब तबासे लमा जमाकुनुला ब्लप्बा न्हबा धिन चा थेनीगदेला लागिरी मुल धिन मुबा। थेतबासेलमा थे मुल धिनकुनु कुसरी

खालैलान लास आतगै भिसी यहूदीगदेसे हाड हाड न्हडरी सल्लाह लजी। ओच्छे थेनीगदे पिलातस मुबा ग्लारी निसी, “सिबाला सजाय पिन्बा म्हिगदे योनान सिगै भिसी थेनीगदेला काड क्युड्सी कुसग्याम मार ते:पुड्जी” भिसी बिन्ती लजी। 32 जमाहेन्से सिपाहीगदे खसी डाच्छा येशूदेन छ्यामनोन कुसरी टाँगब लबा म्हि न्हीला काड क्युड्जी। 33 येशूलाएनोन स्थाप क्युड्बारी छ्याइमा थेनीगदेसे येशू डाच्छान सिसी जिन्बा म्राड्जी। थेतबासेलमा थेनीगदेसे येशूला स्थाप आक्युड्नी। 34 तर सिपाही गिकसे येशूला राइरी भालासे भ्लोमा येशूला राइग्याम कादेन क्युड थोन्जी। 35 एनीगदेसेनोन विश्वास लखमौ भिसी चु म्राड्बा म्हिसे जस्तो तबा म्राड्बा मुबा थेहड्बान पाड्बा मुला। चु ताम सत्य हिन्ना भिबा थेदा था मुला। 36 “थेला नख्ख गिकनोन आक्युड्” भिसी बचनरी भिबा ताम पूरा तबाला लागिरीन चुहड् तबा हिन्ना। †37 दो:सी बचनना अर्गु ग्लारी “जुन म्हिदा थेनीगदेसे भ्लोला, थेनोन म्हिदा थेनीगदेसे च्याला” भिसी भिबा मुला। †

येशूदा धुसारी थान्बा

मत्ती २७:५७-६१; मर्कूस १५:४२-४७; लूका २३:५०-५६

38 यहूदीगदेदेन छ्याम लोड्सी स्हान्दोसे था आयाड्ना येशूदा विश्वास लबा अरिमाथिया भिबा शहरला योसेफ भिबा चेला गिक मुबा। थेसे पिलातसदेन छ्याम येशूला लास हीजी, जमाहेन्से पिलातससे थेदा “तला, भोगी” भिसी भिजी। जमाहेन्से थे निसी येशूला लास कुसग्याम मार ते:सी भोजी। 39 ओच्छे डाच्छा म्हनड येशू मुबा ग्लारी निबा निकोदेमसएनोन बोगल गिकसे च्युक सोम किलो ते मूरदेन च्युकुमारी दोड्सी स्होबा ज्यबा बास्ना खबा अत्तर भसी खजी। †40 चुहड् लसी थेनीगदेसे यहूदीगदेला ठिम अन्छार येशूला लासरी थे बास्ना खबा अत्तर फोर्सी मलमलला क्वानरी रिन्जी। 41 येशूदा कुसरी टाँगब लबा ग्लाला डामरी बगैँचा गिक मुबा। थे बगैँचारी खालैलान लास आथान्बा छार धुसा गिक मुबा। 42 यहूदीगदेसे ब्लप्बा न्हबा धिनना डाच्छाकुनुला धिन तबासे लमा थेनीगदेसे येशूला लास थे डामरीन मुबा धुसारी थान्जी।

येशू धुसारी आरेबा

मत्ती २८:१-८; मर्कूस १६:१-८; लूका २४:१-९

20 आइतवार स्होरीन मरियम मगदलिनी ††† येशूला लास थान्बा धुसारी निजी। धुसारी धोसी च्यामा थेसे धुसाला म्रापरी मुबा युड्बा ले:सी जिन्बा म्राड्जी। 2 जमाहेन्से थे थेग्याम यार्बान सिमोन पत्रुसदेन येशूसे माया लबा चेला मुबा ग्लारी निसी, “थेनीगदेसे य्हाडला प्रभुदा धुसाला भोजीम! तर खानड भोर्सी थान्जी भिबा इन्दा था आरे” भिसी भिजी।

3 जमाहेन्से तुरुन्तन पत्रुसदेन थे चेला यार्बान धुसारी निजी। 4 थेन्नी छ्याम छ्यामनोन यार्सी निमा पत्रुसदा खलासी थे स्हान्दो चेला चा धुसारी डाच्छा धोजी। 5 धुसाला म्रापग्याम योड तसी च्यामा थेसे डाच्छा येशूदा बेरब लबा क्वान जे म्राड्जी, तर थे धुसा न्हडरी आवाड्नी। 6 सिमोन पत्रुसएनोन थे चेलाला लिच्छा लिच्छा खसी धुसा न्हडरी वाड्सी च्याजी। थेसेनोन थेरी येशूदा बेरब लबा मलमलला क्वान जे म्राड्जी। 7 येशूला थोबोरी बेरब लबा क्वान चा मलमलला क्वानदेन छ्याम आरेबा। तर जजाकी क्याथाडपट्टि भसी पटट्याब लसी थान्बा मुबा। 8 जमाहेन्से पत्रुस भन्दा डाच्छा धोखबा चेलाएनोन धुसा न्हडरी वाड्सी च्याजी। चु म्राड्बाहेन्से थेसे येशू सिबाग्याम सोजीम भिसी विश्वास लजी। 9 तिगदा भिसम येशू सिबाग्याम दो:सी सोनोन तो:ला भिसी बचनरी भिबा ताम थेनीगदेसे दान्देधोना घोबा आरेबा। 10 जमाहेन्से थे चेला न्ही हाडला दिमरी निजी।

येशू मरियम मगदलिनी मुबा ग्लारी फेप्खबा

मत्ती २८:९-१०; मर्कूस १६:९-११

11 तर मरियम मगदलिनी चा क्राबान धुसाला डामरी राप्सी चिबा मुबा। क्राबान थेसे धुसा न्हडरी योड तसी च्यामा, 12 येशूला लास थान्बा ग्लारी तार

†† 19:36 प्रस्था १२:४६; गन्ती ९:१२; भजन ३४:२० ††† 19:37 जक १२:१०

††† 19:39 यूह ३:१-२ †††† मत्ती, मर्कूसदेन लूकारी च्यामा स्हान्दो म्रिडम्हेमे न्हीएनोन मुला, तर चु पदरी चा स्हान्दो म्रिडम्हेमे न्हीला मिन पाड्बा आरे।

क्वान क्वान्बा स्वर्गदूत न्हीदा म्राड्जी, गिक येशूला थोबोपट्टि गिक स्थापपट्टि मुबा।¹³ थे स्वर्गदूत न्हीसे थेदा “माइ, ए तिगदा क्राबा?” भिसी इयोइमा, थेसे थेनीगदेदा “म्हिगदेसे डाला प्रभुदा भोजीम, थे म्हिगदेसे प्रभुदा खानड भोर्सी थान्जी भिबा डादा था आरे” भिसी भिजी।

¹⁴ चुहड् भिसी थेसे ग्यापट्टि च्यामा येशू राप्सी स्हूबा म्राड्जी। तर थेसे येशून हिन्ना भिसी डोआसेनी।

¹⁵ येशूसे थेदा “माइ, ए तिगदा क्राबा? एसे खाल्दा म्हाइबा?” भिसी सुङ्गा, थेसे येशूदा बर्गैचारी म्हेन्दो क्वबा म्हे मुनम भिसी, “ज्योज्यो, हाडसे येशूदा चुयाम भोर्बा हिन्सम खानड थान्बा मुला डादा सुङ्गो, डाइ थेदा भोर्ला” भिसी भिजी।

¹⁶ येशूसे थेदा “मरियम!” भिसी इयोइमा, प्लिक दोःसी थेसे येशूदा, हिब्रू ग्योइरी “रब्बोनी” भिसी भिजी। “रब्बोनी” भिबा चा “डाला गुरु” भिबा हिन्ना।

¹⁷ येशूसे थेदा “डादा चुड्सी थाथान्गो, तिगदा भिसम डा दान्देधोना आबा मुबा ग्लारी निबा आरे। तर ए डाला ज्योज्यो आले नाना आडागदे मुबा ग्लारी निसी थेनीगदेदा ‘डाला आबादेन एनीगदेला आबा ओच्छे डाला परमेश्वरदेन एनीगदेला परमेश्वर मुबा ग्लारी डा निबान मुला’ भिसी पाड्सी पिन्गो” भिसी सुड्जी।

¹⁸ जमाहेन्से मरियम मदलिनी चलागदे मुबा ग्लारी निसी, “डाइ प्रभुदा म्राड्जी” भिसी भिजी। ओच्छे येशूसे थेदा सुड्बा ताम थेनीगदेदाएनोन पाड्सी पिन्जी।

येशू चलागदे मुबा ग्लारी फेखबा

मत्ती २८:१६-२०; मर्कुस १६:१४-१८; लूका २४:३६-४९

¹⁹ थेनोन धिनकुनु ड्यसे येशूला चलागदे यहुदी नेतागदेदेन छ्याम लोड्सी प्राप दुड्सी चिबा मुबा। थे धुडरीन येशू थेनीगदे मुबा ग्लारी फेखसी थेनीगदेला गुडरी राप्सी धन्ख्याजी। ओच्छे येशूसे थेनीगदेदा “एनीगदेदा शान्ति तगै” भिसी सुड्जी।²⁰ चुहड् सुङ्गाहेन्से येशूसे थेनीगदेदा हाडला यादेन राइ उन्जी। प्रभुदा म्राड्सी थेनीगदे ल्हानान ताड्जी।

²¹ जमाहेन्से येशूसे दोःसीनोन थेनीगदेदा “एनीगदेदा शान्ति तगै! डाला आबासे डादा पुड्खबा हड् लसी डाइएनोन एनीगदेदा पुड्बान मुला” भिसी सुड्जी।²² जमाहेन्से येशूसे थेनीगदेदा फू लसी चुहड् भिसी सुड्जी, “परमेश्वरला आत्मा किन्गो।²³ जुन म्हेला पाप एनीगदेसे माफ लला, थेनीगदेसे माफ याड्ला, ओच्छे जुन म्हेला पाप एनीगदेसे माफ आल, थेनीगदेसे माफ आयाड्।” †

येशू थोमा मुबा ग्लारी फेखबा

²⁴ येशू फेखबा धुडरी च्युक न्ही चलागदे न्हडरी दिदुमस भिबा थोमा चा थेनीगदेदेन छ्याम आरेमुबा।²⁵ थेतबासेलमा स्हान्दो चलागदेसे थेदा “डन्से प्रभुदा म्राड्जी” भिसी भिजी। तर थेसे थेनीगदेदा “येशूला यारी खिल ठोक्बाला पोर आम्राड्तेधोना, ओच्छे थे पोरदेन राइला पोररी डाला या जुम्बी आझाड्तेधोना डाइ विश्वास आल” भिसी भिजी।

²⁶ साता गिक लिच्छाएनोन चलागदे दिमरीन प्राप दुड्सी चिबा मुबा। जमा चा थोमाएनोन थेनीगदेदेन छ्यामनोन मुबा। तर येशू थेनीगदे मुबा ग्लारी फेखसी थेनीगदेला गुडरी राप्सी धन्ख्याजी, ओच्छे “एनीगदेदा शान्ति तगै!” भिसी सुड्जी।²⁷ जमाहेन्से येशूसे हाडला छ्या उन्बान थोमादा “एला या जुम्बी चुरी थान्गो, ओच्छे डाला या च्यागो। ओच्छे एला यासे डाला राइरी थुर्सी च्यागो। एसे शड्का थालउ, तर विश्वास लउ” भिसी सुड्जी।

²⁸ थेनोन धुडरी थोमासे येशूदा “डाला प्रभुदेन परमेश्वर!” भिसी भिजी।

²⁹ येशूसे थेदा “एसे डादा म्राड्बासे लमा विश्वास लबा आहिन? तर जुन म्हेसे डादा आम्राड्सैनोन विश्वास लला, थेसे गाते ल्हानान मोलम याड्ला” भिसी सुड्जी।

³⁰ येशूसे हाडला चलागदेला डाच्छा ल्हानान उदेकला गेदेन शक्तिशाली गेगदे लबा मुबा, थे तामगदे चु किताबरी भिबा आरे।³¹ तर एनीगदेसे येशू

† 20:23 मत्ती १६:१९; १८:१८

परमेश्वरला झा थार्बा पिन्बा ख्रीष्ट हिन्ना भिसी विश्वास लगे भिसीन चु किताब भिबा हिन्ना। थेदा विश्वास लसी एनीगदेसे जुकजुकधोनाला जुनी याड्गै।

येशू हाडला चेला निस मुबा ग्लारी फेखबा

21 जमाहेन्से येशू दोःसी गालील अञ्चलला तिबेरियास भिबा समुन्द्रला कुनीरी हाडला चलागदे मुबा ग्लारी फेखजी। चुहड् लसी येशू थेनीगदे मुबा ग्लारी फेखजी।² थेरी सिमोन पत्रुस, दिदुमस भिबा थोमा, गालील अञ्चलला काना भिबा शहरला नथानेलदेन जब्दियाला झा न्ही, ओच्छे स्हान्दो चेला न्ही पोप तसी चिबा मुबा।³ सिमोन पत्रुससे हाडला ह्गोदेदा “दाहेन्से डा मी तार्डा साइबारी निला” भिसी भिमा, थेला ह्गोदेसे “डनीएनोन एदेन छ्यामनोन निला” भिसी भिजी। जमाहेन्से थेनीगदे दौंगारी क्रेःजी। तर थेनीगदेसे म्हुन गिकरी तार्डा गिकनोन चुड्बारी आखम्नी। ††

⁴ म्हाल तबारी छ्याइबा धुडरी येशू समुन्द्रला कुनीरी राप्सी धन्ख्याबा मुबा। तर चलागदेसे येशून हिन्ना भिसी डोआसेनी।⁵ येशूसे थेनीगदेदा “कोलागदे, एनीगदेदेन छ्याम तार्डा मुला?” भिसी इयोइमा, थेनीगदेसे “आरे” भिसी भिजी।⁶ येशूसे थेनीगदेदा “एनीगदेसे दौंगाला दाहिनेपट्टि घ्याड रोपो तार्डा स्याप्ला” भिसी सुड्जी। थेनीगदेसे येशूसे सुड्बा ग्लारी घ्याड रोप्पा ल्हानान तार्डा स्याप्लासे लमा घ्याडनोन छेड्बारी आखम्नी।⁷ येशूसे माया लबा चेलासे पत्रुसदा “थे मी प्रभु गा चीम” भिसी भिजी। “थे मी प्रभु गा चीम” भिबा थेःसी सिमोन पत्रुस हाडला क्वान क्रेप्सरी खीसी समुन्द्ररी वाड्जी। तिगदा भिसम थेसे क्वान स्युबा मुबा।⁸ तर स्हान्दो चलागदे चा दौंगारीन चिसी तार्डासे प्लिड्बा घ्याड छेड्बान समुन्द्रला कुनीरी खजी। समुन्द्रला कुनीग्याम थेनीगदे ल्हाना थारेड आरेमुबा, ओस्पन ग्यार्जा गिक मिटर ते जे थारेड मुबा।⁹ समुन्द्रला कुनीरी धोखमाहेन्से थेनीगदेसे मेभुप्यारी तार्डा म्राड्जी ओच्छे गेडएनोन म्राड्जी।

¹⁰ येशूसे थेनीगदेदा “एनीगदेसे भर्खर चुड्बा तार्डा जजाकी भउ” भिसी सुड्जी।

¹¹ जमाहेन्से सिमोन पत्रुस दौंगारी क्रेःसी ग्रेन ग्रेन तार्डासे प्लिड्बा घ्याड छेड्बान पाखारी भजी। थेरी ग्यार्जा गिकसे बोगल न्हीसे च्युक सोम तार्डा मुबा। ओते ल्हाना मुसैनोन घ्याड चा आढेनी।¹² येशूसे थेनीगदेदा “चबारी खउ” भिसी सुड्जी। तर चलागदे खालैसेन येशूदा “हाड खाल हिन्ना?” भिसी इयोइबा सेम आलनी। तिगदा भिसम येशू प्रभु हिन्ना भिसी थेनीगदेसे डोसेसी जिन्बा मुबा।¹³ येशू फेखसी थेनीगदेदा गेडदेन तार्डा पिन्जी।¹⁴ येशूदा सिबाग्याम सोना लमाहेन्से हाडला चलागदे मुबा ग्लारी फेखबा चु सोमरेमला पालरी मुबा।

येशूदेन पत्रुस

¹⁵ थेनीगदेसे चसी जिन्माहेन्से येशूसे सिमोन पत्रुसदा “यूहन्नाला झा सिमोन, तिग एसे डादा चुगदेसे भन्दा ल्हाना माया लला?” भिसी सुड्जी।

जमाहेन्से पत्रुससे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा “थेहड् भिसम एसे डाला ग्युला कोलागदेदा †† ज्यना लसी छउ” भिसी सुड्जी।

¹⁶ येशूसे दोःसी, “यूहन्नाला झा सिमोन, तिग एसे डादा माया लला?” भिसी सुड्जी।

जमाहेन्से थेसे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा “थेहड् भिसम एसे डाला ग्युगदेदा ज्यना लसी च्यागो” भिसी सुड्जी।

¹⁷ येशूसे दोःसीनोन थेदा “यूहन्नाला झा सिमोन, तिग एसे डादा माया लला?” भिसी सुड्जी।

येशूसे चुहड् लसी सोमरेमधोना “तिग एसे डादा माया लला?” भिसी सुड्बासे लमा ल्हानान आज्यना इहम्सी पत्रुससे येशूदा “प्रभु, हाडदा

†† 21:3 लूका ५:५ † 21:6 लूका ५:६ †† “ग्युला कोलागदे” भिबा चा येशूदा विश्वास लबा म्हिगदे हिन्ना।

जम्मान ताम था मुला। डाइ ह्राडदा माया लमुला भिबा तामएनोन ह्राडदा था मुला” भिसी भिजी।

जमाहेन्से येशूसे थेदा चुह्रड् भिसी सुड्जी, “थेह्रड् भिसम एसे डाला ग्युगदेदा ज्यना लसी छउ।¹⁸ एसे डाला ताम ड्यान्गो, ए भ्योन मुबा धुइरी एसे ह्राडला के: ह्राडसेन खीमुबा, ओच्छे जुन ग्लारी निबा सेम लमुबा थेरीन निमुबा। तर खेप्बा दोमाहेन्से एसे तिगै लबारी आखम, एदा स्थान्दो म्हिसे के: खीसी पिन्ना ओच्छे जुन ग्लारी एदा निआम्हन थेरीन एदा भोर्ला” भिसी सुड्जी।¹⁹ चु ताम चा परमेश्वरदा मान लबादेन जयजयकार लबारी पत्रुस खाह्रड् लसी सितो:ला भिसी येशूसे सुड्बा हिन्ना। चु ताम सुड्सी जिन्माहेन्से येशूसे पत्रुसदा “ए डादेन छ्याम भ्रउ” भिसी सुड्जी। †

येशूसे माया लबा चेला

²⁰ पत्रुससे ग्याप दो:सी च्यामा येशूसे माया लबा चेला लिच्छा लिच्छा खबान लबा म्राड्जी। चुनोन चेलासे भोज चबा धुइरी येशूला डामरी चिसी,

† ल्हाना ह्रड्बा बाइबल विद्वानगदेसे पत्रुसदा बोगल गिकसे च्युइ दिड लिच्छा थोबो ग्युरो लसी क्रुसरी टॉगब लसी साइजी भिसी पाड्बा मुला।

“प्रभु, ह्राडदा चुड्सी पिन्बा म्हि खाल हिन्ना?” भिसी ड्योइबा मुबा।

††²¹ थेदा म्राड्सी पत्रुससे येशूदा “चुला चा तिग तला?” भिसी ड्योइजी।

²² जमाहेन्से येशूसे पत्रुसदा “डा आखतेधोना थेसे डादा भ्रान्सी चिइ भिबा डाला सेम मुसैनोन एदा तिग्दा तो:जी? ए चा डादेन छ्याम भ्रउ” भिसी सुड्जी।²³ थेतबासेलमा थे चेला आसिनम भिबा ताम स्थान्दो चेलागदेसे था याड्जी। येशूसे मी थे आसि भिसी सुड्बा आरेमुबा, तर “डा आखतेधोना थेसे डादा भ्रान्सी चिइ भिबा डाला सेम मुसैनोन एदा तिग्दा तो:जी?” भिसी जे सुड्बा मुबा।

²⁴ चुनोन चेलासे चु जम्मान ताम पाड्बा हिन्ना, ओच्छे थेसेन चु ताम भ्रिबा हिन्ना। थेसे पाड्बा तामदेन भ्रिबा ताम सत्य मुला भिसी डन्दा था मुला।

²⁵ येशूसे अर्गुएनोन ल्हानान गेगदे लबा मुला। थे जम्मान गेला बारेरी भ्रिबा हिन्सम चु किताबगदे जम्बुलिड नाडनोन आवाड्सेला मुबा भिसी डाइ म्हन्मुला।

†† 21:20 यूह १३:२५

चु किताबला बारेरी पाड्तो:मा

येशूला मुल चेला पावलला ह्यो लूकासे भिबा मुबा (२ तिमोथी ४:११)। थे अर्गु यहुलला म्हि हिन्ना। थे डाक्टर मुबा (कलस्सी ४:१४)। थेसे थार्बा पिन्बा समाचारएनोन गिक भिबा मुबा।

रोम शहररी भिबा मुबा।

ओस्पन ईश्वी संवत् ६०-७० (विक्रम संवत् ११७-१२७) सालला गुडरी भिबा मुबा। लूकासे थार्बा पिन्बा समाचार भिमाहेन्से चु किताब भिबा मुबा। चु किताब न्ही चा भो गिकदेन भो न्ही ह्इबा मुबा।

येशूला मुल चेलागदेसे लबा गेगदे घोना लबाला लागिरी थियोफिलस भिबा म्हिदा भिबा हिन्ना।

चु किताब लूकासे हाडसे भिबा “थार्बा पिन्बा समाचार” भिसी जिन्माहेन्से भिबा मुबा। चु किताबदा नेपाली बाइबलरी “प्रेरित” भिसी भिबा मुला। चु किताबरी पाड्बा मुल ताम चा प्रभु येशूला जम्मान भन्दा डाच्छाला चेलागदेसे खाह्इ लसी परमेश्वरला आत्माला शक्ति याड्सी थार्बा पिन्बा समाचार यरूशलेमहेन्से जम्बुलिडला कानाकुनी जम्मान ग्लारी धोना लजी भिसी पाड्बा हिन्ना (मुल चेला १:८)। चु ताम यहूदीगदेग्याम शुरु तसी लिच्छा जम्बुलिडला जम्मान म्हिगदेला लागिरीनोन येशूदा तेन्बा ग्याम दोबा हिन्ना। चु किताबरी ख्रीष्टियानगदे रोमी सरकारदा बिरोध लबागदे आहिन, तर ख्रीष्टियानगदेसे लबा विश्वासग्याम यहूदी धर्मला गे पूरा तबा हिन्ना भिबा ताम पढब लबागदेसे घोगै भिसी भिबा मुला।

चु किताबरी मुल चेलागदेला गे भो सोमरी भिबा मुल।

(क) येशू स्वर्गरी फेप्माहेन्से यरूशलेम शहररी थार्बा पिन्बा समाचार थे:ना लबा।

(ख) प्यालेस्टाइन भिबा यहुल्साला ग्ला ग्लारीनोन थार्बा पिन्बा समाचार थे:ना लजी।

(ग) अर्गु यहुल्साला जम्मान म्हिगदेला गुडरी थार्बा पिन्बा समाचार थे:ना लजी। थेह्इ लसीन यूरोपदेन अफ्रिकाला गुडरी मुबा ग्रेन समुन्द्रला कानाकुनी परब तबा यहुल्सागदेदेन रोम यहुल्साधोनान थार्बा पिन्बा समाचार थे:जी।

चु किताबला मुल ताम चा परमेश्वरला आत्मासे लबा गेला बारेरी हिन्ना। परमेश्वरला आत्मा पेन्तिकोसला धिनकुनु यरूशलेम शहररी मुबा विश्वासीगदेला गुडरी शक्तिरी फेप्खजी। थेह्इ लसीन चु किताबरी मुबा तामगदेग्याम मण्डलीदेन मण्डलीदा च्याबा म्हिगदेदा ह्यो लबा ताम ओच्छे थेनीगदेदा विश्वासीरी कोड्ना लबा तामगदे उन्बा मुला। चु किताबरी भिबा तामगदेसे विश्वासीगदे खाह्इ लसी भ्रतो:ला भिबादेन संगतीरी थे थार्बा पिन्बा समाचारला शक्ति खाह्इबा मुबा भिसी उन्बा मुला।

मुल तामगदे

येशू स्वर्गरी फेप्बा धुइला ताम ओच्छे येशूसे कुल्बादेन कबुल लबा ताम १:१-१४

यहूदाला साटोरी स्थान्दोदा मुल चेला स्होबारी धम्बा १:१५-२६

यरूशलेम शहररी थार्बा पिन्बा समाचार थे:ना लबा २:१-८:३

यहूदियादेन सामरिया अञ्चलरी थार्बा पिन्बा समाचार थे:ना लबा ८:४-१२:२५

डाच्छा रेम पावल थार्बा पिन्बा समाचार थे:ना लबारी निबा १३:१-१४:२८

यरूशलेम शहररी चिबा सभा १५:१-३५

न्ही रेमला पालरी पावल थार्बा पिन्बा समाचार थे:ना लबारी निबा १५:३६-१८:२२

सोम रेमला पालरी पावल थार्बा पिन्बा समाचार थे:ना लबारी निबा १८:२३-२१:१६

यरूशलेमदेन कैसरिया ओच्छे रोम शहररी पावलदा इयाल्खानरी झाड्बा २१:१७-२८:३१

मुल चेलागदेला गे

परमेश्वरसे हाडला आत्मा पिन्ना भिसी लबा कबुल

1 लास्सो, थियोफिलस, फ्याफुल्ला, डाइ हाडदा येशूसे गे शुरु लबाहेन्से स्वर्गरी आभोर्तेधोना थेसे लबादेन लोप्बा जम्मान तामला बारेरी डाच्छान भिसी जिन्बा मुला। † चु तबा भन्दा डाच्छा येशूसे परमेश्वरला आत्माग्याम हाडसे धम्बा मुल चेलागदेसे तिग गे लतो:ला भिसी सुड्बा मुबा। †† येशू सिसी जिन्माहेन्से हाडदा सिबाग्याम सोना लबा मुला भिबा ताम

† थियोफिलसदा डाच्छा भिसी पुड्बा किताब चा लूकाला किताब हिन्ना (लूका १:३)।

†† 1:1-2 लूका १:१-४

ल्हानान ग्यामसे उन्बाला लागिरी बोगल न्ही धिनधोना हाडला चेलागदे मुबा ग्लारी फेप्खजी। ओच्छे थेनीगदेदा परमेश्वरला यहुल्साला बारेरी सुड्जी।

4 तिरेकुनु थेनीगदेदेन छ्याम धन्छ्यासी सोल छ्योइबा धुइरी येशूसे थेनीगदेदा चुह्इ भिसी कुल्जी, “एनीगदे यरूशलेम शहर खलासी खानडएनोन थानिउ। परमेश्वर आबासे हाडला आत्मा पिन्ना भिसी लबा कबुल आयाड्तेधोना भ्रान्सी चिउ। थे कबुलला बारेरी डाइ एनीगदेदा डाच्छान पाड्सी जिन्बा मुला। #5 तिगदा भिसम यूहन्नासे क्युइग्याम बप्तिस्मा

‡ 1:4 लूका २४:४९; यूह १४:२६

पिन्जी, तर दाहेन्से तैगै धिन लिच्छा एनीगदेला बत्तिस्मा परमेश्वरला आत्माग्याम † तला।" ††

येशू स्वर्गरी फेष्बा

6 थेतबासेलमा थेनीगदे पोप तसी चिबा धुडरी चेलागदेसे येशूदा "प्रभु, दान्दे हाडसे इस्राएल खुल्सादा दोःसी छार स्होबारी छ्याइबा हिन्ना?" भिसी इयोइजी।

7 येशूसे थेनीगदेदा चुहड् भिसी सुड्जी, "चु ताम परमेश्वर आबासे तोगब लबा धिनदेन धुडगदेरी तनोन तला। तर थे तामगदे घोबारी म्हाइबा एनीगदेला गे आहिन। 8 तर परमेश्वरला आत्मा एनीगदेथोरी फेष्बाहेन्से एनीगदेसे शक्ति याड्ला। जमाहेन्से एनीगदे यरूशलेमहेन्से यहूदियादेन सामरिया अज्वलरी, ओच्छे जम्बुलिडला कनाकुनीधोना डाला साक्षी दोला।" †

9 येशूसे चुहड् सुड्हाहेन्से थेनीगदेसे च्याना च्यानान येशूदा स्वर्गरी भोजी। ओच्छे येशूदा खसुसे घप्जी। जमाहेन्से थेनीगदेसे येशूदा आम्राड्नी। ††

10 थेनीगदे एकोहोरो तसी मुपट्टि च्यासी चिबा धुडरी तिक्खुरीन तार क्वान क्वान्बा म्हि न्ही †† थेनीगदेला डामरी राप्जी। 11 ओच्छे थे म्हि न्हीसे थेनीगदेदा "गालीलला म्हिगदे, तिगदा एनीगदे मुपट्टि च्यासी राप्सी चिबा? एनीगदे मुबाग्याम स्वर्गरी फेष्बा चुनोन येशू दान्दे एनीगदेसे खाहड् लसी स्वर्गरी फेष्बान लबा म्हाइबा मुला। थेहड् लसीन थे दोःसी फेष्बला" भिसी भिजी।

यहूदाला ग्लारी मतियासदा थान्बा

12 जमाहेन्से थेनीगदे जैतून भिबा गडग्याम यरूशलेमपट्टि दोःजी। थेग्याम यरूशलेम शहररी धोबारी ओस्पन किलोमिटर गिक ते भ्रदोमुबा। 13 शहररी धोमाहेन्से थेनीगदे हाड चिबा दिमला तलाथोला कोठारी वाड्जी। थेनीगदे पत्रुस, यहून्ना, याकूब, अन्द्रियास, फिलिप, थोमा, बारथोलोमाड, मत्ती, अल्फयसला झा याकूब, हाडला खुल्सादा माया लबा म्हि भिबा सिमोन ओच्छे याकूबला झा यहूदा मुबा। ††14 कोड कोड म्रिडम्हेमेगदेदेन येशूला आमा मरियम ओच्छे येशूला आलेगदेएनोन थेनीगदेदेन छ्याम सेम गिक लसी प्रार्थना लबाला लबान मुबा।

15 तिरेकुनु थेरी प्रभु येशूदा विश्वास लबा म्हिगदे ओस्पन ग्यार्जा गिकसे बोगल गिक हुप तबा मुबा। थे धुडरी पत्रुस थेनीगदेला डाच्छापट्टि राप्सी चुहड् भिबारी छ्याइजी, 16 "ज्योज्यो आले नाना आडागदे, परमेश्वरला बचनरी येशूदा चुड्बा म्हिगदेला नेता यहूदाला बारेरी दाऊद ग्लेसे डाच्छान परमेश्वरला आत्माग्याम पाड्बा मुबा। थे बचनरी मुबा ताम पूरा तनोन तोःबा मुबा। 17 यहूदाएनोन डनीगदे न्हडला गिक मुबा। डन्से हड्णोन प्रभुला गे लबाला लागिरी थेदाएनोन धम्बा मुबा।"

18 ओच्छे यहूदासे आज्यबा गे लसी स्होबा टाडगासे बु गिक ग्लुजी। थे बुरी हाडनोन सिसी सरी हिल्मा थेला फो थिसी गूड फो थोन्जी। 19 थे ताम यरूशलेमला जम्मान म्हिगदेसे था याड्जी, ओच्छे थेनीगदेसे थे बुला मिन हाडलान ग्योइरी "आखेल्दामा" भिसी थान्जी। थेला अर्थ चा काला बु भिबा हिन्ना। ††

20 पत्रुससे दोःसी चुहड् भिसी भिजी,

"थेला दिम थान्थान तगै, थेरी खालै थाचिगै।"

ओच्छे

'थेसे याड्बा अधिकार स्हान्दोसेन जिम्मा किन्नै'

भिसी व्हाइला किताबरी † भिबा मुला। †

21 "थेतबासेलमा यहूदाला ग्लारी य्हाडदेन छ्याम मुबा म्हिगदे न्हडला गिक धन्तोःबा मुला। थे म्हि चा य्हाड प्रभु येशूदेन छ्याम मुबा धुडरी सदन

य्हाडदेन छ्यामनोन भ्रबा म्हि ततोःला। 22 थे म्हि यहून्नासे बत्तिस्मा पिन्बा धुडहेन्से प्रभु येशू य्हाड मुबाग्याम स्वर्गरी भोर्बा धुडधोना य्हाडदेन छ्यामनोन मुबा म्हि ततोःला। ओच्छे थे म्हि य्हाडदेन छ्याम तसी प्रभु येशू सिबाग्याम सोजी भिबा तामला साक्षी ततोःला।" ††

23 जमाहेन्से थेरी मुबा म्हिगदेसे म्हि न्हीला मिन पिन्जी। थे न्हीला मिन युस्तस भिबा योसेफ बारसाबासदेन मतियास मुबा। 24 थेनीगदेसे चुहड् भिसी प्रार्थना लजी, "प्रभु, हाडदा जम्मान म्हिला सेमला ताम था मुला। थेतबासेलमा चु न्ही न्हडरी हाडसे खाल्दा धम्बा, डन्दा उन्सी पिन्गो। 25 ओच्छे थे म्हिसे चा यहूदासे लबा मुल चेलाला गे लखमौ। तिगदा भिसम यहूदा चा थे गे ख्लासी थे जुन ग्लारी नितोःमुबा थेनोन ग्लारी निसी सिजी।" ††26 जमाहेन्से थेनीगदेसे थे म्हि न्हीला मिनरी चिट्ठा युजी, थे चिट्ठा मतियासला मिनरी परब तजी। जमाकुनुहेन्से थेदा च्युक गिक मुल चेलागदेदेन छ्याम इयाजी।

परमेश्वरला आत्मा फेष्बा

2 पेन्तिकोसला धिनकुनु प्रभु येशूदा विश्वास लबा म्हिगदे जम्मान ग्ला गिकरीन पोप तबा मुबा। ††2 थे धुडरी तिक्खुरी स्वर्ग्याम लाबा खबा हड्बा घेन काड खजी। थे काडसे थेनीगदे चिबा दिम प्लिड्जी। 3 ओच्छे मेला ल्हाम हड्बा स्हेगदे थेनीगदे हाड हाडथोरी भो भो तसी चिबा ग्राड्जी। थे मेला ल्हाम चा ले हड्बान ग्राड्मुबा। 4 जमाहेन्से थेनीगदे जम्मान परमेश्वरला आत्मासे प्लिड्जी। † ओच्छे परमेश्वरला आत्माग्याम पाड्खम्बा शक्ति याड्सी थेनीगदेसे पाड्आसेबा अर्गु ग्योइगदेरी ताम पाड्बारी छ्याइजी

5 थे धुडरी परमेश्वरदा तेन्बा यहूदीगदे जम्बुलिडला जम्मान यहूल्साग्याम यरूशलेमरी खसी चिबा मुबा। 6 चुहड्बा काड थेःमाहेन्से थेरी म्हिगदे पोप तजी। ओच्छे प्रभु येशूदा विश्वास लबा म्हिगदेसे हाड हाडला ग्योइरी ताम पाड्बा ग्राड्सी थेनीगदे उदेक म्हन्जी।

7 जमाहेन्से थेनीगदे उदेक तसी चुहड् भिबारी छ्याइजी, "तिग चु ताम पाड्बा जम्मान म्हिगदे गालीलला आहिन? 8 तर चुगदेसे खाहड् लसी य्हाड हाड हाडला ग्योड पाड्खम्जी! 9 य्हाड चुरी पार्थीला म्हिगदे, मादीला म्हिगदे, एलामला म्हिगदे, मेसोपोटामीयाला म्हिगदे, यहूदियाला म्हिगदे, कापाडोकियाला म्हिगदे, पोन्टसदेन एशियारी चिबा म्हिगदे हिन्ना। 10 ओच्छे फ्रिगियाला म्हिगदे, पामफिलियाला म्हिगदे, मिश्रदेन कुरेनीरी परब तबा लिबियाला डाम डामला ग्लागदेदेन रोमग्याम खबा 11 यहूदीदेन यहूदी धर्म तेन्बा अर्गु यहूलला म्हिगदे मुला। ओच्छे क्रेट यहूलसारी चिबा म्हिगदेदेन अरबीला म्हिगदेएनोन मुला, थेनीगदेसे मी य्हाडला हाड हाडलान ग्योइरी परमेश्वरसे लबा घेन गेला बारेरी पाड्बान चीम।

12 चुहड्बा ग्राड्सी थेनीगदे जम्मान उदेक तसी अलमल तसी गिकसे गिकदा "चु तिग तबा?" भिसी इयोइबा छार्बा लबारी छ्याइजी। 13 तर स्हान्दोगदेसे थेनीगदेदा "चुगदे मी कलिलो निडगुसे इय्होइजीम" भिसी खिसी लजी।

पत्रुससे म्हिला हुलदा घोना लबा

14 जमाहेन्से पत्रुस च्युक गिक चेलागदेदेन छ्याम राप्सी जजाकी डाच्छा निसी घेन काइरी चुहड् भिसी भिजी, "यहूदिया अज्वलग्याम ज्योइखबा यहूदी ह्योगदेदेन यरूशलेमरी स्हूबा जम्मान म्हिगदे चु तिग तबा हिन्ना डाड हाडनीदा घोना लला। हाडनीसे डाला ताम ज्यना लसी इयान्गो। 15 हाडनीसे म्हन्बा हड् चुगदे इय्होइबा आरे। दान्दे स्होला नौ बजब जे तबा मुला, चु धुडरी खालैसेन निडगु आथुड्। 16 तर चु ताम तला भिसी योएल अगमवक्तासे पाड्बा मुबा।

17 'परमेश्वरसे सुड्बा मुला,

लिच्छाला धिनरी डाड जम्मान म्हिगदेथोरी डाला आत्मा पुड्खला,

††† 1:22 मत्ती ३:१६; मर्कू १:९; १६:१९; लूका ३:२१; २४:५१ †† "यहूदा हाडलान ग्लारी निसी सिजी" भिबा चा थे नर्गरी निजी भिबा हिन्ना। ††† 2:1 लैवी २३:१५-२१; व्यव १६:९-११ †† "परमेश्वरला आत्मासे प्लिड्जी" भिबा चा म्हिदा परमेश्वरला आत्माला शक्तिसे पूरान चलब लबा हिन्ना।

† परमेश्वरला आत्माला बत्तिस्माला बारेरी मुल चेला २:१-१३ स्हीगो। †† 1:5 मत्ती ३:११; मर्कू १:८; लूका ३:१६; यूह १:२३ † 1:8 मत्ती २८:१९; मर्कू १६:१५; लूका २४:४७-४८ †† 1:9 मर्कू १६:१९; लूका २४:५०-५१ †† "तार क्वान क्वान्बा म्हि न्ही" चा स्वर्गदूतगदे हिन्ना। ††† 1:13 मत्ती १०:२-४; मर्कू ३:१६-१९; लूका ६:१४-१६ ††† 1:19 मत्ती २७:३-८ † व्हाइला किताब भिबा चा भजनसंग्रह हिन्ना। "थेसे याड्बा अधिकार स्हान्दोसेन जिम्मा किन्नै" भिबा चा यहूदासे लबा ख्रीष्टला गे स्हान्दो म्हिसे लगे भिबा हिन्ना। †† 1:20 भजन ६९:२५; १०९:८

जमाहेन्से एनीगदेला झा झामेगदेसे अगमवाणी पाड्ला,
 ओच्छे एनीगदेला ठिटा कोलागदेसे परमेश्वरसे उन्बा ताम म्राड्ला,
 ओच्छे एनीगदेला आखे मम म्हेमेगदेसे म्हाड म्राड्ला।
 18 थे धिनकुनु नोकरगदेथोरीनोन डाइ डाला आत्मा पुइखला,
 ओच्छे थेनीगदेसे लिच्छा तसेला ताम डाच्छान पाड्ला।
 19 डाइ तोर मुरी उदेकला गेगदेदेन मार जम्बुलिडरी उदेकला चिनुगदे उन्ना।
 चु चिनुगदे चा का, मेदेन म्युगुला मुस्तो हिन्ना।
 20 परमप्रभु फेख्खबा घेन य्हाल य्हाल्बा धिन भन्दा डाच्छा धिनी धोपधोप
 तला

ओच्छे लनी का ह्ण्डबान वाला तला।
 21 ओच्छे जुन म्हिसे परमप्रभुदा डादा ह्यो लउ भिसी भिला, थे म्हिसे थारबा
 याड्ला।†

22 “इसाएलला म्हिगदे डाला ताम इयान्गो, परमेश्वरसे येशूय्याम
 हाडनीला गुडरी शक्तिशाली गेगदे लबान उदेकला चिनुगदे उन्बा ताम
 हाडनीदा थानोन मुला। थे चिनुगदेय्याम परमेश्वरसे नासरतला येशूदा
 डाइनोन पुइखला हिन्ना भिसी उन्बा मुबा। 23 परमेश्वरसे डाच्छान म्हन्बा
 अन्धार येशूदा हाडनीसे चुड्जी। ओच्छे येशूदा हाडनीसे पापी म्हिगदेला
 यारी जिम्मा पिन्सी कुसरी टाँगब लसी साइपुड्जी। †24 तर येशूदा सिबाला
 शक्तिसे साइबाला साइबान लबारी आखम्नी। तिगदा भिसम परमेश्वरसे
 येशूदा सिबाला दुखय्याम फेसी सोना लजी। †25 तिगदा भिसम दाऊद ग्लेसे
 येशूला बारैरी चुह्ण्ड भिबा मुला,
 ‘डाइ प्रभुदा सदन डाला डाच्छापट्टि म्राड्मुला।

थे डादेन छ्यामनोन मुला।
 थेतबासेलमा डाइ तिगै तामरी धन्दा सुर्दा लआतो:। †
 26 थेतबासेलमा डा सेमहेन्सेन ताड्बा मुला,
 ओच्छे ताड्बान डाइ सेमहेन्सेन डाला सुडय्याम प्रभुला जयजयकार लबा
 मुला।

ओच्छे डाला ल्हुइ सिसी निसैनोन डा दो:सी सोला भिसी डाइ प्रभुथोरी
 आश लबा मुला।

27 तिगदा भिसम हाडसे डाला प्राणदा सिबागदे निबा ग्लारी आखला।
 ओच्छे हाडदा जे तेन्बा म्हेला ल्हुइदा हाडसे नइना आल।

28 हाडसे डादा डा दो:सी सोला भिबा ताम उन्बा मुला,
 ओच्छे हाड डादेन छ्याम तसी डादा ल्हानान ताड्ना लला।’

29 “ज्योज्यो आले नाना आडागदे, डाइ य्हाडला म्हेमे दाऊद ग्लेला बारैरी
 दुक्क तसी पाड्ला। थे सिसी ल्हुजी, ओच्छे दान्देधोना थेला धुर्सा मुनोन
 मुला। 30 दाऊद ग्ले अगमवक्ता तबासे लमा थेला ग्लारी हाडलान सन्तानना
 गिकदा परमेश्वरसे ग्ले स्होला भिसी परमेश्वरसे कबुल लबा ताम थेदा था
 मुबा। †31 परमेश्वरसे लिच्छा तिग लला भिसी दाऊदसे डाच्छान म्राड्मुबा।
 थेतबासेलमा थेसे थारबा पिन्बा ख्रीष्ट सिबागय्याम सोला भिसी चुह्ण्ड भिमुबा,
 ‘थेदा सिबागदे निबा ग्लारी आखलानी ओच्छे थेला सिबा ल्हुइ नइना
 आलनी।’

32 “ओच्छे चुनोन येशूदा परमेश्वरसे सिबागय्याम सोना लजी। चु तामला
 डनी जम्मान साक्षी मुला। 33 परमेश्वर आबासे येशूदा घेन मान पिन्सी
 हाडला दाहिने छ्यापट्टि थान्जी, ओच्छे कबुल लबा अन्धार परमेश्वरसे
 येशूदा हाडला आत्मा पिन्जी। दान्दे हाडनीसे म्राड्बा चु तामदेन थे:बा
 तामगदे थेनोन परमेश्वरला आत्मा प्रभु येशूसे इन्दा पिन्बा हिन्ना। 34 दाऊद
 हाडनोन स्वर्गरी आनिनी, तर थेसे चुह्ण्ड भिसी भिबा मुला,
 ‘परमप्रभुसे डाला प्रभुदा चुह्ण्ड भिसी सुड्बा मुला,
 डाइ एला शत्रुगदेदा भेना आलतेधोना
 ए डाला दाहिने यापट्टि चिउ’ ††

36 “थेतबासेलमा इसाएलला जम्मान म्हिगदेसे चु ताम पक्का हिन्ना भिसी
 था याड्गै, जुन येशूदा हाडनीसे कुसरी टाँगब लसी साइबा मुबा, थेनोन
 येशूदा परमेश्वरसे प्रभुदेन थारबा पिन्बा ख्रीष्ट स्होबा मुला।”

37 जमाहेन्से पत्रुसला ताम थे:सी थेनीगदेला सेमरी ल्हानान दुख तजी,
 ओच्छे पत्रुसदेन स्हान्दो मुल चेलागदेदा “दाहेन्से इन्से तिग लतो:ला
 ज्योज्यो आले?” भिसी इयोइमा,

38 पत्रुससे थेनीगदेदा चुह्ण्ड भिसी जोहाब पिन्जी, “दाहेन्से एनीगदेसे हाड
 हाडला पाप खलासी परमेश्वरपट्टि दो:गो। ओच्छे पाप माफ याड्बाला
 लागिरी एनीगदेसे येशू ख्रीष्टला मिनरी बत्तिस्मा किन्गो। जमाहेन्से एनीगदेसे
 परमेश्वरला आत्माला मोलम याड्ला। 39 तिगदा भिसम परमेश्वरसे लबा चु
 कबुल एनीगदेदेन छ्याम एनीगदेला कोलागदेला लागिरी हिन्ना, ओच्छे
 य्हाडला प्रभु परमेश्वरसे इयोइबा थारेड थारेड चिबा जम्मान म्हिगदेला ††
 लागिरीनोन हिन्ना।”

40 ओच्छे पत्रुससे ल्हानान तामग्याम होशियार तना लजी। ओच्छे
 थेनीगदेदा अर्ती पिन्बान, “दान्देला नइबा म्हिगदेथोरी खबारी छ्याइबा
 सजायग्याम एनीगदे हाडनोन जोगब तसी चिउ” भिसी भिजी।

41 जमाहेन्से ल्हानान म्हिगदेसे पत्रुससे पाड्बा तामरी विश्वास लसी
 बत्तिस्मा किन्जी। थेनोन धिनकुनु थेनीगदेला गुडरी विश्वास लबा म्हिगदे
 ओस्पन हजार सोम ते बढब तजी।

विश्वासीगदेला संगती

42 जमाहेन्से थेनीगदेसे मुल चेलागदेसे लोष्बा ताम इयान्मुबा, संगती
 लमुबा, प्रभु भोज चमुबा, ओच्छे सेम गिक तसी सदन प्रार्थना लमुबा।
 43 मुल चेलागदेसे ल्हानान उदेकला गेगदेदेन उदेकला चिनुगदे उन्जी।
 थेतबासेलमा जम्मान म्हिगदेसे परमेश्वरदा ल्हानान मान लजी। 44 प्रभुदा
 विश्वास लबा जम्मान म्हिगदे ग्ला गिकरीन हुप तमुबा, ओच्छे थेनीगदेदेन
 छ्याम मुबा स्हेगदे जम्मान हिन्ना भिसी चलब लमुबा। †45 ओच्छे
 थेनीगदेसे हाडदेन छ्याम मुबा सम्पत्तिदेन मालसामान चूड्सी जुन जुन
 म्हेदा जुन जुन स्हे खौचो तबा मुला थे स्हे जम्मादान भो लसी पिन्मुबा।
 46 ओच्छे थेनीगदे धिन धिननोन जम्मान सेम गिक तसी परमेश्वरला मन्दिररी
 हुप तमुबा। ओच्छे थेनीगदे दिम दिमरी निसी प्रभु भोज चबादेन ज्यबा सेम
 थोसी ताड्सी चबा थुड्बा लमुबा। 47 ओच्छे सदन परमेश्वरला जयजयकार
 लमुबा। स्हान्दो म्हिगदेसे थेनीगदेदा ज्यबा म्हे भिसी भिमुबा। ओच्छे थारबा
 याड्बा म्हिगदे धिन धिननोन प्रभुसे थेनीगदेला गुडरी बढब लसी पिन्जी।

कुज्या म्हे गिकदा खम्ना लबा

3 तिरेकुनु पत्रुसदेन यूहन्ना धिनना तीन बजेरी परमेश्वरला मन्दिररी
 निबान मुबा। थे धुइ चा प्रार्थना लबा धुइ मुबा। 2 परमेश्वरला मन्दिर
 न्हडरी वाड्बा म्हिगदेदेन छ्याम टाडगा ह्रीगै भिसी न्हाहेन्सेन कुज्या मुबा
 म्हे गिकदा म्हिगदेसे सदन परमेश्वरला मन्दिररी वाड्बा म्रापरी भसी
 थान्मुबा। थे म्रापदा जेबा म्राप भिसी भिमुबा। 3 थे कुज्या म्हिसे पत्रुसदेन
 यूहन्ना परमेश्वरला मन्दिर न्हडरी वाड्बारी छ्याइबा म्राड्सी टाडगा ह्रीजी।
 4 जमाहेन्से पत्रुसदेन यूहन्नासे थे म्हेदा ज्यना लसी च्याजी, ओच्छे पत्रुससे
 थेदा “इन्दा च्यागो” भिसी भिजी। 5 थेतबासेलमा थेनीगदेसे तिगै पिन्ना वा
 भिसी थे कुज्या म्हिसे थेनीगदेदा सेम लसी च्याजी।

6 जमाहेन्से पत्रुससे “डादेन छ्याम म्हरदेन म्हुइ आरे। तर डादेन छ्याम
 तिग मुला थे डाइ एदा पिन्ना। नासरतला येशू ख्रीष्टला मिनरी ए रे:सी
 भ्रउ!” भिसी भिजी। 7 ओच्छे थेसे थे कुज्या म्हेला दाहिने यारी चुड्सी
 थीजी, थीमैछ्याम थे कुज्या म्हेला काडदेन काडला जी जीरी भड वाड्जी।
 8 जमाहेन्से थे कुज्या म्हे डोड रे:सी क्यारमार भ्रबारी छ्याइजी। ओच्छे
 भ्रबान छ्योइसी परमेश्वरला जयजयकार लबान थेनीगदेदेन छ्याम
 परमेश्वरला मन्दिररी वाड्जी। 9 ओच्छे जम्मान म्हिगदेसे थेदा भ्रबान लबादेन
 परमेश्वरला जयजयकार लबा म्राड्जी। 10 थेनीगदेसे थे म्हेदा परमेश्वरला
 मन्दिरला जेबा भिबा म्रापरी हीसी चिबा चुनोन हिन्ना भिसी डोसेजी। ओच्छे
 थे खम्बा म्राड्सी थेनीगदे ल्हानान उदेक तजी।

† 2:21 योए २:२८-३२ †† 2:23 मत्ती २७:३५; मर्कु १५:२४; लूका २३:३३; यूह
 १९:१८ † 2:24 मत्ती २८:५-६; मर्कु १६:६; लूका २४:५ †† 2:25 भजन १६:८-११
 †† 2:30 भजन १३२:११; २ शमू ७:१२-१३ ††† 2:34-35 भजन ११०:१

††† “थारेड थारेड चिबा जम्मान म्हिगदे” भिबा चा लिच्छा लिच्छाला म्हिगदे अथवा
 थारेड थारेडला ग्ला हिन्ना। § 2:44 मुल ४:३२-३५

पत्रुससे परमेश्वरला मन्दिररी लोष्वा

11 थे म्हिसे पत्रुसदेन यूहन्नादा चुड्सी भ्रवा म्राड्सी म्हिगदे ल्हानान उदेक तसी सोलोमन भिबा दलानरी यार्बान थेनीगदे मुबा ग्लारी खजी। 12 चु म्राड्सी पत्रुससे म्हिगदेदा चुहड् भिषी भिजी, “इसाएलला म्हिगदे, हाडनी तिगदा चु तामरी उदेक म्हन्बा? तिग डन्से हाडलान शक्तिदेन परमेश्वरदा तेन्बासे लमा चु म्हिदा भ्रना लखम्बा हड् छोर्सी ट्वल्ल तसी डन्दा च्याबा? 13 व्हाडला आखे म्हमे अब्राहाम, इसहाकदेन याकूबला परमेश्वरसे हाडला गे लबा येशूदा घेन मान लजी। तर हाडनीसे चा चुड्सी म्हिला यारी जिम्मा पिन्जी, ओच्छे पिलातससे येशूदा पुडबारी छ्याइमा हाडनीसे थेदा पुडबारी आत भिषी पिलातसला डाच्छापट्टि भिमुबा। 14 तर हाडनीसे तिगै दोष आरेबादेन परमेश्वरसे म्हन्बा अन्धार भ्रवा म्हिदा चा पुडबारी आत, बरु म्हि साडबा म्हिदा चा पुडगो भिषी पाड्जी। 15 ओच्छे हाडनीसे जुनी पिन्बादा साड्जी। तर थेनोन येशूदा परमेश्वरसे सिबाग्याम सोना लजी, चु ताम म्राड्बा चा डनीन हिन्ना। 16 येशूलान मिनना शक्तिग्याम चु म्हिसे भड याड्जी। हाडनीसे म्राड्बादेन डोसेबा चु म्हिसे येशूदा विश्वास लबासे लमा हाडनी जम्मालान डाच्छापट्टि चुदा खम्ना लबा मुला।

17 “च्यागो ज्योज्यो आलेगदे, हाडनीसे लबा चु जम्मान गे आसेनान लबा हिन्ना भिषी डादा था मुला। ओच्छे हाडनीला नेतागदेसेनोन थेहड्नुन लजी। 18 तर थार्बा पिन्बा ख्रीष्टसे दुख नातो:ला भिषी परमेश्वरसे डाच्छान जम्मान अगमवक्तागदेग्याम सुड्बा अन्धार परमेश्वरसे चु गे पूरा लजी। 19 थेतबासेलमा परमेश्वरसे हाडनीला पाप माफ लबाला लागिरी हाड हाडला पाप ख्लासी परमेश्वरपट्टि दो:गो। 20 जमाहेन्से परमेश्वरग्याम हाडनीसे सुखला धिन याड्ला, थेहड् लसीन परमेश्वरसे हाडनीला लागिरी डाच्छान धम्बा थार्बा पिन्बा ख्रीष्ट येशूदा पुडखला। 21 ओन्माहेन्सेन परमेश्वरसे हाडला अगमवक्तागदेग्याम सुड्बा जम्मान स्हे दो:सी स्होबा धुड आततेधोना येशू ख्रीष्ट स्वर्गरी धन्ख्यातो:बा मुला। 22 मोशासे चुहड् भिषी पाड्बा मुला,

‘एनीगदेला परमप्रभु परमेश्वरसे डादा पुडखबा हड् लसी एनीगदेला ज्योज्यो आलेगदे न्हड्ग्यामसेन एनीगदेला लागिरी अगमवक्ता गिक पुडखला।

थेसे पाड्बा जम्मान ताम एनीगदेसे ड्यान्तो:बा मुला। †

23 थे अगमवक्ताला ताम आड्यान्बा खजिबै म्हिदा चा परमेश्वरला म्हिगदेग्याम फेसी नाश लला।’ †

24 “शमूल अगमवक्ताहेन्से लिच्छा खबा जम्मान अगमवक्तागदेसे चुनोन धिनगदेला † बारेरी पाड्जी। 25 हाडनी थेनोन अगमवक्तागदेदेन परमेश्वरसे लबा थेनोन कबुलला सन्तान हिन्ना। थे कबुल हाडनीला म्हमे अब्राहामदेन छ्याम परमेश्वरसे चुहड् भिषी लमुबा, ‘एला सन्तानग्यामनोन जम्बुलिडला जम्मान म्हिगदेसे मोलम याड्ला।’ ††26 हाडनीदा नड्बा गेग्याम फेसी मोलम पिन्बाला लागिरी परमेश्वरसे हाडला झा येशूदा डाच्छा हाडनी मुबा ग्लारी पुडखबा हिन्ना।”

पत्रुसदेन यूहन्नादा यहुदी धर्मला अदालतरी भोर्बा

4 पत्रुसदेन यूहन्ना म्हिगदेदेन छ्याम ताम लबान लमा परमेश्वरला मन्दिररी पूजा लबा म्हिगदेदेन मन्दिर च्याबा सिपाहीगदेला कप्तान ओच्छे सदुकीगदे थेनीगदे मुबा ग्लारी खजी। 2 थेनीगदेदा बोमो खजी, तिगदा भिसम पत्रुसदेन यूहन्नासे येशू सिबाग्याम सोबा मुला, थेहड् लसीन स्हान्दो सिबा म्हिगदेएनोन थेग्याम सोला भिषी म्हिगदेदा लोष्बान मुबा। 3 थेतबासेलमा थेनीगदेसे पत्रुसदेन यूहन्नादा चुड्जी, ओच्छे थे धुडरी ड्यसे तसी जिन्बासे लमा न्हड्गरदडधोना इयाल्खानरी थान्जी। 4 तर पत्रुसदेन यूहन्नासे पाड्बा समाचार ड्यान्बा म्हिगदे न्हडरी ल्हानान म्हिगदेसे विश्वास लजी। विश्वास लबा म्हिगदे न्हडरी ओस्पन हजार डा ते हेम्कोलागदे मुबा।

† 3:13 प्रस्था ३:१५ †† 3:14 मत्ती २०:१५-२३; मर्कु १५:६-१४; लूका २३:१३-२३; यूह १९:१२-१५ † 3:22 व्यव १८:१५, १८ †† 3:23 व्यव १८:१९ †† “चुनोन धिनगदे” भिबा चा येशू ख्रीष्ट डाच्छा फेख्बा धिनहेन्से दो:सी फेख्बा धिनधोनाला ताम तखम्ना। ††† 3:25 उत्प २२:१८

5 ओच्छे न्हड्गरदड यहुदी नेतागदे, यहुदी धर्मगुरुगदेदेन यहुदी गन्बागदे यरूशलेमरी पोप तजी। 6 थेरी परमेश्वरला मन्दिररी पूजा लबा मुल म्हि हन्नासदेन छ्याम कैयाफा, यूहन्ना, ††† अलेक्जेन्डर ओच्छे मुल म्हिला स्हान्दो हाडला म्हिगदेएनोन मुबा। 7 जमाहेन्से थेनीगदेसे पत्रुसदेन यूहन्नादा हाडला गुडरी भरी, “एनीगदेसे चु गे खाहड्बा शक्तिदेन खाल्ला मिनग्याम लबा हिन्ना?” भिषी ड्योड्जी।

8 जमाहेन्से परमेश्वरला आत्मासे प्लिड्सी पत्रुससे चुहड् भिषी भिजी, “यहुदी नेतागदेदेन यहुदी गन्बागदे, 9 चुदे हाडनीसे चु कुज्या म्हिला लागिरी तिनी डन्से ज्यबा गे लबासे लमा चु म्हिदा खाहड् लसी खम्ना लजी भिषी ड्योड्बा छार्बा लबा हिन्सम, 10 चु ताम हाडनीदेन इसाएलला जम्मान म्हिगदेदा था तगै, हाडनीसे क्रुसरी टॉगब लसी साड्बादेन परमेश्वरसे सिबाग्याम सोना लबा नासरतला येशू ख्रीष्टला मिनरी चु म्हि हाडनीला ओन्छाडरी खम्सी राष्वा मुला। 11 चुनोन येशूला बारेरी बचनरी चुहड् भिषी भिबा मुला,

‘हाडनी डकर्मिगदेसे गे आखेल भिषी भ्याड्बा युडबा चुनोन हिन्ना, तर दान्दे चुनोन युडबा सुर युडबा दोबा मुला।’ †

12 ओच्छे थेसे बाहेक स्हान्दो खालैसे व्हाडदा थार्बा पिन्बारी आखम, तिगदा भिसम जम्बुलिडला म्हिगदेला गुडरी व्हाडदा सोना लबारी स्हान्दो खालैला मिन आरे।”

13 ओच्छे ल्हाना पढब आलबादेन तिगै तालिम आकिन्बा सोजो म्हि पत्रुसदेन यूहन्नासे म्हिगदेदा लोष्वा आँट लबा म्राड्सी यहुदी नेतागदे, यहुदी धर्मगुरुगदेदेन यहुदी गन्बागदे उदेक म्हन्जी। जमाहेन्से थेनीगदेसे पत्रुसदेन यूहन्ना येशूदेन छ्याम चिबा चीम भिषी था याड्जी। 14 थे कुज्या म्हि खम्सी पत्रुस, यूहन्नादेन छ्याम राप्सी चिबा म्राड्बासे लमा थेनीगदेसे तिगै पाड्बारी आखम्नी। 15 थेतबासेलमा थेनीगदेसे पत्रुसदेन यूहन्नादा अदालतग्याम मडग्यार निउ भिषी कुल्जी। ओच्छे थेनीगदे हाड हाड न्हडरी चुहड् भिषी सल्लाह लबारी छ्याड्जी, 16 “दाहेन्से व्हाडसे चु न्हीदा तिग लबा? तिगदा भिसम चु न्हीसे लबा उदेकला गे यरूशलेमरी चिबा जम्मान म्हिगदेसे था याड्सी जिन्बा मुला। ओच्छे चु ताम व्हाडसेनोन आहिन भिबारी आखम। 17 तर चु ताम स्हान्दो म्हिगदेसे थाआयाड्गै भिषी ‘दाहेन्से एनीगदेसे चु येशूला बारेरी खालै म्हिदा तिगै थापाङ्गो’ भिषी व्हाडसे चु न्हीदा पाड्तो:ला।”

18 जमाहेन्से थेनीगदेसे पत्रुसदेन यूहन्नादा ड्योड्सी, “च्यागो, दाहेन्से एनीगदेसे येशूला बारेरी खालैदा तिगै थापाङ्गो ओच्छे तिगै ताम थालोणो” भिषी कुल्जी। 19 तर पत्रुसदेन यूहन्नासे थेनीगदेदा “परमेश्वरला ताम आड्यान्ना हाडनीला ताम ड्यान्बारी परमेश्वरला डाच्छा ठीक हिन्ना कि आहिन हाडनीसेन म्हन्गो। 20 तिगदा भिसम डन्से म्राड्बादेन थे:बा ताम आपाड्ना डनी चिनोन आखम” भिषी जोहाब पिन्जी।

21 थेनीगदेसे पत्रुसदेन यूहन्नादा सजाय पिन्बारी तिगै ग्याम आम्राड्माहेन्से पत्रुसदेन यूहन्नादा ल्हानान बड्सी पुड्जी। तिगदा भिसम थेरी तबा उदेकला गेला लागिरी जम्मान म्हिगदेसे परमेश्वरला जयजयकार लबान मुबा।

22 तिगदा भिसम थे उदेकला गेग्याम खम्बा म्हि बोगल न्ही दिड भन्दा ल्हाना तबा मुबा। ††

येशूदा विश्वास लबा म्हिगदेला प्रार्थना

23 थेग्याम पुड्माहेन्से पत्रुसदेन यूहन्ना हाडला ह्ोगदे मुबा ग्लारी खजी। ओच्छे परमेश्वरला मन्दिररी पूजा लबा मुल म्हिगदेदेन यहुदी गन्बागदेसे पाड्बा जम्मान ताम ह्ोगदेदा पाड्सी पिन्जी। 24 थेनीगदेसे चु ताम थे:माहेन्से सेम गिक लसी परमेश्वरदेन छ्याम प्रार्थना लबारी छ्याड्जी, “प्रभु, मु जम्बुलिडदेन समुन्द्र ओच्छे थेरी मुबा जम्मान स्हे हाडसेन स्होबा हिन्ना। †††25 ओच्छे हाडला गे लबा डन्ना आखे म्हमे दाऊदला सुड्ग्याम हाडला आत्मासे चुहड् सुड्बा मुबा, ‘अर्गु यहुलला म्हिगदे तिगदा बोमो खबा,

††† चु यूहन्ना चा येशूला चेला यूहन्ना आहिन। † 4:11 भजन ११८:२२ †† 4:22 मुल ३:७-८ ††† 4:24 प्रस्था २०:११; नहे ९:६; भजन १४६:६

ओच्छे म्हिगदेसे तिगदा गे आखेल्बा तामगदे म्हन्बा?

²⁶ जम्बुलिडला ग्लेगदेदेन शासन लबागदे

परमप्रभुदेन थेसे धम्बा थाबा पिन्बा ख्रीष्टला बिरोधरी लडाइ लबाला लागिरी तयार तजी।†

²⁷ “चु सत्य ताम हिन्ना, तिगदा भिसम हाडसे धम्बा तिगै दोष आरेबा हाडला गे लबा येशूला बिरोधरी हेरोददेन पन्तियस पिलातस ओच्छे अर्गु यहुलला म्हिगदे, इस्राएलीगदेदेन छ्याम चुनोन शहररी हुप तबा मुबा।

^{†28} डाच्छान हाडला सेमसे म्हन्बादेन हाडला शक्तिसे तिग लबारी म्हाइमुबा थे पूरा तबा मुला। ²⁹ दाहेन्से प्रभु, थेनीगदेसे इन्दा लोडना लबा ताम हाडसे ढन्गी, ओच्छे हाडला गे लबा म्हि इन्दा हाडला बचन म्हिगदेदा थे:ना लबारी भड पिन्गो। ³⁰ ओच्छे हाडला शक्तिग्याम आखम्बा म्हिगदेदा खम्ना लमा हाडला गे लबा तिगै दोष आरेबा येशूला मिनग्याम उदेकला चिनुदेन गे तगै।”

³¹ चुहड लसी प्रार्थना लसी जिन्माहेन्से थेनीगदे पोप तबा ग्ला लिलगिलिग तजी, ओच्छे थेनीगदे जम्मान परमेश्वरला आत्मासे प्लिड्जी। ‡ जमाहेन्से थेनीगदे आलोडना परमेश्वरला बचन थे:ना लबारी छ्याइजी।

विश्वासीगदेला साझा सम्पत्ति

³² चु धुइरी चा प्रभु येशूदा विश्वास लबा म्हिगदे न्हडला खालैसेनोन हाडला धन सम्पत्ति चु डाला हिन्ना भिसी आभिमुबा। थेनीगदे जम्मालान सेम गिकनोन तबासे लमा थेनीगदेदेन छ्याम मुबा जम्मान धन सम्पत्ति व्हाडला भिसी भिमुबा। †³³ थे मुल चेलागदेसे परमेश्वरला ग्रेन शक्ति याड्सी प्रभु येशू सिबाग्याम सोबा हिन्ना भिबा तामला साक्षी दोसी पाड्बा, ओच्छे परमेश्वरसे थेनीगदे जम्मादान ल्हानान मोलम पिन्जी। ³⁴ थेनीगदेला न्हडरी खालैदान तिगै स्हेला खॉचो आतमुबा, तिगदा भिसम वारी बु मुबादेन दिम मुबागदेसे थे चूड्सी खबा टाडगा भसी, ³⁵ मुल चेलागदेदा पिन्मुबा। ओच्छे जुन जुन म्हिदा खॉचो तमुबा थेनीगदेदा भो लसी पिन्मुबा। ³⁶ ओच्छे साइप्रस यहुलाला लेवी वंशला योसेफ भिबा म्हिदा मुल चेलागदेसे बारनाबास भिसी मिन थान्मुबा (बारनाबास भिबा चा आँट पिन्बाला झा हिन्ना), ³⁷ थेसे हाडला वारी बु चूड्जी, ओच्छे टाडगा भसी मुल चेलागदेदा पिन्जी।

हननियादेन सफीरा

5 तर थेरी हननिया भिबा म्हि गिक मुबा, थेदेन थेला म्रिड सफीरासे हाडदेन छ्याम मुबा टोगल गिक वारी चूड्जी। ² थेन्नी ढिक्सी वारी चूड्सी खबा टाडगाग्याम तिगै टाडगा चा हाडदेन छ्याम थान्जी। ओच्छे बाँकी टाडगा चा हननियासे मुल चेलागदे मुबा ग्लारी भसी जम्मान टाडगा चुदेन हिन्ना भिसी पाड्जी।

³ जमाहेन्से पत्रुससे थेदा चुहड् भिसी भिजी, “हननिया ए शैतानना तहरी चिसी तिगदा परमेश्वरला आत्मादेन छ्याम लुसीला ताम पाड्बा? ओच्छे हाडला वारी चूड्सी खबा टाडगा तिगदा छुम्सी थान्बा? ⁴ तिग थे वारी आचूड्तेथोना एलान आहिन? ओच्छे चूड्सी खबा टाडगाएनोन एलान मुबा, चु टाडगा एसे जे लइ म्हन्बा थेनोन लबारी खम्सेला मुबा। तर एदा चुहड्बा गे लबा सेम खाहड् लसी खजी? च्यागो, एसे म्हिगदेदा आहिन, तर परमेश्वरदा लुसीला ताम पाड्बा मुला। ⁵ चुहड्बा ताम थे:मैछ्याम हननिया सरी पाप्सी सिजी। जमाहेन्से चु ताम थे:बा म्हिगदे जम्मादान ल्हानान लोड्बा खजी। ⁶ जमाहेन्से थेरी मुबा भ्योन म्हिगदे रे:सी थेला लास क्वानसे रिन्जी ओच्छे धुसारी भोर्सी ल्हुजी।

⁷ ओस्पन घण्टा सोम लिच्छा चु ताम था आयाड्ना हननियाला म्रिड न्हडरी खजी। ⁸ जमाहेन्से पत्रुससे थेदा “एनीगदेसे वारी ओतेरीन चूड्बा हिन्ना? डादा पाड्गो” भिसी भिमा, थेसे “लास्सो, ओतेरीन हिन्ना” भिसी भिजी।

⁹ जमाहेन्से पत्रुससे थेदा “एनीगदे ढिक्सी तिगदा प्रभुला आत्मासे तिग लबा चीम भिसी च्याबारी म्हाइबा? च्यागो, एला हेम्बोदा धुसारी ल्हुबागदे म्प्रापरीन मुला, एदाएनोन थेनीगदेसे मडग्यार भोर्ला” भिसी भिजी। ¹⁰ थेहड् भिमैछ्याम थे पत्रुसला काड डामरी पाप्सी सिजी। जमाहेन्से थेला हेम्बोदा ल्हुसी खबा भ्योनगदे न्हडरी खमा थे सिसी जिन्मुबा, ओच्छे थेनीगदेसे थेदाएनोन भोर्सी थेला हेम्बोला डामरी ल्हुजी। ¹¹ जमाहेन्से जम्मान मण्डलीदेन ‡ चु ताम थे:बा जम्मान म्हिगदेदा ल्हानान लोड्बा खजी।

मुल चेलागदेग्याम तबा उदेकला गे

¹² जमाहेन्से मुल चेलागदेग्याम म्हिगदेला गुडरी उदेकला गेगदे तबारी छ्याइजी, ओच्छे थेनीगदे जम्मान सोलोमनना दलानरी †† सेम गिकनोन तसी हुप तमुबा। ¹³ तर प्रभु येशूदा विश्वास आलबा स्थान्दो म्हिगदे न्हडला खालैसेनोन प्रभु येशूदा विश्वास लबा म्हिगदेदेन छ्याम ढिक्सी चिबारी भड आलनी, तसैनोन थेनीगदेसे प्रभु येशूदा विश्वास लबा म्हिगदेला बाररी ज्यबान ताम लमुबा। ¹⁴ जमाहेन्से प्रभुदा विश्वास लबा हेम्फेबेदेन म्रिडम्हेमेगदेला हुल इन बढब तबान निजी। ¹⁵ मुल चेलागदेसे लबा उदेकला गेला बाररी थे:सी म्हिगदेसे आखम्बा म्हिगदेथोरी पत्रुस खमा थेला क्रिपसे जे भिसै स्यापौ भिसी आखम्बा म्हिगदेदा थेनीगदेला तीबा नान्बादेन छ्यामनोन भसी ग्याम ग्यामरी थान्मुबा। ¹⁶ ओच्छे यरूशलेमला क्यारक्युरला शहरग्यामसेनोन ल्हानान म्हिगदेसे आखम्बा म्हिगदेदेन म्हडसे स्याप्बा म्हिगदेदाएनोन थेरी भसी खमुबा। ओच्छे थे म्हिगदे जम्मान खम्मुबा।

मुल चेलागदेदा दुख पिन्बा

¹⁷ परमेश्वरला मन्दिररी पूजा लबा मुल म्हि ओच्छे थेदेन छ्याम मुबा जम्मान सदुकीगदेसे मुल चेलागदेदा डाह लजी। ¹⁸ ओच्छे मुल चेलागदेदा चुड्सी इयाल्खानरी झाड्जी। ¹⁹ तर म्हुनड प्रभुला दूत गिक खसी इयाल्खानना म्प्राप ठोड्सी थेनीगदेदा मडग्यार भसी चुहड् भिसी भिजी, ²⁰ “एनीगदे निउ ओच्छे परमेश्वरला मन्दिररी राप्सी चु छार जुनीला बाररी जम्मान ताम म्हिगदेदा थे:ना लउ।”

²¹ स्वर्गदूतसे चुहड् भिमाहेन्से थेनीगदे स्थोरीन परमेश्वरला मन्दिररी वाड्सी म्हिगदेदा लोप्वारी छ्याइजी।

थेनोन धुइरी परमेश्वरला मन्दिररी पूजा लबा मुल म्हि, थेदेन छ्याम मुबा म्हिगदे खजी, ओच्छे इस्राएली नेतागदे जम्मादान सभारी इयोइजी। जमाहेन्से मुल चेलागदेदा इयाल्खानग्याम भबारी म्हिगदे पुइजी। ²² तर परमेश्वरला मन्दिरला सिपाहीगदे इयाल्खानरी धोखसी च्यामा थेनीगदेसे थेरी खालैदा आम्राड्नी। थेतबासेलमा थेनीगदे दो:सी निसी चु ताम पाड्जी। ²³ “डन्से इयाल्खानरी ताल्चा लसी थान्बादेन पालेगदे म्प्रापरी राप्सी चिबा म्राड्जी, तर डन्से म्प्राप ठोड्सी च्यामा न्हडरी खालैदा आस्याप्नी।” ²⁴ परमेश्वरला मन्दिरला कप्तानदेन परमेश्वरला मन्दिररी पूजा लबा मुल म्हिगदेसे चु ताम थे:माहेन्से दाहेन्से तिग तला भिसी थेनीगदे अलमल तजी।

²⁵ थेनोन धुइरी थेरी खालै म्हि गिक खसी, “च्यागो, हाडनीसे इयाल्खानरी झाड्सी थान्बा म्हिगदे मी परमेश्वरला मन्दिररी राप्सी म्हिगदेदा लोप्वान मुला” भिसी भिजी। ²⁶ जमाहेन्से सिपाहीगदेदेन छ्याम परमेश्वरला मन्दिरला कप्तान निसी थेनीगदेदा कर आलना भजी। तिगदा भिसम म्हिगदेसे थेनीगदेदा युडबासे तोला भिसी थेनीगदे लोड्मुबा।

²⁷ थेनीगदेसे थे मुल चेलागदेदा सभारी भसी डाच्छापट्टि राप्पुड्जी। ओच्छे परमेश्वरला मन्दिररी पूजा लबा मुल म्हिसे मुल चेलागदेदा चुहड् भिसी इयोइजी, ²⁸ “एनीगदेदा डन्से येशूला मिन लसी खालैदा तिगै ताम थालोपो भिसी कुल्मुबा। तर च्यागो, एनीगदेसे लोप्वान चु ताम यरूशलेम नाडनोन थे:ना लसी जिन्जीम, ओच्छे येशूदा साइबाला दोष एनीगदेसे इन्दा लबारी म्हाइबा मुला।” ††

† 4:26 भजन २:१-२ †† 4:27 मत्ती २७:१-२; मर्कू १५:१; लूका २३:१, ७-११; यूह १८:२८-२९ ‡ “परमेश्वरला आत्मासे प्लिड्बा” भिबा चा परमेश्वरला शक्ति याड्बा हिन्ना। †† 4:32 मुल २:४४-४५

‡ चु पदरी “मण्डली” भिबा चा प्रभु येशू ख्रीष्टदा विश्वास लबा यरूशलेमला म्हिगदे हिन्ना। ††† “सोलोमनना दलान” भिबा चा सोलोमन ग्लेसे स्होबा दलान मुबा, चु दलान यरूशलेमला मन्दिररी मुबा। ††† 5:28 मत्ती २७:२५

29 तर पत्रुसदेन स्थान्दो मुल चलागदेसे चुहड् भिंसी भिंजी, “डन्से म्हिगदेसे कुल्बा ताम आहिंन, बरु परमेश्वरसे कुल्बा ताम चा इयान्दोन तो:मुला। 30 हाडनीसे येशूदा कुसरी टांगब लसी साइबा मुबा, तर व्हाडला आखे म्हेमेला परमेश्वरसे येशूदा सिबाग्याम सोना लजी। 31 परमेश्वरसे इस्राएलीगदेसे हाडला पाप ख्लासी परमेश्वरपट्टि दो:गै भिंसी ओच्छे थेनीगदेला पापला दोष मेटब लबारी येशूदा शासन लबा म्हिदेन थार्बा पिन्बा म्हि स्होसी हाडला दाहिने छ्यापट्टि थान्जी। 32 चु जम्मान तामला साक्षी डनी मुला, थेहड्नीन लसी परमेश्वरसे कुल्बा ताम इयान्बा म्हिगदेदा पिन्बा परमेश्वरला आत्माएनोन साक्षी मुला।”

33 चु ताम थे:माहेन्से थेनीगदेदा ल्हानान बोमो रे:जी, ओच्छे मुल चलागदेदा साइबारी सल्लाह लबान मुबा। 34 तर यहूदी धर्मगुरुदेन छ्याम जम्मासेन मान लबा गमलिएल भिबा फरिसीसे सभाला डाच्छा रे:सी थेनीगदेदा छिन्नड मडग्यार निउ भिंसी भिंजी। 35 ओच्छे थेसे सभाला म्हिगदेदा चुहड् भिंसी भिंजी, “इस्राएलीगदे हाडनीसे चु म्हिगदेदा जे लबारी छ्याइबा मुला, थेरी होशियार तउ। 36 तिगदा भिसम चु भन्दा डाच्छाएनोन थूदास भिबा म्हिसे डा घेन म्हि हिन्ना भिंसी भिमुबा। ओच्छे थेदेन छ्याम ओस्पन ग्यार्जा ब्लि म्हिगदे भ्रमुबा, ओच्छे थेदा साइजी। जमाहेन्से थेदेन छ्याम भ्रबा जम्मान म्हिगदे ससा बडबड तजी, ओच्छे जम्मान गे आखेल्बा तजी। 37 चु म्हि भन्दा लिच्छाएनोन यहुल्साला म्हि इयाबा धुडरी गालीलग्याम यहूदा भिबा म्हि थोन्जी, ओच्छे ल्हानान म्हिगदे थेला लिच्छा भ्रजी, थेदाएनोन साइजी। जमाहेन्से थेदेन छ्याम भ्रबा म्हिगदे ससा बडबड तजी। 38 दान्देल चो तामला बाररीनोन डाइ हाडनीदा पाइला, चु म्हिगदेदा हाडनीसे तिगै आलना खलागो। तिगदा भिसम चुगदेसे लबा चु गेदेन ताम म्हिगदेग्याम हिन्सम थे हड्नीन म्हासी निला। 39 तर चु गे परमेश्वरग्याम तबा हिन्सम हाडनीसे रोकब लबारी आखम। रोकब लबारी म्हाइजी भिसम हाडनी परमेश्वरला बिरोधरी रे:जीम भिबा ताम था तला।”

जमाहेन्से थेनीगदेसे थेला ताम इयान्जी। 40 ओच्छे थेनीगदेसे मुल चलागदेदा न्हडरी इयोइसी तोबा ग्याइबा लजी। ओच्छे “दो:सी खाइमै येशूला मिन किन्सी तिगै ताम थापाङ्गो” भिंसी थेनीगदेदा पुइजी।

41 जमाहेन्से येशूला मिनरी बेइज्जत नाबाधोनाला तजी भिबा तामरी ताइसी ताइसी मुल चलागदे थे सभाग्याम थोन्सी निजी। 42 ओच्छे थेनीगदे धिन धिननोन परमेश्वरला मन्दिरदेन दिम दिमरी निंसी येशून थार्बा पिन्बा ख्रीष्ट हिन्ना भिंसी थार्बा पिन्बा समाचार थे:ना लबारी आखलानी।

चबा थुइबा भो लसी पिन्बाला लागिरी धम्बा गोर निस म्हि

6 थे धुडरी येशूदा विश्वास लबा म्हिगदे बढब तबान निमुबा। जमाहेन्से हिब्रू ग्योइ पाइबा यहूदीगदेला † बिरोधरी ग्रीक ग्योइ पाइबा यहूदीगदेसे तामगन लबारी छ्याइजी। तिगदा भिसम ग्रीक ग्योइ पाइबा यहूदीगदेला हेम्बो सिबा म्रिडम्हेमेगदेसे धिनना धिन तो:तेधोना चबा थुइबा आयाइमुबा। 2 जमाहेन्से च्युक न्ही चलागदेसे येशूदा विश्वास लबागदेदा इयोइसी चुहड् भिंसी भिंजी, “परमेश्वरला बचन थे:ना लबा गे ख्लासी चबा थुइबा पिन्बा गे लबारी डन्दा ठीक आत। 3 थेतबासेलमा आलेगदे, एनीगदे न्हडला परमेश्वरला आत्मादेन बुद्धिसे प्लिइबा, ओच्छे जम्मासेन मान लबा गोर निस म्हिदा धम्गो, डन्से चु गे थेनीगदेदा जिम्मा पिन्ना। 4 तर डन्से चा प्रार्थना लबादेन परमेश्वरला बचन थे:ना लबा गे लला।”

5 चु ताम येशूदा विश्वास लबा जम्मान म्हिगदेदा सेम निजी। ओच्छे थेरी मुबा जम्मादान थे ताम ज्यबा छोर्सी थेनीगदेसे पूरा विश्वास मुबादेन परमेश्वरला आत्मासे प्लिइबा स्तिफनस, फिलिप, प्रखरस, निकनोर, तीमोन, पर्मिनासदेन एन्टिओखिया भिबा शहरला यहूदी धर्म तेन्बा निकोलाउसदा धम्जी। 6 ओच्छे थे म्हिगदेदा मुल चलागदे मुबा ग्लारी भजी। जमाहेन्से मुल चलागदेसे थे म्हिगदेथोरी हाडला या थान्सी प्रार्थना लजी।

7 परमेश्वरला बचन ल्हानान ग्लारी थे:बान निजी, ओच्छे यरूशलेमरी प्रभु येशूदा विश्वास लबा म्हिगदे बढब तबान निजी। परमेश्वरला मन्दिररी पूजा लबा म्हिगदे न्हडला ल्हानान म्हिगदेसेनोन प्रभु येशूदा विश्वास लजी।

स्तिफनसदा चुइसी यहूदीगदे हुप तबा दिमरी भोर्बा

8 जमाहेन्से स्तिफनस परमेश्वरला दयामायादेन शक्तिसे प्लिइसी म्हिगदेला गुडरी घेन घेन गेगदे लसी उदेकला चिनुगदे उन्बान मुबा। 9 तर दान्दे नोकर आहिन्बा म्हिगदे भिबा हुप तबा दिमग्याम कोइ कोइ म्हिगदे स्तिफनस मुबा ग्लारी खसी आतो:बा आतो:बा ताम लबारी छ्याइजी। थे म्हिगदे चा अलेक्जेन्ड्रिया, कुरेनी, किलिकिया ओच्छे एशियाला म्हिगदे मुबा। 10 स्तिफनससे परमेश्वरला आत्मादेन बुद्धिग्याम पाइबा तामला जोहाब थेनीगदे खालैसेन पिन्आखम्नी।

11 जमाहेन्से थेनीगदेसे न्हड न्हडरी म्हिगदेदा थीसी घुस पिन्बान चुहड् भिंसी पाइपुइजी, “चुसे परमेश्वरदेन मोशाला बिरोध †† लसी ताम पाइबा डन्से थे:जी।” 12 चुहड्बा ताम लसी थेनीगदेसे म्हिगदे, यहूदी गन्बागदेदेन यहूदी धर्मगुरुगदेदा थीजी। ओच्छे थेनीगदेसे स्तिफनसदा चुइसी यहूदी धर्मला अदालतरी भोर्जी।

13 जमाहेन्से थेनीगदेसे स्तिफनसला बिरोध लसी लुसीला ताम पाइबा म्हिगदेदा भजी। थे म्हिगदेसे चुहड् भिंसी पाइजी, “चु म्हिसे परमेश्वरला मन्दिरदेन मोशाला ठिमला बिरोध लसी ताम पाइबारी आखलानी। 14 तिगदा भिसम चुसे मी ‘नासरतला येशूसे परमेश्वरला चु मन्दिरदा फुप्ला ओच्छे मोशासे व्हाडदा पिन्बा रिमठिमएनोन पोसी पिन्ना’ भिबा डन्से थे:जी।” 15 जमाहेन्से यहूदी धर्मला अदालतरी चिबा जम्मान म्हिगदेसे थेदा ज्यना लसी च्याजी। ओच्छे थेला ली स्वर्गदूतला ली हड्बान य्हाल य्हाल्बा म्राइजी।

स्तिफनससे म्हिगदेदा पाइबा

7 जमाहेन्से परमेश्वरला मन्दिररी पूजा लबा मुल म्हिसे, “चु ताम सत्य हिन्ना?” भिंसी इयोइमा, 2 स्तिफनससे चुहड् भिंसी भिंजी, “आबागदेदेन ज्योज्यो आलेगदे चु ताम इयान्गो। जम्मान भन्दा घेन शक्ति मुबा परमेश्वरसे व्हाडला आखे म्हेमे अब्राहाम हारान भिबा नाम्सारि फेच्बा भन्दा डाच्छा मेसोपोटामिया भिबा ग्लारी स्हूबा धुडरी थेसे परमेश्वरदा हाडला डाच्छापट्टि म्राइजी। 3 परमेश्वरसे थेदा ‘ए हाडला यहुल्सादेन हाडला म्हिगदे ख्लासी डाइ उन्बा यहुल्सारी निउ’ भिंसी सुइबा मुबा। † 4 “जमाहेन्से थे कल्दीगदेला यहुल्साग्याम थोन्सी हारान भिबा नाम्सारि खसी चिजी। ओच्छे थेला आबा सिमाहेन्से परमेश्वरसे थेदा थे ग्लाग्याम दान्दे हाडनी स्हूबान लबा चु शहररी भजी। 5 परमेश्वरसे थेदा थे ग्लारी निंसी सम्पत्ति मी आहिंन काड थान्बा ग्ला सुतै आपिन्नी। तर सन्तान आरेसैनोन परमेश्वरसे थे ग्ला थेदेन थेला सन्तानदा पिन्ना भिंसी कबुल लबा मुबा। ††6 ओच्छे परमेश्वरसे थेदा “एला सन्तान अर्गु यहुल्सारी निंसी चितो:बा मुला, थे ग्लाला म्हिगदेसे थेनीगदेदा घ्यबा स्होसी ग्यार्जा ब्लि दिडधोना थेनीगदेसे नाआखम्बा दुख पिन्ना’ भिंसी सुइजी। ††7 दो:सी परमेश्वरसे चुहड् भिंसी सुइजी, ‘थेनीगदे जुन यहुलला म्हिगदेला घ्यबा दो:सी चिला डाइ थे यहुलला म्हिगदेदा सजाय पिन्ना। जमाहेन्से थेनीगदे थे ग्लाग्याम थोन्सी चुनोन ग्लारी खसी डादा तेन्ना।’

8 “परमेश्वरसे अब्राहामदेन छ्याम खतनाला कबुल लजी। हाडला झा इसहाक न्हसी भ्रे:रे तमाकुनु अब्राहामसे थेला खतना लजी। इसहाकसेनोन हाडला झा याकूबला खतना लजी, थेहड् लसीन याकूबसेनोन हाडला च्युक न्ही कोलागदेला खतना लजी। ओच्छे थेला च्युक न्ही कोलागदे व्हाड जम्मालान आखे म्हेमे दोजी। §

9 “थे आखे म्हेमेगदे न्हडरी योसेफ भिबादा थेला ज्योज्योगदेसे डाह लसी मिश्र यहुल्सारी चूइसी पिन्जी। तसैनोन थेदेन छ्याम परमेश्वर मुबा। §†10 योसेफदा परमेश्वरसे जम्मान दुखग्याम फेजी। ओच्छे परमेश्वरसे थेदा

† हिब्रू ग्योइ पाइबा यहूदीगदे चा इस्राएलीगदे हिन्ना। ओच्छे ग्रीक ग्योइ पाइबा यहूदीगदे चा अर्गु यहुलला म्हिगदे हिन्ना।

†† चुरी “मोशाला बिरोध लसी” भिबा चा परमेश्वरसे मोशादा पिन्बा ठिमला बिरोधरी भिबा हिन्ना। † 7:2 उत्प १२:१ †† 7:3 उत्प १२:१ †† 7:4 उत्प ११:३१; १२:४ ††† 7:5 उत्प १२:७; १३:१५; १५:१८; १७:८ ††† 7:6 उत्प १५:१३-१४; प्रस्था

ज्याब बुद्धि पिन्बासे लमा मिश्र यहुल्साला ग्ले फारोसे थेदा सेम निसी मान लजी। जमाहेन्से थेदा मिश्र यहुल्सादेन ग्लेखाडला हाकिम स्होजी। †

11 “लिच्छा मिश्र यहुल्सादेन कनान यहुल्सा नाडनोन अनिकाल तसी ग्रेन दुख तजी, थेतबासेलमा यहाडला आखे म्हेमेसे चबा स्हे तैगैनोन आयाडनी। ††12 तर याकूबसे मिश्र यहुल्सारी चबा स्हे मुला भिबा ताम थे:माहेन्से थेला झागदे यहाडला आखे म्हेमेदा थेरी पुडजी। थेनीगदे मिश्र यहुल्सारी निबा चु डाच्छारेम मुबा। 13 ओच्छे दो:सी हुप तमा योसेफसे ह्राडला ज्योज्यो आलेगदेदा ह्राड खाल हिन्ना भिसी डोसेना लजी। जमाहेन्से योसेफला जम्मान म्हेमेला बारेरी फारो ग्लेसे था याडजी। †14 जमाहेन्से योसेफसे ह्राडला आबा याकूबदेन ह्राडला म्हिगदेदा चुरी भसी खड भिसी पुडजी। याकूबला ह्राडला म्हेमेदेन ह्राडला म्हिगदे लसी बोगल सोमसे च्युक डा म्हि मुबा। †15 जमाहेन्से याकूब ह्राडला जम्मान म्हिगदेदा भोर्सी मिश्र यहुल्सारी निजी, ओच्छे थे थेरीन सिजी। थेह्रड लसीन थेला झागदे यहाडला आखे म्हेमेगदेएनोन थेरीन सिजी। †16 लिच्छा मिश्र यहुल्साग्याम थेनीगदेला सिबा ल्हुडदा शकेम भिबा ग्लारी भोर्सी धुर्सा री थान्जी। थे धुर्सा अब्राहामसे हमारो भिबा म्हिंला झागदेदा टाडगा फासी ग्लुबा मुबा। ††

स्तिफनससे मोशाला बारेरी पाड्बा

17 “परमेश्वरसे अब्राहामदेन छ्याम लबा कबुल पूरा तबारी छ्याडबा धुड तसी जिन्बा मुबा, थे धुडरी मिश्र यहुल्सारी यहाडला आखे म्हेमेला सन्तानगदे ल्हानान बढब तबान निजी। 18 जमाहेन्से मिश्र यहुल्सारी योसेफदा डोआसेबा स्हान्दो ग्लेसे शासन लबारी छ्याडजी। ††19 थे ग्लेसे यहाडला यहुलला म्हिगदेदा धोका पिन्सी ल्हानान दुख पिन्जी। ओच्छे थेनीगदेसे यहाडला आखे म्हेमेला भर्खर न्हबा कोलागदेदा मडग्यार थान्पुडजी। चुह्रड लसी भर्खर न्हबा जम्मान कोलागदेदा सिना लजी। †

20 “थेनोन धुडरी मोशा न्हजी। थे परमेश्वरला डाच्छापट्टि जेबा म्हि मुबा। थेदा ला सोमधोना ह्राडलान आबाला दिमरी सयार लसी थान्जी। †21 थेदा मडग्यार भोर्सी थान्माहेन्से फारोला झामेसे थेदा भोर्जी, ओच्छे ह्राडलान झा स्होसी सयार लसी न्हजी। ††22 जमाहेन्से मोशादा मिश्रीगदेला बुद्धि लोप्ली, ओच्छे मोशासे पाड्बा तामदेन गे शक्तिशाली मुबा।

23 “बोगल न्ही दिड तमाहेन्से मोशासे ह्राडला इस्राएली ज्योज्यो आलेदेन छ्याम हुप तबा सेम लजी। †24 मिश्री गिकसे ह्राडला इस्राएली ज्योज्यो आले न्हडला गिकदा अन्याय लबा म्राड्सी मोशासे थेदा जोगब लसी थे मिश्रीदा साड्सी ह्राडला आलेथोरी लबा अत्याचारला बदला किन्जी। 25 डाग्यामसेन परमेश्वरसे थेनीगदेदा चु दुखग्याम फेला भिबा ताम डाला ज्योज्यो आलेसे घोला भिसी मोशासे म्हन्बा मुबा। तर थेनीगदेसे थे ताम आघोनी। 26 न्हडगरदड इस्राएली न्ही ह्राड ह्राड न्हडरी छेबा बड्बा लसी चिबा धुडरी मोशा खजी, ओच्छे थेनीगदेदा ढिकना लबारी म्हाड्सी ‘होगदे, एनीगदे मी ज्योज्यो आले हिन्ना, तिगदा ह्राड ह्राड न्हडरी छेबा?’

27 “तर ह्राडला खिम्जेमदा अन्याय लबा म्हिसे थेदा धुर आड्सी चुह्रड भिजी, ‘एदा डन्दा शासन लबा म्हिदेन न्यायाधीश दोबारी खाल्से धम्जी?’ 28 तिग तिल्मा एसे थे मिश्रीदा साड्बा ह्रडनोन डादाएनोन साड्बारी म्हाड्बा?’ 29 चुह्रड्बा ताम थे:सी मोशा मिद्यान भिबा यहुल्सारी यार्सी विदेशी दोसी चिजी। थेरी थेला झा न्ही न्हजी।

30 “मिद्यान यहुल्सारी चिबा बोगल न्ही दिड तमा मोशासे सीनै भिबा गडला डामरी तोडतोडबा ग्लारी लुड्बा झाडरी मे ल्हामरी स्वर्गदूत गिक म्राड्जी। ††31 चु म्राड्सी मोशा उदेक तजी, ओच्छे जजाकी डामरी निसी च्यामा परमेश्वरसे चुह्रड भिसी सुड्बा थे:जी। 32 ‘डा एला आखे म्हेमे अब्राहाम, इसहाकदेन याकूबला परमेश्वर हिन्ना।’ चु थे:सी मोशा लोड्सी फितफित धर्सी थेपट्टि च्याबारीन आखम्नी।

33 “जमाहेन्से परमेश्वरसे मोशादा चुह्रड भिसी सुड्जी, ‘एला लखम स्युगो। तिगदा भिसम ए राब्बा ग्ला चोखो ग्ला हिन्ना। 34 डाइ मिश्र यहुल्सारी मुबा डाला म्हिगदेदा लबा अन्याय म्राड्सी जिन्बा मुला, ओच्छे थेनीगदेला दुखला तामएनोन थे:सी जिन्बा मुला। थेतबासेलमा थेनीगदेदा थे अन्यायदेन दुखग्याम फेबाला लागिरी डा मार फाब्बा हिन्ना। दाहेन्से डाइ एदा मिश्र यहुल्सारी पुडला।’

35 “चुनोन मोशादा थेनीगदेसे ‘एदा खाल्से डन्दा शासन लबा म्हिदेन न्यायाधीश स्होजी’ भिसी पत्याब आतमुबा, थेनोन मोशादा परमेश्वरसे लुड्बा झाडला मे ल्हामरी म्राड्बा स्वर्गदूतग्याम शासन लबा म्हिदेन इस्राएलीगदेदा दुखग्याम फेबा म्हि स्होसी पुडजी। ††36 चुनोन मोशासे मिश्र यहुल्सारी, वाला भिबा समुन्द्रदेन बोगल न्ही दिडधोना तोडतोडबा ग्लारी उदेकला गेगदेदेन चिनुगदे उन्बान इस्राएलीगदेदा मिश्र यहुल्साग्याम फेसी भबा मुबा। †

37 “चुनोन मोशासे इस्राएलीगदेदा ‘परमेश्वरसे डादा पुड्खबा ह्रड लसी एनीगदे न्हडग्यामसेन एनीगदेला लागिरी अगमवक्ता गिक पुड्खला’ भिसी पाड्बा। ††38 चुनोन मोशा तोडतोडबा ग्लारी म्हिगदेदेन छ्याम मुबा धुडरी स्वर्गदूतदेन छ्याम मुबा, थेनोन स्वर्गदूतसे सीनै भिबा गडरी यहाडला आखे म्हेमेदेन छ्याम ताम पाड्बा, थेसेन यहाडदा पिन्बाला लागिरी छोन्बो बचन याड्बा मुबा। ††

39 “थेसे कुल्बा ताम आड्यान्ना यहाडला आखे म्हेमेसे थेदा खलासी मिश्र यहुल्सारीन दो:सी निबा सेम लजी। 40 जमाहेन्से थेनीगदेसे हारूनदा ‘यहाडला डाच्छा डाच्छा भ्रबा तिगै लगदे स्होसी पिन्गो। तिगदा भिसम डन्दा मिश्र यहुल्साग्याम फेसी भबा चु मोशादा तिग तगोम यहाडदा था आरे’ भिसी भिजी। ††41 जमाहेन्से थेनीगदेसे म्हे बहरला मूर्ति गिक स्होसी थेरी बलि पिन्जी, ओच्छे ह्राडसे लबा गेरी थेनीगदे ल्हानान ताड्जी। 1842 थेतबासेलमा परमेश्वरसे थेनीगदेदा खलाजी, ओच्छे थेनीगदेसे म्हन्बा ह्रडनोन मुरी मुबा सारगदेदा तेन्बारी खलासी पिन्जी। चु ताम अगमवक्तागदेसे डाच्छान परमेश्वरला बचनरी भिबा मुबा, ‘इस्राएलीगदे तिग एनीगदे बोगल न्ही दिडधोना तोडतोडबा ग्लारी मुबा धुडरी

एनीगदेसे डादा जन्तुला बलिदेन भेटीगदे पिन्जी? आपिन्नी। 19

43 तर एनीगदेसे मोलोख भिबा लला पालदेन रेफन भिबा लला सार, ओच्छे एनीगदेसे तेन्बा लला मूर्तिगदे थीसी भोर्जी। थेतबासेलमा दाहेन्से डाइ एनीगदेदा सजाय पिन्बाला लागिरी बेबिलोन भिबा ग्लायाम क्याम्सडपट्टि पुडला।’

स्तिफनससे परमेश्वर धन्ख्याबा पालला बारेरी पाड्बा

44 “यहाडला आखे म्हेमे तोडतोडबा ग्लारी मुबा धुडरी थेनीगदेदेन छ्याम परमेश्वर धन्ख्याबा पाल मुबा। थे पाल मोशासे म्राड्बादेन परमेश्वरसे कुल्बा अन्धार स्होबा मुबा। 2045 परमेश्वरसे अर्गु यहुलला म्हिगदेदा ते:सी थेनीगदेला यहुल्सा यहाडला आखे म्हेमेदा शासन लपुड्जी। थे पाल यहोशूसे थेनीगदेला यहुल्सा ढासी किन्बा धुडरी थेनीगदेदेन छ्यामनोन भजी। थेह्रड लसीन दाऊद ग्लेला धुडधोनान थे पाल थेनीगदेदेन छ्यामनोन मुबा। 2146 दाऊद ग्लेसे परमेश्वरला दयामाया याड्सी थेसे याकूबला परमेश्वरला लागिरी दिम स्होम्याड्गै भिसी परमेश्वरदेन छ्याम बिन्ती लजी। 2247 तर परमेश्वरला लागिरी दिम चा सोलोमन ग्लेसे 23 स्होजी। 24

48 “तर म्हिसे स्होबा दिमरी जम्मान भन्दा ग्रेन परमेश्वर धन्आछ्या, ओच्छे अगमवक्तागदेसेनोन चुह्रड पाड्बा मुला। 49 परमेश्वरसे चुह्रड भिसी सुड्बा मुला, ‘डाला ठि स्वर्ग हिन्ना,

३:१२ § 7:8 उत्प १७:१०-१४; २१:२-४; २५:२६; २९:३०-३५ §† 7:9 उत्प ३७:११, २८; ३९:२, २१† 7:10 उत्प ४१:३९-४१†† 7:11 उत्प ४२:१-२ † 7:13 उत्प ४५:१, १६†† 7:14 उत्प ४५:९-१०, १७-१८; ४६:२७†† 7:15 उत्प ४६:१-७; ४९:३३††† 7:16 उत्प २३:३-१६; ३३:१९; ५०:७-१३; यहो २४:३२††† 7:18 प्रस्था १:७-८ § 7:19 प्रस्था १:११-१३, २२ §† 7:20 प्रस्था २:२ §†† 7:21 प्रस्था २:३-१० §† 7:23 प्रस्था २:११-१५; १८:३-४ §†† 7:30 प्रस्था ३:१-१०

§† 7:35 प्रस्था २:१४ §† 7:36 प्रस्था ७:५; १४:२१; गन्ती १४:३३ §§† 7:37 व्यव १८:१५, १८ §§† 7:38 प्रस्था १९:१-२०:१७; व्यव ५:१-३३ §§§ 7:40 प्रस्था ३२:१ 18 7:41 प्रस्था ३२:२-६ 19 7:42 आमो ५:२५-२७ 20 7:44 प्रस्था २५:९, ४० 21 7:45 यहो ३:१४-१७ 22 7:46 २ शमू ७:१-१६; १ इति १७:१-१४ 23 “सोलोमन ग्ले” चा दाऊद ग्लेला झा हिन्ना। 24 7:47 १ राजा ६:१-३८; २ इति ३:१-१७

ओच्छे जम्बुलिङ डाला काड थान्बा ग्ला हिन्ना।

एनीगदेसे डाला लागिरी खाह्ण्डबा दिम स्होजी?

ओच्छे डाइ बल्लबा न्हबा ग्ला खानड मुला?

50 तिग चु जम्मान स्हे डालान यासे स्होबा आहिन?" † †

51 दोःसी स्तिफनससे चुह्ण्ड भिसी भिजी, "युडबा ह्ण्डबा सेम थोबा म्हिगदे, एनीगदेसे हाडला सेमरी परमेश्वरदा खाइमै आथान्नी। ओच्छे एनीगदेला आखे म्हमेगदेसे लबा ह्ण्डनोन एनीगदेसेनोन परमेश्वरला आत्मासे पाड्बादा सदन बिरोध लजी। ††52 एनीगदेला आखे म्हमेगदेसे अगमवक्तागदे न्हडला खजिबा अगमवक्तादा चा दुख आपिन्नी तला? थेनीगदेसे परमेश्वरसे म्हन्बा अन्धार भ्रबा म्हि † फेप्खबान मुला भिसी थेःना लबागदे जम्मान साइजी। दान्दे हाडनी चा परमेश्वरसे धम्बा म्हिदा धोका पिन्बादेन साइबा म्हि दोजी। 53 हाडनीसे स्वर्गदूतगदेला याग्याम पिन्बा मोशाला ठिम मी याड्जी। तर हाडनीसे थे ठिम आड्थान्नी।"

स्तिफनस सिबा

54 स्तिफनसला चुह्ण्डबा ताम थेःसी थेनीगदे बोमोसे म्लाड म्लाड तसी स्वा क्रेबारी छ्याड्जी। 55 तर स्तिफनस चा परमेश्वरला आत्मासे प्लिङ्सी एकोहोरो स्वर्गपट्टि च्याजी। ओच्छे थेसे परमेश्वरला घ्रेन य्हालरी येशूदा परमेश्वरला दाहिनेपट्टि राप्सी धन्छ्याबा म्राड्जी। 56 ओच्छे थेसे "च्यागो, डाइ स्वर्ग ठोड्बादेन परमेश्वरसे पुड्खबा म्हि येशूदा परमेश्वरला दाहिनेपट्टि राप्सी धन्छ्याबा म्राड्बा मुला" भिसी भिजी।

57 तर थेनीगदेसे नाब्यड ख्यासी घ्रेन काइ लसी क्रिङ्सी तिक्खुरीन स्तिफनसदा व्हाजी। 58 जमाहेन्से थेनीगदेसे युडबासे तोसी साइबाला लागिरी स्तिफनसदा शहरग्याम तेःसी भोजी। चुह्ण्ड लबा म्राड्बा म्हिगदेसे हाड हाडला क्वान स्युसी शाऊल भिबा भ्योन म्हिदा जिम्मा लसी स्तिफनसदा युडबासे तोजी।

59 थेनीगदेसे चुह्ण्ड लसी युडबासे तोबा धुइरी स्तिफनससे "प्रभु येशू डाला आत्मा हाडसे किन्गो" भिसी प्रार्थना लजी। 60 जमाहेन्से थेसे पुड् जूसी घ्रेन काइ लसी, "प्रभु, चु पापला दोष थेनीगदेदा थाखगै" भिमैछ्याम थेला सा निजी।

शाऊलसे येशूदा विश्वास लबा म्हिगदेदा दुख पिन्बा

8 स्तिफनसदा साइबारी शाऊलएनोन ठिक्का मुबा। थेनोन धिनकुनुहेन्से यरूशलेमरी मुबा मण्डलीला बिरोधरी ल्हानान दुख तबारी छ्याड्जी, ओच्छे मुल चेलागदे बाहेक थेनीगदे जम्मान ससा बडबड तसी यहूदियादेन सामरियाला ग्लारीक्यार यार्जी। 2 जमाहेन्से परमेश्वरदा तेन्बा म्हिगदेसे स्तिफनसला लासदा भोर्सी ल्हुजी, थे सिबासे लमा थेनीगदे ल्हानान क्राबा क्रिङ्बा लजी। 3 तर शाऊलसे चा येशूदा विश्वास लबा म्हिगदेदा नाश लबारी छ्याड्जी। ओच्छे दिम दिमरी वाड्सी हेम्फेबे, म्रिडम्हेमे जम्मान छेड्बान भोर्सी इयाल्खानरी झाड्जी। †

फिलिपसे सामरियारी थार्बा पिन्बा समाचार थेःना लबा

4 जमाहेन्से थे ससा बडबड तसी यार्बा म्हिगदेसे हाड धोतेबा ग्लारी थार्बा पिन्बा समाचार थेःना लजी। 5 फिलिप चा सामरियाला शहर गिकरी निसी थार्बा पिन्बा ख्रीष्टला बारेरी पाड्जी। 6 फिलिपसे पाड्बादेन थेसे लबा उदेकला चिनु म्राड्सी थेरी मुबा म्हिगदेसे थेला तामदा सेम लसी इयान्नी। 7 तिगदा भिसम थेरी मुबा ल्हानान म्हिला ल्हुङ्ग्याम घ्रेन काइ लसी क्रिङ्बान म्हड थोन्सी निबारी छ्याड्जी। ओच्छे थेरी मुबा काड या चलब आतबादेन कुज्या म्हिगदेदाएनोन खम्ना लबा मुबा। 8 थेतबासेलमा थे शहरला म्हिगदे ल्हानान ताड्जी।

जादु उन्बा सिमोन

9 थे शहररी सिमोन भिबा म्हि गिक मुबा। थेसे डाच्छाहेन्सेन थे शहररी जादु लसी सामरियाला म्हिगदेदा उदेक तना लबा मुबा। ओच्छे थेसे हाडसे हाडदान डा ह्ण्डबा खालै आरे भिसी म्हन्मुबा। 10 थेदा यहुल्साला जजाबा म्हिहेन्से घ्रेनधोनाला जम्मान म्हिगदेसे "चु परमेश्वरला शक्ति हिन्ना" भिसी तेन्मुबा, "चुदा जम्मान भन्दा घ्रेन शक्ति भिमुला।" 11 थे ग्लाला म्हिगदेसे सिमोनसे भिबा ताम इयान्नी थेदेन छ्याम भ्रमुबा। तिगदा भिसम थेसे ल्हानान धुइहेन्से जादु लसी म्हिगदेदा उदेक तना लबा मुबा। 12 तर थेनीगदेसे परमेश्वरला यहुल्सादेन येशू ख्रीष्टला मिनना समाचार थेःना लबा फिलिपला तामरी विश्वास लजी। जमाहेन्से हेम्फेबेदेन म्रिडम्हेमे जम्मानसेन बत्तिस्मा किन्जी। 13 सिमोनसेनोन विश्वास लसी बत्तिस्मा किन्जी, ओच्छे थे फिलिपदेन छ्याम भ्रबारी छ्याड्जी। ओच्छे फिलिपसे लबा घ्रेन घ्रेन उदेकला गेदेन चिनुगदे म्राड्सी सिमोन उदेक तजी।

14 सामरियाला म्हिगदेसे परमेश्वरला बचनरी विश्वास लजी भिबा थेःसी यरूशलेमरी मुबा मुल चेलागदेसे पत्रुसदेन यूहन्नादा थेनीगदे मुबा ग्लारी पुड्जी। 15 थेनीगदे सामरियारी धोखसी थेरी मुबा विश्वासीगदेसे परमेश्वरला आत्मा याड्गै भिसी पत्रुसदेन यूहन्नासे प्रार्थना लजी। 16 तिगदा भिसम थे धुइधोना थेनीगदे न्हडला खालैथोरीनोन परमेश्वरला आत्मा फेप्खबा आरेमुबा। थेनीगदेला बत्तिस्मा प्रभु येशूला मिनरी जे तबा मुबा। 17 पत्रुसदेन यूहन्नासे थेनीगदेथोरी या थान्सी प्रार्थना लमाहेन्से थेनीगदेसे परमेश्वरला आत्मा याड्जी।

18 मुल चेलागदेसे या थान्मा परमेश्वरला आत्मा याड्बा म्राड्बाहेन्से सिमोनसे थेनीगदेदा टाडगा पिन्बारी छ्याड्बान, 19 "डादाएनोन चु शक्ति पिन्गो, ओच्छे डाइ जुन म्हिथोरी या थान्ना थे म्हिसे परमेश्वरला आत्मा याड्गै" भिसी भिजी। 20 तर पत्रुससे सिमोनदा चुह्ण्ड भिसी भिजी, "एला टाडगा एदेन छ्यामनोन नाश तगै। तिगदा भिसम परमेश्वरला मोलम टाडगासे ग्लुखम्ला भिसी एसे म्हन्जी। 21 परमेश्वरला डाच्छा एला सेमसे म्हन्बा ताम ठीक आरेबासे लमा चु गेरी एला तिगै भोदेन अधिकार आरे। 22 थेतबासेलमा एसे म्हन्बा चु आज्यबा नड्बा तामदा ख्लासी परमेश्वरपट्टि दोःसी परमेश्वरदेन छ्याम प्रार्थना लसम एला सेमरी म्हन्बा चुह्ण्डबा तामदा परमेश्वरसे माफ पिन्ना तला। 23 तिगदा भिसम एला सेम डाहसे प्लिड्बादेन पापला तहरी मुला भिबा ताम डादा था मुला।"

24 जमाहेन्से सिमोनसे "हाडनीसे सुड्बा ताम डाथोरी थाखगै भिसी हाडनीसेन परमेश्वरदेन छ्याम डाला लागिरी प्रार्थना लसी पिन्गो" भिसी भिजी।

25 ओच्छे पत्रुसदेन यूहन्नासे येशूसे लबा हाडसेन म्राड्बा गेदेन प्रभुला बचनग्याम घोना लमाहेन्से सामरीगदेला ल्हानान नाम्सागदेरी थार्बा पिन्बा समाचार थेःना लबान थेनीगदे यरूशलेमरी धोजी।

फिलिपसे इथियोपिया भिबा सरकाररी म्हिदा स्याब्बा

26 जमाहेन्से प्रभुला दूत गिकसे फिलिपदा "ए रेःसी ल्होपट्टि यरूशलेमग्याम गाजापट्टि निउ। थे ग्याम तोडतोडबा मुला" भिसी भिजी। 27 थेतबासेलमा फिलिप रेःसी निजी, थेसे नपुंसक गिकदा स्याप्जी थे नपुंसक इथियोपिया भिबा यहुल्साला कन्दाकी भिबा ग्लेस्याला टाडगाला गे लबा मुल म्हि मुबा। थे नपुंसक परमेश्वरदा तेन्बारी यरूशलेमरी निबा मुबा। 28 थे नपुंसक हाडला दिमपट्टि दोःसी खबान मुबा, ओच्छे थे हाडला रथरी चिसी यशैया भिबा अगमवक्तासे भिबा किताब पढब लबान मुबा। 29 जमाहेन्से परमेश्वरला आत्मासे फिलिपदा "ए थे रथला डामरी निसी थेदेन छ्याम छ्यामनोन निउ" भिसी सुड्जी।

30 फिलिप थे मुबा ग्लारी यार्सी निमा थेसे यशैया भिबा अगमवक्तासे भिबा किताब पढब लबान लबा थेःजी। जमाहेन्से फिलिपसे थेदा "हाडसे पढब लबान लबा चु ताम घोमुला?" भिसी इयोड्मा,

† 7:50 यशै ६६:१-२ †† 7:51 यशै ६३:१० † "परमेश्वरसे म्हन्बा अन्धार भ्रबा म्हि" चा येशू ख्रीष्ट हिन्ना। †† 8:3 मुल २२:४-५; २६:९-११

31 थेसे “खालैसे घोना आलतेधोना डाइ खाह्इ लसी घोसे?” भिसी भिजी। जमाहेन्से थेसे फिलिपदा रथरी डादेन छ्यामनोन चिउ भिसी पाइजी। 32 थेसे पढब लबा परमेश्वरला बचनरी चुह्इ भिसी भिबा मुबा, थे साइबारी भोर्बा ग्यु ह्इबान मुबा,

ओच्छे ग्यु बोगो हाडला का थामा कुटिसी चिमुला, थेह्इ लसीन थेसेनोन तिगै आसुइना कुटिसी चिजी। †

33 थेदा अत्याचार तबा धुइरी थेसे ठीक निसाफ आयाइनी।

दाहेन्से थेला वंशला बारेरी खाल्से पाइला?

तिगदा भिसम थेला जुनी जम्बुलिङ्ग्याम भोर्जी।

34 जमाहेन्से थे नपुंसकसे फिलिपदा “चु अगमवक्तासे खाल्ला बारेरी पाइबा हिन्ना? थेसे हाडलान बारेरी पाइबा हिन्ना कि स्थान्दो खालै म्हिला बारेरी पाइबा हिन्ना? डादा पाइसी पिन्गो” भिसी भिजी। 35 जमाहेन्से फिलिपसे परमेश्वरला थेनोन बचनग्याम थेदा येशूला बारेरी थार्बा पिन्बा समाचार पाइजी। 36 ओच्छे थेनीगदे निबान लबा धुइरी क्युइ मुबा ग्लारी धोजी। जमाहेन्से थे नपुंसकसे फिलिपदा “च्यागो, चुरी क्युइ मुबा चीम, दाहेन्से डादा बप्तिस्मा किन्बारी तिगसे रोकब लखम्ला?” भिसी भिजी। 37 फिलिपसे थे नपुंसकदा “हाडसे सेमहेन्सेन विश्वास लसम हाडसे किन्खम्ला” भिसी भिमा थे नपुंसकसे, “येशू ख्रीष्टनोन परमेश्वरला झा हिन्ना भिसी डाइ विश्वास लबा मुला” भिसी जोहाब पिन्जी। †38 जमाहेन्से थे नपुंसकसे रथ रोकब लपुइजी ओच्छे फिलिपदेन थे क्युइरी वाइजी, जमाहेन्से फिलिपसे थेदा बप्तिस्मा पिन्जी।

39 थेन्नीन क्युइग्याम पाखारी थोन्मैछ्याम प्रभुला आत्मासे फिलिपदा भोर्जी, जमाहेन्से नपुंसकसे फिलिपदा दोःसी आम्राइनी, ओच्छे थे ताइबान दिमरी निजी। 40 तर फिलिपसे हाड अशदोद भिबा ग्लारी धोजीम भिबा था याइजी। ओच्छे कैसरिया भिबा ग्लारी आदोतेधोना जम्मान शहरगदेरी थार्बा पिन्बा समाचार थेःना लबान निजी।

शाऊलसे येशूदा विश्वास लबा

9 थेनोन धुइरी शाऊलसे अझ धाग उन्बान प्रभुला चेलागदेदा साइबारी परमेश्वरला मन्दिररी पूजा लबा मुल म्हि मुबा ग्लारी निसी, 2 प्रभुदा विश्वास लबा हेम्फेबेदेन म्रिडम्हेमे न्हडला जो स्यासै खीसी यरूशलेमरी भम्याइगै भिसी दमस्कस भिबा ग्लाला यहूदीगदे हुप तबा दिमला नेतागदेला लागिरी चिठी भिसी पिन्गो भिसी चिठी हीजी। 3 जमाहेन्से शाऊल निबान लमा थे दमस्कस भिबा ग्लाला डामरी धोजी। थेरी धोमा स्वर्ग्याम तिवखुरीन थेला क्युनोन थाल तजी। 4 थे सरी हिल्लजी ओच्छे थेसे “शाऊल, शाऊल, एसे डादा तिगदा ल्हानान दुख पिन्बा?” भिबा काइ थेःजी।

5 ओच्छे थेसे “प्रभु हाड खाल हिन्ना?” भिसी भिमा चुह्इ भिबा काइ थेःजी, “डा एसे ल्हानान दुख पिन्बा येशू हिन्ना। 6 दाहेन्से ए रेःसी शहररी निउ, ओच्छे एसे तिग लतोःबा थे ताम एदा उन्ना।”

7 थेदेन छ्याम निबा म्हिगदेसे थे काइ चा थेःजी, तर क्यारमार च्यामा खालैदा आम्राइबासे लमा थेनीगदे थोम तसी चिजी। 8 जमाहेन्से शाऊल रेःसी मी ठोइसी च्यामा थेसे तिगै आम्राइनी, ओच्छे थेदेन छ्याम मुबागदेसे थेला यारी चुइसी दमस्कस भिबा ग्लारी भोर्जी। 9 थेसे सोमरेधोना तिगै आम्राइनी, ओच्छे चबा थुइबाएनोन आलनी।

10 दमस्कस भिबा ग्लारी हननिया भिबा प्रभुला चेला गिक मुबा। थेदा म्हाडरी प्रभुसे “हननिया” भिसी इयोइमा, थेसे “लास्सो प्रभु” भिसी भिजी।

11 जमाहेन्से प्रभुसे थेदा चुह्इ भिसी सुइजी, “ए ‘सोजो’ भिबा ग्यामपट्टि निउ, थेरी यहूदाला दिमरी शाऊल भिबा टार्सस शहररी चिबा म्हिदा म्हाइगो, च्यागो, थेसे दान्दे प्रार्थना लबान मुला। 12 थेसे म्हाडरी हननिया भिबा म्हि गिक खसी म्हाइखमौ भिसी हाडथोरी हननियासे या थान्बा म्हाइबा मुला।”

13 तर हननियासे चुह्इ भिसी भिजी, “प्रभु, चु म्हिसे मी यरूशलेमरी मुबा हाडला म्हिगदेदा गाते नइबा गे लसी दुख पिन्जी भिबा ताम डाइ ल्हानान म्हिगदेग्याम थेःबा मुला। 14 चुरीनोन हाडला मिन किन्बागदेदा खीबारी परमेश्वरला मन्दिररी पूजा लबा मुल म्हिगदेग्याम अधिकार याइबा मुला।”

15 तर प्रभुसे थेदा चुह्इ भिसी सुइजी, “ए निउ, तिगदा भिसम डाइ थेदा डादा तेन्बारी धम्बा मुला। थेसे अर्गु खुलला म्हिगदे, ग्लेगदेदेन इस्राएलीगदेदा डाला मिन थेःना लला। 16 दाहेन्से थेसे डाला लागिरी गाते दुख नातोःला भिबा ताम डाइ थेदा उन्ना।”

17 जमाहेन्से हननिया निसी थे दिमरी वाइजी। ओच्छे शाऊलथोरी हाडला या न्हीनोन थान्सी चुह्इ भिसी भिजी, “शाऊल आले, ए ग्यामरी खबान लबा धुइरी ए मुबा ग्लारी फेखबा प्रभु येशूसेन डादा पुइखबा हिन्ना। एसे म्हाइबारी खमौ ओच्छे परमेश्वरला आत्मासे प्लिङ्गै भिसी ए मुबा ग्लारी पुइखबा हिन्ना।” 18 हननियासे थेह्इ भिमैछ्याम थेला मीग्याम जजाबा पाप्रा ह्इबा ताइजी ओच्छे थेला मीसे म्हाइखम्जी। जमाहेन्से रेःसी थेसे बप्तिस्मा किन्जी। 19 ओच्छे थेसे चबा स्हे चसी भड याइजी।

शाऊलसे दमस्कसदेन यरूशलेमरी परमेश्वरला खुल्साला समाचार थेःना लबा

शाऊल तिगै रेधोना येशूदा विश्वास लबागदेदेन छ्याम दमस्कसरी चिजी। 20 ओच्छे तुरुन्तन शाऊल यहूदीगदे हुप तबा दिमरी निसी, “येशू परमेश्वरला झा हिन्ना” भिसी पाइबारी छ्याइजी। 21 चुह्इ भिबा थेःबा म्हिगदे जम्मान उदेक म्हन्सी चुह्इ भिजी, “येशूला मिन किन्बा यरूशलेमरी मुबा म्हिगदेदा नाश लबादेन चुरीनोन येशूला मिन किन्बा म्हिगदेदा खीसी परमेश्वरला मन्दिररी पूजा लबा मुल म्हिगदे मुबा ग्लारी भोर्बा सेमसे खबा चुनोन म्हि आहिन?” 22 तर शाऊलसे थेःना लबा ताम इन इन शक्तिशाली तबान निजी ओच्छे येशून थार्बा पिन्बा ख्रीष्ट हिन्ना भिसी दमस्कसरी मुबा यहूदीगदेदा अलमल तना लजी।

23 ल्हानान रे निमाहेन्से शाऊलदा साइबारी यहूदीगदे ढिक्सी सल्लाह लजी। 24 तर थेनीगदेसे हाडदा साइबारी म्हाइबा ताम शाऊलसे था याइजी। शाऊलदा साइबारी थेनीगदेसे दमस्कस शहरला म्हाप म्हापरी धिन म्हुननोन खूइसी चिमुबा। 25 तर शाऊलदा स्थान्दो विश्वासीगदेसे म्हुनडनोन छाडरी युसी थे शहरला पर्खालग्याम मार पुइजी। †

शाऊल यरूशलेम शहररी

26 शाऊल यरूशलेमरी खमाहेन्से थेरी मुबा येशूला चेलागदेदेन छ्याम ढिक्बारी म्हाइजी। तर थेनीगदेसे थे येशूला चेला हिन्ना भिसी विश्वास आतबासे लमा शाऊल म्हाइसी जम्मान लोइजी। 27 तर बारनाबाससे मुल चेलागदे मुबा ग्लारी शाऊलदा हाडदेन छ्यामनोन भोर्जी। ओच्छे शाऊलसे प्रभुदा ग्यामरी म्हाइबादेन प्रभुसे सुइबा तामला बारेरी पाइजी। थेह्इ लसीन दमस्कसरी आलोइनान येशूला बारेरी थेःना लजी भिबा ताम बारनाबाससे थेनीगदेदा पाइसी पिन्जी। 28 जमाहेन्से शाऊल यरूशलेमला जम्मान ग्लारी थेनीगदेदेन छ्याम छ्याम भ्रजी, ओच्छे शाऊल आलोइनान प्रभुला बारेरी थेःना लबान भ्रजी। 29 ओच्छे शाऊलदेन ग्रीक ग्योइ पाइबा यहूदीगदे हाड हाड न्हडरी आढिक्बा ताम लमुबा, तर थे ग्रीक ग्योइ पाइबा यहूदीगदेसे चा शाऊलदा साइबारी म्हाइबान मुबा। 30 चु ताम था याइसी प्रभुदा विश्वास लबागदेसे शाऊलदा कैसरिया भिबा शहररी भोर्जी, ओच्छे थेंग्याम टार्सस भिबा शहरपट्टि पुइजी।

31 जमाहेन्से यहूदियादेन गालील ओच्छे सामरिया भिबा ग्लारी मुबा जम्मान मण्डलीदा शान्ति तजी। ओच्छे प्रभुला चेलागदेसे परमेश्वरला आत्माग्याम आँट याइजी ओच्छे मण्डलीएनोन बढब तजी। चेलागदे परमेश्वरसे कुल्बा अन्धार भ्रमुबा ओच्छे प्रभुदा विश्वास लबा म्हिगदेएनोन ल्हानान तबान निजी।

एनियासदेन डोरकास भिबा म्हि खम्बा

32 पत्रुस क्यारमारला नाम्सागदेरी कोर्बान निबा धुइरी लुइला भिबा ग्लारी मुबा परमेश्वरला म्हिगदे मुबा ग्लारी धोखजी। 33 पत्रुससे थेरी एनियास भिबा कुज्या म्हि गिक म्हेसी चिबा स्यापजी, थे म्हि कुज्या तबा भ्रेः दिड तबा मुबा। 34 जमाहेन्से पत्रुससे थे कुज्या म्हिदा “एनियास, एदा येशू ख्रीष्टसे खम्ना

† 8:32 यशै ५३:७-८ † चु पद ल्हाना ह्इबा ग्रीक बाइबलरी भिबा आरे।

‡ 9:25 २ कोर ११:३२-३३

लला। थेतबासेलमा ए रेःसी ह्राडला तीबा नान्बा दुइगो” भिसी भिमैछ्याम थे कुज्या म्हि डोड रेःजी।³⁵ थे कुज्या म्हि खम्बा म्राड्सी लुड्वादेन शारोन भिबा ग्लारी चिबा जम्मान म्हिगदेसे प्रभुदा विश्वास लजी।

पत्रुससे प्रार्थना लमाहेन्से डोरकास दोःसी सोबा

³⁶ योप्पा भिबा शहररी तबीता भिबा चेला गिक मुबा, थेदा ग्रीक ग्योडरी डोरकास भिमुबा। † थेसे सदन प्राडबोगदेदा ह्यो लबादेन ज्यबा गे लमुबा।
³⁷ पत्रुस लुड्वा भिबा ग्लारी मुबा धुडरी थे तबीता आखम्ना सिजी, ओच्छे म्हिगदेसे थेला लास खुसी तलाथोला कोठा गिकरी भोर्सी थान्जी।³⁸ लुड्वा भिबा ग्ला योप्पा शहरला डामरीन तबासे लमा चेलागदेसे पत्रुस थेरी मुला भिबा ताम थेःसी, “डनी मुबा ग्लारी योना फेखउ भिउ” भिसी म्हि न्हीदा थे मुबा ग्लारी पुड्जी।

³⁹ जमाहेन्से पत्रुस थेनीगदेदेन छ्याम निजी। थेरी धोखमाहेन्से थेनीगदेसे पत्रुसदा तलाथोला कोठारी भोर्जी। जमाहेन्से थेरी मुबा हेम्बो सिबा म्रिडम्हेमेगदे पत्रुसला डामरी राप्सी क्राबान मुबा, ओच्छे डोरकास भिबा तबीतासे थेनीगदेदेन छ्याम मुबा धुडरी राबा क्वान उन्जी।

⁴⁰ जमाहेन्से पत्रुससे थेनीगदे जम्मादान मडग्यार पुड्सी पुड् जूसी प्रार्थना लजी, ओच्छे थे लासपट्टि च्यासी, “तबीता रेःगो” भिसी भिमा, तबीतासे मी ठोड्जी ओच्छे थेसे पत्रुसदा म्राड्सी रेःसी चिजी।⁴¹ पत्रुससे तबीताला यारी चुड्सी थीजी ओच्छे परमेश्वरला म्हिगदेदेन हेम्बो सिबा म्रिडम्हेमेगदेदा इयोड्सी तबीता सोजी भिसी उन्जी।

⁴² जमाहेन्से चु ताम योप्पा शहर नाडनोन थेःजी, ओच्छे ल्हानान म्हिगदेसे प्रभुदा विश्वास लजी।⁴³ ओच्छे पत्रुस ल्हानान धिनधोना ढिला गे लबा सिमोन भिबा म्हिदेन छ्याम योप्पा शहररीन चिजी।

पत्रुसदेन कर्नेलियस

10 कैसरिया भिबा ग्लारी कर्नेलियस भिबा म्हि गिक मुबा, थे म्हि रोमी खुलला इटालिया भिबा सिपाहीला कप्तान मुबा।² थेसे परमेश्वरदा तेन्मुबा, ओच्छे थेदेन थेला दिमला जम्मान म्हिगदेसे परमेश्वरसे कुल्बा ताम इयान्मुबा। थेसे आरेबागदेदा ज्यबा सेमसे पिन्मुबा। ओच्छे परमेश्वरदेन छ्याम सदन प्रार्थना लमुबा।³ तारेकुनु थेसे धिनना तीन बजेरीक्वार प्रार्थना लबा धुडरी परमेश्वरला स्वर्गदूत गिक ह्राड मुबा ग्लारी खबा म्राड्जी। ओच्छे स्वर्गदूतसे थेदा “कर्नेलियस!” भिसी इयोड्बा थेःजी।

⁴ जमाहेन्से कर्नेलियस लोड्सी स्वर्गदूतदा ज्यना लसी च्यासी, “प्रभु, सुङ्गो” भिसी भिमा,

स्वर्गदूतसे थेदा चुहड् भिसी भिजी, “एसे लबा प्रार्थनादेन एसे प्राडबोगदेदा दया लसी चबा थुड्बारी पिन्बा जम्मान गे परमेश्वरदा फुल्बा भेटी ह्रड्बान दोबा मुला।⁵ दाहेन्से एसे योप्पा भिबा शहररी म्हिगदे पुड्सी पत्रुस भिबा सिमोनदा इयोड्गो।⁶ थे ढिला गे लबा सिमोन भिबा म्हिदेन छ्याम चिबा मुला, थे सिमोनना दिम समुन्द्रला कुनीरी मुला।”

⁷ ओते पाङ्गाहेन्से स्वर्गदूत कर्नेलियस मुबाग्याम फेसी निजी। जमाहेन्से कर्नेलियससे ह्राडला नोकरगदे न्हडला नोकर न्हीदेन सदन ह्राडदा क्योड्बा ओच्छे परमेश्वरदा तेन्बा सिपाही गिकदा इयोड्जी।⁸ ओच्छे थेनीगदेदा चु जम्मान ताम पाड्सी योप्पा भिबा शहररी पुड्जी।

पत्रुससे म्राड्बा ताम

⁹ न्हडगरदड थेनीगदे निबान लबा धुडरी धिनना बाह्र बजेरीक्वार योप्पा शहरला डामरी धोखमा पत्रुस चा प्रार्थना लबारी दिमला कौसीरी निजी।
¹⁰ थे धुडरी पत्रुसदा फोखेन्जी, ओच्छे थेसे चबा स्हे चबारी म्हाड्जी। तर स्हान्दोगदेसे चबा स्हे स्होबान मुबा, थेनीन धुडरी थे एकोहोरो तजी।

¹¹ जमाहेन्से थेसे स्वर्ग ठोड्बा म्राड्जी ओच्छे कुनी ब्लिरीन खीबा तन्ना ह्रड्बा स्वर्ग्याम जम्बुलिडपट्टि मार खबान लबा म्राड्जी।¹² थे तन्नारी

† हिब्रू ग्योडरी “तबीता” ओच्छे ग्रीक ग्योडरी “डोरकास” भिबा मुला। चुला अर्थ चा “तडगी” हिन्ना।

जम्बुलिडला काड ब्लि मुबा ल्हानान थरीला जन्तुदेन सरी भ्रबा जन्तु ओच्छे चरागदे मुबा।¹³ जमाहेन्से पत्रुससे चुहड् भिबा काड थेःजी, “पत्रुस, ए रेःसी चुदा साड्सी चउ।”

¹⁴ तर पत्रुससे “आहिन प्रभु, डाइ चुहड्बा चबारी आतबा नड्बा स्हे † खाड्मै चबा आरे” भिसी भिजी।

¹⁵ दोःसीनोन पत्रुससे “परमेश्वरसे चोखो स्होसी जिन्बा स्हेदा एसे नड्बा स्हे थाम्हन्गो” भिबा काड थेःजी।¹⁶ सोमरेमधोना चुहड्बा काड थेःजी, ओच्छे थे तन्ना तुरुन्तन स्वर्गपट्टि भोर्जी।

¹⁷ ह्राडसे म्राड्बा तामला अर्थ तिग मुला तला भिसी पत्रुस अलमल तसी चिमुबा। थेनीन धुडरी कर्नेलियससे पुड्बा म्हिगदे सिमोनना दिम म्हाड्बान निमा दिम स्याप्सी म्रापरी राप्जी।¹⁸ ओच्छे घ्रेन काड लसी, “पत्रुस भिबा सिमोन चुरी धन्छ्यामुला?” भिसी इयोड्जी।

¹⁹ थे धुडरी पत्रुस ह्राडसे म्राड्बा तामला बारेरी म्हन्सी चिबा मुबा। थेनीन धुडरी परमेश्वरला आत्मासे पत्रुसदा चुहड् भिसी सुड्जी, “च्यागो, एदा म्हि सोमसे म्हाड्बान मुला।²⁰ थेतबासेलमा ए रेःसी धिरी निउ, ओच्छे शड्का आलना थेनीगदेदेन छ्याम निउ, तिगदा भिसम थेनीगदेदा डाडनोन पुड्खबा हिन्ना।”

²¹ जमाहेन्से पत्रुस थेनीगदे मुबा ग्लारी निसी, “च्यागो, एनीगदेसे म्हाड्बा म्हि डानोन हिन्ना। एनीगदे चुरी तिगदा खबा?” भिसी इयोड्मा,²² थेनीगदेसे पत्रुसदा “कर्नेलियस भिबा कप्तानसे डन्दा पुड्खबा हिन्ना। थे ज्यबा म्हिदेन परमेश्वरदा तेन्बा म्हि हिन्ना, ओच्छे यहूदीगदे जम्मासेन थेदा मान लमुला। थेला दिमरी ह्राडदा इयोड्सी ह्राडसे सुड्बा ताम इयान्गो भिसी परमेश्वरला स्वर्गदूतगदे गिकसे कुल्बा मुला” भिसी भिजी।

²³ थेतबासेलमा थेनीगदेदा न्हडरी इयोड्सी पत्रुससे थेनीगदेदा क्योड्जी।

पत्रुस कर्नेलियसला दिमरी निबा

न्हडगरदड पत्रुस थेनीगदेदेन छ्याम निजी, ओच्छे येशूदा विश्वास लबा योप्पा शहररी मुबा कोड कोड म्हिगदेएनोन थेदेन छ्याम निजी।
²⁴ रेनीदड थेनीगदे कैसरिया भिबा ग्लारी धोजी। कर्नेलियससे चा ह्राडला म्हिगदेदेन ह्राडदेन छ्याम ढिक्बा ह्योगदेदा इयोड्सी थेनीगदेला ग्याम च्यासी चिबा मुबा।²⁵ पत्रुस न्हडरी खमाहेन्से कर्नेलियस थेदेन छ्याम हुप तजी, ओच्छे थेदा फ्या लजी।²⁶ तर पत्रुससे थेदा थीसी, “रेःगो, डाएनोन म्हि जे हिन्ना” भिसी भिजी।

²⁷ ओच्छे थेदेन छ्याम ताम पाड्बान दिम न्हडरी वाड्जी, थेरी पत्रुससे ल्हानान म्हिगदे हुप तसी चिबा म्राड्जी।²⁸ पत्रुससे थेनीगदेदा चुहड् भिसी भिजी, “डनी यहूदीगदेला ठिमसे अर्गु खुलला म्हिगदेदेन छ्याम हुप तबारी आपिन्मुला † भिबा ताम ह्राडनीदा थानोन मुला, तर परमेश्वरसे डादा खजिबै म्हिदा नड्बादेन गे आखेल्बा थाम्हन्गो भिसी उन्बा मुला।²⁹ थेतबासेलमा ह्राडनीसे ड्योड्मैछ्याम तिगै आम्हन्ना डा ह्राडनी मुबा ग्लारी खबा हिन्ना। ह्राडनीसे डादा चुरी तिगदा इयोड्बा हिन्ना डादा सुङ्गो।”

³⁰ जमाहेन्से कर्नेलियससे चुहड् भिसी भिजी, “ब्लिरे डाच्छा ओस्पन चुनोन धुडरी डा दिमरी तीन बजेला प्रार्थना लबान मुबा थे धुडरी खाल खाल्बा क्वान क्वान्बा म्हि गिक डाला डाच्छापट्टि राप्जी।³¹ ओच्छे थे म्हिसे चुहड् भिसी भिजी, “कर्नेलियस, एसे लबा प्रार्थना परमेश्वरसे थेःबा मुला, थेहड् लसीन प्राडबोगदेदा दया लसी चबा थुड्बा पिन्बा गे परमेश्वरसे ढन्बा मुला।³² थेतबासेलमा एसे योप्पा शहररी म्हि पुड्सी पत्रुस भिबा सिमोनदा इयोड्गो। थे समुन्द्रला कुनीरी ढिला गे लबा सिमोनना दिमरी चिमुला।”

³³ थेतबासेलमा डाइ तुरुन्तन ह्राड मुबा ग्लारी म्हि पुड्खबा हिन्ना, दान्दे ह्राड डन्ना लागिरी ल्हानान दुख लसी चुरी फेख्खजी। दाहेन्से प्रभुसे ह्राडदा कुल्बा जम्मान ताम ह्राडग्याम इयान्बारी डनी जम्मान परमेश्वरला डाच्छापट्टि हुप तबा मुला।”

†† परमेश्वरसे मोशादा पिन्बा ठिम अन्धार कोड कोड जन्तुगदेला स्या चबारी आतमुबा।

‡ यहूदीगदेसे चा अर्गु खुलला म्हिगदेदा परमेश्वरला डाच्छा नड्बादेन तिगै गे आखेल्बा म्हि भिसी म्हन्मुबा।

पत्रुससे थार्षा पिन्बा समाचार थे:ना लबा

34 जमाहेन्से पत्रुससे चुहड् भिसी पाड्बारी छ्याइजी, “चु ताम सत्य हिन्ना, परमेश्वरसे खालैला ली आच्याना जम्मानान गिकनोन व्यवहार लमुला भिबा ताम डाइ म्राड्बा मुला। 35 तर खुल खुलला म्हिगदे न्हडला जुन म्हिसे परमेश्वरदा मान लसी थेसे म्हन्बा अन्धारला गे लला थे म्हि परमेश्वरदा सेम निबा म्हि तला। 36 ओच्छे येथू ख्रीष्टग्याम इस्राएलीगदेला गुडरी परमेश्वरसे पुइखबा शान्तिला समाचार हाडनीदा थानोन मुला। थेनोन येथू जम्मालान प्रभु हिन्ना। 37 यूहन्नासे बत्तिस्माला बारैरी थे:ना लमाहेन्से गालीलहेन्से यहूदियाला जम्मान ग्लारी तबा ताम हाडनीदा थानोन मुला। 38 खाहड् लसी परमेश्वरसे नासरतला येथूथोरी हाडला आत्मादेन शक्ति पुइखजी। जमाहेन्से थेसे ज्यबा गेदेन शैतानसे दुख पिन्बा जम्मान म्हिगदेदा खम्ना लबान भ्रजी, तिग्दा भिसम थेदेन छ्याम परमेश्वर मुबा।

39 “यहूदीगदेला खुल्सादेन यरूशलेमरी येथूसे लबा जम्मान गे डन्से म्राड्बा मुला। थेदा म्हिगदेसे कुसरी टाँगब लसी साइजी। 40 तर सोमरेमाकुनु परमेश्वरसे थेदा सोना लजी। थेतबासेलमा डन्से दो:सी येथूदा म्राड्म्याइजी। 41 थेदा जम्मान म्हिसे मी म्राड्आम्याइनी, तर थे सिबाग्याम सोमाहेन्से थेदेन छ्यामनोन चबा थुड्बा लसी भ्रबा म्हि डन्से जे म्राड्जी। चुनोन ताम उन्बाला लागिरी डाच्छान परमेश्वरसे डन्दा धम्बा हिन्ना। 42 ओच्छे थार्षा पिन्बा समाचार थे:ना लबारीदेन येथूदा सिबादेन सोबा म्हिगदेला निसाफ लबाला लागिरी परमेश्वरसे धम्बा हिन्ना भिसी पाङ्गो भिसी येथूसे डन्दा कुल्बा मुला। 43 ओच्छे येथूथोरी विश्वास लबागदे जम्मालान पाप येथूला मिनरी माफ याइला भिसी जम्मान अगमवक्तागदेसेनोन पाड्बा मुला।”

44 पत्रुससे चु ताम पाड्ना पाड्ना पत्रुसला ताम थे:बा जम्मान म्हिथोरी परमेश्वरला आत्मा फेपखजी। 45 अर्गु खुलला म्हिगदेथोरीएनोन परमेश्वरला आत्मा फेपखबा म्राड्सी पत्रुसदेन छ्याम खबा यहूदी विश्वासीगदे उदेक तजी। 46 तिग्दा भिसम थेनीगदेसे आसेबा ग्योड पाड्सी परमेश्वरला जयजयकार लबान लबा यहूदी विश्वासीगदेसे थे:जी।

जमाहेन्से पत्रुससे चुहड् भिसी पाड्जी, 47 “म्हाडसे हड्जोनोन परमेश्वरला आत्मा याड्बा चु म्हिगदेदा दाहेन्से क्युइला बत्तिस्मा किन्बारी खाल्से रोकब लबा?” 48 थेतबासेलमा पत्रुससे थेनीगदेदा येथू ख्रीष्टला मिनरी बत्तिस्मा किन्गो भिसी कुल्जी। जमाहेन्से थेनीगदेसे पत्रुसदा तिगै थिन डन्देन छ्याम स्हूगो भिसी भिजी।

खतना लबा यहूदीगदेदा पत्रुससे घोना लबा

11 यहूदियारी मुबा मुल चेलादेन स्हान्दो आलेगदेसे अर्गु खुलला म्हिगदेसेनोन परमेश्वरला बचनरी विश्वास लजी भिबा ताम थे:जी।

2 ओच्छे पत्रुस यरूशलेमरी धोखमाहेन्से खतना लनोन तो:ला भिबा यहूदी विश्वासीगदेसे पत्रुसदा चुहड् भिसी बिरोध लजी, 3 “खतना आलबा म्हिगदेला दिमरी निसी थेनीगदेदेन छ्याम हाडसे तिग्दा चबा थुड्बा लबा?”

4 जमाहेन्से पत्रुससे थेनीगदेदा मेलोसेन घोना लबारी छ्याइजी। 5 “च्यागो, डा योप्पा भिबा शहररी प्रार्थना लमा सेम गिक तसी एकोहोरो तबा धुडरी कुनी ब्लिरी खीबा घेन तन्ना हड्बा गिक मुग्याम मार खबान लबा तिगै स्हे डाइ म्राड्जी, थे तन्ना हड्बा स्हे डा मुबा ग्लारी खजी। 6 थेरी डाइ ज्यना लसी च्यामा जम्बुलिडरी मुबा काड् ब्लि मुबा ल्हानान थरीला जन्तुगदेदेन सरी भ्रबा जन्तुगदे ओच्छे चरागदेदा म्राड्जी। 7 जमाहेन्से ‘पत्रुस रे:गो, एसे चुगदे साइसी चउ’ भिबा काइ डाइ थे:जी।

8 “तर डाइ ‘आहिन प्रभु, चुहड्बा चबारी आतबा नड्बा स्हेगदे डाइ खाइमै चबा आरे’ भिसी भिमा, 9 “दो:सीनोन स्वर्ग्याम परमेश्वरसे चोखो स्होसी जिन्बा स्हेदा एसे नड्बा स्हे भिसी थापाङ्गो भिबा काइ डाइ थे:जी। 10 सोमरेमधोना चुहड्जोनोन तजी, जमाहेन्से थे जम्मान स्हे दो:सी स्वर्गरीन भोर्जी।

11 “थेनोन धुडरी कैसरिया भिबा ग्ल्याग्याम डा मुबा ग्लारी पुइखबा म्हि सोम डा चिबा दिमरी धोखजी। 12 परमेश्वरला आत्मासे डादा थेनीगदेदेन

† 10:34 व्यव १०:१७

छ्याम शड्का आलना निउ भिसी सुड्जी। ओच्छे चु ज्योज्यो आले दुएनोन डादेन छ्याम निमुबा, जमाहेन्से डनी थे म्हिला दिम न्हडरी वाड्जी।

13 थेसे डन्दा चुहड् भिसी पाड्जी, स्वर्गदूत गिक थेला दिमरी राप्सी चुहड् भिसी पाड्बान लबा म्राड्जी, ‘एसे योप्पा भिबा शहररी म्हि पुइसी सिमोन भिबा पत्रुसदा इयोइसी भउ। 14 थेसे एदा जुन ताम पाड्ला थे तामग्याम एदेन एला दिमला जम्मान म्हिगदेसे थार्षा याइला।’

15 “डाइ पाड्बारी छ्याइमाहेन्से, डाच्छा म्हाड्थोरी परमेश्वरला आत्मा फेपखबा हड् लसी थेनीगदेथोरीनोन परमेश्वरला आत्मा फेपखजी।

16 जमाहेन्से ‘यूहन्नासे एनीगदेदा क्युइग्याम बत्तिस्मा पिन्जी, तर दाहेन्से परमेश्वरला आत्माग्याम एनीगदेला बत्तिस्मा तला’ भिसी प्रभुसे सुड्बा ताम डाइ ढन्जी। 17 प्रभु येथू ख्रीष्टदा विश्वास लमाहेन्से परमेश्वरसे म्हाड्दा मोलम पिन्जी, थेनोन मोलम परमेश्वरसे थेनीगदेदाएनोन पिन्जी भिसम परमेश्वरदा रोकब लबा डा खाल हिन्ना?”

18 चु ताम थे:माहेन्से थेनीगदेसे बिरोध लबा खलाजी, जमाहेन्से थेनीगदेसे परमेश्वरदा जयजयकार लजी, ओच्छे “दाहेन्से परमेश्वरसे अर्गु खुलला म्हिगदेदाएनोन हाड हाडला पाप खलासी परमेश्वरपट्टि दो:सी सोबा मौका पिन्बा मुला” भिसी भिजी।

एन्टिओखिया भिबा शहरला मण्डली

19 स्तिफनसला बारैरी खबा दुखसे लमा ससा बड्बड तबागदेसे स्हान्दोगदेदा आहिन, तर यहूदीगदेदा जे थार्षा पिन्बा समाचार थे:ना लबान, फोनिके भिबा ग्लादेन साइप्रस भिबा ग्ला ओच्छे एन्टिओखिया भिबा शहरधोना निजी। 20 तर थेनीगदे न्हडला कोइ कोइ चेलागदे साइप्रसदेन कुरेनी भिबा ग्लाला मुबा। थेनीगदे एन्टिओखिया भिबा शहररी खसी अर्गु खुलला म्हिगदेदाएनोन प्रभु येथूला बारैरी थार्षा पिन्बा समाचार थे:ना लजी। 21 थेनीगदेदेन छ्याम प्रभुला शक्ति मुबासे लमा ल्हानान म्हिगदेसे विश्वास लसी प्रभुला चेला दोजी।

22 चु ताम यरूशलेमरी मुबा मण्डलीसे थे:जी, जमाहेन्से थेनीगदेसे एन्टिओखिया भिबा शहररी बारनाबासदा पुइजी। 23 बारनाबास थेरी खसी परमेश्वरसे दयामाया लबादेन मोलम पिन्बा म्राड्सी ल्हानान ताड्जी। ओच्छे थेसे थेनीगदे जम्मानान सदन सेमहेन्से प्रभुदा विश्वास लसी चिउ भिसी आँट पिन्जी। 24 बारनाबास परमेश्वरला आत्मासे प्लिड्बादेन विश्वासरी कोड्बा ज्यबा म्हि मुबा। थेतबासेलमा ल्हानान म्हिगदेसे प्रभुदा विश्वास लजी।

25 जमाहेन्से बारनाबास शाऊलदा म्हाइबारी टार्सस भिबा शहररी निजी। 26 थेसे शाऊलदा स्याप्पाहेन्से एन्टिओखिया भिबा शहररी भजी। जमाहेन्से थेनीगदेसे तिदिड्धोना मण्डलीला म्हिगदेदेन छ्याम स्याप्बान ल्हानान म्हिगदेदा परमेश्वरला बचन लोप्यारी छ्याइजी। चेलागदेदा जम्मान भन्दा डाच्छा एन्टिओखिया भिबा शहररीन ख्रीष्टियान भिसी भिजी।

27 थे धुडरी कोइ कोइ अगमवक्तागदे यरूशलेमग्याम एन्टिओखिया भिबा शहररी खजी। 28 थे अगमवक्तागदे न्हडला अगाबस भिबा अगमवक्ता रे:जी, ओच्छे परमेश्वरला आत्मासे थेदा चु जम्बुलिड नाड्जोनोन घेन अनिकाल तबारी छ्याइबा मुला भिसी पाड्पुड्जी। चु ताम लिच्छा क्लौडियस भिबा ग्लेला पालोरी पूरा तजी। 29 जमाहेन्से जम्मान चेलागदेसे हाड हाडसे खम्नेधोना भेटी हुप्सी यहूदिया भिबा ग्लारी चिबा विश्वासीगदेदा पिन्बारी पक्का लजी। 30 चुहड् लसी बारनाबासदेन शाऊलसे भेटी हुप्सी मण्डलीदा च्याबा म्हिगदे मुबा ग्लारी पुइजी।

पत्रुसदा इयाल्खानरी थान्बा

12 थे धुडरी हेरोद अग्रिपा # भिबा ग्लेसे मण्डलीला कोइ कोइ म्हिगदेदा चुड्सी ल्हानान दुख पिन्बारी छ्याइजी। 2 थे ग्लेसे यूहन्नाला ज्योज्यो याकूबदा तरवारसे थासी साइपुड्जी। 3 चुहड् लमा यहूदीगदे ताड्बा म्राड्सी हेरोद ग्लेसे पत्रुसदाएनोन चुड्पुड्जी। हेरोद ग्लेसे

†† 11:16 मुल १:५ † 11:19 मुल ८:१-४ †† 11:28 मुल २१:१० †† चु हेरोद अग्रिपा घेन हेरोदला छाया हिन्ना। येथू न्हबा धुडरी चा घेन हेरोद ग्ले मुबा (मत्ती २:१-१८, लूका १:५)।

चुहड़ लबा खमीर आयुना गेड चसी धड्बा चाडला † धुइरी मुबा। 4 हेरोद ग्लेसे पत्रुसदा चुइसी इयाल्खानरी झाड्माहेन्से सिपाहीगदेला समूह ब्लि स्होसी खुइपुइजी। ओच्छे मिश्र खुल्साग्याम फेसी खबा धिनदा ढन्सी धड्बा चाड जिन्माहेन्से थेदा म्हिगदेला डाच्छापट्टि भसी इयोइबा छार्बा लबा सेम लजी। ††

5 थेतबासेलमा पत्रुसदा इयाल्खानरी झाइजी, तर मण्डलीसे पत्रुसला लागिरी परमेश्वरदेन छ्याम झन प्रार्थना लबाला लबान लजी।

पत्रुस इयाल्खानग्याम थोन्बा

6 हेरोद ग्लेसे पत्रुसदा म्हिगदेला डाच्छापट्टि भबारी छ्याइबा धिनना डाच्छाकुनुला म्हुनड, पत्रुस सिपाही न्हीला गुडरी म्हेसी चिबा मुबा, थेदा च्याल्दा न्हीसे खीसी थान्बा मुबा। ओच्छे स्थान्दो सिपाहीगदेसेनोन इयाल्खानना म्पारी खुइसी चिबा मुबा। 7 तिक्खुरीन प्रभुला दूत गिक पत्रुस मुबा ग्लारी खसी राप्जी, ओच्छे पत्रुसदा थान्बा कोठारी फ्हाल तजी। ओच्छे थे स्वर्गदूतसे पत्रुसला राइरी थुर्सी, “ए योना रे:गो” भिसी पत्रुसदा छिइजी। स्वर्गदूतसे थेहड् भिमैछ्याम पत्रुसला यारी खीबा च्याल्दा हड्न्नोन ब्लसी सरी ताइजी। 8 जमाहेन्से स्वर्गदूतसे थेदा “एसे क्वानदेन लखम क्वान्गो” भिसी भिमा थेसे थेहड्न्नोन लजी। दो:सीनोन स्वर्गदूतसे पत्रुसदा “ए घ नान्सी डाला लिच्छा लिच्छा खउ” भिसी भिजी। 9 स्वर्गदूतसे थेहड् भिमाहेन्से पत्रुस स्वर्गदूतला लिच्छा लिच्छा भ्रबारी छ्याइजी। स्वर्गदूतसे लबा चु गे सौँच्चिन हिन्ना भिसी पत्रुसदा थानोन आरेबा। तर पत्रुससे चु डाइ म्हाड म्प्राइबान मुला भिसी म्हन्जी। 10 जमाहेन्से इयाल्खानरी खुइसी चिबा सिपाहीला समूह न्हीदा वाइसी थेनीगदे शहरपट्टि निबा फाइला म्पारी धोजी, थेरी धोमैछ्याम थे म्प्राप हड्न्नोन ठोइजी, जमाहेन्से थेनीगदे थोन्सी गल्लीला ग्याम तसी निना निनान स्वर्गदूतसे पत्रुसदा ख्लासी निजी।

11 थे धुइरी चा तिग तजी भिबा ताम पत्रुससे था याइसी चुहड् भिजी, “प्रभुसे हाडला दूत पुइखसी हेरोद ग्लेला याग्यामदेन यहूदीगदेसे लबारी छ्याइबा गेग्याम फेबा ताम पक्का हिन्ना।”

12 चु ताम था याइहाहेन्से थे मर्कूस भिबा यूहन्नाला आमा मरियमला दिमरी निजी। थेरी ल्हानान म्हिगदे हुप तसी प्रार्थना लसी चिबा मुबा। 13 थेसे म्प्राप द्बक द्बक लमाहेन्से रोदा भिबा नोकरस्या म्प्राप ठोइबारी खजी। 14 थेसे पत्रुसला काइ डोसेसी ताइबासे लमा म्प्रापनोन आठोइना न्हडरी यार्बान निसी, “पत्रुस म्पारी राप्सी चिबा मुला” भिसी जम्मादान भिजी।

15 तर थेरी मुबागदेसे थेदा “ए म्प्योजीम” भिसी भिमा थेसे ढीपि लबान चु ताम पक्का हिन्ना भिसी भिजी। जमाहेन्से थेनीगदेसे “थे पत्रुसदा च्याबा स्वर्गदूत मुला तला” भिसी भिजी।

16 तर पत्रुससे चा म्प्राप द्बक द्बक लबाला लबान लजी। जमाहेन्से म्प्राप ठोइमा पत्रुसदा म्प्राइसी थेनीगदे उदेक तजी। 17 तर पत्रुससे थेनीगदेदा “कुटिसी चिउ” भिसी यासे चाल लजी, ओच्छे प्रभुसे हाडदा खाहड् लसी इयाल्खानग्याम मडग्यार ते:जी भिबा ताम थेनीगदेदा पाइजी। ओच्छे चु ताम याकूबदेन विश्वास लबा स्थान्दो ज्योज्यो आले नाना आडागदेदाएनोन पाइसी पिन्गो भिसी पत्रुस थेनीगदे मुबा ग्ल्याम अर्गु ग्लारी निजी।

18 स्हो तमाहेन्से पत्रुस खानड निजी भिसी सिपाहीगदे न्हडरी ल्हानान हल्ली खल्ली तजी। 19 हेरोदसे पत्रुसदा म्हाइगो भिसी कुल्जी। तर थेनीगदेसे पत्रुसदा खानडएनोन आस्यापनी। थेतबासेलमा सिपाहीगदेदा इयोइबा छार्बा लजी, तसेनोन तिगै जोहाब आपिन्माहेन्से थेनीगदेदा साइगो भिसी कुल्जी। जमाहेन्से हेरोद चा यहूदियाग्याम कैसरिया भिबा ग्लारी निसी थेरीन चिजी।

हेरोद सिबा

20 टुरोसदेन सीदोन खुल्साला म्हिगदेदेन छ्याम हेरोद ल्हानान बोमो खबा मुबा। थेतबासेलमा थेनीगदे ढिक्सी हेरोद मुबा ग्लारी खजी, ओच्छे ग्लेला गे लबा बलस्तस भिबा म्हिदा हो स्होसी ग्लेदेन छ्याम ढिक्बाला लागिरी

† “खमीर आयुना गेड चसी धड्बा चाड” भिबादेन मिश्र खुल्साग्याम फेसी खबा धिनदा ढन्सी धड्बा चाड भिबा गिकनोन हिन्ना। †† 12:4 प्रस्था १२:१-२०

सल्लाह लजी। तिग्दा भिसम थेनीगदेला चबा स्हे हेरोद ग्लेला खुल्साग्याम खतो:बा मुबा।

21 तोगब लबा धिनकुनु ग्लेसे जे क्वान्बा क्वान क्वान्सी हेरोद ग्ले निसाफ लबा ठिरी चिसी म्हिगदेला डाच्छा भाषण लजी। 22 जमाहेन्से म्हिगदेसे “चु काइ मी लला काइ हिन्ना, म्हिला आहिन!” भिसी क्रिइजी। 23 तर परमेश्वरला मानदेन जयजयकार आलबासे लमा थेनोन धुइरी स्वर्गदूत गिकसे हेरोद ग्लेदा आखम्बा तना लजी, जमाहेन्से स्याउँ स्याउँ च्योलोड तसी थे सिजी।

24 तर परमेश्वरला बचन जुन जुन ग्लारी थे:जी थेरी ल्हानान विश्वासीगदे बढब तबान निजी। 25 ओच्छे बारनाबासदेन शाऊल हाडला गे जिन्ना लसी यरूशलेमग्याम दो:जी। थेनीगदेदेन छ्याम मर्कूस भिबा यूहन्नाएनोन मुबा।

बारनाबासदेन शाऊलदा धम्बा

13 एन्टिओखियाला मण्डलीरी मुबा अगमवक्तागदेदेन लोप्बा म्हिगदे चुनोन हिन्ना। बारनाबास, म्लाडगै भिबा शिमियोन, कुरेनी भिबा लुकियस, शासन लबा हेरोददेन छ्याम † छर्बा मनेन ओच्छे शाऊल, 2 थेनीगदे फोइथान चिसी प्रार्थना लबान प्रभुदा तेन्बा धुइरी परमेश्वरला आत्मासे “बारनाबासदेन शाऊलदा डाला लागिरी फेसी थान्गो, डाइ थेन्नीदा डाला गे लबाला लागिरी धम्बा मुला” भिसी सुइजी। 3 जमाहेन्से थेनीगदे फोइथान चिसी थेन्नीथोरी हाड हाडला या थान्सी प्रार्थना लसी थेन्नीदा प्रभुला गे लबारी पुइजी।

पावल थार्बा पिन्बा समाचार थे:ना लबारी डाच्छारेम निबा

समुन्द्रला गुडरी मुबा साइप्रस भिबा ग्लारी

4 परमेश्वरला आत्मासे बारनाबासदेन शाऊलदा पुइजी, ओच्छे थेन्नी सिलुकिया भिबा ग्लारी निजी। थे ग्ल्याम पानी जहाजरी क्रै:सी साइप्रसपट्टि निजी। 5 ओच्छे सलामिस भिबा ग्लारी धोखमाहेन्से थेन्नीसे यहूदीगदे हुप तबा दिमरी परमेश्वरला बचन थे:ना लजी। थेन्नीदा हो लबारी मर्कूस भिबा यूहन्नाएनोन थेन्नीदेन छ्यामनोन मुबा। †

6 जमाहेन्से थेनीगदे साइप्रस भिबा अञ्चलला † शहर शहररी कोर्बान पाफोस भिबा ग्लाधोना धोखजी, थेरी थेनीगदेसे बार-येथू भिबा जादु लबा फट्टा यहूदी अगमवक्ता गिकदा स्याप्पी। 7 थे जादु लबा म्हि साइप्रस भिबा अञ्चलरी शासन लबा सर्गियस पौलुस भिबा म्हिला हो मुबा। थे सर्गियस पौलुस बुद्धि मुबा म्हि मुबा। थेसे परमेश्वरला बचन इयान्बा सेम लबासे लमा शाऊलदेन बारनाबासदा इयोइजी। 8 तर जादु लबा एलुमाससे सर्गियस पौलुससे थेनीगदेला ताम विश्वास थालगै भिसी शाऊलदेन बारनाबासला बिरोध लजी। एलुमास भिबा चा ग्रीक ग्योइरी जादु लबा म्हि भिबा हिन्ना। 9 तर शाऊल, थेदा पावलएनोन भिमुबा, परमेश्वरला आत्मासे प्लिइसी थे एलुमासदा एकोहोरो च्याबाला च्याबान लसी चुहड् भिसी भिजी, 10 “ए जम्मान ज्यबा गेला शत्रु, ओच्छे पापी सेमदेन नइबा सेमसे प्लिइबा शैतानना कोला, तिग एसे प्रभुग्याम लोप्बा सत्य तामगदेदा न्होइना लबारी आख्ला?

11 च्यागो, दाहेन्से प्रभुसे एदा सजाय पिन्सी जिन्बा मुला, थेतबासेलमा छिन्नडधोना ए काना तसी धिनीला य्हालएनोन आम्राइ” भिसी भिजी। थेहड् भिमैछ्याम खसु हड्बा खसी थेला मी घप्पी, ओच्छे धोपधोप तसी थेसे तिगै आम्राइनी।

जमाहेन्से खालैसे यारी चुइसी डोन्चाब लला वा भिसी थे क्यारमार भ्रबारी छ्याइजी। 12 चुहड् तबा म्प्राइसी थे ग्लारी शासन लबा म्हिसे प्रभुदा विश्वास लजी। तिग्दा भिसम प्रभुला बचनग्याम लोप्बा तामरी थे उदेक तबा मुबा।

‡ चु हेरोद चा हेरोद अन्तिपास हिन्ना। †† 13:5 मुल १२:१२, २५ †† “साइप्रस” भिबा अञ्चल चा समुन्द्रला गुडरी मुबा ग्ल्या हिन्ना। बाइबलला ग्यापपट्टि मुबा नक्सारी स्हीगो।

पावलसे एन्टिओखिया भिबा शहररी थार्बा पिन्बा समाचार थे:ना लबा

13 पावलदेन थेला ह्योगदे पाफोसग्याम पानी जहाजरी क्रे:सी पामफिलिया भिबा ग्लारी परब तबा पर्गा भिबा ग्लारी धोजी, ओच्छे मर्कूस भिबा यूहन्ना चा थेनीगदेग्याम फेसी यरूशलेमरी धोजी। 14 तर थेनीगदे चा पर्गा भिबा ग्लायाम पिसिदिया भिबा अञ्चलरी परब तबा एन्टिओखिया शहररी खजी, ओच्छे ब्लाबा न्हबा धिनकुनु यहूदीगदे हुप तबा दिम न्हडरी निसी चिजी। 15 ओच्छे यहूदीगदे हुप तबा दिमला नेतागदेसे मोशाला ठिमदेन अगमवक्तागदेसे भिबा किताब पढब लमाहेन्से थेनीगदेदा "आलेगदे, हाडनीदेन छ्याम म्हेगदेदा अर्ती पिन्बा खाल्ला तिगै बचन मुसम सुङ्गे" भिसी भिजी।

16 जमाहेन्से पावल राप्सी यासे चाल लबान चुहङ्ग भिबारी छ्याइजी, "इसाएलला डाला ज्योज्यो आलेदेन परमेश्वरदा तेन्बा अर्गु यहुलला म्हेगदे डाला ताम इयान्गो। 17 व्हाडला आखे म्हेमेगदे मिश्र यहुल्सारी चिबा धुडरी इसाएल यहुलला परमेश्वरसे थेनीगदेदा धम्सी घेन म्हे स्होजी। जमाहेन्से परमेश्वरसे हाडला शक्तिशाली छ्यासे थेनीगदेदा थे यहुल्साग्याम ते:सी भजी। 18 ओच्छे तोडतोडबा ग्लारी थेनीगदेसे लबा आज्यबा बानीबेहोर नाबान ओस्पन बोगल न्ही दिडधोना परमेश्वरसे थेनीगदेदा ह्यो लजी। 19 जमाहेन्से परमेश्वरसे कनान यहुल्साला गोर निस यहुलला म्हेगदेदा नाश लजी। ओच्छे थे यहुल्सा परमेश्वरसे थेनीगदेला अधिकाररी पिन्जी। 20 चु जम्मान ताम ओस्पन ग्यार्जा बल्लिसे बोगल न्हीसे च्युइ दिडधोना तजी।

"जमाहेन्से शमूएल अगमवक्ताला पालोधोना परमेश्वरसे न्यायाधीश पिन्जी। 21 जमाहेन्से म्हेगदेसे ग्ले ह्रीजी, थेतबासेलमा परमेश्वरसे बेन्यामीनना वंशला कीश भिबा म्हेला झा शाऊलदा बोगल न्ही दिडधोना शासन लपुङ्गी। 22 ओच्छे परमेश्वरसे शाऊलदा ते:माहेन्से दाऊददा थेनीगदेला ग्ले स्होजी। ओच्छे परमेश्वरसे दाऊदला बारेरी 'डाइ यिशै भिबा म्हेला झा दाऊददा डाला सेमसे म्हेन्बा ह्वाडबान म्हे स्याप्जी, थेसे डाइ म्हेन्बा जम्मान गे लला' भिसी सुङ्गी। 23

"परमेश्वरसे कबुल लबा अन्धार चुनोन म्हेला सन्तानग्याम इसाएलीगदेदा थार्बा पिन्बाला लागिरी येशूदा भजी। 24 येशू फेप्खबा भन्दा डाच्छा यूहन्नासे इसाएलला जम्मान म्हेगदेदा हाड हाडला पाप खलासी परमेश्वरपट्टि दो:सी बप्टिस्मा किन्गो भिसी थे:ना लजी। 25 यूहन्नासे हाडला गे जिन्ना लबारी छ्याइमा 'एनीगदेसे डा खाल भिसी म्हेन्बा मुला? डा थे आहिन। तर च्यागो, थे डा भन्दा लिच्छा फेप्खला, डा थेला लखम स्युबाधोनाला आरे' भिसी भिमुबा। 26

"अब्राहामला सन्तान, डाला ज्योज्यो आलेदेन परमेश्वरसे कुल्बा ताम इयान्बा अर्गु यहुलला आलेगदे चु थार्बा याड्बा समाचार व्हाडला लागिरी पुडखबा मुला। 27 तर यरूशलेमरी चिबा म्हेगदेदेन हाडला नेतागदेसे थेदा डोआसेनी, ओच्छे ब्लाबा न्हबा धिनकुनु पढब लबा अगमवक्तागदेसे भिबा बचन आघोना थेदा सिबाला सजाय पिन्सी थे बचन पूरा लजी। 28 सिबाला सजाय पिन्तो:बा तिगै ताम आस्याप्सैनोन थेनीगदेसे थेदा साइनोन तो:ला भिसी पिलातसदा भिजी। 29 ओच्छे थेनीगदेसे थेला बारेरी बचनरी भिबा अन्धार जम्मान ताम लसी जिन्माहेन्से थेनीगदेसे थेदा कुसग्याम मार ते:सी धुर्सारी थान्जी। 30 तर परमेश्वरसे थेदा सिबाग्याम सोना लजी। 31 ओच्छे गालीलग्याम यरूशलेमधोना हाडदेन छ्याम खबा म्हेगदेसे थेदा ल्हानान धिनधोना म्हाङ्गी, दान्दे म्हेगदेला लागिरी थेनीगदे थेला साक्षी हिन्ना।

32 "परमेश्वरसे व्हाडला आखे म्हेमेदेन छ्याम लबा थे कबुलला समाचार डन्से हाडनीदा पाङ्गला। 33 परमेश्वरसे येशूदा सिबाग्याम सोना लसी थेनीगदेला कोलागदे व्हाडला लागिरी थे ताम पूरा लसी पिन्जी, थेला बारेरी दाऊद ग्लेसे भिबा न्हीरेमला व्हाडरी चुहङ्ग भिसी भिबा मुला

† 13:17 प्रस्था १:७; १२:५१ †† 13:18 गन्ती १४:३४; व्यव १:३१ † 13:19 व्यव ७:१; यहो १४:१ †† 13:20 न्याय २:१६; १ शमू ३:२० †† 13:21 १ शमू ८:५; १०:२१ ††† 13:22 १ शमू १३:१४; १६:१२; भजन ८९:२० ††† 13:24 मर्कू १:४; लूका ३:३ † 13:25 मत्ती ३:११; मर्कू १:७; लूका ३:१६; यूह १:२०, २७ †† 13:28 मत्ती २७:२२-२३; मर्कू १५:१३-१४; लूका २३:२१-२३; यूह १९:१५ ††† 13:29 मत्ती २७:५७-६१; मर्कू १५:४२-४७; लूका २३:५०-५६; यूह १९:३८-४२

'ए डाला झा हिन्ना, तिनी डा एला आबा दोजी।' †

34 परमेश्वरसे येशूदा खाइमै नइना आलना सिबाग्याम सोना लबाला बारेरी चुहङ्ग भिसी सुङ्गला मुला, 'डाइ दाऊददा पिन्ना भिसी

लबा कबुल चोखोदेन सत्य मोलम एनीगदेदा पिन्ना।' ††

35 ओच्छे अर्गु व्हाडरीनोन चुहङ्ग भिबा मुला, 'परमेश्वरसे हाडदा जे तेन्बा म्हेला ल्हुइ धुर्सारी नइआपुङ्ग।' †

36 तर चु ताम दाऊदसे हाडला बारेरी पाङ्गला आहिन। तिगदा भिसम दाऊदसे हाड सोतेधोना परमेश्वरसे म्हेन्बा ह्वाडबान गे लसी सिजी। ओच्छे थेदा थेला आखे म्हेमे ल्हुबा ग्लारीन ल्हुजी, ओच्छे थेला ल्हुइ नइसी निजी। 37 तर परमेश्वरसे सिबाग्याम सोना लबा येशूला ल्हुइ चा आनइनी।

38 "थेतबासेलमा ज्योज्यो आलेगदे चु येथूग्यामसेन व्हाडला पाप माफ तला भिसी डाइ पाङ्गला चु ताम हाडनीदा था तगै। 39 मोशाला ठिमग्याम हाडनी परमेश्वरदा सेम निबा म्हे दोबारी आखम्नी। तर येशूदा विश्वास लबागदे जम्मान परमेश्वरदा सेम निबा म्हे दोबा मुला। 40 थेतबासेलमा होशियार लसी स्हूगो, आहिन्सम अगमवक्तागदेसे पाङ्गला चु ताम हाडनीथोरी खला। 41 अगमवक्तागदेसे चुहङ्ग भिसी पाङ्गला मुबा, 'परमेश्वरसे सुङ्गला तामदा हेला लबागदे, उदेक तसी सिउ!

एनीगदेला धुडरी डाइ गे गिक लला, थे गेला बारेरी खालैसे पाङ्गसी पिन्सैनोन एनीगदेसे खाइमै विश्वास आल।" ††

42 पावलदेन बारनाबास यहूदीगदे हुप तबा दिमग्याम थोन्सी निबारी छ्याइमुबा, जमा म्हेगदेसे खबा साताला ब्लाबा न्हबा धिनकुनुएनोन डन्दा चु ताम लोप्सी पिन्गो भिसी थेनीगदेदा पाङ्गबाला पाङ्गबान लजी।

43 यहूदीगदे हुप तबा दिमग्याम थोन्माहेन्से ल्हानान यहूदीगदेदेन यहूदी धर्म तेन्बा अर्गु यहुलला म्हेगदे पावलदेन बारनाबासला लिच्छा भ्रबारी छ्याइजी, जमाहेन्से पावलदेन बारनाबाससे थेनीगदेदा एनीगदे सदन परमेश्वरला दयामायारी चिउ भिसी भिजी।

44 ब्लाबा न्हबा अर्गु धिनकुनुएनोन शहरला जम्मान ह्वाडबा म्हेगदे परमेश्वरला बचन इयान्बारी पोप तजी। 45 चुदे ल्हाना म्हेला हुल म्हाङ्गी कोइ कोइ यहूदीगदेदा ल्हानान डाह तजी, ओच्छे पावलसे पाङ्गला तामदा बिरोध लसी थेनीगदेसे पावलला बेइज्जत लजी।

46 तर पावलदेन बारनाबास दुक्क तसी थेनीगदेदा चुहङ्ग भिसी भिजी, "जम्मान भन्दा डाच्छा परमेश्वरला बचन एनीगदे यहूदीगदेदेन थे:ना लतो:बा मुबा। तसैनोन चुदा एनीगदेसे इयान्बारीन आम्हाइनी। चुहङ्ग लसी एनीगदेसे हाडसे हाडदा जुकजुकधोनाला जुनी याड्बाधोनाला म्हे हिन्ना भिसी आम्हन्बासे लमा दाहेन्से डनी अर्गु यहुलला म्हेगदे मुबा ग्लारी निसी परमेश्वरला बचन थे:ना लला। 47 तिगदा भिसम प्रभुसे डन्दा चुहङ्ग भिसी कुल्बा मुला,

'जम्बुलिडला कनाकुनीधोना थार्बा याड्बा समाचार धोना लबारी ओच्छे अर्गु यहुलला म्हेगदेला गुडरी म्हाल दोबारी डाइ एनीगदेदा धम्बा मुला।" †††

48 चु ताम थे:माहेन्से अर्गु यहुलला म्हेगदे ताङ्गी परमेश्वरला बचनला जयजयकार लजी, ओच्छे जुकजुकधोनाला जुनी याड्बारी धम्बागदेसे परमेश्वरला बचनरी विश्वास लजी।

49 जमाहेन्से विश्वासीगदेसे जम्मान ग्लारी प्रभुला बचन थे:ना लजी। 50 तर पावलदेन बारनाबासला बिरोध लसी यहूदीगदेसे म्हेगदेग्याम मान याड्बा परमेश्वरसे कुल्बा ताम इयान्बा म्हेगदेगदेदेन शहरला मुल म्हेगदेदा थीसी, पावलदेन बारनाबासदा हाडला ग्लायाम ते:जी। 51 थेतबासेलमा पावलदेन बारनाबाससे चा थेनीगदेला बिरोधरी हाडला काडला धुलु खर्सी

‡ 13:33 भजन २:७ ‡† 13:34 यशै ५५:३ ‡ 13:35 भजन १६:१० ‡† 13:41 हब १:५ ‡†† 13:47 यशै ४२:६; ४९:६

आइकोनियन भिबा ग्लारी निजी।^{†52} तर एन्टिओखियारी मुबा चेलागदे चा परमेश्वरला आत्मासे प्लिड्सी ल्हानान ताड्जी।

पावलदेन बारनाबास आइकोनियन भिबा शहररी

14 थेहड् लसीन बारनाबासदेन पावल आइकोनियन भिबा शहररीनोन यहूदीगदे हुप तबा दिमरी निजी। ओच्छे थेनीगदेसे यहूदीगदे हुप तबा दिम न्हडरी ज्यना लसी घोना लबासे लमा थेरी मुबा ल्हानान यहूदीगदेदेन अर्गु यहूलला म्हिगदेसे प्रभु येशू ख्रीष्टदा विश्वास लजी।² तर विश्वास आलबा यहूदीगदेसे चा अर्गु यहूलला म्हिगदेदा थीसी प्रभुरी विश्वास लबा ज्योज्यो आलेगदेला बिरोध लबारी छयाइजी।³ तसैनोन पावलदेन बारनाबास ल्हानान धिनधोना थेरीन चिजी। थेनीसे प्रभुथेरी विश्वास थान्सी आलोड्जान ताम लजी। थेनीगदेग्याम प्रभुसे उदेकला चिनुगदेदेन गेगदे लसी ह्राडला दयामायाला बचन सत्य हिन्ना भिसी उन्जी।⁴ तर थे शहरला म्हिगदे फेसी कोड यहूदीगदेदेन छयाम कोड येशूला मुल चेलागदेदेन छयाम ढिक्बारी छयाइजी।⁵ जमाहेन्से अर्गु यहूलला म्हिगदेदेन यहूदीगदे न्हीनोन नेतागदेदेन छयाम ढिक्सी थेनीगदेदा दुख पिन्बादेन युडबासे तोबारी म्हाइजी।⁶ पावलदेन बारनाबाससे चु था याड्सी लुकोनिया भिबा शहरला लुस्त्रादेन डर्बी शहररी ओच्छे थे शहरला क्यारमारला जिल्ला तबान यासी निजी।⁷ थेरीनोन थेनीगदेसे थार्बा पिन्बा समाचार थे:ना लसीन चिजी।

पावलदेन बारनाबास लुस्त्रादेन डर्बी शहररी

⁸ लुस्त्रा भिबा शहररी काड चलब आतबा म्हि गिक मुबा। थे म्हि न्हमान कुज्या मुबा, थे खाइमै भ्रबा आरेमुबा।⁹ थे म्हिसे पावलसे पाड्मा ड्यान्बान मुबा। ओच्छे थे म्हिसे डाएनोन खम्ला भिसी विश्वास लबा ताम था याड्सी पावलसे थे म्हिदा एकोहोरो च्यासी,¹⁰ “ए काड जूसी डोड रे:गे” भिसी ग्रेन काडसे पाड्जी। थेहड् पाड्मैछयाम थे म्हि डोड रे:सी भ्रबारी छयाइजी।

¹¹ म्हिला हुलसे पावलसे लबा चु गे भ्राड्हाहेन्से लुकोनिया ग्योडरी क्रिड्बान, “लगदे म्हि दोसी य्हाड मुबा ग्लारी फेखजीम” भिसी भिजी।¹² जमाहेन्से थेनीगदेसे बारनाबासदा जिउस भिबा ल ओच्छे पावलदा हर्मस ल †† भिसी भिबारी छयाइजी, तिगदा भिसम पावल चा ताम पाड्बा मुल म्हि मुबा।¹³ थे जिउसला मन्दिर थे शहरला डामरीन मुबा। थेतबासेलमा थे मन्दिररी पूजा लबा म्हिसे बहरगदेदेन म्हेन्दोला लुड भसी शहरला म्नापरी खजी। जमाहेन्से मुल चेला बारनाबासदेन पावलला डाच्छापट्टि थे बाहरगदे बलि पिन्बारी ठीक लजी।

¹⁴ तर मुल चेलागदे बारनाबासदेन पावलसे चु ताम था याड्हाहेन्से थेनीगदेसे ह्राड ह्राडला क्वान ढेबान म्हिला हुल न्हडरी यासी निसी क्रिड्बान चुहड् भिबारी छयाइजी।¹⁵ “म्हिगदे! ह्राडनीसे तिगदा चुहड्बा गे लबा? डनीएनोन ह्राडनी ह्रड्बान दुख सुख नासी भ्रबा म्हिगदे हिन्ना, ओच्छे चुहड्बा नडबा गेगदे ख्लासी स्वर्गदेन जम्बुलिड ओच्छे समुन्द्रेन थेरी मुबा जम्मान स्हेगदे स्होबा छोन्बो परमेश्वरपट्टि दो:गै भिसी ह्राडनीदा सत्य ताम पाड्बारी डनी थार्बा पिन्बा समाचार भसी खबा हिन्ना।^{†16} दडबो धुडरी परमेश्वरसे जम्मान यहूलला म्हिगदेदा ह्राड ह्राडला ठिम अन्धार भ्रपुड्जी,¹⁷ तसैनोन परमेश्वरसे ह्राडला दयामायाला गे लबा आख्लाना स्वर्गयाम नाम ताड्ना लसी चबा स्हेगदे रोना लजी। ओच्छे ल्हानान चबा स्हेगदे पिन्सी म्हिगदेला सेम ताड्ना लजी। चुनोन गेगदेसे परमेश्वरला साक्षी पिन्बा मुला।”¹⁸ चुहड् भिसैनोन बलि थालउ भिसी थे म्हिगदेदा रोकब लबारी थेनीगदेदा गाहो तजी। तसैनोन म्हिला हुलदा बलि पिन्आपुड्नी।

¹⁹ जमाहेन्से एन्टिओखियादेन आइकोनियन भिबा शहरग्याम कोड कोड यहूदीगदे थेरी धोखजी। थेनीगदेसे म्हिगदेदा थीसी युडबासे तोपुड्जी। जमाहेन्से जम्मान म्हिगदेसे युडबासे तोजी, ओच्छे सिजी भिसी म्हन्सी थेनीगदेसे पावलदा डुड्बान शहरग्याम मडग्यार भोजी।²⁰ तर प्रभुला

चेलागदे खसी पावलला क्यारक्युर पोप तमा थे रे:सी शहर न्हडरी निजी। ओच्छे न्हडगरदड बारनाबासदेन छयामनोन थे डर्बी भिबा शहररी निजी।

सिरिया भिबा ग्लाला एन्टिओखिया शहररी दो:सी निबा

²¹ थेनीसे डर्बी भिबा शहररी थार्बा पिन्बा समाचार थे:ना लसी ल्हानान म्हिगदेदा येशूला चेला स्होजी। जमाहेन्से थेनी लुस्त्रादेन आइकोनियन ओच्छे एन्टिओखिया भिबा शहररी दो:सी निजी।²² थेनीसे थेरी मुबा चेलागदेदा ऑट पिन्बान सदन विश्वासरि चिउ भिसी भिजी। ओच्छे य्हाड सेमरी ल्हानान दुख नासी परमेश्वरला यहूलसारी वाड्तो:ला भिसी थेनीगदेदा भिजी।²³ जमाहेन्से बारनाबासदेन पावलसे जम्मान मण्डलीरी मण्डलीदा च्याबा म्हिगदे धम्सी थान्जी। ओच्छे फोड्थान चिसी प्रार्थना लसी थेनीगदेदा ह्राडसे विश्वास लबा प्रभुला छयारी जिम्मा पिन्जी।

²⁴ जमाहेन्से थेनीगदे पिसिदिया अज्चलग्याम पामफिलिया भिबा अज्चलरी खजी।²⁵ ओच्छे पर्गा भिबा शहररी परमेश्वरला बचन थे:ना लसी थेनीगदे अटालिया भिबा शहररी निजी।

²⁶ थेनीगदे अटालियाग्याम पानी जहाजरी क्रै:सी एन्टिओखियारी दो:सी निजी। थेनोन शहररी पावलदेन बारनाबासदा प्रभुदा विश्वास लबा ज्योज्यो आलेगदेसे परमेश्वरला दयामायारी जिम्मा पिन्सी परमेश्वरला बचन थे:ना लबारी पुड्बा मुबा। दान्दे चु गे पावलदेन बारनाबाससे पूरा लजी।²⁷ एन्टिओखियारी धोखमाहेन्से पावलदेन बारनाबाससे मण्डलीला जम्मान म्हिगदेदा ड्योइजी। ओच्छे परमेश्वर थेनीदेन छयाम तसी लबा गेदेन अर्गु यहूलला म्हिगदेसेनोन विश्वास लबारी खम्ला भिबा ताम थेनीगदेदा पाड्सी पिन्जी।²⁸ जमाहेन्से थेनीगदे थेरी चेलागदेदेन छयाम ल्हानान धिनधोना चिजी।

यरूशलेमरी चिबा सभा

15 यहूदियाग्याम एन्टिओखियारी खबा कोड कोड म्हिगदेसे येशूदा विश्वास लबा ज्योज्यो आले नाना आडागदेदा “एनीगदेसे मोशाला ठिम अन्धार खतना आलनी भिसम एनीगदेसे थार्बा आयाड्” भिसी लोप्जी।^{†2} पावलदेन बारनाबासला ताम थेनीगदेदेन छयाम आढिक्बासे लमा थेनीगदेसे ह्राड ह्राडलान ताम थान्जी। थेतबासेलमा पावलदेन बारनाबास ओच्छे कोड कोड विश्वासीगदेदा चु ताम सल्लाह लबारी यरूशलेमरी मुबा मुल चेलागदेदेन मण्डलीदा च्याबा म्हिगदे मुबा ग्लारी पुड्बाला लागिरी धम्जी।

³ जमाहेन्से मण्डलीला म्हिगदेसे थेनीगदेदा थे ग्याम पुड्जी। थेनीगदे फोनिकेदेन सामरियाग्याम तबान निबा धुडरी स्याप्बा विश्वासीगदेदा अर्गु यहूलला म्हिगदेसेनोन प्रभुदा विश्वास लजी भिबा ताम पाड्जी। चु ताम थे:सी थेरी मुबा विश्वासीगदे ल्हानान ताड्जी।⁴ थेनीगदे यरूशलेमरी धोखमाहेन्से थेनीगदेदा मण्डलीला म्हिगदेदेन मुल चेलागदे ओच्छे मण्डलीदा च्याबा म्हिगदेसे मान लजी। जमाहेन्से परमेश्वरसे थेनीगदेग्याम लबा जम्मान गे थेरी मुबागदेदा पाड्जी।

⁵ जमाहेन्से फरिसी समूहला कोड कोड विश्वासीगदे राप्सी, “अर्गु यहूलला म्हिगदेदाएनोन खतना लसी मोशाला ठिम अन्धार भ्रतो:ला भिसी पाड्तो:ला” भिसी भिजी।

⁶ चु तामला बारेरी सल्लाह लबाला लागिरी मुल चेलागदेदेन मण्डलीदा च्याबा म्हिगदे हुप तजी।⁷ थेनीगदे न्हडरी ल्हानान सल्लाह लसी जिन्माहेन्से पत्रुस राप्सी थेनीगदेदा चुहड् भिबारी छयाइजी, “आलेगदे, ल्हानान धुड् डाच्छा अर्गु यहूलला म्हिगदेसे डाला सुड्ग्याम थोन्बा थार्बा पिन्बा समाचार थे:सी विश्वास लगै भिसी ह्राडनी न्हड्ग्याम परमेश्वरसे डादा धम्बा ताम ह्राडनीदा थानोन मुला।^{††8} ओच्छे परमेश्वर चा जम्मान म्हिला सेमला ताम था याड्बा परमेश्वर हिन्ना। परमेश्वरसे य्हाडदा ह्रड्नोन अर्गु यहूलला म्हिगदेदाएनोन ह्राडला आत्मा पिन्सी थेनीगदे डाला हिन्ना भिसी उन्बा मुला।^{††9} ओच्छे परमेश्वरसे य्हाडदेन थेनीगदे खालैला ली आच्याना गे

† 13:51 मती १०:१४; मर्कू ६:११; लुका ९:५; १०:११ †† थे ग्लाला म्हिगदेसे तेन्बा मुल ल चा ‘जिउस’ भिबा ल मुबा, ओच्छे ‘हर्मस’ भिबा चा लगदेला ताम थे:ना लबा ल भिसी म्हन्मुबा। ‡ 14:15 प्रस्था २०:११; भजन १४६:६

†† 15:1 लेवी १२:३ †† 15:7 मुल १०:१-११:१८ ††† 15:8 मुल २:४; १०:४४

लसी थेनीगदेसे लबा विश्वासग्याम थेनीगदेला सेम साडसाड तना लजी।
¹⁰ थेतबासेलमा तिग्दा अर्गु खुलला विश्वासीगदेदा चु धोइ काप्सी परमेश्वरदा बोमो खना लबारी म्हाइबा? तिग्दा भिसम चु धोइ व्हाडला आखे म्हेमेसेनोन पुइआखम्नी ओच्छे व्हाडसेनोन पुइआखम्नी। ¹¹ तर व्हाडसे ह्इन्डोन थेनीगदेसेनोन प्रभु येशूला दयामायग्याम थारबा याड्बा मुला भिसी व्हाडसे विश्वास लबा मुला।”

¹² पत्रुसला चुह्इबा ताम थे:सी सभारी मुबा जम्मान म्हिगदे कुटिसी चिजी, ओच्छे अर्गु खुलला म्हिगदेला गुडरी परमेश्वरसे थेनीगदेग्याम खाह्इबा उदेकला गेदेन चिनुगदे उन्बा ताम पावलदेन बारनाबाससे पाड्मा थेनीगदे ड्यान्सी चिजी। ¹³ पावलदेन बारनाबाससे पाड्सी जिम्नाहेन्से याकूबसे चुह्इ भिसी भिजी, “ज्योज्यो आलेगदे डाला ताम ड्यान्गो, ¹⁴ परमेश्वरसे दया लसी अर्गु खुलला म्हिगदेदा धम्सी ह्वाडलान म्हे स्होजी। चु ताम मी सिमोनसे ह्वाडदा दोलोन पाड्सी जिन्बा मुला। ¹⁵ चुनोन तामदेन छ्याम अगमवक्तला बचनएनोन टिक्मुला। परमप्रभुसे सुड्बा ताम अगमवक्तासे चुह्इ लसी भिबा मुला,

¹⁶ ‘डा दो:सी खला,

ओच्छे दाऊदला फुष्बा दिम † दो:सी स्होला,
 थेनोन फुष्बा दिमला जगथोरी दो:सी दिम स्होला,

¹⁷ थेह्इ लसीन बाँकी मुबा म्हिगदे

डा मुबा ग्लारी खगै,

ओच्छे अर्गु खुलला म्हिगदेदाएनोन

डाला म्हे स्होबाला लागिरी डाइ ड्योइबा मुला।

¹⁸ चु ताम डा परमप्रभुसे ल्हानान डाच्छाहेन्सेन था तना लबा मुला।’ ††

¹⁹ “थेतबासेलमा परमेश्वरपट्टि दो:बा अर्गु खुलला म्हिगदेदा व्हाडसे दुख आपिन्ने भिसी डाइ म्हेन्बा मुला। ²⁰ तर व्हाडसे थेनीगदेदा चुह्इ भिसी भिसी पुइगे, ‘एनीगदेसे मूर्तिदा फुल्बा स्हे थाचउ। ओच्छे स्हान्दोदेन छ्याम ब्रेल्सी थाभ्रउ, ओच्छे खारे च्यासी साइबा जन्तुला स्या थाचउ, ओच्छे तिगैलान का थाचउ।’ ²¹ तिग्दा भिसम डाच्छाला म्हिगदेला धुइहेन्सेन जम्मान शहररी मोशाला ठिमग्याम लोष्वान मुला, चु ठिम चा बल्प्बा न्हा धिनरी यहूदीगदे हुप तबा दिमरी पढब लमुबा।”

अर्गु खुलला म्हिगदेदा भिबा चिठी

²² जमाहेन्से मुल चेलागदेदेन मण्डलीदा च्याबा म्हिगदे ओच्छे जम्मान मण्डली टिक्सी ह्वाड न्हडला कोइ कोइ म्हिगदेदा धम्सी पावलदेन बारनाबासदा छ्यामनोन एन्टिओखियारी पुइबा ज्यबा तला भिसी म्हेन्जी। ओच्छे विश्वासीगदे न्हडला मुल म्हिगदे यहूदा भिबा बारसाबासदेन सिलासदा धम्जी। ²³ थेनीगदेदेन छ्याम चुह्इ भिसी भिबा चिठी पुइजी,
 “ह्वाडनीलान ज्योज्यो आले डनी मुल चेलागदेदेन मण्डलीदा च्याबा म्हिगदेग्याम एन्टिओखियादेन सिरिया ओच्छे किलिकियारी मुबा अर्गु खुलला विश्वासीगदेदा प्याफुल्ला।

²⁴ “डनी न्हडला कोइ कोइसे डन्से आपाड्बा तामगदे ह्वाडनीदा लोप्सी ह्वाडनीला सेम धरमर तना लसी ह्वाडनीदा ल्हानान तामग्याम दुख पिन्बा मुला भिबा ताम डन्से थे:बा मुला। ²⁵ थेतबासेलमा डनी जम्मान टिक्सी लबा सल्लाह अन्खार कोइ कोइ म्हिगदेदा धम्सी थेनीगदेदा डन्ना सेम निबा ह्यो बारनाबास ओच्छे पावलदेन छ्याम ह्वाडनी मुबा ग्लारी पुइखबा ज्यबा छोर्जी। ²⁶ चुगदे चुह्इबा म्हिगदे हिन्ना, चुगदेसे व्हाडला प्रभु येशू ख्रीष्टला लागिरी ह्वाडला ज्याननोन पिन्बारी छ्याइबा मुबा। ²⁷ थेतबासेलमा डन्से यहूदादेन सिलासदाएनोन पुइखबा मुला। थेनीगदेसेनोन चु ताम ह्वाडनीदा पाड्सी पिन्ना। ²⁸ तिग्दा भिसम था ततो:बा ताम बाहेक अर्गु ल्हानान तामग्याम दुख आपिन्बा परमेश्वरला आत्मादेन डन्दा ज्यबा छोर्जी। ²⁹ ह्वाडनीदा था ततो:बा ताम चा चुनोन हिन्ना, ह्वाडनीसे मूर्तिदा बलि पिन्बा तिगै स्हेगदे, कादेन खारे च्यासी साइबा जन्तुला स्या थासोल्गो, ओच्छे

स्हान्दोदेन छ्याम ब्रेल्सी थाभ्रउ। चुह्इबा तामगदेला संगतनोन आलनी भिसम ह्वाडनीदा ज्यबा तला। दान्देदा चुदेन लास्सो प्याफुल्ला।”

³⁰ जमाहेन्से पावल, बारनाबास, यहूदादेन सिलास यरूशलेमग्याम एन्टिओखिया शहररी निजी। थेरी थेनीगदेसे विश्वासीगदेदा ग्ला गिकरी ड्योइसी थेनीगदेदा थे चिठी पिन्जी। ³¹ चिठीरी भिबा आँट पिन्बा ताम पढब लसी एन्टिओखियाला विश्वासीगदे ल्हानान ताड्जी। ³² यहूदादेन सिलास चा अगमवक्ता मुबा। थेन्नीसे प्रभुदा विश्वास लबा ज्योज्यो आले नाना आडागदेदा बचनग्याम ल्हानान आँट पिन्सी विश्वासरी कोड्ना लजी। ³³ थेनीगदे तिगै रेधोना थेरी चिमाहेन्से थेरी मुबा आलेगदेसे थेनीगदेदा पुइखबागदे मुबा ग्लारी दुक्क तसी फेपो भिसी पुइजी। ³⁴ तर सिलासदा चा थेरीन चिबा ज्यबा छोर्जी। ³⁵ तर पावलदेन बारनाबास चा म्हिगदेदा लोष्वानेन प्रभुला बचन थे:ना लबान ल्हानान म्हिगदेदेन छ्याम एन्टिओखियारी चिजी।

पावल थारबा पिन्बा समाचार थे:ना लबारी न्हीरेमला पालरी निबा

पावलदेन बारनाबासला ताम आढिक्बा

³⁶ तिगै धिन लिच्छा पावलसे बारनाबासदा “व्हाडसे डाच्छा प्रभुला बचन थे:ना लबा शहरला विश्वासीगदेदा दो:सी स्याप्बारी निइ ओच्छे थेनीगदे खाह्इबा चीम च्यागे” भिसी भिजी। ³⁷ बारनाबाससे मर्कूस भिबा यूहन्नादा थोर्बा सेम लजी। ³⁸ तर पावलदा चा मर्कूसदा छ्यामनोन थोर्बारी ज्यबा आछोर्नी, तिग्दा भिसम पामफिलियारी मुबा धुइरी मर्कूस थेनीगदेग्याम फेसी निमुबा, ओच्छे थेनीगदेदेन छ्याम टिक्सी गे लबा आरेमुबा। ³⁹ चु तामरी पावलदेन बारनाबासला ताम आढिक्वा थेन्नी फेजी। ओच्छे बारनाबाससे मर्कूसदा थोर्सी पानी जहाजरी क्रे:सी साइप्रस भिबा ग्लारी निजी। ⁴⁰ तर पावलसे चा सिलासदा धम्जी, ओच्छे प्रभुदा विश्वास लबा आलेगदेसे थेन्नीदा परमेश्वरला छ्यारी जिम्मा पिन्माहेन्से थेन्नी थेग्याम निजी। ⁴¹ पावलदेन सिलास सिरियादेन किलिकियारी निसी थेरी मुबा मण्डलीगदेदा विश्वासरी कोड्ना लबान भ्रजी।

पावलदेन सिलास तिमोथीदेन छ्याम हुप तबा

16 पावल डर्बीदेन लुस्त्रा शहररीएनोन खजी। थेरी तिमोथी भिबा चेला गिक मुबा। थेला आमा यहूदी विश्वासी मुबा, तर आबा चा ग्रीक मुबा। ² लुस्त्रादेन आइकोनियन शहरला ज्योज्यो आले नाना आडागदेसे तिमोथीदा ज्यबा म्हे भिसी पाड्बा। ³ पावलसे तिमोथीदाएनोन छ्यामनोन थोर्बा सेम लजी। ओच्छे थेरी चिबा यहूदीगदेसे लमा पावलसे थेदा थोर्सी खतना लसी पिन्जी। तिग्दा भिसम थेला आबा ग्रीक हिन्ना भिसी थेनीगदेदा था मुबा। ⁴ जमाहेन्से थेनीगदे शहर शहररी निबान यरूशलेमरी मुबा मुल चेलागदेदेन मण्डलीदा च्याबा म्हिगदेसे पक्का लबा ताम ड्यान्गो भिसी पाड्बान भ्रजी। ⁵ थेतबासेलमा मण्डलीगदे विश्वासरी कोड्बान धिन धिननोन प्रभुदा विश्वास लबा म्हिगदे बढब तबान निजी।

पावल म्हेर्बा धुइरी माकेडोनियाला म्हिदा म्हाड्बा

⁶ परमेश्वरला आत्मासे पावल, सिलासदेन तिमोथीदा एशियारी बचन थे:ना लआपुड्बासे लमा थेनीगदे फ्रिगियादेन गलातियाला ग्लागदे तबान निजी। ⁷ माइसिया भिबा ग्लाला साँधरी धोखमाहेन्से थेनीगदे बिथिनिया भिबा ग्लापट्टि निबारी म्हाइजी। तर येशूला आत्मासे थेनीगदेदा थेपट्टि निआपुड्नी। ⁸ थेतबासेलमा माइसिया तबान थेनीगदे त्रोआस भिबा ग्लारी निजी। ⁹ म्हुनड म्हेर्बा धुइरी पावलसे माकेडोनियाला म्हे गिक राप्सी थेदा “माकेडोनियारी फेप्खउ ओच्छे डन्दा ह्यो लसी पिन्गो” भिसी बिन्ती लसी चिबा म्हाड्जी। ¹⁰ थेसे चुह्इबा म्हाड्बाहेन्से डनी ¹¹ माकेडोनियारी निबारी

† चु पदरी “दिम” भिबा चा दाऊद ग्लेला खुल्सा हिन्ना। †† 15:18 आमो ९:११-१२
 ‡ 15:20 प्रस्था ३४:१५-१७; लेवी १७:१०-१६; १८:६-२३

†† ल्हानान ह्इबा ग्रीक बाइबलरी ३४ पद आरे। †† 15:38 मुल १३:१३

तयार तजी। तिगदा भिसम थे ग्लाता म्हिगदेदा थार्बा पिन्बा समाचार थे:ना लबारी परमेश्वरसे इन्दा इयोइजीम भिबा ताम इन्से था याइजी।

लिडिया भिबा म्रिडम्हेमेसे विश्वास लबा

11 जमाहेन्से डनी त्रोआसग्याम पानी जहाजरी क्रे:सी सोजोन सामोथ्रेस भिबा ग्लारी खजी, ओच्छे न्हडगरदड नियापोलिस भिबा ग्लारी धोखजी। 12 थेग्याम माकेडोनियाला ग्रेन शहर फिलिपीरी निजी। थे शहररी चा रोमीगदेसे शासन लमुबा। थेरीन डनी तिगै रेधोना चिजी। 13 ब्लप्बा न्हबा धिनकुनु डनी शहरग्याम थोन्सी स्योडला कुनीरी निजी। तिगदा भिसम थेरी प्रार्थना लबा ग्ला मुला तला भिसी इन्से म्हन्बा मुबा, थेरी कोइ कोइ म्रिडम्हेमेगेदे हुप तसी चिबा स्यापजी। थेतबासेलमा डनीएनोन थेनीगदेदेन छ्याम चिसी ताम लजी। 14 थेरी इन्ना ताम इयान्बागदे न्हडरी थिआटीरा भिबा शहररी चिबा वाला वाला पिडगै छोनना क्वान चूड्बा परमेश्वरदा तेन्बा लिडिया भिबा म्रिडम्हेमे गिक मुबा। पावलसे पाइमा ज्यना लसी इयान्सी घोखमौ भिबा सेम प्रभुसे थेदा पिन्बा मुबा। 15 थेदेन थेला दिमला जम्मान म्हेमेगदेसे बप्तिस्मा किन्माहेन्से थेसे “चुदे ह्राडनीसे डादा प्रभुदा विश्वास लबा म्हे म्हन्सम डाला दिमरी फेप्खसी धन्छ्यागो” भिसी इन्दा कर लसी इयोइजी।

पावलदेन सिलासदा इयाल्खानरी झाइबा

16 डनी प्रार्थना लबा ग्लारी निबान मुबा, थेरी इन्से म्हडसे स्याप्बा नोकर स्या गिकदा स्यापजी, थेसे थे म्हडला शक्तिग्याम म्हुदु च्यासी स्होबा ल्हानान टाडगा ह्राडला मालिकगदेदा पिन्मुबा। 17 ओच्छे थे नोकरस्यासे “चु म्हिगदे शक्तिशाली परमेश्वरला गे लबा म्हिगदे हिन्ना। चुगदेसे एनीगदेदा थार्बा याइबा ग्यामला बारैरी पाइबान मुला” भिसी क्रिडबान पावलदेन छ्याम इन्ना लिच्छा लिच्छा भ्रजी। 18 थे नोकरस्यासे ल्हानान धिनधोना चुहड पाइबाला पाइबान लबासे लमा पावल छेसीं थेपट्टि फ्लिक दो:सी थे नोकरस्याला ल्हुइरी मुबा म्हडदा चुहड भिसी भिजी, “ए थेला ल्हुइग्याम येशू ख्रीष्टला मिनरी थोन्सी निउ भिसी डाइ कुल्बा मुला।” पावलसे थेहड् भिमैछ्याम थे म्हड थोन्सी निजी।

19 थे नोकरस्याला मालिकगदेसे दाहेन्से चुला कमाइ चआम्याडनम भिबा म्राइसी पावलदेन सिलासदा चुइसी बजारला गुडरी मुबा नेतागदे मुबा ग्लारी डुइबा छेइबा लबान भोजी। 20 ओच्छे थेनीगदेदा थे शहरला हाकिमगदे मुबा ग्लारी भसी चुहड् भिसी भिजी, “चु म्हिगदे यहूदी हिन्ना, चुगदेसे य्हाडला शहररी आतो:बा ताम लोप्पी इन्दा कोल्ना लजी। 21 ओच्छे थेनीगदेसे य्हाडला ठिमसे लोप्बारी आतबा ताम लोप्बा मुला य्हाड रोमी म्हिगदे तबासे लमा थेन्से लोप्बा ताम य्हाडसे विश्वास लसी इयान्बारी आत।”

22 जमाहेन्से थेरी मुबा म्हिगदे पावलदेन सिलासला बिरोधरी रे:जी। थे शहरला हाकिमगदेसे थेनीगदेला क्वान ठेसी भ्याइजी, ओच्छे थेनीगदेदा तोउ भिसी कुल्जी। 23 थेनीगदेदा ल्हानान तोमाहेन्से इयाल्खानरी झाइसी इयाल्खानना हाकिमदा चु कैदीगदेदा यार्बारी आखम्ना लसी थान्गो भिसी कुल्जी। 24 चुहड् भिमाहेन्से थे इयाल्खानना हाकिमसे पावलदेन सिलासदा इयाल्खानना न्हडला कोठारी भोर्सी ठिगुरो लगब लसी थान्जी। 25 तर म्हुन गडसलरीक्यार पावलदेन सिलास प्रार्थना लबान परमेश्वरला व्हाइ गोबान मुबा, ओच्छे स्हान्दो कैदीगदेसे चा इयान्बान मुबा। 26 जमाहेन्से थेरी तिवखुरीन ग्रेन सडगुल खसी इयाल्खानना जग य्हड य्होड तसी तुरुन्तन इयाल्खानना म्रापगदे ठोइजी। ओच्छे थेनीगदे जम्मादान खीबा स्हेगदेएनोन ह्इन्ोन ब्लजी। 27 थे इयाल्खानना हाकिम फातछोर्मा इयाल्खानना जम्मान म्राप ठोइबा म्राइसी थेसे जम्मान कैदीगदे यार्जी भिसी म्हन्सी ह्राडसे ह्राडदान साइबारी तरवार स्याजी। 28 तर पावलसे थेदा “ह्राडसे ह्राडदान तिगै थालउ, तिगदा भिसम डनी जम्मान चुरीन मुला” भिसी ग्रेन काइसे क्रिड्जी।

†† चु किताब लूकासे भिबा मुबा, चु धुइरी लूकाएनोन पावल, तिमाथी, सिलासदेन छ्याम निबा मुबा। † थे धुइरी चा कैदीगदे यार्जी भिसम इयाल्खानना हाकिमदा सरकारसे साइमुबा।

29 जमाहेन्से थेसे नाडसल हीसी छ्योइबान न्हडरी खजी, थे लोइसी फितफित धर्बान पावलदेन सिलासला डाच्छापट्टि खलुप तजी। 30 ओच्छे थेसे थेनीगदेदा मडग्यार भसी, “दाहेन्से डाइ थार्बा याइबारी तिग लतो:ला?” भिसी इयोइजी।

31 पावलदेन सिलाससे “प्रभु येशू ख्रीष्टदा विश्वास लउ, ओच्छे ह्राडदेन ह्राडला जम्मान म्हेमेगदेसे थार्बा याइला” भिसी भिजी। 32 जमाहेन्से थेनीगदेसे थेदेन थेला दिमरी मुबा जम्मादान प्रभुला बचन थे:ना लजी। 33 जमाकुनु म्हुनडला थेनोन धुइरी थेसे थेनीगदेदा भोर्सी थेनीगदेला पोर खुसी पिन्जी। ओच्छे थेदेन थेला दिमरी मुबा जम्मासेन तुरुन्तन बप्तिस्मा किन्जी। 34 जमाहेन्से थे इयाल्खानना हाकिमसे पावलदेन सिलासदा ह्राडला दिमरी भसी सोल पिन्जी। ओच्छे थेसे परमेश्वरदा विश्वास लबासे लमा थेला दिमरी मुबा जम्मान म्हिगदे विश्वास लसी थेदेन छ्याम ल्हानान ताइजी।

35 तर य्हाल तमाहेन्से शहरला हाकिमगदेसे सिपाहीगदेदा “थे म्हिगदेदा पुइसी पिन्गो” भिसी कुल्जी। 36 जमाहेन्से इयाल्खानना हाकिमसे पावलदा “शहररी मुबा हाकिमगदेसे ह्राडनीदा पुइसी पिन्गो भिसी पाइबा मुला। थेतबासेलमा दाहेन्से ह्राडनी थोन्सी दुक्क तसी फेणो” भिसी भिजी।

37 तर पावलसे थे खबर भसी खबा सिपाहीगदेदा “डनी रोमी म्हे तना तनान थेनीगदेसे रोमी ठिम अन्छार इन्दा तिगै इयोइबा छार्बा आलना तोसी इयाल्खानरी झाइजी। दान्दे चा इन्दा सुटक्क ते:बारी म्हाइबा? डनी नीनोन आनि। थेहड् भिसी कुल्बा हाकिमगदेन छ्याम खसी इन्दा ते:तो:ला” भिसी भिजी।

38 जमाहेन्से सिपाहीगदे हाकिमगदे मुबा ग्लारी निसी पावलसे पाइबा ताम पाइजी। पावलदेन सिलास रोमी म्हे चीम भिबा थे:सी थेनीगदे लोइजी।

39 जमाहेन्से थेनीगदे खसी पावलदेन सिलासदा माफ हीजी, ओच्छे पावलदेन सिलासदा इयाल्खानग्याम मडग्यार भोर्सी, “इन्ना शहर खलासी फेणो” भिसी बिन्ती लजी। 40 इयाल्खानग्याम थोन्माहेन्से पावलदेन सिलास लिडिया भिबा म्रिडम्हेमेला दिमरी निजी। थेरी प्रभुदा विश्वास लबा ज्योज्यो आले नाना आडागदेदेन छ्याम हुप तसी थेनीगदेदा प्रभुरी कोइसी चिउ भिसी आँट पिन्सी पावलदेन सिलास थेग्याम निजी।

थेसलोनिके भिबा ग्लारी परमेश्वरला य्हुल्साला समाचार थे:ना लबा

17 जमाहेन्से पावलदेन सिलास †† अम्फिपोलिसदेन अपोल्लोनिया भिबा शहरग्याम तबान थेसलोनिके भिबा शहररी खजी। थेरी यहूदीगदे हुप तबा दिम गिक मुबा। 2 सदला ह्इन्ोन लसी पावल थेनीगदे मुबा ग्लारी निजी, ओच्छे सोमरेम ब्लप्बा न्हबा धिनधोना परमेश्वरला बचनग्याम थेनीगदेदेन छ्याम छलफल लजी। 3 थेसे परमेश्वरला बचनग्याम ख्रीष्टसे दुख नासी सिबाग्याम सोनोन तो:ला भिसी प्रस्टन उन्सी घोना लजी। “चुनोन येशू थार्बा पिन्बा ख्रीष्ट हिन्ना भिसी डाइ ह्राडनीदा पाइबान मुला,” भिसी भिजी। 4 जमाहेन्से थेनीगदे न्हडला कोइ कोइ म्हिगदेसे प्रभुदा विश्वास लजी। ओच्छे परमेश्वरदा तेन्बा ल्हानान ग्रीकगदेदेन स्हान्दोसे मान लबा ल्हानान म्रिडम्हेमेगदेसेनोन प्रभुदा विश्वास लसी पावल, सिलासदेन छ्याम ढिक्सी भ्रजी।

5 तर यहूदीगदेसे डाह लसी गे आलना न्होइसी भ्रबा म्हिगदेदा थीसी शहररी हुल दडगा लपुइजी, ओच्छे यासोन भिबा म्हेला म्राप इयाल छ्याकछिक लसी पावलदेन सिलासदा म्हिगदेला डाच्छापट्टि भबारी छ्याइजी। 6 थेनीगदेसे पावलदेन सिलासदा आस्याम्माहेन्से यासोनदेन स्हान्दो कोइ कोइ ज्योज्यो आलेगदेदा शहररी मुबा शासन लबा म्हिगदे मुबा ग्लारी डुइबा छेइबा लसी चुहड् भिसी क्रिडबान भिजी, “जम्बुलिड नाडनोन हल्ली खल्ली तना लबा चु म्हिगदे चुरीनोन धोखजीम। 7 थे म्हिगदे यासोनना डोन्बो दोबा मुला, थेनीगदे जम्मासेन येशू भिबा स्हान्दोन ग्ले गिक मुला भिसी रोमी ग्याल्बो कैसरला ठिम अन्छार लतो:बा गेला बिरोध लबा मुला।” 8 थु थे:सी म्हिगदेदेन शहररी मुबा शासन लबा म्हिगदे आत्यब तजी।

†† १७:१ हेन्से २०:४ पदधोना लूकासे ‘डनी’ भिसी पाइबा आरे। चु तामग्याम लूका पावल, सिलासदेन छ्याम आरे भिबा ताम था याइखम्ना। चु धुइरी लूका चा फिलिपीरी चिबा मुबा।

9 जमाहेन्से यासोन ओच्छे थेदेन छ्याम मुबा बाँकी म्हिगदेदेन छ्याम धरौटी किन्सी पुइजी।

बेरिया भिबा ग्लारी परमेश्वरला खुल्साला समाचार थे:ना लबा

10 म्हुन तमैछ्याम पावलदेन सिलासदा विश्वासीगदेसे बेरिया भिबा ग्लारी पुइजी, ओच्छे थेनीगदे थेरी धोखमाहेन्से यहूदीगदे हुप तबा दिमरी निजी।
11 थे ग्लाला यहूदीगदे थेसलोनिकेला म्हिगदे भन्दा ल्हानान फर्स्यालो मुबा। तिगदा भिसम थेनीगदेसे परमेश्वरला बचन सेम लसी इयान्मुबा, ओच्छे पावलसे पाइमा ढिक्का चीम कि आढिक्का चीम भिसी सदन परमेश्वरला बचनरी च्यामुबा।
12 थेतबासेलमा ल्हानान म्हिगदेसे प्रभुदा विश्वास लजी। ओच्छे स्थान्दोसे मान लबा ल्हानान ग्रीक म्रिडम्हेमेगदेदेन हेम्फेबेगदेसेनोन प्रभुदा विश्वास लजी।
13 तर परमेश्वरग्यामला बचन बेरिया भिबा ग्लारीनोन पावलसे थे:ना लबान मुला भिबा थेसलोनिकेला यहूदीगदेसे था याङ्गाहेन्से थेनीगदे थेरीनोन हुल दडगा लबारी म्हिगदेदा सुन्याब लबारी खजी।
14 जमाहेन्से विश्वासीगदेसे पावलदा तुरुन्तन समुन्द्रधोना सनिजी। तर सिलासदेन तिमोथी चा थेरीन चिजी।
15 पावलदा सबारी निबागदेसे पावलदा एथेन्स भिबा ग्लाधोना सनिजी। थेरी धोमाहेन्से पावलसे सिलासदेन तिमोथीदा खम्तेधोना योना खउ भिउ भिसी पाङ्गो भिसी कुल्जी। जमाहेन्से थेदा सबागदे थेग्याम बेरियारी दो:सी निजी।

पावल एथेन्स भिबा ग्लारी धोबा

16 सिलासदेन तिमोथीदा पावलसे एथेन्स भिबा ग्लारी भ्रान्सी चिमा थेसे थे शहर नाडनोन लथाननोन लथान म्राङ्सी थेदा ल्हानान दुख इहम्जी।
17 थेतबासेलमा थेसे यहूदीगदे हुप तबा दिमरी परमेश्वरदा तेन्बा म्हिगदे, यहूदीगदेदेन छ्याम ओच्छे बजाररी स्याप्बा म्हिगदेदेन छ्याम धिन धिननोन इयोइबा छार्बा लमुबा।
18 इपिक्युरीदेन स्तोइ भिबा धर्म तेन्बा म्हिगदेसेनोन थेदेन छ्याम इयोइबा छार्बा लजी। ओच्छे थेनीगदे न्हडला कोइ कोइसे “चु फतफतेसे तिग पाइबारी म्हाइबा हिन्ना?” भिसी भिमा, स्थान्दोगदेसे “चुसे अर्गु खुल्साला ल लुला बारेरी पाइबा इहडबा मुला” भिसी भिजी। तिगदा भिसम थेसे येशूदेन छ्याम सिबागदे दो:सी सोला भिबा तामला बारेरी पाइबान मुबा।
19 थेतबासेलमा थेनीगदेसे पावलदा अरियोपागसरी † भोर्सी चुहड् भिसी भिजी, “हाडसे लोप्बा चु छार ताम खाहड्बा हिन्ना, डन्सेनोन घोबारी तला? 20 तिगदा भिसम हाडसे डन्दा उदेकला ताम लोप्बान मुला। थेतबासेलमा चु खाहड्बा ताम हिन्ना थे ताम डन्दाएनोन घोबा सेम मुला।”
21 दान्दे एथेन्सला जम्मान म्हिगदेदेन थे ग्लारी चिबा अर्गु खुल्साला म्हिगदे छार छार ताम पाइबादेन इयान्सीन धिन निना लमुबा।
22 थेतबासेलमा पावलसे अरियोपागस भिबा सभाला गुडरी राप्सी चुहड् भिसी भिजी, “एथेन्सला म्हिगदे, हाडनी जम्मान तामरी धर्म लबा चीम भिसी डाइ म्राङ्बा मुला। 23 तिगदा भिसम डा कोर्बान निमा हाडनीसे तेन्बा लथानगदे म्राङ्जी। ओच्छे ग्ला गिकला भेटी फुल्बा ग्लारी चा ‘डोआसेबा लला लागिरी’ भिसी ठ्वाइसी भिसी थान्बाएनोन स्याप्जी। थेतबासेलमा डाइ हाडनीसे डोआसेनान तेन्बा परमेश्वरला बारेरी हाडनीदा पाइला।
24 “चु जम्बुलिडदेन जम्बुलिडरी मुबा जम्मान रहे स्होबा परमेश्वर स्वर्गदेन जम्बुलिडला प्रभु हिन्ना, थेतबासेलमा यासे स्होबा मन्दिररी परमेश्वर धन्आछ्या। 25 ओच्छे म्हिला याग्याम फुल्बा स्हेगदे परमेश्वरदा तो:ला भिसी थाम्हन्गो। तिगदा भिसम परमेश्वर हाडसेन जम्मान म्हिगदेदा जुनी, सादेन तो:बा जम्मान स्हेगदे पिन्बा मुला। ††२६ परमेश्वरसे म्हि गिकग्याम जम्बुलिड नाडनोन चिबारी खुल खुलला म्हिगदे स्होजी। ओच्छे थेनीगदे सोबा धुइदेन चिबा ग्लाएनोन तोगब लसी पिन्जी। 27 चुहड् लबा चा जम्मान खुलला म्हिगदेसे परमेश्वरदा आस्याप्तेधोना साम्सी म्हाइसी स्यापौ भिबा परमेश्वरला सेम मुला। तसेनोन परमेश्वर य्हाड जम्मानग्याम थारेड आरे।
28 तिगदा भिसम परमेश्वर य्हाडदेन छ्यामनोन मुबासे लमा य्हाड सोबा मुला,

† अरियोपागस भिबा एथेन्स भिबा ग्लाला गड मुबा। थे ग्लारी चा एथेन्सला नेतागदे हुप तबा ग्ला मुबा। लिच्छा चुनोन ग्लाला मिनग्याम सभाला मिन थान्जी। †† 17:25 † राजा ८:२७; यशै ४२:५; मुल ७:४८

य्हाड क्यारमार भ्रबा मुला ओच्छे य्हाड जम्बुलिडरी मुला। हाडनीलान व्हाइ भिबा म्हिगदेसेनोन ‘य्हाड पक्कान परमेश्वरला सन्तान हिन्ना’ भिसी भिबा मुला।

29 य्हाड परमेश्वरला सन्तान तबासे लमा परमेश्वर म्हर, म्हुइदेन युडबागदेला ल हड्बा हिन्ना भिसी य्हाडसे म्हन्बारी आत। चुगदे चा म्हिला सेमसे म्हन्सी म्हिला सीपसे स्होबा रहे जे हिन्ना। 30 थेतबासेलमा डाच्छा आसेना आघोना लबा धुइला गेदा परमेश्वरसे वास्ता आलनी। तर दाहेन्से परमेश्वरसे जम्मान म्हिगदेदा “हाड हाडला पापगदे ख्लासी डापट्टि दो:गो” भिसी कुल्बा मुला। 31 तिगदा भिसम परमेश्वर हाडसेन धम्बा म्हिग्याम खालैला ली आच्याना जम्बुलिडला निसाफ लबारी परमेश्वरसे थे धिन तोगब लसी जिन्बा मुला। ओच्छे जम्मान म्हिगदेदा चु धिन उन्बाला लागिरी येशूदा सिबाग्याम सोना लजी।”

32 सिबाग्याम सोना लजी भिबा ताम थे:सी थेनीगदे न्हडला कोइ कोइसे पावलदा खिसी लजी। तर स्थान्दोगदेसे चा “हाडसे पाइबा चु ताम डन्दा दो:सी इयान्बा सेम मुला” भिसी भिजी। 33 जमाहेन्से पावल सभाग्याम थोन्सी निजी। 34 तर कोइ कोइ म्हिगदे थेदेन छ्याम भ्रसी प्रभुदा विश्वास लजी। थेनीगदे न्हडला अरियोपागस भिबा सभाला डियनुसियस भिबा म्हिदेन दामारिस भिबा म्रिडम्हेमे गिक मुबा ओच्छे स्थान्दोगदेसेनोन प्रभुदा विश्वास लजी।

पावल कोरिन्थ भिबा ग्लारी निबा

18 जमाहेन्से पावल एथेन्सग्याम कोरिन्थ भिबा ग्लारी निजी। 2 थेरी पावलसे पोन्टस भिबा ग्लाला अकिलास भिबा यहूदी म्हि गिकदा स्याप्जी। थे म्हि तिगै धिन डाच्छा जे हाडला म्रिड प्रिस्किलोदेन छ्याम इटालिया भिबा ग्लाग्याम खबा मुबा। तिगदा भिसम क्लौडियस भिबा ग्याल्बोसे जम्मान यहूदीगदेदा रोमग्याम थोन्सी निउ भिसी कुल्बा मुबा। पावल थेनीगदेदा स्याप्बारी निजी। 3 पावलदेन थेनीगदेला गे गिकनोन तबासे लमा थेनीगदे छ्यामनोन चिजी। तिगदा भिसम थेनीगदेएनोन पाल स्होबा गे लमुबा। 4 ब्लप्बा न्हबा धिनदडसेन पावल यहूदीगदे हुप तबा दिमरी निसी छलफल लमुबा, ओच्छे यहूदीदेन ग्रीकगदेदा घोना लबारी म्हाइमुबा।
5 सिलासदेन तिमोथी माकेडोनियाग्याम खबा धुइरी पावल परमेश्वरला बचन थे:ना लबा गे लबादेन यहूदीगदेदा येशून थार्बा पिन्बा ख्रीष्ट हिन्ना भिसी घोना लबा गे जे लमुबा। 6 तर यहूदीगदेसे पावलला बिरोध लबान तामगन लबारी छ्याइजी, जमाहेन्से पावलसे हाडला क्वान खर्सी, “एनीगदे हाडलान दोषसे लमा नाश तजी भिसम चुला दोष डादा लगब आत। दाहेन्से, डा अर्गु खुलला म्हिगदे मुबा ग्लारी निला” भिसी भिजी। †

7 जमाहेन्से पावल थेग्याम परमेश्वरदा तेन्बा तीतस युस्तस भिबा म्हिला दिमरी निजी। थेला दिम यहूदीगदे हुप तबा दिमला डामरीन मुबा। 8 थेरी यहूदीगदे हुप तबा दिमला नेता क्रिस्पसदेन थेला दिमरी मुबा जम्मान म्हिगदेसे प्रभुदा विश्वास लजी, ओच्छे कोरिन्थला म्हिगदे न्हडला ल्हानान म्हिगदेसे पावलसे पाइबा परमेश्वरला बचन इयान्सी विश्वास लसी बप्तिस्मा किन्जी।

9 तिरिकुनु म्हुनड म्हेर्बा धुइरी म्हाडरी पावलदा प्रभुसे चुहड् भिसी भिजी, “ए थालोङ्गो, तर पाइबान निउ, ओच्छे कुटिसी थाचिउ। 10 तिगदा भिसम डा एदेन छ्याम मुला। थेतबासेलमा एदा खालैसे तिगै लआखम, तिगदा भिसम चु शहररी डाला म्हिगदे ल्हानान मुला।” 11 थेतबासेलमा परमेश्वरला बचन लोप्बान पावल दिड गिकसे ला दुधोना थेनीगदेदेन छ्यामनोन चिजी।

12 तर अखैया भिबा ग्लाला नेता गलियोनना धुइरी जम्मान यहूदीगदे ढिक्की पावलदा चुइसी अदालतरी भोजी, 13 ओच्छे चुहड् भिसी भिजी, “चु म्हिसे मोशाला ठिमला बिरोध लसी परमेश्वरदा तेन्गो भिसी म्हिगदेदा व्हाम्बान लोप्बा मुला।”

14 पावलसे ताम पाइबारी छ्याइमा गलियोनसे थे यहूदीगदेदा चुहड् भिसी भिजी, “यहूदीगदे, चुदे चु ताम अन्यायदेन आज्यबा गेला बारेरी हिन्सम डाइ एनीगदेला ताम इयान्णोन तो:बा मुबा। 15 तर एनीगदेसे पाइबा चु तामदेन

मिन मोशासे पिन्बा एनीगदेलान ठिमला बारैरी तबासे लमा एनीगदेसेन ठिक्ना लउ। चुहड्बा तामला निसाफ चा डाइ आल।¹⁶ जमाहेन्से गलियोनसे थेनीगदेदा अदालतग्याम तेःजी।¹⁷ जमाहेन्से थेनीगदे जम्मासेन यहूदीगदे हुप तबा दिमला सोस्थेनेस भिबा नेतादा चुड्सी अदालत न्हडरीन तोजी। तर गलियोनसे थे तामला तिगै वास्ता आलनी।

पावल दोःसी थार्बा पिन्बा समाचार थेःना लबारी ग्ला ग्लारी निबा

¹⁸ पावल कोरिन्थरी तिगै धिनधोना चिजी। जमाहेन्से विश्वासीगदेग्याम फेसी पावल पानी जहाजरी क्रेःबारी किंक्रिया भिबा ग्लारी निजी। थेदेन छ्याम प्रिस्किलादेन अकिलासएनोन मुबा। सिरिया भिबा ग्लारी निबाला लागिरी पानी जहाजरी क्रेःबा भन्दा डाच्छा हाडसे लबा कबुल पूरा लबाला लागिरी किंक्रिया भिबा ग्लारी पावलसे हाडला क्रा भेजी।¹⁹ जमाहेन्से थेनीगदे एफिसस भिबा ग्लारी धोखजी, ओच्छे पावलसे प्रिस्किलादेन अकिलासदा थेरीन खलाजी। तर हाड चा यहूदीगदे हुप तबा दिम गिकरी वाड्सी यहूदीगदेदेन छ्याम छलफल लबारी छ्याइजी।²⁰ पावलदा यहूदीगदेसे अझ तिगै धिनधोना चिउ भिसी भिमा पावलसे थेनीगदेला ताम आड्यान्नी।²¹ थेनीगदेग्याम फेबा धुडरी पावलसे थेनीगदेदा “परमेश्वरसे सेम लजी भिसम डा दोःसी हाडनी मुबा ग्लारी खला” भिसी पावल पानी जहाजरी क्रेःसी एफिससरी निजी।

²² जमाहेन्से कैसरिया शहररी धोखसी पावल यरूशलेमरी निसी थेरी मुबा मण्डलीला म्हिगदेदेन छ्याम हुप तजी। ओच्छे पावल एन्टिओखिया शहररी धोजी।

पावल थार्बा पिन्बा समाचार थेःना लबारी सोमरेमला पालरी निबा

²³ पावल तिगै धिनधोना थेरीन चिजी। जमाहेन्से पावल गलातियादेन फ्रिगियाला जम्मान ग्लागदेरी निबान जम्मान चेलागदेदा विश्वासरी कोड्ना लबान भ्रजी।

अपोल्लोससे थार्बा पिन्बा समाचार थेःना लबा

²⁴ अलेक्जेन्ड्रिया भिबा ग्लाला अपोल्लोस भिबा यहूदी गिक एफिससरी खजी। थे परमेश्वरला बचन सेबा घोबादेन ज्यना लसी ताम पाड्खम्बा म्हि मुबा।²⁵ थेसे थार्बा पिन्बा प्रभु येशूला बारैरी थेःबा मुबा, थेतबासेलमा सेमहेन्सेन ताड्सी प्रभु येशूला बारैरी ज्यना लसी लोप्मुबा। तसैनोन थेदा यूहन्नासे पिन्बा बप्तिस्माला बारैरी जे था मुबा।²⁶ थे दुक्क तसी यहूदीगदे हुप तबा दिमरी पाड्बारी छ्याइजी। थेसे पाड्मा प्रिस्किलादेन अकिलाससे थेःमाहेन्से थेनीगदेसे थेदा हाडला दिमरी भोजी। ओच्छे थेदा परमेश्वरला गेला बारैरी ज्यना लसी घोना लसी पिन्जी।

²⁷ जमाहेन्से अपोल्लोस अखैया भिबा ग्लारी निबा सेम लजी। थेतबासेलमा एफिससरी मुबा चेलागदेसे थेदा निबारी आँट पिन्सी, अपोल्लोसदा मान लगै भिसी चिठी गिक भिसी पुड्जी। अखैयारी धोमाहेन्से प्रभुला दयामायाग्याम विश्वास लबा म्हिगदेदा थेसे ल्हानान ह्यो लजी।²⁸ तिगदा भिसम थेसे परमेश्वरला बचनग्याम येशून थार्बा पिन्बा ख्रीष्ट हिन्ना भिसी म्हिगदेला ओन्हाडरी यहूदीगदेदा तिगै पाड्आखम्बा तना लजी।

पावल एफिसस शहररी निबा

19 अपोल्लोस कोरिन्थरी मुबा धुडरी पावल एशियाला गुडग्याम तबान एफिसस भिबा शहररी खजी। थेरी पावलसे कोड कोड चेलागदेदा स्याप्जी।² जमाहेन्से पावलसे थेनीगदेदा “एनीगदेसे विश्वास लमाहेन्से परमेश्वरला आत्मा याड्जी?” भिसी इयोइमा, थेनीगदेसे पावलदा “परमेश्वरला आत्मा मुला भिसी डन्से थेःबै आरे” भिसी भिजी।³ दोःसीनोन पावलसे थेनीगदेदा “एनीगदेसे खाहड्बा बप्तिस्मा किन्जी?” भिसी इयोइमा, थेनीगदेसे पावलदा “यूहन्नासे लोप्बा अन्धारला बप्तिस्मा किन्जी”

† 18:18 गन्ती ६:१८

भिसी भिजी।⁴ जमाहेन्से पावलसे थेनीगदेदा “यूहन्नासे पिन्बा बप्तिस्मा चा हाड हाडला पाप ख्लासी परमेश्वरपट्टि दोःगै भिसी पिन्बा बप्तिस्मा हिन्ना। थेसे हाड भन्दा लिच्छा फेप्खबा म्हिदा विश्वास लउ भिसी म्हिगदेदा लोप्मुबा, थे म्हि येशू हिन्ना” भिसी पाड्जी।⁵ चु ताम थेःसी थेनीगदेसे प्रभु येशूला मिनरी बप्तिस्मा किन्जी।⁶ पावलसे थेनीगदेथेरी या थान्माहेन्से थेनीगदेथेरी परमेश्वरला आत्मा फेप्खजी, जमाहेन्से थेनीगदेसे आसेबा ग्योइदेन परमेश्वरग्याम खबा ताम पाड्जी।⁷ थेनीगदे ओस्पन च्युक न्ही ते मुबा।

⁸ जमाहेन्से पावल दुक्क तसी यहूदीगदे हुप तबा दिमरी वाड्सी ला सोमधोना परमेश्वरला यहुल्साला बारैरी थेनीगदेदेन छ्याम छलफल लबान म्हिगदेदा घोना लजी।⁹ तर थेरी कोड कोड म्हिगदे अटेरी तसी विश्वास आलना येशूदा विश्वास लबा म्हिगदेला ओन्हाडरी थेरी मुबा समूहला बिरोध लबारी छ्याइजी। थेतबासेलमा पावल थेनीगदेग्याम फेसी चेलागदेदा छ्यामनोन भोर्सी टुरान्नस भिबा ग्लाला स्कूलरी धिन धिननोन छलफल लबारी छ्याइजी।¹⁰ चु मे लबा न्ही दिड तमा एशियारी चिबा जम्मान यहूदीदेन ग्रीकगदेसे प्रभुला बचन थेःजी।

एफिससरी उदेकला गे

¹¹ थेरी परमेश्वरसे पावलग्याम म्हिसे लबारी आखम्बा उदेकला गेगदे लजी।¹² पावलला ल्हुडरी रूमाल तसै घ तसै थुर्सी आखम्बा म्हिगदे मुबा ग्लारी भोर्सी थेनीगदेला ल्हुडरी थुर्माहेन्से आखम्बा म्हिगदे खम्मुबा ओच्छे थेनीगदेला ल्हुडग्याम म्हड थोन्सी यार्मुबा।

¹³ जमाहेन्से डाबा स्युड्बा लबा कोड कोड यहूदीगदे क्यारमार निसी प्रभु येशूला मिनग्याम म्हडसे स्याप्बागदेदा “डाइ एदा पावलसे थेःना लबा येशूला मिनरी थोन्सी निउ भिसी कुल्बा मुला” भिसी भिजी।¹⁴ चुहड्बा गे लबा चा परमेश्वरला मन्दिररी पूजा लबा यहूदी मुल म्हि स्केवासला झा निस मुबा।¹⁵ तर तिरेकुनु चा म्हडसे थेनीगदेदा “डाइ येशूदा डोसेमुला, ओच्छे पावलदाएनोन डोसेबा मुला, तर एनीगदे चा खाल हिन्ना?” भिसी इयोइजी।¹⁶ जमाहेन्से थे म्हडसे स्याप्बा म्हि छ्योइबान थेनीगदे मुबा ग्लारी खजी, ओच्छे थेनीगदे जम्मादान लछार पछार लसी तहरी थान्जी, जमाहेन्से थेनीगदे लिगन्डी तसी घाड्ते तसी थे दिमग्याम थोन्सी यार्जी।

¹⁷ चु ताम एफिससरी चिबा जम्मान यहूदीदेन ग्रीकगदेसे थेःसी थेनीगदे जम्मान लोड्जी। ओच्छे थेनीगदेसे प्रभु येशूला मिननोन जम्मान भन्दा घ्रेन हिन्ना भिसी भिबारी छ्याइजी।¹⁸ जमाहेन्से विश्वास लबा ल्हानान म्हिगदे खजी ओच्छे थेनीगदे जम्मासेन हाड हाडसे लबा आज्यबा गेगदे म्हिगदेला ओन्हाडरी पाड्जी।¹⁹ जादु लबा म्हिगदे न्हडला ल्हानान म्हिगदेसे हाड हाडला जादुला किताब हुप लसी भजी, ओच्छे जम्मान म्हिगदेला ओन्हाडरी ख्राड्जी। थेनीगदेसे भबा किताबला सय लमा ओस्पन बोगल न्हीसे हजार च्युड म्हुडला डबल तजी।²⁰ चुहड् तसी प्रभुला शक्तिशाली बचन खानडदमान थेःसी ल्हेबान निजी।

²¹ चुहड् तमाहेन्से पावलसे माकेडोनियादेन अखैया तबान यरूशलेमरी निबारी पक्का लजी। ओच्छे थेरी धोमाहेन्से “डा रोमरीएनोन निनोन तोःला” भिसी पावलसे भिजी।²² ओच्छे पावलसे हाडदा ह्यो लबा तिमोथीदेन इरास्तसदा माकेडोनियारी डाच्छा पुड्जी। तर हाड चा तिगै धिनधोना एशियारीन चिजी।

एफिसस भिबा ग्लाला म्हिगदे न्हडरी खल्बल तबा

²³ थे धुडरी थार्बा याड्बा ग्यामला बारैरी थेःना लबासे लमा एफिससरी ल्हानान खल्बल तजी।²⁴ तिगदा भिसम डेमेत्रियस भिबा म्हुडला मूर्तिगदे स्होबा म्हि गिकसे आर्तेमिस भिबा लुला जजाबा मन्दिरगदे स्होसी गे लबागदेदा ल्हानान गे पिन्बा मुबा।²⁵ ओच्छे थेसे थे गे लबागदेदेन अर्गु थेहड्बान गे लबागदे जम्मादान ग्ला गिकरी हुप लसी चुहड् भिसी भिजी, “डाला ह्योगदे, एनीगदेदा थानोन मुला, य्हाडदा चुनोन गेग्याम ल्हानान

† 19:4 मत्ती ३:११; मर्कु १:४, ७-८; लुका ३:४, १६; यूह १:२६-२७ † 19:18 वय १८:१०-१४

फाइदा मुला।²⁶ एनीगदेसे झाडबादेन थे:बा तामगदे एफिससरी जे आहिन, तर एशियाला जम्मान ग्लारी पावल भिबा म्हिसे म्हिला याग्याम स्होबा ल लुगदे चा तिगै आहिन भिसी ल्हानान म्हिगदेदा व्हाम्सी भोर्बा मुबा।

²⁷ थेतबासेलमा व्हाडला व्यापार म्हासी निबा जे आहिन, तर आर्तेमिस भिबा घेन लुला मन्दिरएनोन गे आखेल्बा तला, ओच्छे एशियाला जम्मान ग्लादेन जम्बुलिड न्हडनोन घेन मान पिन्बा लुदा तेन्बा खलाला।”

²⁸ चु ताम थे:सी थेनीगदेदा ल्हानान बोमो रे:जी, ओच्छे “एफिससला म्हिगदेला आर्तेमिसनोन घेन हिन्ना” भिसी थेनीगदे क्रिडबारी छ्याइजी।

²⁹ ओच्छे शहर न्हडनोन हल्ली खल्ली तजी। जमाहेन्से थेनीगदे जम्मान ढिक्सी माकेडोनियाला गायसदेन अरिस्तार्खस भिबा पावलला ह्यो न्हीदा चुड्सी डुडबा छेड्बा लसी रडगशाला न्हडरी भोजी।³⁰ पावलएनोन तिगै ताम पाड्बा सेम लसी म्हिला हुल न्हडरी निबारी म्हाइजी, तर प्रभुदा विश्वास लबागदेसे थेदा निआपुड्नी।³¹ एशियाला सरकारला गे लबा कोड कोड मुल म्हिगदेएनोन पावलला ह्यो मुबा। ओच्छे थेनीगदेसेनोन पावलदा रडगशाला न्हडरी थानिउ भिसी पाड्सी पिन्गो भिसी कुल्सी पुड्जी।

³² थेनोन धुडरी थेनीगदे न्हडरी गिकसेम गिक ह्वाड ह्वाडला ताम लबान क्रिड्सी हल्ली खल्ली लबान मुबा। तिगदा भिसम थेरी मुबा ल्हानान म्हिगदेदा ह्वाड तिगदा पोप तजी भिबा ताम सुत्तै था आरेमुबा।³³ जमाहेन्से म्हिला हुल न्हडग्याम कोड कोड म्हिगदेसे अलेक्जेन्डर भिबा म्हिदा डाच्छापट्टि भजी। थेदा यहूदीगदेसे तिगै ताम पाड्सी चुगदेदा घोना लसी पिन्गो भिसी भिजी। ओच्छे अलेक्जेन्डरसे ह्वाड जोगब तबाला लागिरी याला चाल लबान तिगै पाड्बा सेम लजी।³⁴ तर थेनीगदेसे थे म्हि यहूदी चीम भिबा था याड्सी जम्मान म्हिगदे ढिक्सी ओस्पन घण्टा न्ही ते “एफिससला म्हिगदेला आर्तेमिसनोन घेन हिन्ना” भिसी क्रिड्जी।

³⁵ जमाहेन्से शहरला हाकिमसे म्हिगदेदा कुटिसी चिना लमाहेन्से चुहड् भिसी घोना लजी, “एफिससला म्हिगदे, एफिसस शहर चा घेन आर्तेमिसला मन्दिरदेन मुग्याम ताड्बा थेला मूर्तिदा जोगब लसी थान्बा मुला भिबा ताम खाल्दा था आरे? ³⁶ चु ताम खालै म्हिसे आहिन भिसी पाड्बारी आखम भिबा ह्वाडनीदा थानोन मुला। थेतबासेलमा ह्वाडनी कुटिसी स्हूगो, ओच्छे तिगै आम्हन्ना तिगै गे लबारी आत।³⁷ तिगदा भिसम ह्वाडनीसे भबा चु म्हिगदेसे व्हाडला लथान व्हो लबा आरे, ओच्छे व्हाडला लुदा बिरोधएनोन लबा आरे।³⁸ चुदे डेमेत्रियसदेन थेला गे लबागदेसे खालैला बिरोधरी उजुर लतो:बा मुसम अदालतगदे मुनोन मुला ओच्छे न्यायाधीशगदेएनोन मुनोन मुला। थेतबासेलमा थेनीगदेसे गिकसे गिकदा बिरोध लबा हिन्सम मुद्दा युगै।³⁹ तर चु बाहेक अर्गुन ताम पाड्बा सेम मुसम थे तामला निसाफ व्हाडला ठिम अन्धार गन्बागदे हुप तसी सदन लबा सभारी ढिक्ना लला।⁴⁰ तिगदा भिसम तिनी तबा चु हुल दडगाला दोष व्हाडथोरी खबारी खम्ला, चु थेहड्नीनोन तबा हुल दडगा तिगदा तजी भिसी व्हाडसे घोना लबारी आखम।”⁴¹ चुदे भिसी थे हाकिमसे थेरी मुबा म्हिगदेदा पुड्जी।

पावल माकेडोनियादेन ग्रीस भिबा ग्लारी निबा

20 थे हल्ली खल्ली म्हाहेन्से पावलसे प्रभुदा विश्वास लबागदेदा इयोडबारी पुड्जी, ओच्छे थेनीगदेदा आँट पिन्सी थेनीगदेग्याम फेसी थे माकेडोनिया भिबा ग्लापट्टि निजी।² माकेडोनियाग्याम तबान निमा थेसे प्रभुदा विश्वास लबा थे ग्लाला म्हिगदेदा ल्हानान आँट पिन्सी थे ग्रीस भिबा ग्लारी निजी।³ थेरी पावल ला सोमधोना चिजी। ओच्छे पानी जहाजरी क्रे:सी सिरिया भिबा ग्लारी निबारी छ्याइमा थेदा यहूदीगदेसे साड्बारी जाल लबा ताम था याड्सी थेसे भ्रसीन माकेडोनिया तसी निबारी पक्का लजी।⁴ ओच्छे बेरिया भिबा ग्लाला पुरस भिबा म्हिला झा सोपात्रोस, थेसलोनिके भिबा ग्लाला अरिस्तार्खसदेन सिकन्दस ओच्छे डर्बी भिबा ग्लाला गायसदेन तिमोथी ओच्छे एशिया भिबा ग्लाला तुखिकसदेन त्रोफिमसएनोन थेदेन छ्याम निजी।⁵ चुगदे डाच्छान त्रोआस भिबा ग्लारी धोसी डन्दा † भ्रान्सी चिबा मुबा।⁶ डनी चा मिश्र व्हुल्साग्याम फेसी खबा धिनदा ढन्सी धड्बा चाड निमाहेन्से फिलिप्पी भिबा ग्लाग्याम पानी जहाजरी क्रे:सी खमा

† चुरी लूकासे “डन्दा” भिसी पाड्बा चा पावलएनोन लूकादेन छ्याम मुबा।

डारेकुनु थेनीगदे मुबा ग्ला त्रोआसरी धोखजी, ओच्छे थेरी डनी डारेधोना चिजी।

युटिकस भिबा म्हि सिबाग्याम सोबा

⁷ साताला डाच्छाकुनु डनी प्रभु भोज चबारी पोप तजी, ओच्छे पावल चा न्हडगरदडनोन निबा सेम लबासे लमा थेनीगदेदेन छ्याम म्हुन गडसलधोना ताम लसी चिजी।⁸ डनी पोप तबा दिमला तलाथोला कोठारी चा ल्हानान नाडसलगदे मुबा।⁹ युटिकस भिबा भ्योन म्हि चा इयालरी चिबा मुबा। पावलसे ल्हानान धुडधोना ताम लबासे लमा थेदा म्हेर्बा खसी छुप निजी। थेतबासेलमा थे तला सोमग्यामसे ताड्जी, थेनीगदेसे थेदा थीमा सिसी जिन्बा स्याप्जी।¹⁰ जमाहेन्से पावल मार फाप्जी, ओच्छे खलुप तसी थेदा हाप ख्वाइजी। पावलसे थेरी मुबागदेदा “थालोड्को, तिगदा भिसम चु सोबान मुला” भिसी भिजी।¹¹ जमाहेन्से थे तलाथोरी निजी ओच्छे गेड व्पुड्सी चमाहेन्से व्हाल आततेधोना ताम लसी चिजी। जमाहेन्से थेनीगदेग्याम पावल फेसी निजी।¹² ओच्छे थेनीगदेसे थे सिबाग्याम सोबा भ्योन म्हिदा दिमरी भोजी। ओच्छे थेनीगदेसे ल्हानान आँट याड्जी।

पावल त्रोआसग्याम मिलेटस भिबा ग्लाधोना निबा

¹³ त्रोआसग्याम पावल बाहेक डनी जम्मान पानी जहाजरी क्रे:सी अस्सोस भिबा शहररी निजी। पावलसे चा अस्सोसधोना भ्रसी निबा सेम लबासे लमा थे अस्सोसधोना भ्रसी निजी। ओच्छे अस्सोसग्याम चा डन्डेन छ्यामनोन पानी जहाजरी क्रे:सी निबा पावलला सेम मुबा।¹⁴ डनी अस्सोसरी धोखमाहेन्से पावलएनोन डन्डेन छ्यामनोन पानी जहाजरी क्रे:सी डनी जम्मान छ्यामनोन मितिलेने भिबा शहररी निजी।¹⁵ थेग्याम डनी पानी जहाजरी निसी न्हडगरदड खियस भिबा ग्लाला डामरी धोखजी, ओच्छे रेनीदड सामोस भिबा ग्लारी धोखजी। ओच्छे अर्गु धिनकुनु चा मिलेटस भिबा ग्लारी खजी।¹⁶ पावलसे एशियारी चिबा सेम आलबासे लमा एफिससरी आवाडनान निबा सेम लजी। तिगदा भिसम पावलसे खन्तेधोना पेन्तिकोसला धिनरी यरूशलेमरीन दोबारी भड लबान मुबा।

एफिससला मण्डलीदा च्याबा म्हिगदेग्याम फेसी निबा

¹⁷ पावलसे मिलेटसग्याम एफिससरी मुबा मण्डलीला मण्डलीदा च्याबा म्हिगदेदा इयोडबारी म्हि पुड्जी।¹⁸ थेनीगदे पावल मुबा ग्लारी धोखमाहेन्से पावलसे थेनीगदेदा चुहड् भिसी भिजी, “एशियारी काड न्हे:माकुनुहेन्से डा ह्वाडनीला गुडरी खाहड् लसी चिजी भिबा ताम ह्वाडनीदा थानोन मुला।¹⁹ ओच्छे यहूदीगदेसे जाल लसी डादा फसब लबारी म्हाडबासे लमा डादा ल्हानान दुख तजी, तसैनोन डा सोजो तसी क्राबान प्रभुला गे लजी।²⁰ ओच्छे ह्वाडनीदा ज्यबा ताम पाड्बा धुडरी जम्मान म्हिला ओन्हाडरीदेन एनीगदे जम्मान दिम दिमरी निसी डाइ ह्वाडनीदा लोप्बा धुडरी डाइ तिगै ताम बाँकी आथान्ना लोप्जी।²¹ यहूदीगदेदेन अर्गु व्हुलला म्हिगदेदाएनोन डाइ ह्वाड ह्वाडला पाप ख्लासी परमेश्वरपट्टि दो:गो ओच्छे व्हाडला प्रभु येशू ख्रीष्टदा विश्वास लउ भिसी पाड्बा मुला।

²² “च्यागो, डा परमेश्वरला आत्माला करसे लमा यरूशलेमपट्टि निबान मुला, थेरी तिग तला भिबा ताम डादा था आरे।²³ जम्मान शहररी डादा दुख तबादेन इयाल्खानरी झाड्ला भिसी परमेश्वरला आत्मासे उन्बा ताम जे डादा था मुला।²⁴ तसैनोन डाइ ह्वाडला ज्यानदा घेन म्हन्बा आरे, तिगदा भिसम परमेश्वरला दयामायाला बारेरी थार्बा पिन्बा समाचार थे:ना लबादेन प्रभु येशूसे डादा पिन्बा गे जिन्ना लखम्म भिबा डाला सेम मुला। †

²⁵ “च्यागो, डाइ ह्वाडनी न्हडला जम्मान परमेश्वरला व्हुल्साला समाचार थे:ना लबान भ्रजी, दो:सी खाइमै व्हाड हुप आत भिबा डादा था मुला।²⁶ थेतबासेलमा तिनी डाइ ह्वाडनीदा पाड्ला, ह्वाडनी न्हडला खालै नाश तसैनोन थेला दोष डादा आत।²⁷ तिगदा भिसम एनीगदेसे था याड्गै भिसी परमेश्वरसे म्हन्बा जम्मान ताम डाइ एनीगदेदा गिकनोन बाँकी आथान्ना पाड्बा मुला।

†† 20:24 २ तिमो ४:७

28 “दाहेन्से हाड हाडलान लागिरी ओच्छे परमेश्वरला आत्मासे हाडनीदा जिम्मा पिन्बा ग्युगदेला लागिरी होशियार तसी चिउ। परमेश्वरला मण्डलीदा ज्यना लसी च्याबा म्हि दोगो, तिगदा भिसम प्रभु येशूसे थें म्हिगदेदा हाडलान कासे ग्लुबा मुला। 29 तिगदा भिसम डा निमाहेन्से एनीगदेला गुडरी लोड्बा खबा फाबागदे हड्बान लुसीला ताम लोप्बा म्हिगदे खला, थेंसे म्हिगदेदा बाँकी आथान भिबा ताम डादा था मुला। 30 हाडनीलान गुडग्यामएनोन न्होड्ना लबा ताम पाड्बा म्हिगदे थोन्ना, थेनीगदेसे प्रभुदा विश्वास लबागदेदा हाडदेन छ्याम भोर्ला। 31 थेतबासेलमा हाडनी होशियार तसी स्हूगो, डाड सोम दिडधोना धिन म्हुननोन क्रासी क्रासी एनीगदे जम्मानान लोप्बा ताम थाम्ले:गो।

32 “दाहेन्से डाड हाडनीदा परमेश्वरदेन थेला दयामायाला बचनरी जिम्मा पिन्ना, थे बचनसेन हाडनीदा विश्वासर कोड्ना लला, ओच्छे परमेश्वरसे हाडला लागिरी फेसी थान्बा म्हिगदेसे याड्बा हक एनीगदेसेनोन याड्ला। 33 डाड खालै म्हिला म्हर, म्हुडदेन व्वान्ना लोभ आलनी। 34 ओच्छे डाडनोन गे लसी डाला खॉचो ओच्छे डादेन छ्याम मुबागदेदा खॉचो तबा स्हेगदे डाड पिन्बा हाडनीदा थानोन मुला। 35 हाडनीसेनोन डाड हड् लसी कमजोर म्हिगदेदा हो लगे भिसी डाड सेमहेन्सेन लबा जम्मान गे हाडनीदा उन्बा मुला, तिगदा भिसम प्रभु येशूसेनोन ‘किन्बागदे भन्दा पिन्बागदेसे चा झन मोलम याड्ला’ भिसी सुड्बा मुला। थेतबासेलमा हाडनीसेनोन चु बचनदा ठन्सी हाडसेन गे लसी आखम्बागदेदा हो लउ।”

36 चुदे पाड्सी जिन्माहेन्से पावलसे पुड जूसी थेनीगदेदेन छ्याम प्रार्थना लजी। 37 ओच्छे थेनीगदे जम्मान क्रासी पावलदा हापखाड्सी च्योक लजी। 38 पावलसे दो:सी खाड्मै हुप आत भिसी पाड्बासे लमा थेनीगदेदा ल्हानान दुख इहम्जी। ओच्छे थेनीगदेसे पावलदा पानी जहाज मुबा ग्लाधोना सबारी निजी।

पावल यरूशलेमरी निबा

21 थेनीगदेग्याम फेसी डनी पानी जहाजरी क्रे:सी सोजोन कोस भिबा ग्लारी खजी, ओच्छे न्हडगरदड रोडस भिबा ग्लारी धोखजी थेंग्याम पटारा भिबा ग्लारी धोखजी। 2 जमाहेन्से फोनिके भिबा ग्लारी निबा पानी जहाज गिक स्याप्जी ओच्छे डनी थेरीन क्रे:सी निजी। 3 साड्प्रस भिबा ग्ला म्हाड्नाहेन्से थे ग्लाला देब्रेपट्टिग्याम डनी सिरियापट्टि निसी टुरोस भिबा ग्लारी फाप्जी। तिगदा भिसम पानी जहाजरी भबा मालसामान थेरी ते:तो:बा मुबा। 4 ओच्छे प्रभुदा विश्वास लबागदेदा म्हाड्सी स्याप्माहेन्से डनी निसरेधोना थेरीन चिजी। थेनोन धुडरी प्रभुदा विश्वास लबागदेसे परमेश्वरला आत्माग्याम पावलदा यरूशलेमरी थानिउ भिसी भिजी। 5 थे ग्लाग्याम निबा धुड तमाहेन्से डनी थे ग्लाग्याम थोन्जी। ओच्छे थेनीगदेला कोलागदेदेन म्हेमेगदे क्योड्सेन डन्दा शहर मडग्यारधोना सबारी खजी। जमाहेन्से डनी जम्मानसेन समुन्द्रला कुनीरी पुड जूसी प्रार्थना लजी। 6 जमाहेन्से डनी थेनीगदेग्याम फेसी पानी जहाजरी क्रे:जी, ओच्छे थेनीगदे चा हाडला दिमरी निजी।

7 टुरोसग्याम डनी समुन्द्रला ग्याम तबान टोलेमाडस भिबा ग्लारी धोखजी। जमाहेन्से थेरी मुबा प्रभुदा विश्वास लबागदेदा स्याप्सी डनी थेनीगदेदेन छ्याम तिरि चिजी। 8 न्हडगरदड डनी थे ग्लाग्याम थोन्सी कैसरिया भिबा शहररी धोखजी, ओच्छे डनी थारबा पिन्बा समाचार थे:ना लबा फिलिप † भिबा म्हिला दिमरी वाड्जी। थे फिलिप यरूशलेमरी धम्बा गोर निस न्हडला गिक मुबा। †9 थे फिलिपला ब्याह आलबा झामे ब्लि मुबा। थेनीगदेसे परमेश्वरग्याम खबा ताम पाड्बा।

10 डनी तिगे रेधोना थेरी चिबा धुडरी यहूदिया भिबा ग्लाग्याम अगाबस भिबा अगमवक्ता गिक डनी मुबा ग्लारी खजी। †11 थे अगमवक्ता डनी मुबा ग्लारी खसी पावलला के: किन्सी हाडलान काड या खीजी। थेसे “चु के: जुन म्हिला हिन्ना थेंदा यरूशलेमरी यहूदीगदेसे चुहड्नीन लसी खीला।

ओच्छे अर्गु यहुलला म्हिगदेला यारी जिम्मा पिन्ना भिसी परमेश्वरला आत्मासे सुड्बा मुला” भिसी भिजी।

12 चु ताम थे:सी थेरी मुबागदेदेन डन्से पावलदा यरूशलेमरी थाफेणो भिसी बिन्ती लजी। 13 तर पावलसे थेनीगदेदा “तिगदा एनीगदे क्रासी डाला सेम क्राणा लबा? प्रभु येशूला लागिरी डा इयाल्खानरी चिबा जे आहिन, तर यरूशलेमरी सिबारीनोन तयार मुला” भिसी जोहाब पिन्जी। 14 डन्से पावलला सेम दो:बारी आखम्माहेन्से “प्रभुसे जुन म्हन्बा मुला थे ताम पूरा तगै” भिसी डनी कुटिसी चिजी।

15 जमाहेन्से डनी हाड हाडला सामानगदे तयार लसी यरूशलेमपट्टि निजी। 16 डन्देन छ्याम कैसरिया भिबा ग्लाला कोड् कोड् प्रभुदा विश्वास लबागदेएनोन निजी। ओच्छे थेनीगदेसे डन्दा डाच्छाहेन्सेन प्रभुदा विश्वास लबा साड्प्रस भिबा ग्लाला मनासोन भिबा म्हिला दिमरी बास चिबाला लागिरी भजी।

पावलसे मण्डलीला मण्डलीदा च्याबा म्हिगदेदा हुप तबा

17 डनी यरूशलेमरी धोखमाहेन्से थेरी मुबा ज्योज्यो आले नाना आडागदे ताड्सी डन्दा मान लजी। 18 ओच्छे न्हडगरदड पावल डन्देन छ्याम याकूब मुबा ग्लारी निजी। थेरी जम्मान मण्डलीदा च्याबा म्हिगदे हुप तबा मुबा। 19 थेनीगदेदा लास्सो प्याफुल्ला भिसी पाड्नाहेन्से पावलसे थेनीगदेदा हाडसे लबा गेग्याम अर्गु यहुलला म्हिगदेला गुडरी परमेश्वरसे खाहड्बा गेगदे लजी भिबा जम्मान ताम थेनीगदेदा पाड्जी।

20 चु ताम थे:माहेन्से थेनीगदेसे परमेश्वरला जयजयकार लजी। जमाहेन्से थेनीगदेसे पावलदा चुहड् भिसी भिजी, “आले, चुरीनोन इयासीन इयाबारी आखम्बाधोनाला यहूदीगदेसे परमेश्वरदा विश्वास लसी मोशासे पिन्बा ठिम अन्छार ज्यना लसी भ्रमुला। 21 हाडसे अर्गु यहुल्सारी चिबा यहूदीगदेदा एनीगदेसे हाडला कोलागदेला खतना थालउ। ओच्छे मोशासे पिन्बा ठिम अन्छार आलसै तला भिसी लोप्बा मुला रो भिबा ताम थेनीगदेसे थे:बा मुला। 22 दाहेन्से तिग लसे? थेनीगदेसे हाड चुरी फेप्खजी भिबा पक्कान थे:ला। 23 थेतबासेलमा डन्से हाडदा पाड्बा अन्छार लउ, चुरी परमेश्वरदेन छ्याम कबुल लबा म्हि ब्लि डन्देन छ्याम मुला। 24 चुगदेदा भोर्सी हाडएनोन चुगदेदेन छ्यामनोन चोख्याब तउ, ओच्छे चुगदेदा तो:बा खर्च हाडसेन युसी पिन्गो। जमाहेन्से चुगदेसे क्रा भ्रैगै। हाडसे चुहड् लसी मोशासे पिन्बा ठिम अन्छार लबा म्हाड्सी हाडला बारेरी चुगदेसे थे:बा जम्मान ताम सत्य आहिन्बा चीम भिसी था याड्ला। 25 तर डन्से सल्लाह लसी प्रभुदा विश्वास लबा अर्गु यहुलला म्हिगदेदा हाडनीसे मूर्तिदा बलि पिन्बा तिगे स्हेगदे, कादेन खारे च्यासी साड्बा जन्तुला स्या थाचउ, ओच्छे स्हान्दोदेन छ्याम ब्रेल्सी थाभ्रउ भिसी चिठी भिबा मुला।”

26 जमाहेन्से न्हडगरदड थे म्हि ब्लिदा भोर्सी हाडदाएनोन थेनीगदेदेन छ्यामनोन चोख्याब लजी, ओच्छे चोख्याब लबा धिन खाड्मा जिन्ना भिबादेन थे म्हिगदेला लागिरी बलि खाड्मा फुल्बा भिसी परमेश्वरला मन्दिररी पूजा लबा म्हिदा पाड्बारी पावल परमेश्वरला मन्दिर न्हडरी वाड्जी।

पावलदा चुड्बा

27 कबुल पूरा लबा निसरे तबारी छ्याड्बा धुडरी एशियाला यहूदीगदेसे पावलदा परमेश्वरला मन्दिररी म्हाड्सी थेरी मुबा जम्मान म्हिगदेदा थीसी पावलदा चुड्जी। 28 थेनीगदेसे क्रिड्बान, “इस्त्राएलला म्हिगदे डन्दा हो लउ। तिगदा भिसम खानडदमान य्हाडला यहुलला म्हिगदेदेन य्हाडला ठिम ओच्छे चु ग्लाला बिरोध लसी लोप्सी भ्रबा म्हि चुनोन हिन्ना। चुदे जे आहिन, चुसे परमेश्वरला मन्दिररी अर्गु यहुलला म्हिगदेदा भसी चु चोखो ग्लादा नड्बा तना लबा मुला” भिसी भिजी। 29 तिगदा भिसम चु भन्दा डाच्छा थे म्हिगदेसे एफिसस भिबा ग्लाला त्रोफिमस भिबा म्हिदा पावलदेन छ्याम म्हाड्बा मुबा। थेतबासेलमा पावलसे थेंदा परमेश्वरला मन्दिररी भजी भिसी थे म्हिगदेसे म्हन्जी।

† फिलिपदा चा मुल चेलगदेदा हो लबाला लागिरी धम्बा मुबा। †† 21:8 मुल ६:१-७ † 21:10 मुल ११:२७-२८

30 जमाहेन्से शहर नाडनोन हल्ली खल्ली तसी म्हिगदे तिवखुरीन यार्बान खजी। ओच्छे पावलदा चुड्सी डुडबा छेड्बा लसी परमेश्वरला मन्दिरग्याम मडग्यार तेःसी तुरुन्तन मन्दिरला प्राप दुड्जी।

31 थेनीगदेसे पावलदा साड्बारी म्हाड्बा धुडरी यरूशलेम नाडनोन हल्ली खल्ली तबा मुला भिबा ताम रोमी सिपाहीगदेला हाकिमसे थेःजी।

32 जमाहेन्से थेसे तुरुन्तन सिपाहीदेन कप्तानगदेदा छ्यामनोन भोर्सी यार्बान पावलदा तोबान लबा ग्लारी खजी। पावलदा तोबागदेसे हाकिमदेन सिपाहीगदेदा प्राड्सी पावलदा तोबा ख्लाजी।

33 ओच्छे रोमी सिपाहीगदेला हाकिम पावलला डामरी खसी पावलदा चुड्जी। ओच्छे चुदा च्याल्दा न्हीसे खीगो भिसी कुल्जी। जमाहेन्से थेसे चु म्हि खाल हिन्ना? चुसे तिग लजी? भिसी इयोड्जी। 34 तर थेरी मुबा म्हिगदे न्हडरी कोडसे तिग ताम लसी क्रिड्सी हल्ली खल्ली लबासे लमा थेसे थे घटनाला बारैरी तिगै आघोनी। थेतबासेलमा थेसे पावलदा सिपाहीगदेला ब्यारेकरी भोगो भिसी कुल्जी। 35 पावल चामरी धोमा म्हिगदेसे पावलदा तोबारी खबासे लमा सिपाहीगदेसे थेदा पुड्सी भोर्जी। 36 तिगदा भिसम म्हिला हुलसे “चुदा साड्बारी तोःला” भिसी क्रिड्बान लिच्छा लिच्छा भ्रबा मुबा।

म्हिला हुलदा पावलसे हाडला बारैरी पाड्बा

37 सिपाहीगदेला ब्यारेक न्हडरी भोर्बारी छ्याड्मा पावलसे सिपाहीगदेला हाकिमदा “हाडसे डादा ताम पाड्पुड्सम तिगै ताम पाड्बा सेम मुला” भिसी भिमा सिपाहीगदेला हाकिमसे पावलदा चुहड् भिसी भिजी, “एसे ग्रीक ग्योड् सेमुला? 38 डाच्छा रोमी सरकारदा बिरोध लसी हजार ब्लि बिरोध लबागदेदा तोडतोडबा ग्लारी भोर्सी निबा मिश्री एनोन आहिन?” 39 तर पावलसे “डा मी किलिकिया भिबा ग्लाला टार्सस भिबा शहरला यहूदी हिन्ना, डा जजाबा शहरला म्हि आहिन। थेतबासेलमा डादा चु म्हिगदेदा तिगै पाड्पुड्गो” भिसी बिन्ती लजी। 40 जमाहेन्से “तला” भिसी भिमाहेन्से पावल चामरी राप्सी म्हिगदेदा यासे चाल लजी, ओच्छे म्हिगदे कुटिसी चिजी। जमाहेन्से थेसे हिब्रू ग्योड्री † चुहड् भिसी पाड्बारी छ्याड्जी।

22 “डाला ह्योगदे हाडनीला ओन्हाडरी डाड डाला बारैरी पाड्बारी छ्याड्बा ताम इयान्गो।” 2 पावलसे हिब्रू ग्योड्री ताम पाड्बा थेःसी थेनीगदे झन कुटिसी चिजी।

3 जमाहेन्से पावलसे चुहड् भिसी पाड्बारी छ्याड्जी, “डा किलिकिया भिबा ग्लाला टार्सस शहररी न्हबा यहूदी हिन्ना। तर डा यरूशलेम शहररी गमलिएल भिबा म्हिला कुरी छर्बा हिन्ना। गमलिएल गुरुग्यामनोन डाड म्हाडला आखे म्हेमेला ठिम अन्धार लोप्तोःबा जम्मान ताम लोप्जी। तिनी हाडनीसे सेमहेन्से परमेश्वरदा खाहड् लसी तेन्बा मुला डाडनोन थेहड् लसीन तेन्बा मुबा। 4 ओच्छे डाड थार्बा याड्बा ग्यामरी भ्रबा म्हिगदेदा सिबाधोनान तोसी हेम्फेबेदेन मिडम्हेमे न्हीदान चुड्सी इयाल्खानरी झाड्जी। †15 डाड पाड्बा चु ताम सत्य हिन्ना भिसी परमेश्वरला मन्दिररी पूजा लबा मुल म्हिदेन यहूदीगदे हुप तबा दिमला गन्बागदेसेनोन पाड्खम्ला। थेनीगदेसेन दमस्कस भिबा ग्लारी मुबा यहूदी ज्योज्यो आलेगदेदा चिठी भिसी डादा पुड्जी। थे चिठीरी प्रभु येशूदा विश्वास लबागदे जम्मान चुड्बा अधिकार डादा पिन्बा मुबा। थेतबासेलमा थेनीगदेदा खीसी यरूशलेमरी भसी सजाय पिन्बा सेमसे डा दमस्कसरी निबा मुबा।

6 “डा दमस्कसला डामरी धोमा ओस्पन धिनी गडसल तजी तला, थेनोन धुडरी स्वर्गग्याम तिवखुरीन डाला क्युनोन म्हाल खसी इवालड् तजी। 7 डा सरी हिल्ली, ओच्छे डादा ‘शाऊल, शाऊल, एसे डादा तिगदा दुख पिन्बा?’ भिबा काड थेःजी।

8 “ओच्छे डाड ‘प्रभु, हाड खाल हिन्ना?’ भिसी इयोड्मा, थेसे डादा ‘एसे दुख पिन्बान लबा नासरतला येशू डानोन हिन्ना’ भिसी सुड्जी। 9 डादेन छ्याम मुबागदेसे थे म्हाल मी म्हाड्जी, तर डादेन छ्याम ताम पाड्बाला काड भिसम आथेःनी।

10 “थेनोन धुडरी डाड ‘प्रभु, दाहेन्से डाड तिग लउ?’ भिसी भिमा, प्रभुसे डादा ‘ए रेःगो ओच्छे दमस्कस शहररी निउ, एसे लतोःबा जम्मान गे थेरी

पाड्सी पिन्ना’ भिसी सुड्जी। 11 थे म्हालसे लमा डाड तिगै आम्राड्नी। थेतबासेलमा डादेन छ्याम मुबागदेसे डादा यारी चुड्सी दमस्कस शहररी भजी।

12 “थे शहररी हननिया भिबा मोशासे पिन्बा ठिम अन्धार भ्रबा म्हि गिक मुबा। थेदा दमस्कसरी चिबा जम्मान यहूदीगदेसे मान लमुबा। 13 थेनोन म्हि डा मुबा ग्लारी खसी डाला डामरी राप्सी डादा ‘शाऊल आले, एला मी दोःसी म्हाड्’ भिसी पाड्मैछ्याम डाड म्हाड्खम्जी, ओच्छे डाड थेदा म्हाड्जी।

14 “ओच्छे थेसे चुहड् भिसी भिजी, ‘म्हाडला आखे म्हेमेला परमेश्वरला सेम घोबादेन परमेश्वरसे म्हन्बा अन्धार भ्रबा म्हिदा † म्हाड्बारी ओच्छे थेसे पाड्मा थेःबारी हाडदा धम्बा मुला। †15 तिगदा भिसम हाडसे थेला बारैरी म्हाड्बादेन थेःबा तामला साक्षी दोसी हाडसे जम्मान म्हिगदेदा थेःना लतोःबा मुला। 16 थेतबासेलमा दाहेन्से तिगदा भ्रान्से? रेःगो, बप्तिस्मा किन्गो, ओच्छे थेला मिनरी विश्वास लमाहेन्से हाडला पाप धाला।’

17 “यरूशलेमरी दोःसी खमाहेन्से परमेश्वरला मन्दिररी प्रार्थना लबा धुडरी सेम गिक तसी डा एकोहोरो तजी। 18 एकोहोरो तबा धुडरी डाड प्रभुदा म्हाड्जी, थेसे डादा ‘योना लसी ए यरूशलेमग्याम थोन्सी निउ। तिगदा भिसम डाला बारैरी एसे पाड्मा थेनीगदेसे विश्वास आल’ भिसी सुड्जी।

19 “तर डाड चुहड् भिसी पाड्जी, ‘प्रभु, जम्मान यहूदीगदे हुप तबा दिमरी निसी हाडदा विश्वास लबागदेदा तोबा ग्याड्बा लसी इयाल्खानरी झाड्बा ताम यहूदीगदे जम्मान था मुला। 20 ओच्छे हाडला बारैरी पाड्बा स्तिफनसदा साड्बारी डाएनोन दिक्सी डामरीन राप्सी स्तिफनसदा साड्बागदेला क्वान खूड्सी चिबा मुबा।’ 21 “जमाहेन्से प्रभुसे डादा ‘ए निउ, तिगदा भिसम डाड एदा अर्गु य्हलला म्हिगदे मुबा ग्लारी थारेड थारेडधोना पुड्ला’ भिसी सुड्जी।”

22 पावलसे चुहड् पाड्तेधोना थेनीगदेसे इयान्बान मुबा, ओच्छे इयान्ना इयान्ना “चुहड्बा म्हिदा मी जम्बुलिडरी थान्बारी आत। तिगदा भिसम सोबा भन्दा सिबान ज्यबा तला” भिसी थेनीगदे क्रिड्बारी छ्याड्जी। †23 ओच्छे थेनीगदे हाड हाडला क्वान स्युसी साप्रा स्वाबान क्रिड्जी।

24 जमाहेन्से सिपाहीगदेला हाकिमसे चुहड् भिसी कुल्जी, “चु म्हिगदेसे तिगदा चुदा बिरोध लसी क्रिड्बा चीम भिबा ताम था याड्बाला लागिरी थेदा ब्यारेक न्हडरी भसी कोर्से तोबान इयोड्बा छर्बा लउ।” 25 सिपाहीगदेसे पावलदा ढिला छोसे खीबारी छ्याड्मा पावलसे हाडला डामरी राप्सी चिबा कप्तानदा “तिग रोमीला ठिम अन्धार तिगै दोष आरेबा रोमी म्हिदा कोर्से तोबा ठीक हिन्ना?” भिसी इयोड्जी।

26 चु ताम थेःमाहेन्से कप्तान सिपाहीगदेला हाकिम मुबा ग्लारी खसी, “हाडसे चु तिग लबारी छ्याड्बा? चु म्हि मी रोमी म्हि चीम” भिसी भिजी।

27 जमाहेन्से थे हाकिम खसी पावलदा “लु, डादा पाड्गो, ए पक्कान रोमी म्हि हिन्ना?” भिसी इयोड्मा पावलसे “हिन्ना” भिसी भिजी। 28 ओच्छे थे हाकिमसे “डाड ल्हानान टाडगा फासी डा चु य्हुलाला म्हि दोबा हिन्ना” भिसी जोहाब पिन्मा, पावलसे “तर डा मी न्हमान रोमी म्हि हिन्ना” भिसी भिजी।

29 पावलदा इयोड्बा छर्बा लबारी तयार तबागदे जम्मान थेंग्याम तुरुन्तन लिच्छापट्टि लेःजी। ओच्छे पावल रोमी म्हि चीम भिबा ताम था याड्सी सिपाहीगदेला हाकिमएनोन लोड्जी। तिगदा भिसम पावलदा खीगो भिसी थेसे कुल्बा मुबा।

पावलदा यहूदीगदेला अदालतरी भोर्बा

30 न्हडगरदड यहूदीगदेसे तिगदा बिरोध लजीम भिबा ताम घोबा सेम लसी थेदा ब्लसी पिन्जी। ओच्छे परमेश्वरला मन्दिररी पूजा लबा जम्मान मुल म्हिगदेदेन यहूदीगदेला अदालतला नेतागदेदा पोप तउ भिसी कुल्जी। जमाहेन्से पावलदा अदालतरी भसी थेनीगदेला डाच्छापट्टि राप्पुड्जी।

† परमेश्वरसे म्हन्बा अन्धार भ्रबा म्हि चा येशू खीष्ट हिन्ना। यहूदीगदेसे बिरोध थालगो भिसी पावलसे चुरी येशूला मिन आपाड्नी। †† 22:14 मुल ९:१७ †† परमेश्वरसे पावलदा अर्गु य्हलला म्हिगदे मुबा ग्लारी निउ भिसी सुड्बा ताम थेःसी यहूदीगदेसे चा अर्गु य्हलला म्हिदेन यहूदीगदे गिकनोन हिन्ना भिसी म्हन्सी पावल म्हाड्सी यहूदीगदेदा झन बोमो खजी।

23 पावलसे अदालतरी मुबागदे जम्मादान च्यासी, “ज्योज्यो आलेगदे, तिनीला धिनधोना डा परमेश्वरला डाच्छा ज्यबा सेमसे भ्रबा मुला” भिसी भिजी।² चु ताम थे:सी परमेश्वरला मन्दिररी पूजा लबा मुल म्हि हननियासे पावलला डामरी राप्सी चिबागदेदा थेला ग्रम्बारी तोउ भिसी कुल्जी।³ जमाहेन्से पावलसे थेदा “हाडसे हाडदान ज्यबा म्हन्बा म्हि! च्यागो, एदाएनोन परमेश्वरसे सजाय पिन्ना। ए मोशासे पिन्बा ठिम अन्छार डाला निसाफ लबारी चिसीनोन मोशाला ठिमदा खलासी एसे डादा तोउ भिसी कुल्बा?” भिसी भिजी।

⁴ पावलला डामरी राप्सी चिबागदेसे पावलदा “तिग एसे परमेश्वरला मन्दिररी पूजा लबा मुल म्हिला बेइज्जत लबा?” भिसी भिजी।

⁵ पावलसे थेनीगदेदा “डाला ज्योज्यो आलेगदे, थे परमेश्वरला मन्दिररी पूजा लबा मुल म्हि हिन्ना भिबा डादा था आरेबा। तिगदा भिसम ‘एसे हाडला खुलला नेताला बारेरी नइबा ताम थापाङ्गो’ भिसी परमेश्वरला बचनरी भिबा मुला” भिसी भिजी।[†]

⁶ तर अदालतरी सदुकीगदेला समूहदेन फरिसीगदेला समूह चीम भिबा था याड्सी पावलसे “ज्योज्यो आलेगदे, डा फरिसीला कोला फरिसीन हिन्ना। डाइ सिबागदे दो:सी सोला भिसी आश लबासे लमा डादा चु मुद्दा तबा हिन्ना” भिसी भिजी।

⁷ पावलसे थेहड् भिमाहेन्से फरिसीगदेदेन सदुकीगदेला ताम आढिकना थेनीगदे फेजी।⁸ तिगदा भिसम सदुकीगदेसे म्हि सिबाग्याम दो:सी आसो भिबादेन स्वर्गदूत ओच्छे आत्मा भिबा तिगै आरे भिसी भिमुबा। तर फरिसीगदेसे चा चु जम्मान मुला भिसी विश्वास लमुबा।

⁹ जमाहेन्से थेरी ल्हानान हल्ली खल्ली तजी। थेतबासेलमा फरिसी समूहला कोइ कोइ धर्मगुरुगदे राप्सी सदुकीगदेला बिरोध लबान, “डन्से चु म्हिला तिगै दोष आस्याजी। तर आत्मा अथवा स्वर्गदूतसेन चु म्हिदा चुहड् पाड्बा हिन्सम तिग तजी?” भिसी भिजी।¹⁰ थेरी थेनीगदेला ताम आढिकना छेबा बड्बा तबासे लमा पावलदा थेनीगदेसे तोबा ग्याड्बा लसी साइला भिसी सिपाहीगदेला हाकिम लोड्सी पावलदा थेग्याम भसी ब्यारेक न्हडरी भोगो भिसी सिपाहीगदेदा कुल्जी।

¹¹ जमाकुनु म्हुनड प्रभु पावलला डामरी राप्सी, “पावल एसे भड लउ। तिगदा भिसम यरूशलेम शहररी एसे डाला बारेरी पाड्बा हड् लसी रोमरीनोन डाला बारेरी पाड्तो:ला” भिसी सुड्जी।

पावलदा साइबारी जाल लबा

¹² जमाहेन्से न्हडगरदड स्होरी यहूदीगदे हुप तसी पावलदा जाल लसी साइबारी सल्लाह लजी। ओच्छे पावलदा आसाइतेधोना तिगै चबा थुड्बा आल भिसी ग्रान फाजी।¹³ चुहड् लसी जाल लबा म्हिगदे बोगल न्ही भन्दा ल्हानान मुबा।¹⁴ थेनीगदे परमेश्वरला मन्दिररी पूजा लबा मुल म्हिगदेदेन यहूदी गन्बागदे मुबा ग्लारी निसी चुहड् भिसी भिजी, “डन्से पावलदा आसाइतेधोना तिगै आच भिसी ग्रान फाबा मुला।¹⁵ थेतबासेलमा हाडनीदेन अदालत ढिक्सी सिपाहीगदेला हाकिमदा चुहड् भिसी पाङ्गो, चुला मुद्दाला बारेरी अझ ज्यना लसी छिनब लतो:ला भिबा स्होसी थेदा ते:सी भउ। ओच्छे थे चुरी खना खनान डन्से थेदा ग्यामरीन साइला।”

¹⁶ तर पावलला कोनसे चुहड्बा जाल लबा था याड्सी ब्यारेक न्हडरी निसी पावलदा पाड्सी पिन्जी।¹⁷ जमाहेन्से पावलसे कप्तानगदे न्हडला गिकदा इयोइसी, “चु भ्योन म्हिदा सिपाहीगदेला हाकिम मुबा ग्लारी ससी पिन्गो। तिगदा भिसम चुसे थेदा पाड्तो:बा ताम मुला” भिसी भिजी।

¹⁸ थेतबासेलमा कप्तानसे थेदा सिपाहीगदेला हाकिम मुबा ग्लारी भोर्सी, “इयाल्खानरी मुबा पावलसे डादा इयोइसी चु भ्योन म्हिदा हाड मुबा ग्लारी भोगो भिसी पाड्जी। तिगदा भिसम चुसे हाडदेन छ्याम तिगै ताम पाड्बा सेम मुला रो” भिसी भिजी।

¹⁹ जमाहेन्से सिपाहीगदेला हाकिमसे थे भ्योन म्हिदा यारी चुड्सी कुनी गिकरी भोर्सी, “एसे डादा तिग ताम पाड्बारी म्हाइबा?” भिसी इयोइजी।²⁰ ओच्छे थे भ्योन म्हिसे हाकिमदा चुहड् भिसी भिजी, “यहूदीगदेसे

† 23:5 प्रस्था २२:२८

पावलला बारेरी अझ ज्यना लसी इयोइबा छार्बा लतो:ला भिबा निहुँ लसी न्हडगर थेदा अदालतरी भसी पिन्गो भिसी हाडदा बिन्ती लतो:ला भिसी सल्लाह लबा मुला।²¹ तर हाडसे थेनीगदेला ताम थाड्यान्गो। तिगदा भिसम बोगल न्ही भन्दा ल्हानान म्हिगदेसे थेदा आसाइतेधोना तिगै चबा थुड्बा आल भिसी ग्रान फासी थेदा साइबारी खुड्सी चिबा मुला। दान्दे थेनीगदेसे हाडसे तिग सुड्बा चीम थे ताम जे भ्रान्सी चिबा मुला।”

²² जमाहेन्से सिपाहीगदेला हाकिमसे थे भ्योन म्हिदा “एसे डादा पाड्बा चु ताम स्हान्दो खालैदा थापाङ्गो” भिसी पुड्जी।

पावलदा कैसरिया भिबा ग्लारी पुड्बा

²³ जमाहेन्से सिपाहीगदेला हाकिमसे कप्तानगदे न्हडला न्हीदा इयोइसी चुहड् भिसी भिजी, “तिनी म्हुनना नौ बजेरीक्यार ग्यार्जा न्ही सिपाहीगदेदेन बोगल सोमसे च्युइ ताथोरी क्रे:बा म्हिगदे ओच्छे ग्यार्जा न्ही भाला पुड्बा म्हिगदेदा कैसरिया भिबा ग्लाधोना निबारी ठीक लसी थान्गो।²⁴ ओच्छे पावलला लागिरीनोन ता गिक ठीक लसी थेदा बिरोध लबा म्हिगदेग्याम जोगब लसी यहूदिया अज्चलाधीश फेलिक्स मुबा ग्लारी भोगो।”²⁵ थेसे चुहड् भिसी चिठी भिजी,

²⁶ “माननीय अज्चलाधीश फेलिक्सदा क्लौडियस लुसियसग्याम प्याफुल्ला!

²⁷ चु म्हिदा यहूदीगदेसे चुड्सी साइबारी छ्याइबा मुबा। तर चु रोमी म्हि चीम भिसी डाइ था याड्सी सिपाहीगदेदेन छ्याम निसी चुदा जोगब लबारी थेनीगदेला याग्याम फेसी भजी।^{††28} तिग तामरी चुदा थेनीगदेसे दोष लजीम भिसी घोबाला लागिरी डाइ चुदा थेनीगदेला अदालतरीनोन भोर्जी।

²⁹ थेनीगदेसे हाडलान ठिमला इयोइबा तामला बारेरी चुदा दोष लजीम। तर डाइ चुदा साइतो:बा अथवा इयाल्खानरी झाइतो:बा हड्बा तिगै दोष आस्याजी।³⁰ चु म्हिदा जाल लसी साइबारी छ्याइबा ताम था याड्सी डाइ चु म्हिदा तुरुन्तन हाड मुबा ग्लारी पुड्खबा हिन्ना। ओच्छे चुदा बिरोध लबागदेदा हाडला डाच्छापट्टि बयान पिन्गो भिसी डाइ पाड्बा मुला।”

³¹ जमाहेन्से सिपाहीगदेला हाकिमसे कुल्बा अन्छार पावलदा सिपाहीगदेसे म्हुनडनोन एन्टिपाट्रिस भिबा शहररी भोर्जी।³² न्हडगरदड ताथोरी क्रे:बा सिपाहीगदेदा पावलदेन छ्यामनोन निउ भिसी भिजी। ओच्छे भाला पुड्बा सिपाहीगदे चा ब्यारेकरी दो:सी खजी।³³ कैसरिया भिबा ग्लारी धोमाहेन्से थेनीगदेसे कैसरियाला मुल हाकिमदा चिठी पिन्जी। ओच्छे पावलदाएनोन थेला डाच्छापट्टि भजी।³⁴ थेसे थे चिठी पढब लसी जिन्माहेन्से पावलदा ए खजिबा जिल्लाला हिन्ना भिसी इयोइमा, पावल किलिकिया भिबा ग्लाला चीम भिबा था याड्जी।³⁵ थेसे “एदा दोष लबागदे खमाहेन्से डाइ एला मुद्दा च्याला” भिसी भिजी। ओच्छे पावलदा हेरोद † ग्लेसे स्होबा ग्लेखाडरी थान्गो भिसी कुल्जी।

पावलदा फेलिक्स भिबा मुल हाकिमला डाच्छापट्टि भबा

24 डारे लिच्छा परमेश्वरला मन्दिररी पूजा लबा मुल म्हि हननियादेन कोइ कोइ यहूदी गन्बागदे तर्तुल्लस भिबा वकीलदेन छ्याम थेरी खजी। थेनीगदेसे पावलदा बिरोध लबा ताम मुल हाकिम फेलिक्सदा घोना लजी।² पावलदा थेरी भमाहेन्से तर्तुल्लससे थेला बिरोध लसी चुहड् भिबारी छ्याइजी,

“माननीय फेलिक्स हाडग्याम डन्से ल्हानान शान्ति याड्बा मुला। ओच्छे हाडसे डन्ना खुलला लागिरी ल्हानान ज्यबा गेगदे लबा मुला।³ चु ताम डन्से जम्मान ग्लारी सदन ढन्सी हाडदा ल्हानान धन्यवाद पिन्बा मुला।⁴ डादा हाडदेन छ्याम ल्हानान ताम पाड्बा सेम आरे। तसैनोन दया लसी हाडसे डन्ना ताम गिक इयान्गो।

⁵ “तिगदा भिसम चु म्हि जम्बुलिड नाडलान यहूदीगदेला गुडरी हल्ली खल्ली लबादेन खानडदमान दुख पिन्सी भ्रबा नासरी भिबा समूहला मुल नेता हिन्ना।⁶ ओच्छे चुसे परमेश्वरला मन्दिरदाएनोन नइबा तना लबारी

†† 23:27 मुल १६:३७; २२:२४-२९ † चु हेरोद चा ग्रैन हेरोद हिन्ना। चु हेरोद येथू न्हाहेन्से सिजी। मत्ती २ अध्यायरी स्होगी।

छ्याइबान मुबा। थेनोन धुइरी डन्से चुदा चुइजी। डन्ना ठिम अन्धार निसाफएनोन लसेला मुबा।⁷ तर सिपाहीगदेला हाकिम लुसियससे डनी मुबा ग्लारी खसी जबरजस्ती थेदा डनीग्याम ब्यन्सी भोजी।⁸ ओच्छे चुदा बिरोध लबागदेदा हाडला डाच्छा निउ भिसी कुल्जी।[†] दाहेन्से डन्से चुदा बिरोध लसी पाइमा ठीक हिन्ना कि आहिन भिसी हाडसेनोन इयोइबा छार्ब लमाहेन्से था याइला।”

⁹ थेदेन छ्याम खबा यहूदीगदेसेनोन “चु जम्मान ताम ठीक हिन्ना” भिसी भिजी।

¹⁰ अज्जलाधीशसे पावलदा ताम पाइपुइमाहेन्से पावलसे चुइइ भिसी पाइजी, “हाड ल्हानान दिडहेन्से यहूदी खुलला मुल हाकिमदेन न्यायाधीश हिन्ना भिबा ताम डाइ था याइजी। थेतबासेलमा हाडला डाच्छापट्टि डादा बिरोध लबा तामला बारेरी पाइम्याइमा डा ल्हानान ताइबा मुला।¹¹ डा परमेश्वरला मन्दिररी परमेश्वरदा तेन्बारी यरूशलेमरी निबा च्युक न्ही धिन भन्दा ल्हाना तबा आरे। चु ताम हाडसेनोन था याइखम्ला।¹² ओच्छे चुगदेसे डाइ खाले म्हिगदेदेन छ्याम छलफल लबाएनोन स्याप्बा आरे। ओच्छे परमेश्वरला मन्दिरदेन यहूदीगदे हुप तबा दिमरी ओच्छे शहररी हुल दडगा लबाएनोन स्याप्बा आरे।¹³ ओच्छे दान्दे चुगदेसे डादा लबा दोषला तिगै सत्य ताम हाडदा उन्बारी आखम।¹⁴ “तर चु ताम डाइ हाडलान डाच्छापट्टि पाइखम्ला। डा थार्बा याइबा ग्यामरी भ्रसी डन्ना आखे म्हेमेला परमेश्वरदा तेन्बा मुला। चुनोन थार्बा याइबा ग्यामदा चुगदेसे लुसीला ताम पाइबा म्हिगदेला समूह भिसी भिमुला। तर डाइएनोन थेनीगदे भ्रबा ग्यामरीन भ्रसी मोशाला ठिमरी मुबा तामदेन अगमवक्तासे भ्रिबा किताबला जम्मान तामरी विश्वास लबान मुला।¹⁵ थेनीगदेसे हइ लसीन परमेश्वरसे म्हन्बा अन्धारला गे लबा म्हिदेन परमेश्वरसे म्हन्बा अन्धारला गे आलबा म्हि न्हीनोन सिबाग्याम दोःसी सोला भिसी डाइएनोन परमेश्वरथोरी आश लबा मुला।¹⁶ थेतबासेलमा डाइ सदन परमेश्वरदेन म्हिगदेला डाच्छापट्टि ज्यबा सेम थोसी भ्रबा मुला।

¹⁷ “ल्हानान दिड लिच्छा डा हाडलान यहूदीगदेदा टाडगा पिन्सी हो लबारीदेन परमेश्वरदा भेटी फुल्बारी यरूशलेमरी खबा मुबा।¹⁸ परमेश्वरला मन्दिररी भेटी फुल्बान लबा धुइरी चुगदेसे डादा स्याप्बा हिन्ना। थे धुइरी डाइ चोख्याब तबारी लतोःबा जम्मान गे लसी जिन्बा मुबा। चुगदेसे डादा परमेश्वरला मन्दिररी स्याप्पा डादेन छ्याम खाले म्हिला हुल आरेबा ओच्छे हुल दडगाएनोन तबा आरेबा।¹⁹ तर एशिया भिबा ग्लाय्याम खबा कोइ कोइ यहूदीगदेसे डादा परमेश्वरला मन्दिररी म्हाइबा मुबा। चुदे डाला बिरोधरी तिगै ताम पाइतोःबा मुसम थेनीगदे चा हाड मुबा ग्लारी खसी डाला बिरोधरी उजुर लदोमुबा।²⁰ आहिन्सम, डा यहूदी अदालतला डाच्छापट्टि राप्बा धुइरी डाला तिग दोष स्याप्पी थे दोष चुरी मुबा म्हिगदेसेन पाइगै।²¹ तर डाइ थेनीगदेला डाच्छा क्रिइसी चु ताम जे पाइबा हिन्ना, ‘सिबागदे दोःसी सोला’ भिसी विश्वास लबासे लमा तिनी हाडनीला डाच्छा डादा चु मुद्दा तबान मुला।”

²² चु तामला बारेरी फेलिक्सदा जम्मान ताम था तबासे लमा थेसे चु ताम थेःमाहेन्से पावलदा बिरोध लबागदेदा “सिपाहीगदेला हाकिम लुसियस चुरी खमाहेन्से डाइ एनीगदेला मुद्दा छिनब लसी पिन्ना” भिबा स्होसी पुइजी।²³ जमाहेन्से फेलिक्ससे कप्तानदा “पावलदा ज्यना लसी खुइसी चिउ, तर थेदा ल्हानान कडाएनोन थालउ। ओच्छे थेदा तोःबा स्हेगदे थेला ह्योगदेसे पिन्बारी खमा थेला ह्योगदेदा रोकब थालउ” भिसी कुल्जी।

फेलिक्सदेन द्रुसिल्लाला डाच्छापट्टि पावल

²⁴ तिगै धिन लिच्छा फेलिक्ससे हाडला यहूदी म्रिड द्रुसिल्लादा छ्यामनोन भसी खजी, ओच्छे थेसे पावलदा इयोइसी ख्रीष्ट येशूदा विश्वास लबा बारेला ताम पावलग्याम इयान्जी।²⁵ पावलसे थेदा परमेश्वरदा सेम निबा गे लतोःबा मुला ओच्छे हाडसे हाडदान तहरी थान्सी परमेश्वरसे लबा निसाफला बारेरी पाइमा फेलिक्स आत्तेब तसी पावलदा “दान्देदा ए निउ,

† “डन्ना ठिम अन्धार...हाडला डाच्छा निउ भिसी कुल्जी।” चु ताम ल्हाना हइबा ग्रीक बाइबलरी आरे।

तजी भिसम डाइ एदा इयोइला” भिसी भिजी।²⁶ पावलसे थेदा टाडगा पिन्ना वा भिबा आश लसी पावलदा धुइ धुइरी इयोइसी ताम लमुबा।

²⁷ न्ही दिड लिच्छा फेलिक्सला ग्लारी पकिअस फेस्तस भिबा हाकिम खजी। ओच्छे फेलिक्ससे यहूदीगदेदा ताइना लबाला लागिरी पावलदा इयाल्खानरीन थान्सी निजी।

पावलला मुद्दा फेस्तससे च्याबा

25 फेस्तस मुल हाकिम दोबा सोमरे लिच्छा कैसरियाग्याम यरूशलेमरी निजी।² थेरी परमेश्वरला मन्दिररी पूजा लबा मुल म्हिगदेदेन यहूदी गन्बागदेसे पावलला बिरोधरी दोष लजी।³ डन्ना लागिरी पावलदा यरूशलेमरी पुइखसी डन्दा दया लउ भिसी बिन्ती लजी। तिगदा भिसम थेनीगदेसे पावलदा ग्यामरी खना खनान साइबारी जाल लबान मुबा।⁴ तर फेस्तससे थेनीगदेदा चुइइ भिसी पाइजी, “पावलदा कैसरियारीन इयाल्खानरी थान्बा मुला, ओच्छे डाएनोन योनान कैसरियारी दोःसी निबा सेम मुला।⁵ एनीगदे न्हडला कोइ कोइ नेतागदे डादेन छ्यामनोन कैसरियारी भ्रउ, ओच्छे थे म्हिसे तिगै आज्यबा गे लबा मुसम थेरी थेला दोष उन्नो।”⁶ जमाहेन्से थेनीगदे मुबा ग्लारी फेस्तस भ्रेःरे च्युइरे भन्दा ल्हाना आचिना कैसरियारी दोःसी निजी। ओच्छे न्हडगरदड निसाफ लबा ठिरी चिसी पावलदा भसी खउ भिसी कुल्जी।⁷ पावल धोखमाहेन्से यरूशलेमग्याम खबा यहूदीगदे थेला क्युसीन राप्पी। ओच्छे पावलला बिरोधरी हिन्बा आहिन्बा तामला दोष लजी। तर थेनीगदे हाडसेन पाइमा सत्य हिन्ना भिसी उन्बारी आखम्नी।

⁸ जमाहेन्से पावलसे हाडला ताम पाइबान, “डाइ यहूदीगदेदा मोशासे पिन्बा ठिम, परमेश्वरला मन्दिरला बिरोधरीदेन रोमी ग्याल्बो कैसरला बिरोधरी तिगै आज्यबा गे लबा आरे” भिसी भिजी।

⁹ तर फेस्तससे यहूदीगदेदा ताइना लबाला लागिरी पावलदा “तिग ए यरूशलेमरी निसी थेरी डाला डाच्छा चु तामला बारेरी निसाफ लसी पिन्नी भिसी म्हन्बा मुला?” भिसी इयोइजी।

¹⁰ तर पावलसे चुइइ भिसी भिजी, “डा रोमी ग्याल्बो कैसरसे निसाफ लबा ठिला डाच्छा राप्पी चिबान मुला। थेतबासेलमा डाला निसाफ चुरीन ततोःला। डाइ यहूदीगदेदा तिगै नइबा गे लबा आरे भिबा ताम हाडदा थानोन मुला।¹¹ चुदे डाइ डादा साइतोःबाधोनाला गे लबा मुसम डादा साइसैनोन ठीक मुला। तर डादा यहूदीगदेसे लबा दोषला तिगै सत्य ताम उन्बारी आखम्सम डादा खालैसे थेनीगदेला यारी जिम्मा पिन्बारी आम्याइ। तर रोमी ग्याल्बो कैसरसेन डाला चु मुद्दा च्यासी पिन्नी भिबा डाला बिन्ती मुला।”

¹² जमाहेन्से फेस्तससे हाडदा सल्लाह पिन्बा म्हिगदेदेन छ्याम सल्लाह लसी, “एसे रोमी ग्याल्बो कैसरदा बिन्ती लजी। थेतबासेलमा ए रोमी ग्याल्बो कैसर मुबा ग्लारीन नितोःला” भिसी भिजी।

अग्रिपास भिबा ग्लेदेन फेस्तससे लबा सल्लाह

¹³ तिगै धिन लिच्छा अग्रिपास ग्लेदेन थेला आडा बरनिकी फेस्तसदा मान लबारी कैसरियारी खजी।¹⁴ थेरी थेनीगदे ल्हानान धिन चिमाहेन्से फेस्तससे पावलला मुद्दा ग्लेदा उन्बान चुइइ भिसी भिजी, “चुरी फेलिक्ससे इयाल्खानरी थान्बा म्हि गिक मुला।¹⁵ थेला बारेरी डा यरूशलेमरी निमा परमेश्वरला मन्दिररी पूजा लबा मुल म्हिदेन यहूदी गन्बागदेसे थेला बिरोधरी दोष लसी थेदा सिबाला सजाय पिन्तोःला भिसी डादा पाइबा।

¹⁶ तर डाइ थेनीगदेदा चुइइ भिसी भिजी, ‘दोष आस्याप्तेधोना खाले म्हिदा सिबाला सजाय पिन्बा रोमीगदेला ठिम आरे। ओच्छे दोष लबा म्हिला ओन्छाडरी दोष तबा म्हिसे हाडला बारेरी ताम पाइम्याइतोःला।’

¹⁷ थेतबासेलमा थेनीगदे चुरी खमाहेन्से डाइ योना लसीन न्हडगरदडनोन निसाफ लबा ठिरी चिसी थेदा भसी खउ भिसी कुल्जी।¹⁸ जमाहेन्से पावलदा दोष लबा म्हिगदेसे राप्पी पावलसे लबा आज्यबा गेला दोष उन्ना भिसी डाइ म्हन्बा मुबा। तर थेनीगदेसे डाइ म्हन्बा अन्धार तिगै दोष उन्बारी आखम्नी।¹⁹ बरु थेनीगदे न्हडरी आढिकबा ताम चा सिसी जिन्बा येशूला बारेरीदेन थेनीगदेदान धर्मला बारेरी मुबा। ओच्छे पावलसे चा येशू अइ

सोबान मुला भिंसी पाड्बा मुबा।²⁰ जमाहेन्से चु ताम तिग हिन्ना भिंसी सत्य ताम था याड्बारी डा अलमल तबासे लमा चु तामला बारेरी निसाफ लबारी यरूशलेमरी निबा सेम मुला कि भिंसी डाइ पावलदा इयोइजी।²¹ तर पावलसे रोमी ग्यालबोग्याम छिनब आततेधोना डादा चुरीन इयाल्खानरी थान्गो भिंसी बिन्ती लबासे लमा थेदा रोमी ग्याल्बो कैसर मुबा ग्लारी आपुइतेधोना चुरीन थान्गो भिंसी कुल्जी।

²² जमाहेन्से अग्रिपाससे फेस्तसदा “चु म्हिला ताम डादाएनोन इयान्बा सेम मुला” भिंसी भिमा फेस्तससे अग्रिपासदा “थेला ताम हाडसे न्हडगर इयान्म्याड्ला” भिंसी भिजी।

पावलदा अग्रिपास भिबा ग्लेला डाच्छा भोर्बा

²³ न्हडगरदड अग्रिपास ग्लेदेन थेला आडा बरनिकी ओच्छे सिपाहीगदेला हाकिमगदे, शहरला मुल नेतागदेदेन छयामनोन सभा दिम न्हडरी वाड्जी, थेरी म्हिगदेसे थेनीगदेदा ल्हानान मान लजी। जमाहेन्से फेस्तससे पावलदा भसी खड भिंसी कुल्बासे लमा पावलदा थेरी भजी।²⁴ जमाहेन्से फेस्तससे चुहड् भिंसी भिजी, “ग्ले अग्रिपासदेन चुरी य्हाडदेन छयाम मुबा जम्मान ज्योज्यो आलेगदे, हाडनीसे म्राड्बा चु म्हिदा जम्मान यहूदीगदेसे क्रिड्बान, ‘चु म्हिदा साइनोन तो:ला’ भिंसी यरूशलेमरीदेन चुरी डादाएनोन थेसे हाडला ताम पाड्बा मुबा।²⁵ तर डाइ चुदा साइनोन तो:बा तिगै दोष आस्यापनी ओच्छे चुसेनोन रोमी ग्याल्बोला डाच्छा हाडला ताम थान्बा सेम लबासे लमा डाइ चुदा रोमी ग्याल्बो मुबा ग्लारी पुड्बा सेम लबा मुला।²⁶ चुला बारेरी डाइ डाला रोमी ग्याल्बोदा भिंसी पुइतो:बा खास ताम तिगै आरे। थेतबासेलमा डाइ चुदा हाडनीला डाच्छापट्टि ओच्छे खास लसी हाड ग्ले अग्रिपासला डाच्छापट्टि भवा मुला, दाहेन्से य्हाडसे चुदा इयोइबा छार्बा लमाहेन्से डाइ भिंसी पुइतो:बा ताम स्याप्ला तला।²⁷ तिगदा भिसम इयाल्खानरी झाड्बा म्हिला बारेरी तिगै दोष आउन्ना रोमी ग्याल्बो मुबा ग्लारी पुड्बारी डादा ज्यबा आछोर्नी।”

26 जमाहेन्से अग्रिपास ग्लेसे पावलदा “दाहेन्से एसे हाडला बारेरी ताम पाड्म्याड्ला” भिंसी भिजी। ओच्छे पावलसे याला चाल लबान हाडला बारेरी चुहड् भिंसी ताम लबारी छ्याइजी।

² “ग्ले अग्रिपास, यहूदीगदेसे डादा लबा जम्मान दोषला बारेरी तिनी हाडला डाच्छापट्टि पाड्म्याड्ला डा ल्हानान ताड्बा मुला।³ यहूदीगदेला जम्मान रिमठिमदेन थेनीगदेदे खाहड्बाधोना मुला भिबा हाडदा ज्यना लसी था मुबासे लमा डाला ताम आछेर्ना ज्यना लसी इयान्सी पिन्गो भिबा डाला बिन्ती मुला।

⁴ “डाला यहूलला गुडरीदेन यरूशलेमरीनोन डा जत्धुगुहेन्से दान्देधोना खाहड् लसी भ्रवा मुला भिबा ताम यहूदीगदेदा था मुला।⁵ डन्ना यहूदी धर्म तेन्बा म्हिगदे न्हडला हाडसे तेन्बा ताम जे जम्मान भन्दा ठीक हिन्ना भिबा फरिसीगदेला समूह न्हडला डाएनोन गिक मुबा भिबा ताम थेनीगदेदा था मुला। थेतबासेलमा चु ताम पाड्बा सेम मुसम थेनीगदेसे पाड्खम्ला।⁶ परमेश्वरसे य्हाडला आखे म्हेमेदेन छयाम लबा कबुलरी डाइ विश्वास लबासे लमा तिनी डादा चु मुद्दा तबा मुला।⁷ अग्रिपास ग्ले य्हाडला च्युक न्ही वंशगदेसेन चु कबुल याड्बाला लागिरी धिन म्हुननोन सेम गिक लसी परमेश्वरदा तेन्बा मुला। चुनोन कबुलरी डाइ विश्वास लबासे लमा यहूदीगदेसे डादा दोष लबा हिन्ना।⁸ परमेश्वरसे सिबागदेदा दो:सी सोना लला भिबा तामरी विश्वास लबारी हाडनीदा तिगदा गाहो तबा?

⁹ “हिन्बाम डाइनोन खन्तेधोना नासरतला येशूला बिरोध लतो:ला भिंसी म्हन्बा मुबा।¹⁰ डाइ यरूशलेमरी चुहड् लसी बिरोध लजी। डाइ परमेश्वरला मन्दिररी पूजा लबा मुल म्हिगदेग्याम अधिकार किन्सी परमेश्वरला म्हिगदेदा इयाल्खानरी झाड्जी। ओच्छे थेनीगदेदा साड्बा गेरीनोन हो लजी।¹¹ ओच्छे यहूदीगदे हुप तबा जम्मान दिमगदेरी थेनीगदेदा ल्हानान रेम सजाय पिन्सी परमेश्वरदा बिरोध लउ भिंसी कर लबा मुबा। ओच्छे थेनीगदेदेन छयाम ल्हानान बोमो खसी डाइ थेनीगदेदा अर्गु यहूलला शहरगदेरीनोन दुख पिन्जी।

पावलसे हाडसे येशूदा विश्वास लबाला बारेरी पाड्बा

¹² “चुहड् लसी परमेश्वरला मन्दिररी पूजा लबा मुल म्हिगदेग्याम अधिकारदेन कुल्बा तामला चिठी याङ्गहेन्से डा दमस्कस भिबा ग्लापट्टि निजी।¹³ अग्रिपास ग्ले, डनी निबान लमा धिनी गुडरी डाइ स्वर्ग्याम धिनीला य्हाल भन्दा ल्हानान य्हाल खबा म्राड्जी। थे य्हाल डादेन डाला ह्योगदेला क्युसीन ज्वालडलड तजी।¹⁴ ओच्छे डनी जम्मान सरी हिल्ली। जमाहेन्से डादा हिब्रू ग्योइरी “शाऊल, शाऊल एसे डादा तिगदा दुख पिन्बा? डादेन छयाम छेसी एसे हाडसे हाडदान दुख तना लबा मुला” † भिबा काइ डाइ थे:जी।

¹⁵ “जमाहेन्से डाइ, ‘प्रभु, हाड खाल हिन्ना?’ भिंसी इयोइजी।

“प्रभुसे डादा चुहड् भिंसी सुड्जी, ‘एसे दुख पिन्बान लबा येशू डानोन हिन्ना।’¹⁶ ‘तर रे:गो, तिगदा भिसम डाइ एदा डाला गे लबा म्हिदेन डाला साक्षी पिन्बा म्हि स्होबाला लागिरी डा ए मुबा ग्लारी खबा हिन्ना। एसे डाला बारेरी म्राड्बा तामदेन डाइ एदा लिच्छा उन्बा तामगदेएनोन स्पहान्दो म्हिगदेदा थे:ना लतो:ला।¹⁷ ओच्छे एदा डाइ यहूदीगदेदेन अर्गु यहूलला म्हिगदे मुबा ग्लारी पुड्बारी छ्याइबा मुला। थेनीगदेसे एदा पिन्बा दुखग्याम डाइ एदा जोगब लला।¹⁸ एसे थेनीगदेला मी म्राड्ना लसी थेनीगदेदा धोपधोपग्याम य्हाल य्हाल मुबापट्टिदेन शैतानना शक्तिग्याम फेसी परमेश्वरपट्टि भतो:ला। जमाहेन्से थेनीगदेसे पापग्याम माफ याड्ला ओच्छे डादा विश्वास लबासे लमा थेनीगदे परमेश्वरसे धम्बा म्हिगदेदेन छयाम चिम्याड्ला।

¹⁹ “थेतबासेलमा अग्रिपास ग्ले, डादा स्वर्ग्याम उन्बा ताम डाइ इयान्बा हिन्ना।²⁰ डाइ डाच्छा दमस्कसरी, जमाहेन्से यरूशलेमरीदेन यहूदिया यहूलला नाडनोन चिबागदेदा, ओच्छे अर्गु यहूलला म्हिगदेदाएनोन हाड हाडला पाप खलासी परमेश्वरपट्टि दो:गो ओच्छे हाड हाडला पाप खलासी परमेश्वरपट्टि दो:बा अन्छारला गे लउ भिंसी थे:ना लजी।²¹ डाइ चुहड् लसी थे:ना लबासे लमा यहूदीगदेसे डादा परमेश्वरला मन्दिररी चुड्सी साड्बारी म्हाइजी।²² तिनीधोना परमेश्वरसे डादा हो लबान मुला। थेतबासेलमा डा चुरी राप्सी यहूलला जजा ग्रेन जम्मादान चु ताम पाड्बान मुला। ओच्छे डाइ अगमवक्तागदेदेन मोशासे पाड्बा ताम पूरा तनोन तला भिबा ताम बाहेक अर्गु तिगै ताम पाड्बा आरे।²³ थेनीगदेसे थार्बा पिन्बा ख्रीष्टसे दुख नानोन तो:ला, ओच्छे सिबागदे न्हडरी थे जम्मान भन्दा डाच्छा सोसी हाडला यहूलला म्हिदेन अर्गु यहूलला म्हिगदेदा परमेश्वरला यहूलला बारेरी पाड्ला।”

²⁴ पावलसे चु ताम पाड्बान लमा फेस्तससे “पावल ए म्योबा हिन्ना, एसे ल्हानान पढब लबासे लमा एदा थेसेन म्योना लबा हिन्ना” भिंसी ग्रेन काइ लसी पाड्जी।

²⁵ तर पावलसे चुहड् भिंसी भिजी, “जम्मासेन मान लबा फेस्तस, डा म्योबा आहिन, तर डाइ सत्य तामदेन बुद्धिला ताम जे पाड्बा मुला।²⁶ चु तामला बारेरी अग्रिपास ग्लेदाएनोन था मुबासे लमा डाइ दुक्क तसी चु ताम पाड्बान मुला। डाइ पाड्बा चु जम्मान ताम ग्लेदा थानोन मुला भिबा ताम डादा पक्का था मुला। तिगदा भिसम चु ताम खालैसे आम्राड्बा ग्लारी लबा आहिन।”

²⁷ जमाहेन्से पावलसे चुहड् भिंसी भिजी, “अग्रिपास ग्ले, तिग हाडसे अगमवक्तागदेदा विश्वास लमुला? डादा था मुला, हाडसे विश्वास लमुला।”

²⁸ जमाहेन्से अग्रिपास ग्लेसे पावलदा “तिग एसे डादा चुदे योनान ख्रीष्टियान स्होबारी म्हाइबा?” भिंसी भिजी।

²⁹ पावलसे “योना तसै घड्सी तसैनोन चु च्याल्दागदे बाहेक, हाड जे आहिन, तर तिनी डाला ताम इयान्बागदे जम्मान डा हड्बान तगै भिंसी डाइ परमेश्वरदेन छयाम प्रार्थना लबा मुला” भिंसी जोहाब पिन्जी।

³⁰ जमाहेन्से ग्लेदेन हाकिम ओच्छे बरनिकीदेन थेरी मुबा जम्मान म्हिगदे रे:सी निबारी छ्याइजी।³¹ ओच्छे थेनीगदे थे ग्लायाम थोन्माहेन्से “चु म्हिसे

† ग्रीक बाइबलरी “सुइरोरी काडसे छेक्मा एदान स्हु खला” भिंसी भिबा मुला। चु भिबा चा “डादेन छयाम छेसी एसे हाडसे हाडदान दुख तना लबा मुला” भिबा हिन्ना।

साइनोन तो:बा अथवा इयाल्खानरी झाइतो:बाधोनाला तिगै गे लबा आरेम” भिसी हाड हाड न्हडरी ताम लजी।

³² ओच्छे अग्रिपाससे फेस्तसदा “चुसे रोमी ग्याल्बो कैसरला डाच्छा हाडला ताम थान्बा सेम आलबा हिन्सम पुइसै तसेला” भिसी भिजी।

पावल रोम म्हूसारी थार्बा पिन्बा समाचार थे:ना लबारी निबा

27 डनी समुन्द्रग्याम तबान इटालिया भिबा ग्लारी नितो:ला भिसी पक्का लमाहेन्से थेनीगदेसे पावलदेन स्हान्दो कोइ कोइ

इयाल्खानरी मुबा म्हिगदेदा ग्याल्बो अगस्टसला सिपाहीगदेला कप्तान युलियस भिबा म्हिला यारी जिम्मा पिन्जी। ² जमाहेन्से डनी एड्रामिटेनोस भिबा ग्लाय्याम खसी एशियारी परब तबा पानी जहाज थान्बा ग्लगदे तबान निबा पानी जहाजरी क्रे:सी निजी। थेरी इन्देन छ्याम माकेडोनिया अञ्चलला थेसलोनिके भिबा ग्लाला अरिस्तार्खस मिन लबा म्हि गिकएनोन मुबा।

³ न्हडगरदड डनी सीदोन भिबा ग्लारी धोखजी। ओच्छे युलियससे दया लसी पावलदा थेला ह्योगदे मुबा ग्लारी निसी तो:तेबा स्हेगदे किन्पुइजी।

⁴ थेग्याम दो:सी डनी मुबा पानी जहाज निजी, ओच्छे पानी जहाजला डाच्छापट्टियाम लाबा खबासे लमा डनी समुन्द्रला गुडरी मुबा साइप्रस भिबा ग्लाला भर लसी कुनीग्याम तबान निजी। ⁵ जमाहेन्से किलिकियादेन पामफिलिया भिबा ग्लाला क्याम्सडपट्टिला समुन्द्ररी धोखमाहेन्से डनी लुकिया भिबा ग्लाला माइरा भिबा शहररी धोखजी। ⁶ थेरी कप्तान युलियससे अलेक्जेन्ड्रिया भिबा शहरग्याम इटालिया भिबा म्हूसारी निबा पानी जहाज गिक स्याप्जी। ओच्छे डनी थे पानी जहाजरी क्रे:सी निजी।

⁷ ल्हानान धिनधोना दुख नासी डनी गोल्से गोल्से लसी क्नीडस भिबा ग्लारी धोखजी। तर लाबासे अड्ड इन्दा डाच्छा निआपुइबासे लमा क्रेट भिबा गडला भर लसी कुनीग्याम तबान सालमोने भिबा ग्लारी निजी। ⁸ ल्हानान दुखसे डनी थे ग्लाला कुनीग्याम पानी जहाज थान्बा जेबा भिबा ग्लारी खजी। थे ग्लाय्याम लासिया भिबा शहर डामरीन मुबा।

⁹ समुन्द्रग्याम निबारी ल्हानान लोइबा खबा धुइ तबासे लमा डनी ल्हानान धिनधोना थेरीन चिजी, ओच्छे फोइथान चिसी प्रार्थना लबा धिनएनोन † निसी जिन्बासे लमा पावलसे थेनीगदेदा चुहइ भिसी सल्लाह पिन्जी।

¹⁰ “च्यागो ह्योगदे, चु समुन्द्रग्याम निजी भिसम यहाडदा ल्हानान दुख तला। पानी जहाजदेन मालसामान जे नाश तबा आहिन, तर यहाडला ज्याननोन निखम्ला भिबा ताम डाइ म्राइबा मुला” भिसी भिजी। ¹¹ तर सिपाहीगदेला कप्तानसे पावलला तामदा भन्दा पानी जहाज चलब लबा म्हिदेन पानी जहाजला धनीला ताम जे विश्वास लजी। ¹² चु ग्लारी सेर्खरी चिबारी गाहो तबासे लमा जस्तो लसीन फोनिकस भिबा ग्लारी निसी खइबा ला निना लतो:ला भिसी ल्हानान हइबा म्हिगदेसे थेग्याम पानी जहाज चलब लतो:ला भिसी सल्लाह पिन्जी। फोनिकस भिबा ग्ला चा क्रेट भिबा गडला पानी जहाज थान्बा ग्ला हिन्ना। थे ग्ला चा ल्हो न्हुपदेन इयाड न्हुपपट्टि दोबा मुला।

समुन्द्ररी लाबालुडसर खबा

¹³ ल्होग्याम गोल्से गोल्से लाबा खबारी छ्याइमाहेन्से थेनीगदेसे दाहेन्से यहाड निखम्ला भिसी म्हन्जी, ओच्छे फाइला अइकुसी ते:सी क्रेट भिबा ग्लाला कुनीन कुनी निबारी छ्याइजी। ¹⁴ तर छिन्नड लिच्छा थे क्रेट भिबा गडग्याम ग्रेन लाबालुडसर खजी। चुहइबा लाबालुडसरदा स्यार इयाड लाबा भिसी भिमुबा। ¹⁵ जमाहेन्से थे लाबालुडसरसे पानी जहाजदा डाच्छापट्टि निआपुइनी। तसैनोन पानी जहाज चलब लबा म्हिसे खम्तेधोना डाच्छा निबारी भड लजी, तर निबारी आखम्नी। थेतबासेलमा इन्से पानी जहाज खानड खानड निजी थेनोन पट्टि निपुइजी। ¹⁶ ओच्छे क्तौडा भिबा ग्लाला गडला भर लसी कुनीग्याम निमा इन्से बल्ला बल्ला पानी जहाजला ग्यापपट्टि खीसी थान्बा जजाबा दौंगादा जोगब लखम्जी। ¹⁷ थे दौंगादा पानी

† “फोइथान चिसी प्रार्थना लबा धिन” चा नेपाली पात्रो अन्धार आसोज लारी परब तमुबा। चु धुइरी चा जम्मान यहूदीगदेला पाप माफ तबाला लागिरी परमेश्वरला मन्दिररी पूजा लबा मुल म्हिसे बलि फुल्मुबा। (प्रस्था ३०:१०; लेवी २३:२७; गन्ती २९:७-११; हिब्रू ९:७)

जहाज न्हडरी झाइमाहेन्से पानी जहाज चलब लबागदेसे पानी जहाज थान्होइगै भिसी पानी जहाजला क्युर्सिन ग्रेन छोसे खीजी। तसैनोन सिरटिस भिबा ग्लाला कुनीरीक्यार मुबा बलौटे सरी क्याला भिसी थेनीगदे लोइजी। जमाहेन्से पानी जहाज चलब लबागदेसे पानी जहाजला पाल ते:जी, ओच्छे पानी जहाजदा लाबाला भररी पुइजी। ¹⁸ थे लाबालुडसरसे इन्दा प्लिड लला हइनोन लबासे लमा न्हडगरदड थेनीगदेसे पानी जहाजरी मुबा मालसामान भ्याइबारी छ्याइजी। ¹⁹ ओच्छे पानी जहाज चलब लबारी तो:बा स्हेगदेएनोन रेनीदड थेनीगदेसेन भ्याइजी। ²⁰ ल्हानान धिनधोना धिनीदेन सार तिगैनोन आप्राइनी। ओच्छे लाबालुडसरएनोन खबाला खबान लबासे लमा इन्दा सोला भिबा आशनोन आरेबा।

²¹ ओच्छे ल्हानान धिनधोना थेनीगदेसे तिगै आचमाहेन्से पावल थेनीगदेला गुडरी राप्सी चुहइ भिसी पाइजी, “ह्योगदे, हाडनीसे डाला ताम इयान्सी क्रेटग्याम पानी जहाज चलब आलबा हिन्सम हाडनीसे चुहइबा दुख नाआतो:सेला मुबा। ²² तसैनोन दाहेन्से हाडनी थालोङ्गो, भड लउ। तिग्दा भिसम हाडनी न्हडला खालैनोन आसि। तर पानी जहाज चा नाश तला। ²³ तिग्दा भिसम डा जुन परमेश्वरला हिन्ना ओच्छे डाइ जुन परमेश्वरदा तेन्बा मुला, थेनोन परमेश्वरला दूत गिक दोलो म्हुनड डा मुबा ग्लारी खजी। ²⁴ ओच्छे थेसे डादा ‘थालोङ्गो पावल, तिग्दा भिसम ए रोमी ग्याल्बो कैसर मुबा ग्लारी निनोन तो:ला। च्यागो, एदेन छ्याम पानी जहाजरी मुबा जम्मान म्हिगदेदा परमेश्वरसे सोना लला’ भिसी भिजी। ²⁵ थेतबासेलमा ह्योगदे, हाडनी थालोङ्गो, भड लउ। तिग्दा भिसम डादा परमेश्वरसे जुन ताम सुइबा मुला थे ताम पूरा तला भिबा तामरी डादा विश्वास मुला। ²⁶ तसैनोन यहाडला पानी जहाज खजिबै गड गिकरी ठोक्तो:ला।”

²⁷ इन्ना पानी जहाज लाबालुडसरसे लमा एड्रियास भिबा समुन्द्ररी याडयोड तबा च्युक ब्लि धिन तसी जिन्बा मुबा। जमाहेन्से म्हुन गडसलरीक्यार पानी जहाज चलब लबागदेसे यहाड खजिबै ग्लाला डामरी धोबारी छ्याइजीम भिसी म्हन्जी। ²⁸ जमाहेन्से थेनीगदेसे गाते नुष्बा चीम भिसी दप्सी च्यामा बोगल गिकसे च्युक दु मिटर नुष्बा मुबा ओच्छे जजाकी क्याथाड निसी दो:सी दप्सी च्यामा बोगल गिकसे मिटर दु नुष्बा मुबा। ²⁹ ओच्छे पानी जहाज खानडै युडबारी ठोक्ला भिसी लोइसी थेनीगदेसे पानी जहाजला ग्यापपट्टियाम गोर ब्लि फाइला अइकुसी मार पुइजी, ओच्छे यहाल तगै भिसी प्रार्थना लबारी छ्याइजी। ³⁰ ओच्छे पानी जहाज चलब लबागदे थे पानी जहाज खलासी यार्बाला लागिरी पानी जहाजला डाच्छापट्टियाम फाइला अइकुसी मार पुइबा स्होसी थे पानी जहाजरी मुबा दौंगा समुन्द्ररी ते:सी जिन्बा मुबा। ³¹ जमाहेन्से पावलसे सिपाहीगदेला कप्तानदेन सिपाहीगदेदा “चु म्हिगदे चुरी आचिनी भिसम हाडनी सोबारी आखम” भिसी भिजी। ³² चु ताम थे:सी सिपाहीगदेसे पानी जहाजरी खीसी थान्बा दौंगाला छो थासी पुइजी।

³³ रमरम रिमरिम तबा धुइरी पावलसे थेनीगदे जम्मादान दाहेन्से सोल्बा छ्योइबा लउ भिसी बिन्ती लजी। ओच्छे पावलसे थेनीगदेदा चुहइ भिसी भिजी, “सुर्दा लसी हाडनीसे सोल्बा छ्योइबा आलबा तिनी च्युक ब्लि धिन तसी जिन्बा मुला। ³⁴ थेतबासेलमा दाहेन्से हाडनीसे तिगै सोल्बा छ्योइबा लउ। ओच्छे तिगै सोल्बा छ्योइबा लमाहेन्से हाडनीदा भड खला, थालोङ्गो, खालैनोन आसि।” ³⁵ चुदे पाइसी जिन्माहेन्से पावलसे गेड दुइसी जम्मालान ओन्हाडरी परमेश्वरदा धन्यवाद पिन्सी गेड क्युइसी चबारी छ्याइजी। ³⁶ जमाहेन्से थेनीगदेसेनोन आँट याइसी तिगै चबा स्हेगदे चजी। ³⁷ पानी जहाजरी डनी जम्मान लसी ग्यार्जा न्हीसे बोगल सोमसे च्युक दु म्हि मुबा। ³⁸ थेनीगदेसे ग्रेन्ना चमाहेन्से पानी जहाज याइना लबारी पानी जहाजरी मुबा ग्वाएनोन भ्याइजी।

पानी जहाज नाश तबा

³⁹ यहाल तसैनोन थेनीगदेसे थे ग्ला डोआसेनी। तर थेरी थेनीगदेसे कुनी गिकरी बलौटे स म्राइजी। जमाहेन्से खम्तेधोना पानी जहाजदा थे कुनीरी भोगे भिसी थेनीगदेसे सल्लाह लजी। ⁴⁰ जमाहेन्से थेनीगदेसे फाइला अइकुसीगदे ते:सी समुन्द्ररी भ्याइजी, ओच्छे पानी जहाज चलब लबा

क्याबादा खीबा छोगदेएनोन बलसी समुन्द्ररी पुइजी। जमाहेन्से डाच्छापट्टिला पालदा तोर खेन्सी लाबापट्टि दोःसी पिन्जी, ओच्छे पानी जहाजदा कुनीपट्टि भोर्बारी छ्याइजी। ⁴¹ तर क्युइ न्हडरी मुबा बालुवाला उमरी ठोक्की, ओच्छे पानी जहाजला डाच्छापट्टिला जो थेरीन भासब तसी चलब लबारीन आखम्नी। जमाहेन्से पानी जहाजला ग्यापपट्टिला जोरी समुन्द्रला छालसे तसी क्युइबारी छ्याइजी।

⁴² थेहइ तमाहेन्से थेरी मुबा इयाल्खानरी झाइबा म्हिगदे समुन्द्ररी क्याल्सी याला भिसी म्हन्सी सिपाहीगदेसे थेनीगदेदा साइगे भिसी सल्लाह लजी। ⁴³ तर सिपाहीगदेला कप्तानसे पावलदा जोगब लबा सेम लसी थेनीगदेदा थेहइ लआपुइनी। ओच्छे क्याल्बारी खम्बागदे डाच्छा पानी जहाजग्याम छ्योइसी पाखारी थोन्नो भिसी सिपाहीगदेला कप्तानसे कुल्जी। ⁴⁴ ओच्छे क्याल्बारी आखम्बागदे चा फल्याकगदेदेन पानी जहाजला क्युइबा टोगलगदे चुइसी निउ भिसी भिजी। चुहइ लसी जम्मान ज्यना लसी पाखारी थोन्जी।

पावल माल्टा भिबा ग्लारी धोबा

28 डनी ज्यना लसी समुन्द्रला कुनीरी धोमाहेन्से थे ग्लाला मिन माल्टा चीम भिसी डन्से था याइजी। ² जमा धुइरी नाम खसी ल्हानान खइबासे लमा थे ग्लाला म्हिगदेसे ल्हानान दया लसी मे फुइसी डनी जम्मादान मान लजी।

³ पावलसेनोन भम नाड सिड हुप लसी मेरी युजी। मेला लेप्से लमा पुख्री गिक थोन्सी थेला यारी जीसीन चिजी। ⁴ थे ग्लाला म्हिगदेसे पावलला यारी पुख्रीसे जिबा म्राइसी, “चु म्हि पक्कान म्हि साइबा म्हि चीम। चु म्हि समुन्द्रग्यामसेम जोगब तसी खजी। तर ल लुला निसाफग्याम चा स्योर आम्याइनी” भिसी हाड हाड न्हडरी पाइजी। ⁵ जमाहेन्से पावलसे थे पुख्रीदा मेरी खसी पिन्जी। तर थेदा चा तिगै आतनी। ⁶ जमाहेन्से थेरी मुबा म्हिगदेसे पावलदा थे पुख्रीला बिखसे टाइसी तिक्खुरीन हिल्सी सिला भिसी च्याबारी छ्याइजी। तसैनोन ल्हानान धुइधोना थेदा तिगै आतबा म्राइसी थेनीगदेसे डाच्छा म्हन्बा ताम आहिन्बा चीम “तर चु मी ल चीम” भिसी भिजी।

⁷ थे ग्लाला पब्लियस भिबा मुल म्हिला बु वारी थे ग्लाला डामरीन मुबा। थेसे डन्दा मान लसी सोमरेधोना थेला दिमरी भोर्सी क्योइजी। ⁸ थे धुइरी पब्लियसला आबा मासी तसी छवा खसी आखम्बा मुबा। पावल थेदा च्याबारी निजी, ओच्छे थेथोरी या थान्सी प्रार्थना लसी थेदा खम्ना लजी। ⁹ चुहइ तबा था याइहाहेन्से थे ग्लाला जम्मान आखम्बा म्हिगदेएनोन खजी, ओच्छे थेनीगदेएनोन खम्जी। ¹⁰ थेनीगदेसे डन्दा ल्हानान मान लसी ल्हानान स्हेगदे पिन्जी। ओच्छे पानी जहाजरी क्रेःमाहेन्से डन्दा तोःबा अर्गु स्हेगदेएनोन पानी जहाजरी झाइसी पिन्जी।

पावल रोमरी धोखबा

¹¹ ला सोम लिच्छा डनी अलेक्जेन्ड्रिया भिबा ग्लायाम खबा पानी जहाजरी क्रेःजी। चु पानी जहाज सेखरी माल्टा भिबा ग्लारीन मुबा। थे पानी जहाजला डाच्छापट्टि जौल्या लला मूर्ति स्होसी थान्बा मुबा। ¹² जमाहेन्से सुराकुसाई भिबा शहररी धोखसी डनी सोमरेधोना थेरीन चिजी। ¹³ थेग्याम डनी कुनी कुनी तसी रेगियन भिबा ग्लारी धोखजी। न्हडगरदड ल्होग्याम लाबा खजी, ओच्छे रेनीदड डनी पटिओली भिबा ग्लारी धोखजी। ¹⁴ थेरी डन्से प्रभु येशूदा विश्वास लबा ज्योज्यो आले नाना आडागदेदा स्याप्जी। थेनीगदेसे डन्दा थेरी निसरेधोना चिउ भिसी भिजी। चुहइ लसी डनी रोमरी निजी। ¹⁵ डनी खबान मुला भिबा ताम थेःसी रोमरी मुबा विश्वासीगदे डन्दा हुप तबारी अप्पियस भिबा बजारदेन तीन पाटी भिबा शहरधोना खजी। थेनीगदेदा म्राइसी पावल ताइसी परमेश्वरदा धन्यवाद पिन्जी। ¹⁶ डनी रोमरी धोखमाहेन्से पावलदा सिपाही गिकला भररी थे गिकदा चिपुइजी।

पावलसे रोमरी थार्बा पिन्बा समाचार थेःना लबा

¹⁷ थेरी धोखसी सोमरे लिच्छा पावलसे रोमला यहूदी गन्बागदेदा इयोइजी। ओच्छे थेनीगदे खमाहेन्से पावलसे थेनीगदेदा चुहइ भिसी भिजी, “ज्योज्यो आलेगदे, डाइ यहाडला यहुलला म्हिगदेदेन आखे म्हेमेला रिमठिमला बिरोधरी तिगै गे लबा आरेमुबा। तसैनोन यरूथलेमहेन्सेन इयाल्खानरी झाइसी डादा रोमीगदेला यारी जिम्मा पिन्बा मुला। ¹⁸ थेनीगदेसे इयोइबा छार्बा लमाहेन्से डादा साइतोःबा तिगै दोष आस्याम्माहेन्से डादा पुइबा सेम लमुबा। ¹⁹ तर यहूदीगदेसे बिरोध लबासे लमा डाइ रोमी ग्याल्बो कैसरदा डाला ताम पाइनोन तोःबा तजी। तसैनोन डाइ डाला यहुलला म्हिगदेदा बिरोध लसी दोष लतोःबा तिगै ताम आरेबा। ²⁰ थेतबासेलमा हाडनीदेन छ्याम हुप तसी ताम लबारी डाइ हाडनीदा इयोइबा हिन्ना। तिगदा भिसम इस्राएलीगदेसे आश लबा खीष्ट फेखजी भिसी डाइ विश्वास लबासे लमा डादा च्याल्दासे खीसी चुरी भबा हिन्ना।

²¹ जमाहेन्से थेनीगदेसे पावलदा चुहइ भिसी भिजी, “डन्से मी हाडला बारेरी यहूदियाग्याम तिगै खबर याइबा आरे। ओच्छे यहाडला खालै यहूदी ज्योज्यो आलेगदे खसी हाडला बिरोधरी तिगै आज्यबा तामएनोन पाइबा आरे। ²² तर डन्दा थे ताम हाडग्यामसेन इयान्बा सेम मुला। तिगदा भिसम चु समूहला † बारेरी जम्मान ग्लारी म्हिगदेसे बिरोध लबा ताम जे डन्दा था मुला।”

²³ थेतबासेलमा पावलला ताम इयान्बाला लागिरी थेनीगदेसे धिन तोगब लजी। थे धिनकुनु ल्हानान म्हिगदे पावल मुबा ग्लारी खजी। जमाहेन्से पावलसे थेनीगदेदा स्होहेन्से इयसेधोनान मोशाला ठिमदेन अगमवक्तागदेला किताबग्याम परमेश्वरला यहुल्साला बारेरी जम्मान ताम घोना लसी येशूला बारेरी थेनीगदेदा विश्वास तना लबारी म्हाइजी। ²⁴ पावलसे पाइबा तामरी कोइसे विश्वास लजी, कोइसे विश्वास आलनी। ²⁵ जमाहेन्से थेनीगदे हाड हाड न्हडरी आढिवना फेसी भ्रबारी छ्याइमाहेन्से पावलसे थेनीगदेदा चुहइ भिसी भिजी, “एनीगदेला आखे म्हेमेदा यशैया अगमवक्ताग्याम परमेश्वरला आत्मासे पाइमा ठीकनोन मुबा भिसी हाडला ताम जिन्ना लबान चुहइ भिबारी छ्याइजी।

²⁶ ‘चु म्हिगदे मुबा ग्लारी निसी पाइजे एनीगदेसे थेःबाम थेःमुला, तर खाइमै आघोमुला, च्याबाम च्यामुला, तर खाइमै आम्राइमुला।

²⁷ तिगदा भिसम चु म्हिगदेला सेम कोइबा मुला, ओच्छे थेनीगदेला नाब्यड आथेःमुला, ओच्छे थेनीगदेसे मी च्युम्बा मुला, आहिन्सम थेनीगदेसे म्राइसेला मुबा, ओच्छे थेःसेला मुबा, ओच्छे घोसी सेम दोःसेला मुबा, जमाहेन्से डाइ थेनीगदेदा खम्ना लसेला मुबा।’ ††

²⁸ थेतबासेलमा चु ताम हाडनीदा था तगै, दाहेन्से परमेश्वरसे पिन्बा चु थार्बा अर्गु यहुलला म्हिगदे मुबा ग्लारी पुइबा मुला, ओच्छे थेनीगदेसे चु ताम इयान्ना।”

²⁹ पावलसे चु ताम पाइसी जिन्माहेन्से यहूदीगदे हाड हाड न्हडरी ल्हानान छलफल लबान थेग्याम फेजी। †

³⁰ न्ही दिडधोना पावल रोमरी हाडसेन खर्च लसी चिजी, ओच्छे थे मुबा ग्लारी खबा जम्मान म्हिगदेदा मान लजी। ³¹ आलोडना थेसे परमेश्वरला यहुल्साला समाचार थेःना लजी, चुहइ लसी प्रभु येशू खीष्टला बारेरी लोप्पा थेदा खालैसे रोकब आलनी।

† चु समूहला म्हिगदे भिबा चा खीष्टदा विश्वास लबा म्हिगदे हिन्ना। †† 28:27 यशै ६:९-१० ‡ चु पदला ताम ल्हाना हइबा ग्रीक बाइबलरी आरे।

चु चिठीला बारेरी पाडतो:मा

येशूला मुल चेला पावलसे भिबा मुबा (रोमी १:१)। चु चिठी भिबाला लागिरी पावलदा तर्तियस भिबा म्हिसे ह्यो लबा मुबा (रोमी १६:२२)।

कोरिन्थ शहररी भिबा मुबा।

ओस्पन ईश्वी संवत् ५६-५७ (विक्रम संवत् ११३-११४) सालरी भिबा मुबा। चु चिठी पावल थार्बा पिन्बा समाचार थे:ना लबारी निबा सोमरेमला पालला धुड जिन्बारी छ्याइमा भिबा मुबा।

रोम शहररी मुबा विश्वासीगदेदा भिबा मुबा।

पावल चु चिठी भिबा धुडधोना रोम शहररी निबा आरेमुबा। तर रोम शहररी मुबा विश्वासीगदेदा हुप तसी थेनीगदेदेन छ्याम तिगै धिनधोना चिसी गे लबा सेम मुबा। ओच्छे थेनीगदेद्याम तिगै ह्यो किन्सी स्पेन यहुल्सारी थार्बा पिन्बा समाचार थे:ना लबारी निबा पावलला सेम मुबा। चु चिठी थेसे विश्वासीगदेसे आघोनान आतबा तामगदे घोना लबाला लागिरी भिबा मुबा। पावलसे रोम यहुल्साला मण्डलीदा फ्याफुल्बान थेनीगदेला लागिरी थेसे प्रार्थना लबा तामगदे उन्बा मुला। ओच्छे परमेश्वरला डाच्छा यहुदीगदे मुसैनोन अर्गु यहुलला म्हिगदे मुसैनोन पाप खलासी परमेश्वरदा सेम निबा म्हि ततो:ला भिसी पाड्बा मुला। तिगदा भिसम जम्मान म्हिगदे पापला तहरी मुला। ओच्छे ह्याडदा परमेश्वरदा सेम निबा म्हि स्होबाला लागिरी येशू ख्रीष्टदा विश्वास लनोन तो:ला भिसी पाड्बा मुला। जमाहेन्से येशूदेन छ्याम गिक तमाहेन्से याड्बा छार जुनीला बारेरी पाड्बा मुला। येशूदा विश्वास लबागदे परमेश्वर मुबा ग्लारी निम्याड्बा ओच्छे थेदा परमेश्वरला आत्मासे पापदेन कालला शक्तिग्याम फेला। ओच्छे ५ अध्यायहेन्से ८ अध्यायधोनारी विश्वास लबागदेदा परमेश्वरदा सेम निबा म्हिगदे स्होबा तामला बारेरीदेन परमेश्वरला आत्माला शक्तिसे लबा गेला बारेरी पाड्बा मुला। जमाहेन्से परमेश्वरसे म्हि यहुलला लागिरी म्हन्बा अन्छार यहुदीगदेदेन अर्गु यहुलला म्हिगदे खाह्ण्ड लसी खबारी खम्ला भिसी ड्योड्बा तामला जोहाब पिन्बारी म्हाड्बा मुला। यहुदीगदेसे येशूदा विश्वास आलबासे लमा अर्गु यहुलला म्हिगदेसे येशूदा विश्वास लसी परमेश्वरला दयामाया याड्गै भिबा परमेश्वरला सेम मुबा। चिठीला थुमरी स्हान्दोगदेदा माया लजी भिसम परमेश्वरदा ताड्ना लखम्ला भिसी भिबा मुला। परमेश्वरदा तेन्बा, विश्वासीगदेसे ह्याडला यहुल्साला लागिरीदेन स्हान्दो म्हिगदेदा लतो:बा गेगदेला बारेरीनोन भिबा मुला।

मुल तामगदे

फ्याफुल्बादेन धन्यवादला प्रार्थना १:१-१७

म्हिगदेसे याड्गोन तो:बा थार्बा १:१८-३:२०

थार्बा याड्बाला लागिरी परमेश्वरसे उन्बा ग्याम ३:२१-४:२५

ख्रीष्टग्याम याड्बा छार जुनी ५:१-८:३९

परमेश्वरसे म्हन्बा अन्छार यहुदीगदेसे याड्बा ताम ९:१-११:३६

ख्रीष्टदा विश्वास लबागदेला बानीबेहोर १२:१-१५:१३

चिठीला थुमरी भिबा ताम १५:१४-१६:२७

पावलसे रोमला विश्वासीगदेदा भिबा चिठी

1 लास्सो, रोमरी मुबा जम्मान म्हिगदेदा डा पावलग्याम फ्याफुल्ला। डा येशू ख्रीष्टदा तेन्बा म्हिदा परमेश्वरसेन मुल चेला दोबारी धम्बा हिन्ना। ओच्छे थार्बा पिन्बा समाचार थे:ना लबाला लागिरी धम्बा हिन्ना। 2 चुनोन थार्बा पिन्बा समाचार परमेश्वरसे दडबोरीन ह्याडला म्हिगदेदा पिन्ना भिसी अगमवक्तागदेद्याम सुड्बा मुबा। थेनोन थार्बा पिन्बा समाचार परमेश्वरला बचनरी भिबा मुला।

3 थे थार्बा पिन्बा समाचार चा परमेश्वरला झा यहाडला प्रभु येशू ख्रीष्टला बारेरी हिन्ना। थे म्हि दोसी दाऊद ग्लेला वंशग्याम न्हजी। 4 म्हि दोसी न्हसैनोन थे स्वर्गग्याम फेखबा मुबा, यहाडला प्रभु येशू ख्रीष्टदा परमेश्वरला झा हिन्ना भिसी परमेश्वरला आत्माला शक्तिसे उन्बा अन्छार परमेश्वरसे थेदा सिबाग्याम सोना लजी। 5 यहाडला प्रभु येशू ख्रीष्टग्याम परमेश्वरसे डन्दा दयामाया लसी ख्रीष्टला गे लबा मुल चेला स्होबा मुला। जम्मान

यहुलला म्हिगदेसे विश्वास लगै ओच्छे थेसे कुल्बा ताम ड्यानौ भिसीन डाइ ख्रीष्टला लागिरी चु गे लबा हिन्ना। 6 थेनीगदे न्हडरी एनीगदेदाएनोन येशू ख्रीष्टला ह्याडलान म्हि स्होबारी ड्योड्बा मुला।

7 परमेश्वरसे माया लसी ह्याडला म्हिगदे स्होबारी ड्योड्बा रोम यहुल्साला म्हिगदे, एनीगदेदा यहाडला परमेश्वर आबादेन प्रभु येशू ख्रीष्टला दयामायादेन शान्ति तगै।

धन्यवादला प्रार्थना

8 जम्मान भन्दा डाच्छा डाइ डाला परमेश्वरदा येशू ख्रीष्टग्याम एनीगदे जम्मालान लागिरी धन्यवाद पिन्ना। तिगदा भिसम एनीगदेसे ख्रीष्टदा विश्वास लबा ताम जम्बुलिडला जम्मान म्हिगदेसे थे:बा मुला। 9 डाइ सदन प्रार्थना लबा धुडरी एनीगदेदा गाते ढन्बा मुला भिबा ताम परमेश्वरदान था

मुला। डाइ थेनोन परमेश्वरला झाला समाचार थे:ना लसी थेंदा सेमहेन्सेन तेन्बा मुला। ¹⁰ परमेश्वरसे म्हन्बा अन्धार डा जस्तो लसीन एनीगदे मुबा ग्लारी खबारी खमै भिसी डाइ प्रार्थना लमा सदन परमेश्वरदेन छ्याम बिन्ती लबा मुला।

¹¹ तिग्दा भिसम परमेश्वरला आत्मासे पिन्बा मोलम एनीगदेदा पाड्सी ख्रीष्टथोरी लबा विश्वास कोड्ना लबाला लागिरी एनीगदेदेन छ्याम हुप तबा डादा ल्हानान सेम मुला। ¹² ओच्छे य्हाड न्हीलान विश्वासग्याम गिकसेम गिकदा भड याड्गै भिबा डाला सेम हिन्ना।

¹³ ज्योज्यो आले नाना आडागदे, चु ताम एनीगदेदा था तगै भिसी डाइ म्हन्बा मुला। अर्गु ग्लाला म्हिगदेसे हड लसी रोमला अर्गु य्हुलला म्हिगदेसेनोन विश्वास लगे भिसी डा ल्हानान रेम एनीगदे मुबा ग्लारी खबा सेम लजी। तर डा दान्देधोना एनीगदे मुबा ग्लारी खबारी खम्बा आरे। ^{†14} ग्रीक †† म्हि हिन्से आहिन्से, पढब लबा मुसै आरेसै जम्मादान थार्बा पिन्बा समाचार थे:ना लबा जिम्मा डाला हिन्ना। ¹⁵ थेतबासेलमा एनी रोमरी चिबागदेदाएनोन थार्बा पिन्बा समाचार थे:ना लबारी डादा ल्हानान सेम मुला।

थार्बा पिन्बा समाचार

¹⁶ चु थार्बा पिन्बा समाचार थे:ना लबारी डा आपे:मुला। तिग्दा भिसम विश्वास लबागदे जम्मालान लागिरी चु थार्ना लबा परमेश्वरला शक्ति हिन्ना। डाच्छा यहूदीगदेदा थार्ना लबाला लागिरी हिन्ना, थेहड लसीन अर्गु य्हुलला म्हिगदेला लागिरीनोन हिन्ना। ^{†17} चुनोन थार्बा पिन्बा समाचारसे म्हिदा परमेश्वरदा सेम निबा म्हि दोबारी लोप्ला, ओच्छे विश्वासग्यामसेन डाच्छाहेन्से लिच्छाधोना परमेश्वरदा सेम निबा म्हि दोबारी खम्बा। तिग्दा भिसम बचनरीनोन “जुन म्हि विश्वासग्याम परमेश्वरदा सेम निबा म्हि दोबा मुला, थेसेन जुकजुकधोनाला जुनी याड्ला” भिसी भिबा मुला। ^{††}

म्हिसे परमेश्वरदा सेम आनिबा गे लबा

¹⁸ म्हिगदेसे परमेश्वरला बिरोध लसी पापदेन आज्यबा गे लबासे लमा परमेश्वर बोमो खसी थेनीगदेथोरी स्वर्ग्याम सजाय खबा मुला। थेनीगदेसे लबा आज्यबा गेसे सत्य तामदा नाड्सी थान्बा मुला। ¹⁹ परमेश्वरला बारेरी घोखम्बा ताम चा थेनीगदेला डाच्छान मुला। तिग्दा भिसम थे ताम परमेश्वरसे थेनीगदेदा उन्सी जिन्बा मुला। ²⁰ म्हिसे म्राड्आखम्बा परमेश्वरला गुण, खाड्मै आम्हबा थेला शक्तिदेन बानीबेहोर चु जम्बुलिड छ्यामाहेन्से परमेश्वरसे स्होबा जम्मान स्हेगदेग्यामसेन म्राड्बा मुला। थेतबासेलमा थेनीगदेसे तिगै निउ लबा ग्याम आरे।

²¹ थेनीगदेसे परमेश्वरदा डोसेसीनोन परमेश्वरदा लतो:बा मानदेन जयजयकार आलनी ओच्छे परमेश्वरदा धन्यवादएनोन आपिन्नी। बरु थेनीगदेसे म्हन्बा आज्यबा तामग्यामसेन थेनीगदे गे आखेल्बा म्हि दोजी। ओच्छे थेनीगदेला आज्यबा सेम झन धोपधोपसे प्लिड्जी। ^{††22} थेनीगदेसे ह्राडसे ह्राडदान बुद्धि मुबा म्हि भिसी भ्रजी, तसैनोन थेनीगदेदान तामसे थेनीगदे मूर्ख दोबा मुला। ²³ थेनीगदेसे खाड्मै नाश आतबा य्हालदेन शक्ति मुबा परमेश्वरदा तेन्बा खलासी नाश तसी निबा म्हि, जन्तु, चरागदेदेन सुल्सी भ्रबा जन्तुगदेला मूर्ति स्होसी तेन्जी। ^{†††}

²⁴ थेतबासेलमा थेनीगदेला नड्बा सेमसे तिग लड् म्हन्बा, थे अन्धार लसी भ्रबारी परमेश्वरसे थेनीगदेदा खलासी पिन्जी। थेनीगदेसे ह्राड ह्राड न्हडरी ब्रेल्सी पे:बा खबा पाप गेगदे लजी। ²⁵ थेनीगदेसे सदन जयजयकार लतो:बा जम्मान स्हे स्होबा परमेश्वरदा तेन्बा खलाजी। ओच्छे परमेश्वरसे स्होबा स्हेगदेदा चा तेन्जी। चुहड लसी थेनीगदेसे परमेश्वरला सत्य तामदा लुसीला तामदेन छ्याम देप्ली।

²⁶ थेतबासेलमा परमेश्वरसे थेनीगदेला आज्यबा सेमसे म्हन्बा अन्धारलान पे:बा खबा गेगदे लबारी खलासी पिन्जी। ओच्छे थेनीगदेला म्रिडकोलागदे

हेम्कोलादेन छ्याम आम्हेर्ना म्रिडकोला म्रिडकोलान ब्रेल्सी भ्रजी। ²⁷ थेहड लसीन हेम्कोलागदे म्रिडकोलादेन छ्याम आम्हेर्ना बैससे क्रोसी हेम्कोला हेम्कोलादेन छ्यामनोन ब्रेल्सी भ्रजी। ओच्छे थेनीगदेसे लबा आज्यबा पे:बा खबा गेला सजाय थेनीगदे ह्राडसेन नाजी।

²⁸ थेनीगदेसे परमेश्वरदा तेन्बा सेम आलबासे लमा परमेश्वरसे थेनीगदेदा थेनीगदेदान न्होड्बा सेमसे म्हन्बा अन्धारलान गे लगे भिसी खलासी पिन्जी। ²⁹ थेनीगदेला सेम जम्मान आज्यबा ताम, लोभदेन बोमोसे प्लिड्बा मुला। थेतबासेलमा थेनीगदेसे डाह लबा, म्हि साड्बा, छेबा बड्बा लबा, म्हिदा झुक्याब लबा, स्हान्दोला बारेरी आज्यबा म्हन्बा, म्हिला तामगन लबा, ³⁰ ओच्छे स्हान्दोला बेड्जजत लसी भ्रबा, परमेश्वरदाएनोन हेला लबा, डा हड्बा खालै आरे भिसी ह्राडसे ह्राडदान घेन स्होबा, स्हान्दोदा मान आलबा, आबा आमासे कुल्बा ताम आड्यान्ना आज्यबा गे जे लबारी छार छार ग्याम म्हाड्बा, ³¹ थेहड लसी थेनीगदे मूर्ख दोसी लला भिबा गेएनोन आलमुला। चु म्हिगदे चा दया आरेबा म्हि हिन्ना। ³² चुहड्बा गे लबा म्हिगदे परमेश्वरला ठिम अन्धार सितो:बा मुला भिबा ताम थेनीगदेदा थानोन मुला, तसैनोन थेनीगदेसे चुहड्बा आज्यबा गे लबा जे आहिन, चुहड्बा आज्यबा गे लबा स्हान्दोदाएनोन भड पिन्मुला।

परमेश्वरसे लबा निसाफ

² थेतबासेलमा स्हान्दोदा दोष लबा म्हिगदे, एनीगदे जुन मुसैनोन डाइ गल्ती लबा आरे भिसी तिगै निउ लबा ग्याम आरे। स्हान्दोदा दोष लबा तामग्यामसेन एनीगदे दोषी तबा मुला। तिग्दा भिसम एनीगदेसे जुन गेग्याम स्हान्दोदा दोष लबा मुला थेनोन गे एनीगदेसेनोन लबा मुला। ^{†††2} चुहड्बा गे लबा म्हिगदेदा परमेश्वरसे ठीक निसाफ लला भिबा ताम य्हाडदा था मुला। ³ एनीगदेसे चुहड्बा आज्यबा गे लबा म्हिगदेदा दोष लमुला। तर ह्राडएनोन थेहड्बान आज्यबा गे लसी भ्रमुला। तिग परमेश्वरसे निसाफ लबा धुडरी एनीगदे चा स्योम्याड्ला भिसी म्हन्बा? ⁴ परमेश्वरसे एनीगदेदा गाते माया लमुला, ओच्छे ह्राडदेन छ्याम थान्बारी गाते सेम लमुला भिबा ताम एनीगदेसे पक्कान म्हन्बा आरे। परमेश्वरसे एनीगदे ह्राड ह्राडला पाप खलासी ह्राडपट्टि दो:गै भिसी भ्रान्बा मुला। थेतबासेलमा एनीगदेदा गाते ज्यना लमुला भिबा ताम एनीगदेदा था आरे?

⁵ तर एनीगदेला कोड्बा सेमदेन परमेश्वरपट्टि दो:बारी आम्हाड्बासे लमा परमेश्वरसे ठीक लसी निसाफ लबा धुडरी एनीगदेसे ल्हानान सजाय याड्ला। ⁶ तिग्दा भिसम परमेश्वरसे जम्मान म्हिदा थेनीगदेसे लबा गे अन्धार इनाम पिन्ना। ⁷ सेम नासी ज्यबा गे लबान परमेश्वरला घेन य्हालदेन मान ओच्छे जुकजुकधोनाला जुनी याड्बारी म्हाड्बा म्हिगदेदा चा परमेश्वरसे जुकजुकधोनाला जुनी पिन्ना। ⁸ तर स्हान्दो म्हिगदेसे ह्राडला जे ग्याम च्यासी सत्य ताम अन्धार आभ्रमुला, ओच्छे पाप गे जे लसी भ्रमुला। थेहड्बा म्हिगदेदा परमेश्वरसे सजाय पिन्ना। ⁹ आज्यबा गे लबा जम्मान म्हिगदेथोरी आपत विपतदेन दुख खला। चुहड्बा दुख डाच्छा यहूदीगदेथोरी खला, थेहड लसीन अर्गु य्हुलला म्हिगदेथोरीनोन खला। ¹⁰ तर ज्यबा गे लबा म्हिगदेदा परमेश्वरसे ज्यबा भिसी मानदेन शान्ति पिन्ना। चु जम्मान ताम परमेश्वरसे डाच्छा यहूदीगदेदा पिन्ना, थेहड लसीन अर्गु य्हुलला म्हिगदेदाएनोन पिन्ना। ¹¹ तिग्दा भिसम परमेश्वरसे खालैलान ली च्यासी निसाफ आल। ^{††}

¹² परमेश्वरसे मोशादा पिन्बा ठिम था आयाड्ना पाप गे लबा अर्गु य्हुलला म्हिगदेएनोन नाश तला, ओच्छे थे ठिम था याड्सीनोन पाप गे लबा यहूदीगदेदाएनोन थे ठिमग्यामसेन निसाफ लला। ¹³ तिग्दा भिसम मोशाला ठिम सेसी घोसी जे परमेश्वरदा सेम निबा म्हि दोबारी आखम। तर ठिम अन्धार गे लबा म्हि चा परमेश्वरदा सेम निबा म्हि दोला। ¹⁴ अर्गु य्हुलला म्हिगदेदेन छ्याम परमेश्वरसे मोशादा पिन्बा ठिम आरे। तसैनोन थेनीगदे न्हडला कोड् कोड्से ह्राडला बानीबेहोरग्याम लबा गेगदे ठिमदेन छ्याम ढिक्बासे लमा थेनीगदे ह्राडनोन ठिम तेबान हिन्ना। ¹⁵ थेनीगदेसे लबा गे

† 1:13 मुल १९:२१ †† चु पदरी “ग्रीक” भिबा चा थे धुडरी जम्बुलिडरी जम्मान भन्दा ज्यबा रिमठिम मुबादेन ल्हानान ताम सेबा घोबा म्हि भिबा हिन्ना। † 1:16 मर्कू ८:३८ †† 1:17 हब २:४ †† 1:21 एफि ४:१७-१८ ††† 1:23 व्यव ४:१६-१८

††† 2:1 मत्ती ७:१; लूका ६:३७ § 2:6 भजन ६२:१२; हितो २४:१२ § 2:11 व्यव १०:१७

ठिमदेन छ्याम ढिक्बासे लमा थेनीगदेला सेमरीन ठिम मुला भिसी उन्मुला। थेतबासेलमा थेनीगदेला सेमसे खाइमाम दोष उन्मुला, खाइमाम भड पिन्मुला। ¹⁶ चु ताम परमेश्वरसे येशू ख्रीष्टग्याम म्हेला सेमला ताम निसाफ लबा धुइरी तला। थे ताम डाइ एनीगदेदा थाबा पिन्बा समाचार थे:ना लबा धुइरी पाइसी जिन्बा मुला।

ठिम अन्धार भ्रबा जे यहूदी हिन्ना

¹⁷ तर एनीगदे यहूदी हिन्ना भिसी परमेश्वरसे मोशादा पिन्बा ठिमला भररी भ्रमुला, ओच्छे डनी परमेश्वरसे धम्बा म्हे हिन्ना भिसी घमण्डएनोन लमुला भिसम, ¹⁸ एनीगदेदा परमेश्वरला सेमला तामएनोन था मुला, ओच्छे तिग ज्यबा हिन्ना भिबा ताम था मुला, तिगदा भिसम एनीगदेसे ठिमग्याम लोप्बा मुला। ¹⁹ थेहइ लसीन एनीगदे हाडसे हाडदान काना म्हेगदेला नेतादेन धोपधोपरी भ्रबा म्हेगदेला लागिरी य्हाल हिन्ना भिसी भ्रमुला। ²⁰ ओच्छे मूर्ख म्हेगदेदा ज्यबा ग्याम उन्बादेन आसेबा आघोबा म्हेगदेदा लोप्मुला भिसी म्हेन्मुला। तिगदा भिसम एनीगदे ठिमग्यामसे जम्मान सत्य तामदेन बुद्धि याइबा मुला भिसी भ्रमुला। ²¹ चुहइ लसी स्यहान्दोदा लोप्बा ताम अन्धार एनीगदे चा तिगदा आभ्रबा? ओच्छे स्यहान्दोदा चा य्हो लबारी आत भिसी पाइसी भ्रबा, एनीगदे चा तिगदा य्हो लसी भ्रबा? ²² एनीगदेसे स्यहान्दोगदेदा चा ब्रेल्सी भ्रबारी आत भिसी लोप्सी एनीगदे हाडनोन चा तिगदा ब्रेल्सी भ्रबा? ओच्छे मूर्तिदा तेन्बा ठीक आहिन भिसी स्यहान्दोदा लोप्सी एनीगदे हाडनोन चा तिगदा मन्दिरला धन सम्पत्ति य्हो लबा? ²³ डन्दा ठिम था मुला भिसी घमण्ड लबा म्हेसे तिगदा ठिमरी मुबा ताम अन्धार आभ्रना परमेश्वरदा हेला लबा? ²⁴ तिगदा भिसम बचनरी “एनी यहूदीगदेसे लमान अर्गु यहूलला म्हेगदेसे परमेश्वरला बिरोधरी ताम लसी भ्रबा मुला” भिसी भ्रिबा मुला। †

²⁵ ठिम अन्धार भ्रजी भिसम एसे ल्हुइरी लबा खतना ठीक हिन्ना। तर थे ठिम अन्धार आभ्रनी भिसम एसे लबा खतना आलबा तेबान हिन्ना। ²⁶ चुदे खतना आलबा अर्गु यहूलला म्हेगदेसे थे ठिम अन्धार गे लजी भिसम परमेश्वरला डाच्छा थे खतना लबा म्हे हइबान हिन्ना। ²⁷ ल्हुइरी खतना आलसैनोन थे ठिम अन्धार भ्रबा अर्गु यहूलला म्हेगदेसे एनी खतना लबादेन भ्रिबा ठिम मुसीनोन थे अन्धार आभ्रबा यहूदीगदेला दोष उन्ना। ²⁸ तिगदा भिसम यहूदी तसी न्हजी भिदेमा पक्का यहूदी आदो। ओच्छे ल्हुइरी जे लबा खतनाएनोन पक्का खतना आत। ²⁹ तर जुन म्हेसे सेमहेन्सेन परमेश्वरदा तेन्ना थे म्हे चा पक्का यहूदी हिन्ना। ओच्छे सेमरी परमेश्वरला आत्मासे लबा खतना चा पक्का खतना हिन्ना। चु चा ठिमरी भ्रिबा अन्धार आहिन। चुहइबा म्हेसे म्हेगदेग्याम आहिन, परमेश्वरग्याम स्याबास याइला। ††

3 थेहइ भिसम यहूदी तसी तिगै फाइदा आरे? ओच्छे खतना लसी तिगै याइबा आरे? ² जम्मान तामरी फाइदा मुला। तिगदा भिसम परमेश्वरसे जम्मान भन्दा डाच्छा यहूदीगदेदा हाडला बचन जिम्मा पिन्बा मुबा। ³ चुदे थेनीगदे न्हडला कोइ कोइसे परमेश्वरला बचनथोरी विश्वास लबारी आखम्नी भिदेमा तिग परमेश्वर विश्वास लबारी आखम्बा परमेश्वर हिन्ना? ⁴ अहँ, आहिन। म्हे फटा तसैनोन परमेश्वर चा सत्य मुला। बचनरीनोन चुहइ भिसी भ्रिबा मुला,

“हाडसे सुइबा तामग्यामसेन हाड सत्य परमेश्वर हिन्ना भिसी म्हेगदेसे था याइला,

ओच्छे निसाफ लबा धुइरी हाडसेन ढाला।” †

⁵ तर चुदे य्हाडसे लबा आज्यबा गेग्याम परमेश्वर ज्यबा मुला भिसी पाइमुला भिसम य्हाडसे तिग पाइसे? परमेश्वरसे य्हाडदा आज्यबा गेला सजाय पिन्मा तिग परमेश्वरसे अन्याय लबा तला? डाइ म्हेसे म्हेन्बा अन्धार पाइबा हिन्ना। ⁶ चु ताम हिन्नोन आहिन, चुदे परमेश्वरदेन छ्याम निसाफ लबा अधिकार आरेबा हिन्सम खाहइ लसी परमेश्वरसे जम्बुलिडला निसाफ लबारी खम्ला? ⁷ चुदे डाइ पाइबा लुसीला तामग्याम परमेश्वरदा ल्हानान मान तला, ओच्छे परमेश्वर सत्य हिन्ना भिसी उन्ना भिसम तिगदा परमेश्वरसे डादा इन पापी म्हेदा हइ लसी निसाफ लबा? ⁸ ज्यबा तबारी

पाप गे लसै तला भिबा ताम खाइमै ज्यबा तला? तसैनोन कोइ कोइ म्हेगदेसे य्हाडसे चुहइ पाइजी भिसी खिसी लसी दोष लबा मुला। चुहइ लसी दोष लबा म्हेगदेदा चा ठीक सजाय पिन्ना।

पाप आलबा म्हे खालै आरे

⁹ दाहेन्से अर्गु यहूलला म्हेगदे भन्दा य्हाड यहूदीगदे चा परमेश्वरला डाच्छा ज्यबा म्हे हिन्ना? आहिन। यहूदीदेन अर्गु यहूलला म्हेगदे जम्मान पापला तहरी मुला भिसी डाइ डाच्छान पाइसी जिन्बा मुला। ¹⁰ बचनरीनोन चुहइ भिसी भ्रिबा मुला

“परमेश्वरसे म्हेन्बा अन्धार भ्रबा म्हे खालै आरे, गिकनोन आरे। †

¹¹ घोबा म्हे खालै आरे,

ओच्छे परमेश्वरदा म्हाइबा म्हेएनोन खालै आरे।

¹² जम्मान म्हेसे परमेश्वरदा खलाबा मुला,

गे खेल्बा म्हे गिकनोन आरे,

ओच्छे ज्यबा गे लबा म्हेएनोन गिकनोन आरे।

¹³ थेनीगदेला ओल्गोड आल्हुबा धुर्सा हइबान मुला,

ओच्छे स्यहान्दोदा फसब लबारी थेनीगदेला लेसे लुसीला ताम जे लमुला। थेनीगदेला सुइरी चा पुखीला हइबान बिख मुला। ††

¹⁴ थेनीगदेला सुइसे के:बादेन

आज्यबा ताम जे पाइमुला। †††

¹⁵ थेनीगदे म्हे साइबारी छ्यार्बा तमुला। †††

¹⁶ थेनीगदे भ्रबा ग्यामरी

दुखदेन नाश जे तमुला।

¹⁷ ओच्छे शान्तिला ग्यामदा

थेनीगदेसे डोसेबान आरे।

¹⁸ थेनीगदे परमेश्वर म्हाइसी

आलोङ्गुला।” §

¹⁹ परमेश्वरसे मोशादा पिन्बा ठिमरी भ्रिबा ताम थे ठिमला तहरी चिबा म्हेगदेदा पाइबा ताम हिन्ना भिसी य्हाडदा था मुला। थेतबासेलमा जम्बुलिडला जम्मान म्हेगदे परमेश्वरला डाच्छा राप्तो:ला। थे धुइरी खालैसेन तिगै पाइबारी आखम। ²⁰ तिगदा भिसम थे ठिम अन्धार गे लसी खालैनोन परमेश्वरदा सेम निबा म्हे दोबारी आखम। ठिमसे चा म्हेसे लबा पाप उन्सी पिन्बा जे हिन्ना। ††

विश्वासग्यामसे जे परमेश्वरदा सेम निबा म्हे दोला

²¹ तर दान्दे परमेश्वरसे म्हेदा खाहइ लसी हाडदा सेम निबा म्हे स्होमुला भिबा ताम य्हाडसे म्हाइबा मुला। चु ताम ठिमदेन अगमवक्तागदेसेनोन पाइबा मुला। तर चु चा ठिम अन्धार गे लसी आहिन। ²² चुहइ लसीन येशू ख्रीष्टदा विश्वास लबा जम्मान म्हेगदे विश्वासग्यामनोन परमेश्वरदा सेम निबा म्हे दोबा मुला। तिगदा भिसम परमेश्वरला डाच्छा जम्मान म्हे गिकनोन हिन्ना। †††²³ तिगदा भिसम जम्मान म्हेगदेसे पाप लबा मुला, ओच्छे परमेश्वरला घेन य्हालग्याम थारेड तबा मुला। ²⁴ तर परमेश्वर चा दया लबा परमेश्वर हिन्ना, थेसे दयामाया लसी म्हेगदेदा तिगै आकिन्ना ओहइनोन हाडदा सेम निबा म्हे स्होबा मुला। तिगदा भिसम ख्रीष्ट येशूसे जम्मान म्हेला लागिरी हाडसेन सजाय नासी म्हेगदेदा पापला सजायग्याम फेबा मुला। ²⁵ परमेश्वरसे ख्रीष्टदा य्हाडला लागिरी बलि तबारी पुइखजी। ओच्छे ख्रीष्टसे बगब लबा का य्हाडला लागिरी हिन्ना भिबा तामरी विश्वास लबा म्हेला पापला दोष मेटब लबा मुला। चुहइ लसी परमेश्वरसे हाडसे लबा निसाफ ठीक हिन्ना भिसी उन्बा मुला। तिगदा भिसम ख्रीष्ट फेक्खबा भन्दा डाच्छा परमेश्वरसे नासी म्हेगदेला पापगदेदा तिगै वास्ता आलनी। ²⁶ दान्देनोन हाड ठीक मुला भिसी उन्बाला लागिरी परमेश्वरसे चुहइ लजी।

† 2:24 यशै ५२:५ †† 2:29 व्यव ३०:६ † 3:4 भजन ५१:४
‡ 3:10 भजन १४:१-३; ५३:१-३ †† 3:13 भजन ५:९; १४०:३ †††
§ 3:14 भजन १०:७ ††† 3:15 यशै ५९:७-८ § 3:18 भजन ३६:१ †† 3:20
भजन १४३:२; गला २:१६ ††† 3:22 गला २:१६

परमेश्वरसे हाड ठीक निसाफ लबादेन येशूथोरी विश्वास लबा म्हिगदेग्याम स्थान्दो म्हिगदेदाएनोन हाडदा सेम निबा म्हि स्होबारी खम्बा परमेश्वर हिन्ना भिसी उन्बाला लागिरी थेह्ण्ड लबा हिन्ना।

27 थेह्ण्ड भिसम य्हाडसे तिग तामला लागिरी घमण्ड लसे? घमण्ड लतो:बा तामनोन आरे। तिगदा भिसम चु गे खजिबै ठिम अन्छार भ्रसी तबा आहिन। तर विश्वास लबासे लमान तबा हिन्ना। 28 थेतबासेलमा ठिम अन्छार गे लसी आहिन। तर विश्वास लसी जे परमेश्वरदा सेम निबा म्हि दोबारी खम्बा भिबा ताम य्हाडदा था मुला। 29 तिग परमेश्वर य्हुदीगदेला जे परमेश्वर हिन्ना? तिग अर्गु य्हुलला म्हिगदेला चा परमेश्वर आहिन? थे अर्गु य्हुलला म्हिगदेलाएनोन परमेश्वर हिन्ना। 30 जम्मालान परमेश्वर गिकनोन हिन्ना। खतना लबा म्हि मुसै, खतना आलबा म्हि मुसै, † जम्मादान परमेश्वरसे थेनीगदेसे लबा विश्वासग्यामसेन परमेश्वरदा सेम निबा म्हि स्होबा हिन्ना। †31 चुदे य्हाडसे विश्वासग्याम परमेश्वरदा सेम निबा म्हि दोखम्बा भिसी पाड्मा तिग परमेश्वरला ठिमदा चा नाश लबा हिन्ना? पक्कान आहिन, बरु य्हाडसे थे ठिमदा पूरा लबा मुला।

अब्राहामला विश्वास

4 दाहेन्से उन्ना म्हेमे अब्राहामसे तिग लोप्जी भिबा ताम खाह्ण्ड लसी पाड्से? 2 चुदे अब्राहाम थेसे लबा गेग्याम परमेश्वरदा सेम निबा म्हि दोबा हिन्सम घमण्ड लम्पाड्सेला मुबा। तर परमेश्वरला डाच्छा चा आहिन। 3 तिगदा भिसम परमेश्वरला बचनरी चुह्ण्ड लसी भिबा मुला, “अब्राहामसे परमेश्वरदा विश्वास लजी। थेतबासेलमा परमेश्वरसे अब्राहामदा हाडदा सेम निबा म्हि हिन्ना भिसी सुड्जी।” 4 च्यागो, खालै म्हिसे गे लसी याड्बा ज्याला चा दान आहिन, तर थे थेसे याड्तो:बा ज्याला हिन्ना। 5 जुन म्हिसे गेथोरी भर आलना पाप माफ लसी परमेश्वरदा सेम निबा म्हि स्होबा परमेश्वरदा विश्वास लला, थेह्ण्डबा म्हिदा विश्वासग्यामसेन परमेश्वरसे हाडदा सेम निबा म्हि हिन्ना भिसी सुड्जी। 6 गेग्याम आहिन, तर विश्वासग्याम परमेश्वरदा सेम निबा म्हि दोबा म्हिगदेदा दाऊद ग्लेसे परमेश्वरला बचनरी चुह्ण्ड भिसी पाड्बा मुला।

7 “थेनीगदेसे परमेश्वरग्याम गाते मोलम याड्ला, थेनीगदेसे आज्यबा गे लसैनोन परमेश्वरसे थेनीगदेदा माफ लबा मुला। ओच्छे थेनीगदेला पापला दोषएनोन मेटब लसी पिन्बा मुला।

8 थेनीगदेसे परमेश्वरग्याम गाते मोलम याड्ला, थेनीगदेसे लबा पापला दोष परमेश्वरसे मेटब लसी जिन्बा मुला।” †

9 दाऊदसे पाड्बा चु मोलम खतना लबा य्हुदीगदेला लागिरी जे हिन्ना? आहिन। तर खतना आलबा अर्गु य्हुलला म्हिगदेला लागिरीनोन हिन्ना। तिगदा भिसम अब्राहामसे परमेश्वरदा विश्वास लबासे लमा परमेश्वरसे थेदा हाडदा सेम निबा म्हि हिन्ना भिसी सुड्जी भिबा ताम य्हाडसे पाड्मुला। 10 अब्राहामदा परमेश्वरसे खाड्मा तिगै दोष आरेबा म्हि हिन्ना भिसी सुड्जी? थेसे ठिम अन्छार खतना लबा भन्दा डाच्छा कि लिच्छा? तर खतना लबा भन्दा डाच्छान सुड्बा हिन्ना। 11 लिच्छा अब्राहामला खतना लजी, ओच्छे चु चा थेसे लबा विश्वाससे लमा खतना तबा भन्दा डाच्छान परमेश्वरसे थेदा हाडदा सेम निबा म्हि भिसी सुड्बाला चिनु हिन्ना। ओच्छे खतना आलसैनोन विश्वासग्याम परमेश्वरसे हाडदा सेम निबा म्हि भिसी सुड्बा जम्मान म्हिगदेला थे आबा दोगै भिसी चुह्ण्ड तबा हिन्ना। †12 थेह्ण्ड लसी य्हुदीगदे खतना लबासे लमा आहिन, तर थेनीगदेसेनोन अब्राहामसे ह्ण्ड लसैन खतना लबा भन्दा डाच्छा विश्वास लसी भ्रबासे लमान अब्राहाम थेनीगदेलाएनोन आबा दोजी।

विश्वासग्यामसे जे कबुल लबा स्हे याड्ला

13 अब्राहामदेन थेला सन्तानगदेदा जम्बुलिडला हक पिन्ना भिसी लबा कबुल चा थेसे ठिम अन्छार गे लबासे लमा आहिन। तर थेसे लबा

† “खतना लबा म्हि” ओच्छे “खतना आलबा म्हि” भिबा चा य्हुदी ओच्छे अर्गु य्हुलला म्हिगदे हिन्ना। †† 3:30 व्यव ६:४; गला ३:२० † 4:3 उत्प १५:६; गला ३:६ †† 4:8 भजन ३२:१-२ †† 4:11 उत्प १७:१०

विश्वासग्याम परमेश्वरदा सेम निबा म्हि दोबासे लमा हिन्ना। ††14 चुदे ठिम अन्छार भ्रबा म्हिगदेसे थे हक याड्बा हिन्सम म्हिगदेसे लबा विश्वास गे आखेल्बा तसेला मुबा। ओच्छे परमेश्वरसे पिन्ना भिसी लबा कबुलएनोन गे आखेल्बा तसेला मुबा। ††15 तिगदा भिसम ठिम अन्छार आभ्रमा परमेश्वरसे म्हिगदेदा सजाय पिन्ना। तर ठिमनोन आरेमाहेन्से थेरी आज्यबा गेनोन आत।

16 परमेश्वरसे लबा दयामायाथोरी भर लगै भिसी थेसे लबा कबुल विश्वासग्यामसे जे याड्ला। चुनोन दयामायाग्यामसे अब्राहामला जम्मान सन्तानसे परमेश्वरसे लबा कबुल याड्ला भिसी पक्का लबा मुला। चु कबुल ठिम मुबागदेला लागिरी जे आहिन, तर अब्राहामसे ह्ण्डबान विश्वास लबा म्हिगदेला लागिरीनोन हिन्ना। तिगदा भिसम अब्राहाम य्हाड जम्मालान आबा हिन्ना। †17 परमेश्वरसे अब्राहामदा सुड्बा ताम बचनरी चुह्ण्ड लसी भिबा मुला, “डाड् एदा जम्मान य्हुलला म्हिगदेला आबा स्होबा मुला।” तिगदा भिसम परमेश्वरला डाच्छा अब्राहाम य्हाड जम्मालान आबा हिन्ना। सिबागदेदा सोना लबादेन आरेबा स्हेदा बचनग्यामसेन स्होबा परमेश्वरदा अब्राहामसे विश्वास लजी। ††

18 कोला तला भिसी आशनोन आरेबा धुडरी परमेश्वरसे “एला कोलागदे मुला सार ह्ण्डनोन इयासीन इयाआखम्बाधोना तला” भिसी सुड्बा तामरी आश लसी विश्वास लजी। चुह्ण्ड लसी थे ल्हानान य्हुलला म्हिगदेला आबा दोजी। ††19 अब्राहाम ओस्पन ग्यार्जा गिक दिड तसी जिन्बा मुबा। हाड खेल्बा दोसी सिड लबा धुड तजी भिबा तामदेन हाडला मिड साराग्याम कोला आत भिबा ताम था याड्सीनोन थेला विश्वास कमजोर आतनी। †20 परमेश्वरसे पिन्ना भिसी कबुल लबा तामरी थेसे तिगै शड्का आलना विश्वासरी इन कोड्सी चिजी, ओच्छे चुनोन विश्वासग्याम थेसे परमेश्वरदा मानदेन जयजयकार लजी। 21 परमेश्वरसे लबा कबुल पूरा लखम्बा भिबा ताम अब्राहामदा पक्का था मुबा। 22 चुह्ण्डबा विश्वाससे लमान परमेश्वरसे अब्राहामदा “हाडदा सेम निबा म्हि हिन्ना” भिसी सुड्जी। 23 “परमेश्वरदा सेम निबा म्हि हिन्ना” भिसी सुड्बा ताम चा अब्राहामला लागिरी जे भिबा आहिन, 24 तर य्हाडला लागिरीनोन भिबा हिन्ना। य्हाड न्हडला जुन म्हिसे य्हाडला प्रभु येशूदा सिबाग्याम सोना लबा परमेश्वरदा विश्वास लला, थेनीगदेदाएनोन परमेश्वरसे हाडदा सेम निबा म्हि हिन्ना भिसी सुड्जी। 25 य्हाडला पापला दोष मेटब लबाला लागिरी येशूदा साड्जी, ओच्छे य्हाडदा परमेश्वरदा सेम निबा म्हि हिन्ना भिसी म्हन्बाला लागिरी थेदा सिबाग्याम सोना लजी। ††

विश्वासग्याम याड्बा शान्ति

5 थेतबासेलमा य्हाडला विश्वासग्यामसेन य्हाडदा परमेश्वरदा सेम निबा म्हि दोना लबा मुला। ओच्छे य्हाडला प्रभु येशू ख्रीष्टग्यामसेन य्हाड परमेश्वरदेन छ्याम ढिक्का मुला। 2 ख्रीष्टसे य्हाडला विश्वासग्याम य्हाडदा परमेश्वरला दयामायारी भबा मुला। ओच्छे दान्दे य्हाड थेनोन दयामायारी भ्रबा मुला। य्हाडदा परमेश्वरसे थेला ह्ण्डबान य्हालदेन शक्ति पिन्ना भिसी ग्रेन आश थोसी य्हाड ताड्बा मुला। 3 चुदे जे आहिन, दुखरीनोन य्हाड ताड्बा मुला। तिगदा भिसम य्हाडसे दुख नाजी भिसम अझन य्हाड विश्वासरी पाको म्हि दोला। 4 दुख नाखम्बा शक्तिसे य्हाडदा पाको म्हि स्होला। य्हाड पाको म्हि तमाहेन्से य्हाडदा आश खमुला। 5 य्हाडसे लबा चु आशसे य्हाडदा दुख इहम्ना आल। तिगदा भिसम य्हाडदा परमेश्वरसे हाडला आत्मा पिन्बा मुला, ओच्छे थेनोन आत्मासे य्हाडला सेमरी परमेश्वरला माया थान्सी पिन्बा मुला।

6 य्हाडसे थार्बा याड्बाला लागिरी तिगैनोन लबारी आखम्बा धुडरी ख्रीष्ट य्हाड पापीगदेला लागिरी परमेश्वरसे तोगब लबा धुडरी सिजी। 7 धर्म तेन्बा म्हिला लागिरी खालै म्हि चुह्ण्ड लसी आसि। तर ज्यबा गे लबा म्हिला लागिरी खालै म्हिसे सिबारी म्हाडला तला। 8 तर य्हाड पापी तसैनोन ख्रीष्ट य्हाडला लागिरी सिसी य्हाडदा परमेश्वरसे हाडला माया उन्जी।

††† 4:13 उत्प १७:४-६; २२:१७-१८; गला ३:२९ ††† 4:14 गला ३:१८ † 4:16 गला ३:७ †† 4:17 उत्प १७:५ ††† 4:18 उत्प १५:५ † 4:19 उत्प १७:१७ ††† 4:25 यशै ५३:४-५

9 दाहेन्से ख्रीष्ट सिसी हाडलान काग्याम य्हाडदा परमेश्वरदा सेम निबा म्हि दोना लजी। चुदे जे आहिन, परमेश्वरग्याम य्हाडसे नातो:बा सजायग्यामसेनोन य्हाडदा जोगब लला। 10 य्हाड परमेश्वरला शत्रु मुबा धुडरीन थैला झा ख्रीष्ट सिसी य्हाडदा परमेश्वरदेन छ्याम ढिकना लजी। य्हाडदा परमेश्वरदेन छ्याम ढिकना लबा जे आहिन, तर दाहेन्से इन प्रभु येशू ख्रीष्टला ल्हुडग्यामसे य्हाडदा थानाएनोन लला। 11 चुदे जे आहिन, तर दाहेन्से प्रभु येशू ख्रीष्टसे य्हाडदा परमेश्वरदेन छ्याम ढिकना लसी हाडला हो स्होबासे लमा य्हाड परमेश्वरदेन छ्याम गिक तसी ताड्बा मुला।

आदमदेन ख्रीष्ट

12 जम्मान भन्दा डाच्छा आदम भिबा म्हि गिकग्याम जम्बुलिडरी पाप खजी, ओच्छे पापग्याम काल खजी। चुहड लसीन जम्मान म्हिगदेसे पाप लबासे लमा जम्मानथोरी काल खजी। 13 परमेश्वरसे मोशादा ठिम पिन्बा भन्दा डाच्छाहेन्सेन जम्बुलिडरी पाप मुबा। तर ठिम आरेबासे लमा पापला हिसाब आरेमुबा। 14 तसैनोन आदमला धुडहेन्से मोशा भिबा म्हिला धुडधोनाला जम्मान म्हिगदेदा कालसे शासन लजी। थे म्हिगदेसे लबा पाप आदमसे लबा पाप हड्बा आतसै थैनीगदे सितो:जी। आदमसे लबा गेग्याम जम्मान म्हि सिजी, ओच्छे ख्रीष्टसे लबा गेग्याम चा जम्मान म्हि सोजी।

चुहड लसी च्यामा, आदम लिच्छा फेखबा ख्रीष्ट हड्बान मुबा। 15 तर पापला सय फाबारी परमेश्वरसे य्हाडदा पिन्बा मोलमदेन आदमसे लबा पाप ल्हानान फरक मुला। तिगदा भिसम म्हि गिकसे लबा पापग्याम ल्हानान म्हिगदे सिजी। तर लिच्छा फेखबा येशू ख्रीष्टसे चा परमेश्वरला ल्हानान घेन दयामाग्याम म्हिसे फातो:बा पापला सय फासी ल्हानान म्हिगदेदा सोना लजी।

16 थेहड लसीन परमेश्वरसे ओहडनोन पिन्बा मोलम चा म्हि गिकसे लबा पाप भन्दा फरक मुला। म्हि गिकसे पाप लबासे लमा जम्मान म्हिगदेदा दोषी भिसी पाड्जी, ओच्छे सजाय नातो:जी। तर ल्हानान पाप लमाहेन्से लिच्छा फेखबा ओहडनोन याड्बा मोलमग्याम परमेश्वरसे म्हिगदेला पापला दोष मेटब लसी हाडदा सेम निबा म्हि भिसी सुड्जी। 17 म्हि गिकसे पाप लबासे लमा जम्मान म्हिगदेथोरी कालसे शासन लजी। तर परमेश्वरसे ल्हानान दयामाया लसी म्हि गिक येशू ख्रीष्टग्याम ओहडनोन पिन्बा मोलमग्याम य्हाडदा परमेश्वरदा सेम निबा म्हि हिन्ना भिसी सुड्जी। थे मोलम याड्बा म्हिगदे येशू ख्रीष्टग्याम सोला ओच्छे शासन लला।

18 थेतबासेलमा म्हि गिकसे लबा पापग्यामसे जम्मान म्हिगदेसे सजाय नातो:जी, थेहड लसीन म्हि गिकसे लबा ज्यबा गेग्यामसेन जम्मान म्हिगदे परमेश्वरदा सेम निबा म्हि दोसी जुकजुकधोनाला जुनी याड्बारी खम्ला। 19 म्हि गिकसे परमेश्वरसे कुल्बा ताम आड्यान्बासे लमा ल्हानान म्हिगदे पापी दोजी। थेहड लसीन म्हि गिकसे परमेश्वरसे कुल्बा ताम ड्यान्बासे लमा ल्हानान म्हि परमेश्वरदा सेम निबा म्हि दोजी। 20 जम्मान म्हिगदेसे गाते पाप लबा चीम भिसी था याड्गै भिसी परमेश्वरसे ठिम पिन्जी। तर जति पाप बढब तबान निजी परमेश्वरसे इन ल्हानान दयामाया लजी। 21 थे धुडरी पापसे कालग्याम म्हिगदेदा शासन लबा हड् लसी दान्दे परमेश्वरला दयामायासे शासन लबान मुला। थे दयामायासे य्हाडदा परमेश्वरदा सेम निबा म्हि स्होसी य्हाडला प्रभु येशू ख्रीष्टग्याम जुकजुकधोनाला जुनी पिन्बान मुला।

पापग्याम सिला ख्रीष्टग्याम सोला

6 दाहेन्से य्हाडसे तिग पाड्से? तिग परमेश्वरग्याम ल्हानान दयामाया याड्गै भिसी अझ य्हाड पापनोन लसी चिसे? 2 आहिन, खाड्मै चुहड लबारी आत। चुदे य्हाड पापला शक्तिग्याम फेसी जिन्जी भिसम तिगदा य्हाड दो:सी पापला तहरी चिबा सेम लबा? 3 य्हाड ख्रीष्ट येशूदेन छ्याम गिक तबारी बप्तिस्मा किन्जी। य्हाडसे किन्बा बप्तिस्मा चा ख्रीष्टदेन छ्याम गिक तसी सिबाला चिनु हिन्ना भिबा ताम एनीगदेदा थानोन मुला। 4 थेतबासेलमा य्हाडएनोन ख्रीष्टदेन छ्यामनोन बप्तिस्माग्याम सिसी ल्हुजी। ओच्छे य्हाड

† 5:12 उत्प ३:६

छार बानीबेहोर थोसी भ्रबाला लागिरी शक्तिशाली परमेश्वर आबासे हाडला शक्तिग्याम येशू ख्रीष्टदा सिबाग्याम सोना लजी। †

5 चुदे य्हाड ख्रीष्टदेन छ्याम गिक तसी सिजी भिसम य्हाडएनोन थे हड् लसीन सिबाग्याम सोला। 6 य्हाडला पापसे प्लिड्बा ल्हुड नाश तगै भिसी डाच्छाला बानीबेहोरदा ख्रीष्टदेन छ्यामनोन कुसरी साड्बा मुला। चुहड लबा चा दाहेन्से य्हाड पापला तहरी चिआतो:गै भिसी हिन्ना भिबा ताम य्हाडदा थानोन मुला। 7 तिगदा भिसम जुन म्हि सिबा मुला थे म्हि थैला पापला सजायग्याम पूरान फेसी जिन्बा मुला।

8 ख्रीष्टदेन छ्याम सिजी भिसम ख्रीष्टदेन छ्यामनोन सोला भिसी य्हाडसे विश्वास लबा मुला। 9 तिगदा भिसम य्हाडदा थानोन मुला, ख्रीष्ट सिसीनोन सोसी जिन्बा मुला। दाहेन्से थे खाड्मै आसि, ओच्छे थेदा कालला शक्तिसेनोन तिगै लबारी आखम। 10 पूरान पापला दोष मेटब लबाला लागिरी ख्रीष्ट तिरेम सिसी जिन्बासे लमा पापला सय फासी जिन्जी। ओच्छे परमेश्वरला लागिरीन थे सदनना लागिरी सोबा मुला। 11 थेहड लसीन एनीगदेसेनोन हाड हाडला पापला शक्तिला लागिरी सिजी भिसी म्हन्तो:मुला। तर ख्रीष्ट येशूग्याम परमेश्वरला लागिरी सोबा मुला भिसी म्हन्तो:मुला।

12 थेतबासेलमा एनीगदेला पापी सेमसे जुन लड् म्हन्बा थे अन्छार लआतो:गै भिसी एनीगदेसे हाडला सिसी निबा ल्हुडरी पापदा शासन लबारी थापिन्गो। 13 ओच्छे आज्यबा गे लबारी हाडला या काड पापदा जिम्मा थापिन्गो। तर सिबाग्याम सोबा म्हिगदेसे हड् लसी हाडला पूरान ल्हुड परमेश्वरदा पिन्गो, ओच्छे परमेश्वरदा सेम निबा गे लबाला लागिरी हाडला या काड परमेश्वरदान जिम्मा लसी पिन्गो। 14 तिगदा भिसम पाप एनीगदेथोरी शासन लबा एनीगदेला मालिक आहिन, दाहेन्से एनीगदे ठिमला तहरी आरे, तर परमेश्वरला दयामायाला तहरी मुला।

परमेश्वरदा सेम निबा गे लबा म्हि

15 य्हाड ठिमला तहरी आरे, तर परमेश्वरला दयामायाला तहरी मुला भिदेमा तिग य्हाड पापनोन लसी चिसे? आहिन, चुहड् खाड्मै लबारी आत। 16 जुन्ना ताम ड्यान्सी गे लबा सेम लला एनीगदे थैलान नोकर दोला। चुदे पापला नोकर दोसी थेसे कुल्बा अन्छार भ्रजी भिसम ए सिला, तर परमेश्वरसे कुल्बा अन्छार भ्रजी भिसम ए थेदा सेम निबा म्हि दोला। 17 डाच्छा एनीगदे पापला नोकर दोबा मुबा। तर दान्दे एनीगदेसे सेमहेन्सेन परमेश्वरला बारेरी लोप्बा ताम अन्छार भ्रबा मुला। चुला लागिरी परमेश्वरदा धन्ववाद तगै। 18 एनीगदे पापग्याम फेबा मुला, ओच्छे परमेश्वरसे म्हन्बा अन्छार भ्रबा म्हि दोबा मुला।

19 घोबारी आखम्बा एनीगदेला बानीबेहोरसे लमा डाड् एनीगदेसे घोबारी खम्बा ग्योडरी पाड्बान मुला। तिरेम आज्यबा सेम थोसी पापथोरी पाप लबाला लागिरी एनीगदेसे हाडला ल्हुड पापदा जिम्मा पिन्बा मुबा। दाहेन्से परमेश्वरसे म्हन्बा अन्छार भ्रबा म्हि दोबारी एनीगदेसे हाडला ल्हुड परमेश्वरदा जिम्मा पिन्गो। 20 पापला नोकर दोबा धुडरी एनीगदे परमेश्वरसे म्हन्बा अन्छार भ्रआतो:मुबा। 21 थे धुडरी लबा गेगदे ढन्सी एनीगदे दान्दे पे:मुला, थेहड्बा गेग्याम एनीगदेसे तिग याड्जी? थे जम्मान आज्यबा गेसे चा म्हिदा सिना लमुला। 22 दाहेन्से एनीगदेसे पापग्याम थारबा याड्बा मुला, ओच्छे परमेश्वरदा तेन्सी तिगै दोष आरेबा म्हि दोबा मुला। चुग्याम एनीगदेसे जुकजुकधोनाला जुनी याड्ला। 23 तिगदा भिसम पापसे पिन्बा ज्याला चा काल हिन्ना, तर परमेश्वरसे ओहडनोन पिन्बा मोलम चा य्हाडला प्रभु येशू ख्रीष्टग्याम याड्बा जुकजुकधोनाला जुनी हिन्ना।

ठिमग्याम फेबा

7 ज्योज्यो आले नाना आडागदे, चु ताम डाड् ठिम सेबा घोबा म्हिगदेदा पाड्बान मुला। म्हि सोतेधोना जे ठिमला तहरी तमुला भिबा ताम एनीगदेदाएनोन थानोन मुला। 2 सोतेधोना ब्याह लबा बारेला ठिमला तहरी चिबा चा, ब्याह लबा म्रिडम्हेमे हाडला हेम्बो सोतेधोना हेम्बोला तहरी चिबा

†† 6:4 कल २:१२

हड्डबा हिन्ना। तर चुदे थैला हेम्बो सिजी भिसम थे हेम्बोला तहरी आचि।
³ चुदे हाडला हेम्बो मुना मुनान थेसे स्थान्दो हेम्फेबेदेन छ्याम ब्याह लजी भिसम ब्रेल्सी भ्रबा हिन्ना। तर थैला हेम्बो सिजी भिसम थे, थे ठिमग्याम फेबा मुला, ओच्छे स्थान्दो हेम्फेबेदेन छ्याम ब्याह लसैनोन ब्रेल्सी भ्रबा आहिन।

⁴ थेहड्ड लसीन डाला ज्योज्यो आले नाना आडागदे, एनीगदेएनोन ख्रीष्टला लहुडग्याम ठिमला लागिरी सिसी जिन्बा मुला। थेतबासेलमा परमेश्वरला लागिरी ज्यबा गे लबारी खमौ भिसी य्हाड सिबाग्याम सोबा ख्रीष्टदेन छ्याम गिक तबा मुला। ⁵ य्हाड डाच्छा पापी बानीबेहोर अन्धार भ्रमुबा। थे धुडरी ठिमसे य्हाडला पापी सेमदा थीसी य्हाडदा ल्हानान पाप गेगदे लपुड्जी। थेनोन गेसे य्हाडथोरी काल भजी। ⁶ थेहड्डबा ठिमला लागिरी य्हाड सिसी जिन्जी। चु भिबा चा य्हाड थे ठिमग्याम फेसी जिन्बा मुला भिबा हिन्ना। थेतबासेलमा दाहेन्से य्हाड डाच्छा भ्रिबा ठिमला तहरी चिसी आहिन, तर परमेश्वरला आत्मासे पिन्बा छार जुनीग्याम तेन्बा मुला।

ठिमदेन पाप

⁷ थेहड्ड भिसम तिग य्हाडसे ठिमनोन पाप हिन्ना भिसी पाड्बारी तला? पक्कान आत। तर चुदे ठिम आरेबा हिन्सम पाप भिबा डादा थानोन आतसेला मुबा। तिगदा भिसम “एसे लोभ थालउ” भिसी ठिमसे आपाड्बा हिन्सम लोभ लबा चा पाप हिन्ना भिसी डाइ था आयाडसेला मुबा। ^{†8} तर पापसे ठिमरी कुल्बा तामग्याम मौका किन्सी डाला सेमरी ल्हानान थरीला लोभ खना लजी। तिगदा भिसम ठिम आरेसम पाप खाइमै आरेबा तेबान हिन्ना। ⁹ डाच्छा ठिम था आरेबा धुडरी डा सोबा मुबा। तर ठिम था याड्हाहेन्से डा पापग्याम सिबा तेबान तजी ओच्छे पाप चा सोजी। ¹⁰ ओच्छे जुनी पिन्ना भिसी कबुल लबा थे ठिमसे मी डादा सिना लजी। ¹¹ तिगदा भिसम पापसे थे ठिमसे कुल्बा तामग्यामसेन मौका किन्सी डादा छल लसी साइबा हड्डबान हिन्ना। ^{††12} तसैनोन ठिमदेन ठिमसे कुल्बा ताम चा तिगै दोष आरेबादेन ठीक ओच्छे ज्यबा मुला।

¹³ ज्यबा मुला भिबा ठिमसेन डादा साइबा हिन्ना? पक्कान आहिन। ठिमरी मुबा ज्यबा तामग्याम डादा साइबा पापनोन हिन्ना। थेतबासेलमा ठिम अन्धार पाप गाते लोड्बा खबा मुला भिबा ताम य्हाडदा था मुला।

ख्रीष्ट आरेसम य्हाड पापदेन छ्याम भ्रे:ला

¹⁴ ठिम स्वर्ग्याम खबा ज्यबा ताम हिन्ना भिबा य्हाडदा था मुला। तर डाएनोन पापला तहरी चिबा जम्बुलिडला म्हि हिन्ना। ¹⁵ डाइ तिग लबान मुला थे डादान था आरे। तिगदा भिसम जुन गे डाइ लबारी म्हाइला थे आलमुला। तर जुन गे डादा सेम आनिमुला थेनोन गे डाइ लमुला। ^{†16} चुहड्ड लसीन लबारी आम्हाइबा गे डाइ लमुला भिसम ठिम ज्यबा मुला भिबा तामरी डादा विश्वास मुला। ¹⁷ थेतबासेलमा डाइ लबा आज्यबा गे डा हाडसेन लबा आहिन। तर डा न्हडरी चिबा पापसे लबा हिन्ना। ¹⁸ तिगदा भिसम डा जम्बुलिडलान म्हि तबासे लमा डा न्हडरी तिगै ज्यबा ताम आरे, थेहड्ड तबा चा डा न्हडरी मुबा जम्मान पापी बानीबेहोरसे हिन्ना भिसी डादा था मुला। थेतबासेलमा जुन गे ज्यबा मुला, थे गे डाइ लबारी म्हाइसैनोन लबारी आखम्मुला। ¹⁹ तिगदा भिसम जुन गे ज्यबा भिसी डाइ लबारी म्हाइजी थे लबारी आखम्मुला। तर जुन गे आज्यबा भिसी डाइ लबारी आम्हाइनी थे गे लमुला। ²⁰ जुन गे डादा सेम आनिमुला थेनोन गे डाइ लमुला भिसम थे गे लबा डा हाडनोन आहिन। तर डा न्हडरी चिबा पाप हिन्ना।

²¹ थेतबासेलमा ज्यबा गे लबारी म्हाइना म्हाइनान डाग्याम आज्यबा गे जे तमुला। डाला लहुडरी गे लबा चा आज्यबा गे लबा ठिम हिन्ना भिसी डाइ था याड्बा मुला। ²² तिगदा भिसम डाला सेम चा परमेश्वरला ठिमग्यामसेन ताड्कुला। ²³ तर डादा चा डा न्हडरी मुबा अर्गुन ठिमसे गे लपुड्कुला भिसी डाइ म्हाइबा मुला। चु शक्तिसे चा परमेश्वरदा ताड्ना लबारी म्हाइबा डाला सेमदा बिरोध लमुला। चुसेन डादा पापला नोकर स्होसी डाथोरी शासन लमुला।

²⁴ डा गाते ल्हाना दुख याड्बा म्हि, पापदेन कालला शक्तिला तहरी मुबा चु

लहुडग्याम डादा खाल्से फेला? थेतबासेलमा डाइ सेमहेन्सेन परमेश्वरला ठिमदा तेन्बारी म्हाइमुला, तर डाला पापी बानीबेहोरसे चा पापदान तेन्पुड्कुला। डा खाहड्डबा ताड्आखम्बा म्हि, पापदेन कालला शक्तिला तहरी मुबा चु लहुडग्याम डादा खाल्से फेला? परमेश्वरदा धन्यवाद तगै। येशू ख्रीष्ट य्हाडला प्रभुसेन चुग्याम य्हाडदा फेला।

परमेश्वरला आत्माग्याम याड्बा जुनी

8 थेतबासेलमा दाहेन्से ख्रीष्ट येशूदेन छ्याम गिक तबा म्हिगदेदा परमेश्वरसे सजाय आपिन। ² तिगदा भिसम ख्रीष्ट येशूग्याम जुनी पिन्बा परमेश्वरला आत्माला शक्तिसे य्हाडदा पापदेन सिबाला शक्तिग्याम थार्ना लबा मुला। ³ म्हिला हाडलान पापी बानीबेहोरसे ठिमदा कमजोर तना लबासे लमा ठिमसे लबारी आखम्बा गे परमेश्वरसे लजी। परमेश्वरसे हाडलान डादा पापी म्हिला हड्डबान लहुडरी पुड्खसी म्हिला पापला लागिरी बलि तपुड्जी। ओच्छे थैलान लहुडग्याम पापला शक्तिदा नाश लजी। ⁴ चुहड्ड लसी पापी बानीबेहोर अन्धार भ्रबारी आहिन, तर परमेश्वरला आत्मासे कुल्बा अन्धार भ्रबा म्हि य्हाडग्याम परमेश्वरसे ठिमसे म्हन्बा ताम पूरा तबा मुला।

⁵ तिगदा भिसम पापी बानीबेहोर अन्धार भ्रबा म्हिगदेला सेम पापी बानीबेहोरदा सेम निबा तामरी तमुला। तर परमेश्वरला आत्मासे कुल्बा अन्धार भ्रबा म्हिगदेला सेम परमेश्वरला आत्मादा सेम निबा तामरी तमुला। ⁶ पापी बानीबेहोर अन्धार जे भ्रबा सेम लबा म्हि चा सिबा म्हि हड्डबान हिन्ना। तर परमेश्वरला आत्मासे म्हन्बा अन्धार भ्रबा सेम लबा म्हिसे चा शान्तिदेन जुनी याड्ला। ⁷ पापी सेमला तहरी चिबा म्हिगदे परमेश्वरला शत्रु हिन्ना। तिगदा भिसम थेनीगदे परमेश्वरला ठिम अन्धार भ्रएनोन आभ्र ओच्छे भ्रबारीएनोन आखम। ⁸ पापी सेमला तहरी चिबा म्हिगदेसे परमेश्वरदा ताड्ना लबारी आखम।

⁹ चुदे एनीगदे न्हडरी परमेश्वरला आत्मा धन्छ्याजी भिसम एनीगदे पापी बानीबेहोररी आहिन, तर परमेश्वरला आत्मा तला। तर खालै म्हिदेन छ्याम ख्रीष्टला आत्मा ^{††} आरेसम थे ख्रीष्टला म्हि तनोन आखम। ¹⁰ चुदे ख्रीष्ट एनीगदे न्हडरी धन्छ्याजी भिसम पापसे लमा एनीगदेला लहुड सिसी निसैनोन एनीगदे परमेश्वरदा सेम निबा म्हि दोबासे लमा एनीगदेला आत्मा चा सोला। ¹¹ परमेश्वरसे हाडला आत्मासे ख्रीष्ट येशूदा सिबाग्याम दो:सी लहुडरीन सोना लजी। थेनोन परमेश्वरला आत्मा एनीगदे न्हडरी धन्छ्याजी भिसम एनीगदेला सिसी निबा लहुडदाएनोन थेसे सोना लला। ^{††}

¹² थेतबासेलमा ज्योज्यो आले नाना आडागदे, य्हाडसे लतो:बा गे मी ल्हानान मुला, तर चु गेगदे य्हाडला पापी बानीबेहोरला तहरी चिसी लबा आहिन। ¹³ तिगदा भिसम एनीगदे हाडलान पापी बानीबेहोरला तहरी चिजी भिसम एनीगदे सितो:ला। तर चुदे परमेश्वरला आत्माला शक्तिग्याम थे पापी बानीबेहोरदा नाश लजी भिसम एनीगदे सोला। ¹⁴ तिगदा भिसम परमेश्वरला आत्मासे उन्बा ग्यामरी भ्रबा म्हिगदे जे परमेश्वरला कोलागदे हिन्ना। ¹⁵ तिगदा भिसम परमेश्वरसे एनीगदेदा थैला नोकर स्होसी लोड्ना लबा आत्मा पिन्बा आहिन, तर परमेश्वरसे एनीगदेदा थैला हाडलान कोलागदे दोबा आत्मा पिन्बा मुला। थे आत्माग्यामसे य्हाडसे थैदा “आबा” भिसी पाड्मुला। ^{†††16} य्हाड परमेश्वरला कोलागदे हिन्ना भिसी परमेश्वरला आत्मासे य्हाडला आत्मादा घोना लबा मुला। ¹⁷ य्हाड परमेश्वरला कोलागदे हिन्सम य्हाड परमेश्वरला हक याड्बा म्हि हिन्ना। ओच्छे चु हक ख्रीष्टदेन छ्याम तसी याड्ला। तर थेहड्ड लसीन ख्रीष्टसे नाबा दुख य्हाडसेनोन नाजी भिसम ख्रीष्टसे याड्बा मान य्हाडसेनोन याड्ला।

लिच्छा याड्बा मान

¹⁸ तिगदा भिसम य्हाडसे लिच्छा याड्बा सुखदेन प्रेन मान दान्दे य्हाडसे नाबा दुखदेन छ्याम दाँजब लबारी आखम भिबा ताम डादा था मुला।

¹⁹ पाड्नोन तो:मा, परमेश्वरसे हाडला कोलागदे उन्बा धिन च्याबारी

†† चु पदरी परमेश्वरला आत्मादेन ख्रीष्टला आत्मा भिबा गिकनोन हिन्ना। †††
 8:11 † कोर ३:१६ ††† 8:15 मर्कू १४:३६; गला ४:६

परमेश्वरसे स्होबा जम्मान स्हेसे सेम लसी थे धिन भ्रान्सी चिबा मुला।
20 तिग्दा भिसम जम्मान स्हे गे आखेल्बा तबा मुला, थेनीगदेसे म्हन्बा अन्धार
चुहङ् लबा आहिन। तर परमेश्वरसेन थेनीगदेदा थाना लबा धिनना आश
लसी चुहङ् लबा हिन्ना। 21 तिग्दा भिसम परमेश्वरसे स्होबा स्हेगदेदाएनोन
तिरेकुनु नाश तबाला याग्याम फेला, ओच्छे थेनीगदेसेनोन परमेश्वरला
कोलागदेसे याङ्बा हङ्बान घेन थाबा याङ्बाला।

22 थेनीगदे जम्मानसेन कोला न्हबा बेथा याङ्बा म्रिडम्हेमेगदेसे दुख नाबा
हङ् लसी दान्देधोना दुख नासी चिबा मुला भिबा ताम य्हाडदा था मुला।
23 थेनीगदे जे आहिन, तर परमेश्वरला आत्मा याङ्बा म्हेगदे य्हाडएनोन
परमेश्वरला कोलागदे दोबादेन ल्हुड पूरान पापग्याम फेबाला लागिरी सेमरी
दुख नासी परमेश्वरला ग्याम च्यासी चिबा मुला। 24 तिग्दा भिसम य्हाड
चुनोन आशग्याम थाबा मुला। आश लबा भिबा चा य्हाडसे तिगै स्हे
याङ्बाला लागिरी भ्रान्सी चिबा हिन्ना। डाच्छा याङ्सी जिन्बा स्हेला लागिरी
खालैसेन आश आला। 25 तर चुदे य्हाडसे आम्राङ्बा स्हेला लागिरी आश
लबा हिन्सम थे आयाङ्तेधोना दुख नासी भ्रान्सी चितोःला।

26 य्हाड कमजोर मुला, तर परमेश्वरला आत्मासेन य्हाडदा ह्यो लला। ह्यो
लबा भिबा चा खाहङ् लसी प्रार्थना लतोःला भिसी आसेबा धुइरी य्हाडसे
पाङ्बारीन आखम्बा तामग्याम परमेश्वरला आत्मासे य्हाडला साटोरी प्रार्थना
लला। 27 ओच्छे परमेश्वरला आत्मासे म्हन्बा ताम जम्मान सेमला ताम था
याङ्बा परमेश्वरदा था मुला। तिग्दा भिसम परमेश्वरला आत्मासे ह्याडला
म्हेगदेला साटोरी परमेश्वरसे म्हन्बा अन्धार प्रार्थना लमुला।

28 परमेश्वरसे ह्याडसे म्हन्बा अन्धार धम्बा जम्मान म्हेगदेदेन थेदा माया
लबा म्हेगदेला लागिरी जम्मान स्हेगदेदा ज्यबा तना लमुला भिबा ताम
य्हाडदा था मुला। 29 ख्रीष्ट जम्मान ज्योज्यो आले नाना आडागदेला ज्योज्यो
दोगै भिसी जम्बुलिङ स्होबा भन्दा डाच्छाहेन्सेन परमेश्वरसे ह्याडसे डोसेबा
म्हेगदेदा धम्जी। ओच्छे थेनीगदेदा ह्याडला झा हङ्बान स्होबारी पक्का
लजी। 30 जुन जुन म्हेदा परमेश्वरसे डाच्छान धम्मुबा, थेनीगदेदा ह्याडलान
सन्तान दोबारी ड्योडजी। ड्योडमाहेन्से थेनीगदेदा परमेश्वरला डाच्छा ज्यबा
म्हे हिन्ना भिसी सुङ्जी। परमेश्वरला डाच्छा ज्यबा म्हे हिन्ना भिसी
सुङ्गाहेन्से परमेश्वरसे थेनीगदेदा ह्याडसे याङ्बा मानदेन य्हाल याङ्बा
हकएनोन पिन्जी।

परमेश्वरला माया

31 थेहङ् भिसम चु तामगदेला बारेरी य्हाडसे तिग पाङ्तोःबा? चुदे
परमेश्वरसेन य्हाडपट्टि मुला भिसम य्हाडदा खाल्से ढाखम्ला?

32 परमेश्वरसे ह्याडलान झादा मी बाँकी आथान्ना य्हाडला लागिरी पिन्जी
भिसम तिग थेसे ह्याडला झादेन ह्यामनोन य्हाडदा जम्मान स्हे आपिन?

33 परमेश्वरसे धम्बा म्हेगदेला बिरोधरी खाल्से दोष उन्खम्ला? परमेश्वरसेन
थेनीगदेदा ह्याडदा सेम निबा म्हे भिसी सुङ्बा मुला। 34 थेतबासेलमा य्हाडदा
सजाय पिन्गो भिसी खाल्से पाङ्खम्ला? तिग्दा भिसम य्हाडसे नातोःबा
सजाय ख्रीष्ट येशूसेन नासी सिजी। थे सिबाग्याम सोसी दान्दे स्वर्गला मुल
ठिरी धन्छयाबा मुला। ओच्छे य्हाडला लागिरी परमेश्वरदेन ह्याम प्रार्थना
लबा मुला। 35 दाहेन्से य्हाडदा दुख कष्ट, बिरोध, चआम्याङ्बा,
क्वानआम्याङ्बा, आपत विपत, साइबारी म्हाइबा चु तामसे य्हाडदा
ख्रीष्टला मायाग्याम फेबारी खम्ला? 36 परमेश्वरला बचनरीनोन चुहङ् भिसी
भ्रिबा मुला,

“ह्याडला लागिरी डन्दा धिन धिननोन साइबा मुला,
ओच्छे डन्दा साइबारी ठीक लबा ग्युदा हङ्नोन लमुला।” †

37 तर चु जम्मान ताम तसैनोन य्हाडदा माया लबा ख्रीष्टग्यामसेन य्हाडसे चु
जम्मानथोरी ढाबा मुला। 38 तिग्दा भिसम कालला शक्तिगदे मुसै, सिसै,
सोसै, स्वर्गदूतगदे मुसै, शासन लबागदे मुसै, दान्देला तामगदे मुसै, लिच्छा
तसेला तामगदे मुसै, नर्गला शक्तिगदे मुसै, मुरी मुबा शक्ति मुसै, जम्बुलिङरी
मुबा शक्ति मुसै, खजिबै स्हेगदे मुसै ख्रीष्ट येशूग्यामसे य्हाडदा परमेश्वरसे
लबा मायाग्याम फेबारी आखम भिबा ताम डादा था मुला।

परमेश्वरसे धम्बा म्हेगदे

9 डा ख्रीष्टला म्हे तबासे लमा सत्य ताम पाङ्बान मुला, डाइ लुसीला
ताम पाङ्बा आरे। डाइ सत्य ताम पाङ्बान मुला भिबा ताम डाला
सेमदा था मुला, ओच्छे डाइ लुसीला ताम पाङ्बा आरे भिसी परमेश्वरला
आत्मादा था मुला। 2 डाला सेमरी ल्हानान दुखदेन सुर्दा सदन तबा मुला।
3 डा ख्रीष्टग्याम फेमा डाला य्हुलला ज्योज्यो आले नाना आडागदेसे थाबा
याङ्बा हिन्सम डा ह्याडला म्हेगदेला लागिरी सजाय नाबारीनोन तयार
तसेला मुबा। 4 थेनीगदे इस्त्राएलीगदे हिन्ना, थेनीगदेदा परमेश्वरसे ह्याडलान
कोलागदे स्होजी, ओच्छे थेनीगदेदा अर्गु य्हुलला म्हेगदेग्याम ह्याडला
य्हालदेन शक्ति उन्जी। थेहङ् लसीन थेनीगदेदा मोलम पिन्ना भिसी कबुल
लजी, ओच्छे ठिम पिन्जी। थेनीगदेसे परमेश्वरदा खाहङ् लसी तेन्तोःला
भिसीएनोन लोज्जी, ओच्छे परमेश्वरसे पिन्ना भिसी लबा कबुलगदे
थेनीगदेलान हिन्ना। 5 चुगदे अब्राहाम, इसहाकदेन याकूबला सन्तान हिन्ना।
थाबा पिन्बा ख्रीष्टएनोन चुनोन वंशग्याम म्हे ल्हुड किन्सी न्हबा हिन्ना।
जम्मानथोरी शासन लबा परमेश्वर थाबा पिन्बा ख्रीष्टनोन हिन्ना। थेला सदन
जयजयकार तगै। आमेन।

6 परमेश्वरसे इस्त्राएलीगदेदेन ह्याम लबा कबुल पूरा आलबा आहिन, तर
थेनीगदे परमेश्वरसे कुल्बा अन्धार आभ्रनी। थेतबासेलमा थेनीगदे जम्मान
इस्त्राएलला सन्तान तसैनोन परमेश्वरला कोलागदे आदोनी। 7 ओच्छे
अब्राहामला सन्तान तजी भिदेमा जम्मान थेला झा झामे आत। तिग्दा भिसम
परमेश्वरसे अब्राहामदा सुङ्बा ताम बचनरी चुहङ् लसी भ्रिबा मुला,
“इसहाकग्याम न्हबागदेदा जे एला सन्तान भिला।” †8 चु भिबा चा
अब्राहामला जम्मान सन्तान परमेश्वरला कोलागदे आहिन। तर परमेश्वरसे
लबा कबुलग्याम † न्हबा कोलागदे जे अब्राहामला सन्तान हिन्ना। 9 तिग्दा
भिसम परमेश्वरसे अब्राहामदेन चुहङ् लसी कबुल लबा मुबा, “तोगब लबा
धुइरी डा दोःसी खला, जमा धुइरी एला म्रिड सारासे झा गिक न्हला।” ††

10 ओते जे आहिन, य्हाडला म्हेमे इसहाकग्याम रिबेकासे जौल्या कोला
न्हबा मुबा। 11 परमेश्वरसे म्हन्बा अन्धार थेसे धम्बा ताम पूरा लबाला लागिरी
थे जौल्या कोलागदे न्हबा भन्दा डाच्छान जजा कोलादा धम्जी। थेनीगदेसे
ज्यबा आज्यबा गे लबा भन्दा डाच्छान परमेश्वरसे थे कोलादा धम्बा मुबा।
12 चु चा म्हेगदेसे लबा गे अन्धार आहिन, तर य्हाडदा ड्योडबा परमेश्वरसे
म्हन्बा अन्धार हिन्ना। तिग्दा भिसम परमेश्वरसे रिबेकादा “थेबा झा चा
च्याङ्बा झाला नोकर दोला” भिसी सुङ्बा मुबा। ††13 परमेश्वरला
बचनरीनोन चुहङ् लसी, “डाइ याकूबदा माया लजी, तर एसावदा चा हेला
लजी” भिसी भ्रिबा मुला। †

14 थेहङ् भिसम य्हाडसे तिग पाङ्तोःबा? तिग परमेश्वरसेनोन अन्याय
लला? पक्कान आल! 15 तिग्दा भिसम परमेश्वरसे मोशादा,
“जुन म्हेदा डाइ दया लबा सेम मुला, डाइ थेदा दया लला।

ओच्छे जुन म्हेदा डाइ माया लबा सेम मुला, डाइ थेदान माया लला”
भिसी सुङ्बा मुला। †

16 थेतबासेलमा चु दया चा न्ह य्हाडला सेमसे म्हन्बासे लमा हिन्ना न्ह
य्हाडसे गे लबारी म्हाइबासे लमा हिन्ना, तर परमेश्वरसे म्हन्बा अन्धार
हिन्ना। 17 मिश्र य्हुल्साला ग्ले फारोदा परमेश्वरसे “एग्याम डाला शक्ति
उन्बादेन जम्बुलिङ नाडनोन डाला मिन थेःना लगै भिबा सेमसे डाइ एदा ग्ले
स्होबा हिन्ना” भिसी सुङ्बा ताम बचनरी भ्रिबा मुला। ††18 थेतबासेलमा
परमेश्वरसे जुन म्हेदा दया लबा सेम मुला थेदा दया लला, ओच्छे जुन
म्हेला सेम कोङ्ना लबा सेम मुला थेला सेम कोङ्ना लला।

19 एनीगदे न्हडला खालैसे डादा चुहङ् भिसी पाङ्बाला, “थेहङ् भिसम
परमेश्वरसे तिग्दा अझ दोष लबा? तिग्दा भिसम परमेश्वरसे म्हन्बा तामदा
खालैसेन बिरोध लबारी आखम।” 20 म्हे तसैनोन परमेश्वरदेन ह्याम
जोहाब लबा ए खाल हिन्ना? तिग साप्राग्याम स्होबा ताडसे ह्याडदा स्होबा

‡ 9:4 प्रस्था ९:४ †† 9:7 उत्प २१:१२ †† चु पदरी “कबुल” भिबा चा
पावलसे येशू ख्रीष्टग्याम थाबा याङ्बा समाचारला बारेरी पाङ्बा ताम हिन्ना। ††† 9:9
उत्प १८:१० ††† 9:12 उत्प २५:२३ † 9:13 मला १:२-३ †† 9:15 प्रस्था
३३:१९ ††† 9:17 प्रस्था ९:१६

म्हिदा “तिगदा डादा चुहड्बा स्होबा?” भिसी इयोइला।^{†21} तिग हाडसे ज्योपबा साप्राग्याम कोइ ताड ज्यबा खाल्ला, कोइ ताड आज्यबा खाल्ला स्होबा हक कुमालेदा आरे? ††

²² थेहड् लसीन परमेश्वरदाएनोन हाडला बोमोदेन शक्ति उन्बा सेम मुला। तर सजाय पिन्तो:बा म्हिगदेदाएनोन सजाय आपिन्ना अझ नासीन धन्छयाबा मुला।^{‡3} ओच्छे हाडसे डाच्छान इयोइबा म्हिगदेदा परमेश्वरसे हाडला प्रेन य्हालदेन शक्ति ओच्छे ल्हानान दया उन्बाला लागिरीन चुहड् लसी नाबा मुबा।^{‡4} तिगदा भिसम परमेश्वरला म्हिगदेदे य्हाडनोन हिन्ना। थेसे यहूदीगदे न्हडग्याम जे इयोइबा आहिन, तर अर्गु य्हुलला म्हिगदेदे न्हडग्यामएनोन इयोइजी।^{‡5} परमेश्वरसे सुड्बा ताम होशे भिबा अगमवक्तासे चुहड् लसी भिबा मुला,

“जुन म्हिगदे ‘डाला म्हि आहिन्मुबा,
थेनीगदेदा डाइ ‘डाला म्हि स्होला।’
ओच्छे जुन म्हिदा ‘डाइ माया लबा आरेबा,
थेनीगदेदा ‘डाइ माया लला।’” †

²⁶ ओच्छे,

“जुन ग्लारी थेनीगदेदा,
‘एनीगदे डाला म्हि आहिन’ भिसी भिमुबा,
थेनोन ग्लारी थेनीगदेदा,
‘छोन्बो परमेश्वरला कोलागदे’ भिसी भिला।” ††

²⁷ इस्राएलीगदेला बारेरी यशैया अगमवक्तासेनोन चुहड् भिसी पाड्बा मुला,

“इस्राएलीगदे समुन्द्रला बालुवा ते मुसैनोन
थेनीगदे न्हडला कोइ कोइसे जे थार्बा याड्ला।

²⁸ तिगदा भिसम प्रभुसे हाडला बचन अन्छार
योनान जम्बुलिडला म्हिगदेदा सजाय पिन्सी नाश लला।” ††

²⁹ यशैया अगमवक्तासे इस्राएलीगदेला बारेरी चुहड् भिसीनोन पाड्बा मुला,

“चुदे जम्मान भन्दा शक्तिशाली परमेश्वरसे य्हाडला लागिरी सन्तान
गिकनोन आखलाबा हिन्सम

य्हाडएनोन सदोमदेन गमोराला म्हिगदेदे हड् लसीन नाश तसेला मुबा।” †††

यहूदीगदेसे विश्वास आलबा

³⁰ चु जम्मान तामला अर्थ चा तिग हिन्ना? चु भिबा चा अर्गु य्हुलला म्हिगदेसे परमेश्वरदा सेम निबा म्हि दोबारी आम्हाइसैनोन थेनीगदेदा परमेश्वरसे हाडदा सेम निबा म्हि स्होजी। चु जम्मान ताम थेनीगदेला विश्वासग्याम तजी।^{‡1} तर इस्राएलीगदेदे चा थे ठिम अन्छार भ्रसी परमेश्वरदा सेम निबा म्हि दोबारी ल्हानान भड लजी तसैनोन दोआखम्नी।^{‡2} तिगदा आखम्नी? तिगदा भिसम थेनीगदेसे विश्वास आलना लबा गेग्याम परमेश्वरदा सेम निबा म्हि दोबारी म्हाइजी। थेतबासेलमा थेनीगदेदे युडबारी तोइजी, ओच्छे थे युडबासे थेनीगदेदा हिल्ला लजी।^{‡3} परमेश्वरला बचनरीनोन चुहड् भिसी भिबा मुला,

“च्यागो, डाइ सियोनरी ††† थेनीगदेदा तोइना लबा युडबा गिक थान्ना,
थे युडबारी ल्हानान म्हिगदेदे तोइला ओच्छे थेनीगदेदा हिल्ला लला।
तर थेदा विश्वास लबा खालै म्हिगदेदा पे:ना आल।” †

¹⁰ ज्योज्यो आले नाना आडागदे, परमेश्वरसे इस्राएलीगदेदा थार्ना लगे
भिसी डाइ सेमहेन्सेन म्हन्बा मुला, ओच्छे प्रार्थना लबा मुला।

² थेनीगदेसे परमेश्वरदा ल्हानान तेन्बारी म्हाइबा मुला भिबा ताम डाइ पक्का लसी पाड्खम्ला। तर थेनीगदेसे तेन्बा चा ठीक ज्ञान बुद्धिग्याम आहिन।

³ तिगदा भिसम परमेश्वरसे थेनीगदेदा हाडदा सेम निबा म्हि स्होला भिबा ताम था आयाड्ना, थेनीगदेदे हाडलान गेग्याम परमेश्वरदा सेम निबा म्हि दोबारी म्हाइजी। तर थेनीगदेदे परमेश्वरसे हाडदा सेम निबा म्हि स्होला भिबा

† 9:20 यशै २९:१६; ४५:९ †† 9:21 यर्मि १८:१-१०; २ तिमो २:२०-२१ †
9:25 होशे २:२३ †† 9:26 होशे १:१० †† 9:28 यशै १०:२२-२३ ††† 9:29
यशै १:९ ††† “सियोन” भिबा चा यरूशलैम शहरदा पाड्बा हिन्ना। † 9:33 यशै
२८:१६

तामला तहरी आचिनी।^{‡4} तिगदा भिसम ख्रीष्टदा विश्वास लबा म्हिगदे
परमेश्वरदा सेम निबा म्हि दोगै भिसी ख्रीष्टसेन ठिमला गे पूरा लजी।

जम्मासेन थार्बा याड्खम्ला

⁵ “ठिमरी पाड्बा अन्छार परमेश्वरदा सेम निबा म्हि दोबारी म्हाइबागदे
ठिम अन्छारनोन भ्रतो:ला” भिसी मोशासे भिबा मुला।^{‡6} तर विश्वासग्याम
परमेश्वरदा सेम निबा म्हि दोबा तामसे चुहड् भिसी पाड्बा मुला, “एनीगदेसे
सेम न्हडरी ‘खाल स्वर्गरी निला?’ भिसी थापाङ्गी, चु भिबा चा ख्रीष्टदा मार
भबारी हिन्ना।^{‡†7} ओच्छे ‘ल्हानान नुप्बा व्हाडथोना †† खाल निला?’
भिसीएनोन एनीगदेसे हाडला सेम न्हडरी थापाङ्गी।” चु भिबा चा ख्रीष्टदा
सिबाग्याम सोना लसी तोर भबारी हिन्ना।^{‡8} तर चु बचनसे तिग पाड्बा
मुला? “परमेश्वरला बचन एनीगदेदेन छ्यामनोन मुला। ओच्छे एनीगदेला
सेमदेन सुडरीन मुला।” डन्से थे:ना लबा चुनोन बचनसे म्हिगदेदा विश्वास
लबारी इयोइबा मुला।^{‡†9} तिगदा भिसम चुदे एसे येशूदान प्रभु हिन्ना भिसी
पाड्बादेन परमेश्वरसेन थेदा सिबाग्याम सोना लबा हिन्ना भिसी सेमहेन्सेन
विश्वास लजी भिसम ए थार्ला।^{‡10} तिगदा भिसम हाडला सेमहेन्से विश्वास
लबा म्हिदा परमेश्वरसे हाडदा सेम निबा म्हि हिन्ना भिसी सुड्ला, ओच्छे
येशूदा प्रभु हिन्ना भिसी पाड्बासे लमान थेसे थार्बा याड्ला।^{‡11} परमेश्वरला
बचनरीनोन “थेदा विश्वास लबा म्हिगदेदे खालैनोन पे:आतो:” भिसी भिबा
मुला।^{‡†12} तिगदा भिसम यहूदीदेन अर्गु य्हुलला म्हिगदेदे न्हडरी तिगै फरक
आरे। प्रभु गिक जे मुला, थेनोन प्रभु जम्मालान प्रभु हिन्ना। थेदेन छ्याम
ह्रीबा म्हिगदेदा थेसे ल्हानान मोलम पिन्ना।^{‡13} तिगदा भिसम बचनरी “प्रभुला
मिन किन्बा म्हिगदेदे जम्मासेन थार्बा याड्ला” भिसी भिबा मुला। ††

¹⁴ तर प्रभुदा विश्वास लबान आरे भिसम म्हिगदेसे खाहड् लसी प्रभुदेन
छ्याम ह्रीसे? प्रभुला बारेरी थे:बान आरे भिसम थेनीगदेसे खाहड् लसी
प्रभुदा विश्वास लसे? ओच्छे खालै म्हिसे थेनीगदेदा प्रभुला बारेरी थे:ना
लबान आरे भिसम थेनीगदेसे खाहड् लसी था याड्से? †5 ओच्छे थे:ना लबा
म्हिनोन आपुइना खाहड् लसी थे:बा? परमेश्वरला बचनरीनोन “थार्बा पिन्बा
समाचार थे:ना लबा म्हिगदेदे खमा गाते ल्हानान ताड्तो:बा ताम हिन्ना”
भिसी भिबा मुला। †††

¹⁶ तर थेनीगदेदे न्हडला कोइ कोइ म्हि थार्बा पिन्बा समाचार अन्छार
आभनी। तिगदा भिसम यशैया अगमवक्तासेन “प्रभु, डन्से थे:ना लबा तामदा
खाल्से विश्वास लबा मुला?” भिसी भिबा मुला। ††††17 विश्वास चा थार्बा
पिन्बा समाचार थे:सी खमुला, ओच्छे थे थार्बा पिन्बा समाचार चा ख्रीष्टला
बारेरी पाड्बा ताम हिन्ना।

¹⁸ थेहड् भिसम डाइ एनीगदेदा इयोइला, “तिग थेनीगदेसे थे:बा
आरेबा?” आहिन, थेनीगदेसे पक्कान थे:बा मुला। तिगदा भिसम परमेश्वरला
बचनरी

“मुदेन स्वर्गला काइ जम्बुलिड नाडनोन थे:बा मुला,
ओच्छे थेनीगदेसे परमेश्वरला बारेरी पाड्बा ताम जम्बुलिडला जम्मान
ग्लारी धोबा मुला”

भिसी भिबा मुला। †††

¹⁹ डाइ दो:सीनोन इयोइला, “तिग इस्राएलीगदेसे आघोनी?” परमेश्वरसे
मोशाग्याम डाच्छान थेनीगदेदा

“जुन म्हि खजिबै य्हुलला आहिन मुबा, थेनोन य्हुलला म्हिदा धम्सी डाइ
एनीगदेला सेमरी डाह तना लला।

ओच्छे आघोबा मूर्ख म्हिगदेदा थार्ना लसी डाइ एनीगदेदा बोमो खना
लला”

भिसी सुड्बा मुबा। †8

²⁰ परमेश्वरसे सुड्बा ताम अझ आँट लसी यशैया अगमवक्तासे चुहड् लसी
भिबा मुला,

‡† 10:5 लेवी १८:५ ‡†† 10:6 व्यव ३०:१२ ‡† “ल्हानान नुप्बा व्हाड” भिबा
चा म्हाड म्हुड चिबा ग्ला हिन्ना (लुका ८:३१; उन्बा ९:१, २, ११; ११:७; १७:८; २०:१, ३)।
‡†† 10:8 व्यव ३०:१४ ‡† 10:11 यशै २८:१६ ‡† 10:13 योए २:३२
‡†† 10:15 यशै ५२:७ ‡†† 10:16 यशै ५३:१ ‡†† 10:18 भजन १९:४
18 10:19 व्यव ३२:२१

“डादा म्हाइनोन आम्हाइबागदेसे डादा स्याप्बा मुला,
ओच्छे जुन म्हिसे डादा आम्हाइनी थेनीगदेला गुडरी डा ह्वाडनोन थोन्जी” †
21 इस्राएलीगदेला बारेरी परमेश्वरसे चुहड् भिसी सुड्बा मुला,
“डाला ताम आड्यान्बादेन सेम कोड्बा म्हिगदेदा ‘खउ’ भिसी
डाइ धिन गिक या पिन्जी।” ††

यहूदीगदेदा परमेश्वरसे लबा दया

11 थेहड् भिसम डाइ एनीगदेदा इयोइला, “तिग परमेश्वरसे ह्वाडला
म्हिगदेदा खलाबा हिन्ना?” पक्कान आहिन! तिगदा भिसम ख्रीष्टदा
विश्वास लबा डाएनोन अब्राहामला वंशरी न्हबा बेन्यामीनला † सन्तान
इस्राएली हिन्ना। †2 परमेश्वरसे डाच्छाहेन्सेन डोसेबा ह्वाडला म्हिगदेदा
खलाबा आरे। एलिया अगमवक्ताला बारेरी परमेश्वरला बचनरी पाड्बा ताम
मी एनीगदेदा थानोन मुला। एलिया अगमवक्तासे इस्राएलीगदेला बिरोधरी
परमेश्वरदेन छ्याम चुहड् लसी बिन्ती लबा मुबा, 3 “प्रभु, थेनीगदेसे ह्वाडला
अगमवक्तागदेदा साइबा मुला ओच्छे ह्वाडदा बलि फुल्बा ग्लागदे फुप्सी
पिन्बा मुला, सोबा चा डा जे हिन्ना, डादाएनोन साइबारी थेनीगदेसे म्हाइबान
मुला।” †4 तर परमेश्वरसे थेदा “डाइ डाला लागिरी हजार निस म्हिगदेदा
जोगब लसी थान्बा मुला, थेनीगदेसे बाल भिबा लदा फ्या लबा आरे” भिसी
सुड्जी। †5 थेहड् लसीन परमेश्वरला दयामायाम्याम धम्बागदे न्हडला कोड्
कोड् म्हिगदे दान्देनोन मुला। 6 चु चा दयामायाम्याम तबा हिन्ना, ठिम अन्धार
लबा गेग्याम आहिन। चुदे ठिम अन्धार लबा गेग्याम तबा हिन्सम दयामाया
आचिसेला मुबा।

7 थेतबासेलमा चुहड् तजी, इस्राएलीगदेसे जुन स्हे म्हाइमुबा थे स्हे
थेनीगदेसे आयाड्नी। तर परमेश्वरसे धम्बागदेसे जे थे स्हे याड्जी। तर
आयाड्बागदेला चा सेम कोड्जी। 8 परमेश्वरला बचनरीनोन चुहड् भिसी
भ्रिबा मुला,

“परमेश्वरसे थेनीगदेदा तिगै ताम घोबारी आखम्बा आत्मा पिन्बा मुला,
ओच्छे म्हाइनोन आम्हाइबा मीदेन थे:नोन आथे:बा नाब्यड पिन्बा मुला,
दान्देधोनाएनोन थेनीगदे थेहड्बान मुला।” †††

9 ओच्छे दाऊदसेनोन चुहड् भिसी पाड्बा मुला,
“थेनीगदेला भोजएनोन थेनीगदेला लागिरी झूबा वादेन फुप ह्वाडबान तगै।
ओच्छे थेनीगदेला चबा स्हे थान्बा टेबुलरी ठोक्सी थेनीगदे हिल्लै,
थेनीगदेसे फातो:बा पापला सय फातो:गै।

10 थेनीगदेला मी काना तगै,
ओच्छे थेनीगदेला छिक्मा खाइमै सोजो थातगै।” §

11 थेतबासेलमा एनीगदेसे डाला ताम इयान्गो, “तिग नाश तबारीन
इस्राएलीगदे ठोक्सी हिल्लबा हिन्ना?” आहिन। तर थेनीगदेसे पाप लबासे
लमान थेनीगदेसे याड्तो:बा थार्बा अर्गु यहुलला म्हिगदेसे याड्जी। तिगदा
भिसम चु म्हाइसी इस्राएलीगदेसे थार्बा याड्बारी सेम लगै भिसीन चुहड् तबा
हिन्ना। 12 इस्राएलीगदेसे पाप लबासे लमा अर्गु यहुलला म्हिदेन जम्बुलिडला
जम्मान म्हिगदेसे मोलम याड्जी। थेनीगदे परमेश्वरसे कुल्बा अन्धार
भ्रआखम्बासे लमा अर्गु यहुलला म्हिगदेसे थार्बा याड्जी भिसम झन
इस्राएलीगदेसेनोन परमेश्वरसे कुल्बा ताम इयान्बा हिन्सम गाते ल्हानान
मोलम याड्सेला मुबा।

अर्गु जम्मान यहुलसे थार्बा याड्बा

13 दाहेन्से डाइ एनी अर्गु यहुलला म्हिगदेदा चु ताम पाड्ला, डा अर्गु
यहुलला म्हिगदेला लागिरी मुल चेला दोबासे लमा डाइ चु गे लम्याड्जी।
थेतबासेलमा डाला सेम ल्हानान ताड्बा मुला। 14 डाला ह्वाडलान यहुलला
म्हिगदेसे एनीगदेदा डाह लसी थेनीगदे न्हडला कोड् कोड् चा परमेश्वरपट्टि
दो:सी थार्बा याड्ला वा भिबा आशसे डाइ चुहड् लबा हिन्ना। 15 तिगदा
भिसम थेनीगदेदा परमेश्वरसे खलामा जम्बुलिडला जम्मान म्हिगदे

† 10:20 यशै ६५:१ †† 10:21 यशै ६५:२ † “बेन्यामीन” भिबा म्हि चा
इस्राएलला च्युक न्ही कोलागदे न्हडला गिक हिन्ना। †† 11:1 फिलि ३:५ †† 11:3 §
राजा १९:१०-१४ ††† 11:4 § राजा १९:१८ ††† 11:8 व्यव २९:४; यशै २९:१०
§ 11:10 भजन ६९:२२-२३

परमेश्वरला म्हि दोजी भिसी दो:सी थेनीगदेदा परमेश्वरसे ह्वाडला म्हि स्होबा
चा जम्बुलिडला जम्मान म्हिगदे सिबाग्याम सोबा तेबान आहिन? 16 चुदे गेड
ख्राड्बारी ज्योप्बा ब्राग्याम जजाकी परमेश्वरदा फुल्जी भिसम थे गेड
ख्राड्बारी ज्योप्बा जम्मान ब्रा चोखो तला। थेहड् लसीन दोडला टा ज्यबा
मुसम थे दोडला हाँगाएनोन ज्यबा तला।

17 थेहड् लसीन दोडला हाँगा क्युड्सी निबा ह्वाड लसी गाते
इस्राएलीगदेसेनोन परमेश्वरदा खलासी निबा मुला। तर एनी अर्गु यहुलला
म्हिगदे चा हिरी खबा जैतूनना हाँगा दिमरी मुबा जैतूनना दोडरी थुड्बा ह्वाड
लसी थुड्बा मुला। दाहेन्से एनीगदे टा गिकग्यामसेन शक्ति याड्सी सोला।
18 थेतबासेलमा एसे थे क्युड्सी निबा हाँगा ह्वाड्बा इस्राएलीगदेदेन छ्याम
घमण्ड थालउ। चुदे घमण्डन लबा हिन्सम चु ताम ढनो, तिगदा भिसम ए चा
हाँगा जे हिन्ना, एसे टादा ताबा आहिन। तर टासे चा एदा ताबा हिन्ना। 19
एसे चुहड् भिसी पाड्ला, “डादा थुड्बाला लागिरीन थे हाँगागदे क्युड्बा
मुबा।” 20 एसे पाड्बा तामएनोन ठीकनोन हिन्ना, येशूदा विश्वास आलबासे
लमा थेनीगदे क्युड्बा हाँगा ह्वाडबान मुबा। तर एनीगदे चा विश्वास लबासे
लमा सोबा हिन्ना। थेतबासेलमा एनीगदेसे घमण्ड थालउ, तर परमेश्वर
म्हाइसी लोड्डी। 21 तिगदा भिसम परमेश्वरसे डाच्छाहेन्सेन मुबा हाँगागदेदा मी
भ्याड्जी भिसम एनीगदे थुड्बा हाँगागदेदाएनोन भ्याड्ला।

22 थेतबासेलमा परमेश्वरसे गाते ल्हानान दया लमुला भिबादेन गाते खरो
व्यवहार लमुला भिबा ताम एनीगदेसे था याड्सी जिन्बा मुला। थेदा विश्वास
आलबागदेदा थेसे खरो व्यवहार लजी। तर थेदा विश्वास लबा एनीगदेदा
परमेश्वरसे दया लजी। तर एनीगदेसे थेला दयादा म्ले:जी भिसम
एनीगदेदाएनोन थासी भ्याड्ला। 23 चुदे थेनीगदेसे ह्वाडला सेम दो:सी
विश्वास लजी भिसम हाँगादा ह्वाड लसी थुड्ला। तिगदा भिसम परमेश्वरसे
थेनीगदेदा दो:सी गिक स्होबारी खम्ला। 24 अर्गु यहुलला म्हि एनीगदे चा हिरी
खबा जैतूनना दोडग्याम थासी भबा हाँगा ह्वाडबान हिन्ना। हिरी खबा
जैतूनदेन दिमरी मुबा जैतून आढिक्सेनोन एनीगदेदा दिमरी मुबा जैतून
दोडला हाँगा थुड्बा मुला। इस्राएलीगदे चा दिमरी मुबा जैतूनना हाँगा
ह्वाडबान हिन्ना। थेतबासेलमा थेनीगदेदा दो:सी भसी थुड्बारी परमेश्वरदा
झन सजिलो तला।

जम्मानथोरी परमेश्वरला दयामाया मुला

25 ज्योज्यो आले नाना आडागदे, परमेश्वरला सेमला ताम एनीगदेसेनोन
था याड्गै भिबा डाला सेम मुला। थे ताम था याड्जी भिसम एनीगदेसे
ह्वाडसे ह्वाडदान घेन म्हि आस्हो। थे ताम चा चुनोन हिन्ना, परमेश्वरला
लागिरी ख्रीष्टदा विश्वास लबा अर्गु यहुलला म्हिगदे आछ्योतेधोना जे
इस्राएलीगदेला सेम कोड्ला। 26 जमाहेन्से जम्मान इस्राएली यहुलदाएनोन
थार्ना लला। परमेश्वरला बचनरीनोन चुहड् भिसी भ्रिबा मुला,
“थार्बा पिन्बा म्हि सियोनग्याम फेप्खला,
ओच्छे याकूबग्याम पाप गेगदे भ्याड्ला।” ††

27 “ओच्छे प्रभुसे ‘थेनीगदेला पापला दोष मेटब लसी डाइ थेनीगदेदेन
छ्याम लबा डाला कबुल पूरा लला’ भिसी सुड्बा मुला।” †††

28 एनी अर्गु यहुलला म्हिगदेला गुडरी थार्बा पिन्बा समाचार धोबाला
लागिरी इस्राएलीगदे परमेश्वरला शत्रु दोबा हिन्ना। तर थेनीगदेला आखे
म्हेमेसे लमा अझ थेनीगदे परमेश्वरसे धम्बा म्हि हिन्ना। ओच्छे थेनीगदेदा
परमेश्वरसे माया लमुला। 29 तिगदा भिसम परमेश्वरसे ह्वाडसे मोलम दो:सी
आकिन, ओच्छे ह्वाडसे धम्बागदेदाएनोन खाइमै आखला। 30 डाच्छा
एनीगदेसेनोन परमेश्वरसे कुल्बा ताम आड्यान्बामुबा। तर इस्राएलीगदेसे
परमेश्वरसे कुल्बा ताम आड्यान्बासे लमा दान्दे एनीगदेसे परमेश्वरला दया
याड्बा हिन्ना। 31 थेहड् लसी दान्दे इस्राएलीगदे अटेरी तसी चिबासे लमा
परमेश्वरसे एनीगदे अर्गु यहुलला म्हिगदेदा दया लबा हिन्ना। एनीगदेदा दया
लबा म्हाइसी तिरेकुनु थेनीगदेसेनोन दया याड्ला। 32 जम्मान म्हि अटेरी
तबासे लमा परमेश्वरसे थेनीगदेदा थेनीगदेलान पापरी खीसी थान्बा मुला।

†† 11:26 यशै ५९:२० ††† 11:27 यर्मि ३१:३३-३४

चुहड़ लबा चा तिरैकुनु जम्मान म्हिगदेसे परमेश्वरला दया याङ्गै भिसी हिन्ना।

जयजयकारला व्हाइ

33 ओहो, परमेश्वरला दया गाते लहाना!

थेला ज्ञान बुद्धि गाते घेन!

ओच्छे थेसे पक्का लसी जिन्बा ताम खाल्से घोखम्ला?

थेला ग्याम खालैसेन म्राड्बारी आखम! †

34 “तिगदा भिसम प्रभुला सेमला ताम खाल्से था याङ्गै मुला?

ओच्छे थेदा सल्लाह पिन्बा म्हि खाल मुला?” ††

35 “परमेश्वरसे छे फाबारी

खाल्से परमेश्वरदा छे पिन्बा मुला?” †

36 तिगदा भिसम जम्मान स्हे परमेश्वरग्याम खबा हिन्ना।

जम्मान स्हे थेसेन स्होबा हिन्ना।

ओच्छे जम्मान स्हे थेलान लागिरी स्होबा हिन्ना।

थेतबासेलमा सदन परमेश्वरला मानदेन जयजयकार तगै। आमैन। ††

परमेश्वरदा सेम निबा बलि

12 थेतबासेलमा ज्योज्यो आले नाना आडागदे, एनीगदेदा परमेश्वरसे लहानान दया लबासे लमा परमेश्वरसे कुल्बा अन्धार भ्रबारी एनीगदेसे ह्राड ह्राडला लहुइ परमेश्वरदा सेम निबा छोन्बोदेन चोखो बलि दोसी परमेश्वरदा जिम्मा पिन्गो भिबा डाला बन्ती मुला। एनीगदेसे परमेश्वरदा सेमहेन्सेन तेन्बाएनोन चुनोन हिन्ना।² जम्बुलिडला म्हिगदेला ह्राड्बा बानीबेहोर थोसी थाभ्रउ, बरु एनीगदेसे ह्राडला सेम परमेश्वरपट्टि दोःसी छार म्हि दोगो। थेह्रड लजी भिसम जे एनीगदेसे परमेश्वरला सेमला ताम घोबारी खम्ला। ओच्छे खजिबा ताम ज्यबादेन परमेश्वरदा सेम निबा ओच्छे सत्य हिन्ना भिसी था याङ्गैखम्ला।

³ डाथोरी परमेश्वरला दयामाया मुबासे लमा एनीगदे जम्मादान डाला चु बन्ती मुला, एनीगदेसे ह्राडसे ह्राडदान घेन थाम्हन्गो। तर परमेश्वरसे पिन्बा विश्वास †† अन्धार ह्राड ख्राह्रड्बा मुला थे भन्दा घेन दोबारी थाम्हाइगो।⁴ चु चा यहाडला लहुइ ह्रड्बान हिन्ना। तिगदा भिसम यहाडला लहुइ गिक मुसैनीन थेरी या, काड, ना, सुड लहानान थरीला स्हेगदे मुला। तर चु जम्मान स्हेगदेसे गे गिकनोन आल।⁵ थेह्रड लसीन यहाड लहानान मुसैनीन ख्रीष्टदेन छ्याम गिक तबासे लमा यहाड लहुइ गिक ह्रड्बान हिन्ना, ओच्छे यहाड जम्मान ह्राड ह्राड न्हडरी या, काड, ना, सुड ह्रड्बान हिन्ना। †††⁶ थेतबासेलमा परमेश्वरसे दयामाया लसी यहाडदा पिन्बा थरी थरीला मोलमगदे अन्धार यहाडसे गे लड। अगमवाणी पाड्बा मोलम याड्बा म्हिसे ह्राडला विश्वास अन्धार पाङ्गै,⁷ स्हान्दोदा ह्रो लबा मोलम याड्बा म्हिसे सेमहेन्सेन ह्रो लगै, स्हान्दोदा लोप्बा मोलम याड्बा म्हिसे ज्यना लसी लोपै,⁸ स्हान्दोदा आँट पिन्बा मोलम याड्बा म्हिसे आँट पिन्नी, स्हान्दोदा दान पिन्बा मोलम याड्बा म्हिसे सेमहेन्सेन ताङ्गी पिन्नी, शासन लबा मोलम याड्बा म्हिसे ज्यना लसी शासन लगै ओच्छे दया लबा मोलम याड्बा म्हिसे सेमहेन्सेन ताङ्गी दया लगै। †††

स्हान्दोदा माया लउ

⁹ एनीगदेसे सुडसे जे आहिन सेमहेन्सेन माया लउ। ओच्छे जुन ताम आज्यबा मुला थे तामला संगतनोन थालउ। तर जुन ताम ज्यबा मुला सदन थे अन्धार भ्रउ।¹⁰ ज्योज्यो आले नाना आडा न्हडरी माया लबा ह्रड लसी जम्मादान माया लउ। ओच्छे एनीगदेदा लबा मान भन्दा स्हान्दोदा झन लहाना मान लउ।¹¹ एनीगदे आब्लेना सदन झन्सी गे लउ, ओच्छे सेमहेन्सेन परमेश्वरदा तेन्गो।¹² एनीगदेसे जुकजुकधोनाला जुनी याङ्गै भिसी लबा आशरी ताङ्गै, ओच्छे जस्तोन दुख तसैनीन नासी सदन प्रार्थना लसी चिउ।

13 परमेश्वरला म्हिगदेदा खॉचो तबा धुइरी ह्रो लउ, ओच्छे ह्राडला दिमरी खबा डोन्बोदा ज्यना लसी क्योङ्गो।

¹⁴ एनीगदेदा दुख पिन्बा म्हिगदेदा मोलम पिन्गो। थेनीगदेदा केःबा आहिन, बरु मोलम पिन्गो।¹⁵ ताङ्गै म्हिगदेदेन छ्याम एनीगदेएनोन ताङ्गो, ओच्छे दुख तसी क्राबा म्हिगदेदेन छ्याम एनीगदेएनोन क्रागो।¹⁶ जम्मान म्हिगदेदेन छ्याम ढिक्सी चिउ। एनीगदेसे खाङ्गै घमण्ड थालउ, तर सोजो म्हिगदेदेन छ्याम भ्रउ। ओच्छे ह्राडसे ह्राडदान घेन म्हि स्होसी थाभ्रउ। ††

¹⁷ खालैसे आज्यबा लजी भिदेमा एसे थेदा आज्यबा थालउ। बरु जम्मान म्हिगदेसे ज्यबा भिसी म्हन्बा तामरी जे भ्रउ।¹⁸ खम्तेधोना एनीगदे जम्मान म्हिगदेदेन छ्याम ढिक्सी चिउ।¹⁹ डाला सेम निबा ह्रोगदे, एनीगदे ह्राडसे खाङ्गै खालैदेन छ्याम बदला थाकिन्गो, तर परमेश्वरदान जिम्मा पिन्गो। तिगदा भिसम बचनरीनोन चुह्रड् भिसी भिबा मुला,

“बदला किन्बा गे डाला हिन्ना,

डाइनोन थेनीगदेदा बदला किन्ना”

भिसी परमप्रभुसे सुड्बा मुला। †††

²⁰ बरु,

“एला शत्रु खेन्बा फुइबा मुसम

थेदा चबा थुइबा पिन्गो

थेह्रड लजी भिसम एला शत्रु ह्राडनोन पेःला।” ††††

²¹ एनीगदे आज्यबा गे लबागदेदेन छ्याम थाब्रेगो, बरु ज्यबा गे लसी थेनीगदेदा ढागो।

शासन लबागदेला तहरी चिउ

13 शासन लबा म्हिगदेसे कुल्बा ताम जम्मासेन ड्यान्तोःमुला। तिगदा भिसम परमेश्वरसे शासन लबा हक आपिन्नी भिसम खालैसेन शासन लबारी आखम। शासन लबा जम्मान म्हिगदेदा परमेश्वरसेन धम्बा हिन्ना।² थेतबासेलमा शासन लबा म्हिगदेदा बिरोध लबा म्हिगदेसे परमेश्वरसे कुल्बा तामदा बिरोध लबा हिन्ना। जुन जुन म्हिसे बिरोध लला, थेसे सजाय याङ्गै।³ तिगदा भिसम शासन लबा म्हिगदे म्राङ्गी ज्यबा गे लबा म्हिगदे आहिन, तर आज्यबा गे लबा म्हिगदे जे लोङ्गमुला। तिग एनीगदे शासन लबा म्हिगदेदेन छ्याम आलोङ्गना चिबा सेम मुला? थेह्रड भिसम एनीगदेसे ज्यबा गे लउ। जमाहेन्से एनीगदेसे थेनीगदेग्याम स्याबास याङ्गै।⁴ तिगदा भिसम शासन लबागदे परमेश्वरला गे लबा म्हिगदे हिन्ना। परमेश्वरसे एनीगदेदा ज्यबा लबारीन थेनीगदेदा धम्बा हिन्ना। एसे आज्यबा गे लजी भिसम जे थेनीगदेदेन छ्याम लोङ्गो। तिगदा भिसम थेनीगदेदेन छ्याम सजाय पिन्बा अधिकार मुला। शासन लबा म्हिगदे चा आज्यबा गे लबा म्हिगदेदा सजाय पिन्बा परमेश्वरला गे लबा म्हिगदे हिन्ना।⁵ थेतबासेलमा परमेश्वरग्याम सजाय आयाङ्गै जे आहिन, तर एनीगदेला सेमला तामला लागिरी एनीगदे शासन लबागदेला तहरी चितोःला।

⁶ थेतबासेलमान एनीगदेसे तिरो फामुला। तिगदा भिसम शासन लबा म्हिगदे चा सदन आज्यबा गेगदे लआपुङ्गै परमेश्वरला गे लबा म्हिगदे हिन्ना।⁷ एनीगदेसे तिग तिग लदोमुला थे पूरा लउ, तिरो फातोःबा ग्लारी तिरो फागो ओच्छे मान लतोःबा म्हिदा मान लउ। ††

गिकसेम गिकदा माया लउ

⁸ एनीगदेसे स्हान्दोला लागिरी लतोःबा तिगै गे बाँकी थाथान्गो, तर गिकसेम गिकदा माया लबारी चा खाङ्गै थाखलागो। तिगदा भिसम ह्राडला खिम्जेमदा माया लबा म्हिसे चा ठिमरी मुबा जम्मान ताम पूरा लबा हिन्ना।⁹ “ए स्हान्दोदेन छ्याम ब्रेल्सी थाभ्रउ, एसे म्हि थासाङ्गो, एसे य्हो थालउ, एसे लोभ थालउ,” भिसी कुल्बा तामगदेदेन अर्गु कुल्बा जति तामगदे मुला थे जम्मान तामगदे चा “एसे ह्राडला खिम्जेमगदेदा ह्राडदा ह्रड्नीन माया लउ” भिसी कुल्बा ताम न्हडरी स्याप्ला। ††††¹⁰ माया लबा म्हिसे ह्राडला

† 11:33 यशै ५५:८ †† 11:34 यशै ४०:१३ † 11:35 अय्युब ४१:११
‡ 11:36 १ कोर १२:६ ‡‡ चु पदरी “विश्वास” भिबा चा परमेश्वरसे म्हिगदेदा पिन्बा शक्तिदेन मोलमगदे हिन्ना। ††† 12:5 १ कोर १२:१२ ††† 12:8 १ कोर १२:४-११

§ 12:14 मत्ती ५:४४; लूका ६:२८ †† 12:16 हितो ३:७ ††† 12:19 व्यव ३२:३५ †† ग्रीक ग्योइरी चा “एसे थेला थोबोरी मे भुयो उम्ता” भिसी भिबा मुला। ††† 12:20 हितो २५:२१-२२ †† 13:7 मत्ती २२:२१; मर्कू १२:१७; लूका २०:२५ †† 13:9 प्रस्था २०:१३-१५, १७; व्यव ५:१७-१९; लेवी १९:१८

खिम्जेमदा न्होङ्ना आल। थेतबासेलमा माया लबा चा ठिम पूरा लबा हिन्ना।

¹¹ चु जे आहिन, चु धुइ चा य्हाड म्हेर्बाग्याम रे:तो:बा धुइ हिन्ना भिबा ताम एनीगदेदा थानोन मुला। तिग्दा भिसम डाच्छा य्हाडसे विश्वास लबा धुइरी भन्दा इन दान्दे थार्बा याड्बा धुइ तसी जिन्बा मुला। ¹² म्हुन निसी य्हाल तबारीन छ्याइबा मुला। थेतबासेलमा य्हाडसे धोपधोपरी लबा जम्मान आज्यबा गेगदे खलागे, ओच्छे य्हालला सेना दोसी चिइ। ¹³ ओच्छे य्हालरी भ्रबा म्हे दोसी सोजो तसी गे लइ। म्हुनड ह्इ लसी मोजमजा लबा, इय्होइसी भ्रबा, ब्रेल्सी भ्रबा, छाडा तसी भ्रबा, छेबा बड्बा लबा, ओच्छे डाह लबा गेगदे य्हाडसे खलागे। ¹⁴ तर प्रभु येशू ख्रीष्ट ह्इबान दोसी भ्रउ, ओच्छे पापी बानीबेहोर अन्धार ल्हुइला लागिरी जे लइ म्हन्बा थे लसी थाभ्रउ।

स्थान्दोदा दोष थालउ

14 विश्वासरी कमजोर मुबागदेदा ह्वाडलान ज्योज्यो आले नाना आडा म्हन्गो। तर थेनीगदेसे म्हन्बा तामगदेला बिरोध लबाला लागिरी आहिन। ¹² कोइ कोइसे चा जम्मान स्हे चबारी तमुला भिसी विश्वास लमुला, तर विश्वासरी कमजोर मुबा म्हेगदेसे चा ढापढुप जे चमुला। ³ एनी जम्मान स्हे चबागदेसे ढापढुप जे चबागदेदा जजा थाम्हन्गो। थेह्इ लसीन एनी आचबागदेसेनोन चबागदेदा दोष थालउ। तिग्दा भिसम चबा म्हेगदेदाएनोन परमेश्वरसे ह्वाडला कोलागेदे म्हन्बा मुला। ⁴ स्थान्दोला नोकरदा दोष लबा ए खाल हिन्ना? थेला ह्वाडलान मालिकसे गा नोकरसे ज्यबा गे लबा हिन्ना कि आज्यबा गे लबा हिन्ना भिसी निसाफ लला। प्रभुसेन ह्वाडला म्हेगदेदा जम्मान गेरी ज्यबा तना लला। तिग्दा भिसम थेदा ह्यो लबा शक्ति प्रभुदेन छ्याम मुला।

⁵ कोइ कोइ म्हेसे अर्गु धिन भन्दा चु धिन ज्यबादेन मुल हिन्ना भिसी म्हन्मुला। तर कोइ कोइसे चा जम्मान धिन ओस्पन हिन्ना। जम्मान म्हेगदेसे ह्वाड ह्वाडला सेमरी विश्वास लबा अन्धार दुक्क ततो:ला। ¹¹⁶ खजिबै धिनदा ज्यबादेन मुल धिन हिन्ना भिसी म्हन्बा म्हेसे परमेश्वरदा मान लबाला लागिरी म्हन्बा हिन्ना। स्या चबा म्हेगदेसे चबा धुइरी परमेश्वरदा मान लमुला। तिग्दा भिसम थेनीगदेसे परमेश्वरदा धन्यवाद पिन्मुला। ओच्छे स्या आचबा म्हेगदेसेनोन आचबा धुइरी परमेश्वरदा मान लमुला। तिग्दा भिसम थेनीगदेसे परमेश्वरदा धन्यवाद पिन्मुला। ⁷ तिग्दा भिसम य्हाड खालैनोन ह्वाडलान लागिरी सोएनोन आसो ओच्छे सिएनोन आसि। ⁸ य्हाड सोसै प्रभुला लागिरीन सोला ओच्छे सिसैनोन प्रभुला लागिरीन सिला। थेतबासेलमा य्हाड सिसै सोसै प्रभुलान हिन्ना। ⁹ थेतबासेलमा ख्रीष्ट सिजी ओच्छे सिबाग्याम सोसी सिबादेन सोबागदे जम्मान प्रभु दोजी

¹⁰ थेह्इ भिसम, तिग्दा एनीगदेसे ह्वाडला ज्योज्यो आले नाना आडागदेदा दोष लबा? ओच्छे तिग्दा थेनीगदेदा जजा म्हन्बा? तिग्दा भिसम परमेश्वरसे निसाफ लबा धुइरी य्हाड जम्मान थेला डाच्छापट्टि राप्तो:ला। ¹¹¹ तिग्दा भिसम बचनरीनोन चुह्इ भिसी भ्रिबा मुला,

“च्यागो, डाइ ग्रान फासी पाड्ला,

जम्मासेन डादा पया लला,

ओच्छे जम्मासेन डादा परमेश्वर भिसी

जयजयकार लला’

भिसी प्रभुसे सुड्बा मुला।” [†]

¹² थेतबासेलमा य्हाड जम्मासेन परमेश्वरदा ह्वाड ह्वाडला हिसाब उन्तो:ला।

स्थान्दोदा फसब थालउ

¹³ थेतबासेलमा य्हाडसे गिकसेम गिकदा दोष आलइ। बरु दाहेन्से ह्वाडला ज्योज्यो आले नाना आडागदेदा न्होङ्ना लबा गे खाइमै आलबारी पक्का लइ। ¹⁴ प्रभु येशूदा विश्वास लबासे लमा चु ताम डादा था मुला, खजिबै चबा स्हे ह्वाडनोन चीबु आत। तर खालै म्हेसे खजिबै चबा स्हे चीबु हिन्ना भिसी म्हन्जी भिसम थेला लागिरी थे चबा स्हे चीबुन तला। ¹⁵ एसे चबा स्हेसे लमा एला आलेला विश्वासदा ज्यबा आतनी भिसम एसे ह्वाडला आलेदा माया

लबा आरे। ख्रीष्टसे ह्वाडला ज्याननोन पिन्सी सोना लबा एला आले एसे चबा स्हेसे लमा नाश थातगै। ¹⁶ थेतबासेलमा एदा ज्यबा छोर्बा तामदा आज्यबा भिसी स्थान्दोसे बिरोध थालगै। ¹⁷ तिग्दा भिसम परमेश्वरला य्हुल्सा चा चबा धुइबा ताम आहिन। तर चु चा परमेश्वरदा सेम निबा म्हे दोबाला बारेरी, शान्ति पिन्बाला बारेरी ओच्छे ताड्बा तामला बारेरी हिन्ना। चु जम्मान परमेश्वरला आत्माग्याम खबा हिन्ना। ¹⁸ चुह्इ लसी ख्रीष्टदा तेन्बा म्हेसे परमेश्वरदा ताड्ना लला, ओच्छे म्हेगदेसेनोन थेदा ज्यबा म्हे भिसी पाड्ला।

¹⁹ थेतबासेलमा य्हाडसे सदन ह्वाड ह्वाड न्हडरी शान्ति पिन्बा तामदेन गिकसेम गिकदा विश्वासरी कोङ्ना लबा गे जे लइ। ²⁰ एसे चबा स्हेला लागिरीन परमेश्वरला गेदा न्होङ्ना थालउ। पाङ्गोन तो:मा जम्मान चबा स्हे चोखो मुला, तर ह्वाडसे चबा स्हेग्याम स्थान्दोदा न्होङ्ना लबा चा ज्यबा आहिन। ²¹ स्या चमा, इय्होइबा स्हे थुङ्गा एला ज्योज्यो आले नाना आडाला विश्वास न्होङ्ना भिसम एसे आचबादेन आधुइबान ज्यबा तला।

²² एसे जुन विश्वास लबा मुला थे विश्वासदा एदेन परमेश्वर न्हडरी थान्गो। जुन म्हेसे चु ताम ठीक हिन्ना भिसी ह्वाडला सेमरी तिगै आज्यबा आम्हन्ना पक्का लला थे म्हे ताड्ला। ²³ तर खालै म्हेसे तिगै स्हे शड्का लसी चजी भिसम थे म्हे परमेश्वरला डाच्छा दोषी तला। तिग्दा भिसम विश्वास अन्धार आलबा जुन ताम तसैनोन पाप हिन्ना।

स्थान्दोदा ह्यो लउ

15 य्हाड विश्वासरी कोङ्बा मुबागदेसे विश्वासरी कमजोर मुबागदेदा ह्यो लतो:ला। ओच्छे य्हाडसे ह्वाडदा ज्यबा तबा गे जे आहिन, तर स्थान्दोदाएनोन वास्ता लतो:ला। ² य्हाड जम्मासेन ख्रीष्टदा विश्वास लबागदेदा ज्यबा तगै, ओच्छे थेनीगदे विश्वासरी कोङ्बा तगै भिसी य्हाडसे थेनीगदेदा वास्ता लतो:ला। ³ तिग्दा भिसम ख्रीष्टसेनोन ह्वाडदा ज्यबा तबा गे जे आलनी। परमेश्वरला बचनरीनोन “ह्वाडदा हेला लबागदेसे डादाएनोन हेला लबा मुला” भिसी भ्रिबा मुला। ⁴ तिग्दा भिसम बचनरी भ्रिबा जम्मान तामगदे य्हाडदा लोप्बाला लागिरी भ्रिबा मुबा, चु बचनग्यामसेन य्हाडसे लबा आश याड्बाला लागिरी जस्तोन दुख तसैनोन नाबारी आँट याड्ला।

⁵ दुख नाखम्बा शक्तिदेन आँट पिन्बा परमेश्वरसेन एनीगदेदा ख्रीष्ट येशू ह्इबान दोसी भ्रबारीदेन ह्वाड ह्वाड न्हडरी दिक्सी चिखम्बा सेम पिन्ना। ⁶ ओच्छे एनीगदे जम्मान दिक्सी सुड गिक तसी य्हाडला प्रभु येशू ख्रीष्टला आबा परमेश्वरला जयजयकार लबारी खम्मा।

अर्गु य्हुलला म्हेगदेला लागिरी थार्बा पिन्बा समाचार

⁷ थेतबासेलमा ख्रीष्टसे एनीगदेदा माया लबा ह्इ लसी परमेश्वरदा मान लबारी एनीगदेसे ह्वाड ह्वाड न्हडरी गिकसेम गिकदा मान लउ। ⁸ एनीगदेसे डाला ताम इयान्गो, येशू ख्रीष्टसे लबा गेसे परमेश्वर विश्वास लखम्बा परमेश्वर हिन्ना भिसी यहूदीगदेदा उन्बारी हिन्ना। ओच्छे येशू ख्रीष्टसे य्हाडला आखे म्हेमेदेन छ्याम लबा कबुल पूरा लजी। ⁹ थेह्इ लसीन अर्गु य्हुलला म्हेगदेसे परमेश्वरसे लबा दयाला लागिरी परमेश्वरला जयजयकार लगै भिसीएनोन येशू ख्रीष्टसे चु गे लबा हिन्ना। बचनरीनोन चुह्इ भिसी भ्रिबा मुबा,

“थेतबासेलमा डाइ अर्गु य्हुलला म्हेगदेला गुडरी ह्वाडला जयजयकार लला,

ओच्छे ह्वाडलान जयजयकार तबा व्हाइ गोला।” ^{##}

¹⁰ दो:सी चुह्इ भिसीनोन भ्रिबा मुला,

“अर्गु य्हुलला म्हेगदे,

परमेश्वरला म्हेगदेदेन छ्याम ताङ्गो।” ^{##}

¹¹ दो:सीनोन चुह्इ भिसीनोन भ्रिबा मुला

“अर्गु य्हुलला जम्मान म्हेगदे,

प्रभुलान जयजयकार लउ,

† 14:1 कल २:१६ †† चु पदरी पावलसे यहूदी धर्मला ठिम अन्धार ज्यबा धिन भिसी पाड्बा मुला। † 14:10 २ कोर ५:१० †† 14:11 यशै ४५:२३

15:3 भजन ६९:९ ##† 15:9 २ शमू २२:५०; भजन १८:४९ ##† 15:10 वयव ३२:४३

ओच्छे जम्मान म्हिगदेसे

प्रभुला जयजयकार लगै।" †

12 दोःसी यशैया अगमवक्तासेनोन चुहड् भिसी पाड्बा मुला,
“यिशैला †† वंशग्याम म्हि गिक फेखला,
थेसे अर्गु यहुलला म्हिगदेथोरी शासन लला,
ओच्छे अर्गु यहुलला म्हिगदेसेनोन
थेथोरी आश लला।” ‡

13 आश तना लबा परमेश्वरदा विश्वास लबासे लमा थेसेन शान्ति पिन्सी
एनीगदेदा पूरान ताड्ना लगै। थेहड् लसम एनीगदेसे लबा आश परमेश्वरला
आत्माला शक्तिग्याम ल्हेबान निला।

अर्गु यहुलला म्हिगदेला लागिरी पावलसे लबा गे

14 ज्योज्यो आले नाना आडागदे, एनीगदे ल्हानान ज्यबा मुला, ओच्छे
एनीगदेला जम्मान ज्ञान बुद्धिसे गिकसेम गिकदा लोप्वारी खम्मुला भिबा
ताम डादा था मुला। 15 तसैनोन परमेश्वरसे डादा दयामाया लबासे लमा
एनीगदेदा ढन्ना लबाला लागिरी डाइ चु तामगदे भिबारी आँट लबा मुला।

16 परमेश्वरसे दयामाया लसी डादा अर्गु यहुलला म्हिगदेला गुडरी गे लबाला
लागिरी ख्रीष्ट येथूला मुल चेला स्होर्जी। ओच्छे अर्गु यहुलला म्हिगदे
परमेश्वरला आत्मग्याम चोखो तसी परमेश्वरदा सेम निबा भेटी दोगै भिसी
डाइ परमेश्वरला मन्दिररी पूजा लबा म्हि हड्बा दोसी थार्बा पिन्बा समाचार
थेःना लजी।

17 थेतबासेलमा ख्रीष्ट येथूसे डाग्याम परमेश्वरला लागिरी डाइ लतोःबा गे
लम्याङ्गा डा ल्हानान ताड्बा मुला। 18 ख्रीष्टदा विश्वास लबा अर्गु यहुलला
म्हिगदेदा परमेश्वरसे कुल्बा अन्छार भ्रबा म्हि स्होबारी ख्रीष्टसे डाग्याम लबा
तामदेन गेला बारैरी जे डाइ पाड्बारी भड लला। 19 डाइ परमेश्वरला
आत्माला शक्तिग्याम उदेकला चिनुगदेदेन उदेकला गेगदे लजी। थेहड् लसीन
डाइ यरूशलेमहेन्से इल्लुरिकन भिबा यहुल्साधोनान ख्रीष्टला थार्बा पिन्बा
समाचार पूरान थेःना लजी। 20 स्थान्दोसे थान्बा जगथोरी दिम स्होबा म्हिसे
हड् लसी स्थान्दोसे थेःना लबा ग्लारी थेःना लबा डाला सेम आरे।
थेतबासेलमा ख्रीष्टला मिन आथेःबादेन खालैसेन थेःना आलबा ग्लारी जे
थार्बा पिन्बा समाचार थेःना लबा डादा सेम मुला। 21 बचनरीनोन चुहड्
लसीन भिबा मुला,

“थेला बारैरी जुन म्हिदा खाइमै पाड्बा आरे,

थेनीगदेसे थेदा म्राड्ला।

ओच्छे थेला बारैरी जुन म्हिसे खाइमै थेःबा आरे

थेनीगदेसे परमेश्वरदा डोसेला” ††

पावल रोमरी निड म्हन्बा

22 थेतबासेलमान डाइ चु ग्लागदेरी ख्रीष्टला समाचार थेःना लसी भ्रबासे
लमा डा ल्हानान रेम एनीगदे मुबा ग्लारी खबारी म्हाडसैनोन खबारी
आखम्नी। 23 तर दाहेन्से चु ग्लारीक्यार डाइ थार्बा पिन्बा समाचार थेःना
लसी जिन्बा मुला। ल्हानान दिडहेन्से एनीगदेदेन छ्याम हुप तबा सेम मुबासे
लमा, 24 डा स्पेन भिबा यहुल्सारी निबा धुडरी एनीगदेदेन छ्याम चिसी तिगै
धिनधोना संगती लबा सेम मुला। ओच्छे एनीगदेदेन छ्याम तिगै धिनधोना
चिमाहेन्से डा थेग्याम स्पेनरी निबा धुडरी एनीगदेसे डादा ह्यो लला भिसी डाइ
म्हन्बा मुला। 25 तर दान्दे चा डा परमेश्वरला म्हिगदेदा ह्यो लबारी यरूशलेम
शहररी निबान मुला। 26 तिगदा भिसम माकेडोनियादेन अखैया भिबा ग्लारी
मुबा परमेश्वरला म्हिगदेसे ताड्सी यरूशलेम शहररी मुबा परमेश्वरला
म्हिगदे न्हडला प्राडबोगदेदा टाड्गा पुड्खबा मुला। 27 चु टाड्गा पिन्बारी
थेनीगदेदा ल्हानान सेम मुबा। तर थेनीगदेसे यहुदीगदेदा पिन्बा टाड्गा चा
थेनीगदेसे फातोःबा छे हड्बान हिन्ना। तिगदा भिसम अर्गु यहुलला म्हिगदेसे
याड्बा स्वर्गला मोलम यहुदीगदेग्यामसे याड्बा हिन्ना। 28 थेतबासेलमा चु
टाड्गा हुप्सी थेनीगदेदा भोर्सी पिन्माहेन्से एनीगदे मुबा ग्लारी खसी डा

स्पेनरी निला। 29 ओच्छे डा एनीगदे मुबा ग्लारी खमा येथू ख्रीष्टसे पिन्बा
मोलमगदेएनोन भसी खला।

30 ज्योज्यो आले नाना आडागदे, य्हाडला प्रभु येथू ख्रीष्टदेन परमेश्वरला
आत्मासे पिन्बा मायाग्याम डाला लागिरी डादेन छ्यामनोन परमेश्वरदेन
छ्याम प्रार्थना लसी पिन्गो भिबा डाला बिन्ती मुला। 31 ख्रीष्टदा विश्वास
आलबा यहुदिया अञ्चलरी मुबा म्हिगदेग्याम जोगब तबारी खमौ भिसी
डाला लागिरी परमेश्वरदेन छ्याम प्रार्थना लसी पिन्गो। ओच्छे यरूशलेमरी
मुबा परमेश्वरला म्हिगदेदाएनोन डाइ हुप्सी भबा टाड्गा सेम निगै
भिसीएनोन प्रार्थना लसी पिन्गो। 32 थेहड् लसीन परमेश्वरला सेम मुसम डा
एनीगदे मुबा ग्लारी ताड्सी ताड्सी खला। ओच्छे डा एनीगदेदेन छ्यामनोन
चिसी ब्लप्बा न्हला। 33 शान्ति पिन्बा परमेश्वर एनीगदे जम्मानदेन छ्याम
तगै। आमेन।

प्याफुल्ला

16 दाहेन्से डाइ मण्डलीदा ह्यो लबा य्हाडला आडा फिबी गाते ज्यबा
मुला भिसी एनीगदेदा डोसेना लला। थे किंक्रिया भिबा ग्लाला
मण्डलीरी ह्यो लबा म्हि हिन्ना। 2 थेसे ल्हानान म्हिगदेदा ह्यो लबा मुला ओच्छे
डादाएनोन ल्हानान ह्यो लबा मुला। थेतबासेलमा परमेश्वरला म्हिगदेदा मान
लबा हड् लसी थेदाएनोन मान लउ। ओच्छे एनीगदेसे थेदा तिग तोःबा थे
स्हेरी खम्तेधोना ह्यो लउ।

3 डादेन छ्यामनोन ख्रीष्ट येथूला गे लबा प्रिस्कादेन †† थेला हेम्बो
अकिलासदा प्याफुल्ला। 4 थेनीगदेसे डादा जोगब लबाला लागिरी ह्याडला
ज्याननोन पिन्बारी तयार तजी। डाइ थेनीगदेदा खाइमै म्तेःबारी आखम,
डाइ जे आहिन, अर्गु यहुलला जम्मान मण्डलीगदेसेएनोन थेनीगदेदा म्तेःबारी
आखम। 5 थेनीगदेला दिमरी मुबा मण्डलीदाएनोन प्याफुल्ला।

ओच्छे एशिया अञ्चलरी जम्मान भन्दा डाच्छा ख्रीष्टदा विश्वास लबा
डाला सेम निबा ह्यो इपेनितसदा प्याफुल्ला। 6 एनीगदेला लागिरी ल्हानान
गे लसी पिन्बा मरियमदाएनोन प्याफुल्ला मुला भिसी पाड्सी पिन्गो।
7 डादेन छ्यामनोन इयाल्खानरी मुबा डाला यहुदी ह्योदेन एन्डोनिकस
ओच्छे युनियस आडादा प्याफुल्ला मुला भिसी पाड्सी पिन्गो। चेलागदे
न्हडरी थेनीगदेएनोन जम्मासेन डोसेबा मुल चेलागदे हिन्ना। डाइ भन्दा
डाच्छा थेनीगदेसे ख्रीष्टदा विश्वास लबा मुबा।

8 ओच्छे प्रभुरी डाला सेम निबा ह्यो एम्प्लीआतसदाएनोन डाइ प्याफुल्ला
मुला भिसी पाड्सी पिन्गो। 9 य्हाडदेन छ्यामनोन ख्रीष्टला लागिरी गे लबा
उर्बानसदेन डाला सेम निबा ह्यो स्ताखुसदाएनोन प्याफुल्ला मुला भिसी
पाड्सी पिन्गो। 10 अपेल्लेसदाएनोन प्याफुल्ला। थेसे सेमहेन्से ख्रीष्टदा लबा
विश्वासला ताम उन्बा मुला। थेहड् लसीन अरिस्तोबुलसला दिमरी मुबागदे
जम्मादान प्याफुल्ला। 11 डाला यहुदी आले हेरोदियनदेन प्रभुदा विश्वास
लबा नर्किससला दिमरी मुबागदे जम्मादान प्याफुल्ला।

12 प्रभुला ल्हानान गे लबा त्रुफेना आडादेन त्रुफोसादा ओच्छे प्रभुला
लागिरी ल्हानान गे लबा डाला सेम निबा आडा परसीसदा प्याफुल्ला।
13 प्रभुसे धम्बा रूफसदेन थेला आमादा डाइ प्याफुल्ला मुला भिसी पाड्सी
पिन्गो। थेला आमासे डादाएनोन ह्याडलान झादा हड् लसी माया लमुला।
14 ओच्छे असिंक्रितस, फ्लेगन, हर्मस, पत्रोबासदेन हर्मास ओच्छे थेनीगदेदेन
छ्याम मुबा जम्मान ज्योज्यो आले नाना आडागदेदाएनोन प्याफुल्ला।
15 थेहड् लसीन फिलोलोगस, युलिया आडा, नेरियसदेन थेला आडा,
ओलिम्पास ओच्छे थेनीगदेदेन छ्याम मुबा परमेश्वरला म्हिगदे जम्मादान
प्याफुल्ला। 16 एनीगदे ह्याड ह्याड न्हडरी गिकसेम गिकदा सेमहेन्सेन माया
लसी प्याफुल्ला। डन्से सेमहेन्सेन माया लसी प्याफुल्ला मुला भिसी जम्मान
मण्डलीगदेसे पाड्बा मुला।

17 ज्योज्यो आले नाना आडागदे, एनीगदेदा लोप्बा तामदा बिरोध लबादेन
ह्याडसे ह्याडदान विश्वासी भिसी एनीगदेला विश्वासदा न्होड्ना लबारी
म्हाड्बा म्हिगदे म्राड्सी होशियार तसी चिउ। थेहड्बा म्हिगदेला संगतनोन

†† ग्रीक बाइबलरी चु पददेन १ कोरिन्थी १६:१९ पदरी जे प्रिस्का भिसी भिबा मुला।
अर्गु जम्मान ग्लारी प्रिस्किला भिसी भिबा मुला। प्रिस्का भिबादेन प्रिस्किला भिबा म्हि गिकनोन
हिन्ना।

† 15:11 भजन ११७:१ †† “यिशै” चा दाऊद ग्लेला आबा हिन्ना। ‡ 15:12
यशै ११:१० †† 15:21 यशै ५२:१५

थालउ भिबा डाला बिन्ती मुला।¹⁸ तिगदा भिसम थेह्ण्डबा म्हिगदेसे य्हाडला प्रभु येशू ख्रीष्टला लागिरी आहिन, तर ह्हाडला फो न्हबाला लागिरी जे गे लमुला। ओच्छे ज्यबा ज्यबा ताम लसी सोजो म्हिगदेदा धोका पिन्मुला।¹⁹ एनीगदे परमेश्वरसे कुल्बा अन्धार भ्रमुला भिबा ताम जम्मादान था मुला। चु म्हाड्सी डाएनोन ल्हानान ताड्बा मुला। थेह्ण्ड लसीन ज्यबा ज्यबा तामला बारेरी एनीगदेसे बुद्धि याड्गै तर आज्यबा तामला बारेरी तिगै था आतगै भिसी डाड म्हन्बा मुला।²⁰ शान्ति पिन्बा परमेश्वरसे शैतानदा योनान एनीगदेला काड धिरी थान्ना। य्हाडला प्रभु येशू ख्रीष्टला दयामाया एनीगदेदेन छ्याम तगै।

²¹ डादेन छ्याम गे लबा तिमोथीसे एनीगदेदा प्याफुल्ला भिसी पाड्बा मुला। थेह्ण्ड लसीन डाला यहूदी आले लुकियस, यासोनदेन सोसिपात्रोससेनोन एनीगदेदा प्याफुल्ला मुला।²² पावलला लागिरी चु चिठी भिसी पिन्बा प्रभुरी ह्हाडनीला आले डा तर्तियससेनोन जम्मादान प्याफुल्ला।²³ डा चिबा दिमला धनी गायसदेन थेला दिमरी मुबा मण्डलीगदेसेनोन

प्याफुल्ला भिसी पाड्बा मुला। ओच्छे चु शहरला कोष अध्यक्ष इरास्तसदेन आले क्वार्टससेनोन एनीगदेदा प्याफुल्ला मुला।²⁴ य्हाडला प्रभु येशू ख्रीष्टला दयामाया एनीगदेदेन छ्याम तगै। आमेन। †

²⁵ य्हाड जम्मासेन परमेश्वरदा मान लइ। थार्बा पिन्बा ख्रीष्टला बारेला ताम दडबोहेन्सेन छुम्सी थान्बा मुबा। तर दान्दे एनीगदेसे चु ताम था याड्बा मुला। चु ताम डाड थेःना लबा येशू ख्रीष्टला बारेरी पाड्बा तामग्यामसे एनीगदेसे था याड्बा मुला।²⁶ थेतबासेलमा दान्दे चु जम्मान तामगदे अगमवक्तासे भिबा तामगदेग्याम था याड्ना लमुला। ओच्छे जम्मासेन विश्वास लसी परमेश्वरसे कुल्बा ताम इयान्नी भिसी खाइमै म्हासी आनिबा परमेश्वरसे कुल्बा तामग्याम जम्मान य्हुलला म्हिगदेसे चु जम्मान ताम थेःबा मुला।²⁷ ओच्छे जम्मान ताम था याड्बा परमेश्वर गिक जेला येशू ख्रीष्टग्याम सदन मानदेन जयजयकार तगै। आमेन।

† चु पदला ताम ल्हाना ह्ण्डबा ग्रीक बाइबलरी भिबा आरे।

चु चिठीला बारेरी पाडतो:मा

येशूला मुल चेला पावलसे भिबा मुबा। चु चिठी भिबाला लागिरी पावलदा सोस्थेनेस भिबा म्हिसे ह्यो लबा मुबा (१ कोरिन्थी १:१)।

एशिया अज्वलला एफिसस शहररी भिबा मुबा।

ओस्पन ईश्वी संवत् ५५-५६ (विक्रम संवत् ११२-११३) सालरी भिबा मुबा।

कोरिन्थ शहररी मुबा विश्वासीगदेदा भिबा मुबा।

पावलसे चु चिठी कोरिन्थला विश्वासीगदेदा डाच्छारेम भिबा मुबा। कोरिन्थ शहर चा ग्रीस भिबा खुल्साला ग्लेखाड मुबा। पावलला धुडरी कोरिन्थसे अर्गु जम्मान खुल्सादेन छ्यामएनोन टिक्सी गे लबा मुबा। थे शहररी थरी थरीला ल्हानान रिमठिमदेन धर्मगदे तेन्बा म्हिगदे मुबा। थेहड लसीन नडबा गे लबा म्हिगदेएनोन मुबा। पावलसे थे शहररी थाबा पिन्बा समाचार थे:ना लमा यहूदीगदेसे भन्दा अर्गु खुलला ल्हानान म्हिगदेसे येशूदा विश्वास लजी। ओच्छे पावलसे थेरी मण्डली गिक स्होजी।

कोरिन्थला मण्डलीरी छेबा बड्बा, नडबा बानीबेहोरदेन स्फान्दोदेन छ्याम ब्रेल्सी भ्रबा हड्बा नडबा तामगदे मुबा। थेहड लसीन ब्याहला बारेरी, ज्ञान बुद्धिला बारेरी, मण्डलीला ठिमला बारेरीदेन परमेश्वरला आत्मासे पिन्बा मोलमला बारेरी ओच्छे सिबाग्याम सोबाला बारेरी इयोडबा तामगदे मुबा। चु जम्मान तामगदेला बारेरी पावलदा ज्ञान बुद्धि मुबासे लमा थेसे चु चिठीग्याम कोरिन्थला विश्वासीगदेदा ज्यना लसी घोना लजी। परमेश्वरसे हाडला म्हिगदेदा पिन्बा मोलमगदे न्हडरी माया चा जम्मान भन्दा ज्यबा हिन्ना भिसी १३ अध्यायरी भिबा मुला।

मुल तामगदे

प्याफुल्बादेन धन्यवाद पिन्बा १:१-९

मण्डली न्हडरी आढिक्बा १:१०-४:२१

नडबा गेगदे खलातो:बा ५:१-६:२०

ब्याह लबाला बारेरी पाड्बा ७:१-७:४०

ख्रीष्टदा तेन्बागदेदेन मूर्तिदा तेन्बागदे ८:१-११:१

मण्डली न्हडरी प्रभुदा तेन्बा धुडरी था ततो:बा ताम ११:२-१४:४०

ख्रीष्टदेन ख्रीष्टदा विश्वास लबागदे सिबाग्याम सोबा १५:१-५८

यरूशलेमरी मुबा परमेश्वरला म्हिगदेला लागिरी भेटी १६:१-४

चिठीला थुमरी भिबा ताम १६:५-२४

पावलसे कोरिन्थला विश्वासीगदेदा भिबा डाच्छारेमला चिठी

1 लास्सो, परमेश्वरसे म्हन्बा अन्छार ख्रीष्ट येशूला मुल चेला दोबारी धम्बा डा पावलदेन यहाडला आले सोस्थेनेसग्याम † प्याफुल्ला! 2 चु चिठी डन्से कोरिन्थ शहररी मुबा परमेश्वरला मण्डलीला म्हिगदेदा भिबान मुला। परमेश्वरसे एनीगदेदा हाडलान म्हिगदे दोबारी ख्रीष्ट येशूग्याम चोखो स्होबा मुला। थेसे प्रभु येशू ख्रीष्टदा तेन्बा जम्मान ग्लारी मुबा म्हिगदेदा हाडला म्हि स्होबा हड् लसीन एनीगदेदाएनोन हाडला म्हि स्होबारी इयोडबा मुला। थेनीगदेदेन यहाडला प्रभु गिकनोन हिन्ना। †3 यहाडला परमेश्वर आबादेन प्रभु येशू ख्रीष्टसे एनीगदेदा दयामायादेन शान्ति पिन्ना।

पावलसे परमेश्वरदा धन्यवाद पिन्बा

4 एनीगदे ख्रीष्ट येशूदेन छ्याम गिक तसी परमेश्वरसे एनीगदेदा दयामाया लबासे लमा डाइ एनीगदेला लागिरी सदन डाला परमेश्वरदा धन्यवाद पिन्बा मुला। 5 एनीगदे ख्रीष्ट येशूदेन छ्याम गिक तबासे लमा एनीगदेदा परमेश्वरला बारेरी ज्यना लसी ताम पाड्खम्बा शक्तिदेन जम्मान ताम घोखम्बा ज्ञान बुद्धि पिन्बा मुला। 6 तिग्दा भिसम ख्रीष्टला बारेरी डन्से

† सोस्थेनेस चा कोरिन्थ शहरला यहूदी नेता मुबा। थेसे पावलग्याम थाबा पिन्बा समाचार थे:सी प्रभु येशूदा विश्वास लबा मुबा। †† 1:2 मुल १८:१

पाड्मा सत्य हिन्ना भिसी एनीगदेदा पक्का मुला। 7 थेतबासेलमा यहाडला प्रभु येशू ख्रीष्ट दो:सी फेखबा धुड आततेधोना भ्रान्सी चिमा परमेश्वरदा तेन्बाला लागिरी एनीगदेदा तो:बा जम्मान मोलम याड्बा मुला। 8 ओच्छे यहाडला प्रभु येशू ख्रीष्ट दो:सी फेखमा एनीगदेदा तिगै दोष आरेबा म्हि स्होबाला लागिरी परमेश्वरसेन लिच्छाधोना एनीगदेला विश्वास कोड्ना लला। 9 परमेश्वर विश्वास लखम्बा परमेश्वर हिन्ना। थेसे हाडला झा यहाडला प्रभु येशू ख्रीष्टदेन छ्याम टिक्सी सेम गिक तबारी एनीगदेदा इयोडबा मुला।

मण्डली न्हडरी आढिक्बा

10 ज्योज्यो आले नाना आडागदे, दाहेन्से डाइ एनीगदेदा यहाडला प्रभु येशू ख्रीष्टला अधिकारग्याम एनीगदे हाड हाड न्हडरी टिक्सी चिउ भिबा डाला बिन्ती मुला। ओच्छे मण्डली न्हडरी तिगै आढिक्बा ताम खआपुड्गो। बरु एनीगदेसे लबारी म्हाड्बा तामगदेरी सेम गिक तसी चिउ। 11 तिग्दा भिसम डाला ज्योज्यो आले नाना आडागदे, एनीगदे हाड हाड न्हडरी कल लमुला भिबा ताम डादा क्लोए भिबा म्हेमेगदे न्हडला खालेसे पाड्जी। 12 एनीगदेला बारेरी डाइ थे:बा ताम चा चुनोन हिन्ना, एनीगदे हाड हाड

न्हडरी कोइसे “डा पावलला हिन्ना,” कोइसे “डा अपोल्लोसला हिन्ना,” कोइसे “डा पत्रुसला † हिन्ना” ओच्छे कोइसे “डा ख्रीष्टला हिन्ना” भिसी पाइमुला रो। ††

13 तिग ख्रीष्ट भो लबा मुला? तिग एनीगदेला लागिरी डा पावल कुसरी सिबा हिन्ना? ओच्छे डा पावलला मिनरी एनीगदेसे बप्तिस्मा किन्बा हिन्ना? आहिन। 14 डाइ क्रिस्पसदेन गायसदा बाहेक स्हान्दो खालैदा बप्तिस्मा आपिन्नी, परमेश्वरदा धन्यवाद तगै। †15 थेतबासेलमा डाला मिनरी बप्तिस्मा किन्जी भिसी एनीगदे खालैसेन पाइआम्याइ। 16 हिन्बाम, डाइ स्तिफनासला दिमला जम्मान म्हिगदेदाएनोन बप्तिस्मा पिन्जी। चु बाहेक डाइ स्हान्दो खालैदा बप्तिस्मा पिन्जी कि आपिन्नी थे डाइ ढन्बा आरे। †17 तिग्दा भिसम बप्तिस्मा पिन्बारी आहिन, तर थार्बा पिन्बा समाचार थे:ना लबाला लागिरी ख्रीष्टसे डादा पुइबा हिन्ना। चु तामगदे डाइ हाडलान ज्ञान बुद्धिग्याम पाइबा आहिन। चुदे डाइ हाडलान ज्ञान बुद्धिग्याम पाइजी भिसम ख्रीष्ट कुसरी सिबा खेरो निला।

ख्रीष्टनोन परमेश्वरला ज्ञानदेन शक्ति हिन्ना

18 ख्रीष्ट कुसरी सिबाला बारेला समाचार नाश तबागदेसे मूर्ख ताम हिन्ना भिसी म्हन्मुला। तर व्हाड थार्बा याइबागदेला लागिरी चा परमेश्वरला शक्ति हिन्ना। 19 परमेश्वरला बचनरीनोन चुहइ भिसी भिबा मुला,

“डाइ बुद्धि मुबागदेला बुद्धि नाश लला

ओच्छे चलाकगदेला घोखम्बा शक्ति म्हाना लला।” ††

20 खइ, बुद्धि मुबा म्हिगदे खानड मुला? खइ, यहूदी धर्मगुरुगदे खानड मुला? ओच्छे ल्हानान ताम पाइबा चु धुइला म्हिगदे खइ? च्यागो, परमेश्वरसे जम्बुलिडला ज्ञान बुद्धिदा गे आखेल्बा स्होबा मुला।

††21 जम्बुलिडला म्हिगदेसे हाडला ज्ञान बुद्धिग्याम परमेश्वरदा डोआसे भिबा ताम परमेश्वरसे हाडला ज्ञान अन्धार म्हन्जी। बरु जम्बुलिडला म्हिगदेसे गे आखेल्बा ताम हिन्ना भिसी म्हन्बा इन्से थे:ना लबा थार्बा पिन्बा समाचाररी विश्वास लबा म्हिगदेदा थार्ना लबा परमेश्वरदा ज्यबा छोर्री।

22 च्यागो, यहूदीगदेसे चा उदेकला चिनु उन्नो भिसी पाइमुला। ओच्छे अर्गु यहुलला म्हिगदेसे चा जम्बुलिडला ज्ञान बुद्धि म्हाइमुला। 23 तर इन्से कुसरी साइबा ख्रीष्टला बारेरी पाइमुला। चु ताम यहूदीगदेला लागिरी चा छेर्ना लबा ताम दोजी, ओच्छे अर्गु यहुलला म्हिगदेला लागिरी चा गे आखेल्बा ताम दोजी। ††24 तर यहूदी हिन्से अर्गु यहुलला म्हि हिन्से परमेश्वरसे धम्बागदेला लागिरी चा ख्रीष्टनोन परमेश्वरला शक्तिदेन ज्ञान बुद्धि हिन्ना। 25 तिग्दा भिसम म्हिगदेसे परमेश्वरसे लबा ताम चा मूर्ख ताम हिन्ना भिसी म्हन्सैनोन परमेश्वरला ताम म्हिला ज्ञान बुद्धि भन्दा ग्रेन मुला, ओच्छे म्हिगदेसे परमेश्वर कमजोर मुला भिसी म्हन्सैनोन परमेश्वर म्हिला शक्ति भन्दा शक्तिशाली मुला।

26 ज्योज्यो आले नाना आडागदे, परमेश्वरसे धम्बा धुइरी एनीगदे खाइइबा मुबा? थे ताम ढन्गो। म्हिगदेसे म्हन्बा अन्धार एनीगदे न्हडला ल्हाना हइबा म्हि ज्ञान बुद्धि आरेबा मुबा। एनीगदे न्हडला ल्हानान म्हि शक्तिशाली आरेबा मुबा, ओच्छे यहुल्साला ग्रेन म्हिला म्हेमेलाएनोन आहिन मुबा। 27 तर डा ज्ञान बुद्धि मुबा म्हि हिन्ना भिसी म्हन्बा म्हिगदेदा पे:ना लबारी परमेश्वरसे जम्बुलिडला म्हिगदेसे मूर्ख भिसी म्हन्बा म्हिगदेदा धम्जी। ओच्छे इनी शक्ति मुबा म्हि हिन्ना भिसी म्हन्बागदेदा पे:ना लबारी कमजोर म्हिगदेदा धम्जी। 28 ओच्छे चु जम्बुलिडला म्हिगदेसे ग्रेन म्हन्बा म्हिगदेदा गे आखेल्बा स्होबाला लागिरी परमेश्वरसे म्हिगदेसेन हेला लसी गे आखेल्बा भिसी म्हन्बा म्हिगदेदा धम्जी। 29 खालैसेन हाडला डाच्छापट्टि घमण्ड थालगै भिसीन परमेश्वरसे चुहइ लबा हिन्ना। 30 बरु परमेश्वरसेन एनीगदेदा ख्रीष्ट

† चु पदरी पत्रुसदा ल्हानान हइबा बाइबलरी केफास भिसी भिबा मुला। पत्रुस भिबादेन केफास भिबा म्हि गिकनोन हिन्ना। †† 1:12 मुल १८:२४ † 1:14 मुल १८:८; १९:२९; रोमी १६:२३ †† 1:16 १ कोर १६:१५ †† 1:19 यशै २९:१४ ††† 1:20 अय्यूब १२:१७; यशै १९:१२; ३३:१८; ४४:२५ ††† यहूदीला ठिम अन्धार कुसरी टॉगब लसी साइबा म्हि चा परमेश्वरग्याम सजाय याइबा म्हि हिन्ना भिसी म्हन्मुबा (प्रस्था २१:२२-२३ स्हीगो)। थेतबासेलमा कुसरी टॉगब लसी साइबा येशू ख्रीष्टग्याम खाइइ लसी थार्बा याइला भिसी यहूदीगदेसे म्हन्मुबा।

येशूदेन छ्याम गिक स्होबा मुला। परमेश्वरग्यामसेन ख्रीष्ट व्हाडला ज्ञान बुद्धि दोबा मुला। थेहइ लसी ख्रीष्टग्यामसेन व्हाडदा परमेश्वरदा सेम निबा म्हि स्होजी ओच्छे व्हाडला पापला सय फासी व्हाडदा चोखो स्होसी फेबा मुला। 31 थेतबासेलमा परमेश्वरला बचनरीनोन “चुदे खालै म्हिसे डा ज्यबा म्हि हिन्ना भिसी पाइबा सेम मुसम, थेसे प्रभुसे लबा गे गाते ज्यबा मुला भिसी पाइगै” भिसी भिबा मुला। §

परमेश्वरला आत्माग्याम याइबा ज्ञान बुद्धि

2 डाला ज्योज्यो आले नाना आडागदे, परमेश्वरला बारेरी पाइबारी डा एनीगदे मुबा ग्लारी खमा डाइ डाला ज्ञान बुद्धिरी घमण्ड लसी एनीगदेदेन छ्याम ग्रेन ग्रेन ताम आलनी। 2 तिग्दा भिसम डा एनीगदेदेन छ्याम मुबा धुइरी येशू ख्रीष्ट कुसरी सिबा ताम बाहेक अर्गु तिगै ताम एनीगदेदा आपाइबा पक्का लबा मुबा। 3 एनीगदे मुबा ग्लारी खमा धुइरी डा कमजोर मुबा, ओच्छे लोइसी डाला तिड धर्बा मुबा। ††4 डाइ एनीगदेदेन छ्याम ताम लबान बचनग्याम पाइमा एनीगदेदा व्हाम्बारी डाला ज्ञान बुद्धिदेन शक्तिग्याम तिगै ताम आपाइनी, तर डाला गेग्यामसेन परमेश्वरला आत्माला शक्ति उन्जी। 5 एनीगदेला विश्वास म्हिला ज्ञान बुद्धिथोरी आहिन, तर परमेश्वरला शक्तिथोरी तगै भिसी डाइ थेहइ लबा हिन्ना।

6 तसैनोन पाको म्हिगदेदा इन्से ज्ञान बुद्धिला ताम लोप्बा मुला। तर इन्से लोप्बा ज्ञान बुद्धिला ताम चु जम्बुलिडला म्हिगदेदेन शासन लबागदेला ज्ञान बुद्धिला ताम आहिन। थेहइबा ज्ञान बुद्धि थोबा म्हिगदे चा नाश तसी निला। 7 तर इन्से चा म्हिला ज्ञान बुद्धिग्याम घोबारी आखम्बा परमेश्वरला ज्ञान बुद्धिला बारेरी थे:ना लबा मुला। चु ज्ञान बुद्धि चा जम्बुलिड स्होबा भन्दा डाच्छान व्हाडदा व्हालदेन शक्ति पिन्बाला लागिरी परमेश्वरसे म्हन्बा अन्धार फेसी थान्बा मुबा। 8 चु जम्बुलिडरी शासन लबागदे खालैसेन चु ताम आघोनी। चुदे थेनीगदेसे घोबा हिन्सम व्हालदेन शक्ति मुबा प्रभुदा कुसरी टॉगब आलसेला मुबा। 9 तर बचनरी चुहइ भिसी भिबा मुला,

“खालैसेन खाइमै आम्राइबा,

खाइमै आथे:बा,

खाइमै सेमरी आम्हन्बा तामगदे परमेश्वरसे हाडदा माया लबा म्हिगदेला लागिरी ठीक लबा मुला।” †††

10 परमेश्वरसे हाडला आत्माग्यामसेन व्हाडदा थे जम्मान ताम उन्बा मुला। तिग्दा भिसम परमेश्वरला आत्मादा जम्मान ताम था मुला। ओच्छे म्हिसे था आयाइबा परमेश्वरला सेमला तामगदेएनोन परमेश्वरला आत्मादान था मुला। 11 म्हिला सेमला ताम थे न्हडरी मुबा हाडलान आत्मासे जे घोला, थेहइ लसीन परमेश्वरला सेमला ताम परमेश्वरला आत्मासे जे घोला। 12 व्हाडसे जम्बुलिडरी मुबा आत्मा याइबा आहिन, तर दाहेन्से परमेश्वरसे पिन्बा जम्मान मोलमगदे घोबारी खम्बै भिसी परमेश्वरसेन हाडला आत्मा व्हाडदा पिन्बा मुला।

13 इन्से थे:ना लबा ताम म्हिला ज्ञान बुद्धिग्याम लोप्बा तामगदे आहिन, तर परमेश्वरला आत्मासे इन्दा लोप्बा तामगदे हिन्ना। थेनोन तामगदे इन्से परमेश्वरला आत्मा मुबागदेदा लोप्बा मुला। 14 तर जुन म्हिदेन परमेश्वरला आत्मा आरे थेसे परमेश्वरला आत्माला तामगदेरी विश्वास आल। तिग्दा भिसम थेला लागिरी थे तामगदे चा मूर्ख ताम हिन्ना। थे जम्मान तामगदे परमेश्वरला आत्माग्यामसे जे घोबारी खम्बा तामगदे तबासे लमा थेसे घोबारी आखम। 15 परमेश्वरला आत्मा मुबा म्हिसे जम्मान स्हे ठीक मुला कि आरे भिसी च्याबारी खम्बला। तर परमेश्वरला आत्मा आरेबा स्हान्दो खालै म्हिसे थेदा ठीक मुला कि आरे भिसी च्याबारी आखम। 16 तिग्दा भिसम बचनरी चुहइ भिसी भिबा मुला,

“खालसे प्रभुला सेम घोखम्बला?

ओच्छे खालसे प्रभुदा लोप्बारी खम्बला?”

तर व्हाडसे मी ख्रीष्टला सेम याइबा मुला। ††

परमेश्वरला गे लबा म्हिगदे

3 डाला ज्योज्यो आले नाना आडागदे, डा एनीगदेदेन छ्याम मुबा धुडरी डाइ परमेश्वरला आत्मासे कुल्बा अन्धार भ्रबा म्हिगदेदेन छ्याम ह्ण्ड लसी एनीगदेदेन छ्याम ताम लबारी आखम्नी। तर डाइ एनीगदेदेन छ्याम ह्ण्डला सेमसे म्हन्बा अन्धार भ्रबा म्हिदेन छ्याम ह्ण्ड लसी ताम लजी। ओच्छे डाइ एनीगदेदेन छ्याम विश्वासरी † पाको आरेबा म्हिगदेदा ह्ण्ड लसी ताम लबा मुला।² थे धुडरी एनीगदेसे कोड्बा चबा स्हे चबारी आखम्बासे लमा डाइ एनीगदेदा इहे जे ख्वाजी। दान्देधोनाएनोन एनीगदेसे चबा स्हे चबारी खम्बा आरे। †‡ अझ एनीगदे ह्ण्डला सेमसे म्हन्बा अन्धार भ्रबा म्हिला ह्ण्डबान बानीबेहोर थोसी भ्रबा मुला। ओच्छे एनीगदे ह्ण्ड ह्ण्ड न्हडरी गिकसेम गिकदा डाह लबान छेबा बड्बा लमुला। थेतबासेलमा एनीगदे अझ ह्ण्डला सेमसे म्हन्बा अन्धार भ्रबा स्थान्दो म्हि ह्ण्डबान मुला।⁴ तिग्दा भिसम एनीगदे ह्ण्ड ह्ण्ड न्हडरीन कोड्से “डा पावलला हिन्ना,” कोड्से “डा अपोल्लोसला हिन्ना” भिमाहेन्से एनीगदे ह्ण्डला सेमसे म्हन्बा अन्धार भ्रबा म्हिगदे ह्ण्डबान आतनी? † तजी।

⁵ अपोल्लोसदेन पावल घेन हिन्ना? आहिन। डनी मी प्रभुसे कुल्बा अन्धार गे लबा म्हि जे हिन्ना। डन्से परमेश्वरथोरी विश्वास लबाला लागिरी एनीगदेदा ह्ण्ड लबा जे हिन्ना।⁶ डाइ चा सूजी, ओच्छे अपोल्लोससे क्युड युजी। तर थेदा परमेश्वरसेन ल्हेना लजी। †‡ थेतबासेलमा सूबादेन क्युड युबा म्हि तिगै आहिन, तर ल्हेना लबा परमेश्वर चा घेन हिन्ना।⁸ सूबादेन क्युड युबा म्हि तिगै फरक आरे। थेन्नीसेन ह्ण्ड ह्ण्डसे लबा गे अन्धारला ज्याला याड्ला।⁹ तिग्दा भिसम डनी न्ही चा परमेश्वरला गे लबा म्हि हिन्ना, एनीगदे चा परमेश्वरला बु ह्ण्डबान हिन्ना।

ओच्छे एनीगदे परमेश्वरला दिम ह्ण्डबाएनोन हिन्ना।¹⁰ परमेश्वरसे डादा पिन्बा दयामायग्याम डाइ मुल कर्मीसे ह्ण्ड लसी जग थान्बा मुला। स्थान्दोगदेसे चा थे जगथोरी दिम स्होबान मुला, तर थे जगथोरी दिम स्होबागदेसे होशियार लसी स्होगै।¹¹ तिग्दा भिसम थे जग चा येथू ख्रीष्टनोन हिन्ना। थे जग बाहेक स्थान्दो खालैसे अर्गु जग थान्बारी आखम।¹² चुदे खालै म्हिसे थे जगथोरी म्हर, म्हुडदेन म्हुंगो खाल्ला युडबा, सिड, सो ओच्छे परालसे दिम स्होजी भिसम,¹³ थे जम्मान म्हिगदेसे लबा गे परमेश्वरसे निसाफ लबा धिनकुनु था याड्ला। तिग्दा भिसम निसाफ लबा धुडरी परमेश्वरसे मेरी युसी थेनीगदेसे लबा गे खाह्ण्डबा चीम भिसी च्याला।¹⁴ चुदे थे जगथोरी दिम स्होबा म्हिला गे मेरी युमा आक्रोनी भिसम थे म्हिसे इनाम याड्ला।¹⁵ चुदे खालै म्हिला गे क्रोसी नाश तजी भिसम थेसे इनाम आयाड्। तर थे म्हि चा मेयाम स्योर्बा ह्ण्ड तसी जोगब तला।

¹⁶ एनीगदेन परमेश्वरला मन्दिर हिन्ना, ओच्छे परमेश्वरला आत्मा एनीगदे न्हडरी धन्छ्यामुला भिबा ताम एनीगदेदा था आरे? ¹⁷ चुदे खालै म्हिसे परमेश्वरला मन्दिरदा नाश लजी भिसम परमेश्वरसेन थेदा नाश लला। तिग्दा भिसम परमेश्वरला मन्दिर चोखो मुला, ओच्छे थे मन्दिर चा एनीगदेन हिन्ना।

¹⁸ खालैसेन ह्ण्डसे ह्ण्डदान धोका थापिन्गो। एनीगदे न्हडरी खालै म्हिसे ह्ण्डसे ह्ण्डदान डा चु जम्बुलिडला ज्ञान बुद्धि मुबा म्हि हिन्ना भिसी म्हन्जी भिसम थे तिगै था आरेबा मूर्ख म्हि ह्ण्डबा दोतो:ला। जमाहेन्से थे ज्ञान बुद्धि मुबा म्हि दोला।¹⁹ तिग्दा भिसम परमेश्वरला लागिरी जम्बुलिडला ज्ञान बुद्धि चा मूर्ख ताम ह्ण्डबान हिन्ना। बचनरीनोन चुह्ण्ड लसी भ्रिबा मुला,

“ज्ञान बुद्धि मुबा म्हिगदेसे लबा चलाक गेयामसेन परमेश्वरसे थेनीगदेदा चुड्ला।”

²⁰ दो:सी चुह्ण्ड भिसीएनोन भ्रिबा मुला,

“ज्ञान बुद्धि मुबा म्हिगदेसे म्हन्बा ताम गे आखेल्बा ताम हिन्ना भिसी परमप्रभुदा था मुला।”

²¹ थेतबासेलमा खालैसेन म्हिसे लबा गेरी घमण्ड थालगै। तिग्दा भिसम जम्मान स्हे एनीगदेदान हिन्ना,²² पावलदेन अपोल्लोस ओच्छे पत्रुस, चु

जम्बुलिड, दान्देला धुड, लिच्छाला धुड, सिसै सोसै जम्मान एनीगदेदान हिन्ना।²³ ओच्छे एनीगदे चा ख्रीष्टला हिन्ना, ओच्छे ख्रीष्ट चा परमेश्वरला हिन्ना।

ख्रीष्टला मुल चेलागदेसे नातो:बा ताम

4 म्हिगदेसे डन्दा ख्रीष्टला गे लबा म्हिदेन म्हिसे था आयाड्बा परमेश्वरला सेमला ताम घोना लबा जिम्मा याड्बा म्हि हिन्ना भिसी म्हन्तो:ला।² चुदे जे आहिन, चुह्ण्डबा गे लबा म्हि चा मालिकसे विश्वास लखम्बा म्हि ततो:ला।³ तर एनीगदेदेन म्हिगदेला निसाफ लबा अदालतसे डाला निसाफ लसैनोन थे ताम डाला लागिरी तिगै आहिन। ओच्छे डाइएनोन ह्ण्डसे ह्ण्डदान निसाफ आल।⁴ डाइ तिगै आज्यबा गे लबा मुला भिसी डादा था आरे, तर चुह्ण्ड भिदेमा डाला तिगै गल्ती आरे भिसी पाड्बारी आखम। प्रभुसेन डाला निसाफ लला।⁵ थेतबासेलमा प्रभुसे तोगब लबा धुड भन्दा डाच्छान एनीगदेसे खालैदान निसाफ थालउ। बरु प्रभु फेख्वा धुड भ्रान्सी चिउ। धोपधोपरी लबा जम्मान ताम प्रभुसेन व्हालरी भसी म्हिला सेमला जम्मान ताम उन्ना। थे धुडरी चा जम्मान म्हिसे परमेश्वरग्याम ह्ण्ड ह्ण्डला गे अन्धार याड्तो:बा इनाम याड्ला।

⁶ दाहेन्से ज्योज्यो आले नाना आडागदे, चु तामग्यामसेन एनीगदेसे ज्यना लसी घोखम्मी भिसी डाइ डादेन अपोल्लोसला बारेरी पाड्बा मुला। परमेश्वरला बचनरी भ्रिबा भन्दा तिगै अर्गु ताम थालउ। ओच्छे एनीगदेसे कोड्दा मान लबा, कोड्दा मान आलबा थालउ।⁷ खाल्से एनीगदेदा स्थान्दो म्हिगदे भन्दा घेन स्होजी? तिग एनीगदेदेन छ्याम मुबा जम्मान स्हे परमेश्वरसेन पिन्बा आहिन? परमेश्वरसे पिन्बा स्हेगदेन एनीगदेदेन छ्याम मुला भिसम दो:सी तिग्दा एनीगदे ह्ण्डसेन स्होबा ह्ण्ड लसी घमण्ड लबा?

⁸ ह्ण्डदा तो:बा जम्मान स्हे याड्सी एनीगदे प्युक्पो तसी जिन्बा मुला भिसी एनीगदेसे म्हन्बा मुला। ओच्छे डनी आरेसै ग्ले दोबारी खम्बा मुला भिसी एनीगदेसे म्हन्बा मुला। एनीगदेसे म्हन्बा अन्धार एनीगदे ग्लेनोन दोबा हिन्सम ज्यबा तसेला मुबा। तिग्दा भिसम डन्सेनोन एनीगदेदेन छ्यामनोन शासन लबारी खम्सेला मुबा।⁹ तर डनी मुल चेलागदेदा सिबाला सजाय याड्बा म्हिगदेदा † ह्ण्ड लसी परमेश्वरसेन जम्मान भन्दा लिच्छापट्टि थान्बा मुला भिसी म्हन्बा मुला। थेह्ण्ड लसीन डनी चा जम्बुलिडरी स्वर्गदूतगदेदेन म्हिगदेला ओच्छाडरी जम्मासेन प्राङ्गै भिसी उन्बारी थान्बा स्हे ह्ण्डबान म्हन्बा मुला।¹⁰ डन्से ख्रीष्टदा तेन्बासे लमा डनी मूर्ख म्हि ह्ण्डबान हिन्ना, तर एनीगदेदा चा ख्रीष्टसे बुद्धि मुबा म्हि स्होबा मुला। डनी कमजोर म्हि हिन्ना, एनीगदे चा भड्बा म्हि हिन्ना। ओच्छे डन्दा हेला लमुला, तर एनीगदेदा चा म्हिगदेसे मान लमुला।¹¹ दान्देएनोन डनी चबा धुड्बा आयाड्ना फोड्थाननोन भ्रबा मुला, क्वान्बारी ज्यबा क्वान आरे। ओच्छे डन्दा म्हिगदेसे तोबा ग्याड्बा लबा मुला, ओच्छे डन्दा दिमनामएनोन आरे।¹² चबा धुड्बादेन क्वान्बाला लागिरी डनी ह्ण्डसेन दुख लसी गे लमुला। स्थान्दोसे बेड्ज्जत लमा डन्से थेन्दा मोलम पिन्मुला, ओच्छे दुख पिन्मा डन्से नामुला।¹³ डन्दा बेड्ज्जत लमाएनोन डन्से थेन्दा माया लसी ताम पाड्बा मुला। दान्देधोनाएनोन म्हिगदेला लागिरी डनी जम्बुलिडरी तिगै गे आखेल्ना भ्याड्तो:बा स्हेदेन फोहोर ह्ण्डबान तबा मुला।

¹⁴ चु ताम डाइ एनीगदेदा पे:ना लबाला लागिरी भ्रिबा आहिन, तर एनीगदेदा डाइ माया लबा डालान कोलागदेदा ह्ण्ड लसी अर्ती पिन्बारी भ्रिबा हिन्ना।¹⁵ एनीगदेदा ख्रीष्टला बारेरी लोप्बा म्हिगदे ड्याबारीन आखम्बाधोना मुसैनोन एनीगदेला आबा ल्हाना आरे, तर गिक जे मुला। तिग्दा भिसम एनीगदेदा थार्बा पिन्बा समाचार थे:ना लसी ख्रीष्ट येथूदा डोसेना लबासे लमा डा एनीगदेला आबा ह्ण्डबान दोबा मुला।¹⁶ थेतबासेलमा एनीगदे डा ह्ण्डबान दोगो भिबा डाला बिन्ती मुला।¹⁷ थेतबासेलमा डाइ माया लबा तिमोथीदा एनीगदे मुबा ग्लारी पुड्खबान मुला। थे ख्रीष्टदेन छ्याम गिक तबादेन विश्वास लखम्बा डाला झा ह्ण्डबान हिन्ना। डाइ जम्मान ग्लाला

† चु पदरी “विश्वासरी” भिबादा ग्रीक बाइबलरी ख्रीष्टरी भिसी भ्रिबा मुला। †† 3:2 हिब्रू ५:१२-१३ † 3:4 १ कोर १:१२ †† 3:6 मुल १८:४-११, २४-२८

‡‡ थे धुडरी चा कोरिन्थीला ठिम अन्धार सजाय पित्तो:बा म्हिदा जम्मान म्हिला डाच्छापट्टि भसी च्यानदा चपुड्बा।

मण्डलीगदेरी लोष्वा अन्धार येशू ख्रीष्टरी डा खाह्ङ लसी भ्रबा मुला भिबा ताम थेसेन एनीगदेदा ढन्ना लला।

18 एनीगदे न्हडरी कोइ कोइ चा डा एनीगदे मुबा ग्लारी आख भिबा म्हन्सी घमण्ड लसी भ्रमुला रो, 19 तर प्रभुसे सेम लजी भिसम डा योनान एनीगदे मुबा ग्लारी खला। ओच्छे थे घमण्ड लसी भ्रबा म्हिसे पाडबासे लमा आहिन, तर थेनीगदेला शक्ति खाह्ङबा चीम थे च्याला। 20 तिगदा भिसम परमेश्वरला खुल्सा ज्यबा तामग्याम जे आहिन, तर शक्तिग्याम † म्राड्मुला। 21 डा थेरी धोखमाहेन्से डाइ एनीगदेदा तिग लगे भिसी म्हन्बा मुला? एनीगदेदा कडीसे सजाय पिन्गो कि सोजो तसी माया लउ?

ब्रेल्बा

5 डाइ एनीगदेला गुडरी स्थान्दोदेन छ्याम ब्रेल्सी भ्रमुला रो भिबा ताम थे:बान मुला। ओच्छे एनीगदे न्हडला गिकसे मी हाडलान आमच्याडदा †† मिड स्होबा मुला भिबा ताम डाइ थे:बा मुला। चुह्ङ लसी मी अर्गु खुलला म्हिगदेएनोन ब्रेल्सी आभ्रमुला। 2 तर एनीगदेसे मी घमण्ड लबा मुला। बरु एनीगदेसे मी दुख म्हन्तो:मुबा, ओच्छे थेह्ङबा गे लबा म्हिदा एनीगदेला गुडग्याम ते:तो:मुबा। 3 डा ल्हुडरी एनीगदेदेन छ्याम आरेसै डाला सेम मी एनीगदेदेन छ्यामनोन मुला। ओच्छे डा एनीगदेदेन छ्याम मुबा ह्ङ लसीन थेह्ङबा गे लबा म्हिदा डाइ निसाफ लसी जिन्बा मुला। 4 एनीगदे व्हाडला प्रभु येशूला मिनरी ग्ला गिकरीन ह्रुप तमा, डाला सेमएनोन एनीगदेदेन छ्यामनोन तला, ओच्छे व्हाडला प्रभु येशूला शक्तिएनोन थेरीन तला। 5 थे धुडरी थेला पाप लबा ल्हुड † नाश लगे भिसी एनीगदेसे थेदा शैतानना यारी जिम्मा लसी पिन्गो। ओच्छे प्रभु दो:सी फेप्वसी निसाफ लबा धुडरी थेला आत्मा चा थार्ला।

6 एनीगदेसे घमण्ड लबा ज्यबा आहिन। ज्योप्ला ब्रारी जजाकी खमीर युमाहेन्से † ज्योप्ला जम्मान ब्रादा भोना लमुला भिबा ताम एनीगदेदा था आरे? 7 खमीर आयुना ज्योप्ला छार ब्रा दोबारी एनीगदेसे डाच्छाला थे आज्यबा खमीर †† ते:सी थ्याङ्गो। जमाहेन्से एनीगदे खमीर आयुना ज्योप्ला छार ब्रा ह्ङबान दोला, तिगदा भिसम ख्रीष्ट चा मिश्र खुल्साग्याम फेसी खबा धिनदा ढन्सी धड्बा चाडरी बलि फुल्बा ग्यु बोगो ह्ङबान दोसी व्हाडला लागिरी बलि तसी जिन्बा मुला। 8 थेतबासेलमा थे खमीर ह्ङबा आज्यबा बानीबेहोर थोसी आहिन, तर सेमरी तिगै आज्यबा ताम आथान्ना सत्य ग्यामरी भ्रसी खमीर आयुना गेड ह्ङबान दोसी चाड धङ्गो।

9 डाइ डाच्छान एनीगदेदा ब्रेल्सी भ्रबा म्हिगदेदेन छ्याम संगतनोन थालउ भिसी अर्गु चिठीरी भ्रिबा मुबा। 10 तर चु जम्बुलिडरी मुबा ख्रीष्टदा विश्वास आलना ब्रेल्सी भ्रबागदे, लोभ लबागदे, य्हो लबागदेदेन मूर्तिदा तेन्बा म्हिगदेदेन छ्याम संगतनोन थालउ भिबारी म्हाड्बा आहिन। थेह्ङ भिसम एनीगदेसे चु जम्बुलिडनोन खलातो:ला। 11 डाइ भ्रिबा ताम चा चुनोन हिन्ना। डा ख्रीष्टदा विश्वास लबा म्हि हिन्ना भिसी सुडसे चा पाड्सी भ्रबा, तर गेसे चा स्थान्दोदेन छ्याम ब्रेल्सी भ्रबा, लोभ लबा, मूर्तिदा तेन्बा, म्हिला तामगन लबा, इय्होडसी भ्रबादेन य्हो लबा म्हिदेन छ्याम चा संगतनोन थालउ भिबा हिन्ना। थेह्ङबा म्हिदेन छ्याम मी चबा थुड्बाएनोन थालउ। 12 ख्रीष्टदा विश्वास आलबा मण्डली †† न्हडरी आरेबा म्हिगदेला निसाफ लबा गे डाला आहिन। तर ख्रीष्टदा विश्वास लबा मण्डली न्हडला म्हिगदेला निसाफ लबा गे एनीगदेला हिन्ना। 13 ख्रीष्टदा विश्वास आलबा मण्डली न्हडरी आरेबा म्हिगदेला निसाफ मी परमेश्वरसेन लला। परमेश्वरला बचनरी चुह्ङ भिसी भ्रिबा मुला, “नइबा गे लबा म्हिदा एनीगदेला गुडग्याम ते:गो।” †††

† “शक्तिग्याम” भिबा चा परमेश्वरला आत्मासे ख्रीष्टदा विश्वास लबागदेला बानीबेहोर परमेश्वरदा सेम निबा स्होबा हिन्ना। जमाहेन्से थे परमेश्वरसे म्हन्बा अन्धार भ्रबारी खम्ला। †† “आमच्याड” भिबा चा आबासे भ्रबा स्थान्दो मिड हिन्ना। † “पाप लबा ल्हुड” भिबादा पापी बानीबेहोर भिसीएनोन घोखम्ला। †† “ज्योप्ला ब्रारी जजाकी खमीर युमाहेन्से” भिबा चा जजाबा पापसे पूरान मण्डलीदा न्होड्ना लमुला भिबा हिन्ना। †† “आज्यबा खमीर” भिबा चा पाप लबा म्हि हिन्ना। ††† “मण्डली” भिबा चा ख्रीष्टदा विश्वास लबा जम्मान म्हिगदे हिन्ना। ††† 5:13 व्यव १३:५; १७:७

विश्वासी न्हडरी मुद्दा

6 एनीगदे न्हडरी खालैला स्थान्दो विश्वासी गिकदेन छ्याम छेबा बड्बा तजी भिसम तिगदा निसाफ लसी पिन्गो भिसी परमेश्वरला म्हि मुबा ग्लारी आनिना परमेश्वरदान विश्वास आलबा म्हिगदे मुबा ग्लारी निबा? 2 परमेश्वरला म्हिगदेसे जम्बुलिडला म्हिगदेला निसाफ लला भिबा ताम एनीगदेदा था आरे? चुह्ङ लसी एनीगदेसेन जम्बुलिडला म्हिगदेला मी निसाफ लला भिसम तिग जजाबा ताम चा ढिक्ना लबारी आखम? 3 व्हाडसे स्वर्गदूतगदेलाएनोन निसाफ लला भिबा ताम एनीगदेदा था आरे? थेह्ङ भिसम तिग चु धुडला तामगदे निसाफ लबारी गाहो मुला? 4 चुह्ङ लसी छेबा बड्बा तमा तिगदा एनीगदे मण्डलीसे मान आलबा स्थान्दो म्हिगदे मुबा ग्लारी निसी निसाफ लसी पिन्गो भिसी पाड्बा? 5 एनीगदेदा मी पे:बा खतो:बा। तिग हाडला ज्योज्यो आले नाना आडा छेबा बड्बा लमा निसाफ लखम्बा बुद्धि मुबा म्हि एनीगदे न्हडरी खालै आरे? 6 तर एनीगदे मी विश्वासीगदे न्हडरी गिकसेम गिकला बिरोध लसी परमेश्वरदा विश्वास आलबा म्हिगदेला डाच्छा निसाफ लसी पिन्गो भिसी अदालतरी निमुला।

7 एनीगदे हाड हाड न्हडरी गिकसेम गिकला बिरोध लसी मुद्दा लबासे लमा एनीगदे भे:सी जिन्बा मुला। बरु मुद्दा आलना जस्तोन तसे एनीगदेसे नासी चितो:मुबा। ओच्छे ठगब लसे एनीगदेसे नासी चितो:मुबा। 8 तर एनीगदेसे मी हाडलान विश्वासी ज्योज्यो आले नाना आडागदेदाएनोन दुख पिन्सी ठगब लबा मुला।

9 आज्यबा गे लबा म्हिगदे परमेश्वरला खुल्सारी निम्याड्बा हक आयाड् भिबा ताम एनीगदेदा था आरे? एनीगदेसे हाडसे हाडदान थोका थापिन्गो। ब्रेल्सी भ्रबा म्हिगदे, मूर्तिदा तेन्बागदे, स्थान्दोला मिडदेन छ्याम ब्रेल्सी भ्रबागदे, बेश्या मिडम्हेमे ह्ङबा ब्रेल्सी भ्रबा हेम्कोलागदे ओच्छे मिडकोला मिडकोलादेन छ्याम हेम्कोला हेम्कोलादेन छ्यामनोन ब्रेल्सी भ्रबागदे, 10 य्हो लबागदे, लोभ लबागदे, इय्होडसी भ्रबागदे, म्हिला तामगन लबागदेदेन स्थान्दोला ब्यन्सी चबागदेसे परमेश्वरला खुल्सारी निम्याड्बा हक आयाड्। 11 एनीगदे न्हडरी कोइ कोइ डाच्छा थेह्ङबान मुबा। तर दान्दे एनीगदेला पाप खुसी परमेश्वरसे चोखो म्हि स्होबा मुला। ओच्छे प्रभु येशू ख्रीष्टदेन व्हाडला परमेश्वरला आत्माग्याम एनीगदेदा हाडदा सेम निबा म्हि स्होबा मुला।

एनीगदेला ल्हुडग्याम परमेश्वरदा मान लउ

12 एनीगदे न्हडरी खालैसे “डाइ जे लसे ठीक मुला” भिसी पाड्मुला तला, तर जम्मान तामग्याम एनीगदेदा ज्यबा आत। डाइएनोन पाड्खम्सेला मुबा, “डाइ जे लसे तला,” तर डा खजिबै तामला नोकर आदो।

13 एनीगदे न्हडरी खालैसे “चबा स्हे फोला लागिरी ओच्छे फो चबा स्हेला लागिरी हिन्ना” भिसी पाड्मुला। थे ताम ठीकनोन हिन्ना, तर परमेश्वरसे थे न्हीदान नाश लला। म्हिला ल्हुड ब्रेल्सी भ्रबाला लागिरी आहिन, तर परमेश्वरदा तेन्बाला लागिरी हिन्ना, ओच्छे व्हाडला ल्हुड चा प्रभुलान हिन्ना। 14 ओच्छे परमेश्वरसे हाडलान शक्तिग्याम प्रभुदा सोना लजी, व्हाडदाएनोन थेलान शक्तिग्याम थेसेन सोना लला।

15 एनीगदेला ल्हुड ख्रीष्टला या काड ह्ङबान हिन्ना भिबा ताम एनीगदेदा था आरे? थेह्ङ भिसम तिग डाइ ख्रीष्टला छयादेन स्थापदा भोर्सी बेश्यादेन छ्याम ब्रेल्बारी तला? आत, चु तनोन आखम्बा ताम हिन्ना! 16 बेश्यादेन छ्याम ब्रेल्बा म्हि चा बेश्यादेन छ्याम ल्हुड गिक ह्ङबान तला भिबा ताम एनीगदेदा था आरे? तिगदा भिसम बचनरीनोन “थे न्ही ल्हुड गिक ह्ङबान तला” भिसी भ्रिबा मुला। §17 तर जुन म्हि प्रभुदेन छ्याम गिक तला, थे म्हि प्रभुदेन छ्याम आत्माारीनोन गिक तला।

18 थेतबासेलमा खाड्मै ब्रेल्सी थाभ्रउ। तिगदा भिसम अर्गु पापसे भन्दा ब्रेल्सी भ्रबा पापसे चा म्हिला हाडलान ल्हुडदा ल्हानान न्होड्ना लमुला।

19 एनीगदेला ल्हुड परमेश्वरला आत्माला मन्दिर हिन्ना। एनीगदेसे परमेश्वरग्याम याड्बा आत्मा एनीगदे न्हडरी धन्च्यामुला भिबा ताम

एनीगदेदा था आरे? थेतबासेलमा एनीगदेला ल्हुइ एनीगदेलान आहिन,
20 तिग्दा भिसम परमेश्वरसे एनीगदेदा सय फासी ग्लुबा हिन्ना। थेतबासेलमा
एनीगदेसे ह्राडला ल्हुइग्याम परमेश्वरदा मानदेन जयजयकार लउ।

ब्याह लबाला बारेरी पाड्बा

7 दाहेन्से एनीगदेसे भिबा तामगदेला बारेरी डाइ पाड्ला। म्हिसे ब्याह
आलबान ज्यबा हिन्ना।¹² तर ल्हानान ब्रेल्सी भ्रबासे लमा जम्मान
हेम्फेबेला ह्राड ह्राडलान मिड तगै, ओच्छे जम्मान मिडम्हेमेलाएनीन ह्राड
ह्राडलान हेम्बो तगै।³ हेम्बो ह्राडला मिडदेन छ्याम हेर्बा खलाबारी आत।
ओच्छे मिडएनीन ह्राडला हेम्बोदेन छ्याम हेर्बा खलाबारी आत।⁴ ओच्छे
मिडसे ह्राडला ल्हुइथोरी ह्राडसेन अधिकार लआम्याड्, तर हेम्बोला
अधिकार तला। थेह्इ लसीन हेम्बोसेनोन ह्राडला ल्हुइथोरी ह्राडसेन
अधिकार लआम्याड्, तर मिडसे अधिकार लला।⁵ मिड हेम्बो खाइमै
छ्यामनोन हेर्बा थाखलागो। सल्लाह लसी तिगै धिनना लागिरी प्रार्थना
लबाला लागिरी छ्यामनोन आहेसैनीनोन प्रार्थना लसी जिन्माहेन्से चा
छ्यामनोन हेर्गो। आहिन्सम एनीगदेसे सेम नाबारी आखम्बासे लमा
शैतानसे एनीगदेदा फसब लला।⁶ चुह्इ लसी लनोन तोःला भिसी डाइ
एनीगदेदा कुल्बा आहिन। तर एनीगदेसे लबारी तला भिसी जे पाड्बा
हिन्ना।⁷ हिन्बाम जम्मान म्हि डा ह्इ लसी ब्याह आलना चिगै भिसी डाइ
म्हन्बा मुला। तर जम्मान म्हिसे परमेश्वरग्याम थरी थरीला मोलम याड्बा
मुला, कोइसे ब्याह आलना चिबा मोलम याड्बा मुला ओच्छे कोइसे ब्याह
लसी चिबा मोलम याड्बा मुला।

⁸ दाहेन्से ब्याह आलबा म्हिगदेदेन हेम्बो सिबा मिडम्हेमेगदेला लागिरी डाइ
चु ताम पाड्बान मुला, थेनीगदे चा डा ह्इ लसीन ब्याह आलना चिबान
थेनीगदेला लागिरी ज्यबा हिन्ना।⁹ तर थेनीगदेसे ह्राडसे ह्राडदान तहरी
थान्बारी आखम्नी भिसम ब्याह लगै। तिग्दा भिसम सेम नाबारी आखम्ना
चिबा भन्दा बरु ब्याह लबा चा ज्यबा हिन्ना।

¹⁰ दाहेन्से डाइ ब्याह लबा म्हिगदेदा पाड्ला, मिडसे हेम्बोदा थाखलागो। चु
डाइ कुल्बा ताम आहिन, तर प्रभुसे कुल्बा ताम हिन्ना।¹¹ तर फेसी चिसैनीन
स्थान्दोदेन छ्याम ब्याह थालउ। स्थान्दोदेन छ्याम ब्याह लबा भन्दा मी बरु
दोःसी ह्राडला हेम्बोदेन छ्यामनोन दिक्सी चिउ। ओच्छे हेम्बोसेनोन ह्राडला
मिडदा खलाबारी आत।

¹² तर स्थान्दो जम्मादान † डाइ चुह्इ भिसी पाड्ला, चु ताम प्रभुसे
सुड्बा ताम आहिन। तर डाइनीन पाड्बा हिन्ना। चुदे प्रभुदा विश्वास लबा
खालै ज्योज्यो आलेला मिडसे ख्रीष्टदा विश्वास लबा आरे, तसैनीन थेसे
ह्राडला हेम्बोदेन छ्याम चिबा सेम लजी भिसम थे म्हिसे ह्राडला मिडदा
थाखलागै।¹³ चुह्इ लसीन खालै मिडम्हेमेला हेम्बोसे ख्रीष्टदा विश्वास
आलसैनीन थेसे ह्राडला मिडदेन छ्याम चिबा सेम लजी भिसम थेसे ह्राडला
हेम्बोदा थाखलागै।¹⁴ तिग्दा भिसम हेम्बोसे ख्रीष्टदा विश्वास आलसैनीन
मिडसे विश्वास लबासे लमा हेम्बो परमेश्वरला म्हि दोखम्ला। ओच्छे मिडसे
ख्रीष्टदा विश्वास आलसैनीन हेम्बोसे विश्वास लबासे लमा मिड परमेश्वरला
म्हि दोखम्ला। थेह्इ आतबा हिन्सम थेनीगदेला कोलागदे चोखो आतसेला
मुबा। तर थेह्इ तबासे लमा थेनीगदे मी परमेश्वरदा सेम निबा मुला।

¹⁵ तर ख्रीष्टदा विश्वास आलबा म्हिसे चा खलाबारी म्हाइसम खलापुड्गो।
जमाहेन्से मिड मुसै हेम्बो मुसै थेनी गिकसेम गिकला तहरी चिआतोः।
थेतबासेलमा थेन्नीदा खालैसेन कर लसी ग्ला गिकरी थाथान्गो। थेन्नी चा
फेसी चिबान ठीक मुला, तिग्दा भिसम परमेश्वरसे य्हाडदा छेबा बड्बा लसी
चिबारी आहिन, तर दिक्सी चिबाला लागिरी धम्बा हिन्ना।¹⁶ तिग ख्रीष्टदा
विश्वास लबा मिडम्हेमेसे विश्वास आलबा ह्राडला हेम्बोदा थार्ना लखम्ला
भिबा ताम एनीगदेदा था आरे? ओच्छे ख्रीष्टदा विश्वास लबा हेम्फेबेसे
विश्वास आलबा ह्राडला मिडदा थार्ना लखम्ला भिबा ताम एनीगदेदा था
आरे?

परमेश्वरसे म्हन्बा अन्धार भ्रउ

¹⁷ प्रभुसे एनीगदे जम्मादान खाह्इ लसी भ्रगै भिसी म्हन्बा मुला थेनोन
अन्धार भ्रउ। ओच्छे एनीगदेदा डाच्छा परमेश्वरसे धम्माहेन्से खाह्इ लसी
भ्रमुबा थेह्इ लसीन भ्रउ। डाइ पाड्बा चु ताम जम्मान मण्डलीगदेला लागिरी
हिन्ना।¹⁸ परमेश्वरसे धम्बा भन्दा डाच्छान खतना लसी जिन्बा मुसम थे
म्हिसे दोःसी खतना आलबा म्हि दोबारी थाम्हाइगो। ओच्छे खतना आलमान
परमेश्वरसे थेदा धम्जी भिसैनीन थेसे खतना थालउ।¹⁹ तिग्दा भिसम खतना
लसै आलसै तिगै आहिन। तर परमेश्वरसे कुल्बा ताम इयान्बा चा घ्रेन ताम
हिन्ना।²⁰ परमेश्वरसे थेनीगदेदा धम्बा धुइरी थेनीगदे खाह्इबा मुबा थेनोन
अन्धार लसी चिगै।²¹ परमेश्वरसे धम्बा धुइरी ए खालैला नोकर ‡ मुसैनीन
एसे धन्दा सुर्दा थालउ। तर ए थेग्याम थोन्म्याइसम थोन्गो।²² तिग्दा भिसम
जुन म्हि प्रभुसे धम्बा धुइरी नोकर मुबा थेदा दान्दे प्रभुसे थेग्याम फेबा मुला।
थेह्इ लसीन प्रभुसे धम्बा धुइरी जुन म्हि खालैला नोकर दोबा आरेबा थे
दान्दे ख्रीष्टला नोकर दोबा मुला।²³ परमेश्वरसे एनीगदेदा सय फासी ग्लुबा
हिन्ना। थेतबासेलमा एनीगदे म्हिला नोकर थादोगो।²⁴ ज्योज्यो आले नाना
आडागदे, परमेश्वरसे एनीगदेदा धम्बा धुइरी एनीगदे खाह्इबा मुबा थेनोन
अन्धार सदन परमेश्वरदेन छ्याम चिउ।

ब्याहला बारेरी इयोइबा तामगदे

²⁵ ब्याह आतबा म्हिगदेदा प्रभुसे कुल्बा ताम डादेन छ्याम तिगै आरे। तर
प्रभुला दया याड्सी विश्वास लखम्बा म्हि तबासे लमा डाइ एनीगदेदा चु
सल्लाह पिन्ना।²⁶ चु धुइला दुखदा म्हाइमाम एनीगदे खाह्इ लसी चिबा
मुला थेह्इ लसीन चिबा ज्यबा तला भिसी डाइ म्हन्बा मुला।²⁷ चुदे एसे
ब्याह लसी जिन्बा मुसम ह्राडला मिडदा खलाबारी थाम्हाइगो। ओच्छे ब्याह
लबा आरेसै ब्याह लबारी थाम्हाइगो।²⁸ तर ब्याह लजी भिसै पाप आहिन।
ब्याह आलबा मिडकोलासे ब्याह लजी भिदेमा थेसे पाप लबा आहिन। तर
ब्याह लबा म्हिगदेसे चु जम्बुलिडरी ल्हानान दुख नातोःला डाइ मी एनीगदेदा
चु दुखग्यामसे जे जोगब लबारी म्हाइबा हिन्ना।

²⁹ ज्योज्यो आले नाना आडागदे, डाइ पाड्बारी म्हाइबा ताम चा चुनोन
हिन्ना। दाहेन्से य्हाडला प्रभु फेखबा धुइ ल्हाना आरेबासे लमा मिड
मुबागदेसे मिड आरेबागदे ह्इ लसी चिउ।³⁰ क्राबागदे आक्राबा म्हिगदे ह्इ
लसी चिउ ओच्छे ताड्बागदे आताड्बा म्हिगदे ह्इ लसी चिउ। ओच्छे तिगै
ग्लुसी भबागदेसे ह्राडदेन छ्याम तिगै आरेबा ह्इ लसी चिउ।³¹ थेह्इ लसीन
जम्बुलिडला स्हे चलब लबा म्हिगदेसे थे स्हेगदेदा वास्तान आलबा ह्इ लसी
चिउ। तिग्दा भिसम चु जम्बुलिड म्हासी निबान मुला।

³² एनीगदे जम्मान धन्दा सुर्दा आलना चिगै भिसी डाइ म्हन्बा मुला। ब्याह
आलबा म्हिसे चा खाह्इ लसी प्रभुदा ताड्ना लखम्ला भिसी सेमहेन्सेन
प्रभुला लागिरी गे लमुला।³³ तर ब्याह लबा म्हिसे चा खाह्इ लसी ह्राडला
मिडदा ताड्ना लखम्ला भिसी जम्बुलिडला तामगदेरी धन्दा सुर्दा लमुला।
³⁴ थेह्इबा म्हिला सेम चा पट्टि न्ही तला। थेह्इ लसीन दोःसी ब्याह आलना
चिबा मिडम्हेमेदेन खाइमै ब्याह आलबा मिडकोलासे चा ह्राडला ल्हुइदेन
आत्मा परमेश्वरलान हिन्ना भिबा तामरी जे धन्दा सुर्दा लमुला। तर ब्याह
लबा मिडम्हेमेसे चा खाह्इ लसी ह्राडला हेम्बोदा ताड्ना लखम्ला भिसी
जम्बुलिडला तामरी धन्दा सुर्दा लमुला।

³⁵ डाइ चु ताम एनीगदेला लागिरी ज्यबा तगै भिसी पाड्बा हिन्ना।
एनीगदेसे चु लबारी तला, चु लबारी आत भिसी डाइ चु ताम एनीगदेला
लागिरी ठिम स्तोसी पिन्बा आहिन। तर एनीगदे प्रभुरी ज्यना लसी भ्रबारी
खम्मै ओच्छे जस्तोन दुख तसैनीन प्रभुदा तेन्बारी खम्मै।

³⁶ चुदे खालै म्हिसे ह्राडला सेम तहरी थान्बारी आखम्ना ह्राडसे ब्याह
लबारी ह्रीबा मिडकोलादेन छ्याम ब्रेल्बा सेम खजी भिसम थेदा ब्याह
लपुड्गो। चुह्इ लबा पाप आहिन।³⁷ थेह्इ लसीन जुन म्हिसे ब्याह लबारी
ह्रीसी जिन्बा मिडकोलादेन छ्याम खालैसे कर लसी आहिन, तर ह्राडलान
सेमसे ब्याह आल भिसी ह्राडसे ह्राडदान तहरी थान्मुला भिसम थे म्हिसेनीन

† ग्रीक बाइबलरी चा हेम्कोलासे मिडकोलादा आर्थुबान ज्यबा हिन्ना भिसी पाड्बा मुला।
‡ “स्थान्दो जम्मादान” भिबा चा येथूदा विश्वास लबा भन्दा डाच्छान ब्याह लबा म्हिगदेदा
पाड्बा हिन्ना।

‡ थे धुइला ‘नोकरसे चा’ गे लपुड्सीनीन तिगै आयाड्बा म्हि हिन्ना।

ज्यवान लबा हिन्ना।³⁸ थेतबासेलमा जुन म्हिसे ब्याह लला, थेसे ज्यवान लबा हिन्ना। तर जुन म्हिसे ब्याह आल, थेसे इन ज्यबा लबा हिन्ना।

³⁹ हेम्बो सोतेधोना प्रिड हेम्बोलान तहरी तला। तर हेम्बो सिमाहेन्से थेदा ब्याह लइ म्हन्जी भिसम थेसे स्थान्दोदेन छ्याम ब्याह लबारी खम्ला। थे म्हि चा प्रभुदा विश्वास लबा म्हि ततो:ला।⁴⁰ तर थे प्रिडम्हेमे ब्याह आलना चिजी भिसम थेला लागिरी इन ताडतो:बा ताम हिन्ना। चु डाइ म्हन्बा ताम जे हिन्ना, तसैनोन परमेश्वरला आत्मा डादेन छ्याम मुला भिसी डाइ म्हन्बा मुला।

मूर्तिदा फुल्बा स्हेगदे

8 दाहेन्से मूर्तिगदेदा फुल्बा स्हेला बारेरी डाइ पाइला। यहाड जम्मानदेन छ्याम ज्ञान बुद्धि मुला भिबा ताम यहाड जम्मान था मुला। थे ज्ञान बुद्धिसे चा यहाडदा घमण्डी स्होला। तर मायासे चा मण्डलीदा भइना लला।² चुदे खालै म्हिसे “डाइ जम्मान ताम सेबा मुला” भिसी म्हन्मुला भिसम थेसे जुन ताम सेतो:मुबा थे ताम चा सेबान आरे।³ तर जुन म्हिसे परमेश्वरदा माया लला परमेश्वरसे थेदा डोसेला।

⁴ थेतबासेलमा मूर्तिगदेदा फुल्बा चबा स्हेला बारेरी च्यागे। जम्बुलिडरी मुबा मूर्ति तिगै आहिन। ओच्छे परमेश्वर बाहेक स्थान्दो खालै आरे भिबा ताम यहाडदा थानोन मुला।⁵ मुदेन जम्बुलिडरी मिन जेला ल लु मुला तला। चुहइ लसी म्हिसे ल्हानान ल लुदेन प्रभुगदे तेन्सैनोन,⁶ यहाडला लागिरी चा परमेश्वर आबा गिक जे मुला, जम्मान स्हे थेसेन स्होबा हिन्ना। ओच्छे यहाड थेलान लागिरी सोबा हिन्ना। यहाडला लागिरी प्रभु गिक जे मुला थे चा येशू ख्रीष्ट हिन्ना। थेग्यामसेन जम्मान स्हे स्होबा हिन्ना। ओच्छे थेग्यामसेन यहाड सोबा मुला।

⁷ तर जम्मान म्हिदा चु ताम था आरे। ओच्छे एनीगदे न्हडला कोइ कोइ म्हिसे विश्वास लबा भन्दा डाच्छान मूर्तिदा पूजा लसी खबासे लमा दान्देधोनाएनोन थेहइबा चबा स्हे चमा चु चा मूर्तिदा फुल्बा स्हे हिन्ना भिसी म्हन्मुला। ओच्छे ज्यबा आज्यबा फेबारी खम्बा थेनीगदेला ज्ञान कमजोर तबासे लमा थेनीगदेसे “डाइ पाप लजी” भिसी म्हन्मुला।⁸ चबा स्हेसे यहाडदा परमेश्वरदा सेम निबा म्हि आस्हो। ओच्छे थेहइबा चबा स्हे चसैनोन यहाडदा न्होइना आल, आचसैनोन यहाडदा ज्यबा तना आल।

⁹ तर एनीगदे होशियार तउ, एनीगदेला लागिरी जम्मान स्हे चबारी तसैनोन विश्वासरी कमजोर मुबागदेसे पाप लआम्याङ्गै।¹⁰ चुदे कमजोर सेम मुबागदेसे एनीगदे सेबा घोबा म्हिगदेदा मूर्तिदा मन्दिररी चबा थुइबा लसी चिबा म्राड्जी भिसम, तिग थेनीगदेसे मूर्तिदा फुल्बा स्हेगदे चबा आँट आल?¹¹ एला ज्ञान बुद्धि अन्धारला गे लबासे लमा थे विश्वासरी कमजोर मुबा ज्योज्यो आले नाना आडागदे नाश तला। तर ख्रीष्ट थेनीगदेला लागिरीनोन सिसी जिन्बा मुला।¹² थेहइ लसी एनीगदेसे विश्वासरी कमजोर मुबा स्थान्दो विश्वासीगदेला सेम न्होइना लबा चा ख्रीष्टला बिरोधरी पाप लबा हिन्ना।¹³ चुदे डाइ चबा चबा स्हेसे लमा स्थान्दो विश्वासीगदे पापरी फसब तला भिसम डाइ खाइमै स्या आच। चुहइ लसी स्थान्दो विश्वासीगदेदा पापरी फसब लबा डाला सेम आहिन।

पावलएनोन अर्गु मुल चेलागदे हइबान हिन्ना

9 डा खजिबै स्हेला तहरी आरे। डा मुल चेला हिन्ना। डाइ यहाडला प्रभु येशूदा म्राइबा मुला। डाइ यहाडला प्रभुला लागिरी लबा गेग्यामसेन एनीगदेसे थेदा विश्वास लबा हिन्ना।² स्थान्दोगदेसे डादा मुल चेला आहिन भिसैनोन एनीगदेसे मी डादा मुल चेला हिन्ना भिसी म्हन्मुला। एनीगदेसे प्रभुदा लबा विश्वासग्यामसेन डा मुल चेला हिन्ना भिसी उन्मुला।

³ डाला अधिकारला बारेरी बिरोध लसी ताम पाइबा म्हिगदेदा डाइ चुनोन ताम पाइला,⁴ तिग एनीगदेग्यामसेन चबा थुइबा किन्बा डन्ना हक आरे?⁵ तिग स्थान्दो मुल चेलागदेदेन प्रभुला आलेगदे ओच्छे पत्रुससे हइ लसी डन्सेनोन छ्याम छ्यामनोन प्रभुदा विश्वास लबा प्रिड थोसी भ्रबा हक आरे?⁶ तिग बारनाबासदेन डाइ जे सोबाला लागिरी ह्राडसेन गे लतो:बा हिन्ना?

⁷ तिग सिपाहीसे सरकारग्याम चबा थुइबा आयाइ? याइला। तिग अडगुर सूबा म्हिसे अडगुर आच? चला। तिग म्है मुइ न्हबा म्हिसे इहे म्हुइ आथुइ? थुइला।⁸ चु ताम डाइ म्हिसे म्हन्बा ताम अन्धार जे पाइबा आहिन। तर परमेश्वरसे मोशादा पिन्बा ठिमरीनोन चुहइ भिसी भ्रिबा मुला।⁹ तिगदा भिसम परमेश्वरसे मोशादा पिन्बा ठिमरी “दाइ लबा ग्लापला सुडरी बोर थाक्वानो” भिसी भ्रिबा मुला। तिग परमेश्वरसे म्हैगदेला लागिरी वास्ता लबा हिन्ना?¹⁰ तिग परमेश्वरसे यहाडला लागिरीन चु ताम सुइबा आहिन? हिन्ना। यहाडला लागिरी चु ताम भ्रिबा हिन्ना। तिगदा भिसम मोइबा म्हिदेन दाइ लबा म्हिसे ह्राडला भो याइला भिबा आशसेन गे लमुला।¹¹ डन्से एनीगदेदा थार्बा पिन्बा समाचार थे:ना लबा चा ब्लु दवबा हइबान हिन्ना भिसम एनीगदेग्याम डन्से बाली दुइबा हइ लसी तिगै स्हे किन्ना उदेक म्हन्तो:ला?¹² चुदे स्थान्दो म्हिगदेसे एनीगदेग्याम तिगै स्हे याइबा हक मुला भिसम इन डन्ना मी घेन हक मुला। तर डन्से थे हक अन्धार आकिन्नी। बरु ख्रीष्टला थार्बा पिन्बा समाचार थे:ना लमा स्थान्दो म्हिदा विश्वास लबारी गाहो थातगै भिसी जम्मान ताम नासी चिजी।¹³ तिग परमेश्वरला मन्दिररी गे लबा म्हिसे मन्दिरग्यामसेन चबा स्हे चला भिबादेन बलि फुल्बा ग्लारी गे लबा म्हिसे बलि फुल्बा स्हेग्यामसेन भो किन्ना भिबा ताम एनीगदेदा था आरे?¹⁴ चुहइ लसीन थार्बा पिन्बा समाचार पाइबा म्हिगदेसेनोन थे गेग्यामसेन चबा थुइबा लउ भिसी प्रभुसे कुल्बा मुला।

¹⁵ तर डाइ याइतो:बा हक एनीगदेग्याम तिगै म्हाइबा आरे। दान्देनोन एनीगदेसे थे जम्मान ताम ढिक्का लगै भिसीएनोन डाइ चु ताम भ्रिबा आहिन। चुहइ लसी डा ताइसी ताइसी थार्बा पिन्बा समाचार थे:ना लबा डाला गेदा खालै म्हिसे गे आखेल्बा स्होजी भिसम बरु डा सिबान ज्यबा तला।¹⁶ डाइ थार्बा पिन्बा समाचार थे:ना लमा डाइ घमण्ड लतो:बा ताम आरे। तिगदा भिसम चु डाइ थे:ना लतो:बान समाचार हिन्ना। चुदे डाइ थार्बा पिन्बा समाचार थे:ना आलनी भिसम डाला लागिरी चु भन्दा दुखला ताम अर्गु तिगै आरे।¹⁷ तिगदा भिसम चु गे डाइ म्हन्बा अन्धार लजी भिसम डाइ इनाम याइला। तर चु गे डाइ म्हन्बा अन्धार आल। परमेश्वरसेन डादा चु गे लउ भिसी जिम्मा पिन्बासे लमान चु गे लबा हिन्ना।¹⁸ थेहइ भिसम डाइ याइबा इनाम चा तिग हिन्ना? थे इनाम चा डाइ याइबा हक अन्धार तिगै स्हे आकिन्ना थार्बा पिन्बा समाचार थे:ना लबा चा डाइ याइबा इनाम हिन्ना।

¹⁹ डा खालै म्हिला नोकर आहिन। तसैनोन ल्हानान म्हिगदेदा डाइ ख्रीष्ट मुबा ग्लारी भबारी खमै भिसी डा जम्मान म्हिला नोकर दोजी।²⁰ यहूदीगदेसे ख्रीष्टदा विश्वास लगै भिसी डा यहूदीगदे हइबान दोसी भ्रजी। ओच्छे परमेश्वरसे मोशादा पिन्बा ठिमला तहरी भ्रबा म्हिगदेसे ख्रीष्टदा विश्वास लगै भिसी डाएनोन थे ठिमला तहरी चिजी।²¹ ओच्छे थे ठिम अन्धार आभ्रबा अर्गु यहुलला म्हिगदेसेनोन ख्रीष्टदा विश्वास लगै भिसी डाएनोन थेनीगदे हइबान दोसी भ्रजी। चु भिबा चा डाइ परमेश्वरला ठिमदा खलाजी भिसी पाइबा आहिन, तर डा ख्रीष्टला ठिम अन्धार भ्रबा मुला।²² ओच्छे विश्वासरी पाको आरेबा म्हिगदे विश्वासरी पाको तगै भिसी डाएनोन थेनीगदे हइबान तसी भ्रजी। चुहइ लसी जम्मान म्हिसे ख्रीष्टग्याम थार्बा याइगै भिसी जम्मान म्हिगदेला लागिरी डा जम्मान थरीला म्हि दोसी भ्रजी।²³ चु थार्बा पिन्बा समाचारग्याम मोलम याइला भिबा आश लसीन डाइ थार्बा पिन्बा समाचारला लागिरी चु जम्मान गे लबा हिन्ना।

²⁴ इनाम याइला भिसी छयोइबा म्हिगदे न्हडरी गिकसे जे इनाम याइला भिबा ताम एनीगदेदा था आरे? थेतबासेलमा एनीगदेएनोन इनाम याइबालान लागिरी छयोङ्गो।²⁵ तिगै खेलरी भो किन्बा म्हिसे जम्मान थरीला तालिम किन्तो:ला। थेनीगदेसे म्हासी निबा इनाम याइबाला लागिरी थेहइ लमुला। तर यहाडसे चा खाइमै आम्हबा इनाम याइबाला लागिरी थेहइ लबा मुला।²⁶ थेतबासेलमा डा ह्राड धोतो:बा ग्लारी आधोतेधोना छयोइबारी आखला। थेहइ लसी म्हाडदुडरी छेक्का म्हिसे हइ लसी † डाइ आछेक।²⁷ तर डाइ डाला ल्हुइदा दुख पिन्सी तहरी थान्ना। थेहइ आलनी भिसम स्थान्दो म्हिदा थार्बा पिन्बा समाचार थे:ना लना लनान डाइ याइतो:बा इनाम आयाइ।

† चु चा बक्सीड क्लाइबा खेल हइबान म्हन्सी म्हाडदुडरीन म्हिदा आछेक भिसी घोना लबा हिन्ना। तिगदा भिसम कोरिन्थरी दिडएदडसेन खेल क्लाइमुबा।

इसाएलीगदेसे हड लसी मूर्तिदा थातेनो

10 ज्योज्यो आले नाना आडागदे, एनीगदेसे चु ताम था याङ्गै भिसी डाइ म्हन्बा मुला। यहाडला आखे म्हमेगदेदा मिश्र खुल्साय्याम खसुसे ग्याम उन्सी भोजी। ओच्छे थेनीगदे जम्मान ज्यना लसी समुन्द्र गुडग्याम निखम्जी।² ओच्छे थेनीगदे जम्मान मोशाला लिच्छा भ्रसी खसुदेन समुन्दरी बत्तिस्मा याङ्गी।³ थेनीगदे जम्मानसेन परमेश्वरला आत्मासे पिन्बा चबा रहे चजी।⁴ ओच्छे थेनीगदेदेन छ्याम छ्यामनोन मुबा पहराग्याम परमेश्वरला आत्मासे पिन्बा क्युड थेनीगदे जम्मानसेन थुङ्गी। थे पहरा ख्रीष्टनोन मुबा।⁵ तसैनोन थेनीगदे न्हडला ल्हानान हड्बा म्हिगदेदेन छ्याम परमेश्वर आताङ्नी। ओच्छे थेनीगदे थे तोडतोडबा ग्लारीन सिजी।⁶ थेनीगदेसे हड्बानेन यहाडसेनोन आज्यबा सेम थाथोगै भिसीन यहाडदा घोना लबाला लागिरी चु ताम तबा हिन्ना।⁷ थेनीगदे न्हडला कोड कोडसे मूर्तिदा तेन्बा हड लसी एनीगदेसे थातेनो। थेनीगदेला बारेरी बचनरीनोन चुहड् भिसी भ्रिबा मुला, “म्हिगदेसे चबा थुङ्बा लबारी चिजी ओच्छे रेःसी मोजमजा लजी।”⁸ थेनीगदे न्हडला कोड कोड म्हिगदे ब्रेल्सी भ्रबा हड लसी यहाड ब्रेल्सी भ्रबारी आत। थेनीगदेसे थेहड्बा आज्यबा गे लबासे लमान तरेरीन बोगल गिकसे हजार सोम म्हि सिजी।⁹ थेनीगदे न्हडला कोड कोड म्हिगदेसे प्रभुला¹⁰ सेम च्याबा हड लसी यहाडसे थेला सेम च्याबारी आत। प्रभुला सेम च्याबासे लमा थेनीगदे पुरखीसे जीसी सिजी।¹¹ थेनीगदे न्हडला कोड कोडसे गनगन लबा हड लसी यहाडसे गनगन लबारी आत। गनगन लबासे लमा थेनीगदेदा नाश लबा दूतसे नाश लजी।¹² थे तामगदे यहाडदा घोना लबाला लागिरी थेनीगदेदा तबा मुबा। थे तामगदे जिन्बारी छ्याइबा धुइरी यहाडदा होशियार तना लबाला लागिरी भ्रिबा हिन्ना।¹³ थेतबासेलमा जुन म्हिसे डा ठीक मुला भिसी म्हन्ना, थे म्हि चा होशियार तसी चिगै। आहिन्सम थे म्हि हिल्ला।¹⁴ एनीगदेदा लोभ उन्सी फसब लमा स्थान्दो म्हिगदेदा लोभरी फसब लबा हड्बान तला। तर परमेश्वर विश्वास लखम्बा परमेश्वर हिन्ना, तिगदा भिसम परमेश्वरसे एनीगदेला सेमसेन नाआखम्बाधोनाला लोभ उन्सी फसब लबारी आपिन। एनीगदेदा फसब लबारी लोभ उन्मा थेग्याम फेबारी परमेश्वरसेन एनीगदेदा ग्याम उन्सी पिन्ना।¹⁵ थेतबासेलमा डाला सेम निबा ह्योगदे, एनीगदेसे मूर्ति थातेनो।¹⁶ सेबा घोबा म्हि म्हन्सी डाइ एनीगदेदा पाड्बान मुला। डाइ पाड्बा चु ताम सत्य हिन्ना कि आहिन, एनीगदेसेन पक्का लउ।¹⁷ प्रभु भोजला खोरे थोसी यहाडसे परमेश्वरदा धन्यवाद पिन्सी थुङ्गा यहाड ख्रीष्टला कारी गिक तबा हिन्ना। ओच्छे गेड क्युडसी चमा यहाड ख्रीष्टला लहुइरी गिक तबा हिन्ना।¹⁸ गेड गिकनोन हिन्ना, थेतबासेलमा यहाड ल्हानान मुसैनोन लहुइ चा गिकनोन हिन्ना। तिगदा भिसम यहाड जम्मानसेन गेड गिकग्यामसेन चबा मुला।¹⁹ इसाएलीगदेदा च्यागो, परमेश्वरदा फुल्बा रहे चबागदे परमेश्वरदा बलि फुल्बा ग्लादेन छ्याम गिक तबा मुला।²⁰ डाइ पाड्बारी म्हाइबा तिग हिन्ना भिसम, मूर्तिदा फुल्बा रहे तिगै आहिन, ओच्छे मूर्तिएनोन तिगैनोन आहिन।²¹ तर मूर्तिदा बलि फुल्बा अर्गु खुलला म्हिगदेसे परमेश्वरदा फुल्बा आहिन, म्हड म्हुडदा हिन्ना। थेतबासेलमा एनीगदे म्हड म्हुडदेन गिक थातगै भिबा डाला सेम मुला।²² एनीगदेसे प्रभुदेन म्हड म्हुड न्हीलान खोरेग्याम थुङ्बारी आखम। ओच्छे प्रभुदेन म्हड म्हुड न्हीलान टेबुलरी चिसीनोन चबारी आखम।²³ थेहड् लजी भिसम प्रभुदा डाह तला। तिग एनीगदेसे यहाड प्रभु भन्दा भड्बा हिन्ना भिसी म्हन्बा? §†

एनीगदेसे जे लसै परमेश्वरदा मान तबा गे लउ

²³ जम्मान ताम लम्याङ्मुला, तर जम्मान ताम यहाडला लागिरी ज्यबा आरे। जम्मान ताम लम्याङ्मुला, तर जम्मान तामसे स्थान्दोगदेदा ज्यबा तना आल।²⁴ एनीगदे खालैसेन ह्याडसे ह्याडदा ज्यबा लबारी थाम्हाङ्गो। तर ह्याडला खिम्जेमदा ज्यबा लबारी म्हाङ्गो।²⁵ एनीगदेला सेम आन्होङ्बाला लागिरी स्या पसलरी निसी खानङ्ग्याम भबा हिन्ना भिसी ड्योइबा छार्बा आलना भसी चउ।²⁶ तिगदा भिसम परमेश्वरला बचनरी चुहड् लसी भ्रिबा मुला, “जम्बुलिङ्गदेन जम्बुलिङ्गरी मुबा जम्मान रहे प्रभुलान हिन्ना।”²⁷ ख्रीष्टदा विश्वास आलबा खालै म्हिसे एनीगदेदा चबारी ड्योइमा एनीगदेदा निबा सेम खजी भिसम ह्याडला सेम आन्होङ्बाला लागिरी एनीगदेसे तिगै ड्योइबा छार्बा आलना थेरी चबारी पिन्बा जम्मान रहे चउ।²⁸ तर खालै म्हिसे एदा “चु मी बलि फुल्बा रहे हिन्ना” भिजी भिसम थेहड् पाड्बा म्हिदेन थेला सेमला लागिरी एसे थे चबा रहे थाचउ।²⁹ डाइ एला लागिरी पाड्बा आहिन, तर एदा थे ताम था याङ्गना लसी पिन्बा म्हिला सेमला लागिरी पाड्बा हिन्ना। डाइ जे लसै तबा तामरी तिगदा स्थान्दोला सेमसे निसाफ लपुङ्से? ³⁰ चुदे डाइ परमेश्वरदा धन्यवाद पिन्सी चबान मुला भिसम धन्यवाद पिन्सी चबा रहेला लागिरी स्थान्दोसे तिगदा डादा बिरोध लबा?³¹ थेतबासेलमा एनीगदेसे चसै, थुङ्सै, जे लसैनोन परमेश्वरदा मानदेन जयजयकार पिन्बाला लागिरी एनीगदेसे जम्मान गे लउ।³² एनीगदेसे यहूदीदा तसै, अर्गु खुलला म्हिदा तसै, परमेश्वरला मण्डली तसै खालैदान न्होङ्ना लबा गे थालउ।³³ जम्मान गेग्याम डाइ जम्मान म्हिदा ताङ्ना लबारी म्हाइबा मुला। डाइ खाइमै ह्याडदा ज्यबा तगै भिसी खजिबै गे लबारी आम्हाइनी। तर थेनीगदेसे थार्बा याङ्गै भिसी डाइ ल्हानान म्हिगदेला लागिरी ज्यबा गे लबारी म्हाइबा मुला।
11 डाइ ख्रीष्टसे लबा हड्बान लसी भ्रबा मुला, एनीगदेएनोन डाइ लबा हड्बान लसी भ्रउ। §§†

प्रिङ्म्हेमेसे थोबो घप्तोःबा

² डा एनीगदेदेन छ्याम ल्हानान ताङ्बा मुला। तिगदा भिसम एनीगदेसे डादा सदन ढन्बा मुला, ओच्छे डाइ लोप्बा अन्छार एनीगदे भ्रबा मुला।³ तर एनीगदेसे चु ताम घोतोःला भिसी डाइ म्हन्बा मुला। ख्रीष्ट चा जम्मान हेम्फेबेला थोबो §§§ हिन्ना ओच्छे हेम्बो चा प्रिङ्गला थोबो हिन्ना। थेहड् लसीन परमेश्वर चा ख्रीष्टला थोबो हिन्ना।⁴ थोबो घप्पी प्रार्थना लबादेन अगमवाणी पाड्बा हेम्फेबेसे ह्याडलान थोबोला बेङ्जजत लबा हिन्ना।⁵ तर थोबो आघज्ना प्रार्थना लबादेन अगमवाणी पाड्बा प्रिङ्ग्हेमेसे चा ह्याडला हेम्बोला बेङ्जजत लबा हिन्ना। थेहड्बा प्रिङ्ग्हेमेसे चा क्रा भ्रसी भ्रबा प्रिङ्ग्हेमेसे हड्बान हिन्ना।⁶ खालै प्रिङ्ग्हेमेसे ह्याडला थोबो आघज्नी भिसम थेसे क्रा भ्रसी भ्रगै। तर क्रा थाबादेन भ्रेबा चा प्रिङ्ग्हेमेला लागिरी पेःबा खबा ताम तबासे लमा थेसे थोबो घप्तोःला।⁷ परमेश्वरसे ह्याडदा उन्बाला लागिरी हेम्फेबेदा ह्याड हड्बान स्होजी। थेतबासेलमा हेम्फेबेसे थोबो घप्बारी आत। तिगदा भिसम हेम्फेबेला गे चा परमेश्वरदा मान लबा हिन्ना। तर प्रिङ्ग्हेमेला गे चा हेम्फेबेदा मान लबा हिन्ना।⁸ तिगदा भिसम जम्मान भन्दा डाच्छा हेम्फेबे प्रिङ्ग्हेमेग्याम स्होबा आहिन, तर प्रिङ्ग्हेमेसे चा हेम्फेबेग्याम स्होबा हिन्ना।⁹ थेहड् लसीन प्रिङ्ग्हेमेला लागिरी हेम्फेबे स्होबा आहिन, तर हेम्फेबेला लागिरी प्रिङ्ग्हेमेसे स्होबा हिन्ना।¹⁰ ओच्छे स्वर्गदूतगदेसे ग्राड्बासे लमा प्रिङ्ग्हेमेसे ह्याडला हेम्बोला तहरी चिबा मुला भिबा ताम उन्बाला लागिरी थोबो घप्तोःला।

¹¹ तसैनोन प्रभुला म्हिगदेला गुडरी प्रिङ्ग् हेम्बोला तहरी चितोःला ओच्छे हेम्बोएनोन प्रिङ्गला तहरी चितोःला।¹² तिगदा भिसम हेम्फेबेग्याम प्रिङ्ग्हेमेसे §§ 10:23 १ कोर ६:१२ §§† 10:26 भजन २४:१ §§§ 11:1 १ कोर ४:१६ §§§ “थोबो” भिबा चा मुली भिबा हिन्ना। 18 थे धुइरी जम्मानसेन डोसेगै भिसी बेश्या प्रिङ्ग्हेमेगदेला क्रा भ्रसी पिन्मुबा। 19 11:7 उत्प १:२६-२७ 20 11:8 उत्प २:२१-२२ 21 11:9 उत्प २:२३

† 10:3 प्रस्था १६:३५ †† 10:4 प्रस्था १७:६; गन्ती २०:११ † 10:5 गन्ती १४:२९-३० †† 10:7 प्रस्था ३२:६ †† 10:8 गन्ती २५:१-१८ ††† चु पदरी प्रभुला साटोरी ख्रीष्ट भिसी कोड कोड बाइबलरी भ्रिबा मुला। ††† 10:9 गन्ती २१:५-६ § 10:10 गन्ती १६:४१-४९ §† 10:16 मन्ती २६:२६-२८; मर्कू १४:२२-२४; लुका २२:१९-२० §†† 10:18 लेवी ७:६ §† 10:20 व्यव ३२:१७ §†† चु पद अन्छार विश्वासीगदेसे प्रभुला भोज चमाहेन्से विश्वास आलबा म्हिदेन चबारी मूर्तिगदेला मन्दिररी निबारी आत। §† 10:22 व्यव ३२:२१

सहोजी। थेहड लसीन हेम्फेबे म्रिडम्हेमेग्याम न्हला। ओच्छे जम्मान ताम चा परमेश्वरग्यामसेन तबा हिन्ना।¹³ चु ताम एनीगदेसेन पक्का लउ, तिग म्रिडम्हेमेसे थोबो आघणा परमेश्वरदेन छ्याम प्रार्थना लमा जेला? ¹⁴ थेहड लसीन हेम्फेबेसे क्रा न्हजी भिसम थेला लागिरी पे:बा खबा ताम हिन्ना भिसी तिग एनीगदेसे डाच्छाहेन्सेन तसी खबा तामग्याम था याड्बा आरे? ¹⁵ तर चुदे म्रिडम्हेमेला क्रा हेड्बा मुसम थेला लागिरी ताड्बा ताम हिन्ना। तिगदा भिसम थेला थोबो घप्बाला लागिरीन थेदा हेड्बा क्रा पिन्बा हिन्ना। ¹⁶ तर चु तामदा खालैसे बिरोध लबारी म्हाड्जी भिसम म्हाड्देन परमेश्वरला मण्डलीदेन छ्याम चु बाहेक अर्गु खजिबै ठिम आरे।

प्रभु भोज

मत्ती २६:२६-२९; मर्कूस १४:२२-२५; लूका २२:१४-२०

¹⁷ दाहेन्से डाइ एनीगदेदा चु तामगदेला बारेरी पाड्मा एनीगदेसे ज्यबा लजी भिसी डाइ पाड्बारी आखम। तिगदा भिसम एनीगदे हुप तबा धुडरी ज्यबा ताम भन्दा ल्हानान आज्यबा ताम लबा मुला। ¹⁸ डाच्छा एनीगदे मण्डलीरी हुप तबा धुडरी हाड हाड न्हडरी आढिकमुला भिबा ताम डाइ थे:बा मुला। चु ताम हिन्ना तला भिसी डाइ विश्वास लबा मुला। ¹⁹ खाल ठीक मुला, खाल ठीक आरे भिसी डोसेबाला लागिरी एनीगदेला गुडरी आढिकबा तामगदेएनोन खतो:ला।

²⁰ एनीगदे ग्ला गिकरी पोप तसी चबा थुड्बा लबा चा प्रभु भोज आहिन। ²¹ तिगदा भिसम चबा थुड्बा धुडरी जम्मासेन खालैसे खालैदा आभ्रान्ना हाड हाडला भो चला। ओच्छे कोड फोडथान तला, कोड चा थुड्सी ड्होडला। ²² एनीगदेसे हाड हाडलान दिमरी चसै आत? तिग एनीगदेसे परमेश्वरला मण्डलीदा गे आखेल्बा भिसी म्हन्बा? ओच्छे तिगै आरेबा म्हिगदेदा पे:ना लबारी म्हाड्बा? दाहेन्से डाइ एनीगदेदा तिग पाड्से? तिग एनीगदेसे चुहड् लबा ज्यबा हिन्ना भिसी पाड्से? अहँ, डाइ आपाड्।

²³ तिगदा भिसम डाइ जुन ताम प्रभुग्याम लोप्बा मुला थे ताम डाइ एनीगदेदा पाड्बारी छ्याड्बा मुला। प्रभु येथूदा चुड्बाकुनु म्हुनड थेसे गेड थोजी। ²⁴ ओच्छे परमेश्वरदा धन्यवाद पिन्सी थे गेड क्युड्जी। जमाहेन्से “चु एनीगदेला लागिरी डाला ल्हुड हिन्ना। डादा ढन्सी चिबाला लागिरी एनीगदेसे चुहड्नीन लउ” भिसी सुड्जी। ²⁵ थेहड लसीन भोज चसी जिन्माहेन्से प्रभुसे खोरे थोसी, “चु खोरेला निडगु एनीगदेला लागिरी डाला काग्याम स्होबा छार कबुल हिन्ना। जुन जुन धुडरी एनीगदेसे चु थुड्ला थे, थे धुडरी डादा ढन्बाला लागिरी सदन चुहड् लउ” भिसी सुड्जी। ²⁶ चुहड् लसी गेड चबादेन अडगुरला निडगु थुड्बा धुडरी प्रभु आफेप्खतेधोना प्रभु म्हाड्ला लागिरी सिजी भिसी एनीगदेसे जम्मादान थे:ना लमुला।

²⁷ थेतबासेलमा जुन म्हिसे तिगै ताम वास्ता आलना प्रभुला गेड चबादेन प्रभुला खोरेग्याम थुड्ला थेसे प्रभुला ल्हुड्देन कादा बेड्जजत लबासे लमा पापला दोष तला। ²⁸ जम्मान म्हिसे डाच्छा हाडसे हाडदान ठीक मुला कि आरे भिसी च्यासी जे थे गेड चउ, ओच्छे खोरेग्याम थुड्जो। ²⁹ तिगदा भिसम जुन म्हिसे प्रभुला ल्हुड्ला बारेरी आघोना चबा थुड्बा लला, थेसे थेहड लसी चबा थुड्बा लबासे लमा सजाय याड्ला। ³⁰ थेतबासेलमा एनीगदे न्हडरी ल्हानान कमजोरदेन आखम्बा मुला, ओच्छे कोड कोड मी सिसी जिन्जी। ³¹ तर म्हाड्से हाडसे हाडदान ठीक मुला कि आरे भिसी च्याजी भिसम म्हाड्से सजाय नाआतो:। ³² तर निसाफ लबा धुडरी जम्बुलिडला दोष स्याप्बा हड् लसी एनीगदेला दोष थास्याणै भिसी म्हाड्दा प्रभुसे हाडला तहरी थान्ना।

³³ थेतबासेलमा ज्योज्यो आले नाना आडागदे, प्रभु भोज चबारी ग्ला गिकरी पोप तबा धुडरी गिकसेम गिकदा भ्रान्गो। ³⁴ खालै फोखेन्बा मुसम थेसे दिमरीन चगै, ओच्छे प्रभु भोज चबा धुडरी एनीगदे खालैसेन परमेश्वरग्याम सजाय थायाड्गै। अर्गु तामला बारेरी डा खसीन पाड्ला।

परमेश्वरला आत्मासे पिन्बा मोलम

12 ज्योज्यो आले नाना आडागदे, परमेश्वरला आत्मासे पिन्बा मोलमला बारेरी एनीगदेसे था याड्गै भिसी डाइ म्हन्बा मुला। ² एनीगदेसे ख्रीष्टदा विश्वास लबा भन्दा डाच्छा तिगै स्हेसे एनीगदेदा उन्बा आज्यबा ग्यामरी भ्रसी तामनोन पाड्आखम्बा मूर्तिगदेदा तेन्जी भिबा ताम एनीगदेदा थानोन मुला। ³ परमेश्वरला आत्मासे कुल्बा अन्धार भ्रबा म्हिगदे खालैसेन “येथू गे आखेल्बा हिन्ना” भिसी आपाड्। ओच्छे परमेश्वरला आत्मासे ह्यो आलतेधोना खालैसेन “येथून प्रभु हिन्ना” भिसी पाड्बारी आखम भिबा ताम एनीगदेसे था याड्गै भिसी डाइ म्हन्बा मुला। ⁴ परमेश्वरसे पिन्बा मोलम ल्हानान थरीला मुला, तर मोलम पिन्बा परमेश्वरला आत्मा चा गिक जे हिन्ना। ⁵ तेन्बाला लागिरी ल्हानान थरीला तामगदे मुला, तर प्रभु चा गिक जे मुला। ⁶ ओच्छे गेगदे ल्हानान थरीला मुला, तर जम्मान म्हिदा गे लखम्बा शक्ति पिन्बा चा थेनोन परमेश्वर जे हिन्ना।

⁷ जम्मान विश्वासीदा ह्यो लबाला लागिरी परमेश्वरला आत्मासे म्हाड् जम्मादान मोलम पिन्बा मुला। ⁸ परमेश्वरला आत्मासेन कोडदा बुड्दिला ताम पाड्बारी, थेनोन परमेश्वरला आत्मासे कोडदा ज्ञानना ताम पाड्बारी मोलम पिन्बा मुला। ⁹ थेनोन परमेश्वरला आत्मासे कोडदा विश्वास लखम्बा, कोडदा आखम्बा म्हिगदेदा खम्ना लबा मोलमगदे पिन्बा मुला। ¹⁰ ओच्छे कोडदा उदेकला गे लखम्बा, कोडदा अगमवाणी पाड्बा, कोडदा ज्यबा आज्यबा आत्मा फेरखम्बा, कोडदा थरी थरीला ग्योड पाड्बा, कोडदा चा थेनोन थरी थरीला ग्योड जम्मादान घोना लखम्बा मोलमगदे पिन्बा मुला। ¹¹ तर परमेश्वरला आत्मा गिकनोन हिन्ना ओच्छे चु जम्मान गेगदे थे आत्मालान हिन्ना। ओच्छे चु मोलम परमेश्वर म्हाड्सेन म्हन्बा अन्धार गिक गिकदा पिन्ना।

ल्हुड गिकरी ल्हानान स्हे मुला

¹² म्हाड्ला ल्हुडरी ल्हानान स्हे मुला। ल्हानान स्हेगदे मुसैनोन ल्हुड चा गिक जे हिन्ना, ख्रीष्टला ल्हुड्एनोन थेहड्बान हिन्ना। ¹³ म्हाड् यहुदी हिन्सै, अर्गु यहुलला म्हि हिन्सै, नोकर हिन्सै आहिन्सै म्हाड्से गिकनोन परमेश्वरला आत्माग्याम ल्हुड गिकरीन बत्तिस्मा किन्बा मुला। ओच्छे म्हाड् जम्मासेन परमेश्वरला आत्मा गिकनोन याड्बा मुला। ¹⁴

¹⁴ तिगदा भिसम ल्हुड्ला स्हे गिकग्यामसे जे म्हेला ल्हुड स्होबा आहिन, तर ल्हुडला ल्हानान स्हेगदे ढिक्सी म्हेला ल्हुड स्होबा हिन्ना। ¹⁵ चुदे काड्से “डा या आहिन, थेतबासेलमा डा ल्हुडरी मुबा स्हे आहिन” भिजी भिदेमा थे ल्हुडला स्हे आहिन? हिन्ना। ¹⁶ ओच्छे नाब्यड्से “डा मी आहिन, थेतबासेलमा डा ल्हुडला स्हे आहिन” भिजी भिदेमा थे ल्हुडला स्हे आहिन? हिन्ना। ¹⁷ चुदे ल्हुडरी जम्मान मीनोन मी जे मुबा हिन्सम तिगसे थे:बा? ओच्छे ल्हुडरी जम्मान नाब्यड् जे मुबा हिन्सम तिगसे थाड् नाबा? ¹⁸ तर परमेश्वरसे म्हाड्से म्हन्बा अन्धार म्हाड्ला ल्हुडरी जम्मान स्हे ढिक्ना लसी थान्बा मुला। ¹⁹ चुदे थे जम्मान स्हे गिक जे मुबा हिन्सम ल्हुड्नीन आदोसेला मुबा। ²⁰ तर ल्हुडरी ल्हानान स्हेगदे मुसैनोन ल्हुड चा गिक जे हिन्ना।

²¹ मीसे यादा “ए डादा आतो:” भिसी पाड्आखम, ओच्छे थोबोसेनोन काड्दा “एनीगदे डादा आतो:” भिसी पाड्आखम। ²² बरु ल्हुडरी मुबा कमजोर स्हेगदे झन आरेना आतमुला। ²³ म्हाड्से जजा म्हन्बा ल्हुडला थे स्हेगदेदा झन ज्यना लसी थान्मुला। ओच्छे उन्बारी आखम्बा स्हेगदेदा झन जोगब लसी थान्मुला। ²⁴ तर म्हाड्से उन्बारी खम्बा स्हेगदेदा चा थेहड् लसी जोगब लसी थान्आतो:। बरु ल्हुडला कमजोर स्हेगदेदा चा मान लगै भिसी परमेश्वरसे ढिक्ना लसी थान्जी। ²⁵ ल्हुडरी मुबा जम्मान स्हेगदे ढिक्सी गिकसेम गिकला वास्ता लगै भिसीन हिन्ना। ²⁶ चुदे ल्हुडला स्हे गिकदा दुख

†† 12:3 रोमी १२:६ † 12:4 रोमी १२:६ †† 12:12 रोमी १२:४-६ ††

“परमेश्वरला आत्मा गिकनोन याड्बा मुला” भिबादा ग्रीक बाइबलरी आत्मा गिकनोन थुड्बारी पिन्बा मुला भिसी भिबा मुला।

तजी भिसम ल्हुइला जम्मान स्हेदा दुख तला। ओच्छे ल्हुइला स्हे गिकसे मान याइजी भिसम ल्हुइला जम्मान स्हेगदे ताइला।

27 एनीगदे जम्मान ख्रीष्टला ल्हुइ हिन्ना, ओच्छे एनीगदे गिक गिक ख्रीष्टला ल्हुइला स्हेगदे हिन्ना। 28 परमेश्वरसेन मण्डलीरी जम्मान भन्दा डाच्छा मुल चलागदे, जमाहेन्से अगमवक्तागदे, जमाहेन्से स्थान्दोदा लोष्वा म्हिगदे, ओच्छे उदेकला गे लबा म्हिगदे, आखम्बा म्हिदा खम्ना लबा मोलम याइबा म्हिगदे, स्थान्दोदा ह्यो लबा म्हिगदे, जम्मान ताम दिक्ना लबा म्हिगदे, ओच्छे थरी थरीला ग्योइ पाइबा म्हिगदेदा धम्सी थान्बा मुला। †

29 तिग जम्मान म्हिगदे मुल चेला हिन्ना? आहिन। तिग जम्मान म्हिगदे अगमवक्ता हिन्ना? आहिन। तिग जम्मान म्हिगदे स्थान्दोदा लोष्वा म्हि हिन्ना? आहिन। तिग जम्मान म्हिगदेसे उदेकला गे लला? आल। 30 तिग जम्मान म्हिगदेसे आखम्बा म्हिदा खम्ना लबा मोलम याइला? आयाइ। तिग जम्मान म्हिगदेसे थरी थरीला ग्योइ पाइला? आपाइ। तिग जम्मान म्हिगदेसे थे थरी थरीला ग्योइ जम्मादान घोना लबारी खम्ला? आखम। 31 तर एनीगदेसे अझ घेन घेन मोलम याइबा सेम लउ।

माया चा जम्मान भन्दा घेन मोलम हिन्ना

ओच्छे एनीगदेदा डाइ झन जम्मान भन्दा ज्यबा ग्याम उन्ना।

13 डाइ म्हिगदेदेन स्वर्गदूतगदेला ग्योइरी ताम पाइसैनीन स्थान्दोदा माया आलनी भिसम डा चा स्याडदेन बुज्जेल ह्इबा जे तला। 2 डाइ अगमवाणी पाइखम्सैनीन म्हिला ज्ञान बुद्धिसे घोआखम्बा ताम घोसैनीन, जम्मान ज्ञान बुद्धि याइसैनीन, ओच्छे डादेन छ्याम गडगदे ले:खम्बा विश्वास मुसैनीन डाइ स्थान्दोदा माया लआखम्नी भिसम डा तिगैनीन आहिन। ††3 चुदे डाइ डाला जम्मान धन सम्पत्ति स्थान्दोदा भो लसी पिन्जी, ओच्छे डाइ डाला ल्हुइनीन मेरी खाइपुइसैनीन ‡ डाइ स्थान्दोदा माया आलनी भिसम डाडा तिगै ज्यबा आत।

4 स्थान्दोदा माया लबा म्हिसे जम्मान ताम भ्रान्बारी खम्ला ओच्छे दया लला। स्थान्दोदा डाह आल, डा जे ज्यबा भिसी आपाइ ओच्छे घेन दोसीनीन आभ्र। 5 स्थान्दोदा माया लबा म्हि चा ह्किबा आरेबा म्हि ह्इबा आत मुला, हाडदा जे ज्यबा तगै भिसीएनीन आम्हन, स्थान्दोदेन आछेर, ओच्छे हाडदा बिरोध लबा तामलाएनीन वास्ता आल। 6 स्थान्दोदा माया लबा म्हि आज्यबा तामरी आताइ, थे सत्य तामरी जे ताइला। 7 स्थान्दोदा माया लबा म्हिसे जम्मान ताम जोगब लला, जम्मान तामएनीन विश्वास लला, ओच्छे जम्मान ताम तला भिसी आश लला, जम्मान तामरी कोइसी चिला।

8 माया खाइमै म्हासी आनि। तर अगमवाणी पाइबा खलाला, थरी थरीला ग्योइ पाइबा खलाला, ओच्छे ज्ञान बुद्धिला तामगदे गे आखेल्बा तला। 9 य्हाडसे पाइबा अगमवाणीदेन य्हाडला ज्ञान बुद्धि पूरा आरे। 10 तर जम्मान ताम पूरा तमाहेन्से चा पूरा आतबा जम्मान तामगदे म्हासी निला।

11 डा जजा मुबा धुइरी डाइ जत्थुगुलान ताम पाइबा, ओच्छे जत्थुगुसे म्हन्बा तामनोन म्हन्मुबा, जत्थुगुसे घोबा ह्इ लसीन घोमुबा। तर भ्योन तमाहेन्से डाइ जत्थुगुला जम्मान बानीबेहोरगदे खलाजी। 12 दान्दे चा य्हाडसे ज्यना लसी आम्राइबा ऐनारी म्राइबा ह्इ जे म्राइमुला, तर लिच्छा चा ज्यना लसी म्राइला। दान्दे डाइ पूरान ताम आघोसैनीन थे धुइरी चा परमेश्वरसे डाला बारेरी जम्मान ताम था याइबा ह्इ डाइएनीन जम्मान ताम घोला।

13 विश्वास, आशदेन माया चा खाइमै आम्हा। तर चु सोम न्हडरी घेन चा माया हिन्ना।

अगमवाणीदेन अर्गु ग्योइ

14 थेतबासेलमा एनीगदेसे ल्हानान म्हाइदोबा चा माया हिन्ना। ओते जे आहिन, परमेश्वरला आत्मासे पिन्बा मोलमगदे याइबारीनीन ल्हानान सेम लउ। ओच्छे अगमवाणी पाइबारी चा झन ल्हानान सेम लउ। 2 तिगदा भिसम अर्गु ग्योइ † पाइबा म्हिसे म्हिगदेदेन छ्याम आहिन, परमेश्वरदेन छ्याम ताम पाइमुला। थेसे परमेश्वरला आत्माला शक्तिग्याम म्हिसे था आयाइबा ताम पाइबासे लमा स्थान्दो खालै म्हिसे आघोमुला। 3 तर अगमवाणी पाइबा म्हिसे स्थान्दोगदेसे घोखम्बा ताम पाइमुला। थेसे पाइबा तामग्याम म्हिगदेसे विश्वासरी कोइबा आँटदेन शान्ति याइला। 4 अर्गु ग्योइ पाइबा म्हिसे हाडलान विश्वास कोइना लला। तर अगमवाणी पाइबा म्हिसे चा मण्डलीलान विश्वास कोइना लला। 5 एनीगदे जम्मासेन अर्गु ग्योइ पाइगै भिसी डाइ म्हन्बा मुला। तर थे भन्दा झन ल्हाना चा एनीगदेसे अगमवाणी पाइगै भिसी डाइ म्हन्बा मुला। मण्डलीला विश्वास कोइना लबाला लागिरी अर्गु ग्योइ म्हिगदेदा घोना लसी पिन्बा म्हि खालै आरेसम अर्गु ग्योइ पाइबा म्हि भन्दा अगमवाणी पाइबा म्हि चा घेन हिन्ना।

6 ज्योज्यो आले नाना आडागदे, चुदे डा एनीगदे मुबा ग्लारी खसी अर्गु ग्योइ जे पाइजी भिसम तिग एनीगदेदा ज्यबा तला? आत। तर चुदे डा एनीगदे मुबा ग्लारी खसी परमेश्वरसे उन्बा ताम, ज्ञान बुद्धिला ताम, अगमवाणीदेन तिगै लोप्तो:बा ताम लोप्जी भिसम एनीगदेदा ज्यबा तला। 7 बाँसुरीदेन वीणा ह्याम्पा थेला काइ ज्यना लसी आथोन्नी भिसम तिग ह्याप्जी भिसी खाह्इ लसी था याइबा? 8 चुदे बिगुल ह्याम्पा ज्यना लसी आथे:नी भिसम लडाइ लबाला लागिरी खाह्इ लसी तयार तला? ††9 थेह्इ लसीन एनीगदेसेनीन अर्गु ग्योइरी आघोबा ताम पाइजी भिसम एनीगदेसे तिग पाइजी भिसी खाल्से था याइसे? एनीगदेसे पाइबा चा तिगै गे आखेल्बा तला। 10 जम्बुलिडरी ल्हानान थरीला ग्योइगदे मुला। थे ग्योइगदे न्हडरी खालै म्हिसे आघोबा ग्योइ चा गिकनोन आरे। 11 चुदे खालै म्हिसे पाइमा डाइ आघोनी भिसम थे डाला लागिरी विदेशी तला, ओच्छे थेला लागिरी डा विदेशी तला। 12 थेह्इ लसीन एनीगदेसेनीन परमेश्वरला आत्माग्याम याइबा मोलमगदे याइबारी ल्हानान सेम लबासे लमा मण्डलीदा ल्हेना लबाला लागिरी जुन मोलमसे आँट याइसी भइना लला थे मोलम म्हाइगो।

13 थेतबासेलमा अर्गु ग्योइ पाइबा म्हिसे थे ताम घोना लखम्बा शक्ति याइबाला लागिरी प्रार्थना लतो:ला। 14 तिगदा भिसम डाइ अर्गु ग्योइरी प्रार्थना लमा डाला आत्माग्याम प्रार्थना लला। तर थे ताम डाइएनीन आघो। 15 थेह्इ भिसम डाइ तिग लसे? डाइ आत्माग्याम प्रार्थना लला, तर डाइ घोबाला लागिरी सेमसेनीन प्रार्थना लला। ओच्छे आत्मासे परमेश्वरला जयजयकार लसी व्हाइ गोला, तर डाइ घोबाला लागिरी सेमसेनीन व्हाइ गोला। 16 चुदे एसे आत्माग्याम परमेश्वरला जयजयकार लसी धन्यवाद पिन्सी प्रार्थना लमा स्थान्दो म्हिगदेसे आघोनी भिसम खाह्इ लसी, “आमेन” भिखम्ला? 17 एसे ज्यना लसी धन्यवाद पिन्ना तला, तर स्थान्दो म्हिसे आघोनी भिसम थेला विश्वास कोइबा आत।

18 डाइ परमेश्वरदा धन्यवाद पिन्ना, तिगदा भिसम एनीगदेसे भन्दा झन डाइ ल्हानान रेम अर्गु ग्योइ पाइमुला। 19 तर मण्डलीरी आघोबा ग्योइग्याम हजार च्युइ ताम पाइबा भन्दा मी बरु डाइ हाडलान सेमग्याम गोर डा ताम जे पाइसी स्थान्दोदा लोष्वा चा ज्यबा तला भिसी डाइ म्हन्बा मुला।

20 ज्योज्यो आले नाना आडागदे, एनीगदेसे कोलागदेसे म्हन्बा ह्इ लसी थाम्हन्गो। आज्यबा तामगदेला लागिरी एनीगदे तिगै आसेबा कोलागदे ह्इबान दोगो। तर म्हन्बा धुइरी चा पाको म्हिसे म्हन्बा ह्इबान म्हन्गो।

21 बचनरीनीन परमप्रभुसे चुह्इ भिसी सुइबा मुला,

“अर्गु ग्योइ पाइबा म्हिगदेदेन विदेशीग्याम

डाइ चु म्हिगदेदेन छ्याम ताम पाइला।

तसैनीन थेनीगदेसे डाला ताम इयान्बा सेम आल।” †††

† “अर्गु ग्योइ” भिबा चा ग्रीक अन्कार खालै म्हिसे आसेबा ग्योइ पाइखम्ला भिबा हिन्ना। (चु ताम १४:४, ५, १३, १४, १८, २२, २६, २७, २८, ३१ पदगदेरीनीन मुला।) †† यहूदीगदेला ठिम अन्कार लडाइ लबाला लागिरी तयार तउ भिसी पाइतो:मा बिगुल ह्याम्पाबा। ††† 14:21 यशै २८:११-१२

† 12:28 एफि ४:११ †† 13:2 मत्ती १७:२०; २१:२१; मर्कु ११:२३ ‡ थे धुइरी म्हिदा सजाय पिन्तो:सम मेसे खाइमुबा।

22 थेतबासेलमा अर्गु ग्योइगदे पाड्बा चा विश्वास लबा म्हिगदेला लागिरी आहिन, विश्वास आलबा म्हिगदेला लागिरी चिनु हिन्ना। तर अगमवाणी पाड्बा चा विश्वास आलबा म्हिगदेला लागिरी आहिन, विश्वास लबा म्हिगदेला लागिरी हिन्ना।

23 थेतबासेलमा एनीगदे मण्डलीरी हुप तबा धुइरी अर्गु ग्योइ पाड्बा धुइरी विश्वास आलबा म्हिगदेदेन थे ताम आघोबा म्हिगदे थेरी खजी भिसम थेनीगदेसे एनीगदेदा म्योजीम भिसी भिला। 24 तर जम्मासेन अगमवाणी पाड्बान लबा धुइरी विश्वास आलबा खालै म्हिदेन घोबा सेम थोसी खबा म्हि थेरी खजी भिसम जम्मासेन पाड्बा तामग्याम थेसे हाडसे लबा पाप था याड्ला ओच्छे थेसे हाड ठीक मुला कि आरे भिसी च्याला। 25 खालैदा था आरेबा थेला सेमला तामगदेएनोन था याड्ला। जमाहेन्से खलुप तसी थेसे परमेश्वरदा धन्यवाद पिन्ना, ओच्छे “पक्कान, एनीगदेला गुडरी परमेश्वर मुला” भिसी थेसे पाड्ला।

ठीक लसी संगती लउ

26 ज्योज्यो आले नाना आडागदे, डाइ एनीगदेदा पाड्बारी म्हाइबा ताम चा चुनोन हिन्ना, एनीगदे हुप तसी संगती लबा धुइरी कोइसे व्हाइ गोला, कोइसे बचनग्याम लोप्ला, कोइसे परमेश्वरसे उन्बा ताम घोना लला, कोइसे अर्गु ग्योइ पाड्ला, कोइसे थे ग्योइग्याम पाड्बा ताम जम्मादान घोना लला। चु जम्मान तामगदे चा मण्डलीदा भङ्ना लबारी लतोःला। 27 एनीगदे न्हडरी खालैसे अर्गु ग्योइ पाड्मुला भिसम, पालो पालो लसी न्ही सोमसे जे पाङ्गो, स्थान्दो गिकसे चा थे अर्गु ग्योइ जम्मादान घोना लतोःला। 28 तर थे ताम घोना लबारी थेरी खालै म्हि आतनी भिसम थे ताम पाड्बा म्हि चा मण्डलीरी कुटिसी चिगै। ओच्छे थे हाडनोन परमेश्वरदेन छ्याम जे ताम लगै।

29 अगमवाणी पाड्बा म्हि चा न्ही सोमघोना तगै, ओच्छे स्थान्दो म्हिगदेसे चा थेनीगदेसे पाड्मा परमेश्वरग्याम खबा हिन्ना कि आहिन भिसी च्यागै। 30 तर थेरी मुबा म्हिगदे न्हडरी गिकदा परमेश्वरसे तिगै ताम उन्सी पाड्पुड्जी भिसम डाच्छा पाड्बान लबा म्हि चा तिगै आपाड्ना कुटिसी चिगै। 31 अगमवाणी पाड्बा एनीगदे जम्मासेन पालो पालो लसी अगमवाणी पाड्खम्ला, ओच्छे इयान्बा म्हिगदेसे लोप्लम्ला ओच्छे जम्मासेन आँट याड्ला। 32 अगमवक्तागदेसे हाडला सेमदा हाडसेन तहरी थान्तोःला। 33 तिगदा भिसम परमेश्वर अलमल तना लबा परमेश्वर आहिन, तर शान्ति पिन्बा परमेश्वर हिन्ना।

थेह्ण्ड लसीन परमेश्वरला म्हिगदेसे जम्मान मण्डलीला ठिम अन्धार, 34 मण्डलीरी संगती लबान लबा धुइरी म्प्रिडम्हेमेगदे कुटिसी चितोःला। थे धुइरी थेनीगदेसे ताम पाड्आम्पाड्। तर हाडला ठिमसे पाड्बा अन्धार थेनीगदे तहरी चितोःला। 35 तिगै तामला बारेरी इयोइबा सेम मुसम थेनीगदेसे दिमरी हाड हाडला हेम्बोदेन छ्याम इयोइगै। तिगदा भिसम मण्डलीरी ताम पाड्बा चा म्प्रिडम्हेमेगदेला लागिरी पेःबा खबा ताम हिन्ना।

36 तिग परमेश्वरला बचन एनी कोरिन्थला म्हिगदेसे थेःना लबारी शुरु लबा हिन्ना? आहिन। तिग परमेश्वरला बचन एनीगदेसे जे थेःबा हिन्ना? आहिन।

37 खालै म्हिसे हाडसे हाडदान अगमवक्ता अथवा परमेश्वरला आत्माग्याम मोलम याड्बा म्हि हिन्ना भिसी म्हन्मुला भिसम, थेसे डाइ भिबा चु ताम प्रभुसे कुल्बा ताम हिन्ना भिसी था याड्तोःला। 38 तर खालै म्हिसे चु तामगदेदा वास्ता आलनी भिसम थेला तामदाएनोन खालैसेन वास्ता आल।

39 थेतबासेलमा डाला ज्योज्यो आले नाना आडागदे, अगमवाणी पाड्बारी ल्हानान सेम लउ, ओच्छे अर्गु ग्योइ पाड्बा म्हिगदेदाएनोन थाकागो। 40 तर जम्मान गे ज्यना लसी ढिक्ना लसी लतोःला।

येशू ख्रीष्ट सिबाग्याम सोबा

15 दाहेन्से ज्योज्यो आले नाना आडागदे, डाइ एनीगदेदा थेःना लबा थार्बा पिन्बा समाचारला बारेरी डाइ एनीगदेदा दोःसी पाड्ला। थे समाचाररी विश्वास लसी एनीगदे थेनोन अन्धार भ्रबान मुला। 2 चुदे डाइ थेःना लबा थार्बा पिन्बा समाचाररी विश्वास लबा आखलानी भिसम जे

एनीगदेसे थार्बा याड्ला, आहिन्सम एनीगदेसे लबा विश्वास गे आखेल्बा तला।

3 तिगदा भिसम परमेश्वरला बचन अन्धार ख्रीष्ट व्हाडला पापला लागिरी सिजी भिसी डाइ था याड्बा मुल तामनोन डाइ एनीगदेदा थेःना लबा मुला। 4 थेदा ल्हुजी ओच्छे परमेश्वरला बचन अन्धार थे सोमरेमाकुनु सिबाग्याम दोःसी सोजी। 5 ओच्छे थेदा पत्रुससे म्प्राड्जी, जमाहेन्से थेदा च्युक न्ही मुल चेलासे म्प्राड्जी। 6 जमाहेन्से थेदा हाडदा विश्वास लबा ग्यार्जा डा भन्दा ल्हाना ज्योज्यो आले नाना आडागदेसे तिक्खुरीन म्प्राड्जी। थेनीगदे न्हडला ल्हाना ह्ण्डबा म्हिगदे दान्दोनाएनोन मुला, तर कोइ कोइ चा सिसी जिन्जी। 7 जमाहेन्से थेदा याकूबसे म्प्राड्जी, ओच्छे लिच्छा जम्मान मुल चेलागदेसे म्प्राड्जी। 8 थेदा जम्मान भन्दा लिच्छा चा डाइ म्प्राड्जी। थे धुइरी चा डा ला आछ्योना न्हाबा कोला ह्ण्डबान मुबा। 9

9 तिगदा भिसम जम्मान मुल चेलागदे डा भन्दा ग्रेन हिन्ना, थेनीगदे न्हडरी डा चा तिगैनोन आहिन। तिगदा भिसम डाइ परमेश्वरला मण्डलीदा ल्हानान दुख पिन्बासे लमा डा मुल चेला भिबाधोनाला आरे। 10 तर दान्दो डा परमेश्वरला दयामायासे लमान मुल चेला दोबा मुला। ओच्छे थेसे डादा लबा दयामाया खेरोरी आनिनी। बरु डाइ स्थान्दो मुल चेलागदेसे भन्दा ल्हानान गे लजी। तर चु जम्मान गे डाइ लबा आहिन, डादेन छ्याम मुबा परमेश्वरला दयामायासेन हिन्ना। 11 थेतबासेलमा डाइ थेःना लसै, थेनीगदेसे थेःना लसै, डन्से थेःना लबा ताम चा गिकनोन हिन्ना। ओच्छे थेनोन तामरी एनीगदेसे विश्वास लबा मुला।

व्हाड सिबाग्याम सोला

12 डन्से चा ख्रीष्ट सिबाग्याम सोजी भिसी थेःना लसी भ्रमुला भिसम एनीगदे न्हडला कोइ कोइसे चा तिगदा सिबागदे दोःसी आसो भिसी पाड्बा? 13 तर चुदे सिबागदे दोःसी आसो भिसम ख्रीष्टएनोन सिबाग्याम सोबा आहिन। 14 चुदे ख्रीष्ट सिबाग्याम आसोबा हिन्सम डन्से थेःना लबा ताम गे आखेल्बा तला, ओच्छे एनीगदेसे लबा विश्वासएनोन गे आखेल्बा तला। 15 थे भन्दाएनोन डनी परमेश्वरला बारेरी लुसीला ताम पाड्बा म्हि दोला। तिगदा भिसम परमेश्वरसे ख्रीष्टदा सिबाग्याम सोना लजी भिसी डन्से परमेश्वरला बारेरी थेःना लबा मुला। तर च्यागो, सिबागदे दोःसी आसोबा हिन्सम परमेश्वरसे ख्रीष्टदाएनोन सोना आलसेला मुबा। 16 सिबागदे आसोमुला भिसम परमेश्वरसेनोन ख्रीष्टदा सोना लबा आहिन। 17 ख्रीष्ट सिबाग्याम आसोबा हिन्सम एनीगदेसे लबा विश्वास गे आखेल्बा तला, ओच्छे एनीगदे अझ पापरीन तला। 18 थेह्ण्ड भिसम ख्रीष्टदा विश्वास लसी सिबा म्हिगदेएनोन जम्मान सिबाला सिबान तजी। 19 चुदे चु जुनी मुदेधोनाला लागिरी जे व्हाडदा ख्रीष्टग्याम ज्यबा तला भिसी आश लबा हिन्सम स्थान्दो जम्मान म्हिगदे भन्दा व्हाड चा ल्हाना दया याड्तोःबा म्हि दोला।

20 तर ख्रीष्ट मी सिबाग्याम सोबा हिन्ना। सिबागदे न्हडग्याम ख्रीष्ट जम्मान भन्दा डाच्छा सोसी स्थान्दो सिबागदेएनोन सोला भिसी उन्बा मुला। 21 तिगदा भिसम म्हि गिकसे लमान जम्मान म्हि सिबा मुला। थेह्ण्ड लसीन गिकसे लमान सिबागदेएनोन दोःसी सोला। 22 आदमग्याम ३३ जम्मान म्हि सिबा मुला। थेह्ण्ड लसीन ख्रीष्टग्याम चा जम्मान म्हि सोला। 23 तर जम्मान म्हि हाड हाडला पालो अन्धार सिबाग्याम सोला। ख्रीष्ट चा सिबाग्याम जम्मान भन्दा डाच्छा सोजी। ओच्छे ख्रीष्ट दोःसी फेप्लबा धुइरी चा थेदा विश्वास लबा म्हिगदेएनोन सिबाग्याम सोला। 24 जमाहेन्से चु जम्बुलिड नाश तला। थे धुइरी ख्रीष्टसे जम्मान अधिकारगदे, शक्तिगदेदेन शासन लबागदेदा नाश लसी परमेश्वरला यहुल्सा परमेश्वर आबादान जिम्मा पिन्ना। 25 तिगदा भिसम ख्रीष्टसे जम्मान शत्रुगदेदा भ्रेना लसी हाडला काड धिरी आथान्तेधोना थेसे शासन लतोःला। २६ जम्मान भन्दा लिच्छा चा शत्रु कालदा नाश लबान मुला। 27 तिगदा भिसम बचनरी “परमेश्वरसे जम्मान

† 15:3 यशै ५३:५-१२ †† 15:4 भजन १६:८-१०; मत्ती १२:४०; मुल २:२४-३२
‡ 15:5 मत्ती २८:१६-१७; मर्कू १६:१४; लूका २४:३४, ३६; यूह २०:१९ †† 15:8
मुल ९:३-६ †† 15:9 मुल ८:३ ††† “आदम” चा परमेश्वरसे स्त्रीबा जम्मान भन्दा
डाच्छाला म्हि हिन्ना। आदमसे परमेश्वरसे कुल्बा ताम आड्यान्ना पापी दोजी। आदम पापी
दोबासे लमा व्हाडएनोन पापी दोजी। ††† 15:25 भजन ११०:१

स्हेगदे ख्रीष्टला स्थाप धिरी थान्ना" भिसी भिबा मुला। चु भिबा चा परमेश्वरएनोन ख्रीष्टला तहरी तला भिसी पाड्बा आहिन। तर परमेश्वरसे जम्मान स्हेगदेथोरी ख्रीष्टदा शासन लपुड्ला भिबा हिन्ना।¹²⁸ जम्मान स्हे ख्रीष्टला शासनरी भमाहेन्से ख्रीष्टएनोन परमेश्वरला तहरी धन्ख्याला। ओच्छे जम्मान स्हेथोरी परमेश्वरसेन शासन लला।

²⁹ सिबाग्याम दोःसी आसोबा हिन्सम सिबागदेला लागिरी बप्तिस्मा किन्बा म्हिगदेदा तिग फाइदा तला? चुदे सिबाग्याम आसो भिसम थेनीगदेसे थेला लागिरी तिगदा बप्तिस्मा किन्बा? ³⁰ ओच्छे डनीएनोन तिगदा सदन ह्वाडला ज्यान गोजाला धाररी थान्सी भ्रसे? ³¹ ज्योज्यो आले नाना आडागदे, एनीगदे व्हाडला प्रभु ख्रीष्ट येथूदेन छ्याम गिक तबासे लमा डा ल्हानान ताड्बा मुला। थेतबासेलमा डाड सेमहेन्सेन चु ताम पाड्बा, "डा धिन धिनोन सिबारी तयार मुला।" ³² म्हिसे म्हन्बा अन्धार जे एफिसस शहररी डा हि जन्तुदेन † छ्याम छेबा तामसे डादा तिग फाइदा तला? चुदे सिबागदे दोःसी आसो भिसम म्हिगदेसे पाड्बा ह्ङ्गोन

"व्हाडएनोन चबा थुड्बा लड,

तिगदा भिसम न्हडगर मी व्हाड सिनोन सिला!" ‡

³³ चु तामरी एनीगदे ड्युक्याब थातउ। आज्यबा म्हेला संगत लजी भिसम ज्यबा बानीबेहोरएनोन न्होड्ला। ³⁴ दाहेन्से एनीगदेसे ठीक ताम म्हन्गो, ओच्छे पाप थालउ। तिगदा भिसम एनीगदे न्हडला गाते म्हिसे मी परमेश्वरदा डोसेबान आरे। डाड चु ताम पाड्मा एनीगदेदा पेःबा खतोःबा।

सिबाग्याम सोबा ल्हुड

³⁵ तर खालै म्हिसे "सिबागदे दोःसी खाड् लसी सोला? ओच्छे सोमाहेन्से थेनीगदेला ल्हुड खाड्बा तला?" भिसी ड्योड्ला। ³⁶ मूर्ख म्हि! एसे जुन स्हेला ब्लु दवला थे ब्लु आनइतेधोना आफुड। ³⁷ एनीगदेसे ग्वा तसै, अर्गु तिगैला ब्लु मुसै, थेला गेडा दवबा हिन्ना, तर दोडनोन दवबा आहिन। ³⁸ तर परमेश्वरसे ह्वाडसे म्हन्बा अन्धार थे ब्लुगदेदेन अर्गु ब्लुगदेदा जेबा ल्हुड पिन्ना। ³⁹ जम्मान ल्हुड खाल गिकलान आत। म्हेला ल्हुड अर्गु खाल्ला, जन्तुगदेला ल्हुड अर्गु खाल्ला, चरागदेला ल्हुड अर्गु खाल्ला ओच्छे तार्डागदेला ल्हुड अर्गु खाल्ला तला।

⁴⁰ मुरी मुबा स्हेगदेला ह्वाड ह्वाडलान रुपदेन व्हाल तला ओच्छे जम्बुलिडरी मुबा स्हेगदेलाएनोन ह्वाड ह्वाडलान रुप तला। ⁴¹ धिनीला व्हाल अर्गुन खाल्ला तला, लनीला व्हाल अर्गु खाल्ला तला ओच्छे सारगदेला व्हाल अर्गुन खाल्ला तला। तिगदा भिसम जम्मान सारगदेला व्हाल गिकनोन आत।

⁴² सिबागदेएनोन थेह्ङ् लसीन सोला। सिमाहेन्से ल्हुबा ल्हुड चा नडसी निला, तर सिबाग्याम दोःसी सोमाहेन्से चा खाड्मै आसि। ⁴³ सिमाहेन्से ल्हुबा व्हाडला ल्हुड आज्यबादेन कमजोर तला। ओच्छे सिबाग्याम सोमाहेन्सेला ल्हुड जेबादेन शक्तिशाली तला। ⁴⁴ ल्हुबा धुडरी स्या काला ल्हुडरी ल्हुला, तर सोबा धुडरी थे आत्माला ल्हुडरी सोला। स्यादेन काला ल्हुड तला भिसम आत्माला ल्हुडएनोन तनोन तला।

⁴⁵ थेतबासेलमा बचनरीनोन, "जम्मान भन्दा डाच्छाला म्हि आदम चा सोबा म्हि दोजी" भिसी भिबा मुला। तर लिच्छाला आदम † चा स्थान्दोदा जुकजुकधोनाला जुनी पिन्बा आत्मा तजी।⁴⁶ आत्माला ल्हुड डाच्छा खबा आहिन, तर स्या काला ल्हुड चा डाच्छा खबा हिन्ना। जमाहेन्से जे आत्माला ल्हुड खबा हिन्ना। ⁴⁷ डाच्छाला म्हि आदम चा जम्बुलिडला साप्राग्याम स्होबा म्हि मुबा। तर थे भन्दा लिच्छाला म्हि ख्रीष्ट चा स्वर्ग्याम फेप्खबा मुबा। ⁴⁸ जम्बुलिडरी मुबा म्हिगदे चा थे साप्रासे स्होबा म्हि ह्ङ्बान मुला, ओच्छे स्वर्गी मुबा म्हिगदे चा स्वर्ग्याम फेप्खबा म्हि ह्ङ्बान मुला। ⁴⁹ दान्दे व्हाडसे साप्रासे स्होबा म्हेला रुप किन्बा ह्ङ् लसी लिच्छा चा व्हाडसे स्वर्ग्याम फेप्खबा म्हेला रुप किन्म्याड्ला।

⁵⁰ ज्योज्यो आले नाना आडागदे, डाड पाड्बारी म्हाड्बा ताम चा चुनोन हिन्ना, चु स्या काला ल्हुडदा परमेश्वरला व्हल्सारी वाड्बा हक आरे। ओच्छे नाश तसी निबा ल्हुडसे खाड्मै आसिबा जुनी आयाड्।⁵¹ च्यागो, डाड

† 15:27 भजन ८:६ †† "हि जन्तु" भिबा चा पावलदा एफिससरी बिरोध लबा म्हिगदे हिन्ना। ‡ 15:32 यशै २२:१३ †† "लिच्छाला आदम" भिबा चा ख्रीष्ट हिन्ना।

‡ 15:45 उत्त २:७

एनीगदेदा म्हिसे था आयाड्बा ताम गिक पाड्बा। व्हाड जम्मान मी आसि, तर व्हाड जम्मान ल्हुड पोला।⁵² व्हाडला मी चीम जे तमा छिन्नडरीन जम्मान भन्दा लिच्छारेम बिगुलला काड थेःला। जमाहेन्से तुरुन्तन सिबागदे दोःसी खाड्मै नाश आतबा जुनी किन्सी सोला, ओच्छे व्हाडला ल्हुड पोला।⁵³ तिगदा भिसम सिबा ल्हुड खाड्मै आसिबा ततोःला, ओच्छे चु नडसी निबा ल्हुड दोःसी खाड्मै आनइबा ततोःला।⁵⁴ सिबा ल्हुड खाड्मै आसिबादेन नडसी निबा ल्हुड खाड्मै आनइबा दोमाहेन्से बचनरी "कालदाएनोन ढाजी" भिसी भिबा ताम पूरा तला। ‡

⁵⁵ "काल एसे खानड ढाबा मुला?

काल खाड् एला शक्ति?" §

⁵⁶ पापग्याम कालसे दुख पिन्बा शक्ति याड्बा ओच्छे ठिमग्याम पापसे शक्ति याड्बा।⁵⁷ तर परमेश्वरदा धन्यवाद तगै, थेसे व्हाडदा व्हाडला प्रभु येथू ख्रीष्टग्याम ढाना लबान मुला।

⁵⁸ थेतबासेलमा डाला सेम निबा ज्योज्यो आले नाना आडागदे, एनीगदे विश्वासरी कोड्सी याडयोड आतना चिउ। ओच्छे झन्सी प्रभुला गे लउ। तिगदा भिसम एनीगदेसे दुख लसी लबा प्रभुला गे खाड्मै खेरोरी आनि भिबा ताम एनीगदेदा थानोन मुला।

यरूशलेमरी मुबा परमेश्वरला म्हिगदेला लागिरी भेटी

16 दाहेन्से डाड परमेश्वरला म्हिगदेला लागिरी भेटी हुबाला बारेरी भिबान मुला, डाड गलातियाला मण्डलीदा पाड्बा ह्ङ् लसीन एनीगदेसे हुपो।² एनीगदेसे ह्वाडसे गे लसी स्होबा टाडगाग्याम साताला शुरुला धिनकुनु सातैदडसेन जजाकर भेटी हुप्सी थान्गो। थेह्ङ् लजी भिसम डा खबा धुडरी एनीगदेसे भेटी हुप आतोः।³ ओच्छे डा खमाहेन्से एनीगदेसे धम्बा म्हिगदेदा डोसेना लबा चिठी पिन्ना। जमाहेन्से थेनीगदेसेन थे भेटी यरूशलेमरी भोर्सी निला।⁴ ओच्छे डाएनोन निमा ज्यबा तला भिसम थेनीगदे डानेन छ्यामनोन निला।

पावलसे ग्ला ग्लारी निबा सेम लबा

⁵ डा माकेडोनिया तसी खबा धुडरी एनीगदेदेन छ्याम हुप तबारी खला। तिगदा भिसम दान्दे चा डा माकेडोनिया तसी निबारी छ्याड्बा मुला।

⁶ एनीगदेदेन छ्याम डा तिगै धिनधोना चिखम्ला तला, तजी भिसम सेर्ख भरनोन एनीगदेदेन छ्याम चिखम्ला। जमाहेन्से डा जुन ग्लारी निसैनोन एनीगदेसे डादा ग्यामरी तोःबा जम्मान स्हे ढिक्ना लखम्ला।⁷ चु पाल्से चा एनीगदेदेन छिन्नड जे हुप तबारी खबा आहिन, प्रभुला सेम तजी भिसम तिगै धिनधोना एनीगदेदेन छ्यामनोन चिम्याड्ला भिसी डाड आश लबा मुला।⁸ तर पेन्तिकोस भिबा चाडधोना डा एफिसस शहररीन चिला।⁹ डादा बिरोध लबा म्हिगदे ल्हानान मुसैनोन थेरी प्रभुला घ्रेन गे लबारी डाड ज्यबा मौका याड्बा मुला।

¹⁰ चुदे तिमोथी एनीगदे मुबा ग्लारी खजी भिसम थेदा एनीगदेदेन छ्याम ज्यना लसी चिपुङ्गो। तिगदा भिसम थेसेनोन डाड ह्ङ् लसीन प्रभुला गे लबान मुला।¹¹ थेतबासेलमा थेदा खालैसेन हेला थालउ। तर थे डा मुबा ग्लारी खमा एनीगदेसे थेदा ज्यना लसी पुड्खउ। तिगदा भिसम चुरी मुबा विश्वासीगदेदेन डाड थेदा भ्रान्सी चिबा मुला।

¹² आले अपोल्लोसदा डाड स्थान्दो ज्योज्यो आलेगदेदेन छ्याम एनीगदे मुबा ग्लारी निउ भिसी ल्हानान पाड्बा मुला। तर थेसे दान्दे एनीगदे मुबा ग्लारी खबा सेम आलनी, तजी भिसम थे लिच्छा एनीगदे मुबा ग्लारी खला।

चिठीला थुमरी पाड्बा

¹³ एनीगदे होशियार तसी चिउ। ओच्छे विश्वासरी कोड्सी चिउ। थेह्ङ् लसी आलोड्ना ऑट थोसी भ्रउ।¹⁴ एनीगदेसे जुन जुन गे लला थे जम्मान गे मायाग्याम लउ।

¹⁵ अखैया भिबा अज्वलला जम्मान म्हिगदे न्हडरी जम्मान भन्दा डाच्छा स्तिफनासदेन थेला म्हेमेगदेसे विश्वास लबा हिन्ना भिबा ताम एनीगदेदा

‡† 15:52 † थेस ४:१५-१७ ‡† 15:54 यशै २५:८ § 15:55 होशै १३:१४

थानोन मुला। थेनीगदेसे परमेश्वरला म्हिगदेसे लबा गेरी सेमहेन्सेन ह्यो लबा मुला। ज्योज्यो आले नाना आडागदे, डाला चु बिन्ती मुला, ¹⁶ थेह्इबा म्हिगदेदेन थेह्इबा गे लबा स्थान्दो म्हिगदेसे पाइमा इयान्गो। ¹⁷ स्तिफनास, फोर्नुनाटसदेन अखाइकस खमा डा ल्हानान ताइजी। तिगदा भिसम थेनीगदेसे एनीगदे आरेबासे लमा डादा तोःबा जम्मान स्हेगदे पिन्बा मुला। ¹⁸ थेनीगदेसे एनीगदेदा ह्इन्नोन डादाएनोन आँट पिन्बा मुला। थेतबासेलमा एनीगदेसे थेह्इबा म्हिगदेदा मान लउ।

¹⁹ एशियारी † मुबा मण्डलीगदेसे एनीगदेदा फ्याफुल्ला भिसी पाइबा मुला। अकिलासदेन प्रिस्का †† ओच्छे थेनीगदेला दिमरी मुबा मण्डलीसेनोन

† चु चिठी भिबा धुइरी चा चु ग्लादा एशिया भिमुबा, तर दान्दे चा चु ग्ला टर्की भिबा धुल्सा हिन्ना। †† ग्रीक बाइबलरी चु पददेन १ कोरिन्थी १६:१९ पदरी जे प्रिस्का भिसी भिबा मुला। अर्गु जम्मान ग्लारी प्रिस्किला भिसी भिबा मुला। प्रिस्का भिबादेन प्रिस्किला भिबा म्हि गिकनोन हिन्ना।

एनीगदेदा फ्याफुल्ला भिसी पाइबा मुला। ²⁰ चुरी मुबा जम्मान ज्योज्यो आले नाना आडागदेसे एनीगदेदा फ्याफुल्ला भिसी पाइबा मुला। एनीगदेसेनोन ह्वाड ह्वाड न्हडरी गिकसेम गिकदा सेमहेन्सेन माया लसी फ्याफुल्गो।

²¹ डा पावल ह्वाडलान यासे फ्याफुल्ला भिसी भिबा मुला। ‡

²² जुन म्हिसे प्रभुदा माया आल थेसे परमेश्वरग्याम सजाय याइगै। प्रभु, ह्वाड फेप्खउ!

²³ प्रभु येशूला दयामाया एनीगदेदेन छ्याम तगै।

²⁴ ओच्छे ख्रीष्ट येशूदेन छ्याम गिक तबा एनीगदे जम्मादान डाइ माया लला, आमन।

‡ पावलसे स्थान्दो म्हि गिकदा पाइसी भिपुइजी, तर चु चिठीरी मुबा जम्मान ताम पावलसे पाइबा अन्खार भिबा हिन्ना भिसी जम्मासेन था याइगै भिसी चु पदला ताम चा पावल ह्वाडसेन भिबा मुबा।

चु चिठीला बारेरी पाडतो:मा

येशूला मुल चेला पावलसे भिबा मुबा। चु चिठी भिबाला लागिरी पावलदा तिमोथी भिबा म्हिसे ह्यो लबा मुबा (२ कोरिन्थी १:१)।

माकेडोनिया भिबा अज्चलरी भिबा मुबा।

ओस्पन ईश्वी संवत् ५५-५७ (विक्रम संवत् ११२-११४) साल न्हडरी भिबा मुबा।

कोरिन्थ शहररी मुबा विश्वासीगदेदा भिबा मुबा।

पावलसे कोरिन्थला विश्वासीगदेदा डाच्छारेमला चिठी भिसी पुइमाहेन्से ओस्पन तिदिड लिच्छा भिसी पुइबा चु “न्हीरेमला” चिठी हिन्ना। चु चिठी भिबा धुइरी कोरिन्थला मण्डलीदेन पावलला गुडरी आढिकबा तामगदे मुबा। मण्डलीला कोइ कोइ म्हिसे पावलदा बिरोध लसी बेइज्जत लबा मुबा। तसैनोन पावलसे थेनीगदेदेन छ्याम ढिकबारी ल्हानान सेम लजी। चु चिठीला शुरुरी पावलदेन कोरिन्थला मण्डलीला गुडरी तबा तामगदेला बारेरी भिबा मुला। पावलसे कोरिन्थला मण्डलीरी मुबा हाडदा बेइज्जत लबा कोइ कोइ म्हिगदेदा चिठीरी ल्हानान बड्सी भिबा मुबा। चु चिठीरी भिबा तामसे लमा म्हिगदेसे हाड हाडला पाप खलासी परमेश्वरपट्टि दोःबादेन जम्मान तामरी ढिकबासे लमा पावल ल्हानान ताड्बा मुबा। जमाहेन्से पावलसे यरूशलेमरी मुबा मण्डलीदा सेमहेन्सेन ह्यो लउ भिसी बिन्ती लजी। थेह्ण्ड लसी पावलसे हाड खीष्टला पक्का मुला चेला हिन्ना भिसी पाड्बा मुला। तिगदा भिसम कोरिन्थला कोइ कोइ म्हिसे हाड चा खीष्टला पक्का मुल चेला हिन्ना भिसी पाड्बा मुबा। ओच्छे पावल चा फट्टा मुल चेला हिन्ना भिसी दोष लबा मुबा।

मुल तामगदे

प्याफुल्बादेन धन्यवाद पिन्बा १:१-११

पावलदेन कोरिन्थरी मुबा विश्वासीगदे १:१२-७:१६

यरूशलेमरी मुबा परमेश्वरला म्हिगदेला लागिरी भेटी ८:१-९:१५

पावलसे हाड खीष्टला मुल चेला हिन्ना भिसी पाड्बा १०:१-१३:१०

चिठीला थुमरी भिबा ताम १३:११-१३

पावलसे कोरिन्थला विश्वासीगदेदा भिबा न्हीरेमला चिठी

1 लास्सो, कोरिन्थ शहररी मुबा परमेश्वरला मण्डलीदेन अरखैया अज्चलरी मुबा जम्मान परमेश्वरला म्हिगदेदा परमेश्वरसे खीष्ट येशूला मुल चेला दोबारी धम्बा डा पावलदेन यहाडला आले तिमोथीग्याम प्याफुल्ला। 2 यहाडला परमेश्वर आबादेन प्रभु येशू खीष्टग्याम एनीगदेसे दयामायादेन शान्ति याड्गै।

दुखरी ह्यो लबा परमेश्वर

3 यहाडदा ल्हानान दया लबादेन दुखरी ह्यो लबा † यहाडला प्रभु येशू खीष्टला आबा परमेश्वरला जयजयकार तगै। 4 परमेश्वरसेन यहाडदा जम्मान दुखरी ह्यो लबा मुला। तिगदा भिसम दुखरी परब तबा स्थान्दो म्हिगदेदा ह्यो लखम्मा भिसीन थेसे यहाडदा दुखरी ह्यो लबा मुला। 5 खीष्टसे नाबा ह्ण्डबान दुख यहाडसेनोन ल्हानान नाबासे लमा परमेश्वरसे यहाडदा खीष्टग्यामसेन ल्हानान ह्यो लबा मुला। 6 डन्से दुख नाजी भिसम थे एनीगदेला लागिरी ह्योदेन थार्बा याड्बाला लागिरी हिन्ना। डन्से दुखरी ह्यो याड्जी भिसम एनीगदेसेनोन दुखरी ह्यो याड्ला। ओच्छे डन्से दुख नाखम्बा शक्ति याड्बा ह्ण्ड लसी एनीगदेसेनोन दुख नाखम्बा शक्ति याड्ला। 7 एनीगदेथोरी डन्दा पूरान विश्वास मुला। तिगदा भिसम डन्से नाबा ह्ण्डबा दुख एनीगदेसेनोन नाबा मुला, ओच्छे दुखरी डन्से याड्बा ह्ण्डबान ह्यो एनीगदेसेनोन याड्बा मुला भिसी डन्दा था मुला।

† चु पदगदेरी “ह्यो लबा” भिबा चा सम्झ लबा हिन्ना।

8 ज्योज्यो आले नाना आडागदे, डन्से एशिया अज्चलरी नाबा दुखला बारेरी एनीगदेसेनोन था याड्गै भिसी डन्से म्हन्बा मुला। थेरी डन्दा नाबारीन आखम्बा दुख तजी, थे दुखसे लमा सोला भिबा डन्दा आशोनोन आरेबा। 9 डन्से मी सिबान तजी भिसी म्हन्बा मुबा। चु तबा चा हाडसे हाडदान भर लगै भिसी आहिन, तर सिबागदेदा सोना लबा परमेश्वरथोरी भर लगै भिसी चुह्ण्ड तजीम। 10 थेह्ण्डबा लोड्बा खबा दुखग्याम डन्दा परमेश्वरसेन फेजी, थेसे यहाडदा फेनोन फेला। ओच्छे थेसे यहाडदा सदन फेला भिसी डन्से पूरा विश्वास लबा मुला। 11 चुला लागिरी एनीगदेसे डन्दा ल्हानान प्रार्थना लसी पिन्गो। एनीगदेसे डन्दा लागिरी प्रार्थना लबासे लमा परमेश्वरसे डन्दा मोलम पिन्ना, ओच्छे ल्हानान म्हिगदेसे डन्दा लागिरी परमेश्वरदा धन्यवाद पिन्ना।

पावलसे ग्ला ग्लारी निबारी सेम पोबा

12 चु तामला लागिरी डनी ताड्बा मुला, जम्बुलिडला म्हिगदेला डाच्छा जे आहिन, तर एनीगदेला डाच्छाएनोन डनी परमेश्वरसे उन्बा सत्य †† ग्यामरी सेमहेन्सेन भ्रबा मुला भिबा ताम डन्से सेमहेन्सेन पाड्खम्ला। चुह्ण्डबा बानीबेहोर चा डन्से म्हिला ज्ञान बुद्धिग्याम याड्बा आहिन, परमेश्वरला दयामायाग्याम याड्बा हिन्ना। 13 एनीगदेसे पढब लखम्बादेन घोबारी खम्बा तामगदे जे डन्से एनीगदेदा भिबा मुला। थेतबासेलमा एनीगदेसे पूरान ताम घोखम्ला भिसी डाइ म्हन्बा मुला। 14 तसैनोन दान्दे एनीगदेदा डन्दा बारेरी

†† कोइ कोइ ग्रीक बाइबलरी “सत्य” भिबादा चोखो भिसी भिबा मुला।

जजाकर जे था मुला, लिच्छा एनीगदेसे डन्ना बारेरी जम्मान ताम था याड्ला। ओच्छे व्हाडला प्रभु येशू फेख्बा धुइरी एनीगदे डन्ना लागिरी ताड्म्याड्ला हड लसी डनीएनोन एनीगदेला लागिरी ताड्म्याड्ला।

¹⁵ व्हाड जम्मान ताड्म्याड्ला भिबा तामरी डा दुक्क तबा मुला। डा माकेडोनियारी निबा धुइरी एनीगदेदेन छ्याम हुप तबा सेम मुबा, थेहड लसीन थेग्याम दोःसी खमाएनोन एनीगदेदेन छ्याम हुप तबा सेम मुबा। तिग्दा भिसम एनीगदेसे दोब्बर मोलम याड्गै भिबा डाला सेम मुबा। ओच्छे एनीगदेग्याम फेसी डा यहूदिया अच्चलरी निमा एनीगदेसे डादा हो लला भिसी डाइ म्हन्बा मुबा। ¹⁷ तर डा एनीगदे मुबा ग्लारी खबारी आखम्नी। तिग डाइ तिगै ताम आम्हन्ना डा एनीगदे मुबा ग्लारी खबारी छ्याड्बा भिसी म्हन्बा? तिग डा एनीगदे मुबा ग्लारी खबारी छ्याड्मा ख्रीष्टदा डोआसेबा म्हिगदेसे हड खाड्माम “तला” खाड्माम “आत” भिसी डाइ पाड्बा हिन्ना? आहिन।

¹⁸ तर परमेश्वर विश्वास लखम्बा परमेश्वर हिन्ना। थेतबासेलमा डाइएनोन ताम गिकदान खाड्माम “तला” खाड्माम “आत” भिसी खाड्मै आपाड्। ¹⁹ तिग्दा भिसम परमेश्वरला डा येशू ख्रीष्टला बारेरी सिलास, तिमोथीदेन डाइ एनीगदेदा थेःना लबा ताम चा खाड्माम “हिन्ना” खाड्माम “आहिन” भिबा ताम आहिन्मुबा। तर परमेश्वरला डा येशू ख्रीष्टदेन छ्याम चा सदन “हिन्ना” भिबा ताम जे मुला। ²⁰ तिग्दा भिसम परमेश्वरसे लबा जम्मान हिन्ना भिबा कबुलगदे येशू ख्रीष्टग्यामसेन पूरा तबा मुला। थेतबासेलमा येशू ख्रीष्टग्यामसेन परमेश्वरला मानदेन जयजयकार तगै भिसी व्हाडसे थेला मिन किन्सी, “आमेन” भिमुला। ²¹ डन्देन एनीगदेदा ख्रीष्टदेन छ्याम गिक स्होसी भड्बा स्होबादेन व्हाडदा धम्बा चा परमेश्वरसेन हिन्ना। ²² थेहड लसी डालान हिन्ना भिसी परमेश्वरसे व्हाडदा छापएनोन लबा मुला। ओच्छे थेसे व्हाडदा जम्मान स्हे पिन्ना। तर व्हाडसे जम्मान स्हे आयाड्देधोनाला लागिरी थेसे व्हाडला आत्मा बैनाला रूपरी व्हाडला सेमरी थान्सी पिन्बा मुला।

²³ डा कोरिन्थ शहररी आखबा चा डाइ एनीगदेदा बड्सी एनीगदेला सेम स्हु थाखगै भिसी हिन्ना। चु ताम परमेश्वरदान था मुला। ²⁴ एनीगदेसे विश्वास लबा तामथोरी डन्से खाड्मै अधिकार आल। तर एनीगदे ताड्गै भिसी एनीगदेदेन छ्याम ढिक्सी गे लला। तिग्दा भिसम एनीगदे विश्वासरी कोड्बा मुला।

2 थेतबासेलमा एनीगदेदा सुर्दा थातगै भिसी डा एनीगदे मुबा ग्लारी आखबा पक्का लजी। ² डादा ताड्ना लबा चा एनीगदेन हिन्ना। थेतबासेलमा डाइ एनीगदेला सेम स्हु खना लजी भिसम डादा खाल्से ताड्ना लबा? ³ थेतबासेलमा डा खमा ताड्ना लबा म्हिगदेग्याम डादा सुर्दा थातगै भिसीन डाइ थे चिठी भिबा हिन्ना। तिग्दा भिसम डा ताड्बा धुइरी एनीगदेएनोन ताड्ना भिबा डादा पक्का विश्वास मुला। ⁴ डादा सेमरी सुर्दा तबा मुबा ओच्छे सेम ल्हानान स्हु खसी क्राबान थे चिठी भिबा मुबा। डाइ थे चिठी एनीगदेदा दुख तना लबारी भिबा आहिन, तर डाइ एनीगदेदा गाते माया लबा मुला भिबा ताम एनीगदेसे था याड्गै भिसी भिबा मुबा।

गल्ती लबागदेदा माफ लबा

⁵ खालै म्हिसे दुख पिन्बा मुसम थेसे एनीगदे जम्मान भन्दा डादा ल्हाना दुख पिन्बा हिन्ना। पाड्नोंन तोःमा थे ताम जस्तोन मुसैनोन दाहेन्से डादा थे भन्दा ल्हाना पाड्बा सेम आरे। ⁶ थेहड्बा म्हिदा एनीगदे न्हडला ल्हानान म्हिगदे ढिक्सी पिन्बा सजायसे छयोबा मुला। ⁷ थेतबासेलमा दाहेन्से एनीगदेसे थेदा माफ लतोःला, ओच्छे थेदा हो लतोःला। आहिन्सम सेमरी ल्हानान दुख तसी थेदा इन सुर्दा तला। ⁸ थेतबासेलमा एनीगदेसे थे म्हिदा अझ सेमहेन्सेन माया लउ भिबा डाला बिन्ती मुला।

⁹ एनीगदेसे डाइ कुल्बा जम्मान ताम ड्यान्बा चीम कि आड्यान्बा चीम भिसी च्याबाला लागिरीन डाइ एनीगदेदा थे चिठी भिबा मुबा। ¹⁰ एनीगदेसे जुन म्हिदा माफ लबा मुला डाइएनोन थेदा माफ लला। चुदे डाइ तिगै तामरी खालैदा माफ लबा मुसम एनीगदेदान लागिरी डाइ ख्रीष्टला डाच्छापट्टि थेदा

माफ लबा मुला। ¹¹ शैतानसे व्हाडदा फसब लआम्पाड्के भिसीन डाइ थेहड लबा हिन्ना। तिग्दा भिसम शैतानना जम्मान जुक्तिगदे व्हाडदा था मुला।

प्रभुला गे लबागदे

¹² डा त्रोआस भिबा शहररी ख्रीष्टला थार्बा पिन्बा समाचार थेःना लबारी खमा प्रभुसे डादा थेला गे लबा मौका पिन्जी। ¹³ तर डाइ थेरी व्हाडला आले तीतसदा आस्याप्पा डाला सेमरी शान्ति आरेबा। थेतबासेलमा डा थेनीगदेग्याम फेसी माकेडोनिया भिबा अच्चलरीक्यार निजी।

¹⁴ तर परमेश्वरदा धन्यवाद तगै, तिग्दा भिसम थेसे व्हाडदा सदन ख्रीष्टदेन छ्याम ढाबा ग्यामरी थोला। ओच्छे डनीग्यामसेन थेसे ज्यबा बास्ना खबा हड्बा ख्रीष्टला ज्ञान बुद्धिला तामगदे जम्मान ग्लारी धोना लला। ¹⁵ तिग्दा भिसम थार्बा याड्बा म्हिगदेदेन नाश तसी निबा म्हिगदेला गुडरीनोन डनी परमेश्वरला लागिरी ख्रीष्टग्याम ज्यबा बास्ना खबा धूप हिन्ना। ¹⁶ नाश तसी निबा म्हिगदेला लागिरी चा व्हाड कालला थाड हिन्ना, ओच्छे थार्बा याड्बा म्हिगदेला लागिरी चा सोना लबा बास्ना हिन्ना। चुहड्बा गे लखम्बा म्हि खाल मुला? ¹⁷ तिग्दा भिसम डन्से स्हान्दो म्हिगदेसे हड लसी परमेश्वरला बचन व्यापार लबा आरे। तर डन्दा परमेश्वरसेन पुड्खबा हिन्ना। थेतबासेलमा परमेश्वरला ओन्हाडरी ख्रीष्टदेन छ्याम गिक तसी डन्से ज्यबा सेमसे पाड्ला।

3 तिग दोःसी डन्से व्हाडसे व्हाडदान घेन स्होबारी व्हाड्बा हिन्ना? आहिन। तिग स्हान्दो म्हिगदेसे हड लसी डादा मान लउ भिसी एनीगदेदा स्हान्दो म्हिसे चिठी भितोःला? भिआतोः। थेहड लसीन एनीगदेसेनोन डादा मान लउ भिसी स्हान्दो म्हिदा चिठी भिआतोः। ² जम्मान म्हिगदेसे घोबादेन पढब लखम्बा डन्ना सेमरी भिबा चिठी एनीगदेन हिन्ना। ³ एनीगदे ख्रीष्टसे भिबा चिठी हिन्ना, ओच्छे चिठी सबा चा डनी हिन्ना। चु चिठी मसीसे भिबा आहिन, तर छोन्बो परमेश्वरला आत्मासे भिबा हिन्ना। ओच्छे चु युडबाला पाटीरी † भिबा चिठी आहिन, तर व्हाडला सेमला पाटीरी भिबा हिन्ना। ††

⁴ परमेश्वरला ओन्हाडरी डनी ख्रीष्टग्याम दुक्क तबा मुला। ⁵ खजिबै ताम डनी व्हाडसेन लबारी खम्ला भिसी आपाड्, तर जम्मान ताम परमेश्वरग्याम लबारी खम्ला। ⁶ परमेश्वरसे छार कबुल लबा मुला ओच्छे डन्दा थे कबुल अन्धार गे लखम्बा म्हि स्होबा मुला। चु कबुल परमेश्वरला आत्मासे लबा कबुल हिन्ना, भिबा ठिमसे लबा कबुल आहिन। भिबा ठिमसे सिना लमुला, तर परमेश्वरला आत्मासे सोना लमुला।

छार कबुलग्याम खबा व्हाल

⁷ ठिम युडबाला पाटीरी ठ्वाड्सी भिसी पिन्बा धुइरी परमेश्वरला व्हालदेन शक्ति खजी। थे व्हाल मोशाला लीरी परब तजी, लिच्छा थे व्हाल म्हाबान निजी। तसैनोन थे व्हालसे लमा इस्राएलीगदेसे मोशाला लीरी च्याबारी आखम्नी। सिना लबा ठिम याड्बा धुइरी मी थेहड्बा व्हाल तजी भिसम ⁸ परमेश्वरला आत्मासे लबा गेग्याम इन गाते व्हाल व्हाल तला। ⁹ तिग्दा भिसम म्हिला दोष उन्बा गे मी थेहड्बा व्हाल तजी भिसम परमेश्वरदा सेम निबा म्हि स्होबा गे इन ल्हानान व्हाल तला। ¹⁰ पाड्नोंन तोःमा छार ग्यामला व्हाल चा थे डाच्छाला व्हाल भन्दा इन उदेकला व्हाल मुबासे लमा थे डाच्छाला व्हाल म्हासी निजी। ¹¹ छिन्नडला लागिरी खबा स्हे मी व्हालरी खजी भिसम सदनना लागिरी खबा स्हे मी इन ल्हानान व्हाल व्हाल तला।

¹² डन्से थेहड्बा आश लबासे लमान डन्से ल्हानान आँट याड्बा मुला। ¹³ व्हाड मी मोशा हड्बा आहिन, थेसे थे म्हासी निबा व्हाल इस्राएलीगदेसे थाम्राङ्के भिसी व्हाडला ली घप्पुबा। ¹⁴ तर थेनीगदेला सेम कोड्बा मुबा, तिग्दा भिसम दान्देधोनाएनोन थेनीगदेसे थे डाच्छाला कबुल पढब लबा धुइरी व्हाडला सेम घप्पुला। थेतबासेलमा थेनीगदेसे सत्य ताम घोबारी आखम। थे घप्पा स्हे चा ख्रीष्टसे जे तेःखम्ला। ¹⁵ दान्देधोनाएनोन मोशाला ठिम पढब लबा धुइरी थे घप्पा स्हेसे व्हाडला सेम घप्पासे लमा थेनीगदेसे आघोमुला।

† परमेश्वरसे इस्राएलीगदेदा पिन्बा गोर च्युड कुल्बा तामगदे युडबाला पाटीरी भिबा मुबा।

†† 3:3 प्रस्था २४:१२; यर्मि ३१:३३; इज ११:१९; ३६:२६

16 तर म्हि प्रभुपट्टि दोःमैछ्याम थे घण्बा स्हे थेंग्याम तेःला। 17 तिग्दा भिसम प्रभु आत्मा हिन्ना। थेतबासेलमा जुन म्हिदेन छ्याम प्रभुला आत्मा मुला थे म्हि खालैला तहरी आत। 18 य्हाड जम्मासेन ली आघण्णा प्रभुला य्हालदेन शक्ति उन्बा मुला। प्रभु आत्मा हिन्ना, ओच्छे थेंग्याम खबा थेंनोन य्हालसे य्हाडदा थे ह्इबान स्होबान झन ल्हानान य्हालरी भोर्बान मुला।

साप्राला ताडरी मुबा सम्पत्ति

4 परमेश्वरसे ह्वाडसेन दया लसी डन्दा चु गे पिन्बासे लमा डन्से सुर्दा लआतोः। 2 डन्से लतोःबा जम्मान पेःबा खबा गेगदे ख्लासी जिन्बा मुला। ओच्छे स्हान्दोदा जाल लसी फसब लबा ताम लबा आरे। थेह्इ लसीन परमेश्वरला बचन लोण्बा धुइरी बचनरी मुबा तिगै ताम पोबा आरे। बरु डन्से परमेश्वरला सत्य बचन म्हिगदेदा घोना लबान डनी खाल हिन्ना भिसी म्हिगदेदा उन्बा मुला। ओच्छे थेनीगदेसे परमेश्वरला डाच्छा डनी खाह्इबा म्हि हिन्ना भिसी था याड्वा। 3 चुदे डन्से थेःना लबा थार्बा पिन्बा समाचार घण्बा मुसम थे नाश तसी निबा म्हिगदेला लागिरी जे घण्बा मुला। 4 चु जम्बुलिडरी शासन लबा ल लुसे विश्वास आलबा म्हिगदेला सेम घप्पी पिन्बा मुला। थेतबासेलमा ख्रीष्टला घ्रेन मानना बारेरी उन्बा थार्बा पिन्बा समाचारला य्हालदेन शक्ति थेनीगदेसे म्हाड्बा आरे। ख्रीष्टनोन परमेश्वरला रूप हिन्ना। 5 डन्से ह्वाडलान बारेरी थेःना लबा आहिन, तर येशू ख्रीष्टनोन प्रभु हिन्ना भिसी थेःना लबा मुला। ओच्छे येशूला लागिरी डनी एनीगदेला नोकर हिन्ना भिसी थेःना लबा मुला। 6 “धोपधोपरी य्हाल तउ” भिसी सुड्बा परमेश्वरसे येशू ख्रीष्टला स्ह्यालग्याम तबा य्हाल परमेश्वरला घ्रेन मानना ज्ञान बुद्धिदा घोबारी खम्पै भिसी डन्ना सेमरी थेसे य्हाल तना लजी। †

7 दाहेन्से डन्ना सेमरी चु य्हाल मुला, तर डनी ह्वाडनोन चा साप्राला ताड ह्इबा हिन्ना। थेतबासेलमा डन्देन छ्याम मुबा चु शक्ति डनी ह्वाडलान आहिन, तर परमेश्वरग्यामनोन खबा हिन्ना भिबा ताम प्रस्टन था तला। 8 डन्से सदन ह्इबा दुख याड्बा मुला, तसैनोन डन्ना सेम सिबा आरे। ओच्छे डनी तिग लबा भिसी अलमल तबा मुला, तसैनोन डन्ना सोबा आश म्हाबा आरे। 9 डन्से ल्हानान दुख याड्बा मुला, तसैनोन परमेश्वरसे डन्दा खलाबा आरे। डन्दा म्हिगदेसे ल्हानान तोबा मुला, तसैनोन डनी नाश तसी निबा आरे। 10 डन्ना चु ल्हुडग्याम येशूला ह्इबा जुनी म्हाड्खम्पै भिसी थेसे सिबा धुइरी नाबा ह्इबान दुख डन्सेनोन सदन नाबा मुला। 11 तिग्दा भिसम दान्दे डनी सोतेधोना डन्ना ल्हुडग्याम येशूला जुनी म्हाड्गे भिसी डनी सदन येशूला लागिरी सिबारीनोन तयार मुला। 12 थेह्इ लसीन डनी सितोःसैनोन डन्से एनीगदेला गुडरी ख्रीष्टला गे लबान मुला, तर चुग्याम एनीगदे सोबा मुला।

13 “डाइ विश्वास लबासे लमा डाइ पाड्बा मुला” भिसी बचनरी भिबा म्हिदेन छ्याम विश्वास लबा आत्मा मुबा ह्इनोन डन्देन छ्यामएनोन विश्वास लबा आत्मा मुला। थेतबासेलमा डन्से विश्वास लला ओच्छे पाड्वा। ††14 डन्दा था मुला, प्रभु येशूदा सिबाग्याम सोना लबा परमेश्वरसे डन्दाएनोन येशूदेन छ्यामनोन सोना लला, ओच्छे परमेश्वरसेन डन्दा एनीगदेदेन छ्याम ह्वाड मुबा ग्लारी भोर्ला। 15 चु जम्मान ताम एनीगदेला लागिरीन तबा हिन्ना। तिग्दा भिसम जति ल्हानान म्हिगदेसे परमेश्वरला दयामाया याड्वा ओतेन म्हिगदेसे परमेश्वरला मानदेन जयजयकार लबाला लागिरी परमेश्वरदा धन्यवाद पिन्बा गे बढब तबान निखम्पै।

छार जुनी

16 थेतबासेलमा डन्दा तिगै सुर्दा आरे। डन्ना चु ल्हुड कमजोर तसी निसैनोन डन्ना आत्मा चा धिन धिननोन छार दोबान निला। 17 डन्से दान्दे तिगै धिनना लागिरी नाबा जजाबा दुखग्यामसेन डन्ना लागिरी जुकजुकधोना चिबा य्हालदेन शक्ति याड्वा। चु दुखगदे भन्दा चु य्हालदेन शक्ति चा ल्हानान घ्रेन मुला। 18 डन्से म्हाड्बा स्हेगदेदा आहिन, तर आम्राड्बा स्हेगदेदा च्याबा

मुला। तिग्दा भिसम म्हाड्बा स्हेगदे मी छिन्डला लागिरी जे तला, तर आम्राड्बा स्हेगदे मी जुकजुकधोनान चिला।

5 तिग्दा भिसम य्हाडला चु स्या काला ल्हुड फुप्पी निबा दिम ह्इबान मुला। तसैनोन परमेश्वरसे य्हाडदा स्वर्गरी जुकजुकधोना चिबा ल्हुड पिन्ना। चु ल्हुड चा म्हिला यासे स्होबा फुप्पी निबा दिम ह्इबा आहिन, तर परमेश्वरसे स्होबा हिन्ना भिबा ताम य्हाडदा था मुला। 2 भिनोन तोःमा चुरी य्हाड ल्हुइरी ल्हानान ब्लप्पी चिबा मुला। ओच्छे परमेश्वरसे पिन्बा ल्हुड किन्बारी य्हाडसे ल्हानान सेम लबा मुला। 3 तिग्दा भिसम थे ल्हुड किन्माहेन्से स्वर्गरी य्हाडला आत्मा थे ल्हुइदेन छ्यामनोन तला। 4 य्हाडदा चु जम्बुलिडरी सोतेधोना दुख मी तनोन तला। चु भिबा चा य्हाड सिबारीदेन य्हाडदेन छ्याम मुबा चु ल्हुड खलाबारी म्हाड्बा चा आहिन। बरु य्हाडला चु सिबा ल्हुड पोबाला लागिरी य्हाडसे सदन सोबा छार ल्हुड किन्बारी म्हाड्बा हिन्ना। 5 दाहेन्से चुनोन छार ल्हुइला लागिरी य्हाडदा परमेश्वरसे स्होबा हिन्ना। ओच्छे य्हाडदा थेसे ह्वाडला आत्मा बैना पिन्सी पक्का लबा मुला। 6 डनी चु सिसी निबा ल्हुइरी मुतेधोना प्रभुग्याम थारेड मुसैनोन छार ल्हुड याड्वा भिबा तामरी सदन दुक्क मुला। 7 थेतबासेलमा डनी विश्वासग्याम भ्रबा मुला, डन्ना मीसे म्हाड्बा ताम अन्छार आहिन। 8 चु सिसी निबा ल्हुइरी चिबा भन्दा मी परमेश्वरला दिमरी प्रभुदेन छ्यामनोन चिला भिबा तामरी डनी पुरान दुक्क मुला। 9 थेतबासेलमा डनी चुरी मुसैनोन, प्रभुदेन छ्याम मुसैनोन डन्ना सेम चा प्रभुदा ताड्ना लबा जे हिन्ना। 10 तिग्दा भिसम निसाफ लबा धुइरी य्हाड जम्मान ख्रीष्टला डाच्छा राप्तोःला। थे धुइरी य्हाडसे ल्हुइरी मुबा धुइरी ज्यबा आज्यबा खाह्इबा गे लबा मुला, थे अन्छार य्हाडदा ख्रीष्टसे निसाफ लला।

ख्रीष्टग्याम परमेश्वरदेन छ्याम ढिक्का

11 परमेश्वरदेन छ्याम लोड्बा भिबा तिग हिन्ना, थे ताम था याड्सी डन्से स्हान्दोगदेदाएनोन थे अन्छार भ्रपुड्वा। परमेश्वरसे डन्दा ज्यना लसी डोसेबा मुला। ओच्छे डनी खाह्इबा मुला भिबा ताम एनीगदेसेनोन था याड्सी जिन्बा मुला भिसी डाइ म्हन्बा मुला। 12 एनीगदेसे डन्दा मान लगै भिसी डन्से दोःसी चु ताम पाड्बा आहिन। तर सेमला तामदा वास्ता आलना मीसे म्हाड्बा तामरी घमण्ड लबा म्हिगदेदा एनीगदेसे ज्यना लसी जोहाब पिन्खम्पै, ओच्छे डन्ना बारेरी था याड्सी एनीगदे ताड्खम्पै भिसी पाड्बा हिन्ना। 13 चुदे डन्ना सेम ग्लारी आरे भिसम थे परमेश्वरला लागिरी हिन्ना, ओच्छे चुदे डन्ना सेम ग्लारी मुला भिसम थे एनीगदेला लागिरी हिन्ना। 14 डनी ख्रीष्टला मायाला तहरी मुला, तिग्दा भिसम य्हाड जम्मान लागिरी ख्रीष्ट सिबा मुला। थेतबासेलमा जम्मान म्हि सिबा मुला भिबा ताम डन्दा पक्का विश्वास मुला। 15 ख्रीष्ट जम्मान म्हिला लागिरी सिजी। थेतबासेलमा दाहेन्से सोबागदे ह्वाडला लागिरी आहिन, तर थेनीगदेला लागिरी सिबाग्याम सोबा ख्रीष्टला लागिरी सोतोःला।

16 दाहेन्से डन्से खालैदान जम्बुलिडला म्हिगदेसे म्हन्बा ह्इ लसी म्हन्बारी आत। डाच्छा मी डन्सेनोन ख्रीष्टदा थे म्हिगदेसे म्हन्बा ह्इ लसीन म्हन्बा मुबा। तर दाहेन्से डन्से ख्रीष्टदा थेह्इ लसी आमहन। 17 थेतबासेलमा चुदे खालै म्हि ख्रीष्टदेन छ्याम गिक तसी जिन्बा मुला भिसम थे छार दोसी जिन्बा मुला, पुरानो तामगदे जम्मान म्हासी जिन्बा मुला। च्यागो, थे जम्मान ताम छार दोसी जिन्बा मुला। 18 चु जम्मान ताम चा य्हाडदा ख्रीष्टग्याम ह्वाडदेन छ्याम ढिक्का लबा परमेश्वरग्याम तबा हिन्ना। ओच्छे परमेश्वरसे ह्वाडदेन छ्याम स्हान्दोदा ढिक्का लबा गे डन्दा पिन्बा मुला। 19 थेनोन परमेश्वर ह्वाडनोन ख्रीष्टदेन छ्याम तसी जम्बुलिडला जम्मान म्हिगदेदा ह्वाडदेन छ्याम ढिक्का लबान मुबा। थेतबासेलमा परमेश्वरसे थेनीगदेसे लबा पापला तिगै सय आकिन्नी। ओच्छे स्हान्दो म्हिगदेदा परमेश्वरदेन छ्याम ढिक्का लबा गे डन्दा जिम्मा पिन्बा मुला। 20 थेतबासेलमा डनी ख्रीष्टला समाचार भोर्बा म्हि हिन्ना। परमेश्वर ह्वाडनोन डन्देन छ्याम तसी एनीगदेदा ड्योडबान मुला। डनीएनोन ख्रीष्टदेन छ्याम तसी एनीगदे परमेश्वरदेन छ्याम ढिक्को भिसी बिन्ती लला। 21 य्हाड ख्रीष्टग्याम परमेश्वरदा सेम निबा

म्हि दोगे भिसी पापनोन आलबा ख्रीष्टदा परमेश्वरसे व्हाडला जम्मान पाप काप्सी पिन्जी।

6 डनी परमेश्वरदेन छ्यामनोन गे लबा म्हि तबासे लमा एनीगदेदा परमेश्वरसे पिन्बा दयामाया खेरो निना थालउ भिबा डन्ना बिन्ती मुला। 2 तिग्दा भिसम परमेश्वरसे चुह्ण्ड भिसी सुड्बा मुला, “ठीक धुइरी डाइ एसे लबा बिन्ती थे:बा मुला, ओच्छे थार्ना लतो:बा धिनरी डाइ सदन ह्यो लजी।” च्यागो, ठीक धुइदेन थार्ना लबा धिन चा दान्देन हिन्ना। †

पावलला दुख

3 डन्से लबा गेदा खालैसेन बिरोध थालगै भिसी डन्से खालैदान दुख पिन्बा गे आल। 4 तर डन्से जम्मान तामग्याम डनी परमेश्वरला गे लबा म्हि हिन्ना भिसी उन्ना। डन्से जम्मान दुख, गाह्यो तबा ताम, आपत विपतला ताम सोजो तसी नाबा मुला। 5 डन्दा तोबा ग्याड्बा लजी, ड्याल्खानरी झाड्जी, बिरोध लसी म्हिगदेसे हुल दडगा लजी, दुख लसी गे लजी, म्हेबारी आम्याड्नी ओच्छे चआम्याड्नी। 6 डन्से ज्यबा बानीबेहोर, ज्ञान बुद्धि, दुख नाखम्बा शक्ति, दया, परमेश्वरला आत्मादेन सत्य माया थोसी भ्रबा मुला। 7 डन्से सत्य बचनग्याम ओच्छे परमेश्वरलान शक्तिग्याम थेला गे लबा म्हि हिन्ना भिसी उन्ना मुला। नड्बा तामगदेथोरी ढाबारीदेन जम्मान तामग्याम जोगब तबाला लागिरी थोबा हतियारगदे चा परमेश्वरदा सेम निबा बानीबेहोर हिन्ना। 8 खालैसे डन्दा मान लजी, खालैसे डन्दा बेइज्जत लजी। खालैसे डन्दा ज्यबा म्हि भिसी पाड्जी, खालैसे डन्दा बिरोध लजी। ओच्छे खालैसे डन्दा लुसीला ताम पाड्बा म्हि हिन्ना भिसी पाड्जी। तर डन्से सत्य ताम पाड्बा मुला। 9 डन्दा डोआसेबा म्हिदा ह्ण्ड लसैनोन डन्दा जम्मासेन डोसेबा मुला। सिबा ह्ण्डबान तसैनोन डनी सोबान मुला, ओच्छे तोबा ग्याड्बा लजी तर डन्दा साड्बा आरे। 10 डन्ना सेमरी ल्हानान दुख मुला, तसैनोन डनी सदन ताड्बा मुला। डनी प्राडबो मुसैनोन डन्से ल्हानान म्हिगदेदा विश्वासरी प्युक्पो स्होला। ओच्छे तिगै आरेसैनोन डन्देन छ्याम जम्मान सहे मुला।

11 कोरिन्थला डाला ह्योगदे, डन्से एनीगदेदा जम्मान ताम घोना लसी पाड्बा मुला, एनीगदेदा डन्ना सेमहेन्सेन ल्हानान माया लबा मुला। 12 डन्से एनीगदेदा माया लबा खलाबा आरे, बरु एनीगदेसे चा डन्दा ल्हाना माया आलमुला। 13 थेतबासेलमा डाइ एनीगदेदा डालान कोलागदेदा ह्ण्ड लसी पाड्बा, एनीगदेसेनोन डन्दा सेमहेन्सेन ल्हानान माया लउ।

ख्रीष्टदा विश्वास लबागदेदेन आलबागदे

14 म्हे मोड्बा धुइरी जुवा गिकरीन म्हेदेन ता नारब आलबा ह्ण्ड लसी एनीगदेएनोन ख्रीष्टदा विश्वास आलबा म्हिगदेदेन छ्याम गिक तसी थाभ्रउ। तिग्दा भिसम ज्यबादेन पाप खाड्मै ढिकबारी आखम ओच्छे धोपदेन व्हाल खाड्मै ग्ला गिकरी आत। 15 ख्रीष्टदेन शैतान †† खाड्मै गिक आत ओच्छे ख्रीष्टदा विश्वास लबागदेदेन विश्वास आलबागदेएनोन खाड्मै गिक आत। 16 मूर्तिगदेदेन परमेश्वरला मन्दिर खाड्मै गिक आत। तिग्दा भिसम व्हाड चा छोन्बो परमेश्वरला मन्दिर हिन्ना। परमेश्वरसेनोन चुह्ण्ड भिसी सुड्बा मुला,

“डादा तेन्बा म्हिगदेदेन छ्याम चिला,

ओच्छे थेनीगदेदेन छ्यामनोन भ्रला।

डा थेनीगदेदेन परमेश्वर दोला,

ओच्छे थेनीगदे चा डाला म्हि दोला। †

17 थेतबासेलमा एनीगदे थेनीगदेग्याम फेसी खउ,

ओच्छे फेसी चिउ।

नड्बा सहेगदे तिगैनोन थाथुगो,

डाइ एनीगदेदा डालान म्हि स्होला’ भिसी

परमप्रभुसे सुड्बा मुला।” ††

18 “डा एनीगदेला आबा दोला,

† 6:2 यशै ४९:८ †† ग्रीक बाइबलरी शैतानदा बेलिआल भिसी भिबा मुला। खाड्मा गिक न्ही यहूदीगदेसे शैतानदा बेलिआल भिसी पाड्बा। बेलिआल भिबा चा गे आखेल्बा हिन्ना।

‡ 6:16 लेवी २६:१२; इज ३७:२७ †† 6:17 यशै ५२:११

ओच्छे एनीगदे चा डाला झा डामे दोला’ भिसी

जम्मान भन्दा घेन परमप्रभुसे सुड्बा मुला।” ††

7 थेतबासेलमा डाला सेम निबा ह्योगदे, परमेश्वरसे व्हाडदेन छ्याम थे कबुलगदे लबासे लमा व्हाडसे व्हाडला ल्हुइदेन आत्मादा आज्यबा तना लबा जम्मान नड्बा सहेगदेदा भ्याड्सी चोखो म्हि दोगे। ओच्छे परमेश्वरदा मान लसी तिगै दोष आरेबा म्हि दोसी भ्रड।

पावल ताड्बा

2 एनीगदेसे डन्दा सेमहेन्सेन ल्हानान माया लउ। डन्से खालैदान आज्यबा व्यवहार लबा आरे। ओच्छे डन्से खालैला विश्वास न्होड्ना लबादेन खालै म्हिग्याम फाइदा किन्बाएनोन आरे। 3 चु ताम डाइ एनीगदेदा दोष लबारी पाड्बा आहिन। तिग्दा भिसम एनीगदे डन्ना सेमरी मुला भिबा ताम डाइ एनीगदेदा डाच्छान पाड्सी जिन्बा मुला। डनी एनीगदेदेन छ्यामनोन सितो:सै सोतो:सै तयार मुला। 4 डा एनीगदेदेन छ्याम दुक्क मुला। एनीगदेदा डोसेबासे लमा डा ल्हानान ताड्बा मुला, एनीगदेसे डादा ल्हानान तामरी आँट पिन्बा मुला। थेतबासेलमा डन्से नातो:बा जम्मान दुखरीनोन डा ल्हानान ताड्बा मुला।

5 तिग्दा भिसम माकेडोनियारी खसीनोन डन्से बल्बा न्हआम्याड्नी। डन्दा इन जम्मानग्याम आपत विपत तजी। डन्दा ल्हानान म्हिसे बिरोध लसी बड्जी ओच्छे सेमरी ल्हानान लोड्बा खजी। ††6 तर तीतस डनी मुबा ग्लारी खबा तामग्याम दुख तबागदे जम्मादान आँट पिन्बा परमेश्वरसे डन्दा आँट पिन्जी। 7 थे खबासे लमा जे आहिन, तर एनीगदेसे थेदा पिन्बा आँटग्याम डन्से आँट याड्बा मुला। एनीगदेसे डादेन छ्याम हुप तबारी ल्हानान सेम लबा मुला भिसी थेसे डन्दा पाड्जी। ओच्छे डाच्छा डाला सेम सहु खना लबा ताम ढन्सी एनीगदेसे ल्हानान दुख इहम्बा मुला भिबादेन डादा ल्हानान वास्ता लबा मुला भिबा तामएनोन थेसे डन्दा पाड्जी। चु ताम थे:सी डा इन ल्हानान ताड्बा मुला।

8 डाइ भिबा चिठीग्याम एनीगदेदा सुर्दा तजी भिसी डाइ दुख म्हन्बा आरे, हिन्बाम डाच्छा डादाएनोन सुर्दा तबा मुबा। थे चिठीसे एनीगदेदा छिन्नडला लागिरी जे तसैनोन सुर्दा तना लजी भिबा ताम डाइ था याड्जी। 9 एनीगदेदा सुर्दा तजी भिसी डा ताड्बा आहिन, तर थे सुर्दाग्याम एनीगदेसे हाडसे लबा आज्यबा गेगदे खलासी परमेश्वरपट्टि दो:जी भिसी ताड्बा हिन्ना। तिग्दा भिसम डनीग्याम एनीगदेदा तिगै सुर्दा थातगै भिसी एनीगदेसे परमेश्वरसे म्हन्बा अन्धारला दुख नाजी। 10 तिग्दा भिसम परमेश्वरदा ढन्सी लबा सुर्दा चा परमेश्वरदा सेम निबा सुर्दा हिन्ना। चुनोन सुर्दासे थार्ना याड्बाला लागिरी म्हिदा हाडला पाप खलासी परमेश्वरपट्टि दो:पुड्ला। ओच्छे थे तामसे सेमरी तिगै दुख आत। तर जम्बुलिडला सुर्दासे चा म्हिदा सिना लला। 11 तिग्दा भिसम च्यागो, परमेश्वरग्याम खबा सुर्दासे एनीगदेदा गाते आँट पिन्बा मुला। थे सुर्दासे एनीगदेदा हाड तिगै दोष आरेबादेन ज्यबा म्हि हिन्ना भिसी उन्बारी आँट पिन्बा मुला। थे सुर्दासे एनीगदेला गुडरी पाप लबा म्हिगदे ब्राड्सी बोमो खना लबा मुला। ओच्छे एनीगदेदा डादेन छ्याम हुप तबा सेम पिन्ना। थेह्ण्ड लसीन पापग्याम याड्बा सजाय ब्राड्सी लोड्बादेन पाप गे लबा म्हिदा सजाय पिन्बा सेम खना लला। चु तामग्यामसेन एनीगदे तिगै दोष आरेबा म्हि हिन्ना भिसी था याड्ला। 12 डाइ थे चिठी दुख पिन्बा अथवा दुख याड्बा म्हेला लागिरी भिबा आहिन। तर परमेश्वरला डाच्छा एनीगदेसे डन्दा गाते ढन्बा मुला भिबा ताम था याड्बाला लागिरीन डाइ भिबा हिन्ना।

13 थेतबासेलमा डन्से आँट याड्बा मुला।

डन्से आँट जे आहिन, एनीगदेसे तीतसदा ताड्ना लबासे लमा डनीएनोन ल्हानान ताड्बा मुला। 14 तिग्दा भिसम डाइ एनीगदेला बारेरी तीतसदेन छ्याम घमण्ड लसी ताम लमुबा, तसैनोन डा पे:आतो:नी। डन्से एनीगदेदा सत्य ताम पाड्बा ह्ण्ड लसीन तीतसदेन छ्याम घमण्ड लसी पाड्माएनोन सत्य दोजी। 15 एनीगदे लोड्सी तीतससे पाड्बा जम्मान ताम ड्यान्सी थेदा मान लजी। थे ताम ढन्सी थेसे एनीगदेदा इन

ल्हानान माया लबा मुला। 16 एनीगदेथोरी पूरान भर लखम्बासे लमा डा एनीगदेदेन छ्याम ल्हानान ताड्बा मुला।

ज्यबा सेमसे पिन्तोःबा

8 ज्योज्यो आले नाना आडागदे, माकेडोनिया अञ्चलरी मुबा मण्डलीगदेदा परमेश्वरसे लबा दयामायाला बारेरी डन्से एनीगदेदा पाड्बा सेम मुला। 2 स्हान्दोसे ल्हानान दुख पिन्बा धुइरीनोन थेनीगदे ल्हानान ताड्बा मुबा। ओच्छे ल्हानान प्राडबो तसैनीन थेनीगदेसे स्हान्दोदा ज्यबा सेमसे दान पिन्मुबा। 3 थेनीगदेसे पिन्खम्बा भन्दा ल्हानान हाडला सेमहेन्से ताड्सी ताड्सी पिन्बा मुबा भिबा ताम डाइ एनीगदेदा पाड्बा। 4 थेनीगदेसे यरूशलेमरी मुबा परमेश्वरला म्हिगदेदा ह्यो लबा मौका पिन्गो भिषी डन्देन छ्याम घरिघरि बिन्ती लजी। 5 थेनीगदेसे डन्से म्हन्नोन आम्हन्बा ताम लजी। जम्मान भन्दा डाच्छा थेनीगदेसे हाड हाडदा प्रभुला छ्यारी जिम्मा पिन्जी, ओच्छे परमेश्वरसे म्हन्बा अन्धारला गे लबाला लागिरी एनीगदेसे हाडसे हाडदान डन्ना यारी जिम्मा पिन्जी।

6 थे भेटी हुप्बा ज्यबा गे डाच्छा तीतससेन शुरु लजी। थेतबासेलमा एनीगदेला गुडरीनोन थे गे पूरा लबाला लागिरी एनीगदेदा ह्यो लउ भिषी डन्से थेदान बिन्ती लजी। 7 तर एनीगदे विश्वास लबारी, पाड्बारी, ज्ञान बुद्धिरी, जम्मान तामरी आँट पिन्बारीदेन डन्दा माया लबा चु जम्मान ताम एनीगदेसे ज्यना लसी लबान मुला। थेह्ण्ड लसीन पिन्बा गेएनोन एनीगदेसे ल्हानान लबान निउ।

8 चु चा डाइ एनीगदेदा लनोन तोःला भिषी कुल्बा आहिन। तर स्हान्दोगदेसे सेमहेन्सेन ह्यो लबा तामग्याम एनीगदेसे स्हान्दोगदेदा लबा माया सत्य हिन्ना कि आहिन भिषी था याड्बाला लागिरी डाइ चु ताम पाड्बा हिन्ना। 9 यहाडला प्रभु येशू ख्रीष्टसे लबा दयामाया एनीगदेदा थानोन मुला। थे ल्हानान प्युकपो मुबा। तसैनीन थे एनीगदेला लागिरी प्राडबो दोजी। तिग्दा भिसम हाड प्राडबो दोसी एनीगदे प्युकपो दोखमौ भिषीन थेसे चुह्ण्ड लबा हिन्ना।

10 एनीगदेला लागिरी ज्यबा तगै भिबा डाला चु सल्लाह मुला। तिग्युडमा एनीगदेसे पिन्बा गे शुरु लबा जे आहिन, तर थे गे लबारीनोन ल्हानान सेम लबा मुबा। 11 दाहेन्से एनीगदेसे थे गे पूरा लउ। शुरु लबा धुइरी एनीगदेसे ल्हानान पिन्बा सेम लबा अन्धार खम्तेधोना पिन्सी पूरा लउ। 12 पिन्बा सेम मुसम म्हिसे हाडदेन छ्याम आरेबा स्हे आहिन, तर जुन स्हे हाडदेन छ्याम मुला थे अन्धार पिन्मा परमेश्वर ताड्बा।

13 एनीगदेदा चा गाह्यो तगै, ओच्छे स्हान्दोगदेदा चा सजिलो तगै भिषी डाइ चु ताम पाड्बा आहिन। तर जम्मान च्योच्यो ततोःला भिषी डाइ चु ताम पाड्बा हिन्ना। 14 दान्दे एनीगदेदेन छ्याम ल्हानान मुबा स्हेग्याम आरेबागदेदा पिन्गो। ओच्छे लिच्छा थेनीगदेदेन छ्याम ल्हानान तबा धुइरी एनीगदेदा खॉचो तमा थेनीगदेसेनोन एनीगदेदा पिन्ना। थेह्ण्ड लजी भिसम जम्मान च्योच्यो तला। 15 बचनरीनोन चुह्ण्ड लसी भिबा मुला, “ल्हानान दुइबा म्हिदाएनोन ल्हाना आतनी, ओच्छे च्याइना दुइबा म्हिदाएनोन आछ्योबा आतनी।” †

तीतसदेन थेला ह्योगदे कोरिन्थरी निबा

16 तर परमेश्वरदा धन्यवाद तगै। तिग्दा भिसम थेसे एनीगदेला लागिरी तीतसदाएनोन डाला ह्ण्डबान सेम पिन्जी। 17 तिग्दा भिसम थे डन्से पाड्बासे लमा जे एनीगदेदेन छ्याम ह्युप तबारी खबा आहिन, तर थे सेमहेन्सेन ताड्सी ताड्सी हाडनोन एनीगदे मुबा ग्लारी खबान मुला। 18 ओच्छे थार्बा पिन्बा समाचार थेःना लसी भ्रमा जम्मान मण्डलीसे मान लबा आलेदाएनोन डन्से थेदेन छ्याम पुइखबान मुला। 19 चुदे जे आहिन, मण्डलीसे ह्युप लबा भेटी यरूशलेमरी भोर्बा धुइरी चु आलेदा डन्देन छ्यामनोन निगै भिषी धम्बा मुला। चु ज्यबा गे डन्से प्रभुला मानदेन जयजयकार लबाला लागिरी ओच्छे आरेबागदेदा ह्यो लबा सेम डन्दा मुला भिषी उन्बाला लागिरी लबा हिन्ना।

20 ज्यबा सेमसे पिन्बा चु भेटी यरूशलेमरी भोर्सी थेला विश्वासीगदेदा भो

लसी पिन्बा धुइरी डन्दा चु भेटीला बारेरी खालैसेन दोष थालगै भिषी डनी होशियार तसी गे लमुला। 21 तिग्दा भिसम डन्दा प्रभुला डाच्छापट्टि जे आहिन, तर म्हिगदेला डाच्छापट्टिएनोन जुन ताम ज्यबा मुला थेनोन ताम लबा सेम मुला।

22 थेनीगदेदेन छ्यामनोन डन्से स्हान्दो आले गिकदाएनोन एनीगदे मुबा ग्लारी पुइखबान मुला। डन्से ल्हानान रेम च्यामा थे प्रभुला गे लबारी ल्हानान झन्बा म्राड्जी। ओच्छे थेसे एनीगदेथोरी भर लबासे लमा थेसे झन ल्हानान गे लबारी आँट याड्बा मुला। 23 तीतस चा डादेन छ्यामनोन दिक्सी गे लबा डाला ह्यो हिन्ना। थेसे एनीगदेसे ह्यो लबा गेरी डादा ह्यो लमुला। ओच्छे थेदेन छ्याम खबा स्हान्दो आलेगदे चा मण्डलीगदेसे पुइखबा आलेगदे हिन्ना। थेनीगदेएनोन ख्रीष्टला मानदेन जयजयकार लबागदे हिन्ना। 24 थेतबासेलमा चु म्हिगदेदा एनीगदेसे हाडला माया उन्गो। ओच्छे डनी एनीगदे म्राड्सी तिग्दा ताड्बा मुला थे ताम थेनीगदेदा उन्गो। तिग्दा भिसम चु ताम जम्मान ग्लाला मण्डलीगदेसे था याड्गै।

विश्वासीगदेसे हुप्बा भेटी

9 यरूशलेमरी मुबा परमेश्वरला म्हिगदेला लागिरी पिन्बारी छ्याइबा भेटीला बारेरी डाइ एनीगदेदा भितोःबा ताम तिगै आरे। 2 तिग्दा भिसम एनीगदे सदन स्हान्दोदा ह्यो लबारी तयार मुला भिबा ताम डादा था मुला। एनीगदे अखैया अञ्चलरी मुबागदे तिग्युडमाहेन्सेन स्हान्दोदा ह्यो लबारी तयार तबासे लमा डा ताड्बा ताम माकेडोनिया अञ्चलला म्हिगदेदा पाड्बा मुबा। चु ताम थेःसी माकेडोनियाला ल्हानान म्हिसे स्हान्दोदा ह्यो लबा आँट याड्जी। 3 तर डनी एनीगदेला जुन गेला बारेरी थेःसी ताड्बा मुला। थे ताड्बा ताम खेरोरी थानिगै भिषी डाइ आलेगदेदा पाड्बा अन्धार एनीगदे भेटी पिन्बारी तयार तसी चिउ। डाइ आलेगदेदा एनीगदे मुबा ग्लारी पुइखबान मुला। 4 चुदे माकेडोनिया अञ्चलला खालै म्हि डादेन छ्याम खबा धुइरी एनीगदे तयार आरेबा स्याज्जी भिसम डनी पेःतोःला। ओच्छे एनीगदेएनोन ल्हानान पेःतोःला। तिग्दा भिसम डन्से एनीगदेथोरी ल्हानान भर लबा मुला। 5 थेतबासेलमा एनीगदेसे पिन्ना भिषी कबुल लबा भेटी डा खबा भन्दा डाच्छान दिक्ना लबाला लागिरी डाइ आलेगदेदा एनीगदे मुबा ग्लारी पुइखबान ज्यबा तला भिषी म्हन्जी। ओच्छे चु भेटी खालैला करकापसे आहिन, तर हाडलान सेमग्याम पिन्बा भेटी तगै।

ल्हानान द्बवासे ल्हानान बाली दुइला

6 तर च्याइना द्बवा म्हिसे च्याइनान बाली दुइला, ओच्छे ल्हाना द्बवा म्हिसे ल्हानान बाली दुइला भिबा ताम एनीगदेसे थाम्तेःगो। †7 ओच्छे जम्मान म्हिसे हाडला सेमसे म्हन्बा अन्धार पिन्गो। पिन्गे आम्हन्सम खालैला करकापरी तसी थापिन्गो। तिग्दा भिसम सेमहेन्सेन ताड्सी पिन्बा म्हिदा परमेश्वरसे माया लमुला। 8 परमेश्वरसे एनीगदेदा जम्मान स्हे तोःबा भन्दा ल्हानान पिन्ना। जमाहेन्से एनीगदेदेन छ्याम सदन ल्हानान स्हेगदे तला, ओच्छे एनीगदेसे ज्यबा गेला लागिरी स्हान्दोगदेदा पिन्बारी खम्ला।

9 बचनरीनोन चुह्ण्ड भिषी भिबा मुला,

“थेसे सेमहेन्सेन ताड्सी प्राडबोगदेदा पिन्ना।

ओच्छे थेसे लबा ज्यबा गे जुकजुकधोनान चिला।” †

10 खेती लबा म्हिदा परमेश्वरसेन द्बवारी ब्लुदेन चबारी चबा स्हे पिन्ना, थेसेन एनीगदेदा ब्लु पिन्ना ओच्छे फुइना लसी ल्हेना लला। एनीगदेसे लबा थे ज्यबा गेरी परमेश्वरसे मोलम पिन्बासे लमा स्हान्दोगदेदा ह्यो लबारी खम्ला। †11 एनीगदेसे ज्यबा सेमसे पिन्खमौ भिषी परमेश्वरसे एनीगदेदा जम्मान स्हेरी मोलम पिन्ना। ओच्छे एनीगदेसे पिन्बा भेटी डन्से अर्गु मण्डलीगदेदा पिन्मा थेनीगदेसे परमेश्वरदा धन्यवाद पिन्ना। 12 एनीगदेसे पिन्बा भेटीग्याम परमेश्वरला म्हिगदेला खॉचो जे टारेब तबा आहिन। तर एनीगदेसे पिन्बा भेटीसे लमा थेनीगदेसे परमेश्वरदा ल्हानान धन्यवाद पिन्ना। 13 एनीगदेसे लबा थे ज्यबा गेग्याम एनीगदेसे हाड खाह्ण्डबा म्हि हिन्ना भिषी उन्बा मुला। एनीगदेसे ख्रीष्टला थार्बा पिन्बा समाचारदा विश्वास लसी कुल्बा

ताम इयान्बासे लमा, एनीगदेसे ह्याडदेन छ्याम मुबा स्हेगदे सेमहेन्सेन ताड्सी थेनीगदेदेन स्थान्दोदा पिन्बा ताम म्राड्बासे लमा म्हिगदेसे परमेश्वरला मानदेन जयजयकार लला। ¹⁴ परमेश्वरसे एनीगदेदा ल्हानान दयामाया लबासे लमा थेनीगदेसे एनीगदेदा ल्हानान माया लसी एनीगदेला लागिरी प्रार्थना लला। ¹⁵ पाड्सी पाड्बारी आखम्बा मोलम † पिन्बाला लागिरी परमेश्वरदा धन्यवाद तगै।

पावलसे ह्याडला गे जोगब लबा

10 एनीगदे न्हडला कोइ कोइसे डा एनीगदेदेन छ्याम चिमा चा सोजो तसी ताम लमुला, ओच्छे एनीगदेग्याम फेसी निमाहेन्से चा बड्हुला भिसी पाड्मुला। दाहेन्से ख्रीष्टसे पिन्बा सेमदेन दयाग्याम एनीगदेदा डा पावलला बिन्ती मुला। ² जुन म्हिगदेसे इन्दा जम्बुलिडला आज्यबा बानीबेहोर थोबा म्हि हिन्ना भिसी म्हन्बा मुला, थे म्हिगदेदा डा एनीगदे मुबा ग्लारी खबा धुइरी डाइ बड्आतोःगै। ³ हिन्ना, दान्दे य्हाड जम्बुलिडरी मुला, तसैनोन ख्रीष्टदा डोआसेबा म्हिगदेसे ह्इ लसी य्हाडसे लडाइ आल। ⁴ इन्से लडाइरी थोबा हतियारगदे चा स्थान्दो म्हिगदेसे थोबा हतियार ह्इबा आहिन। तर इन्से थोबा हतियार चा शैतानना शक्तिदेन इन्ना गुडरी मुबा लुसीला तामगदेदा नाश लखम्बा परमेश्वरला शक्ति हिन्ना। ⁵ घमण्ड लसी परमेश्वरला ज्ञान बुद्धिला बिरोध लबा जम्मान तामगदेदा इन्से नाश लबा मुला। ओच्छे जम्मान म्हन्बा तामगदेदा ख्रीष्टसे कुल्बा ताम इयान्बा भिसी इन्से तहरी थान्बा मुला। ⁶ एनीगदे पुरान कुल्बा ताम अन्धार भ्रमाहेन्से कुल्बा ताम अन्धार आभ्रबागदे जम्मादान सजाय पिन्बारी इनी तयार मुला। ⁷ एनीगदेसे ह्याडसे म्राड्बा स्हेगदेदा जे च्यामुला। एनीगदे न्हडला खालैसे डा ख्रीष्टला म्हि हिन्ना भिसी पुरान विश्वास लबा मुला भिसम थेसे इनीएनोन ख्रीष्टला म्हि हिन्ना भिसी घोतोःला। ⁸ इन्से याड्बा अधिकारला बारेरी डाइ ल्हानान घमण्ड लसी पाड्बा मुसैनोन डा पेःआतोः। तिगदा भिसम चु अधिकार एनीगदेदा न्होइना लबाला लागिरी आहिन, तर एनीगदेदा विश्वासरी कोड्बा स्होबाला लागिरीन प्रभुसे पिन्बा हिन्ना। ⁹ डाइ एनीगदेदा भिबा चिठीगदे एनीगदेदा लोइना लबाला लागिरी भिबा हिन्ना भिसी थाम्हन्गो। ¹⁰ तिगदा भिसम कोइ कोइसे “पावलसे चिठीगदे भिबा धुइरी चा इन्दा बड्सी भिमुला। तर य्हाडदेन छ्याम हुप तबा धुइरी चा कमजोर तमुला, ओच्छे थेसे पाड्मा तिगै गे आखेल्बा तमुला” भिसी पाड्मुला। ¹¹ थेह्इबा म्हिगदेसे इन्से चिठीरी जुन ताम भिबा मुला, थेनोन अन्धार एनीगदेदेन छ्याम हुप तमाएनोन लला भिबा ताम घोतोःला।

¹² कोइ कोइ म्हिसे ह्याडसे ह्याडदान घेन म्हि भिसी म्हन्मुला, थेह्इबा म्हिगदेदेन छ्याम इनी ह्याडसे ह्याडदान दाँजब लसी च्याबा सेम आरे। तर थेनीगदेसे ह्याडसे ह्याडदान घेन स्होसी ह्याड ह्याड न्हडरी दाँजब लसी च्याजी भिसम थेनीगदे तिगै आघोबा मूर्ख म्हि दोला। ¹³ तर परमेश्वरसे पिन्बा अधिकारला बारेरी जे इन्से घेन दोसी ताम पाड्ला। परमेश्वरसे पिन्बा गेला बारेरी भन्दा अर्गु खजिबै तामला बारेरी इन्से घेन दोसी ताम आल। थेह्इ लसी घेन दोसी लबा गे एनीगदे मुबा ग्लारीनोन धोखबा मुला। ¹⁴ एनीगदे मुबा ग्लारी खनोन आखबा म्हिसे ह्इ लसी इन्से मुबा आरेबा तामगदेरी ताड्सी भ्रबा आरे। तिगदा भिसम जम्मान भन्दा डाच्छा ख्रीष्टला थार्बा पिन्बा समाचार भसी एनीगदे मुबा ग्लारी खबा म्हि इनीन हिन्ना। ¹⁵ स्थान्दोगदेसे लबा गेदा इन्से लबा हिन्ना भिसी ताड्सी आभ्र, तर इनी ह्याडसेन लबा गेरी जे ताड्ला। एनीगदेला विश्वास ल्हेबान निमा एनीगदेला गुडरी इन्से लबा गे झन बढब तबान निला भिबा इन्दा आश मुला। ¹⁶ चुह्इ लसी इन्से लबा गे एनीगदेला गुडरी बढब तबान निजी भिसम इन्से एनीगदेग्याम अर्गु य्हुल्सारीनोन थार्बा पिन्बा समाचार थेःना लबारी खम्ला। थेह्इ तजी भिसम इन्से स्थान्दोगदेसे डाच्छान गे लबा ग्लारी निबा सेम आल। तिगदा भिसम स्थान्दोगदेसे लबा गेदा इन्से लबा हिन्ना भिसी ताड्सी भ्रबा सेम आरे। ¹⁷ तर बचनरीनोन चुह्इ भिसी भिबा मुला, “जुन म्हिदा ताड्बा सेम मुला थे म्हि प्रभुला बारेरी ताड्गै।” ††¹⁸ तिगदा भिसम खालैसे डा ज्यबा म्हि हिन्ना

† चु पदरी मोलम भिबा चा ल्हानान ह्इबा बाइबल विद्वानगदेसे ख्रीष्ट हिन्ना भिसी पाड्बा मुला। †† 10:17 यर्मि ९:२४

भिदेमा थे ज्यबा म्हि आत। तर जुन म्हिदा प्रभुसे ज्यबा म्हि हिन्ना भिसी सुड्ला, थेनोन ज्यबा म्हि तला।

पावलदेन लुसीला ताम पाड्बा मुल चेला

11 डाइ मूर्ख ताम लसैनोन एनीगदेसे नाला भिबा डाइ आश लबा मुला। एनीगदेसे डादा नासी पिन्गो या। ² परमेश्वरसे एनीगदेदा लबा ह्इबान वास्ता डाइएनोन लबा मुला। तिगदा भिसम आबासे झामेदा म्हाछारला यारी जिम्मा पिन्बारी कबुल लबा ह्इ लसी डाइ एनीगदेदाएनोन चोखो म्रिडकोलादा ह्इ लसी ख्रीष्टला छ्यारी जिम्मा पिन्बा सेम लसी कबुल लबा मुला। ³ तर शैतानसे पुरखीला रुप किन्सी हव्वादा फसब लबा ह्इ लसी खालैसे एनीगदेला ख्रीष्टदा तेन्बा चोखो सेम न्होइना लला वा भिसी डा लोड्बा मुला। ⁴ तिगदा भिसम चुदे खालै म्हि खसी एनीगदेदा इन्से पाड्बा येशूला बारेरी भन्दा स्थान्दो येशूला बारेरी पाड्जी भिसम एनीगदेसे सेम लसी इयान्बा चीम। ओच्छे एनीगदेदा डाच्छा पाड्बा परमेश्वरला आत्मादेन थार्बा पिन्बा समाचारला बारेरी भन्दा स्थान्दो आत्मादेन समाचारला बारेरी पाड्जी भिसम थे ताम एनीगदेसे तुरुन्तन विश्वास लबा चीम। ⁵ थे जम्मान भन्दा घेन मुल चेला दोबा स्होबा म्हिगदे भन्दा डा तिगै तामरी जजा मुला भिसी म्हन्बा आरे। ⁶ डा ज्यना लसी ताम पाड्बारी आसेबा म्हि तसैनोन डादेन छ्याम ज्ञान बुद्धि चा मुला। चु जम्मान ताम इन्से डाच्छान एनीगदेदा ज्यना लसी घोना लसी उन्बा मुला।

⁷ एनीगदेदा घेन स्होबाला लागिरी डा जजा दोसी एनीगदेग्याम तिगै आकिन्ना परमेश्वरला समाचार थेःना लमा तिग डाइ पाप लबा हिन्ना? ⁸ डाइ एनीगदेदा ह्यो लबाला लागिरी अर्गु मण्डलीगदेग्याम टाड्गा किन्मा अर्गु मण्डलीगदेदा डाइ ठगब लबा ह्इबान तजी। ⁹ एनीगदेदेन छ्याम चिमा डादा खॉचो तबा धुइरी डाइ एनीगदेदा दुख आपिन्नी। डादा खॉचो तबा धुइरी जम्मान स्हेगदे माकेडोनियाग्यामसेन आलेगदेसे भसी पिन्मुबा। दान्देनोन एनीगदेदा दुख पिन्बा सेम आरे। चु तामला लागिरी डाइ एनीगदेदा डाच्छाएनोन दुख आपिन्नी, दाहेन्सेनोन डाइ एनीगदेदा दुख आपिन। ¹⁰ अखैया अञ्चलरी डाइ ताड्सी पाड्बा चु तामदा थापाङ्गो भिसी खालैसेन पाड्बारी आखम। तिगदा भिसम डाला सेमरी ख्रीष्टला सत्य बचन मुला। ¹¹ डाइ तिगदा चुह्इ लबा हिन्ना? तिग डाइ एनीगदेदा माया आलबासे लमा हिन्ना? डाइ एनीगदेदा माया लमुला भिबा ताम परमेश्वरदान था मुला। ¹² तर इन्से लबा ह्इबान गे † लबा मुला भिसी ताड्बारी म्हाइबा थे जम्मान भन्दा घेन मुल चेला दोबा स्होबा म्हिगदेदा ताड्सी भ्रबा मौका आपिन्बाला लागिरी डाइ दान्दे जुन गे लबान मुला थे गे सदन लला। ¹³ तिगदा भिसम थेह्इबा म्हिगदे ख्रीष्टला मुल चेला दोबा स्होसी स्थान्दोदा छल लसी भ्रबा फट्टा चेलागदे हिन्ना। ¹⁴ चु तिगै उदेक म्हन्तोःबा ताम आहिन। तिगदा भिसम शैतानसेनोन म्हिदा फसब लबाला लागिरी य्हाल य्हाल्बा स्वर्गदूत ह्इबान दोसी खमुला। ¹⁵ थेतबासेलमा शैतानना नोकरगदेएनोन परमेश्वरदा सेम निबागदे ह्इबान दोसी भ्रजी भिदेमा तिगै उदेक म्हन्तोःबा ताम आरे। परमेश्वरसे निसाफ लबा धुइरी थेनीगदेसे ह्याडसे लबा आज्यबा गेला सजाय नातोःला।

पावलसे नाबा दुखगदे

¹⁶ डाइ दोःसीनोन पाड्ला, डादा खालैसेन मूर्ख थाम्हन्गो। चुदे एनीगदेसे डादा मूर्ख म्हन्बा मुसम मूर्खन म्हन्सी डाइ पाड्मा विश्वास लउ। जमाहेन्से डाइएनोन तिगै तामरी जजाकर भिसै ताड्म्याड्ला। ¹⁷ हिन्ना, ताड्बा तामला बारेरी डाइ मूर्खसे ह्इ लसीन ताम लबान मुला। चु ताम चा डादा प्रभुसे कुल्बासे लमा पाड्बा आहिन। ¹⁸ ल्हानान म्हिगदे जम्बुलिडला तामगदेथोरी ताड्बासे लमा डाइएनोन ताड्ला। ¹⁹ एनीगदे मी ल्हानान ज्ञान बुद्धि मुबा म्हि दोजीम। ओच्छे मूर्ख म्हिगदेसे पाड्माएनोन ताड्सी ताड्सी नाबा चीम। ²⁰ चुदे खालै म्हिसे एनीगदेदा नोकर स्होसैनोन, ठगब लसैनोन,

‡ 11:3 उत्य ३:२-२० †† 11:9 फिलि ४:१५-१८ †† “इन्से लबा ह्इबान गे” भिबा चा पावलसे तिगै टाड्गा आकिन्ना लबा गे हिन्ना (२ कोर ११:७-९ स्होगो), तर घेन मुल चेला दोबा स्होबागदेसे चा टाड्गा किन्सी गे लमुबा।

ब्यसैनोन, एनीगदेदा धाक उन्सैनोन ओच्छे ग्रम्बारीन तोसैनोन एनीगदेसे थे जम्मान नाबा चीम।²¹ एनीगदेदा स्थान्दोगदेसे लबा ह्इबान डन्से लआखम्नी भिसी डा पे:तो:बा हिन्ना? आहिन।

तर खालै म्हि तिगै तामरी ताड्बा मुसम डाइएनोन थे तामरी ताड्बा। हिन्ना, डाइ मूर्ख म्हिसे ह्इ लसीन ताम लबान मुला।²² तिग थेनीगदे हिब्रू हिन्ना? डाएनोन हिब्रू हिन्ना। तिग थेनीगदे इस्त्राएली हिन्ना? डाएनोन इस्त्राएली हिन्ना। तिग थेनीगदे अब्राहामला सन्तान हिन्ना? डाएनोन अब्राहामला सन्तान हिन्ना।²³ तिग थेनीगदे ख्रीष्टला गे लबा म्हिगदे हिन्ना? म्योबा म्हिसे ह्इ लसीन डाइ चु तामगदे पाड्बान मुला। थेनीगदे भन्दा मी डा इन ज्यना लसी ख्रीष्टला गे लबा म्हि हिन्ना। थेनीगदेसे भन्दा डाइ ल्हानान दुख लसी गे लजी। ओच्छे थेनीगदे भन्दा डा ल्हानान रेम इयाल्खानरी परब तजी। थेनीगदेदा भन्दा डादा कोर्सासेनोन ल्हानान तोजी। ओच्छे गाते रेम मी डा सिला ह्इनोन तजी।^{†24} डादा यहूदीगदेसे डारेमधोना चुड्सी तोजी। थेनीगदेसे डादा डारेम डारेमधोना बोगल गिकसे च्युक कुरेमधोना कोर्सासे तोजी।^{††25} सोमरेमधोना डादा कडीसे तोजी। तिरेम युडबासेनोन तोजी। सोमरेमधोना डा क्रे:बा पानी जहाजएनोन न्होड्जी। ओच्छे धिन गिक म्हुन गिक डा समुन्दरीन चिजी।[‡]

²⁶ ख्रीष्टला समाचार थे:ना लसी भ्रमा डा स्योडरी परब तसी, ओच्छे व्होगदेग्याम, हाडलान म्हि यहूदीगदेग्याम, अर्गु यहुलला म्हिगदेग्याम, शहररीनोन, तोडतोडबा ग्लारीक्यार निमाएनोन, समुन्द्रग्याम भ्रमाएनोन, लुसीला ताम पाड्सी भ्रमा आलेगदेग्याम दुख नातो:जी।^{‡‡27} डा गाते रेम मी म्हेर्बारी आम्याड्नी तसैनोन आब्लेना दुख लसी गे लजी, गाते रेम चबा थुड्बा आयाड्ना फोड्थानोन चितो:जी ओच्छे क्वान आरेबासे लमा खड्बा नासीनोन चितो:जी।²⁸ ओते जे आहिन, मण्डलीगदेला बारैरीनोन डादा धिन धिनोन सुर्दा तमुबा।²⁹ खालै म्हि विश्वासरी कमजोर तबा म्राड्जी भिसम डाएनोन कमजोर तबा ह्इनोन छोर्मुला, ओच्छे खालै म्हि पापरी फसब तबा म्राड्जी भिसम डादा सेमरी ल्हानान दुख तमुला।

³⁰ चुदे डा ताड्बान तो:जी भिसम डाला कमजोर तामगदे उन्मा ताड्बाला।³¹ डाइ पाड्बा तामगदे लुसीला ताम आहिन भिबा प्रभु येशूला आबा व्हाडला परमेश्वरदान था मुला। थेदा व्हाडसे सदन जयजयकार लतो:ला।³² दमस्कस भिबा शहररी मुबा धुडरी अरितस भिबा ग्लेला हाकिमसे डादा चुड्बाला लागिरी ग्ला ग्लारी सिपाहीगदे थान्मुबा।^{‡‡33} तर डादा सदनरी झाड्सी पर्खालला इयालग्याम मार पुड्बासे लमा डा थे ग्लेला यारी परब आतनी।

पावलसे म्राड्बा म्हाड

12 तिगै फाइदा आरेसेनोन डा ताड्बाला। ओच्छे डादा प्रभुसे उन्मा तामदेन डाइ म्राड्बा म्हाडला बारैरी एनीगदेदा पाड्बाला।² च्युक ब्लि दिड डाच्छाला ताम हिन्ना, ख्रीष्टदा विश्वास लबा म्हि गिकदा स्वर्गला जम्मान भन्दा घ्रेन ग्लाधोनान भोर्जी। थे म्हिदा^{‡‡} डाइ डोसेबा मुला, तर थेदा ल्हुडरी साँच्चिन भोर्बा हिन्ना कि आहिन थे ताम डादा था आरे, परमेश्वरदान था मुला।³ डाइ दो:सी पाड्बाला, स्वर्गधोनान भोर्बा थे म्हिदा डाइ डोसेबा मुला। तर ल्हुडरीन भोर्बा हिन्ना कि आहिन, थे ताम डादा था आरे, परमेश्वरदान था मुला।⁴ थेदा स्वर्गरी थीसी भोर्जी, थेरी थेसे म्हिसे पाड्आखम्बा घ्रेन घ्रेन ताम थे:जी, थेह्इबा ताम म्हिदा पाड्आपुड्मुला।⁵ थेह्इबा म्हिला बारैरी डा ताड्बाला, डा हाडलान बारैरी चा आताड्। तर डा चा डाला कमजोर ताम उन्मा धुडरी जे ताड्बाला।⁶ डाइ ताड्सीन भ्रमा सेम लसैनोन डा मूर्ख म्हि चा आदो। तिगदा भिसम डाइ सत्य ताम पाड्बा मुला। डाइ लबा गे म्राड्बादेन डाला बारैरी थे:बा भन्दा ल्हाना घ्रेन म्हि भिसी खालैसेन थाम्हनौ भिबा डाला सेम मुला।

⁷ डाइ प्रभुसे उन्मा म्हाड म्राड्जी भिसी घ्रेन दोसी थाभ्रगै भिसी डाला ल्हुडरी पुजुसे भ्लोबा ह्इबान स्हेर पिन्जी। थेसे शैतानना दूतसे ह्इ लसी

† 11:23 मुल १६:२३ †† 11:24 व्यव २५:३ ‡ 11:25 मुल १६:२२; १४:१९ ‡‡ 11:26 मुल ९:२३; १४:१५ ‡‡‡ 11:32 मुल ९:२३-२५ ‡‡‡‡ चुरी चा पावलसे "थे म्हि" भिसी हाडसे हाडदान पाड्बा हिन्ना।

डादा धुड् धुडरी ताड्सी थाभ्रगै भिसी दुख पिन्मुला।⁸ "डादा चु दुखग्याम फेसी पिन्गो" भिसी डाइ प्रभुदा सोमरेमधोना बिन्ती लजी।⁹ तर प्रभुसे डादा "डाइ एदा ल्हानान दयामाया लबा मुला, ए कमजोर मुबा धुडरी डाला शक्ति एग्याम उन्मा मुला" भिसी सुड्जी। थेतबासेलमा डा कमजोर मुबा धुडरी डा इन ल्हानान ताड्बा मुला। तिगदा भिसम थे धुडरी परमेश्वरसे ख्रीष्टला शक्ति डाग्याम उन्मा मुला।¹⁰ थेतबासेलमा ख्रीष्टला लागिरी कमजोर तसैनोन, डादा बेड्जत लसैनोन, बिरोध लसैनोन, स्थान्दोसे दुख पिन्सैनोन, ओच्छे आपत विपत तसैनोन डा ताड्बाला। तिगदा भिसम कमजोर तबा धुडरी डा इन भड्बा तला।

कोरिन्थला म्हिगदेला लागिरी पावलसे सुर्दा लबा

¹¹ डा मूर्ख ह्इबा दोबा मुला, डादा मूर्ख ह्इबान स्होबा चा एनीगदेन हिन्ना। एनीगदेसे डाला बारैरी ज्यबा ताम लतो:मुबा। पाड्बान तो:मा डा तिगैनोन आहिन, तर थे जम्मान भन्दा घ्रेन मुल चेला दोबा स्होबा म्हिगदे भन्दा डा जजा आहिन।¹² डाइ एनीगदेला गुडरी जम्मान दुख नाबान शक्तिशाली चिनुगदेदेन उदेकला गेगदे लसी डा पक्कान मुल चेला हिन्ना भिसी एनीगदेदा उन्मा मुला।¹³ खजिबा तामला बारैरी एनीगदे अर्गु मण्डलीगदे भन्दा जजा तजी? चु ताम जे हिन्ना, डाइ अर्गु मण्डलीगदेरी लबा गे गिक चा एनीगदेला लागिरी आलनी। थे गे चा तिग हिन्ना भिसम डाइ एनीगदेग्याम टाड्गा आकिन्नी। चु डाला गल्ती हिन्ना, चुला लागिरी डादा माफ लउ।

¹⁴ डा दो:सीनोन एनीगदे मुबा ग्लारी खबारी छ्याड्बा मुला। दान्दे खमा डा एनीगदे मुबा ग्लारी खबा सोमरेम तला। तर एनीगदेसे डाला लागिरी तिगै खर्च लआतो:। डाइ एनीगदेला सम्पत्ति म्हाड्बा आहिन, डाइ मी एनीगदेदा चा म्हाड्बा हिन्ना। तिगदा भिसम आबा आमासे कोलागदेग्याम आकिन, तर आबा आमासे चा कोलागदेला लागिरी सोसी थान्ना।¹⁵ डाडेन छ्याम मुबा जम्मान स्हेगदे डाइ एनीगदेदा ताड्सी ताड्सी पिन्ना। ओच्छे एनीगदेला लागिरी डा सिबारीनोन तयार मुला। डाइ एनीगदेदा सेमहेन्सेन ल्हानान माया लबा मुला भिसम तिगदा एनीगदेसे चा डादा जजाकर जे माया लबा?

¹⁶ एनीगदेसे डाला लागिरी तिगै खर्च लआतो:नी, चु ताम एनीगदेदान था मुला। तर डा बातो तसी डाइ एनीगदेदा फसब लजी भिसी खालैसे पाड्मुला।¹⁷ तिग डाइ पुड्खबा म्हिगदेग्याम एनीगदेदा फसब लसी डाइ तिगै स्हे किन्बा मुला? ¹⁸ डाइ तीतसदा एनीगदे मुबा ग्लारी निउ भिसी पुड्खजी, ओच्छे थेदेन छ्याम डाइ स्थान्दो आलेदाएनोन पुड्खबा मुबा। तीतससेनोन एनीगदेग्याम तिगै स्हे आकिन्नी। थेदेन डा सेम गिक तसी गे गिकनोन लबा मुला।

¹⁹ चु जम्मान ताम डन्से हाडदान जोगब लबाला लागिरी पाड्बा हिन्ना भिसी एनीगदेसे म्हुन्मुला तला। चु जम्मान ताम परमेश्वरला डाच्छा ख्रीष्टदेन छ्याम गिक तसी डन्से पाड्बान मुला। डन्ना सेम निबा ह्गोदे, डन्से चु जम्मान गे लबा चा एनीगदेदा विश्वासरी कोड्बा स्होबाला लागिरीन हिन्ना।²⁰ तिगदा भिसम डा थेरी खबा धुडरी डाइ म्हुन्बा अन्धार एनीगदेदा आस्याप, ओच्छे एनीगदेसेनोन हाडसे म्हुन्बा अन्धार डादा आस्याप वा भिसी डा लोड्बा मुला। एनीगदे हाड हाड न्हडरी छेबा बड्बा लबा, डाह लबा, बोमो लबा, हाडला जे फाइदा च्याबा, स्थान्दोदा बड्बा, म्हिला तामगन लबा, हाडसे हाडदान डा ह्इबा खालै आरे भिसी म्हुन्बागदे ओच्छे अलमल तना लबा म्हिगदे स्याप्ला वा भिसी डा लोड्बा मुला।²¹ डा एनीगदे मुबा ग्लारी दो:सी खमा डादा डाला परमेश्वरसे एनीगदेला डाच्छा जजा स्होला भिसी डा लोड्बा मुला। ओच्छे डाइ ल्हानान म्हिगदेला लागिरी सुर्दा लतो:ला। तिगदा भिसम डाच्छा नड्बा गे लबादेन स्थान्दोदेन छ्याम ब्रेल्सी भ्रमा ओच्छे सेमरी जे लड् म्हुन्बा थेनोन लसी पाप लबा म्हिगदेसे हाडला पाप खलासी परमेश्वरपट्टि दो:बा आरे तला।

पावलसे अझ होशियार तना लबा

13 डा दो:सीनोन एनीगदे मुबा ग्लारी खला, दान्दे खमा सोमरेम तला। बचनरी चुहड् भिसी भ्रिबा ताम ढन्गो, "खालै म्हिदा सजाय

पिन्बाला लागिरी थेसे लबा गे म्हाड्बा म्हे न्ही सोमसे पाड्बाग्यामसेन सजाय पिन्तो:बा कि पिन्आतो:बा भिसी था याड्ला।" ¹² न्हीरेमला पालरी डा एनीगदेदेन छ्याम मुबा धुइरी डाइ एनीगदेदा होशियार तना लबा मुबा। दान्दे डा एनीगदेदेन छ्याम आरेबा धुइरीनोन डाइ एनीगदेदा होशियार तना लबान मुला। डा दो:सी एनीगदे मुबा ग्लारी खमा डाच्छा डाच्छा पाप लबागदेदेन स्थान्दोगदे खलैदान डाइ आख्ला। ³ थे धुइरी ख्रीष्ट डादेन छ्याम गिक तसी डाग्याम ताम पाड्बा चीम कि आपाड्बा चीम भिसी एनीगदेसे च्याबारी म्हाड्बा ताम था याड्ला। एनीगदेला गुडरी गे लमा ख्रीष्ट खाइमै कमजोर आत, तर शक्तिशाली तला। ⁴ तिग्दा भिसम ख्रीष्ट कमजोर तसी कुसरी सिजी। तर परमेश्वरला शक्तिसे थेदा सोना लजी। थेह्ण्ड लसीन डनीएनोन ख्रीष्ट ह्ण्डनोन कमजोर तबा मुला। तर एनीगदेला गुडरी गे लबाला लागिरी परमेश्वरसेन हाडला शक्तिग्याम डन्दा ख्रीष्टदेन छ्याम सोना लला।

⁵ एनीगदेसे पक्का विश्वास लबा मुला कि आरे भिसी हाडसे हाडदान च्यागो। चुह्ण्ड लसी च्यामा येशू ख्रीष्ट एनीगदेदेन छ्याम आस्याप्नी भिसम एनीगदेसे पक्का विश्वास लबा आरेबा चीम भिसी था याड्ला। ⁶ ओच्छे डन्से पक्का विश्वास लबा मुला भिबा तामएनोन एनीगदेसे था याड्ला भिसी डाइ आश लबा मुला। ⁷ एनीगदेसे आज्यबा गे थालगै भिसी डन्से परमेश्वरदेन छ्याम प्रार्थना लबान मुला। डनी चा ज्यबा म्हे हिन्ना भिसी उन्बाला लागिरी डन्से चुह्ण्ड लसी प्रार्थना लबा आहिन। तर एनीगदेसे डनी

पक्का मुल चेला आहिन भिसी म्हन्सैनोन एनीगदेसे चा ठीक ठीक गे जे लखमै भिसी डन्से प्रार्थना लबा हिन्ना। ⁸ तिग्दा भिसम डनी सत्य तामला बिरोध लसी गे आल, तर सत्य तामला लागिरी जे गे लला। ⁹ डनी कमजोर तसैनोन एनीगदे चा भड्बा तजी भिसम डनी ताड्ला। ओच्छे एनीगदे डन विश्वासरी पूरान पाको म्हे दोगै भिसी डन्से प्रार्थना लबा मुला। ¹⁰ डा एनीगदे मुबा ग्लारी खमा प्रभुसे डादा पिन्बा अधिकारग्याम डाइ एनीगदेदा बड्आतो:गै भिसीन डा एनीगदेदेन छ्याम आरेबा धुइरी चु चिठी भिबान मुला। एनीगदेदा न्होड्ना लबाला लागिरी आहिन, तर एनीगदेदा विश्वासरी कोड्बा स्होबाला लागिरीन थे अधिकार प्रभुसे डादा पिन्बा हिन्ना।

चिठीला थुमरी पाड्बा ताम

¹¹ ज्योज्यो आले नाना आडागदे, दाहेन्से डादा विदा पिन्गो। एनीगदे सेमहेन्सेन ज्यबा म्हे दोबारी म्हाड्गो, ओच्छे गिकसेम गिकदा आँट पिन्सी हाड हाड न्हडरी ढिक्सी चिउ भिबा डाला बिन्ती मुला। जमाहेन्से शान्तिदेन माया पिन्बा परमेश्वर एनीगदेदेन छ्याम धन्छ्याला। ¹² ओच्छे गिकसेम गिकदा सेमहेन्सेन माया लसी फ्याफुल्गो। ¹³ परमेश्वरला चुरी मुबा जम्मान म्हेगदेसे एनीगदेदा फ्याफुल्बा मुला। प्रभु येशू ख्रीष्टला दयामायादेन परमेश्वरला माया ओच्छे परमेश्वरला आत्माला संगती एनीगदे जम्मानदेन छ्याम तगै।

चु चिठीला बारेरी पाडतो:मा

येशूला मुल चेला पावलसे भिबा मुबा (गलाती १:१)।

एन्टिओखिया शहररी भिबा मुबा।

ओस्पन ईश्वी संवत् ४८-५७ (विक्रम संवत् १०५-११४) सालला गुडरी भिबा मुबा।

गलातीया अञ्चलला गला ग्लारी मुबा मण्डलीगदेदा भिबा मुबा (गलाती १:२)।

येशूला बारेरी थार्बा पिन्बा समाचार थे:ना लबारी छ्याइमाहेन्से अर्गु यहुलला म्हेगदेसे येशूदा विश्वास लजी। ओच्छे ख्रीष्टदा पक्का विश्वास लबा म्हे दोबारी परमेश्वरसे मोशादा पिन्बा ठिम अन्धार भ्रतो:ला कि भ्रआतो: भिबा तामगदे थोन्जी। पावलसे मोशादा पिन्बा ठिम अन्धार भ्रआतो: भिसी पाड्जी, तिगदा भिसम ख्रीष्टसे पिन्बा जुकजुकधोनाला जुनीला मुल जग चा विश्वास हिन्ना। विश्वासग्यामसेन जम्मान म्हेगदे परमेश्वरदा सेम निबा म्हे दोला। तर एशियारी परब तबा रोम यहुल्लाला गलातीया अञ्चलरी मुबा मण्डलीगदेरी कोइ कोइ म्हेगदे खबा मुबा। पावलसे लोप्बा ताम थाबान थेनीगदेसे मोशादा पिन्बा ठिम अन्धार आभ्रनी भिसम खालैनोन परमेश्वरदा सेम निबा म्हे दोबारी आखम भिसी पाड्जी। पावलसे लुसीला तामरी विश्वास लबा गलातीयाला म्हेगदेदा सत्य विश्वासरी दो:सी भबाला लागिरी चु चिठी भिबा मुबा। पावलसे ह्वाड ख्रीष्टला मुल चेला हिन्ना भिबा ताम उन्बाला लागिरी ओच्छे मुल चेलागदेला अधिकारला बारेरी ज्यना लसी घोना लबाला लागिरी चु चिठी भिबा हिन्ना। ओच्छे पावलसे ह्वाडदा म्हेसे मुल चेला स्होबा आहिन, तर परमेश्वरसेन मुल चेला स्होबा हिन्ना भिसी पाड्बा मुला। ओच्छे ह्वाडसे थे:ना लबा थार्बा पिन्बा समाचार चा अर्गु यहुलला म्हेगदेला लागिरी हिन्ना भिसी पाड्बा मुला। थेह्वाड लसीन विश्वासग्यामसे जे म्हे यहुल परमेश्वरदा सेम निबा म्हे दोला भिसी पाड्बा मुला। पावलसे लिच्छापट्टिला अध्यायगदेरी चा य्हाडसे स्हान्दोगदेदा माया लजी भिसम विश्वास लबा अन्धारला बानीबेहोर म्हाड्वा, ओच्छे ख्रीष्टदा विश्वास लमाहेन्से स्हान्दोदा माया लबारी खम्ला भिसी पाड्बा मुला।

मुल तामगदे

प्याफुल्बादेन थार्बा पिन्बा समाचार गिक जे मुला १:१-१०

पावलदा परमेश्वरसेन मुल चेला स्होबा १:११-२:२१

परमेश्वरला दयामायाला समाचार ३:१-४:३१

ख्रीष्टसे पापला तहग्याम फेबादेन ख्रीष्टदा विश्वास लबागदेला बानीबेहोर ५:१-६:१०

चिठीला थुमरी भिबा ताम ६:११-१८

पावलसे गलातीयाला विश्वासीगदेदा भिबा चिठी

1 लास्सो डा पावल खालै म्हेगदेसे धम्सी ओच्छे खालैसे स्होसी मुल चेला दोबा आहिन। तर येशू ख्रीष्टदा सिबाग्याम सोना लबा परमेश्वर आबादेन येशू ख्रीष्टसे डादा मुल चेला स्होबा हिन्ना। 2 चुरी डादेन छ्याम मुबा जम्मान ज्योज्यो आलेगदेदेन डाग्याम गलातिया अञ्चलरी मुबा मण्डलीगदेदा प्याफुल्ला!

3 एनीगदेदा परमेश्वर आबादेन य्हाडला प्रभु येशू ख्रीष्टग्याम दयामायादेन शान्ति तगै। 4 य्हाडदा चु जम्बुलिडला आज्यबा बानीबेहोरग्याम फेबारी परमेश्वर आबासे म्हन्बा अन्धार प्रभु येशू ख्रीष्ट य्हाडला पापला लागिरी सिजी। 5 थेतबासेलमा परमेश्वरदा सदन मानदेन जयजयकार तगै। आमेन।

थार्बा पिन्बा समाचार चु भन्दा अर्गु आरे

6 एनीगदे म्हाड्सी डा उदेक तबा मुला, तिगदा भिसम ख्रीष्टला दयामायाग्याम एनीगदेदा इयोइबा परमेश्वरदा एनीगदेसे चुदे योनान म्ते:सी अर्गु समाचार इयान्सी भ्रमुला। 7 च्यागो, थार्बा पिन्बा समाचार चा चु भन्दा अर्गु आरे। तर कोइ कोइ म्हेसे चा एनीगदेदा अलमल तना लसी ख्रीष्टला समाचारदा न्होड्ना लबारी म्हाड्बा मुला। 8 ओच्छे डन्से एनीगदेदा थे:ना लबा थार्बा पिन्बा समाचारदा उल्टो स्होसी लोप्बागदे चा, डनी तसे स्वर्गदूतनीन तसे थे नाश तगै। 9 एनीगदेसे विश्वास लबा थार्बा पिन्बा

समाचारदा उल्टो स्होसी पाड्बा म्हे चा नाशनीन तला। दान्दे डाइ पाड्बा चु ताम एनीगदेदा डाइ डाच्छापानोन पाड्बा मुला। 10 तिग चुह्वाड लसी डाइ म्हेदा ताड्ना लबारी म्हाड्बा हिन्ना? डाइ मी परमेश्वरदा ताड्ना लबारी म्हाड्बा हिन्ना। तिग डादा म्हेगदेसे मान लगै भिसी डाइ म्हन्बा हिन्ना? चुदे डाइ चुह्वाड म्हन्बा हिन्सम, डा ख्रीष्टला गे लबा म्हेनोन आहिन।

परमेश्वरसे पावलदा धम्बा

11 ज्योज्यो आले नाना आडागदे, डाइ एनीगदेदा थे:ना लबा थार्बा पिन्बा समाचार म्हेगदेसे स्होसी पाड्बा ताम आहिन भिबा एनीगदेसे था याड्गै भिसी डाइ म्हन्बा मुला। 12 तिगदा भिसम डादा चु खालै म्हेसे उन्बाएनोन आहिन, खालै म्हेसे पिन्बाएनोन आहिन। तर येशू ख्रीष्ट ह्वाडसेन डादा चु उन्बा हिन्ना।

13 डाच्छा यहूदी धर्म तेन्बा धुडरी डाला बानीबेहोर खाह्वाड्बा मुबा भिसी एनीगदेदा थानोन मुला। थे धुडरी डाइ परमेश्वरला मण्डलीदा ल्हानान दुख पिन्सी थेदा नाश लबारी म्हाड्जी। 14 थे धुडरी यहूदी धर्म तेन्बा डा च्योच्योला म्हेगदे न्हडरी जम्मान भन्दा सेबा घोबा डानोन मुबा। डाइ आखे

म्हमेला रिमठिम ल्हानान तेन्मुबा।¹⁵ तर डा न्हवा भन्दा डाच्छान डादा दयामाया लसी धम्बा परमेश्वरसेन,¹⁶ डाइ अर्गु यहुलला म्हिगदेदा थार्बा पिन्बा समाचार थे:ना लबारी खमै भिसी थेदा ह्वाडलान झा डादा डोसेना लबा ज्यबा छोर्जी। थे धुइरी डाइ खालै म्हिदेन छ्याम इयोइबा छार्बा लसी आभ्रनी।¹⁷ ओच्छे डा यरूशलेम शहररी डा भन्दा डाच्छाला मुल चलागदेदा हुप तबारीनोन आनिनी, बरु तुरुन्तन अरब यहुल्सारी निजी। जमाहेन्से दमस्कस भिबा ग्लारीन दो:सी खजी।

¹⁸ ओच्छे डा सोम दिड लिच्छा जे यरूशलेमरी पत्रुसदा हुप तबारी निजी। थेरी डा थेदेन छ्याम साता न्हीधोना चिजी।¹⁹ डाइ थेरी प्रभुला आले याकूबदा बाहेक स्हान्दो खालै मुल चलागदेदा आस्याजी।²⁰ डाइ एनीगदेदा भिबा चु ताम सत्य हिन्ना, डाइ लुसीला ताम पाड्बा आरे भिबा परमेश्वरदान था मुला।²¹ जमाहेन्से डा सिरियादेन किलिकिया भिबा ग्लारी निजी।²² थे धुइधोना ख्रीष्टदा विश्वास लबा यहूदिया अञ्चलरी मुबा म्हिगदेसे डादा डोआसेबा,²³ “डाच्छा य्हाडदा ल्हानान दुख पिन्सी य्हाडसे लबा विश्वासदा नाश लबारी म्हाइबा म्हि ह्वाडसेन दान्दे थेनोन विश्वासला बारेरी पाड्सी भ्रमुला” भिबा ताम जे थेनीगदेसे थे:बा मुबा।²⁴ डाइ थेंह्वाड गे ख्लासी परमेश्वरदा विश्वास लबासे लमा थेनीगदेसे परमेश्वरला जयजयकार लजी।

पावलदेन मुल चलागदे

2 च्युक ब्लि दिड लिच्छा दो:सी डा बारनाबासदेन छ्याम तीतसदा भोर्सी यरूशलेम शहररी निजी।^{#2} डादा परमेश्वरसे उन्बा अन्धार डा थेरी निजी। ओच्छे डाइ लबा गे खेरो थानिगै भिसी डाइ अर्गु यहुलला म्हिगदेदा थे:ना लबा थार्बा पिन्बा समाचारनोन थेला सेबा घोबा मण्डलीदा च्याबा म्हिगदेदा कुनी गिकरी भोर्सी पाड्जी।³ तर डादेन छ्याम निबा तीतसदा ग्रीक यहुलला म्हि तसैनोन खतना लतो:ला भिसी खालैसेन आपाड्नी।⁴ तसैनोन लुसीला ताम लोप्बा गाते ज्योज्यो आलेगदे मण्डलीरी खसी खतना लतो:ला भिसी डनी ख्रीष्ट येशूदेन छ्याम गिक तबासे लमा ठिमला तह्य्याम फेबा तामला चिवा लजी। ओच्छे डाच्छाला ठिमला तहरी थान्बारी म्हाइजी।⁵ तर थार्बा पिन्बा समाचारला सत्य ताम एनीगदेसे थाम्ले:गै भिसी डन्से थेनीगदेला तामदा वास्तान आलनी।

⁶ थेनीगदे सेबा घोबा मण्डलीदा च्याबा म्हिगदे तसैनोन डाइ पाड्बा तामदा आहिन भिसी आपाड्नी। ओच्छे थेनीगदे सेबा घोबान मुसैनोन डादेन थेनीगदे न्हडरी तिगै फरक आरे। तिगदा भिसम परमेश्वरसे खालैला ली च्यासी गे आलमुला।^{#7} तर परमेश्वरसे यहूदीगदेला गुडरी पत्रुसदा थार्बा पिन्बा समाचार थे:ना लबा गे जिम्मा पिन्बा ह्वाड लसी डादाएनोन परमेश्वरसे अर्गु यहुलला म्हिगदेला गुडरी थार्बा पिन्बा समाचार थे:ना लबा गे जिम्मा पिन्जी भिबा ताम थेनीगदेसे था याड्जी।⁸ खाह्वाड लसी परमेश्वरसे मुल चेला पत्रुसग्याम यहूदीगदेला गुडरी गे लजी थेंह्वाड लसीन डाग्यामसेनोन परमेश्वरसे अर्गु यहुलला म्हिगदेला गुडरी गे लजी।⁹ मण्डलीला मण्डलीदा च्याबा म्हिगदे याकूब, पत्रुसदेन यहून्नासे डाथोरी परमेश्वरला दयामाया मुला भिसी था याड्जी। थेतबासेलमा थेनीगदेसे बारनाबासदेन डादा मान लसी संगती लबारी जिम्मा पिन्जी। जमाहेन्से डनी चा अर्गु यहुलला म्हिगदेला गुडरी गे लबा थेनीगदे चा यहूदीगदेला गुडरी गे लबा तामरी पक्का लजी।¹⁰ खाँचोरी परब तबा प्राडबोगदेदा ह्यो लतो:ला भिबा ताम चा थेनीगदेसेनोन लजी। चु गे चा डादाएनोन लबा सेम मुबा।

पावलसे पत्रुसला गल्ली उन्बा

¹¹ तर पत्रुस एन्टिओखिया भिबा ग्लारी धोखमाहेन्से डाइ थेदा जम्मालान डाच्छा बिरोध लजी। तिगदा भिसम थेसे लबा गे गल्ली मुबा।¹² थे याकूबसे पुइखबा म्हिगदे धोखबा भन्दा डाच्छा चा अर्गु यहुलला म्हिगदेदेन छ्यामनोन चिसी चबा थुइबा लमुबा। तर याकूबसे पुइखबा म्हिगदे धोखमाहेन्से अर्गु यहुलला म्हिगदेदेन छ्याम आचिनी। तिगदा भिसम खतना लबा म्हिगदे म्हाइसी थे लोड्बा।¹³ जमाहेन्से अर्गु यहूदीगदेसेनोन थेसे ह्वाडनोन लजी।

† 1:14 मुल २२:३ †† 1:16 मुल ९:३-६; २२:६-१०; २६:१३-१८ ‡ 1:18 मुल ९:२६-३० †† 2:1 मुल ११:३०; १५:२ †† 2:6 व्यव १०:१७

थेनीगदेला चुह्वाड बानीबेहोर म्हाइसी बारनाबासएनोन थेनीगदे ह्वाडन दोबारी म्हाइजी।¹⁴ तर डाइ थेनीगदेदा थार्बा पिन्बा समाचार अन्धार सत्यरी भ्रवा आम्नाड्नी। थेतबासेलमा थेनीगदे जम्मालान डाच्छा डाइ पत्रुसदा “ह्वाड यहूदी तसीनोन अर्गु यहुलला म्हिगदे ह्वाड लसी भ्रमुला भिसम खाह्वाड लसी अर्गु यहुलला म्हिगदेदा चा यहूदी ह्वाड लसी भ्रउ भिसी पाड्खम्ला” भिसी पाड्जी।

¹⁵ हिन्बाम य्हाड अर्गु यहुलला पापी म्हिगदे ह्वाड आतना न्हमान यहूदी हिन्ना।¹⁶ य्हाड यहूदीगदेएनोन परमेश्वरदा सेम निबा म्हि दोबा य्हाडला ठिम अन्धार गे लसी आहिन। तर येशू ख्रीष्टदा विश्वास लबासे लमान परमेश्वरदा सेम निबा म्हि दोबा हिन्ना भिबा ताम य्हाडदा था मुला। य्हाडसेनोन परमेश्वरदा सेम निबा म्हि दोबाला लागिरी येशू ख्रीष्टदा विश्वास लजी। तिगदा भिसम ठिम अन्धार गे लबासे लमा आहिन, तर ख्रीष्टदा लबा विश्वासग्याम परमेश्वरदा सेम निबा म्हि दोखमौ भिसी हिन्ना। थेतबासेलमा ठिम अन्धार गे लसी खालैनोन परमेश्वरदा सेम निबा म्हि दोबारी आखम।^{##17} चुदे य्हाड ख्रीष्टदेन छ्याम गिक तसी परमेश्वरदा सेम निबा म्हि दोबारी म्हाइमा खालैसे य्हाडदाएनोन पापीन पाड्जी भिसम तिग ख्रीष्टसे य्हाडदा पाप लपुड्बा हिन्ना? पक्कान आहिन।¹⁸ तिगदा भिसम ह्वाडसेन फुप्बा स्हे दो:सी ह्वाडसेन स्होजी भिसम ह्वाडसे ह्वाडदान अपराधी स्होबा हिन्ना।¹⁹ थेतबासेलमा परमेश्वरला लागिरी सोखमौ भिसी परमेश्वरसे मोशादा पिन्बा ठिमग्याम ठिमला लागिरी डा सिबा मुला।²⁰ डादा ख्रीष्टदेन छ्यामनोन कुसरी साइबा मुला। थेतबासेलमा दाहेन्से सोबा डा आहिन, ख्रीष्ट डादेन छ्याम तसी सोबा मुला। दान्दे सोबा चु ल्हुइ चा परमेश्वरला झादा विश्वास लसी सोबा हिन्ना। थेसे डादा माया लसी ह्वाडला ज्याननोन डाला लागिरी पिन्जी।²¹ डाइ परमेश्वरला दयामायादा हेला लबारी आखम। तिगदा भिसम परमेश्वरसे मोशादा पिन्बा ठिमग्याम म्हि परमेश्वरदा सेम निबा दोबारी खम्बा हिन्सम ख्रीष्ट सिबा चा तिगै गे आतनी।

विश्वासग्याम याड्बा मोलम

3 गलातियारी मुबा मूर्ख म्हिगदे, एनीगदेदा खाल्से मोहनी लजी? येशू ख्रीष्ट कुसरी सिजी भिबा ताम एनीगदेलान ओन्हाडरी घोना लसी पाड्ना पाड्नान खाह्वाड आघोबा? ² थेह्वाड लसी एनीगदेसे याड्बा परमेश्वरला आत्मा परमेश्वरसे मोशादा पिन्बा ठिम अन्धार गे लसी याड्बा कि थार्बा पिन्बा समाचार थे:सी विश्वास लबासे लमा याड्बा हिन्ना? डादा पाड्ना।³ एनीगदे खाह्वाड मूर्ख, परमेश्वरला आत्माग्याम शुरु तसी दान्दे गेग्याम पूरा तबारी म्हाइबा? ⁴ तिग एनीगदेसे नाबा दुख खेरो निबा हिन्ना? पक्कान आहिन।⁵ थेतबासेलमा परमेश्वरसे एनीगदेदा ह्वाडला आत्मा पिन्बा मुला, ओच्छे एनीगदेला गुडरी उदेकला गेगदे लबा मुला। तिग चु जम्मान परमेश्वरसे मोशादा पिन्बा ठिम अन्धार एनीगदेसे गे लबासे लमा तबा हिन्ना, कि थार्बा पिन्बा समाचार थे:सी विश्वास लबासे लमा तबा हिन्ना?

⁶ अब्राहामला विश्वासदा च्यागो, “थेसे परमेश्वरदा विश्वास लबा मुबा। ओच्छे परमेश्वरसे थेदा सेम निबा म्हि हिन्ना भिसी सुड्जी।”^{##7} थेतबासेलमा जुन जुन म्हिसे परमेश्वरदा विश्वास लला, थेनीगदेन अब्राहामला सन्तान हिन्ना भिसी एनीगदेसे घोउ।^{##8} डाच्छान परमेश्वरला बचनरी अर्गु यहुलला म्हिगदेएनोन विश्वासग्यामसेन परमेश्वरदा सेम निबा म्हि दोला भिसी भिबा मुबा। थेतबासेलमा दडबोरीन परमेश्वरसे अब्राहामदा “एग्यामसे जम्मान यहुलला म्हिगदेसे मोलम याड्बा” भिसी ज्यबा समाचार थे:ना लबा मुबा।^{##9} थेतबासेलमा ख्रीष्टदा विश्वास लबागदेसे विश्वास लबा अब्राहामसे ह्वाड लसीन मोलम याड्बा मुला।

¹⁰ तर परमेश्वरसे मोशादा पिन्बा ठिमथोरी जे भर लसी चिबागदेसे सजाय याड्बा। तिगदा भिसम परमेश्वरला बचनरी “परमेश्वरसे मोशादा पिन्बा ठिमरी मुबा जम्मान ताम आड्यान्बा म्हिगदेसे सजाय याड्बा” भिसी भिबा मुला।^{##11} थेतबासेलमा परमेश्वरसे मोशादा पिन्बा ठिमथोरी जे भर लबा म्हि चा खालैनोन परमेश्वरदा सेम निबा म्हि दोबारी आखम भिबा ताम प्रस्टन

##† 2:16 भजन १४३:२; रोमी ३:२०, २२ ## 3:6 उत्प १५:६; रोमी ४:३ § 3:7 रोमी ४:१६ §† 3:8 उत्प १२:३ §†† 3:10 व्यव २७:२६

मुला। तिगदा भिसम “विश्वासग्यामसे जे परमेश्वरदा सेम निबा म्हि दोसी सोखम्ला” भिसी बचनरी भिबा मुला।¹² तर विश्वासग्याम लबा गे परमेश्वरसे मोशादा पिन्बा ठिमसे लबारी आखम। बरु परमेश्वरला बचनरी चुहड् भिसी भिबा मुला, “जुन म्हिसे थे ठिम अन्धार गे लला, थे, थे ठिम अन्धारनोन भ्रला।”¹³ परमेश्वरसे मोशादा पिन्बा ठिम अन्धार य्हाडसे याड्तो:बा सजाय ख्रीष्टसेन नाजी, ओच्छे सय फासी य्हाडदा थे सजायग्याम फेजी। तिगदा भिसम “परमेश्वरग्याम सजाय याड्बादा जे कुसरी च्योसी साइला” भिसी परमेश्वरला बचनरी भिबा मुला।¹⁴ थेतबासेलमा अब्राहामसे याड्बा परमेश्वरला मोलम अर्गु य्हुलला म्हिगदेसेनोन याड्गै भिसी ख्रीष्ट येशूसे पापला सय फासी य्हाडदा पापग्याम फेजी। ओच्छे परमेश्वरसे ह्हाडला आत्मा पिन्बा भिसी लबा कबुल य्हाडसे विश्वासग्याम याड्ला।

परमेश्वरसे लबा कबुल

¹⁵ च्यागो ज्योज्यो आले नाना आडागदे, डाइ एनीगदेदा म्हि न्हीला गुडरी लबा कबुलला बारेरी पाड्ला, थेन्नीसे कबुल लसी कागजरी सही छाप लमाहेन्से थेरी भिबा ताम लिच्छा घटबट लबारी आखम, आहिन भिबारी आखम।¹⁶ परमेश्वरसे अब्राहामदा सन्तान पिन्ना भिसी कबुल लबा मुबा। थेदा ल्हानान सन्तान पिन्ना भिसी आहिन, तर गिक जे पिन्ना भिसी कबुल लबा मुबा। थे सन्तान गिक भिबा चा ख्रीष्टनोन हिन्ना।¹⁷ डाइ पाड्बा ताम चा चुनोन हिन्ना, परमेश्वरसे डाच्छान लबा कबुलदा ग्यार्जा ब्लिसे बोगल गिकसे च्युड दिड लिच्छा मोशादा पिन्बा ठिमसे थाबारी आखम, थेहड् लसी थाबारी खम्बा हिन्सम परमेश्वरसे लबा कबुल भ्याड्सेला मुबा।¹⁸ चुदे मोशादा पिन्बा ठिम तेन्सी य्हाडसे परमेश्वरला सन्तान दोबा हक याड्बा हिन्सम, थे हक परमेश्वरसे लबा कबुलग्याम याड्बा आतसेला मुबा। तर परमेश्वरसे लबा कबुल अन्धार थे हक अब्राहामदा पिन्सी जिन्बा मुबा।¹⁹ थेहड् भिसम दाहेन्से परमेश्वरसे मोशादा पिन्बा ठिम तिगदा तो:जी? तिगदा भिसम म्हिगदेसे लबा पाप गेगदे उन्बाला लागिरी ओच्छे परमेश्वरसे अब्राहामदा सन्तान पिन्ना भिसी लबा कबुल पूरा आततेधोनाला लागिरी जे हिन्ना। चु ठिम म्हिगदेदा परमेश्वरदेन छ्याम ढिक्ना लबाला लागिरी स्वर्गदूतगदेग्याम म्हि गिकसे स्होबा हिन्ना।²⁰ परमेश्वर गिक जे मुबासे लमा गिकला लागिरी अर्गु ढिक्ना लबा म्हि खालै आतो:।

परमेश्वरसे मोशादा पिन्बा ठिमला गे

²¹ थेहड् भिसम परमेश्वरला ठिम तिग परमेश्वरसे लबा कबुलला बिरोधरी मुला? आरे। चुदे म्हिगदेसे थार्बा याड्गै भिसी थे ठिम पिन्बा हिन्सम ठिमग्यामसेन म्हिगदे परमेश्वरदा सेम निबा म्हि दोसेला मुबा।²² तर परमेश्वरला बचनसे चुहड् भिसी पाड्बा मुला, जम्बुलिडला जम्मान म्हि पापला तहरी मुला। थेतबासेलमा जुन म्हिसे येशू ख्रीष्टदा विश्वास लला, थेसे परमेश्वरसे पिन्ना भिसी लबा कबुल विश्वासग्यामसेन याड्ला।

²³ तर ख्रीष्टदा विश्वास लबा धुड खबा भन्दा डाच्छा य्हाड मोशादा पिन्बा ठिमला तहरी मुबा, ओच्छे विश्वास आलतेधोना य्हाडदा थे ठिमसेन खीसी थान्बा मुबा।²⁴ विश्वासग्यामसेन परमेश्वरदा सेम निबा म्हि दोगे भिसी मोशादा पिन्बा ठिमसे य्हाडदा लोप्वान ख्रीष्ट मुबा ग्लाधोना निबा ग्याम उन्बा जिम्मा पिन्बा मुबा।²⁵ तर विश्वास खसी जिन्बासे लमा दाहेन्से य्हाड मोशादा पिन्बा ठिमला तहरी चिआतो:।

²⁶ तिगदा भिसम ख्रीष्ट येशूदा लबा विश्वासग्यामसेन एनीगदे जम्मान परमेश्वरला सन्तान दोबा हिन्ना।²⁷ थेहड् लसीन एनीगदे न्हडला जुन म्हि ख्रीष्टदेन छ्याम गिक तसी बत्तिस्मा किन्बा मुला, थेनीगदे जम्मान ख्रीष्ट ह्हाडबान दोबा मुला।²⁸ थेतबासेलमा यहूदी तसै, ग्रीक तसै, नोकर तसै, नोकर आहिनसै, हेम्फेबे तसै, म्रिडम्हेमे तसै ख्रीष्ट येशूदेन छ्याम एनीगदे जम्मान गिकनोन हिन्ना।²⁹ एनीगदे ख्रीष्टला हिन्सम अब्राहामला सन्तान

हिन्ना, ओच्छे परमेश्वरसे पिन्ना भिसी कबुल लबा सम्पत्तिला हकएनोन याड्बा मुला।³⁰

4 डाइ पाड्बा चा चुनोन हिन्ना, खालै म्हिसे ह्हाडला आबा आमाला जम्मान धन सम्पत्ति याड्बा हक मुसैनोन जजा मुतेधोना थे नोकर ह्हाडबान हिन्ना।² ओच्छे थे ग्रेन आततेधोना आबासे च्याबारी जिम्मा पिन्बा म्हिला तहरी चिसी पाड्बा ताम ड्यान्तो:मुला।³ ख्रीष्ट फेखबा भन्दा डाच्छा य्हाड जम्मान थेहड्बान मुबा। ओच्छे जम्मान म्हिगदे कोलागदे ह्हाडबान मुबा। थे धुडरी जम्मान म्हिगदे जम्बुलिडरी मुबा आत्माला शक्तिगदेला तहरी मुबा।⁴ तर धुड ठीक तमाहेन्से परमेश्वरसे ह्हाडलान झादा पुडखजी। थे म्रिडम्हेमेला कोखग्याम न्हसी यहूदी ठिमला तहरी धन्ख्याजी।⁵ य्हाडदा ठिमला तहग्याम सय फासी फेबाला लागिरी ओच्छे ह्हाडलान कोलागदे स्होबाला लागिरी परमेश्वरसे थेदा पुडखबा हिन्ना।⁶ दाहेन्से य्हाड परमेश्वरला सन्तान दोबा मुला। थेतबासेलमा परमेश्वरसे ह्हाडलान झाला आत्मा य्हाडला सेमरी पुडखबा मुला। थेनोन आत्मासे य्हाडदा सेमहेन्सेन “परमेश्वर आबा” भिसी पाड्पुड्हुला।⁷ थेतबासेलमा परमेश्वरसे एनीगदेदा नोकर आहिन, तर ह्हाडलान कोलागदे स्होबा मुला। ओच्छे एनीगदेसे याड्तो:बा हकएनोन याड्बा मुला।

पावलसे गालीलला म्हिगदेदा वास्ता लबा

⁸ परमेश्वरदा डोसेबा भन्दा डाच्छा एनीगदेसे मुनोन आरेबा ल लुदा तेन्मुबा। ओच्छे थेलान तहरी चिमुबा।⁹ तर एनीगदेसे परमेश्वरदा डोसेबा भन्दाएनोन परमेश्वरसे एनीगदेदा डोसेबा मुला। थेहड् भिसम दो:सी एनीगदे तिगदा जम्बुलिडरी मुबा थेहड्बा गे आखेल्बा कमजोर आत्माला नोकर दोसी भ्रबा?¹⁰ एनीगदेसे चा यहूदीगदेसे धड्बा धिन, ला, धुडदेन दिडदा तेन्सी परमेश्वरदा ताड्ना लबारी म्हाड्बा मुला।¹¹ थेतबासेलमा डाइ एनीगदेला लागिरी लबा गे खेरोरीन निजीम भिसी डादा सुर्दा तबा मुला।

¹² ज्योज्यो आले नाना आडागदे, एनीगदेएनोन डा ह्हाडबान दोगो भिबा डाला बिन्ती मुला। तिगदा भिसम डाएनोन एनीगदे ह्हाडबान मुबा। एनीगदेसे डादा तिगै आज्यबा लबा आरे।¹³ जम्मान भन्दा डाच्छा डाइ एनीगदेदा थार्बा पिन्बा समाचार थे:ना लबा धुडरी डा आखम्बा मुबा भिबा एनीगदेदा थानोन मुला।¹⁴ थे धुडरी डा आखम्बासे लमा एनीगदेदा ल्हानान गाहो तबा मुबा। तसैनोन एनीगदेसे डादा हेला आलनी। बरु परमेश्वरला दूतदेन ख्रीष्ट येशूदा ह्हाड लसी एनीगदेसे डादा मान लजी।¹⁵ थे धुडरी एनीगदे गाते ताड्बा मुबा, तबा हिन्सम एनीगदेसे ह्हाडला मीनोन ते:सी पिन्तो:सै डादा पिन्बारी तयार मुबा भिबा ताम डादा था मुला। तर दान्दे चा एनीगदेदा तिग तजी?¹⁶ तिग दान्दे डाइ सत्य ताम पाड्मा चा डा एनीगदेला शत्रु दोबा हिन्ना?

¹⁷ स्हान्दो म्हिगदेसेनोन एनीगदेदा वास्ता लमुला। तर ज्यबा सेमसे वास्ता लबा आहिन। थेनीगदेसे एनीगदेदा डाइ लोप्वान ताम खलासी ह्हाडला लिच्छा भ्रबा म्हि स्होबारी म्हाड्बा हिन्ना।¹⁸ डा एनीगदेदेन छ्याम मुबा धुडरी जे झन्सी गे लबा आहिन, तर डा आरेसै सदन गे लसी चिबा चा ज्यबा ताम हिन्ना।¹⁹ डाला कोलागदे, एनीगदे ख्रीष्ट ह्हाडबान आदोतेधोना डादा कोला न्हबारी छ्याड्बा म्रिडम्हेमेदा तबा ह्हाडबान दुख तबा मुला।²⁰ दान्दे डा एनीगदेदेन छ्यामनोन चिसी चु भन्दा अर्गुन ताम लम्याड्बा हिन्सम गाते ज्यबा तसेला मुबा। तर पाड्न्नोन तो:मा डाइ एनीगदेला लागिरी तिग लतो:बा थे डादा था आरे।

हागारदेन सारा

²¹ परमेश्वरसे मोशादा पिन्बा ठिमला तहरी चिबारी म्हाड्बागदेसे डादा पाड्गो, ठिमसे तिग भिमुला थे ताम एनीगदेदा था आरे?²² तिगदा भिसम चुहड् भिसी भिबा मुला, अब्राहामला झा न्ही मुबा, गिक चा नोकरस्याग्याम न्हबा ओच्छे गिक चा ह्हाडलान म्रिडग्याम न्हबा मुबा। थेला ह्हाडलान म्रिड चा नोकर आहिनमुबा।²³ नोकरस्याग्याम न्हबा झा चा सेमसे म्हन्बा अन्धार न्हबा मुबा। तर नोकर आहिनबा ह्हाडलान म्रिडग्याम न्हबा झा चा परमेश्वरसे पिन्ना भिसी लबा कबुल अन्धार न्हबा मुबा।²⁴ चु म्रिडम्हेमे न्हीनोन

† 3:11 हब २:४†† 3:12 लेवी १८:५‡ 3:13 व्यव २१:२३‡† 3:16 उत्प १२:७‡‡ 3:17 प्रस्था १२:४०‡‡† 3:18 रोमी ४:१४

‡‡‡ 3:29 रोमी ४:१३§ 4:22 उत्प १६:१५; २१:२

परमेश्वरसे लबा कबुलगदे ह्इबा हिन्ना। चु कबुलगदे तिग हिन्ना भिबा ताम चु प्रिडम्हेमे न्हीग्यामसेन म्हाड्बा मुला। प्रिडम्हेमे गिक चा हागार हिन्ना। थे चा परमेश्वरसे सीनै भिबा गडरी मोशादा पिन्बा ठिम ह्इबान हिन्ना। थे ठिमला नोकरगदे चा थेलान कोलागदे हिन्ना।

²⁵ अरब यहुल्साला सीनै भिबा गड चा हागार भिबा नोकरस्या ह्इबान हिन्ना। ओच्छे परमेश्वरसे मोशादा पिन्बा ठिमदा तेन्बा दान्देलारुशलेमदेन ठिमला लिच्छा भ्रवा जम्मान म्हिगदे थे नोकरस्याला सन्तान ह्इबान हिन्ना।

²⁶ तर स्थान्दो प्रिडम्हेमे सारा चा स्वर्गला यरूशलेम ह्इबान हिन्ना। थे खालैला नोकर आहिन, थे चा य्हाडला आमा हिन्ना। ²⁷ तिग्दा भिसम

बचनरी चुह्इ भिसी भिबा मुला,

“कोलागदे आतबा प्रिडम्हेमे,

ए ताङ्गो।

ओच्छे कोला न्हा बेथानोन था आयाड्बा प्रिडम्हेमे,

ए सेमहेन्सेन ताड्सी क्रिङ्गो।

तिग्दा भिसम कोला तबा प्रिडम्हेमेला भन्दा कोला आतबा

प्रिडम्हेमेला कोलागदे ल्हानान तला।” †

²⁸ ज्योज्यो आले नाना आडागदे, य्हाडएनोन अब्राहामदेन साराला झा इसहाक ह्इबान परमेश्वरसे लबा कबुल अन्धार न्हाबा सन्तान हिन्ना। ²⁹ तर थे धुडरी सेमसे म्हन्बा अन्धार न्हाबा झासे परमेश्वरला आत्मासे म्हन्बा अन्धार न्हाबा झादा दुख पिन्मुबा, दान्देनोन थेह्इबान मुला। ³⁰ तर बचनरी तिग भिसी भिबा मुला? “थे नोकरस्यादेन थेला झादा दिमग्याम ते:गो। तिग्दा भिसम नोकर आहिन्बा ह्हाडलान प्रिडग्याम न्हाबा झासे याड्बा हक नोकरस्याला झासे आयाड्” भिसी भिबा आरे? ³¹ थेतबासेलमा ज्योज्यो आले नाना आडागदे, य्हाड नोकरस्याला सन्तान आहिन, तर नोकर आहिन्बा प्रिडम्हेमेला सन्तान हिन्ना।

ख्रीष्टसे ठिमला तहग्याम फेबा

5 य्हाडदा ठिमला तहग्याम ख्रीष्टसे फेबा हिन्ना। थेतबासेलमा भड्बा तसी चिउ, ओच्छे दो:सी थे ठिमला नोकर दोबारी थाम्हाड्गो।

² च्यागो, डा पावलसेन एनीगदेदा चु ताम पाड्बा मुला, एनीगदे खतना लबा ठिम तेन्बा हिन्सम एनीगदेला लागिरी ख्रीष्टला तिगै गे आरे। ³ डाइ दो:सी एनीगदेदा पाड्बा, खतना लतो:ला भिसी पाड्बा म्हिगदे जम्मासेन परमेश्वरसे मोशादा पिन्बा ठिम पूरान तेन्तो:ला। ⁴ मोशादा पिन्बा ठिम तेन्सी परमेश्वरदा सेम निबा म्हि दोबारी म्हाड्बा एनीगदे ख्रीष्टग्याम थारेड तबा मुला। ओच्छे परमेश्वरला दयामायाग्यामएनोन थारेड तबा मुला। ⁵ तर डन्से लबा आश चा विश्वासग्याम सदन परमेश्वरदा सेम निबा म्हि दोबा हिन्ना। थे आश चा परमेश्वरला आत्माग्यामसेन याड्बा भिसी य्हाडसे भ्रान्सी चिबा मुला। ⁶ तिग्दा भिसम ख्रीष्ट येशूदा विश्वास लमाहेन्से खतना लसै आलसै तिगै आहिन। तर गिकसेम गिकदा माया लसी विश्वासला गे लबा चा मुल ताम हिन्ना।

⁷ हिन्बाम एनीगदे ज्यबा ग्यामरी भ्रबान मुबा। तर दान्दे चा खाल्से एनीगदेदा सत्य ग्याम खलासी भ्रबारी कर लजी। ⁸ चुह्इ लपुड्बा चा एनीगदेदा इयोड्बा परमेश्वरसे आहिन। ⁹ चु लुसीला ताम चा जजाकी खमीर ह्इबान हिन्ना। जजाकी खमीर युसै ज्योप्बा जम्मान ब्रादा भोना लला। ¹⁰ एनीगदेसे डाला ताम बाहेक स्थान्दो म्हेला ताम आड्ग्याम भिसी डाइ प्रभुरी विश्वास लबा मुला। एनीगदेदा अलमल लसी आतो:बा ग्यामरी भ्रपुड्बा जुन म्हि मुसै थेसे परमेश्वरग्याम खबा सजाय नातो:ला। ¹¹ ज्योज्यो आले नाना आडागदे, डाइ अझ खतना लनोन तो:ला भिसी पाड्सी भ्रसम तिग्दा चुह्इ लसी दुख नातो:सेला। खतना लबा ताम सत्य हिन्सम ख्रीष्ट येशू कूसरी सिबा ताम पाड्मा खालैसेन बिरोध आलसे मुबा। ¹² एनीगदेदा सत्य ग्याम खलापुड्बागदेसे मी तिग्दा खतना जे लसे, बरु थेनीगदेसे मी ल्हुडला स्हेनोन थसै तसेला।

¹³ ज्योज्यो आले नाना आडागदे, ठिमला तहग्याम थार्बाला लागिरीन एनीगदेदा इयोड्बा हिन्ना। थेतबासेलमा थार्बा याड्सीनोन पापी बानीबेहोर अन्धार गे थालउ। तर माया लसी गिकसेम गिकदा ह्यो लउ। ¹⁴ तिग्दा भिसम परमेश्वरसे मोशादा पिन्बा जम्मान ठिम “एसे ह्हाडला खिम्जेमदा ह्हाडदा ह्इनोन माया लउ” भिसी सुड्बा बचन गिकरीन पूरा तबा मुला। †

¹⁵ तर एनीगदे ह्हाड ह्हाड न्हडरी जन्तुगदे ह्इ लसी छेबा बड्बादेन ख्राप्बा लबा मुला भिसम होशियार तसी चिउ। आहिन्सम एनीगदे ह्हाड ह्हाडग्यामनोन नाश तसी निला।

परमेश्वरला आत्माग्याम याड्बा जुनी

¹⁶ थेतबासेलमा एनीगदेसे डाला ताम इयान्गो, एनीगदे परमेश्वरला आत्मासे कुल्बा अन्धार भ्रउ। तर पापी बानीबेहोरग्याम जे लड म्हन्बा थेनोन लसी थाभ्रउ। ¹⁷ तिग्दा भिसम पापी बानीबेहोरदा परमेश्वरला आत्मासे ओच्छे परमेश्वरला आत्मादा पापी बानीबेहोरसे बिरोध लला। एनीगदेसे जुन गे लबारी म्हाडला थे गे लआपुड्बाला लागिरी थेन्नी न्हडरी गिकसेम गिकला बिरोध लला। ¹⁸ तर चुदे एनीगदे परमेश्वरला आत्मासे कुल्बा अन्धार भ्रजी भिसम दाहेन्से एनीगदे ठिमला तहरी आरे।

¹⁹ पापी बानीबेहोरग्याम लबा गेगदे चुनोन हिन्ना: ब्रेल्सी भ्रबा, नड्बा ताम म्हन्बा, सेमरी जे लड म्हन्बा थेनोन लबा, ²⁰ मूर्तिगदेदा पूजा लबा, तन्त्रमन्त्र लबा, शत्रु स्होबा, छेबा बड्बा लबा, डाह लबा, बोमो लबा, ह्हाडला जे ग्याम च्याबा, फेना लबा, ह्हाड ह्हाडला समूह स्होसी भ्रबा, ²¹ डाह लबा, इय्होड्सी भ्रबा, मोजमजा लबादेन चुह्इबान अर्गु पाप गेगदे लबा। डाइ चुह्इबा गे लबा म्हिगदेदा परमेश्वरला यहुल्सारी वाड्आम्याड् भिसी डाच्छाएनोन पाड्बा मुबा, दान्देनोन पाड्बान मुला।

²² तर परमेश्वरला आत्मासे य्हाडदा माया लबारी, ताड्ना लबारी, ढिक्सी चिबारी, नाबारी, दया लबारी, स्थान्दोदा ज्यबा लबारी, विश्वासला गे लबारी, ²³ सोजो दोबारी, ह्हाडसे ह्हाडदान तहरी थान्बारी ह्यो लला। चु तामगदेदा बिरोध लबा खजिबै ठिम आरे। ²⁴ तर जुन म्हिगदे ख्रीष्ट येशूला हिन्ना, थेनीगदेसे चा पापी बानीबेहोरग्याम थोन्बा जम्मान पापी सेमगदे कूसरी टांगब लसी जिन्बा मुला। ²⁵ य्हाड परमेश्वरला आत्माग्याम सोबासे लमा परमेश्वरला आत्मासे कुल्बा अन्धारनोन भ्रड्। ²⁶ य्हाड घमण्ड लसी गिकसे गिकदा बोमो खना लबादेन ईख थान्बा म्हि दोबारी आत।

गिकसेम गिकदा ह्यो लउ

6 ज्योज्यो आले नाना आडागदे, चुदे खालै म्हिसे आज्यबा गे लबा स्याप्जी भिसम एनीगदे परमेश्वरला आत्माग्याम पाको दोबागदेसे थेदा ज्यना लसी घोना लउ। तर एनीगदे ह्हाडएनोन फसब आतबारी होशियार तसी चिउ। ² दुखरी गिकसेम गिकदा ह्यो लउ। चुह्इ लसी एनीगदेसे ख्रीष्टसे लोप्बा ठिम पूरा लला। ³ तिग्दा भिसम तिगै गे आखेल्बा म्हिसे डा ह्इबा खालै आरे भिसी म्हन्जी भिसम थेसे ह्हाडसे ह्हाडदान धोका पिन्बा हिन्ना। ⁴ जम्मासेन ह्हाड ह्हाडसे लबा गे ठीक मुला कि आरे थे ह्हाड ह्हाडसेन च्यागो। ह्हाडसे लबा गे ठीक मुसम ताङ्गो। तर स्थान्दोसे भन्दा डाइ ज्यबा गे लजी भिसी घमण्ड थालउ। ⁵ तिग्दा भिसम जम्मासेन ह्हाडला गे ह्हाड ह्हाडसेन लतो:ला।

⁶ ह्हाडदा परमेश्वरला बचन लोप्सी पिन्बा म्हिगदेदा ह्हाडदेन छ्याम मुबा ज्यबा स्हेगदे पिन्गो।

⁷ थेतबासेलमा खालैसे ह्हाडसे ह्हाडदान धोका थापिन्गो। परमेश्वरदा खालैसेन ठट्टा लबारी आत। तिग्दा भिसम म्हिसे जे सूला थेनोन रोला। ⁸ जुन म्हि ह्हाडला पापी बानीबेहोर अन्धार भ्रला, थे थेनोन पापी बानीबेहोरसे लमा नाश तला। तर जुन म्हि परमेश्वरला आत्मासे कुल्बा अन्धार भ्रला, थेसे परमेश्वरला आत्माग्यामसेन जुकजुकधोनाला जुनी याड्ला। ⁹ दाहेन्से य्हाड ज्यबा गे लबारी भ्रलप्वारी आत। तिग्दा भिसम आभलप्वारी ज्यबा गे लजी भिसम य्हाडसे ठीक धुडरी बाली दुड्याड्ला। ¹⁰ थेतबासेलमा मौका याड्बा

‡‡ 5:14 लेवी १९:१८

† 4:27 यशै ५४:१ †† 4:29 उत्प २१:९ ‡ 4:30 उत्प २१:१० ‡† 5:9 १ कोर ५:६

धुइरी चा य्हाडसे जम्मान म्हिदा ज्यबा लतोःला। अझ ख्रीष्टदा विश्वास लबागदेला म्हेमेदा चा य्हाडसे ज्यबा लनोन तोःला।

छार जुनी

¹¹ च्यागो, चु ताम एनीगदेसे था याङ्गै भिसी डाइ ह्हाडलान यासे घेन घेन हिगीरी भिबा मुला।

¹² च्यागो, डा चा ज्यबा म्हि हिन्ना भिसी म्हिगदेदा उन्बारी म्हाइबागदेसे जे एनीगदेदा खतना लनोन तोःला भिसी कर लमुला। ख्रीष्टला कुससे जे थार्ना लला भिबा तामरी विश्वास लबासे लमा स्र्हान्दो म्हिगदेग्याम दुख नाआतोःगै भिसी थेनीगदे जोगब तबाला लागिरी जे चु ताम पाङ्बा हिन्ना। ¹³ जुन म्हिगदेसे एनीगदेदा खतना लतोःला भिसी पाङ्मुला थेनीगदे ह्हाडसेनोन ठिमरी पाङ्बा अन्छार गे आलमुला। तर घमण्ड लबारी जे एनीगदेसे खतना

लगै भिसी थेनीगदेसे म्हन्मुला। ¹⁴ तर डा चा अर्गु तामरी घमण्ड आल, प्रभु येशू ख्रीष्ट कुसरी सिबा तामरी जे घमण्ड लला। तिगदा भिसम प्रभु येशू ख्रीष्ट कुसरी सिबासे लमा डाला लागिरी जम्बुलिङ्ग्याम खबा जम्मान तामगदे सिसी जिन्बा मुला, ओच्छे डाएनोन जम्बुलिङ्गला लागिरी सिसी जिन्बा मुला। ¹⁵ खतना लसै आलसै तिगै आहिन, तर परमेश्वरसे छार म्हि स्होबा चा मुल ताम हिन्ना। ¹⁶ चु ठिम अन्छार भ्रबागदे जम्मान परमेश्वरला म्हिगदेदा दयादेन शान्ति तला। दाहेन्से थेनीगदे जम्मान परमेश्वरला म्हिगदे हिन्ना। ¹⁷ दाहेन्से चु तामला लागिरी डाइ खालैग्यामसेन दुख नाआतोःगै। तिगदा भिसम डा येशूला गे लबा म्हि हिन्ना भिसी उन्बाला लागिरी डाला ल्हुइ नाड डामनोन डाम मुला। ¹⁸ ज्योज्यो आले नाना आडागदे, एनीगदेला आत्मादेन छ्याम य्हाडला प्रभु येशू ख्रीष्टला दयामाया तगै। आमेल।

चु चिठीला बारैरी पाडतो:मा

येशूला मुल चेला पावलसे भिबा मुबा (एफिसी १:१)।

रोम शहरला इयाल्खानग्याम भिबा मुबा।

ओस्पन ईश्वी संवत् ६१-६३ (विक्रम संवत् ११८-१२०) सालला गुडरी भिबा मुबा।

एफिसस शहररी मुबा मण्डलीदेन थेला डाम डामला ग्लारी मुबा मण्डलीगदेदा भिबा मुबा।

चु चिठीरी जम्मान भन्दा डाच्छा परमेश्वरसे म्हन्बा अन्धारला ख्रीष्टदा जम्मान स्हेला मुल स्होसी जम्मान स्हे ख्रीष्टला तहरी थान्जी भिसी भिबा मुला (एफिसी १:९-१०)। चु चिठी चा परमेश्वरला म्हिगदे ख्रीष्टदेन छ्याम गिक तसी परमेश्वरसे म्हन्बा अन्धार सोगै भिसी भिबा हिन्ना।

चु चिठीला डाच्छाला अध्यायरी खाह्ण्ड लसी व्हाड ख्रीष्टदेन छ्याम गिक तजी भिबा तामला बारैरी पाड्बा मुला। परमेश्वर आबासे ह्वाडला म्हिगदेदा धम्सी ह्वाडला झा येशू ख्रीष्टग्याम थेनीगदेला पापला दोष मेटब लसी पापग्याम फेजी, ओच्छे परमेश्वरसे ह्वाडसे लबा घेन कबुल ह्वाडला आत्मा बैना पिन्सी पक्का लजी। लिच्छापट्टिला अध्यायरी चा पावलसे चु चिठी पढब लबागदेदा ख्रीष्टदेन छ्याम गिक तबा अन्धारला बानीबेहोर उन्गो भिसी बिन्ती लबा मुला। परमेश्वरला म्हिगदे ख्रीष्टदेन छ्याम गिक तबा तामगदे उन्बाला लागिरी पावलसे चुह्ण्डबा तामगदे पाड्बा मुला। मण्डली चा ख्रीष्टला ल्हुइ ह्ण्डबान हिन्ना, मण्डलीला थोबो चा ख्रीष्ट हिन्ना। ओच्छे मण्डली दिम ह्ण्डबान हिन्ना, थे दिमला सुर युडबा चा ख्रीष्ट हिन्ना। थेह्ण्ड लसी मण्डली चाडछार ह्ण्डबान हिन्ना, ओच्छे म्हाछार चा ख्रीष्ट हिन्ना। चु चिठीरी पावलसे बलि, माफ, दयामायादेन चोखो ओच्छे ख्रीष्टला मायाला बारैरी घेन घेन ताम भिबा मुला।

मुल तामगदे

फ्याफुल्बा १:१-२

ख्रीष्टदेन ख्रीष्टदा विश्वास लबागदे १:३-३:२१

ख्रीष्टदेन छ्याम मुबा छार जुनी ४:१-६:२०

चिठीला थुमरी भिबा तामगदे ६:२१-२४

पावलसे एफिससला विश्वासीगदेदा भिबा चिठी

१ लास्सो, एफिससरी मुबा जम्मान परमेश्वरला म्हिगदेदा डा पावलग्याम फ्याफुल्बा! डा परमेश्वरसे ख्रीष्ट येशूला गे लबाला लागिरी धम्बा मुल चेला हिन्ना। एनीगदे, ख्रीष्ट येशूदा सदन विश्वास लसी चिबागदेदा, ^{†२} व्हाडला परमेश्वर आबादेन प्रभु येशू ख्रीष्टग्याम दयामायादेन शान्ति तगै।

ख्रीष्टग्याम याड्बा मोलम

^३ व्हाडला प्रभु येशू ख्रीष्टला आबा परमेश्वरला जयजयकार तगै। तिग्दा भिसम ख्रीष्टदेन छ्याम गिक तबासे लमा परमेश्वरसे व्हाडदा स्वर्गला जम्मान मोलम पिन्बा मुला। थे मोलमगदे चा चुनोन हिन्ना। ^४ चोखोदेन तिगै दोष आरेबा म्हि स्होबाला लागिरी परमेश्वरसे ख्रीष्टदेन छ्याम गिक स्होसी चु जम्बुलिड स्होबा भन्दा डाच्छान धम्बा हिन्ना। ^५ परमेश्वरसे व्हाडदा माया लसी येशू ख्रीष्टग्याम थेसे ह्वाडला सेमसे म्हन्बा ह्ण्डबान कोलागदे स्होबारी व्हाडदा डाच्छाहेन्सेन धम्बा मुबा। ^६ परमेश्वरसे ह्वाडला सेमहेन्से माया लबा झग्याम व्हाडदा ल्हानान दया लसी मोलम पिन्बा मुला। थेतबासेलमा व्हाडसे परमेश्वरला जयजयकार लतो:ला। ^७ परमेश्वरसे व्हाडदा ल्हानान दयामाया लबासे लमा व्हाडसे ख्रीष्टग्याम थार्बा याड्बा मुला। थेनोन ख्रीष्टला कासे व्हाडला पापला सय फासी व्हाडदा पापग्याम फेबा मुला। ^{†९} चुह्ण्ड लसीन परमेश्वरसे ह्वाडला पूरा ज्ञान बुद्धिग्याम थेला सेमला ताम व्हाडदा घोना लबा मुला। थेला सेमला ताम चा धुइ तमाहेन्से ह्वाडसे म्हन्बा

अन्धारला स्वर्गदेन जम्बुलिडरी मुबा जम्मान स्हेगदे ख्रीष्टसे ग्ला गिकरी पोप लसी शासन लबा हिन्ना। चु चा थेसे म्हन्बा अन्धार डाच्छाहेन्से ख्रीष्ट येशूग्याम स्होसी थान्बा ताम हिन्ना।

^{११} थेतबासेलमा परमेश्वरसे ह्वाडसे म्हन्बा अन्धार जम्मान ताम पूरा लबा मुला। थेह्ण्ड लसीन व्हाडदाएनोन ख्रीष्टदेन छ्याम गिक स्होसी थेला म्हि स्होबा मुला। ^{१२} ख्रीष्ट येशूथोरी डाच्छाहेन्सेन आश लबा डनी यहूदीगदेदा परमेश्वरसे थेला व्हालदेन शक्तिला जयजयकार लगै भिसी धम्बा मुला।

^{१३} थेह्ण्ड लसीन एनीगदेसेनोन थार्बा पिन्बा समाचार सत्य बचन थे:सी ख्रीष्ट येशूदा विश्वास लजी। थेतबासेलमा एनीगदेदा डालान हिन्ना भिसी परमेश्वरसे ह्वाडला आत्मासे छाप लबा मुला। चुनोन आत्मा परमेश्वरसे ह्वाडला म्हिदा पिन्ना भिसी लबा कबुल हिन्ना। ^{१४} व्हाड परमेश्वरला म्हिसे याड्तो:बा हकदेन पापग्याम पूरान फेला भिबा ताम उन्बाला लागिरी परमेश्वरसे थेला आत्मा बैना पिन्बा मुला। थेतबासेलमा व्हाडसे परमेश्वरला व्हालदेन शक्तिला जयजयकार लतो:ला।

पावलसे एफिससरी मुबा विश्वासीगदेला लागिरी लबा प्रार्थना

^{१५} थेतबासेलमा एनीगदेसे प्रभु येशूदा विश्वास लबा मुला भिबादेन परमेश्वरला म्हिगदेदा माया लबा मुला भिबा ताम थे:सी डाइ एनीगदेला लागिरी सदन परमेश्वरदा धन्यवाद पिन्बान चुह्ण्ड लसी प्रार्थना लबा मुला। ^{१७} प्रभु येशू ख्रीष्टला परमेश्वर व्हाडसे मान लतो:बा परमेश्वर आबासे एनीगदेदा ह्वाडला आत्मा पिन्ना। थेनोन आत्माग्याम परमेश्वरदा डोसेबा ज्ञान याड्सी थेला बारैरी अझ घोखमै। ^{१८} थेह्ण्ड लसीन परमेश्वरला व्हाल

याड्बाला लागिरी एनीगदेला सेम छोर्सी एनीगदेदा तिग आश उन्सी इयोड्बा मुबा थे घोखम्मी। ओच्छे थेसे हाडला म्हिगदेदेन कबुल लमा पिन्ना भिबा मोलम गाते घ्रेन गाते ल्हाना मुला थे था याड्गै।¹⁹ ओच्छे य्हाड विश्वास लबागदेला लागिरी गे लबा परमेश्वरला शक्ति गाते घ्रेन मुला थे एनीगदेसे घोखम्मी भिषीएनोन डाइ प्रार्थना लबा मुला।²⁰ थेनोन शक्तिग्याम परमेश्वरसे ख्रीष्ट येशूदा सिबाग्याम सोना लसी स्वर्गी हाडला दाहिने छ्यापट्टि मुल ठिरी चिपुड्जी।^{†21} ओच्छे परमेश्वरसे ख्रीष्ट येशूदा जम्बुलिडदेन मुरी मुबा जम्मान शासन लबागदे, अधिकार मुबागदे, शक्ति मुबागदे, ग्लेगदेदेन जम्मान मिनथोरी शासन लबा अधिकार पिन्जी। दान्देल्ला धुडरी जे आहिन, तर लिच्छा खबा धुडरीनोन चु जम्मानथोरी थेदा शासन लबा अधिकार पिन्बा मुला।²² थेह्इ लसीन परमेश्वरसे जम्मान स्हेगदे ख्रीष्टला स्हाप धिरी थान्सी मण्डलीला लागिरी ख्रीष्ट येशूदा जम्मान स्हेला थोबो स्होजी।^{†23} मण्डली चा ख्रीष्टला ल्हुइ हिन्ना। थेग्यामसे मण्डली पूरा तमुला। ओच्छे जम्मान स्हेगदे पूरा तना लबाएनोन थेनोन हिन्ना। †

य्हाडदा परमेश्वरसे दया लसी सोना लजी

2 एनीगदे हाडलान पापग्याम सिबा धुडरी परमेश्वरसे एनीगदेदा सोना लजी।^{†2} थे धुडरी एनीगदे जम्बुलिडला आज्यबा ठिमला लिच्छा भ्रमुबा ओच्छे म्हडगदेला य्हुल्सारी शासन लबा शैतानसे कुल्बा ताम इयान्सी भ्रमुबा। दान्देलोन परमेश्वरसे कुल्बा ताम आड्यान्बागदेदा थेसे हाडला तहरी थान्बा मुला।³ डाच्छा मी य्हाड जम्मान थेनीगदे ह्इबान सेमरी ल्हुइला लागिरी जे लइ म्हन्बा थेनोन लसी भ्रबा म्हि हिन्ना। य्हाडला थेह्इबा बानीबेहोर अन्धार मी स्हान्दोगदेसे ह्इन्ोन य्हाडसेनोन परमेश्वरग्याम सजाय याड्तोःबा मुबा।⁴ तर य्हाडला परमेश्वर ल्हानान दया लबा परमेश्वर हिन्ना। ओच्छे य्हाडला ल्हानान माया लबा मुला।⁵ थेतबासेलमान य्हाड पापरी सिसेनोन परमेश्वरसे ख्रीष्ट येशूदेन छ्यामनोन सोना लजी। एनीगदेसे याड्बा थार्बाएनोन थेनोन परमेश्वरला दयामायासे हिन्ना।⁶ ख्रीष्ट येशूदेन छ्याम गिक स्होबासे लमा परमेश्वरसे य्हाडदा येशू ख्रीष्टदेन छ्याम सोना लसी स्वर्गी थेदेन छ्यामनोन चिपुड्जी।⁷ परमेश्वरसे चुह्इबा गे लसी लिच्छाला धुइला लागिरी थेला घ्रेन दयामाया उन्बा मुला। येशू ख्रीष्टसे य्हाडला लागिरी जम्मान गे लबासे लमा य्हाडसे चु दयामाया याड्बा मुला।⁸ तिगदा भिसम परमेश्वरला दयामायाग्याम य्हाडला विश्वाससे लमान य्हाडसे थार्बा याड्बा हिन्ना। चु चा एनीगदेसे लबा गेग्याम आहिन, तर परमेश्वरसे पिन्बा मोलमग्याम हिन्ना।⁹ म्हिसे लबा गेग्याम थार्बा याड्बा हिन्सम म्हि घमण्डी दोसेला मुबा।¹⁰ तिगदा भिसम य्हाडसे ज्यबा गे ल्गै भिषी परमेश्वरसे य्हाडदा येशू ख्रीष्टग्याम छार म्हि स्होबा हिन्ना। थेसे म्हन्बा अन्धार भ्रगै भिषीन परमेश्वरसे य्हाडदा डाच्छाहेन्सेन स्होबा मुबा।

येशू ख्रीष्टरी जम्मान गिक हिन्ना

11 थेतबासेलमा एनीगदेसे चु ताम थाम्लेःगो, डाच्छा ल्हुडरी खतना लबा य्हुदीगदेसे घमण्ड लसी एनीगदेदा खतना आलबा अर्गु य्हुलला म्हि भिषी भिबा मुबा।¹² थे धुडरी एनीगदे ख्रीष्टग्याम थारेड मुबा। ओच्छे इस्राएलीगदेसे याड्बा हकग्यामएनोन थारेड मुबा। थेह्इ लसीन परमेश्वरसे हाडला म्हिगदेदा पिन्ना भिषी लबा कबुलगदेरीनोन एनीगदेला तिगै हक आरेबा मुबा। थेतबासेलमा एनीगदे जम्बुलिडरी आश आरेबादेन परमेश्वरदा डोआसेबा म्हि मुबा।¹³ तर दान्दे एनीगदे ख्रीष्ट येशूदेन छ्याम गिक तबा मुला। डाच्छा एनीगदे परमेश्वरग्याम थारेड मुबा दान्दे ख्रीष्ट येशूसे बगब लबा काग्याम एनीगदेदा परमेश्वरला डामरी भबा मुला।

¹⁴ य्हाडदा शान्ति पिन्बा येशू ख्रीष्टनोन हिन्ना। तिगदा भिसम डाच्छा य्हाडला गुडरी य्हुदीदेन अर्गु य्हुलला म्हि भिषी फेबारी पर्खाल ह्इबा शत्रु मुबा। थेसे थे पर्खाल ह्इबा शत्रुदा नाश लसी य्हाडदा गिकनोन स्होजी।¹⁵ ओच्छे येशू ख्रीष्टसे य्हुदीगदेदेन अर्गु य्हुलला म्हिगदेदा दिक्ना लबादेन हाडग्याम छार म्हि स्होबारी हाडलान ल्हुइ पिन्सी य्हुदीगदेला ठिमदेन

ठिमसे कुल्बा तामगदे नाश लजी।^{†16} थेह्इ लसीन येशू ख्रीष्ट हाडनोन कुसरी सिषी य्हाड न्हडरी गिकसे स्हान्दोदा शत्रु भिषी म्हन्बा तामदा नाश लजी। ओच्छे य्हाडदा गिकनोन स्होसी परमेश्वरदेन छ्याम दिक्ना लजी।¹⁷ येशू ख्रीष्ट हाडनोन फेखसी परमेश्वरग्याम थारेड मुबा एनीगदे अर्गु य्हुलला म्हिगदेदेन परमेश्वरला डामरी मुबा डनी य्हुदीगदे जम्मान शान्ति पिन्बा ज्यबा समाचार थेःना लजी।¹⁸ दान्दे डनी य्हुदीदेन एनी अर्गु य्हुलला म्हि, य्हाड न्हीसेन ख्रीष्ट येशूग्याम परमेश्वरला आत्मा गिकनोन याड्सी परमेश्वर आबा मुबा ग्लारी निम्याड्बा मुला।

¹⁹ दाहेन्से एनीगदे विदेशी परदेसी आहिन। तर परमेश्वरला सन्तान हिन्ना। थेतबासेलमा परमेश्वरला म्हिगदेसे याड्बा हक एनीगदेसेनोन याड्बा मुला।²⁰ एनीगदे चा मुल चेलादेन अगमवक्तागदेला जगथोरी स्होबा दिम हिन्ना। थे दिमला सुर युडबा चा ख्रीष्ट येशून हिन्ना।²¹ थेतबासेलमा थे दिम पूरा प्रभुग्यामसेन जोडब तसी भड्बान परमेश्वरला लागिरी फेसी थान्बा चोखो मन्दिर दोबान निला।²² थेह्इ लसीन ख्रीष्टदेन गिक तसी एनीगदेएनोन डनी य्हुदीगदेदेन छ्याम परमेश्वरला मन्दिर दोबान निबा मुला। थे मन्दिररी परमेश्वर हाडला आत्माग्याम धन्छ्याला।

अर्गु य्हुलला म्हिगदेदा पावलसे येशू ख्रीष्टला समाचार थेःना लबा

3 थेतबासेलमा डा पावल एनीगदे अर्गु य्हुलला म्हिदा ख्रीष्ट येशूला समाचार थेःना लमा इयाल्खानरी परब तबा हिन्ना।² एनीगदे अर्गु य्हुलला म्हिगदेला लागिरी परमेश्वरसे थेला दयामायाग्याम चु गे डादा जिम्मा पिन्बा मुला भिबा ताम एनीगदेसेनोन था याड्सी जिन्बा मुला।³ परमेश्वरसे डादा थेला सेमला ताम घोना लबा मुला। चु तामला बाररी एनीगदेला लागिरी डाइ डाच्छान जजाकी भ्रिबा मुला।⁴ चु ताम पढब लमाहेन्से ख्रीष्टला बाररी परमेश्वरला सेमरी मुबा ताम डाइ गाते घोजीम भिषी एनीगदेसे घोखम्ला।⁵ डाच्छा मी परमेश्वरसे हाडला सेमला ताम म्हिगदेदा घोना लबा आरेमुबा। तर दान्दे परमेश्वरसे हाडला आत्माग्याम धम्बा हाडला मुल चेलादेन अगमवक्तागदेदा घोना लबा मुला।⁶ चु ताम चा अर्गु य्हुलला म्हिगदेसे परमेश्वरला थार्बा पिन्बा समाचार थेःसी विश्वास लमाहेन्से य्हुदीगदेसे ह्इन्ोन परमेश्वरला मोलम याड्बा हिन्ना। थेतबासेलमा दाहेन्से थेन्नी गिकनोन तबा मुला। ओच्छे परमेश्वरसे येशू ख्रीष्टग्याम हाडला म्हिगदेदा पिन्ना भिषी लबा कबुल एनीगदे अर्गु य्हुलला म्हिसेनोन याड्बा मुला।^{††}

⁷ ओच्छे परमेश्वरसेन दयामायादेन शक्तिग्याम थेला मोलम अन्धार डादा चु थार्बा पिन्बा समाचार थेःना लबा म्हि स्होजी।⁸ परमेश्वरला म्हिगदे न्हडरी डा जम्मान भन्दा गे आखेल्बा म्हि तसेनोन परमेश्वरसे डादा दयामाया लसी ख्रीष्टग्याम य्हाडसे याड्बा म्हन्बारीन आखम्बा मोलमला समाचार अर्गु य्हुलला म्हिगदेदा थेःना लबारी डादा धम्बा मुला।⁹ जम्मान स्हे स्होबा परमेश्वरसे हाडला सेमला ताम दडबोहेन्सेन खालैदा उन्बा आरेबा। तर दान्दे परमेश्वरसे थे ताम खाह्इ लसी उन्सी पूरा लजी भिषी जम्मान म्हिदा घोना लबा गेएनोन डादा पिन्बा मुला।¹⁰ परमेश्वरला सेमला ताम चा मण्डलीग्याम हाडला ज्ञान बुद्धि मुरी मुबा शक्तिदेन शासन लबागदेदा उन्बा हिन्ना।¹¹ चु चा जुकजुकहेन्सेन परमेश्वरसे म्हन्बा अन्धार य्हाडला प्रभु येशू ख्रीष्टग्याम पूरा लबा हिन्ना।¹² ओच्छे य्हाडसे येशू ख्रीष्टदा विश्वास लसी थेदेन छ्याम गिक तबासे लमा परमेश्वर मुबा ग्लारी निबा भड याड्बा मुला।¹³ थेतबासेलमा एनीगदेला लागिरी डाइ नाबा दुख ब्राड्सी एनीगदे आत्तेब थातउ। तिगदा भिसम चु मी एनीगदेला लागिरी मान याड्बादेन ताड्तोःबा ताम हिन्ना।

पावलसे दोःसीएनोन एफिससला मण्डलीला लागिरी लबा प्रार्थना

¹⁴ थेतबासेलमान स्वर्गदेन जम्बुलिडरी मुबा जम्मान य्हुलला म्हि स्होबा परमेश्वर आबादा डाइ पुड् जूसी प्रार्थना लबा मुला।¹⁶ परमेश्वरसे हाडला आत्माला शक्तिग्याम ल्हानान मोलम पिन्सी एनीगदेला सेम खाइमै याड्योड आतबा भड याड्गै।¹⁷ ओच्छे एनीगदेसे ख्रीष्टदा विश्वास लबासे लमा ख्रीष्ट सदन एनीगदेला सेमरी धन्छ्यागै। ओच्छे एनीगदे परमेश्वरला मायारी

† 1:20 भजन ११०:१ †† 1:22 भजन ८:६ † 1:23 कल १:१८ †† 2:1 कल २:१३

‡ 2:15 कल २:१४ ††† 3:6 कल १:२६-२७

खाइमै याडयोड आतना भड्बा तसी चिखमौ।¹⁸ थेहड् लसीन परमेश्वरला म्हिगदे जम्मानदेन छ्याम ख्रीष्टला माया गाते ल्हानान मुला भिसी एनीगदेसे घोखमौ।¹⁹ ओच्छे म्हिला ज्ञान बुद्धिसे घोबारी म्हाइसै घोआखम्बा ख्रीष्टला माया घोखमौ। थेहड् लसीन परमेश्वर खाहड्बा मुला, एनीगदेएनोन थेहड्बान दोखमौ। चुहड् लसी डाइ एनीगदेला लागिरी प्रार्थना लबा मुला।²⁰ परमेश्वरसे य्हाडला गुडरी ह्वाडला शक्तिग्याम गे लमुला। ओच्छे य्हाडसे हीबादेन म्हन्बा भन्दा ल्हानान पिन्मुला।²¹ य्हाड ख्रीष्ट येशूदेन छ्याम गिक तबा म्हिगदेदेन मण्डलीसे ह्वाड जम्मान भन्दा घ्रेन परमेश्वर हिन्ना भिसी सदन मानदेन जयजयकार लतो:ला। आमेन।

ख्रीष्टदा विश्वास लबागदे जम्मान गिकनोन हिन्ना

4 थेतबासेलमा प्रभुला गे लमा इयाल्खानरी परब तबा म्हि, डाइ एनीगदेदा परमेश्वरसे धम्बासे लमा थेसे कुल्बा अन्धार गे लउ भिसी बन्ती लबा मुला।² एनीगदे खाइमै घ्रेन आदोना सोजो म्हि दोसी भ्रउ। ओच्छे गिकसे गिकला ताम नासी ह्वाड ह्वाड न्हडरी माया लसी टिकसी चिउ।³ एनीगदेदा परमेश्वरला आत्मासे गिक स्होजी भिबा ताम अन्धार भ्रबारी सदन भड लउ।⁴ परमेश्वरसे इयोड्बा धुडरी य्हाडसे तिग याड्ला भिसी आश लमुबा, थे आश गिकनोन हिन्ना। थेहड् लसीन दाहेन्से य्हाड ल्हुड गिकलान हिन्ना। ओच्छे य्हाडसे याड्बा परमेश्वरला आत्माएनोन गिकनोन हिन्ना।⁵ ओच्छे य्हाडला प्रभुएनोन गिकनोन, य्हाडला विश्वासएनोन गिकनोन ओच्छे य्हाडसे किन्बा बप्तिस्माएनोन गिकनोन हिन्ना।⁶ थेतबासेलमा दाहेन्से य्हाड जम्मानान परमेश्वर आबा गिकनोन हिन्ना। थेनोन जम्मानदेन छ्याम तसी य्हाड जम्मानग्याम गे लबा मुला। ओच्छे थेसेन जम्मानथोरी शासन लबा मुला।⁷ तर ख्रीष्टसे ह्वाडला सेमसे म्हन्बा अन्धार य्हाड जम्मादान थरी थरीला गे लबा मोलम पिन्बा मुला।⁸ थेतबासेलमा परमेश्वरला बचनरी ख्रीष्टला बारेरी चुहड् भिसी भिबा मुला, “थे तोर फेष्बा धुडरी थेसे ह्वाडला शत्रुदाएनोन खीसी भोर्जी। ओच्छे म्हिगदेदा मोलम पिन्जी।”⁹ थेहड् लसीन बचनरी तोर फेष्बा भिसी भिबाला अर्थ तिग? चु भिबा चा ख्रीष्ट चु जम्बुलिडला धिधोना फेष्बा भिबा आहिन? हिन्ना।¹⁰ थेनोन जम्बुलिडला धिधोना फेष्बा जम्मानथोरी शासन लबारी स्वर्गरी जम्मान भन्दा तोर फेष्बा।¹¹ ओच्छे ख्रीष्टसे ह्वाडला गे लगै भिसी कोइ म्हिदा ख्रीष्टला मुल चेला दोबारी, कोइ म्हिदा अगमवक्ता दोबारी, कोइ म्हिदा थार्बा पिन्बा समाचार थे:ना लबारी, कोइ म्हिदा मण्डलीला पास्टरदेन म्हिगदेदा लोष्बा म्हि स्होबारी धम्जी।¹² तिगदा भिसम परमेश्वरला जम्मान म्हिगदेसे परमेश्वरला गे ज्यना लसी ख्रीष्टला ल्हुड मण्डलीदा भड्ना लखमौ भिसी थेसेन चुहड् लसी धम्बा हिन्ना।¹³ थेतबासेलमा य्हाडसे परमेश्वरदा लबा विश्वासरी गिक आतनी भिसम ओच्छे थेला झा ख्रीष्टदा ज्यना लसी डोआसेनी भिसम य्हाड खाइमै पाको म्हि दोबारी आखम। ओच्छे ख्रीष्ट खाहड्बा मुला थेहड्बाएनोन दोबारी आखम।¹⁴ दाहेन्से य्हाड जुन ताम थे:जी थेनोन तामरी विश्वास लबा कोलागदे हड् लसी आभ्र। तिगदा भिसम कोइ कोइ म्हिगदेसे य्हाडदा फसब लबारी ल्हानान थरीला लुसीला तामदाएनोन सत्य ताम हड् लसी पाड्सी भ्रमुला।¹⁵ बरु य्हाड माया लसी सत्य ताम पाड्सी ख्रीष्ट हड्बान दोगे। तिगदा भिसम ख्रीष्ट चा य्हाडला थोबो हिन्ना।¹⁶ य्हाडला ल्हुडरी या काड जोडब लसी ल्हुड गिकनोन तबा हड् ख्रीष्टसेनोन जम्मादान गिकनोन स्होबा मुला। थेतबासेलमा या काड टिकसी ह्वाड ह्वाडला गे लबा हड् लसी य्हाडएनोन ह्वाड ह्वाड न्हडरी टिकसी गे लजी भिसम अझ य्हाड न्हडरी माया ल्हेबान निला।[‡]

ख्रीष्टग्याम याड्बा छार जुनी

¹⁷ ख्रीष्ट येशूला अधिकारग्याम डाइ पाड्बा चु ताम ज्यना लसी इयान्नो। दाहेन्से एनीगदे परमेश्वरदा डोआसेबा अर्गु य्हुलला म्हिगदे हड् तसी थाभ्रउ।

तिगदा भिसम थेनीगदेसे लबा गेदेन म्हन्बा ताम गे आखेल्बा मुला।¹⁸ थेनीगदेसे सत्य ताम आघोमुला ओच्छे थेनीगदेला सेम कोड्बासे लमा थेनीगदेदेन परमेश्वरला बारेरी घोबा ज्ञाननोन आरे। थेतबासेलमा परमेश्वरग्याम याड्तो:बा जुनी थेनीगदेसे याड्बा आरे।¹⁹ थेनीगदेदा ज्यबा तामदेन आज्यबा ताम तिगै था आरे। थेतबासेलमा थेनीगदेसे सेमरी तिग लड म्हन्बा थेनोन लसी पे:बा खबा गे जे लसी भ्रमुला।

²⁰ तर एनीगदेसे मी ख्रीष्टला बारेरी लोष्बा धुडरी थेहड्बा ताम लोष्बा आरेबा।²¹ एनीगदेसे ख्रीष्ट येशूला सत्य ताम थे:सी घोबा मुला भिसी डादा था मुला।²² थेतबासेलमा एनीगदेदा न्होड्ना लबा पापी सेमदेन डाच्छाला आज्यबा बानीबेहोर खलागो।^{‡23} ओच्छे परमेश्वरला आत्मासे एनीगदेला सेम छार स्होगै।²⁴ परमेश्वरसे एनीगदेदा ह्वाड हड्बान म्हि स्होसी छार बानीबेहोर पिन्बा मुला। थेतबासेलमा दाहेन्से एनीगदेसे थे पक्का छार बानीबेहोर अन्धार परमेश्वरदा सेम निबादेन तिगै दोष आरेबा म्हि दोगो।[‡]
²⁵ थेतबासेलमा जम्मासेन लुसीला ताम पाड्बा खलासी विश्वासीगदे न्हडरी सत्य ताम जे पाङ्गो। तिगदा भिसम य्हाड ल्हुड गिकलान हिन्ना।^{‡‡26} ओच्छे बोमो खसैनोन पाप थालउ। तिगदा भिसम शैतानसे एनीगदेदा पाप लपुडला। थेतबासेलमा धिनी घल्बा भन्दा डाच्छान एनीगदेला बोमो म्हागै।^{‡‡‡}

²⁸ खालैसे य्हा लबा मुसम दाहेन्से खलासी ह्वाडसेन दुख लसी गे लगै, ओच्छे आरेबागदेदा पिन्खम्बा म्हि दोगै।

²⁹ एनीगदे ह्वाड ह्वाड न्हडरी आज्यबा ताम थालउ। बरु ज्यबा तामदेन स्हान्दो म्हिला विश्वास बढब तबान निबा खाल्ला ताम जे लउ। तिगदा भिसम एनीगदेसे लबा तामग्याम म्हिगदेदा ज्यबा तगै।

³⁰ ओच्छे परमेश्वरला आत्मादा दुख थापिन्गो। तिगदा भिसम एनीगदे पापग्याम फेबा धिन आखतेधोना एनीगदे परमेश्वरलान हिन्ना भिसी परमेश्वरला आत्मासेन छाप लबा मुला।

³¹ थेतबासेलमा दाहेन्से ईख थान्बा, बोमो लबा, म्हिदा बड्बा हड्बा जम्मान आज्यबा ताम एनीगदेसे खलागो।³² बरु गिकसेम गिकदा सेमहेन्सेन दया लउ। ओच्छे परमेश्वरसे एनीगदेदा ख्रीष्ट येशूग्याम माफ लबा हड् लसी एनीगदेसेनोन गिकसेम गिकदा माफ लउ।[§]

परमेश्वरदा सेम निबा गे जे लउ

5 एनीगदे परमेश्वरसे माया लबा कोलागदे तबासे लमा परमेश्वर हड्बान दोबारी म्हाइगो।² ओच्छे ख्रीष्टसे य्हाडदा माया लबा हड् लसी य्हाडएनोन ह्वाड ह्वाड न्हडरी माया लसी टिकसी चितो:ला। तिगदा भिसम ख्रीष्टसे य्हाडदा माया लसी ह्वाडला ल्हुडनोन पिन्जी। ओच्छे थेला ल्हुड बलिदान पिन्सी परमेश्वरला लागिरी ज्यबादेन बास्ना खबा धूप दोजी।^{§†}

³ एनीगदे परमेश्वरला म्हिगदे तबासे लमा स्हान्दोदेन छ्याम ब्रेल्सी भ्रबा, नड्बा खबा ताम ओच्छे लोभ लबा, चु जम्मान ताम म्हन्बारीनोन आत।

⁴ ओच्छे पे:बा खबा ताम, मूर्ख तामदेन म्हिदा सेम आनिबा ताम थालउ। चुहड्बा ताम लबा चा ज्यबा आहिन। बरु परमेश्वरदा धन्यवाद पिन्गो।

⁵ च्यागो, चु ताम चा एनीगदेदा था तनोन तो:बा ताम हिन्ना। स्हान्दोदेन छ्याम ब्रेल्सी भ्रबा, नड्बा खबा ताम लबा, लोभ लबा म्हिसे परमेश्वरदेन ख्रीष्टला य्हुल्सारी तिगै हक आयाड्। लोभ लबा म्हि चा मूर्तिदा परमेश्वर भिसी पूजा लबा म्हि हड्बान हिन्ना।

⁶ एनीगदेदा खालैसेन लुसीला ताम लोष्पी फसब थालगै। थेहड्बा गे लसी परमेश्वरसे कुल्बा ताम आड्यान्बा म्हिगदेदा परमेश्वरसे सजाय पिन्ना।

⁷ थेतबासेलमा एनीगदे परमेश्वरसे कुल्बा ताम आड्यान्बा थेहड्बा म्हिदेन छ्याम थाभ्रउ।⁸ एनीगदे डाच्छा धोपधोपरी मुबा। तर दान्दे प्रभुदा डोसेबासे लमा य्हाल य्हालरी मुला। थेतबासेलमा दाहेन्से एनीगदे धोपधोपरी भ्रबा म्हिगदे हड् लसी आहिन तर य्हाल य्हालरी भ्रबा म्हिगदे हड् लसी भ्रउ।

⁹ तिगदा भिसम य्हालरी भ्रबा म्हिगदेसे लबा गे चा ज्यबादेन परमेश्वरदा सेम

†† 4:22 कल ३:९ †† 4:24 उत्प १:२६; कल ३:१० ††† 4:25 जक ८:१६
††† 4:26-27 भजन ४:४ § 4:32 कल ३:१३ †† 5:2 प्रस्था २९:१८; भजन ४०:६

निबा ओच्छे सत्य तमुला। ¹⁰ ओच्छे प्रभुदा सेम निबा गे तिग हिन्ना? थे गे जे लबारी म्हाइगो। ¹¹ थेतबासेलमा धोपधोपरी भ्रवा म्हिगदेसे लबा ह्इबा गे आखेल्ला गे एनीगदेसे थालउ। बरु खालै म्हिसे थेह्इबा गे लजी भिसम थे म्हिदा चु लबारी आतबा गे हिन्ना भिसी पाङ्गो। ¹² हिन्नाम, थे म्हिगदेसे लासी लबा नड्बा गेला बारेरी पाङ्गारीनोन पे:बा खबा ताम हिन्ना। ¹³ तर तिगै सहे य्हालरी भजी भिसम थे सहे खाह्इबा चीम भिसी जम्मासेन था याङ्गला। तिगदा भिसम जम्मान सहेदा म्हाङ्गना लबान य्हाल हिन्ना। ¹⁴ थेतबासेलमा चुह्इ भिसी पाङ्गुला मुला,
“म्हेर्बागदे छोगो,
ओच्छे सिबाग्याम रे:गो!
ख्रीष्टसे एनीगदेदा य्हाल तना लला।”

¹⁵ थेतबासेलमा एनीगदेला बानीबेहोर खाह्इबा मुला होस लसी भ्रउ। ओच्छे बुद्धि आरेबा म्हिगदे ह्इ लसी आहिन तर बुद्धि मुबा म्हि ह्इ तसी भ्रउ। ¹⁶ ओच्छे एनीगदेसे याङ्गुला मौका स्योर्ना थालउ। तिगदा भिसम दान्देल्ला धुइ ठीक आरे। ¹⁷ थेतबासेलमा मूर्ख म्हि ह्इ तसी थाभ्रउ। तर एनीगदेसे तिग लगी भिसी प्रभुसे म्हन्बा मुला थे ताम घोउ। ¹⁸ ओच्छे इय्होइबा सहे थुइसी इय्होइसी थाभ्रउ। तिगदा भिसम इय्होइबा सहेसे म्हिदा न्होङ्गना लमुला। बरु एनीगदेला सेम सदन परमेश्वरला आत्मासे प्लिङ्गो। ¹⁹ थेह्इ लसीन एनीगदे ह्हाड ह्हाड न्हडरी परमेश्वरला आत्मासे पिन्बा व्हाइ गोसी गिकसेम गिकदा विश्वासरी कोङ्गुला तना लउ। चुह्इ लसी सेमहेन्सेन व्हाइ गोबान प्रभुदा जयजयकार लउ। ²⁰ य्हाङ्गला प्रभु येथू ख्रीष्टला मिनरी जम्मान सहेला लागिरी सदन परमेश्वर आबादा धन्यवाद पिन्गो। ††

मिड हेम्बोसे लोपतो:बा ताम

²¹ एनीगदेसे ख्रीष्टदा मान लबासे लमा ह्हाड ह्हाड न्हडरी गिकसेम गिकला तहरी चिउ।

²² प्रभुला तहरी चिबा ह्इ लसी मिडम्हेमेगदेएनोन ह्हाड ह्हाडला हेम्बोला तहरी चिउ। ²³ तिगदा भिसम ख्रीष्ट मण्डलीला थोबो हिन्ना। थेह्इ लसीन मिडम्हेमेगदेला लागिरीनोन ह्हाड ह्हाडला हेम्बो थोबो ह्इबान हिन्ना। ओच्छे ह्हाडला ल्हुइ मण्डलीदा थार्ना लबाएनोन ख्रीष्टनोन हिन्ना। ²⁴ थेतबासेलमा मण्डली ख्रीष्टला तहरी चिबा ह्इ लसी मिडम्हेमेगदेएनोन ह्हाड ह्हाडला हेम्बोला तहरी चिउ। ²⁵ ओच्छे ख्रीष्टसे मण्डलीदा माया लसी ह्हाडला ज्याननोन पिन्बा ह्इ लसी हेम्फेबेगदेसेनोन ह्हाड ह्हाडला मिडदा माया लउ। ²⁶ ओच्छे ख्रीष्टसे मण्डलीदा चोखो स्होबारी बप्तिस्माला क्युइदेन ह्हाडला बचनय्याम ख्रुसी धाना लबा मुला। ²⁷ ख्रीष्टसे मण्डलीदा य्हालदेन जेबा, दाग आरेबा, आज्योम्बा, तिगै चोट आरेबा, चोखोदेन तिगै दोष आरेबा मण्डली स्होसी ह्हाडदेन छ्याम भबाला लागिरीन ख्रीष्टसे थेह्इ लसी ह्हाडला ज्याननोन पिन्बा हिन्ना। ²⁸ थेह्इ लसीन हेम्फेबेगदेसेनोन ह्हाड ह्हाडला मिडदा ह्हाडला ल्हुइदा ह्इनोन माया लदोमुला। ह्हाडला मिडदा माया लबागदेसे जे ह्हाडला ल्हुइदाएनोन माया लमुला। ²⁹ तिगदा भिसम खालै म्हिसेन ह्हाडला ल्हुइदा आज्यना आलमुला। बरु ज्यबा तबारी ज्यना लसी चबा क्वान्बा लमुला। थेह्इ लसीन ख्रीष्टसेनोन ह्हाडला ल्हुइ मण्डलीदा ज्यना लमुला। ³⁰ तिगदा भिसम य्हाड ख्रीष्टला ल्हुइ तबासे लमा य्हाड गिकनोन हिन्ना।

³¹ “थेतबासेलमा म्हिसे ह्हाडला आबा आमादा ख्लासी ह्हाडला मिडदेन छ्याम ढिक्सी चिमुला। ओच्छे थेन्नी ल्हुइ गिक ह्इबान तसी चिमुला।” ³² चु य्हाड म्हिला ज्ञानसे घोखम्बा ताम आहिन। चु ताम डाइ ख्रीष्टदेन मण्डलीला बारेरी पाङ्गुला हिन्ना। ³³ तर चु ताम एनीगदेसेनोन लतो:बा ताम हिन्ना। थेतबासेलमा एनीगदे जम्मासेन ह्हाड ह्हाडला मिडदा ह्हाडदा ह्इनोन माया लउ, ओच्छे मिडम्हेमेसेनोन ह्हाड ह्हाडला हेम्बोदा मान लउ।

आबा आमादेन कोलागदेसे लोपतो:बा ताम

6 कोलागदे, एनीगदे प्रभुला म्हि तबासे लमा, ह्हाडला आबा आमासे कुल्बा ताम इयान्गो। तिगदा भिसम आबा आमासे कुल्बा ताम इयान्बान ज्यबा हिन्ना। ¹ “ह्हाडला आबा आमादा मान लउ” चु चा परमेश्वरसे मोशादा पिन्बा ठिम न्हडरी परमेश्वरसे कबुल लसी जम्मान भन्दा डाच्छा कुल्बा ताम हिन्ना। ² थे कबुल चा एनीगदेसे आबा आमादा मान लजी भिसम जम्बुलिडरी एनीगदेदा ज्यबा तसी छेह्इबा हिन्ना। ³ आबा आमागदे, एनीगदेसेनोन ह्हाडला कोलागदेदा बोमो खना थालउ। तर थेनीगदेदा तहरी थान्सी प्रभुला बचन लोपबान छर्ना लउ। §

नोकरदेन मालिकगदेसे लोपतो:बा ताम

⁴ नोकरगदे, एनीगदेसे ख्रीष्टदा सेमहेन्सेन मान लबा ह्इ लसी जम्बुलिडरी मुबा ह्हाडला मालिकदाएनोन मान लउ। ओच्छे थेनीगदेसे कुल्बा ताम इयान्गो। ⁵ एनीगदेसे मालिकगदेला डाच्छा थेनीगदेदा ताङ्गना लबारी जे गे लबा आहिन, तर ख्रीष्टला गे लबागदेसे ह्इ लसी एनीगदेसे सेमहेन्सेन परमेश्वरसे म्हन्बा अन्धार गे लउ। ⁶ ओच्छे म्हिगदेदा उन्बाला लागिरी आहिन, तर प्रभुला लागिरी ह्इ लसी सेमहेन्सेन ज्यना लसी गे लउ। ⁷ थेतबासेलमा एनीगदे नोकर हिन्सै आहिन्सै ज्यबा गे लबा म्हिसे प्रभुग्याम थे अन्धारलान इनाम याङ्गला भिबा ताम एनीगदेदा थानोन मुला। §† ⁸ थेह्इ लसीन मालिकगदेसेनोन ह्हाडला नोकरगदेदा आज्यबा व्यवहार थालउ। तिगदा भिसम एनीगदे न्हीलान मालिक स्वर्गरी मुला। थेसे निसाफ लबा धुइरी खालैला ली च्यासी आल। §††

परमेश्वरसे पिन्बा हतियार

⁹ दाहेन्से एनीगदे प्रभुदेन गिक तसी थेला घेन शक्तिग्याम भइसी चिउ। ¹⁰ ओच्छे शैतानसे एनीगदेदा फसब लबारी म्हाइबा जुक्तिगदेदा ढाबारी सेनासे ह्इ लसी परमेश्वरसे पिन्बा जम्मान हतियारगदे थोगो। ¹¹ तिगदा भिसम य्हाड म्हिदेन लडाइ लबारी आहिन, तर जम्मान शासन लबा शक्तिगदेदेन लडाइ लबारी हिन्ना। थेह्इ लसीन चु धोपधोपबा जम्बुलिडरी शासन लबा शक्तिगदेदेन मुरी मुबा जम्मान म्हाडला आत्मागदेला शक्तिदेन लडाइ लबारी हिन्ना। ¹² थेतबासेलमा परमेश्वरसे पिन्बा जम्मान हतियारगदे एनीगदेसे सदन थोजी भिसम शैतानना सेना छेबारी खबा धिनरीनोन एनीगदे थेदेन छ्याम छेबारी खम्ला। ओच्छे लडाइ ढासीनोन एनीगदे भइबा तसी चिखम्ला।

¹³ थेतबासेलमा सेनागदेसे क्रेप्सरी पेटी खीबा ह्इ लसी एनीगदेसे ह्हाडदा सत्यसे खीगो। ओच्छे थेनीगदेसे कुरी पाता थान्बा ह्इ लसी एनीगदेसेनोन परमेश्वरदा सेम निबा बानीबेहोर थोसी तयार तसी चिउ। ¹⁴ ओच्छे लखम क्वान्बा ह्इ लसी शान्ति पिन्बा थार्बा पिन्बा समाचार थोसी तयार तउ। ¹⁵ ओच्छे अर्गु ताम चा एनीगदे सदन विश्वासला ढाल थोसी चिउ। थेह्इ लसी चिजी भिसम शैतानसे पुइखबा मेला बान एनीगदेसे साइखम्ला। ¹⁶ थेह्इ लसीन परमेश्वरसे एनीगदेदा पिन्बा थार्बादा सेनागदेसे टोप कूबा ह्इ लसी सदन कूसी चिउ। ओच्छे परमेश्वरला आत्माला तरवार थोगो। थे तरवार चा परमेश्वरला बचन हिन्ना। §†

¹⁷ थेतबासेलमा परमेश्वरला आत्माग्याम एनीगदेसे सदन जम्मान सहेला लागिरी प्रार्थना लउ। चुह्इ लसीन जम्मान परमेश्वरला म्हिगदेला लागिरीनोन सदन झन्सी प्रार्थना लउ।

¹⁸ ओच्छे डाइ ताम पाङ्गुबारी छ्याइमा तिग ताम पाङ्गुतो:बा थे ताम परमेश्वरसेन लोपौ। ओच्छे म्हिसे था आयाङ्गुबा थार्बा पिन्बा समाचार आलोङ्गान स्हान्दो म्हिगदेदा घोना लबारी खम्मौ भिसी डाला लागिरी प्रार्थना लसी पिन्गो। ¹⁹ चुनोन थार्बा पिन्बा समाचारला लागिरी इयाल्खानरी

† 5:16 कल ४:५ †† 5:20 कल ३:१६-१७ ‡ 5:22 कल ३:१८; † पत्रु ३:१ †† 5:25 कल ३:१९; † पत्रु ३:७ †† 5:31 उत्प २:२४

‡†† 6:1 कल ३:२० ††† 6:2 प्रस्था २०:१२; व्यव ५:१६ § 6:4 कल ३:२१ §† 6:8 कल २:२२-२५ §†† 6:9 व्यव १०:१७; कल ३:२५; ४:१ §† 6:14 यशै ११:५; ५९:१७ §†† 6:15 यशै ५२:७ §† 6:17 यशै ५९:१७

परब तबा डा ख्रीष्टला दूत हिन्ना। ओच्छे डाइ आलोङ्गान चुला बारेरी पाङ्बारी खम्मै भिसी प्रार्थना लसी पिन्गो।

चिठीला थुमरी भिबा ताम

²¹ प्रभुला गेरी विश्वास लखम्बा डन्से माया लबा आले तुखिकसदा डाइ एनीगदे मुबा ग्लारी पुङ्खबा मुला। ओच्छे डादा खाहङ्बा मुला भिबादेन डाइ तिग लबान मुला भिबा जम्मान ताम थेसेन एनीगदेदा पाङ्गला।

^{†22} ओच्छे चुरी डन्दा खाहङ्बा मुला भिबा ताम था याङ्सी एनीगदेसे आँट याङ्गै भिसी डाइ एनीगदे मुबा ग्लारी थेदा पुङ्खबा हिन्ना। ^{††23} ख्रीष्टदा विश्वास लबा ज्योज्यो आले नाना आडा जम्मादान य्हाङला परमेश्वर आबादेन प्रभु येशू ख्रीष्टग्याम विश्वासरी कोङ्सी मायादेन शान्ति याङ्गै। ²⁴ थेहङ् लसीन य्हाङला प्रभु येशू ख्रीष्टदा जुकजुकधोना माया लबागदेदेन छ्याम परमेश्वरला दयामाया तगै।

† 6:21 मुल २०:४; २ तिमो ४:१२ †† 6:22 कल ४:७-८

चु चिठीला बारेरी पाडतो:मा

येशूला मुल चेला पावलसे भिबा मुबा। चु चिठी भिबाला लागिरी पावलदा तिमोथी भिबा म्हेसे ह्यो लबा मुबा (फिलिप्पी १:१)।

रोम शहरला इयाल्खानग्याम भिबा मुबा।

ओस्पन ईश्वी संवत् ६१-६३ (विक्रम संवत् ११८-१२०) सालला गुडरी भिबा मुबा।

फिलिप्पी शहररी मुबा विश्वासीगदेदा भिबा मुबा। (मुल चेला १६:११-४०)

फिलिप्पी शहर चा माकेडोनिया अज्वलला रोम यहुलसाला मुल शहर मुबा। चु शहर दान्दे यूरोपरी परब तमुला। चु चिठी भिबा धुडरी पावल इयाल्खानरी मुबा। थे धुडरी फिलिप्पी शहररी मुबा मण्डलीरी लुसीला ताम लोप्यासे लमा पावलदा दुख इहम्बा मुबा। तर पावलला कोड्बा विश्वाससे लमा चु चिठीसे फिलिप्पीला विश्वासीगदेसे विश्वासरी आँट याड्जी।

चु चिठी चा फिलिप्पीला विश्वासीगदेदा धन्यवाद पिन्बाला लागिरी भिबा मुबा। थेनीगदेसे पावलदा खॉचो तबा धुडरी भेटी पुडसी ह्यो लबा मुबा। ओच्छे थेनीगदेदाएनोन दुख तबा धुडरी पावलसे हाडदेन थेनीगदेदा विश्वासरी कोड्ना लबारीदेन आँट पिन्बाला लागिरी चु चिठी भिबा मुबा। हाड जे चबा थुड्बा लम्याड्सम तला भिसी म्हन्बा भन्दा सोजो तसी येशूला ह्दबान बानीबेहोर थोगै भिसी पाड्बा मुला। ख्रीष्टदेन छ्याम गिक तबा थेनीगदेला बानीबेहोर चा परमेश्वरग्याम याड्बा मोलम हिन्ना। चु मोलम चा थेनीगदेसे यहूदीगदेला ठिम अन्छार भ्रबासे लमा याड्बा आहिन, तर थेनीगदेसे लबा विश्वासग्याम याड्बा हिन्ना भिसी पावलसे थेनीगदेदा ढन्ना लबा मुला। ओच्छे ख्रीष्टदा विश्वास लबागदेसे याड्बा ताड्बा तामदेन शान्तिला बारेरी पावलसे भिबा मुला। चु चिठीरी ख्रीष्टदा विश्वास लबागदेसे याड्बा ताड्बा ताम, आँट, गिक तबादेन सेमहेन्सेन गे लबा तामगदेला बारेरी पाड्बा मुला। ओच्छे चु चिठीरी पावलसे फिलिप्पीला विश्वासीगदेदा गाते माया लमुला भिबा ताम उन्बा मुला।

मुल तामगदे

प्याफुल्बादेन प्रार्थना १:१-११

पावलदा तबा तामगदे १:१२-२६

ख्रीष्टदेन छ्याम मुबा जुनी १:२७-१:१८

तिमोथीदेन इपाफ्रोडिटस २:१९-३०

होशियार तना लबा तामगदे ३:१-४:९

भेटीला लागिरी धन्यवाद पिन्बा ४:१०-२०

चिठीला थुमरी भिबा ताम ४:२१-२३

पावलसे फिलिप्पीला विश्वासीगदेदा भिबा चिठी

पावलसे फिलिप्पीला विश्वासीगदेदा प्याफुल्बा

1 लास्सो, ख्रीष्ट येशूदा तेन्बा डा पावलदेन तिमोथीग्याम फिलिप्पीरी मुबा ख्रीष्ट येशूदा विश्वास लबा परमेश्वरला म्हेगदेदेन मण्डलीदा च्याबा म्हे ओच्छे मण्डलीरी ह्यो लबागदेदा प्याफुल्बा! †

2 व्हाडला परमेश्वर आबादेन प्रभु येशू ख्रीष्टग्याम एनीगदेदा दयामायादेन शान्ति तगै।

पावलसे लबा प्रार्थना

3 एनीगदेदा ढन्मा डाइ डाला परमेश्वरदा सदन धन्यवाद पिन्बा मुला।
4 डाइ प्रार्थना लबा धुडरी सदन एनीगदेला लागिरी ताड्सी ताड्सी प्रार्थना लमुला। 5 तिगदा भिसम थार्बा पिन्बा समाचार थे:ना लबाला लागिरी डाच्छाहेन्से दान्धेधोना एनीगदेसे सेम गिक लसी डादा ह्यो लबा मुला।
6 परमेश्वरसे एनीगदेला गुडरी शुरु लबा ज्यबा गे येशू ख्रीष्ट फेख्बबा धुड्धोनारी थेसेन पूरा लला भिबा ताम डादा पूरा विश्वास मुला।

7 डाइ एनीगदेला बारेरी चुह्दुड्बा ताम म्हन्बाएनोन ठीक हिन्ना। एनीगदे सदन डाला सेमरी मुला। तिगदा भिसम डा इयाल्खानरी मुबा धुडरीनोन ओच्छे थार्बा पिन्बा समाचार जोगब लबारीदेन स्थान्दो म्हेगदेदा थे:ना लबा चु गे न्हीरीन परमेश्वरला दयामायारी एनीगदेसे सेम गिक लसी डादा ह्यो लबा मुला। 8 डाइ ख्रीष्ट येशूला मायाग्यामसे एनीगदे जम्मादान गाते ढन्बा मुला भिबा ताम परमेश्वरदान था मुला।

9 परमेश्वरग्याम ज्ञान बुद्धि याड्सी एनीगदेला माया इन इन ल्हेबान निगै भिसी डाइ प्रार्थना लबा मुला। 10 चुह्दु लजी भिसम एनीगदेसे जम्मान भन्दा ज्यबा ताम तिग हिन्ना, थे फेबारी खम्ला। ओच्छे ख्रीष्ट फेख्बबा धुड्दुला लागिरी एनीगदे तिगै दोष आरेबा चोखो म्हे दोला। 11 परमेश्वरदा मानदेन जयजयकार लबाला लागिरी येशू ख्रीष्टसे पिन्बा परमेश्वरदा सेम निबा बानीबेहोरसे एनीगदेला सेम प्लिड्गी।

पावल इयाल्खानरी परब तबासे लमा थार्बा पिन्बा समाचार ल्हानान ग्लारी थे:बा

12 ज्योज्यो आले नाना आडागदे, डाइ नाबा चु दुखग्याम थार्बा पिन्बा समाचार थे:ना लबा गे इन ल्हानान तबा मुला भिबा ताम एनीगदेसे था

† 1:1 मुल १६:१२

याङ्गै भिंसी डाइ म्हन्बा मुला। ¹³ ख्रीष्टला बारेरी थे:ना लबासे लमान डा इयाल्खानरी परब तबा हिन्ना भिंसी ग्लेखाडला जम्मान सिपाहीगदेदेन अर्गु जम्मान म्हिगदेसे था याङ्गी जिन्बा मुला। ¹⁴ डा इयाल्खानरी परब तबासे लमा ल्हानान विश्वासीगदे प्रभुरी कोड्बा मुला। ओच्छे थेनीगदेसे आलोड्नान परमेश्वरला बचन थे:ना लबारी आँट याङ्बा मुला।

¹⁵ हिन्बाम कोड कोडसे चा डाह लसी स्थान्दोसे भन्दा डाइ ज्यबा गे लबा मुला भिंसी उन्बारी म्हाइमुला, तर स्थान्दोगदेसे चा ज्यबा सेमसे ख्रीष्टला बारेरी थे:ना लबा मुला। ¹⁶ थार्बा पिन्बा समाचार थे:ना लबाला लागिरीन परमेश्वरसे डादा धम्बा हिन्ना भिंसी था याङ्बागदेसे चा माया लसी सेमहेन्सेन चु गे लबा मुला। ¹⁷ डाह लबागदेसे चा ज्यबा सेमसे आहिन। तर इयाल्खानरी डाइ अझ ल्हानान दुख याङ्गै भिंसी ह्वाडसे ह्वाडदान घेन स्होबा सेमसे ख्रीष्टला बारेरी पाङ्बा हिन्ना। ¹⁸ ज्यबा सेमसे लसै आज्यबा सेमसे लसै ठीकनोन मुला, जस्तो लसीन ख्रीष्टला बारेरी पाङ्गी भ्रतो:बा हिन्ना।

चु तामरी डा ल्हानान ताङ्बा मुला। ¹⁹ हिन्ना डा ताङ्गला। तिग्दा भिसम एनीगदेसे लबा प्रार्थनादेन येशू ख्रीष्टला आत्मासेन ह्यो लसी चु दुखग्याम फेला भिबा ताम डादा था मुला। ²⁰ डाइ सेमहेन्सेन घेन आश लसी चिबा मुला, डाइ लतो:बा जम्मान गेरी डा खाइमै पे:आतो:। तर डादेन छ्याम ल्हानान आँट मुला। ओच्छे डा सिसै सौसै सदाला ह्वाड लसीन डाला चु ज्यानसे ख्रीष्टलान मान लला। ²¹ तिग्दा भिसम डा सोबा चा ख्रीष्टदा तेन्बाला लागिरी हिन्ना। ओच्छे सिबा चा डाला लागिरी झन ज्यबा ताम हिन्ना। ²² डाला चु ल्हुइ सोतेधोना डाइ अझ ज्यबा गे लला। तर डा सिबा कि सोबा चु न्ही न्हडरी खजिबा चा धम्तो:बा थे ताम डादा था आरे। ²³ डादा दोधार तबा मुला। चु जम्बुलिड ख्लासी ख्रीष्टदेन छ्याम चिबा सेमएनोन ल्हानान मुला। तिग्दा भिसम डाला लागिरी चु ल्हानान ज्यबा ताम हिन्ना। ²⁴ तर एनीगदेला लागिरी चा डा सोसीन चितो:बा मुला। ²⁵ थेतबासेलमा एनीगदेदा विश्वासी ल्हेना लबारीदेन ताङ्ना लबारी डा अझ सोसी एनीगदे जम्मानदेन छ्याम चिला भिबा डादा पक्का था मुला। ²⁶ दाहेन्से डा दो:सी एनीगदेदेन छ्याम हुप तमा डाग्याम ख्रीष्टसे लबा गे म्हाइसी एनीगदे अझ ख्रीष्ट येशूदेन छ्याम गिक तसी ल्हानान ताङ्ग्याङ्गला।

²⁷ मुल ताम चा चुनोन हिन्ना, जे तसैनोन एनीगदेला बानीबेहोर ख्रीष्टला थार्बा पिन्बा समाचार अन्धार ततो:ला। थेतबासेलमा डा एनीगदेदेन छ्याम हुप तसै आतसै थार्बा पिन्बा समाचाररी स्थान्दो म्हिगदेसे विश्वास लगै भिंसी एनीगदे सेम गिक तसी ठिक्की दुख लबान गे लबा मुला भिबा ताम डाइ थे:म्याङ्गै। ²⁸ ओच्छे बिरोध लबा म्हिगदे म्हाइसी एनीगदे थालोङ्गो। चु थेनीगदेला लागिरी चा नाश तबाला चिनु हिन्ना। तर एनीगदेला लागिरी चा थार्बा याङ्गला भिंसी म्हाइबा चिनु हिन्ना। थार्बा याङ्गला चा परमेश्वरग्यामनोन हिन्ना। ²⁹ एनीगदेदा पिन्बा मौका ख्रीष्टदा विश्वास लबा जे आहिन, तर ख्रीष्टला लागिरी दुख नाबारीनोन हिन्ना। ³⁰ डाइ डाच्छा नाबा दुख एनीगदेसे म्हाइबा मुबा, थे दुख डाइ दान्देनोन नाबान मुला भिंसी एनीगदेसे थे:बा मुला। चुनोन दुख एनीगदेसेनोन नाबान मुला। †

2 तिग ख्रीष्टदेन छ्याम गिक तबासे लमा एनीगदेसे आँट याङ्बा मुला? ओच्छे तिग थेला मायासे एनीगदेसे ह्यो याङ्बा मुला? तिग परमेश्वरला आत्मादेन छ्याम संगती लबा मुला? तिग एनीगदेसे ह्वाड ह्वाड न्हडरी सेमहेन्सेन दया लबा मुला? ² थेह्वाड भिसम एनीगदे जम्मान सेम गिक तसी ह्वाड ह्वाड न्हडरी माया लउ, ओच्छे ठिक्की छ्याम छ्यामनोन गे लसी डादा ताङ्ना लउ। ³ ओच्छे ह्वाडला जे ग्याम च्यासी गे लबादेन ह्वाड जे घेन भिंसी थाम्हन्गो। तर ह्वाड भन्दा स्थान्दोदा घेन म्हन्सी सोजो तसी चिउ। ⁴ एनीगदे जम्मासेन ह्वाडदा जे ज्यबा तगै भिंसी थाम्हन्गो। तर स्थान्दोदाएनोन ज्यबा तगै भिंसी म्हन्गो।

⁵ एनीगदेसे ख्रीष्ट येशूला ह्वाडबान सेम थोगो।

⁶ येशू ख्रीष्ट डाच्छाहेन्सेन परमेश्वर मुबा।

तसैनोन थे परमेश्वर दोबारी आम्हाइनी।

⁷ बरु स्वर्गरी मुबा ह्वाडला जम्मान स्हे ख्लासी

म्हि दोसी जम्बुलिडरी केजी।

ओच्छे नोकर ह्वाडबान दोजी।

⁸ थे ह्वाडनोन म्हि दोसी फेखसैनोन सोजो तसी

परमेश्वरसे कुल्बा ताम इयान्सी

कुसरी सिबारीनोन तयार तजी।

⁹ थेतबासेलमा परमेश्वरसे थेदा जम्मान भन्दा घेन स्होसी

जम्मान स्हेगदेला भन्दा घेन मिन थान्जी।

¹⁰ थेतबासेलमा स्वर्गदेन जम्बुलिड ओच्छे जम्बुलिड धिरी मुबा

जम्मासेन येशूदा मान लबारी पुइ जूतो:ला।

¹¹ थेह्वाड लसीन परमेश्वर आबाला मानदेन जयजयकार लबाला लागिरी जम्मासेन येशू ख्रीष्टनोन प्रभु हिन्ना भिंसी पाङ्गो:ला। †

नाडसलसे ह्वाड लसी य्हाल तना लउ

¹² डाला सेम निबा ह्वागदे, डा एनीगदेदेन छ्याम मुबा धुडरी एनीगदेसे डाइ पाङ्गला ताम इयान्मुबा। दान्दे डा एनीगदेदेन छ्याम आरेमा झन डाइ पाङ्गला ताम इयान्बा चा घेन ताम हिन्ना। परमेश्वर म्हाइसी लोङ्गो ओच्छे थेदा मान लसी एनीगदेसे याङ्गला थार्बा अन्धारला गे लउ। ¹³ तिग्दा भिसम परमेश्वरसे एनीगदेदा थेसे कुल्बा ताम इयान्बा सेमदेन थेदा ताङ्गला लबा शक्ति पिन्सी एनीगदेला गुडरी गे लबान मुला।

¹⁴ थेतबासेलमा गनगनदेन कल आलना जम्मान गे ठिक्की लउ। ¹⁵ थेह्वाड लजी भिसम एनीगदे पापीदेन न्होड्बा म्हिगदेला गुडरी चोखोदेन तिगै दोष आरेबा म्हि तसी परमेश्वरला सन्तान दोला। ओच्छे सारसे मुरी य्हाल तना लबा ह्वाड लसी एनीगदेसे जम्बुलिडरी य्हाल य्हाल तना लला। ¹⁶ एनीगदेसे थेनीगदेदा थार्बा पिन्बा ख्रीष्टला समाचार थे:ना लजी भिसम ख्रीष्ट फेखबा धुडरी डाइ दुख लसी लबा गे खेरोरी आनिनी भिंसी डा ल्हानान ताङ्ग्याङ्गला। ¹⁷ ओच्छे एनीगदेला विश्वासग्याम एनीगदेला ल्हुइ परमेश्वरदा फुल्बा बलि ह्वाडबान दोबा मुला। डाला ल्हुइएनोन एनीगदेला ल्हुइदेन छ्याम बलि ह्वाड लसी फुल्तो:सैनोन डा ताङ्गला। ओच्छे एनीगदे जम्मानदेन छ्याम डा सेमहेन्सेन ताङ्गला। ¹⁸ थेह्वाड लसीन एनीगदे ताङ्गो, ओच्छे डादाएनोन ताङ्गला लउ।

तिमोथीदेन इपाफ्रोडिटस

¹⁹ डाइ तिमोथीदा एनीगदे मुबा ग्लारी योनान पुइखला भिंसी प्रभु येशूथोरी आश लबा मुला। चुह्वाड लसी थेंग्याम एनीगदेला बारेरी था याङ्गी डा ताङ्ग्याङ्गला। ²⁰ तिमोथीसे ह्वाड लसी एनीगदेदा सेमहेन्सेन वास्ता लबा म्हि डादेन छ्याम स्थान्दो खालै आरे। ²¹ तिग्दा भिसम स्थान्दोगदेसे चा येशू ख्रीष्टला तामदा तिगै वास्ता आलना ह्वाडला जे ग्याम च्यासी भ्रमुला। ²² तर तिमोथी खाह्वाड म्हि हिन्ना भिबा ताम एनीगदेदा थानोन मुला। तिग्दा भिसम झासे आबादा खाह्वाड लसी ह्यो लमुला थेह्वाड लसीन थेसे डादा थार्बा पिन्बा समाचार थे:ना लबारी ह्यो लबा मुला। ²³ थेतबासेलमा डादा तिग तबा चीम, थे ताम था याङ्गैछ्याम डाइ थेदा एनीगदे मुबा ग्लारी पुइखबा सेम मुला। ²⁴ ओच्छे डाएनोन योनान खम्याङ्गला भिंसी प्रभुथोरीन भर लबा मुला।

²⁵ एनीगदेसे डादा ह्यो लबाला लागिरी पुइखबा प्रभुरी डाला आले, डादेन छ्याम ठिक्की प्रभुला गे लबा ओच्छे डादा ह्यो लबा ख्रीष्टला सिपाही इपाफ्रोडिटसदा एनीगदे मुबा ग्लारी पुइखनोन तो:ला भिंसी डाइ म्हन्बा मुला। ²⁶ तिग्दा भिसम थेसेनोन एनीगदे जम्मानदेन छ्याम हुप तबारी ल्हानान सेम लबा मुला। थे आखम्बा मुला भिबा ताम एनीगदेसे थे:बासे लमा थेदा ल्हानान सुर्दा तबा मुला। ²⁷ हिन्ना, थे ल्हानान आखम्बा सिबारीन छ्याइमुबा तर परमेश्वरसे थेदा दया लजी। थेदा जे आहिन, डादाएनोन दुखथोरी झन दुख थातगै भिंसी परमेश्वरसे दया लजी। ²⁸ थेतबासेलमा थेदा एनीगदे मुबा ग्लारी पुइखबारी डाइ ल्हानान सेम लबा मुला। तिग्दा भिसम थेदा दो:सी म्हाइहेन्से एनीगदे ताङ्गला ओच्छे डाला सुर्दाएनोन म्हाला।

²⁹ एनीगदेसे थेदा प्रभुरी आले ह्वाडबान म्हन्सी सेमहेन्सेन ताङ्गी माया लउ।

चुहड्बा म्हिगदेदा चा मान लनोन तो:ला।³⁰ तिगदा भिसम एनीगदेसे डादा लतो:बा ह्यो लबाला लागिरी हाडला ज्यान्ना तिगै वास्ता आलना ख्रीष्टला गे लबाला लागिरी थे सिबारीन तयार तजी।

लहुडरी भर थालउ

3 दाहेन्से ज्योज्यो आले नाना आडागदे, प्रभुदेन गिक तबासे लमा एनीगदे ताङ्गो। एनीगदेला लागिरी ताम गिकनोन घरिघरि भितो:से डा छेर्बा आरे। तिगदा भिसम चु एनीगदेदान विश्वास जोगब लबाला लागिरी हिन्ना।

2 नडबा गे लबा नगी † हड्बा म्हिगदे म्राड्सी होशियार तसी चिउ। थेनीगदेसे खतना लतो:ला भिसी पाड्सी भ्रमुला।³ य्हाडसे मी परमेश्वरदा आत्माग्याम तेन्बा मुला। ओच्छे ख्रीष्ट येशूदेन छ्याम गिक तसी ताड्बा मुला। य्हाडसे लबा पक्का खतना चा चुनोन हिन्ना। थेतबासेलमा य्हाड म्हिगदेला गेथोरी भर लबा म्हि आहिन।⁴ थेहड्बा म्हिगदेला गेथोरी भर लबा म्हि हिन्सम स्य्हान्दोसे भन्दा डाइ ल्हानान भर लखम्सेला मुबा।⁵ तिगदा भिसम डा इस्राएल य्हुलला बेन्यामीन वंशरी न्हबा म्हि हिन्ना। न्हसी भ्रे:रे तमाकुनु डाला खतना तबा हिन्ना। डा हिब्रूगदेलाएनोन हिब्रू हिन्ना, ओच्छे परमेश्वरसे मोशादा पिन्बा ठिम ड्यान्बा फरिसीएनोन हिन्ना।^{††6} यहूदी धर्मलान ताम लबा हिन्सम डाइ हाडला धर्मदा जोगब लबारी मण्डलीदा गाते ल्हानान दुख पिन्जी। ओच्छे ठिम अन्धार भ्रसी परमेश्वरदा सेम निबा म्हि दोबा हिन्सम डा तिगै दोष आरेबा म्हि हिन्ना। †

7 तर थे धुडरी डाइ लबा जम्मान गेगदेदेन म्हन्बा तामगदे डाला लागिरी ज्यबान हिन्ना भिसी म्हन्बा मुबा। दान्दे थे जम्मान गेदेन म्हन्बा तामगदे ख्रीष्टला लागिरी तिगै गे आखेल्बा चीम भिसी डाइ था याड्जी।⁸ चुदे जे आहिन, डाइ ख्रीष्ट येशूदा डाला प्रभु भिसी डोसेबा ज्ञान बुद्धिला डाच्छा मी थे जम्मान स्हे तिगै गे आखेल्बा चीम भिसी डाइ म्हन्बा मुला। ख्रीष्ट येशूदा अझ ज्यना लसी डोसेखम्मै भिसी डाइ थे जम्मान स्हेदा नडबा गे आखेल्बा स्हे म्हन्सी ख्रीष्टला लागिरी ख्लासी जिन्बा मुला।⁹ डा ख्रीष्टदेन छ्याम गिक तगै भिसी डाइ म्हन्बा मुला। ओच्छे डा परमेश्वरदा सेम निबा म्हि दोबा चा डाइ ठिम ड्यान्सी डा हाडनोन परमेश्वरदा सेम निबा म्हि दोबा आहिन। तर ख्रीष्टदा विश्वास लबासे लमा परमेश्वरदा सेम निबा म्हि दोबा हिन्ना। डाला विश्वासदा च्यासी परमेश्वरसे डादा हाडदा सेम निबा म्हि स्होबा हिन्ना।¹⁰ डाइ ख्रीष्टदा पूरान डोसेसी थेदा सिबाग्याम सोना लबा शक्तिदा था याड्खम्मै, ओच्छे थे सिबा धुडरी थेसे नाबा हड्बान दुख डाइ नाबारी खम्मै।¹¹ थेहड् लसीन तजी भिसम सिबाग्याम दो:सी सोखम्मै भिसी डाइ म्हन्बा मुला।

याड्तो:बा स्हे याड्बारी भड लउ

12 डाइ जम्मान ताम याड्सी पूरान पाको म्हि दोबा मुला भिसी पाड्बारी छ्याड्बा आहिन। तर चु जम्मान ताम याड्बाला लागिरी डाइ अझ भड लबान मुला। तिगदा भिसम ख्रीष्ट येशूसे चुलान लागिरी डादा डाच्छान धम्बा मुला।¹³ ज्योज्यो आले नाना आडागदे, चु जम्मान तामगदे याड्सी जिन्जी भिसी डाइ म्हन्बा आरे। तर गे गिक चा डाइ लबा मुला। थे गे चा तिग हिन्ना भिसम डाच्छाला तामगदेदा म्ते:सी लिच्छाला तामगदेदा जे च्यासी डा भ्रबान मुला।¹⁴ परमेश्वरसे ख्रीष्ट येशूग्याम जुकजुकधोनाला जुनी पिन्बारी डादा ड्योड्बा हिन्ना। स्वर्गला चु इनाम याड्बाला लागिरी डाइ भड लबान मुला।

15 य्हाड आत्मारी पाको तबागदे जम्मासेन चुहड्बान सेम थोतो:ला। एनीगदेसे कोड कोड तामला बारैरी चा अर्गु सेम थोबा मुसम परमेश्वरसे एनीगदेदा घोना लला।¹⁶ ओच्छे य्हाडसे जुन ताम याड्बा मुला, थे तामरीन भ्रड।

17 ज्योज्यो आले नाना आडागदे, एनीगदेसेनोन डाइ लबा हड्बान लउ। ओच्छे डन्से लबा हड्बान गे लसी भ्रबा म्हिगदेदा च्यासी थेनीगदेसे लबा हड्बान गे लउ।^{††18} ख्रीष्टसे कुसरी सिसी तिग लजी भिसी भ्रबा म्हिगदेला बारैरी डाइ एनीगदेदा ल्हानान रेम पाड्सी जिन्बा मुला। दान्देनोन डाइ डाला मी नाड मीखली थोसी एनीगदेदा पाड्बा मुला।¹⁹ थेनीगदे नाश तसी म्हासी निला। तिगदा भिसम थेनीगदेला लहुडसे तिग म्हाड्बा थेदान ल भिसी तेन्मुला। ओच्छे पे:बा खबा तामरीनोन थेनीगदे ताड्बा चीम। थेनीगदेला सेमएनोन चुनोन जम्बुलिडला तामगदेरी जे मुला।²⁰ तर य्हाड मी स्वर्गला म्हि हिन्ना। थार्बा पिन्बा य्हाडला प्रभु येशू ख्रीष्ट स्वर्गग्याम फेखला भिसी य्हाडसे ग्याम च्यासी चिबा मुला।²¹ ख्रीष्ट येशूसे जम्मान स्हेदा हाडला तहरी भबा शक्तिग्याम य्हाडला कमजोर लहुडदा थेला हड्बान य्हाल य्हाल्बादेन शक्तिशाली लहुड स्होला।

4 थेतबासेलमा डाला ज्योज्यो आले नाना आडागदे, एनीगदेदा डाइ माया लसी ल्हानान ढन्बा मुला। एनीगदेसे लमान डा ल्हानान ताड्म्याड्बा मुला, ओच्छे डाइ याड्बा इनाम भिबान एनीगदे हिन्ना। थेतबासेलमा डाला ह्योगदे, एनीगदे सदन चुहड् लसीन प्रभुदेन छ्याम गिक तसी चिउ।

आँट पिन्बा ताम

2 इयोदियादेन सनुनुखे, एनीगदे प्रभुदेन गिक तबासे लमा हाड हाड न्हडरी ढिक्सी चिउ भिबा डाला बिन्ती मुला।³ डाला विश्वास लखम्बा ह्यो, एदा डाइ चु ताम पाड्ला, चु म्रिडम्हेमेगदेदा एसे ह्यो लसी पिन्गो। तिगदा भिसम थेनीगदेसे डादेन छ्याम थार्बा पिन्बा समाचार थे:ना लबा गे लबा मुला। डादेन छ्याम जे आहिन, क्लेमेस भिबा म्हिदेन डाला अर्गु ह्योगदेदेन छ्यामएनोन थेनीगदेसे ढिक्सी गे लबा मुला। परमेश्वरसे थेनीगदे जम्मालान मिन जुकजुकधोनाला जुनी पिन्बारी हाडला किताबरी भिसी थान्बा मुला।

4 ओच्छे प्रभुदेन गिक तबासे लमा एनीगदे ताङ्गो, डाइ दो:सीनोन पाड्ला एनीगदे सदन ताङ्गो।⁵ एनीगदेला सोजो बानीबेहोर जम्मान म्हिगदेसे था याड्गै। तिगदा भिसम प्रभु फेखसी जिन्बा मुला।⁶ एनीगदेसे तिगै तामरी सुर्दा थालउ। तर जम्मान तामला लागिरी प्रार्थना लबान धन्यवाद पिन्सी परमेश्वरदेन छ्याम बिन्ती लउ।⁷ म्हिसे था आयाड्बा परमेश्वरसे पिन्बा शान्तिसे एनीगदे जम्मालान म्हन्बा तामदेन सेमदा ख्रीष्ट येशूदेन छ्याम गिक स्होसी जोगब लसी थान्ना।

8 दाहेन्से ज्योज्यो आले नाना आडागदे, एनीगदेसे जुन ताम सत्य मुला, जुन ताम मान याड्बा खाल्ला मुला, जुन ताम ठीक मुला, जुन ताम चोखो मुला, जुन ताम ताड्बा खाल्ला मुला, जुन ताम ढिक्बा मुला ओच्छे जुन ताम जम्मादान सेम निबा खाल्ला मुला थेनोन तामरी सेम लउ।⁹ एनीगदेसे जुन ताम डाग्याम लोप्ली, जुन ताम डाग्याम याड्जी, जुन ताम थे:जी ओच्छे जुन ताम म्राड्जी, थेनोन ताम अन्धार भ्रउ। चुहड् लजी भिसम शान्ति पिन्बा परमेश्वर एनीगदेदेन छ्याम तला।

भेटीला लागिरी धन्यवाद

10 एनीगदेसे ल्हानान धिन लिच्छा डादा दो:सी ढन्बासे लमा डा प्रभुदेन छ्याम ल्हानान ताड्बा मुला। डाला लागिरी एनीगदेसे ल्हानान सुर्दा लबा मुबा। तर एनीगदेसे डादा पिन्बारी मौका आयाड्नी।¹¹ डादा खॉचो तजी भिसी पाड्बा आहिन। तिगदा भिसम जस्तोन धुडरी सन्तोक लसी चितो:मुला भिसी डादा था मुला।¹² ओच्छे खॉचो तसै आतसै खाहड् लसी भ्रतो:ला भिसी डादा था मुला। थेहड् लसीन चम्याड्सै चआम्याड्सै, ल्हाना मुसै च्याड्ना मुसै जस्तोन धुडरी सन्तोक लसी चितो:मुला भिसी डादा था मुला।¹³ ख्रीष्टसे पिन्बा शक्तिग्यामनोन डाइ चु जम्मान ताम लबारी खम्ला।

14 तसैनोन एनीगदेसे डादा दुखरी ह्यो लसी ज्यबा लजी।¹⁵ डाच्छा डाइ एनीगदेदा थार्बा पिन्बा समाचार थे:ना लसी माकेडोनिया भिबा ग्लाग्याम निबारी छ्याड्माएनोन चुहड् लसी किन्बा पिन्बा गे लबा चा एनीगदे फिलिप्पीला म्हिगदे बाहेक अर्गु खजिबै मण्डली आरेमुबा। थे ताम एनीगदेदा

† यहूदीगदेसे अर्गु य्हुलला म्हिदा "नगी" भिसी पाड्बा तर पावलसे चुरी यहूदीगदेदा "नगी" भिसी पाड्बा हिन्ना। तिगदा भिसम थेनीगदेला गे आज्यबा मुबा। †† 3:5 मुल २३:६; २६:५; रोमी ११:१३ 3:6 मुल ८:३; २२:४; २६:९-११

†† 3:17 १ कोर ४:१६; ११:१

थानोन मुला। ¹⁶ थेह्वड् लसीन डा थेसलोनिके भिबा ग्लारी मुबा धुइरीनोन एनीगदेसे ल्हानान रेम चुह्वड् लसीन डादा ह्यो लमुबा। ¹⁷ डाइ चु ताम पाइसी एनीगदेग्याम भेटी किन्बारी म्हाइबा आहिन। तर एनीगदेसे डादा लबा ह्योग्याम परमेश्वरसे मोलम पिन्गै भिबा डाला आश मुला।

¹⁸ एनीगदेसे इपाफ्रोडिटसदा पुइखबा भेटीग्याम डादा तो:तेधोना छ्योबा मुला। थे भेटी चा परमेश्वरदा सेम निबा बास्ना खबा बलि दोबा मुला। थे म्हाइसी परमेश्वर ल्हानान ताइबा मुला। ¹⁹ ख्रीष्ट येशूग्याम डाला परमेश्वरसे ह्याडला शक्तिग्याम ताइसी ताइसी एनीगदेदा तो:बा जम्मान स्हेगदे थेला सम्पत्तिग्याम पिन्ना। ²⁰ य्हाडला परमेश्वर आबाला सदन मानदेन जयजयकार तगै। आमेन।

चिठीला थुमरी भिबा ताम

²¹ ख्रीष्ट येशूदेन छ्याम गिक तसी चिबा परमेश्वरला जम्मान म्हिगदेदा प्याफुल्ला। चुरी डादेन छ्याम मुबा ज्योज्यो आले नाना आडागदेसेनोन एनीगदेदा प्याफुल्ला मुला। ²² परमेश्वरला म्हिगदेसे ओच्छे खास लसी रोमी ग्याल्बो कैसरला गे लबा म्हिगदेसेनोन एनीगदेदा प्याफुल्ला भिसी पाइबा मुला।

²³ प्रभु येशू ख्रीष्टला दयामाया एनीगदेदेन छ्याम तगै।

चु चिठीला बारेरी पाडतो:मा

येथूला मुल चेला पावलसे भिबा मुबा। चु चिठी भिबाला लागिरी पावलदा तिमोथी भिबा म्हिसे ह्यो लबा मुबा (कलस्सी १:१)।

रोम शहरला इयाल्खानग्याम भिबा मुबा।

ओस्पन ईश्वी संवत् ६१-६३ (विक्रम संवत् ११८-१२०) सालला गुडरी भिबा मुबा।

कलस्सी शहररी मुबा विश्वासीगदेदा भिबा मुबा।

कलस्सी भिबा शहर एफिसस भिबा शहरला स्यारपट्टि परब तबा एशिया अञ्चलला शहर गिक मुबा। चु मण्डली पावलसे शुरु लबा मण्डली चा आहिन, तसैनोन चु शहर थे बास चिबा ग्लाला डामरीन मुबासे लमा डाइ ह्यो लतो:ला भिसी थेसे म्हन्बा मुबा। चु मण्डलीरी प्रभुला गे लबाला लागिरी पावलसे एफिसस शहरग्याम म्हिगदे पुडबा मुबा। कलस्सीला मण्डलीरी लुसीला ताम लोप्बा म्हिगदेसे परमेश्वरदा डोसेबाला लागिरीदेन थार्बा याड्बाला लागिरी स्थान्दो आत्मादेन शक्तिगदेदा तेन्तो:ला भिसी पाड्बा। चु ताम पावलदाएनोन था मुबा। चु तामगदे बाहेक थे लुसीला ताम लोप्बा म्हिगदेसे खतना लतो:ला, ओच्छे चबा थुड्बादेन अर्गु तामगदेलाएनोन ठिम अन्धार लतो:ला भिसी लोप्पुबा। पावलसे कलस्सीला विश्वासीगदेदा थेह्ण्ड्बा लुसीला तामला बिरोध चा सत्य विश्वासग्याम लतो:ला भिसी चिठी भिबा मुबा। थेसे भिबा चु चिठीला मुल ताम चा येथू ख्रीष्टसे पूरान थार्ना लखम्ला, ओच्छे अर्गु तामदेन ठिमसे चा म्हिगदेदा ख्रीष्टग्याम थारेड तना लमुला। परमेश्वरसे जम्बुलिडला म्हिगदे येथूग्यामसेन स्होजी ओच्छे येथूग्यामनोन थेनीगदेदा ह्याड मुबा ग्लारी भजी। थेतबासेलमा येथू ख्रीष्टग्याम जे जम्बुलिडला जम्मान म्हिगदेसे थार्बा याड्ला। ओच्छे पावलसे जम्मान विश्वासीगदेदा विश्वासी भ्रबाला लागिरी तो:बा जम्मान तामगदे घोना लबा मुला। चु चिठी तुखिकस भिबा म्हिसे कलस्सी शहररी भोर्सी निबा मुबा। ओच्छे थेदेन छ्याम फिलेमोनना नोकर ओनेसिमसएनोन निबा मुबा। थेला लागिरी पावलसे फिलेमोनदा चिठीएनोन भिबा मुबा।

मुल तामगदे

प्याफुल्बादेन प्रार्थना १:१-१४

ख्रीष्ट जम्मान भन्दा घेन १:१५-२:१९

ख्रीष्टदेन छ्याम गिक तसी याड्बा छार जुनी २:२०-४:६

चिठीला थुमरी भिबा ताम ४:७-१८

पावलसे कलस्सीला विश्वासीगदेदा भिबा चिठी

1 लास्सो, कलस्सेरी मुबा परमेश्वरला म्हिगदेदा परमेश्वरसे ह्याडला समाचार थे:ना लबारी धम्बा डा ख्रीष्ट येथूला मुल चेला पावलदेन व्हाडला आले तिमोथीग्याम प्याफुल्ला! थेरी मुबा परमेश्वरला म्हिगदे ख्रीष्टदेन छ्याम गिक तबा विश्वासी ज्योज्यो आले नाना आडागदेदा व्हाडला परमेश्वर आबादेन ख्रीष्ट प्रभुग्याम दयामायादेन शान्ति तगै।

धन्यवाददेन प्रार्थना

3 डन्से एनीगदेला लागिरी प्रार्थना लबा धुडरी व्हाडला प्रभु येथू ख्रीष्टला आबा परमेश्वरदा सदन धन्यवाद पिन्बा मुला। 4 तिगदा भिसम एनीगदेसे ख्रीष्ट येथूदा विश्वास लबा तामदेन परमेश्वरला जम्मान म्हिगदे न्हडरी माया लसी ढिक्सी चिबा मुला भिबा ताम डन्से थे:बा मुला। 5 परमेश्वरसे स्वर्गरी एनीगदेला लागिरी जुकजुकधोनाला जुनी थान्बा मुला भिसी एनीगदेसे आश लबा मुला। थेतबासेलमा एनीगदे चुह्ण्ड लसी विश्वास लसी ह्याड ह्याड न्हडरी माया लसी ढिक्सी चिबा हिन्ना। एनीगदेसे लबा आशला तामला बारेरी एनीगदेसे डाच्छान थार्बा पिन्बा समाचार सत्य बचनग्याम थे:बा मुला। 6 चुनोन थार्बा पिन्बा समाचार थे:सी, परमेश्वरला दयामायाला बारेरी सत्य ताम ज्यना लसी घोमाकुनुहेन्से एनीगदे न्हडरी ख्रीष्टदा विश्वास लबा म्हिगदे बढब तबा मुला। थेह्ण्ड लसीन जम्बुलिडला जम्मान ग्लारी थार्बा पिन्बा समाचार थे:सी ख्रीष्टदा विश्वास लबा म्हिगदे बढब तबान मुला। 7 चु थार्बा

पिन्बा समाचार एनीगदेसे डन्से माया लबा ह्यो इपाफ्रासग्यामसेन था याड्सी जिन्बा मुला। थे डन्देन छ्यामनोन ढिक्सी गे लमुला। थेतबासेलमा डन्ना साटोरी थेसे एनीगदेला गुडरीनोन सेमहेन्सेन ख्रीष्टला गे लबा विश्वास लखम्बा म्हि हिन्ना। 8 ओच्छे परमेश्वरला आत्माग्याम एनीगदेसे ह्याड ह्याड न्हडरी लबा मायाला बारेरी थेसे डन्दा पाड्बा मुला।

9 थेतबासेलमा चु ताम थे:माकुनुहेन्से डन्से एनीगदेला लागिरी प्रार्थना लबारी खलाबा आरे। परमेश्वरला आत्मासे पिन्बा ज्ञान बुद्धिग्याम एनीगदेसे तिग लगै भिसी परमेश्वरसे म्हन्बा मुला, थे जम्मान ताम ज्यना लसी घोबारी खम्मै भिसी बिन्ती लबा मुला। 10 थेह्ण्ड लसीन एनीगदेसे प्रभुदा सेम निबा बानीबेहोर थोसी सदन ज्यबा गे लखम्मै। एनीगदेला थेह्ण्ड्बा गेग्याम प्रभु ताड्गै। ओच्छे परमेश्वरला बारेरी झन ज्यना लसी घोखम्मै। 11 एनीगदेदा जस्तोन दुख तसैनोन ताड्सी ताड्सी नाबाला लागिरी परमेश्वरला घेन शक्ति याड्सी भड्सी चिउ। 12 परमेश्वरसे व्हाल व्हाल्बा युल्सारी चिबा ह्याडला म्हिगदेदा पिन्बा हक एनीगदेदाएनोन पिन्बा मुला। थेतबासेलमा थेह्ण्ड्बा हक पिन्बा परमेश्वर आबादा सदन धन्यवाद पिन्गो। 13 थेनोन परमेश्वरसे व्हाडदा शैतानना धोपधोप्बा युल्साग्याम फेसी ह्याडसेन माया लबा झा ख्रीष्टला युल्सारी भसी थान्जी। 14 ख्रीष्टसेन व्हाडला पापला दोष मेटब लसी व्हाडदा पापग्याम फेबा मुला। ††

जम्मान भन्दा घेन ख्रीष्टनोन हिन्ना

15 खालैसेन म्राड्आखम्बा परमेश्वरला रुप ख्रीष्टनोन हिन्ना। थे परमेश्वरसे स्होबा जम्मान स्हे भन्दा डाच्छाहेन्सेन मुबा। थेतबासेलमा परमेश्वरसे स्होबा जम्मान स्हे भन्दा घेन ख्रीष्टनोन हिन्ना। 16 तिग्दा भिसम स्वर्गदिन जम्बुलिडरी मुबा म्राड्आखम्बा म्राड्आखम्बा जम्मान स्हेगदे, ग्लेगदे मुसै, खुल्सागदे मुसै, शासन लबागदे मुसै, अधिकार याड्बागदे मुसै परमेश्वरसे ख्रीष्टग्याम स्होबा हिन्ना। ओच्छे परमेश्वरसे चु जम्मान ख्रीष्टलान लागिरी स्होबा हिन्ना। 17 जम्मान स्हे स्होबा भन्दा डाच्छाहेन्सेन ख्रीष्ट मुबा। थेतबासेलमा जम्मान स्हेगदे ख्रीष्ट येशूरीन छ्याबा मुला। 18 ख्रीष्ट हाडला लहुड मण्डलीला थोबो हिन्ना। ओच्छे लहुडला मुल हड्बा जम्मान स्हेला मुल थेनोन हिन्ना। थेहड् लसीन सिबागदे न्हडग्याम जम्मान भन्दा डाच्छा सोबाएनोन ख्रीष्टनोन हिन्ना। थेतबासेलमा जम्मान स्हेगदे भन्दा घेन ख्रीष्टनोन हिन्ना। 19 परमेश्वरसे म्हन्बा अन्धार परमेश्वर हाडनोन थेला झा ख्रीष्ट न्हडरी तसी धन्छ्याबा मुला। 20 हाडला झा ख्रीष्ट क्रुसरी सिसी बगब लबा काग्यामसेन परमेश्वरसे स्वर्गदिन जम्बुलिडरी मुबा जम्मान स्हेदा शान्ति पिन्जी। ओच्छे ख्रीष्टग्यामसे जम्मान स्हेदा हाडलान स्होजी। 21 डाच्छा एनीगदेला पापी सेमदेन पाप गेसे लमा एनीगदे परमेश्वरला शत्रु मुबा। थेतबासेलमान थे धुडरी एनीगदे परमेश्वरग्याम थारेड मुबा। 22 तर दान्दे परमेश्वरसे म्हन्बा अन्धार परमेश्वरला झा म्हे दोसी सिजी। चुग्यामसेन परमेश्वरसे एनीगदेदा हाडला ह्येन तिगै दोष आरेबा चोखो म्हे स्होसी हाडला डामरी भबारी हिन्ना। 23 थेतबासेलमा एनीगदेसे लबा विश्वास आखलाना विश्वासरी कोड्सी चिउ। ओच्छे एनीगदेसे थार्बा पिन्बा समाचार थे:बा धुडरी याड्बा आशदा थाम्ले:गो। तिग्दा भिसम चु समाचार जम्बुलिडला जम्मासेन थे:सी जिन्बा मुला। थेतबासेलमा डा पावलएनोन चुनोन समाचार थे:ना लबा म्हे दोबा मुला।

मण्डलीला लागिरी पावलसे लबा गे

24 दान्दे एनीगदेला लागिरी दुख नातो:सै डा ताड्बा मुला। तिग्दा भिसम डाइ ख्रीष्टसे नाबा हड्बा दुख अझ नातो:सेला मुला। थेतबासेलमा थेला लहुड मण्डलीला लागिरी डाइ नातो:बा जम्मान दुख नाला। 25 परमेश्वरसे थेला मण्डलीरी गे लबा जिम्मा डादा पिन्बा मुला। डादा पिन्बा जिम्मा चा एनीगदेला लागिरी परमेश्वरला समाचार पूरान थे:ना लबा हिन्ना। 26 चु दडबोहेन्सेन खालैसे घोबारी आखम्बा परमेश्वरला सेमला ताम हिन्ना। तर दान्दे चु परमेश्वरसेन हाडला म्हेगदेदा घोना लबा मुला। 27 म्हेसे था आयाड्बा परमेश्वरला सेमला ताम अर्गु खुलला म्हेगदेला लागिरी गाते उदेकला मुबा भिबा ताम घोना लबारी थेनीगदेदा धम्बा हिन्ना। थे परमेश्वरला सेमला ताम चा एनीगदेला सेमरी मुबा ख्रीष्ट हिन्ना। ओच्छे एनीगदेसे परमेश्वरदेन छ्यामनोन चिम्माड्ला भिसी लबा आश हिन्ना।

28 थेतबासेलमा डन्से जम्मान म्हेगदेदा ख्रीष्टला बारेरी पाड्बा मुला। ओच्छे ख्रीष्टदेन छ्याम गिक तबागदेदा पाको म्हे स्होसी परमेश्वरला डामरी भोर्बाला लागिरी थेनीगदेदा डन्ना ज्ञान बुद्धिसे खम्तेधोना लोप्सी होशियार तना लबा मुला। 29 चुला लागिरी डा न्हडरी मुबा ख्रीष्टला घेन शक्तिग्याम डाइ दुख लसी चु गे लबा हिन्ना।

2 एनीगदेदेन लाउडिकिया भिबा शहररी मुबा विश्वासीगदेला लागिरी ओच्छे डादेन छ्याम हुप आतबा म्हेगदेला लागिरी डाइ गाते दुख लसी गे लबा मुला भिबा ताम एनीगदेसे था याड्गै। 2 डाइ चुहड् लसी गे लबा चा एनीगदेसे आँट याड्सी हाड हाड न्हडरी माया लसी टिकसी चिखमौ भिसी हिन्ना। ओच्छे एनीगदेसे परमेश्वरला बचन पूरान घोसी परमेश्वरला सेमला ताम ख्रीष्टदा ज्यना लसी डोसेगै, घोगै भिसीएनोन हिन्ना। 3 यहाडदा आरेनान आतबा परमेश्वरला ज्ञान बुद्धि ख्रीष्टदेन छ्याम जे मुला। 4 थेतबासेलमा खालैसेन एनीगदेदा लुसीला ताम लोप्सी झुक्याब लबारी थाखमौ भिसी चु ताम डाइ एनीगदेदा पाड्बा हिन्ना। 5 डा लहुडरी एनीगदेदेन छ्याम आरेसै डाला सेम मी सदन एनीगदेदेन छ्यामनोन मुला। ओच्छे

† 1:18 एफि १:२२-२३ † 1:20 एफि २:१६

एनीगदेला बानीबेहोरदेन ख्रीष्टदा लबा विश्वासरी एनीगदे कोड्सी चिबा म्राड्सी डा ल्हानान ताड्बा मुला।

थार्बा पिन्बा ख्रीष्टनोन हिन्ना

6 थेतबासेलमा एनीगदेसे ख्रीष्ट येशूदा प्रभु भिसी विश्वास लबासे लमा सदन ख्रीष्टदेन छ्याम गिक तसी भ्रउ। 7 डाच्छा एनीगदेदा लोप्बा अन्धार विश्वासरी अझ कोड्बान निउ। थेहड् लसीन ख्रीष्टदा लबा विश्वासरी याडयोड आतना ख्रीष्टदेन छ्याम गिक तसी विश्वासरी बढब तबान निउ। ओच्छे परमेश्वरदा सदन धन्यवाद पिन्गो।

8 च्यागो, एनीगदेदा खालै म्हेसे थेनीगदे हाड हाडसे म्हन्सी लोप्बा गे आखेल्बा लुसीला ताम लोप्सी फसब थालगै। तिग्दा भिसम चु जम्मान ताम जम्बुलिडदेन मुरी मुबा म्हाड म्हुड, ल लुग्याम खबा ताम हिन्ना। तर ख्रीष्टग्याम खबा आहिन।

9 ख्रीष्ट म्हे दोसी फेखसै थेनोन परमेश्वर हिन्ना। 10 एनीगदे ख्रीष्टरी गिक तबासे लमा एनीगदेसे पूरा थार्बा याड्बा मुला। ओच्छे जम्मान शक्तिगदेदेन अधिकार याड्बागदेथोरी शासन लबाएनोन ख्रीष्टनोन हिन्ना।

11 ख्रीष्ट येशूदेन छ्याम गिक तबासे लमा एनीगदे खतना लबा म्हे हड्बान दोबा मुला। तर यहूदीगदेला ठिम अन्धार एनीगदेला लहुडला तिगै स्हे थासी आहिन। तर ख्रीष्ट येशूसे एनीगदेला पापी बानीबेहोर भ्याड्सी खतना लबा हिन्ना। 12 तिग्दा भिसम बपतिस्मा किन्मा एनीगदे ख्रीष्टदेन छ्यामनोन लहुबा मुबा। ओच्छे परमेश्वरला शक्तिसे ख्रीष्टदा सिबाग्याम सोना लबा हिन्ना, थेनोन शक्तिथोरी विश्वास लबासे लमा एनीगदेदाएनोन ख्रीष्टदेन छ्यामनोन सोना लबा मुला। 13 डाच्छा एनीगदे हाडला पापदेन पापी बानीबेहोर आखलाबासे लमा एनीगदे सिबा तेबान मुबा। तर दान्दे परमेश्वरसे यहाड जम्मालान पाप माफ लसी ख्रीष्टदेन छ्यामनोन सोना लबा मुला।

14 यहाडला आज्यबा गेसे लमा परमेश्वरसे मोशादा पिन्बा ठिम अन्धार याड्तो:बा सजायदा परमेश्वरसे क्रुसरी खिल ठोक्सी नाश लजी। 15 चुहड् लसी ख्रीष्ट क्रुसरी सिसी जम्मान शक्तिगदेदेन अधिकार याड्बागदेदा भ्रेना लजी। ओच्छे थेनीगदेदा जम्मालान ओन्हाडरी पे:ना लजी।

16 थेतबासेलमा एनीगदेदा खालै म्हेसे तिग चबा थुड्बा लबा चीम, खाहड्बा खाहड्बा चाड धड्बा चीम, औंसी धड्बा चीम कि धड्बा चीम ओच्छे ब्लप्बा न्हबा धिन धड्बा चीम कि धड्बा चीम भिसी दोष थालगै। 17 चु जम्मान ठिमगदे चा सत्य तामला चिनु जे हिन्ना। थे सत्य ताम भिबा चा ख्रीष्टनोन हिन्ना। 18 एनीगदेदा खालैसे लुसीला ताम लोप्सी फसब थालगै। तिग्दा भिसम थेहड्बा म्हेगदेसे एनीगदेदा फसब लबारी यहाड तिगै आहिन, यहाडसे स्वर्गदूतगदेदा तेन्तो:ला भिसी लोप्पुला। चु जम्मान ताम डन्दा परमेश्वरसे उन्बा हिन्ना भिसी थेनीगदेसे पाड्सीनोन थेन्ना सेमरी म्हन्सी लोप्बा ताम जे हिन्ना। थेतबासेलमा एनीगदेसे थेनीगदेला ताम ड्यान्जी भिसम एनीगदेसे याड्तो:बा इनाम आयाड्। थेनीगदेसे हाडला सेमरी म्हन्सी लोप्बा तामरी घमण्ड लसी भ्रमुला। तर थेनीगदेसे घमण्ड लतो:बा ताम तिगै आरे। 19 थेहड्बा म्हेगदे चा हाडला लहुडला थोबो हड्बा ख्रीष्टदेन छ्याम आचिना, फेसी चिमुला। ख्रीष्टदेन छ्याम गिक तसी चिजी भिसम जे यहाडला लहुडला जोर्नी जोर्नीरी भड वाड्सी परमेश्वरसे म्हन्बा अन्धार यहाड ल्हेबान निला। 20

एनीगदे ख्रीष्टदेन छ्यामनोन सिसी जम्बुलिडदेन मुरी शासन लबा म्हाड म्हुडदेन ल लुग्याम फेसी जिन्बा मुला। चुदे एनीगदे फेसी जिन्बा हिन्सम जम्बुलिडरी चिबा हड् लसी थेहड्बा ठिमदा तिग्दा खलाबारी आखम्बा? ओच्छे अझ तिग्दा थेहड्बा ठिमला लिच्छा भ्रबा? 21 ओच्छे अझ तिग्दा चु लबारी आत, चु चबारी आत, चु थुर्बारी आत भिसी पाड्सी भ्रबा? 22 चु जम्मान तामगदे चा यहाडसे लना लनान म्हासी निबा ताम हिन्ना। तिग्दा भिसम चु तामगदे चा म्हेगदेसे स्हान्दो म्हेदा कुल्बारीदेन लोप्बारी स्होबा ठिम जे हिन्ना। 23 थेहड्बा रिमठिम तेन्बा म्हेगदेसे चा “डनी धर्म कर्म लबा

‡ 2:12 रोमी ६:४ † 2:13 एफि २:१-५ † 2:14 एफि २:१५ † † 2:16 रोमी १४:१-६ † † 2:19 एफि ४:१६

सोजो म्हि हिन्ना" भिसी ल्हानान सेबा दोसी हाडला ल्हुइदा दुख पिन्मुला। तर थेनीगदेसे हाडला पापी सेमदा चा तहरी थान्बारी आख्मुला।

परमेश्वरदा सेम निबा बानीबेहोर

3 एनीगदे ख्रीष्टदेन छ्यामनोन सिबाग्याम सोबा मुला। थेतबासेलमा स्वर्गरी मुबा स्हेगदे म्हाइगो। थेनोन स्वर्गरी परमेश्वरला दाहिने छ्यापट्टि मुल ठिरी ख्रीष्ट धन्छ्यामुला।^{†2} एनीगदेसे जम्बुलिडरी मुबा तामगदेला बारेरी आहिन तर स्वर्गरी मुबा तामगदेला बारेरी म्हन्गो।[‡] तिग्दा भिसम एनीगदे ख्रीष्टदेन छ्यामनोन सिबा मुला। ओच्छे एनीगदेला जुनी ख्रीष्टदेन छ्याम परमेश्वर मुबा ग्लारी थान्बा मुला।⁴ ओच्छे एनीगदेला जुनी ख्रीष्टनोन हिन्ना। थेतबासेलमा ख्रीष्ट दोःसी फेप्खबा धुइरी थेला घेन व्हालदेन शक्तिरी एनीगदेएनोन थेदेन छ्यामनोन तला।

⁵ थेतबासेलमा एनीगदेसे जम्बुलिडरी लबा आज्यबा बानीबेहोर खलागो। थेह्इबा आज्यबा बानीबेहोर भिबा चा स्थान्दोदेन छ्याम ब्रेल्सी भ्रबा, स्थान्दोदेन छ्याम ब्रेल्बा सेम लबा, पापी सेम थोबा, आज्यबा ताम म्हन्बादेन लोभ लबा हिन्ना। लोभ लबा चा मूर्तिदा परमेश्वर भिसी तेन्बा हिन्ना।

⁶ थेह्इबा गेगदेसे लमान परमेश्वर थेनीगदे ग्राइसी बोमो खबा मुला ओच्छे परमेश्वरसे कुल्बा ताम आड्यान्बा †† थेह्इबा म्हिगदेदा थेसे सजाय पिन्ना।

⁷ डाच्छा मी एनीगदेएनोन थेह्इबा तामला लिच्छा भ्रमुबा।

⁸ तर दाहेन्से एनीगदेसे म्हिदा बोमो लबा, म्हिदा बिरोध लबा, स्थान्दोला बेइज्जत लबा, नइबा ताम लबा चु जम्मान आज्यबा ताम खलागो।⁹ ओच्छे खालैदेन एनीगदेसे लुसीला ताम थालउ। तिग्दा भिसम एनीगदेसे डाच्छाला जम्मान आज्यबा बानीबेहोर खलासी जिन्बा मुला।^{†10} दाहेन्से परमेश्वरसे एनीगदेदा छार जुनी पिन्बासे लमा एनीगदेसे परमेश्वरदा ज्यना लसी डोसेगै भिसी अझन परमेश्वरसे एनीगदेदा हाड ह्इबान स्होबान मुला।^{††11} छार म्हि दोमाहेन्से अर्गु व्हुलला म्हि मुसै, यहूदी मुसै, खतना लसै आलसै, पढब लबारी आसेसै, बानीबेहोर आरेसै नोकर मुसै मालिक मुसै तिगै घेन ताम आहिन। तर ख्रीष्टसे जम्मानथोरी शासन लबादेन ख्रीष्ट व्हाड जम्मानदेन छ्याम तबा चा घेन ताम हिन्ना।

¹² हाडलान म्हिगदे स्होबारी परमेश्वरसे माया लसी एनीगदेदा धम्बा हिन्ना। थेतबासेलमा एनीगदे सेमहेन्सेन दया लबा, दुख नाखम्बादेन घेन म्हि आदोना सोजो म्हि दोसी भ्रउ।^{††13} ओच्छे एनीगदे हाड हाड न्हडरी सेम नासी चिउ। खालैसे एनीगदेदा बिरोध लसम प्रभुसे एनीगदेदा माफ लबा ह्इ लसी थेनीगदेदाएनोन माफ लउ।^{††14} चु जम्मान तामगदे भन्दा घेन चा एनीगदे न्हडरी लबा माया हिन्ना। तिग्दा भिसम जम्मान स्हेदा गिक स्होबा चा माया हिन्ना।¹⁵ ओच्छे ख्रीष्टसे पिन्बा शान्तिसे एनीगदेला सेम न्हडरी सदन गे लगै। चुनोन शान्तिला लागिरी परमेश्वरसे एनीगदेदा ख्रीष्टय्याम ल्हुइ गिक ह्इबान स्होसी ड्योइबा हिन्ना। ओच्छे सदन परमेश्वरदा धन्यवाद पिन्गो।¹⁶ एनीगदेला सेम सदन ख्रीष्टला बचनसे प्लिड्सी गिकसेम गिकदा हाडला जम्मान ज्ञान बुद्धिसे लोणो। ओच्छे परमेश्वरला आत्मासे पिन्बा व्हाइ सेमहेन्से गोसी परमेश्वरदा धन्यवाद पिन्गो।¹⁷ एनीगदेसे खजिबै गेदेन ताम लसै प्रभु येशूला मिनग्यामसेन लउ। ओच्छे प्रभु येशूग्यामसेन परमेश्वर आबादा धन्यवाद पिन्गो।^{‡‡}

ख्रीष्टदा विश्वास लबागदेसे लतोःबा ताम

¹⁸ जम्मान म्रिडम्हेमेगदे हाड हाडला हेम्बोला तहरी चिउ। तिग्दा भिसम चु प्रभुदा सेम निबा ताम हिन्ना।^{§19} ओच्छे जम्मान हेम्फेबेगदेसेनोन हाड हाडला म्रिडदा आज्यबा व्यवहार आलना माया लउ।^{§†}

²⁰ कोलागदे, एनीगदेसे हाडला आबा आमासे कुल्बा जम्मान ताम इयान्गो। चुह्इ लसम परमेश्वर ताड्ला।^{§††}

²¹ थेह्इ लसीन आबागदेसेनोन हाड हाडला कोलागदेदा बोमो खना थालउ। बोमो खना लजी भिसम थेनीगदेला सेम स्हु खला।^{§†}

²² नोकरगदे, एनीगदेसे जम्बुलिडरी मुबा हाड हाडला मालिकगदेदा ताड्ला लबारी थेनीगदेला डाच्छा जे गे लबा आहिन। तर प्रभुदा मान लबा ह्इ लसी एनीगदेला मालिकदाएनोन मान लउ। ओच्छे एनीगदेसे सदन थेनीगदेसे कुल्बा ताम इयान्गो। ओच्छे हाडला सेमहेन्से गे लउ।^{§†23} ओच्छे एनीगदेसे जुन गे लसै म्हिला लागिरी गे लबा ह्इ लसी आहिन, तर प्रभुला लागिरी गे लबा ह्इ लसी सेमहेन्सेन झन्सी गे लउ।²⁴ तिग्दा भिसम प्रभुसे हाडला म्हिगदेदा इनाम पिन्ना भिसी लबा कबुल एनीगदेदा थानोन मुला। ओच्छे एनीगदेसे तेन्बा प्रभु चा ख्रीष्ट जे हिन्ना।²⁵ जुन म्हिसे आज्यबा गे लला थेसे लबा आज्यबा गेला सजाय याड्नोन याड्ला। तिग्दा भिसम परमेश्वरसे खालैला ली आच्याना निसाफ लला।^{§†}

4 मालिकगदे, एनीगदेसेनोन हाडला नोकरगदे न्हडरी खालैला ली आच्याना ज्यना लउ। ओच्छे एनीगदेसेनोन हाडला मालिक स्वर्गरी मुला भिबा ताम थाम्लेःगो।^{§†}

ख्रीष्टियानगदेसे लतोःबा ताम

² एनीगदे सदन परमेश्वरदा धन्यवाद पिन्बान झन्सी प्रार्थना लसी चिउ।³ एनीगदेसे प्रार्थना लबा धुइरी अझ ख्रीष्टला बारेरी परमेश्वरला सेमरी मुबा ताम म्हिगदेदा थेःना लबारी परमेश्वरसेन ग्याम स्होसी पिन्गै भिसी डन्ना लागिरी प्रार्थना लसी पिन्गो। ख्रीष्टला समाचार थेःना लबासे लमान दान्दे डा इयाल्खानरी परब तबा हिन्ना।⁴ ओच्छे डाइ घोना लतोःबा चु ताम ज्यना लसी घोना लबारी खम्यै।

⁵ ख्रीष्टदा विश्वास आलबा म्हिदेन होस लसी ज्यबा व्यवहार लउ। ओच्छे एनीगदेसे याड्बा खजिबै मौका स्योर्ना थालउ।^{§†6} थेतबासेलमा एनीगदेसे पाड्बा ताम म्हिगदेदा इयान्गो म्हन्बा खाल्ला तगै। ओच्छे म्हिगदेदेन छ्याम ताम लमा खाह्इ लसी जोहाब पिन्तोःला भिसी घोउ।

⁷ डन्से माया लबा आले तुखिकससेन एनीगदेदा डाला बारेरी जम्मान ताम पाड्ला। थेएनोन डन्देन छ्यामनोन प्रभुला गे लबा विश्वास लखम्बा म्हि हिन्ना।^{§†8} डाइ थेदा एनीगदे मुबा ग्लारी पुड्खबा चा थेसे डन्ना बारेरी पाड्सी एनीगदेसे आँट याड्गै भिसी हिन्ना।^{§§9} थेदेन छ्याम ओनेसिमसएनोन खबान मुला। डन्से विश्वास लखम्बा सेम निबा आले ओनेसिमस चा एनीगदेलान म्हि हिन्ना। एनीगदेदा डन्ना बारेरी थेन्से जम्मान ताम पाड्ला।¹⁸

¹⁰ डादेन छ्यामनोन इयाल्खानरी मुबा ह्यो आरिस्तार्खससे एनीगदेदा प्याफुल्ला भिसी पाड्बा मुला। ओच्छे बारनाबासला कोन मर्कूससेनोन एनीगदेदा प्याफुल्ला भिसी पाड्बा मुला। मर्कूस एनीगदे मुबा ग्लारी खजी भिसम एनीगदेसे थेदा मान लतोःला भिबा ताम था याड्सी जिन्बा मुला।¹⁹¹¹ युस्तस भिबा येशूसेनोन एनीगदेदा प्याफुल्ला भिसी पाड्बा मुला। यहूदी विश्वासीगदे न्हडला चु सोमसे जे परमेश्वरला व्हुल्साला समाचार थेःना लबारी डादेन छ्याम गे लबा मुला। चु सोमसे लमान डाइ ल्हानान भड याड्बा मुला।

¹² थेह्इ लसीन प्रभु ख्रीष्ट येशूला गे लबा एनीगदेलान आले इपाफ्राससेनोन एनीगदेदा प्याफुल्ला भिसी पाड्बा मुला। एनीगदेसे परमेश्वरसे म्हन्बा जम्मान ताम घोसी विश्वासरि पाकोदेन ढक्क तसी चिबारी खम्यै भिसी थेसे सदन एनीगदेला लागिरी प्रार्थना लबा मुला।²⁰¹³ थेसे लाउडिकिया भिबा शहरदेन हिरापोलिस भिबा शहररी मुबागदेला लागिरी ओच्छे एनीगदेला लागिरी ल्हानान दुख लसी गे लबा मुला भिबा ताम डाइ म्राड्बा मुला।

¹⁴ थेह्इ लसी डन्ना सेम निबा आले डाक्टर लूकादेन डेमाससेनोन एनीगदेदा प्याफुल्ला भिसी पाड्बा मुला।²¹¹⁵ लाउडिकिया भिबा शहरला

† 3:1 भजन ११०:१†† परमेश्वरसे कुल्बा ताम आड्यान्बागदेदा भिबा ताम चा कोइ ग्रीक बाइबलरी मुला कोइ ग्रीक बाइबलरी आरे। ‡ 3:9 एफि ४:२२ ‡† 3:10 उत्प १:२६; एफि ४:२४ ‡‡ 3:12 एफि ४:२ ‡‡† 3:13 एफि ४:२२ ‡‡‡ 3:17 एफि ५:१९-२० § 3:18 एफि ५:२२; १ पत्रु ३:१ §† 3:19 एफि ५:२५; १ पत्रु ३:७ §†† 3:20 एफि ६:१

§‡ 3:21 एफि ६:४ §†† 3:22 एफि ६:५-८ §† 3:25 व्यव १०:१७; एफि ६:९ §‡ 4:1 एफि ६:९ §§† 4:5 एफि ५:१६ §§‡ 4:7 मुल २०:४; २ तिमो ४:१२ §§§ 4:8 एफि ६:२१-२२ 18 4:9 फिले १०-१२ 19 4:10 मुल १९:२९; २७:२; फिले २४; मुल १२:१२, २५; १३:१३; १५:३७-३९ 20 4:12 कल १:७; फिले २३ 21 4:14 २ तिमो ४:१०, ११; फिले २४

विश्वासी ज्योज्यो आले नाना आडागदेदेन नुम्फास भिबा म्रिडम्हेमेदा ओच्छे
थेला दिमरी मुबा मण्डलीदाएनोन डाइ फ्याफुल्बा मुला भिसी पाइसी पिन्गो।
¹⁶ चु चिठी एनीगदेसे पढब लसी जिन्माहेन्से लाउडिकिया भिबा शहररी
मुबा मण्डलीदाएनोन पढब लपुङ्गो। ओच्छे लाउडिकियारी डाइ पुइबा
चिठीएनोन एनीगदेसे पढब लउ। ¹⁷ ओच्छे “प्रभुसे एदा पिन्बा गे पूरा लनोन
तो:ला” भिसी अर्खिप्पसदा पाङ्गो। †

¹⁸ एनीगदे जम्मादान फ्याफुल्ला भिसी डा पावलसेन भिबा हिन्ना। ओच्छे
डा इयाल्खानरी मुला भिबा ताम एनीगदेसे थाम्ते:गो। एनीगदेदेन छ्याम
परमेश्वरला दयामाया सदन तगै।

† 4:17 फिले २

चु चिठीला बारेरी पाडतो:मा

येथूला मुल चेला पावलसे भिबा मुबा। चु चिठी भिबाला लागिरी पावलदा सिलासदेन तिमोथी भिबा म्हिसे ह्यो लबा मुबा (१ थेसलोनिके १:१)।

कोरिन्थ शहररी भिबा मुबा।

ओस्पन ईश्वी संवत् ५० (विक्रम संवत् १०७) सालरी भिबा मुबा। बाइबलला ल्हाना ह्युबा विद्वानगदेसे पावलसे भिबा चिठीगदे न्हडला चु जम्मान भन्दा डाच्छा भिबा चिठी हिन्ना भिसी पाड्मुला।

थेसलोनिके शहररी मुबा विश्वासीगदेदा भिबा मुबा।

थेसलोनिके भिबा शहर रोम यहुल्सारी परब तबा माकेडोनिया भिबा अज्वलला ग्लेखाड मुबा। पावल फिलिप्पी शहरग्याम चु शहररी निजी, ओच्छे थाबा पिन्बा समाचार थे:ना लसी मण्डली शुरु लजी (मुल चेला १७:१०)। तर थे शहररी यहूदीगदेसे तिगै धिन लिच्छा पावलदा बिरोध लजी। यहूदी धर्म सेम निबा अर्गु यहुलला म्हिगदेसे पावलसे थे:ना लबा थाबा पिन्बा समाचाररी विश्वास लबा म्हाड्सी थे यहूदीगदेसे पावलदा बिरोध लजी। थे यहूदीगदेसे ल्हानान बिरोध लबासे लमा पावल थेसलोनिके शहरग्याम बेरिया भिबा शहररी निजी। लिच्छा पावल कोरिन्थ शहरग्याम धोखमा थेदेन ह्यामनोन प्रभुला गे लबा तिमोथीग्याम थेसलोनिके शहररी मुबा मण्डलीला बारेरी थे:जी।

चु डाच्छारेमला चिठी पावलसे थेसलोनिके शहररी मुबा विश्वास लबा म्हिगदेदा आँट पिन्बारीदेन तिगै ताम लोपबाला लागिरी भिबा मुबा। ओच्छे थेनीगदेसे लबा विश्वासदेन मायाला बारेरी थे:सी पावलसे परमेश्वरदा धन्यवाद पिन्जी। पावलसे ह्याड थेनीगदेदेन ह्याम मुबा धुडरी ह्याड खाह्यु लसी चिबा मुबा थे ताम ढन्ना लबा मुला।

जमाहेन्से पावलसे ख्रीष्ट दो:सी फेप्लबाला बारेरी मण्डली न्हडरी थोन्बा तामगदेला जोहाब चुह्यु लसी पिन्बा मुला। तिग ख्रीष्ट दो:सी फेप्लबा भन्दा डाच्छान सिबा विश्वासीगदेसे ख्रीष्ट दो:सी फेप्लमा याड्बा जुकजुकधोनाला जुनी याड्ला? ख्रीष्ट दो:सी खाड्मा फेप्लला? चुनोन धुडरी पावलसे थेनीगदेदा ख्रीष्ट दो:सी फेप्लला भिसी भ्रान्सी चिमा तिगै तामरी आकोल्ना कुटिसी ख्रीष्टला गे लबान निउ भिसी पाड्बा मुला।

मुल तामगदे

प्याफुल्बा १:१

पावलसे परमेश्वरदा धन्यवाद पिन्बादेन जयजयकार लबा १:२-१०

थेसलोनिकेरी पावलसे लबा गे २:१-३:१३

ख्रीष्टदा विश्वास लबागदेला बानीबेहोर ४:१-१२

ख्रीष्ट दो:सी फेप्लबाला बारेरी घोना लबा ४:१३-५:११

चिठीला थुमरी भिबा ताम ५:१२-२८

पावलसे थेसलोनिकेला विश्वासीगदेदा भिबा डाच्छारेमला चिठी

1 लास्सो थेसलोनिकेरी मुबा जम्मान विश्वासीगदेदा डा पावलदेन सिलास ओच्छे तिमोथीग्याम प्याफुल्ला! एनीगदे जम्मासेन परमेश्वर आबादेन प्रभु येथू ख्रीष्टग्याम दयामायादेन शान्ति याड्गै। †

थेसलोनिकेला म्हिगदेसे लबा विश्वास

2 डन्से प्रार्थना लबा धुडरी सदन एनीगदेदा ढन्सी परमेश्वरदा धन्यवाद पिन्बा मुला। 3 एनीगदेसे विश्वास लमाहेन्से गाते ज्यबा गे लबा मुला। ह्याड ह्याड न्हडरी गिकसेम गिकदा माया लसी गाते दुख लसी गे लबा मुला। ओच्छे य्हाडला प्रभु येथू ख्रीष्ट फेप्लला भिसी एनीगदेसे लबा आश खाह्युबा कोड्बा मुला। चु जम्मान ताम डन्से य्हाडला परमेश्वर आबाला डाच्छा ढन्बा मुला।

4 ज्योज्यो आले नाना आडा, परमेश्वरसे माया लसी एनीगदेदा धम्बा मुबा भिसी डन्दा था मुला। 5 ओच्छे डन्से एनीगदेदा थे:ना लबा परमेश्वरला यहुल्साला समाचार ताम जे आहिन। तर परमेश्वरला आत्मादेन शक्तिग्याम

डन्सेनोन सेमहेन्से घोसी विश्वास लबा सत्य ताम मुबा। ओच्छे डनी एनीगदेदेन ह्याम चिबा धुडरी एनीगदेला लागिरी डनी खाह्युबा मुबा भिबा ताम एनीगदेदा थानोन मुला। 6 एनीगदे प्रभु येथूदेन डनी ह्युबान दोबा मुला। तिगदा भिसम म्हिगदेसे जस्तोन दुख पिन्सेनोन एनीगदे परमेश्वरला आत्माग्याम ताड्सी ताड्सी परमेश्वरला बचनरी विश्वास लजी। †7 थेतबासेलमा एनीगदे माकेडोनियादेन अखैया भिबा अज्वलरी मुबा जम्मान विश्वासीगदेला गुडरी ज्यबा म्हि दोबा मुला। 8 तिगदा भिसम एनीगदेग्याम परमेश्वरला बचन माकेडोनियादेन अखैया भिबा अज्वलरी जे थे:ना लबा आहिन। तर एनीगदेसे परमेश्वरदा विश्वास लबा ताम जम्मान ग्लारी थे:बा मुला। थेतबासेलमा दाहेन्से डन्से पाड्तो:बा अर्गु ताम तिगै आरे। 9 तिगदा भिसम डनी एनीगदे मुबा ग्लारी खमा एनीगदेसे डन्दा खाह्यु लसी मान लबा मुला। ओच्छे छोन्बोदेन सत्य परमेश्वरला गे लबारी मूर्तिगदेदा तेन्बा ख्लासी एनीगदे परमेश्वरपट्टि दो:जी भिबा ताम म्हिगदेसेन पाड्ला। 10 थेह्यु लसीन एनीगदेसे परमेश्वरला झा येथू स्वर्गग्याम फेप्लला भिसी भ्रान्सी चिबा मुला। थेदा परमेश्वरसेन सिबाग्याम सोना लबा मुबा।

† 1:1 मुल १७:१

†† 1:6 मुल १७:५-९

ओच्छे थेसेन व्हाडदा पापला सजायग्याम थार्ना लला भिबा तामएनोन थेनीगदेसेन पाड्ला।

पावलसे थेसलोनिके भिबा ग्लारी लबा गे

2 च्यागो आलेगदे, डनी एनीगदे मुबा ग्लारी खबा ल्हानान ज्यबा तजी भिबा एनीगदेदा थानोन मुला। 2 थेह्वड लसीन डाच्छा डन्से फिलिप्पी भिबा शहररी दुखदेन म्हिला हेला नाजी भिबा तामएनोन एनीगदेदा था मुला। तर डन्दा बिरोध लबागदे ल्हानान मुसैनोन परमेश्वरला व्हुल्साला समाचार थे:ना लबारी परमेश्वरसे डन्दा आँट पिन्जी। 13 तिगदा भिसम डन्से लोप्बा तामगदे लुसीला तामएनोन आहिन्बा मुबा। ओच्छे नडबा तामदेन एनीगदेदा जाल लसी लोप्बा तामएनोन आहिन्बा मुबा। 4 तर परमेश्वरसे डन्दा च्यासीन थार्ना पिन्बा समाचार थे:ना लबा जिम्मा डन्दा पिन्बा हिन्ना। थेतबासेलमा म्हिदा ताड्ना लबारी आहिन तर व्हाडला सेमला ताम था याड्बा परमेश्वरदा ताड्ना लबारी म्हिगदेदा थे:ना लबा हिन्ना। 5 एनीगदेदाएनोन चु ताम थानोन मुला डन्से एनीगदेदेन छ्याम तिगै चिप्ले तामएनोन आलनी ओच्छे तिगै याड्ला भिसी लोभएनोन आलनी। चु ताम परमेश्वरदान था मुला।

6 डनी ख्रीष्टला मुल चेला तबासे लमा एनीगदेथोरी अधिकार लखम्सेला मुबा। तसैनोन डन्से एनीगदेदेन स्हान्दो खालै म्हिगदेसे डन्दा ज्यबा म्हि भिगै भिसी आम्हाडनी। तर हाडला कोलागदेदा सयार लबा आमासे ह्वड लसी डन्से एनीगदेदा माया लजी। 8 च्यागो आलेगदे, एनीगदेला मायासे लमा डन्से एनीगदेदा परमेश्वरला व्हुल्साला समाचार जे आहिन, तर डन्दा ज्यानएनोन एनीगदेला लागिरी पिन्बारी डनी तयार मुबा। तिगदा भिसम डन्से एनीगदेदा ल्हानान माया लमुबा। 9 ज्योज्यो आले नाना आडागदेदा थानोन मुला। डन्से परमेश्वरला व्हुल्साला समाचार थे:ना लबा धुइरी खालैदा दुख आपिन्ने भिसी धिन म्हुननोन दुख लसी गे लबा मुबा।

10 विश्वासीगदेला गुडरी डन्से लबा गे परमेश्वरदा सेम निबादेन चोखो ओच्छे तिगै दोष आरेबा मुबा। चु ताम एनीगदेदेन परमेश्वरदान था मुला।

11 ओच्छे आबासे हाडला झा झामेदेन छ्याम लबा ह्वडबान व्यवहार लसी डन्से एनीगदेदा परमेश्वरदा सेम निबा ग्यामरी भ्रबाला लागिरी आँट पिन्जी भिबा ताम एनीगदेदा थानोन मुला। 12 थेतबासेलमा एनीगदेला चालचलन परमेश्वरसे म्हन्बा अन्धार तगै। तिगदा भिसम परमेश्वरसे एनीगदेदा थेला व्हुल्सा, शक्तिदेन व्हालरी ड्योडबा मुला।

13 डन्से एनीगदेदा थे:ना लबा बचनदा म्हिगदेला बचन आहिन तर परमेश्वरदान बचन हिन्ना भिसी विश्वास लजी। थेनोन परमेश्वरला बचनसे एनीगदे न्हडरी गे लबान मुला। थेतबासेलमा चुलान लागिरी डन्से सदन परमेश्वरदा धन्यवाद पिन्बा मुला। 14 तिगदा भिसम एनीगदेएनोन ख्रीष्ट येशूदा विश्वास लबा यहूदिया अञ्चलरी मुबा परमेश्वरला मण्डलीगदे ह्वडबान दोबा मुला। ओच्छे यहूदिया अञ्चलरी मुबा म्हिगदेसे हाडलान म्हि यहूदीगदेग्याम दुख नाबा ह्वड लसी एनीगदेसेनोन हाडलान म्हिगदेग्याम दुख नाबा मुला। 15 चुनोन यहूदीगदेसे प्रभु येशू ख्रीष्टदेन अगमवक्तागदेदा साड्जी, ओच्छे डन्दाएनोन दुख पिन्जी, ओच्छे परमेश्वरदा बोमो खना लबादेन जम्मान म्हिगदेदा बिरोध लबा मुला। 16 ओच्छे अर्गु व्हुलला म्हिगदेसे थार्ना याड्गै भिसी थे:ना लबा ताम यहूदीगदेसे डन्दा थे:ना लआपुड्नी। थेह्वड लसी यहूदीगदेसे पापथोरी झन पाप लजी। थेतबासेलमा परमेश्वरसे यहूदीगदेदा सजाय पिन्बा मुला।

पावलसे थेसलोनिकेरी मुबा म्हिगदेदा स्याप्वारी ल्हानान सेम लबा

17 व्हाड ज्योज्यो आले नाना आडा न्हडरी तिगै धिनना लागिरी फेसै व्हाडला सेम फेबा आरे। थेतबासेलमा दो:सी एनीगदेदेन छ्याम हुप तबा सेम डन्दा ल्हानान मुला। 18 एनीगदे मुबा ग्लारी डनी खबारी म्हाड्मुबा। ओच्छे डा पावल एनीगदे मुबा ग्लारी ल्हानान रेम खबारी म्हाड्मुबा। तर डनी खबारी म्हाड्मा सदन शैतानसे ग्याम काजी। 19 व्हाडला प्रभु येशू ख्रीष्ट फेप्वबा धुइरी थेला डाच्छा डन्से लबा आशदेन ताड्तो:बा ताम एनीगदेन आहिन?

† 2:2 मुल १६:१९-२४; १७:१-९ †† 2:14 मुल १७:५ † 2:15 मुल ९:२३, २९; १३:४५, ५०; १४:२, ५, १९; १७:५, १३; १८:१२

हिन्ना। 20 डन्से याड्तो:बा मानदेन डनी ताड्तो:बा ताम भिबान एनीगदे हिन्ना।

तिमोथीदा थेसलोनिकेरी पुड्बा

3 थेतबासेलमा एनीगदेग्याम फेसी चिबारी डन्ना सेमसे आड्यान्नी। ओच्छे डनी चा एथेन्स भिबा ग्लारीन चिबारी ज्यबा छोर्सी थेरीन चिजी। 12 तर तिमोथीदा चा एनीगदे मुबा ग्लारी पुड्खबा मुला। तिगदा भिसम थेसेन एनीगदेदा विश्वासरी कोड्ना लबारी आँट पिन्ना। व्हाडला आले तिमोथी चा ख्रीष्टला समाचार थे:ना लबा डन्देन छ्यामनोन परमेश्वरला गे लबा म्हि हिन्ना। 3 थे धुइला दुखसे लमा एनीगदे खालैनोन याड्योड थातगै भिसी डन्से म्हन्बा मुबा। व्हाड सोतेधोना दुख मी खनोन खला भिबा ताम एनीगदेसेनोन घोसी जिन्बा मुला। 4 तिगदा भिसम डनी एनीगदेदेन छ्याम मुबा धुइरीन व्हाडसे दुख नातो:ला भिसी डन्से डाच्छान पाड्बा मुबा। डन्से पाड्बा ह्वड तनोन तजी, थे एनीगदेदाएनोन थानोन मुला। 5 थेतबासेलमा डाड नाआखम्ना एनीगदेला विश्वास खाह्वड्बा चीम भिसी घोबाला लागिरी डाड एनीगदे मुबा ग्लारी तिमोथीदा पुड्खबा मुला। तिगदा भिसम एनीगदेदा खालै म्हिसे लोभ उन्सी फसब लसी डन्से लबा गेगदे गे आखेल्बा तना लजी वा भिसी डा लोड्बा मुबा। 6 तर दान्दे तिमोथी एनीगदे मुबाग्याम डनी मुबा ग्लारी खसी एनीगदेसे परमेश्वरदा लबा विश्वासदेन हाड हाड न्हडरी माया लसी ढिक्सी चिमुला भिबा ज्यबा समाचार डन्दा पाड्जी। ओच्छे डन्से एनीगदेदेन छ्याम हुप तबारी म्हाड्बा ह्वड एनीगदेसेएनोन डन्दा ल्हानान डन्सी सदन हुप तबारी म्हाड्बा मुला भिबा तामएनोन पाड्जी। 7 थेतबासेलमा ज्योज्यो आले नाना आडा, डन्दा दुख तसी सुर्दा तबा धुइरीनोन एनीगदेसे लबा विश्वासला बारैरी थे:सी डनी ताड्बा मुला। 8 तिगदा भिसम एनीगदे प्रभुरी कोड्सी चिबा मुला भिबा थे:सी डनी ल्हानान ताड्बा मुला

9 एनीगदेसे लमा डनी परमेश्वरला डाच्छा ल्हानान ताड्म्याड्बा मुला। चुला लागिरी डन्से परमेश्वरदा जतिन धन्यवाद पिन्सै आछ्यो। 10 एनीगदेला विश्वास अझ कोड्ना लबा सेम लसी दो:सी एनीगदेदेन छ्याम हुप तम्याड्गै भिसी डन्से धिन म्हुननोन झन्सी प्रार्थना लबा मुला।

11 दाहेन्से व्हाडला परमेश्वर आबादेन प्रभु येशूसेन डनी एनीगदे मुबा ग्लारी खबाला लागिरी ग्याम स्होसी पिन्नी। 12 डन्से एनीगदेदा माया लबा ह्वड लसी एनीगदेसे हाड हाड न्हडरी लबा मायादेन जम्मान म्हिगदेदा लबा मायादा प्रभुसेन ल्हानान ल्हेना लगै। 13 व्हाडला प्रभु येशू हाडला म्हिगदेदेन छ्याम दो:सी फेप्वबा धुइरी परमेश्वरसेन एनीगदेला सेमरी भड पिन्सी थेला डाच्छापट्टि तिगै दोष आरेबादेन चोखो म्हि स्होगै।

परमेश्वरदा सेम निबा गे लउ

4 दाहेन्से एनीगदे प्रभु येशूला म्हि तबासे लमा परमेश्वरदा ताड्ना लबारी खाह्वड लसी भ्रतो:ला भिबा ताम डन्से लोप्सी जिन्बा मुला। ओच्छे एनीगदेसे डन्से लोप्बा ह्वडनोन लबान मुला। थेतबासेलमा ज्योज्यो आले नाना आडागदे, अझ एनीगदेसे थेह्वड्बा ज्यबा गे लबान निउ भिबा डन्ना बिन्ती मुला। 2 तिगदा भिसम डन्से प्रभु येशूग्याम एनीगदेदा तिग तिग ताम कुल्बा मुबा थे ताम एनीगदेदा थानोन मुला। 3 एनीगदे चोखो म्हि दोगै भिसी परमेश्वरसे म्हन्बा मुला। थेतबासेलमा एनीगदेसे स्हान्दोदेन छ्याम ब्रेल्सी भ्रबा तामरी संगतनोन थालउ। 4 एनीगदेसे हाडसे हाडलान ल्हुइदा तहरी थान्बारी लोप्यै भिसी परमेश्वरसे म्हन्बा मुला। ओच्छे स्हान्दो म्हिगदेग्याम मान लबाला लागिरी एनीगदेसे हाडला ल्हुइदा चोखो थान्गो। 5 ओच्छे एनीगदेसे परमेश्वरदा डोआसेबा म्हिगदेसे ह्वड लसी खाल्दमनदेन छ्याम ब्रेल्बा सेम थालउ। 6 चु तामरी आज्यबा गे लसी विश्वासी ज्योज्यो आले नाना आडागदे न्हडरी खालैसे खालैदान न्होड्ना थालगै। च्यागो, चुह्वड्बा गे लजी भिसम प्रभुसेन सजाय पिन्ना भिसी डन्से एनीगदेदा डाच्छान घोना लसी जिन्बा मुला। 7 तिगदा भिसम परमेश्वरसे व्हाडदा चुह्वड्बा नडबा गे लबारी आहिन, तर तिगै दोष आरेबा चोखो म्हि दोसी

†† 3:1 मुल १७:१५ †† 3:6 मुल १८:५

भ्रबाला लागिरी इयोइबा हिन्ना।⁸ थेतबासेलमा जुन म्हिसे चु तामदा वास्ता आल थेंसे म्हिदा आहिन, तर एनीगदेदा हाडलान आत्मा पिन्बा परमेश्वरदा वास्ता आलबा हिन्ना।

⁹ विश्वास लबा ज्योज्यो आले नाना आडादा खाहड लसी माया लतो:ला भिबा ताम डन्से एनीगदेदा पाड्आतो:। तिग्दा भिसम चु ताम एनीगदेदा परमेश्वरसेन लोप्सी जिन्बा मुला।¹⁰ ओच्छे थेनोन अन्धार एनीगदेसे माकेडोनिया भिबा अज्जलरी मुबा जम्मान विश्वासीगदेदा ल्हानान माया लबा मुला। थेतबासेलमा ज्योज्यो आले नाना आडागदे, थेहड लसीन एनीगदे हाड हाड न्हडरी अझ माया लसी चिउ भिबा डन्ना अर्ती मुला।

¹¹ डाच्छा डन्से एनीगदेदा लोप्बा तामरी दुक्क तसी हाड हाडला गे सेम लसी लबान टिक्सी चिउ।¹² चुहड लसम एनीगदेदा म्हिगदेसेनोन मान लला। ओच्छे एनीगदेदा खॉचो तबा धुइरी स्थान्दो म्हिला भर लआतो:।

प्रभु दो:सी फेखबा

¹³ ज्योज्यो आले नाना आडागदे, एनीगदेसे सिबा विश्वासीगदेला बारेरी था याड्गै भिबा डन्से म्हन्बा मुला। थेतबासेलमा आशोनोन आरेबा म्हिगदे हड लसी एनीगदे सुर्दा थालउ।¹⁴ तिग्दा भिसम येशू सिबाग्याम दो:सी सोजी भिसी यहाडसे विश्वास लबा मुला। थेहड लसीन सिबा विश्वासीगदेदा परमेश्वरसेन येशूग्याम दो:सी सोना लसी थेदेन छ्यामनोन भला भिसीएनोन यहाडसे विश्वास लबा मुला।¹⁵ प्रभुसे सुड्बा हड डन्से पाड्बा ताम इयान्गो, प्रभु दो:सी फेखबा धुइरी यहाड सोबागदे तिगै लसीन सिबा विश्वासीगदे भन्दा डाच्छा तआखम।¹⁶ तिग्दा भिसम प्रभु हाडनोन ग्रेन काइरी कुल्बान मुल स्वर्गदूतला काइदेन परमेश्वरला बिगुलला काइरी स्वर्ग्याम फेखला। थेनोन धुइरी ख्रीष्टदा विश्वास लसी सिबागदे चा डाच्छान सोला।¹⁷ जमाहेन्से यहाड सोबागदे मुरी हुप तबारी थेनीगदेदेन छ्यामनोन खसुरी थीसी भोर्ला। ओच्छे यहाड सदनना लागिरी प्रभुदेन छ्यामनोन चिला।¹⁸ थेतबासेलमा चु तामग्याम गिकसे स्थान्दोदा आँट पिन्गो।

5 तर ज्योज्यो आले नाना आडागदे, चु ताम खाडमा तला भिसी एनीगदेला लागिरी तिगै भितो:बा आरे।² तिग्दा भिसम प्रभु फेखबा धुइरी म्हुनड य्हो खबा हड लसी फेखला भिबा ताम एनीगदेदा थानोन मुला।³ थे धुइरी म्हिगदेसे “यहाडदा शान्ति मुला तिगै लोड्बा डोबा आरे भिसी भिला।” थेनोन धुइरी मिडम्हेमेदा कोला न्हबा धुइरी बेथा याड्बा हड थेनीगदे तिक्खुरीन नाश तला। जमाहेन्से थेनीगदे थेहड्बा आपत विपतग्याम तिगै लसीन स्योर आम्याड्।⁴ तर ज्योज्यो आले नाना आडागदे, एनीगदे धोपधोपरी आरे। थेतबासेलमा एनीगदेला लागिरी प्रभु फेखबा धुइरी य्हो खबा हड्बा आत।⁵ तिग्दा भिसम एनीगदे जम्मान धोपधोपदेन म्हुनड भ्रबा म्हिला सन्तान आहिन, तर यहालदेन धिनीरी भ्रबा म्हिला सन्तान हिन्ना।⁶ थेतबासेलमा यहाड स्थान्दो म्हिगदे हड लसी म्हैर्बारी आत। तर होशियार तसी छोर्सी चितो:ला।⁷ तिग्दा भिसम म्हैर्बागदे म्हुनडनोन म्हैर्ला ओच्छे

† 4:15 १ कोर १५:५१-५२ † 5:2 मत्ती २४:४३; लूका १२:३९; २ पत्रु ३:१०

थुड्बागदेएनोन म्हुनडनोन इयोइसी भ्रमुला।⁸ तर यहाड चा धिनीरी भ्रबा म्हिला सन्तान तबासे लमा होशियार तसी भ्रतो:ला। ओच्छे सेनासे हाडदा जोगब लबारी कुरी पाता थान्बा हड लसी यहाडसेनोन हाडदा जोगब लबाला लागिरी यहाडला विश्वासदेन मायादा थोसी भ्रतो:ला। थेहड लसीन यहाडसे पूरा थार्बा याड्ला भिसी लबा आशदा सेनागदेसे सदन टोप कूबा हड लसी सदन कूतो:ला।⁹ तिग्दा भिसम परमेश्वरसे यहाडदा सजाय पिन्बारी आहिन। तर प्रभु येशू ख्रीष्टग्याम थार्बा पिन्बारी डाच्छान धम्बा हिन्ना।¹⁰ प्रभु फेखबा धुइरी यहाड सिसै सोसै प्रभुदेन छ्यामनोन सोगै भिसी प्रभु येशू यहाडला लागिरी सिजी।¹¹ थेतबासेलमा एनीगदेसे दान्दे लबा हड्नोन गिकसे गिकदा आँट पिन्सी भड्ना लबा गे लउ।

चिठीला थुमरी भ्रिबा ताम

¹² ज्योज्यो आले नाना आडागदे, एनीगदेला गुडरी दुख लसी गे लबागदेदा मान लउ भिबा डन्ना बिन्ती मुला। तिग्दा भिसम थेनीगदेसे प्रभुला लागिरी खाहड लसी भ्रतो:ला भिबा ताम एनीगदेदा लोप्ला।¹³ थेनीगदेसे ज्यबा गे लबासे लमा थेनीगदेदा मायादेन मान लउ। ओच्छे हाड हाड न्हडरी टिक्सी चिउ।

¹⁴ ज्योज्यो आले नाना आडागदे, ब्लेगुगदेदा अर्ती पिन्बादेन हरेस चबागदेदा आँट पिन्गो। ओच्छे आखम्बागदेदा ह्यो लबादेन जम्मान ओन्हाडरी ज्यबा गे लसी उन्गो भिबा डन्ना बिन्ती मुला।¹⁵ ओच्छे खालैसे एनीगदेदा आज्यबा लजी भिदेमा एनीगदेसे थेदा आज्यबा थालउ। बरु गिकसे गिकदा ओच्छे जम्मान म्हिगदेदा सदन ज्यबा व्यवहार लबारी म्हाड्गो।¹⁶ सदन ताड्सी चिउ।¹⁷ ओच्छे सदन प्रार्थना लउ।¹⁸ दुख सुख जस्तोन तसै धन्यवाद पिन्गो। तिग्दा भिसम ख्रीष्ट येशूदेन छ्याम गिक तबा एनीगदेसे चुहड्बा लगे भिसी परमेश्वरसे म्हन्बा मुला।¹⁹ ओच्छे परमेश्वरला आत्मासे लबा गेदा रोकब थालउ।²⁰ खालैसे परमेश्वरग्याम पाड्बा तामदा हेला थालउ।²¹ ओच्छे जम्मान ताम सेसी घोसी जुन ताम ज्यबा मुला थेनोन तामरी भड्बा तसी चिउ।²² ओच्छे जम्मान आज्यबा तामगदेग्याम थारेड तसी चिउ।²³ शान्ति पिन्बा परमेश्वरसेन एनीगदेदा पूरा चोखो तना लगे, ओच्छे यहाडला प्रभु येशू ख्रीष्ट दो:सी फेखबा धुइरी एनीगदेला आत्मादेन सेम ओच्छे ल्हुइरी तिगै दोष आरेबा तगै।²⁴ एनीगदेदा इयोइबा परमेश्वर विश्वास लखम्बा परमेश्वर हिन्ना। थेसेन एनीगदेदा चु जम्मान ताम पूरा लसी पिन्ना।²⁵ थेतबासेलमा ज्योज्यो आले नाना आडागदे, एनीगदेसे डन्ना लागिरीनोन प्रार्थना लसी पिन्गो।²⁶ जम्मान ज्योज्यो आले नाना आडागदे हाड हाड न्हडरी गिकसेम गिकदा सेमहेन्सेन माया लसी फ्याफुल्गो।²⁷ प्रभुला अधिकारग्याम डाड पाड्बा ताम इयान्गो। एनीगदेसे चु चिठी जम्मान ज्योज्यो आले नाना आडागदेदा पढब लसी थे:ना लउ।²⁸ यहाडला प्रभु येशू ख्रीष्टला दयामाया एनीगदेथोरी तगै।

‡ 5:8 यशै ५९:१७; एफि ६:१३-१७

चु चिठीला बारेरी पाडतो:मा

येशूला मुल चेला पावलसे भिबा मुबा। चु चिठी भिबाला लागिरी पावलदा सिलासदेन तिमोथी भिबा म्हेसे ह्यो लबा मुबा (२ थेसलोनिकी १:१)।

कोरिन्थ शहररी भिबा मुबा।

ओस्पन ईश्वी संवत् ५१ (विक्रम संवत् १०८) सालरी भिबा मुबा।

थेसलोनिके शहररी मुबा विश्वासीगदेदा भिबा मुबा।

थेसलोनिके शहरला मण्डली न्हडरी ख्रीष्ट दो:सी फेप्लला भिबाला बारेरी ल्हानान तामगदे तबा मुबा। चु तामला बारेरी ल्हानान ताम तबासे लमा थेसलोनिके शहरला विश्वासीगदेला गुडरी लुसीला तामगदे थोन्जी। थेनीगदे न्हडला कोइ कोइसे ख्रीष्ट फेप्लबा धुइ मी डाच्छान तसी जिन्बा मुला भिसी विश्वास लमुबा। थेनीगदेला चुहड्बा विश्वास म्राड्सी पावलसे थेनीगदेदा घोना लबाला लागिरी चु न्हीरेमला चिठी भिबा मुबा। चु चिठीरी पावलसे ख्रीष्ट फेप्लबा भन्दा डाच्छा ख्रीष्टला बिरोध लबा नड्बा गे लबा म्हे खला, ओच्छे थेसे जम्मान नड्बा तामगदे लबान निला भिसी भिबा मुला। पावलसे चु चिठी पढब लबागदेदा जस्तोन दुख तसैनीन हाडसे लबा विश्वास आखलाना कोड्सी चिउ। ओच्छे पावलसे हाडदेन हाडला ह्योगदेसे हड लसी सदन ज्यबा गे लतो:ला भिसी थेनीगदेदा पाड्बा मुला।

मुल तामगदे

प्याफुल्बा १:१-२

स्याबासदेन आँट पिन्बा १:३-१२

ख्रीष्ट दो:सी फेप्लबाला बारेरी घोना लबा २:१-१७

ख्रीष्टदा विश्वास लबागदेला बानीबेहोर ३:१-१५

चिठीला थुमरी भिबा ताम ३:१६-१८

पावलसे थेसलोनिकेला विश्वासीगदेदा भिबा न्हीरेमला चिठी

1 लास्सो य्हाडला परमेश्वर आबादेन प्रभु येशू ख्रीष्टदा विश्वास लबा थेसलोनिकेरी मुबा जम्मान विश्वासीगदेदा डा पावलदेन सिलास ओच्छे तिमोथीला प्याफुल्ला! †2 परमेश्वर आबादेन प्रभु येशू ख्रीष्टग्याम एनीगदेदा दयामायादेन शान्ति तगै।

धन्यवाददेन प्रार्थना

3 आलेगदे, एनीगदेला लागिरी परमेश्वरदा डन्से सदन धन्यवाद पिन्तो:बा मुला। तिगदा भिसम एनीगदेला विश्वास ल्हानान बढब तबा मुला, ओच्छे हाड हाड न्हडरी एनीगदेला माया बढब तबा मुला। 4 ओच्छे एनीगदे जम्मान दुख कष्ट नासी विश्वासीरी याडयोड आतना चिबा मुला। थेतबासेलमा एनीगदेला चुहड्बा विश्वासला बारेरी डन्से परमेश्वरला अर्गु मण्डलीगदेला गुडरीनीन ताड्सी ताड्सी पाड्म्याड्बा मुला। 5 एनीगदेसे दुख नाबासे लमा एनीगदे परमेश्वरला य्हुल्साला म्हे दोबा मुला। चु जम्मान तामग्याम परमेश्वरसे खालैला ली आच्याना ठीक निसाफ लबा मुला भिबा ताम था याड्बा मुला। 6 एनीगदेदा दुख पिन्बादा परमेश्वरसेन दुख पिन्ना, तिगदा भिसम परमेश्वर खालैला ली आच्याना ठीक निसाफ लबा परमेश्वर हिन्ना। 7 प्रभु येशू ख्रीष्ट शक्तिशाली स्वर्गदूतगदेदेन मेला ल्हामरी स्वर्गग्याम फेप्लला। ओच्छे दुख नाबा डन्सेन एनीगदेदा थे धुडरीन परमेश्वरसे य्हाडदा चु दुखग्याम फेला। 8 तर परमेश्वरदा डोआसेबागदेदेन य्हाडला प्रभु येशूला थार्बा पिन्बा समाचार आड्ग्यान्बागदेदा परमेश्वरसे सजाय पिन्ना। 9 थेनीगदे प्रभुदेन प्रभुला घेन य्हालदेन शक्तिग्याम फेसी चितो:ला। ओच्छे थेनीगदेसे

† 1:1 मुल १७:१

सदनना लागिरी नाश तबा सजाय याड्ला। ††10 चु ताम चा प्रभु येशू फेप्लबा धुडरी तला। थे धुडरी परमेश्वरला जम्मान विश्वास लबा म्हेगदेसे प्रभु येशूदा ल्हानान जयजयकार लला। जमा धुडरी एनीगदेएनोन थेनीगदेदेन छ्यामनोन तला, तिगदा भिसम डन्से पाड्बा तामरी एनीगदेसे विश्वास लजी।

11 थेतबासेलमा य्हाडला परमेश्वरसे एनीगदेदा ड्योड्बा अन्धार ज्यना लसी भ्रखमौ, ओच्छे एनीगदेसे लबारी म्हाड्बा ज्यबा गेदेन एनीगदेला विश्वासग्याम लबा गे थैला शक्तिग्याम पूरा लगै भिसी डन्से प्रार्थना लबा मुला। 12 थेहड् लजी भिसम एनीगदेग्याम प्रभु येशूला मान तला ओच्छे प्रभु येशूएनोन एनीगदे म्राड्सी ताड्ला। तिगदा भिसम एनीगदेसे य्हाडला परमेश्वर आबादेन प्रभु येशू ख्रीष्टग्याम दयामाया याड्बा मुला।

परमेश्वरला बचन आड्ग्यान्बा म्हे

2 ज्योज्यो आले नाना आडागदे, य्हाडला प्रभु येशू ख्रीष्ट दो:सी फेप्लबा धुडरी य्हाड थेदेन छ्यामनोन हुप तला भिबा तामला बारेरी डन्से एनीगदेदा पाड्बा मुला। †2 खालैसे एनीगदेदा प्रभु फेप्लबा धुइ तसी जिन्बा मुला भिसी पाड्जी भिसम थेहड्बा ताम डनीग्याम खबा ताम हिन्ना भिसी एनीगदे थालोड्को। तिगदा भिसम थेहड्बा म्हेगदेसे डन्ना मिन किन्सी तामग्याम, चिठीग्याम ओच्छे परमेश्वरला आत्माग्याम पाड्बा हिन्ना भिसी एनीगदेदा फसब लबारी म्हाड्मुला। तर एनीगदेसे थेनीगदेला ताम विश्वास थालउ भिबा डन्ना बिन्ती मुला। 3 ओच्छे एनीगदेदा खालैसेन तिगै ताम लसी फसब थालगै। तिगदा भिसम पाप गे लबादेन नाश ततो:बा म्हे खसी

†† 1:9 यशै २:१० † 2:1 १ थेस ४:१५-१७

परमेश्वरदा लहानान बिरोध आलतेधोना प्रभु फेपखबा धुइ आख। 4 थे म्हिसे ह्राडसे ह्राडदान घेन स्होसी म्हिगदेसे परमेश्वर भिसी तेन्बा जम्मान स्हेला बिरोध लला। ओच्छे डानोन परमेश्वर हिन्ना भिसी थे परमेश्वरला मन्दिररी चिला। †

5 डा एनीगदेदेन छ्याम मुबा धुइरी डाइ पाड्बा ताम एनीगदेसे ढन्बा आरे? 6 थे म्हि थेला धुइ आतमान थोन्ना भिसी परमेश्वरसे दान्देधोना थेदा रोकब लसी थान्बा मुला भिबा ताम एनीगदेदा थानोन मुला। 7 तिग्दा भिसम थे परमेश्वरला बचन आड्यान्बा म्हिसे न्हड न्हडनोन गे लसी जिन्बा मुला। तर थेदा रोकब लसी थान्बा शक्तिसे थेदा आखलातेधोना थेसे लबा नड्बा गेगदे प्राड्आखम। 8 थे परमेश्वरला बचन आड्यान्बा म्हि थोन्ना। जमाहेन्से प्रभु येशू घेन शक्तिरी फेपखसी थेदा फू लसीन नाश लला। ††

9 परमेश्वरला बचन आड्यान्बा थे म्हि शैतानना शक्ति थोसी खला। ओच्छे थेसे लहानान थरीला फट्टा चिनुगदेदेन उदेकला गेगदे लला। †10 ओच्छे नाश तबागदेदा थेसे नड्बा गे लसी फसब लला। तिग्दा भिसम थेनीगदेदा थार्बा पिन्बा सत्य ताम सेम आनिनी। 11 थेतबासेलमा थेनीगदेसे लुसीला तामरीन विश्वास लगै भिसी परमेश्वरसे थेनीगदेदा अलमल तबा शक्ति गिक थेनीगदे मुबा ग्लारी पुइखला। 12 तिग्दा भिसम थेनीगदेसे सत्य तामरी विश्वास आलना नड्बा तामनोन ज्यबा भिसी म्हन्बासे लमा परमेश्वरसे थेनीगदेथोरी निसाफ लबा हिन्ना।

थार्बा याड्बाला लागिरी धम्बागदे

13 प्रभुसे माया लबा आलेगदे, एनीगदेला लागिरी डन्से सदन परमेश्वरदा धन्यवाद पिन्नोन तोःबा मुला। तिग्दा भिसम एनीगदेदा तिगै दोष आरेबा म्हि स्होबारी परमेश्वरला आत्मादेन एनीगदेसे विश्वास लबा सत्य तामग्याम थार्बा याड्गै भिसी परमेश्वरसे एनीगदेदा डाच्छाहेन्सेन धम्बा हिन्ना। 14 डन्से एनीगदेदा थेःना लबा थार्बा पिन्बा समाचारग्याम य्हालदेन शक्ति पिन्बारी य्हाडला परमेश्वरसे एनीगदेदा ड्योड्बा हिन्ना। थेतबासेलमा परमेश्वर प्रभु येशू ख्रीष्टदेन छ्याम ताड्बा ह्इ एनीगदेदेन छ्यामएनोन ताड्बा। 15 थेतबासेलमा ज्योज्यो आले नाना आडागदे, डन्से डाच्छा लोप्ला तामग्याम तसै डन्से भिबा चिठीग्याम तसै एनीगदेसे डन्से लोप्ला ताम ड्यान्सी कोड्सी चिउ।

16 य्हाडदा माया लबा प्रभु येशू ख्रीष्टदेन परमेश्वर आबासे थेला दयामायाग्याम य्हाडदा जुकजुकधोनाला आँटदेन ज्यबा आश पिन्बा मुला। 17 थेतबासेलमा परमेश्वरसेन अड्ग सेमरी आँट पिन्सी एनीगदेदा जम्मान ज्यबा गेदेन ज्यबा ताम लबारी सदन भड पिन्नी।

प्रार्थना

3 ज्योज्यो आले नाना आडागदे, डन्ना लागिरी प्रार्थना लसी पिन्गो, तिग्दा भिसम एनीगदेसे थेःबा ह्इ प्रभुला बचन अर्गु जम्मान ग्लाला

† 2:4 दानि ११:३६; इज २८:२ †† 2:8 यशै ११:४ † 2:9 मत्ती २४:२४

म्हिगदेसे योनान थेःगै। ओच्छे थेनीगदेसेनोन एनीगदेसे ह्इनोन प्रभुला बचनदा मान लगै। 2 ओच्छे परमेश्वरसे डन्दा आज्यबा म्हिदेन पापी म्हिगदेग्यामसेनोन जोगब लसी पिन्नी भिसी प्रार्थना लसी पिन्गो। तिग्दा भिसम जम्मान म्हिगदेसे मी विश्वास आल। 3 तर प्रभु मी विश्वास लखम्बा प्रभु हिन्ना। थेसे एनीगदेदा विश्वासरी कोड्ना लला ओच्छे शैतानग्याम जोगब लसी थान्ना। 4 डन्से कुल्बा ताम अन्धारनोन एनीगदेसे गे लबान मुला। ओच्छे थेह्इ लसीन सदन गे लला भिबा ताम डन्से प्रभुग्यामनोन था याड्बा मुला। 5 परमेश्वरसे एनीगदेदा लबा मायादेन ख्रीष्टसे नाबा दुख एनीगदेसेनोन लबारीदेन नाबारी खमौ भिसी प्रभुसेन उन्नी।

ब्लेगुगदेदा पाड्बा ताम

6 ज्योज्यो आले नाना आडागदे, य्हाडला प्रभु येशू ख्रीष्टला अधिकारग्याम डन्से एनीगदेदा चु ताम कुल्ला। डन्से लोप्ला ताम अन्धार आभ्रबादेन ब्लेगु विश्वासीगदेग्याम थारेड तसी चिउ। 7 तिग्दा भिसम डन्से लबा ह्इनोन लतोःला भिबा ताम एनीगदेदा थानोन मुला। एनीगदेदेन छ्याम मुबा धुइरी डनी खाइमै ब्लेगु दोसी आचिनी। 8 डन्से टाडगा आफाना खालैला तिगै आचनी, बरु एनीगदेदा दुख थातगै भिसी डन्से धिन म्हुननोन दुख लसी गे लजी। 9 एनीगदेग्याम डन्से टाडगा किन्बा अधिकार आरे भिसी आहिन, तर एनीगदेसेनोन डन्से ह्इनोन लगै भिसी डन्से चुह्इ लबा हिन्ना।

10 एनीगदेदेन छ्याम मुबा धुइरी डन्से एनीगदेदा “खालैसे गे आलनी भिसम थेसे चबा धुड्बा थालगै” भिसी पाड्बा। 11 तिग्दा भिसम एनीगदे न्हडरी कोइ कोइ म्हिसे ब्लेगु दोसी तिगै गे आलना म्हिसे लबा गेरी ओह्इनोन या झाड्गुला भिबा ताम डन्से थेःमुला। 12 थेतबासेलमा थेह्इबा म्हिगदेदा प्रभु येशू ख्रीष्टला अधिकारग्याम डाइ चुह्इ लसी कुल्ला। थेनीगदे कुटिसी ह्राड ह्राडला गे लगै ओच्छे ह्राड ह्राडलान यासे स्होसी चउ। 13 तर ज्योज्यो आले नाना आडागदे, एनीगदे चा ज्यबा लबारी खाइमै दुख थाम्हन्गो।

14 डन्से भिबा चु चिठीला ताम चुदे खालैसे आड्यान्नी भिसम थे म्हिदा डोसेसी थान्गो, ओच्छे थेह्इबा म्हिला संगतनोन थालउ। थेह्इ लसम थे ह्राडनोन पेःला। 15 तसैनोन थेदा शत्रु ह्इबा थाम्हन्गो, तर ज्योज्यो आलेदा ह्इ लसी थेदा अर्ती पिन्गो।

चिठीला थुमरी भिबा ताम

16 य्हाडदा शान्ति पिन्बा प्रभुसे एनीगदेदा जस्तोन तसै सदन शान्ति पिन्नी। ओच्छे प्रभु सदन एनीगदेदेन छ्याम तगै।

17 डा पावल ह्राडलान यासे फ्याफुल्ला भिसी भिबा मुला। ओच्छे डाला जम्मान चिठी डोसेबाला लागिरी सदन डाइ चुह्इ लसी भिबा मुला।

18 य्हाडला प्रभु येशू ख्रीष्टला दयामाया एनीगदे जम्मानदेन छ्याम तगै।

चु चिठीला बारैरी पाडतो:मा

येशूला मुल चेला पावलसे भिबा मुबा (१ तिमोथी १:१)।

फिलिप्पी शहररी भिबा मुबा।

ओस्पन ईश्वी संवत् ६३-६५ (विक्रम संवत् १२०-१२२) सालला गुडरी भिबा मुबा।

तिमोथी भिबा म्हिदा भिबा मुबा।

तिमोथी एशिया अज्चलला विश्वास लबा भ्योन म्हि मुबा। थेला आमा यहूदी विश्वासी मुबा ओच्छे आबा चा ग्रीक यहूदला म्हि मुबा। थार्बा पिन्बा समाचार थे:ना लमा थे पावलदेन छ्याम छ्यामनोन भ्रमुबा ओच्छे पावलदा ह्यो लमुबा। पावलसे थेदा चु डाच्छारेमला चिठीरी मुल ताम सोम भिबा मुला। जम्मान भन्दा डाच्छा चु चिठीरी मण्डलीरी मुबा लुसीला ताम लोप्बागदेग्याम होशियार तना लबा मुला। थे लुसीला ताम चा यहूदी धर्मदेन अर्गु यहूदला म्हिगदेला सेमरी म्हन्बा तामगदे दोड्सी थोन्बा लुसीला तामग्याम खबा विश्वास हिन्ना। चु विश्वासग्याम जम्बुलिड पापसे प्लिड्बा मुला भिसी लोप्जी। ओच्छे म्हिसे परमेश्वरला सेमला ताम घोबारी खम्बा ज्ञान बुद्धि पक्का लसी आयाड्तेधोना, गाते चबा स्हेगदे चबारी आख्ला ओच्छे ब्याह लबारी आख्ला, थे धुडधोना थेसे थार्बा आयाड्।

चु चिठीरी मण्डलीरी खाहड् लसी गे लतो:ला, खाहड् लसी ह्यो लतो:ला, मण्डलीदा च्याबा म्हिगदे खाहड्बा ततो:ला ओच्छे थेनीगदेदा ह्यो लबागदेला बानीबेहोर खाहड्बा ततो:ला भिसी चु जम्मान अर्तीगदे पिन्बा मुला। थेहड् लसीन चिठीला थुमरी तिमोथीदा विश्वासीगदेला समूहगदेला लागिरी तिग लतो:बा भिबा तामला बारैरीदेन येशू ख्रीष्टला ज्यबा गे लबा म्हि खाहड् लसी दोबारी खम्बा भिसी सल्लाह पिन्बा मुला।

मुल तामगदे

प्याफुल्बा १:१-२

मण्डलीला बारैरी लोप्बा ताम १:३-३:१६

पावलसे तिमोथीला गेला बारैरी पाड्बा ४:१-६:२१

पावलसे तिमोथीदा भिबा डाच्छारेमला चिठी

१ लास्सो, विश्वासरी डाला झा तिमोथी, डा पावलग्याम प्याफुल्ला। डा व्हाडदा थार्बा पिन्बा परमेश्वरदेन आश पिन्बा ख्रीष्ट येशूसे कुल्बा अन्धार ख्रीष्ट येशूला मुल चेला हिन्ना। एसे व्हाडला परमेश्वर आबादेन प्रभु ख्रीष्ट येशूग्याम मोलमदेन दया ओच्छे शान्ति याड्गै। †

लुसीला ताम लोप्बागदेदा बड्गो

३ डा माकेडोनिया भिबा ग्लारी निबा धुडरी एदा पाड्बा अन्धार लुसीला ताम लोप्बागदेदा थेहड् थालउ भिसी कुल्बाला लागिरी ए एफिससरीन चिउ। ४ थेनीगदेदा अनुमान लसी सेमरी म्हन्सी पाड्बा कथा ओच्छे आखे म्हेमेला बारैरी खाड्मै आजिन्बा तामला लिच्छा थाभ्रउ भिसी पाड्गो। थेहड्बा तामसे चा व्हाड न्हडरी छेबा बड्बा तना लमुला, ओच्छे विश्वासग्याम घोखम्बा परमेश्वरसे म्हन्बा तामदा जे न्होड्ना लमुला। ५ चु कुल्बा ताम चा ज्यबा सेमदेन सेमसे म्हन्बा अन्धार ठीक गे लबारी ओच्छे ज्यबा विश्वासग्याम खबा माया ल्हेना लबाला लागिरी हिन्ना। ६ कोड कोड म्हिगदे चा चु जम्मान तामगदेदा वास्ता आलना गे आखेल्बा तामगदेरी कोल्सी चिमुला। ७ थेनीगदे परमेश्वरसे मोशादा पिन्बा ठिम लोप्बा म्हि दोबारीम म्हाडमुला, तर व्हाडसेन पक्का लसी पाड्बा ताम व्हाडसेन आघोमुला।

८ चुदे खालैसे परमेश्वरसे मोशादा पिन्बा ठिम ठीक लसी तेन्जी भिसम थे ठिम ल्हानान ज्यबा मुला भिबा ताम व्हाडदा था मुला। ९ ओच्छे व्हाडदा चु तामएनोन था मुला, थे ठिम ज्यबा म्हेला लागिरी आहिन। तर थे ठिम

† 1:1-2 मुल १६:१

अन्धार आभ्रबागदेदेन कुल्बा ताम आड्यान्बागदे ओच्छे परमेश्वरदा आतेन्बागदे, पापीगदे, नड्बा सेम मुबागदे, परमेश्वरदा बिरोध लबागदे, आबा आमादा साड्बागदेदेन म्हि साड्बागदे, १० ओच्छे खाल्दमानदेन छ्याम ब्रेल्सी भ्रबागदे, व्हाड व्हाड न्हडरीन ब्रेल्सी हेम्फेबेगदेदेन छ्याम भ्रबागदे, नोकर चूड्बा ग्लुबा लसी भ्रबागदे, लुसीला ताम पाड्बागदेदेन लुसीला तामरी साक्षी दोसी भ्रबागदे ओच्छे सत्य तामदा आहिन भिसी बिरोध लसी भ्रबागदेला लागिरी हिन्ना। ११ थे सत्य ताम डादा जिम्मा पिन्बा ल्हानान ज्यबा परमेश्वरला ल्हानान घ्रेन थार्बा पिन्बा समाचार अन्धार मुला।

पावलदा प्रभुला दया

१२ डादा भड पिन्बा व्हाडला प्रभु ख्रीष्ट येशूदा धन्यवाद मुला, तिगदा भिसम थेसे डादा विश्वासला म्हि म्हन्सी थेला गे लबारी डादा धन्जी। १३ डाड् डाच्छा प्रभुदा बिरोध लसी बेड्जजत लजी। थे धुडरी डाड् ख्रीष्टदा विश्वास आलबासे लमा चु जम्मान गे आसेना आघोना लजी। थेतबासेलमा डाड् प्रभुग्याम दया याड्जी। ††१४ व्हाडला प्रभुसे डादा ल्हानान दयामाया लजी। ओच्छे विश्वासदेन माया पिन्जी। तिगदा भिसम ख्रीष्ट येशूदेन छ्याम व्हाडदा गिक स्होबा हिन्ना। १५ जस्तो लसीन चु जम्मासेन ड्यान्तो:बादेन विश्वास लतो:बा ताम हिन्ना। पापीगदेदा थार्बा पिन्बारी ख्रीष्ट येशू जम्बुलिडरी फेप्खबा हिन्ना। ओच्छे पापीगदे न्हडरी जम्मान भन्दा पापी चा डानोन हिन्ना। १६ डा पापीगदे न्हडरी जम्मान भन्दा पापी तसैनोन डाला लागिरी

†† 1:13 मुल ८:३; ९:४-५

ख्रीष्ट येशूसे गाते दुख नाजी भिबा ताम उन्बाला लागिरी परमेश्वरसे डादा दया लजी। चुहड् लबा चा थेदा विश्वास लसी जुकजुकधोनाला जुनी याड्बागदेदा उन्बाला लागिरी हिन्ना।¹⁷ खालैसे म्राड्आखम्बादेन खाइमै आजिन्बा ओच्छे जुकजुकधोना चिबा ग्ले परमेश्वर गिकदा जे सदन मानदेन जयजयकार तगै। आमैन।

¹⁸ डाला झा तिमोथी, डाइ एदा चु ताम कुल्बा मुला, एला बारेरी परमेश्वरसे डाच्छान पाड्बा अन्धार एसे आँट याड्सी विश्वासला लागिरी ज्यबा लडाइ लउ।¹⁹ थे धुइरी एसे ह्राडला विश्वासदेन सेमसे म्हन्बा अन्धार ठीक गे लबारी थाखलागो। तिगदा भिसम कोइ कोइ म्हिसे सेमसे म्हन्बा अन्धार ठीक गे लबारी खलाबासे लमा थेनीगदेसे ह्राडला विश्वासदा नाश लबा मुला।²⁰ थेहड् लसी नाश लबागदे न्हडरी हुमेनियसदेन अलेक्जेन्डर हिन्ना। थेनीगदेसे परमेश्वरदा बिरोध लबा खलागे भिसी डाइ थेनीगदेदा शैतानना यारी जिम्मा पिन्बा मुला।

मण्डलीरी प्रार्थना लबा धुइरी था ततो:बा ताम

2 जम्मान भन्दा मुल ताम चा एसे जम्मालान लागिरी प्रार्थना लउ, एसे थेनीगदे जम्मालान लागिरी परमेश्वरग्याम मोलम ह्रीसी पिन्गो, ओच्छे परमेश्वरदा धन्यवाद पिन्गो।² ग्लेगदेदेन ग्रेन ग्रेन पदरी मुबागदे जम्मालान लागिरीनोन प्रार्थना लउ। थेहड् लजी भिसम यहाड सदन सुख शान्तिरी दुक्क तसी परमेश्वरदा तेन्सी थेदा मान लसी चिम्याड्ला।³ चुहड् लबा ल्हानान ज्यबा हिन्ना, यहाडदा थार्बा पिन्बा परमेश्वरदाएनोन चुहड्बान सेम निमुला।⁴ तिगदा भिसम जम्मान म्हिसे सत्यदा डोसेसी थार्बा याड्गै भिबा परमेश्वरला सेम मुला।⁵ तिगदा भिसम परमेश्वर गिक जे मुला ओच्छे म्हिगदेदा परमेश्वरला डाच्छापट्टि भबा म्हिेनोन गिक जे मुला। थे म्हिे चा ख्रीष्ट येशू हिन्ना।⁶ येशू ख्रीष्टसे जम्मान म्हिगदेला पापला सय फाबारी ह्राडलान लहुड बलिदान पिन्जी, चु ताम चा परमेश्वरसे म्हन्बा धुइरीन उन्जी।⁷ चुलान लागिरी डादा अर्गु यहुलला म्हिगदेदा विश्वासदेन सत्यला बारेरी लोप्वाला लागिरी थार्बा पिन्बा समाचार थे:ना लबा म्हिेदेन मुल चेला स्होजी। डाइ पाड्बा चु ताम पूरान सत्य हिन्ना, लुसीला ताम आहिन।[†]

⁸ थेतबासेलमा संगती लबा जम्मान ग्लारी हेम्फेबेगदेसे तिगै बोमोदेन कल आलना ह्राड ह्राडला तिगै दोष आरेबा या थीसी प्रार्थना लगै भिसी डाइ म्हन्बा मुला।

⁹ थेहड् लसीन म्हेमहेमेगदेएनोन ल्हाना क्रा स्होसी ज्योबादेन म्हर, मोती ओच्छे ल्हानान सयला क्वान क्वान्सी आहिन, तर सोजो तसी स्वाहब तबा क्वान क्वान्सी भ्रगै भिसी डाइ म्हन्बा मुला।^{††10} तर जुन म्हेमहेमेगदेसे डा परमेश्वरदा तेन्बा म्हिे हिन्ना भिसी म्हन्मुला थेनीगदे चा ज्यबा गेग्याम ज्योसी भ्रगै।

¹¹ ओच्छे म्हेमहेमेगदे कुटिसी तहरी चिसी लोपौ।¹² म्हेमहेमेगदेसे हेम्फेबेगदेदा तहरी थान्बादेन परमेश्वरला बचन लोप्वबा अधिकार चा डाइ आपिन, तर थेनीगदे कुटीसीन चितो:ला।¹³ तिगदा भिसम परमेश्वरसे डाच्छा आदमदा स्होसी जे हव्वादा स्होबा हिन्ना।^{††14} ओच्छे डाच्छा आदमदा आहिन, तर म्हेमहेमेदा चा शैतानसे पापरी फसब लबा हिन्ना।^{††15} तसैनोन थेसे ज्यना लसी विश्वास लसी परमेश्वरला मायादेन तिगै दोष आरेबा म्हिे दोसी परमेश्वरला डाच्छा ज्यबा तसी चिजी भिसम थेदा कोला न्हा धुइरी जोगब लला। ## ††

मण्डलीदा च्याबा म्हिगदे

3 चु सत्य ताम हिन्ना। खालै म्हिेसे मण्डलीदा च्याबा गे लबारी म्हाइबा चा ज्यबा ताम हिन्ना। चु चा थेला सेमसे लबारी म्हाइबा ज्यबा गे हिन्ना।² थेतबासेलमा मण्डलीदा च्याबा म्हिे चा खालैसे दोष उन्बारी आखम्बा, म्हेमहे गिक जे मुबा, ह्राडसे ह्राडदान तहरी थान्बा, जम्मासेन मान लबा, डोन्बोदा मान लबादेन ज्यना लसी लोप्वारी खम्बा ततो:मुला।³ ओच्छे

† 2:7 र तिमो १:११ †† 2:9 १ पत्र ३:३ † 2:13 उत्प २:७, २१-२२ †† 2:14 उत्प ३:१-६ †† कोइ कोइ विद्वानगदेसे “कोला न्हा धुइरी जोगब लला” भिबा चा न्हा कोलाग्याम थार्बा याड्ला भिबा हिन्ना। चु कोला चा येशू हिन्ना। ††† 2:15 उत्प ३:१५

झि आइरक थुड्सी इय्होइसी भ्रबादेन छेबा बड्बा लबा आहिन, तर जम्मानदेन ह्य्याम ढिक्बा, सोजो, टाडगाला लिच्छा आभ्रबादेन,⁴ थेसे ह्राडला दिम परिवारदा ज्यना लसी च्यातो:ला। ओच्छे थेला कोलागदेसे कुल्बा ताम इयान्सी थेदा मान लतो:ला।⁵ चुदे खालै म्हिेसे ह्राडला दिमला म्हिेगदेदा तहरी थान्बारी आखम्नी भिसम थेसे खाहड् लसी परमेश्वरला मण्डलीदा च्याबारी खम्बा? ⁶ मण्डलीदा च्याबा म्हिे चा भर्खर प्रभुदा विश्वास लबा छार म्हिे तबारी आत। आहिन्सम थेसे ह्राडसे ह्राडदान ग्रेन स्होसी घमण्ड लसी भ्रला। ओच्छे शैतानसे याड्बा सजायरी थेएनोन परब तला।⁷ थे ख्रीष्टदा विश्वास आलबा म्हिेगदेला ओन्हाडरीनोन ज्यबा म्हिे ततो:ला, आहिन भिसम जम्मासेन थेला तामगन लसी भ्रला ओच्छे शैतानना यारी परब तला। ##

⁸ थेहड् लसीन मण्डलीरी ह्यो लबा म्हिेगदेएनोन जम्मासेन मान लबा म्हिे ततो:ला, ओच्छे ले न्ही मुबा हड् लसी ताम पाड्बारी आत, झि आइरक थुड्सी इय्होइबादेन टाडगाला लोभ लबारी आत,⁹ बरु थेनीगदेसे ह्राडला सेमसे म्हन्बा अन्धार ठीक गे लसी सत्य विश्वासदा जोगब लसी थान्तो:ला।¹⁰ डाच्छा थेनीगदे ठीक मुला कि आरे भिसी मण्डलीसे च्यागै। ओच्छे तिगै दोष आरेसम थेनीगदेसे मण्डलीरी ह्यो लगै।

¹¹ थेहड् लसीन मण्डलीरी ह्यो लबा म्हिला म्हेमहेमेगदेएनोन ⁸ स्थान्दोग्याम मान याड्बादेन खालैला तामगन आलबा ततो:ला। ओच्छे ह्राडसे ह्राडदान तहरी थान्खम्बादेन जम्मान तामरी म्हिेगदेसे विश्वास लखम्बा ततो:ला।

¹² मण्डलीरी ह्यो लबा म्हिलाएनोन म्हेमहे गिक जे ततो:ला ओच्छे थेसेनोन ह्राडला कोलागदेदेन दिम परिवारदा ज्यना लसी च्याखम्तो:ला।¹³ तिगदा भिसम मण्डलीरी ह्यो लबागदेसे ज्यना लसी गे लजी भिसम थेनीगदेसे मान याड्ला। ओच्छे थेनीगदेसे ख्रीष्ट येशूदा लबा विश्वासला बारेरीनोन स्थान्दोगदेदा पाड्बारी आँट याड्ला।

यहाडसे विश्वास लबा तामगदे गाते ग्रेन मुला

¹⁴ ए मुबा ग्लारी योनान खबा सेम मुला, तसैनोन डाइ एदा चु चिठी भ्रिबान मुला।¹⁵ तिगदा भिसम तिगै लसी डा खबारी घड्जी भिसम चु चिठीग्यामसेन परमेश्वरला दिम यहाडला छोन्बो परमेश्वरला मण्डलीरी खाहड् लसी गे लतो:ला भिबा ताम एसे था याड्ला। तिगदा भिसम परमेश्वरला मण्डली चा सत्य तामला भर ताबा थामदेन जग हिन्ना।¹⁶ यहाडदा था मुला कि यहाडसे लबा विश्वास म्हिेसे था आयाड्बा ग्रेन मुला,

“यहाडसे येशूदा म्हिे लहुइरी म्राड्जी,
थे परमेश्वरदा सेम निबा मुला भिसी परमेश्वरला आत्मासे उन्जी।
ओच्छे थेदा स्वर्गदूतगदेसेनोन म्राड्जी।
थेला बारेरी यहुल्सा यहुल्सारी थे:जी,
थेदा जम्बुलिडरी विश्वास लजी,
ओच्छे थे ग्रेन यहालदेन शक्तिरी तोर फेप्ली।”

तिमोथीदा लोप्वबा ताम

4 लिच्छा खबा धुइरी फट्टा आत्मादेन म्हेड म्हुडला ताम इयान्सी कोइ कोइ म्हिेसे विश्वास लबा खलाला भिसी परमेश्वरला आत्मासे प्रस्टन सुड्बा मुला।² चुहड्बा लुसीला ताम पाड्बा म्हिेगदेला जालसे लमान चुहड् तला, थेहड्बागदेला ज्ञान बुद्धि चा लेप्वबा फाइसे खाइसी सिबा हड्बान तला। जमाहेन्से थेनीगदेसे ज्यबा नड्बा तिग हिन्ना थे फेबारी आखम।³ चुहड्बा म्हिेगदेसे ब्याह लबारी आत भिमुला, ओच्छे गाते चबा स्हेगदे चा चबारी आत भिसी लोप्वमुला। तर ख्रीष्टदा विश्वास लसी सत्य ताम घोबागदेसे परमेश्वरसे स्होबा चबा स्हेगदे धन्यवाद पिन्सी चबारी तला।⁴ परमेश्वरसे स्होबा जम्मान स्हे ज्यबा मुबा। थेतबासेलमा जम्मान स्हे चबारी तला। तर परमेश्वरदा धन्यवाद पिन्सी जे चतो:ला।⁵ तिगदा भिसम परमेश्वरला बचनदेन प्रार्थनाग्याम थे चबारी तबा चोखो स्होला।

3:7 तीत १:६-९ § “मण्डलीरी ह्यो लबा म्हिेगदेला म्हेमहेमेगदे” भिबा चा मण्डलीरी ह्यो लबा म्हेमहेमे अथवा मण्डलीरी ह्यो लबा म्हिला म्हेमहेमे पाड्बा हिन्ना।

ख्रीष्ट येशूला गे लबा म्हिदेन छ्याम ततो:बा ज्यबा बानीबेहोर

6 चुदे एसे चु जम्मान तामला बारेरी ज्योज्यो आले नाना आडागदेदा लोप्पी भिसम, ए भ्रबा ज्यबा तामदेन विश्वासला बचनरी पाको म्हि दोला, ओच्छे ए ख्रीष्ट येशूला गे लबा ज्यबा म्हि दोला। 7 परमेश्वरदा आतेन्बादेन टाना गा जोला ताम पाड्बागदेग्याम होशियार तसी थारेड चिउ, ओच्छे परमेश्वरला बचन अन्धार भ्रबारी भड लसी गे लउ। 8 तिग्दा भिसम लहुडला लागिरी लबा गे तिगै धिनना लागिरी जे फाइदा तला। तर आत्माला लागिरी लबा गे चा जुन लसै फाइदा तला। तिग्दा भिसम चु गेग्याम दान्देलाला जुनीदेन लिच्छाला जुनीला लागिरी कबुल लबा ताम हिन्ना। 9 चु चा सेमहेन्सेन इयान्सी विश्वास लतो:बा ताम हिन्ना। 10 चुलान लागिरी यहाडसे दुख लसी गे लबा हिन्ना। तिग्दा भिसम यहाडसे छोन्बो परमेश्वरथोरी आश लबा मुला। परमेश्वर चा जम्मान म्हिगदेदा थार्बा पिन्बा ग्ले हिन्ना। अझ पाड्बानोन तो:मा विश्वास लबा म्हिगदेदा थार्बा पिन्बा ग्ले हिन्ना।

11 चुनोन ताम लोप्पी कुल्गो। 12 ए भ्योन तसैनोन एदा खालैसेन हेला थालगै। तर विश्वासीगदेला ओन्हाडरी एला बोली बचनदेन बानीबेहोर ओच्छे एसे चोखो सेम थोसी स्थान्दोदा लबा मायादेन परमेश्वरदा लबा विश्वास उन्नो। 13 डा थेरी आखतेधोना एसे सेम लसी परमेश्वरला बचन पढब लसी थे:ना लउ, ओच्छे बचनग्याम लोप्पी आँट पिन्बादेन अर्ती पिन्बा गे लउ। 14 एदा परमेश्वरसे पिन्बा मोलमदेन शक्तिदा ज्यना लसी चलब लउ। एसे थे मोलम मण्डलीदा च्याबा म्हिगदेसे एदा मोलम पिन्बारी या थान्सी प्रार्थना लबादेन अगमवक्तागदेसे एला बारेरी पाड्बा धुइरी याड्बा मुबा। 15 एसे लबा ज्यबा गे जम्मासेन म्राड्बाला लागिरी एदा जिम्मा पिन्बा थे गेगदे सेमहेन्सेन लसी चिउ। 16 ओच्छे हाडला बारेरीदेन हाडसे लोष्वा तामला बारेरी होशियार तसी चिउ। ओच्छे चु गे लसीन चिउ। थेहड लजी भिसम एसे लोष्वा ताम इयान्बागदेदेन ए हाडएनोन थार्ला।

विश्वासीगदेदा लतो:बा बानीबेहोर

5 एसे खेष्वा दोबा म्हिदा थाबड्गो, तर थेदा आबादा हड लसी सम्झब लउ। ओच्छे हाड भन्दा जजागदेदा आलेदा हड लसी व्यवहार लउ। 2 थेहड लसी खुड दोबा म्रिडम्हेमेगदेदा आमादा हड लसी ओच्छे हाड भन्दा जजा म्रिडम्हेमेगदेदा हाडला आडादा हड लसी ज्यबा व्यवहार लउ। 3 साँच्चिलान, खालै आरेबा हेम्बो सिबा म्रिडम्हेमेदा वास्ता लउ। 4 तर चुदे खालै हेम्बो सिबा म्रिडम्हेमेला कोलागदेदेन छाया छुया मुसम थेनीगदेसे सयार लसी हाडला आबा आमाला गुण फागै। ओच्छे थेनीगदेसे डाच्छा हाडलान दिमरी परमेश्वरला बचन अन्धार गे लगै। तिग्दा भिसम परमेश्वरदा चुनोन ताम सेम निमुला। 5 तर साँच्चिलान, खालै आरेबा हेम्बो सिबा म्रिडम्हेमेसे चा परमेश्वरथोरी आश लसी धिन म्हुननोन प्रार्थना लसी चिमुला। 6 तर चुहड आलना थेसे मोजमजा लसी भ्रजी भिसम थे सिबा तेबान तला। 7 विश्वासीगदेदा तिगै दोष आतबाला लागिरी चु ताम थेनीगदेदा लोपो। 8 तर चुदे खालैसे हाडला म्हिगदेदेन हाडला दिमला म्हेमेगदेदा चबा क्वान्बा आपिन्नी भिसम थेसे विश्वास लबा खलाला। ओच्छे थे विश्वास आलबा म्हिगदे भन्दाएनोन गे आखेल्बा तला।

9 हेम्बो सिसैनोन हेम्बो सिबा म्रिडम्हेमेगदेला मिन भ्रिबा खातारी मिन भ्रिसी थान्बाला लागिरी बोगल सोम दिड छ्योबा ततो:ला, हाडला हेम्बोला सतरी चिबा ततो:ला, 10 ओच्छे थेसे ज्यबा गे लसी मान याड्बा, कोलागदे ज्यना लसी च्याबा, डोन्बोगदेदेन परमेश्वरला म्हिगदेदा ज्यना लसी क्योड्बा, † दुख याड्बागदेदा हो लबा हड्बा ज्यबा गेरी सेम लबा म्हि ततो:ला।

11 तर छामे म्रिडम्हेमेला हेम्बो सिसैनोन थेला मिन हेम्बो सिबा म्रिडम्हेमेगदेला मिन भ्रिबा खातारी थाभ्रिउ। तिग्दा भिसम थेनीगदेला सेमसे आड्यान्नी भिसम थेनीगदेसे ख्रीष्टदा खलासी दो:सी ब्याह लला। 12 चुहड लसी थेनीगदेसे डाच्छा लबा कबुल अन्धार आभ्रबासे लमा थेनीगदेसे सजाय याड्ला। 13 ओच्छे थेनीगदे म्हिला दिम दिमरी कोर्सी भ्रबादेन ब्लेगु दोसी

† “परमेश्वरला म्हिगदेदा ज्यना लसी क्योड्बा” भिबा चा यहूदीगदेला ठिम अन्धार विश्वासीगदेला काड खुसी मान लबा हिन्ना।

भ्रबा जे आहिन, तर म्हिला तामगन लसी भ्रबा ओच्छे म्हिसे लबा गेरी या झाड्बादेन पाड्बारीन आतबा ताम पाड्सी भ्रबा तला। 14 थेतबासेलमा हेम्बो सिबा छामे म्रिडम्हेमेसे दो:सी ब्याह लसी कोलागदे तगै ओच्छे थेसे हाडला दिमनाम स्होगै। तिग्दा भिसम यहाडला शत्रुगदेसे यहाडदा दोष लआम्याङ्गै भिबा डाला सेम मुला। 15 तिग्दा भिसम कोड कोड हेम्बो सिबा छामे म्रिडम्हेमेगदे मी डाच्छान शैतानपट्टि निसी जिन्बा मुला। 16 चुदे खालै विश्वासी म्रिडम्हेमेला हाडला म्हि न्हडरी हेम्बो सिबा म्रिडम्हेमे मुसम थेसे हो लगै, ओच्छे मण्डलीदा तिगै दुख थातगै। थेतबासेलमा मण्डलीसे चा साँच्चिन खालै आरेबा हेम्बो सिबा म्रिडम्हेमेगदेदा हो लबारी खमौ।

17 ल्हानान दुख लसी मण्डलीदा च्याबा म्हिगदेदा मान लसी थेनीगदेदा गेला ज्यालाएनोन याड्तो:बा भन्दा ल्हानान पिन्गो, ओच्छे दुख लसी परमेश्वरला बचन थे:ना लबादेन लोष्वा म्हिसे मी झन चु याड्बानोन तो:ला।

18 तिग्दा भिसम परमेश्वरला बचनरी
“दाई लबा ग्लापला सुडरी भोर थाक्वान्गो”
भिसी भ्रिबा मुला।

ओच्छे

“गे लमाहेन्से ज्याला याड्बानोन तो:ला”

भिसी सुड्बा मुला। ††

19 म्हि न्ही सोम साक्षी आरेतेधोना मण्डलीदा च्याबा म्हिदा लबा दोष थाड्यान्गो। 20 स्थान्दोगदेसेनोन पाप गे थालगै भिसी सदन पाप गे लसी भ्रबा म्हिगदेदा जम्मान ओन्हाडरी बड्गो।

21 परमेश्वरदेन ख्रीष्ट येशूला डाच्छापट्टि ओच्छे परमेश्वरसे धम्बा स्वर्गदूतगदेला डाच्छापट्टि एसे खालैला ली च्यासी गे आलना जम्मादान च्योच्यो लसी चु ठिमगदे इयान्गो भिसी डाड एदा कुल्ला। 22 खालै म्हिथोरी हतार लसी या थान्सी प्रार्थना लसी मण्डलीला गे जिम्मा थापिन्गो। ओच्छे स्थान्दो म्हिगदेला पापरी थाभ्रउ। ओच्छे सदन पापग्याम जोगब तसी चिउ।

23 डाच्छा हड् क्युड जे आहिन, तर एला फो धुड धुइरी आखम्बासे लमा एसे जजाकर अडगुरला निडगु थुङ्गो।

24 कोड कोड म्हिला पाप चा प्रस्टन म्राड्मुला ओच्छे थेनीगदे निसाफरी परब तमुला। तर स्थान्दो गाते म्हिला पाप चा लिच्छा जे म्राड्मुला। 25 थेहड लसी गाते ज्यबा गेगदे डाच्छान प्रस्टन म्राड्मुला ओच्छे प्रस्टन आम्राड्बा गेगदे मुसैनोन जम्मासेन था याड्ला।

6 परमेश्वरला मिनदेन यहाडसे लोष्वा तामदा खालैसे दोष आलबाला लागिरी जम्मान नोकरगदेसे हाड हाडला मालिकला तहरी चिसी मालिकसे कुल्बा ताम इयान्तो:ला भिसी म्हन्गो। 2 विश्वासरी ज्योज्यो आले नाना आडा तजी भिदेमा विश्वास लबा मालिकदा विश्वास लबा नोकरगदेसे मान आलबा आहिन। बरु थेनीगदेसे हाडला मालिकदा अझ ज्यना लसी मान लगै। तिग्दा भिसम थेनीगदेसे लबा गेग्याम हाडलान सेम निबा विश्वासीगदेदान फाइदा तबा हिन्ना।

सत्यला धनदेन फट्टा ताम लोष्वा

चु अन्धार गे लउ भिसी थेनीगदेदा लोप्पी आँट पिन्गो। 3 चुदे खालै म्हिसे लोष्वा ताम यहाडला प्रभु येशू ख्रीष्टला सत्य बचनदेन परमेश्वरदा तेन्बारी लोष्वा तामदेन आढिवनी भिसम 4 थे म्हिसे डा हड्बा खालै आरे भिसी भ्रमुला, तर थेसे तिगै आघोमुला। थे भिथाला ताम लबादेन ताम गिक गिकरी कल लबा रोगसे स्याष्वा म्हि हिन्ना। चुहड्बा तामगदेसे डाह लबा, कल लबा बिरोध लबादेन नड्बा म्हन्बा ताम खना लमुला। 5 ओच्छे बुद्धि न्होड्बादेन सत्य ताम आड्यान्बा म्हिगदेदेन छ्याम कल लमुला, ओच्छे परमेश्वरदा तेन्बा भिबा चा धन सम्पत्ति स्होबारी हिन्ना भिसी थेनीगदेसे म्हन्मुला।

6 हाडदेन छ्याम जुन स्हे मुला थेरीन सन्तोक लसी परमेश्वरदा तेन्जी भिसम थेनोन जम्मान भन्दा घेन सम्पत्ति हिन्ना। 7 तिग्दा भिसम यहाडसे चु

जम्बुलिङ्गरी न्ह तिगै भसी खजी न्ह तिगै भोर्सी निला।⁸ तर चबादेन क्वान्बारी जे छयोर्जी भिसम य्हाड ओतेरीन सन्तोक तला।

⁹ तर फ्युक्पो दोबारी म्हाइबा म्हिगदे चा थेनीगदेला सेमरी खबा आज्यबा तामदेन न्होइबा सेमसे लमा थेनीगदे फसब तला। चु जम्मान नइबा म्हन्बा तामगदेसे थेनीगदेदा नर्गरी धोना लला।¹⁰ तिगदा भिसम जम्मान न्होइना लबा तामगदे खबान टाडगाला लिच्छा भ्रबासे लमा हिन्ना। टाडगाला लिच्छा भ्रबासे लमा कोइ कोइ म्हिसे मी विश्वास लबान ख्लासी आज्यबा ग्यामपट्टि भ्रबा मुला, ओच्छे थेनीगदेला सेम ल्हानान दुखसे क्रोबा मुला।

पावलसे तिमोथीदा कुल्बा ताम

¹¹ तर परमेश्वरला म्हि एसे चु जम्मान आज्यबा तामगदे खलागो। ओच्छे जुन ताम सत्यदेन ज्यबा मुला थे तामला लिच्छा भ्रउ। थेह्ण्ड लसीन परमेश्वरदा सेम निबा म्हि दोबारी, परमेश्वरदा तेन्बारी, विश्वासरी भ्रबारी, माया लबारी, सेम नाबारीदेन सोजो तसी भ्रबारी भड लउ।¹² थेतबासेलमा ए जुकजुकधोनाला जुनीला लागिरी विश्वासरी सदन डाच्छा बढब तउ। तिगदा भिसम परमेश्वरसे एदा चुलान लागिरी इयोइबा मुबा। एसे थे जुकजुकधोनाला जुनीला बारेरी ल्हानान म्हिला ओन्हाडरी ज्यना लसी उन्बा मुला।¹³ जम्मादान जुनी पिन्बा परमेश्वर ओच्छे पन्तियस पिलातसला डाच्छा सत्य ताम सुइबा ख्रीष्ट येशूला डाच्छा डाइ एदा कुल्ला।^{†14} एदा

† 6:13 यूह १८:३७

खालैसे दोष आलबाला लागिरी डाइ एदा कुल्बा चु ताम य्हाडला प्रभु येशू ख्रीष्ट दोःसी आफेखतेधोना ढुक्क तसी पूरान इयान्गो।¹⁵ परमेश्वर जम्मादान मोलम पिन्बादेन जम्मानथोरी शासन लबा, ओच्छे ग्लेगदेलाएनोन ग्ले, प्रभुगदेलाएनोन प्रभु परमेश्वर हिन्ना। धुइ पूरा तमाहेन्से थेसेन ख्रीष्ट फेखबा धुइ उन्ना।¹⁶ खाइमै आसिबा चा थे जे हिन्ना, ओच्छे थे खालै निआखम्बा य्हालरी धन्ख्यामुला। थेदा खालै म्हिसे खाइमै म्हाइबा आरे ओच्छे म्हाइबारीएनोन आखम। ओच्छे थेनोन परमेश्वरदा सदन मानदेन शक्ति तगै। आमेन।

¹⁷ चु जम्बुलिङ्गला फ्युक्पोगदेदा डा ह्ण्डबा खालै आरे भिसी भ्रबारी आत भिसी कुल्गो। ओच्छे नाश तसी निबा सम्पत्तिरी आहिन, तर य्हाडदा ताङ्ना लबारी जम्मान स्हे ल्हानान पिन्बा परमेश्वरथोरी आश लउ भिसी पाङ्गो।

¹⁸ थेनीगदेला टाडगा ज्यबा गेरी चलब लउ भिसी पाङ्गो, ओच्छे थेनीगदेदा स्हान्दोदा ज्यबा सेमसे भो लसी पिन्बा ज्यबा गेरी फ्युक्पो दोगो भिसी कुल्गो।¹⁹ चुह्ण्ड लसी धन सम्पत्ति सोजी भिसम थेनीगदेदा खबा धिनगदेरी ज्यबा तला। चु थेनीगदेसे याइबा पक्का जुनी हिन्ना।

²⁰ तिमोथी, एदा जुन गे जिम्मा पिन्बा मुला, थे जोगब लसी थान्गो। ओच्छे परमेश्वरदा आतेन्बा तामदेन आतोःबा तामगदे चा भिथाला ज्ञान जे हिन्ना। थेतबासेलमा थेह्ण्डबा तामगदे खलागो।²¹ चु तामगदे इयान्सी भ्रबा गाते म्हिगदेसे विश्वास लबान ख्लाबा मुला।

एदेन छ्याम परमेश्वरला दयामाया तगै।

चु चिठीला बारेरी पाडतो:मा

येशूला मुल चेला पावलसे भिबा मुबा (२ तिमोथी १:१)।

रोमला इयाल्खानग्याम भिबा मुबा।

ओस्पन ईश्वी संवत् ६५-६७ (विक्रम संवत् १२२-१२४) सालला गुडरी भिबा मुबा।

तिमोथी भिबा म्हिदा भिबा मुबा।

चु न्हीरेमला चिठी पावलसे थाबा पिन्बा समाचार थे:ना लबा ह्राड भन्दा च्याड्बा तिमोथीदा जे पिन्बा सल्लाह हिन्ना। चु चिठीला मुल ताम चा “नाबा” हिन्ना। चु चिठीरी तिमोथीदा जस्तोन दुख तसैनोन सेमहेन्सेन ख्रीष्ट येशूला बारेरी पाड्बाला पाड्बान लउ भिसी पाड्बा मुला। ओच्छे परमेश्वरला थाबा पिन्बा समाचारदेन पुरानो कबुलला सत्य तामगदेरी कोड्सी चिउ भिसी पाड्बा मुला। थेह्ण्ड लसीन दुखदेन हेला नातो:मा लोप्ला म्हिदेन थाबा पिन्बा समाचार थे:ना लबा म्हिसे लतो:बा जम्मान गे लसीन चिबाला लागिरी आँट खबा सल्लाह पिन्बा मुला। खास लसी तिमोथीदा चु चिठीरी “जम्बुलिडला मूर्ख तामगदेग्याम” जोगब तबाला लागिरी होशियार तना लबा मुला। चुह्ण्ड मूर्ख तामसे इयान्बागदेदा फाइदा आत, बरु न्होड्ना लमुला।

चु जम्मान तामला बारेरी पावलसे तिमोथीदा ह्राडदेन ह्राडसे लबारी म्हाड्बा गेगदेला बारेरी पाड्बा मुला। पावलसे ह्राडलान विश्वासला बारेरी, ह्राडसे नाबा तामला बारेरी, ह्राडसे लबा मायाला बारेरीदेन दुखला धुडरी नाबा तामगदे ढन्ना लबा मुला।

मुल तामगदे

प्याफुल्बा १:१-२

स्याबासदेन आँट पिन्बा १:३-२:१३

सल्लाह पिन्बादेन होशियार तना लबा २:१४-४:५

पावलसे ह्राडलान बारेरी पाड्बा ४:६-१८

चिठीला थुमरी भिबा ताम ४:१९-२२

पावलसे तिमोथीदा भिबा न्हीरेमला चिठी

1 लास्सो, प्रभुरी सेम निबा डाला झा तिमोथीदा डा पावलग्याम प्याफुल्ला। डादा ख्रीष्ट येशूसे जुकजुकधोनाला जुनी पिन्ना भिसी लबा कबुल अन्धार परमेश्वरसे ख्रीष्ट येशूला मुल चेला दोबारी धम्बा हिन्ना। एदा परमेश्वर आबादेन व्हाडला प्रभु येशू ख्रीष्टग्याम मोलमदेन दया ओच्छे शान्ति तगै। †

प्रभुला गे लबारी दुख थाम्हनो

3 डाला झा, डाइ सदन धिन म्हुन प्रार्थना लबा धुडरी एदा ढन्सी परमेश्वरदा धन्यवाद पिन्बा मुला। डाला आखे म्हेमेगदेसे तेन्बा ह्ण्ड लसी डाइ सेमहेन्सेन परमेश्वरदा तेन्बा मुला। 4 एला मीखलीला धारा ढन्माम, डादा सदन एदेन छ्याम हुप तबा सेम खमुला, ओच्छे एदेन छ्याम हुप तम्याड्सम डा ल्हानान ताड्सेला मुबा। 5 एसे सेमहेन्सेन लबा एला ज्यबा विश्वास डाइ ढन्बा मुला। थे विश्वास चा डाच्छा एला मम लोड्सदेन आमा युनिससेनोन लमुबा। एला ममदेन आमासे लबा ह्ण्डबान विश्वास एसेनोन लबा मुला भिबा तामरी डा ढुक्क मुला। ††

6 थेतबासेलमा डाइ एथोरी या थान्सी प्रार्थना लमा एसे परमेश्वरग्याम याड्बा मोलमदा सदन सोना लसी थान्गो भिसी डाइ एदा ढन्ना लला। 7 तिग्दा भिसम परमेश्वरला आत्मासे व्हाडदा लोड्बा खबा आत्मा पिन्बा आरे, तर भड, मायादेन ह्राडसे ह्राडदान तहरी थान्खम्बा आत्मा पिन्बा मुला।

† 1:1-2 मुल १६:१ †† 1:5 मुल १६:१

8 थेतबासेलमा व्हाडला प्रभुला बारेरी पाड्बारी थापे:गो, ओच्छे डा इयाल्खानरी मुला भिसीएनोन थापे:गो। तर परमेश्वरग्याम शक्ति याड्सी थाबा पिन्बा समाचार थे:ना लसी डादेन छ्यामनोन दुख नाबारी तयार तउ।

9 परमेश्वरसे व्हाडदा थाना लबा मुला।

थेसे व्हाडला गे म्हाड्सी आहिन,

तर थेसे म्हन्बा अन्धार ह्राडलान दयामायाग्याम व्हाडदा ह्राडला म्हि स्होबारी इयोड्बा हिन्ना।

चु ताम थेसे दडबोरीन ख्रीष्ट येशूग्याम व्हाडदा पिन्बा मुबा।

10 दान्दे थे दयामाया व्हाडला थाबा पिन्बा ख्रीष्ट येशू फेप्खसी व्हाडदा उन्बा मुला।

थेसे कालदा नाश लसी व्हाडदा थाबा पिन्बा समाचारग्याम

जुकजुकधोनाला जुनी उन्जी।

11 चुनोन थाबा पिन्बा समाचार थे:ना लबारीदेन लोप्लारी डादा मुल चेला स्होसी धम्जी। #12 थेतबासेलमा डाइ चु दुखएनोन नाबान मुला। तसैनोन डा खाड्मै आपे:नी। तिग्दा भिसम डाइ खाल्दा विश्वास लबा मुला थे ताम डादा था मुला। ओच्छे जुन गे थेसे डादा जिम्मा पिन्बा मुला थे जम्मान गे थेसे पूरा लखम्ला। निसाफ लबा धिन आततेधोना थे गे पूरा लबारी डादा भड पिन्ना भिबा तामरी डा ढुक्क मुला।

‡ 1:11 १ तिमो २:७

13 ख्रीष्ट येशूदेन छ्याम गिक तबा विश्वासदेन मायारी डाय्याम लोष्वा सत्य तामगदे अन्धार एसे गे लउ। 14 एदा जिम्मा पिन्बा सत्य तामदा व्हाड न्हडरी धन्छ्याबा परमेश्वरला आत्माग्याम जोगब लसी थान्गो।

15 एशिया अञ्चलरी मुबागदे जम्मान डाय्याम फेसी निजी भिबा एदा थानोन मुला। फेसी निबागदे न्हडला फुगेलसदेन हर्मोगेनसएनोन हिन्ना।

16 प्रभुसे ओनेसिफरसला म्हेमेदा दया लगै, तिगदा भिसम थेसे डाला दुखरी ल्हानान रेम ऑट पिन्मुबा, ओच्छे डा इयाल्खानरी मुसैनोन डा प्राइसी थै आपे:मुबा। 17 तर थे रोमरी धोखमैछ्याम डादा आस्यात्तेधोन थेसे म्हाइबाला म्हाइबान लजी। 18 निसाफ लबा धुइरी थेदा प्रभुसे दया लगै। थेसे एफिसस शहररी डादा गाते हो लजी भिबा ताम एदा थानोन मुला।

येशू ख्रीष्टसे कुल्बा ताम इयान्बा म्हे

2 थेतबासेलमा डाला कोला, ए ख्रीष्ट येशूसे पिन्बा दयामायारी कोङ्गो।

2 ओच्छे ल्हानान म्हेगदेला गुइरी एसे डाय्याम थे:बा ताम विश्वास लखम्बादेन लोष्वारी खम्बा म्हेदा जिम्मा पिन्गो।

3 ख्रीष्ट येशूला ज्यबा सिपाही दोसी इन्देन छ्याम दुख नाबारी तयार तउ। 4 सिपाहीरी भर्ना तबा म्हे खाइमै अर्गु गेरी आकोल्मुला। तिगदा भिसम थेला सेमरी ह्वाड भन्दा थोला म्हेदा ताङ्ना लतो:ला भिबा जे तमुला। 5 ओच्छे खेलरी भो किन्सी खेलला ठिम अन्धार आक्लड्बा खजिबै म्हेसे इनाम आयाड्। 6 जुन म्हेसे दुख लसी खेती लला थेसेन डाच्छा रोबा बाली याइतो:ला। 7 डाइ तिग पाइबा मुला, थे ताम म्हन्गो, तिगदा भिसम जम्मान ताम एदा प्रभुसे घोना लला।

8 दाऊद वंशग्याम फेख्बा येशू ख्रीष्टदा ढन्गो। थे सिबागदे न्हडग्याम सोबा मुला। डाइ थे:ना लबा थार्बा पिन्बा समाचार चा चुनोन हिन्ना। 9 थार्बा पिन्बा चुनोन समाचार थे:ना लबासे लमा डाइ दुख नाबान मुला, ओच्छे अड् अपराधीदा ह्वाड लसी डादा च्याल्दासे खीबा मुला। तर परमेश्वरला थार्बा पिन्बा समाचारदा खाइमै च्याल्दासे खीबारी आखम। 10 थेतबासेलमा परमेश्वरसे धम्बागदेला लागिरी डाइ जम्मान दुख नाला। तिगदा भिसम थेनीगदेसेनोन जुकजुकधोनाला य्हालदेन शक्ति ओच्छे ख्रीष्ट येशूग्याम थार्बा याइगै भिसी डाइ चु दुख नाबा हिन्ना। 11 चुह्वाड् भिसी पाइबा चा सत्य हिन्ना,

चुदे व्हाड थेदेन छ्यामनोन सिबा मुला भिसम थेदेन छ्यामनोन सोला।

12 व्हाडसे दुख नाबारी खम्जी भिसम व्हाडसेनोन थेदेन छ्यामनोन शासन लम्पाइला, तर व्हाडसे थेदा विश्वास लबा ख्लाजी भिसम थेसेनोन व्हाडदा खलाला। †

13 व्हाडसे विश्वास लबा ख्लासैनोन, ख्रीष्ट सदन विश्वास लखम्बा तला, तिगदा भिसम थेसे खाइमै ह्वाडला बचन आपो।

परमेश्वरसे ह्वाडला गे लबारी धम्बा म्हे

14 चु ताम थेनीगदेदा घोना लउ ओच्छे आतो:बा तामरी कल थालउ भिसी प्रभुला डाच्छा कुल्गो। चुह्वाड्बा तामसे खालैदा ज्यबा आत, तर इयान्बागदेदा न्होइना जे लला। 15 आपे:ना परमेश्वरला सत्य बचन अन्धार ज्यना लसी गे लबा म्हेसे ह्वाड एसेनोन ह्वाडसे ह्वाडदान परमेश्वरदा सेम निबा म्हे दोबारी भड लउ। 16 ओच्छे परमेश्वरदा मान आतबादेन मूर्ख तामगदे खलागो। तिगदा भिसम चुह्वाड्बा तामसे म्हेगदेदा इन परमेश्वरग्याम थारेड तना लमुला। 17 थेनीगदेला ताम सइन तबा पोर ह्वाड तसी निमुला। थेह्वाड्बा ताम लबा म्हेगदे न्हडला हुमेनियसदेन फिलेतसएनोन हिन्ना। 18 सत्य ताम खलाबा चुनोन म्हेगदेसे थेनीगदे डाच्छान सिबाग्याम सोसी जिन्बा मुला भिसी पाइमुला। ओच्छे थेनीगदेसे विश्वास लबा कोइ कोइ म्हेगदेदा मी न्होइना लबा मुला। 19 तर परमेश्वरसे थान्बा सत्यला जग सदन कोइसी

चिला। ओच्छे थेथोरी चुह्वाड्बा छाप लबा मुला, “प्रभुसे ह्वाडला म्हेगदेदा डोसेमुला,” ओच्छे “प्रभुला मिन किन्बागदे पापग्याम थारेड चिगै।” ††

20 पयुकपोला दिमरी म्हरदेन म्हुइला ताड जे आहिन, तर सिडदेन साप्राला ताडएनोन तमुला। चु ताडगदे कोइ म्हेगदेदा क्योइबाला लागिरी तला भिसम कोइ ह्वाडलान लागिरी चलब लबाला लागिरी हिन्ना। 21 खालै म्हेसे ह्वाडदा पाप गेग्याम चोखो थान्जी भिसम थे म्हे चा डोन्बोदा क्योइबारी चलब लबा चोखो ताड ह्वाडबान तला। तिगदा भिसम थेसे ह्वाडदान चोखो थान्बासे लमा जम्मान ज्यबा गेरी चलब लबाला लागिरी मालिकदा थे सेम निबा तला।

22 थेह्वाड् लसीन भ्योन मुबा धुइरी सेमरी खबा नइबा तामगदे खलागो, ओच्छे परमेश्वरदा सेम निबा म्हे दोसी विश्वास, मायादेन शान्तिरी ज्यबा सेमसे प्रभुला मिन किन्बागदेदेन छ्याम भ्रउ। 23 तर एसे मूर्ख तामदेन गे आखेल्बा ताम खलागो, तिगदा भिसम चुह्वाड्बा तामसे कल जे तमुला भिबा एदा थानोन मुला। 24 प्रभुला गे लबा म्हेसे चा कल लबारी आत, थे जम्मानदेन छ्याम ढिक्बा, लोष्वारी खम्बा, जस्तोन दुख तसे नाबारी खम्बादेन 25 जम्मान गेरी सोजो तसी ह्वाडदा बिरोध लबागदेदा घोना लसी ज्यबा ग्याम उन्बारी खम्बा म्हे ततो:ला। थेह्वाड् लजी भिसम परमेश्वरसे थेनीगदेदा थेन्से लबा पाप खलासी सत्य ताम घोसी परमेश्वरपट्टि दो:बा सेम पिन्ना तला, 26 जमाहेन्से होसरी खसी थेनीगदे शैतानना याग्याम स्योर्ला। तिगदा भिसम शैतानसे कुल्बा अन्धार भ्रगै भिसी थेसे थेनीगदेदा खीसी थान्मुला।

लिच्छाला धुइरी परमेश्वरदा खलाबा म्हेगदे

3 लिच्छाला धुइ चा ल्हानान दुखला धुइ तला भिबा ताम एसे था याङ्गो।

2 तिगदा भिसम जमा धुइरी म्हेगदे ह्वाडदा जे माया लबा, ओच्छे टाडगाला लिच्छा जे भ्रबा, डा ह्वाडबा खालै आरे भिसी भ्रबा, डा जे चसे डा जे भ्रसे भिसी भ्रबा म्हे, स्य्हान्दोदा बिरोध लबा, आबा आमामसे पाइबा ताम आइयान्बा, गुण आम्राइबादेन परमेश्वरदा आतेन्बा, 3 ओच्छे दया आरेबा, ढिक्ना लबारी आखम्बा, तामगन लसी भ्रबा, ह्वाडसे ह्वाडदान तहरी आथान्बा, च्यामान लोइबा खबा, ज्यबा ताम सेम आनिबा, 4 धोका पिन्बा, तिगै वास्ता आलना मूर्ख गे लसी भ्रबा, डा ह्वाडबा खालै आरे भिसी भ्रबा, परमेश्वरदा ताङ्ना आलना मोजमजा लसी भ्रबा सेम लबा, 5 परमेश्वरदा तेन्बा स्होबा, तर परमेश्वरला शक्तिग्याम लबा गे चा आहिन भिबा चुह्वाड्बा म्हेगदेग्याम थारेड तसी चिउ।

6 तिगदा भिसम थेह्वाड्बा म्हेगदे न्हडला कोइ कोइ चा दिम दिमरी निसी पापी सेम थोबादेन पापसे नाइबा कमजोर म्रिडम्हेमेगदेदा ह्वाडला तहरी थान्मुला। 7 थे म्रिडम्हेमेगदेसे सदन लोष्वारी मी म्हाइमुला, तर सत्य ताम तिग हिन्ना भिसी खाइमै आसेमुला। 8 यान्नेसदेन याम्ब्रेससे मोशादा बिरोध लबा ह्वाडनोन चु म्हेगदेसे सत्य तामला बिरोध लमुला। चुह्वाड्बा म्हेगदेला बुद्धि न्होइबा मुला, ओच्छे विश्वास लबा स्होसी भ्रमुला। 9 तर दाहेन्से थेनीगदे ल्हानान आट, तिगदा भिसम थेनीगदे गाते मूर्ख चीम भिबा ताम जम्मासेन म्हाइला। ओच्छे यान्नेसदेन याम्ब्रेसदा खाह्वाड् तमुबा थेनीगदेदाएनोन थेह्वाड्बा तला।

पावलसे तिमोथीदा कुल्बा ताम

10 तर डाइ लोष्वा ताम, डाला बानीबेहोर, डाइ लबारी छ्याइबा गे, डाला विश्वास, डाइ दुख नाखम्बा, डाला मायादेन डा विश्वासरी गाते कोइसी चिबा मुला भिबा ताम एसेन म्हाइबा मुला। 11 ओच्छे डादा म्हेगदेसे पिन्बा दुखदेन डाइ नाबा दुख एसे म्हाइबा मुला। एन्टिओखिया, आइकोनियनदेन लुस्त्रा भिबा ग्लारी डाइ गाते ल्हाना दुख नाजी। तसैनोन थे जम्मान दुखग्याम प्रभुसे डादा जोगब लजी। ††12 पाइनोन तो:मा ख्रीष्ट येशूदा सेमहेन्सेन तेन्सी थेदेन छ्याम भ्रबागदे जम्मादान म्हेगदेसे दुख मी पिन्नोन पिन्ना। 13 तर पापी सेम थोबा म्हेगदे स्य्हान्दोदा ठगब लबारी म्हाइमा थेनीगदे ह्वाडनोन

†† 2:19 गन्ती १६:५ † 3:8 प्रस्था ७:११ † 3:11 मुल १३:१४-५२; १४:१-७, ८-२०

झन झन न्होड्डी नीला। ओच्छे स्थान्दोदा धोका पिन्बागदे ह्राडसेन धोका याड्डीला। ¹⁴ तसेनोन ए चा ह्राडसे लोप्या चु तामरी विश्वास लसी कोड्डी चिउ। तिगदा भिसम चु ताम खाल खालग्याम लोप्यी भिबा एदा थानोन मुला। ¹⁵ एदा जजाहेन्सेन परमेश्वरला बचन था मुला। थे बचनसे ख्रीष्ट येशूदा लबा विश्वासग्याम थार्बा याड्डीबाला लागिरी एदा ज्ञान बुद्धि पिन्खम्ला। ¹⁶ चु बचनरी भिबा जम्मान ताम चा परमेश्वरला आत्माग्यामनोन खबा हिन्ना। तिगदा भिसम सत्य ताम लोप्यारी, आतोःबा तामला दोष उन्बारी, गल्ली तामगदेदा सोज्यब लबारी ओच्छे परमेश्वरसे म्हन्बा अन्धार भ्रबा लोप्यारी खमौ भिसी हिन्ना। ¹⁷ थेह्ण्ड लसीन परमेश्वरला म्हिगदेसे जम्मान ज्यबा गेगदे लबारी खमौ भिसीन परमेश्वरला बचन पिन्बा हिन्ना।

4 ख्रीष्ट येशू ग्ले दोसी फेख्खमा सिबादेन सोबा जम्मालान निसाफ लला। थेतबासेलमा परमेश्वरदेन येशू ख्रीष्टला डाच्छापट्टि डाइ एदा चु ताम कुल्ला। ² धुइ मुसै आरेसै ए खाइमादमान बचन थेःना लबारी तयार तउ, म्हिगदेदा अर्ती पिन्गो, बड्गो, आँट पिन्गो, ओच्छे दुख तसै सेम नाबारीदेन लोप्यारी थाखलागो। ³ तिगदा भिसम चुह्ण्डबा धुइएनोन खबान मुला, जमा धुइरी म्हिगदेसे सत्य ताम ड्यान्बा खलाला, थेनीगदे ह्राडला सेमसे तिग म्हन्बा थेनोन अन्धार जे भ्रला। थेह्ण्ड लसीन थेनीगदेसे ह्राडदा सेम निबा ताम लोप्या म्हिगदेदा जे ड्योडला। ⁴ ओच्छे थेनीगदेसे सत्य ताम ड्यान्बारी खलासी म्हिसे म्हन्सी पाड्डीबा कथागदे चा ड्यान्सी भ्रला। ⁵ तर एसे ह्राडसे ह्राडदान जम्मान तामरी तहरी थान्गो, ओच्छे जस्तोन दुख तसै नासी थार्बा पिन्बा समाचार थेःना लबा गे लउ। थेह्ण्ड लसीन एसे परमेश्वरदा तेन्बा गे पूरा लउ।

⁶ डाइ चा डाला ल्हुइ परमेश्वरला डाच्छा बलि फुल्सी एनीगदेग्याम फेबारी छ्याड्डीबा मुला। ⁷ डाइ दुख नासी लतोःबा जम्मान गे लसी जिन्बा मुला। ओच्छे डाइ विश्वासदा जोगब लसी थान्बा मुला। ⁸ परमेश्वरदा सेम निबा म्हि हिन्ना भिसी उन्बा मुकुट याड्डीबारी जे बाँकी मुला। थे मुकुट ठीक निसाफ लबा प्रभुसेन थे धिनकुनु डादा कूसी पिन्ना। चु मुकुट डादा जे आहिन, तर थे दोःसी फेख्खला भिसी थेदा माया लसी थेला ग्याम च्यासी चिबागदे जम्मानान पिन्ना।

⁹ ए खम्तेधोना डादा हुप तबारी योनान खउ। ¹⁰ तिगदा भिसम डेमाससे जम्बुलिडरी मुबा स्हेगदेदा माया लसी डादा खलासी थेसलोनिकेरी निजी। ओच्छे क्रेसेन्स चा गलातियारी, तीतस चा दलमातियारी निजी। ¹¹ लूका जे

† 4:10 कल ४:१४; फिले २४; २ कोर ८:२३; गला २:३; तीत १:४

डादेन छ्याम मुला। ओच्छे मर्कूसदा म्हाइसी एदेन छ्यामनोन भसी खउ। तिगदा भिसम थेसे डादा ज्यना लसी ह्यो लमुला। ¹² डाइ तुखिकसदा चा एफिससरी पुड्डीबा मुला। ¹³ ए खबा धुइरी त्रोआसरी डाइ कार्पस मुबा ग्लारी खलासी थान्बा घदेन किताबगदे, ओच्छे ठिरी भिबा परमेश्वरला बचन आम्लेःना भसी खउ। †

¹⁴ स्हाड्डीबोला ताड स्होबा अलेक्जेन्डरसे डादा ल्हानान दुख पिन्जी। थेसे लबा गे अन्धार प्रभुसेन थेदा खी किन्ना। ¹⁵ थे म्हि म्हाड्डीसी एएनोन होशियार तसी चिउ। तिगदा भिसम म्हाड्डीसे थार्बा पिन्बा समाचार थेःना लमा थेसे डन्दा ल्हानान बिरोध लजी।

¹⁶ डाच्छा डादा मुद्दा तमा डाला लागिरी खालैसेन तिगै ताम पाड्डीसी आपिन्नी, तर जम्मानेन डादा खलासी निजी। चु तामला दोष थेनीगदेदा थातगै। ¹⁷ तर प्रभु डादेन छ्याम तसी डादा भड पिन्जी। थेतबासेलमा डाइ अर्गु खुलला म्हिगदेदा थार्बा पिन्बा समाचार ज्यना लसी थेःना लखम्जी। चुह्ण्ड लसी परमेश्वरसे डादा सिबाग्याम जोगब लजी। ¹⁸ हिन्ना, अझ प्रभुसेन डादा जम्मान आज्यबा तामग्याम जोगब लला, ओच्छे प्रभुसेन डादा जोगब लसी थेला खुल्सारी भोर्ला। थेला सदन मानदेन जयजयकार तगै। आमेलन।

चिठीला थुमरी भिबा ताम

¹⁹ प्रिस्किलादेन थेला हेम्बो अकिलासदा ओच्छे ओनेसिफरसला म्हेमेदा प्याफुल्बा मुला भिसी पाड्डीसी पिन्गो। ²⁰ इरास्तस कोरिन्थरीन चिबा मुला, तर त्रोफिमस चा आखम्बासे लमा डाइ थेदा मिलेटसरीन खलाजी। ²¹ ए खम्तेधोना सेर्ख खबा भन्दा डाच्छान खबारी भड लउ, एदा युबुलससे प्याफुल्ला भिसी पाड्डीबा मुला, ओच्छे पुडेस, लिनस, क्लौडियादेन जम्मान आलेगदेसेनोन प्याफुल्ला भिसी पाड्डीबा मुला।

²² प्रभु एला आत्मादेन छ्याम तगै। ओच्छे एदेन छ्याम प्रभुला दयामाया तगै।

† 4:11 कल ४:१४; फिले २४; मुल १२:१२, २५; १३:१३; १५:३७-३९; कल ४:१०
‡ 4:12 मुल २०:४; एफि ६:२१-२२; कल ४:७-८ †† 4:13 मुल २०:६ ††† 4:14
‡ तिमो १:२०; भजन ६२:१२; रोमी २:६ ††† “सिबाग्याम जोगब लजी” भिबादा ग्रीक
बाइबलरी च्यान्ना सुडग्याम जोगब तजी भिसी भिबा मुला। †††† 4:19 मुल १८:२; २ तिमो
१:१६-१७ § 4:20 मुल १९:२२; रोमी १६:२३; मुल २०:४; २१:२९

चु चिठीला बारेरी पाडतो:मा

मुल चेला पावलसे भिबा मुबा (तीतस १:१)।

कोरिन्थ शहररी भिबा मुबा।

ओस्पन ईश्वी संवत् ६३-६५ (विक्रम संवत् १२०-१२२) सालला गुडरी भिबा मुबा।

तीतस भिबा म्हिदा भिबा मुबा।

तीतस चा अर्गु खुलला म्हि मुबा। थेसे थार्बा पिन्बा समाचार थे:ना लबा गेरी पावलदा हो लमुबा। पावलसे क्रेट भिबा शहरला मण्डलीदा च्याबाला लागिरी तीतसदा थे शहररीन थान्जी। चु चिठीरी गोर सोम मुल तामगदे भिबा मुला। जम्मान भन्दा डाच्छाला ताम चा क्रेटला ल्हानान म्हिगदेसे नइबा गे लबासे लमा पावलसे तीतसदा मण्डलीदा च्याबा म्हिगदेला बानीबेहोर खाहइबा ततो:ला भिसी घोना लबा मुला। अर्गु ताम चा मण्डलीरी मुबा खेप्बा खुइ दोबागदेदेन भ्योनगदे ओच्छे नोकरगदेदा खाहइ लसी लोप्बा भिसी घोना लबा मुला। अर्गु ताम चा पावलसे तीतसदा तिगै तामरी ईख आथान्ना, छेबा बइबा आलना, मण्डली न्हडरी फेना लबा तामग्याम जोगब तउ ओच्छे सोजो तसी जम्मानदेन छ्याम ढिक्सी ख्रीष्टियान बानीबेहोर अन्धार भ्रतो:ला भिसी सल्लाह पिन्बा मुला।

मुल तामगदे

प्याफुल्बा १:१-४

मण्डलीदा च्याबा म्हिदा बारेरी लोप्बा तामगदे १:५-१५

मण्डलीरी मुबा जम्मान समूहगदेसे लतो:बा गे २:१-१५

सल्लाह पिन्बादेन होशियार तना लबा ३:१-११

चिठीला थुमरी पाड्बा तामगदे ३:१२-१५

पावलसे तीतसदा भिबा चिठी

१ लास्सो डा परमेश्वरला गे लबादेन येशू ख्रीष्टला मुल चेला पावलग्याम प्याफुल्ला! डादा परमेश्वरसे धम्बागदेला विश्वास ल्हेना लबादेन परमेश्वरदा खाहइ लसी तेन्बा भिबा सत्य ताम लोप्बारी धम्बा हिन्ना।^२ चु सत्य तामग्याम चा यहाडदा जुकजुकधोनाला जुनी याइला भिबा आश खमुला। ओच्छे खाइमै लुसीला ताम आपाड्बा परमेश्वरसे यहाडदा चु जुनी पिन्ना भिसी जम्बुलिड स्होबा भन्दा डाच्छान कबुल लसी जिन्बा मुबा।^३ ओच्छे प्रभु येशूसे ठीक धुइरी डादा चु ज्यबा समाचार उन्जी। चुनोन ज्यबा समाचार थे:ना लबारी यहाडदा थार्बा पिन्बा परमेश्वरसे कुल्बा अन्धार डादा जिम्मा पिन्जी।^४ विश्वास गिकनोन तबासे लमा डाला हाडलान झा दोबा तीतसदा परमेश्वर आबादेन यहाडदा थार्बा पिन्बा येशू ख्रीष्टग्याम दयामायानेन शान्ति तगै।

क्रेट भिबा यहुल्सारी तीतससे लबा गे

^५ डाड कुल्बा अन्धार थेरी बाँकी मुबा गेगदे जिन्ना लबारीदेन जम्मान ग्लारी मण्डलीदा च्याबा म्हिगदे धम्बाला लागिरी डाड एदा क्रेट भिबा ग्लारी थान्बा हिन्ना।^६ मण्डलीदा च्याबा म्हिगदे तिगै दोष आरेबादेन म्रिड गिक जे मुबा ततो:ला। ओच्छे थेला कोलागदेएनोन विश्वास लबा ततो:ला। आज्यबा बानीबेहोर थोबादेन कुल्बा ताम आइयान्बा तबारी आत।^७ तिगदा भिसम परमेश्वरला गे लबारी जिम्मा पिन्बा म्हि तबासे लमा मण्डलीदा च्याबा म्हि चा तिगै दोष आरेबा ततो:ला। थे हाडला सुरसे भ्रबा, योनान बोमो खबा, झि आइरक थुइसी इय्होइसी भ्रबा, छेबा बइबा लबा, धन सम्पत्तिरी लोभ लबा म्हि आहिन,^८ तर डोन्बोगदेदा मान लबा, ज्यबा तामरी जे सेम लबा, हाडसे

हाडदान तहरी थान्बा ततो:ला। ओच्छे परमेश्वरदा सेम निबा बानीबेहोर थोबादेन चोखो ओच्छे जस्तोन दुख तसैनोन नाखम्बा म्हि ततो:ला।^९ थेदा लोप्बा विश्वास लखम्बा बचनरी थे कोइसी चितो:ला। तिगदा भिसम थेसे घोबा सत्य ताम अन्धार थेसे स्हान्दोदा लोप्बारी खमौ। थेसे लोप्बा तामगदेदा बिरोध लबा म्हिगदेला गल्ली उन्खम्तो:ला।[†]

^{१०} तिगदा भिसम ल्हानान म्हिगदे स्हान्दोला ताम आइयान्बादेन आतो:बा ताम पाड्बा ओच्छे लुसीला ताम पाड्बा तमुला, इन खतना लबागदे^{††} थेहइबा तमुला।^{११} थेतबासेलमा थेनीगदेला सुड बन्द तना लतो:ला। तिगदा भिसम थेनीगदेसे हाडला फाइदाला लागिरी आतो:बा ताम लोप्सी जम्मान म्हेमेगदेला विश्वास न्होइना लबा मुला। चुहइबा ताम चा थेनीगदेसे लोप्बारी आतमुबा।^{१२} थेनीगदे न्हडला अगमवक्ता गिकसे “क्रेटला म्हिगदे सदन लुसीला ताम पाड्बादेन पशुला हइबा बानीबेहोर लबा ओच्छे ल्हाना चबा ब्लेगुगदे तला” भिसी पाड्बा।^{१३} चु ताम सत्य हिन्ना। थेतबासेलमा थेनीगदे विश्वासरी पाको म्हि दोगै भिसी थेनीगदेदा ल्हानान बइगो।^{१४} ओच्छे थेनीगदेसे सत्य तामदा खलाबा म्हिगदेसे कुल्बा तामदेन सेमरी म्हन्सी पाड्बा यहुदीगदेसे स्होसी पाड्बा कथारी सेम थालगै।

^{१५} चोखो सेम मुबा म्हिगदेला लागिरी जम्मान स्हे चोखो तला। तर चोखो सेम आरेबादेन ख्रीष्टदा विश्वास आलबा म्हिगदेला लागिरी चा तिगै स्हेनोन चोखो आत। तिगदा भिसम थेनीगदेला सेमदेन थेनीगदेसे म्हन्बा तामनोन चोखो आरे।^{१६} थेनीगदेसे परमेश्वरदा डोसेबा मुला भिसी मी पाड्मुला, तर थेनीगदेला गेग्याम चा आउन्मुला। ओच्छे थेनीगदे परमेश्वरला डाच्छा

† 1:9 १ तिमो ३:२-७ †† “खतना लबागदे” भिबा चा यहुदी ख्रीष्टियानगदे हिन्ना।

नइबादेन कुल्बा ताम आइयान्बा म्हिगदे तमुला। थेतबासेलमा थेनीगदे खजिबै ज्यबा गे लबाधोनाला आरे।

जजा म्हिहेन्से घ्रेन म्हिधोनादा लोप्बा ताम

2 तीतस, एसे चा म्हिगदेदा सत्य ताम अन्धार खाह्ण्ड लसी भ्रतोःला थे ताम जे लोपो। 2 खेप्बा म्हिगदेदा सेम नाबारी, जम्मानदेन छ्याम ठिक्बारी, ज्ञान बुद्धि थोसी चिबारी, ओच्छे विश्वासरी पाको दोबारी, माया लबारीदेन दुख तबा धुइरी नासी चिखम्तोःला भिसी लोपो।

3 चुह्ण्ड लसीन खुइ दोबा म्निडम्हेमेगदेसे परमेश्वरदा तेन्बा बानीबेहोर थोतोःला, स्थान्दोदा आतोःबा तामरी दोष थालउ, ओच्छे झि आइरक थुइसी इय्होइबारी आत भिसी लोपो। थेनीगदेसे जुन ताम ज्यबा मुला थे ताम लोप्तोःला। 4 खुइ दोबा म्निडम्हेमेगदेसे छामे म्निडम्हेमेगदेदा ह्राड ह्राडला हेम्बोदेन कोलागदेदा माया लबारी, 5 जम्मानदेन छ्याम ठिक्सी हेम्बोसे कुल्बा ताम इयान्बा, दिमनाम लखम्बादेन दया लबारी ओच्छे ह्राड ह्राडला हेम्बोला तहरी चिबारी थेनीगदेदा लोप्तोःला। चुह्ण्ड लजी भिसम परमेश्वरला बचनना हेला आत।

6 थेह्ण्ड लसीन भ्योन म्हिगदेदाएनोन ह्राडसे ह्राडदान तहरी थान्सी भ्रउ भिसी पाङ्गो। 7 एसे लबा जम्मान गेग्यामसेन एला ज्यबा बानीबेहोर उन्नो, ओच्छे ए होशियार तसी सत्य ताम लोपो। 8 लोप्बा धुइरी खालैसे थाबारी आखम्बा सत्यदेन ठीक ताम लोपो। थेह्ण्ड लजी भिसम य्हाडदा बिरोध लबागदेसे तिगै पाङ्आखम्बा थेनीगदे ह्राडनोन पेःला।

9 नोकरगदेदाएनोन ह्राड ह्राडला मालिकला तहरी चिसी जम्मान तामग्याम ह्राडला मालिकदा ताङ्ना लउ। ओच्छे ह्राडला मालिकदा सुड थादोःगो भिसी लोपो। 10 थेनीगदेसे तिगै य्हो थालगै। तर थेनीगदेसे लबा जम्मान गे ज्यबादेन पूरा विश्वासला तगै। थेह्ण्ड लसीन जम्मान तामरी थेनीगदेसे य्हाडदा थार्बा पिन्बा परमेश्वरला बारेरी लोप्बा तामदा अझ जेना लगै।

11 तिगदा भिसम परमेश्वरसे जम्मान म्हिदा थार्ना लबारी ह्राडला दयामाया उन्बा मुला। 12 थे दयामायासे य्हाडदा परमेश्वरदा तेन्आपुङ्बादेन जम्बुलिडला स्हेगदेथोरी लोभ लबा सेम ख्लापुङ्ला। ओच्छे चु जम्बुलिडरी ह्राडसे ह्राडदान तहरी थान्सी परमेश्वरदा सेम निबा बानीबेहोर थोबादेन परमेश्वरदा तेन्सी भ्रबारी लोप्बा मुला। 13 ओच्छे य्हाडदा थार्बा पिन्बा जम्मान भन्दा घ्रेन परमेश्वर येशू ख्रीष्ट घ्रेन य्हालदेन शक्तिरी दोःसी फेप्खबा धिनना य्हाडसे आश लसी चिबा मुला। 14 ख्रीष्टसे य्हाडला जम्मान पापला छे फासी थार्ना लबा मुला। ओच्छे ह्राडलान लागिरी ज्यबा गे लबारी इन्बा य्हुल गिकदा चोखो तना लबारी ह्राडलान ज्यान पिन्जी। †

15 एसे चु तामगदे पूरा अधिकार लसी लोपो, ओच्छे पाङ्बा ताम आइयान्नी भिसम थेनीगदेदा बङ्गो। एदा खालैसेन हेला थालगै।

ज्यबा गे जे लउ

3 शासन लबा म्हिगदेदेन सरकारी गे लबा म्हिगदेसे पाङ्बा ताम इयान्गो ओच्छे थेनीगदेसे कुल्बा ताम इयान्बारीदेन ज्यना लसी गे

† 2:14 भजन १३०:८; प्रस्था १९:५; व्यव ४:२०; ७:६; १४:२; १ पत्र २:९

लबारी विश्वासीगदेदा ढन्ना लसी पिन्गो। 2 ओच्छे थेनीगदेसे खालैला बिरोध लबादेन छेबा बङ्बा लसी थाभ्रगै। ओच्छे सोजो तसी जम्मान म्हिदेन छ्याम ज्यबा बानीबेहोर उन्नै।

3 तिगदा भिसम डाच्छा य्हाडएनोन मूर्ख, पाङ्बा ताम आइयान्बा, तिगै आघोबादेन आज्यबा म्हन्बा, मोजमजा लबा ओच्छे डाह लबा, पापी सेम थोबा, स्थान्दोसे हेला लबादेन गिकसे गिकदा हेला लबा मुबा। 4 तर य्हाडदा थार्बा पिन्बा परमेश्वरसे ह्राडला दयामाया उन्मा, 5 थेसे य्हाडदा थार्ना लबा य्हाडसे ज्यबा गे लसी आहिन, तर थेला दयासे हिन्ना। थेसे य्हाडदा परमेश्वरला आत्मासे खुसी दोःसी न्हा लसी छार जुनी पिन्बा मुला। 6 थार्बा पिन्बा येशू ख्रीष्टग्याम परमेश्वरसे य्हाडदा ताङ्सी ताङ्सी थेनोन आत्मासे प्लिङ्ना लजी। 7 तिगदा भिसम परमेश्वरला दयासे लमा य्हाड परमेश्वरदा सेम निबा म्हि दोजी। ओच्छे य्हाडसे आश लबा अन्धार जुकजुकधोनाला जुनी याङ्बा हक याङ्बा मुला। 8 चु ताम सत्य हिन्ना। थेतबासेलमा परमेश्वरदा विश्वास लबागदेसे ज्यबा गे लउ भिसी एसे थेनीगदेदा भड पिन्गो भिबा डाला सेम मुला। तिगदा भिसम म्हिगदेला लागिरी चु ताम ज्यबादेन गे खेल्बा मुला।

9 तर मूर्ख तामदेन ओन्माला ताम ओच्छे परमेश्वरसे मोशादा पिन्बा ठिमला बारेरी कल लबागदेदेन छेबा बङ्बा लबागदेग्याम थारेड चिउ। तिगदा भिसम थे य्हाडदा आतोःबादेन गे आखेल्बा ताम हिन्ना। 10 ओच्छे छेबा बङ्बा लसी फेबा म्हिदा तिरेम न्हीरेम सम्झब लउ, सम्झब लसै आइयान्नी भिसम थेदेन छ्याम संगतनोन थालउ। 11 एदा चु ताम थानोन मुला, चुह्ण्डला म्हिला इज्जत आरे। ओच्छे थेसे लबा पापग्यामसेन थेसे ह्राडला दोष ह्राडसेन उन्ना।

ढन्तोःबा ताम

12 डाइ अर्तिमासदा तसै तुखिकसदा तसै ए मुबा ग्लारी पुइखला। थे खमैछ्याम ए खम्तेधोना डादा हुप तबारी निकोपोलिस भिबा ग्लारी खउ। तिगदा भिसम डाइ सेर्ख भर थेरीन चिबा सेम लबा मुला। ††13 जेनास भिबा वकीलदेन अपोल्लोसदा ग्यामरी ह्यो लसी पिन्गो। तिगदा भिसम खम्तेधोना थेनीगदेदा तोःबा स्हे याङ्गै। ††14 य्हाडला म्हिगदेसे आरेनान आतबा स्हेगदे स्थान्दोदा पिन्बाला लागिरी सदन ज्यबा गे लबारी लोप्तोःला। थेह्ण्ड लजी भिसम थेनीगदेला जुनी खेरोरी आनि।

15 चुरी डादेन छ्याम मुबागदे जम्मानसेन एदा फ्याफुल्ला भिसी पाङ्बा मुला। इन्दा माया लबा थेरी मुबा जम्मान विश्वासीगदेदा डन्सेनोन फ्याफुल्बा मुला भिसी पाङ्गो।

एनीगदे जम्मानदेन छ्याम परमेश्वरला दयामाया तगै।

†† 3:12 मुल २०:४; एफि ६:२१-२२; कल ४:७-८; २ तिमो ४:१२ † 3:13 मुल १८:२४; १ कोर १६:१२

चु चिठीला बारेरी पाडतो:मा

मुल चेला पावलसे भिबा मुबा। चु चिठी भिबाला लागिरी तिमोथीसे हो लबा मुबा (फिलेमोन १:१)।

रोमला इयाल्खानग्याम भिबा मुबा।

ओस्पन ईश्वी संवत् ६०-६२ (विक्रम संवत् ११७-११९) सालला गुडरी भिबा मुबा।

फिलेमोन भिबा म्हिदा भिबा मुबा।

फिलेमोन जम्मासेन डोसेबा ख्रीष्टियान मुबा। थे कलस्सी शहररी मुबा मण्डलीला विश्वासी तखम्ला। थे ओनेसिमस भिबा नोकरला मालिक मुबा। ओनेसिमस हाडला मालिकला दिमग्याम यार्सी रोम शहररी निबा मुबा। थार्बा पिन्बा समाचार थे:ना लबासे लमा थे धुइरी पावल चा इयाल्खानरी परब तबा मुबा। थेसे पावलग्यामसेन थार्बा पिन्बा समाचार थे:सी प्रभु येशूदा विश्वास लबा मुबा। पावलसे ओनेसिमसदा फिलेमोन मुबा ग्लारी पुडबान मुबा। थेतबासेलमा ओनेसिमससे तिगै गे न्होइना लबा मुसै थेदा माफ लसी पिन्गो ओच्छे थेदा नोकरदा लबा ह्इबा व्यवहार आहिन, तर येशूदा विश्वास लबा आलेदा लबा ह्इबान व्यवहार लसी मान लउ भिसी फिलेमोनदा चु चिठी भिबा मुबा।

मुल तामगदे

प्याफुल्बा १-३

पावलसे फिलेमोनदा ज्यबा म्हि भिसी पाड्बा ४-७

ओनेसिमसला लागिरी बिन्ती लबा ८-२२

चिठीला थुमरी पाड्बा ताम २३-२५

पावलसे फिलेमोनदा भिबा चिठी

फिलेमोन भिबा म्हिदा पावलला चिठी

1 लास्सो, डा ख्रीष्ट येशूला लागिरी इयाल्खानरी मुबा पावलदेन व्हाडला आले तिमोथीग्याम, डन्ना सेम निबा हो डन्दा हो लबा फिलेमोनदेन 2 व्हाडला आडा अप्फिया ओच्छे डन्देन छ्याम टिक्सी गे लबा अर्खिप्सदेन एला दिमला मण्डलीदा प्याफुल्ला। 3 व्हाडला परमेश्वर आबादेन प्रभु येशू ख्रीष्टग्याम दयामायादेन शान्ति याड्गै।

पावलसे फिलेमोनना लागिरी प्रार्थना लबा

4 फिलेमोन आले, डाइ प्रार्थना लबा धुइरी एदा ढन्मा डाइ सदन डाला परमेश्वरदा धन्यवाद पिन्मुला। 5 तिगदा भिसम प्रभु येशूदा एसे लबा विश्वासदेन परमेश्वरला म्हिगदेदा एसे माया लबा मुला भिबा ताम थे:मुला। 6 एला विश्वाससे ख्रीष्टदेन छ्याम गिक तबा व्हाडला जम्मान ज्यबा तामगदे अझ घोबारी ज्ञान बुद्धि पिन्गै भिसी डाइ परमेश्वरदेन छ्याम प्रार्थना लमुला। 7 डाला आले, एला मायासे डा ल्हानान ताड्सी ऑट याड्बा मुला। तिगदा भिसम एसे लमा परमेश्वरला म्हिगदेला सेम दो:सी ताड्बा मुला।

पावलसे ओनेसिमसला लागिरी पाड्बा ताम

8 थेतबासेलमा एसे तिग लतो:ला भिसी ख्रीष्टसे पिन्बा अधिकारग्याम एदा कुलखम्बा ऑट मुला, 9 तर एला माया मुबासे लमा डाइ एदा चु बिन्ती लबा मुला, दान्दे डा खेष्बा दोसी जिन्बा पावल ख्रीष्ट येशूला लागिरी इयाल्खानरी मुला। 10 थेतबासेलमा प्रभुरी डाला झा ओनेसिमसला लागिरी डाइ एदा चु बिन्ती लबा मुला। इयाल्खानरी मुबा धुइरीन डा थेला आबा दोबा मुला।

11 डाच्छा ओनेसिमस † एला लागिरी गे आखेल्बा म्हि मुबा। तर दान्दे एदेन

डाला लागिरी थे गे खेल्बा म्हि तबा मुला। 12 थे डाला तिडला डोरा हिन्ना। तसैनोन डाइ थेदा ए मुबा ग्लारी दो:सी पुडखबा मुला। 13 थार्बा पिन्बा समाचारला लागिरी डा इयाल्खानरी मुबा धुइरी एला साटोरी थेसे डादा हो लबाला लागिरी थे चुरीन मुगै भिबा डाला सेम मुबा। 14 तर एदा आड्योइना डादा तिगै लइ आम्हन्नी। तिगदा भिसम डादा हो लबा करसे आहिन, तर एलान सुरसे लगै भिबा डाला सेम मुला।

15 ओनेसिमस तिगै धिनना लागिरी एग्याम फेसी चिमुबा। थेह्इ तबा चा थे सदन एदेन छ्यामनोन चिगै भिसीनोन मुला तला। 16 थेतबासेलमा दाहेन्से थे नोकर ह्इबा आहिन, तर नोकर भन्दा घेन हिन्ना। ओच्छे प्रभुरी सेम निबा डाला हाडलान आले हिन्ना, दान्दे मी झन एला लागिरी थे हाडलान आले हिन्ना।

17 थेतबासेलमा चुदे एसे डादा हाडलान टिक्का हो म्हन्मुला भिसम थेदाएनोन डादा ह्इन्ोन मान लउ। 18 चुदे थेसे एदा तिगै आज्यबा लसैनोन, अथवा थेसे तिगै फातो:बा मुसै थे डाला मिनरी थान्गो। 19 थे छे डाइनोन फासी पिन्ना भिबा ताम चा डा पावलसेन भिबा हिन्ना। ओच्छे एसेनोन प्रभुदा डोसेबा डाग्यामसेन हिन्ना भिबा ताम डाइ एदा पाड्आतो: तला।

20 थेतबासेलमा डाला आले, डादा प्रभुला लागिरी चु गे लसी पिन्गो। ख्रीष्टदेन छ्याम गिक तबासे लमा एसे डाला सेम दो:सी ताड्ना लउ।

21 डाइ पाड्बा भन्दा अझ एसे डाला लागिरी ल्हानान लला भिबा ताम डादा पूरा था तसी डाइ एदा चु भिबा मुला।

22 ओच्छे अर्गु ताम चा डाला लागिरीनोन कोठा गिक ठीक लसी थान्गो। तिगदा भिसम एला प्रार्थनासे लमा डाएनोन ए मुबा ग्लारी खम्याड्ला वा भिसी आश लबा मुला।

† “ओनेसिमस” भिबाला अर्थ चा गे खेल्बा हिन्ना।

चिठीला थुमरी पाड्बा ताम

²³ ख्रीष्ट येशूला लागिरी डादेन छ्यामनोन इयाल्खानरी चिबा इपाफ्राससे एदा पयाफुल्ला भिसी भिबा मुला। ²⁴ थेह्ण्ड् लसीन डादेन छ्याम ठिक्सी गे

लबा डाला ह्णोगदे मर्कुस, अरिस्तार्खसदेन डेमास ओच्छे लूकासेनोन पयाफुल्ला भिबा मुला।

²⁵ प्रभु येशू ख्रीष्टला दयामाया एनीगदेदेन छ्याम तगै।

चु चिठीला बारेरी पाडतो:मा

खालैदा था आरे। डाच्छा डाच्छा चु चिठी पावलसे भिबा हिन्ना भिसी बाइबल विद्वानगदेसे पाड्बा। तर दान्दे पावलसे भिबा आहिन भिसी बाइबल विद्वानगदेसे म्हन्मुला। थेनीगदे न्हडला कोइसे अपोल्लोससे, कोइसे बारनाबाससे, कोइसे लूकासे, कोइसे सिलाससे, कोइसे चा स्थान्दो म्हिसे भिबा हिन्ना भिसी म्हन्बा मुला। तर खाल्से भिजी भिबा ताम परमेश्वरदा बाहेक स्थान्दो खालैदान था आरे।

पक्का था आरे, तर कोइ कोइ बाइबल विद्वानगदेसे रोम शहरग्याम तखम्ला भिसी पाड्बा मुला।

ओस्पन ईश्वी संवत् ७० (विक्रम संवत् १२७) साल भन्दा डाच्छा भिबा मुबा।

येशूदा विश्वास लबा यहूदी म्हिगदेला समूहगदेदा भिबा मुबा।

येशूदा विश्वास लबा यहूदी म्हिगदेसे ल्हानान दुखदेन बिरोधला ताम नातो:बासे लमा येशूदा विश्वास लबा खलाला वा भिसी लोड्बा मुबा। थेतबासेलमा चु चिठी भिबा म्हिसे थेनीगदेदा आँट पिन्बाला लागिरी येशू ख्रीष्टनोन परमेश्वरला म्राड्बा रुप हिन्ना भिसी पाड्बा मुला। चु ताम घोना लबाला लागिरी चु चिठी भिबा म्हिसे गोर सोम सत्य तामग्याम चुहड् भिसी पाड्बा मुला।

(क) येशू परमेश्वरला जुकजुकधोनाला झा हिन्ना, थेसे जम्मान दुख नासी परमेश्वर आबासे कुल्बा जम्मान तामगदे सेमहेन्सेन खाहड् लसी इयान्तो:ला भिसी था याड्जी। येशू परमेश्वरला झा तबासे लमान डाच्छाला कबुलरी पाड्बा जम्मान अगमवक्तागदे, स्वर्गदूतदेन मोशा भन्दा घेन हिन्ना।

(ख) परमेश्वरला झा येशू ख्रीष्ट चा जुकजुकधोना परमेश्वरला मन्दिररी पूजा लबा मुल म्हि हिन्ना। थे चा डाच्छाला कबुलरी पाड्बा परमेश्वरला मन्दिररी पूजा लबा म्हि भन्दा घेन हिन्ना भिसी पाड्बा मुला।

(ग) येशू ख्रीष्टदा विश्वास लबा म्हिदा पापदेन लोड्बा खबा ताम ओच्छे कालग्याम जोगब लला। चु तामला चिनु यहूदी धर्मला रिमठिमदेन जन्तुगदेदा बलि पिन्बा तामगदेग्याम डाच्छान उन्सी जिन्बा मुबा।

चु चिठी भिबा म्हिसे ११ अध्यायरी चु चिठी पढब लबा म्हिगदेदा इस्राएली काइरनरी मिन भिसी थान्बा कोइ कोइ मिन चलब तबा म्हिगदेसे लबा विश्वासला बारेरी पाड्सी विश्वासरी सदन कोइसी चिउ भिसी बिन्ती लबा मुला। १२ अध्यायरी जस्तोन दुख तसैनोन आसितेधोना येशूदा जे च्यासी जम्मान ताम नागो, ओच्छे विश्वासरी कोइसी चिउ भिसी थेसे थेनीगदेदा पाड्बा मुला। चु चिठी चा सल्लाह पिन्बादेन होशियार तना लबा तामगदे भिबान थुम्ना लबा मुला।

मुल तामगदे

येशू ख्रीष्ट परमेश्वरला पक्का रुप हिन्ना १:१-३

स्वर्गदूतगदे भन्दा येशू ख्रीष्ट घेन हिन्ना १:४-२:१८

मोशादेन यहोशू भन्दा येशू ख्रीष्ट घेन हिन्ना ३:१-४-१३

येशू ख्रीष्ट परमेश्वरला मन्दिररी पूजा लबा जम्मान भन्दा घेन म्हि ४:१४-७:२८

येशू ख्रीष्टसे लबा घेन कबुल ८:१-९:२८

येशू ख्रीष्ट पापला सय फाबारी कुसरी सिबा १०:१-३०

विश्वास चा जम्मान भन्दा मुल ताम हिन्ना ११:१-१२:२९

परमेश्वरदा ताड्ना लतो:बा १३:१-१९

चिठीला थुमरी लबा प्रार्थना १३:२०-२१

चिठीला थुमरी पाड्बा ताम १३:२२-२५

हिब्रूगदेदा भिबा चिठी

येशू ख्रीष्ट परमेश्वरला झा

1 ओन्मा परमेश्वर अगमवक्तागदेग्याम य्हाडला आखे म्हेमेगदेदेन छ्याम ल्हानान थरीसे ल्हानान रेमधोना ताम लमुबा।² तर चु लिच्छाला धिनगदेरी परमेश्वर ह्हाडला झाग्याम य्हाडदेन छ्याम ताम लमुला। परमेश्वरसे ह्हाडला झा ख्रीष्टग्यामसेन जम्बुलिड स्होजी। ओच्छे जम्मान स्हेगदे ह्हाडलान स्होबारी थेदान धम्जी।³ परमेश्वरला घेन य्हालदेन शक्ति ख्रीष्टग्याम म्राड्बा मुला। परमेश्वरला रुप थेनोन हिन्ना। थेला शक्तिशाली बचनग्यामसेन मुदेन जम्बुलिडला जम्मान स्हेगदे छ्याबा मुला। ओच्छे म्हिदा

पापग्याम थार्ना लबा गे लसी जिन्माहेन्से थे स्वर्गरी शक्तिशाली परमेश्वरला दाहिने छ्यापट्टि मुल ठिरी धन्छ्याबा मुला।

ख्रीष्ट स्वर्गदूतगदे भन्दा घेन हिन्ना

4 ख्रीष्ट स्वर्गदूतगदे भन्दा ल्हानान घेन हिन्ना, थेहड् लसीन परमेश्वरसे स्वर्गदूतगदेला भन्दा थेला मिन ज्यबा थान्जी।

5 तिगदा भिसम परमेश्वरसे येशूदा बाहेक खाइमै खजिबै स्वर्गदूतगदेदा चुहड् भिसी सुड्बा आरे,
“ए डाला झा हिन्ना,

तिनी डा एला आबा दोबा मुला”

ओच्छे

“डा थेला आबा दोला,
थे डाला झा दोला।” †

6 परमेश्वरसे हाडला झादा जम्बुलिडरी पुइखबा धुइरी
“जम्मान स्वर्गदूतगदेसे थेदा तेनौ” भिसी दोःसीनोन सुइबा मुला।

7 परमेश्वरसे स्वर्गदूतगदेला बारेरी चुहइ भिसी सुइबा मुला,
“परमेश्वरसे हाडला स्वर्गदूतगदेदा लाबा स्होजी,
ओच्छे हाडला गे लबा म्हिगदेदा चा मेला ल्हाम स्होजी।” ††

8 तर परमेश्वरसे हाडला झाला बारेरी चुहइ भिसी सुइबा मुला,
“परमेश्वर हाडला यहुल्सा सदन चिला।
ओच्छे हाडसे ठीक लसी शासन लला। ‡

9 हाडदा ठीक ताम सेम निमुला, ओच्छे आज्यबा ताम चा च्यागेन
आम्हन्मुला।

थेतबासेलमा परमेश्वर, हाडला परमेश्वरसे हाडदा धम्बा मुला।

ओच्छे हाडला ह्मिगदेदा भन्दा ल्हाना मान लसी ताडना लबा मुला।” ††

10 परमेश्वरसे हाडला झादा दोःसी चुहइ भिसी सुइजी,
“प्रभु, हाडसेन शुरी जम्बुलिडला जग थान्जी।
ओच्छे हाडसे हाडलान छयासे मुदेन मुरी मुबा जम्मान स्हेगदे स्होजी। ††

11 थे जम्मान स्हेगदे नाश तला, तर हाड चा सदन चिला।

थे स्हेगदे क्वान हइ भोक्टो तसी निला। †††

12 थे स्हेगदेदा हाडसे क्वान हइ लसी रिल्ला,
ओच्छे थे स्हेगदे क्वान हइबा भोक्टो तसी निला ओच्छे पोला,
तर हाड चा खाइमै आपो।

ओच्छे हाड खाइमै म्हासी आनि।”

13 तर परमेश्वरसे येशूदा बाहेक खाइमै खजिबै स्वर्गदूतगदेदा चुहइ भिसी
सुइबा आरे,

“डाइ एला शत्रुगदेदा एला काड धिरी आथान्तेधोना
ए डाला दाहिने यापट्टि मुल ठिरी चिउ।” †††

14 थेतबासेलमा स्वर्गदूतगदे चा परमेश्वरदा तेन्बा आत्मा जे हिन्ना। ओच्छे
थारबा याइबा म्हिगदेदा हौ लबाला लागिरी परमेश्वरसे थेनीगदेदा पुइखबा
हिन्ना।

परमेश्वरसे येशू ख्रीष्टग्याम पिन्बा थारबादा थाम्लेःगो

2 थेतबासेलमा य्हाडसे जुन ताम थेःबा मुला थे तामरी झन ल्हाना सेम
लसी ड्यान्तोःला, आहिन्सम य्हाड थे तामग्याम थारेड तला।

2 स्वर्गदूतगदेसे य्हाडला आखे म्हेमेदा थेःना लबा परमेश्वरला बचनरी पक्का
अधिकार मुबा। थे ताम अन्धार आभ्रबा पाप लबा म्हिगदेदा परमेश्वरसे ठीक
सजाय पिन्जी। 3 थेतबासेलमा येशू ख्रीष्टसे पिन्बा चु घ्रेन थारबादा य्हाडसे
वास्ता आलनी भिसम झन य्हाड चा खाहइ लसी सजायग्याम स्योम्याइला?
चु थारबाला बारेरी डाच्छा प्रभुसेन थेःना लजी। ओच्छे प्रभुसे थेःना लबा ताम
थेःबा म्हिगदेसे चु ताम सत्य हिन्ना भिसी य्हाडदा घोना लजी।

4 परमेश्वरसेनोन चिनुगदे उन्सी, ल्हानान थरीला उदेकला गेदेन शक्तिशाली
गेगदे लसी, ओच्छे हाडसे म्हेन्बा अन्धार हाडला आत्माला मोलमगदे भो
लसी पिन्सी चु थारबा चा सत्य हिन्ना भिसी पक्का लजी।

य्हाडदा परमेश्वर मुबा ग्लारी भोर्बारी येशू म्हे दोःसी फेखबा

5 परमेश्वरसे स्वर्गदूतगदेदा य्हाडसे ताम लबा लिच्छाला धुइरी शासन लबा
अधिकार पिन्बा आरे। 6 परमेश्वरला बचनरी ग्ला गिकरी चुहइ भिसी म्हे
गिकसे भिबा मुला,

“म्हे जजा हिन्ना, तसैनोन हाडसे तिग्दा थेदा वास्ता लमुला?

ओच्छे म्हेला झा खाल हिन्ना, हाडसे तिग्दा थेला सुर्दा लमुला?”

† 1:5 भजन २:७; २ शमू ७:१४; १ इति १७:१३ †† 1:7 भजन १०४:४ †
1:8 भजन ४५:६ †† 1:9 भजन ४५:७ ††† 1:10 भजन १०२:२५ †††† 1:11
भजन १०२:२६; यशै ५१:६ †††† 1:13 भजन ११०:१ § चु भिबा चा स्वर्गदूतगदेदा
शासन लबारी आपिन्नी। तर येशूदा शासन लबा अधिकार पिन्जी भिबा हिन्ना।

7 हाडसे थेदा तिगे धिनना लागिरी स्वर्गदूतगदे भन्दा जजा स्होजी।

तसैनोन हाडसे थेदा स्थान्दोगदेसे ल्हानान मानदेन जयजयकार लबा मुकुट
कूसी पिन्जी।

8 ओच्छे हाडसे जम्मान स्हेगदेथोरी शासन लबा अधिकार थेदा पिन्बा
मुला।” ††

परमेश्वरसे जम्मान स्हे म्हेगदेला तहरी थान्मा थेला अधिकाररी आरेबा
स्हेगदे तिगैनोन आरेबा। तर दान्देला चु धुइरी य्हाड जम्मान स्हेगदे म्हेला
तहरी मुबा आम्राइमुला। 9 तर तिगे धिनना लागिरी स्वर्गदूतगदे भन्दा जजा
तबा येशूदा य्हाडसे प्राइबा मुला। परमेश्वरला दयामायासे लमा थे जम्मालान
लागिरी सिजी। थेहइ लसी सिबासे लमा थेदा ल्हानान मानदेन जयजयकार
लबा मुकुट कूसी पिन्जी।

10 परमेश्वरसे हाडला लागिरी जम्मान स्हे हाडसेन स्होबा मुबा। ओच्छे
हाडला कोलागदेदा हाडसे याइबा य्हालदेन शक्ति पिन्बाला लागिरी थारबा
पिन्बा येशूदा दुख नापुइसी पाको स्होबा चा परमेश्वरदा ज्यबा छोजी,

11 तिग्दा भिसम येशूसे पापग्याम फेसी चोखो तना लबा जम्मान म्हेगदेदेन
येशू परमेश्वरलान सन्तान हिन्ना। थेतबासेलमा थेनीगदेदा आले आडा भिसी
पाइबारी येशू आपेःमुला। 12 येशूसे परमेश्वरदा चुहइ भिसी सुइजी,
“डाइ डाला आले आडागदेला गुडरी हाडसे लबा गेला बारेरी पाइला,
ओच्छे मण्डलीला गुडरी डाइ हाडला जयजयकार लला।” †††

13 दोःसी येशूसे चुहइ भिसी सुइजी,

“डाइ परमेश्वरथोरीन भर लला।”

थेहइ लसी दोःसीनोन

“च्यागो, दान्दे डा परमेश्वरसे डादा पिन्बा चु कोलागदेदेन छ्यामनोन
मुला” भिसी सुइजी। ††

14 थे कोलागदेला ल्हुइ स्यादेन काला तबासे लमा येशूला ल्हुइएनोन
थेनीगदेला हइबान स्यादेन काला दोजी। ओच्छे म्हेदा नाश लबा शक्ति थोबा
शैतानदा नाश लबारी येशू हाडनोन सिजी। 15 ओच्छे सिला वा भिसी सदन
लोइसी चिबा म्हेगदेदा येशूसे लोइबाग्याम फेजी। 16 चुहइ लसी येशूसे
स्वर्गदूतगदेला लागिरी थेहइ लबा आहिन, तर अब्राहामला सन्तानना †††
लागिरी थेहइ लबा हिन्ना भिबा ताम य्हाडदा था मुला। †††† 17 थेतबासेलमा
म्हेगदेला पाप माफ लबाला लागिरी परमेश्वरसे पिन्बा गेरी भर तबादेन दया
मुबा परमेश्वरला मन्दिररी पूजा लबा मुल म्हे दोतोःला। थेहइबा म्हे दोबाला
लागिरी जम्मान तामरी येशू हाडलान आले आडागदे हइबान दोतोःबा मुबा।

18 शैतानसे फसब लबारी म्हाइमा येशू हाडसेन ल्हानान दुख नाजी।

थेतबासेलमा शैतानसे फसब लबारी म्हाइबागदे जम्मादान थेसे जोगब
लखम्ला।

येशू मोशा भन्दा घ्रेन हिन्ना

3 थेतबासेलमा परमेश्वरसे हाडलान म्हेगदे स्होबाला लागिरी धम्बा
ज्योज्यो आले नाना आडागदे, य्हाडसे परमेश्वरसे पुइखबा
परमेश्वरला मन्दिररी पूजा लबा मुल म्हे येशूदा च्यागे। 2 मोशा परमेश्वरला
म्हेगदेला गुडरी गे लबाला लागिरी भर तबा म्हे मुबा हइनोन येशूएनोन
हाडदा गे लपुइबा परमेश्वरला लागिरी भर तबा मुबा। ††† 3 दिमसे भन्दा दिम
स्होबा म्हेसे मान याइबा हइ लसी मोशासे भन्दा येशूसे झन ल्हाना मान
याइबा मुला। 4 खजिबै दिम खजिबै म्हेसे स्होबा तमुला। तर जम्मान स्हे
स्होबा चा परमेश्वरनोन हिन्ना। 5 मोशा चा परमेश्वरला म्हेगदेदा च्याबा
जम्मान तामरी भर तबा नोकर मुबा। थेसे परमेश्वरला म्हेगदेदा लिच्छा तिग
तला भिबा ताम पाइबा। 6 तर ख्रीष्ट चा दिमला भर तबा झा गिक हइबान
परमेश्वरला दिमरी अधिकार याइबा मुल झा हिन्ना। चुदे य्हाडसे लबा
आशथोरी पूरान भर लसी लिच्छाधोनान विश्वासरी कोइसी चिजी भिसम
य्हाडएनोन परमेश्वरला दिमला कोलागदे दोला।

§† 2:8 भजन ८:४-६ §†† 2:12 भजन २२:२२ §† 2:13 यशै ८:१७-१८
§†† “अब्राहामला सन्तान” भिबा चा परमेश्वरदा विश्वास लबा म्हेगदे हिन्ना। ††
2:16 गला ३:७; यशै ४१:८ §† 3:2 गन्ती १२:७

परमेश्वरला लिच्छा भ्रउ

7 थेतबासेलमा परमेश्वरला आत्मासे चुहड् भिसी सुड्बा मुला,
“तिनी एनीगदेसे परमेश्वरला काड थे:जी भिसम,
8 एनीगदेला आखे म्हेमेसे परमेश्वरला बिरोध लबा हड् लसी
एनीगदेसे हाडला सेम कोड्ना थालउ।
थेनीगदेसे तोडतोडबा ग्लारी परमेश्वरला सेम च्यासी परमेश्वरला बिरोध
लबा मुबा।

9 थेरी एनीगदेला आखे म्हेमेगदेसे बोगल न्ही दिडधोना डाइ लबा गे
म्राड्सीनोन

डाला सेम च्यासी डादा विश्वास आलनी।

10 थेतबासेलमा थेनीगदेदा म्राड्सी डादा बोमो रे:जी।

ओच्छे ‘चु म्हेगदेसे डादा विश्वास लबा खलाजी,
डाइ पाड्बा थेनीगदेसे आड्यान्नी’ भिसी डाइ भिजी।

11 डाइ बोमोला झोकरी थेनीगदेदा

‘डाइ स्होबा ब्लप्बा न्हा ग्लारी थेनीगदे खाइमै वाड्आम्याड्’ भिसी ग्रान
फाजी।” †

12 ज्योज्यो आले नाना आडागदे, होशियार तसी चिउ। एनीगदे न्हडरी
खालैनोन विश्वास आलबा पापी सेम थोसी छोन्बो परमेश्वरदा थाखलागो।

13 तर परमेश्वरला बचनरी “तिनी” भिबा धुड् मुतेधोना जम्मासेन गिकसेम
गिकदा सदन आँट पिन्सीन चिउ। आहिन्सम पापसे फसब लसी एनीगदे
न्हडरी खालैला सेम कोड्ना लला। 14 य्हाडसे शुररी लबा विश्वासरी य्हाड
सोतेधोना कोड्सी चिजी भिसम य्हाडसे ख्रीष्टग्याम याड्बा हक याड्ना।

15 बचनरी चुहड् भिसी भिबा मुला,

“तिनी एनीगदेसे परमेश्वरला काड थे:जी भिसम

बिरोध लबा धिनरी हड् लसी

एनीगदेसे हाडला सेम कोड्ना थालउ।” ††

16 परमेश्वरला काड थे:सीनोन थेदा बिरोध लबा म्हेगदे खाल मुबा? तिग
मोशासे मिश्र य्हुल्साग्याम फेसी भबा म्हेगदेन आहिन? हिन्ना। 17 खाल
म्राड्सी परमेश्वर बोगल न्ही दिडधोना बोमो खजी? तोडतोडबा ग्लारी सिबा
थे पाप लबा ओन्माला म्हेगदेदा म्राड्सी आहिन? हिन्ना। 18 परमेश्वरसे डाइ
स्होबा ब्लप्बा न्हा ग्लारी वाड्आम्याड् भिसी खाल्दा सुड्बा? परमेश्वरसे
कुल्बा ताम आड्यान्बा थेनोन म्हेगदेदा सुड्बा आहिन? हिन्ना।

19 थेतबासेलमा थेनीगदेसे विश्वास आलबासे लमा थेनीगदे ब्लप्बा न्हा
ग्लारी वाड्आम्याड्नी भिबा ताम य्हाडसे था याड्बा मुला।

परमेश्वरला म्हेगदेला लागिरी ब्लप्बा न्हा ग्ला

4 य्हाडदा ब्लप्बा न्हा ग्लारी वाड्पुड्ना भिसी परमेश्वरसे कबुल लबा
मुला। थेतबासेलमा य्हाड होशियार तसी चिड्, आहिन्सम एनीगदे
न्हडला खालै थे ब्लप्बा न्हा ग्लारी वाड्आम्याड्। 2 तिग्दा भिसम ओन्माला
म्हेगदेदा हड्न्नोन य्हाडदाएनोन थार्बा पिन्बा समाचार थे:ना लबा मुला। तर
थेनीगदेला लागिरी थे समाचार गे आखेल्बा तजी। तिग्दा भिसम थेनीगदेसे थे
समाचार सेमरी थान्सी विश्वास आलनी। 3 दाहेन्से य्हाड विश्वास लबागदे
चा थे ब्लप्बा न्हा ग्लारी वाड्म्याड्ना। परमेश्वरसे चुहड् भिसी सुड्बा
मुला,

“डाइ बोमोला झोकरी ‘थेनीगदेदा डाइ स्होबा ब्लप्बा न्हा ग्लारी
थेनीगदे खाइमै वाड्आम्याड्’ भिसी ग्रान फाजी।”

तसैनोन जम्बुलिड स्होमाहेन्सेन परमेश्वरसे लबा जम्मान गे पूरा तबान मुला।

‡ तिग्दा भिसम थेसे अर्गु ग्लारीनोन निसरेला बारैरी चुहड् भिसी सुड्बा
मुला,

“परमेश्वरसे जम्मान गे लसी जिन्माहेन्से निसरेमाकुनु ब्लप्बा न्हाजी।” ‡

5 दो:सी थेसे चु तामला बारैरी चुहड् भिसी सुड्बा मुला,

“डाइ ब्लप्बा न्हाबाला लागिरी स्होबा ग्लारी थेनीगदे खाइमै वाड्आम्याड्।”

‡

6 तसैनोन परमेश्वरसे स्होबा थे ब्लप्बा न्हा ग्लारी अड्न्न कोड् कोड् म्हे
वाड्म्याड्ना। ओच्छे डाच्छान थार्बा पिन्बा समाचार थे:सीनोन कुल्बा ताम
आड्यान्बा म्हेगदे चा थे ब्लप्बा न्हा ग्लारी वाड्आम्याड्नी। 7 थेतबासेलमा
परमेश्वरसे ब्लप्बा न्हा ग्लारी वाड्म्याड्ना लागिरी अर्गु धिन स्होजी। थे
धिन चा “तिनीला धिन” भिसी तोगब लजी। परमेश्वरसे ल्हानान दिड
लिच्छा दाऊद ग्लेग्याम चुहड् भिसी सुड्जी,

“तिनी एनीगदेसे परमेश्वरला काड थे:जी भिसम हाडला सेम कोड्ना
थालउ।” ‡‡

चु ताम डाइ डाच्छाएनोन पाड्सी जिन्बा मुबा।

8 चुदे यहोशूसे थेनीगदेदा ब्लप्बा न्हा ग्लारी धोना लबा हिन्सम
परमेश्वरसे थे अर्गु धिनना तामनोन आते:सेला मुबा। ‡‡‡ थेतबासेलमा
परमेश्वरसे निसरेकुनु ब्लप्बा न्हा हड् लसी परमेश्वरला म्हेगदेला
लागिरीनोन ब्लप्बा न्हा ग्ला स्होबा मुला। 10 परमेश्वरसे गे लसी जिन्माहेन्से
ब्लप्बा न्हा हड् लसी ब्लप्बा न्हा ग्लारी वाड्बा म्हेगदेसेनोन गे लसी
जिन्माहेन्से ब्लप्बा न्हा। 11 परमेश्वरसे कुल्बा ताम आड्यान्बासे लमा
ओन्माला म्हेगदे ब्लप्बा न्हा ग्लारी वाड्आम्याड्नी। तर य्हाड न्हडरी
खालैनोन थेहड् आतबाला लागिरी य्हाड जम्मासेन थे ब्लप्बा न्हा ग्लारी
वाड्बारी खन्तेधोना भड लड्।

12 परमेश्वरला छोन्बो बचन मी गे लसी चिबा शक्ति हिन्ना। चु न्हीलोनपट्टि
धार मुबा तरवार भन्दा छ्यार्बा मुला। चुसे म्हेला आत्मा, ल्हुड्, थेला जी
जीदेन नखुला टाडगदेन फेला ओच्छे म्हेला सेमला तामदेन लबारी म्हाड्बा
गे ठीक मुला कि आरे भिसी च्याला। 13 परमेश्वरसे म्राड्आखम्बा ताम
तिगैनोन आरे। थेला डाच्छा जम्मान ताम प्रस्टन मुला। य्हाडसे लबा जम्मान
गेला हिसाब थेदान उन्तो:ला।

परमेश्वरला मन्दिररी पूजा लबा मुल म्हेगदे न्हडरी येशू जम्मान भन्दा घेन
हिन्ना

14 थेतबासेलमा य्हाडसे लबा विश्वासरी अड्न्न य्हाड कोड्सी चिड्। तिग्दा
भिसम स्वर्गरी फेप्बा परमेश्वरला झा येशून परमेश्वरला मन्दिररी पूजा लबा
य्हाडला मुल म्हे हिन्ना। 15 परमेश्वरला मन्दिररी पूजा लबा मुल म्हेगदे
न्हडला घेन म्हे य्हाडला येशूदा य्हाडला जम्मान कमजोरीगदे था मुला।
तिग्दा भिसम थेदाएनोन य्हाडदा हड्न्नोन जम्मान तामरी फसब लबारी
म्हाड्जी। तर थेसे पाप चा आलनी। 16 थेतबासेलमा य्हाड आलोड्ना दया
लबा परमेश्वरला ठिला डाच्छापट्टि निड्। दुख तबा धुड्नी य्हाडसे थेरी थेला
दयामायाग्याम ह्यो याड्ना।

5 परमेश्वरला मन्दिररी पूजा लबा खजिबै मुल म्हे धम्मा म्हेगदे
न्हड्ग्यामनोन धम्मुला। म्हेगदेला साटोरी परमेश्वरदा फुल्लो:बा
पापला बलिदेन भेटी फुल्बाला लागिरी थेदा धम्बा हिन्ना। 2 थे मुल म्हेसे
आसेबा आघोबादेन ग्याम थोर्सी भ्रबागदेदा आछेर्ना ज्यना लसी घोना
लखम्मुला। तिग्दा भिसम थे हाडएनोन कमजोर म्हे हिन्ना। 3 थेतबासेलमा
स्य्हान्दो म्हेगदेला पापला लागिरी जे आहिन, तर थेसे हाडला पापला
लागिरीनोन बलि फुल्लो:मुला।

4 खालै म्हेसे हाडला सेमसे म्हाड्जी भिदेमा परमेश्वरला मन्दिररी पूजा
लबा मुल म्हेसे याड्बा मान आयाड्। तर परमेश्वरसेन थे मान याड्बा म्हे
स्होबारी धम्ला। थेहड् लसीन हारूनदाएनोन थेनोन परमेश्वरसे धम्जी।
‡‡ चुहड् लसी ख्रीष्टसेनोन हाडनोन परमेश्वरला मन्दिररी पूजा लबा मुल म्हे
दोबारी मान आम्हाड्नी। तर थेदा

“ए डाला झा हिन्ना,

डा तिनी एला आबा दोबा मुला”

भिसी सुड्बा परमेश्वरसेन धम्जी। ‡‡‡ ओच्छे परमेश्वरसे अर्गु ग्लारीनोन
चुहड् भिसी सुड्बा मुला,

† 3:11 भजन ९५:७-११ †† 3:15 भजन ९५:७-८ ‡ 4:3 भजन ९५:११
‡‡ 4:4 उत्प २:२

‡‡ 4:5 भजन ९५:११ ‡‡‡ 4:7 भजन ९५:७-८ ‡‡‡ मोशा सिमाहेन्से
इसाएलीगदेदा यहोशूसे कनान भिबा य्हुल्सारी भोर्बा गे लजी। § 5:4 प्रस्था २८:१ ‡
5:5 भजन २:७

“ए मल्कीसेदेक ह्इन्नोन

सदनना लागिरी परमेश्वरदा तेन्बा म्हि हिन्ना” †

7 येशू जम्बुलिडरी म्हि दोसी धन्छ्यामा ल्हानान क्रासी हाडदा सिबाग्याम सोना लखम्बा परमेश्वरदेन छ्याम प्रार्थना लजी। ओच्छे सोजो तसी कुल्बा ताम इयान्बासे लमा परमेश्वरसे थेला प्रार्थना सान्जी। 8 येशू परमेश्वरला झा तसीनोन हाडसे नाबा दुखग्याम परमेश्वरसे कुल्बा ताम इयान्बारी लोप्जी। 9 येशू जम्मान तामरी पाको तमाहेन्से थे हाडसे कुल्बा ताम इयान्बा जम्मान म्हिगदेला लागिरी जुकजुकधोना थार्बा पिन्बा मुहान दोजी। 10 ओच्छे परमेश्वरसेन थेदा मल्कीसेदेकदा ह्इन्नोन परमेश्वरदा तेन्बा मुल म्हि दोबारी धम्जी।

विश्वास थाखलागै भिसी होशियार तना लबा

11 चु तामला बारेरी एनीगदेदा डन्से पाडतो:बा ताम ल्हानान मुला। तर एनीगदेदा घोना लबारी गाहो तबा मुला। तिगदा भिसम एनीगदेसे योना आघोमुला। 12 तिनीधोना मी एनीगदे स्हान्दोदा लोप्खम्बा म्हि ततो:मुबा। तर एनीगदेदा मी अझ परमेश्वरला बारेरी जजाबा तामगदेएनोन स्हान्दो म्हिसे लोप्तो:बा मुला। थेतबासेलमा एनीगदे चबा स्हेला साटोरी अझ इहे थुड्बा कोलागदे ह्इबान मुला। 13 एनीगदे इहेला भररी जे सोबा कोलागदे ह्इबान म्हिसे चा ज्यबादेन नडबा तिग हिन्ना थे ताम था आत। 14 तर चबा स्हे चबा घेन म्हिसे चा धिन धिननोन हाडसे लबा गेग्याम ज्यबादेन नडबा तिग हिन्ना थे ताम था याडला।

6 थेह्इ भिसम यहाड ख्रीष्टला बारेरी डाच्छा लोप्बा तामगदे जे आतना अझ घेन घेन तामगदे लोप्बान पाको म्हि दोगे। अथवा नाश तना लबा गेगदे ख्लासी परमेश्वरपट्टि दो:बा तामदेन परमेश्वरदा विश्वास लबा ताम यहाडदा घरिघरि लोप्आतो:। 2 ओच्छे बत्तिस्माला बारेरी लोप्बा तामगदे, स्हान्दोथोरी या थान्सी प्रार्थना लबा तामगदे, सिबागदे दो:सी सोला भिबा तामगदेदेन जुकजुकधोनाला सजाय याडला भिबा तामगदेला बारेरीनोन एनीगदेदा दाहेन्से लोप्आतो:। 3 चुदे परमेश्वरसे सेम लजी भिसम यहाडसे घेन घेन तामएनोन लला।

4 तिग विश्वास ख्लासी निबागदेदा दो:सी भसी परमेश्वरपट्टि दो:पुड्बारी खम्ला? आखम। तिगदा भिसम जुन म्हिसे डाच्छा तिरेम परमेश्वरला यहाल याड्सी स्वर्गला मोलमदेन परमेश्वरला आत्माएनोन याड्बा मुला।

5 थेनीगदेसे परमेश्वरला बचनएनोन था याड्बा मुला ओच्छे खबा धुडला बारेरी परमेश्वरसे लबा शक्तिशाली गेगदेएनोन प्राड्सी जिन्बा मुला। 6 थे जम्मान ताम था तसीनोन विश्वास लबा ख्लासी न्होड्सी निबा म्हिगदेदा दो:सी हाड हाडला पाप ख्लासी परमेश्वरपट्टि दो:पुड्बारी खम्नोन आखम। तिगदा भिसम थेह्इबा म्हिगदेसे परमेश्वरला झादा दो:सीनोन कूसरी टाँगब लसी जम्मान म्हिला ओन्हाडरी येशूला बेडज्जत लला।

7 ल्हानान ह्इ नाम ताड्माहेन्से बु भम्सी खेती लबागदेसे द्बवा अन्न ल्हानान रोला। थेह्इबा बु वारीसे परमेश्वरग्याम मोलम याड्ला। †8 तर थे बुरी पुजु दोडगदे जे फुड्जी भिसम थे गे आखेल्बा तला। थेह्इबा बुदा परमेश्वरसे के:बारी छ्याडला। लिच्छा थे पुजु दोडगदे मेरी खाड्ला।

9 डाला सेम निबा ह्गोदे, डन्से चुह्इबा ताम लसैनोन एनीगदेला बारेरी चा ज्यबा ताम तला भिसी म्हन्बा मुला। ओच्छे थार्बा याड्सी एनीगदेसे ल्हानान ज्यबा स्हेगदे याड्ला। 10 परमेश्वरसे सदन ठीक निसाफ लमुला, ओच्छे एनीगदेसे परमेश्वरला म्हिगदेदा ह्गो लसी परमेश्वरदा माया उन्बा मुला। अझ एनीगदेसे थेह्इबा गे लबान मुला, चु ताम परमेश्वरसे खाड्मै आम्ले:।

11 एनीगदे जम्मासेन हाड हाडसे लबा आश पूरान याड्बाला लागिरी दुक्क तसी सोतेधोना भड लसी गे लला भिसी डन्से म्हन्बा मुला। 12 परमेश्वरसे पिन्ना भिसी कबुल लबा स्हेगदे याड्बाला लागिरी एनीगदे ब्लेगु थादोगै। ओच्छे विश्वास लसी जस्तोन दुख तसे नाबा म्हिगदे ह्इ तसी भ्रगै भिबा डन्ना सेम मुला।

परमेश्वरसे लबा कबुल

13 परमेश्वरसे यहाडला म्हेमे अब्राहामदा मोलम पिन्ना भिसी कबुल लमा हाड भन्दा घेन स्हान्दो खालै आरेबासे लमा परमेश्वरसे हाडलान मिनरी घान फासी चुह्इ भिसी सुड्जी, 14 “डाइ एदा मोलम पिन्नोन पिन्ना, ओच्छे एला सन्तान ल्हानान तला।” †15 परमेश्वरसे पिन्ना भिसी कबुल लबा मोलम आयाड्तेधोना अब्राहामसे भ्रान्सी चिबासे लमा थे मोलम याड्जी।

16 खालै म्हिसे तिगै ताम पक्का लतो:जी भिसम थेसे हाड भन्दा घेन्ना मिनरी घान फामुला, ओच्छे आढिक्का तामगदे घान फासी ढिक्का लमुला। 17 परमेश्वरसे पिन्ना भिसी कबुल लबा मोलम याड्बा म्हिगदेदा हाडसे लबा कबुल खाड्मै आपोमुला भिबा ताम उन्बा सेम लजी। थेतबासेलमा परमेश्वरसे घान फासी थे कबुल पक्का लजी। 18 परमेश्वरसे यहाडदेन छ्याम कबुलएनोन लबा मुला, घानएनोन फाबा मुला। चु ताम न्ही चा खाड्मै आपोमुला। ओच्छे परमेश्वरसे खाड्मै लुसीला ताम आलमुला। थेतबासेलमा जोगब तबाला लागिरी परमेश्वरला डाच्छा निबा यहाडसे घेन आँट याड्ला। ओच्छे यहाडसे यहाडला डाच्छापट्टि थान्सी पिन्बा आशएनोन याड्ला। 19 चु आश चा यहाडला आत्मादा जोगब लबा पक्का सत्य ताम हिन्ना। चुनोन आशग्याम यहाड परमेश्वर धन्छ्याबा ग्लाधोना धोला। 20 यहाडला लागिरी येशू यहाड भन्दा डाच्छान थे ग्लारी फेप्सी धन्छ्यासी जिन्बा मुला। ओच्छे येशू सदनना लागिरी परमेश्वरदा तेन्बा म्हि मल्कीसेदेक ह्इबान मुल म्हि दोबा मुला।

परमेश्वरदा तेन्बा मल्कीसेदेक

7 चु मल्कीसेदेक शालेम भिबा यहुल्साला ग्लेदेन जम्मान भन्दा घेन परमेश्वरदा तेन्बा म्हि मुबा। अब्राहाम गोर ब्लि ग्लेदेन लडाइ लसी ढासी दो:सी खबा धुडरी मल्कीसेदेकसे स्याप्सी मोलम पिन्जी। 2 अब्राहामसे ग्लेगदेदा ढासी भबा जम्मान स्हेगदेग्याम भो च्युडला भो गिक फेसी मल्कीसेदेकदा पिन्जी। मल्कीसेदेक भिबाला अर्थ गिक चा ठीक निसाफ लबा ग्ले हिन्ना। ओच्छे थे शालेम यहुल्साला ग्ले तबासे लमा मल्कीसेदेक भिबाला अर्गु अर्थ चा शान्तिला ग्ले हिन्ना। 3 मल्कीसेदेकला आबा आमादेन आखे म्हेमे खाल हिन्ना भिसी तिगै भ्रिसी थान्बा आरे। ओच्छे थे न्हबादेन सिबा तामला बारेरीनोन तिगै भ्रिसी थान्बा आरे। परमेश्वरला झा ह्इन्नोन थेएनोन सदनना लागिरी परमेश्वरदा तेन्बा म्हि दोजी।

4 मल्कीसेदेक गाते घेन म्हि मुबा भिबा ताम एनीगदेदा था तला। यहाडला म्हेमे अब्राहामसेनोन लडाइरी ढासी भबा जम्मान स्हेग्याम भो च्युडला भो गिक थेदा पिन्जी। 5 परमेश्वरला मन्दिररी पूजा लबा लेवी वंशला म्हिगदेएनोन अब्राहामलान सन्तान तसैनोन परमेश्वरसे मोशादा पिन्बा ठिम अन्धार हाडलान म्हिगदेग्याम भो च्युडला भो गिक किन्मुबा। 6 परमेश्वरदा तेन्बा मल्कीसेदेक लेवी वंशला आहिन। तसैनोन थेसे परमेश्वरला मन्दिररी पूजा लबा म्हिगदेला म्हेमे अब्राहामग्याम भो च्युडला भो गिक किन्जी। ओच्छे परमेश्वरसे लबा कबुलगदे याड्तो:बा अब्राहामदा थेसे मोलम पिन्जी। 7 घेन म्हिसे जजा म्हिदा मोलम पिन्ना भिबा ताम जम्मादान था मुला। 8 परमेश्वरला मन्दिररी पूजा लबा सिसी निबा म्हिगदेसे भो च्युडला भो गिक किन्जी। तर परमेश्वरदा तेन्बा खाड्मैनोन आसिबा मल्कीसेदेकसेनोन भो च्युडला भो गिक किन्बा मुबा। 9 लेवीगदेसे म्हिगदेग्याम भो च्युडला भो गिक किन्मुबा। तर चुह्इएनोन पाड्खम्ला, लेवीगदेला म्हेमे अब्राहामसे मल्कीसेदेकदा भो च्युडला भो गिक पिन्माहेन्से लेवीगदेसेनोन पिन्बा तला। 10 तिगदा भिसम मल्कीसेदेकसे अब्राहामदा स्याप्पा लेवी हाडला म्हेमे अब्राहामला लहुडरीन मुबा।

येशू मल्कीसेदेक ह्इबान हिन्ना

11 लेवी वंशला म्हिगदेसे परमेश्वरला मन्दिररी पूजा लबा गे याड्बा मुबा। थेतबासेलमा इस्त्राएलीगदेसे परमेश्वरग्याम ठिम याड्जी। तर परमेश्वरला मन्दिररी पूजा लबा लेवीला गे लबा ठिम अन्धार खालै म्हिदा तिगै दोष

आरेबा म्हि स्होबारी खम्बा हिन्सम हारूनना सन्तानना † साटोरी मल्कीसेदेक ह्वाडा परमेश्वरदा तेन्बा स्हान्दो म्हि तिगदा खतो:जी? 12 तिगदा भिसम परमेश्वरला मन्दिररी पूजा लबा मुल म्हि स्हान्दोन खाल्ला पोमाहेन्से ठिमएनोन पोतो:ला।

13 व्हाडला प्रभुला बारैरी चु तामगदे पाड्बा मुला, थे अर्गु वंशला हिन्ना। थेला वंशला खालैसेन परमेश्वरदा भेटी फुल्बा ग्लारी गे लबा आरे।

14 व्हाडला प्रभु मी यहूदाला वंशरी न्हाबा हिन्ना। यहूदाला वंशग्याम परमेश्वरला मन्दिररी पूजा लबा म्हि स्होबा तामला बारैरी मोशासे तिगैनोन पाड्बा आरे भिबा ताम जम्मादान था मुला।

15 मल्कीसेदेक ह्वाडान परमेश्वरदा तेन्बा स्हान्दो म्हि खसी जिन्बासे लमा दाहेन्से चु जम्मान ताम इन ज्यना लसी घोला। 16 थे व्हाडला आखे म्हेमेला ठिम अन्धार स्होबा परमेश्वरदा तेन्बा म्हि आहिन। तर खाडमै नाश आतबा जुनीला शक्तिग्याम स्होबा परमेश्वरदा तेन्बा म्हि हिन्ना। 17 तिगदा भिसम थेला बारैरी बचनरी चुह्वाड भिसी भिबा मुला, “मल्कीसेदेक ह्वाडोन ए सदनना लागिरी परमेश्वरदा तेन्बा म्हि हिन्ना।” ††18 तिगदा भिसम थे डाच्छाला ठिम चा तिगै लआखम्बादेन गे आखेल्बा तबासे लमा भ्याड्बा मुला। 19 तिगदा भिसम थे ठिमसे खजिबै सहेदा तिगै दोष आरेबा स्होआखम्नी। तर दाहेन्से इन व्हाडदा ज्यबा आश पिन्बा मुला। थे आशग्याम व्हाड परमेश्वरला डामरी धोखम्ला।

20 परमेश्वरसे व्हाडला ताम पक्का लबाला लागिरी ग्रान फासी चु छार ठिम शुरु लबा हिन्ना। चुह्वाड ग्रान चसी परमेश्वरसे पूजा लबा स्हान्दो खजिबै म्हिगदेदा धम्बा आरे, 21 तर येशू चा परमेश्वरसे ग्रान फासी परमेश्वरला मन्दिररी पूजा लबा म्हि स्होबा हिन्ना। थेला बारैरी बचनरी चुह्वाड भिसी भिबा मुला,

“परमप्रभुसे ग्रान फासी जिन्बा मुला,
थेसे व्हाडला सेम खाडमै आपो।

‘ए सदनना लागिरी परमेश्वरला मन्दिररी पूजा लबा म्हि हिन्ना।’”

22 परमेश्वरसे लबा ज्यबा कबुलला जिम्मा येशूसे किन्बा मुला।

23 ओच्छे अर्गु ताम चा डाच्छा परमेश्वरला मन्दिररी पूजा लबा म्हिगदे ल्हानान मुबा। तिगदा भिसम थेनीगदे सिसी निबासे लमा सदन व्हाडला गे लबारी आखम्मुबा। 24 तर येशू चा जुकजुकधोनान सोसी चिबासे लमा थे सदनना लागिरी परमेश्वरला मन्दिररी पूजा लबा म्हि दोबा मुला।

25 थेतबासेलमा येशूदा विश्वास लसी परमेश्वर मुबा ग्लारी खबा म्हिगदेदा थेसे सदनना लागिरी थार्ना लबारी खम्ला। तिगदा भिसम थेनीगदेला लागिरी परमेश्वरदेन छ्याम प्रार्थना लसी पिन्बारी येशू सदन सोसी चिला।

26 व्हाडदा तो:बा परमेश्वरदा तेन्बा मुल म्हि चुनोन येशू हिन्ना। थे पापनोन आलबादेन चोखो ओच्छे तिगै दोष आरेबा मुला। थेतबासेलमा परमेश्वरसे थेदा पापी म्हिगदेग्याम फेसी स्वर्गला जम्मान भन्दा मुल ठिरी धन्छ्यापुड्बा मुला। 27 परमेश्वरला मन्दिररी पूजा लबा अर्गु मुल म्हिगदेसे म्हिगदेला पाप माफ लबारी धिन धिननोन बलि फुल्लो:मुबा। तर येशूसे चा थेह्वाड लसी बलि फुल्लो:नी। तिगदा भिसम थे व्हाडनोन तिरेमरीन सदनना लागिरी बलि तसी जिन्बा मुला। 28 तिगदा भिसम मोशादा पिन्बा ठिम अन्धार कमजोर म्हिगदेदा परमेश्वरला मन्दिररी पूजा लबा मुल म्हि स्होबारी धम्जी। तर परमेश्वरला झा येशूदा थे ठिम भन्दा लिच्छा परमेश्वरसे व्हाडसे ग्रान फाबा अन्धार धम्बा मुला। ओच्छे सदनना लागिरी तिगै दोष आरेबा स्होबा मुला।

येशू परमेश्वरदा तेन्बा व्हाडला मुल म्हि हिन्ना

8 डन्से पाड्बा मुल तामएनोन चुनोन हिन्ना, व्हाडला जम्मान भन्दा ग्रेन परमेश्वरदा तेन्बा मुल म्हि स्वर्गरी परमेश्वरला दाहिनेपट्टि ठिरी धन्छ्याबा मुला। †2 येशू परमेश्वरदा तेन्बा मुल म्हि दोसी स्वर्गला जम्मान भन्दा चोखो ग्लारी गे लमुला। चु चोखो ग्लाम्हासे स्होबा आहिन, तर परमेश्वरसे स्होबा सत्य पाल हिन्ना।

3 परमेश्वरला मन्दिररी पूजा लबा जम्मान मुल म्हिगदे परमेश्वरदा भेटीदेन बलि फुल्बाला लागिरी धम्बा हिन्ना। थेतबासेलमा परमेश्वरदा तेन्बा व्हाडला मुल येशूसेनोन परमेश्वरदा तिगै सहे फुल्लोन तो:ला। 4 येशू चु जम्बुलिडरी मुबा हिन्सम खाडमै परमेश्वरदा तेन्बा म्हि आदोसेला मुबा। तिगदा भिसम मोशादा पिन्बा ठिम अन्धार भेटी फुल्बा परमेश्वरला मन्दिररी पूजा लबा लेवी वंशला म्हिगदे मी चुरी डाच्छाहेन्सेन मुबा। 5 थेनीगदेसे परमेश्वरला मन्दिररी पूजा लबा गे चा स्वर्गरी मुबा सत्य ताम व्हाड जे हिन्ना, तर स्वर्गरी मुबा सत्य तामनोन चा आहिन। मोशादाएनोन परमेश्वरसे थेह्वाडान लउ भिसी कुल्बा मुबा। मोशासे परमेश्वरदा तेन्बारी पाल स्होबारी छ्याडमा, “च्यागो, जम्मान ताम डाड एदा गडरी उन्बा व्हाडान स्होउ” भिसी कुल्बा मुबा। ††6 तर येशूसे परमेश्वरदा तेन्बा गे चा परमेश्वरला मन्दिररी पूजा लबा स्हान्दो मुल म्हिगदेला गे भन्दा इन ग्रेन मुला। थेह्वाड लसीन परमेश्वरदेन परमेश्वरला म्हिगदेला गुडरी येशूसे लबा छार कबुल थे पुरानो कबुल भन्दा ज्यबा मुला। तिगदा भिसम छार कबुलरी ल्हानान ज्यबा तामगदे मुला।

7 पुरानो कबुलरी तिगै दोष आरेबा हिन्सम थेला ग्लारी दो:सी अर्गु कबुल लनोन आतो:सेला मुबा। 8 तर परमेश्वरसे व्हाडला म्हिगदेसे लबा गल्ती था याड्सी चुह्वाड भिसी सुड्जी,

“परमप्रभुसे चुह्वाड भिसी सुड्बा मुला,
डाड इस्राएलला सन्तानदेन यहूदाला सन्तानदेन छ्याम
छार कबुल लबा धिन खबान मुला। ††

9 थे छार कबुल डाड थेनीगदेला आखे म्हेमेगदेदेन छ्याम लबा कबुल ह्वाड आत।

थे धुडरी डाड थेनीगदेदा यारी चुड्सी मिश्र यहुल्साग्याम फेसी भबा मुबा। परमप्रभुसे चुह्वाड भिसी सुड्बा मुला,
थेनीगदे डाड लबा कबुल अन्धार आभ्रनी।
थेतबासेलमा डाड थेनीगदेला वास्ता आलनी।

10 थे धिन खमाहेन्से डाड इस्राएलला सन्तानगदेदेन छ्याम छार कबुल लला,

डाड थे ठिम थेनीगदेला सेमरी भिसी थान्ना।

डा थेनीगदेला परमेश्वर दोला ओच्छे थेनीगदे डाला म्हि दोला।

11 ‘परमप्रभुदा डोसेगो’ भिसी दाहेन्से खालैसेन व्हाडला खिम्जेमदा, व्हाडला ज्योज्यो आले नाना आडादा लोप्आतो:।

तिगदा भिसम जजाहेन्से ग्रेनधोनाला जम्मासेन डादा डोसेला।

12 डाड थेनीगदेसे लबा नड्बा गेला दोष मेटब लला,

ओच्छे थेनीगदेसे लबा पाप डाड दो:सी खाडमै आढन।” †††

13 चु कबुलदा “छार” भिसी सुड्बासे लमान परमेश्वरसे डाच्छाला कबुलदा भोक्टो स्होजी। थे डाच्छाला कबुल चा भोक्टो तबासे लमा म्हासी निला।

परमेश्वरदा तेन्बाला लागिरी म्हिसे स्होबा चोखो ग्लाम्हा

9 पुरानो कबुलरी परमेश्वरदा तेन्बा ठिम मुबा। ओच्छे थे ठिमरी परमेश्वरदा तेन्बा चोखो ग्लाला बारैरीनोन भिबा मुबा। 2 थे पाल न्हडरी कोठा न्ही मुबा। डाच्छापट्टिला कोठादा चोखो ग्लाम्हा भिसी भिमुबा। थे कोठारी चा नाडसल थान्बा ग्लालेन टेबुल मुबा। थे टेबुलथोरी चा परमेश्वरदा फुल्बा गेडगदे मुबा। 3 थे कोठा भन्दा न्हडरी अर्गु पर्दा गिक मुबा। थे पर्दा न्हडला कोठादा चा जम्मान भन्दा चोखो ग्लाम्हा भिसी भिमुबा। †††4 थे कोठा न्हडरी म्हरला धूप ग्लालेन डाच्छाला कबुल थान्बा म्हरसे मोरब लबा चोखो सन्दोस मुबा। थे सन्दोस न्हडरी म्हरला ताडरी मन्नेन म्हेन्दो सार्बा हारूनना कडी ओच्छे परमेश्वरसे व्हाडला म्हिगदेदेन छ्याम लबा कबुल भिसी थान्बा युडबाला पाटीगदे मुबा। ††5 परमेश्वरला व्हालदेन शक्ति थेरी मुला भिसी उन्बाला लागिरी थे सन्दोसथोरी पाप माफ लबा ग्लारी भ्याप मुबा करूब भिबा स्वर्गदूत न्ही मुबा। थे ग्लाला थेन्नीला भ्याप्से घप्सी थान्बा मुबा। तर दान्देन डन्से चु ताम मेलीसेन पाड्बारी आखम। ††

† हारूनना सन्तान चा लेवीगदे हिन्ना। †† 7:17 भजन ११०:४ † 8:1 भजन ११०:१

†† 8:5 प्रस्था २५:४० †† 8:8 यर्मि ३१:३१-३४ ††† 8:12 यर्मि ३१:३१-३४ ††† 9:3 प्रस्था २६:३१-३३ § 9:4 प्रस्था ३०:१-६; २५:१०-१६; १६:३३; गन्ती १७:८-१०; व्यव १०:३-५ §† 9:5 प्रस्था २५:१८-२२

6 चु जम्मान स्हेगदे ठीक लसी जिन्माहेन्से परमेश्वरला मन्दिररी पूजा लबा म्हिगदे ह्राडसे लतोःबा गेगदे लबारी धिन धिननोन डाच्छापट्टिला चोखो ग्लारी निमुबा। 7 तर जम्मान भन्दा चोखो ग्लारी चा तिदिडरी तरेम परमेश्वरला मन्दिररी पूजा लबा मुल म्हि गिक बाहेक स्थान्दो खालै आनिमुबा। थेएनोन थेरी जन्तुला का आभोर्दे निआखम्मुबा। थे का थेसे ह्राडला पापदेन स्थान्दो म्हिगदेला पापला लागिरी फुल्मुबा। 8 चु जम्मान तामगदेग्याम डाच्छापट्टिला चोखो ग्ला मुतेधोना मन्दिर न्हडपट्टिला जम्मान भन्दा चोखो ग्लारी वाड्बा प्राप आठोड् भिबा ताम परमेश्वरला आत्मासे उन्बा मुला। 9 चु ताम चा दान्देला धुड गाते घ्रेन मुला भिसी उन्बा चिनु जे हिन्ना। चु तामग्याम परमेश्वरदा फुल्बा भेटीदेन बलिसे म्हिला सेम चोखो स्होबारी आखम भिसी उन्बा मुला। 10 थे स्हेगदे चा चबा थुड्बादेन म्हिदा चोख्याब लबा ल्हानान थरीला ठिम जे हिन्ना। थे ठिम चा परमेश्वरग्याम छार ठिम आखतेधोनाला लागिरी ल्हुड् चोखो तना लबा ठिम जे हिन्ना, सेम चोखो तना लबा ठिम आहिन।

ख्रीष्टला का

11 तर ख्रीष्ट चा परमेश्वरदा तेन्बा मुल म्हि दोसी दान्दे चुरी मुबा जम्मान ज्यबा स्हेगदे पिन्बाला लागिरी फेख्बा मुला। थे जम्मान भन्दा घ्रेनदेन चोखो ग्लारी फेप्जी। चु ग्ला चा जम्बुलिडला स्हेगदेग्याम म्हिसे स्होबा ग्ला आहिन। 12 ख्रीष्टसे बोगोदेन बहरला का भोर्सी आहिन, तर ह्राडलान का भोर्सी तरेमरीन यहाडदा जुकजुकधोना पापग्याम फेबाला लागिरी थे जम्मान भन्दा चोखो ग्लारी फेप्जी। 13 डाच्छाला ठिम अन्धार रा बोगोदेन बहरला का ओच्छे म्हे योमो खाड्बा मेफ्रा अशुद्ध तबा म्हिगदेदा स्वामा थेनीगदेला ल्हुड् चोखो तमुबा। 14 इन ख्रीष्टला काग्याम यहाड सोसी छोन्बो परमेश्वरदा तेन्नी भिसी यहाडदा सिना लबा गे लपुड्बा नडबा सेमदा चोखो स्होबा मुला। तिग्दा भिसम ख्रीष्ट खाड्मै नाश आतबा आत्माग्याम तिगै दोष आरेबा बलि दोसी ह्राडसे ह्राडदान परमेश्वरदा फुल्जी।

15 थेतबासेलमा परमेश्वरसे जुकजुकधोना चिबा मोलमगदे पिन्ना भिसी लबा कबुल ह्राडसे धम्बा म्हिगदेसे याड्गै भिसी छार कबुल ठिकना लबा चा ख्रीष्टनोन हिन्ना। तिग्दा भिसम डाच्छा लबा पुरानो कबुलला धुडरी म्हिगदेसे लबा पापगदेग्याम फेबाला लागिरीन ख्रीष्ट सिबा मुला।

16 अर्गु ताम चा खालै म्हिसे ह्राडला सम्पत्ति बकसपत्र भिसी पिन्बा ह्रड्बा हिन्ना, तिग्दा भिसम बकसपत्र लसी पिन्बा म्हि आसितेधोना थे बकसपत्रसे तिगै गे आल। 17 तिग्दा भिसम बकसपत्र भिसी पिन्बा म्हि सोतेधोना बकसपत्र याड्बा म्हिला तिगै अधिकार आत। थे बकसपत्र भिसी पिन्बा म्हि सिमाहेन्से जे बकसपत्र याड्बा म्हिला अधिकार तला। 18 थेतबासेलमा डाच्छा लबा पुरानो कबुलसेनोन का आरेतेधोना तिगै गे आलमुबा।

19 मोशासे परमेश्वरसे पिन्बा जम्मान ठिमगदे म्हिगदेदा पाड्सी जिन्माहेन्से क्युडरी बोगोदेन बहरला का दोड्सी हिसपला स्याउलादेन वाला ऊनसे म्हिगदेदेन परमेश्वरसे पिन्बा ठिमला किताबरी स्वामुबा। 20 ओच्छे थेसे चुहड् भिसी भिजी, “एनीगदेसे परमेश्वरसे कुल्बा ताम ड्यान्नी भिसी थेसे एनीगदेदेन छ्याम लबा कबुलदा पक्का लबा चा चुनोन का हिन्ना।”

21 थेहड् लसीन मोशासे परमेश्वरला मन्दिरला चोखो ग्लादेन पूजा लबारी चलब लबा जम्मान स्हेगदेरी थे का स्वाजी। 22 पाड्नोन तोःमा परमेश्वरसे मोशादा पिन्बा ठिम अन्धार जम्मान ह्रड्बा स्हेदा कासे चोखो तना लला, का बगब आततेधोना पापला दोष मेटब आत।

23 थे डाच्छाला ठिमला तामगदे स्वर्गरी मुबा स्हेगदे ह्रड्बा जे हिन्ना। थेहड्बा स्हेगदेदा मी चोखो स्होबारी ठिम तोःजी भिसम स्वर्गरी मुबा स्हेगदेदा चोखो स्होबारी इन ज्यबा बलि लतोःला। 24 थेतबासेलमा ख्रीष्ट म्हिसे स्होबा चोखो ग्लारी आफेप्जी। तिग्दा भिसम थे स्वर्गरी मुबा चोखो सत्य ग्ला ह्रड्बा जे हिन्ना। तर दान्दे थे परमेश्वरला डाच्छा यहाडला लागिरी ताम थान्बारी स्वर्गरी फेप्बा मुला। 25 डाच्छाला ठिम अन्धार परमेश्वरला मन्दिररी पूजा लबा मुल म्हि जन्तुला का भोर्सी दिडएदडसेन चोखो ग्लारी

नितोःबा मुबा। तर ख्रीष्ट चा ह्राडनोन बलि दोसी घरिघरि स्वर्गरी आफेप्जी।

26 चुदे सदन फेप्तोःबा हिन्सम जम्बुलिड छ्यामाहेन्सेन ख्रीष्टसे घरिघरि दुख नातोःसेला मुबा। तर जम्बुलिड नाश तबा धुडधोनाला लागिरी ख्रीष्ट तरेम फेख्सी सदनना लागिरी पापला दोष मेटब लबारी ह्राडनोन बलि तजी।

27 म्हि तरेम सिनोन तोःला, ओच्छे सिमाहेन्से परमेश्वरसे थेला निसाफ लला। 28 थेहड् लसीन ल्हानान म्हिला पापला दोष मेटब लबाला लागिरी ख्रीष्टएनोन तरेम जे बलि दोजी। ख्रीष्ट दोःसीनोन फेख्खला, ओच्छे थे धुडरी चा म्हिगदेला पापला दोष मेटब लबाला लागिरी आहिन, तर ताड्सी ताड्सी थेला ग्याम च्यासी चिबागदेदा थार्ना लबारी फेख्खला।

ख्रीष्ट सदनना लागिरी बलि तजी

10 परमेश्वरसे मोशादा पिन्बा ठिम चा लिच्छा खबा ज्यबा तामला चिनु जे हिन्ना। तर ख्रीष्टसे लबा ज्यबा तामनोन चा आहिन। तिग्दा भिसम डाच्छाला ठिम अन्धार दिडएदडसेन खाल गिकलान बलि फुल्मुबा। तर थे बलिसे चा परमेश्वर मुबा ग्लारी खबा म्हिगदेदा चोखो स्होबारी आखम। 2 बलि फुल्सी म्हिगदे चोखो तबा हिन्सम बलि फुल्बान आखलासेला मुबा। तिग्दा भिसम परमेश्वरदा तेन्बा म्हिगदे सदनना लागिरी चोखो तसेला मुबा। ओच्छे थेनीगदेसे पापी भिसी म्हन्आतोःसेला मुबा। 3 बरु थे दिडएदडसेन लबा बलिसे म्हिगदेदा ह्राडला पाप सदन ढन्ना जे लला। 4 तिग्दा भिसम बहरदेन रा बोगोदेला कासे खाड्मै पापला दोष मेटब लबारी आखम।

5 थेतबासेलमा जम्बुलिडरी फेख्खा धुडरी ख्रीष्टसे परमेश्वरदा चुहड् भिसी सुड्जी,

“ह्राडसे भेटीदेन बलिदान आम्हाइनी,

तर डाला लागिरी ह्राडसे ल्हुड् गिक स्होजी।

6 ह्राड मेरी खाड्सी फुल्बा बलिदेन पापला दोष मेटब तबाला लागिरी फुल्बा बलिगदेरीनोन आताइनी।’

7 जमाहेन्से डाड चुहड् भिसी भिजी,

‘स्हीगो परमेश्वर, डाला बारेरी बचनरी भिबा ह्रड्नोन

ह्राडसे म्हन्बा अन्धार पूरा लबारी डा खबा मुला।” #

8 ख्रीष्टसे डाच्छा चुहड् भिसी सुड्जी, “जन्तुगदेला बलिदेन अन्न बलिगदे ओच्छे बलि फुल्बा ग्लारी खाड्सी पिन्बा जन्तुला बलिदेन पाप मेटब तबाला लागिरी फुल्बा बलि किन्बारी ह्राड आताइनी।” चु जम्मान बलिगदे चा मोशादा पिन्बा ठिम अन्धार मुसैनोन चुहड् भिसी सुड्जी। 9 ओच्छे दोःसी ख्रीष्टसे चुहड् भिसी सुड्जी, “स्हीगो, ह्राडसे म्हन्बा ताम पूरा लबाला लागिरी डा खबा मुला।” लिच्छाला ठिमदा सदनना लागिरी थान्बारी ख्रीष्टसे डाच्छाला ठिमदा भ्याड्जी। 10 परमेश्वरसे म्हन्बा ताम पूरा लबारी येथू ख्रीष्टसे ह्राडलान ल्हुड् बलि फुल्जी। चुनोन बलिग्याम यहाडदा सदनना लागिरी चोखो स्होबा मुला।

11 परमेश्वरला मन्दिररी पूजा लबा जम्मान म्हिगदेसे डाच्छाला ठिम अन्धार सदन परमेश्वरला डाच्छा निसी घरिघरि खाल गिकलान बलि फुल्बा गे लमुला। तर थेहड्बा बलिसे खाड्मै पापला दोष मेटब आतमुला। 12 तर ख्रीष्टसे मी पापगदेला दोष सदनना लागिरी मेटब लबारी ह्राडलान ल्हुड्दा बलि गिक स्होसी फुल्जी। ओच्छे थे परमेश्वरला दाहिने छ्यापट्टि मुल ठिरी धन्छ्याजी। 13 परमेश्वरसे थेला शत्रुगदेदा थेला काड धिरी आथान्तेधोना थे थेरीन भ्रान्सी धन्छ्याला। 14 तिग्दा भिसम बलि गिकग्यामसेन थेसे चोखो स्होबा म्हिगदेदा सदनना लागिरी थेसे तिगै दोष आरेबा स्होबा मुला।

15 ओच्छे परमेश्वरला आत्मासेनोन चुला बारेरी यहाडदा चुहड् लसी उन्बा मुला,

16 “परमप्रभुसे चुहड् भिसी सुड्बा मुला,

लिच्छाला धिनरी थेनीगदेदेन छ्याम लबा छार कबुल चुनोन हिन्ना।

डाड थेनीगदेला सेमरी डाला ठिम भिसी थान्ना।” §

17 दोःसी परमप्रभुसे चुहड् भिसी सुड्बा मुला,

† 9:6 गन्ती १८:२-६ †† 9:7 लेवी १६:२-३४ † 9:19 प्रस्था २४:६-८; लेवी १४:४ † 9:21 लेवी ८:१५

‡ 10:7 भजन ४०:६-८ †† 10:11 प्रस्था २९:३८ ††† 10:12 भजन ११०:४ § 10:16 यर्मि ३१:३३

“दाहेन्से डाइ थेनीगदेसे लबा पापदेन आज्यबा गेगदे खाइमै आढन।” †
18 दाहेन्से थेनीगदेला जम्मान पाप माफ तबासे लमा दोःसी थेनीगदेला पापला लागिरी तिगै बलि फुलआतोः।

परमेश्वरला डाच्छापट्टि निउ

19 थेतबासेलमा ज्योज्यो आले नाना आडागदे, येशूला कासे लमा य्हाडसे जम्मान भन्दा चोखो ग्लारी निबा आँट याड्बा मुला। 20 येशूसे ह्हाडला ल्हुइ य्हाडला लागिरी बलि पिन्जी। ओच्छे पदाग्याम जम्मान भन्दा चोखो ग्लारी निबारी जुकजुकधोना सोबा छार ग्याम ठोड्सी पिन्बा मुला। 21 परमेश्वरला दिमरी जम्मान अधिकार याड्बा परमेश्वरदा तेन्बा य्हाडला मुल म्हि गिक मुला। 22 दाहेन्से य्हाड आज्यबा म्हन्बा तामग्याम चोखो तबादेन चोखो क्युइसे खूसी धाबा ल्हुइ थोसी ज्यबा सेमदेन पूरा विश्वास लसी परमेश्वरला डामरी निइ। †23 य्हाडसे लबा आशरी य्हाड याडयोड आतना कोड्सी चिइ। तिगदा भिसम ह्हाडसे पिन्ना भिसी कबुल लबा परमेश्वर चा विश्वास लखम्बा परमेश्वर हिन्ना। 24 य्हाडसे गिकसेम गिकदा माया लबादेन ज्यबा गे लबाला लागिरी आँट खबा खाल्ला ताम जे लइ। 25 कोइ कोइ म्हिंला संगतीरी आनिबा बानी मुला। तर य्हाड चा संगतीरी निबा आखलागे। बरु प्रभु दोःसी फेप्खबा धिन खबारी छ्याइबा मुला भिबा ताम घोसी गिकसेम गिकदा इन आँट पिन्ने।

26 तिगदा भिसम सत्य ताम था याड्सीनोन चुदे दोःसी पाप लबाला लबान लजी भिसम य्हाडसे लबा पापला दोष मेटब लबारी अर्गु खजिबै बलिदान आरे। 27 तर थेह्हाड्बा पाप लबागदे चा परमेश्वरला शत्रुगदेदा नाश लबा ल्हानान घेन मेदेन परमेश्वरसे पिन्बा लोड्बा खबा सजाय भ्रान्सी चितोःबा जे मुला। †28 चुदे खालै म्हिसे परमेश्वरसे मोशादा पिन्बा ठिम आड्यान्ना भ्रबा ताम म्हि न्ही सोमसे म्हाड्सी पाड्जी भिसम थे ठिम आड्यान्ना म्हिदा तिगै दया आउन्ना साइतोःबा मुबा। †29 थेह्हाड् भिसम परमेश्वरला झादा बिरोध लबा म्हिसे इन गाते ल्हाना सजाय याड्ला। तिगदा भिसम थेसे ह्हाडदा पापग्याम फेसी चोखो तना लबादेन परमेश्वरसे लबा कबुलदा पूरा लबा ख्रीष्टला कादा गे आखेल्बा स्हे स्होबा मुला, ओच्छे दयामाया पिन्बा परमेश्वरला आत्मादा बिरोध लबा मुला। †30 तर चुह्हाड् भिसी सुड्बा परमेश्वरदा य्हाडसे डोसेबा मुला, “बदला किन्बा गे डाला हिन्ना, डाइ थेनीगदेसे लबा गे अन्धारला सजाय पिन्ना”। ओच्छे दोःसी, “परमप्रभुसे ह्हाडला म्हिगदेला ठीक निसाफ लला” भिसीएनोन सुड्बा मुबा। †31 पाप गे लबागदे छोन्बो परमेश्वरला छ्यारी परब तबा चा लोड्बा खबा ताम हिन्ना।

32 एनीगदेसे येशू ख्रीष्टला बारेरी लोप्बा डाच्छाला धिनगदेदा थाम्लेःगो। जमा धुइरी एनीगदेसे ल्हानान दुख नातोःसै विश्वासरी कोड्सी चिबा मुबा। 33 खाइमाम एनीगदेसे जम्मान म्हिंला ओन्छाडरी दुखदेन हेला नाजी। ओच्छे खाइमाम एनीगदेसे दुखरी परब तबागदेदा ह्यो लजी। 34 एनीगदेसे इयाल्खानरी परब तबागदेदा ह्यो लजी। ओच्छे ह्हाडदेन छ्याम मुबा जम्मान धन सम्पत्ति ब्यन्माएनोन एनीगदेसे ताड्सी ताड्सी नाजी। तिगदा भिसम जुकजुकधोना चिबा अझ घेन सम्पत्ति ह्हाडदेन छ्याम मुला भिबा ताम एनीगदेदा था मुबा।

35 थेतबासेलमा एनीगदेसे विश्वासग्याम जुन आँट याड्बा मुला थे थाखलागो। चुग्यामसेन एनीगदेसे घेन इनाम याड्ला। 36 परमेश्वरदा सेम निबा गे लबादीदेन परमेश्वरसे पिन्ना भिसी कबुल लबा तामगदे याड्बाला लागिरी भ्रान्सी चितोःबा मुला। 37 तिगदा भिसम बचनरी चुह्हाड् भिसी भिबा मुला,

“दाहेन्से फेप्खबा चा फेप्खनोन खला,
थेसे घइना आल। ††

38 तर डाइ म्हन्बा अन्धार भ्रबा डाला म्हिगदे चा विश्वासग्याम सोला,
ओच्छे चुदे थेनीगदे न्हडला खालैसे विश्वास लबा खलाजी भिसम
थे म्हाड्सी डा आताइ।”

39 य्हाड चा विश्वास लबा खलासी नाश तबा म्हिगदे न्हडला आहिन, तर विश्वास लसी थाबा याड्बा म्हिगदे न्हडला हिन्ना।

विश्वास

11 विश्वास लबा चा आश लबा ताम याड्ला भिसी दुक्क तबादेन आम्राड्बा तामरी पूरान भर लबा हिन्ना। 2 तिगदा भिसम थेनीगदेसे विश्वास लबासे लमान ओन्माला म्हिगदेदा परमेश्वरसे ह्हाडला म्हि स्होजी। 3 परमेश्वरसे ह्हाडला बचनग्यामसे चु जम्बुलिड स्होजी भिबा ताम विश्वासग्याम य्हाडसे था याड्बा मुला। थेह्हाड् लसी य्हाडला मीसे आम्राड्बा स्हेगदेग्यामसेन म्हाड्बा स्हेगदे स्होजी। §
4 विश्वासग्यामसेन हाबिलसे परमेश्वरदा कयिनसे भन्दा ज्यबा बलि फुलजी। विश्वासग्यामसेन हाबिलदा परमेश्वरसे ह्हाडदा सेम निबा म्हि स्होजी। ओच्छे थेसे फुल्ला बलि परमेश्वरदा सेम निजी। थे सिसी निसैनोन थेला विश्वासग्याम थेसे अझ य्हाडदा ल्हानान ताम लोप्बान मुला। ††
5 विश्वास लबासे लमान हनोक आसिनी। तर थेदा छोन्बोन स्वर्गरी भोर्जी। ओच्छे थेदा खालैसेन आस्यापी। तिगदा भिसम परमेश्वरसे थेदा थीसी भोर्बा मुबा। थेदा परमेश्वरसे थीसी भोर्बा भन्दा डाच्छा थेसे परमेश्वरदा ताड्ना लबा ताम चुग्यामसेन था याड्बा मुला। †††6 विश्वास आलना खालैसेन परमेश्वरदा ताड्ना लबारी आखम। तिगदा भिसम परमेश्वर मुबा ग्लारी खबा म्हिसे परमेश्वर मुला भिबा तामदेन थेदा म्हाड्बा म्हिदा इनाम पिन्ना भिसी विश्वास लतोःला।

7 विश्वासग्यामसेन नोआसे थानोन आरेबा लिच्छा तसेला आम्राड्बा तामला बारेरी परमेश्वरसे कुल्बा अन्धार थेसे घेन पानी जहाज गिक स्होजी। ओच्छे थे पानी जहाज न्हडरी थेसे ह्हाडला म्हेमेगदेदा थान्सी जोगब लजी। चुह्हाड् लसी थेसे विश्वासग्यामसेन जम्बुलिडला म्हिगदेला दोष उन्जी। ओच्छे थे ह्हाडला विश्वासग्याम परमेश्वरदा सेम निबा म्हि दोजी। ††

8 विश्वास लबासे लमा अब्राहामसे परमेश्वरसे कुल्बा ताम इयान्जी। ओच्छे थेदा पिन्ना भिसी कबुल लबा य्हुल्सारी परमेश्वरसे थेदा निउ भिसी कुल्जी। तर ह्हाड खानडपट्टि निबान मुला भिबा था आरेसै थे ह्हाडला य्हुल्सा खलासी निजी। ††9 विश्वास लबासे लमा अब्राहाम परमेश्वरसे पिन्ना भिसी कबुल लबा य्हुल्सारी निसी विदेशी ह्हाड लसी पाल फ्रेड्सी चिजी। थेह्हाड् लसीन परमेश्वरसे इसहाकदेन याकूबदाएनोन थे य्हुल्सा पिन्ना भिसी कबुल लजी। ओच्छे थेनीगदेएनोन अब्राहाम ह्हाड लसीन चिजी। ††10 तिगदा भिसम अब्राहामसे परमेश्वर ह्हाडसेन म्हन्सी जुकजुकधोना चिबा जगथोरी स्होबा शहरदा भ्रान्सी चिबा मुबा।

11 विश्वासग्यामसेन दिड निसी जिन्सैनोन अब्राहाम आबा दोजी। साराएनोन कोला आतबाधोनान खुइ दोसी जिन्बा मुबा। तसैनोन परमेश्वरसे पिन्ना भिसी लबा कबुलथोरी अब्राहामसे पूरान विश्वास लसी चिजी। ††12 अब्राहाम ल्हानान खेप्बा दोबासे लमा थेग्याम तिगै आशनोन आरेमुबा। तसैनोन थे म्हि गिकग्यामसेन मुला सारदेन समुन्द्रला बालुवा तेनोन इयानोन आखम्बा सन्तान तजी। †††

13 परमेश्वरसे पिन्ना भिसी कबुल लबा स्हेगदे आयाड्सैनोन चु जम्मान म्हिगदेसे सिबा धुइधोनाएनोन विश्वास लबा आखलानी। तसैनोन थेनीगदेसे थे स्हेगदेदा थारेड्ग्यामसेन म्हाड्सी सेमरी किन्जी। ओच्छे थेनीगदेसे ह्हाड चा चु जम्बुलिडरी विदेशीदेन परदेशी हिन्ना भिसी म्हन्जी। †††14 चुह्हाड्बा ताम लबा म्हिगदेसे ह्हाडलान य्हुल्सा म्हाड्बान मुला भिबा ताम प्रस्टन घोना लमुला। 15 थेनीगदेसे डाच्छा ह्हाडसे खलासी खबा य्हुल्सादा ढन्सी आचिनी। चुदे थे य्हुल्सादा ढन्बा हिन्सम थेनीगदे दोःसी थे य्हुल्सारी निम्याड्सेला मुबा। 16 तर थेनीगदेसे चा चु भन्दान ज्यबा स्वर्गला य्हुल्सा म्हाड्बा मुबा। थेतबासेलमा थेनीगदेला परमेश्वर हिन्ना भिसी सुड्बारी परमेश्वर आपेःनी। तिगदा भिसम परमेश्वरसे थेनीगदेदा पिन्बाला लागिरी शहर गिक स्होसी जिन्बा मुबा।

† 10:17 यर्मि ३१:३४ †† 10:22 लेवी ८:३०; इज ३६:२५ † 10:27 यशै २६:११ †† 10:28 व्यव १७:६; १९:१५ †† 10:29 प्रस्था २४:८ ††† 10:30 व्यव ३२:३५-३६ ††† 10:37 हब २:३-४

§ 11:3 उत्प १:१; भजन ३३:६, ९; यूह १:३ †† 11:4 उत्प ४:३-१० ††† 11:5 उत्प ५:२१-२४ †† 11:7 उत्प ६:१३-२२ ††† 11:8 उत्प १२:१-५ †† 11:9 उत्प ३५:२७ †† 11:11 उत्प १८:११-१४; २१:२ ††† 11:12 उत्प १५:५; २२:१७; ३२:१२ ††† 11:13 उत्प २३:४; † इति १९:१५; भजन ३९:१२

17 परमेश्वरसे अब्राहामला सेम च्याबा धुइरी विश्वाससे लमान अब्राहामसे हाडला झा इसहाकदा † बलि फुल्बारी तयार तजी। परमेश्वरसे अब्राहामदा “इसहाकग्यामसेन एला वंश बढब तला” भिसी कबुल लबा मुबा। तसैनोन अब्राहामसे विश्वासग्यामसेन हाडला गिक जेन झादाएनोन बलि फुल्बारी तयार तजी। †19 तिगदा भिसम परमेश्वरसे सिबाग्यामएनोन सोना लखम्ला भिबा अब्राहामदा विश्वास मुबा। ओच्छे अब्राहामसे विश्वास लबा अन्खारनोन हाडला झा इसहाकदा सिबाग्याम सोबा हडबान दोःसी याड्जी।

20 विश्वाससे लमान इसहाकसे याकूबदेन एसावदा लिच्छा तसेला तामला बारेरी मोलम पिन्जी। ‡

21 विश्वाससे लमान याकूबसे सिबारी छ्याइबा धुइरी योसेफला झागदेदा मोलम पिन्जी। ओच्छे कडीला भररी राप्सी याकूबसे परमेश्वरला जयजयकार लजी। †

22 विश्वाससे लमान योसेफसे सिबा धुइरी इस्राएलीगदेसे मिश्र यहुल्सा खलाबा तामला बारेरी पाड्बा मुबा। थेसे थेनीगदेदा लिच्छा मिश्र यहुल्सा खलाबा धुइरी हाडला नखुगदे तिग लतोःला भिबा तामएनोन कुल्जी। ‡

23 विश्वाससे लमान मोशाला आबा आमासे थे न्हाहेन्से ला सोमधोना छुम्सी थान्जी। †† थेनीगदेसे हाडला झा ल्हानान जेबा म्राड्जी, ओच्छे ग्लेसे कुल्बा ताम आड्यान्बारीनोन आलोड्नी। †††

24 विश्वाससे लमान मोशासे हाड ग्रेन तमाहेन्से फारो ग्लेला झामेला झा दोबारी आड्यान्नी। §25 पाप लसी छिन्नड ताड्सी चिबा भन्दा मी बरु थेसे परमेश्वरला म्हिगदेदेन छ्यामनोन दुख नाबा सेम लजी। 26 मिश्र यहुल्साला जम्मान धन सम्पत्ति भन्दा बरु थेसे थार्बा पिन्बा ख्रीष्टला लागिरी दुख नाबा चा ग्रेन सम्पत्ति म्हन्जी। तिगदा भिसम थेसे परमेश्वरसे पिन्बा इनामदा च्यासी चिबा मुबा। 27 विश्वाससे लमान ग्लेला बोमो म्राड्सी आलोड्नीन थेसे मिश्र यहुल्सा खलाजी। ओच्छे म्राड्आखम्बा परमेश्वरदाएनोन म्राड्बा हड् लसीन थे भड्सी चिजी। §†28 विश्वाससे लमान मोशासे नाश लबा स्वर्गदूतसे इस्राएलीगदेला थेबा झागदेदा थासाड्गै भिसी बलिला का इस्राएलीगदे जम्मालान म्रापरी फोर्पुड्जी। ओच्छे मिश्र यहुल्साग्याम फेसी खबा धिनदा ढन्सी धड्बा चाड धड्पुड्जी। §††

29 विश्वाससे लमान इस्राएलीगदेसे सरी भ्रबा हड् लसी वाला समुन्दरी भ्रसी क्याम्सडपट्टि निजी। मिश्र यहुल्साला म्हिगदेएनोन थेनीगदे हड् लसीन निबारी छ्याइमा डुबब तसी सिजी। §†

30 विश्वाससे लमान इस्राएलीगदेसे निसरेधोना यरीहो शहरला पर्खाल क्युर्मा फुज्जी। §††31 विश्वाससे लमान राहाब भिबा बेश्या म्रिडम्हेमे परमेश्वरसे कुल्बा ताम आड्यान्बा म्हिगदेदा साड्बा धुइरी सोजी। तिगदा भिसम थेसे थेरी चिवा लबारी निबा इस्राएलीगदेदा मान लबा मुबा। §†

32 चु भन्दा ल्हाना डाड तिग पाड्से? तिगदा भिसम गिदोन, बाराक, शिमशोन, यिप्ता, दाऊददेन शमूल ओच्छे स्थान्दो अगमवक्तागदेला बारेरी पाड्बाला लागिरी डादा धुइ आरे। §†33 विश्वाससे लमान थेनीगदेसे जम्मान यहुल्सागदेदा ढासी शासन लजी। थेनीगदेसे ठीक निसाफ लसी परमेश्वरसे पिन्ना भिसी कबुल लबा तामगदेएनोन याड्जी। विश्वाससे लमान थेनीगदेसे च्यानगदेला सुड मुसी पिन्जी। §†34 थेहड् लसीन थेनीगदेसे मेला ल्हामदा साड्जी, तरवारग्यामएनोन जोगब तजी। ओच्छे थेनीगदे कमजोर मुबा, तर भड्बा तजी। थेनीगदे लडाइ लमा आलोड्नी ओच्छे अर्गु यहुल्साला जम्मान शत्रुगदेदा भ्रेना लजी। §†35 विश्वाससे लमान म्रिडम्हेमेगदेसे हाडला म्हिगदेदा सिबाग्याम दोःसी सोबा स्याप्जी। §§§

† हागारपट्टिला झा मुसैनोन अब्राहामसे इसहाकदा गिक जेन झा भिसी भिबा मुबा। तिगदा भिसम इसहाक चा परमेश्वरसे कबुल लबा अन्खार न्हाबा मुबा भिसम हागारपट्टिला झा चा अब्राहामला सेमसे म्हन्बा अन्खार न्हाबा मुबा। †† 11:17-18 उत्प २२:१-१४ † 11:20 उत्प २७:२७-२९, ३९-४० †† 11:21 उत्प ४७:३१-४८:२० †† 11:22 उत्प ५०:२४-२५; प्रस्था १३:१९ ††† मिश्र यहुल्साला ग्लेसे इस्राएलीगदेला झा न्हजी भिसम साड्गो भिसी कुल्बा मुबा। ††† 11:23 प्रस्था १:२२; २:२ § 11:24 प्रस्था २:१०-१२ §† 11:27 प्रस्था २:१५ §†† 11:28 प्रस्था १२:२१-३० §† 11:29 प्रस्था १४:२१-३१ §†† 11:30 यहो ६:१२-२१ §† 11:31 यहो २:१-२१; ६:२२-२५ §† 11:32 न्याय ६:११-३२; ४:६-५:३१; ११:१-१२:७; १३:२-१६:३१; १ शमू १:१-२:५; १ शमू १६:१-१ राजा २:११ §†† 11:33 दानि ६:१-२७ §§† 11:34 दानि ३:१-३० §§§ 11:35 १ राजा १७:१७-२४; २ राजा ४:२५-३७

स्थान्दोगदेसे चा सिमाहेन्से अड्ज ज्यबा जुनी याड्बाला लागिरी मिश्र यहुल्साग्याम फेबा सेम आलना ल्हानान दुख नाजी। 36 कोइ कोइदा बेइज्जत लसी कोरसे तोजी, स्थान्दोगदेदा चा च्याल्दासे खीसी इयाल्खानरी झाड्जी। 1837 म्हिगदेसे थेनीगदेदा युडबासे तोजी, आरासे क्लेजी, तरवारसे ताम्जी। ओच्छे थेनीगदेसे रादेन ग्युला ढि क्वान्जी। थेनीगदे प्राडबो, स्थान्दोला हेला नाबान दुख नासी क्यारमार कोर्सी भ्रतोःजी। 1938 चु आज्यबा जम्बुलिड थेनीगदेला लागिरी गे खेल्बाधोनाला आरेबा। थेनीगदे तोडतोडबा ग्लादेन गडगदे ओच्छे ऊगदेरी क्यारमार कोर्सी भ्रतोःजी।

39 थेनीगदे जम्मासेन हाडसे लबा विश्वासला लागिरी ल्हानान मान याड्जी। तर परमेश्वरसे पिन्ना भिसी कबुल लबा स्हेगदे चा आयाड्नी।

40 तिगदा भिसम यहाडदेन छ्याम जे थेनीगदे तिगै दोष आरेबा म्हि दोगै भिसीन परमेश्वरसे यहाडला लागिरी डाच्छान ज्यबा स्हे स्होसी थान्बा मुबा।

परमेश्वरला तहरी चिउ

12 यहाडला क्युर्सीन चुदे ल्हाना विश्वास लबा म्हिगदे मुबासे लमा यहाडदा ग्यामरी कोल्ना लबा ल्हानान स्हेगदेदेन यहाडदा सजिलोसे कोल्ना लबा पापगदेदा यहाडसे भ्याड्गो। ओच्छे यहाड धोतोःबा ग्लाधोना आधोतेधोना ढक्क तसी भ्रड्। 2 यहाडला विश्वास शुरु लबादेन पूरा लबा येशूदा च्यासी भ्रड्। लिच्छा याड्बा ताड्बा तामला लागिरी थेसे बेइज्जत तसे तिगै वास्ता आलना कुसरी दुख नाजी। दान्दे थे परमेश्वरला दाहिने छ्यापट्टिला मुल ठिरी धन्छ्याबा मुला। 203 एनीगदेदा सुर्दा आतबादेन सदन विश्वासरी चिबाला लागिरी पापीगदेसे बेइज्जत लमा नाबा येशूदा च्यागो। 4 एनीगदे पापला शक्तिगदेदेन छ्याम छेमा सिबाधोना मी तबा आरे। 5 परमेश्वरसे एनीगदेदा हाडला झागदेदा हड् लसी बचनरी चुहड् लसी अर्ती पिन्बा ताम म्लेःजी?

“डाला झा, परमप्रभुसे लबा तहरी भ्रड्।

ओच्छे थेसे बड्मा दुख थाम्हन्गो।

6 तिगदा भिसम जुन म्हिदा परमप्रभुसे माया लला थेदा हाडला तहरी थान्मुला।

ओच्छे हाडलान कोलागदे भिसी म्हन्बा जम्मादान थेसे सजाय पिन्मुला।”

21

7 एनीगदेसे नाबा सजाय चा आबाला तहरी चिबा हिन्ना भिसी म्हन्गो। एनीगदेसे नाबा सजायग्यामसे परमेश्वरसे एनीगदेदा हाडलान कोलागदेदा हड् लसी व्यवहार लबा मुला भिबा ताम उन्बा मुला। हाडला आबाग्याम तोबा ग्याड्बा आनाबा कोलागदे खालै मुला? आरे। 8 चुदे जम्मान कोलागदेसे नाबा सजाय एनीगदेसे चा आनानी भिसम एनीगदे हाडलान आबाला कोलागदे आहिन, तर स्थान्दोदेन छ्याम ब्रेल्सी न्हाबा कोलागदे हिन्ना। 9 चु जे आहिन, यहाड म्हिला मी आबासे हाडला कोलागदेदा तहरी थान्मुला, ओच्छे कोलागदेसे आबादा मान लमुबा। थेतबासेलमा इन यहाडसे यहाडला आत्माला आबा परमेश्वरला तहरी चितोःला। थेहड् लजी भिसम यहाडसे जुकजुकधोनाला जुनी याड्ला।

10 यहाड म्हिला आबासे चा यहाडदा तिगै धिनना लागिरी थेन्से ठीक भिसी म्हन्बा अन्खार तहरी थान्मुला। तर परमेश्वर आबासे सदनना लागिरी यहाडदा ज्यबा तगै ओच्छे हाड हड्बान तिगै दोष आरेबा दोबाला लागिरी तहरी थान्मुला। 11 सजाय याड्बा धुइरी यहाडदा सुख आहिन, तर ल्हाना दुख तमुला। तर यहाड तहरी चिसी पाको दोबागदे परमेश्वरदा सेम निबादेन ज्यबा बानीबेहोर मुबा म्हि दोला।

12 थेतबासेलमा एनीगदेला घेबा यागदे थीगो। ओच्छे कमजोर काडगदे भड्बा तना लउ। 2213 एनीगदे सोजो ग्यामरी भ्रड्। जमाहेन्से कमजोर म्हिगदे आहिल, तर थेनीगदे ज्यना लसी भ्रखम्ला। 23

18 11:36 १ राजा २२:२६-२७; २ इति १८:२५-२६; यर्मि २०:२; ३७:१५; ३८:६
19 11:37 २ इति २४:२१ 20 12:2 भजन ११०:१ 21 12:6 अय्यूब ५:१७;
हितो ३:११-१२ 22 12:12 यशै ३५:३ 23 12:13 हितो ४:२६

परमेश्वरदा थाखलागो भिसी पाड्बा

14 जम्मान म्हिगदेदेन छ्याम ढिव्सी चिबारीदेन परमेश्वरला डाच्छा तिगै दोष आरेबा म्हि दोबारी भड लउ। तिग्दा भिसम परमेश्वरला डाच्छा तिगै दोष मुसम खालैसेन परमप्रभुदा म्हाड्बारी आखम। 15 च्यागो, खालैनोन परमेश्वरला दयामाया आयाड्बा म्हि थादोगै। आज्यबा सेमग्याम खालैदान छेबा बड्बा तना थालगै, ओच्छे ल्हानान म्हिदा न्होड्ना थालगै। 16 खालैसेन आज्यबा बानीबेहोर थाथोगै। ओच्छे एसाव हड्बान परमेश्वरसे कुल्बा ताम आड्यान्बा म्हि थादोगो। थेसे छक गिक चबाला लागिरी थेबा झासे याड्तो:बा अधिकारदान चूड्जी। 17 एनीगदेदा थानोन मुला, लिच्छा थेसे हाडला आबाग्याम मोलम किन्बारी म्हाड्जी। ओच्छे क्रासी क्रासी हाडसे डाच्छा चूड्बा अधिकार दो:सी किन्बारी म्हाड्जी। तर थेसे आयाड्नी। तिग्दा भिसम थेसे हाडसे लबा आज्यबा गे खलाबा मौकान आयाड्नी। 18

एनीगदे इसाएलीगदे हड् लसी थुबारी खम्बा सीनै भिबा गडरी खबा आरे। थेरी मेला ल्हाम थोन्बा मुबा, म्लाड म्लाडबा खसुसे घण्बा मुबा, ओच्छे लाबालुडसर खबा मुबा। 19 इसाएलीगदेसे बिगुलला घेन काइदेन परमेश्वरसे सुड्बा बचनएनोन थे:बा मुबा। चूहड्बा काइ थे:माहेन्से थेनीगदेसे दाहेन्से दो:सी खाड्मै थे:आतो:गै भिसी बिन्ती लबा मुबा। 20 तिग्दा भिसम थेनीगदेदा “चुदे खजिबै जन्तुसे चु गड थुर्जी भिसैनोन थेदा युडबासे तोसी साड्गो” भिसी कुल्बा ताम थेनीगदेसे नाबारी आखम्नी।

21 मोशाएनोन थे ताम म्हाड्सी ल्हानान लोड्बा मुबा। थेतबासेलमा, “डा लोड्सी फितफित धर्बा मुला” भिसी मोशासेनोन पाड्बा मुबा। 22

तर एनीगदे मी सियोन गडरी खबा मुला। ओच्छे इयासीन इयाबारी आखम्बाधोनाला स्वर्गदूतगदे ताड्सी पोप तसी छोन्बो परमेश्वरला स्वर्गला यरूशलेम शहररी खबा मुला। 23 एनीगदे स्वर्गरी मिन भिसी जिन्बा डाच्छा न्हबा परमेश्वरला कोलागदेला 24 सभारी खबा मुला। ओच्छे एनीगदे जम्मान म्हिला निसाफ लबा परमेश्वर मुबा ग्लारीदेन परमेश्वरला डाच्छा ज्यबा म्हिगदेला आत्मा मुबा ग्लारीनोन खबा मुला। 24 एनीगदे येशू मुबा ग्लारी खबा मुला। येशूसे चा एनीगदेदा परमेश्वरदेन छ्याम ढिव्ना लबाला लागिरी छार कबुल स्होबा मुला। ओच्छे एनीगदे हाबिलला कासे 25 भन्दा अझ ज्यबा ताम लोण्बा का स्वाबा ग्लारी खबा मुला। 25

होशियार तसी चिउ, एनीगदेसे हाडदेन छ्याम ताम पाड्बा परमेश्वरला ताम इयान्बारी थाखलागो। तिग्दा भिसम चु जम्बुलिडला म्हि मोशासे कुल्बा ताम इसाएलीगदेसे आड्यान्मा सजायग्याम स्योरआम्याड्नी। इन यहाडसे स्वर्गग्याम कुल्बा परमेश्वरला ताम आड्यान्नी भिसम यहाड खाहड् लसी स्योर्खम्ला? 26 परमेश्वरसे सीनै गडरी ताम लमा जम्बुलिडनोन य्होड्जी। तर दान्दे परमेश्वरसे चुहड् भिसी कबुल लबा मुला, “दाहेन्से अझ तिरैम जम्बुलिड जे आहिन, तर डाइ स्वर्गन य्होड्ना लला।” 27 चु “अझ तिरैम” भिबा तामग्याम जम्बुलिडरी मुबा जम्मान स्हेगदे नाश तला भिबा हिन्ना। चु भिबा चा आय्होड्बा स्हेगदे चा नाश आत।

28 थेतबासेलमा आय्होड्बा यहुल्सा यहाडसे याड्बासे लमा परमेश्वरदा धन्यवाद पिन्गे। थेहड् लसीन परमेश्वरदा सेम निबा गे लसी थेदा सदन मान लबान जयजयकार लड। 29 तिग्दा भिसम यहाडला परमेश्वर नाश लबा मे हड्बान मुला। 30

परमेश्वरदा ताड्ना लबा गे

13 गिकसेम गिकदा ज्योज्यो आले नाना आडादा हड्नोन सदन माया लउ। 2 डोआसेबा डोन्बोगदेदा मान लबारी थाखलागो। चुहड् लसी डोन्बोदा मान लमा कोइ कोइसे था आयाड्ना स्वर्गदूतदाएनोन मान लबा

† 12:16 उत्प २५:२९-३४ †† 12:17 उत्प २७:३०-४० † 12:18 प्रस्था १९:१६-२२; २०:१८-२१; व्यव ४:११-१२; ५:२२-२७ †† 12:20 प्रस्था १९:१२-१३ †† 12:21 व्यव ९:१९ ††† “डाच्छा न्हबा परमेश्वरला कोलागदे” भिबा चा परमेश्वरदा डाच्छान विश्वास लबा म्हिगदे हिन्ना। ††† हाबिलला काग्याम सजाय याड्जी भिसम येशूला काग्याम जम्मान म्हिसे पापला माफ याड्जी (उत्प ४:११-१२ स्हीगो)। § 12:24 उत्प ४:१० §† 12:25 प्रस्था २०:२२ §†† 12:26 हागै २:६ § 12:29 व्यव ४:२४

मुबा। 31 ह्राडएनोन इयाल्खानरी मुबा हड्बान म्हन्सी इयाल्खानरी मुबागदेदा वास्ता लउ। ओच्छे हाडलान ल्हुडरी दुख याड्बा हड्बान म्हन्सी दुख याड्बागदेदाएनोन वास्ता लउ।

4 ब्याह चा जम्मान म्हिला ओन्हाडरी ज्यबा ततो:ला। ओच्छे म्रिड हेम्बो न्हडरी खाड्मै आज्यबा तबारी आत। तिग्दा भिसम आज्यबा बानीबेहोर थोसी स्हान्दोला म्रिड हेम्बोदेन छ्याम ब्रेल्सी भ्रबागदेदा परमेश्वरसे सजाय पिन्ना।

5 एनीगदे धन सम्पत्तिला लिच्छा थाभ्रउ, हाडदेन छ्याम जुन स्हे मुला थेरीन ताड्सी चिउ। तिग्दा भिसम परमेश्वरसे चुहड् भिसी सुड्बा मुला,

“डाइ एदा तिगै लसीन आखला,

डाइ एदा खाड्मै थारेड आथान।” 6

थेतबासेलमा यहाड दुक्क तसी पाड्गो,

“प्रभुसेन डादा हो लबा मुला,

थेतबासेलमा डा खाड्मै आलोड्।

तिग डादा म्हिसे तिगै लबारी खम्ला? आखम।” 7

7 एनीगदेदा परमेश्वरला बचनग्याम लोण्बा मण्डलीदा च्याबा म्हिगदेदा ढन्गो। थेनीगदेला गाते ज्यबा बानीबेहोर मुबा थे घोउ। ओच्छे एनीगदेसेनोन थेनीगदेसे लबा हड्बान विश्वास लउ। 8 येशू ख्रीष्ट मी तिल्मा, तिनी ओच्छे सदन गिकनोन मुला। 9 एनीगदेदा था आरेबा खजिबै छार तामगदेसे एनीगदेदा सत्य तामग्याम थाफेगै। चबा थुड्बाला ठिमसे आहिन, तर परमेश्वरला दयामायासे सेमदा भड्ना लबा चा ज्यबा हिन्ना। चबा थुड्बाला ठिम अन्धार भ्रसी आत्माला लागिरी तिगै फाइदा आरे।

10 यहूदीगदेला चोखो ग्लारी पूजा लबा म्हिगदेदा यहाडला बलि फुल्बा ग्लारी तिगै चबा अधिकार आरे। 11 डाच्छाला ठिम अन्धार परमेश्वरला मन्दिररी पूजा लबा मुल म्हिसे पापला लागिरी बलि फुल्बा जन्तुला का पाल न्हडला जम्मान भन्दा चोखो ग्लारी भोर्सी निमुबा। तर थे जन्तु चा शहरग्याम मडग्यार भोर्सी खाड्गुला। 12 थेतबासेलमा येशूसेनोन हाडलान काग्याम म्हिगदेदा पापग्याम फेसी चोखो स्होबाला लागिरी शहरला मडग्यार निसी सिजी। 13 थेतबासेलमा यहाडएनोन शहरला मडग्यार येशू मुबा ग्लारी निसी थेसे नाबा हड्बान बेइज्जत नागे। 14 तिग्दा भिसम चु जम्बुलिडरी सदन चिबाला लागिरी यहाडला शहर आरे। तर यहाडसे मी लिच्छा खबा शहरला ग्याम च्यासी चिबा मुला।

15 थेतबासेलमा यहाडसे येशूग्याम परमेश्वरदा सदन जयजयकारला बलि फुल्गे। चु थेला मिन किन्बागदेला सुड्ग्याम फुल्बा बलि हिन्ना। 16 गिकसेम गिकदा ज्यबा लबारीदेन हो लबारी थाखलागो। तिग्दा भिसम परमेश्वरदा सेम निबा बलि चुनोन हिन्ना।

17 एनीगदेसे हाडला मण्डलीदा च्याबा म्हिगदेसे कुल्बा ताम इयान्सी थेनीगदेला तहरी चिउ। थेनीगदेला गे चा एनीगदेला आत्मादा वास्ता लबा हिन्ना। ओच्छे थेनीगदेसे एनीगदेला लागिरी लबा गेला हिसाब परमेश्वरदा उन्तो:ला। एनीगदेसे थेनीगदेला ताम इयान्जी भिसी थेनीगदेसे ताड्सी ताड्सी हाडला गे लला। तर थेहड् आलसम थेनीगदेसे दुख इहम्ला, ओच्छे एनीगदेला लागिरी तिगै ज्यबा आत।

18 डन्ना लागिरी सदन प्रार्थना लउ। डन्से म्हन्बा अन्धार डन्से तिगै गल्ती लबा आरे भिबा ताम डन्दा पक्का मुला। तिग्दा भिसम सदन ज्यबा गे लबा डन्ना सेम मुला। 19 डा दो:सी एनीगदे मुबा ग्लारी योनान खखम्मी भिसी एनीगदेसे डाला लागिरी प्रार्थना लसी पिन्गो भिबा डाला बिन्ती मुला।

प्रार्थना

20 शान्तिला परमेश्वरसे जम्मान ग्युगदेला मुल गोठालो यहाडला प्रभु येशूदा सिबाग्याम सोना लजी। ओच्छे थेला काग्याम जुकजुकधोना चिबा कबुल पूरा लजी। 21 एनीगदेसे परमेश्वरसे म्हन्बा गे लबाला लागिरी प्रभु येशूग्याम एनीगदेदा जम्मान ज्यबा तामगदेसे ज्लिड्ना लगै। ओच्छे परमेश्वरदा सेम

§†† 13:2 उत्प १८:१-८; १९:१-३ §† 13:5 व्यव ३१:६, ८; यहो १:५ § 13:6 भजन ११८:६ §†† तिग्दा भिसम थेनीगदेसे डाच्छाला ठिम अन्धार पूजा लबा तामथोरी भर लमुबा। ओच्छे थेनीगदेसे प्रभु येशूथोरी चा भर आलमुबा। यहाडला लागिरी बलि फुल्बा ग्ला चा येशूला कुस हिन्ना। §§† 13:11 लेवी १६:२७

निबा गेगदे लबारी खम्मौ भिसी येशू ख्रीष्टग्याम एनीगदेला सेमरी गे लगै। येशू ख्रीष्टला सदन मानदेन जयजयकार तगै। आमेन।

²² ज्योज्यो आले नाना आडागदे, एनीगदेदा डाला चु बिन्ती मुला, एनीगदेदा ऑट पिन्बा चु ताम आछेर्ना ड्यान्गो। डाइ एनीगदेदा ल्हाना ताम भिबा आरे। ²³ व्हाडला आले तिमोथीएनोन ड्याल्खानग्याम थोन्सी जिन्बा

मुला भिबा ताम डाइ एनीगदेदा पाड्ला। थे योनान खजी भिसम डा थेदेन छ्यामनोन एनीगदे मुबा ग्लारी खला। ²⁴ एनीगदेला जम्मान मण्डलीदा च्याबा म्हिगदेदेन परमेश्वरला जम्मान म्हिगदेदा फ्याफुल्ला। इटालिया यहुल्ला विश्वासीगदेसेनोन एनीगदेदा फ्याफुल्ला भिसी पाड्बा मुला। ²⁵ एनीगदे जम्मानदेन छ्याम परमेश्वरला दयामाया तगै। आमेन।

चु चिठीला बारेरी पाडतो:मा

येशूला आले याकूबसे भिबा मुबा (याकूब १:१, मत्ती १३:५५, मर्कूस ६:३)।

यरूशलेम शहररी भिबा मुबा।

ओस्पन ईश्वी संवत् ६० (विक्रम संवत् ११७) सालरीक्यार भिबा मुबा। तर कोड कोड बाइबल विद्वानगदेसे ईश्वी संवत् ५० (विक्रम संवत् १०७) साल भन्दा डाच्छा भिबा मुबा भिसी पाड्बा मुला। थेतबासेलमा चु चिठी छार कबुलला जम्मान भन्दा डाच्छा भिबा किताब तखम्ला।

जम्बुलिडला ग्ला ग्लारी ससा बडबड तसी चिबा येशूदा विश्वास लबा यहूदी म्हिगदेदा भिबा मुबा।

चु चिठीरी विश्वास लबागदे खाह्ण्ड लसी भ्रतो:ला भिसी विश्वास लबागदेदा तो:बा ज्ञान बुद्धिदेन मण्डलीदा च्याबा म्हिला बारेरी अर्ती पिन्बा मुला। चु अर्ती पिन्मा याकूबसे थरी थरीला उखानगदे पाड्बा मुला। ओच्छे विश्वास लबागदेसे थोतो:बा बानीबेहोरला बारेरी चुह्ण्ड भिसी भिबा मुला। प्युकपोदेन प्राडबो भिसी खालैला ली च्यासी गे थालउ, ज्यबा व्यवहार लउ, खालैदा लेबाफेबा थालउ, डाह थालउ, खालैदा बिरोध थालउ, म्हिला तामगन थालउ, घमण्ड थालउ, जस्तोन दुख तसै नागो ओच्छे प्रार्थना लउ।

चु चिठीरी विश्वास लबा जे आहिन, तर विश्वास लबा अन्धारला गेएनोन लतो:ला भिसी पाड्बा मुला।

मुल तामगदे

प्याफुल्बा १:१

विश्वासदेन ज्ञान बुद्धि १:२-८

प्युकपोदेन प्राडबो १:९-११

दुख नाबादेन सेम च्याबा १:१२-१८

बचन झ्यान्सी थे अन्धारला गे लउ १:१९-२७

ली च्यासी गे थालउ २:१-१३

विश्वास अन्धारला गे २:१४-२६

सुड तहरी थान्गो ३:१-१८

जम्बुलिडला म्हिगदेदेन विश्वास लबागदे ४:१-५:६

चिठीला थुमरी भिबा तामदेन अर्गु अर्तीगदे ५:७-२०

याकूबसे भिबा चिठी

1 लास्सो, परमेश्वरदेन प्रभु येशू ख्रीष्टला गे लबा डा याकूबग्याम जम्बुलिडला ग्ला ग्लारी ससा बडबड तसी चिबा ख्रीष्टदा विश्वास लबा च्युक न्ही वंशला म्हिगदेदा † प्याफुल्ला। ††

विश्वासदेन बुद्धि

2 डाला ज्योज्यो आले नाना आडागदे, एनीगदेथोरी थरी थरीला आपत विपत खमा चु ताडतो:बा ताम हिन्ना भिसी म्हन्गो। 3 तिगदा भिसम चुह्ण्डबा दुख नामाहेन्से एनीगदेला विश्वासग्याम अझ एनीगदेसे घेन घेन दुख नाखम्ला भिबा ताम एनीगदेदा थानोन मुला। 4 थेतबासेलमा एनीगदेथोरी खबा जम्मान दुख पूरान नागो। चुह्ण्ड लजी भिसम एनीगदे जस्तोन दुख तसैनोन नाखम्बा पाको म्हि दोला।

5 तर चुदे एनीगदे न्हडरी खालैदा ज्ञान बुद्धि आरेसम थेसे आछेर्ना पिन्बा परमेश्वरदेन छ्याम हीगो। ओच्छे परमेश्वरसे थेदा पिन्ना। 6 तर थे म्हिसे तिगै शड्का आलना परमेश्वरग्याम याड्ला भिबा विश्वास लसी हीगै। शड्का लबा म्हि चा लाबासे रे:ना लबा समुन्द्रला छाल ह्ण्डबान हिन्ना।

† “च्युक न्ही वंशला म्हिगदे” भिबा चा यहूदी हिन्ना। तर याकूबसे पाड्बा चु ताम चा यहूदीगदेला लागिरी जे आहिन, ख्रीष्टदा विश्वास लबा जम्मान म्हिगदेला लागिरी हिन्ना।

†† 1:1 मत्ती १३:५५; मर्कू ६:३; मुल १५:१३; गला १:१९

7 थेह्ण्डबा शड्का लबा म्हिसे चा परमप्रभुग्याम तिगै स्हे याड्ला भिसी थाम्हन्गो। 8 तिगदा भिसम थेह्ण्डबा सेम क्लाड्बा म्हिसे चा लबारी म्हाड्बा खजिबै गे पूरा लबारी आखम।

प्राडबोदेन प्युकपो

9 प्राडबो ज्योज्यो आले नाना आडागदे, एनीगदे ताड्गो। तिगदा भिसम परमेश्वरसे एनीगदेदा घेन म्हि स्होबा मुला। 10 ओच्छे प्युकपो ज्योज्यो आले नाना आडागदेएनोन ताड्गो, तिगदा भिसम एनीगदेला धन सम्पत्ति परमेश्वरला डाच्छा तिगै आहिन। तिगदा भिसम प्युकपो म्हि चा ह्लिला म्हेन्दो ह्ण्डनोन सम्सी निला। 11 तिगदा भिसम खरेडी तमा धिनीसे क्रोसी म्हेन्दोला दोड स्याड्सी निला। ओच्छे ओते जेबा म्हेन्दो ताड्सी नाश तला। थेह्ण्ड लसीन प्युकपो म्हिएनोन ह्ण्डला गेरी कोल्ना कोल्नान नाश तला। †

12 जस्तोन दुख तसैनोन नासी चिखम्बा म्हि चा परमेश्वरग्याम मोलम याड्बा म्हि हिन्ना। थेह्ण्डबा दुख नासी जिन्माहेन्से थेसे जुकजुकधोनाला जुनी याड्बा इनाम याड्ला। थे इनाम चा परमेश्वरसे ह्ण्डदा माया लबा म्हिगदेदा पिन्ना भिसी कबुल लबा मुला।

‡ 1:11 यशै ४०:६-७

13 परमेश्वरसे खालै म्हिला सेम च्यामा, थे म्हि फसब तजी भिसम थेसे डादा परमेश्वरसे फसब लजी भिसी थापाङ्कै। तिग्दा भिसम परमेश्वर हाडएनोन आज्यबा तामरी फसब आत। ओच्छे म्हिदाएनोन आज्यबा तामरी फसब आल। 14 तर जम्मान म्हि हाडलान आज्यबा सेमसे लोभ उन्सी फसब तमुला। 15 हाडलान आज्यबा सेमसे लमा पाप थोन्ना। ओच्छे थे पाप पुरान बढब तमाहेन्से नाश लला।

16 थेतबासेलमा डाला सेम निबा ज्योज्यो आले नाना आडागदे, एनीगदेसे हाडसे हाडदान धोका थापिन्गो। 17 य्हाडसे याड्बा जम्मान ज्यबादेन चोखो मोलमगदे चा मुला लनी धिनी स्होबा य्हाडला परमेश्वर आबाग्यामसेन खमुला। ओच्छे घरिघरि पोसी चिबा क्रिप ह्इ लसी परमेश्वर खाड्मै आपो। 18 परमेश्वरसे हाडलान सेमसे सत्य बचनग्याम य्हाडदा हाडला म्हि स्होजी। तिग्दा भिसम परमेश्वरसे स्होबा जम्मान स्हेगदे न्हडरी य्हाडदा चा थेसे हाडलान लागिरी धम्जी।

परमेश्वरला बचन ड्यान्सी थे अन्धारला गे लउ

19 थेतबासेलमा सेम निबा डाला ज्योज्यो आले नाना आडागदे, एनीगदेसे हाडला ताम पाड्बा भन्दा डाच्छा ज्यना लसी ड्यान्गो। ओच्छे योना बोमो थाखउ भिबा ताम एनीगदे जम्मानसेन घोउ। 20 तिग्दा भिसम म्हिला बोमोसे परमेश्वरसे म्हन्बा अन्धारला गे खाड्मै लबारी आखम। 21 थेतबासेलमा थेह्इबा जम्मान आज्यबा बानीबेहोरदेन नड्बा ताम खलागो। ओच्छे परमेश्वरसे एनीगदेला सेमरी थान्बा बचनदा सोजो तसी सदन थोसी भ्रउ। चुनोन बचनरी एनीगदेदा थाना लबा शक्ति मुला।

22 एनीगदेसे चु बचन ड्यान्बा जे आहिन, बचन अन्धार गेएनोन लउ। तर बचन ड्यान्सी जे हाडसे हाडदान धोका थापिन्गो। 23 खालै म्हिसे बचन चा ड्यान्सी बचन अन्धार गे आलनी भिसम थे म्हि चा ऐनारी ली च्याबा म्हि ह्इबान हिन्ना। 24 थेसे ऐना च्यातेधोना जे हाडला ली चुह्इबा मुला भिसी था याड्कुला। तर ऐना च्यासी निमाहेन्से थेसे हाड खाह्इबा मुला भिबा ताम तुरुन्तन म्ले:ला। 25 तर जुन म्हिसे थाना लबा परमेश्वरला ठिम अन्धार सेम लसी ड्यान्सी भ्रला, थेसे परमेश्वरला बचन आम्ले:ना गेएनोन लला। थेह्इबा म्हिदा चा हाडसे लबा जम्मान गेरी परमेश्वरसे मोलम पिन्ना।

26 चुदे खालैसे हाडसे हाडदान डा परमेश्वरदा तेन्बा म्हि हिन्ना भिसी भिला, तर हाडला सुड चा तहरी आथान्नी भिसम थेसे हाडसे हाडदान धोका पिन्बा हिन्ना। थेतबासेलमा थेसे परमेश्वरदा तेन्बा ताम तिगै गे आखेल्बा तला। 27 परमेश्वर आबादा सेम निबा चोखोदेन सत्य तेन्बा ताम चा दुखरी परब तबा हेम्बो सिबा मिडम्हेमेगदेदा ह्यो लबादेन टुहुरा कोलागदेदा सयार लबा ओच्छे जम्बुलिडला जम्मान आज्यबा तामगदे खलाबा हिन्ना।

ली च्यासी गे थालउ

2 डाला ज्योज्यो आले नाना आडागदे, एनीगदेसे य्हाडला जम्मान भन्दा घेन य्हालदेन शक्ति मुबा प्रभु येशू ख्रीष्टदा विश्वास लबासे लमा एनीगदेसे खालैला ली च्यासी गे थालउ। 2 चुदे एनीगदे हूप तसी प्रार्थना लबा ग्लारी ज्यबा ज्यबा क्वानदेन म्हरला च्याप क्वान्बा फ्युक्पो म्हिदेन भाक्टा भोक्टो क्वान क्वान्बा प्राडबो म्हि खबा धुडरी 3 एनीगदेसे ज्यबा ज्यबा क्वान क्वान्बा फ्युक्पो म्हिदा चा मान लसी, "तोर ठिरीन धन्छ्यागो" भिबा, तर प्राडबो म्हिदा चा "थेरीन राप्सी चिसै चिउ, सरीन चिसै चिउ" भिसी पाड्जी भिसम, 4 एनीगदेसे हाड हाड न्हडरीन ली च्यासी गे लबा आहिन? एनीगदेसे चुह्इबा गे लमाहेन्से तिग एनीगदे पापी सेम थोसी निसाफ लबा म्हि आदोनी?

5 डाला सेम निबा ज्योज्यो आले नाना आडागदे ड्यान्गो, तिग परमेश्वरसे जम्बुलिडला प्राडबोगदेदा विश्वासरि फ्युक्पो दोना लसी हाडला य्हुल्सारी वाड्म्याड्बा हक पिन्बारी धम्बा आहिन? चुनोन य्हुल्सा परमेश्वरसे हाडदा माया लबागदेदा पिन्ना भिसी कबुल लबा आहिन? 6 तर एनीगदेसे प्राडबोगदेदा हेला लमुला। तिग फ्युक्पोगदेसे एनीगदेदाएनोन दुख आपिन्मुला? थेनोन फ्युक्पोगदेसे एनीगदेदा अदालतरी आभोर्मुला? 7 तिग

येशू ख्रीष्टला मिन लसी एनीगदेदा थान्बा मिनना बेडज्जत लबा थेनोन फ्युक्पोगदे आहिन?

8 चुदे एनीगदेसे "हाडला खिम्जेमगदेदा हाडदा ह्इनोन माया लउ" भिसी बचनरी भिबा परमेश्वरला य्हुल्साला मुल ठिम अन्धार पक्कान भ्रजी भिसम एनीगदेसे ज्यबा गे लबा हिन्ना। 9 तर एनीगदेसे प्राडबोदेन फ्युक्पोला ली च्यासी गे लजी भिसम एनीगदेसे पाप लबा हिन्ना। ओच्छे परमेश्वरला ठिमसेनोन एनीगदेला दोष उन्ना। 10 तिग्दा भिसम खालै म्हिसे परमेश्वरला ठिम न्हडरी मुबा ताम गिक जे आड्यान्सैनोन ठिमरी मुबा जम्मान तामला दोष थेथोरी खला। 11 तिग्दा भिसम "स्हान्दोदेन छ्याम ब्रेल्सी थाभ्रउ" भिसी सुड्बा परमेश्वरसेन "म्हिएनोन थासाड्गो" भिसी सुड्बा हिन्ना। थेतबासेलमा स्हान्दोदेन छ्याम ब्रेल्सी आभ्रसैनोन म्हि चा साड्जी भिसम एनीगदे परमेश्वरला जम्मान ठिम आड्यान्बा म्हि दोला। 12 थेतबासेलमा एनीगदेसे चु ताम ढन्गो, एनीगदेसे पाड्बा तामदेन एनीगदेसे लबा गेग्याम फेबा ठिमसेन एनीगदेला निसाफ लला। 13 तिग्दा भिसम स्हान्दोदा दया आलबा म्हिदा परमेश्वरसेनोन निसाफ लबा धुडरी थेदा दया आल। तर स्हान्दोदा दया लबा म्हिदा परमेश्वरसेनोन दया लला ओच्छे परमेश्वरसे निसाफ लबा धुडरी थे लोड्आतो:।

विश्वास अन्धारला गे

14 च्यागो, डाला ज्योज्यो आले नाना आडागदे, खालै म्हिसे "डाइ विश्वास लबा मुला" भिसी पाड्ला, तर गे चा आलसम थेसे लबा विश्वासला तिग गे? तिग थेह्इबा विश्वाससे थेदा थाना लला? 15 चुदे खालै ज्योज्यो आले नाना आडादा चबादेन क्वान्बा तिगै आरे। 16 तर एनीगदे न्हडला खालैसे थेदा "दुक्क तसी निउ ओच्छे ज्यबा चबा क्वान्बा लउ" भिसी थेला ल्हुड्दा तो:बा स्हे चा आपिन्नी भिसम एनीगदेसे पाड्बा तामला तिग गे? 17 थेतबासेलमा विश्वास जे लसी आत। तर विश्वास अन्धारला गेएनोन लतो:ला। चुदे विश्वास अन्धार गे आलनी भिसम थेह्इबा विश्वास सिबा ह्इबान हिन्ना।

18 तर खालै म्हिसे "एसे विश्वास लमुला, डाइ गे लमुला" भिजी भिसम थेदा डाइ पाड्ला, "लु, दाहेन्से एसे गे आलना एला विश्वास उन्गो। डाइ गे लसी डाला विश्वास एदा उन्ना।" 19 एनीगदेसे परमेश्वर गिक जेन मुला भिसी विश्वास लमुला। थे ज्यबान ताम हिन्ना। थेह्इबा ताम मी म्हड म्हुडसेनोन विश्वास लमुला। तर परमेश्वर म्हाड्बाहेन्से थेनीगदे यार्मुला।

20 मूर्खगदे, विश्वास अन्धारला गे आलनी भिसम थेह्इबा विश्वास तिगै गे आखेल्बा तमुला भिसी एनीगदेदा उन्तो:ला? 21 य्हाडला म्हैमे अब्राहामएनोन विश्वास अन्धारला गेग्यामसेन परमेश्वरदा सेम निबा म्हि दोबा मुबा भिबा ताम एनीगदेदा था आरे? परमेश्वरसे कुल्बा अन्धारला थेसे हाडलान झा इसहाकदा बलि फुल्बारी बलि फुल्बा ग्लाथोरी थान्जी। 22 अब्राहामसे विश्वासदेन छ्याम छ्यामनोन गेएनोन लजी। ओच्छे गेग्यामसेन थेला विश्वास पूरा तबा ताम एनीगदेसे म्हाड्बा मुला। 23 "अब्राहामसे परमेश्वरदा विश्वास लबासे लमा परमेश्वरसे थेदा हाडदा सेम निबा म्हि हिन्ना भिसी सुड्जी" भिसी परमेश्वरला बचनरी भिबा ताम पूरा तबा मुबा। ओच्छे अब्राहाम परमेश्वरला ह्योएनोन दोजी। 24 थेतबासेलमा च्यागो, परमेश्वरदा सेम निबा म्हि दोबारी य्हाडसे विश्वास जे आहिन, तर विश्वासदेन छ्याम छ्याम गेएनोन लदोमुला।

25 थेह्इ लसीन राहाब भिबा बेश्याएनोन थेला गेग्यामसेन परमेश्वरदा सेम निबा म्हि दोजी भिबा ताम एनीगदेदा थानोन मुला। तिग्दा भिसम थेसे थेरी चिवा लबारी खबा य्हुदीगदेदा क्योड्जी। ओच्छे थे गलाला म्हिगदेग्याम जोगब लसी अर्गु ग्यामसे पुड्जी। 26 आत्मा आरेमाहेन्से म्हि सिबा हिन्ना, थेह्इ लसीन विश्वास अन्धारला गे आलनी भिसम थेला विश्वासएनोन सिबा हिन्ना।

† 2:8 लेवी १९:१८ †† 2:11 प्रस्था २०:१३-१४; व्यव ५:१७-१८ ‡ 2:21 उत्प २२:१-१४ †† 2:23 उत्प १५:६; २ इति २०:७; यशै ४१:८ †† 2:25 यहो २:१-२१

सुड तहरी थान्गो

3 डाला ज्योज्यो आले नाना आडागदे, एनीगदे न्हडरी ल्हानान स्हान्दोदा लोष्वा म्हि थादोगो। तिग्दा भिसम परमेश्वरसे य्हाड स्हान्दोदा लोष्वा म्हिला निसाफ लबा धुडरी य्हाडला ल्हानान ताम म्हाडला भिबा ताम य्हाडदा थानोन मुला। 2 य्हाड जम्मासेन ल्हानान गल्ली लमुला। तर जुन म्हिसे होशियार लसी ताम पाडला थे चा पाको म्हि दोला। ओच्छे ह्हाडसे ह्हाडदान तहरी थान्बारी खम्ला।

3 चुदे तागदेदा तहरी थान्बाला लागिरी थेनीगदेला सुडरी लगाम क्वान्जी भिसम थे घेन मुसैनोन य्हाडसे थेदा भोर्गे म्हन्बा ग्लारी भोर्बारी खम्ला। 4 च्यागो, पानी जहाजगदेएनोन गाते घेन मुला, ओच्छे थे लाबाला तोडसे भ्रमुला। तसैनोन थे चलब लबा म्हिसे सिडला जजाबा क्याबाला भररी ह्हाडदा भोर्गे म्हन्बा ग्लारी भोर्खम्मुला। 5 थेह्ण्ड लसीन य्हाडला लेएनोन ल्हुडला जजाबा स्हे हिन्ना, तसैनोन थेसे घेन घेन ताम लमुला।

च्यागो, मेला जजाबा फिलिडगो गिकसेन घेन घेन हि क्रोसी नाश लमुला। 6 थेतबासेलमा य्हाडला लेएनोन मे ह्ण्डबान हिन्ना। तिग्दा भिसम चु य्हाडला ल्हुडला जम्मान भन्दा नडबा गे लपुड्बा स्हे हिन्ना। चुसे य्हाडला पूरान जुनी न्होडना लसी नर्गला मेरी झाङ्गुला। ओच्छे थे ह्हाडएनोन नर्गला मेसे क्रोसी नाश तमुला।

7 म्हिसे जम्मान खाल्ला जन्तुगदे, जम्मान खाल्ला चराचुरुङ्गीदेन सरी भ्रबा जन्तुगदे ओच्छे समुन्द्रला जन्तुगदेदा तहरी थान्खम्मुला ओच्छे तहरी थान्बाएनोन मुला। 8 तर लेदा चा खालैसेन तहरी थान्बारी आखम। तिग्दा भिसम ले पापदेन लोड्बा खबा बिखसे प्लिड्बा कुटिसी आचिबा स्हे हिन्ना।

9 चुनोन लेसे य्हाडसे प्रभु परमेश्वर आबाला जयजयकार लमुला भिसम चुनोन लेसे परमेश्वरसे ह्हाडलान रुपरी स्होबा म्हिदाएनोन के:मुला। 10 चु सुडग्यामसेन मोलमएनोन पिन्मुला, म्हिदाएनोन के:मुला। तर डाला ज्योज्यो आले नाना आडागदे, चु चा य्हाडसे लबारी आतबा ताम हिन्ना। 11 तिग मुहान गिकग्यामसेन कम्बादेन डम्बा क्युड प्योला? 12 डाला ज्योज्यो आले नाना आडागदे, तिग अज्जीरला दोडरी जैतून रोला? ओच्छे अडगुरला दोडरी अज्जीर रोला? थेतबासेलमा कम्बा क्युड प्योला मुहानग्यामसेन खाड्मै डम्बा क्युड आप्यो।

थरी न्हीला ज्ञान बुद्धि

13 एनीगदे न्हडरी ज्ञान बुद्धि मुबादेन ताम घोबा म्हि खाल मुला? थेसे ह्हाडला ज्यबा बानीबेहोरग्याम बुद्धि मुबा सोजो म्हि तसी ज्यबा गे लसी उन्नी। 14 तर चुदे एनीगदेला सेमरी डाहदेन ईख थान्सी ह्हाडला जे ग्याम च्याजी भिसम एनीगदेसे बुद्धि मुला भिसी घमण्ड थालउ। चुह्ण्ड लसी ह्हाडसे ह्हाडदान बुद्धि मुला भिसी भ्रबा चा सत्य तामदा बिरोध लसी ह्हाडसे ह्हाडदान फट्टा स्होबा हिन्ना। 15 चुह्ण्डबा ज्ञान बुद्धि चा परमेश्वरग्याम खबा ज्ञान बुद्धि आहिन। तर जम्बुलिडला आज्यबा तामदेन म्हिला सेमग्याम ओच्छे शैतानग्याम खबा हिन्ना। 16 तिग्दा भिसम जुन ग्लारी डाहदेन ईख थान्सी ह्हाडला जे ग्याम च्याला, थेरी खाड्मै ढिक्सी चिआखम। थेरी जम्मान पाप गे जे तला।

17 तर परमेश्वरग्याम खबा ज्ञान बुद्धिला मुल ताम चा चोखो हिन्ना। ओच्छे शान्ति भबा, जम्मानदेन छ्याम ढिक्सी चिखम्बा, सोजो, दयासे प्लिड्बा, जम्मान गे ज्यबा लबा, खालैला ली च्यासी गे आलबादेन खालैदा चिप्ले ताम आलबा तमुला। 18 शान्ति भबागदेसे शान्तिरीन चिसी म्हिगदेला ओन्छाडरी परमेश्वरसे म्हन्बा अन्छारला गे लबान निला।

जम्बुलिडला स्हेगदेदा माया लबा

4 एनीगदे न्हडरी छेबा बड्बा तिग तामसे तना लबा हिन्ना? एनीगदेसे ह्हाड ह्हाड जे मोजमजा लड् भिसी म्हन्बा लोभ सेमसे लमान आहिन? 2 एनीगदेसे जुन स्हे म्हाडमुला थे आयाङ्गुला। थेतबासेलमा एनीगदेसे म्हि साड्मुला। एनीगदेसे ल्हानान लोभ लमुला, तर आयाङ्गुला। थेतबासेलमा

एनीगदे ह्हाड ह्हाड न्हडरीन छेबा बड्बा लमुला। एनीगदेसे जुन स्हे म्हाडमुला थे स्हे एनीगदेदेन छ्याम आरे। तिग्दा भिसम एनीगदेसे परमेश्वरदेन छ्याम आहीमुला। 3 हीसैनोन एनीगदेसे आयाङ्गुला। तिग्दा भिसम एनीगदेसे मोजमजा लबाला लागिरी आज्यबा सेम थोसी हीमुला।

4 विश्वास आरेबा म्हिगदे, जम्बुलिडला जम्मान स्हेदा माया लबा चा परमेश्वरदेन शत्रु स्होबा भिबा ताम एनीगदेदा था आरे? च्यागो, जुन म्हिसे जम्बुलिडला जम्मान स्हेदा माया लला थेसे ह्हाडसे ह्हाडदान परमेश्वरला शत्रु स्होला। 5 तिग बचनरी चुह्ण्ड भिसी भिबा ताम एनीगदेसे गे आखेल्ला ताम भिसी म्हन्बा? “परमेश्वरसे य्हाड न्हडरी थान्बा आत्मा चा ल्हानान डाहसे प्लिड्बा मुला।” 6 तर परमेश्वरसे थेह्ण्डबा डाह लबा आत्माग्याम फेबारी झन ल्हाना दयामाया लमुला। थेतबासेलमा परमेश्वरला बचनरी चुह्ण्ड भिसी भिबा मुला,

“परमेश्वरसे घमण्डीगदेदा बिरोध लला,

तर सोजो म्हिगदेदा चा दयामाया लला।” ††

7 थेतबासेलमा एनीगदे सदन परमेश्वरला तहरी चिउ, ओच्छे शैतानदा बिरोध लउ। जमाहेन्से थे एनीगदे मुबा ग्लायाम याला। 8 एनीगदे परमेश्वरला डामरी खउ, ओच्छे परमेश्वरएनोन एनीगदेला डामरी फेप्लला। थेतबासेलमा पापीगदे, आज्यबा गे लबा या चोखो स्होउ। ओच्छे सेम न्ही मुबा म्हिगदे, एनीगदेला सेम चोखो स्होउ। 9 एनीगदे दुख इहम्सी क्राबा क्रिड्बा लउ। एनीगदे ताड्सी ड्ये:बा भन्दा क्राबा क्रिड्बा लसी चिउ। 10 एनीगदे प्रभुला डाच्छा सोजो म्हि दोगो, ओच्छे थेसेन एनीगदेदा घेन म्हि स्होला।

स्हान्दोदा दोष थालउ

11 ज्योज्यो आले नाना आडागदे, एनीगदेसे गिकसेम गिकदा बिरोध लसी आज्यबा ताम थापाङ्गो। तिग्दा भिसम जुन म्हिसे ह्हाडला ज्योज्यो आले नाना आडादा बिरोध लसी दोष लला थेसे परमेश्वरला ठिमदा बिरोध लसी दोष लबा हिन्ना। चुदे एसे परमेश्वरला ठिमला दोष उन्जी भिसम ए ठिम अन्छार भ्रबा म्हि आहिन। तर ठिमला निसाफ लबा म्हि हिन्ना। 12 च्यागो, ठिम स्होबादेन निसाफ लबा मी परमेश्वर जे हिन्ना। थेदेन छ्याम जे नाश लबादेन थाना लबा शक्ति मुला। तर ह्हाडला खिम्जेमगदेदा दोष लबा एनीगदे चा खाल हिन्ना?

परमेश्वरसे म्हन्बा अन्छार भ्रउ

13 “तिनी न्हडगरनोन य्हाड शहर गिकरी निसी थेरीन तिदिड चिसी व्यापार लला। ओच्छे धन सम्पत्ति स्होला” भिसी पाड्बा म्हिगदे डाला ताम इयान्गो। 14 न्हडगर तिग तला भिबा ताम एनीगदेदा तिगेनोन था आरे। एनीगदेला जुनी तिग हिन्ना भिबा तामएनोन था आरे। च्यागो, एनीगदेला जुनी मी लड्बु ह्ण्डबान हिन्ना। थे छिन्नडरीन थोन्मुला छिन्नडरीन म्हामुला। 15 चुह्ण्ड भिबा भन्दा मी एनीगदेसे “चुदे परमेश्वरला सेम मुसम य्हाड सोसी चुह्ण्ड लला थेह्ण्ड लला” भिसी पाड्तो:मुबा। 16 तर दान्दे एनीगदे ल्हानान घमण्ड लसी धाक उन्मुला। चुह्ण्ड लसी धाक उन्बा चा पाप हिन्ना। 17 खालैसे ज्यबा लतो:ला भिसी था याड्सीनोन ज्यबा आलनी भिसम थेसे पाप लबा हिन्ना।

फ्युक्पो म्हिदा पाड्बा ताम

5 फ्युक्पो म्हिगदे, एनीगदेसे डाला ताम इयान्गो, एनीगदेथोरी खबारी छ्याड्बा दुखला लागिरी क्राबा क्रिड्बा लसी चिउ। 2 एनीगदेला धन सम्पत्ति नड्बा मुला ओच्छे क्वानगदे बुलुडसे चसी जिन्बा मुला। 3 ओच्छे एनीगदेला म्हर म्हुडरी खिया खबा मुला। थेनोन खियासे एनीगदेला दोष उन्ना। ओच्छे थेनोन खियासे एनीगदेला ल्हुड मेसे ह्ण्ड लसी क्रोसी नाश लला। तसैनोन परमेश्वरसे निसाफ लबा चु धिनरी एनीगदेसे ल्हानान धन सम्पत्ति सोसी थान्बा मुला। 4 एनीगदेसे ह्हाडला बुरी गे लबा म्हिगदेदा पिन्तो:बा ज्यालाएनोन पिन्बा आरे। च्यागो, थेनीगदेदा पिन्तो:बा ज्यालासेन

क्रिड्सी एनीगदेदा बिरोध लला। जम्मान भन्दा शक्तिशाली परमेश्वरसे बुरी गे लबागदे क्राबा क्रिड्बा लबा थे:सी जिन्बा मुला। ¹⁵ एनीगदेसे जम्बुलिडरी ल्हानान मोजमजा लसी चिबा मुबा, एनीगदेसे ह्वाडसे ह्वाडदान साइबाला लागिरी थान्बा जन्तु ह्वाड लसी छोना लसी थान्बा मुला। ⁶ एनीगदेदा बिरोध आलबादेन तिगै दोष आरेबा म्हिगदेदा एनीगदेसे दोष उन्सी साइजी।

जस्तोन दुख तसै नागो

⁷ थेतबासेलमा ज्योज्यो आले नाना आडागदे, प्रभु फेखबा धुइ आततेधोना भ्रान्सी चिउ। च्यागो, खेती लबा म्हिसे ज्यबा बाली याइला भिबा आश लसी सेख्देन बर्खला नाम आखतेधोना भ्रान्सी चिमुला।

⁸ एनीगदेएनोन थेह्वाड लसीन भ्रान्सी विश्वासरी कोड्सी चिउ। तिगदा भिसम प्रभु फेखबा धुइ खसी जिन्बा मुला। ⁹ ज्योज्यो आले नाना आडागदे, एनीगदे ह्वाड ह्वाड न्हडरी दोष थालउ। परमेश्वरसेनोन एनीगदेला दोष उन्सी निसाफ आल। तर च्यागो, निसाफ लबा चा म्नापरीन मुला।

¹⁰ ज्योज्यो आले नाना आडागदे, एनीगदेथोरी खबा दुख नासी चिबारी प्रभुला मिनग्याम ताम पाइबा अगमवक्तागदेसे नाबा दुखदा ढन्गो।

¹¹ थेनीगदेसे जम्मान दुख नाखम्बासे लमा य्हाडसे थेनीगदेदा मान लमुला। ओच्छे अय्यूबसेनोन जम्मान दुख नाखम्जी भिबा तामला बारैरी एनीगदेसे थे:बा मुला। थेह्वाड लसीन प्रभुसे लिच्छा अय्यूबदा दो:सी जम्मान स्हे पिन्जी भिबा ताम एनीगदेदा थानोन मुला। प्रभुसे ल्हानान माया उन्सी दया लमुला।

¹² डाला ज्योज्यो आले नाना आडागदे, जम्मान भन्दा घेन ताम चा एनीगदेसे स्वर्ग, जम्बुलिडदेन अर्गु तिगै स्हेला मिन किन्सी खाइमै घान

† 5:4 व्यव २४:१४-१५ †† 5:11 अय्यूब १:२१-२२; २:१०; भजन १०३:८

थाफागो। बरु “हिन्ना” भिसम “हिन्ना” भिउ “आहिन” भिसम “आहिन” भिउ। थेह्वाड लजी भिसम परमेश्वरला डाच्छा एनीगदेला तिगै दोष आत। ‡

विश्वासला प्रार्थना

¹³ एनीगदे न्हडरी खालैदा दुख तबा मुसम थेसे प्रार्थना लउ। ओच्छे खालै ताइबा मुसम थेसे परमेश्वरदा जयजयकार तबा व्हाइ गोउ। ¹⁴ थेह्वाड लसीन एनीगदे न्हडरी खालै आखम्बा मुसम थेसे मण्डलीदा च्याबा म्हिगदेदा इयोइगो। ओच्छे मण्डलीदा च्याबा म्हिगदेसे थे म्हिदा प्रभुला मिनरी छ्युगु फोर्सी प्रार्थना लगै। †¹⁵ विश्वास लसी लबा प्रार्थनासे आखम्बा म्हिदा खम्ना लला। ओच्छे प्रभुसे थेदा पूरान खम्ना लला। चुदे थेसे पापनोन लबा मुसै माफ याइला। ¹⁶ थेतबासेलमा एनीगदे ह्वाड ह्वाडसे लबा पापगदे गिकसेम गिकदा पाइगो। ओच्छे एनीगदे खम्बाला लागिरी गिकसेम गिकदा प्रार्थना लउ। च्यागो, परमेश्वरसे म्हन्बा अन्छार भ्रबा म्हिसे लबा प्रार्थना शक्तिशाली तमुला, ओच्छे थेग्याम उदेकला गे तमुला।

¹⁷ एलियाएनोन य्हाड ह्वाडान म्हि मुबा। थेसे नाम थाखगै भिसी सेमहेन्सेन प्रार्थना लमा सोम दिडसे ला दुधोना जम्बुलिडरी नाम आखनी। †¹⁸ दो:सी थेसे नाम खगै भिसी प्रार्थना लजी। जमाहेन्से नाम खसी बाली नाली ज्यबा तजी। ††

¹⁹ डाला ज्योज्यो आले नाना आडागदे, एनीगदे न्हडरी खालै म्हिसे सत्य ग्याम खलासी निमा खालैसे थेदा दो:सी भजी भिसम, ²⁰ थेसे चु ताम थाम्ले:गै, जुन म्हिसे आज्यबा ग्यामरी भ्रबा पापी म्हिदा दो:सी भला थेसे थेदा सिबाग्याम जोगब लला, ओच्छे ल्हानान पापगदेला पापला दोष मेटब तला। †††

‡ 5:12 मत्ती ५:३४-३७ †† 5:14 मर्कू ६:१३ †† 5:17 १ राजा १७:१; १८:१ ††† 5:18 १ राजा १८:४२-४५ ††† 5:20 हितो १०:१२; १ पत्रु ४:८

चु चिठीला बारेरी पाडतो:मा

येथूला मुल चेला पत्रुससे भिबा मुबा (१ पत्रुस १:१)। चु चिठी भिबाला लागिरी पत्रुसदा सिलाससे हो लबा मुबा (१ पत्रुस ५:१२)।

चु चिठी “बेबिलोन” शहरग्याम भिबा मुबा भिसी पाड्बा मुला (१ पत्रुस ५:१३)। बाइबलला ल्हानान विद्वानगदेसे बेबिलोन शहर भिबा चा रोम शहर हिन्ना भिसी पाड्मुला।

ओस्पन ईश्वी संवत् ६०-६४ (विक्रम संवत् ११७-१२१) सालला गुडरी भिबा मुबा।

एशिया अज्वलला न्हुपपट्टिला ग्लारीक्यार ससा बडबड तसी चिबा येथूदा विश्वास लबागदेदा भिबा मुबा।

चु चिठीरी विश्वास लबागदेदा “परमेश्वरसे धम्बा म्हिगदे” भिसी पाड्बा मुला। चु चिठी भिबा चा चु चिठी पढब लबागदेसे आँट याड्गै भिसी हिन्ना। तिग्दा भिसम ख्रीष्टदा विश्वास लबासे लमा थेनीगदे दुख नासी चिबा मुबा। चुहड् लसी आँट पिन्मा पत्रुससे थेनीगदेदा येथू ख्रीष्टला बारेरी थार्बा पिन्बा समाचार, येथू सिबादेन सिबाग्याम सोबा ताम ओच्छे येथू दोःसी फेप्लला भिबा कबुल ढन्ना लबा मुला। थेनीगदेसे याड्बा दुख चा थेनीगदेसे लबा विश्वासदा कोड्बा स्होबा ताम हिन्ना। ओच्छे थेनीगदेसे ख्रीष्ट फेप्लबा धिनरी इनाम याड्गला भिसी दुक्क तसी थे दुख नातोःला भिसी पाड्बा मुला। पत्रुससे चु चिठी पढब लबागदेदा दुखला धुडरी आँट पिन्बान ख्रीष्टला म्हिगदे हड्बान दोसी भ्रउ भिसी बिन्ती लबा मुला।

मुल तामगदे

प्याफुल्बा १:१-२

खाड्मै आसिबा आश १:३-१२

तिगै दोष आरेबा म्हि दोगो १:१३-२:१०

दुखला धुडरी ख्रीष्टदा विश्वास लबागदेसे लतोःबा गे २:११-४:१९

ख्रीष्टदा विश्वास लबागदे सोजो तसी लतोःबा गे ५:१-११

चिठीला थुमरी भिबा ताम ५:१२-१४

पत्रुससे भिबा डाच्छारेमला चिठी

१ लास्सो, पोन्टस, गलातियादेन कापाडोकिया ओच्छे एशियादेन बिथिनिया भिबा ग्लारी † क्यार यार्सी ससा बडबड तसी परदेशी दोसी चिबा परमेश्वरसे धम्बा म्हिगदेदा डा येथू ख्रीष्टला मुल चेला पत्रुसग्याम प्याफुल्ला।

२ परमेश्वर आबासे डाच्छाहेन्सेन म्हन्बा अन्छार थेला आत्मासे एनीगदेदा हाडलान म्हि स्होबारी धम्बा मुला। थेतबासेलमा एनीगदेसे येथू ख्रीष्टसे कुल्बा ताम इयान्नी भिसी एनीगदेदा थेला काग्याम तिगै दोष आरेबा म्हि स्होबा मुला।

एनीगदेदेन छ्याम परमेश्वरला दयामायादेन शान्ति ल्हानान तगै।

खाड्मै आसिबा आश

३ य्हाडला प्रभु येथू ख्रीष्टला आबा परमेश्वरला जयजयकार तगै। तिग्दा भिसम परमेश्वरसे येथू ख्रीष्टदा सिबाग्याम सोना लसी य्हाडदा ल्हानान दया लबासे लमा य्हाडसे छार जुनी याड्बा मुला। दान्दे य्हाडदेन छ्याम खाड्मै आसिबा आश मुला। ४ थेहड् लसीन एनीगदेला लागिरी परमेश्वर आबासे खाड्मै नाश आतबा, म्हासी आनिबा, न्होड्सी आनिबा मोलमगदे स्वर्गरी ठीक लसी थान्बा मुला। ५ ओच्छे एनीगदेसे लबा विश्वासग्याम परमेश्वरला शक्तिसे एनीगदेदा थार्ना लबाला लागिरी जोगब लसी थान्ना। चु ताम चा एनीगदेसे परमेश्वरसे निसाफ लबा धुडरी म्हाड्गला।

† पोन्टस, गलातियादेन कापाडोकिया ओच्छे एशियादेन बिथिनिया भिबा ग्लगदे डाच्छा रोम य्हुल्सारी परब तमुबा। तर दान्दे चा चु जम्मान ग्लगदे टर्की भिबा य्हुल्सारी परब तमुला।

६ दान्दे एनीगदेसे तिगै धिनना लागिरी ल्हानान थरीला दुख नातोःसै जमा धुडरी एनीगदे ताड्गला। ७ एनीगदेसे चुहड् लसी दुख नाबा चा एनीगदेसे लबा विश्वास सत्य हिन्ना भिसी उन्बाला लागिरी हिन्ना। नाश तसी निबा म्हरदा मी म्हर हिन्ना कि आहिन भिसी था याड्बाला लागिरी मेरी खाड्गुला भिसम एनीगदेला विश्वास मी थे म्हर भन्दा ग्रेन हिन्ना। थेहड्बा विश्वाससे लमा येथू ख्रीष्ट दोःसी फेप्लमा एनीगदे उदेक तला। जमा धुडरी एनीगदेसे थेदेन छ्यामनोन मानदेन इज्जत याड्गला, ओच्छे एनीगदेदा ज्यबा म्हि भिसी पाड्गला।

८ एनीगदेसे येथू ख्रीष्टदा आम्राड्सैनोन माया लबा मुला। दान्दे एनीगदेसे थेदा आम्राड्सैनोन विश्वास लबा मुला। ओच्छे एनीगदे गाते ताड्गला भिबा तामदेन एनीगदेसे परमेश्वरदा गाते मानदेन जयजयकार लला भिबा ताम खालैसेन पाड्बारी आखम। ९ एनीगदेसे लबा विश्वासग्याम याड्बा इनाम चा एनीगदे थार्बा हिन्ना।

१० परमेश्वरसे एनीगदेदा लबा दयामायाला बारेरी अगमवक्तागदेसे डाच्छान पाड्सी जिन्बा मुबा। ओच्छे एनीगदेसे याड्बा चु थार्बाला बारेरी थेनीगदेसे ल्हानान इयोड्बा छार्बा लमुबा। ११ थे अगमवक्तागदेसे चु खाहड् लसी तला, खाड्मा तला भिसी इयोड्बा छार्बा लमुबा। थेतबासेलमा थेनीगदेदा ख्रीष्टला आत्मासे †† डाच्छा थार्बा पिन्बा ख्रीष्टसे दुख नातोःला, ओच्छे थेसे दोःसी ल्हानान मान याड्गला भिबा ताम डाच्छान पाड्सी जिन्बा मुबा। १२ अगमवक्तागदेसे थे धुडरी पाड्बा ताम हाडला लागिरी आहिन, तर एनीगदेदान लागिरी पाड्बा हिन्ना भिसी परमेश्वरसे थेनीगदेदा घोना

†† चु पदरी “ख्रीष्टला आत्मा” पाड्बा चा परमेश्वरला आत्मा भिबा हिन्ना।

लमुबा। चु ताम स्वर्ग्याम पुडखबा परमेश्वरला आत्म्याम पाड्बागदेसे दान्दे एनीगदेदा थार्बा पिन्बा समाचार थे:ना लबा मुला। चु ताम स्वर्गदूतगदेसेनोन च्याबारी ल्हानान सेम लमुला।

तिगै दोष आरेबा म्हि दोगो

13 थेतबासेलमा एनीगदेसे हाडला सेमदा तहरी थान्सी तयार तउ। ओच्छे सोजो तसी येशू ख्रीष्ट दो:सी फेखबा धुइरी एनीगदेदा गाते दयामाया लला भिबा तामरी पूरान आश लसी चिउ। 14 एनीगदे कुल्बा ताम ड्यान्बा कोलागदे तबासे लमा एनीगदेसे डाच्छा आसेना आघोना हाडला सेमसे म्हाइबा जम्मान आज्यबा तामगदे खलागो। 15 एनीगदेदा धम्बा परमेश्वर तिगै दोष आरेबा परमेश्वर हिन्ना। थेतबासेलमा एनीगदेला जम्मान तामगदेएनोन परमेश्वरला डाच्छा तिगै दोष आरेबा ततो:ला। 16 तिगदा भिसम परमेश्वरला बचनरी चुहड् भिसी भिबा मुला, “एनीगदे तिगै दोष आरेबा म्हि दोगो, तिगदा भिसम डा तिगै दोष आरेबा परमेश्वर हिन्ना।” †

17 खालैलान ली च्यासी आहिन, तर म्हिसे लबा गे अन्धार निसाफ लबा परमेश्वरदा एनीगदेसे आबा भिसी प्रार्थना लबासे लमा जम्बुलिडरी परदेशी दोसी चितेधोना एनीगदे परमेश्वर म्हाइसी लोङ्गो। 18 तिगदा भिसम आखे म्हेमेहेन्से तेन्सी खबा गे आखेल्बा रिमठिमग्याम एनीगदेदा फेबाला लागिरी परमेश्वरसे गाते ल्हानान पापला सय फाजी भिबा ताम एनीगदेदा थानोन मुला। थे सय चा नाश तसी निबा म्हर म्हुइग्याम फाबा सय हड्बा आहिन। 19 तर ग्लुसीन ग्लुबारी आखम्बा ख्रीष्टला काग्याम एनीगदेला पापला सय फासी एनीगदेदा थार्ना लबा हिन्ना। ख्रीष्ट बलि पिन्बा तिगै दोषदेन दाग आरेबा ग्यु बोगो हड्बान दोजी। 20 चुला लागिरी परमेश्वरसे ख्रीष्टदा जम्बुलिड स्होबा भन्दा डाच्छान धम्बा मुबा। तर चु लिच्छाला धुइरी †† एनीगदेदान लागिरी ख्रीष्ट फेखजी।

21 ख्रीष्ट येशूग्यामसेन एनीगदेसे परमेश्वरदा विश्वास लबा हिन्ना। थेनोन परमेश्वरसे ख्रीष्ट येशूदा सिबाग्याम सोना लसी जम्मान भन्दा घ्रेन मान पिन्जी। थेतबासेलमान एनीगदेसे परमेश्वरथोरी विश्वासदेन आश लमुला।

22 दाहेन्से एनीगदेसे सत्य ताम ड्यान्सी हाडला सेम चोखो स्होबा मुला। थेतबासेलमा एनीगदेसे हाडला ज्योज्यो आले नाना आडादा चोखो माया लमुला। ओच्छे गिकसेम गिकदाएनोन सेमहेन्सेन चोखो माया लउ। 23 तिगदा भिसम एनीगदेसे खाइमै नाश आतबादेन छोन्बो परमेश्वरला बचनग्याम नाश तसी निबा आहिन, तर नाश आतबा छार जुनी याड्बा मुला। 24 तिगदा भिसम परमेश्वरला बचनरी चुहड् भिसी भिबा मुला,

“जम्मान म्हिगदे छे हड्बान हिन्ना,

ओच्छे थेनीगदेला मानदेन जेबा हिरी खबा छेला म्हेन्दो हड्बा हिन्ना।

छे हेला ओच्छे म्हेन्दो ताडला।

25 तर प्रभुला बचन जुकजुकधोनान चिला।” †

दान्दे एनीगदेदा थे:ना लबा थार्बा पिन्बा समाचार चु बचननोन हिन्ना।

2 थेतबासेलमा एनीगदेसे जम्मान आज्यबा ताम, छल लबा, सेमरी पाप ताम थान्बा, डाह लबादेन स्हान्दोला तामगन लबा चु जम्मान ताम खलागो। 2 लैनु कोलासे इहे थुड्बारी म्हाइबा हड् लसी एनीगदेसे चा परमेश्वरला सत्य बचनदा म्हाइगो। तिगदा भिसम चु बचनग्यामसेन एनीगदे हाडसे याड्बा थार्बारी ल्हेबान निला। 3 प्रभुसे गाते ल्हाना दया लबा मुला भिबा ताम एनीगदेसे था याड्सी जिन्बा मुला। †

4 एनीगदे येशू मुबा ग्लारी खबान मुला, थे चा छोन्बो युडबा हिन्ना। थेदा म्हिगदेसे गे आखेल्बा युडबा भ्याड्बा हड् लसी भ्याड्बा। तर परमेश्वरसे थेदा धम्सी ग्लुसीन ग्लुबारी आखम्बा युडबा स्होजी। 5 एनीगदेएनोन छोन्बो युडबा हड्बान हिन्ना, परमेश्वरसे एनीगदेदा हाडला मन्दिर स्होबा मुला। परमेश्वरला लागिरी फेसी थान्बा पूजा लबा म्हिगदे दो:सी येशू ख्रीष्टग्याम एनीगदे परमेश्वरदा सेम निबा आत्माला बलि फुल्बा म्हि दोबा मुला। 6 तिगदा भिसम परमेश्वरला बचनरी चुहड् भिसी भिबा मुला, “च्यागो, डाइ ग्लुसीन ग्लुबारी आखम्बा सुर युडबा धम्सी

सियोन † भिबा ग्लारी थान्बा मुला।

जुन म्हिसे थेदा विश्वास लला

थे म्हि खाइमै पे:आतो:।” ††

7 थेतबासेलमा विश्वास लबागदेला लागिरी येशू ख्रीष्ट ग्लुसीन ग्लुबारी आखम्बा युडबा दोजी। तर विश्वास आलबागदेला लागिरी चा बचनरी भिबा चु ताम ढिक्मुला,

“जुन युडबा दिम स्होबा म्हिगदेसे गे आखेल्बा युडबा भिसी भ्याड्जी, थेनोन युडबा चा दिमला सुर युडबा दोजी।” ††

8 ओच्छे

“म्हिगदेदा तोड्बा युडबा चुनोन हिन्ना।

ल्हानान म्हिगदे तोड्सी पापला।”

परमेश्वरसे कुल्बा तामरी विश्वास आलबासे लमान थेनीगदे पापला। थेनीगदे चुहड् तबा चा परमेश्वरसे म्हन्बा अन्धारनोन हिन्ना। §

9 तर एनीगदेदा धोपधोपग्याम हाडला उदेकला य्हालरी भबा परमेश्वरसे थेला उदेकला गे स्हान्दो म्हिगदेदा पाड्बाला लागिरी एनीगदेदा थेसे धम्बा म्हि, जम्मानथोरी शासन लबा परमेश्वरला मन्दिररी पूजा लबा म्हि, ओच्छे परमेश्वरला लागिरी जे फेसी थान्बा य्हुलदेन हाडलान सन्तान स्होजी। ††

10 डाच्छा एनीगदे परमेश्वरला सन्तान आहिनमुबा।

तर दान्दे एनीगदे परमेश्वरला सन्तान दोबा मुला।

डाच्छा एनीगदेसे दया आयाड्मुबा।

तर दान्दे एनीगदेसे दया याड्बा मुला। †††

परमेश्वरदा तेन्बा म्हि

11 डाला सेम निबा ह्योगदे, एनीगदे चु जम्बुलिडला लागिरी विदेशीदेन परदेशी हिन्ना। थेतबासेलमा एनीगदेदा न्होड्ना लबारी, सेमसे लबारी म्हाइबा आज्यबा गेगदे थालउ भिबा डाला बिन्ती मुला। 12 ओच्छे ख्रीष्टदा विश्वास आलबा म्हिगदेला गुडरी एनीगदेला बानीबेहोर ज्यबा तगै। तिगदा भिसम खालैसे एनीगदेदा बिरोध लसी आज्यबा ताम पाड्सैनोन एनीगदेसे लबा ज्यबा गेगदे थेनीगदेसे म्हाइला। चुहड् लजी भिसम ख्रीष्ट निसाफ लबारी फेखबा धुइरी थेनीगदेसे एनीगदेला ज्यबा बानीबेहोर म्हाइसी परमेश्वरला मानदेन जयजयकार लला।

शासन लबागदेदेन मालिकगदेला तहरी चिउ

13 म्हिगदेसे य्हुल्सा चलब लबारी स्होबा रिमठिम मुसैनोन जम्मान भन्दा घ्रेन ग्ले मुसैनोन प्रभुला लागिरी एनीगदे थेनीगदेला तहरी चिउ। 14 थेहड् लसीन य्हुल्सा चलब लबा म्हिगदेला तहरीनोन चिउ। तिगदा भिसम आज्यबा गे लबागदेदा सजाय पिन्बारीदेन ज्यबा गे लबागदेदा मान पिन्बारी परमेश्वरसेन थेनीगदेदा धम्बा हिन्ना। 15 तिगदा भिसम एनीगदेसे लबा ज्यबा गे म्हाइसी मूर्ख म्हिगदेसे आघोना पाड्बा आतो:बा तामगदे खलागै भिसी परमेश्वरसे म्हन्बा मुला। 16 थेतबासेलमा एनीगदे खालैला नोकर तबा हड् लसी थाभ्रउ, तिगदा भिसम परमेश्वरसे एनीगदेदा थार्ना लबा मुला। तर परमेश्वरसे थार्ना लजी भिदेमा आज्यबा गे चा थालउ। बरु परमेश्वरदा तेन्बा म्हिगदे हड् तसी भ्रउ। 17 ओच्छे जम्मान म्हिगदेदा मान लउ। थेहड् लसीन येशू ख्रीष्टदा विश्वास लबा ज्योज्यो आले नाना आडागदेदा माया लउ। ओच्छे परमेश्वर म्हाइसी लोङ्गो। ग्लेदाएनोन मान लउ। ††

ख्रीष्टसे हड् लसीन दुख नागो

18 नोकरगदे, एनीगदेसे हाड हाडला मालिकगदेदा मान लसी थेनीगदेला तहरी चिउ। एनीगदेदा दया लबा मालिकगदेदा जे आहिन, तर दया आरेबा मालिकगदेदाएनोन मान लउ। 19 खालै म्हिसे हाडसे नाआतो:बा दुख परमेश्वरसे म्हन्बा ताम ढन्सी नाजी भिसम थे म्हाइसी परमेश्वर ताड्ला।

†† “सियोन” भिबा चा यरूशलेम हिन्ना। ††† 2:6 यशै २८:१६ ††† 2:7

भजन ११८:२२ § 2:8 यशै ८:१४-१५ † 2:9 प्रस्था १९:५-६; यशै ४३:२०-२१; व्यव ४:२०; ७:६; १४:२; तीत २:१४; यशै ९:२ ††† 2:10 होशै २:२३ †† “ग्ले” भिबा चा शासन लबा म्हि हिन्ना।

† 1:16 लेवी ११:४४-४५; १९:२ †† “लिच्छाला धुइ” भिबा चा डाच्छा ख्रीष्ट फेखमाहेन्से दो:सी फेखबा धुइधोना पाड्बा हिन्ना। † 1:25 यशै ४०:६-८ †† 2:3 भजन ३४:८

20 तिग्दा भिसम एनीगदेसे आज्यबा गेरी दुख नासी तिग याइला? तर एनीगदेसे ज्यबा गे लसीनोन दुख नाजी भिसम एनीगदे परमेश्वरला डाच्छा ज्यबा म्हि दोला। ²¹ चुलान लागिरी परमेश्वरसे एनीगदेदा धम्बा हिन्ना। तिग्दा भिसम ख्रीष्टसेनोन एनीगदेला लागिरी दुख नासी उन्जी। थेतबासेलमा एनीगदेएनोन ख्रीष्टसे उन्बा ग्यामरी भ्रबारी तयार ततो:ला।

²² “थेसे तिगै पाप आलनी,

ओच्छे थेसे खालैदा छलएनोन आलनी।” †

²³ म्हिगदेसे जस्तोन हेला लसीनोन ख्रीष्टसे थेनीगदेदा हेला आलनी। ओच्छे जस्तोन दुख पिन्सैनोन थेसे खालैदा तिगै आलनी। तर थेसे खालैला ली आच्याना ठीक निसाफ लबा परमेश्वरथोरी भर लजी। ††

²⁴ य्हाडसे पाप लबा ख्लासी परमेश्वरदा सेम निबा म्हि दोगै भिसी ख्रीष्टसे य्हाडला जम्मान पाप हाडलान ल्हुइरी पुइसी कुसरी टाँगब लजी।

थेनोन ख्रीष्टला घाउगदेग्याम एनीगदे खम्बा मुला। †

²⁵ डाच्छा एनीगदे गोठालो आरेबा ग्युगदे ह्ङनोन ससा बडबड तबा मुबा। तर दान्दे एनीगदे हाडला आत्मादा वास्ता लबा गोठालो मुबा ग्लारी दो:सी खबा मुला। ††

मिडदेन हेम्बोसे लोपतो:बा ताम

3 थेह्ङ लसीन मिडम्हेमेगदे, एनीगदे हाड हाडला हेम्बोला तहरी चिउ। चुह्ङ लजी भिसम एनीगदेसे प्रभुला बारेरी तिगै ताम आपाडसैनोन एनीगदेला ज्यबा बानीबेहोरसे लमा परमेश्वरला बचन आड्यान्बा हाड हाडला हेम्बोला सेम ढाला। ††2 तिग्दा भिसम एनीगदेसे लबा मानदेन एनीगदेला चोखो बानीबेहोर थेनीगदेसे म्हाडला। ³ एनीगदे म्हिदा उन्बाला लागिरी म्हर म्हुइदेन ज्यबा ज्यबा क्वान क्वान्सी क्रा स्होसी ज्योसी थाभ्रउ। ††4 बरु एनीगदेला सेमरी चा खाइमै नाश आतबा ज्यबा शीलस्वभाव थोबादेन सोजो तसी चिउ। चु चा परमेश्वरला डाच्छा ल्हानान ज्यबा ताम हिन्ना। ⁵ तिग्दा भिसम परमेश्वरथोरी आश थान्सी परमेश्वरदा तेन्बा डाच्छा डाच्छाला मिडम्हेमेगदेएनोन हाड हाडला हेम्बोला तहरी चिसी चुह्ङ लसीन ज्योमुबा। ⁶ सारासे खाह्ङ लसी हाडला हेम्बो अन्नाहामदा मालिक भिसी थेसे कुल्बा ताम ड्यान्मुबा। थेह्ङ लसीन एनीगदेसे हाडला हेम्बो म्हाडसी आलोड्ना ज्यबा लजी भिसम एनीगदे सारालान झामेगदे दोला। †††

⁷ थेह्ङ लसीन हेम्बोसेनोन जम्मान म्हि साप्राला ताड ह्ङबान कमजोर मुला भिबा ताम घोउ। थेतबासेलमा हाडला मिडदा हाड भन्दा कमजोर म्हन्सी मान लउ। तिग्दा भिसम परमेश्वरला दयामायाग्याम याड्बा जुनीरी थेनी गिकनोन हिन्ना। थेतबासेलमा प्रार्थना लमा तिगै तामसे रोकब थालगै भिसी गिकसेम गिकदा ज्यबा व्यवहार लउ। †

ज्यबा गे लमा नातो:बा दुख

⁸ दाहेन्से एनीगदे जम्मान सेम गिक तसी चिउ। ओच्छे स्हान्दोदा तबा दुख हाडदान तबा ह्ङबान म्हन्गो, हाडला ज्योज्यो आले नाना आडादा ह्ङ लसी माया लउ ओच्छे सोजो तसी चिबादेन ज्यबा बानीबेहोर थोगो। ⁹ खालैसे आज्यबा लसैनोन एनीगदेसे थेनीगदेदा आज्यबा थालउ। ओच्छे के:बागदेदा एनीगदेसे थाके:गो। बरु थेनीगदेदा मोलम पिन्गो। तिग्दा भिसम एनीगदेसे मोलम याड्गै भिसी परमेश्वरसे एनीगदेदा ड्योड्बा हिन्ना। ¹⁰ तिग्दा भिसम परमेश्वरला बचनरी चुह्ङ भिसी भिबा मुला,

“जुन म्हिसे हाडला ल्हुइदा माया लबादेन

सुखला धिन च्याबा सेम लला

थेसे पाप तामदेन लुसीला ताम पाड्बा खलातो:ला।

¹¹ थेसे आज्यबा गे लबा ख्लासी ज्यबा गे लगै,

ओच्छे शान्ति म्हाडसी शान्तिलान लागिरी गे लगै।

¹² तिग्दा भिसम प्रभुसे म्हन्बा अन्धारला गे लबा म्हिदा वास्ता लसी

थेनीगदेला प्रार्थना सान्मुला।

तर आज्यबा गे लबागदेदा परमप्रभुसे बिरोध लमुला।” ††

¹³ चुदे एनीगदेसे ज्यबा गे लबा सेम मुजी भिसम एनीगदेदा खाल्से न्होड्ना लला? ¹⁴ तर ज्यबा गे लमाएनोन दुख नातो:जी भिसम परमेश्वरग्याम एनीगदेसे मोलम याड्ला। थेतबासेलमा एनीगदे खालै म्हाडसी लोड्आतो:, ओच्छे सुदाएनोन लआतो:। ¹⁵ बरु ख्रीष्टदा प्रभु हिन्ना भिसी एला सेमहेन्सेन थेदा मान लउ। ओच्छे एनीगदेसे लबा आशला बारेरी खालै म्हिसे ड्योड्जी भिसम पाड्बारी सदन तयार तसी चिउ। ††16 तर थेनीगदेदा पाड्बा धुइरी सोजो तसी थेनीगदेदा मान लसी पाड्गो। ओच्छे एनीगदेला सेमदा सदन चोखो थान्गो। थेह्ङ लजी भिसम एनीगदेसे ख्रीष्टदा विश्वास लबासे लमा याड्बा ज्यबा बानीबेहोर म्हाडसी एनीगदेदा बिरोध लसी हेला लबागदे हाडनोन पे:ला। ¹⁷ चुदे परमेश्वरसे चुह्ङबान म्हन्बा मुसम आज्यबा गे लसी दुख नाबा भन्दा मी ज्यबा गे लसी दुख नाबान ज्यबा हिन्ना।

¹⁸ तिग्दा भिसम य्हाडला पापला लागिरी ख्रीष्ट तरेम सदनना लागिरी दुख नासी सिजी। थेसे खाइमै पाप आलनी, तर पापीगदेदा परमेश्वर मुबा ग्लारी भोबारी सिजी। थे ल्हुइरी सिसी निसै थेदा परमेश्वरसे आत्मारी सोना लजी। ††

¹⁹ थेनोन आत्माला शक्तिरी ख्रीष्ट फेप्सी च्युप्सी थान्बा आत्मागदेदाएनोन थार्बा पिन्बा समाचार थे:ना लजी। ²⁰ थे आत्मागदे चा ओन्मा नोआ भिबा म्हिसे पानी जहाज स्होबा धुइरी हाड हाडला पाप ख्लासी हाड मुबा ग्लारी खला वा भिसी परमेश्वरसे भ्रान्सी चिबा म्हिगदे मुबा। तर थेनीगदेसे परमेश्वरसे कुल्बा ताम आड्यान्नी। थेतबासेलमा पानी जहाजरी मुबा म्हि भे जे नामदेन भालग्याम जोगब तजी। ††21 थे नामदेन भाल चा बप्तिस्माला चिनु हिन्ना। चु बप्तिस्मा चा ल्हुइला खिदि भ्याड्बारी नुहाब लबा ह्ङबा आहिन, तर य्हाडला सेम चोखो स्होबाला लागिरी परमेश्वरसे य्हाडदेन छ्याम लबा कबुल हिन्ना। येशू ख्रीष्ट सिबाग्याम सोबासे लमा बप्तिस्मा चा एनीगदे थार्बाला चिनु हिन्ना। ²² येशू ख्रीष्ट स्वर्गरी फेप्जी, ओच्छे स्वर्गदूतगदे, शासन लबागदेदेन शक्तिगदेदा हाडला तहरी थान्सी परमेश्वरला दाहिने छ्यापट्टि मुबा ठिरी धन्ड्याबा मुला।

परमेश्वरला लागिरी सोउ

4 थेतबासेलमा ख्रीष्टसे खाह्ङ लसी ल्हुइरी दुख नाजी एनीगदेएनोन थेह्ङबान दुख नाबारी तयार तउ। तिग्दा भिसम जुन म्हिसे ल्हुइरी दुख नाला थेसे पाप लबा खलाला। ² दाहेन्से थे म्हि थेसे म्हन्बा आज्यबा ताम अन्धार आहिन, तर चु ल्हुइ सोतेधोना परमेश्वरसे म्हन्बा अन्धार भ्रला। ³ डाच्छा मी एनीगदे परमेश्वरदा डोआसेबा म्हिगदे ह्ङबान स्हान्दोदेन छ्याम ब्रेल्सी भ्रबा, सेमरी जे लइ म्हन्बा थेनोन लसी भ्रबा, ड्योड्बा स्हे थुड्सी मोजमजा लसी भ्रबादेन मूर्तिदा परमेश्वर भिसी ल्हानान पूजा लसी नइबा खबा गे लसी भ्रजी।

⁴ ख्रीष्टदा विश्वास आलबागदे दान्दे एनीगदेसे थेनीगदेदेन छ्याम आज्यबा गे आलबा म्हाडसी उदेक तबा मुला। ओच्छे एनीगदेला बिरोध लमुला। ⁵ तर सोबागदेदेन सिबागदेला निसाफ लबारी तयार तसी धन्ड्याबा परमेश्वरदा थेनीगदेसे हाड हाडसे लबा गेला हिसाब उन्तो:ला। ⁶ थेतबासेलमान सिबागदेदा थार्बा पिन्बा समाचार थे:ना लबा हिन्ना। जम्बुलिडरी मुबा स्हान्दो म्हिगदेदा ह्ङनोन सिबा म्हिगदेदाएनोन ल्हुइरी मुबा धुइरी निसाफ लबा मुबा। तसैनोन आत्मारी परमेश्वर ह्ङ लसीन सोगै भिसी सिबागदेदाएनोन थार्बा पिन्बा समाचार थे:ना लबा हिन्ना।

⁷ जम्मान ताम नाश तबा धुइ खसी जिन्बा मुला। थेतबासेलमा एनीगदे प्रार्थना लबाला लागिरी हाडला सेम खीसी होशियार तसी चिउ। ⁸ जम्मान भन्दा घ्रेन ताम चा हाड हाड न्हडरी सेमहेन्सेन माया लसी ठिक्सी चिबा हिन्ना। तिग्दा भिसम मायासे ल्हानान थरीला पापगदे माफ लमुला।

⁹ एनीगदेसे हाड हाडला दिमरी खबा डोन्बोदा आछेर्ना क्योड्गो।

† 2:22 यशै ५३:९ †† 2:23 यशै ५३:७ † 2:24 यशै ५३:५ †† 2:25 यशै ५३:६ †† 3:1 एफि ५:२२; कल ३:१८ ††† 3:3 १ तिमो २:९ ††† 3:6 उत्प १८:१२ § 3:7 एफि ५:२५; कल ३:१९

§† 3:12 भजन ३४:१२-१६ §†† 3:15 मती ५:१०; यशै ८:१२-१३ § † “पापीगदे” भिबा चा ख्रीष्टदा बिरोध लसी हेला लबा म्हिगदे हिन्ना (१ पत्रुस ३:१६ स्हीगो)। §†† 3:20 उत्प ६:१-७:२४

10 एनीगदेसे परमेश्वरला दयामायग्याम थरी थरीला मोलमगदे याड्बा मुला। एनीगदेसे थें मोलम अन्धार गिकसेम गिकला लागिरी गे लउ। †11 चुदे खालैसे ताम पाड्बा मोलम याड्बा मुसम थेंसे परमेश्वरसे पाड्बा अन्धार पाड्गै, चुदे खालैसे ह्यो लबा मोलम याड्बा मुसम थेंसे परमेश्वरसे पिन्बा शक्तिग्याम ह्यो लगै। थेतबासेलमा जम्मान तामदेन येशू ख्रीष्टग्याम परमेश्वरला मानदेन जयजयकार तगै। थेदा सदन जम्मान मानदेन जयजयकार ओच्छे शक्ति तगै। आमेन।

ख्रीष्टदा विश्वास लबासे लमा तबा दुख

12 डाला सेम निबा ह्योगदे, ल्हानान दुख तबा धुडरी चु खाड्मै आतबा ताम तजी भिसी उदेक थाम्हन्गो। तिगदा भिसम चु चा एनीगदेला विश्वास खाह्ण्ड्बा मुला भिसी च्याबा हिन्ना। 13 बरु ख्रीष्टसे नाबा दुख य्हाड्सेनोन नाम्याड्जी भिसी ताङ्गो। तिगदा भिसम ख्रीष्टला घेन शक्ति म्राङ्गा एनीगदे ल्हानान ताड्म्याड्ला। 14 चुदे ख्रीष्टदा विश्वास लबासे लमा खालैसे एनीगदेला बेड्ज्जत लजी भिसम एनीगदेसे ह्याड परमेश्वरग्याम मोलम याड्बा म्हे भिसी म्हन्गो। तिगदा भिसम परमेश्वरला आत्माला घेन य्हालदेन शक्ति एनीगदेदेन छ्याम तला। 15 तर म्हे साड्बा, य्हो लबा, आज्यबा गे लबादेन म्हेला गेरी या झाड्बा म्हेगदेसे नाबा ह्ण्ड्बा दुख एनीगदे न्हडरी खालैसेन थानागो। 16 तर खालैसे ख्रीष्टियान तबासे लमा दुख नामुला भिसम थापे:गो। बरु ख्रीष्टला लागिरी दुख नाम्याड्जी भिसी परमेश्वरला जयजयकार लगै। 17 तिगदा भिसम निसाफ लबा धुड तसी जिन्बा मुला, परमेश्वरसे निसाफ लमा डाच्छा ह्याडलान म्हेगदेला लला। चुदे य्हाड्दान डाच्छा निसाफ लबारी चुला भिसम परमेश्वरला समाचार थें:सीनोन विश्वास आलबागदेला गति खाह्ण्ड्बा तला? 18 परमेश्वरला बचनरी चुह्ण्ड् भिसी भिबा मुला,
“परमेश्वरला डाच्छा ज्यबा म्हेदा मी थाना लबारी चुह्ण्ड्बा गाह्यो मुला भिसम

परमेश्वरदा आतेन्बादेन पापी म्हेगदेला गति झन खाह्ण्ड्बा तला?” ††

19 थेतबासेलमा परमेश्वरसे म्हन्बा अन्धार दुख नाबागदेसे ज्यबा गे लबारी थाखलागो। ओच्छे ह्याडला आत्मा जम्मान स्हे स्होबा विश्वास लखम्बा परमेश्वरदा जिम्मा पिन्गो।

मण्डलीदा च्याबा म्हेगदेदेन भ्योनगदेसे लोप्टो:बा ताम

5 थेतबासेलमा एनीगदे न्हडला मण्डलीदा च्याबा म्हेगदेदा डाड चु बिन्ती लला। तिगदा भिसम डाएनोन ख्रीष्टसे नाबा दुख म्राङ्बा मण्डलीदा च्याबा म्हे हिन्ना। थेह्ण्ड् लसीन ख्रीष्ट दो:सी फेख्ममा थेंसे याड्बा य्हालदेन शक्ति डाइनोन याड्ला। 2 परमेश्वरसे एनीगदेला विश्वासरि खलासी पिन्बा थेला म्हेगदेदा गोठालोसे ग्युगदेदा च्याबा ह्ण्ड् लसी ज्यना

† 4:10 हितो ११:३१ †† 4:18 हितो ११:३१

लसी च्यागो। चु गे टाड्गाला लोभदेन करसे आहिन, तर ह्याडला सेमहेन्से ताड्सी ताड्सी लउ। तिगदा भिसम चु परमेश्वरसे म्हन्बा ताम हिन्ना। †3 एनीगदेदा जिम्मा पिन्बा म्हेगदेदा एनीगदेसे ह्याडला तहरी थान्बारी थाम्हाड्गो। तर एनीगदेसे डाच्छा थेंनीगदेला लागिरी ज्यबा गे लसी उन्गो। 4 थेह्ण्ड् लजी भिसम मुल गोठालो येशू ख्रीष्ट फेख्ममा एनीगदेसे खाड्मै आन्होड्बा झक्झक्बा मुकुट याड्ला।

5 थेह्ण्ड् लसीन भ्योन म्हेगदे गन्बागदेला तहरी चिउ। ओच्छे एनीगदे जम्मान ह्याड ह्याड न्हडरी सोजो तसी गिकसेम गिकला ताम ड्यान्सी चिउ। तिगदा भिसम परमेश्वरला बचनरी चुह्ण्ड् भिसी भिबा मुला,

“परमेश्वरसे घमण्ड लबा म्हेगदेदा बिरोध लमुला,

तर सोजो म्हेगदेदा दयामाया लमुला।” ††

6 थेतबासेलमा एनीगदे ह्याडनोन सोजो तसी परमेश्वरला घेन शक्तिला तहरी चिउ। ओच्छे धुड तमाहेन्से परमेश्वरसे एनीगदेदा म्हेगदेला गुडरी मान याड्बा म्हे स्होला। जमाहेन्से एनीगदेसे मान याड्ला। †7 एनीगदेला जम्मान धन्दा सुर्दा परमेश्वरथोरी थान्गो। तिगदा भिसम परमेश्वरसेन एनीगदेदा वास्ता लला।

8 तसैनोन एनीगदे सदन होशियार तसी छोर्सी चिउ। तिगदा भिसम एनीगदेला शत्रु शैतान खाल्दा स्याप्ला थेंदान चतो:ला भिसी ड्हासी भ्रबा च्यानसे ह्ण्ड् लसी म्हाड्सी भ्रमुला। 9 थेतबासेलमा विश्वासरि कोड्सी थें शैतानना बिरोध लउ। तिगदा भिसम जम्बुलिड नाडलान विश्वासीगदेसेनोन एनीगदेसे नाबा ह्ण्ड्बान दुख नाबान मुला भिबा ताम एनीगदेदा थानोन मुला।

10 जम्मान दयामायासे प्लिड्बा परमेश्वरसे एनीगदेदा ख्रीष्ट येशूदेन छ्याम गिक स्होसी जुकजुकधोना चिबा ह्याडला य्हालदेन शक्तिरी ड्योड्बा मुला। एनीगदेसे तिगै धिन दुख नामाहेन्से परमेश्वरसेन एनीगदेदा पाको म्हे स्होला, ओच्छे एनीगदेला विश्वास कोड्ना लला। 11 जम्मान शक्तिदेन शासन सदन परमेश्वरलान हिन्ना। आमेन।

चिठीला थुमरी भिबा ताम

12 परमेश्वरला जम्मान सत्य दयामाया एनीगदेदा घोना लबारीदेन आँट पिन्बारी डाड विश्वास लखम्बा आले सिलासदा चु चिठीरी जजाकी ताम भ्रिपुड्बा हिन्ना। परमेश्वरला चु दयामायारी एनीगदे कोड्सी चिउ। †††

13 एनीगदेदा ह्ण्ड्नोन परमेश्वरसे धम्बा चु बेबिलोन भिबा शहररी ††† मुबा विश्वासीगदेदेन प्रभुरी डाला झा मर्कूससेनोन एनीगदेदा प्याफुल्ला भिसी पाड्बा मुला। 14 ओच्छे गिकसे गिकदा सेमहेन्से माया लसी प्याफुल्लो। एनीगदे ख्रीष्टला म्हेगदे जम्मादान शान्ति तगै। §

‡ 5:2 यूह २१:१५-१७ †† 5:5 हितो ३:३४ †† 5:6 मत्ती २३:१२; लूका १४:११; १८:१४ ††† 5:12 मुल १५:२२, ४० ††† बाइबलला ल्हानान विद्वानगदेसे “बेबिलोन शहररी” भिबा चा रोम शहररी हिन्ना भिसी म्हन्मुला। § 5:14 मुल १२:१२, २५; १३:१३; १५:३७-३९; कल ४:१०; फिले २४

चु चिठीला बारैरी पाडतो:मा

येशूला मुल चेला पत्रुससे भिबा मुबा (२ पत्रुस १:१)।

पक्का था आरे, तर कोइ कोइ बाइबल विद्वानगदेसे रोम शहरग्याम तखम्ला भिसी पाड्बा मुला।

ओस्पन ईश्वी संवत् ६५-६८ (विक्रम संवत् १२२-१२५) सालला गुडरी भिबा मुबा। चु चिठी पत्रुससे हाड सिबा भन्दा डाच्छा भिजी (२ पत्रुस १:१४)।

ख्रीष्टदा विश्वास लबा जम्बुलिडला जम्मान ग्लारी ससा बडबड तसी चिबा म्हिगदेदा भिबा मुबा।

चु चिठी भिबा चा लुसीला ताम लोष्बा म्हिगदेसे लोष्बा तामदेन थे तामग्याम खबा आज्यबा तामगदेदा ज्यबा तना लबारी हिन्ना। थे लुसीला ताम लोष्बा म्हिगदेसे चा येशू दो:सी आफेप्ख भिसी पाड्बा मुबा। तर पत्रुससे थे लुसीला ताम लोष्बा म्हिगदेला ताम थाबान, “जम्मासेन हाडला पाप ख्लासी परमेश्वरपट्टि दो:गै ओच्छे खालैनोन नाश थातगै भिसी प्रभुसे एनीगदेदा भ्रान्बा मुला” (२ पत्रुस ३:९) भिबा परमेश्वरला सेम मुबासे लमा ख्रीष्ट घइसी फेप्खबा हिन्ना भिसी पाड्बा मुला।

मुल तामगदे

प्याफुल्बा १:१-२

विश्वासीगदेदा ड्योड्बा १:३-२१

लुसीला ताम लोष्बा म्हिगदे २:१-२२

ख्रीष्ट दो:सी फेप्खबा ताम ३:१-१८

पत्रुससे भिबा न्हीरेमला चिठी

1 लास्सो, येशू ख्रीष्टदा तेन्बा डा मुल चेला सिमोन पत्रुसग्याम प्याफुल्ला। डाइ चु ताम ज्यबादेन ठीक गे लबा य्हाडला परमेश्वरदेन थार्बा पिन्बा येशू ख्रीष्टदा डन्से ह्इ लसीन विश्वास लबा एनीगदेदा भिबा हिन्ना।

2 एनीगदेसे परमेश्वरदेन य्हाडला प्रभु येशू ख्रीष्टदा डोसेबासे लमा ल्हानान दयामायादेन शान्ति याड्बान निगै।

ख्रीष्टसे धम्बा म्हि ह्इ लसी भ्रउ

3 परमेश्वरसे हाडला घेन शक्तिग्याम थेसे म्हन्बा अन्छारला म्हि स्होबाला लागिरी थेसे य्हाडदा तो:बा जम्मान स्हे पिन्बा मुला। घेन य्हालदेन शक्ति ओच्छे ज्यबा गुणग्याम ड्योड्बा परमेश्वरदा य्हाडसे डोसेबासे लमा चु जम्मान स्हे याड्बा हिन्ना। 4 थेह्इ लसीन परमेश्वरसे पिन्ना भिसी लबा ग्लुसीन आयाड्बा घेन कबुलगदे परमेश्वरसे य्हाडदा पिन्बा मुला। चु चा जम्बुलिडरी मुबा नाश तसी निबा आज्यबा तामगदेग्याम थोन्सी परमेश्वरला बानीबेहोर थोसी भ्रबाला लागिरी हिन्ना।

5 थेतबासेलमा एनीगदेसे खम्तेधोना विश्वासदेन छ्याम छ्यामनोन ज्यबा बानीबेहोर थोगो। चुदे जे आहिन, ज्यबा बानीबेहोर लबा ज्ञान बुद्धि मुबा म्हिएनोन दोगो। 6 थेह्इ लसीन हाडसे हाडदान तहरी थान्बा, जस्तोन दुख तसै नाखम्बादेन सदन परमेश्वरदा ढन्बा म्हिएनोन दोगो। 7 चुदे जे आहिन, अझ एनीगदे विश्वास लबा ज्योज्यो आले नाना आडागदेदा वास्ता लबादेन माया लबा म्हि दोगो। 8 चु चा एनीगदे न्हडरी आरेनान आतबा गुण हिन्ना, चुदे एनीगदेसे चु जम्मान गुणगदे थोजी भिसम एनीगदे य्हाडला प्रभु येशू ख्रीष्टला ज्ञान बुद्धिरी बढब तबान निसी एनीगदेसे लबा जम्मान गेगदे ज्यबादेन गे खेल्बा तला। 9 तर चु गुणगदे आरेबा म्हिगदे चा थारेडला ताम आम्राड्बादेन काना म्हि ह्इबान हिन्ना। चुह्इबा म्हिसे हाडसे लबा डाच्छाला पापला दोष परमेश्वरसे मेटब लजी भिबा तामनोन म्ते:बा मुला।

10 थेतबासेलमा ज्योज्यो आले नाना आडागदे, परमेश्वरसे एनीगदेदा धम्बा तामदा आम्ले:ना इन सदन इन्सी चिउ। चुह्इ लजी भिसम एनीगदेसे लबा विश्वास खाइमै आम्हा। 11 चुह्इ लसी य्हाडला प्रभु थार्बा पिन्बा येशू ख्रीष्टला जुकजुकधोनाला य्हुल्सारी वाङ्गा एनीगदेदा ल्हानान मान लला।

12 थेतबासेलमा चु तामगदे डाइ एनीगदेदा सदन ढन्ना लला। हिन्बाम, चु जम्मान ताम एनीगदेदा था मुला। ओच्छे एनीगदेदा लोष्बा सत्य तामरीनोन एनीगदे कोड्सी चिबा मुला। 13 डा सोतेधोना चु जम्मान ताम एनीगदेदा ढन्ना लबान होशियार तना लबा चा ज्यबा हिन्ना भिसी डाइ म्हन्बा मुला। 14 तिगदा भिसम डा योनान चु जम्बुलिड ख्लासी निबान मुला भिसी डादा य्हाडला प्रभु येशू ख्रीष्टसे डाच्छान उन्बा मुला। 15 डा सिसी निसैनोन चु जम्मान ताम एनीगदेसे सदन ढन्ना भिसी खम्तेधोना डाइ एनीगदेदा घोना लबा हिन्ना।

पत्रुससे ख्रीष्टला शक्ति म्राड्जी

16 य्हाडला प्रभु येशू ख्रीष्ट घेन शक्तिरी फेप्खजी भिसी डन्से पाड्बा चु ताम चलाक म्हिसे म्हन्सी स्होबा कथाग्याम पाड्बा आहिन। तर ख्रीष्टला घेन शक्ति डन्देन छ्यामनोन मुबासे लमा डन्से चु ताम पाड्बा हिन्ना।

17 परमेश्वर आबासे ख्रीष्टदा हाडला य्हालदेन शक्ति ओच्छे मान पिन्नी, ओच्छे “चु डाइ सेमहेन्से माया लबा डाला झा हिन्ना, चु म्राड्सी डा ल्हानान ताड्बा मुला” भिबा स्वर्गग्याम परमेश्वरला घेन काइ खजी। 18 थे चोखो गडरी डनी ख्रीष्टदेन छ्याम मुबा धुडरी स्वर्गग्याम खबा चु काइ डन्सेन थे:बा मुबा।

19 चुह्इ लसीन अगमवक्तागदेसे थे:ना लबा परमेश्वरला बचनरी डनी ढक्क तबा मुला। थेतबासेलमा स्होरी रमरम रिमरिम आततेधोना ओच्छे

एनीगदेला सेमरी स्होला सुक्र आथोन्तेधोना † धोपधोपरी नाडसल म्रासी थान्बा ह्इ लसी चु बचन एनीगदेसे ह्वाडला सेमरी थान्जी भिसम ज्यबा तला। 20 तर परमेश्वरला बचनरी अगमवक्तागदेसे पाड्बा ताम चा थेनीगदेसे म्हन्सी घोना लबारी म्हाड्बा ताम आहिन भिसी एनीगदेसे घोतो:ला। 21 तिग्दा भिसम अगमवक्तागदेसे पाड्बा ताम थेन्ना सेमरी म्हन्सी पाड्बा ताम आहिन। तर परमेश्वरला आत्मासे उन्बा अन्धार थेनीगदेसे परमेश्वरग्याम खबा ताम पाड्बा हिन्ना।

लुसीला ताम लोप्बा म्हिगदे

2 तर इस्राएलीगदेला गुडरी लुसीला ताम लोप्बा अगमवक्तागदे मुबा। थेह्इ लसीन एनीगदेला गुडरीनोन लुसीला ताम लोप्बा म्हिगदे थोन्ना। थेनीगदेसे खालैदा था आतना लसी नाश लबा लुसीला ताम लोप्ला। चुदे जे आहिन, थेनीगदेसे ह्वाडला पापला सय फासी थार्ना लबा प्रभुदान खलाला। ओच्छे थेनीगदेसे लबा गेग्यामसेन थेनीगदे तिव्खुरीन नाश तला। 2 ल्हानान म्हिगदे थेनीगदेसे उन्बा आज्यबा ग्यामरी भ्रसी पे:बा खबा गेगदे लला। थेनीगदेसे लोप्बा ताम इयान्बा म्हिगदेसे लमान सत्य ग्यामला बिरोध लला। 3 लोभरी वाड्सी थेनीगदेसे लुसीला ताम लोप्सी एनीगदेग्याम फाड्दा किन्ना। तर परमेश्वरसे थेनीगदेला निसाफ डाच्छान लसी जिन्बा मुला। थेतबासेलमा थेनीगदे नाश तनोन तला।

4 परमेश्वरसे पाप लबा स्वर्गदूतगदेदाएनोन आखलानी। ओच्छे थेनीगदेदा नर्गरी भ्याड्जी। तर निसाफ लबा धिनधोनाला लागिरी थेनीगदेदा धोपधोप्बा ग्लारी खीसी थान्बा मुला। 5 दडबोरी परमेश्वरसे जम्बुलिडला म्हिगदेदाएनोन आखलानी। ओच्छे परमेश्वरसे कुल्बा ताम आइयान्बागदेदा परमेश्वरसे नामदेन भाल बाढीग्याम नाश लजी। तर ह्वाडदा सेम निबा ताम थे:ना लबा नोआदेन स्हान्दो म्हि निसदा चा नामदेन भालग्याम जोगब लसी थान्जी। 6 थेह्इ लसीन परमेश्वरसे सदोमदेन गमोरा भिबा शहरलाएनोन दोष स्याप्सी मेग्याम नाश लजी। थेतबासेलमा परमेश्वरसे कुल्बा ताम आइयान्बा म्हिगदेला गति खाह्इबा तला भिसी चुग्यामसेन था याड्ला। 7 आज्यबा बानीबेहोर मुबा पे:बा खबा गेगदे लसी भ्रबा म्हिगदे म्राड्सी दुख नासी चिबा ज्यबा म्हि लोतदा चा परमेश्वरसे जोगब लजी। 8 थे आज्यबा म्हिगदेला गुडरी चिमा थेनीगदेसे धिन धिननोन लबा पे:बा खबा गे थे:सी, म्राड्सी ज्यबा म्हि लोतला सेमरी ल्हानान दुख तजी। 9 चुह्इ लसी ह्वाडदा तेन्बा म्हिगदेदा दुखग्याम खाह्इ लसी जोगब लसी थान्तो:ला। ओच्छे नड्बा गे लबागदेला निसाफ लबा धिनधोनाला लागिरी खाह्इ लसी खीसी थान्तो:मुला भिबा ताम प्रभुदा था मुला। 10 थेनीगदेसे चा खास लसी म्हिदा न्होड्ना लबा पे:बा खबा गेगदे जे लसी भ्रमुला। ओच्छे परमेश्वरला अधिकारदा हेला लमुला। स्वर्गरी मुबागदेदा बिरोध लबारीनोन आलोड्गुला।

चुह्इबा म्हिगदे चा मूर्खदेन घमण्डी तमुला। 11 तर स्वर्गदूतगदे लुसीला ताम लोप्बागदे भन्दा ल्हानान शक्तिशालीदेन ग्रेन मुला। तसैनोन स्वर्गदूतगदेसे प्रभुला डाच्छा स्वर्गरी मुबागदेदा बड्सी दोष आलमुला। 12 थेह्इबा लुसीला ताम लोप्बा म्हिगदेसे चा ह्वाडसे घोनोन आघोबा तामगदेला बिरोध लमुला। थेनीगदे ज्ञान बुद्धि आरेबा जन्तु ह्इबान मुला। थेतबासेलमा थेनीगदे सदन ह्वाडला बानीबेहोरला तहरी चिमुबा। ओच्छे थेनीगदे चुड्सी साड्बाला लागिरी न्हबा जन्तु ह्इबान मुला। थेतबासेलमा थेनीगदे पशु ह्इ तसी नाश तला।

13 थेनीगदेसे लबा आज्यबा गेला सजाय थेनीगदेसेन नातो:ला। धिनगुडरीन सेमरी जे लड म्हन्बा थेनोन लबा चा ताड्तो:बा ताम हिन्ना भिसी थेनीगदेसे म्हन्मुला। थेनीगदेसे एनीगदेदेन छ्याम भोज चबा धुडरीनोन एनीगदेदा फसब लड भिसी म्हन्मुला। एनीगदेदा न्होड्ना लबादेन पे:ना लबा चु म्हिगदेन हिन्ना। 14 थेनीगदे सदन स्हान्दोदेन छ्याम ब्रेल्बा सेम जे थोसी भ्रमुला, ओच्छे जतिन पाप लसैनोन थेनीगदेसे अझ पाप लबारी आखलामुला। थेनीगदेसे विश्वासरी कमजोर मुबा म्हिगदेदा फसब लमुला। थेनीगदेला सेम लोभसे प्लिड्बा मुला। परमेश्वरग्याम सजाय याड्बा चुगदेन

हिन्ना। 15 थेनीगदेसे ज्यबा ग्याम खलासी खानड भ्रइ म्हन्बा थेरीन भ्रजी। ओच्छे थेनीगदेसे बओरला झा बालामसे ह्इ लसी टाड्गाला लिच्छा भ्रसी आज्यबा गे लसी भ्रजी। 16 तर बालामसे लबा चुह्इबा पापसे लमा थेसे बड्बा नातो:जी। ओच्छे तामनोन आपाड्बा गधासे म्हिसे ह्इनोन ताम पाड्सी थे अगमवक्तादा मूर्ख गे लआपुड्नी।

17 थेह्इबा म्हिगदे खर्सी निबा क्युडला मुहानदेन लाबालुडसरसे फ्याड्ना लबा खसु ह्इबान हिन्ना। थेनीगदेला लागिरी परमेश्वरसे धोपधोप्बा ग्ला स्होसी थान्बा मुला। 18 थेनीगदेसे गे आखेल्बा ग्रेन ग्रेन ताम पाड्सी भ्रमुला। ओच्छे भर्खर आज्यबा गे खलाबा म्हिगदेदा ल्हुडला लागिरी सेमसे जे लड म्हन्बा थेनोन लम्याड्ला भिसी लोभ उन्सी फसब लमुला। 19 थेनीगदेसे म्हिगदेदा पापग्याम फेना लला भिसी कबुल लसी भ्रमुला। तर कबुल लबा म्हिगदे ह्वाडनोन पापला नोकर दो:सी भ्रमुला। तिग्दा भिसम जुन तामसे म्हिगदेदा तहरी थान्ना थेनीगदे थेनोन तामला नोकर हिन्ना। 20 तर चुदे खालै म्हिसे व्हाडला प्रभु थार्ना पिन्बा येथू ख्रीष्टदा डोसेसी जम्बुलिडला नड्बा तामगदेग्याम फेसी जिन्सीनोन दो:सी थेनोन नड्बा तामरी फसब तजी भिसम थेनीगदेला गति डाच्छाला भन्दा झन आज्यबा तला। 21 परमेश्वरसे कुल्बा ताम अन्धार भ्रतो:ला भिबा ताम था याड्सीनोन थे ताम खलाबा म्हिसे मी बरु परमेश्वरदा सेम निबा म्हि दो:सी भ्रतो:ला भिबा ताम खाड्मै था आयाड्बा हिन्सम ज्यबा तसेला मुबा। 22 थेनीगदे चा “नगीसे ह्वाडसेन रुड्सी दो:सी ह्वाडसेन चमुला” भिबादेन “द्ववादा जतिन नुहाब लसै दो:सी हिलोरी क्याल्मुला” भिबा सत्य उखानसे पाड्बा ह्इबान हिन्ना। 23

प्रभु दो:सी फेप्खबा धिन

3 डाला सेम निबा ह्वागदे, डाड् एनीगदेदा भ्रिबा चु न्हीरेमला चिठी हिन्ना, एनीगदेला सेमसे चोखो ताम म्हन्नी भिसी चु चिठी न्हीरीन गाते तामगदे ढन्ना लबा मुला। 2 ओच्छे ल्हानान डाच्छा परमेश्वरला अगमवक्तागदेसे पाड्बा तामदेन मुल चलागदेसे एनीगदेदा थे:ना लबा व्हाडला थार्ना पिन्बा प्रभुसे कुल्बा तामदा एनीगदेसे सदन ढन्नी भिसी डाड् म्हन्बा मुला।

3 जम्मान भन्दा डाच्छा एनीगदेसे चु ताम घोतो:ला, लिच्छाला धिनरी ह्वाडलान सेमला तहरी भ्रबा म्हिगदे थोन्ना। थे म्हिगदेसे एनीगदेसे विश्वास लबा सत्य तामदा खिसी लबान चुह्इ भिसी पाड्ला, 4 “ख्रीष्टसे डा दो:सी खला भिसी कबुल लमुबा आहिन? खाड् खबा? व्हाडला आखे म्हमेनोन सिसी निजी, चु जम्बुलिड छ्यामामहेन्से तबा जम्मान ताम दान्देधोनाएनोन तबान मुला।”

5 तर परमेश्वरसे बचनग्यामसेन मुदेन जम्बुलिड डाच्छान स्होबा हिन्ना, ओच्छे जम्बुलिड चा क्युडला गुडरी क्युड्ग्यामसेन स्होबा हिन्ना भिबा ताम था याड्सीनोन थेनीगदेसे वास्ता आलमुला। 6 थेनोन क्युड्से जम्बुलिड डुबब लसी नाश तजी। 7 तर परमेश्वरदा आतेन्बा म्हिगदेला निसाफ लसी सजाय पिन्बा धिनना लागिरी थेनोन परमेश्वरला बचनसे दान्देला मुदेन जम्बुलिडदा मेग्याम नाश लबाला लागिरी जोगब लसी थान्बा मुला।

8 डाला सेम निबा ह्वागदे, प्रभुला लागिरी धिन गिक हजार दिड ते तला, हजार दिड धिन गिक तेएनोन तला भिबा ताम एनीगदेसे थाम्ले:गो। 9 ह्वाडसे लबा कबुल पूरा लबारी प्रभुसे घड्ना लला भिसी कोड कोड म्हिसे पाड्सेनोन प्रभुसे घड्ना आल। तर जम्मासेन ह्वाडला पाप खलासी परमेश्वरपट्टि दो:गै ओच्छे खालैनोन नाश थातगै भिसी प्रभुसे एनीगदेदा भ्रान्बा मुला।

10 तर प्रभु दो:सी फेप्खमा व्हो खबा ह्इ लसी फेप्खला। थे धुडरी मु गुड्इबा ह्इबा ग्रेन आवाज खसी मु म्हासी निला, ओच्छे मुरी मुबा जम्मान स्हे चा मेला रापसे ड्युला, ओच्छे जम्बुलिडदेन थेरी मुबा जम्मान स्हे क्रोसी नाश तला। 11

11 चु जम्मान स्हेगदे चुह्इ लसी ड्युसी निला भिबा ताम था तबासे लमा एनीगदे खाह्इबा म्हि ततो:ला भिसम एनीगदे परमेश्वरदा सेम निबा

† “स्होला सुक्र आथोन्तेधोना” भिबा चा प्रभु दो:सी आफेप्खतेधोना भिबा हिन्ना।

†† 2:5 उत्प ६:१-७:२४ † 2:6 उत्प १९:२४ † 2:7 उत्प १९:१-१६

‡ 2:15 गन्ती २२:४-३५ †† 2:22 हितो २६:११ ††† 3:3 यहू १८ § 3:5 उत्प १:६-९ §† 3:6 उत्प ७:१०-१२, २१-२३ §†† 3:8 भजन ९०:४ §† 3:10 मत्ती २४:४३; लूका १२:३९; १ थेस ५:२; उन्बा १६:१५

बानीबेहोर थोबादेन सदन परमेश्वरदा ढन्बा म्हि दोतोःला। ¹² एनीगदेसे परमेश्वरसे निसाफ लबा धिन योनान खगै भिसी म्हन्सी भ्रान्बा मुला। थे धिनरी मु मेसे क्रोसी नाश तला। ओच्छे मुरी मुबा जम्मान स्हेगदे चा मेला रापसे ड्युला। ¹³ तर प्रभुसे कबुल लबा अन्धार य्हाड चा छार मुदेन छार जम्बुलिडला ग्याम च्यासी चिला। थे छार जम्बुलिडरी जम्मान म्हिगदेसे परमेश्वरदा सेम निबा गे जे लला। †

¹⁴ थेतबासेलमा डाला सेम निबा ह्योगदे, एनीगदे चु ताम तला भिसी भ्रान्सी चिबासे लमा परमेश्वरला शान्तिरी गिक तसी चिबाला लागिरी परमेश्वरला डाच्छा तिगै दागदेन दोष आरेबा म्हि दोबारी भड लउ। ¹⁵ य्हाडला प्रभु योनान आफेप्लबा चा म्हिगदेसे थार्बा याड्बा हिन्ना भिसी म्हन्गो। य्हाडला सेम निबा आले पावलसेनोन प्रभुसे पिन्बा ज्ञान बुद्धिग्याम एनीगदेदा चुनोन

† 3:13 यशै ६५:१७; ६६:२२; उन्बा २१:१

ताम भ्रिबा मुबा। ¹⁶ थेसे भ्रिबा जम्मान चिठीरीनोन थेसे चु तामगदे भ्रिबा मुला। थेसे भ्रिबा चिठीगदेरी कोड कोड ताम चा घोबारी गाहो मुला। थेतबासेलमा आघोबादेन तिगै तामरी दुङ्गो आरेबा म्हिगदेसे परमेश्वरला बचनरी मुबा तामदा उल्टोपाल्टो लबा ह्यड लसी थे तामगदेदाएनोन उल्टोपाल्टो लसी ह्याडसे ह्याडदान नाश लबा गे लमुला।

¹⁷ थेतबासेलमा डाला सेम निबा ह्योगदे, एनीगदेदा चु ताम डाच्छाहेन्सेन था मुबासे लमा होशियार तसी चिउ। परमेश्वरला बचन आड्यान्बादेन तिगै तामदा वास्ता आलबा न्होड्बा म्हिगदेला तामरी अलमल तसी ह्याडसे लबा विश्वासदा थाखलागो। ¹⁸ तर य्हाडला प्रभु थार्बा पिन्बा येशू ख्रीष्टला दयामायादेन थेसे पिन्बा ज्ञानरी बढब तबान निउ। प्रभुदा तिनी, न्हडगर ओच्छे सदन मानदेन जयजयकार तगै। आमेन।

चु चिठीला बारेरी पाड्तो:मा

येशूला मुल चेला यूहन्नासे भिबा मुबा। चु यूहन्नासे थाबा पिन्बा समाचारएनोन भिबा मुला।

पक्का था आरे, तर बाइबल विद्वानगदेसे एफिसस शहरग्याम तखम्ला भिबी पाड्बा मुला।

पक्का था आरे, तर ल्हानान बाइबल विद्वानगदेसे ओस्पन ईश्वी संवत् ९० (विक्रम संवत् १४७) सालरी भिबा मुबा भिबी पाड्बा मुला।

पक्का था आरे, तर ल्हाना हड्बा बाइबल विद्वानगदेसे एशिया अञ्चलरी मुबा मण्डलीगदेदा भिबा मुबा भिबी पाड्बा मुला।

चु चिठीरी मुल ताम न्ही भिबा मुला। ताम गिक चा चु चिठी पढब लबा म्हिगदेसे परमेश्वरदेन थेला झा येशू ख्रीष्टदेन छ्याम सदन संगती लसी चिउ भिबी ऑट पिन्बा मुला। ओच्छे अर्गु ताम चा संगतीदा न्होइना लबा थे लुसीला तामगदे अन्धार थाभ्रउ भिबी होशियार तना लबा मुला। चु जम्बुलिडरी चिजी भिसम नड्बा तामगदे खला। ओच्छे येशू चा परमेश्वरला झा जे हिन्ना म्हि दोबारी आखम भिबा लुसीला तामगदे खानडदमान थे:ना लबा मुबा। थे लुसीला ताम लोप्बा म्हिगदेसे थाबा याड्बाला लागिरी जम्बुलिडला जम्मान तामग्याम थारेड चितो:ला ओच्छे ज्यबा बानीबेहोर थोसी स्थान्दोदा माया लआतो: भिबी लोप्मुबा।

चुहड् लसी लोप्बा लुसीला तामगदेदा यूहन्नासे थाबान येशू ख्रीष्ट म्हिनोन मुबा भिबी घोना लबा मुला। ओच्छे येशूदा विश्वास लबादेन परमेश्वरदा माया लबागदे जम्मासेन गिकसेम गिकदा माया लतो:ला भिबी पाड्बा मुला।

मुल तामगदे

तिगदा भिबा १:१-४

य्हालदेन धोपधोप १:५-२:२९

परमेश्वरला कोलागदेदेन शैतानना कोलागदे ३:१-२४

सत्यदेन फट्टा ताम ४:१-६

मायाग्याम लतो:बा गे ४:७-२१

ढाबारी खम्बा विश्वास ५:१-२१

यूहन्नासे भिबा डाच्छारेमला चिठी

जुनी पिन्बा बचन

1 डन्से एनीगदेदा दडबोहेन्सेन मुबा जुनी पिन्बा बचनना बारेरी भिबा मुला। चु बचन डन्से ह्वाडसेन थे:बादेन ह्वाडलान मीसे म्हाड्बा हिन्ना। ओच्छे डन्से ह्वाडलान यासे थुसी च्याबा हिन्ना। †2 थे जुनी परमेश्वरसे डन्दा उन्जी, ओच्छे डन्से म्हाड्जी। ओच्छे डन्से ह्वाडसेन म्हाड्बा ताम पाड्बा हिन्ना। थेतबासेलमा एनीगदेदाएनोन डन्से थे जुकजुकधोनाला जुनीला बारेरी थे:ना लला। परमेश्वर आबादेन छ्याम मुबा थे जुकजुकधोनाला जुनी परमेश्वर आबासेन डन्दा उन्जी। †3 एनीगदेएनोन डन्देन छ्यामनोन संगती लगै भिबी डन्से म्हाड्बादेन थे:बा जम्मान ताम एनीगदेदा पाड्बा मुला। य्हाडला संगती चा परमेश्वर आबादेन थेला झा येशू ख्रीष्टदेन छ्याम मुला 4 य्हाडला सेम पूरान ताड्गै भिबी डन्से चु ताम भिबा हिन्ना।

परमेश्वरनोन य्हाल हिन्ना

5 डन्से परमेश्वरला झा येशूग्याम थे:बा समाचारनोन एनीगदेदा थे:ना लबा मुला। थे समाचार चुनोन हिन्ना, परमेश्वरनोन य्हाल हिन्ना, परमेश्वरदेन छ्याम धोप भिबा मुनोन आरे। 6 चुदे सुडसे चा य्हाड परमेश्वरला संगतीरी मुला भिबी पाड्सी भ्रबा, तर थे अन्धार आभ्रना धोपधोपरीन भ्रजी भिसम य्हाड सत्य ताम अन्धार आभ्रना फट्टा हिन्ना। 7 तर परमेश्वर य्हाल मुबा हड्

लसी चुदे य्हाडएनोन य्हालरी भ्रजी भिसम य्हाडला गुडरी संगती तला। ओच्छे परमेश्वरला झा येशूला कासेन य्हाडला जम्मान पाप ख्रूसी धाना लला।

8 चुदे य्हाडसे डाइ पाप लबान आरे भिबी पाड्जी भिसम य्हाडसे ह्वाडसे ह्वाडदान धोका पिन्बा हिन्ना। ओच्छे य्हाडदेन सत्य भिबा तनोन आत। 9 तर चुदे य्हाडसे डाइ पाप लबा मुला भिबी परमेश्वरला डाच्छा पाड्जी भिसम थेसे य्हाडला पापला दोष मेटब लला। तिगदा भिसम थे विश्वास लखम्बा ठीक निसाफ लबा परमेश्वर हिन्ना। थेसेन य्हाडला जम्मान आज्यबा गेग्याम य्हाडदा फेला। 10 चुदे य्हाडसे पाप लबा आरे भिबी पाड्जी भिसम य्हाडसे परमेश्वरदा फट्टा स्होबा हिन्ना, ओच्छे थेला बचन अन्धार य्हाड आभ्र।

2 डाला कोलागदे, एनीगदेसे पाप थालगै भिबी डाइ चु ताम एनीगदेला लागिरी भिबान मुला। तर चुदे खालैसे पाप लनोन लजी भिसम य्हाडला लागिरी परमेश्वरदेन छ्याम बिन्ती लसी पिन्बा परमेश्वरसे म्हन्बा अन्धार भ्रबा येशू ख्रीष्ट य्हाडदेन छ्याम मुला। 2 थेनोन येशू ख्रीष्ट य्हाडला पाप माफ लबारी सिबा हिन्ना। तर थे य्हाडला लागिरी जे आहिन जम्बुलिडरी मुबा जम्मान म्हिगदेला पापला लागिरी सिबा हिन्ना।

3 चुदे य्हाडसे परमेश्वरसे कुल्बा तामगदे ड्यान्जी भिसम चुग्यामसेन य्हाडसे थेदा डोसेजीम भिबी था याड्ला। 4 जुन म्हिसे डाइ परमेश्वरदा डोसेबा मुला भिबी पाड्ला, तर थेसे कुल्बा ताम आड्यान्नी भिसम थे फट्टा हिन्ना। थेहड्बा म्हिदेन चा सत्य भिबा तनोन आत। 5 तर जुन म्हि परमेश्वरला बचन अन्धार भ्रला, थेसे परमेश्वरदा सेमहेन्सेन माया लबा

† 1:1 यूह १:१ †† 1:2 यूह १:१४

तला। चुग्यामसेन यहाड परमेश्वरदेन छ्याम मुला भिबा ताम पक्का तला।
6 परमेश्वरसे म्हन्बा अन्धार भ्रमुला भिबा म्हिसे ख्रीष्ट ह्इबान दोःसी भ्रतोःला।

परमेश्वरसे कुल्बा छार ताम

7 डाला सेम निबा ह्ोगदे, डाइ एनीगदेदा भिबा चु ताम परमेश्वरसे कुल्बा छार ताम आहिन। तर डाच्छाहेन्सेन एनीगदेदा था मुबा परमेश्वरसे कुल्बा तामनोन डाइ भिबान मुला। चु ताम एनीगदेसे डाच्छान थेःबा बचन हिन्ना।
†8 तसैनोन डाइ एनीगदेदा चु कुल्बा तामदा छार ताम म्हन्सी भिबान मुला। चु ताम चा ख्रीष्टदेन छ्याम मुला, ओच्छे ख्रीष्टसे एनीगदेदाएनोन चु ताम म्नाइना लबा मुला। तिग्दा भिसम धोप म्हासी निबान मुला, ओच्छे सत्य य्हाल डाच्छाहेन्सेन फेबान मुला।

9 जुन म्हिसे डा य्हालरी मुला भिसी पाड्वा, तर थेसे जम्मान ज्योज्यो आले नाना आडागदेदा हेला लजी भिसम थे म्हि अझ धोपधोपरीन तला।
10 जुन म्हिसे जम्मान ज्योज्यो आले नाना आडादा माया लला थे म्हि य्हालरी तला, ओच्छे य्हालरी चिबा म्हिसे खालैदा न्होइना आल। 11 तर जुन म्हिसे जम्मान ज्योज्यो आले नाना आडादा हेला लला, थे चा धोपधोपरी तला। थेह्इबा धोपधोपरी भ्रबा म्हिसे ह्वाड खानड निबान मुला भिबा तामनोन था आत। तिग्दा भिसम धोपधोप तबासे लमा थेसे तिगै आम्राड्।

12 डाला कोलागदे, ख्रीष्टसे लमा एनीगदेला पापला दोष मेटब तबा मुला भिसी

डाइ एनीगदेदा चु ताम भिबा मुला।

13 आखे ममगदे, ह्वाडनीसे दडबोहेन्सेन मुबा परमेश्वरदा डोसेबा मुला।
थेतबासेलमा डाइ ह्वाडनीदा चु ताम भिबा मुला।
एनी भर्खरला म्हिगदेदाएनोन डाइ चु ताम भिबा मुला,
एनीगदेसे शैतानदा ढाबा मुला।
ज्योज्यो आले नाना आडागदे, एनीगदेसे परमेश्वर आबादा डोसेबा मुला।
थेतबासेलमा डाइ एनीगदेदा चु ताम भिबा मुला।
14 आखे ममगदे, ह्वाडनीसे दडबोहेन्सेन मुबा परमेश्वरदा डोसेबा मुला।
थेतबासेलमा डाइ ह्वाडनीदा चु ताम भिबा मुला।
एनी भर्खरला म्हिगदेदाएनोन डाइ चु ताम भिबा मुला,
एनीगदेला सेम न्हडरी परमेश्वरला बचन मुबासे लमा
एनीगदे भड्सी शैतानदा ढाबा मुला।

जम्बुलिडरी मुबा स्हेदा माया थालउ

15 एनीगदेसे जम्बुलिडदेन जम्बुलिडरी मुबा स्हेगदेदा माया थालउ। जुन म्हिसे जम्बुलिडदेन जम्बुलिडरी मुबा स्हेगदेदा माया लला, थेसे परमेश्वरदा खाइमै माया आल। 16 तिग्दा भिसम जम्बुलिडरी मुबा य्हाडला सेमसे म्हाइबा स्हेदेन घमण्ड लबा ताम ओच्छे य्हाडला मीसे म्नाइबा नइबा ताम चा परमेश्वर आबाग्याम खबा आहिन। चु जम्मान ताम चा जम्बुलिडग्याम खबा हिन्ना। 17 म्हिला सेमसे म्हाइबा जम्बुलिडदेन जम्बुलिडरी मुबा जम्मान स्हे नाश तसी निला, तर परमेश्वरसे कुल्बा जम्मान ताम ड्यान्सी भ्रबा म्हि चा खाइमै नाश आत।

ख्रीष्टदा बिरोध लबागदेला बारैरी पाड्वा

18 डाला कोलागदे, चु धुइ जम्बुलिड नाश तबा धुइ हिन्ना। तिग्दा भिसम ख्रीष्टदा बिरोध लबा म्हि खबान मुला भिबा ताम एनीगदेसे थेःबा मुला। ख्रीष्टदा बिरोध लबा थेह्इबा म्हिगदे दान्दे ल्हानान खसी जिन्बा मुला। थेतबासेलमा चुग्यामसेन य्हाडसे चु जम्बुलिड नाश तबा धुइ तसी जिन्बा मुला भिसी था याड्वा मुला। 19 थेनीगदे य्हाडला म्हि आहिन्बा चीम। थेतबासेलमान थेनीगदे य्हाडग्याम फेसी निजी। चुदे थेनीगदे य्हाडला म्हि हिन्बा हिन्सम य्हाडदेन छ्यामनोन चिसेला मुबा। थेनीगदे य्हाडला म्हि आहिन भिबा ताम उन्बाला लागिरी य्हाडग्याम फेसी निबा हिन्ना।

20 तर एनीगदे चा ख्रीष्टग्याम परमेश्वरला आत्मासे धम्बा म्हि हिन्ना। थेतबासेलमा एनीगदे जम्मासेन सत्य ताम घोबा मुला। 21 एनीगदेसे सत्य ताम घोबा आरे भिसी डाइ चु ताम भिबा आहिन। तर सत्यग्याम खजिबै लुसीला ताम आख भिबा ताम एनीगदेसे घोबासे लमान डाइ एनीगदेदा चु ताम भिबा हिन्ना।

22 तर लुसीला ताम पाड्वा म्हि खाल हिन्ना? तिग येथूदा थार्बा पिन्बा ख्रीष्ट आहिन भिसी पाड्वा म्हिनोन लुसीला ताम पाड्वा म्हि आहिन? हिन्ना। चुनोन ख्रीष्टदा बिरोध लबा म्हि हिन्ना। तिग्दा भिसम थेसे परमेश्वर आबादेन थेला झादा सदन बिरोध लमुला। 23 जुन म्हिसे परमेश्वरला झादा बिरोध लला थेसे परमेश्वर आबादाएनोन बिरोध लला। ओच्छे जुन म्हिसे परमेश्वरला झादा थार्बा पिन्बा ग्ले हिन्ना भिसी विश्वास लला थेसे परमेश्वर आबादाएनोन विश्वास लला।

24 थेतबासेलमा जुन ताम एनीगदेसे डाच्छाहेन्सेन थेःबा मुला, थे ताम एनीगदेसे ह्वाडला सेमरी थान्गो। चुदे एनीगदेसे डाच्छाहेन्सेन थेःबा ताम ह्वाडला सेमरी थान्जी भिसम एनीगदे परमेश्वर आबादेन थेला झादेन छ्याम तला। 25 थेसे य्हाडदा पिन्ना भिसी लबा कबुल चा जुकजुकधोनाला जुनी हिन्ना।

26 चु जम्मान ताम डाइ एनीगदेदा फसब लबारी म्हाइबा म्हिगदेला बारैरी भिबा हिन्ना। 27 तर एनीगदेसे ख्रीष्टग्याम परमेश्वरला आत्मा याड्वा मुला, थे आत्मा एनीगदेदेन छ्याम सदन धन्छयाला। थेतबासेलमा एनीगदेदा खालैसेन तिगै लोप्आतोः। तिग्दा भिसम परमेश्वरला आत्मासेन जम्मान तामला बारैरी एनीगदेदा लोप्ला। परमेश्वरला आत्मासे लोप्ला ताम चा लुसीला ताम आहिन, सत्य ताम हिन्ना। थेतबासेलमा परमेश्वरला आत्मासे एनीगदेदा लोप्ला अन्धार एनीगदे ख्रीष्टदेन छ्याम गिक तसी चिउ।

28 डाला कोलागदे, ख्रीष्ट दोःसी फेप्लबा धुइरी य्हाडसे आँट याड्सी ख्रीष्टला डाच्छा य्हाड पेःआतोःगै भिसी सदन ख्रीष्टदेन छ्याम गिक तसी चिउ। 29 ख्रीष्ट परमेश्वरसे म्हन्बा अन्धार भ्रबा प्रभु हिन्ना भिबा ताम एनीगदेदा थानोन मुला। चु ताम था तमाहेन्से परमेश्वरसे म्हन्बा अन्धार गे लबा जम्मान म्हिगदेएनोन परमेश्वरलान सन्तान हिन्ना भिसी एनीगदेसे था याड्तोःला।

परमेश्वरला सन्तान

3 च्यागो, य्हाडदा परमेश्वर आबासे गाते ल्हाना माया लबा मुला। परमेश्वरला मायासे लमान य्हाडदा परमेश्वरला सन्तान भिसी पाड्वा हिन्ना, चु ताम सत्यएनोन हिन्ना। थेतबासेलमा जम्बुलिडला म्हिगदेसे य्हाडदा डोआसेबा हिन्ना, तिग्दा भिसम थेनीगदेसे परमेश्वरदा डोआसेनी।
†2 डाला सेम निबा ह्ोगदे, दान्दे चा य्हाड परमेश्वरलान सन्तान हिन्ना। तर लिच्छा चा तिग तला थे ताम य्हाडदा उन्बा आरे। तर ख्रीष्ट दोःसी फेप्लबा धुइरी य्हाडएनोन ख्रीष्ट ह्इबान दोला। तिग्दा भिसम थे धुइरी य्हाडसे ख्रीष्ट खाह्इबा मुला थेह्इबान म्नाइला भिबा ताम य्हाडदा था मुला। 3 ख्रीष्टथोरी चुह्इबा आश थान्बा जम्मान म्हिगदेसे ख्रीष्ट खाह्इबा चोखो मुला, ह्वाडदाएनोन थेह्इबान चोखो थान्मुला।

4 पाप लसीन चिबागदे जम्मासेन परमेश्वरला ठिम आड्यान्बा हिन्ना। तिग्दा भिसम ठिम आड्यान्बान पाप हिन्ना। 5 म्हिगदेला पापला दोष मेटब लबाला लागिरी तिगै पाप आरेबा ख्रीष्ट चु जम्बुलिडरी फेप्लजी भिबा ताम एनीगदेदा थानोन मुला। †6 थेतबासेलमा सदन ख्रीष्टदेन छ्याम गिक तसी चिबा म्हिगदेसे पाप आल। तर सदन पाप लसी चिबा म्हिसे ख्रीष्टदा न्ह म्नाइबा मुला न्ह डोसेबा मुला।

7 डाला कोलागदे, एनीगदेदा खालैसेन फसब लआम्याङ्गै। जुन म्हिसे परमेश्वरसे म्हन्बा अन्धार गे लला, थे म्हि परमेश्वरसे म्हन्बा अन्धार भ्रबा ख्रीष्ट ह्इबान दोला। 8 तर जुन म्हिसे सदन पाप लला, थे म्हि चा शैतानना हिन्ना। तिग्दा भिसम शैतानसे चा डाच्छाहेन्सेन पाप लसीन खमुला। थेतबासेलमा शैतानना गेदा नाश लबाला लागिरी परमेश्वरला झा जम्बुलिडरी फेप्लबा हिन्ना। 9 परमेश्वरला सन्तान दोःसी न्हबा म्हिगदेसे

सदन पाप लसी आचि, तिग्दा भिसम थेदेन छ्याम परमेश्वरला बानीबेहोर तमुला। थेतबासेलमा थेसे सदन पाप लसी आचि, तिग्दा भिसम परमेश्वरनोन थेला आबा हिन्ना।¹⁰ जुन म्हिसे परमेश्वरदा सेम निबा गेदेन स्थान्दोदा माया आल, थे चा परमेश्वरला सन्तान आहिन। थेतबासेलमा थेनीगदेला गेग्यामसेन खाल परमेश्वरला सन्तान, खाल शैतानना सन्तान हिन्ना भिसी प्रस्टन था याड्बा मुला।

गिकसेम गिकदा माया लउ

¹¹ एनीगदेसे डाच्छाहेन्सेन थे:बा समाचार चा चुनोन हिन्ना, “व्हाडसे गिकसेम गिकदा माया लतो:ला।”¹² कयिन शैतानना सन्तान दोसी हाडलान आलेदा साइजी। थेतबासेलमा व्हाड कयिन ह्वाड्बा दोबारी आत। कयिनसे हाडलान आलेदा तिग्दा साइजी? तिग्दा भिसम थेला आलेसे लबा गे परमेश्वरदा सेम निबा गे मुबा, तर कयिनसे लबा गे परमेश्वरदा सेम आनिबा गे मुबा।¹¹

¹³ डाला ज्योज्यो आले नाना आडागदे, चुदे एनीगदेदा जम्बुलिडला म्हिगदेसे हेला लसम उदेक थाम्हन्नो।¹⁴ व्हाडसे व्हाडला ज्योज्यो आले नाना आडागदेदा माया लबासे लमा कालग्याम फेसी व्हाडसे छार जुनी याड्जी भिबा ताम व्हाडदा था मुला। तर जुन म्हिसे माया आलनी थे दान्देधोना कालला तहरी मुला।¹⁵ हाडला ज्योज्यो आले नाना आडागदेदा हेला लबा म्हि चा ज्यानमारा हिन्ना। थेह्वाड्बा म्हिला लागिरी जुकजुकधोनाला जुनी आरे भिबा ताम एनीगदेदा थानोन मुला।

¹⁶ व्हाडदा माया लसी ख्रीष्टसे हाडला ज्याननोन पिन्बासे लमा माया तिग हिन्ना भिबा ताम व्हाडसे ज्यना लसी घोबा मुला। थेतबासेलमा व्हाडसेनोन हाडला ज्योज्यो आले नाना आडागदेला लागिरी ज्याननोन पिन्बारी तयार ततो:ला।¹⁷ तर जुन म्हिदेन छ्याम जम्बुलिडला धन सम्पत्ति मुला, थेसे हाडला ज्योज्यो आले नाना आडागदेदा खाँचो तबा ब्राड्सीनोन आपिन्नी भिसम थेह्वाड्बा म्हिदेन छ्याम खाह्ण्ड लसी परमेश्वरला माया तला?¹⁸ डाला कोलागदे, व्हाडसे सुडसे जे स्थान्दोदा माया लबा आहिन, तर व्हाडसे सेमहेन्सेन माया लतो:ला। थेह्वाड्बा माया चा व्हाडसे लबा गेग्यामसेन ब्राड्ला।¹⁹ चुग्यामसेन व्हाड सत्यला म्हि हिन्ना भिबा ताम था याड्ला। ओच्छे व्हाड परमेश्वरला डाच्छा दुक्क तसी चिखम्ला।²⁰ तसैनोन व्हाडदा हाडला सेमसे मी दोष लमुला भिसम परमेश्वर मी झन व्हाडला सेम भन्दा घेन हिन्ना भिबा ताम व्हाडदा था मुला। ओच्छे परमेश्वरदा जम्मान ताम था तला।

²¹ डाला सेम निबा ह्वागदे, व्हाडला सेमसे व्हाडदा दोष आलनी भिसम व्हाडदा परमेश्वरला डाच्छा निबारी ल्हानान आँट याड्ला।²² ओच्छे व्हाडसे ह्वाबा जम्मान रहे परमेश्वरग्याम याड्ला। तिग्दा भिसम व्हाडसे परमेश्वरसे कुल्बा ताम इयान्सी परमेश्वरदा सेम निबा गे लबा मुला।²³ परमेश्वरसे कुल्बा ताम चा थेला झा येशू ख्रीष्टदा विश्वास लबादेन येशू ख्रीष्टसे कुल्बा अन्धार गिकसेम गिकदा माया लबा हिन्ना।²⁴ परमेश्वरसे कुल्बा ताम इयान्बा म्हिगदे परमेश्वरदेन छ्याम तला, ओच्छे थेनीगदेदेन छ्यामएनोन परमेश्वर तला। परमेश्वर व्हाडदेन छ्याम तला भिबा ताम चा व्हाडदेन छ्याम मुबा परमेश्वरला आत्माग्यामसेन व्हाडसे था याड्बा मुला।

परमेश्वरला आत्मादा डोसेगो

4 डाला सेम निबा ह्वागदे, परमेश्वरला आत्मा मुला भिसी भ्रबा खजिबे म्हिदा विश्वास थालउ। तर थेनीगदेदेन छ्याम परमेश्वरला आत्मा मुला कि आरे भिसी च्यागो। तिग्दा भिसम लुसीला ताम पाड्बा अगमवक्तागदे जम्बुलिड नाडनोन खसी जिन्बा मुला।² येशू ख्रीष्ट म्हिला रुपरी जम्बुलिडरी फेख्बा हिन्ना भिसी पाड्बा म्हिदेन छ्याम चा परमेश्वरला आत्मा तला। चुग्यामसेन एनीगदेसे थेह्वाड्बा म्हिदेन छ्याम परमेश्वरला आत्मा मुला भिसी था याड्ला।³ येशू परमेश्वरग्याम फेख्बा हिन्ना भिबा तामदा विश्वास आलबा म्हिगदेदेन छ्याम परमेश्वरला आत्मा आत। तर थेदेन छ्याम ख्रीष्टदा बिरोध लबाला आत्मा तला। थे आत्मा खाल भिबा

ताम एनीगदेसे डाच्छान थे:सी जिन्बा मुला। दान्दे थे आत्मा जम्बुलिडरी खसी जिन्बा मुला।

⁴ डाला कोलागदे, एनीगदे चा परमेश्वरला हिन्ना। थेतबासेलमा एनीगदेसे थे लुसीला ताम पाड्बा अगमवक्तागदेदा ढाबा मुला। तिग्दा भिसम एनीगदे न्हडरी मुबा परमेश्वरला आत्मा चा जम्बुलिडरी मुबा आज्यबा आत्मा भन्दा घेन हिन्ना।⁵ थेनीगदे जम्बुलिडला हिन्ना। थेतबासेलमा थेनीगदेसे जम्बुलिडला ताम जे लमुला। ओच्छे थेनीगदेसे पाड्बा ताम जम्बुलिडरी मुबागदेसे जे इयान्मुला।⁶ तर व्हाड मी परमेश्वरला म्हि हिन्ना। जुन म्हिसे परमेश्वरदा डोसेबा मुला थेसे व्हाडला ताम इयान्ना। ओच्छे जुन म्हि परमेश्वरला म्हि आहिन, थेसे व्हाडसे पाड्बा ताम आइयान। चुग्यामसेन व्हाडसे सत्य आत्मादेन फट्टा आत्मादा डोसेखम्ला।

परमेश्वरला माया

⁷ डाला सेम निबा ह्वागदे, व्हाडसे गिकसेम गिकदा सदन माया लड। तिग्दा भिसम माया परमेश्वरग्याम खमुला। जुन म्हिसे जम्मादान माया लला, थे परमेश्वरला सन्तान हिन्ना। थेतबासेलमा थेसे परमेश्वरदा डोसेबा मुला।⁸ तर जुन म्हिसे स्थान्दोदा माया आल, थेसे परमेश्वरदा डोआसे। तिग्दा भिसम परमेश्वरनोन माया हिन्ना।⁹ ओच्छे परमेश्वरसे थेग्याम व्हाडसे जुनी याड्गै भिसी हाडला गिक जेन झादा जम्बुलिडरी पुड्खसी व्हाडदा हाडला माया उन्जी।¹⁰ चुनोन सत्य माया हिन्ना। चु व्हाडसे परमेश्वरदा लबा माया आहिन, तर परमेश्वरसे व्हाडदा लबा माया हिन्ना। थेतबासेलमान थेसे हाडला झा सिसी व्हाडला पाप माफ तगै भिसी हाडलान झादा जम्बुलिडरी पुड्खजी।

¹¹ डाला सेम निबा ह्वागदे, परमेश्वरसे मी व्हाडदा चुह्ण्ड लसी माया लबा मुला भिसम व्हाडसेनोन गिकसेम गिकदा माया लतो:ला।¹² खालैसेन परमेश्वरदा खाइमै ब्राड्बा आरे। तर चुदे व्हाडसे गिकसेम गिकदा माया लजी भिसम परमेश्वरएनोन व्हाड न्हडरी धन्छ्याला। जमाहेन्से व्हाडसे लबा मायाएनोन परमेश्वरसे व्हाडदा लबा माया ह्वाड्बान तला।¹³

¹⁴ चुह्ण्ड लसी व्हाडदा परमेश्वरसे हाडलान आत्मा पिन्बा मुला। थेतबासेलमा व्हाड परमेश्वरदेन छ्याम, ओच्छे परमेश्वर व्हाडदेन छ्याम मुला भिबा ताम व्हाडदा था मुला।¹⁵ जम्बुलिडला जम्मान म्हिदा थार्ना लबारी परमेश्वर आबासे हाडलान झादा जम्बुलिडरी पुड्खजी भिबा ताम डन्से ब्राड्बा मुला। चु तामनोन डन्से स्थान्दोदा पाड्बा हिन्ना।¹⁶ जुन म्हिसे येशूदा परमेश्वरला झा हिन्ना भिसी विश्वास लला, थेदेन छ्याम परमेश्वर धन्छ्याला, ओच्छे थे परमेश्वरदेन छ्याम तला।¹⁷ परमेश्वरसे व्हाडदा गाते माया लमुला भिबा ताम व्हाडदा था मुला, ओच्छे व्हाडसे थेदा विश्वास लबा मुला।

परमेश्वर चा माया हिन्ना, ओच्छे जुन म्हि थे मायारी भ्रला, थे परमेश्वरदेन छ्याम तला, ओच्छे परमेश्वरएनोन थेदेन छ्याम धन्छ्याला।¹⁸ परमेश्वरसे निसाफ लबा धुडरी व्हाड दुक्क तसी चिबाला लागिरी व्हाडसे स्थान्दोदा लबा मायाएनोन परमेश्वरसे लबा माया ह्वाड्बान स्होबा मुला। तिग्दा भिसम ख्रीष्ट जस्तो मुला व्हाडएनोन चु जम्बुलिडरी थे ह्वाड्बान दोबा मुला।¹⁹ परमेश्वरसे लबा ह्वाड्बान माया लबा म्हि खाइमै आलोड्। तिग्दा भिसम थेह्वाड्बा मायारी लोड्बा भिबा तनोन आत। तर परमेश्वरसे लबा ह्वाड्बान माया आलबा म्हि चा सजाय याड्ला भिसी लोड्ला।

²⁰ डाच्छा परमेश्वरसेन व्हाडदा माया लबासे लमा व्हाडसेनोन परमेश्वरदा माया लबा मुला।²¹ चुदे खालै म्हिसे “डाइ परमेश्वरदा माया लमुला” भिसी पाड्सी भ्रला, तर हाडला ज्योज्यो आले नाना आडादा चा हेला लमुला भिसम थे फट्टा हिन्ना। तिग्दा भिसम हाडला मीसे ब्राड्बा ज्योज्यो आले नाना आडादा मी माया लबारी आखम्बासे आम्राड्बा परमेश्वरदा माया लबारी आखम।²² जुन म्हिसे परमेश्वरदा माया लला, थेसे हाडला ज्योज्यो आले नाना आडादाएनोन माया लला। तिग्दा भिसम व्हाडदा ख्रीष्टसे कुल्बा ताम चुनोन हिन्ना।

परमेश्वरला झाथोरी लबा विश्वास

5 येशूदा थाबा पिन्बा ख्रीष्ट हिन्ना भिसी विश्वास लबागदे जम्मान परमेश्वरला सन्तान हिन्ना। ओच्छे जुन म्हिसे आबादा माया लला, थे म्हिसे थेला सन्तानदाएनोन माया लला।² चुदे य्हाडसे परमेश्वरदा माया लसी थेसे कुल्बा अन्धार भ्रजी भिसम चुग्यामसेन य्हाडसे परमेश्वरला कोलागदेदा माया लमुला भिबा ताम था याड्ला।³ तिग्दा भिसम परमेश्वरदा माया लबा भिबा चा परमेश्वरसे कुल्बा अन्धार भ्रबा हिन्ना। परमेश्वरसे कुल्बा अन्धार भ्रबारी गाहोएनोन आरे।⁴ तिग्दा भिसम परमेश्वरला जम्मान कोलागदेसे जम्बुलिङ †थोरी ढाबारी खम्ला। य्हाडसे जम्बुलिङदा ढाबा चा य्हाडला विश्वासग्यामनोन हिन्ना।⁵ खाल्से जम्बुलिङथोरी ढाखम्ला? जुन म्हिसे येशूदा परमेश्वरला झा हिन्ना भिसी विश्वास लला, थेसे जे जम्बुलिङथोरी ढाखम्ला।

⁶ येशू ख्रीष्टदा क्युइदेन काग्याम उन्जी। क्युइग्यामसे ‡ जे आहिन, काग्यामसेनोन हिन्ना। चु ताम सत्य हिन्ना भिसी परमेश्वरला आत्मासेन पाड्बा मुला, तिग्दा भिसम परमेश्वरला आत्मा सत्य हिन्ना।⁷ चु तामला साक्षी सोम मुला।⁸ क्युइदेन का ओच्छे परमेश्वरला आत्मासे पाड्बा ताम गिकनोन हिन्ना।⁹ चुदे य्हाडसे म्हिसे पाड्बा ताम मी विश्वास लमुला भिसम परमेश्वरसे सुड्बा ताम मी य्हाडसे झन विश्वास लनोन तोःबा हिन्ना। तिग्दा भिसम परमेश्वरसे ह्हाडलान झा ख्रीष्टला बारेरीनोन य्हाडदा सुड्बा मुला।¹⁰ थेतबासेलमा जुन म्हिसे परमेश्वरला झादा विश्वास लला, थेला ह्हाडलान सेम न्हडरी चु जम्मान ताम था तला। तर जुन म्हिसे परमेश्वरदा विश्वास आल, थेसे परमेश्वरसे सुड्बा सत्य तामदान लुसीला ताम हिन्ना भिसी म्हन्ना। तिग्दा भिसम परमेश्वरसे ह्हाडला झाला बारेरी सुड्बा तामनोन थेसे विश्वास आल।¹¹ य्हाडसे म्हाड्बा ताम चा परमेश्वरसे य्हाडदा पिन्बा जुकजुकधोनाला जुनी हिन्ना। थे जुकजुकधोनाला जुनी चा परमेश्वरला झादेन छ्याम मुला।¹² थेतबासेलमा जुन म्हिदेन छ्याम परमेश्वरला झा

† 5:3 यूह १४:१५ †† चु पदरी “जम्बुलिङ” भिबा चा जम्बुलिङरी मुबा जम्मान नड्बा तामगदे हिन्ना। ‡ क्युइग्याम भिबा चा येशूसे किन्बा बप्तिस्मा हिन्ना, ओच्छे काग्याम भिबा चा येशू क्रुसरी सिबा हिन्ना। †† 5:11 यूह ३:३६

मुला, थेदेन छ्याम जुकजुकधोनाला जुनी मुला। जुन म्हिदेन छ्याम परमेश्वरला झा आरे, थेदेन छ्याम जुकजुकधोनाला जुनी आरे।

जुकजुकधोनाला जुनी

¹³ परमेश्वरला झादा विश्वास लबा म्हि एनीगदेसे जुकजुकधोनाला जुनी याड्बा मुला भिबा ताम था याड्गै भिसीन डाइ चु ताम भिबा हिन्ना।

¹⁴ परमेश्वरसे म्हन्बा अन्धार य्हाडसे जुन रहे ह्रीसैनोन पूरा लला भिबा तामरी य्हाड परमेश्वरथोरी ढुक्क मुला।¹⁵ य्हाडसे जुन रहे ह्रीसैनोन परमेश्वरसे पूरा लमुला भिबा ताम य्हाडदा था मुला। ओच्छे य्हाडसे परमेश्वरदेन छ्याम ह्रीबा स्हेगदेएनोन याड्सी जिन्बा मुला भिबा ताम य्हाडदा था मुला।

¹⁶ चुदे खालै म्हिसे ह्हाडला ज्योज्यो आले नाना आडासे सिना आलबा पाप लबा म्हाड्जी भिसम थेला लागिरी परमेश्वरदेन छ्याम प्रार्थना लसी पिन्गो। थेह्हाड लसी एनीगदेसे प्रार्थना लजी भिसम थेसे जुकजुकधोनाला जुनी याड्ला। तर सिना लबा ‡ पापएनोन मुला, थेह्हाड्बा पाप लबा म्हिगदेला लागिरी चा प्रार्थना लउ भिसी डाइ एनीगदे खालैदान आपाड्।¹⁷ जम्मान खाल्ला नड्बा गेगदे पाप हिन्ना, तसैनोन सिना आलबा पापएनोन मुला।

¹⁸ परमेश्वरला कोलागदे खालैसेन सदन पाप आलमुला भिबा ताम य्हाडदा था मुला। तिग्दा भिसम परमेश्वरला झासे थेदा जोगब लसी थान्ना, ओच्छे शैतानसे थेदा थुर्बारी आखम।¹⁹ चु जम्बुलिङ शैतानना यारी मुसैनोन य्हाड परमेश्वरला सन्तान हिन्ना भिबा ताम य्हाडदा था मुला।²⁰ परमेश्वरला झा फेप्खजी, ओच्छे थे सत्य परमेश्वर हिन्ना भिबा ताम घोखमौ भिसी य्हाडदा ज्ञान बुद्धि पिन्बा मुला भिबा ताम य्हाडदा था मुला। य्हाड थेला झा येशू ख्रीष्टदेन छ्याम तबासे लमा दान्दे य्हाड सत्य परमेश्वरदेन छ्याम मुला। थेनोन सत्य परमेश्वर जुकजुकधोनाला जुनी हिन्ना।

²¹ थेतबासेलमा डाला कोलागदे, एनीगदेसे मूर्तिदा तेन्बा खलागो। एनीगदेसे ह्हाडला सेमरी परमेश्वरदा बाहेक अर्गु तिगैदान थाथान्गो।

‡ चुरी “सिना लबा” भिबा चा परमेश्वरग्याम सदन फेबा हिन्ना।

चु चिठीला बारैरी पाड्तो:मा

मण्डलीदा च्याबा म्हिसे भिबा मुबा (२ यूहन्ना १:१)। बाइबलला ल्हाना ह्इबा विद्वानगदेसे मण्डलीला गे लबा चु मण्डलीदा च्याबा म्हि चा येथूला मुल चेला यूहन्ना हिन्ना भिसी पाड्बा मुला।

पक्का था आरे, तर कोइ कोइ बाइबल विद्वानगदेसे एफिसस शहरग्याम तखम्ला भिसी पाड्बा मुला।

ल्हाना ह्इबा बाइबल विद्वानगदेसे ओस्पन ईश्वी संवत् ९० (विक्रम संवत् १४७) सालरी भिबा मुबा भिसी पाड्बा मुला।

परमेश्वरसे धम्बा म्रिडम्हेमेदेन थेला कोलागदेदा भिबा मुबा (२ यूहन्ना १:१)। थे म्रिडम्हेमे खाल हिन्ना भिबा ताम खालैदा था आरे। थे म्रिडम्हेमे चा मण्डली गिक मुबा ओच्छे थेला कोलागदे चा थे मण्डलीला म्हिगदे मुबा भिसी कोइ कोइ बाइबल विद्वानगदेसे पाड्बा मुला।

चु चिठीरी गिकसेम गिकदा माया लउ ओच्छे लुसीला ताम लोप्ला म्हिदेन थेसे लोप्ला तामग्याम होशियार तसी चिउ भिसी पाड्बा मुला।

मुल तामगदे

प्याफुल्बा १-३

माया चा जम्मान भन्दा मुल ताम हिन्ना ४-६

लुसीला तामग्याम जोगब तसी चिउ भिसी होशियार तना लबा ७-११

चिठीला थुमरी भिबा ताम १२-१३

यूहन्नासे भिबा न्हीरेमला चिठी

1 लास्सो परमेश्वरसे धम्बा आडा, एदेन एला कोलागदेदा डा मण्डलीदा च्याबा म्हिग्याम प्याफुल्ला! डाइ एदेन एला कोलागदेदा ल्हानान माया लबा मुला। डाइ जे आहिन, सत्यदा डोसेबागदे जम्मासेन एनीगदेदा माया लबा मुला। 2 तिगदा भिसम थे सत्य य्हाडदेन छ्याम धन्छ्याबा मुला। चु सत्य य्हाडदेन छ्याम दान्दे जे आहिन सदन धन्छ्याला।

3 य्हाड सत्यदेन मायारी गिक तसी चिबागदेदेन छ्याम परमेश्वर आबादेन थेला झा येथू ख्रीष्टग्याम मोलमदेन दया ओच्छे शान्ति तला।

ख्रीष्टसे कुल्बा अन्छार भ्रतो:ला

4 य्हाडदा परमेश्वर आबासे कुल्बा अन्छार एला कोइ कोइ झा झामेगदे सत्य ग्यामरी भ्रबा म्राड्सी डा ल्हानान ताड्जी। 5 आडा, दाहेन्से डाइ एदा चु ताम पाड्ला, चु ताम चा डाइ एदा कुल्बा छार ताम आहिन। तर य्हाडसे गिकसेम गिकदा माया लतो:ला भिसी डाच्छाहेन्सेन य्हाडदा कुल्बा ताम हिन्ना। 6 परमेश्वरसे कुल्बा अन्छार भ्रबा भिबान गिकसेम गिकदा माया लबा हिन्ना। एसे डाच्छाहेन्सेन थे:बा परमेश्वरसे कुल्बा ताम चुनोन हिन्ना। थेतबासेलमा एनीगदे जम्मासेन गिकसेम गिकदा माया लसी दिक्सी चितो:ला।

† 1:5 यूह १३:३४; १५:१२, १७

7 तिगदा भिसम म्हिगदेदा फसब लबा म्हिगदे जम्बुलिडला जम्मान ग्लारी खसी जिन्बा मुला। थे म्हिगदे चा येथू ख्रीष्ट जम्बुलिडरी म्हिला रुपरी फेप्लबा हिन्ना भिसी विश्वास आलबा म्हिगदे हिन्ना। चुगदे चा छल लबादेन ख्रीष्टदा बिरोध लबा म्हिगदे हिन्ना। 8 थेतबासेलमा एनीगदेसे दुख लसी लबा गेला इनाम आस्योर्बाला लागिरी थेह्इबा म्हिगदे म्राड्सी एनीगदे ह्हाडनोन होशियार तसी चिउ। तर ह्हाडसे याड्तो:बा इनाम पूरान याड्खम्बा म्हि दोगो।

9 ख्रीष्टसे कुल्बा अन्छार आभ्रबा, तर स्थान्दोला ताम इयान्सी भ्रबा म्हिदेन छ्याम परमेश्वर आत। तर ख्रीष्टसे कुल्बा अन्छार भ्रबा म्हिदेन छ्याम परमेश्वरदेन थेला झा तला। 10 चुदे खालै म्हि एनीगदे मुबा ग्लारी खसी ख्रीष्टसे कुल्बा अन्छारला ताम आपाड्नी भिसम एनीगदेसे ह्हाडला दिमरी वाड्थापुङ्गो। ओच्छे थेह्इबा म्हिदा प्याथाफुल्गो। 11 तिगदा भिसम थेह्इबा म्हिदा प्याफुल्बा चा य्हाडसे थेदा नड्बा गे लबारी आँट पिन्बा हिन्ना।

12 डाइ एनीगदेदा पाड्तो:बा ताम मी ल्हानान मुबा। तसैनोन दान्दे डाइ जम्मान ताम चिठीरी भिबा आरे। तर डा एनीगदे मुबा ग्लारी खसी हुप तसी जम्मान ताम लबा सेम मुला, थे धुडरी य्हाड ल्हानान ताड्म्याड्ला।

13 थेह्इ लसीन परमेश्वरसे धम्बा एला आडाला झा झामेगदेसेनोन एदा प्याफुल्ला भिसी पाड्बा मुला।

चु चिठीला बारैरी पाड्तो:मा

मण्डलीदा च्याबा म्हिसे भिबा मुबा (३ यूहन्ना १:१)। बाइबलला ल्हाना ह्इबा विद्वानगदेसे चु मण्डलीदा च्याबा म्हि चा येशूला मुल चेला यूहन्ना हिन्ना भिंसी पाड्बा मुला।

पक्का था आरे, तर कोइ कोइ बाइबल विद्वानगदेसे एफिसस शहरग्याम तखम्ला भिंसी पाड्बा मुला।

ल्हाना ह्इबा बाइबल विद्वानगदेसे ओस्पन ईश्वी संवत् ९० (विक्रम संवत् १४७) सालरी भिबा मुबा भिंसी पाड्बा मुला।

गायस भिबा म्हिदा भिबा मुबा।

चु चिठीरी यूहन्नासे गायसदा ज्यबा म्हि भिंसी पाड्बा मुला, तिगदा भिसम थेसे विश्वास लबागदेदा ह्यो लबा मुबा। ओच्छे यूहन्नासे डेमेत्रियस भिबा म्हिग्याम होशियार तसी चिउ भिंसी गायसदा पाड्बा मुला।

मुल तामगदे

प्याफुल्बा १-४

गायसला बारैरी पाड्बा ज्यबा ताम ५-८

डियोत्रिफसदा दोष लबा ताम ९-१०

डेमेत्रियसला बारैरी पाड्बा ज्यबा ताम ११-१२

चिठीला थुमरी भिबा ताम १३-१५

यूहन्नासे भिबा सोमरेमला चिठी

1 लास्सो डाला सेम निबा ह्यो गायस, डा मण्डलीदा च्याबा म्हिग्याम प्याफुल्ला! सत्य ताम अन्छार भ्रबा एदा डाइ सेमहेन्सेन माया लबा मुला।¹² डाला सेम निबा ह्यो, ए विश्वासरी ज्यबा मुला भिबा ताम डादा था मुला। थेह्इ लसीन एदा सदन ज्यबा तगै भिंसी डाइ एला लागिरी प्रार्थना लबा मुला।³ ए विश्वासरी कोड्बा मुला भिबादेन सत्यरी चिबा मुला भिबा ताम म्हाइसी थेंग्याम खबा कोइ कोइ ज्योज्यो आलेगदेसे डादा पाड्जी। थे ताम थे:सी डा ल्हानान ताड्बा मुला।⁴ थेह्इ लसी डाला कोलागदे सत्यरी भ्रबा मुला भिबा ताम थे:म्याड्बा भन्दा ग्रेन ताड्बा ताम डाला लागिरी अर्गु तिगै आरे।

सत्य तामरी गिक तबागदेदा सेमहेन्सेन ह्यो लउ

⁵ डाला सेम निबा ह्यो, एसे जम्मान ज्योज्यो आले नाना आडागदेला लागिरी विश्वासला गे लबा मुला। एसे डोसेबा ज्योज्यो आले नाना आडागदेला लागिरी जे आहिन, डोआसेबा ज्योज्यो आले नाना आडागदेला लागिरीएनोन गे लबा मुला।⁶ एसे थेनीगदेदा गाते माया लसी वास्ता लजी भिबा ताम थेनीगदेसे मण्डलीला डाच्छा पाड्बा मुला। थेनीगदेसे लबारी छ्याइबा गेरी एसे अझ ह्यो लसम एला गेग्याम परमेश्वर ताड्ला।⁷ तिगदा भिसम थेनीगदे प्रभुला गे लबारी भ्रबासे लमा प्रभुदा विश्वास आलबा म्हिगदेग्याम तिगै स्हे आकिन्ना खबा मुला।⁸ थेतबासेलमा सत्य तामरी गिक

तबाला लागिरी थेनीगदेदेन छ्याम ढिक्की य्हाडसे चुह्इबा गे लबा म्हिगदेदा ह्यो लतो:ला।

⁹ डाइ मण्डलीला लागिरी तिगै ताम भिबा मुबा। तर एनीगदेला गुडरी मुबा ह्हाडसे ह्हाडदान ग्रेन म्हन्बा डियोत्रिफससे डाला तामदा वास्ता आलनी।

¹⁰ डा थेरी खमा थेसे लबा जम्मान ताम एनीगदेदा पाड्ला। थेसे य्हाडला बिरोध लसी लुसीला ताम लबा मुला। चुदे जे आहिन, थेसे विश्वासी ज्योज्यो आले नाना आडागदेदा वास्ता आलमुला। ओच्छे वास्ता लबारी म्हाइबागदेदाएनोन मण्डलीग्याम मडग्यार ते:मुला।

¹¹ डाला सेम निबा ह्यो, ए आज्यबा तामला लिच्छा थाभ्रउ, तर ज्यबा तामला लिच्छा भ्रउ। जुन म्हिसे ज्यबा लला थे परमेश्वरला म्हि हिन्ना। तर जुन म्हिसे आज्यबा लला थेसे परमेश्वरदा डोसेबा आरे।¹² तर डेमेत्रियसदा चा जम्मासेन ज्यबा म्हि हिन्ना भिंसी पाड्मुला, चु ताम मी थेसे लबा सत्य गेग्यामसेन था याड्ला। थेला बारैरी स्थान्दो म्हिगदेसे पाड्बा ताम डन्सेनोन पाड्खम्ला। डन्से पाड्बा ताम सत्य ताम जे तमुला भिबा ताम एनीगदेदा थानोन मुला।

¹³ डाइ पाड्तो:बा ताम मी ल्हानान मुबा। तसैनोन दान्दे डादा चिठीरी भिबा सेम आरे।¹⁴ तर य्हाड योनान हुप तला भिंसी डाइ आश लबा मुला, य्हाड हुप तसीन जम्मान ताम लला।

¹⁵ एदेन छ्याम परमेश्वरला शान्ति तगै। चुरी मुबा जम्मान ह्योगदेसेनोन एदा प्याफुल्ला भिंसी पाड्बा मुला। थेरी मुबा जम्मान ह्योगदेदाएनोन डाइ प्याफुल्बा मुला भिंसी पाड्सी पिन्गो।

† 1:1 मुल १९:२९; रोमी १६:२३; १ कोर १:१४

चु चिठीला बारेरी पाडतो:मा

येशूदेन याकूबला आले यहूदासे भिबा मुबा (यहूदा १:१, मत्ती १३:५५, मर्कूस ६:३)।

पक्का था आरे, तर कोइ कोइ बाइबल विद्वानगदेसे यरूशलेम शहरग्याम तखम्ला भिसी पाड्बा मुला।

ओस्पन ईश्वी संवत् ६५-७० (विक्रम संवत् १२२-१२७) सालला गुडरी भिबा मुबा।

येशूदा विश्वास लबा म्हिगदेदा भिबा मुबा।

यहूदासे चु चिठी लुसीला ताम लोष्बा म्हिगदेग्याम होशियार तना लबाला लागिरी भिबा मुबा। थे लुसीला ताम लोष्बा म्हिगदेसे हाडसे हाडदान येशूदा विश्वास लबा म्हि हिन्ना भिसी पाड्बा। चु चिठी पत्रुससे भिबा न्हीरेमला चिठी हड्बान मुला। यहूदासे चु चिठी पढब लबागदेदा परमेश्वरसे हाडला म्हिगदेदा पिन्बा विश्वासदा जोगब लसी थान्बाला लागिरी ऑट पिन्बा मुला।

मुल तामगदे

प्याफुल्बा १-२

लुसीला ताम लोष्बागदेला बानीबेहोरदेन होशियार तना लबा तामगदे ३-१६

विश्वासरी कोड्सी चिउ भिसी होशियार तना लबा १७-२३

परमेश्वरला जयजयकार लबा २४-२५

यहूदासे भिबा चिठी

1 लास्सो, येशू ख्रीष्टदा तेन्बा डा याकूबला आले यहूदाग्याम परमेश्वरसे धम्सी माया लबागदेदेन येशू ख्रीष्टसे जोगब लसी थान्बागदेदा

प्याफुल्ला! †

2 एनीगदेसे परमेश्वरग्याम ल्हानान दया, शान्तिदेन माया याड्गै।

पाप लबागदेदा परमेश्वरसे सजाय पिन्ना

3 डाला सेम निबा ह्योगदे, यहाडदा परमेश्वरसे माया लसी थान्ना लबा गेला बारेरी सेमहेन्सेन भिइ म्हन्मुबा। तर परमेश्वरसे हाडला लागिरी फेसी थान्बा म्हिगदेदा सदनना लागिरी तिरैम पिन्बा विश्वासदा जोगब लसी थान्बारी चा एनीगदेसे भड याड्गै भिसी डाइ चु ताम भिनोन तो:ला भिसी म्हन्जी।

4 तिगदा भिसम लुसीला ताम लोष्बा कोइ कोइ म्हिगदे एनीगदेला गुडरी खालैसे था आयाड्ना लसी वाड्बा मुला। थेनीगदे चा परमेश्वरदा आतेन्बा म्हि हिन्ना। थेनीगदेसे एनीगदेदा परमेश्वरग्याम दयामाया याड्बा गा भिसी पाप लपुड्हुला। ओच्छे येशू ख्रीष्टनोन यहाडला प्रभुदेन मालिक हिन्ना भिसीएनोन विश्वास आलमुला। चुहड्बा म्हिगदेसे परमेश्वरग्याम सजाय याड्ला भिसी डाच्छान परमेश्वरला बचनरी भिबा मुला।

5 डाच्छा प्रभुसे तिग तिग लजी भिबा ताम एनीगदेदा था मुसैनोन डाइ एनीगदेदा कोइ कोइ ताम ढन्ना लला। थेसे हाडला म्हि इसाएलीगदेदा मिश्र यहुत्साग्याम ते:सी भजी। तसैनोन थेनीगदे न्हडला विश्वास आलबा म्हिगदेदा लिच्छा नाश लजी। †6 ओच्छे थेदा पिन्बा अधिकारला वास्ता आलना हाडला ग्ला ख्लासी भ्रबा स्वर्गदूतगदेदाएनोन निसाफ लबा धुडरी सजाय पिन्बाला लागिरी खाड्मै स्योबारी आखम्ना लसी प्रभुसे च्याल्दासे खीसी धोपधोष्बा ग्लारी थान्बा मुला। 7 थेहड् लसीन सदोमदेन गमोरा भिबा शहर ओच्छे थे शहरला क्यारमारला शहरला जम्मान म्हिगदेदा प्रभुसे नाश लजी। तिगदा भिसम थेनीगदे स्हान्दोदेन छ्याम ब्रेल्सी भ्रबादेन हेम्फेबे

हेम्फेबेन ब्रेल्सी नड्बा गे लसी भ्रमुबा। थे म्हिगदेदा खाड्मै आसिबा मेग्याम सजाय पिन्सी दान्देला म्हिगदेदा उन्बा मुला। †

8 थेहड् लसीन म्हड म्राड्बा चु लुसीला ताम लोष्बा म्हिगदेसे हाडसे हाडदान पाप लपुड्हुला, ओच्छे परमेश्वरग्याम अधिकार याड्बा म्हिगदेदा हेला लबादेन स्वर्गरी मुबागदेदा खिसी लमुला। 9 मुल स्वर्गदूत मिखाएलसेनोन मोशाला लासला बारेरी शैतानदेन छ्याम अधिकारला ताम लमा शैतानदा बिरोध लसी आबड्ना “प्रभुसेन एदा बड्गै” भिसी पाड्बा मुबा। †10 तर चुहड्बा म्हिगदेसे चा हाडसे घोतो:बा तामएनोन घोनोन आघोना बिरोध लसी भ्रमुला। तिगदा भिसम थेनीगदे ज्ञान आरेबा जन्तुगदे हड्बान मुला। थेहड्बा बानीबेहोरसे लमान थेनीगदे नाश तला।

11 थेनीगदेसे परमेश्वरग्याम घेन सजाय याड्ला। तिगदा भिसम थेनीगदे कयिन भिबा म्हिला हड्बान बानीबेहोर थोसी भ्रबा मुला। ओच्छे टाड्गाला लागिरी बालाम भिबा म्हिसे लबा हड्बान नड्बा गे लसी भ्रबा मुला। थेहड् लसीन कोरह भिबा म्हिसे हड्बान परमेश्वरग्याम अधिकार याड्बा तिगै दोष आरेबा म्हिगदेदान बिरोध लसी भ्रबा मुला। थेतबासेलमा थेनीगदेएनोन थे म्हिगदे हड्बान नाश तला। †

12 चु म्हिगदे चा एनीगदेसे मण्डलीरी लबा भोजगदेरी बेइज्जत लबागदे हिन्ना। तिगदा भिसम थेनीगदेसे तिगै धन्दा सुर्दा आलना हाडला जे वास्ता लसी ल्हानान चबा थुड्बा लमुला। थेनीगदे लाबासे भोर्बा नाम आरेबा खसुदेन तिगै आरोबा सेर्खला दोड हड्बान हिन्ना। थेहड्बा दोड चा न्हीरेमधोना सिसी टाहेन्सेन नड्सी गुर्मुला। 13 थेनीगदे समुन्दरी रे:बा छाल हड्बान हिन्ना। तिगदा भिसम समुन्दरी छाल रे:मा बोप्प्या थोन्बा हड् लसी थेनीगदेला सुड्ग्याम नड्बा तामगदे थोन्ना। थेहड् लसीन थेनीगदे मुग्याम ताड्सी म्हासी निबा सार हड्बान मुला। थेहड्बा म्हिगदेला लागिरी चा जुकजुकधोनाला लागिरी धोपधोष्बा ग्ला स्होसी थान्बा मुला।

‡ 1:7 उत्प १९:१-२४ † 1:9 दानि १०:१३, २१; १२:१; उन्बा १२:७; व्यव ३४:६; जक ३:२ † 1:11 उत्प ४:३-८; गन्ती २२:१-३५; १६:१-३५

† 1:1 मत्ती १३:५५; मर्कू ६:५ † 1:5 प्रस्था १२:५१; गन्ती १४:२९-३०

14 आदमहेन्से पुस्ता निस लिच्छाला हनोक भिबा म्हिसेनोन थेह्ङ्बा म्हिगदेला बारैरी डाच्छान चुह्ङ् भिसी पाङ्बा मुबा, “च्यागो, परमप्रभु झ्यासीन झ्याबारी आखम्बा हाडला म्हिगदेदेन † छ्याम फेख्खबान मुला। ††15 थेसे जम्मान म्हिगदेला निसाफ लला ओच्छे परमेश्वरदा आतेन्ना पाप गे लसी परमेश्वरला बिरोध लसी नड्बा ताम लबागदेदा सजाय पिन्ना। 16 गनगन लबागदे, स्थान्दोदा दोष लबागदे, नड्बा सेम अन्धार गे लबागदे, घेन दोःसी ताम लबागदेदेन हाडला फाइदाला लागिरी लुसीला ताम पाङ्बागदे चा चुगदेन हिन्ना।”

विश्वास थाख्लागो भिसी पाङ्बा

17 तर डाला सेम निबा ह्गोदे, एनीगदेसे य्हाडला प्रभु येशू ख्रीष्टला मुल चेलागदेसे डाच्छा पाङ्बा ताम थाम्लेःगो। 18 थेनीगदेसे चुह्ङ् भिसी पाङ्गुबा, “लिच्छाला धिनरी परमेश्वरदा आतेन्बादेन सेमरी जे लड् म्हन्बा थेनोन अन्धार लसी भ्रबा म्हिगदेसे खिसी लला।” †19 एनीगदेदा गिकसेम गिकग्याम फेना लबा म्हिगदे, म्हिना ज्ञान बुद्धि अन्धार भ्रबा परमेश्वरला आत्मा आरेबा म्हिगदे चुगदेन हिन्ना।

† ग्रीक बाइबलरी “म्हिगदे” भिसी पाङ्बा आरे। थेतबासेलमा बाइबलला ल्हाना ह्ङ्बा विद्वानगदेसे स्वर्गदूतगदे हिन्ना भिसी पाङ्बा मुला (मत्ती २५:३१)। †† 1:14 उत्प ५:१८, २१-२४ † 1:18 २ पत्रु ३:३

20 तर डाला सेम निबा ह्गोदे, एनीगदे चा हाडसे लबा चोखो विश्वासरी बढब तबान निउ। ओच्छे परमेश्वरला आत्माला शक्तिरी प्रार्थना लउ। 21 जुकजुकधोनाला जुनी याङ्बाला लागिरी एनीगदेसे य्हाडला प्रभु येशू ख्रीष्टला दया भ्रान्सी चिउ, ओच्छे परमेश्वरला मायारी हाडसे हाडदान जोगब लसी थान्गो। 22 थेह्ङ् लसीन शङ्का लबा म्हिगदेदा एनीगदेसे दया लउ। 23 स्थान्दोगदेदा नर्गला मेग्याम तेःसी जोगब लउ, ओच्छे खालै खालैदा दया लबारी होशियार तउ, पापसे लमा न्होङ्बा थेनीगदेला बानीबेहोरदा बिरोध लउ।

परमेश्वरला जयजयकार लउ

24 एनीगदेदा पापरी फसब तबाग्याम जोगब लबा शक्तिशाली परमेश्वरला जयजयकार तगै। थेसे एनीगदेदा तिगै दोष आरेबा म्हि स्होसी हाडलान घेन य्हालला डाच्छा ताङ्ना लसी भोर्ला। 25 य्हाडला प्रभु येशू ख्रीष्टग्याम य्हाडदा थान्ना लबा थेनोन परमेश्वर गिक जे सदन जम्मान भन्दा घेन ओच्छे थेदा जे घेन मानदेन जयजयकार ओच्छे शक्तिदेन अधिकार डाच्छाहेन्से दान्देधोना ओच्छे जुकजुकधोनान तगै। आमेन।

चु किताबला बारेरी पाड्ती:मा

येशूला मुल चेला यूहन्नासे भिबा मुबा। चु यूहन्नासे छार कबुलरी मुबा किताबगदे न्हडला “थारबा पिन्बा समाचार” देन गोर सोम चिठीगदेएनोन भिबा मुबा।

समुन्द्रला गुडरी मुबा पत्मोस भिबा ग्लारी भिबा मुबा।

ओस्पन ईश्वी संवत् ९०-९५ (विक्रम संवत् १४७-१५२) सालला गुडरी भिबा मुबा।

एशिया अञ्चलरी मुबा गोर निस मण्डलीगदेदा भिबा मुबा।

चु किताबरी मुबा जम्मान तामगदे परमेश्वरसे यूहन्नादा उन्बा ताम हिन्ना। चु ताम म्राड्बा धुडरी यूहन्नादा म्हाड हड्बान छोर्बा मुबा। यूहन्नादा उन्बा ताम चा दुखला धिनगदेला बारेरी हिन्ना। चु “दुखला धिनगदे” यूहन्नाला धुडरीन शुरु तसी जिन्बा मुबा। तिगदा भिसम थेनीगदेसे येशू ख्रीष्टदा ह्वाडला प्रभु हिन्ना भिसी विश्वास लबा मुबा। यूहन्नासे खास लसी चु चिठी पढब लबागदेदा आशदेन आँट पिन्बाला लागिरी ओच्छे दुखदेन आपत विपतला धुडरी ह्वाडसे लबा विश्वासरी याडयोड आतना चिबाला लागिरी बिन्ती लबा मुला।

चु किताबला ल्हाना हड्बा खण्डगदेरी उन्बा तामदेन म्राड्बा तामगदेदा चिनुगदेग्याम घोना लबा मुला। चुहड्बा चिनुगदे थे धुडला विश्वासीगदेसे घोबारी खम्मुबा, तर स्हान्दो म्हिगदेदा चा घोबारी गाहो तमुबा। हिन्बाम ल्हानान म्हिगदेसे चु किताबला बारेरी थरी थरीला तामगदे पाड्मुला। तर मुल ताम चा प्रस्टन मुला। थे मुल ताम चुनोन हिन्ना, प्रभु ख्रीष्टग्याम परमेश्वरसे शैतानदेन ह्वाडला जम्मान शत्रुगदेदा सदनना लागिरी नाश लला। ओच्छे जुन धुडरी शैतानदेन ह्वाडला जम्मान शत्रुगदेथोरी ढाला थे धुडरी परमेश्वरसे ह्वाडदा विश्वास लबा म्हिगदेदा छार स्वगदेन छार जम्बुलिड इनाम पिन्ना।

मुल तामगदे

शुरुला तामदेन फ्याफुल्बा १:१-८

परमेश्वरसे यूहन्नादा उन्बा ताम १:९-२०

गोर निस मण्डलीगदेदा भिबा चिठी २:१-३:२२

यूहन्नासे स्वर्ग म्राड्बा ४:१-११

गोर निस लाहा छाप लबा रिस्सी थान्बा किताबला मुठा ५:१-८:५

गोर निस बिगुलगदे ८:६-११:१९

अजिङ्गरदेन गोर न्ही जन्तु १२:१-१३:१८

यूहन्नादा उन्बा अर्गु तामगदे १४:१-१५:८

परमेश्वरला बोमोसे प्लिड्बा गोर निस खोरे १६:१-२१

परमेश्वरसे ह्वाडला शत्रुगदेथोरी ढाबा १७:१-२०:१०

परमेश्वरसे लबा जम्मान भन्दा लिच्छाला निसाफ २०:११-१५

छार स्वर्ग, छार जम्बुलिडदेन छार यरूशलेम २१:१-२२:५

ख्रीष्ट दो:सी योनान फेप्खला २२:६-२१

परमेश्वरसे यूहन्नादा उन्बा ताम

1 चु किताबला जम्मान तामगदे येशू ख्रीष्टग्याम उन्बा हिन्ना। ह्वाडला गे लबा म्हिगदेसे योनान ततो:बा जम्मान तामगदेला बारेरी घोखमै भिसी परमेश्वरसे येशू ख्रीष्टदा चु जम्मान ताम पिन्जी। चु ताम पाड्बाला लागिरी येशू ख्रीष्टसे ह्वाडला गे लबा यूहन्ना मुबा ग्लारी स्वर्गदूत गिक पुड्खजी।
2 ह्वाडसे म्राड्बा जम्मान ताम यूहन्नासे पाड्बा मुला। थेसे पाड्बा परमेश्वरला बचनदेन येशू ख्रीष्टसे उन्बा सत्य ताम चुनोन हिन्ना।³ चु किताब पढब लबादेन चु किताबरी मुबा परमेश्वरग्याम पाड्बा बचन इयान्सी थे अन्छार भ्रबा जम्मान म्हि परमेश्वरग्याम मोलम याड्बा म्हि हिन्ना। तिगदा भिसम चु जम्मान ताम योनान तसेला मुला।

यूहन्नासे फ्याफुल्ला भिसी पाड्बा

4 एशियारी मुबा गोर निस मण्डलीदा डा यूहन्नाग्याम फ्याफुल्ला। दान्देनोन मुला, डाच्छाएनोन मुबा, दो:सीनोन फेप्खबा परमेश्वरग्यामदेन

थेला ठिला डाच्छापट्टि चिबा गोर निस आत्माग्याम एनीगदेदा दयामायादेन शान्ति तगै।^{†5} ओच्छे परमेश्वरला बारेरी जम्मान सत्य ताम उन्बा विश्वास लखम्बा येशू ख्रीष्टग्यामसेनोन एनीगदेदा दयामायादेन शान्ति तगै। थे सिबागदेग्याम जम्मान भन्दा डाच्छा सोबादेन जम्बुलिडरी शासन लबा ग्लेगदेलाएनोन ग्ले हिन्ना।^{††}

थेसे य्हाडदा माया लसी ह्वाडला कासे पापग्याम फेबा मुला।⁶ थेसे ह्वाडला आबा परमेश्वरदा तेन्बाला लागिरी य्हाडदा परमेश्वरदा पूजा लबा म्हिेला य्हुल गिक स्होजी। थेनोन येशू ख्रीष्टदा सदन सदनना लागिरी मानदेन जयजयकार तगै। आमेन।[‡]

7 च्यागो, थे खसुरी फेप्खबान मुला, थेदा भलोसी साड्बागदेदेन जम्मान म्हिसे थेदा म्राड्ला।

† 1:4 प्रस्था ३:१४; उन्बा ४:५ †† 1:5 यशै ५५:४; भजन ८९:२७ ‡ 1:6 प्रस्था १९:६; उन्बा ५:१०

ओच्छे जम्बुलिडला जम्मान यहुलला म्हिगदेसे थेला लागिरी सुर्दा लला।
हिन्ना चु तनोन तला। आमेन। †

8 जम्मान भन्दा ग्रेन परमप्रभु परमेश्वरसे चुहड् भिसी सुड्बा मुला,
“अल्फादेन ओमेगा †† डानोन हिन्ना,” थे दान्दे मुला, डाच्छाएनोन मुबा,
दो:सीनोन फेप्लला। †

यूहन्नासे येशू ख्रीष्टदा म्राड्बा

9 डा एनीगदेला ज्योज्यो यूहन्नाएनोन एनीगदेदेन छ्यामनोन मुला।
य्हाडसे य्हाडला ग्ले येशूदा विश्वास लबासे लमा दुख नाबा मुला, तसैनोन
थेसे य्हाडदा चु दुख नाबारी ऑट पिन्बा मुला। चुलान लागिरी परमेश्वरसे
य्हाडदा इयोड्बा मुला। परमेश्वरला बचनदेन येशू ख्रीष्टला बारैरी थे:ना
लबासे लमा डादा समुन्द्रला गुडरी मुबा पत्मोस भिबा ग्लारी भोर्सी थान्बा
मुबा। 10 प्रभुला धिनकुनु †† डा परमेश्वरला आत्मासे प्लिड्बा मुबा। थेनोन
धुडरी डाला ग्यापग्याम बिगुलला हड्बान ग्रेन काडरी चुहड् भिसी पाड्बान
लबा थे:जी, 11 “एसे जुन ताम म्राड्बला थे जम्मान ताम किताब गिकरी भ्रिउ।
ओच्छे एफिसस, स्मुर्ना, पर्गामम, थिआटीरा, सार्डिस, फिलाडेल्फियादेन
लाउडिकिया शहररी मुबा गोर निस मण्डलीदान पुड्गो।”

12 डाड देन छ्याम ताम पाड्बा खाल चीम भिसी ग्याप दो:सी च्यामा
थेरी गोर निस म्हरला नाडसल थान्बा स्हेदेन, 13 नाडसल थान्बा स्हेला गुडरी
परमेश्वरसे पुड्बाना म्हि हड्बान काडधोनान धोबा क्वान क्वान्बादेन कुरी
म्हरला हड्बा फित्ता क्वान्बा म्हि गिकदा डाड म्राड्जी। ††14 थेला थोबोदेन
क्रा ऊनदेन प्लिड्बान तार तार्बा मुबा। ओच्छे थेला मी मे ल्हाम हड्बान
मुबा। ††15 थेला स्थाप चा मेरी ख्राड्सी स्होबा झक्झक्वा कॉसला ताड
हड्बान मुबा। ओच्छे थेला काड चा स्योड् इयबा हड्बान मुबा। ††16 थेला
दाहिने छ्यासे गोर निस सारगदे चुड्बा मुबा। ओच्छे थेला सुड्ग्याम
न्हीलोनपट्टि धार मुबा छ्यार्बा तरवार थोन्बा मुबा। थेला स्थाल चा धिनी
गुडला धिनीला स्हेर हड्बान मुबा।

17 थेदा म्राड्बा डा सिबा तेबान तसी थेला स्थापरी हिल्ली। तर थेसे हाडला
दाहिने छ्या डाथोरी थान्सी चुहड् भिसी सुड्जी, “थालोज्जो, जम्मान स्हे शुरु
लबादेन थुम्ना लबा डानोन हिन्ना। §18 सोबाएनोन डानोन हिन्ना। डा सिबा
मुबा। च्यागो, डा सदनना लागिरी सोबा मुला। ओच्छे सिबा म्हिगदेला आत्मा
चिबा ग्लादेन †† कालला साँचोगदे डादेन छ्यामनोन मुला। 19 थेतबासेलमा
एसे जुन ताम म्राड्बा मुला थे भ्रिउ। ओच्छे दान्दे तबा तामगदेदेन लिच्छा
तसेला तामगदे न्हीनोन भ्रिउ। 20 म्हिसे था आयाड्बा ताम एसे डाला दाहिने
यारी म्राड्बा गोर निस सारगदेदेन म्हरला नाडसल थान्बा स्हे निसला अर्थ चा
चुनोन हिन्ना। गोर निस सारगदे चा मण्डली निसदा च्याबा म्हिगदे ††† हिन्ना।
ओच्छे म्हरला नाडसल थान्बा स्हे निस चा मण्डली निस हिन्ना।”

एफिससला मण्डली

2 एफिससरी मुबा मण्डलीदा च्याबा म्हिदा चु ताम भ्रिउ।

चु ताम यारी गोर निस सार थोबादेन गोर निस म्हरला नाडसल
थान्बा स्हेला गुड्ग्याम भ्रबासे सुड्बा मुला। 2 एसे लबा जम्मान गेगदे डादा
था मुला। ओच्छे एसे दुख लसी गे लबादेन सेम नासी चिमुला भिबा ताम
डादा था मुला। आज्यबा गे लबा म्हिगदेदा नाबारी आखम्मुला भिबा
तामएनोन डादा था मुला। मुल चेला आहिन्सै मुल चेला हिन्ना भिसी
भ्रबागदेदा च्यासी थेनीगदेदा फट्टा म्हि हिन्ना भिसी एसे था याड्बा मुला
भिबा तामएनोन डादा था मुला। 3 ए थेन्नोन आतना डाला लागिरी दुख

† 1:7 दानि ७:१३; मत्ती २४:३०; मर्कू १३:२६; लूका २१:२७; १ थेस ४:१७; जक
१२:१०; यूह १९:३४, ३७ †† “अल्फादेन ओमेगा” भिबा चा ग्रीक ग्योडरी शुरुला हिगीदेन
जम्मान भन्दा लिच्छाला हिगी भिबा हिन्ना। चु भिबा चा जम्मान भन्दा डाच्छादेन जम्मान भन्दा
लिच्छा हिन्ना। † 1:8 उन्बा २१:६; २२:१३ †† “प्रभुला धिनकुनु” भिबा चा प्रभु येशू
सिबाग्याम सोबा धिनकुनुदा पाड्बा हिन्ना। †† 1:13 दानि ७:१३; १०:५ ††† 1:14
दानि ७:९; १०:६ ††† 1:15 इज १:२४; ४३:२ § 1:17 यशै ४४:६; ४८:१२; उन्बा
२:८; २२:१३ §† ग्रीक ग्योडरी सिबा म्हिगदेला आत्मा चिबा ग्लादा ‘हेडिस’ भिसी पाड्बा
मुला। थे ग्लारी सिबा म्हिगदेला आत्मा परमेश्वरसे जम्मान भन्दा लिच्छा लबा निसाफला धुड
भान्सी चिमुला (उन्बा ६:८; २०:१३, १४)। ††† ल्हानान हड्बा बाड्बलरी चा “मण्डलीदा
च्याबा म्हिगदे” भिबादा स्वर्गदूत भिसी भ्रिबा मुला (उन्बा २:९, ८, १२, १८; ३:१, ७, १४)।

नासी भान्सी चिबा मुला। 4 तर एला बिरोधरी डाड पाड्तो:बा ताम गिक
मुला। थे ताम चा एसे डादा डाच्छा लबा माया खलाबा मुला। 5 थेतबासेलमा
ए खानड्ग्याम मार ताड्जी, थे ताम ढन्गो। ओच्छे एसे लबा पाप खलासी
परमेश्वरपट्टि दो:सी डाच्छा लबा गे लउ। चुदे ए पाप खलासी परमेश्वरपट्टि
आदो:नी भिसम डा ए मुबा ग्लारी खसी एला नाडसल थान्बा स्हे थेग्याम
ते:ला। 6 तर एदेन छ्याम ज्यबा तामएनोन मुला, एसे डाड हड् लसीन
निकोलाइटसगदेला †† गेदा बिरोध लबा मुला। 7 जुन म्हिदा इयान्बा सेम
मुला, थेसे परमेश्वरला आत्मासे मण्डलीगदेदा सुड्बा ताम इयान्सी ज्यना
लसी घोउ। जुन म्हिसे ढाला थेदा परमेश्वरला बर्गैचारी ††† मुबा जुनी पिन्बा
दोडला रो चबारी पिन्ना। ††

स्मुर्नाला मण्डली

8 ओच्छे स्मुर्नारी मुबा मण्डलीदा च्याबा म्हिदा चु ताम भ्रिउ।

चु ताम जम्मान स्हे शुरु लबादेन जम्मान स्हे थुम्ना लबासे सुड्बा मुला, थे
सिबा मुबा दो:सी सिबाग्याम सोबा मुला। ††9 एसे गाते दुख नाबा मुला भिबा
तामदेन ए गाते प्राड्बो मुला भिबा ताम डादा था मुला। तर पाड्नोन तो:मा
ए प्युक्पोन मुला। यहूदी आहिन्सै यहूदी हिन्ना भिसी भ्रबा म्हिगदेसे एदा
गाते बिरोध लमुला भिबा तामएनोन डादा था मुला। थेनीगदे मी शैतानना
म्हिगदे हिन्ना। 10 एनीगदेथोरी खबारी छ्याइबा दुख म्राड्सी थालोज्जो।
च्यागो, एला विश्वास च्याबाला लागिरी शैतानसे एनीगदे न्हडला कोड
कोडदा इयाल्खानरी झाड्बला। तर एसे च्युडरे जे दुख नातो:ला। ए सिनोन
तो:सै डादा विश्वास लबा थाख्लागो। ओच्छे डाड एदा जुकजुकधोनाला
जुनी याड्बा इनाम ††† पिन्ना। 11 जुन म्हिदा इयान्बा सेम मुला, थेसे
परमेश्वरला आत्मासे मण्डलीगदेदा सुड्बा ताम इयान्सी ज्यना लसी घोउ।
जुन म्हिसे ढाला थेदा आत्मादा सिना लबा कालसे तिगै लबारी आखम। †††

पर्गाममला मण्डली

12 पर्गामम भिबा ग्लारी मुबा मण्डलीदा च्याबा म्हिदा चु ताम भ्रिउ।

चु ताम न्हीलोनपट्टि छ्यार्बा धार मुबा तरवार थोबासे सुड्बा मुला। 13 ए
शैतानना ठि मुबा ग्लारी चिमुला भिबा ताम डादा था मुला। तसैनोन एसे
डादा विश्वास लसीन चिबा मुला, ओच्छे विश्वासरी कोड्बा तसी चिबा डाड
विश्वास लखम्बा एन्टिपासदा शैतानसे शासन लबा ग्लारी एनीगदेलान
डाच्छा साड्बा मुबा। थे धुडरीनोन एसे विश्वास लबा आखलानी भिबा
तामएनोन डादा था मुला।

14 तर एला बिरोधरी डाड पाड्तो:बा तिगै ताम मुला। तिगदा भिसम एदेन
छ्याम कोड कोड बालामसे लोप्ला ताम अन्धार भ्रबा म्हिगदेएनोन मुला। थेसे
इसाएलीगदेदा पापरी फसब लबाला लागिरी मूर्तिदा फुल्बा स्हेगदे चबारीदेन
स्थान्दोदेन छ्याम ब्रेल्सी भ्रबारी तला भिसी बालाक ग्लेदा लोप्पुबा।
§§§15 थेहड् लसीन निकोलाइटसगदेसे लोप्ला ताम अन्धार भ्रबा म्हिगदेएनोन
एदेन छ्याम मुला। 16 थेतबासेलमा हाडला पाप खलासी परमेश्वरपट्टि
दो:गो। आहिन्सम डा ए मुबा ग्लारी योनान खला ओच्छे डाला सुडरी मुबा
तरवारसे थेनीगदेदेन छ्याम लडाइ लला।

17 जुन म्हिदा इयान्बा सेम मुला, थेसे परमेश्वरला आत्मासे मण्डलीगदेदा
सुड्बा ताम ज्यना लसी इयान्तो:ला। जुन म्हिसे ढाला, डाड थेदा छुम्सी
थान्बा मन् पिन्ना। ओच्छे डाड थेदा छार मिन भ्रिबा तार युड्बा गिक
पिन्ना, थे युड्बा याड्बा म्हिसे बाहेक स्थान्दो खालैसेन आघो। 18

थिआटीराला मण्डली

18 थिआटीरारी मुबा मण्डलीदा च्याबा म्हिदा चु ताम भ्रिउ।

§† निकोलाइटसगदे भिबा चा लुसीला ताम लोप्ला म्हिगदेला समूह हिन्ना। §††
“परमेश्वरला बर्गैचा” भिबा चा स्वर्गएनोन तखम्ला। §† 2:7 उत्प २:९; उन्बा २२:२; इज
२८:१३; ३१:८ §† 2:8 यशै ४४:६; ४८:१२; उन्बा १:१७; २२:१३ §†† थे धुडरी खेलरी
ढाबा म्हिदा इनाम चा म्हेंदोला मुकुट पिन्मुबा। §†† 2:11 उन्बा २०:१४; २१:८ §§§
2:14 गन्ती २२:५-७; ३१:१६; व्यव २३:४; गन्ती २५:१-३ 18 2:17 प्रस्था १६:१४-१५;
१६:३३-३४; यूह ६:४८-५०; यशै ६२:२; ६५:१५

चु ताम मेला ल्हाम ह्ण्डबा मी मुबा ओच्छे झक्झक्का काँस ह्ण्डबान स्थाप मुबा परमेश्वरला झासे सुड्बा मुला। ¹⁹ एसे तिग तिग लमुला थे डादा था मुला। एसे लबा माया, एसे लबा विश्वास, एसे लबा गेदेन नाबा जम्मान ताम डादा था मुला। ओच्छे एसे डाच्छा भन्दा दान्दे ल्हानान गे लमुला भिबाएनोन डादा था मुला।

²⁰ तर एला बिरोधरी डाइ पाइतोःबा तामएनोन मुला। एसे हाडसे हाडदान अगमवक्तास्या हिन्ना भिसी भ्रबा इजेबेल भिबा म्रिडम्हेमेदा थेसे म्हन्बा अन्धार लपुड्जी। थेसे डाला गे लबा म्हिगदेदा स्थान्दोदेन छ्याम ब्रेल्सी भ्रबारीदेन मूर्तिदा फुल्बा स्हेगदे चबारी तला भिसी लोप्पुला। चुह्ण्ड लसी थेसे थेनीगदेदा फसब लबा मुला। ²¹ डाइ थेदा हाडला पाप ख्लासी परमेश्वरपट्टि दोःबारी मौका पिन्जी। तर थे स्थान्दोदेन छ्याम ब्रेल्सी भ्रबारी ख्लासी परमेश्वरपट्टि दोःबारी आड्यान्नी। ²² च्यागो, डाइ थेदा स्हु स्हेर पिन्सी थान्ना। ओच्छे थे म्रिडम्हेमेदेन छ्याम ब्रेल्सी भ्रबागदेसे हाडसे लबा आज्यबा गे ख्लासी परमेश्वरपट्टि आदोःनी भिसम डाइ थेनीगदेदा ल्हानान दुखरी थान्ना। ²³ डाइ थेला ताम ड्यान्सी भ्रबागदे जम्माना नश लला। ओच्छे जम्मान मण्डलीगदेसे जम्माना सेमला तामदेन म्हन्बा ताम म्राड्बादेन था याड्बा डा थेनोन हिन्ना भिसी था याड्बा। डाइ एनीगदे जम्माना हाड हाडला गे अन्धारला इनाम पिन्ना।

²⁴ तर थिआटीराला मण्डलीरी मुबा थे ताम अन्धार आभ्रबादेन शैतानना सेमरी मुबा ताम अन्धार आभ्रबा स्थान्दोगदेदा चा डाइ पाइला। डाइ एनीगदेथोरी तिगै दुख तना आल। ²⁵ तर एनीगदेदेन छ्याम जुन विश्वास मुला, डा आखतेधोना थे विश्वासरी जे कोड्सी चिउ। ²⁶ जुन म्हिसे ढाला ओच्छे आसितेधोना डाइ म्हन्बा अन्धार गे लला, थेदा डाइ स्हुल स्हुलथोरी शासन लबा अधिकार पिन्ना। ^{††}

²⁷ जमाहेन्से थेसे फाइला कडी थोसी थेनीगदेथोरी शासन लला। ओच्छे साप्राला ताड थिबा ह्ण्ड लसी थेनीगदेला शक्ति नाश तला।

²⁸ डाइएनोन डाला आबाग्याम चु अधिकार याड्बा मुला। थेनीगदेसे ढाजी भिसी उन्बाला लागिरी डाइ थेनीगदेदा स्होला सुक्र पिन्ना। ²⁹ जुन म्हिदा ड्यान्बा सेम मुला थेसे परमेश्वरला आत्मासे मण्डलीदा तिग सुड्बा मुला, थे ताम ड्यान्सी ज्यना लसी घोतोःला।

सार्डिसला मण्डली

3 सार्डिसरी मुबा मण्डलीदा च्याबा म्हिदा चु ताम भिउ।

चु ताम परमेश्वरदा तेन्बा गोर निस आत्मादा तहरी थान्बादेन गोर निस सार थोबासे सुड्बा मुला। एला जम्मान गेगदे डादा था मुला, ए सोबा मुला भिसी मी पाइमुला, तर ए सिबा मुला। ² थेतबासेलमा छोर्सी चिउ, तिगदा भिसम एदेन छ्याम मुबा विश्वास सिबारी छ्याइबा मुला। थेतबासेलमा नाश तबा भन्दा डाच्छान जोगब लसी कोड्ना लसी थान्गो। तिगदा भिसम एसे लबा गे डाइ परमेश्वरदा सेम निबा खाल्ला आस्याप्नी। ³ एसे जुन ताम थेःबा मुला ओच्छे लोप्बा मुला, थे ताम ढन्गो। ओच्छे थे ताम अन्धार भ्रसी हाडला पाप ख्लासी परमेश्वरपट्टि दोःगो। डा ए मुबा ग्लारी य्ही खबा ह्ण्ड लसी खाल्लैसे था आयाड्ना लसी खला। तर होशियार तसी आचिनी भिसम एसे डा खबा थानोन आयाड्। [‡]

⁴ तर सार्डिसरीनोन कोड कोड म्हिगदेसे चा हाडला क्वान फोहोर ^{‡‡} तना लबा आरे। थेनीगदे डादेन छ्यामनोन तार क्वान क्वान्सी भ्रला। तिगदा भिसम थेनीगदे डादेन छ्याम भ्रबाधोनाला मुला। ⁵ जुन म्हिसे ढाला थेदा चुह्ण्ड लसी तार क्वान क्वान्सी पिन्ना। डाइ थेला मिन जुकजुकधोनाला जुनीला किताबग्याम खाइमै मेटब आल। डाइ थेदा डाला आबादेन आबाला दूतगदेला डाच्छा चु डालान हिन्ना भिसी पाइला। ^{‡‡‡} जुन म्हिदा ड्यान्बा सेम मुला, थेसे परमेश्वरला आत्मासे मण्डलीगदेदा तिग सुड्बा मुला, थे ताम ड्यान्सी ज्यना लसी घोतोःला।

† 2:20 १ राजा १६:३१; २ राजा ९:२२, ३० †† 2:26 भजन २:८-९ ‡ 3:3 मत्ती २४:४३-४४; लूका १२:३९-४०; उन्बा १६:१५ ††† फोहोर क्वान भिबा चा पापी बानीबेहोर हिन्ना। ओच्छे तार क्वान भिबा चा परमेश्वरदा सेम निबा बानीबेहोर हिन्ना। ††† 3:5 प्रस्था ३२:३२-३३; भजन ६९:२८; उन्बा २०:१२; मत्ती १०:३२; लूका १२:८

फिलाडेल्फियाला मण्डली

7 फिलाडेल्फियारी मुबा मण्डलीदा च्याबा म्हिदा चु ताम भिउ।

चु ताम तिगै दोष आरेबादेन सत्यसे सुड्बा मुला। थेदेन छ्याम दाऊद ग्लेला साँचो मुला, थेसे ठोड्बा स्हे खाल्लैसे दुड्बारी आखम। ओच्छे थेसे दुड्बा स्हे खाल्लैसे ठोड्बारी आखम। ^{‡‡‡} एसे लबा जम्मान गेगदे डादा था मुला। च्यागो, डाइ एला लागिरी खाल्लैसेन दुड्बारी आखम्बा म्राप ठोड्सी थान्बा मुला। एदेन छ्याम ल्हानान भड आरे भिबा ताम डादा था मुला। तसैनोन एसे डादा विश्वास लबा खलाबा आरे, ए डाला बचन अन्धार भ्रबा मुला। ⁹ च्यागो, शैतानना म्हिगदेसे हाड यहूदी आहिन्सै यहूदी हिन्ना भिसी लुसीला ताम पाइबागदेदा डा खसी एला काडरी प्या लपुड्ला। ओच्छे डाइ एदा माया लमुला भिबा ताम थेनीगदेदा घोना लला। ^{‡‡‡‡} एसे ल्हानान दुख नासी डाइ कुल्बा ताम ड्यान्बासे लमा जम्बुलिडला जम्मान म्हिगदेला विश्वास च्याबा धुडरी तबारी छ्याइबा ग्रेन दुखग्याम डाइ एदा जोगब लला।

¹¹ डा योनान खबान मुला। एसे ढाबा मुकुट खाल्लैसेन ब्यन्सी थाभोगै भिसी एदेन छ्याम मुबा ताम जोगब लसी थान्गो। ¹² जुन म्हिसे ढाला, थेदा डाइ डाला परमेश्वरला मन्दिरला थाम स्होला, ओच्छे थे थेग्याम खाइमै आथोन। डाइ थेथोरी डाला परमेश्वरला मिन भ्रिला, जमाहेन्से थे डाला परमेश्वरला शहरला म्हि दोला। थे शहर डाला परमेश्वरग्याम स्वर्गहेन्से मार खबा छार यरूशलेम हिन्ना। ओच्छे थेथोरी डाइ डाला छार मिनएनोन भ्रिला। ^{‡‡‡‡‡} जुन म्हिदा ड्यान्बा सेम मुला थेसे परमेश्वरला आत्मासे मण्डलीगदेदा सुड्बा ताम ड्यान्सी ज्यना लसी घोतोःला।

लाउडिकियाला मण्डली

14 लाउडिकियारी मुबा मण्डलीदा च्याबा म्हिदा चु ताम भिउ।

चु ताम परमेश्वरसे स्होबा जम्मान स्हेगदेथोरी शासन लबा, आमेन भिबादेन विश्वास लखम्बा ओच्छे सत्य ताम उन्बासे सुड्बा मुला। ^{‡‡‡‡‡‡} एसे लबा गेगदे डादा था मुला। ए न्ह लेप्बा मुला, न्ह सिम्बा मुला। बरु ए कि सिम्बा तगै कि लेप्बा तगै भिबा डाला सेम मुला। ¹⁶ ए न्ह लेप्बा मुला न्ह सिम्बा मुला, तर दालदोल जे मुबासे लमा डाइ एदा डाला सुड्ग्याम थो भ्याइबा ह्ण्ड लसी भ्याइला। ¹⁷ एसे हाडदा डा फ्युकपो मुला, डादेन छ्याम जम्मान स्हे मुला ओच्छे डादा तिगै स्हेला खॉचो आरे भिसी पाइमुला, तर ए गाते दया खबाधोनाला मुला भिबा तामदेन दुख याड्बा, प्राडबो, कानादेन लिगन्डी मुला भिबा ताम एदा था आरे। ¹⁸ थेतबासेलमा सदन फ्युकपो दोबाला लागिरी ड्याग्याम मेरी खाड्सी खारेब लबा म्हर ग्लुउ। थेह्ण्ड लसीन एदा पेःबा खबा लिगन्डी ल्हुइ घप्बाला लागिरी तार क्वान ओच्छे मी म्राड्बाला लागिरी मन ड्याग्याम ग्लुउ भिबा एदा डाला सल्लाह मुला।

¹⁹ जुन म्हिदा डाइ माया लला, थेदा डाइ बड्सी तहरी थान्ना। थेतबासेलमा झन्सी गे लबारी सेम लउ, ओच्छे हाडला पाप ख्लासी डापट्टि दोःगो। ^{‡‡‡‡‡‡‡} च्यागो, डा खाल्लैला दिमरी खसी ड्योइमा चुदे खाल्लै म्हिसे डाला काड थेःसी म्राप ठोड्जी भिसम डा दिम न्हडरी खला। ओच्छे थेदेन छ्याम चिसी चबा थुड्बा लला, थेसेनोन डादेन छ्यामनोन चिसी चबा थुड्बा लला।

²¹ डाइ ढाजी, ओच्छे डाला आबादेन छ्यामनोन आबाला ठिरी चिबा ह्ण्ड लसी जुन म्हिसे ढाला डाइ थेदा डाला ठिरी डादेन छ्यामनोन चिपुड्ला। ²² जुन म्हिदा ड्यान्बा सेम मुला, थेसे परमेश्वरला आत्मासे मण्डलीगदेदा सुड्बा ताम ड्यान्सी ज्यना लसी घोतोःला।

यूहन्नासे स्वर्ग म्राड्बा

4 जमाहेन्से च्यागो, डाइ स्वर्गरी म्राप गिक ठोड्बा म्राड्जी। डाइ डाच्छा थेःबा बिगुलला ह्ण्डबान काइग्याम डादा चुह्ण्ड सुड्बान लबा डाइ थेःजी। “ए तोर खउ, दाहेन्से तसेला तामगदे डाइ एदा उन्ना।” ² जमाहेन्से

‡‡‡ 3:7 यशै २२:२२; अय्यूब १२:१४ ‡‡‡‡ 3:9 यशै ४९:२३; ६०:१४; ४३:४ ‡‡‡‡‡ 3:12 उन्बा २१:२; यशै ६२:२; ६५:१५ ‡‡‡‡‡‡ 3:14 हितो ८:२२ ‡‡‡‡‡‡‡ 3:19 हितो ३:१२; हिब्रू १२:६

डा तिकवुरीन परमेश्वरला आत्मासे प्लिड्जी। ओच्छे स्वर्गरी म्हि गिक धन्छ्याबान लबा ठि गिक म्राड्जी।¹³ थेला स्थाल चा झक्झक्बा मणि ह्इबान जेबा मुबा ओच्छे ठिला क्यारक्युर चा झक्झक्बा रत्न ह्इबान लरक्युड मुबा।⁴ थे ठिला क्यारक्युर बोगल गिकसे गोर ब्लि अर्गु ठिगदे मुबा। थेनोन ठिगदेरी बोगल गिकसे ब्लि गन्बागदे चिबा मुबा। थेनीगदेसे तार क्वान क्वान्बादेन थोबोरी म्हरला मुकुट कूबा मुबा।⁵ थे ठियाम तिप्लीड ह्इ लसी मे थोन्बादेन गडडगुडुड मु ठेड्बा ह्इबा काइ खमुबा। ओच्छे थे ठिला डाच्छापट्टि गोर निस मेदड लुड्बा मुबा। थे मेदड चा परमेश्वरला आत्मा निस हिन्ना।¹¹⁶ थे ठिला डाच्छापट्टि प्रस्टन म्राड्बा ऐना ह्इबान समुन्द्र मुबा। ‡

लिच्छापट्टिएनोन डाच्छापट्टिएनोन ल्हुड नाडनोन मीनोन मी मुबा गोर ब्लि छोन्बो जन्तु थे ठिला क्युर्नोन मुबा।⁷ थे जन्तुगदे चा गिक च्यान ह्इबा, गिक म्हे बहर ह्इबा, ओच्छे गिकला ली चा म्हिला ह्इबा मुबा, थेह्इ लसीन गिक चा प्याड्बान लबा ग्वाइ ह्इबान मुबा।⁸ थे गोर ब्लि छोन्बो जन्तुगदेलेन ‡ गोर दु दु भ्याप मुबा। ओच्छे थेनीगदेला भ्यापला पाखापट्टिएनोन न्हडपट्टिएनोन मी मुबा। थेनीगदे धिन म्हुननोन थेन आतना चुह्इ भिसी व्हाइ गोमुबा,
“जम्मान भन्दा घेन परमप्रभु परमेश्वर
चोखो, चोखो, चोखो ‡ मुला।

थे दान्देनोन मुला, डाच्छापनोन मुबा ओच्छे दोःसीनोन फेखला।” ‡‡

⁹ थे छोन्बो जन्तुगदेसे जुकजुकधोनान सोसी चिबा मुल ठिरी धन्छ्याबादा जयजयकारदेन धन्यवाद पिन्सी मान लमुबा।¹⁰ जमाहेन्से थे बोगल गिकसे गोर ब्लि गन्बागदेसे ठिरी धन्छ्याबा सदन सोसी चिबादा प्या लजी। ओच्छे थेनीगदेसे ह्वाड ह्वाडला मुकुट ठिला डाच्छापट्टि थान्सी चुह्इ भिसी व्हाइ गोजी,

¹¹ “जम्मान जयजयकार, मानदेन शक्ति याड्तोःबा डन्ना प्रभु परमेश्वर ह्वाड जे हिन्ना।

तिग्दा भिसम जम्मान स्हेगदे ह्वाडसेन स्होबा हिन्ना।

थे जम्मान स्हे ह्वाडसे म्हन्बा अन्धारनोन तजी, ओच्छे स्होजी।”

गोर निस लाहा छाप लसी रिल्सी थान्बा किताबला मुठा

5 ओच्छे डाइ ठिरी धन्छ्याबाला दाहिने छ्यारी रिल्सी थान्बा किताबला मुठा गिक म्राड्जी। थे किताबरी न्हीलोनपट्टि भिबा मुबा ओच्छे बन्द लसी ग्ला निसरी लाहा छाप लबा मुबा। ‡‡² ओच्छे डाइ शक्तिशाली स्वर्गदूत गिकदा म्राड्जी। थेसे “चु रिल्सी थान्बा किताबला मुठारी लबा लाहा छाप ब्लबादेन ठोड्खम्बाधोनाला म्हि खाल मुला?” भिसी घेन काइसे पाड्बान मुबा।³ तर स्वर्गरी, जम्बुलिडरी ओच्छे जम्बुलिडला धिरी चु रिल्सी थान्बा किताब ब्लसी च्याबारी खम्बा म्हि खाले आरेबा।⁴ थे रिल्सी थान्बा किताब ब्लसी च्याखम्बा म्हि खालेनोन आस्याप्बासे लमा डा ल्हानान काजी।⁵ जमाहेन्से गन्बागदे न्हडला गिकसे डादा “थाक्रागो, च्यागो, यहूदा यहुलला दाऊद वंशयाम थोन्बा च्यानसेन ढाबा मुला। चु किताबला ग्ला निसला लाहा छाप ब्लसी ठोड्बाधोनाला म्हि चा थेनोन हिन्ना” भिसी भिजी।⁶ जमाहेन्से साइबा थार्बा पिन्बा ग्यु बोगो ‡ ह्इबान खालेदा परमेश्वरला ठिला गुडरी राप्सी चिबा डाइ म्राड्जी। थेला क्युर्सीन गोर ब्लि जन्तुगदेदेन गन्बागदे मुबा। थेला गोर निस रुदेन गोर निस मी मुबा। चु चा जम्बुलिडला जम्मान ग्लारी पुड्खबा परमेश्वरला आत्मा निस हिन्ना।⁷ थे फेप्सी मुल ठिरी धन्छ्याबाला दाहिने छ्याग्याम थे रिल्सी थान्बा किताबला मुठा किन्जी।⁸ थेसे थे रिल्सी थान्बा किताबला मुठा किन्माहेन्से थे गोर ब्लि छोन्बो जन्तुदेन बोगल गिकसे ब्लि गन्बागदेसे थार्बा पिन्बा ग्यु बोगोदा प्या लजी।

† 4:2 इज १:२६-२८; १०:१ †† 4:5 प्रस्था १९:१६; उन्बा १:४; ८:५; ११:१९; १६:१८; इज १:१३; जक ४:२ ‡ 4:6 इज १:२२, ५-१०; १०:१४ ‡‡ चु जन्तु चा जम्बुलिडला जन्तु ह्इबा आहिने। तर परमेश्वरसे यूहन्नादा तिगे ताम उन्बा धुडरी म्राड्बा ताम पाड्बा जन्तु हिन्ना। ‡‡ चुरी “चोखो” भिबा चा तिगे दोष आरेबादेन जम्मान भन्दा घेन ओच्छे थे भन्दा स्थान्दो खाले आरे। थेतबासेलमा जम्मासेन थेदा तेन्तोःला। ‡‡‡ 4:8 इज १:१८; १०:१२; यशै ६:२-३ ‡‡‡ 5:1 इज २:९-१०; यशै २९:११ § 5:5 उत्प ४९:९; यशै ११:१, १० § च्यानदेन थार्बा पिन्बा ग्यु बोगो भिबा चा येथू ख्रीष्टदा पाड्बा हिन्ना। §†† 5:6 यशै ५:३; जक ४:१०

जम्मालान यारी वीणादेन ज्यबा बास्ना खबा धूपसे प्लिड्बा म्हरला पोड्मो ताड मुबा। थे ज्यबा बास्ना खबा धूप चा परमेश्वरला म्हिगदेसे लबा प्रार्थना हिन्ना। ‡‡⁹ थेनीगदेसे चुह्इ भिसी छार व्हाइ गिक गोजी,

“चु रिल्सी थान्बा किताबला मुठा किन्सी

लाहा छाप ब्लबादेन ठोड्बाधोनाला ह्वाड जे मुला।

तिग्दा भिसम ह्वाडदा साइबा मुबा,

ओच्छे ह्वाडला कासे जम्मान वंश, ग्योइ, म्हि, यहुलदेन यहुल्सादा

पापला सय फासी परमेश्वरला लागिरी ग्लुजी। ‡‡†

¹⁰ व्हाडला परमेश्वरदा तेन्ने भिसी

ह्वाडसे थेनीगदेदा परमेश्वरदा पूजा लबा यहुल गिक स्होबा मुला।

ओच्छे थेनीगदेसे जम्बुलिडरी शासन लला।” ‡†

¹¹ दोःसी डाइ च्यामा, परमेश्वरला ठिदेन जन्तुगदे ओच्छे गन्बागदेला क्युर्सीन ल्हानान स्वर्गदूतगदेसे व्हाइ गोबा म्राड्जी। थेनीगदे लाख, करोड इयानोन आखम्बाधोना मुबा। ‡‡¹² थेनीगदेसे घेन काइरी चुह्इ भिसी व्हाइ गोबान मुबा,

“जम्मालान लागिरी बलि तबा थार्बा पिन्बा ग्यु बोगो जे

जम्मान शक्ति, धन सम्पत्तिदेन ज्ञान बुद्धि,

ओच्छे भड, मान, य्हाल य्हालदेन जयजयकार

किन्खम्बाधोनाला मुला।”

¹³ ओच्छे स्वर्गदेन जम्बुलिड ओच्छे जम्बुलिड धिरी, समुन्दरीदेन थेरी मुबा

जम्मान जन्तुगदेसे चुह्इ भिसी व्हाइ गोबान लबा डाइ म्राड्जी।

“ठिरी धन्छ्याबादेन थार्बा पिन्बा ग्यु बोगोदा

सदन सदन जयजयकार, मानदेन य्हाल य्हाल,

ओच्छे शक्ति तगै।”

¹⁴ जमाहेन्से थे गोर ब्लि छोन्बो जन्तुसे “आमेन” भिजी। ओच्छे थे

गन्बागदेसे चा प्या लबान जयजयकार लजी।

लाहा छाप ब्लबा

6 जमाहेन्से डाइ थे गोर निस लाहा छाप न्हडला छाप गिक थार्बा पिन्बा ग्यु बोगोसे ब्लबा म्राड्जी। थेनोन धुडरी थे गोर ब्लि छोन्बो जन्तुगदे न्हडला गिकसे मु घुर्बा ह्इबान काइरी “खउ” भिसी पाड्बा डाइ म्राड्जी।² जमाहेन्से डाइ तार ता गिक म्राड्जी। थे ताथोरी मुबा म्हिसे म्यादली गिक थोबा मुबा। थेदा मुकुट गिक पिन्जी, ओच्छे थे ढाबाला लागिरी ढाबा म्हि दोःसी थेग्याम भ्रजी। ‡‡†

³ थार्बा पिन्बा ग्यु बोगोसे दोःसी न्हीरेमला लाहा छाप ब्लमा अर्गु जन्तु गिकसे “खउ” भिसी पाड्बा डाइ थेःजी।⁴ जमाहेन्से डाइ वाला ता गिक म्राड्जी। थे ताथोरी मुबा म्हिदा म्हिगदे न्हडरी गिकसेम गिकदा साइगै भिसी जम्बुलिडग्याम शान्ति ब्यन्सी भोर्बा अधिकार पिन्जी। ओच्छे थेदा घेन तरवार गिकएनोन पिन्जी। ‡‡‡

⁵ दोःसी थार्बा पिन्बा ग्यु बोगोसे सोमरेमला लाहा छाप ब्लजी। थे धुडरी डाइ अर्गु जन्तुसे “खउ” भिसी पाड्बा म्राड्जी। जमाहेन्से डाइ म्लाड्गै ता गिक म्राड्जी। थे ताथोरी मुबा म्हिला यारी उमाल गिक मुबा।⁶ डाइ थे गोर ब्लि छोन्बो जन्तुगदेला गुडग्याम चुह्इ भिबा काइ थेःजी। “तिरेला ज्यालासे ग्वा ग्लुबा हिन्सम किलो नाड ओच्छे जौ ग्लुबा हिन्सम किलो सोम ग्लुबारी खम्ला। तर छ्युगुला दोडदेन अडगुरला दोडदा चा न्होड्ना थालउ।

⁷ ओच्छे थार्बा पिन्बा ग्यु बोगोसे ब्लिरेमला लाहा छाप ब्लजी। थे धुडरी डाइ अर्गु जन्तुसे “खउ” भिसी पाड्बा म्राड्जी।⁸ जमाहेन्से डाइ उर ता गिक म्राड्जी। थे ताथोरी क्रेःबा म्हिला मिन चा “काल” मुबा। ओच्छे थेला लिच्छा लिच्छा चा सिबा म्हिगदेला आत्मा चिबा ग्ला मुबा। थेनीगदेदा लडाइ, अनिकाल, देसानदेन जम्बुलिडला हि जन्तुगदेग्याम जम्बुलिडला भो ब्लिरी भो गिकदा नाश लबा अधिकार पिन्बा मुबा। ‡‡‡

⁹ थेह्इ लसीन थार्बा पिन्बा ग्यु बोगोसे डारेमला लाहा छाप ब्लजी। थे धुडरी डाइ धूप म्राबा ग्लाला धिरी परमेश्वरला बचनदेन परमेश्वरला बारेरी

‡‡ 5:8 भजन १४१:२ ‡‡† 5:9 भजन ३३:३; ९८:१; यशै ४२:१० ‡† 5:10 प्रस्था १९:६; उन्बा १:६ ‡‡ 5:11 दानि ७:१० ‡‡† 6:2 जक १:८; ६:३, ६ ‡‡‡ 6:4 जक १:८; ६:२ ‡‡‡ 6:8 उन्बा १:१८; इज १४:२१

थे:ना लबासे लमा स्हान्दोसे साइबा म्हिगदेला आत्मागदे म्राड्जी।¹⁰ ओच्छे थेनीगदेसे घेन काइरी क्रिड्बान, “जम्मान भन्दा घेन ओच्छे जम्मान भन्दा चोखोदेन सत्य प्रभु, हाडसे डन्दा साइबा जम्बुलिडरी मुबा म्हिगदेला ठीक निसाफ खाइमा लसी थेनीगदेदा सजाय पिन्ना?” भिसी भिजी।¹¹ थेनीगदे जम्मादान गोर गिक गिक तार क्वान पिन्जी। ओच्छे थेनीगदेदा एनीगदेदा ह्इ लसी साइतो:बा येशूदा तेन्बा एनीगदेला जम्मान ह्दोदेन ज्योज्यो आले नाना आडागदेदाएनोन आसाइतेधोना भ्रान्गो भिसी भिजी।

¹² जमाहेन्से डाइ थार्बा पिन्बा ग्यु बोगोसे दुरेमला लाहा छाप ब्लबा म्राड्जी। थे धुइरी घेन सडगुल खजी। ओच्छे धिनी म्लाड्गै क्वान ह्इबान धोपधोप तजी, लनी चा का ह्इबान वाला तजी।¹³ लाबालुडसरसे अज्जीरला दोड य्होङ्गा आचिप्बा रोगदे ताइबा ह्इ लसी मुला सारगदे जम्बुलिडरी ताइजी।¹⁴ मु चा कागज ह्इन्ोन रिन्बान म्हासी निजी। ओच्छे गडगदेदेन समुन्द्रला गुडरी मुबा ग्लागदे चा हाड हाडला ग्लाय्याम ले:जी।¹⁵ जमाहेन्से जम्बुलिडला ग्लेगदे, शासन लबागदे, सिपाहीला कप्तानगदे, फ्युक्पो म्हिगदे, अधिकार मुबा म्हिगदे, नोकरगदेदेन अर्गु जम्मान म्हिगदे गड गडला ऊगदेदेन पहरागदेरीक्यार लाजी।¹⁶ थेनीगदेसे गडदेन पहरागदेदा चुह्इ भिसी भिजी, “ठिरी धन्छ्याबादेन थार्बा पिन्बा ग्यु बोगोला बोमोग्याम डन्दा छुम्सी जोगब लउ।¹⁷ तिग्दा भिसम ठिरी धन्छ्याबादेन थार्बा पिन्बा ग्यु बोगोसे निसाफ लसी घेन सजाय पिन्बा धिन खसी जिन्बा मुला। थे धिनना दुख खाल्से नाखम्ला?”¹⁸

लाख गिकसे बोगल न्हीसे हजार ब्लिदा छाप लबा

7 जमाहेन्से डाइ गोर ब्लि स्वर्गदूतगदेदा जम्बुलिडरी, समुन्द्ररी ओच्छे खजिबै दोडरी लाबा थाखगै भिसी जम्बुलिडलापट्टि ब्लिग्यामसेन खबा लाबादा रोकब लबान जम्बुलिडला कुनी ब्लिरी राप्सी चिबा म्राड्जी।² ओच्छे डाइ छोन्बो परमेश्वरला छाप पुइसी स्यारग्याम स्हान्दो स्वर्गदूत गिक खबान लबा म्राड्जी। थेसे जम्बुलिडदेन समुन्द्रदा न्होइना लबारी परमेश्वरग्याम अधिकार याइबा थे गोर ब्लि स्वर्गदूतगदेदा घेन काइरी चुह्इ भिसी भिजी,³ “डन्से य्हाडला परमेश्वरला गे लबा म्हिगदेला डोरी छाप आलतेधोना जम्बुलिडदेन समुन्द्र ओच्छे दोडगदेदा न्होइना थालउ।”⁴ ओच्छे डाइ परमेश्वरला छाप लबा म्हिगदे गाते मुला भिसी पाइबा थे:जी। जमा इसाएलला जम्मान वंशग्याम लसी लाख गिकसे बोगल न्हीसे हजार ब्लि मुबा।

⁵ यहूदाला वंशग्याम च्युक न्ही हजारदा,

रूबेनना वंशग्याम च्युक न्ही हजारदा,

गादला वंशग्याम च्युक न्ही हजारदा,

⁶ आशेर वंशग्याम च्युक न्ही हजारदा,

नप्तालीला वंशग्याम च्युक न्ही हजारदा,

मनश्शेला वंशग्याम च्युक न्ही हजारदा,

⁷ शिमियोनला वंशग्याम च्युक न्ही हजारदा,

लेवीला वंशग्याम च्युक न्ही हजारदा,

इस्साखारला वंशग्याम च्युक न्ही हजारदा,

⁸ जबूलूनना वंशग्याम च्युक न्ही हजारदा,

योसेफला वंशग्याम च्युक न्ही हजारदा

बेन्यामीनला वंशग्याम च्युक न्ही हजार

म्हिदा छाप लजी।

तार क्वान क्वान्बागदेला हुल

⁹ जमाहेन्से डाइ खालै म्हिसे इयासीन इयाबारी आखम्बा म्हिंला हुल गिक म्राड्जी। थेनीगदे जम्मान य्हुल्सादेन वंश ओच्छे य्हुलदेन ग्योइ पाइबा म्हिगदे मुबा। थेनीगदे तार क्वान क्वान्सी यारी खजूरला हाँगा थोसी मुल ठिदेन

† 6:12 उन्बा ११:१३; १६:१८; यशै १३:१०; योए २:१०, १३; ३:१५; मत्ती २४:२९; मर्कु १३:२४-२५; लूका २१:२५ †† 6:13 यशै ३४:४ † 6:14 उन्बा १६:२० †† 6:15 यशै २:१९, २१ †† 6:16 होशे १०:८; लूका २३:३० ††† 6:17 योए २:११; मला ३:२ †††† 7:1 यर्मि ४९:३६; जक ६:५ 7:3 इज ९:४-६

थार्बा पिन्बा ग्यु बोगोला डाच्छापट्टि राप्सी चिबा मुबा।¹⁰ थेनीगदेसे घेन काइरी चुह्इ भिसी भिजी,

“ठिरी धन्छ्याबा य्हाडला परमेश्वरदेन

ग्यु बोगोग्यामसेन य्हाडसे थार्बा याइला।”

¹¹ ओच्छे ठि, गन्बागदेदेन थे गोर ब्लि छोन्बो जन्तुला क्युनोन जम्मान स्वर्गदूतगदे राप्जी, ओच्छे ठिला डाच्छापट्टि खलुप तसी परमेश्वरला जयजयकार लजी।

¹² “आमेन! य्हाडला परमेश्वरदा सदन सदन

जयजयकारदेन य्हाल य्हाल, बुद्धि, धन्यवाद, मान

ओच्छे शक्तिदेन भड तगै। आमेन!”

¹³ गन्बागदे न्हडला गिकसे डादा “तार क्वान क्वान्बा म्हिगदे खाल हिन्ना, ओच्छे थेनीगदे खानडग्याम खबा हिन्ना?” भिसी इयोइजी।

¹⁴ डाइ थेदा “गुरु, थे मी हाडदान था मुला” भिसी भिमा थेसे डादा चुह्इ भिसी पाइजी, “थेनीगदे चा ल्हानान दुख नासी खबा म्हिगदे हिन्ना।

थेनीगदेसे हाड हाडला क्वान थार्बा पिन्बा ग्यु बोगोला कासे खूसी तार तना

लबा मुला।¹⁵ थेतबासेलमा थेनीगदे परमेश्वरला ठिला डाच्छापट्टि मुला,

ओच्छे थेनीगदेसे धिन म्हुननोन परमेश्वरला मन्दिररी थेदा तेन्मुला। ठिरी

धन्छ्याबासे चा थेनीगदेला गुडरी धन्छ्यासी थेनीगदेदा जोगब लला।

¹⁶ दाहेन्से थेनीगदेदा फो खेन्बै आत, क्युइ फुइबाएनोन आत। ओच्छे

थेनीगदेदा धिनीला रापदेन अर्गु खजिबै स्हेला रापसे आक्रो।¹⁷ तिग्दा

भिसम ठिला गुडरी धन्छ्याबा थार्बा पिन्बा ग्यु बोगो थेनीगदेला गोठालो

दोला। ओच्छे थेसेन थेनीगदेदा जुकजुकधोनाला जुनी पिन्बा क्युइला मुलरी

भोर्ला। ओच्छे परमेश्वरसेन थेनीगदेला जम्मान मीख्ली फ्यासी पिन्ना।”¹⁸

निसरेमला लाहा छापदेन म्हरला पोइमो ताड

8 थार्बा पिन्बा ग्यु बोगोसे निसरेमला लाहा छाप ब्लमा स्वर्गरी ओस्पन घण्टा गडसलधोना सुनसान तजी।² जमाहेन्से डाइ परमेश्वरला डाच्छा राप्सी चिबा गोर निस स्वर्गदूतगदेदा म्राड्जी। ओच्छे थेनीगदेदा गोर निस बिगुल पिन्जी।³ ओच्छे स्हान्दो स्वर्गदूत गिक म्हरला पोइमो ताड थोसी धूप म्राबा ग्लाला डामरी राप्जी। ठिला डाच्छापट्टि मुबा म्हरला धूप म्राबा ग्लाली परमेश्वरला म्हिगदेला प्रार्थनादेन छ्यामनोन फुल्बाला लागिरी थेदा ल्हानान धूप पिन्जी।⁴ स्वर्गदूतला याग्याम ज्यबा बास्ना खबा धूपला म्युगु परमेश्वरला म्हिगदेला प्रार्थनादेन छ्यामनोन परमेश्वरला डाच्छा तोर निजी।⁵ जमाहेन्से थे स्वर्गदूतसे पोइमो ताड थोसी धूप म्राबा ग्लाला मे पोइमो ताडरी युसी जम्बुलिडरी भ्याइजी। ओच्छे गडडगुडुड मु ठेइसी तिप्तीड खसी सडगुल निजी।⁶

बिगुलगदे

⁶ जमाहेन्से थे बिगुल थोबा गोर निसनोन स्वर्गदूतगदे बिगुल हाप्बारी ठीक तजी।

⁷ जमाहेन्से जम्मान भन्दा डाच्छापट्टि मुबा स्वर्गदूत गिकसे हाडला बिगुल हाप्जी। थेनोन धुइरी का दोइबा सेर्बदेन मे जम्बुलिडरी ल्हानान ताइजी।

थेतबासेलमा जम्बुलिडला भो सोमरी भो गिक दोडगदेला भो सोमरी भो

गिक ओच्छे जम्मान छेगदेएनोन क्रोजी।

⁸ न्हीरेमला स्वर्गदूतसे हाडला बिगुल हाप्बा धुइरी मे लुइबा घेन गड ह्इबा

स्हे गिक समुन्द्ररी भ्याइजी। ओच्छे समुन्द्रला क्युइ भो सोमरी भो गिक का

दोजी।⁹ ओच्छे समुन्द्ररी मुबा जम्मान जन्तुगदे भो सोमरी भो गिक सिजी।

थेह्इ लसीन पानी जहाजगदेएनोन भो सोमरी भो गिक नाश तजी।

¹⁰ थेह्इ लसीन सोमरेमला स्वर्गदूतसे हाडला बिगुल हाप्जी। थेनोन धुइरी

लुइबा मेला ल्हाम ह्इबान घेन सार गिक मुग्याम भो सोम स्योडगदेला भो

गिकरीदेन क्युइला मुहानगदेरी ताइजी।¹¹ थे सारला मिन “कम्बा” मुबा।

‡† 7:14 दानि १२:१; मत्ती २४:२१; मर्कु १३:१९ ‡†† 7:16 यशै ४९:१० ‡ 7:17 भजन २३:१; इज ३४:२३; भजन २३:२; यशै ४९:१०; २५:८ ‡†† 8:3 आमो ९:१; प्रस्था ३०:१, ३ ‡† 8:5 लेवी १६:१२; इज १०:२; प्रस्था १९:१६; उन्बा ११:१९; १६:१८ ‡ 8:10 यशै १४:१२

थे सारसे भो सोम क्युडरी भो गिक कम्ना लजी। थे कम्बा क्युड थुड्बा ल्हानान म्हिगदे सिजी।

12 दोःसी ब्लिरेमला स्वर्गदूतसे हाडला बिगुल हाप्जी। थेनोन धुडरी धिनी, लनीदेन सारगदेला भो सोमला भो गिकरी तैगै स्हेसे तोजी। जमाहेन्से थेनीगदेला भो सोमरी भो गिक धोप तजी। चुहड लसी धिनदेन म्हुनएनोन भो सोमरी भो गिक धोपधोप तजी।

13 डाइ च्याबान लमा मुरी ग्वाइ गिक प्याड्बान लबा म्राड्जी। थे ग्वाइसे क्रिड्बान चुहड् भिसी भिजी, “दुखन दुख, जम्बुलिडरी मुबा म्हिगदेदा ल्हानान दुख तला। तिग्दा भिसम दाहेन्से बिगुल हाप्बारी बाँकी मुबा अर्गु गोर सोम स्वर्गदूतसे बिगुल हाप्बा धुड तसी जिन्बा मुला।”

9 दोःसी डारेमला स्वर्गदूतसे हाडला बिगुल हाप्बा धुडरी डाइ मुग्याम जम्बुलिडरी सार गिक ताड्बान लबा म्राड्जी। थे सारदा ल्हानान नुष्बा व्हाडला † प्रापला साँचो पिन्जी। 2 थे सारसे ल्हानान नुष्बा व्हाडला म्राप ठोड्मा थेग्याम मेला घ्रेन खाराड्ग्याम थोन्बा हड्बान म्युगु थोन्जी। थे म्युगुसे लमा धिनीदेन मु धोप तना लजी। †3 जमाहेन्से थे म्युगु न्हड्ग्याम तिरीगदे थोन्सी जम्बुलिडरी खजी। थे तिरीगदेदा बिच्छीगदेसे जिबा हड्बान जिबा शक्ति पिन्जी। †4 जम्बुलिडला छे स्याउलादेन दोड्गदेदा तैगै न्होड्ना थालउ। तर डोरी परमेश्वरला छाप आरेबागदेदा जे दुख पिन्गो भिसी थे तिरीगदेदा कुल्बा मुबा। †5 थेनीगदेदा साइनोन चा थासाड्गो, तर ला डाधोना दुख पिन्गो भिसी थे तिरीगदेदा अधिकार पिन्जी। थे तिरीगदेसे पिन्बा दुख चा म्हिदा बिच्छीसे जीमा स्हु खबा हड्बान स्हु खमुबा। 6 थे धुडरी म्हिगदे सिबारी म्हाइला, तर थेनीगदे सिआम्याड्। थेनीगदेसे सिबारी म्हाइला, तर काल चा थेनीगदेग्याम यार्ला। †

7 थे तिरीगदे लडाइ लबाला लागिरी निबारी ठीक तबा तागदे हड्बान म्राड्मुबा। थेनीगदेला थोबोरी म्हरला मुकुट हड्बा स्हे मुबा। ओच्छे थेनीगदेला ली चा म्हिला ली हड्बान मुबा। †8 थेनीगदेला क्रा मिड्म्हेमेला क्रा हड्बान हेड्बा मुबा, ओच्छे स्वा चा च्यान्ना स्वा हड्बान मुबा। †9 थेनीगदेला कुरी फाइला ढाल क्वान्बा मुबा। ओच्छे थेनीगदे प्याड्मा भ्यापग्याम लडाइरी ल्हानान रथदेन तागदे छयोड्मा खबा हड्बान आवाज खमुबा। †10 थेनीगदेला मेःरी चा बिच्छीला हड्बान दुम मुबा। थेनीगदेला मेःरी म्हिगदेदा ला डाधोना दुख पिन्बा शक्ति मुबा। 11 थेनीगदेदा शासन लबा ग्ले चा ल्हानान नुष्बा व्हाडला दूत मुबा। थे दूतला मिन हिब्रू ग्योडरी एबाड्डीन मुबा ओच्छे ग्रीक ग्योडरी अपोल्लियोन मुबा। †

12 दुख गिक निसी जिन्जी। तर च्यागो, दोःसी अड्ग दुख न्ही खबारी बाँकी मुला।

13 दुरेमला स्वर्गदूतसे हाडला बिगुल हाप्मा डाइ परमेश्वरला डाच्छा मुबा म्हरला धूप म्राबा ग्लाला कुनी ब्लिग्याम चुहड् भिबा काइ थेःजी। †14 थे बिगुल हाप्बा दुरेमला स्वर्गदूतदा चुहड् भिबा डाइ थेःजी, “यूफ्रेटिस भिबा घ्रेन स्योडरी खीसी थान्बा स्वर्गदूत ब्लिदा ब्लसी पिन्गो।” 15 चुनोन धुड, चुनोन धिनकुनु, चुनोन ला, चुनोन दिडला लागिरी ठीक लसी थान्बा थे स्वर्गदूत ब्लिदा जम्बुलिडरी मुबा म्हिगदेला भो सोमरी भो गिकदा साड्बाला लागिरी पुड्बा हिन्ना। 16 थेरी ताथोरी क्रेःबा सिपाहीगदे गाते मुला भिबा तामएनोन डादा पाड्जी। थेरी ताथोरी क्रेःसी खबा सिपाहीगदे बोगल गिक करोड मुबा।

17 डाइ म्राड्बा तादेन ताथोरी क्रेःबा सिपाहीगदे चुहड्बा मुबा, थेनीगदेला कुरी क्वान्बा ढालगदे चा मे हड्बान वाला ओच्छे पिड्गैदेन गन्धक हड्बान उर मुबा। थे तागदेला थोबो च्यान्ना हड्बान मुबा। थेनीगदेला सुड्ग्याम मे, म्युगुदेन गन्धक थोन्मुबा। 18 थेनीगदेला सुड्ग्याम थोन्बा मे, म्युगुदेन गन्धकला आपत विपत सोमग्याम जम्बुलिडरी मुबा भो सोम न्हडला भो गिक म्हिगदे साड्जी। 19 तिग्दा भिसम थे तागदेला सुड्देन मेःरी शक्ति मुबा।

थेनीगदेला मेः चा बिख मुबा पुख्रीला थोबो हड्बान मुबा। ओच्छे थेनीगदेसे म्हिगदेदा मेःदेन थोबोसे पोर तना लमुबा।

20 तर चुहड्बा आपत विपतग्याम आसिना जोगब तबा म्हिगदेसे हाड हाडसे लबा आज्यबा गे खलासी परमेश्वरपट्टि आदोःनी। ओच्छे थेनीगदेसे म्हुड म्हुडदेन म्राड्आखम्बा, थेःआखम्बा, भ्रआखम्बा म्हर, म्हुड, काँस, युड्बादेन सिड्ग्याम स्होबा मूर्तिगदेदा तेन्बा आख्लानी। †21 थेहड् लसीन थेनीगदेसे म्हि साड्बा, टुनामुना लबा, स्थान्दोदेन छ्याम ब्रेल्सी भ्रबादेन य्हा लबा हड्बा आज्यबा गेगदे खलासी परमेश्वरपट्टि आदोःनी।

रिल्सी थान्बा जजाबा किताबला मुठा थोबा स्वर्गदूत

10 जमाहेन्से डाइ स्थान्दो शक्तिशाली स्वर्गदूत गिक स्वर्गग्याम फाप्बान लबा म्राड्जी। थेसे खसुला क्वान क्वान्बा मुबा, ओच्छे थेला थोबोरी लरक्युड मुबा। थेला ली धिनी हड्बान मुबा, ओच्छे काड चा मेला ल्हाम हड्बान मुबा। 2 ओच्छे थेला यारी ब्लसी थान्बा जजाबा किताब मुबा। थेसे हाडला दाहिने काड समुन्दरी ओच्छे देब्रे काड सरी थान्सी राज्जी। 3 थे स्वर्गदूत च्यान इहार्बा हड् लसी घ्रेन काडरी क्रिड्जी। ओच्छे थेसे चुहड् लसी क्रिड्मा गोर निस मु गुड्डबासे पाड्जी। 4 थे थेःमैछ्याम डाइ भिबारी छ्याड्मुबा। तर स्वर्गग्याम “गोर निस मु गुड्डबासे पाड्बा ताम थाभ्रिउ, तर चु ताम एला सेमरी थान्गो” भिबा डाइ थेःजी।

5 ओच्छे हाडला काड समुन्द्रेन सरी थान्सी राज्बा थे शक्तिशाली स्वर्गदूतसे हाडला दाहिने या स्वर्गपट्टि थीजी। †6 ओच्छे स्वर्ग, जम्बुलिडदेन समुन्द्रे स्होबा ओच्छे थेरी मुबा जम्मान स्हेगदे स्होबा सदन सोसी चिबा परमेश्वरला मिनरी घ्रान फाबान थे स्वर्गदूतसे चुहड् भिसी भिजी, “दाहेन्से आघड, 7 तर निसरेमला स्वर्गदूतसे हाडला बिगुल हाप्बारी छ्याड्बा धुडरी परमेश्वरसे हाडला गे लबा अगमवक्तागदेदा सुड्बा म्हिसे था आयाड्बा ताम पूरा तला।”

8 जमाहेन्से डाइ थेःबा स्वर्गग्याम खबा थे काइसे दोःसी डादा चुहड् भिसी भिजी, “निस! समुन्दरीदेन सरी काड थान्सी राज्बा थे स्वर्गदूतला यारी मुबा ब्लसी थान्बा थे किताब किन्गो।” †

9 ओच्छे डाइ थे स्वर्गदूत मुबा ग्लारी निसी थे रिल्सी थान्बा किताबला मुठा ह्रीजी। जमाहेन्से थेसे डादा “ना, चु चउ! एला सुडरी खुदु हड्बान केकेला। तर चु ग्लोड्माहेन्से एला फो न्होड्ना लला” भिसी भिजी। 10 थे स्वर्गदूतला याग्याम डाइ थे रिल्सी थान्बा किताबला मुठा किन्सी चजी। थे चमा डाला सुडरी खुदु हड्बान केकेजी, तर चसी जिन्माहेन्से कम्पी डाला फो न्होड्जी। 11 जमाहेन्से थेसे डादा “एसे ल्हानान म्हिगदे, ल्हानान य्हुल, ल्हानान य्हुल्सा, ल्हानान ग्योइदेन ल्हानान ग्लेगदेला बारेरी परमेश्वरसे उन्बा ताम दोःसी पाड्तोःला” भिसी पाड्जी।

परमेश्वरला गे म्राड्बा न्ही

11 जमाहेन्से डादा दप्बा स्हे हड्बान माला कडी गिक पिन्जी। ओच्छे थेसे डादा चुहड् भिसी भिजी, “रेःसी परमेश्वरला मन्दिरदेन थेरी धूप म्राबा ग्ला दपो। ओच्छे थेरी पूजा लबा म्हि गाते चीम ड्यागो। †2 तर परमेश्वरला मन्दिरला खाड्गा चा थादपो। तिग्दा भिसम थे ग्ला चा अर्गु य्हुलला म्हिगदेदा पिन्बा मुला। थेनीगदेसे बोगल न्हीसे ला न्हीधोना परमेश्वरला शहररी रजाई लला। †3 ओच्छे डाला गे स्थान्दो म्हिदा उन्बा म्हि न्हीदा हजार गिकसे ग्यार्जा न्हीसे बोगल सोम धिनधोना बोराला क्वान क्वान्सी परमेश्वरला ताम पाड्बा अधिकार पिन्ना।”

4 डाला गे स्थान्दो म्हिदा उन्बा न्ही चा जम्बुलिड नाड्बान शासन लबा प्रभुला डाच्छापट्टि मुबा जैतूनना दोड न्हीदेन नाड्सल थान्बा ग्ला न्ही हिन्ना। 5 चुदे खालै शत्रुसे थेनीगदेदा न्होड्ना लबारी म्हाड्जी भिसम थेनीगदेला सुड्ग्याम थोन्बा मेसे थेनीगदेला शत्रुदा नाश लला। थेतबासेलमा चुदे खालै म्हिसे थेनीगदेदा न्होड्ना लबारी म्हाड्जी भिसम थेनीगदेदाएनोन थेहड्

† चु पदरी “ल्हानान नुष्बा व्हाड” भिबा चा म्हुड म्हुड चिबा ग्ला हिन्ना (लूका ८:३१; रोमी १०:७; उन्बा ९:२, ११; ११:७; १७:८; २०:१, ३) †† 9:2 उत्प १९:२८ † 9:3 प्रस्था १०:१२-१५ †† 9:4 इज ९:४ †† 9:6 अय्युब ३:२१; यर्मि ८:३ ††† 9:7 योए २:४ ††† 9:8 योए १:६ † 9:9 योए २:५ †† चु मिनना अर्थ चा नाश लबा म्हि हिन्ना। ††† 9:13 प्रस्था ३०:१-३

‡ 9:20 भजन ११५:४-७; १३५:१५-१७; दानि ५:२३ ††† 10:5 प्रस्था २०:११; व्यव ३२:४०; दानि १२:७; आमो ३:७ †† 10:8 इज २:८-३:३ †† 11:1 इज ४०:३; जक २:१-२ ††† 11:2 लूका २१:२४

लसीन साइला। 6 थेनीगदेसे परमेश्वरसे उन्बा ताम पाइबा धुइधोना नाम थाखनै भिंसी मु दुइबादेन क्युइदा काधोना लबा शक्ति थेनीगदेदेन छ्याम मुला। ओच्छे थेनीगदेसे म्हन्बा धुइरी जम्बुलिडरी थरी थरीला आपत विपत तना लबा शक्तिएनोन थेनीगदेदेन छ्याम मुला। †

7 थेनीगदेसे परमेश्वरसे उन्बा ताम पाइसी जिन्माहेन्से ल्हानान नुष्बा व्हाडग्याम थोन्सी खबा लोइबा खबा जन्नुसे थेनीगदेदेन छ्याम लडाइ लसी थेनीगदेदा भेना लसी साइला। ††8 थेनीगदेला लास थेनीगदेला प्रभुदा कुसरी टाँगब लसी साइबा ग्लाला घेन शहरला ग्यामरीन थान्ना। थे शहर चा सदोमदेन मिश्र यहुल्सा ह्इबान हिन्ना। †9 जम्मान यहुल्साला म्हिगदे, जम्मान वंशला म्हिगदे, जम्मान ग्योड पाइबा म्हिगदेदेन जम्मान यहुलला म्हिगदेसे थेनीगदेला लास सोमरेसे धिन गडसालधोना च्याला। ओच्छे थेनीगदेला लास ल्हुआपुड। 10 चु न्हीदा साइबा म्राइसी जम्बुलिडला म्हिगदे ताइसी हाड हाड न्हडरी गिकसेम गिकदा उपहार पिन्बा किन्बा लला। तिग्दा भिसम चु अगमवक्ता न्हीसे जम्बुलिडला म्हिगदेदा ल्हानान दुख पिन्बा मुबा।

11 तर सोमरेसे धिन गडसल तमाहेन्से जुनी पिन्बा सा परमेश्वरग्याम खसी थेनीगदे न्हडरी वाइजी। ओच्छे थेनीगदे सिबाग्याम सोसी डोड रे:जी, थे म्राइसी म्हिगदे ल्हानान लोइजी। ††12 जमाहेन्से थे अगमवक्ता न्हीसे स्वर्ग्याम “तोर खउ” भिबा घेन काइ थे:जी। जमाहेन्से थेनीगदेला शत्रुगदेसे च्यान च्यानान थेन्नी खसु न्हडग्याम तबान स्वर्गरी निजी। ††

13 थेनोन धुइरी घेन सडगुल खसी शहरला भो च्युइला भो गिक दिमगदे नाश लजी। थे सडगुल खमा हजार निस म्हिगदे सिजी। ओच्छे आसिबा म्हिगदेसे चा ल्हानान लोइसी स्वर्गरी धन्छ्याबा परमेश्वरदा मानदेन जयजयकार लजी। †††

14 न्हीरेमला आपत विपत निसी जिन्जी। तर च्यागो, सोमरेमला आपत विपत योनान खला।

निसरेमला बिगुल

15 ओच्छे निसरेमला स्वर्गदूतसे हाडला बिगुल हाप्जी। थेसे हाडला बिगुल हाप्मा स्वर्गरी घेन घेन काइगदेरी चुह्इ भिंसी भिबान मुबा, “दाहेन्से जम्बुलिडथोरी शासन लबा अधिकार य्हाडला परमेश्वरदेन थेसे धम्बा थार्बा पिन्बा ख्रीष्टलान हिन्ना।

थेसे सदनना लागिरी शासन लला।” †††

16 जमाहेन्से परमेश्वरला डाच्छा हाड हाडला ठिरी चिबा थे बोगल गिकसे गोर व्लि गन्बागदेसे परमेश्वरदा प्या लसी जयजयकार लजी। 17 ओच्छे थेनीगदेसे चुह्इ भिंसी भिजी,

“जम्मान भन्दा घेन परमप्रभु परमेश्वर,
हाड डाच्छाएनोन मुबा ओच्छे दान्देनोन मुला।

हाडदा डन्ना ल्हानान धन्यवाद मुला।

तिग्दा भिसम हाडसे हाडला घेन अधिकार किन्सी शासन लबारी छ्याइबा मुला।

18 यहुल यहुलला म्हिगदेदा § ल्हानान बोमो खबा मुबा,
तर दाहेन्से हाडदाएनोन बोमो खबा धुइ तबा मुला।

दाहेन्से सिबागदेला निसाफ लबा धुइएनोन तबा मुला,
ओच्छे हाडसे हाडला गे लबा अगमवक्तागदेदेन हाडला म्हिगदे,
ओच्छे हाडदा मान लबा जजा घेन जम्मान म्हिगदेदा

इनाम पिन्बा धुइएनोन तबा मुला,

ओच्छे जम्बुलिड नाश लबागदेदा नाश लबा धुइएनोन तबा मुला।” §†

19 जमाहेन्से स्वर्गरी मुबा परमेश्वरला मन्दिर ठोइजी। ओच्छे परमेश्वरसे लबा कबुल थान्बा सन्दोस म्राइजी। जमाहेन्से तिप्लीड खसी गडडगुडुड भिंसी मु ठेइबा थे:जी। ओच्छे सडगुल निसी घेन घेन सेर्बा ताइजी। †††

यूहन्नासे म्राइबा म्रिडम्हेमेदेन अजिङ्गर

12 जमाहेन्से डाइ स्वर्गरी उदेकला चिनु गिक म्राइजी। ओच्छे डाइ धिनी क्वान्बादेन काड धिरी लनी मुबा च्युक न्ही सारला मुकुट कूबा म्रिडम्हेमे गिक म्राइजी। 2 थे म्रिडम्हेमे जिउ न्हीला मुबा, ओच्छे बेथा याइबासे लमा थे क्रिडबान मुबा। 3 ओच्छे डाइ दो:सी स्वर्गरी उदेकला चिनु गिक म्राइजी। च्यागो, गोर निस थोबोदेन गोर च्युइ रु मुबा वाला घेन अजिङ्गर गिक म्राइजी। थेसे गोर निस मुकुट कूबा मुबा। §†4 थे अजिङ्गरला मे:से मुला सारगदे भो सोम न्हडरी भो गिक सारदा पोप लसी जम्बुलिडरी भ्याइजी। ओच्छे कोला न्हमैछ्याम चतो:ला भिंसी थे अजिङ्गर कोला न्हबारी छ्याइबा थे म्रिडम्हेमेला डामरी राप्सी चिजी। §†5 थे म्रिडम्हेमेसे जम्बुलिडला जम्मान यहुलला म्हिगदेदा फाइला कडीसे शासन लबा झा गिक न्हजी। थे कोलादा परमेश्वर मुबा ग्लारी थीसी भोर्सी परमेश्वरला ठिरी थान्जी। §†6 जमाहेन्से थे म्रिडम्हेमे तोडतोडबा ग्लारी यार्जी। थेला लागिरी हजार गिकसे ग्यार्जा न्हीसे बोगल सोम धिनधोनाला लागिरी चबा धुइबा लगे भिंसी परमेश्वरसे थेदा ग्ला गिक ठीक लसी थान्बा मुबा।

7 ओच्छे स्वर्गरी लडाइ तजी। मिखाएलदेन §† थेला दूतगदेसे थे अजिङ्गरदेन थेला दूतगदेदेन छ्याम लडाइ लजी। थेह्इ लसीन अजिङ्गरदेन थेला दूतगदेसेनोन लडाइ लजी। §†8 तर अजिङ्गरदेन थेला दूतगदे भेजी। जमाहेन्से थेनीगदेदा चिबाला लागिरी स्वर्गरी ग्ला आतनी। 9 थे अजिङ्गर चा दडबोला पुख्री हिन्ना। थेला मिन शैतान हिन्ना, थेदा म्हडला ग्लेएनोन भिमुला। थेसे जम्बुलिडला जम्मान म्हिगदेदा न्होइना लबा मुबा। थेदेन थेला दूतगदेदान स्वर्ग्याम जम्बुलिडरी भ्याइजी। §†10 जमाहेन्से डाइ स्वर्गरी घेन काइसे चुह्इ भिबा थे:जी,
“दाहेन्से य्हाडला परमेश्वरग्याम य्हाडसे याइबा थाबदिन शक्ति
ओच्छे परमेश्वरला यहुल्सादेन थेसे धम्बा थार्बा पिन्बा ख्रीष्टला अधिकार उन्बा मुला।

तिग्दा भिसम य्हाडला ज्योज्यो आले नाना आडागदेदा धिन म्हुननोन परमेश्वरला डाच्छापट्टि दोष उन्बा शैतानदा स्वर्ग्याम भ्याइबा मुला। §†§

11 थार्बा पिन्बा ग्यु बोगोला कादेन थेनीगदेसे पाइबा सत्य बचन तबासे लमा

थेनीगदेसे थेदा ढाबा मुला।

ओच्छे हाडला ज्याननोन पिन्बारी थेनीगदे तयार तबा मुबा।

12 थेतबासेलमा एनीगदे स्वर्गदेन स्वर्गरी मुबागदे जम्मान ताङ्गो!
तर जम्बुलिडदेन समुन्द्ररी मुबागदेदा गाते दुख तला!

तिग्दा भिसम शैतानसे हाड ल्हाना आसो भिबा ताम था याइसी
थे ल्हानान बोमो खसी एनीगदे मुबा ग्लारी खबा मुला।”

13 थे अजिङ्गरसे हाडदा जम्बुलिडरी भ्याइजी भिबा ताम था याइसी थे झा न्हबा म्रिडम्हेमेदा ताप्बारी छ्याइजी। 14 तर थे म्रिडम्हेमेदा तोडतोडबा ग्लारी प्याइसी निबाला लागिरी घेन ग्वाइला भ्याप पिन्जी। थे तोडतोडबा ग्ला चा थे म्रिडम्हेमेदा अजिङ्गरग्याम सोम दिडसे ला दुधोना 18 जोगब तसी चिबाला लागिरीदेन चबा धुइबा लबाला लागिरी ठीक लसी थान्बा मुबा। 1915 थे म्रिडम्हेमेदा भाल बाढीसे भोर्गे भिंसी थे अजिङ्गरसे सुडग्याम स्योड ह्इ लसी क्युइ पुइजी। 16 तर जम्बुलिडसे हाडला सुड आँ लसी थे अजिङ्गरला सुडग्याम थोन्बा स्योड ग्लोइसी थे म्रिडम्हेमेदा जोगब लजी। 17 जमाहेन्से थे अजिङ्गर थे म्रिडम्हेमेदेन छ्याम इन ल्हानान बोमो खजी। ओच्छे परमेश्वरसे कुल्बा ताम इयान्बादेन येथूसे लोष्बा तामथोरी विश्वास लबा थे म्रिडम्हेमेला अर्गु सन्तानगदेदेन छ्याम लडाइ लबारी भ्रजी। 18 ओच्छे थे अजिङ्गर समुन्द्रला कुनीरी निसी राप्जी।

† 11:6 १ राजा १७:१; प्रस्था ७:१७-१९; १ शमू ४:८ †† 11:7 दानि ७:७, २१; उन्बा १३:५-७; १७:८ † 11:8 यशै १:९-१० †† 11:11 इज ३७:१० †† 11:12 २ राजा २:११ ††† 11:13 उन्बा ६:१२; १६:१८ ††† 11:15 प्रस्था १५:१८; दानि २:४४; ७:१४, २७ § “यहुल यहुलला म्हिगदे” भिबा चा अर्गु यहुलला म्हिगदे हिन्ना। §† 11:18 भजन २:५; ११०:५; ११५:१३ §†† 11:19 उन्बा ८:५; १६:१८-२१

§† 12:3 दानि ७:७ §†† 12:4 दानि ८:१० §† 12:5 यशै ६६:७; भजन २:९ §† “मिखाएल” भिबा चा घेन स्वर्गदूत हिन्ना, थे चा स्हान्दो स्वर्गदूतगदेला कप्तान हिन्ना। §†† 12:7 दानि १०:१३, २१; १२:१; यहू ९ §†§† 12:9 उत्प ३:१; लूका १०:१८ §†§† 12:10 अय्यूब १:९-११; जक ३:१ 18 ग्रीक बाइबल अन्धार सोम दिडसे ला दुधोना भिबा चा धुइ, धुइगदेदेन धुइ गडसल भिंसी भिबा मुला। 19 12:14 दानि ७:२५; १२:७

समुन्द्रग्याम थोन्सी खबा जन्तु

13 जमाहेन्से डाइ लोड्बा खबा जन्तु गिक समुन्द्रग्याम थोन्सी खबा म्राड्जी। थे जन्तुला गोर च्युड रुदेन गोर निस थोबो मुबा, ओच्छे थेला जम्मान रुरी गोर गिक गिक मुकुट मुबा। थेहड् लसीन थेला जम्मान थोबोरी परमेश्वरदा बिरोध लबा आज्यबा मिन भिबा मुबा।² थे लोड्बा खबा जन्तु चितुवा हड्बान मुबा। तर थेला काड तहुमला हड्बान मुबा ओच्छे सुड चा च्यान्ना हड्बान मुबा। थे अजिङ्गरसे हाडला शक्तिदेन हाडला ठि ओच्छे घेन अधिकार थे जन्तुदा पिन्जी।³ थे लोड्बा खबा जन्तुला थोबोगदे न्हडला थोबो गिकरी चा घेन पोर तबा हड्बान म्राड्मुबा, थे पोरसे लमा थे सिबारी छ्याड्बा मुबा, तर थे पोर खम्जी। जमाहेन्से जम्बुलिडला जम्मान म्हिगदे उदेक तसी थे जन्तुला लिच्छा लिच्छा भ्रजी।⁴ थे अजिङ्गरसे हाडला अधिकार थे लोड्बा खबा जन्तुदा पिन्बा म्राड्सी म्हिगदेसे थे अजिङ्गरदा तेन्जी। ओच्छे म्हिगदेसे “चु जन्तु हड्बा अर्गु खाल मुला? चुदेन छ्याम खाल छेबारी खम्ला?” भिबान थे जन्तुदाएनोन तेन्जी।

⁵ थे लोड्बा खबा जन्तुदा परमेश्वरला बिरोध लबा ताम पाड्पुड्जी। ओच्छे थेदा तिग लड् म्हेन्बा थेनोन लबारी बोगल न्हीसे ला न्हीधोना अधिकार पिन्जी।⁶ थे लोड्बा खबा जन्तुसे परमेश्वरला बिरोधरी ताम पाड्जी। परमेश्वरला मिनदेन थे धन्छ्याबा ग्ला ओच्छे स्वर्गरी परमेश्वरदेन छ्याम चिबागदेला बिरोध लजी।⁷ थे लोड्बा खबा जन्तुदा परमेश्वरला म्हिगदेदेन लडाइ लसी ढाबारी खम्बा शक्ति पिन्बा मुबा। ओच्छे जम्मान वंशदेन म्हिगदे ओच्छे थरी थरीला ग्योड्गदेदेन यहुलगदेथोरी शासन लबा अधिकार पिन्बा मुबा।⁸ जम्बुलिड स्होबा भन्दा डाच्छान जुकजुकधोनाला जुनीला किताबरी मिन आरेबा जम्बुलिडला जम्मान म्हिगदेसे थे लोड्बा खबा जन्तुदा तेन्ना। थे किताब चा साड्बा थार्बा पिन्बा ग्यु बोगोला मुबा।⁹

⁹ जुन म्हिदा इयान्बा सेम मुला, थेसे इयान्सी ज्यना लसी घोउ।
¹⁰ खालै म्हिदा इयाल्खानरी झाड्तो:बा मुसम थेदा इयाल्खानरी झाड्नोन झाड्ला। ओच्छे खालै म्हि तरवारग्याम सितो:बा मुसम थे तरवारग्यामसेन सिला।

थेतबासेलमा परमेश्वरला म्हिगदेदेन छ्याम गाते नाखम्बा शक्तिदेन विश्वास ततो:ला भिबा ताम चुग्यामसेन था तला।¹¹

जम्बुलिडग्याम थोन्बा जन्तु

¹¹ ओच्छे डाइ जम्बुलिडग्याम थोन्सी खबा अर्गु लोड्बा खबा जन्तु गिकएनोन म्राड्जी। थे लोड्बा खबा जन्तुला ग्युला हड्बान रु न्ही मुबा। तर थेसे अजिङ्गरसे हड् लसी ताम पाड्जुबा।¹² चु लोड्बा खबा जन्तुसे समुन्द्रग्याम थोन्बा थे डाच्छाला लोड्बा खबा जन्तुला लागिरी हाडला अधिकारग्याम जम्बुलिडला जम्मान म्हिगदेदा थे घेन पोर म्हाबा डाच्छाला लोड्बा खबा जन्तुदा तेन्पुड्जी।¹³ जम्बुलिडग्याम थोन्बा थे लोड्बा खबा जन्तुसे जम्मान म्हेला डाच्छा मुग्याम जम्बुलिडरी मे ताड्ना लसी घेन घेन चिनुगदे उन्जी।¹⁴ थेसे थे समुन्द्रग्याम थोन्बा लोड्बा खबा जन्तुला लागिरी उदेकला चिनुगदेग्याम जम्बुलिडला जम्मान म्हिगदेदा फसब लजी। ओच्छे तरवारसे थासी घेन पोर तसीनोन सोबा थे लोड्बा खबा जन्तुदा मान लबाला लागिरी थेला मूर्ति गिक स्होउ भिसी जम्बुलिडग्याम थोन्बा थे लोड्बा खबा जन्तुसे जम्मान म्हिगदेदा कुल्जी।¹⁵ थे जम्बुलिडग्याम थोन्बा जन्तुदा थे डाच्छा थोन्बा जन्तुला मूर्तिसे ताम पाड्खम्मी ओच्छे थेला मूर्तिदा आतेन्बा म्हिगदेदा साड्गै भिसी थे मूर्तिरी सा युबा अधिकार पिन्जी।¹⁶ ओच्छे थे जम्बुलिडग्याम थोन्बा जन्तुसे जजा मुसै घेन मुसै, फ्युक्पो मुसै प्राड्बो मुसै, नोकर हिन्सै नोकर आहिन्सै जम्मादान हाड हाडला दाहिने यारी तसै डोरी तसै चिनु लपुड्जी।¹⁷ थे चिनु आलबा म्हिगदेसे चा तिगै स्हे ग्लुबा चूड्बा

† 13:2 दानि ७:४-६ †† 13:5 दानि ७:८, २५; ११:३६ † 13:7 दानि ७:२१
‡ 13:8 भजन ६९:२९ ‡ 13:10 यर्मि १५:२; ४३:११

लआम्याड्मुबा। थे चिनु चा समुन्द्रग्याम थोन्बा जन्तुला मिन अथवा थेला मिनदा घोबा अड्क हिन्ना।

¹⁸ चु ताम घोबाला लागिरी ज्ञान बुद्धि तो:ला, जुन म्हिदेन घोखम्बा शक्ति मुला थेसे थे समुन्द्रग्याम थोन्बा जन्तुला अड्कला अर्थ घोखम्मी। तिगदा भिसम थे अड्क म्हि गिकला मिनग्याम थान्बा हिन्ना। थे अड्क चा ६६६ हिन्ना।

थार्बा याड्बागदेसे गोबा व्हाइ

14 दो:सी डाइ च्यामा सियोन गडरी थार्बा पिन्बा ग्यु बोगो राप्सी चिबा मुबा। थेदेन छ्याम लाख गिकसे बोगल न्हीसे हजार ब्लि म्हिगदे मुबा। थे म्हिगदेला डोरी थेदेन थेला आबाला मिन भिबा मुबा।¹ ओच्छे डाइ स्वर्गग्याम छाँगारी क्युड ताड्बा हड्बादेन मु गुड्ड्बा हड्बान आवाज थे:जी। थे आवाज चा ल्हानान वीणा भिबा बाजा ह्याप्पा थोन्बा आवाज हड्बान थे:मुबा।² थे लाख गिकसे बोगल न्हीसे हजार ब्लि म्हिगदे चा मुल ठिदेन गोर ब्लि छोन्बो जन्तु ओच्छे गन्बागदेला डाच्छापट्टि राप्सी छार व्हाइ गिक गोजी। चु व्हाइ चा थेनीगदेसे जे था याड्बारी खम्मुबा। तिगदा भिसम थेनीगदेदा जे सय फासी जम्बुलिडग्याम ते:बा मुबा।³ थेनीगदे खालै म्रिडकोलागदेदेन छ्याम आब्रेल्बा कन्याकेटा दोसी चिबा मुबा। थेनीगदे थार्बा पिन्बा ग्यु बोगोसे कुल्बा अन्छार भ्रमुबा। जम्बुलिडला म्हिगदे न्हड्ग्याम थेनीगदेदा जे सय फासी ते:बा मुबा ओच्छे परमेश्वरदेन थार्बा पिन्बा ग्यु बोगोला लागिरी जम्मान भन्दा डाच्छा फुल्बा भेटी थेनीगदेन मुबा।⁴ थेनीगदेसे लुसीला ताम तिगैनोन लबा आरेबा, ओच्छे थेनीगदे तिगै दोष आरेबा म्हि मुबा।⁵

गोर सोम स्वर्गदूत

⁶ जमाहेन्से डाइ मुरी प्याड्बान लबा स्हान्दो स्वर्गदूत गिकदा म्राड्जी। थे जम्बुलिडरी मुबा जम्मान यहुल्साला म्हिगदे, जम्मान वंशला म्हिगदेदेन थरी थरीला ग्योड् पाड्बा म्हिगदेदेन यहुल यहुलला म्हिगदेदा जुकजुकधोनाला जुनी पिन्बा समाचार थे:ना लबारी खबा मुबा।⁷ थेसे घेन काड्ग्याम चुहड् भिसी भिजी, “परमेश्वर म्राड्सी लोङ्गो, ओच्छे थेदा मानदेन जयजयकार लउ। तिगदा भिसम परमेश्वरसे जम्मान म्हि यहुलला निसाफ लबा थुड तसी जिन्बा मुला। थेतबासेलमा स्वर्गदेन जम्बुलिड ओच्छे समुन्द्रदेन क्युडला मुलगदे स्होबा परमेश्वरदा तेन्गो।”

⁸ ओच्छे स्हान्दो स्वर्गदूत गिकएनोन थेनोन स्वर्गदूतला लिच्छा लिच्छा चुहड् भिबान खजी, “थे घेन बेबिलोन शहर नाश तबा मुला! हिन्ना नाश तबा मुला। थेनोन शहरसे जम्मान यहुल यहुलला म्हिगदेदा स्हान्दोदेन छ्याम ब्रेलपुड्सी निड्गुसे इय्होड्बा हड्बान तना लजी।”⁹

⁹ थे स्वर्गदूत न्हीला लिच्छा लिच्छा स्हान्दो स्वर्गदूत गिकएनोन घेन काड्गी चुहड् भिबान खजी, “चुदे खालै म्हिसे थे समुन्द्रग्याम थोन्बा जन्तुदेन थेला मूर्तिदा तेन्सी डोरी अथवा यारी थेला चिनु थान्जी भिसम,¹⁰ थेदाएनोन परमेश्वरसे हाडला बोमोग्याम घेन सजाय पिन्ना, थेनीगदेदा परमेश्वरला स्वर्गदूतगदेदेन थार्बा पिन्बा ग्यु बोगोला डाच्छापट्टि मेदेन गन्धकरी भ्याड्सी सजाय पिन्ना।¹¹ ओच्छे थेनीगदेदा सजाय पिन्बा मेला म्युगु सदन तोरपट्टि निला। जुन जुन म्हिसे थे समुन्द्रग्याम थोन्बा जन्तुदेन थेला मूर्तिदा तेन्सी थेला मिन मुबा चिनु थान्ना थेनीगदेसे धिन म्हुननोन सजाय नातो:ला।”¹² परमेश्वरसे कुल्बा ताम इयान्बादेन येशूदा विश्वास लबा परमेश्वरला म्हिगदे चा खाहड् लसी नासी विश्वास आखलाना चितो:ला भिबा ताम चुग्यामसेन था तला।

¹³ ओच्छे डाइ स्वर्गग्याम चुहड् भिबा काड् थे:जी, “चु भिसी थान्गो, दाहेन्से प्रभुदा विश्वास लसी सिबागदे परमेश्वरग्याम मोलम याड्बागदे हिन्ना।” परमेश्वरला आत्मासे चुहड् भिसी सुड्बा मुला, “हिन्ना, थेनीगदे

‡†† 14:1 इज ९:४; उन्बा ७:३ ‡†† 14:5 सप ३:१३ § 14:8 यशै २१:९; यर्मि ५१:८; उन्बा १८:२ §† 14:10 यशै ५१:१७; उत्प १९:२४; इज ३८:२२ §†† 14:11 यशै ३४:१०

हाड हाडसे लबा गेदेन दुखग्याम फेबा मुला ओच्छे थेनीगदेसे लबा गे
अन्धारला इनाम याड्ला।

जम्बुलिडला बाली खन्बा धुड

14 ओच्छे डाइ परमेश्वरसे पुडखबा म्हि हडबान म्हि गिक तार खसुथोरी
धन्ख्याबा म्राड्जी। थेसे म्हरला मुकुट कूबा मुबा। थेला यारी छ्यार्बा हडसु
गिक मुबा। 15 जमाहेन्से परमेश्वरला मन्दिर न्हडग्याम स्थान्दो स्वर्गदूत
गिक खसी खसुरी धन्ख्याबादा घेन काइसे चुहड् भिसी भिजी, "हाडला
हडसुसे बाली खन्गो। तिगदा भिसम जम्बुलिडला जम्मान बाली खन्बा धुड
तसी जिन्बा मुला।" 16 जमाहेन्से खसुथोरी धन्ख्याबासे जम्बुलिडथोरी
हाडला हडसु चलब लसी जम्बुलिडला जम्मान बाली खन्जी।

17 थेहड् लसीन स्वर्गरी मुबा परमेश्वरला मन्दिर न्हडग्याम स्थान्दो
स्वर्गदूत गिकएनोन मडग्यार खजी। थेदेन छ्यामएनोन छ्यार्बा हडसु गिक
मुबा। 18 जमाहेन्से मेथोरी अधिकार मुबा स्थान्दो स्वर्गदूत गिक धूप म्राबा
ग्लायाम थोन्जी। ओच्छे हडसु थोबा स्वर्गदूतला छ्यार्बा हडसुसे
जम्बुलिडला अडगुर थुड, † तिगदा भिसम जम्बुलिडला अडगुर मिन्सी जिन्बा
मुला" भिसी घेन काइसे पाड्जी। 19 जमाहेन्से थे स्वर्गदूतसे जम्बुलिडथोरी
हाडला हडसु चलब लसी जम्बुलिडला जम्मान अडगुर थुसी ग्ला गिकरी
पोप लजी। ओच्छे थे अडगुरदा परमेश्वरसे सजाय पिन्बा कोलरी भ्याड्जी।
20 थे अडगुरदा शहरला मडग्यारपट्टि मुबा कोलरी म्हर्जी। थे कोलग्याम
ओस्पन मिटर नाड्से गडसल नुष्बा † ओच्छे ग्यार्जा सोम किलोमिटर हेड्बा
काला स्योड थोन्बा मुबा। †

गोर निस स्वर्गदूतगदे

15 डाइ स्वर्गरी उदेकला घेन अर्गु चिनु गिक म्राड्जी। थेरी आपत
विपत गिक गिक थोसी चिबा गोर निस स्वर्गदूतगदे मुबा। चु चा
जम्मान भन्दा लिच्छाला आपत विपत मुबा। तिगदा भिसम परमेश्वरसे पिन्बा
जम्मान भन्दा लिच्छाला सजाय चुनोन मुबा। 2 डाइ डाला डाच्छापट्टि मेदेन
सिसा दोड्बा समुन्द्र हडबान स्हे म्राड्जी। ओच्छे समुन्द्रग्याम थोन्बा जन्तुदेन
थेला मूर्ति ओच्छे थेला मिनग्याम थान्बा अड्कथोरी ढाबागदे जम्मादान
म्राड्जी। थेनीगदे हाड हाडला यारी परमेश्वरसे पिन्बा वीणा थोसी थे
समुन्द्रला कुनीरी राप्सी चिबा मुबा। 3 थेनीगदेसे चुहड् भिसी परमेश्वरदा
तेन्बा म्हि मोशादेन

थार्बा पिन्बा ग्यु बोगोला व्हाड गोबान मुबा,
"परमप्रभु परमेश्वर हाड जम्मान भन्दा घेन हिन्ना,
हाडला गे ल्हानान घेनदेन उदेकला मुला,
ओच्छे जम्बुलिडला जम्मान थुलला म्हिगदेथोरी
सदन शासन लबा ग्ले हाडनोन हिन्ना,
हाडसे लबा गेगदे सत्यदेन ठीक मुला। ††

4 परमप्रभु हाड म्राड्सी आलोड्बा म्हि खाल मुला?

ओच्छे हाडदा मान लसी जयजयकार आलबा म्हि खाल मुला?

तिगदा भिसम हाड जे जम्मान भन्दा चोखो मुला।

जम्मान थुलला म्हिगदेसे हाडदा तेन्ना,

तिगदा भिसम हाडसे ठीक निसाफ लबा जम्मासेन म्राड्बा मुला।" †††

5 जमाहेन्से डाइ स्वर्गरी परमेश्वरला मन्दिर ठोड्बा म्राड्जी, ओच्छे मन्दिर
न्हडला जम्मान भन्दा चोखो ग्लायोनोन म्राड्जी। 6 थे मन्दिर न्हडग्याम गोर
गिक गिक आपत विपत थोबा गोर निस स्वर्गदूतगदे थोन्सी खजी। थेनीगदेसे
सफादेन थाल थाल्बा क्वान क्वान्बा मुबा, ओच्छे कुरी म्हरला फित्ता खीबा
मुबा। 7 जमाहेन्से थे गोर ब्लि छोन्बो जन्तुगदे न्हडला गिकसे थे गोर निस
स्वर्गदूतगदेदा सदन सोबा परमेश्वरला बोमोसे प्लिड्बा गोर गिक गिक
म्हरला खोरे पिन्जी। 8 ओच्छे परमेश्वरला थालदेन शक्तिग्याम थोन्बा म्युगुसे

† 14:14 दानि ७:१३ †† 14:15 योए ३:१३ † चु पदरी "अडगुर" भिबा चा
परमेश्वरदा विश्वास आलबा म्हिगदे हिन्ना। †† मिटर नाड्से गडसल नुष्बा भिबा चा ग्रीक
बाइबल अन्धार सहेन्से दप्पा ताला सुडथोना दोमुबा। †† 14:20 यशै ६३:३; विल १:१५;
उन्बा १९:१५ ††† 15:३ प्रस्था १५:१ ††† 15:4 यर्मि १०:७; भजन ८६:९ ९
15:5 प्रस्था ३८:२१

मन्दिर प्लिड्जी। जमाहेन्से थे गोर निस स्वर्गदूतगदेसे थोबा गोर निस आपत
विपत आजिन्तेधोना खालैनोन मन्दिर न्हडरी वाड्बारी आखन्मी। †

परमेश्वरला बोमोसे प्लिड्बा गोर निस खोरे

16 जमाहेन्से डाइ परमेश्वरला मन्दिर न्हडग्याम घेन काइरी थे गोर
निस स्वर्गदूतगदेदा चुहड् भिसी कुल्बा थे:जी, "एनीगदे निउ, ओच्छे
परमेश्वरला बोमोसे प्लिड्बा थे गोर निस खोरे जम्बुलिडथोरी ल्हूगो।"

2 जमाहेन्से स्वर्गदूत गिक निसी हाडदेन छ्याम मुबा खोरे जम्बुलिडथोरी
ल्हूजी। थेतबासेलमा थे समुन्द्रग्याम थोन्बा जन्तुला चिनु थान्बादेन थेला
मूर्तिदा तेन्बा म्हिगदेदा ल्हानान स्हु खबादेन नड्बा खबा पोर थोन्जी। ††

3 ओच्छे न्हीरेमला स्वर्गदूतसे हाडदेन छ्याम मुबा खोरे समुन्द्ररी ल्हूजी।
ओच्छे समुन्द्रला क्युड सिबा म्हिला का हडबान दोजी। थेतबासेलमा
समुन्द्ररी मुबा जम्मान छोन्बो जन्तुगदे सिजी।

4 ओच्छे सोमरेमला स्वर्गदूतसे हाडदेन छ्याम मुबा खोरे स्योडदेन क्युडला
मुहानरी ल्हूजी। जमाहेन्से जम्मान क्युड का दोजी। †† 5 जमाहेन्से डाइ
क्युडला अधिकार याड्बा स्वर्गदूतसे चुहड् भिबान लबा थे:जी, "हाड तिमै
दोष आरेबा परमेश्वर हिन्ना, हाड डाच्छापट्टि मुबा, दान्देनोन मुला। हाडसे
लबा निसाफ ठीक मुला। 6 हाडसे पुडखबा अगमवक्तागदेदेन हाडदा तेन्बा
म्हिगदेदा थेनीगदेसे साड्बासे लमा हाडसे थेनीगदेदा कानोन थुड्पुड्सी
थेनीगदेसे याड्तो:बा सजाय पिन्बा मुला।" 7 जमाहेन्से डाइ धूप म्राबा
ग्लायाम चुहड् भिबा थे:जी, "परमप्रभु परमेश्वर, हाड जम्मान भन्दा घेन
परमेश्वर हिन्ना, हाडसे लबा निसाफ सत्यदेन ठीक मुला।"

8 जमाहेन्से ब्लिरेमला स्वर्गदूतसे हाडदेन छ्याम मुबा खोरे धिनीरी ल्हूजी।
ओच्छे धिनीग्याम थोन्बा मेला हड्बा रापसे म्हिगदेदा क्रोना लपुड्जी। 9 मेला
हड्बा धिनीला रापसे म्हिगदे क्रोजी, ओच्छे थे आपत विपतगदेदा तहरी
थान्बा परमेश्वरदा म्हिगदेसे के:जी। तर थेनीगदे हाड हाडला पाप ख्लासी
परमेश्वरपट्टि दो:सी परमेश्वरदा मानदेन जयजयकार आलनी।

10 डारेमला स्वर्गदूतसे हाडदेन छ्याम मुबा खोरे थे समुन्द्रग्याम थोन्बा
जन्तुला †† ठिथोरी ल्हूजी। ओच्छे थेला थुल्सा धोपधोप तजी। जमाहेन्से
थेनीगदेसे स्हु स्हेरसे लमा स्वा क्रेजी। †† 11 थेनीगदेदा तबा स्हु स्हेरदेन पोरसे
लमा थेनीगदेसे स्वर्गरी धन्ख्याबा परमेश्वरदा बिरोध लजी। तर थेनीगदे हाड
हाडसे लबा आज्यबा गे ख्लासी परमेश्वरपट्टि आदो:नी।

12 डुरेमला स्वर्गदूतसे हाडदेन छ्याम मुबा खोरे यूफ्रेटिस भिबा घेन स्योडरी
ल्हूजी। जमाहेन्से स्यारग्याम खबा ग्लेगदेदेन थेला सिपाहीगदेदा भ्रबारी ग्याम
तमै भिसी थे स्योड खर्जी। †† 13 जमाहेन्से डाइ अजिङ्गरेदेन थे जम्बुलिडग्याम
थोन्बा जन्तु ओच्छे लुसीला ताम पाड्बा अगमवक्ताला सुडग्याम थाल्बा
हड्बान गोर सोम म्हडगदे थोन्बा म्राड्जी। 14 थे आज्यबा आत्मागदे चा
उदेकला चिनुगदे उन्बा म्हडगदे हिन्ना। जम्मान भन्दा घेन परमेश्वरसे
निसाफ लबा धिनकुनु थे आत्मागदे परमेश्वरदेन छ्याम लडाइ लबाला
लागिरी जम्बुलिडला जम्मान ग्लेगदेदा पोप लबारी निला।

15 "च्यागो, डा य्हो खबा हड् लसी खालैदा था आयान्ना लसी खला। जुन
म्हि छोर्सी चिसी हाडला क्वान हाडदेन छ्याम थान्ना थे परमेश्वरग्याम
मोलम याड्बा म्हि हिन्ना। थेहड् लसी हाडला क्वान जोगब लसी थान्बा म्हि
लिगन्डी भ्रआतो:। ओच्छे म्हिगदेला डाच्छापट्टि पे:आतो:।" †† 16 ओच्छे थे
म्हडगदेसे जम्बुलिडला जम्मान ग्लेगदेदा ग्ला गिकरी पोप लजी। थे ग्लादा
हिब्रू ग्योडरी आर-मागोडोन †† भिमुबा। †††

17 ओच्छे निसरेमला स्वर्गदूतसे हाडदेन छ्याम मुबा खोरे लाबाथोरी
ल्हूजी। जमाहेन्से मन्दिरला ठिग्याम "दाहेन्से जिन्जी" भिबा घेन काइ खजी।
18 जमाहेन्से तिप्लीड खबादेन मु ठेड्बा ओच्छे घेन घेन काइ खजी, ओच्छे
घेन सडगुल खजी। थेहड्बा घेन सडगुल मी जम्बुलिडरी म्हि ठुड्बा

†† 15:8 प्रस्था ४०:३४; १ राजा ८:१-११; २ इति ५:१३-१४; यशै ६:४ ††† 16:2
प्रस्था ९:१० †† 16:4 प्रस्था ७:१७-२१; भजन ७८:४४ ††† थे समुन्द्रग्याम थोन्बा
जन्तु चा शैतानना ग्ले हिन्ना। †† 16:10 प्रस्था १०:२१ †† 16:12 यशै ११:१५
††† चु पदला ताम प्रभु येशूसे सुड्बा हिन्ना, (मती २४:४३-४४; लूका १२:३९-४०; उन्बा
३:३ स्हीगो)। ††† "आर-मागोडोन" भिबा चा मेगोडो भिबा गड हिन्ना। ओन्मा थे गडरी
ल्हानान लडाइ तबा मुबा। ††† 16:16 २ राजा २३:२९; न्याय ५:१९; जक १२:११

धिनहेन्से दान्देधोना खाइमै खबा आरेबा। ¹⁹ जमाहेन्से थे घेन बेबिलोन भिबा शहर भो सोम तसी फेजी, ओच्छे जम्मान खुल्साला शहरगदे नाश तजी। परमेश्वरसे थे घेन शहर बेबिलोनला पाप ढन्जी, ओच्छे हाडला घेन बोमोग्याम थे शहरदा सजाय पिन्जी। ²⁰ जमाहेन्से समुन्द्रला गुडरी मुबा जम्मान ग्लागदेदेन जम्मान गडगदे म्हाजी। ²¹ ओच्छे मुग्याम म्हिगदेथोरी ओस्पन बोगल न्ही किलोला सेर्बा ताडबारी छ्याइजी। चुहइबा सेर्बा ताडसी आपत विपत तबासे लमा म्हिगदेसे परमेश्वरदा के:बारी छ्याइजी। तिग्दा भिसम चु ल्हानान लोड्बा खबा आपत विपत मुबा।

ल्हानान बेश्या गे लसी भ्रवा म्रिडम्हेमे

17 थे गोर निस खोरे थोबा गोर निस स्वर्गदूतगदे न्हडला गिक डा मुबा ग्लारी खसी डादा चुहइ भिजी, “चुरी खउ, डाइ एदा ल्हानान स्योडगदेला कुनीरी चिबा जम्मासेन डोसेबा बेश्या म्रिडम्हेमेसे याड्बा सजाय उन्ना। थे बेश्या म्रिडम्हेमे ल्हानान स्योडगदेला कुनीरी मुबा घेन बेबिलोन शहर हिन्ना। ¹ जम्बुलिडला ग्लेगदे थे बेश्या म्रिडम्हेमेदेन छ्याम ब्रेल्बा मुला। ओच्छे जम्बुलिडला म्हिगदे थेदेन छ्याम ब्रेल्सी अडगुरला निडगुसे इय्होइबा ह्ङ्गोन तबा मुला। ²

³ जमाहेन्से डा परमेश्वरला आत्मासे प्लिड्जी। ओच्छे थे आत्मा री स्वर्गदूतसे डादा तोडतोडबा ग्लारी भोजी। थेरी डाइ वाला जन्तुथोरी ⁴ क्रे:बा म्रिडम्हेमे गिक म्राड्जी। थे जन्तुला गोर निस थोबो मुबा ओच्छे गोर च्युइ रु मुबा। थे जन्तुला जिउ नाडनोन परमेश्वरदा बिरोध लबा मिनगदे भ्रिबा मुबा। ⁵ थे म्रिडम्हेमेसे चा वाला वाला पिडगैदेन वाला क्वान क्वान्बा मुबा। ओच्छे म्हर, रत्नदेन मोतीगदे क्वान्सी ज्योबा मुबा। थेसे हाडला यारी म्हरला खोरे गिक थोबा मुबा। थे खोरे चा थेसे लबा नड्बा तामदेन थे स्हान्दोदेन छ्याम ब्रेल्सी भ्रवा नड्बा खबा तामगदेसे प्लिड्बा मुबा। ⁶ थे म्रिडम्हेमेला डोरी, “जम्बुलिडला बेश्यागदेदेन नड्बा खबा तामगदेला आमा घेन बेबिलोन शहर” भिसी म्हिसे था आयाड्बा मिन गिक भ्रिबा मुबा। ⁷ ओच्छे डाइ थे म्रिडम्हेमे परमेश्वरला म्हिगदेदेन येथूला लागिरी हाडला ज्याननोन पिन्बा म्हिगदेला का थुड्सी इय्होइबा म्राड्जी।

थे म्रिडम्हेमेदा म्राड्सी डा ल्हानान उदेक तजी। ⁸ जमाहेन्से थे स्वर्गदूतसे डादा चुहइ भिजी, “ए तिग्दा उदेक म्हन्बा? थे म्रिडम्हेमेदेन थेदा पुड्बा गोर निस थोबादेन गोर च्युइ रु मुबा जन्तुला बारेरी म्हिसे था आयाड्बा ताम डाइ एदा पाड्ला। ⁹ एसे म्राड्बा थे जन्तु डाच्छा मुबा, तर दान्दे आरे। सदनना लागिरी नाश तबारी थे ल्हानान नुप्बा व्हाडय्याम तोर खबारी छ्याइबा मुला। जम्बुलिड छ्यामाहेन्से जुकजुकधोनाला जुनीला किताबरी मिन आभ्रिबा जम्बुलिडला म्हिगदे थे जन्तुदा म्राड्सी उदेक म्हन्ना। तिग्दा भिसम थे जन्तु डाच्छा मुबा, दान्दे सिसी जिन्बा मुला। तर थे दो:सी सोला। ¹⁰

¹¹ “चु ताम घोबारी ज्ञान बुद्धि तो:ला। थे जन्तुला गोर निस थोबो चा थे म्रिडम्हेमे चिबा गड निस हिन्ना। ¹² थे गोर निस ग्लेगदेएनोन हिन्ना, थेनीगदे न्हडरी गोर डा ग्लेगदे नाश तसी जिन्जी, गिक चा दान्देधोना शासन लबान मुला। ओच्छे स्हान्दो गिक चा अझ खबा आरे। थे खमाहेन्से ला न्ही सोमला लागिरी जे थेसे शासन लला। ¹³ थे जन्तु डाच्छा सोबान मुबा, तर दान्दे सिसी जिन्बा मुला। थे जन्तु चा भे:रेमला ग्ले हिन्ना। थे जन्तुएनोन गोर निस ग्लेगदे न्हडला ग्ले गिक हिन्ना। तसैनोन थे नाश तला।

¹⁴ “एसे म्राड्बा थे गोर च्युइ रु चा ग्ले च्युइ हिन्ना। तर थेनीगदेसे दान्देधोना शासन लम्याड्बा आरे। थेनीगदेसे थे जन्तुदेन छ्याम तिगै धिनना लागिरी शासन लम्याड्ला। ¹⁵ थे ग्लेगदेला सेम गिकनोन मुला। थेतबासेलमा थेनीगदेसे हाड हाडला शक्तिदेन अधिकार थे जन्तुदा जिम्मा पिन्ना। ¹⁶ थेनीगदेसे थार्बा पिन्बा ग्यु बोगोला बिरोध लसी लडाइ लला। तर थार्बा पिन्बा ग्यु बोगोसे थेनीगदेथोरी ढाला। तिग्दा भिसम थे प्रभुगदेला प्रभु

ओच्छे ग्लेगदेलाएनोन ग्ले हिन्ना। थेदेन छ्याम मुबागदे चा थेसे इयोइबागदेदेन धम्बागदे ओच्छे थेदा विश्वास लबागदे हिन्ना।”

¹⁷ थे स्वर्गदूतसे डादा दो:सी चुहइ भिसी पाड्जी, “एसे म्राड्बा थे बेश्या चिबा स्योडगदे चा खुल खुलदेन खुल्सा ओच्छे थरी थरीला ग्योइ पाड्बा म्हिगदे हिन्ना। ¹⁸ एसे म्राड्बा गोर च्युइ रुदेन थे वाला जन्तुसे थे बेश्यादा हेला लला। ओच्छे थेदेन छ्याम मुबा जम्मान स्हे ब्यन्सी थेदा लिगन्डीन लसी थेला स्या चला। ओच्छे थेला नखूगदे मेसे खाड्सी नाश लला। ¹⁹ तिग्दा भिसम थेनीगदेदा परमेश्वरसे हाडसे म्हन्बा अन्धार पूरा लबा सेम पिन्बा मुबा। थेतबासेलमा परमेश्वरसे सुड्बा बचन पूरा आततेधोना थेनीगदे सेम गिकलान तसी हाडसे शासन लबा शक्तिदेन अधिकार थे लोड्बा खबा जन्तुदा पिन्जी। ²⁰ एसे म्राड्बा थे म्रिडम्हेमे चा जम्बुलिडला ग्लेगदेथोरी शासन लबा घेन शहर हिन्ना।”

बेबिलोन शहर नाश तबा

18 जमाहेन्से डाइ स्हान्दो स्वर्गदूत गिक स्वर्गय्याम मार फाप्बान लबा म्राड्जी। थेदेन छ्याम घेन अधिकार मुबा। ओच्छे थेला व्हालदेन शक्तिसे लमा जम्बुलिड नाडनोन व्हाल व्हाल तजी। ² थे स्वर्गदूतसे घेन काइरी चुहइ भिसी भिजी,

“थे शहर नाश तजी! थे घेन शहर बेबिलोन नाश तजी, थे घेन शहर शैतानदेन थेला दूतगदे चिबा दिम दोबा मुला, ओच्छे जम्मान नड्बा आत्मागदेदेन चरागदे चिबा ग्ला दोजी। ³ तिग्दा भिसम स्हान्दोदेन छ्याम ब्रेल्सी भ्रवा थेला आज्यबा गेसे लमा जम्मान खुलला म्हिगदे अडगुरला निडगुसे इय्होइबा ह्ङ्गोन तबा मुला। ओच्छे जम्बुलिडला ग्लेगदे थेदेन छ्याम ब्रेल्बा मुला, थेला थेहइबा ब्रेल्सी भ्रवा सेमसे लमा जम्बुलिडला व्यापारीगदे पयुकपो दोबा मुला।” ⁴

⁵ जमाहेन्से डाइ स्वर्गय्याम चुहइ भिबान लबा अर्गु काइ थे:जी, “डाला म्हिगदे, एनीगदे थे ग्लाय्याम थोन्सी खउ। आहिन्सम थेसे लबा पापरी एनीगदेएनोन परब तला, ओच्छे थेसे याड्बा सजाय एनीगदेसेनोन नातो:ला। ⁶

⁷ तिग्दा भिसम थेसे पापथोरी पाप लबासे लमा थेला नड्बा गेगदे स्वर्गधोनान धोबा मुला।

ओच्छे परमेश्वरसे थेसे लबा आज्यबा गेगदे ढन्बा मुला। ⁸ थेसे एनीगदेदा तिग लबा मुला, थेदाएनोन एनीगदेसे थेहङ्गोन लउ। ओच्छे थेसे जुन गे लबा मुला एनीगदेसे थेदा थे भन्दा दोब्बर नाड फागो। थेसे एनीगदेला लागिरी जुन स्हे दोड्सी खोरेरी ठीक लबा मुबा थे भन्दा ल्हाना खरो स्हे एनीगदेसे थेदा पिन्गो। ⁹

¹⁰ थेसे मोजमजा लसी जति मान याड्बा मुला, ओतेन थेदा दुखदेन सुर्दा पिन्गो।

तिग्दा भिसम थेसे घमण्ड लसी सेम न्हड न्हडरी चुहइ भिसी पाड्मुला।

‘डा ग्लेस्या दोसी चिबा मुला, डा हेम्बो सिबा म्रिडम्हेमे आहिन।

थेतबासेलमा डाइ खाइमै सुर्दा लआतो:।’ ¹¹

¹² थेतबासेलमा तिरेरीन थेथोरी कालदेन सुर्दा ओच्छे रोगदेन अनिकाल खला।

ओच्छे थेदा मेसे खाड्ला,

तिग्दा भिसम थेला निसाफ लबा परमप्रभु परमेश्वर शक्तिशाली मुला।”

¹³ थेदेन छ्याम ब्रेल्बादेन मोजमजा लसी चिबा जम्बुलिडला ग्लेगदे थेदा क्रोबा मेला म्युगु म्राड्सी क्राबा क्रिड्बा लला। ¹⁴ थेदा पिन्बा सजाय नाआतो:गै भिसी थेनीगदे लोड्सी थारेडनोन राप्सी चुहइ भिजी, “अम्मै गाते आज्यबा ताम,

† 16:19 यशै ५१:१७ †† 17:1 यर्मि ५१:१३ ‡ 17:2 यशै २३:१७; यर्मि ५१:७ †† वाला जन्तुदेन समुन्द्रय्याम थोन्बा लोड्बा खबा जन्तु ओस्पन तखम्ला। उन्बा १३:१ स्त्रीगो †† 17:3 उन्बा १३:१ ††† 17:4 यर्मि ५१:७ ††† 17:8 दानि ७:७; उन्बा ११:७; भजन ६९:२८ § 17:12 दानि ७:२४

§† 18:2 यशै १३:२१; २१:९; यर्मि ५०:३९; ५१:८; उन्बा १४:८ ††† 18:3 यशै २३:१७; यर्मि ५१:७ † 18:4 यशै ४८:२०; यर्मि ५०:८; ५१:६, ४५ ††† 18:5 उत्प १८:२०-२१; यर्मि ५१:९ † 18:6 भजन १३७:८; यर्मि ५०:२९ † 18:7 यशै ४७:७-९

परमेश्वरग्याम सजाय याड्बा घेन शक्तिशाली बेबिलोन शहर,
एसे लबा आज्यबा गेसे लमा ए छिन्नडरीन नाश तबा मुला।" †

11 जम्बुलिडला व्यापारीगदे थेला लागिरी क्राबा क्रिड्बा लला, तिग्दा भिसम थेनीगदेसे लबा व्यापारला सामानगदे दोःसी खालैसेन आग्लु। 12 म्हर, म्हुड, रत्न, मोतीदेन मलमलला क्वानगदे वाला वाला पिडगै छोनना क्वानगदे, रेशमला क्वानगदे, वाला क्वानगदे, जम्मान खाल्ला बास्ना खबा सिड, हात्तीला स्वाग्याम स्होबा जम्मान स्हेगदे, ल्हानान महँगो जम्मान सिड, काँसग्याम स्होबा स्हेगदे, फाइग्याम स्होबा स्हेगदे, ओच्छे सिङ्गमरमरग्याम स्होबा स्हेगदे, 13 सिडकाउली, मसला, बास्ना खबा धूप, मूर्, तार धूप, अडगुरला निडगु, छ्युगु, ब्रा, ग्वा, म्हे, मुड, ग्युगदे, तागदे, रथगदे, नोकरगदेदेन लडाइरी भेबा म्हिगदेदानोन खालैसेन आग्लु। ††

14 थे व्यापारीगदेसे थेदा चुहड् भिसी भिजी, "बेबिलोन, एला सेमसे म्हन्बा जम्मान स्हेगदे एग्याम ब्यन्बा मुला। ओच्छे एला धन सम्पत्तिदेन जम्मान झक्झक्बा स्हेगदे नाश तसी जिन्बा मुला। दोःसी एसे थे जम्मान स्हे खाइमै आयाड्। 15 थे घेन शहररी व्यापार लसी धनी तबा व्यापारीगदे थेदा पिन्बा घेन सजाय म्राड्सी लोड्सी थारेडनोन राप्सी चिला। ओच्छे चुहड् भिबान क्राबा क्रिड्बा लला, †

16 "अम्मै गाते आज्यबा ताम,

मलमलला क्वान, वाला वाला पिडगैदेन वाला क्वान क्वान्बा
ओच्छे म्हरदेन रत्न ओच्छे मोतीगदे क्वान्सी ज्योबा मुबा।

17 तिग्दा भिसम छिन्नडरीन एला जम्मान धन सम्पत्ति नाश तबा मुला।" †

जम्मान पानी जहाजला कप्तानदेन पानी जहाजरी भ्रबा म्हिगदे ओच्छे पानी जहाज चलब लबा म्हिगदेदेन समुन्द्रग्याम व्यापार लबा म्हिगदे थारेडनोन राप्सी चिजी। ††18 ओच्छे थे घेन शहर क्रोसी थोन्बा म्युगु म्राड्सी, "चुहड्बा घेन शहर हड्बा अर्गु खजिबै शहर आरेबा" भिसी क्रिड्जी। 19 थेनीगदेसे ह्राड ह्राडला थोबोरी धुलु युसी चुहड् भिबान क्रिड्जी,

"अम्मै गाते आज्यबा ताम,

थेरी मुबा धन सम्पत्तियाम पानी जहाजला धनीगदे प्युकपो दोबा मुबा।

तर थे शहर छिन्नडरीन क्रोसी नाश तजी। ††

20 स्वर्गीरी मुबागदे, थे नाश तबासे लमा एनीगदे ताङ्गो!

परमेश्वरला म्हिगदे, मुल चैलागदेदेन अगमवक्तागदे,
एनीगदे जम्मान ताङ्गो।

तिग्दा भिसम थेसे एनीगदेदा अन्याय लबासे लमा

परमेश्वरसे थेदा सजाय पिन्बा मुला।" †††

21 जमाहेन्से शक्तिशाली स्वर्गदूत गिकसे हान्दा हड्बान घेन युडबा गिक थीसी चुहड् भिबान थे युडबा समुन्दरी भ्याड्जी,

"थे घेन शहर बेबिलोनदानोन चुहड् लसीन भ्याड्ला,

ओच्छे थेदा दोःसी खाइमै आम्राड्। †††

22 थेरी वीणादेन बाँसुरी ओच्छे बिगुलदेन

व्हाइ गोबागदेला काइ थेःआम्याड्।

थेरी जम्मान खाल्ला बुट्टा स्हेड्बा म्हिगदेएनोन खाइमै आस्याप।

ओच्छे थेरी हान्दा ड्यबाएनोन खाइमै थेःआम्याड्। †

23 थेरी खाइमै नाडसल आम्रा।

ओच्छे थेरी म्हाछारदेन चाडछारला काइएनोन खाइमै थेःआम्याड्।

तिग्दा भिसम एला व्यापारीगदे जम्बुलिडला घेन घेन म्हिगदे मुबा।

ओच्छे एला तन्त्रमन्त्रसे खुल खुलला म्हिगदेदा ठगब लबा मुबा। †

24 थे शहररीन अगमवक्तागदे, परमेश्वरला म्हिगदेदेन

जम्बुलिडरी साइबा जम्मान म्हिगदेला का स्याप्बा मुबा।" †††

स्वर्गीरी परमेश्वरला जयजयकार लबा

19 जमाहेन्से डाइ स्वर्गीरी ल्हानान म्हिगदेसे घेन काइरी चुहड् भिसी क्रिड्बा थेःजी,

"परमेश्वरदा जयजयकार तगै!

थार्बा पिन्बादेन मान ओच्छे शक्ति व्हाडला परमेश्वरलान हिन्ना।

2 तिग्दा भिसम परमेश्वरसे लबा निसाफ सत्यदेन ठीक मुला।

स्हान्दोदेन छ्याम ब्रेल्सी जम्बुलिड नाडलान म्हिगदेदा न्होड्ना लबा थे घेन बेश्यादा परमेश्वरसे निसाफ लबा मुला।

ओच्छे ह्राडला गे लबागदेदा साइबासे लमा परमेश्वरसे थेदा सजाय पिन्जी।" ††

3 थेनीगदेसे दोःसी घेन काइरी चुहड् भिजी,

"परमेश्वरदा जयजयकार तगै!

थे घेन शहर क्रोसी थोन्बा म्युगु सदन तोरपट्टि निला।" †††

4 ओच्छे थे बोगल गिकसे ब्लि गन्बागदेदेन थे गोर ब्लि छोन्बो जन्तुगदेसे ठिरी धन्छ्याबा परमेश्वरदा पया लबान जयजयकार लजी। ओच्छे थेनीगदेसे क्रिड्बान चुहड् भिजी।

"आमेन!, परमेश्वरदा जयजयकार तगै!"

5 ठिग्याम घेन काइरी चुहड् भिबा थेःजी,

"परमेश्वरला गे लबादेन थे म्राड्सी लोड्बागदे जजा घेन जम्मासेन

व्हाडला परमेश्वरला जयजयकार लउ।" ††

6 जमाहेन्से डाइ म्हेला घेन हुलला काइदेन छॉगाग्याम ताइबा क्युडला आवाज ओच्छे घेन मु गुडुड्बा हड्बान आवाजरी चुहड् भिबा थेःजी,

"परमेश्वरदा जयजयकार तगै!

तिग्दा भिसम जम्मान भन्दा घेन परमप्रभु व्हाडला परमेश्वरसे शासन लबा मुला। ††

7 व्हाड ल्हानान ताड्सी परमेश्वरला मानदेन जयजयकार लड्!

तिग्दा भिसम व्हाडदा थार्बा पिन्बा ग्यु बोगोला ब्याह लबा धिन खसी जिन्बा मुला।

ओच्छे थेला चाडछारएनोन ठीक तसी जिन्बा मुला।

8 चाडछारदा मलमलला व्हाल व्हाल्बा सफा क्वान पिन्सी जिन्जी।" †

थे व्हाल व्हाल्बा मलमलला सफा क्वान चा

परमेश्वरला म्हिगदेसे लबा ज्यबा गे हिन्ना।

9 ओच्छे थे स्वर्गदूतसे डादा "एसे चु ताम भिउ, थार्बा पिन्बा ग्यु बोगोला ब्याहला भोजरी निम्तो याड्बा म्हिगदे चा परमेश्वरग्याम मोलम याड्बा

म्हिगदे हिन्ना" भिसी भिजी। थेसे दोःसी डादा "परमेश्वरला सत्य बचनगदे चुनोन हिन्ना" भिसी भिजी। †††

10 जमाहेन्से थेला काइरी पया लबाला लागिरी डा खलुप तजी। तर थेसे डादा चुहड् भिसी भिजी, "एसे डादा पया लबारी आत। डा चा एदेन एला ह्योगदेदेन छ्याम ओच्छे येशूला सत्य बचन ड्यान्बा म्हिगदे जम्मानदेन छ्याम परमेश्वरला गे लबा म्हि जे हिन्ना। थेतबासेलमा परमेश्वरदा जे पया लउ। तिग्दा भिसम अगमवक्तासे पाड्बाएनोन येशूला बाररी पाड्बा सत्य बचन हिन्ना।

तार ताथोरी क्रेःसी निबा

11 डाइ स्वर्ग ठोड्बा म्राड्जी, च्यागो, थेरी तार ता गिक मुबा। थे ताथोरी क्रेःसी निबा म्हेला मिन चा विश्वास लखम्बादेन सत्य मुबा। थेसे लबा निसाफदेन लडाइ ठीक मुला। †††12 थेला मी मेला ल्हाम हड्बान मुबा, ओच्छे थेला थोबोरी ल्हानान मुकुट कूबा मुबा। थेला डोरी मिन गिक भिबा मुबा, थे मिन थेदा बाहेक स्हान्दो खालैदान था आरेबा। †††13 थेसे कारी ब्लुम्बा क्वान क्वान्बा मुबा। थेला मिन "परमेश्वरला बचन" मुबा। 14 स्वर्गला सेनागदे मलमलला तार सफा क्वान क्वान्सी तार तागदेथोरी क्रेःसी थेला

† 18:10 इज २६:१६-१७ †† 18:13 इज २७:१२, १३, २२ † 18:15 इज २७:३१, ३६ †† 18:17 इज २७:२६-३० †† 18:19 इज २७:३०-३४ ††† 18:20 व्यव ३२:४३; यर्मि ५१:४८ ††† 18:21 यर्मि ५१:६३-६४; इज २६:२१ † 18:22 इज २६:१३; यशै २४:८ † 18:23 यर्मि ७:३४; २५:१० †† 18:24 यर्मि ५१:४९

† 18:10 इज २६:१६-१७ †† 18:13 इज २७:१२, १३, २२ † 18:15 इज २७:३१, ३६ †† 18:17 इज २७:२६-३० †† 18:19 इज २७:३०-३४ ††† 18:20 व्यव ३२:४३; यर्मि ५१:४८ ††† 18:21 यर्मि ५१:६३-६४; इज २६:२१ † 18:22 इज २६:१३; यशै २४:८ † 18:23 यर्मि ७:३४; २५:१० †† 18:24 यर्मि ५१:४९

†† 19:2 व्यव ३२:४३; २ राजा ९:७ ††† 19:3 यशै ३४:१० † 19:5 भजन ११५:१३ † 19:6 इज १:२४; भजन ९३:१; ९७:१; ९९:१ ††† 19:9 मत्ती २२:२-३ ††† 19:11 इज १:१; भजन ९६:१३; यशै ११:४ ††† 19:12 दानि १:०६

लिच्छा लिच्छा भ्रजी।¹⁵ थेला सुडग्याम छ्याबा तरवार थोन्जी, ओच्छे थेसे थे तरवार थोसी खुल खुलला म्हिगदेथोरी ढाला। थेसे फाइला कडी थोसी थेनीगदेथोरी शासन लला। ओच्छे कोलरी अडगुर नाड्सी म्हर्बा हड लसी थेसे जम्मान भन्दा घेन परमेश्वरला घेन बोमोसे नाड्सी थेनीगदेदा म्हर्ला।¹⁶ थेसे क्वान्बा क्वानदेन काडस्हुरी “ग्लेगदेला ग्लेदेन प्रभुगदेला प्रभु” भिषी भिबा मुबा।

¹⁷ जमाहेन्से डाइ धिनीरी राप्सी चिबा स्वर्गदूत गिक म्राड्जी। थेसे मुरी प्याड्बान लबा जम्मान चरागदेदा घेन काइरी चुहड् भिषी भिजी, “परमेश्वरसे ठीक लबा घेन भोज चबारी पोप तउ।¹⁸ ग्लेगदेदेन कप्तानगदे ओच्छे शक्तिशाली म्हिगदे, तागदेदेन ताथोरी क्रे:बागदे, ओच्छे नोकर हिन्से आहिन्से, जजा, घेन जम्मालान स्या चबारी खउ।”[†]

¹⁹ जमाहेन्से डाइ थे समुन्द्रग्याम थोन्बा लोड्बा खबा जन्तुदेन जम्बुलिडला ग्लेगदे ह्राड ह्राडला सिपाही थोसी तार ताथोरी क्रे:बादेन थेला सिपाहीगदेदेन छ्याम लडाइ लबाला लागिरी पोप तबा म्राड्जी।²⁰ तर थे समुन्द्रग्याम थोन्बा लोड्बा खबा जन्तुदेन थे जन्तुला डाच्छापट्टि उदेकला गे लबा फट्टा अगमवक्तादा चुड्जी। उदेकला गे लसी थे फट्टा अगमवक्तासे थे जन्तुला छापदेन थेला मूर्तिदा पूजा लबा म्हिगदेदा फसब लबा मुबा। थे न्हीदा छोन्बोन गन्धकला लुड्बा मेला ग्योइरी भ्याड्जी।²¹ ओच्छे थे न्हीला जम्मान सिपाहीगदेदा चा ताथोरी क्रे:बाला सुडग्याम थोन्बा तरवारसे साइजी। ओच्छे चरागदेसे थेनीगदेला स्या जम्मान घेन्ना चजी।

हजार गिक दिड

20 जमाहेन्से डाइ ल्हानान नुष्बा व्हाडला साँचोदेन घेन च्याल्दा गिक यारी थोसी स्वर्गग्याम मार फाष्वान लबा स्वर्गदूत गिकदा म्राड्जी।² थेसे अजिङ्गरदा चुड्सी च्याल्दासे हजार गिक दिडधोनाला लागिरी खीसी थान्जी। थे अजिङ्गर चा दडबोला पुखी म्हड म्हडला ग्ले शैतान हिन्ना।³ थे अजिङ्गरसे दाहेन्से खुल खुलला म्हिगदेदा फसब थालगै भिषी हजार गिक दिडधोनाला लागिरी स्वर्गदूतसे थेदा ल्हानान नुष्बा व्हाडरी भ्याड्सी थे व्हाडला म्रापरी ताल्चा लसी लाहा छाप लजी। ओच्छे हजार गिक दिड छ्योमाहेन्से थेदा ला न्ही सोमला लागिरी पुइतो:ला।

⁴ जमाहेन्से डाइ ठिगदेदेन ठिथोरी धन्छ्याबागदे म्राड्जी। थेनीगदेला निसाफ लबा अधिकार पिन्बा मुबा। ओच्छे डाइ येथूला सत्य तामदेन परमेश्वरला बचन थे:ना लबासे लमा थोबो थासी साइबागदेला आत्मागदे म्राड्जी। थेनीगदेसे थे समुन्द्रग्याम थोन्बा लोड्बा खबा जन्तुदेन थेला मूर्तिदा आतेन्बा मुबा ओच्छे डोदेन यारी थेला छापएनोन लबा आरेबा। थे आत्मागदे दो:सी सोजी ओच्छे हजार गिक दिडधोना ख्रीष्टदेन छ्याम शासन लजी।⁵ चुहड् लसी सिबाग्याम दो:सी सोबा चा चु डाच्छा रेम हिन्ना। अर्गु सिबागदे चा थे हजार गिक दिड आछ्योतेधोना आसीनी।⁶ डाच्छारेम सिबाग्याम सोबागदे चा परमेश्वरग्याम मोलम याड्बागदेदेन ह्राडला लागिरी फेसी थान्बा म्हिगदे हिन्ना। थेनीगदेदा दो:सी कालला शक्तिसे तिगै लआखम। तर थेनीगदे परमेश्वरदेन ख्रीष्टला पूजा लबा म्हि दोला ओच्छे ख्रीष्टदेन छ्याम हजार गिक दिडधोना शासन लला।

सदनना लागिरी शैतान नाश तबा

⁷ हजार गिक दिड छ्योमाहेन्से शैतानदा च्युप्सी थान्बा ग्लाय्याम पुइला।⁸ जमाहेन्से शैतान जम्बुलिड नाडलान गोग ओच्छे मागोग भिबा खुल खुलला म्हिगदेदा फसब लबारी निला। शैतानसे लडाइ लबाला लागिरी थे खुलला म्हिगदेदा ग्ले गिकरी पोप लला। थेसे पोप लबा म्हिगदे समुन्द्रला बालुवा तेनोन तला।⁹ थेला सेनागदेसे जम्बुलिड नाडलान परमेश्वरला म्हिगदेला पालगदेदेन परमेश्वरसे माया लबा शहरदा घेरब लजी। तर स्वर्गग्याम मे ताइसी थेला सेना नाश तजी।¹⁰ खुल खुलला म्हिगदेदा फसब लबा थे शैतानदा चा गन्धकला लुड्बा मेला ग्योइरी भ्याड्जी। थेरी डाच्छान

† 19:15 भजन २:९; यशै ६३:३; योए ३:१३; उन्बा १४:२० †† 19:18 इज ३९:१७-२० † 19:20 उन्बा १३:१-१८ †† 20:2 उत्प ३:१ †† 20:4 दानि ७:९, २२ ††† 20:8 इज ७:२; ३८:२, १, ९

थे लोड्बा खबा जन्तुदेन लुसीला ताम पाड्बा अगमवक्तादा भ्याड्बा मुबा। थेरी थेनीगदेसे धिन म्हुन सदन सजाय नातो:ला।

जम्बुलिडला म्हिगदेला निसाफ

¹¹ जमाहेन्से डाइ घेन तार ठि गिकदेन थे ठिथोरी धन्छ्याबादा म्राड्जी। ठिथोरी धन्छ्याबाला डाच्छाग्याम मुदेन जम्बुलिड यार्जी ओच्छे दो:सी खानडएनोन आम्राड्नी।¹² डाइ घेन जजा जम्मान सिबागदे थे ठिला डाच्छापट्टि राप्सी चिबा म्राड्जी। थेरी किताबगदे टोड्सी थान्बा मुबा, ओच्छे अर्गु किताब गिकएनोन टोड्जी। थे किताबला मिन चा जुकजुकधोनाला जुनी हिन्ना। थे जम्मान किताबगदेरी थेनीगदेसे लबा गेला बारेरी भिबा मुबा, थे गेगदे अन्छारनोन सिबागदेला निसाफ लजी।¹³ समुन्द्रसे ह्राडदेन छ्याम मुबा सिबागदे दो:सी पिन्जी, कालदेन सिबा म्हिगदेला आत्मा चिबा ग्लासेनोन ह्राडदेन छ्याम मुबा सिबागदे दो:सी पिन्जी। ओच्छे थेनीगदे जम्मालान ह्राड ह्राडसे लबा गे अन्छार निसाफ लजी।¹⁴ जमाहेन्से कालदेन सिबा म्हिगदेला आत्मा चिबा ग्लादा मेला ग्योइरी भ्याड्जी। चु मेला ग्योइरी भ्याड्बा चा दो:सी सिबा हिन्ना।¹⁵ जुन म्हीला मिन जुकजुकधोनाला जुनीला किताबरी आस्यापी थेदा मेला ग्योइरी भ्याड्जा।

परमेश्वरसे जम्मान स्हे छार स्होबा

21 जमाहेन्से डाइ छार मुदेन छार जम्बुलिड म्राड्जी। तिग्दा भिसम डाच्छाला मुदेन जम्बुलिड म्हासी निबा मुबा, ओच्छे समुन्द्रएनोन आरेबा मुबा।² ओच्छे डाइ परमेश्वरला शहर, छार यरूशलेम परमेश्वरग्याम स्वर्गहेन्से मार खबान लबा म्राड्जी। थे यरूशलेम म्हाछारला लागिरी ज्योसी थान्बा चाडछार हड्बान मुबा।³ डाइ ठिग्याम चुहड् भिबा घेन काइ गिक थे:जी, “च्यागो, परमेश्वर म्हिगदेदेन छ्याम धन्छ्याबा मुला। परमेश्वर थेनीगदेदेन छ्याम धन्छ्याला ओच्छे थेनीगदे थेला म्हे तला। थेहड् लसीन थे ह्राडनोन थेनीगदेला परमेश्वर दो:सी थेनीगदेदेन छ्याम धन्छ्याला।⁴ थेसे थेनीगदेला जम्मान मीख्ली प्यासी पिन्ना। ओच्छे थेनीगदे दो:सी खाइमै आसि, खालैदान सुर्दा आत, खालैनोन आक्रा, ओच्छे खालैदान तिगै दुखएनोन आत। तिग्दा भिसम डाच्छाला तामगदे चा जम्मान म्हासी जिन्बा मुला।⁵

⁵ ठिरी धन्छ्याबासे डादा “च्यागो, डाइ जम्मान ताम छार स्होला” भिषी सुड्जी। थेसे दो:सीनोन डादा “चु ताम भ्रिउ, तिग्दा भिसम चु तामगदे चा विश्वास लखम्बादेन सत्य मुला” भिषी सुड्जी।

⁶ परमेश्वरसे डादा चुहड् भिषी सुड्जी, “दाहेन्से जम्मान ताम पूरा तसी जिन्जी। अल्फादेन ओमेगा⁷ डानोन हिन्ना, ओच्छे शुरु लबादेन जिन्ना लबाएनोन डानोन हिन्ना। क्युइ फुड्बागदेदा डाइ जुकजुकधोनाला जुनी पिन्बा क्युइला मुलग्याम ओहड्न्नोन थुड्बारी पिन्ना।⁸ जुन जुनसे ढाला थेसे डाय्याम चु जम्मान हक याड्जा। डा थेला परमेश्वर दोला ओच्छे थे डाला झा दोला।⁹ तर लोड्बागदे, विश्वास आलबागदे, नड्बा गे लबागदे, म्हे साइबागदे, स्हान्दोदेन छ्याम ब्रेल्सी भ्रबागदे, टुनामुना लबागदे, मूर्तिदा तेन्बागदेदेन जम्मान लुसीला ताम पाड्बागदे चा गन्धकदेन लुड्बा मेला ग्योइरी नितो:ला। चु मेला ग्योइरी निबा चा दो:सी सिबा हिन्ना।

छार यरूशलेम

⁹ जमाहेन्से थे जम्मान भन्दा लिच्छाला आपत विपतसे प्लिड्बा खोरे निस थोबा गोर निस स्वर्गदूतगदे न्हडला गिक खसी डादा “खउ, डाइ एदा चाडछार उन्ना, थे थार्बा पिन्बा ग्यु बोगोला म्रिड हिन्ना” भिषी भिजी।¹⁰ जमाहेन्से डा परमेश्वरला आत्मासे प्लिड्जी। ओच्छे थे स्वर्गदूतसे डादा नोबा गडरी भोर्सी परमेश्वरग्याम स्वर्गहेन्से मार फाष्वान लबा परमेश्वरला शहर यरूशलेम उन्जी।¹¹ थे शहर परमेश्वरला घेन य्हालदेन शक्तिसे

††† 20:11 दानि ७:९-१० † 20:14 उन्बा १:१८ †† 21:1 यशै ६५:१७; ६६:२२; २ पत्रु ३:१३ ††† 21:2 यशै ५२:१; ६१:१०; उन्बा ३:१२ †† 21:3 इज ३७:२७; लेवी २६:११-१२ ††† 21:4 यशै २५:८; ३५:१०; ६५:१९ †† 21:6 उन्बा १:८ †† 21:6 यशै ५५:१ ††† 21:7 २ शमू ७:१४; भजन ८९:२६-२७ ††† 21:10 इज ४०:२

प्लिड्बा मुबा। ओच्छे थे शहर चा ल्हानान बिल्लौरदेन रत्नगदे ओच्छे स्फटिक ह्दबान झक्झक्बा मुबा। ¹² थे शहरला क्युनोन च्युक न्ही ग्राप थान्सी स्होबा ग्रेन ग्रेन नोबा पर्खाल मुबा। थे ग्रापदडसेन गोर गिक गिक स्वर्गदूत मुबा। थे ग्रापदडसेन इस्राएलला च्युक न्ही वंशला मिन भिबा मुबा। ¹³ स्यारपट्टि ग्राप सोम, इयाडपट्टि ग्राप सोम ल्होपट्टि ग्राप सोम, न्हुपपट्टि ग्राप सोम मुबा। ¹⁴ थे शहरला पर्खालला जगरी ग्ला ग्लारी च्युक न्ही ग्रेन ग्रेन युडबा थान्बा मुबा। थे युडबादडसेन थार्बा पिन्बा ग्यु बोगोला च्युक न्ही मुल चलागदे गिक गिकला मिन भिबा मुबा।

¹⁵ थे शहरदेन शहरला ग्रापगदे ओच्छे पर्खाल दप्बाला लागिरी डादेन छ्याम ताम पाड्बा स्वर्गदूतदेन छ्याम म्हरला दप्बा स्हे गिक मुबा। ¹⁶ थे शहर चारपाटे मुबा। थे शहरला लम्बाइदेन चौडाइ च्योच्यो मुबा। थेसे थे दप्बा स्हेसे शहर दप्पा हजार न्हीसे ग्यार्जा बिलि किलोमिटर मुबा। थे शहरला लम्बाइ, चौडाइदेन नोबा च्योच्यो मुबा। ¹⁷ स्वर्गदूतसे पर्खालएनोन दप्जी। म्हिगदेसे चलब लबा दप्बा स्हे अन्धार थे पर्खाल बोगल सोमसे मिटर डा ब्लाक्बा मुबा। चु दप्बा स्हे स्वर्गदूतलाएनोन हिन्ना। ¹⁸ थे पर्खाल बिल्लौरग्याम स्होबा मुबा। ओच्छे शहर चा ज्यबा म्हरग्याम स्होबा मुबा। थे शहर सफा सिसा ह्दबान य्हाल य्हाल्बा मुबा। ¹⁹ थे पर्खालला जगरी युबा थे ग्रेन ग्रेन युडबारी ल्हानान थरीला महँगो रत्नगदे थान्बा मुबा। पर्खालला जगरी थान्बा थे ग्रेन ग्रेन युडबारी रत्न गिक गिक थान्बा मुबा। जम्मान भन्दा डाच्छा थान्बा युडबारी चा बिल्लौर, जमाहेन्से अर्गु युडबारी नीर, हरित रत्न, पन्ना, ²⁰ थेह्द लसीन आनिक्स, लालमणि, पीतमणि, बेरूज, पुष्पराज, लसुने, नीलमणि, ओच्छे जम्मान भन्दा लिच्छाला युडबारी चा कटेला थान्बा मुबा। ²¹ थे शहरला च्युक न्ही ग्राप चा च्युक न्ही मोतीग्याम स्होबा मुबा। जम्मान ग्रापगदे चा मोती गिक गिकग्याम स्होबा मुबा। थे शहरला ग्याम सफा सिसा ह्दबान ज्यबा म्हरग्याम स्होबा मुबा।

²² डाइ थे शहर न्हडरी मन्दिर गिकनोन आम्राइनी। तिग्दा भिसम थे शहरला मन्दिर चा जम्मान भन्दा ग्रेन परमेश्वरदेन थार्बा पिन्बा ग्यु बोगो ह्दबानो हिन्ना। ²³ थे शहरदा य्हाल तना लबाला लागिरी धिनीदेन लनी आतोः। तिग्दा भिसम परमेश्वरला य्हालदेन शक्तिसेन थे शहरदा य्हाल तना लमुला। थे शहरला नाडसल चा थार्बा पिन्बा ग्यु बोगो ह्दबानो हिन्ना। ²⁴ परमेश्वरला य्हालरीन य्हुल य्हुलला म्हिगदे भ्रला। ओच्छे जम्बुलिड नाडलान ग्लेगदेसे ह्द ह्दाला धन सम्पत्तिदेन मान थे शहररी भला। ²⁵ थे शहरला ग्रापगदे धिनीरी खाइमै आड्डु, तिग्दा भिसम थेरी म्हुन तनोन आत। ²⁶ य्हुल य्हुलला म्हिगदेसे ह्द ह्दालासे याड्बा मानदेन ल्हानान धन सम्पत्ति थे शहररी भला। ²⁷ तर नइबा तामगदे, आज्यबा पेःबा खबा गे लबागदेदेन लुसीला ताम पाड्बागदे तिगै लसीन थे शहररी वाड्आम्याड्। थार्बा पिन्बा ग्यु बोगोला जुकजुकधोनाला जुनीला किताबरी मिन मुबा म्हिगदे जे थे शहररी वाड्म्याड्ला। ²⁸

जुकजुकधोनाला जुनी पिन्बा स्योड

22 जमाहेन्से थे स्वर्गदूतसे डादा स्फटिक [§] ह्दबान झक्झक्बा जुकजुकधोनाला जुनी पिन्बा क्युइला स्योड उन्जी। थे स्योड परमेश्वरदेन थार्बा पिन्बा ग्यु बोगोला ठिग्याम थोन्जी। ^{§2} ओच्छे थे स्योड थे शहरला ग्यामला गुडग्याम तबान निबा मुबा। थे स्योडला कुनी न्हीरीन जुकजुकधोनाला जुनी पिन्बा दोड मुबा। थे दोडरी लाएनोनदडसे थरी थरीला रो रोमुबा। थेरी दिड गिकरी च्युक न्ही थरीला रो रोमुबा। थे दोडला भा चा य्हुल य्हुलला म्हिगदेदा खम्ना लबा मन मुबा। ^{§13} दाहेन्से थे शहररी मुबा खजिबै स्हेदा परमेश्वरसे आकेः। [§]

† 21:12 इज ४८:३०-३५ †† 21:15 इज ४०:३ † २१:१९-२० चु पदरी ल्हानान रत्नगदेला मिन मुला। चु पदरी पाड्बारी म्हाइबा चा अर्गुन अर्गुन छोनना य्हालदेन ल्हानान य्हाल य्हाल्बा ओच्छे झक्झक्बा मुला भिसी पाड्बा हिन्ना। †† 21:23 यशै ६०:१९-२० †† 21:24 यशै ६०:३ ††† 21:26 यशै ६०:११ ††† 21:27 यशै ५२:१; इज ४४:९ § “स्फटिक” भिबा चा सिसा ह्दबान झक्झक्बा सफा स्हे हिन्ना। §† 22:1 इज ४७:१; जक १४:८ §†† 22:2 उत्प २:९; इज ४७:१२ §† चु पदरी “आकेः” भिबा चा सराप आयु भिबा हिन्ना।

परमेश्वरदेन थार्बा पिन्बा ग्यु बोगोला ठि थे शहररीन तला, ओच्छे थेला म्हिगदेसे थेदा तेन्ना। ^{§14} थेनीगदेसे परमेश्वरला स्ह्हाल म्हाइला, ओच्छे थेनीगदेला डोरी थेला मिन भिबा तला। ⁵ थे शहररी दोःसी खाइमै म्हुन आत। थेनीगदेदा नाडसलदेन धिनीला य्हाल आतोः। तिग्दा भिसम परमप्रभु परमेश्वरनोन थेनीगदेला य्हाल दोला। ओच्छे थेनीगदेसे थेरी सदन शासन लला। §†

⁶ स्वर्गदूतसे डादा चुह्द भिसी भिजी, “चु बचन विश्वास लखम्बादेन सत्य मुला। अगमवक्तागदेदा ह्दाला आत्मा पिन्बा परमप्रभु परमेश्वरसे ह्दाला गे लबा म्हिगदेदा योनान तबा तामगदे उन्बाला लागिरी स्वर्गदूत पुड्खबा मुला।”

येशू योनान फेखबान मुला

⁷ येशूसे चुह्द भिसी सुड्जी, “च्यागो, डा योनान खबान मुला! चु किताबरी भिबा अगमवाणीला बचन अन्धार भ्रवागदे परमेश्वरग्याम मोलम याड्बागदे हिन्ना।”

⁸ चु जम्मान ताम थेःबादेन म्हाइबा डा यूहन्ना हिन्ना। डाइ चु जम्मान ताम थेःबादेन म्हाइहन्से डादा चु ताम उन्बा स्वर्गदूतदा प्या लबारी डा कू तजी। ⁹ तर थेसे डादा चुह्द भिसी भिजी, “च्यागो, एसे चुह्द लबारी आत। डा मी एदेन एला ज्योज्यो आले अगमवक्तागदे ओच्छे चु किताबरी भिबा ताम इयान्बागदे ह्दबान परमेश्वरला गे लबा ह्यो जे हिन्ना। परमेश्वरदा जे प्या लसी तेन्ना।”

¹⁰ जमाहेन्से थे स्वर्गदूतसे डादा चुह्द भिसी भिजी, “चु किताबरी भिबा अगमवाणीला बचन आपाड्ना कुटिसी थाचिउ। तिग्दा भिसम चु जम्मान तामगदे तबारी छ्याइबा मुला। ¹¹ नइबा गे लबा म्हिसे नइबान गे लसी चिगै, पेःबा खबा गे लबा म्हिसे पेःबा खबान गे लसी चिगै, ज्यबा गे लबा म्हिसे ज्यबा गे लसीन चिगै, ओच्छे तिगै दोष आरेबा म्हिसे तिगै दोष आरेबा गे लसीन चिगै।” [§]

¹² येशूसे चुह्द भिसी सुड्जी, “च्यागो, डा योनान खबान मुला! डा इनामदेन सजाय भसी खला। जमाहेन्से डाइ जम्मान म्हिगदेदा थेनीगदेसे लबा गे अन्धार इनामदेन सजाय पिन्ना। ^{§§13} अल्फादेन ओमेगा, डाच्छादेन लिच्छा ओच्छे शुरु लबादेन जिन्ना लबा डानोन हिन्ना। ^{§§}

¹⁴ “जुकजुकधोनाला जुनी पिन्बा दोडला रो चबा हक याड्बारीदेन शहरला ग्रापगदेग्याम न्हडरी वाड्म्याड्गै भिसी ह्द ह्दाला क्वान खूबागदे ^{§§§} चा परमेश्वरग्याम मोलम याड्बागदे हिन्ना। ¹⁸¹⁵ तर नगी ह्दबान म्हिगदे, टुनामुना लबागदे, स्ह्हान्दोदेन छ्याम ब्रेल्सी भ्रवागदे, म्हि साड्बागदे, मूर्तिदा तेन्बागदे, लुसीला ताम सेम निबागदेदेन लुसीला ताम अन्धार भ्रवागदे चा शहरला मडग्यार तला।

¹⁶ “डा येशूसे मण्डलीगदेरी मुबा जम्मादान चु तामगदे था तना लबाला लागिरी एनीगदे मुबा ग्लारी डाला दूत पुड्खबा मुला। दाऊद ग्लेला मुल सन्तान डानोन हिन्ना। ओच्छे स्होला झक्झक्बा सारएनोन डानोन हिन्ना।” ^{19 20}

¹⁷ परमेश्वरला आत्मादेन चाड्छारसे “फेखउ” भिसी भिला। जुन म्हिसे थे ताम थेःला थेसेनोन “फेखउ” भिसी भिगै। जुन म्हिदा क्युइ फुइला थे खसी जुकजुकधोनाला जुनी पिन्बा क्युइ ओह्दबानो थुड्गै। ²¹

¹⁸ च्यागो, चु किताबरी भिबा अगमवाणीला बचन थेःबा म्हिगदेदा डाइ पाड्बाला।

चुदे खालै म्हिसे चु किताबरी भिबा तामरी अर्गु ताम काप्जी भिसम चु किताबरी भिबा जम्मान आपत विपतगदे परमेश्वरसे थेदा काप्सी पिन्ना।

¹⁹ ओच्छे खालै म्हिसे चु अगमवाणीला किताबरी भिबा बचनग्याम तिगै

§†† 22:3 जक १४:११ §† 22:5 यशै ६०:१९; दानि ७:१८ §† 22:11 दानि १२:१० §§† 22:12 यशै ४०:१०; ६२:११; भजन २८:४; यर्मि १७:१० §§§ 22:13 उन्बा १:८, १७; २:८; यशै ४४:६ §§§ “ह्द ह्दाला क्वान खूबागदे” भिबा चा येशूदा विश्वास लसी येशूला काग्याम पापला दोष मेटब तबा म्हिगदे हिन्ना। 18 22:14 उत्प २:९; ३:२२ 19 “स्होला झक्झक्बा सारएनोन डानोन हिन्ना” भिबा चा थार्बा पिन्बा ख्रीष्टसे ह्दालान छार थुड् शुरु लला भिबा हिन्ना। 20 22:16 यशै ११:१, १० 21 22:17 यशै ५५:१

ताम तेःजी भिसम चु किताबरी भिबा जुकजुकधोनाला जुनी पिन्बा
दोडदेन परमेश्वरला शहरग्याम थेसे याड्तीःबा हक परमेश्वरसे थेग्याम
ब्यन्ना। †

† 22:19 व्यव ४:२; १२:३२

²⁰ चु जम्मान तामगदे उन्बादेन सुड्बासे चुहड् भिसी सुड्बा मुला, “हिन्ना,
डा योनान खबान मुला।”

आमेन, फेखउ, प्रभु येशू।

²¹ परमेश्वरला जम्मान म्हिगदेदेन छ्याम प्रभु येशूला दयामाया तगै।
आमेन।